


Bro Nkifrarhu Mrokfot



The New Testament in the Alambлак language of Papua New
Guinea

Bro Nkifrarhu Mrokfot
The New Testament in the Alamlak language of Papua New
Guinea
Nupela Testamen long tokples Alamlak long Niugini

copyright © 2003, 2004 Wycliffe Bible Translators, Inc.

Language: Alamlak

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2004-01-01

PDF generated using Haiola and XeLaTeX on 11 Nov 2022 from source files dated 9 Oct 2020
c8dcc3d0-081d-5a1e-a2e7-a7564390e5d0

Contents

FRT	1
Matyu	3
Mak	73
Luk	116
Jon	190
Aposer	243
Rom	306
1 Korin	338
2 Korin	374
Galesia	397
Efesus	409
Filipai	421
Kolosi	430
1 Tesalonaika	438
2 Tesalonaika	446
1 Timoti	451
2 Timoti	461
Taitus	468
Filemon	473
Hibru	476
Jems	507
1 Pita	517
2 Pita	527
1 Jon	533
2 Jon	542
3 Jon	544
Jut	546
Revelesen	549
Read the New Testament	586

Bro Nkifrarhu Mrokfot
The New Testament in the Alamblak language of
Papua New Guinea
Nupela Testamen long tokples Alamblak long
Niugini

Bro Nkifrarhu Mrokfot

The New Testament in the Alamblak language of East Sepik Province,
 Papua New Guinea
 [amp]

Translation: © 2003, 2004 Wycliffe Bible Translators, Inc.

Print Editions 2003, 2004, by Bible League International

Web version
 2012, Wycliffe Inc.
<http://www.Wycliffe.org>

<http://pngscriptures.org>

<http://www.ScriptureEarth.org>

This translation is made available to you under the terms of the Creative Commons license (Attribution-Noncommercial-No Derivative Works).
<http://creativecommons.org/licenses/by-nc-nd/3.0>

Your are free to share — to copy, distribute and transmit the text under the following conditions:

- **Attribution.** You must attribute the work to *Wycliffe Bible Translators* (but not in any way that suggests that they endorse you or your use of the work).
- **Noncommercial.** You may not use this work for commercial purposes.
- **No Derivative Works.** You may not alter, transform, or build upon this work.
- **In addition,** you have permission to port the text to different file formats, as long as you don't change any of the text or punctuation of the Bible.

Notice — For any reuse or distribution, you must make clear to others the license terms of this work.

Tok Orait

Dispela Buk Baibel i kam wantaim tok orait na lo bilong Creative Commons Attribution-Noncommercial-No Derivative Works license. Em i tok olsem **yu ken givim kopi long narepela manmeri.** Yu ken wokim kopi na givim long husat i laikim. Tasol, yu mas tok klia dispela samting i kam long <http://tokplesbaibel.org>. Yu no ken kisim mani na salim dispela. **Yu mas givim nating.** Na tu, **yu no ken senisim Tok.**

Ol piksa i kam wantim ol Baibel na narapela buk i stap long dispela sait i gat tok orait long usim wantaim dispela samting tasol. Sapos yu laik narapela tok orait, yu mas askim husat i papa bilong copyright long dispela ol piksa. Sapos yu laik stretim samting i no orait long dispela tok orait, stretim tok, salim Buk Baibel, o tainim Tok bilong God long nupela tok ples, yu ken **askim mipela.**

Olgeta tok orait na lo long tok ples English i stap long <http://creativecommons.org/licenses/by-nc-nd/3.0/legalcode>.

Sapos yu gat askim long dispela, **plis askim mipela.**

Bukm yorhwa tkitm

Bukt[tab]Kropenyufat[tab]Pes

Matyur

dwandfamo gutnius mrokfot

Barkof kfo nuhas mrokfot

Ndar Matyur wandfamo gutnius mrokfom yorhwa gonborngt. Gutnius mrokfom yorhwa gonborngm, 4-pela gonborngm gutnius mrokfom korhm. Ndar gonborngm Jisasr ndar bbinysoft nia tohmo yuharoh kfo tndh mrokfom korhm. Ndar Matyur wandfamo gutnius gonborngtn nyingako myorhekwo. Ndar barkof gonborngt yorhwa mrokfom Jisasr Mariat hiyaumo yuhat yo Jisasr nohmo yuhati ee ror tfit sinyahato hefenr muhmo yuhathu kfo nuhas mrokfom korhmt ndar Matyu gonborngt.

Bingot Bro Nkifrarhu profetm kfomo mrokfom nkifram yakitohmoa gonborngtn hta bugamomm. Kfo hna memoum, “Kto Isrerroh Bro Nkifrapno yiyuk yihotat wom yimar nieruharn tfit yak htakhirahrm.” Nd rom kfo htamo mrokfot nhai furarmomt. Yafothett rhumott. Nd rom kfo memo yimar nierahr, to Jisas Kraistr niamor. Nd Jisas Kraistr niahato ror hingrnamo hingrnfem ndar Matyu gonborngtn hti hik bugarahnm. Nd Bro Nkifrarhu profetm kfo pthamo mrokfom, yafothet bugam rhumom. Wahtitwanm nd mrokfom korhm Matyu 1.22-23, yo 2.4-6 yo 2.14-15 yo 2.23 yo 4.13-16 yo 8.16-17 yo 12.15-21 yo 13.34-35 yo 21.2-5 yo 21.16 yo 26.24 yo 26.31 yo 26.54 yo 27.6-10.

Yo wom mrokfot Matyur dkfomot, Bro Nkifrarhu kingdomkfot kfo pthamor. Bro Nkifrar kangr, “Ndar bbinysof thof bugam atohukatohka-hann tuhan yindar bugam nanrpayanhu dukefpar hikrahm.” Ndnnett Jisas Kraistr fak marnyamort yimaroh Bro Nkifrapno yiyuk yihotat.

Matyu gonborngt yorhwa mrokfom, Jisasr pthamoam, nmbuha nmbuha rhu hanitm. Barkof mrokfo nmbuhat htirahnt sapta 5 pthaknimortn sapta 7 mptha tmbhomort (5-7). Nd saptaroh mrokfom Jisasr yura wom kminysoft tohhato dkfo pthamo mrokfomn korhm. Bok met yindarim yi wany yakitohmotm yirmoh mrokfom hemorm. Yo wom mrokfo nmbuhat sapta 10 korht. Nd saptakfote, disaiperm yak hta hanyhato rom hingrnayuk hingrnfem, rom yakyuk krhopam, o rom finji finji tohkfot, ndm kfo ptha nuhasmorm.

Yo wom mrokfo nmbuhat sapta 13 korht. Nd saptakfot kfo nhombra mrokforpam korhmt. Bro Nkifrarhu kingdomkfot Jisasr kfo pthamohat, mimn, wit yukhamn, yispamn, kipr bebth, nd ndmn kfo nhombramor. Yo wom mrokfo nmbuhat sapta 18 korht. Nd saptakfot Jisasrhu tu disaiperm mif rhunefthu mrokfom tu Jisasr kfomorm. Wuroh mrokfo nmbuhat sapta 24-25 korhm. Nd saptafhu mrokfom wuroh yihar rhuruha nefm Jisasr kfo pthamor.

Ndar buk Matyukfot wandfayuk yimarhu yufat nhai htarmomt. Be kfo kangmt “Matyur Wandfayuk Gutnius Mrokfom”. Ka nd sapta 9.9-13 kfo pthamo takis yakmoa yima Matyur dukahato, ror kfo memom, rorn wandfamort. Ndt be wom yimaroh dukefet. Tu nd Matyu gonborngt wandfa mifyuk yimarhu yufat nhai frhikakrmomt.

Jisasr niamo yuhat

(Sapta 1.1–4.16)

*Jisas Krairhu frikef yuhathu nkifraroh yufam
(Luk 3.23-38)*

¹ Ndarn Jisas Krairhu nkifraroh yufayem. Jisasr Defit frikef yuhath niamor, tfit Defitrn Abrahamrhu frika yuhath niamor.*

² Abrahamrn nasakmorr Aisakr. Tfit Aisakr nasakmorr Jekofr. Jekofr nasakmorr Judari rorhu wom nmemrn. ³ Judar nasakmorr Peres Serarof. Rofhu mmemt Tamat. Tfit Peresrn nasakmorr Hesronr. Yo Hesronrn nasakmorr Ramr. ⁴ Yo Ramrn nasakmorr Aminadafr. Aminadafrn nasakmorr Nasonr. Yo Nasonrn nasakmorr Salmonr. ⁵ Salmonr nasakmorr Boasr. Rorhu mmemt Rahaft. Boasrn nasakmorr Obetr. Rorhu mmemt Rutt. Tfit Obetrn nasakmorr Jesir. ⁶ Jesirrn nasakmorr King Defit.

Yo Defitrn nasakmorr Solomonr. Solomonrhu mmemtn Uriarhu mett rhumot. ⁷ Solomonr nasakmorr Rehoboamr. Rehoboamrn nasakmorr Abiyar. Yo Abiyarn nasakmorr Asar. ⁸ Asarn nasakmorr Jehosafatr. Tfit Jehosafatr nasakmorr Jehoramr. Jehoramrn nasakmorr Usiar. ⁹ Usiar nasakmorr Jotamr. Jotamr nasakmorr Ahasr. Yo Ahasrn nasakmorr Hesekiar. ¹⁰ Hesekiar nasakmorr Manaser. Yo Manaser nasakmorr Emonr. Emonrn nasakmorr Josaiar. ¹¹ Josaiar nasakmorr Jehoiakinri rorhu nmemrn. Nd yihar Isrerm Babilonko kalabus yi tohmom.

¹² Isrerm Babilonko kalabus bi htanyetmn Jehoiakinr nasakmorr Sealtier. Yo Sealtierrn nasakmorr Serubaberr. ¹³ Serubaberrn nasakmorr Abiutr. Abiutrnr nasakmorr Eliakimr. Eliakimrn nasakmorr Asorr. ¹⁴ Asorrnr nasakmorr Sadokr. Yo Sadokrn nasakmorr Akimr. Akimrn nasakmorr Eliutr. ¹⁵ Eliutrnr nasakmorr Eleasarr. Eleasarrnr nasakmorr Matanr. Matanrn nasakmorr Jekofr. ¹⁶ Jekofrnr nasakmorr Josef.

Josefr tohhato Mariat fakmor. Mariat rotn hiyaumotr Jisasr. Jisasr tor nd yimam yutiwa Kraiser. Tor nd yimar Bro Nkifrar bi kfo htamor turhu met yindariroh minrfa htiryakuykr.

¹⁷ Nd na kfo hawihne nkifraroh yufam Abrahamrpnno ritohakmorn bi 14-pela nkifram tohmom Defitrpno mthomna tmbhomohat. Tfit Defitrpno thomnakni Babilonko kalabus yinyeftpno mthomna tmbhomohat, tfit wom 14-pela nkifram tohmom. Tfit ndha thomnakni nd hbhakyuk Krairpno mthomna tmbhomohat wom 14-pela nkifram tohmom.

*Jisasr nurmo yuhathu kfo nuhas mrokfot
(Luk 2.1-7)*

¹⁸ Jisarrhu niayuk yuhathu kfo nuhas mrokfot inji korht. Rorhu mmem Mariat, bi kfo nanf hanymomt Josefrpno. Be yuhre nakfo nanf hanyetfn tfit htimomt Mariat yon fanett rhumot. Nd yon fant Bro Nkifrarhu Yafothat kfomott Mariat yon fanett rhumot. ¹⁹ Mariathu kfo nanf yima Josefr dborioh yimarn, nd Mariat yon fanett rhumohat ror nhai marimor, “Rikfo akforuhant.” Nhai. Rorhu dukeft duka memor, “Rikfo akfo yiruhant yak yimtnaruhant. Be nann nhowi fnahhato ftrtrohruhant.” ²⁰ Josefrhu yima yuhur inji rhu hanyetrn Bro Nkifrarhu mounmotr twenano niahato kfo memor, “Josef, Defitru tangishofe, mirahn Mariathu yakneft wom bok dukefm ayaka. Wawanyrn, nd Mariathu yon fant Bro Nkifrarhu Yafothat kfomott yon fanett korht. ²¹ Nd rot hiyauruha yonrhu yufat wayutatwanr Jisasr. Rorn nrfa rafakrahrn tuhan yindarirn Bro Nkifrar finji nanefn. Ndnnettnd nd Jisas yufat wahmbritwanr.”

* **1:1:** Bingot Bro Nkifrar wom bro mrokfot Abrahamrpnno fak dbkafmor. Tfit kto wom bro mrokfot fak dbkafmor Defitrpno.

²² Nd nefm namohat bi Bror profetmpno kfo htamo mrokfo yuhatn inji rhu hikmom. Profetr inji kfo memor,

²³ “Wom mett tafi ram duhatt yon fanett rhuruhatn wom yon yindarir hiyaurahtrn yufat yutarahmr Emanuerr.” *Ais 7.14*
Nd yufathu yimbu yuhat inji, “Bro Nkifrar nompno tohwor.”

²⁴ Be Josefr sinyamohat nd Brorhu mounmotr kfoyuk mrokfo yuhatn yak hikhato Mariat fakmiyakmort. ²⁵ To nhai rpat rpa rika bukt hwe inji narmof. Be inji nndo tohhany tohhany Mariat hiyaumotr yon yindarir. Yonr nurnimotr Josefr yufat futamor Jisasr.

2

Yima tangiroh gunym hti hiket yimam niamo yuhat

¹ Mariat Jisasr hiyaumohat Judia distrikkorhof taun Betlehemtn hiyaumotr, nd yihar Herotr king tohmor. Jisasr bi nurniyetrn gunym hti hik bohikmoa yimam* marr yuwa muhwako toh tanyhato Jerusalemr mfnahhato ² mttiwon hambro memom, “Nd nurmo nfri yonr, Judaroh kingr, fitha inji yorhwar? Nom marr yuwa muhwako tohrohat nd rorhu gunyr hti tanyhato nienom, famunom, ‘Htiruhanomrn bangu miyuknahato kfo yindhorrahnor.’” ³ King Herotri Jerusalemthu met yindari bugam nd mrokfot wanyomohat rroh yima yuhum nhai rhu marnyarmomm. Be mrokfo kfo duham rhumom. ⁴ Be Herotr naku nhafohmorm prisroh bro yimami boririfhuthu tisan. Nia rifiny bugamotm ttiwon memorm, “Nd yimare, Bro Nkifrar kfo hta memo, rorn yiruharn nd turhu met yindarim minrfa htiyakrahm, tone fitoh kmitn nia minurruhar?” ⁵ Tfit rom kfo memorm, “Judia korhof taun Betlehemtn. Profetr wandfamo mrokfot inji kfomot:

⁶ ‘Judako yorhwa kmi Betleheme,

ni nhai be Judako yorhwa yufet yufet kmiroh mongpako rhutakahn. Nhai mif.

Ni yufet kniye. Ninhu yonrn nanhu ttha kmi Isrerm tohuka-tohrahmr.’” *Mai*

5.2

⁷ Be Herotr nd mrokfot wanyhato gunym hti hik bohiket yimam nhofijo kfkalmorm ttiwon hik bohikhato memorm, “Nikone fitoh yiharn nd gunyr mfnahmor?” ⁸ Rom yihato kfo hik bohik nuhas marnyamotmr be kfo memorm, “Betlehemko waikahkomn frhik hanykahkomn bi mhtitawokomr, wania wakfo nuhaskahtkma na yihato bangu myuknahato kfo yindhorruhanr.”

⁹ Be rom nd kingr kfoyuk mrokfot wany sanyhato yimom. Yihato buha yihotohatn nd rom barkof marr yuwa muhwako htimo gunyr htiyaknimomr. Be nd gunyr tohakmotr rom be nd gunyr fau hik hanymom. Yi yihato tu nd yonr rhumo kunyshu mingiahuspno mhir nniotamor. ¹⁰ Rom nd gunyr htihato yima yuhum masat masat yindhormomm.

* **2:1:** Bingot gunym hti hikmoa yimam tohmom. Nd gunym hti hikmoa yimam htimoum, wom bro gunyr dbha ksfut mfnahr, kfo memom, nd neft rhurahr. Wom gunyr hti tawomr fitohko mfnahr, kfo memom, nd neft rhurahr. O wom gunyjmrr hti tawomr, yak hofhahato wom tkitt hirwor, kfo memom, nd neft rhurahr. Nd gunym hti hikmoa yimam inji inji gunym hti hikhato rom bi dukefmpno rhumom.

¹¹ Be rom kunys rim fnahnimohat rim htimomf Maria nmehf rpat rhu hasetfn. Nd yonr rim htimomrn bangu yuknahato kfo yindhormomr. Kfo yindhornihato nd rom hanyomo gorm yo hta yifetyuk sanda mkum yo dborioh mtha yarfonet mrpam hemomr. ¹² Be tfit yifungnano hweneftpno twenano Bro Nkifrar kfo memorm, “Mirahko Herotrhu kmifa yuhat tfit anjunom. Wom yuhat wahta hhriftwako.” Be rom yimohat manoh yuhat yimomn turoh kmiko yimom.

Josef riphar Ijifko yimo yuhat

¹³ Nd marr yuwa muhkorhof yimam bi yiyetmn tfit Brorhu mounmotr niamorn Josefr twenano kfo ptha hany memorr, “Yo ni met nmehf wayaknikahfn Ijifko wakrmenyitwako. Niko Ijift yi toh thombat nanhu tngtn watoh garitwa. Na bi kfiwa ee tfit wanietwako. Herotr kangr, ‘Yihato yonr was hehur thuruhahr.’” ¹⁴ Be Josefr wasinyamorn yon tuhan nmehf yaknihato yifungnano fakrmenimom Ijifkorn. ¹⁵ Josefrom Ijift tohetmn Herotrhu noh mrokfot wanyakmomt. Nd neft rhu hikmot profetmpno Bror pthamo yuhatn. Kfo memorr,
 “Nanhu yonr Ijift tohetrn tfit kfafrhotanr Ijift htanyhato nierahr.” *Hos 11.1*

Herotr kfomotr bok yon yindarim tadbordhamo yuhat

¹⁶ Herotr garitihato memorr, “Nane ndu yimame yuwi kfo nneh tany-moma.” Be ndnatn rorhu yima yuhur namburhato wom yimam kfo tkurafmotrm yimom taun Betlehemtn. Yihato tauntpno rhu hanyuk kmim yi habrihato tafi hus gunyjim duhat yon yindariyenm tadbordha bugamomm. Herotr nd gunym hti hiket yimam ttiwon memohat, “Nikone fitoh yiharn nd gunyr mfnahmor,” to ror be yuwi ttiwon rhtimorm. Memorr, “Awany hik marnyakahann bt nd yihar nur hanyuk yon yindariyenm tadbordharuhanm.” ¹⁷ Nd neft namohat bi Bro Nkifrar profet Jeremaiarhu tngtn kfo htamo yuhatn be inji rhu hik twanhomot. Memorr,

¹⁸ “Bro nur kimrm korhmm Ramakor.

Resert tuthu yonm noh wita nmbuhatpno nurwot.

Rot nhai wofnkaht womm yihato rothu yima yuhur yak marnya bomarnyaneft.” *Jer 31.15*

Josef riphar Ijift htanyomo yuhat

¹⁹ Herotr nohmotr tfit Brorhu mounmotr Ijifko yimorn twenano Josefr kfo hany memorr, ²⁰ “Wasinyakahann yon tuhan nmehf yaknihato tfit wanjuko kantri Isrerkorn. Nda yonr waskfot kfomo yimam bi nohmom.”

²¹ Be Josefr sinyahato yon tuhan nmehf yaknihato tfit yimom kantri Isrerkorn.

²² To tfit wom mrokfot wanymor. Arkelausrn yifem Herotrhu tkitthu yakhato Judiarioh king toh mrokfot, ndt wanyhato duka yanho hanyomr ndkor yinyeft. To nhai, Bro Nkifrar twenano yimorn kfomotrr Josefr distrik Galilikor yimom. ²³ Yimomn wom taunt kutewumt Nasaret, ndha mtomom. Nd neft namohat to bi profetm pthamo mrokfo yuhatn inji rhu hikmot. Memorr, “Yutarahmr Nasaret thofenr.”

3

*Jon Baftaisr kfo nuhasmo mrokfot
 (Mak 1.2-8; Luk 3.1-18; Jon 1.19-28)*

¹ Nd yiham Jon Baftaisr Judiathu nungur tik furat toh habrihato met yindarim kfo memourm, ² “Hefenrhu kingdomkfofot bi brbohwof. Ndnnett tamoh tamoh nefenm mong troh bugakfot.” ³ Nd yima Jonr niahato Bro Nkifrarhu mrokfothu kfo pthaneft to bi Aisaiarn bi kfongotmort rorhu nia mrokfot. Aisaiar kfo memour,

“Wom yimar nungur tik furatn tohato kfo mirahrko,

‘Bro Nungothethru niayuk yuhat wayak marnyak hanyhekomr.’ ” *Ais*
40.3

⁴ Nd yihart Jonr kamer tmb hingrnayet hmbreshat hmbremour yo yemro thaye nyuh dbkafmour yo rit papkumi winepam, ndm yehato tohmour. ⁵⁻⁶ Jerusalem thofm yo Judiakorhofm yo brbo tek Jodent toh habrimoam, nd nd yimam Jonrpnio yihato nd rroh fasoh fasoh nefm kfo nriyafnimoamm tek Jodentn baftaisimmourm.

⁷ Bok Farisimi Sadyusim niamoum baftaisneft Jonrpnio. Jonr inji htihato kfo memourm, “Arom nandomrhu yon kunyso, Bro Nkifrar yimam yak tutfa thombat, finji yak hhrifniruhako?” ⁸ Nikmoh nefm, tohefm amfrfnah marnyakahtm riruh aruhyukm htiruhamn duka mirahm, ndm bi mong trohmomm fasoh fasoh nefm. Bi mar nukat tohwom. ⁹ To mirahko, ‘Ka nom Abrahamrhu yon kunysn ka yak trohnirahrnom.’ Nhah. Ndt rot niko mirahko bro yima yuhum ahtanomt. Wawanyko. Na kfiwanko, Bro Nkifrar akfor, nda tahim yak krekutrfotrm, Abrahamrhu yonm rhurfom. ¹⁰ Hudarim bi mispimn bi frhamsisetm korhm. Fitoh mim nhai hifa yukha hir marnyakahm, nd hudariye yohakhany yohakhany, kahrpatn dbuhaf hanyrahm.*

¹¹ Na bupaye baftaisimwohat niko hatohyuk fasoh fasoh nefm bi mfafhonimokomm, ndnetann baftaisimwanko. Nanhu mongko nia hnawa yimarn, tu bro bbukeft hatohwor. Na nhai ror kanjo bbukeft hatohkaha. Na nhai rorhu senderm yakitohak hekfot.† Rorn tu Bro Nkifrarhu Yafothati kahtpno baftaisimrahrko. ¹² Ror wit yukharoh tawokakhato wutuyakyuk safort kakitohwor. Wutuyakhato yeyukrpm tuha misuhruham, yak rmonruharm wit kunysn htarahrm. Nd krtikt ndmo misuhyukt yak rmonruharn tu tiha yiha nanyar hatohwa kahtn kandhirahr.”‡

Jonr Jisasr baftaisimmo yuhat
(Mak 1.9-11; Luk 3.21-22)

¹³ Be tor nd yiharn Jisasr Galilit htanyhato tek Jodenkor yimor. Memor, “Jon Baftaisrpnio aikahann rorhu tire baftaisafrahra.” ¹⁴ Be wom Jonr inji htiyakhato memor, “Akfo rafoyanr.” Ndnnetrn kfo memorr, “Ni tamohmpno nanpno nie? Na ninnpno yirfota ninn baftaisafrfona.” ¹⁵ Tfit Jisasr kfo wok memorr, “Inji akfo wokwohna. Na nd kfiwa mrokfo yuhatn wayak hikn. Inji narahno be nd Bro Nkifrar duka htayuk dukef yuhatn mikmbrerahnno.” Be ndnatn Jonr fak hikmor Jisasr kfoyuk mrokfotn.

¹⁶ Jisasr baftaisneftpno wuyak muhakmorn tfit mfrsohneftpno yura mountko htimortko rim rhu mrhumot. Yiro moun rifhu yuhatn wuhtiyakmort Bro Nkifrarhu Yafothat ganyom mmkrs kanjo yak nhombranehato

* **3:10:** Nd kfo nhombra mrokfot Bro Nkifrar nda bbinysofthu fasoh yimam yak thuruha nmbuhathu kfo nhombra kfoyet. † **3:11:** Wom yimar hatohyuk senderroh ki jbkafyuk mtinf yak nyusak thumoahat, tu yufapa duha yima furapam kanjo womr hatohyuk senderm kak thumoumm.

‡ **3:12:** Nd kfo nhombra mrokfot hifa yimami fasoh yimaroh kfo nhombra mrokfoyet.

fawihnamot. Be nd ganyom mmkrs yawihnehato be yimarn mifakmort.
 17 Tfit yura mountko wom tngt wanymort. “Asor tu nanhu marbit yorhwa yonr yo na tu hifa hti yindhorwa yonr.”

4

Satanr Jisasr kfo nhebehmo yuhat (Mak 1.12-13; Luk 4.1-13)

1 Be Jisasr ndhart htanymort. Bi Bro Nkifrarhu Yafothat thu nhombrayetrn, to be nd Yafothatn yak hatoh hanymottr; yimor nungur tik furatn. Bro Nkifrar duka memor, “Jisasr nd tkitt tohhato tndhr yihato rorhu yima yuhur tadbordhawonrahrr.” 2 40 yiham toh furamor. Nhai nuwa yarmor. Tu wuroh yiharn bi yatinoth namborhohettrn, 3 nd yima yuhum tadbordhiwa tndhr mfnahhato kfo memorr, “Ni Bro Nkifrarhu yonn rhu thombat, ndar tahim wakfokahtnm, bretpam kekutrahm.” 4 Tfit Jisasr kfo wok memorr, “Bro Nkifrarhu gonborngt kfo kangt, ‘Nhai wom yimar bretparpat yehato tohwonkahr. Nhai. Bro Nkifrar kfo yok mrokfo bugam yehato tohwr.’ ”

Lo 8.3

5 Inji nna pthanihato tfit nd tndhr yaknimorr; hanymorr Jerusalemko yorhwa temperrhu mingiahurhu bikatitn. Yura mhatohmorn, kfo memorr, 6 “Ni Bro Nkifrarhu yonn rhu thombat, watuhatoknikahnn, bbinysoft wamitohwonn. Bro gonborngt kfo kangt, ‘Bro Nkifrarhu mounmotm kforuhatrm, wuyakitohak hanyrahmn. Roh tirmn mirhuniruhann, nhai tahimpno mitawokruhatnm ninhu wuram.’ ”

Sng 91.11-12

7 Jisasr tfit kfo wok memorr, “Bro gonborngt kfo kangt, ‘Mirahn Bror ninhu Bro Nkifrar frnhombrakahann afo htiruha finji hingrnaruar.’ ”

Lo 6.16

8 Inji kfomotrr, tfit yaknimorr hamuhmorr yura kminysofmm. Yura mhatohhato fak nuhasmorr ndar bbinysoftu bro yufa nanyjaret kmi kmim. 9 Kfo memorr, “Kanga akfoyan, nanhu yufat kfo nakuhato kfo tatorahn, be ninn nda bbinysof bugat hiruha.” 10 Jisasr sinyahato kfo wok memorr, “Wuri wai! Bro gonborngt kfo kangt, ‘Bro Nkifrarparhu yufat kfo nakuhato kfo bruttnakfot. Rorpar kfo bruttnahato hikkfot.’ ”

Lo 6.13

11 Be nd tndhr htanymorr Jisasr. Tndhr htanymohat Jisasr bi yati noh namborhoh bugamor. Tfit mounmotm yihato romn toh dbu hmbreyaknimotmr bnteft tfit fakmor.

Jisasr Galiliko rihingrnakmo yuhat (Mak 1.14-15; Luk 4.14-15)

12 Jonrhu kalabus hta mrokfot Jisasr wanyhato be tfit Galiliko yimor.
 13 Taun Nasaret htanyhato taun Kaperneamtn yi mtohmor. Kaperneamt korht Galili bari thmbtn, Sebulun Naftaliroh frikef yuhafhu bbinysoftn.
 14 Nd neft Jisasr namohat, bi Bro Nkifrar profet Aisaiarhu tngt kfo htamo yuhatn fak hikmort. 15 Aisaiar kfo memor, “Met yindarim Sebulunrhu tkitm tohyukm yo Naftalirhu tkitm tohyukm, marombko yita yihota yuhat yorhwa tkitm yo tek Joden mkuko yorhwa tkitm,

ndm Galili distrikkorhofem.

Nd distrikt yima tangirohet.

¹⁶ Nd met yindarim, be tu bro kspt yiro tohwam,
be htirahmt bro nukeft.

Nd met yindarim yifungnt rhu hasoyukm nukeft yakrahtm.” *Ais 9.1-2*

Bro Nkifrarhu kingdomkfof Jisahr kfo ptha nuhasmo yuhati tuhan yindariroh dbohnefm yak thumo yuhat

(Sapta 4.17–9.34)

Jisahr yakmo barkof husfihus hingrnanho yimam

(Mak 1.16-20; Luk 5.1-11)

¹⁷ Nd yiharn Jisahr turhu mrokfot rikfo pthakmort. Kfo memour,
“Hefenrhu kingdomkfof bi brbohwt. Ndnnett tamoh tamoh nefenm mong
troh bugakfot.”

¹⁸ Jisahr Galili bari thmbt yau hanyhato Saimon Andru najohf rugit yak
yif hasetfn htimorf. Saimonr kto Pita yufat futamomr. Rof nd hingrneft
hingrnahato maru kakmouf. ¹⁹ Jisahr rof htihato kfo memorf, “Nann wania
wahikfn. Nann wahikkahtfn yimaroh yakneft yak nuhasruhanfn.” ²⁰ Be rof
inji wanyhato nd rugi wuskar myak htanياهو mhikakni twanhomofr.

²¹ Saimon Andru najohf yaknihato yimom. Yau hanyhato tfit buha
Sebedirhu yon Jems Jon najohf mhtimorf. Rom tum nitohfit turoh mmbtrt
tohhato rugim fak nahu dbofta hasomom. Nd Sebedirhu yonf mhtihato kfo
naku kangrf, “Wania wahikfna.” ²² Be nd yon najohf inji wany mohat be
mhikakni twanhomofr. Yifem Sebedir, ror htanyomofr mmbtrtn.

Jisahr bok yimam yak marnyamo yuhat

(Luk 6.17-19)

²³ Jisahr distrikt Galilit frhtfas bugamort. Turoh rhu rifinyuk rmonm
yihato met yindarim mrokfom hemourm. Hefenrhu kingdomkfoftho
mrokfomn kfo nuhas bonuhasmourm. Yo met yindarim hatohyuk wonk
wonk dbohnefm fak thu bugamorm. ²⁴ Rorhu ndkorhof yi nmbuhat Siria
profinshu met yindarim wany hanyhato hne hna bugamomm womhtet
womhtet dbohnefm pno kkor hasetm yo kmi yarh fknayetm yo yimam
noh mumeft yakhato tir wuram mengongaknihato bruktpno bruktpno
tohakniyetm yo tir noh wura nohetm, ndhtet ndhtet dbohnetm hne hna
bugamotmm Jisahr fak marnya hanymorm. ²⁵ Nhai be kuken yima rifhur
Jisahr hikrmomr. Kmim sinya buga hanymom. Galilikorhofm, distrik
Dekapoliskorhofm, Jerusalem, Judia yo tek Joden mkuko tohyukm sinya
bugahato hik hanymomr.

5

Jisahr yura kminysofkor mtohhato mrokfom hemo yuhat

¹ Jisahr yonmari yima rifhur htihakhato yura kminysofko muhмор. Ndha
mrhu hasetrn turhu disaiperm mrifiny hmbremomr.

Yimaroh yindhor nmbuham

(Luk 6.20-23)

² Jisahr turhu disaiperm yak nhafohmormn kfo memorm, ³ “Fitoh yimam
duka kangm, ‘Nom ndhtet ufaso ruhet yimapanom, Bro Nkifrar hti duka

twanhorahrnom,' ndhtet duket yimam ayindhortwam. Bro Nkifrarhu kingdomkfot tohrahm.

⁴ Fitoh yimaroh yima yuhum nur dungunangu hasiwum, ayindhortwam. Bro Nkifrar yak marnyarahrm rroh yima yuhum.

⁵ Fitoh yimaroh rhunest dborioh yima yuhumpno rhuhatu ptha marnya bomarnyewum, ayindhortwam. Tkit tkitm romn Bro Nkifrar hirahr.

⁶ Fitoh yimam, be nd dborioh nefroh hikneft rroh dukefm korhm, ayindhortwam. Tor Bro Nkifrar, rorn yak hta bohtarahr.

⁷ Fitoh yimam wom yimam hti yuhuwafwomm, ayindhortwam. Tawo Bro Nkifrar hti yuhuwafrahm.

⁸ Fitoh yimam, rroh yima yuhum wutham ruhetm, ayindhortwam. Bro Nkifrar htirahr.

⁹ Wom yimam nnayurwatm o tamoh nefm niwatm, niko womko hifa yima yuhum hanyhato nd rroh nefm kfo marnya bomarnyahato tamoh tamoh nefm kak nohahukkomm, niko ndhtet yimako yindhorkfot. Bro Nkifrarhu yonko rhurahko.

¹⁰ Fitoh yimam, toh marnyahato dborioh nefm hikwatm, wom yimam be krhopam he furewumm, nd yimam ayindhortwam. Bro Nkifrarhu kingdomkfot tohrahm.

¹¹ Na hikwatko, yimam htihato kfo yukioh boyukiohhato krhopam kahukwomko, yindhorkfot. ¹² Nikmoh yufathu wuskam tamoh tamohm bi hefenr rhu garitmko. Nd nefm niko yekwam, bi nikmoh nyingako toh hnamo profetm to inji nahnamoumm."

*Niko youpayeko yo nukefthu yak nukayukeko
(Mak 9.50; Luk 14.34-35)*

¹³ Jisars tfit wompam kfo memor, "Nikom nda bbinysofthu youpayeko. To nd you gb ye juha youpam finji naruhamn tfit you gb yeruham? Ndh tet youpam bi be, bi fasohem. Be inji bbinysoft truf thuhato yimam yihom yahotni myahotnifeftpno bbpa furam rhunikfot.

¹⁴ Niko bbinysofthu nukefthu hayukeko. To wahtiko. Wom taunt ndu yura kmi bikatit urhuyukt nhai yimam hti hambrokfot. ¹⁵ To womt wawanyko. Nhai wom yimam lamt hta funakhato tfit rikar o bro baket yakhatu lamthu funest hta tasifkahmt. Nhai. Lamt hta funak thombat yura hegirwatmt nd kunys rhuyuk yimam nukest kekwo tm. ¹⁶ Ndnatn inji nd niko yakitohyuk kshr yak nuka marnyakfot. Yimam nd niko nayuk nefm htiruhamn Bro Yifemrko kfo yindhorrahr."

Bro Nkifrarhu thfa mntwathu boririfhut

¹⁷ Tfit Jisars kfo memorm, "Niko na mirahko ka Bro Nkifrarhu boririfhuti profetm ptha htayuk mrokforoh yak thunestn niamoya. Nhai. Nanpno nd rom bi pthayuk mrokfefm mfrfnahne hneruhatm htirahkomm. ¹⁸ Na kfo mifwanko, mirahko nd boririfhuthu hik yuharoh wom kfo nuhas mrokfefenm o thfa mntwathu kfo tebos o kfo kars nmbuham ka bi riyak htafrahm. Nhai. Afo nd boririfhut kfuyuk mrokfom afo mfrfnah bugarahm. Bi mfrfnah buganime, ee mounti bbinysoft mibatiniruhatf, boririfhut riyak htafraht. ¹⁹ Ndnatn nd boririfhut yorhwa tefi tefi kfo nuhas mrokfom, kfo tebos mrokfom, kfo kars mrokfom fitoh yimar riyak htafhato wommpno mrhuhato kfo famurm, 'Ndhtet tefi tefi yirmoh nmbuhenm hik bugak duha,' yimar inji nayuk, hefenrhu kingdomkfot nia thombat, rorhu yufat

nhai mfro mfrfnahruhatt. To fitoh yimar nd boririfhuthu mrokfom hikhato wommpno kfo nuhas bonuhasworm, ndhtet yimar hefenrhu kingdomkfof nia thombat, rorhu yufat mfro mfrfnahraht. ²⁰ Na kfo mifwanko, nikmoh toh nmbuham nhai Bro Nkifrarhu dukef yuhat hikrfoko, yo nikmoh dborioh nefm nhai be tu mfrfnah marnyakahm, bi ndu boririfhuthu tisami Farisim namoa kanjo inji nahikwoko. Be nhai hefenrhu kingdomkfof yiruhatrko. Tu be nhai mif.”

*Jisasr kfomo mrokforoh nakfo gbhu yuhat
(Luk 12.57-59)*

²¹ Jisasr kfo memorm, “Nikmoh nkifram kfo hawihnamo yirmoht bi wany hnamokomt. Inji kfomot, ‘Mirahn wanambur sinyahato yima awas furaya. Yima was furarahn kot tohrahm.’ ²² To nann wom kfot kfiwanko, wom yimar turhu yimatpno nna huttf, nd yimar kot tohrah. Ufaso faso kfo rindho borindhirr womr, be nd yimar bro kaunser yimampno kot tohkfof. Yo wom yimar tonehato womr kfo famurr, ‘Ar mmo dangnhar,’ inji kfoyuk yimar kaht riyahr.

²³⁻²⁴ Ndnnett yemrom yaknihato kangn, Bro Nkifrar atarioh mthayanr, nd yemro tarioh mthayuk tkittn wom dukefr niern, nd dukefr kfo famurn, ‘Ni nd yimar inji inji namonr.’ Nd dukefr niern, to be nd tarioh yemrom afo miyak htanyhato afo nd yimarpno yihato mrokfom nakfo gbhu nakfo dbruf nuhasnihato ee tfit yihato Bro Nkifrar tarioh mthakfof.

²⁵ Womr kangr, ‘Akotimann,’ mrokfof yudbat yak nohkfof. Awi kanga hatohrahn, nd yimar jasrhu tirt htaruhatrn tfit rorn polisroh tirm htarahrn. Tfit polism kalabus htarahmn. ²⁶ Kalabus yinyeft to be kalabus tohruhann bi nd kotkfof kfoyuk maruhat bi wiknent ee btn fnahnerahn.”

Ijoh tonayet yimaroh mrokfof

²⁷ Jisasr tfit wom mrokfof kfomor. Kfo memor, “Bro Nkifrarhu nkifra yirmoht inji kfomot, ‘Yimam mirahm womroh metm arim fnahnom.’ ²⁸ To nann wom kfot kfiwanko, wom yimar wom mett hti yuhurhato be yima yuhurpar sinyerr, to be bi yima yuhurn nd mett ners.

²⁹ Tirmifkorhof nyingarn wom nefm htihato fasoh nefm nenm, be nd nyingar yak rurhakhato be rpa nyingarparpno rhu marnyakfof. Hus nyinga bugaf rpat rhuneft, wom nyingarn fasoh nefm hanyruhatrn rorn yak hatohaforuhatrnl hel riyahn. ³⁰ Tir miftn fasoh nefm newut, nd tirt tmbho tuhato be rpa tirpatpno rhu marnyakfof. Hus tir bugaf rpat rhuneft, wom tirtfn fasoh nefm naruhatt rotn yak hatohaforuhattnl hel riyahn.”

*Metroh yak thuneft
(Matyu 19.9; Mak 10.11-12; Luk 16.18)*

³¹ Jisasr tfit wom mrokfof kfomor. Kfo memor, “Bro Nkifrarhu nkifra yirmoht inji kfomot, ‘Wom yimar kangr, rorhu mett ayak tuhafoyant, afo tuhan yak tuhafoyuk gontwat yakhato nd gontwat hingrnanihato ee mett yak tuhafokfof.’ ³² To tfit nann wom kfot kfiwanko, wom yimar turhu mett, ijoh yuhat yi juha, be yak tuhafo furahato mett toh fura hasohato tfit wom yimar yakneft, nd rot yakyuk barkof yindarirn fasoh nmbuhat rihiyafmort. Rorn yak thu furafmotrt rot toh fura hasohato tfit nfri yimar yakneft, nd nfri yindarir ijoh yuhatuher. Yo nd mett, ror yakyukt, ijoh yuhathu metet.”

Tamoh tamohmpno Bro Nkifrarhu yufatpno bmbri myutak duha

³³ Tfit Jisasr wom mrokfot kfo memor, “Nikmoh nkifram kfo hawihnamo yirmoht bi wany hnamokomt. Kfo hna memoum, ‘Bi wom mrokfot Bro Nkifrarhu yufat futent, mirahn tfit mrokfot akfo kekutant. Bro Nkifrar kukatoh hasiwur. Tu bi kfoyuk mrokfo yuhatn hikkfot.’ ³⁴ To tfit nann wom kfot kfiwanko, mirahko tamohmpno Bro Nkifrarhu yufat auyutanomtko. Tu be nhai mif. Mirahko hefenr auyutakahnomm wom mrokfot ayak dbkafnomt. Hefenr ndr ror Bro Nkifrarhu tohukatohyuk tkitet. ³⁵ Yo mirahko bbinysoft ayutakahnomm wom mrokfot ayak dbkafnomt. Bbinysoft rot Bro Nkifrarhu wuraf wayahotwa tkitet. Yo mirahko Jerusalemr yutahato wom mrokfot ayak dbkafnomt. Jerusalemr tu bro Kingrhu tauner. ³⁶ Yo mirahko tukmoh mfham yutahato wom mrokfot ayak dbkafnomt. Nhai nd mfhathu tmars wom tamohm wunahato tmars ganyomtahato tfit wom yiha tfit krtatakfot. ³⁷ Tamoh mrokfom kforahko, bi kfo yakio mrokfot kfiko to be injirpa, o bi kfo rafo mrokfot kfiko to be injirpa. Ndwom ndwom mrokfom pthiwam, ndm tndh Satanr mhfnahnewurm.”

Mirahko tawo tawo annayurnom
(Luk 6.29-30)

³⁸ Jisasr wom mrokfot kfo memorm, “Bro Nkifrarhu nkifra yirmoht inji kfomot, ‘Womr nyingar frdbfern, tawo rorhu nyingar frdbfakfot. Bsor frwokrn, tawo bsor frwokkfot.’ ³⁹ To tfit nann wom kfot kfiwanko, mirahko tawo tawo annayurnom. Yimar wom tamoh nefm nerko, mirahko tawo finji ananomr. Wom yimar tonehato yengongfako ftatrn, tfit kekuthato mano korhof yengongfat yak htahekfot. ⁴⁰ O wom yimar ni womnhu siothat htihat kangr kothato ayakant, to be siothat yakhato rpat wom sakethatpno htahutahato hekfot. ⁴¹ Wom yimar kfo tkurworn rorhu kpthu rpa kilomita hanyheneft, tfit ninn hus kilomita hanyhekfot. ⁴² Yo wom yimar niahato kfo ttiwonworn tamohroh hanyeft, yakhato wahiyafokfot. O wom yimar niahato kfo ttiwonworn tamohroh be yifrar yakitohtaneft, mirahn awany marsisayanr.”

Ninhu yahr kmi thofr yak marnya bomarnyakfot
(Luk 6.27-28; 6.32-36)

⁴³ Jisasr tfit wom mrokfot kfo memor, “Bro Nkifrarhu nkifra yirmoht inji kfomot, ‘Tukmoh yimatm yak marnyakfot. Niko yak bebwa yimamn yak bebkfot.’ ⁴⁴ To tfit nann wom kfot kfiwanko, yimam faso faso kak beb bobebwomko, tfit nikomm nd yimam yak marnya bomarnyahato Bro Nkifrapno wakfo bruttnatwakomm. ⁴⁵ Inji narahko, hefenr yorhwa Yifemrhu yonko rhurahko. Nd Yifemrhu marrpar kekworm fasoh net yimami dborioh nayet yimam. Yo ror yahuka buriohrpar wihhato kekworm dborioh yimami fasoh net yimam. ⁴⁶ Nd nikompno nayak marnyewa yimarpampno hifa hifa nayak marnyarahko, to mirahko ka Bro Nkifrar htihat ttharhrnom. Nhai. To nd gafmanrhu takis marut yekwa yimam, rom ndhet yima yak marnyanest rom kakitohwomt. ⁴⁷ Tukmoh najomromrpm o nmemromrpmampno nakfo yongm boyongm marnyarahko, to mirahko ka Bro Nkifrar htihat to yindhorrhrnom. Nhai. Nd nakfo yongmnefm rom to nd Bro Nkifrar hik duha yimam newumm. ⁴⁸ Nikmoh toh nmbuham, tu Bro Yifemrko tohwa kanjo be yak teh marnyahato toh marnya bomarnyakfot.”

6

Wom yimarih tamohroh hanyeft

¹ Jisasr wom mrokfot kfo memor, “Niko wadukaf hanyswako. Mirahko tamoh tamoh dborioh nmbuham be yima nyingahato anakahtnomm yimam afo ahtimnom. Inji narahko, to mirahko ka hefenr yorhwa Bro Nkifrar inji htihato ka tawo tamohm hirahnom. Nhai.

²⁻³ Ni womn kangn wuskapa duha yimam tamohm ahiyanm, mirahn fumrr yakitohyuk yimar tohakhato fumrr nriyaf hanyhato yimam tamohm ahi hanyanm. Be yau tebfi hanyhato nhofijo rihti ahtihato wahtanyhekfot. Yimarih nyingahato womm tamohm hanyeft, ndt be yuwi kangn, womm inji htihato kfo mirahm, ‘Ndr tu yima hayet yimayer.’ Na kfiwanko, bi ndar yima mif thetmn bi inji kfo yindhorwomn to mirahn ka Bro Nkifrar tfit kfo yindhorrahra. Nhai. ⁴ Nd ni nayuk nefm be inji yimam hti duha. Hingrna kafrohkfot. Bro Nkifrarpar htirahr. Rorpar htihato rorn tawo ttharahrn.”

Kfo bruttnanef yuhathu mrokfot
(Luk 11.2-4)

⁵ Jisasr wom mrokfot kfo memor, “Kangko, Bro Nkifrar akfo bruttnanome, mirahko nd mikfo nhehta mkfo nhehtayet yimam niwa yuhat ahiknom. Rom inji newum. Kfo bruttnaneft rroh yima yuhum be myindhornitmm Judaroh rhu rifinyuk rmonm o yihota nadbgm tohhato kfo bruttnaneft. Kangm, ‘Tafont tohhato kfo bruttnakahtnom yimam htirahmnom.’ Na kfiwanko, inji niwa yimam to bi yimamn htihato kfo yindhorwomm. Bro Nkifrar nhai tfit kfo yindhor inji naruhatrm. ⁶ Kangko, Bro Nkifrarparno akfo bruttnanome, tukmoh kunyko yihato rumko fknenihato rumthu yifhatikt frkihnhato nikmoh Bro Yifemrko kfo bruttnakfot. Bro Yifemrpar htirahr. Ndnnett tamoh nefm yiro kamonghato nayukm rorn htihato ttha hanyahrko.

⁷ Yo kfo bruttnaneft be mirahko Bro Nkifrar hik duha yimam kanjo akfo bruttna yukenom. Rom inji kfo bruttna yuke thombat duka kangm, ‘Kfo bruttna yukekahtnom nmoh nkifram wanyrahmnom.’ ⁸ Niko mirahko rom niwa yuhatn ahiknom. Tamohm yibonhato be yima yuhurparn duka htanest, Bro Nkifrar bi htitworm.

⁹ Kfo bruttnaneft inji kfo bruttnakfot:
‘O hefenr tohwa nmoh Bro Yifeme,
ninhu hnaru yufat nhai yuta rra borrahkfot.

¹⁰ Nom kangnom, ninhu kingdomkfot aniehnat.
Nom ninhu duka yima yuhur ahiktwanom, hefenr tohwam hikwa kanjo.

¹¹ Hrek yihar yeyuk yeshrim wahanyanom.

¹² Nom nayuk fasoh fasoh nefenm wayafhonm,
nom womroh nefm yafuhiwa kanjo.

¹³ Tndh Satanr nia toh nhehaknewurnom, mirahn ahti marsisayanm. Nhai.
Waminrfa htiyaktwannom.’

¹⁴ Wawanyko. Womm wom fasoh fasoh netmko, rom nayuk nefm duka mumafahukomm, tawo nikmoh Bro Yifemr, hefenr tohwar, mumafihahrko niko nayuk tamoh tamoh nefenm. ¹⁵ Nhai duka mumafherfokomm rom nayuk nefm, to tawo niko nayuk tamoh tamoh nefenm nhai duka mumafohiruhatrko nikmoh Bro Yifemr.”

Yeshri kurhato kfo bruttnaneft

¹⁶ Jisasar kfo memor, “Nuwa kurhato rhurahko, mirahko mikfo nhehta mkfo nhehtayuk yimam niwa kanjo tafontn nyingatikm wuyak kihhato arhunom. Yuwi inji anakahtnom hti nhta mirahmnom, ‘Nuwa kurhato yorhwamn nyingatikm wuyekwomm.’ Inji na duha. Na kfo mifwanko, niko hingrna kafrohyuk hingrnfem tafontn htahato yimam htihato ptha srhhirahmko, to be. Bro Nkifrar nhai tfit ttharuhatrko. ¹⁷ Nuwa kurhato rhurahkome, nikmoh nyingatikm yuk marnya yo tmarim komim marnya-hato rhukfot. ¹⁸ Nyingatikm yifatoh marnyarahmko, yimam nhai hti nhtaruhatkmo. Nikmoh Bro Yifemr, rorrpar niko hingrna kafrohyuk hingrnfem htirahr. Rorn ttha hanyrahm niko hingrna kafrohwa hingrnfem.”

Hefernr wuss wuhta hanykfot

(Luk 12.33-34)

¹⁹ Jisasar wom mrokfot kfo memor, “Niko mirahko ndar bbinysoftn niko wuss tamoht yak yakhato masat aharhunom. Ndar bbinysoftn wuss tamoht masat harhuneft, dmthu ruheht korht. Womm binef wingrtn kawutm. Yo rikoh yimaroht korht. ²⁰ Be ndnettn ndar bbinysoftu wuskar tamohr masat harhu duha. Yura hefenrpar wuthu tibmon bugakfot. Hefenko nhai dmt kabofringkahtm. Nhai binef wingrt yekahtm. Yo nhai rikoh yimam yak tmbranihato yakkahm. ²¹ Nikmoh yima yuhum be nd wuskam yorhwa kmtn yirahm.”

Nyingaf thatipthu kshef

(Luk 11.34-36)

²² Jisasar kfo memor, “Nyingaf thatipthu kshef. Ninhu nyingaf dboriohf rhuneft thatipt yak nukaf hanyrahft. ²³ Nyinga bebetn rhurahn, yak tato botatohato hingrna fura bofurarahm tamoh tamoh nefm. Nd nukeft ni yakitohyukt bi nohraht, be bro yifungt tohrahm.”

Nhai hus tohak yimafhu slef yima tohkfot

(Luk 16.13)

²⁴ Jisasar kfo memor, “Nhai wom yimar hus tohak yimafhu slef yimar tohkfot. Ka womr yindhorrforrn, womr hhrekrforrn. Womrhu mrokfom wany yakiorforrn womrhu mrokfom nhai wany yakiorforrn. Niko nhai rpatn Bro Nkifrarhu dukefti maru dukeft rpat yakitohkfot.”

Rhu duka rhu kinyaki duha

(Luk 12.22-31)

²⁵ “Ndnatn kfo kanganko, mirahko tukmoh rhu toh nmbuhat htihato duka kinyaki bokinyakihato akfo amanyom, ‘Nome, tamohm yehato rhu-ruhanom, o tamohm hmbre wondhruhanom?’ Nikmoh dukefm tukmoh toh nmbuham dukewukome, to mirahko be yeshrirpam adukanom. Yo thatipt dukewuko, mirahko hmbresharpam adukanom. Nhai. ²⁶ Nungam htitwokomm. Rom nhai wom yewuri fant nuhtakahm. Rom nhai wom wuss wushato yeshrt o tamoht yak tibmonkahm. Rom be inji rhu furewatm tu hefenr tohwa Bro Yifemrn kahukrm yeshrt. Niko finji dukewako? Ka be nd nunga dukerppam hti dukewur? Nhai yimako tur yak yeny nhombrayukko dukakahrko? ²⁷ Yimar be turhu rhu marnya nmbuhatn duka hasonefte ka nd dukeftn nd yimaru bbinysoftu tohyuk yiham tfit yak nhirta hanyrfomt? Nhai ndar bbinysoftu wom yimar noheft yironak hanyhato afo kfo marifort, ‘Awi ar noheft. Na wofnkaha bmbri nohneft. Na kanga afo atoh buhtaka. Tafi ndar bbinysoft toh buhtarroya.’

²⁸ Mirahko tukmoh toh nmbuhat htihatoh akfo amanyom, ‘Nome tamoh hmbresham hmbriruhanom?’ Htitwoko yifako sinyewa plauam nhai tumn hmbreyuk hmbresham hingrnakahmm. ²⁹ To na, na kfiwanko, bingot Solomonn tu dborioh dborioh wondht wondhmour. To rorhu wondht nhai be mfro yifa tohrmot. Plauamn tot tu wondht harhuwomt. ³⁰ Wur rhu htfaswa kibr furat, yihof yimam pukakhato kaht kandhi thuruhat, ndhtet kibr furat to Bro Nkifrar kfiwatr tfa htahato fnhu nmboretwot. Ndnnett yimako, Bro Nkifrarhu dukefr rim tohni buga duha yitako, to mirahko duka kinyakinom. Bro Nkifrar hirahrko wondhyuk wuskam. ³¹ Ndnatn mirahko tukmoh toh nmbuhat htihatoh akfo amanyom, ‘Nome tamohm yehatoh tohruhanom?’ Hmbreshame tamoh hmbresham hmbriruhanom?’ ³² Nd yeshri hmbresha dukefrn rhu hasoneft, ndt Bro Nkifrar hik duha yimaroh dukefer. Niko be ndhtet dukefrn rhu haso duha. Nikmoh Bro Yifemrko bi htitwor niko nd ndm yibonwohat. ³³ Tamoh tamohm kangko ayaknom, afo Bro Nkifrarhu kingdomkfoti ror tohwa toheft toh hikkfot, ee kto nd niko dukayuk tamoh tamoh dukefm hirahrko. ³⁴ Ndnnett niko mirahko yihofrhof yeyuk yeshrim o tamohm dukahato aduka kinyaki hasonom. Yihofrhof krhopam, rom yihofrhofem. Mirahko yihofrhof krhopam tfit ayakkahnom hrehrhof krhopampno ahtanommm.”

7

Mirahko womroh tohefm o nefm htihatoh akfo nhata ayak nhtanommm (Luk 6.37-38; 6.41-42)

¹ Jisarr kfo memor, “Mirahn womroh nefm htihatoh ayak nhtakahann akfo ameya, ‘Nd nd yimam ndhtet ndhtet yimayem.’ Bro Nkifrar inji yak nhtarahrn, yima inji nayetn. ² Womroh nefm o tohefm htihatoh inji yak nhtarahn o yak nhtarahn, tawo Bro Nkifrar kfo nhtarahrn o yak nhtarahrn. Womm finji finji kahuknm, tawo inji hirahnm. Womm he hmarsirahnm, tawo Bro Nkifrarhe hmarsirahrn. ³ Tamohmpno womroh nyingam rhuyuk krpum yamuka, ayak thuyianm? Ka nhai hti dukakahnt tunhu nyingatikt hta rafiwa dohta mkut? ⁴ Nd dohta mkut ninhu nyingatikt yuhre yak thu duha, to tfit tamohmpno yamuka, ‘Yinowe, kanga ninhu nyingar yorhwa krpur ayak thuhanr.’ ⁵ Be tunhu nefm kak wuna bowunewun. Afo tunhu dohta mkut riyak htahato ee btn rhuhato ninhu yinowemrhu nyingar rhuyuk krpur hti marnyahato yak thurahrn. ⁶ Mirahn bi Bro Nkifrarhu yufatpno htahet shrm yakhato tfit yaumn wahiyafoya. Wahiyaforahnm, to kanga kekuthato tfit wasrahnm. Yo mirahn dborioh dborioh ngany mohm yakhato fohnm wahiyafoya. Wahiyaforahnm, to kanga tfit wuraye yahot tmbho botmbhorahnm.”

Bro Nkifrararno kfo bruttna ttiwonkfot (Luk 11.9-13)

⁷ Jisarr kfo memor, “Bro Nkifrararno kfo bruttnahato kfo ttiwonrahko, hirahrko. Yak hambro hanyrahko, mhtirahko. Mkrohnarahko, yifhatikt tfanyahrt. ⁸ Froh froh yimam yihato mkfo bruttna kfo ttiwonrahm, ee hirahrm. Yimam yak hambrorahm, ee mhtirahm. Yo yimam mkrohnarahm, ee kekuthato htiurahrnm yifhatikt yak tfanyakrahm.

⁹ Wom yonr nuwat tndaurofahat, ka yifemr tahis yakhato tahis wathu nhehafororr? Nhainji narfotr. ¹⁰ O yonr yirar tndaurofahat, ka yifemr nandomt yakhato nandomtn wathu nhehafororr? Nhainji narfotr.

¹¹ Niko, fasoh fasoh net yimako, yinem yonm tamohm kfo tndaunefi yakhato kahukwokomm. Nd yuhatn to nikmoh tu Bro Yifemrko he mifraharko niko tamohm dukahato kfo bruttnaneft. ¹² Kangko, womm ayak marnyamnome, barkofpam afo niko sinyahato womm yak marnyakfot. Ndhtet nefi Mosesrhu boririfhut yo profetroh mrokfom kak hikwot.”

Habhi yihota yuhatn riwitakfot
(Luk 13.24)

¹³ Jisars wom mrokfot kfo memor, “Habhi yihotar yiyet yihotarhu riwita yuhat habhiyet. Nd yuhatn riwitakfot. Helko yiyet yihotarhu riwita yuhat bro mifet. Hmbrohnat yorhwatt, bok yimam be nd yuhatn tone dukekwo. ¹⁴ Mtoh nkifraniryuk kmitt yiyet yihotathu riwita yuhat habhitn hti mumiwumt. Rpa rpa yimarparpam hutamtnd nd yuhat riwitewum.”

Yo! Giaman profetm hti dukak hanykfot
(Luk 6.43-44; 13.25-27)

¹⁵ Jisars tfit wom mrokfot kfo memor, “Yo! Niko giaman profetm hti dukak hanykfot. Nd giaman profetm yimampno yihato yima yuhum mtadborha nhehwomm. Rom pthayuk tok profet mrokfom mirahko ka kto tfit yafothetm korhm. Nhai. Be niko mfrnhehwom. Rom niewohat briahako sifsifroh that kasinyewum. Yiro yima rifhum yifako tohwa yauroh nefm tohwomm. ¹⁶ Wom yimar kangn, ahtiyar ndr tamohetet yimayer, htkfot rorhu nayuk nefmn. Wain yukham nhai hig toftn hirkahtn yimam yakkahmm. Nhai. Yo fik yukham nhaf, nhai mitaku tamentn hirkahtn yakkahmm. Nhai. ¹⁷ Nd yuhatn htirahnm, dborioh nnariyet nnar siham nhai nnarikahm. Fasoh nnariyet nnar siham rroh yukham nnariwom. ¹⁸ Dborioh nnar siham nhai fasoh nnariyet nnariham hirkahm. Yo fasoh nnariyet nnar siham nhai ye marnyet nnariham hirkahm. ¹⁹ Fasoh nnariyet nnariham hiret nnari siham yoh thuhato kaht kandhi thuwomm. ²⁰ Ndnnettnd nd giaman profetroh nefm, nd nnar siham ye nhombra ttiwonwa kanjo rroh nefmn yak nhombra hti nhombrakfot.

²¹ To mirahko duka amanyom, ka met yindarim nanhu yufat yutahato kfo yamukam, ‘Bro Nungothet Jisase, Bro Nungothet Jisase,’ ka inji naku kfet yimamn yirahm hefenrhu kingdomkfot. Nhai. Fitoh metm o yindarim nanhu Yifemrhu dukefrko hikmr, tom nd yimarparpam yi tohrahm. ²² Bro kotkfot yakitohruha yihart bok yimam kot tohato kfo mirahma, ‘Bro Nungothet Jisase, Bro Nungothet Jisase, nom ninhu yufat kfo yutahato Bro Nkifrarhu mrokfom ptha nuhasmounom. Yo kmi yarh fknayet yimam ninhu yufat yuta nawohhato kmi yarhm fnahnimoum. Yo mirakerkfom hingrnamoahat to be ninhu yufat yuta nawohhato bok mirakerkfom hingrnamounomm.’ ²³ Nd yiha inji kfoyuk yimam kfo miruhanm, ‘Na nhai tawisaf-wonkahanko. Wur fasoh fasoh nefm yakitohet yimako, wuri waiko.’”

Hushtet ktitf hingrnayuk kunyf
(Luk 6.47-49)

²⁴ Jisars wom mrokfot kfo memor, “Ndar na kfo pthiwa mrokfom, yimam wany yakiohato yak hikwam, tu dborioh duka tungunet yimam kuny rahu pokm simene simenim dbkaf hmbrita kanjo inji kitt rom mrokfom wany yakiohato hikwa nmbuhat. ²⁵ Kto buriohr wih wihhato hnutnd nd kunyr hnu hmbrenihato kto tfit wifort tonehato nd kunyr mnhombraneft nhai nd kunyr wohsiskfot. Bi rahu pokm bro bro tahimpno simenim hmbriyetm,

to finji kunyrhu wohsiskfot. Ndnetn ndar na kfo pthiwa mrokfom, yimam wany yakiohato yak hikwam, tu dborioh duka tungunetem. ²⁶ Yimam na kfo pthiwa mrokfom nhai wany yakiohato hik duha yitam, ndm mumetm kanjo kuny singoneft be inji yura nungurn singiwumm. ²⁷ Kto buriohr wih wihhato hnuten hnu hmbrenihato kto tfit wifort tonehato nd kunyr mnhombranefthai nd kunyr toh bmtakfot. Nndo fnykt teh tour fnah yohnitt. Nhais be tu yifo suht suhkahr.”

²⁸ Jisasr nd mrokfom kfo ptha buganihato nd rifinyuk yimam nd ror pthayuk mrokfom wanyhato yak nhtamohat be tuha mrokfo ptha duha rhumom. ²⁹ Mrokfom kfo ptha nuhas bonuhasmohat, nhais be Judaroh boririfhuthu tisam kfo ptha nuhaswa kanjo kfo ptha nuhasmorm. Nhais. Mrokfom kfo ptha nuhasmohat bro duka tungunet yimam kanjo kfo ptha hik bohikmorm. Ndnetn yimam rorhu mrokfom wanyomohat nhais marimom, “Kfo ptha inji narahnom.” Nhais. Be tuha mrokfo ptha duha rhumom.

8

Jisasr lepra dbohneft yakety yimar yak marnyamo yuhat (Mak 1.40-44; Luk 5.12-14)

¹ Jisasr yura kminysoft wuhtanyhato yawihnamohat, yonmari yimar rifhur fak hik hawihnamomr. ² Wom lepra dbohneft yakety yimar Jisasr pno bangu mtabokmehato kfo naku memorr, “Broye, ndar na hatohwa dbohneft yak thurahnt, to be thu troh tanyrahta.” ³ Jisasr inji wanyhato nd leprayet yimarn tirt rihtahato kfo memor, “Uwa, na yibonwa.” Inji kfoni hanyhato nd dbohneft kfo memort, “Wathu trohnr.” Inji kфомotr, nd dbohneft yudbat thu trohmotr. ⁴ Thu troh tanymottr Jisasr kfo memorr, “Ni nda dbohneft thu troh tanyhat, mirahn tfit womm akfo nuhasanm. Mosesrhu boririfhut yak hikkfot. Yimam lepra dbohneft yakety marnyamoahat inji namoum. Nd hun gifam prisr pno myak nuhasnimoamn, tarioh mthamoum. Nd tarioh mtha yiharn prism ndt htihato kfo memoum, ‘Nd yimarhu dbohneft bi thu troh tanymotr.’ Ni nd yuhat yak hikkfot.”

Soldiaroh keptenrhu hingrna yimarhu dbohneft Jisasr yak marnyamo yuhat

(Luk 7.1-10)

⁵ Jisasr taun Kaperneamt yimor. Nd taunt tohetrn Romroh 100 soldiaroh keptenr yihato Jisasr pno be nnuhato mkfo memor, ⁶ “Nungothet jisase, nanhu hingrna yimar dbohna bebhato kunys hwitr. Bi minysaf hmbreyetrn nhais sinyahato rhukfot. Thatipt ke shuwotr. Ndnatn be hwe hasiwur.” ⁷ Inji kfo pthamotr Jisasr kfo memorr, “Nhais mrokfom. Yirhoyann dbohneft yak thuhiruhanr.” ⁸ Nd soldiaroh keptenr tfit kfo memorr, “Bro yimaye, mirahn nanhu kunys anea. Na nhais dborioh yimayann nanhu kunys nieruha. Be inji nndo tohhato be wakfokahtn, nanhu hingrna yimar marnyanirahr. ⁹ Na to wom bro tohak ofisar tohekwastr na rorhu yinhitn watohwa. Tfit nann wom tohak yimaya tohwa. Nann kakitohwanm tfit wom ami rifhur. Nd ami rifhur nann yakitohhato wom soldiar kfo kanga, nd soldiar anjur, nd soldiar kitr. Kfo kanga, nd soldiar aniar, nd soldiar niewur. Nanhu hingrna yimar kfiwanr, tamohroh hingrnanefthai, nd hingrneft hingrnewurt.” ¹⁰ Jisasr nd yimarhu mrokfefm wanyhato tuha mrokfo duhatr rhumor. Tfit kecutnihato nd ror hik hanyamo

yimam kfo memorm, “Barenko, nd yimar nndo wom kmi thofer. Nd mrokfot kfiwatr, nanhu yima yuhur duka kanga, Isrerkort nhai wom yimar htikahanr o wanykahanr kfo mekahra, ‘Be inji nndo tohhato wakfokahtn dbohnet yimar marnyanirahr.’ Nhai. Nhai ndhtet duket yimar htikaha.

¹¹ Kfiwanko, boknambok kantriroh yimam mano mano sinyarahm. Marr yuwa muhwa kantriroh yimam sinyarahm, yo marr yohnita kantriroh yimam sinyarahm. Sinyaruhamn, Abraham, Aisak, Jekofrompno rpat rhu yerahmt nd hefenrhu kingdomkfot htaruha yemro burwat. ¹² To nd barkof Bro Nkifrar bi kfo hta memo, ‘Ndar yimamn nanhu kingdomkfot rhurahm,’ to nd bi kfo htayuk yimamn tfit toh kekuthato yak thu wurasohrahr. Nhai rorhu yufat rhuruhatm. Yak tuhafuruhatrm bro kspitat tohrahm. Bro kspitat tohhato tau nknakrahm.”

¹³ Be nd 100 soldiaroh tohak keptenr, Jisasr kfo memorr, “Wanju kunyko. Wanjukahann htirahnr ninhu hingeru yimarhu dbohneft ninhu dukef yuhat rhu hikraht.” Be nd hingeru yimarhu dbohneft, be yudbat teh tmbhakmot.

Jisasr Pitarhu matohemt yak marnyamo yuhat

(Mak 1.29-31; Luk 4.38-39)

¹⁴ Be tfit yihato Pitarhu kunysn mfnahmor. Mfnahhato fknemior. Fknemihato rim htimort Pitarhu matohemt kkah dbohneft hwemot. ¹⁵ Be rotpono yihom rhuhato tirt fakitohmort. Be inji yakitohmotrt nd dbohneft thu troh tanymott. Be nd mett yudbat marnyani hanyhato sinyamotn yeshrim hta mskahemotm.

Jisasr bok met yindarim yak marnyamo yuhat

(Mak 1.32-34; Luk 4.40-41)

¹⁶ Krifta hanymot, bok yimam hany hanymomm kmi yarh fknayet yimam. Hne hnamoatmm Jisasr mrokfot tumourt nd metm o yindarim hatohmoa kmi yarhm fnahni hanymoum. Yo nd dbohna mifetm, rom nhaf yak marnyaf hanymoatrm marnyani hanymoum. ¹⁷ Jisasr nd namo neft, to profet Aisaiar kfonegotmo mrokfotn ror namo neft fak hikmot. Bingot profet Aisaiar kfo memorr, “Turn nmoh dbohnefm yak thumormn nndo tumorm.”

Ais 53.4

Jisasrhu hik yuhat

(Luk 9.57-60)

¹⁸ Jisasr yonmari yima rifhur toh dbu hmbremoatmr kekutnihato turhu disaiperm kfo memorm, “Tek bari mkuko ainyom.” ¹⁹ Nd yima rifinyrn tohmor nkifra boririfhuthu tisar. Yauyaknihato Jisasr rim kfo memorr, “Tisa, ni kmi kmi yi htfas thombat na hikhne hakuruhann.” ²⁰ Jisasr kfo memorr, “Kmburu fkoim, rom hwe skitetem, rom bbmuhamn tohwom. Nungam, rom miyuhtamn o wusmn hwitm. Nikmoh Bro Najomrpar be tu nhai ror wom hwe rhu mskayuk tkitt.” ²¹ Tfit wom disaiperr sinyahato kfo memorr, “Bro Nungothete, nanhu yifemr yinoht, afo rorhu yopt yiruha.” ²² Inji kfo motr, Jisasr kfo memorr, “Noheh yimam, rom tum anayop hanyam. Ni wania wahikna.”

Jisasr kfohato wifort minoh hmbremo yuhat

(Mak 4.36-41; Luk 8.22-25)

²³ Jisasr bot mikmbremor. Turhu disaiperm htiaf hanyhato rom rpat mikmbremom. ²⁴ Mikmbrehato rihir hanyomom. Buha bari dany yuhatn rim hir hanyhato Jisasr hwemor. Hweyetrn, bro wifort sinyamot. Wifort sinyahato tek barit fifrtuhato yonmari burifhum sinyamom. Burifhum

sinyahato rom yimo bot burifhuth bi tas finjaknimott. ²⁵ Be yudbat Jisarr frthamomr. Frtha hanyhato kfo hany memomr, “Broye, nome href finji newanom? Nom href yohnitnom!” ²⁶ Jisarr sinyahato kfo memomr, “Niko ndar wiforti burifhuth kakrmitko? To nikmoh dukefme fitha yitam? Ka nhai mikahko, ‘Tor ror rpat nienom, nhai yakrmiruhatom?’ Nikmoh dukefmi ka nhai be mfro nann niakahmko?” Be inji kfoni hanyhato nd wiforti burifhuth sinyahatom, ro mrokkot tumort be wufakomf. Wifort tone tmbhomot, tekt be minoh hmbremot. ²⁷ Nd bot rhuyukm inji htihato tuha mrokkof duhatm rhumom. Memom, “Ndarr tamohetet yimarn wiforti burifhuth wany yakiohato minoh hmbrief?”

*Hus yimafhu kmi yarhm, Jisarr yak thumo yuhat
(Mak 5.1-17; Luk 8.26-37)*

²⁸ Jisarr Galili mkuko yi tohwa Gadararoh bbinysofko rim dbkafmor. Ndharn kmi yarh fknayet hus yimaf yihato Jisarr mfnahmofr. Nd hus yimaf be yima gum htamoa tahi bakuny mkumn toh htfasmouf. Kmi yarhm tuhagrhamoatmf mfro namburmoatf yimam nhai nd yimaf tohmoa yihota yuhat yirmoam. ²⁹ Nd yimaf hatohwa kmi yarhm Jisarr mhtihato kfo tau naku memom, “Bro Nkifrarhu Yone, nome finji newannom? Nmoh huhra krt kanjo frhabtothato krhopa yak yihar tor yuhre riyorhwor. Bi frohm memom, ‘Asha wanietwa?’” ³⁰ Fohm rom wuri kfof ke wussohmoum. ³¹ Nd yimaf hatohwa kmi yarhm Jisarr kfo naku ttiwon memomr, “Jisase, ni kangn ayak tuhafoyann, wayak hatohafokahtnnom ndar yimaf htany thombat ndur tohwa foh rifhumn tfit fknihato tohrahnom.”

³² Jisarr nd kmi yarhm kfo memomr, “Wafnahniko.” Be inji kfo tkrurmotrm, rom nd hus yimaf thu troh tanyhato tfit fohmn fknenimom. Be fohmn fknenihato thu hafunanimotmm, nd fohm kmi kihahir yuhat mitarhotnihato tek baritn mitayif wurasoh bugamom.

³³ Nd fohm hatohmoa yimam inji htihato fakrmemom. Yakrmehato taunko yimom. Yihato taunthu yimam kfo nuhas bugamomm rom htimo nefm. Yo nd kmi yarh fknayet yimarhu mrokkof kfo hik bugamofm. ³⁴ Be nd taunthu yimam Jisarrpno yihato kfo tkrurmomr nd taunthu htanyhato tfit womha yinyeft.

9

*Jisarr tir wuru minysafet yimar yak marnyamo yuhat
(Mak 2.1-12; Luk 5.17-26)*

¹ Be Jisarr bot mikmbrenihato tek barit tfit hir hayuknihato yimor Kaperneamko. Tot tur tohmoa taunt. ² Yo wom yimam wom tir wuru nohet yimar krokekr hnamomr. Jisarr nd yimar hnayuk yimaroh yima yuhum htimorm. Rroh dukefmi Jisarrpar yimom nd yimarhu minysafethu marnyanineft. Rroh yima yuhum inji htihato nd minysafet yimar kfo memomr, “Ar yone, mirahn adukaya. Ninhu fasoh fasoh nefm bi fak tuhahuyann.”

³ Nkifra boririfhuthu tisam Jisarr kfomo mrokkof wanyhato tum rinahti nahtihato nakfo ptha memom, “Nd yimare, kangr Bro Nkifrarhu ktitt ayaka.”

⁴ Nd yimaroh yima yuhum inji dukamohat Jisarr bi htimorm. Htihato kfo memomr, “Tamohmpno nd fasoh dukefmi yekwako? ⁵ Kangko finji akfoyanane? Kangko akfo amiyann, ‘Ninhu fasoh fasoh nefm bi fak tuhahuyann?’”

O kangko akfo amiya, ‘Wasinya wayauyakni?’ ⁶ Na, Bro Najoma, yimaroh fasoh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kfone hanyhato nd tir wuru minysafetr kfo memorr, “Na kfiwann, wasinyakahnn krokt wayaknikahnt tunhu kunyko wain.” ⁷ Be nd yimar wasinyahato kunyko yimor. ⁸ Tuhan yindarim inji htihato yakrme yima yuhum niahato Bro Nkifrar kfo yindhormomr yimam ndtet hingrna yafotham yahuka nmbuhat.

Jisasr Matyur naku yakmo yuhat
(Mak 2.13-17; Luk 5.27-32)

⁹ Jisasr yau hanyhato Matyur takis marut tuyuk kunyent rhu hasetrn yihom htimorr. Yihom htihato kfo memorr, “Wania wahikna.” Be Matyur sinyahato fak hikakni twanhomorr.

¹⁰ Jisasri turhu disaiperm yihato Matyurhu kunysn nuwa famom. Nd Matyurhu kunys nuwa yamohat wom bok takis marut yakyuk yimam yo wom fasoh nefm nayet yimam yihato rpat nuwa famom. ¹¹ Farisim inji htihato rorhu disaiperm pno yihato kfo memomm, “Tamohmpno nd takis yekwa yimami nd ufasoh nefm nayet yimam rpat rhuhato nuwa ye mskewar?”

¹² Jisasr wanyhato kfo memorm, “Yima furam nhai be yi furakahm hunkotharpno. Nhai. Dbohnet yimarpam kitwom hunkotharpno. ¹³ Afo tfit Bro Nkifrarhu rfa borngtn afo wamhti dukaktwako. Bro Nkifrarhu rfa borngt kfo yamuka,

‘Na nhai hti wofnkahanko nd niko tarioh mtha fura bofurewohat. Yima yuhuwafwa nmbuhatn hti wofnwanko.’ *Hos 6.6*
Nd mrokfot finji kfiwat? Na nhai dborioh yimaroh dukeftn niarmoya. Nhai. Na fasoh fasoh nefm nayet yimaroh dukeftn niamoya. Memoya, fasoh fasoh nefm nayet yimampno yirhoyann, kforhotanm, nd rroh fasoh nefm thu trohrahmm.”

Nuwa kurhato kfo bruttna yuhat
(Mak 2.18-22; Luk 5.33-39)

¹⁴ Nd yiha Jon Baftairhu uhik ahik htfasyuk yimam Jisasrpno yihato mkfo memorr, “Nomi Farisim nuwa kurhato rhu hakutahat, to tamohmpno ninhu disaiperm nhai inji na hakukahm?”

¹⁵ Jisasr kfo memorm, “Wom yimar wom mett yakrahr, rorhu yimatn nhai bi hanurkahmr ror afo rompno yuhre rhu mska inji na thombat. Nhai. Kto yak hambrafuhrar, ee bt rorhu yimatn nuwa kurhato rhurahm.

¹⁶ Nhai yimam bingotrhof hmbresham muhetm rhuneft tfit nfri rmontha nmbm yakhato nahukahmm. Yatk hmbreshathu muht tfit nfri rmonthaye nahuneft nfri rmontha nmbm teh hma bugarfott yatk hmbreshat. ¹⁷ Yo nhai yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreft nd nfri wain bupam rikur prhoruhamn nd yatk meme tha kpt frtfohhato wain bupam mitoh bugarahm. Ndnnett nfri wain bupam tu nfri meme tha kpe tas hmbrihato be nhai kpm yoh tfoh inji nakfot.”

Jisasr wom ofisarhu yonti yo dbottet mett yak marnyamo yuhat
(Mak 5.22-43; Luk 8.41-56)

¹⁸ Jisasr yuhre Jonrhu disaiperm pno ptha hanyetrn, wom ofisar yauyaknimorn Jisasrpno mtabokmehato kfo memorr, “Nanhu yont asomif bi

fnoht. To ninn wai tir wahtakahtnt yafothat tfit mthu nawohraht.”¹⁹ Be Jisars sinyamorn nd ofisar mhikaknimorr. Yo rorhu disaiperm rpat hik hanyomomr.

²⁰ Jisasrom yihotat yau hanyetmn wom mett Jisasrhu mongko yauyaknimotn ror hmbremo sakethathu psifm tire mtayoutimotm. Nd mett dbotteft 12-pela gunyimm hatohmouft. ²¹ Rot nd hmbreshathu psifko tire wutayoutimohat, rothu dukeft duka memot, “Be tirrpaye rorhu hmbreshat wutayoutiruhant, nd na hatoh hnawa dbotteft teh tmbhakraht.” ²² Rot inji dukahato mtayoutimohat, Jisars kekutnihato wahtimort. Wahtihato kfo memort, “Ar yone, ninhu dukeft duka famu, ‘Be tirrpaye rorhu hmbreshat mtayouti thoft, nd dbotteft teh tmbhakraht.’ Ni nd dukeftpno tayoutiwontna ninhu dbotteft teh tmbhekwt.” Be inji kфомotr, nd dbotteft yudbat teh tmbhakmot.

²³ Be Jisars yimorn nd ofisarhu kunys mfnahmor. Mfnahhato mhtiyaknitworm yimam nur windohmpno mayi nmbuham mayi hanyhato ptha hofhta inji namoum. Jisars inji mwanhato ²⁴ memorm, “Niko wafnahniko. Ndar yont nhai nohrfot, tot be hwitt!” Inji kфомotr memom ka be kfo ddiwur. Ndnatn rom tfit haningemomr. ²⁵ Nd nur kunys rhuyuk yimam yak tuhafhato fnah buganimotm, Jisars nd yon gus rhumo tkitt rim tohhato tirt wafakmort, be nd yont tfit mfenyiwomot. ²⁶ Nd ofisarhu yont kasinyamo yuhathu mrokfot nhai wom warhu hasormot. Nd distrikt nd mrokfot thu yufur buganimott.

Jisars yak marnyamo hus nyinga kunyjet yimafhu mrokfoti tng mmkrhu mrokfot

²⁷ Jisars ndhar htanyhato tfit yimor. Yau hanyetrn hus nyinga kunyjetf yau hikaknihato naku kangfr, “Defit frikefthu yon Jisase, wayuhuwafnno.”*

²⁸ Jisars kunys rim fnahnietrn nd nyinga kunyjet yima husf yau hikaknihato rim htimofr. Rim htihato ttiwon memorf, “Nifn dukefm finji dukewafn? Ka duka kangfn, ‘Rorpno yihato rorhu tire kaktitrno nnoh nyingam kukatohwononm.’ Ka inji dukewufn?” Nd yimaf kfo memorf, “Uwa, Broye, no inji dukewuno.” ²⁹ Be nd yimafhu nyingam tir htahato kfo memorf, “To be nifn dukef yuhatn nifn nyingam frdborhewum.” ³⁰ Be nyingam tfit myoh dborhahato fukatohmofm. Jisars kfo hta mrokfom kfo memorf, “Nifn ndar nyingam tfit yukatohwa yuhat mirahfn wom yimampno aptha nuhas mif mifnonm.” ³¹ To nhai, nd yimaf yimohat, nhai hikrmofnd nd mrokfot. Tfit yimofn kfo ntramotft distrikt bugathu tuhant yindars wany bugamot.

³² Nd yimaf fnahni hanyetfn wom tng mmk yimar, kmi yarh fknayetr, hnamomr. ³³ Jisarsrpn hnamotnr fak thumorr kmi yarhr. Yak thumotr pthamor. Tuhan yindars bok dukefm yakhato kfo memom, “Bingot nmoh kantri Isrert nhai ndhtet nefm rhurmotm htirmomm.” ³⁴ Tfit Farisim sinyahato kfo memom, “Nd ror kmi yarhm yak thuwohat, nndo tndhrhu bbukeftpno kak thuworm.”

Jisars turhu hingrna yimam hingnefm hemo yuhat
(Sapta 9.35–10.42)

* **9:27:** Judam rom bi mrokfot wanyngotmomt. Nd mrokfot kfo memot, “Judaroh yakyuk yimar, Defit frikef yuhatn nierahr.” Nd mrokfot bi wanyngotetmn ndnetn inji kфомom.

Jisasr bok yimam htihato yuhuwafmo yuhat

³⁵ Jisasr kmi kmi, taun taun yi htfashato turoh rifinyuk rmonmn yi rhunhohato mrokfom hemorm. Hefenrhu kingdomkfothu mrokfomn kfo nuhasmourm, yo tuhan yindarim tamohtet tamohtet dbohnefm rroh thatipm rhoomam, kak marnyamourm. ³⁶ Nd rifinyo tuhan yindarim htimorm tohukatoh duha sifsifm kanjo. Rroh rhu nmbuhat be tu ufasoh rhu beb mifmom. Htihato yuhuwafmorm. ³⁷ Ndnatn turhu disaiperm kfo memorm, “Mswirthu yewurit bi kak yibonwot. To tmift nhai bok yimam nd yewuriroh yakyukm. ³⁸ Ndnatn tu mswir tikatrpno wakfo bruttnakahtko yimam tkruraforuhatrm yihato yewurit yak wurirahmt.”

10

*Jisasr yakmo barkof 12-pela aposerm
(Mak 3.13-19; Luk 6.12-16)*

¹ Jisasr turhu disaiperm kfakhato niamotm, hemorm dbohnet yimami kmi yarh fknayet yimaroh yak marnyayuk yafothar.

² Jisasr yakmo barkof 12-pela aposerroh yufam inji: barkof yimarhu yufat Saimonr (wom yufat Pitar), yo rorhu nmem Andrur. Yo Sebedirhu yon najohf Jemsri nmem Jonr. ³ Yo Filifr, yo Bartolomyur, yo Tomasr, yo takis marut yak htfasmoa yima Matyur. Yo Alfiusrhu yon Jemsr, yo Tadiusr.

⁴ Yo Selot patikfot tohmoa yima Saimonr, ee wurohr Judas Iskariotr, Jisasr hndhnamo yimar.

*Jisasr 12-pela aposerroh hingrna yuham kfo hta bohta nuhasmo yuhat
(Mak 6.7-13; Luk 9.1-5)*

⁵ Jisasr turhu 12-pela aposerm hingrnefm kfo tkrurafmohat, kfo tebos boteles nuhasmorm. Asom ror hemo kfo tebos mrokfom: Kfo memorm, “Niko hingrnafat yaknitahat, mirahko yima tangimpno ainyo yo mirahko Samariaroh taunm ainyom. Nhai. ⁶ Isrerroh sifsifmpno waiswako. Rroh sifsifm bi frfnah wurasohmom. Rom duka duka waiswako. ⁷ Waikahkomm wakfo wamitwakomm, ‘Hefenrhu kingdomkfo bi brbohwt.’ ⁸ Waikahkomm dbohnet yimam wayak marnyatwakomm, noheh yimam wakasiny-atwakomm, lepra dbohnefetm wayak wus bowustwakomm, kmi yarhm hatohet yimam kmi yarhm wayak thutwakomm. Nd yima yak marnyayuk yafothar be he furiwanko, ndnatn niko yimam tamoh nefm finji nanefit mirahko tfit maruha ayaknomm.

⁹ Mirahko gor silva kapa marut ahiyau hiyaunom. ¹⁰ Yo mirahko gegb yohm afotaknom o wom hmbre wuskenm be ayakitoh furakninom o su wuram ayakitohakinom o kio musm. Nhai. Nd niko yiyuk kmiroh yimamn niko tamoh tamohm hti dukakfot.

¹¹ Wom kmit o taun kitwoko, afo ttiwon hikkfot. Fitoh yimar kak miyekworko, nd yimarpno toh tanyhato yikfot. ¹² Fitoh kunys kitko, rim tohato nd kuny shofm kfo yindhor mekfot, ‘Bro Nkifrar ayak marnya bomarnyatwarko.’ ¹³ Nd rim kfo yindhorakniyuk mrokfot nd kuny shofm wanyhato yindhorhato kak miyekwomko, nd niko rim kfo yindhorakni mrokfot hingrnaruhatn nd kunyshu yimam Bro Nkifrar ayak marnyarahrn. Nhai yak miyakkahmko, kfo tany mekfot, ‘Bro Nkifraye, mirahn nd kuny shofm ayak marnyanm.’ ¹⁴ O wom kmit o taunt yihato nhai kunym yakmiyakhato niko hanyuk mrokfom nhai yindhorkahm wanyneft, nd kmit

htanykfot fus wuram tuha nd kmitn frdbofta tanyhato htanykfot.* ¹⁵ Na kfo mifwanko, Bro Nkifrar kfomo kotkfot rhuruha yihart, nd taunt mirahko ka tu kuken krhopam yakrahm. Sodom Gomoraf yakruha krhopam be inji yakrahf. To rom be tu bro krhopa mifm yakrahm.”

Nhai rpahtet krhopam nieruhatm

(Mak 13.9-13; Luk 21.12-17)

¹⁶ Jisars kfo memorm, “Wawanyko, niko bi sisifm kanjo bi yifako tohwa namburet yauroh rifiny buhar kitwoko. Ndnnett niko dukefmpno waiswako. Nandomm kanjo duka hik marnya bomarnyahato tamoh tamoh nefm nakfot. Yo nunga mahum kanjo kmi thofmpno brbo yihato nayak marnyahato tamoh tamoh nefm nakfot. ¹⁷ Niko tuko duka marnyaf hanykfot. Turoh kaunsermpno mkotimhato tu Judaroh rhu rifinyuk rmonmn hanyhato wife tu smbho bosmbhorahmko. ¹⁸ Nanhu mrokforoh yimaroh ptha nuhas hanyeftn yakruhamko gafmanmi kingroh tirmn htarahmko. Nd yuhatn nanhu mrokfot nd kot swirtn ptharuhatkomt nd bro yimami yo yima tangim wanyrahmt. ¹⁹⁻²⁰ Bi kot hanitmko, mirahko duka yakrmihato akfo amanyom, ‘Amal, nome finji ptharuhanom?’ Mirahko inji aduka yanhonom. Kot swirt, Bro Yifemrhu Yafothatn mrokfo rifhur hi hanyruhatrko, mrokfom be tumn mfrfnah hanyrahm.

²¹ Najohfi yagnm tum nahndhna-rahm. Womr sinyahato womr hndhnaruhatrr wasrahmr. Nitohfim nhaf to inji. Yifemr sinyahato yinemr hndhnaruhatrr wasrahmr. Yinemrom nhai yifammampno nayak marnyaruhatm. Yinemrom sinyahato yifammam hndhnaruhatmm wasrahmm. ²² Yimako na hikrahko, riruh aruhyukm nhai hifa nyingar hta hakuruhatmko. Be hti sr thurahmko. Fitoh yimar inji htihatoh nhai riyoh bruhakhato myafnonirfora, nd yimar Bro Nkifrar yakrahrr. ²³ Wom taunt yihato nanhu mrokfom kfo ptha hanyhato nd taunthu yimam faso kak bebwowmko, yakrman-yihato wom nndoh taunt n yikfot. Na kfiwanko, mirahko ka bi Isrertu taunm mrokfot yak buganiyetmn nikmoh Bro Najemr ka nierahr. Nhai.

²⁴ Wom yonr, wandfa kunys yuhre tohetr, ror tisimiyuk tisarhu yinhit tohwor. Yo wom hingrna yimar turhu tohak yimarhu yinhit tohwor. ²⁵ Nd skurr tohet yonr kangr tukanhu tisar kanjo atoha, to nhai mrokfom. Yo hingrna yimar kangr tukanhu tohak yimar kanjo tohak yimaya atoha, to nhai mrokfom. Na nikmoh tohak yimaya Belsebur yufat hmbremoma. Kfo memom, ‘Belseburer.’ To niko to ndhtet yarhroh yufa bebm hmbri-rahmko.”†

Bro Nkifrarpar duka yanhokfot

(Luk 12.2-7)

²⁶ “Yimam faso faso kak bebwowmko, mirahko ayakrmanyom. Arihat kon kafroh hasiwa nefm kto Bro Nkifrar tafont htaruhatrm yimam htirahmm. ²⁷ Nd na nikompno rhuhatoh nikomrpakompno kfo nuhaswa mrokfom mirahko turpakomn awany hmbritanomm. Yima yima wakfo nuhas buga hanyswakomm. Wakfo nuhas bugakahtkomm wany bugarahm. ²⁸ Mirahko ndar yima mif thetm ayanhonomm. Rom thatiprpat waswatmt nohwot.

* **10:14:** Disaiperm inji naruhatm, kmi thofm ndt htiruhamn, mirahm, ‘O nom yak miyak duha yitanomm inji nem.’ † **10:25:** Yarhroh bro tohak yarhr futamoumr Belsebur. Nmoh akort kutewunomr Tndhr. Tndher nd Belsebur.

Yafothathu wasneft rom nhai waskfot. To rom finji yafothat waskfot? Tu duka yanhoiyuk yimar, Bro Nkifrarpar duka yanhokfot. Ror yafothati thatipt rpat hus bugaf yekwarf kahtn tutrf.

²⁹ Niko htitwokomm ndar nunga pirayenm yafuna htifaswam. Niko kangko ka Bro Nkifrar ka nhai htihatoh yakitohkahrm? Nhai. Nd nunga pirayenm rorhu tirtn korhm. Rorhu tirmn rhuuyuk nungenm nhai nohkfot. Niko yimako to inji nd nungenm kanjo rorhu tirmn korhwoko. ³⁰ Yo womt, nikmoh tmariroh tmarifenm Bro Nkifrar bi htitahato thomna buga htatewurm. ³¹ Ndnettn niko be yakrme furawahko. Bro Nkifrar htihatoh kakitohworko nd nunga pirayenm yakitohwa kanjo.”

*Nom, bi Jisasr hiket yimanom, nom kfo pthahato yimam bi wanykfot
(Luk 12.8-9)*

³² Jisasr kfo memor, “Fitoh yimar na hikhatoh womm kfo nuhas kangrm, ‘Na Jisasr hiket yimaya,’ na kfiwanko, inji kfo nriryafet yimar kto nanhu Yifemrpno kfo miruha, ‘Ndar yimar na hikwa yimayer.’” ³³ To fitoh yimar wommpno rhuhatoh na mong trohrahra, tawo na hefenr yorhwa Yifemrhu nyingahato mong trohruhanr.

*Yimam Jisasr hikneft duka marnyahato hikkfot
(Luk 12.51-53; 14.26-27)*

³⁴ Na niamohat mirahko duka amanyom ka bi gbhur hnamorr. Nhai. Na nhai gbhurn hnarmoya. Nann yahrt hnamoya. ³⁵ Na ndar bbinysoft niahato yimam hikwotma, arihat htirahko, yinemr sinyahato yifemr yiho hathuraahr. Yo yinemr sinyahato mmemt yiho hathurahtt. Yimborem tuhant sinyahato yimboremr yiho hathurahtt. ³⁶ Tum yima ripha tehfm tum yiho nahathuraahr.

³⁷ Yimar turhu yifammafn bro dukefr yihatoh tfit na be inji psirnano kakitohwora, nd yimar nhai nanhu yimatoh tohruhatr. Yo fitoh yimar turhu yinemr yinemr rorhu bro dukefr yorhwarn na be psirnano kakitohwora, nd yimar nhai nanhu yimatoh tohruhatr. ³⁸ Yo yimar nhai rorhu bgre mis titahato yau hik hnekahra, nd yimar nhai nanhu yimatoh tohruhatr. ³⁹ Fitoh yimar ndar bbinysofthu toh marnya nmbuharpahat dukahato ndrpat fakitohr, kto nd toh marnya nmbuhat tfit hti hambrafrahr. To fitoh yimar na dukahato ndar bbinysofthu toh marnya nmbuhat nhai dukarfort, nd yimar arihat yo kto niayuk yiham, rorhu toheft be toh marnya hany swanho hanyrahr.

*Kristenm yak marnyet yimar
(Mak 9.41)*

⁴⁰ Niko nanhu disaipenko, frohr kunyko tamoh nakuyekworko, nd yimar nann nakuyekwor. Yo frohr na kunyko nakuyekwora, nd yimar na kfo tkurafyuk Bro Yifemrn nakuyekwor. ⁴¹ Wom yimar wom profetr htihatoh kfo kangr, ‘Nd yimar profet hingneft tohwa yimayer. Kunyko nakuyakruhanr.’ Inji dukahato nakuyekrr, nd yimar Bro Nkifrar profetm ttha hany shombat, rom yakyuk tamohm ror rpat yakrahmm. Yo wom yimar wom Bro Nkifrar hiket yimar htihatoh kangr, ‘Nd yimar Bro Nkifrar hikwor. Kunyko nakuyakruhanr.’ Inji dukahato nakuyekrr, nd yimar Bro Nkifrar rorhu hiket yimam ttha hany shombat, rom yakyuk tamohm ror rpat yakrahmm. ⁴² Yo na kfo mifwanko, fitoh yimar ndar nanhu yufapa duha disaiperm htihatoh kfo famur, ‘Ndm Jisasrhu disaipem yimayem.’ Inji htihatoh be gonng bupa furam hiyefirm, nd yimar tawo Bro Nkifrar ttharahr.”

Nd yima Jisarr, tamohtet yimayer?

11

(Sapta 11.1–16.20)

*Jonrhu disaiperm kfo tkrurafhato Jisarrpno yimo yuhat
(Luk 7.18-35)*

¹ Jisarr turhu 12-pela disaiperm mrokkom he buganihato nd tkitt tfit htanyhato yimor. Nd Galili rhuyuk taunm yi htfashato Bro Nkifrarhu mrokkot kfo nuhas bonuhasmorm.

² Kraiss hingernamea hingernefroh mrokkom Jon Baftaisr kalabus tohetrn wanyakmor. Wanyakhato tu Jonrhu wom disaiperm kfo tkrur memorm, ³ “Brorpno waiko. Waikahkomn wattiwon wamitwako, ‘Ka nd Bro Nkifrar kfo memo, “Wom yimar nierahr.” Ka mif ninn kfomor o ka womr nierahr?’ ” Be nd ttiwon nmbuhat yaknihato Jisarr mkfo ttiwonmorm.

⁴ Jisarr wanyhato kfo memorm, “Waikahkomn, Jonr wakfo nuhas bugat-wakomr nd niko wanuka mrokkom yo hita nefm. ⁵ Nyinga kunyjetm tfit yukatohwa yuhat yo wura minysafetm marnyanita yuhat yo lepra yaketm marnyanita yuhat yo yimbhindang kihmnyietm marnyanita yuhat yo noheh yimam tfit sinyewa yuhat yo nd knobokroh rirhutayuk yimenm Bro Nkifrarhu gutnius mrokkot wanuka yuhat. Nd ndm wakfo nuhas bonuhastwakomr. ⁶ Yo wakfo wamitwakomr, yimam na niwa nefm htihato rpa dukefrpar rhuhato duka kangm, ‘Nd ror niwa nefm tu yafotet nefm newur.’ Ndhitet dukefm duket yimam Bro Nkifrar toh hongmb hmbrehrahr.”

⁷ Be nd yimam yimom. Yimotm, rroh mongkorn Jonrhu mrokkom yakhat kfo pthamorm. Kfo memorm, “Niko nungur tik furat yihato Jonr htimohate tamoh dukefmm memoko, ai ahtinomr? Ka memoko, nd wifort yihomakni myaknita yuworhur, ai ahtinom? ⁸ O be nd bro marufa kfet hifa hifa wondh wuska hmbreyet yimar memoko, ai ahtinom? Nd hifa hifa wondh wuskam hmbreyet yimar, kingroh kuny kmifam tohwa yimayer. ⁹ To nikome to tamohroh htit yimoko? Profetrhu htit yimoko? Akfoyanko, ror hingernewa profet hingerneft nndo kitt. ¹⁰ To nd Bro Nkifrarhu rfa borngt kfiwut,

‘Ninhu yi mrokkofthu kfo nuhas hanyuk yimar bi kfo tkruraf hanyrhotanr bi rorn tohak hanyhato mrokkot bi kfo hanyrahrr.

Rorn bi tohak hanyhato yihotar bi yau mngon hanyrahrr.’

Mal 3.1

Nd mrokkot kfomo yimar, to Jonr. ¹¹ Ndnetn na kfiwanko, Jon Baftaisrhu yufat be tu broye. Nhai wom yima mif thetr Jonrhu yufat kanjo ndar bbinysoft tohrmor. To tfit kfiwanko, fitoh yimarn tu hefenrhu kingdomkfo tohr, tor nd yimarn tu bro yufa mift yakrahrr.

¹²⁻¹³ Jon Baftaisr tafi mfnah duha, Mosesri profetm hefenrhu kingdomkfothu mrokkot ptha nuhas hnamomm. Ptha nuhas hnamomn Jon Baftaisr mfnahmor. Jon Baftaisr mfnahhato yihotar fau mngon hanyomorr. Tfit nd yiharn namburet yimam rim toh rafakmomt hefenrhu kingdomkfothu nia yuhat. ¹⁴ Nd nkifra mrokkot bi nkifra profetm kfo memo Irajarr tfit nierahr, nd mrokkot to Jonrn kfomot. Jonrn bi nia twanhomorr. To kangko, nd mrokkot awany yakionomt, nhai mrokkom. ¹⁵ Yimbhindangeteko, ndar na kfiwa mrokkot wanykfof.

¹⁶ Ar yiharhof yimam niwa nefme tamohm akfo nhombryanm? Akfoya yon mumenm niwa nefm newum. Maket swirm o wumt swirm yonm hitiwokomm. Wom yonm mano riruhato womm rikfiwumm, ¹⁷ ‘Nom tuhan yindariroh niyak tatrut yiha wumtwa musikkkfot wumtnomt, niko nhai grharfoko. Nur windohm mayi nmbuhampno rpat windohnomm, niko nhai nurrfoko.’ Inji yon mumenm kanjo nnakfo nnakfiwum. ¹⁸ Jon Baftaisr nia tohmohat, nhai nuwa yehato kfo bruttnarmoar. Nuwa kurhato Bro Nkifrarpar kfo bruttnamour. Yo nhai spaket drinkfot yarmoar. Yimam inji htihato kfo memoum, ‘Kmi yarhm fknayetrn nuwa kurhato kfo bruttnewur.’ Inji kfomomr. ¹⁹ Tfit ar yihat na nikmoh tu Bro Najema niamohat, bupa nuwa yewota, tfit yimam ndt htihato tfit kfo kangm, ‘Wahtiko nd yimar nuwa yemungrofoter yo spaket drinkfot masat hmbritrarn spakwor. Yo takis yekwa yimami fasoh nefm niwa yimampno nabnot habriwur.’ Inji inji kfiwuma. Bro Nkifrarhu duka tungunefrn tamoh tamoh nefm mhfnahnewatrm, nd tkittn yimam htihato kfo kangm yafotheter nd rorhu dukefr.”

*Bro Nkifrar yak hik duha kmim
(Luk 10.13-15)*

²⁰ Boknambok taunm Jisasr bok mirakerkfof fak nuhas hnamourm. Rom inji htimoahat nhai yima yuhum yak kekutrmomm. Ndnatn nd taunroh yimam Jisasr kfo huttmorm. ²¹ Kfo memor, “O ar Korasin thofenko, finji rhu bebhirkhokma? Yo niko Betsaida thofenko, niko inji buga. Finji rhu bebhirkhokma? Bro yuhuwaf nmbuhat korhtko. Bi wom yimar Tairti Saidont aikahrn mirakerkfof ahingrnat, na nikompno mirakerkfof hingrnamo kanjo, na kanga ka Tair thofmi Saidon thofm tum nayuk fasoh fasoh nefm hti bebhato bi bek tham tabhutanihato yuhun brasingm ruhato yima yuhum bi yak kekutrmomm. ²² Ndnatn na kfiwanko, kto bro kotkfot tohruha yihart, Tair thofmi Saidon thofmne bro yuhuwafest htarahr. Nikome be inji. ²³ Yo niko Kaperneam thofko, kangko, ‘Ka yura mount muhrahnom?’ Nhahi. Niko nndo helko riyahkonwe. Wom yimar na nikompno mirakerkfof hingrnamo kanjo Sodomt mirakerkfof ahingrnat, na kanga ka Sodomt nhai batirfott. Nhahi. Rhurfot. ²⁴ Ndnatn na kfiwanko, kto bro kotkfot tohruha yihart, Sodomt tu bro yuhuwafest htarahr. Nikome be inji.”

*Krhopam hta kanhitiwa yimako, nanpno wahnakahtkomm yak thuhiruhanko
(Luk 10.21-22)*

²⁵ Jisasr inji pthanihato Bro Nkifrarpar kfo bruttna memor, “Dajaye, ni nda mounti bbinysoft buriwa Nkifraye. Ni tu hifa dborioh nefm namo. Ni namo nefm hifa nhai nd bro duka tungunet yimampno narmotnm htiromm. Nhahi. Yon mumenmpno namotnm romn htimomm ni namo nefm. Ndnatn na kfo yindhorwann. ²⁶ To Bro Nkifraye, nd nefm ni inji namohat ni tunhu duka yima yuhur inji namo.” ²⁷ “Nanhu Yifemr bi nanhu tirnm tamoh tamohm bi hta bugamorm. To nhai wom yimar nd Bro Yifemrhu Yonr hti mikahr, ‘Arr ka Bro Yifemrhu Yoner.’ Nhahi. Tu Bro Yifemrpar tawisafwor. Yo nhai wom yimar nd Yonrhu Yifemr hti mikahr, ‘Ndr ka rorhu Yifemr.’ Nhahi. Tu Yinem yonrpar turhu Yifemr tawisafwor. Yo fitoh yimam bi tu Yinemr bi kfo nuhas famurm, ‘Ndr nanhu Yifemr,’ tom nd yimarpar tawisafwomr nd Yonrhu Yifemr.”

²⁸ Niko yimako bro krhopam tita hasohato bi minysaf bugiwako, nanpno wania bugakahkomn rhu witarahko. ²⁹ Na wayakko. Na yakkahkomn nann nikmoh doh mfhar atohhiyanko. Nann doh mfhar tohhato yak nuhasaf hanyruhanko. Nann htiyaf hanykfot. Tamoh tamoh nefm na noh hmbre yima yuhurpno niwanm. Nanpno yihato nann doh mfhar tohruhanr, niko nhai wom tamoh dukefm yakruhatko. Nhai. ³⁰ Na doh mfhar tohneft dohr be yi furarahr. Nhai wom tamohmpno mrhutaruhatr.”

12

Rhu krna Sabat yiharhu mrokfot (Mak 2.23-28; Luk 6.1-5)

¹ Wom yiha, Judam rhu krnamoa bro Sabat yihar, Jisasr wit swirm htamo yuhamn fau hanyomr. Rorhu disaiperm yatinoh hanyhato nd wit swirroh wit dmm yak tmbhakni hanymoamm fi hanymoumm. ² Farisim inji htihato Jisasr kfo memomr, “Tamohmpno inji nem? Bro Nkifrarhu thfa mntwat inji kfiwut, rhu krna Sabat yiha nhai ndpa ndpam tmbhakkfot.”* ³ Jisasr inji wanyhato kfo memorm, “Nikone Defitri wom yimam yatinoht rhu hasohato nkifra temperr rim htayet nuwa rikat rim yakhato yamo nmbuhathu tndhte, ka htitkomt o nhai? ⁴ Defitr to Bro Nkifrarhu temperr fkenihato nuwa rikat bi Bro Nkifrarhu yufatpno rim htayukt rimakmortn, briaako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt. ⁵ Yo niko ka htitkomt prism Sabat yiha boririfhut hikhato Bro Nkifrarhu temperr yihato tu prisroh hingrnefm hingrniwa yuhat? Nd Sabat yiha nd prism yi hingrnawohat, to finji niwam? Mrokfetm rhuwom? Nhai. ⁶ Na kfiwanko, nd niko kfiwa Bro Nkifrarhu temperrhu nkifra hingrneft ndt be yura kak wunanimoumt. To kfiwanko, tor wom yimar, tu Bro Nkifrarhu temperrhu hingrneft yakitohwa yimar, tor tukompno brbo tohwor. ⁷ Bro Nkifrarhu rfa borngt wom mrokfot korht. Nd mrokfot kfo kangt, ‘Na nhai hti wofnkahanko nd niko tarioh mtha fura bofurewohat. Yima yuhuwafwa nmbuhatn hti wofnwanko.’ Nd mrokfothu yimbu yuhat ayakkomt, to nhai fasoh nefm naduhat yimampno ndhtet mrokfom turmotkomm. ⁸ Wawanyko, na nikmoh Bro Najomann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

Rhu krna yiha Jisasr yak marnyamo tir behohet yimar (Mak 3.1-6; Luk 6.6-11)

⁹ Jisasr nd kmit htanyhato tfit Judam rhu rifinyhato kfo bruttnamoa rmontn fkenimor. ¹⁰ To nd kunysn wom tir gram tip behohet yimar rhumor. Ndhtet dbohnet yimam Jisasr fak marnyamourm. Ndnnett wom yimam ruhato memom, “Afo was tiwonrahnomr. Sabat yiha yak marnyarahr o nhai.” Nd dukeftpno kfo ttiwon memomr, “Ka Sabat yiha yimam yak marnyanefte ka hifan o nhai?” ¹¹ Jisasr inji wanyhato kfo memorm, “Ni wom yima sifsifetnn ninhu wom sifsifr nd rhu krna Sabat

* **12:2:** Judaroh nkifra boririfhut, bi nkifram myakitoh fnahmot, kfo memom, bro rhu krna Sabat yihar nhai wom tamoh hingrnefenm hingrnakfot. Kfo memom, nd yihar nhai wom tamoh yeshrim yakkfot. Nhai. Nkifra gonborngt htikfot Kisim Bek 34.21. Farisim memom, nd thfa mntwat kfoyk mrokfotn hanyjornamom.

yiha muht yohnerfohat, ka be afo hti marsisa htarfonr? Nhai. Miyakrfonr.
¹² Yimar tamoh foh yaurn be nyingarpaye hti marsisa hasokfot, yimayer. Nhai wom kfo rafo mrokfot rhukaht yimam Sabat yiha yak marnyaneft.”
¹³ Inji kfonihato nd tir gram tip behohet yimar kfo memorr, “Tir gram tipt wathu susnant.” Thu susnamotrt marnyanimotr. ¹⁴ Be nd kunys rhuuyk Farisim inji wahti tanymohat nhai wom warhurmom. Be fnahni twanhomom. Fnahnihato Jisasrhu wasyuk mrokfot rim haruhaknimom.

Jisasr tu Bro Nkifrarhu hingrna yima mifer

¹⁵ Jisasrhu was mrokfot Farisim yiro yiro kfo habofknetamohat Jisasr bi htimorm. Jisasr inji htihato nd kmit htanyhato yimor. Ror yimohat bok met yindarim ror yimo yuhat hikaknimomr. Nd yimam dbohnet bugamn rroh dbohnefm fak thu bugamorm. ¹⁶ Dbohnefm yak thu buganimormn kfo memorm, “Na dbohnefm yak thuhat, mirahko wommpno akfo srhnom.”
¹⁷ Nd mrokfot Jisasr kfomohat Bro Nkifrar profet Aisaiarpno kfomo mrokfotn rhu hikmot. Kfo memorr,

¹⁸ “Ndarr nanhu hingrna yimayer. Na tuka kfo htamoyanr.
 Rorn hti yindhorhato nanhu yima yuhur rorpno korhr.
 Nanhu Yafothar thu nawohruhattr,
 kmi kmim tohwa yima tangim kfo nuhas hany mirahrm, ‘Bro Nkifrar bi kak yibonworko.’

¹⁹ Ror nia thoft nhai yimampno nakfo hamuhruhattr,
 nhai thfa yaginyaruhattr.

Nhai kmimn o yihotamn yihom het grhak mhet grhakruhattr.

²⁰ Yimar be suhr suhr yitam nhai be nyingarpaye yukatoh hasoruhattrm.
 Nhai.

Rorn yak kasinyaruharmn tpi hirahrm.

²¹ Yima tangiroh dukefm rorrpar yihato
 rorrpar yukatoh gari haso hakurahm rroh rhu nmbuhathu yak marnyaneft.”

Ais 42.1-4

Kfo memom, Jisasr fasoh tndhrhu bbukeftpno hingrnnewur

(Mak 3.20-30; Luk 11.14-23; 12.10)

²² Nd yiha wom yarhr fknayet yimar Jisasrpnno hnamomr. Nd yimar tngt foukihmotr yo nyingam kunyjmomr. Jisasrpnno hnamotmr, Jisasr yak marnyamotrr nd yimar tfit fukatohmor yo pthamor. ²³ Yimar inji htihato tuha mrokfo duhatm rhumom. Tum nattiwon nattiwonmoum, “Ndar yimare kane, nd Defit frikefthu Yoner?”[†] ²⁴ Farisim inji wanyhato kfo memom, “Nd yimar yarhroh bro tohak Belseburrhu bbukeftpno kak thuworm kmi yarhm.”

²⁵ Jisasr bi htimorm rom inji dukamohat. Htihato kfo memorm, “Rpa kantrikfot tohyuk yimam buha nayak mkuhato rim toh mtohhato nnaknineft, be nd kantrikfot yohniraht. Nhai wom yimam tohruhattrm. Yo rpa taunt o rpa kunys tohyuk yimam nhaf inji. Tum nayak mkuhato nnayurneft, be nhai wom yimar tohruhattr. Be tum naye dborha nohhato yima duha tkitm rhurahm. ²⁶ Tndh yarh Satanr, nhaf to inji buga. Nd tndh yarhr sinyahato wom yarhm yak thuneft, be nhai wom yarhm tohruhattrm. ²⁷ Nikmoh wom yimam Bro Nkifrarhu yufatpno kmi yarhm

[†] **12:23:** Judam rom bi mrokfot wanyngotmomt. Nd mrokfot kfo memot, “Judaroh yakyuk yimar, Defit frikef yuhatn nierahr.” Nd mrokfot bi wanyngotetmndnetn inji kfomom.

yak thu thoft, nhai kfo mekahkomm, ‘Tndhrhu yufatpno kmi yarhm kak thuwomm.’ Nhai. To tamohmpno na Bro Nkifrarhu yufatpno kmi yarhm yak thuwohat, kfo yamukako, ‘Tndhrhu yufatpno kmi yarhm kak thuworm?’ Nikmoh yimatm kfo mirahmko, ‘Kfo furewuko.’²⁸ Htikfot. Bro Nkifrarhu bbukeftpno kmi yarhm kak thuwanm, waduka wamitwako, Bro Nkifrarhu kingdomkfo bi asot nompno.

²⁹ Nhai wom yimar wom nanyjar nngrajohet yimarhu kunys fknenihato yimar rhu hany rorhu kunys rhuyuk wuskam myaknihekfot. Afo nd kuny sikatr tir wuram kisahato ee btn rorhu kunyshu rhuyuk wuskam yaknikfot.

³⁰ Yimar be buha tohhato nanhu tamoh tamoh nefm be nyingarpaye kukatohworm, nd yimar nhai nann tohno yibonkahr. Womrn tohno yibonwor. Yimar nhai nann hingrnanhokahr yimaroh yakhato Bro Nkifrapno hanyneft, tor nd yimarn mis yakhato tabohikworm.

³¹ Kfo mifwanko. Bro Nkifrar duka mmorahrm yimam nayuk fasoh fasoh nefm yo tamoh mrokfo bebm tnge pthayukm. To fitoh yimar na Bro Nkifrarhu Yafothathu bbukeftpno hingrneta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbhuruhatrt, be Bro Nkifrar nhai duka mmoruhatrm nd yimar kfoyuk tngt. Nhai. ³² Fitoh yimar na Bro Najema hingrnayuk hingrneft htihato kangr, ‘Nd yimar nhai fipet hingrneft hingrnakahr,’ inji kfoyuk yimar Bro Nkifrapno tfit kfo gbhukfot. Ndnatn nhai be kfontg duka hanyruhatrt ror pthayuk tngt. Nhai. Duka mmorahrt. To fitoh yimar na Bro Nkifrarhu Yafothathu bbukeftpno hingrneta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbuhruhatrt, be Bro Nkifrar nhai duka mmoruhatrt nd yimar kfoyuk tngt. Duka hatohraht.”

Miyuk tihathu mrokfot
(Luk 6.43-45)

³³ “Hifa sinya warho marnyet mis hifa yukham hirwomt. Fasoh sinya warho marnya duha mis fasoh yukha behohm hirwomt. Yimam yukhamn hti nhtewum. Yukham hifayem, kangm ee nd mis tu hifa dborioh miyet. Yukham fasohem, kangm o nd mis fasoh nnariyet miyet. ³⁴ Arom ruhetmo, yima yuhur rhuyuk tamoh tamoh mrokfo rifhur tfit tngtn ptha nriyafwotm. Ndnnetn niko, fasoh yima yuhetko, nhai tu hifa dborioh mrokfom mfrfnahkahmko. ³⁵ Yimar, tu hifa dborioh yima rifuhetr, tu hifa mrokfo rifhur, tu hifa dborioh nefm mfrfnahnewumr. Fasoh yima yuhetr fasoh fasoh nefm mfrfnahnewumr.

³⁶ To kfiwanko, nd bro kotkfot yakitohruha yiha, nd yiha nd yimam tubatu fura bofuriwa mrokfom kfo ptha hik bugarahmm. ³⁷ Tuko bi kfoyuk mrokfomn Bro Nkifrar tfit yakruharn yak nhta hti kotha inji naruharmn, kfo mirahr, ‘Ni kfomo mrokfot krhonitatt, ni mrokfete. Ni womn kfoyuk mrokfot nhai krhonikaht. Ndnnetn ni nhai mrokfo duhate.’”

Womm memom, “Jisasr mirakerkfot ahingrnakahtrt ahtinomt.”
(Mak 8.11-12; Luk 11.29-32)

³⁸ Boririfhu mrokfothu wom tisam yo Farisim yihato Jisasrpno mkfo memom, “Jisase, wom bro mirakerkfot wanakahtn nom htiruhanomn mirahnom, ‘Awi tu yafotheter.’”

³⁹ Jisasr inji wanyhato kfo memor, “Ar yihofrhof fasoh net yimam Bro Nkifrar yafhohato to be kfo kangm, ‘Mirakerkfot htihato ee bt kfo mirahnom tu Bro Nkifrarhu bbukeftpno hingrnewur.’ Inji kfiwotma to na

finji kanjohot mirakerkfot hingrnarhota ndtn htiruham? Kangm, ‘Mirakerkfot ahtinom,’ profet Jonar hingrnamo mirakerkforpat hingrnarhota ndt htirahm. ⁴⁰ Jonar husfirpa marmi husfirpa yifungm bro kmi tndh yirarhu yatitn rhumor. Bro Najomr to inji narahr. Ndar bbinysofthu rifhutn yohniruharn, husfirpa marmi husfirpa yifungm tohrah. ⁴¹ Bro Nkifrar kot yakitohruha yiha Ninifa thofmn mtohruhamn kfo nriyafhirahmm niko ariharhof yimako niwa nefm. Rom bi fasoh nefm mong trohmomm Jonar Ninifat yihato Bro Nkifrarhu mrokfot kfo pthamo yiha. To kfiwanko, tor wom yimar, tu bro mrokfo ptha rifhur harhuwa yimar, tor tukompno brbo tohwor. ⁴² Kto kot tohruha yiharn sautko tohyuk kwint sinyaruhatn tfit rotn tohhato ariharhof yimaroh fasoh nefm kfo nriyafhirahtm. Nd kwint tu bbinysofthu wuroh krayeft tohhato wanymot Solomonrhu hifa hifa riduka aduka yima yuhum. Wanyhato memot, ‘Afo yirhoyann htiruha rorhu duka yima yuhur.’ To kfiwanko, Solomonrhu riduka aduka yima yuhur nhai be mfro rim dukata mdukatarmor. To tor wom yimar asor brbo tohwor. Rorhu dukefrn tu bro mifer. Riduka adukefr tu bro mifer.”

Kmi yarhr wom yimarn hatohmo yuhat
(Luk 11.24-26)

⁴³ “Kmi yarhr wom yimarn hatoh haso kto wom yiha yak tuhafo thombat afo nd yarhr kitwor bupa duha tkittn. Yihato rhuyuk nfri tkitt hambro htfaswor. Frhambro hany frhambro hany nhai wom tkitt yakrfor, ⁴⁴ tfit kfo kangr, ‘Nhai nanhu tohyuk tkitm. Tfit tuka toh tanyomo yimarn yiruha.’ Yitarn mhtitworr nd yimarhu yima yuhur yak marnya bomarnyahato Bro Nkifrarhu Yafothat rhu duha brioh wutharn, ⁴⁵ to be tfit yitarn wom 7-pelakfot miyekworm. Nd 7-pelakfot tu bro bro nefm hatonitm. Rompno mnathu hmbrenihato nd yimar rompno fknitmr. Rompno fknihato be nd yimar nhai ror tohmoa kanjo be wumtnano yikahr. Nhai. Tu nefm newur. Ndar yihofrhof fasoh net yimam, to be inji tu nefm na hakurahm.”

Jisasrhu tu mmem nmemrom
(Mak 3.31-35; Luk 8.19-21)

⁴⁶ Jisasr yuhre ptha hanyetrn turhu mmemti nmem najohfit yi mfnah-mom. Mfnahhato memom, “Jisasr pno naphtharahnom.” Jisasr ror yiro kunys ruhetrn briahako tohmom. ⁴⁷ Wom yimar fknienihato Jisasr kfo memorr, “Ninhu mmemti nmem najohfit tom niem wom mrokfomn.” ⁴⁸ Jisasr wanyhato kfo memorm, “Frohmn nanhu mmemroyem? Frohmn nanhu nmemroyem?” ⁴⁹ Jisasr turhu disaiperm riyak nuhas hanyhato kfo memom, “Asom, ar yimamn tom nanhu mmemt yo nmemrom.” ⁵⁰ Yimam hefenr rhuwa nanhu Yifemrhu dukefr dukahato yak hikwam, tom nanhu mmemrom, mndaremrom, nmemrom.”

13

Yewuri tpim dborhiwa tkitm
(Mak 4.1-9; Luk 8.4-8)

¹ Nd yiharn Jisasr kunys htanyhato tek bari thmbt mirhumor. ² Tek bari thmbt miruhetrn bok met yindars rifinyaknimom. Rifinyakni rifinyakni rifinyakni Jisasr inji hti batihato sinyanimorn tek barit hiruyuk mmbtrn mirhumor. Rom met yindars bari thmbt ritohmom. ³ Bok mrokfom mmbtrn riruhato rikfohemoahat, mrokfom be yura fafunamourm. Womt kfo

memorm, “Wom yimar mswirt hingrnahato wit tpim yaknihato thu brur htfasmorm.

⁴ Yihota tafont misuhyukm nungam yihato tout buganimomm. ⁵ Wom tpim misuh hanymoum tahi siket tkitmn. Bbpam be htfapamn nd yewuri tpim yudbat dborhahato sinyamom. ⁶ Tfit marr tahato tahi sikthu kkah nadbofnefrpno nd yewuri fanroh nembfam ftaahato nohmom. ⁷ Womm hig suhmpno misuh hanyukm rpat hig tofmpno sinyahato kihawot hmbriyaf-momm. ⁸ Nd tu hifa dborioh bbinysoft misuh hanyukm, romn tu hifa sinya marnyamomn yukha hir trukmom, wom dmm 100 hirmoum, wom dmm 60 hirmoum, wom dmm 30 hirmoum. ⁹ Yimar yimbhindangett, ndar na kfiwa mrokfot wanykfot.”

Jisasr kfomo kfo nhombra mrokforoh yimbu yuham

(Mak 4.10-12; Luk 8.9-10)

¹⁰ Turhu disaiperm niahato ttiwon memorm, “Tamohmpno ni mrokfom yimam yahukohat be yura yafuni-wanm?” ¹¹ Jisasr kfo memorm, “Wanukko, yafuna mrokforoh yakyuk dukefr bi nikomn hemor. Hefenrhu kingdomkfothu kafrohet mrokfom be kfo nhombra kanjo pharahm o mrokfom be yura yafunarahm, nikomn dukefm bi yakrahkomm. Nikomn dukefm bi hemor. Womm nhai. ¹² Frohr nda yura yafunewa kafrohet mrokfom wanyhato yima yuhum fekr, nd yimar Bro Nkifrar tfit wom dukefm hirahr. Frohr nd yura yafunayuk mrokfom nhai wom dukefenr yakrfor, nd yimarhu duka yima yuhur yak thurahrr. ¹³ Nd yimam rom nyingam kukatohwomm, to nhai tamohm htikahm. Yo yimbhindangetem, to mrokfom nhai wany hik marnyakahm. Nhai. Ndnetann kanga mrokfom tamoh tamohm akfo nhombraakahta yima yuhum nhai yakruhatm. ¹⁴ Nd yimam dukefm yak duha yita nmbuhat to be Aisaiair kfomo mrokfo yuhatn kak hikwom. Aisaiair kfo memor, ‘Mrokfom, wanyrahko, wanyrahko, wanyrahko, to nhai wom dukefm yakruhatko.

Nyingam yukatoh hakurahko, to nhai wom tamohm htiruhatko.

¹⁵ To tamohmpno kfo pthayuk mrokfom nhai wanyhato wom dukefm yakruhatko?

Yo yukatohyuk nyingam nhai htiruhatko wom tamohm?

Ndt nhai be sfno. Yimaroh yima yuhum nhai wom dborioh dukef duhatem.

Wanyuk yimbhindangm bi be, bi kihmnimomm, yo yukatohyuk nyingam bi kunyj kihmomm.

Nyingam akunyj duha yimm awi htirfom, yo yimbhindangm akihmni duha yimm awi wanyrfomn yima yuhum yakhato tfit nanpno niar-fotm, yak marnyarfoyanm.’

Ais
6.9-10

¹⁶ To niko wayindhortwako. Nikmoh nyingam htitwomm tamoh tamohm, yo yimbhindangm mrokfom wanukmm. ¹⁷ Na kfo mifwanko, bingot bok-nambok profetmi Bro Nkifrar hiket yimam nd niko htita shrm memoum, ‘Ahtinom,’ to nhai. Nhai nd shrm htirmoamm. Yo nd niko arihat wanuka mrokfot memoum, ‘Awanyinom’, to nhai. Nhai nd mrokfot wanyrmoamt.”

Yewuri tpiroh kfo nhombra mrokfothu yimbu yuhat

(Mak 4.13-20; Luk 8.11-15)

¹⁸ Jisasr kfo memorm, “Nd yewuri tpiroh kfo nhombra mrokfothu yimbu yuhat inji korht. ¹⁹ Nd yewuri tpim yihota yau yuhatn misuhwam, ndm kfo

nhombramoya yimam hefenrhu kingdomkfothu mrokfot wanyhato yima yuhum yak duha yihato tfit Tndhr niahato nd rroh yima yuhumn Bro Nkifrar htayuk mrokfot yak thuwa yuhat. ²⁰ Yo nd tahi sikroh yewuri tpim misuhhato dborha dimanditam, ndm kfo nhombramoya yimar afo barkofpam hifa yindhor nmbuhatpno yudbat Bro Nkifrarhu mrokfot mhik tefi yaknihato ²¹ tfit tamoh krhopam kekwo, to be tfit wuyekwor. Wuyakhato bmbri kafho thuwort Bro Nkifrarhu mrokfot. ²² Yo nd yewuri tpim hig suhmn misuhwam, ndm kfomot, yimar afo Bro Nkifrarhu mrokfot kekwort. Mrokfot yekwartn, tfit turhu toh nmbuhat, yo maru dukefrn, nd nd dukefrn rim suhnit; bibe. Nd mrokfot yiro mifrfnahnitt. Nhai sinyahato yukha hirkahat. ²³ Nd yewuri tpim tu dborioh bbinysoft sinyahato hirwam, ndt kfomot yimam mrokfot wanyhato wany duka tungunewamn, wom dmm hirwom 100, wom dmm hirwom 60, wom dmm hirwom 30.”

Mswirthu kivr bebthu kfo nhombra mrokfot

²⁴ Jisasr tfit wom kfo nhombra mrokfot kfo memorm, “Hefenrhu kingdomkfo kangme yimar mswirt dborioh wit yukt frtrufmor. ²⁵ Tfit yifung-nano kmi thofm hweyetmn nd yimarhu yahr kmim yauyaknihato fasoh kivr bebroh tfam frtruf wuna fnahmomm nd dborioh witroh tpim frtrufmo tkitt. ²⁶ Wit gadent warho bugani ka yukha hirruha asha hti hanyomm nd fasoh fasoh kivr bebt rpat sinyamom. ²⁷ Be nd mswir tikatru hingrna yimam inji htihato mswir tikatrpno yihato kfo memorm; ‘Bro yimaye, nom memonom, ka witroh tpiram frtrufmo. Tone nd nd kivr bebt rpat sinyewate fitoh yuhat niamot?’

²⁸ Kfo memorm, ‘Yahr kmim ndhtet neft namom. Romn nd fasoh kivr bebthu tpim tfit frtruf wunamomm.’ Tfit nd hingrna yimam kfo ttiwon memorm; ‘Ni finji dukewa? Nd kivr bebt ka dbifr thurfonomt?’ ²⁹ Kfo memorm, ‘Woye, nheno! Mirahko ka kivrppam dbifrwonom. Yewuri fanm bi hir yibon hanyetm rpat dbifr thurahkomm. ³⁰ Be inji rpat afo asinya hanyom. Bi nd witroh yak yihayere, ee btn nd witroh yakyuk yimam kforhotanm kipt dbundoruhatn marrpno kaunyohato tfit manyruhamn manyet manyetmn hanyhato hta funarahmm. Kto nd witrat yakhato htarahmt yeshrt htewa kunysn.’”

Mastet tpirhu kfo nhombra mrokfot (Mak 4.30-32; Luk 13.18-19)

³¹ Jisasr tfit wom kfo nhombra mrokfot kfo memorm, “Hefenrhu kingdomkfo kangme tefi mastet tpiyenrn yimar yaknihato turhu mswirtn nuhterr. ³² Mastet tpiyenr kangme sayor tpiyener. Nd mastet tpiyenr frdborhahato yonmari bufum korhm. Kto nungam ktit kiroht ndha niahato wuswomt.”

Yisparoh kfo nhombra mrokfot (Luk 13.20-21)

³³ Tfit wom kfo nhombra mrokfot kfo memorm, “Hefenrhu kingdomkfo kangme metn bretpa hingrnayuk plauapami yispam rpat yaktk botk hmbrihato, kto tfit nd bretpat kur fannahato bropat rhuraht.”

Jisasr kfo pthamoa mrokfom kfo nhombra mrokfompno mrokfom kfo pthamourm
(Mak 4.33-34)

³⁴ Jisasrhu mrokfom kfo pthamoam nhai be kfo ptha mifrhoarm. Nhai. Be kfo nhombramourm. ³⁵ Ror inji be kfo nhombra kanjo mrokfom kfo pthamoahat, to bingot profetr kfomo mrokfo yuhat hik twanhomot. Profetr bingot kfo memor, “Mrokfot kfo ptha thombat, be inji yura yafuna hakuruhanm mrokfom. Nd kfo yafuna mrokfom yimam nhai wany hnarmoam.”

Kipr bebt kfo nhombramo mrokfothu yimbu yuhat

³⁶ Jisasr met yindarim htanymormn kunys fkenenimor. Turhu disaiperm yihato ttiwonmorm, “Mswirt sinyayuk kipr bebthu mrokfo yimbu yuhate finji yorhwat? Afo wakfo hikkahtnt awanynom.”

³⁷ Jisasr kfo memorm, “Hifa wit yukham frtrufwa yimar, ndr, Bro Nkifrarhu Yoner. ³⁸ Mswirt, nda bbinysofet. Hifa wit yukham, ndm, Bro Nkifrarhu kingdomkfot tohwa met yindariyem. Kipr bebt, ndm, Tndhrhu met yindariyem. ³⁹ Nd kipr bebt yak trufwa yimar, ndr Tndher. Yewurit yak wuriruha yihar, ndr ndar bbinysoft bnkaruha yihayer. Mswirthu hingrna yimam, ndm, mounmotem. ⁴⁰ Yimam fasoh kipr bebt yak nhafohhato kaht kandhi thuwa kanjo, inji narahm nda bbinysofthu wuroh kur tupoh yihar. ⁴¹ Bro Nkifrar kfo tkrurruhatrm turhu mounmotm, romn yihato yak thurahmm nd fasoh fasoh nefm nayet yimam, yo yimam yak kasuhwa fasoh fasoh nefm. Nhai Bro Nkifrarhu kingdomkfot tohruhatm. ⁴² Yakruhamm kaht turahmm. Kaht tohhato tau nknekrahm. ⁴³ Nd yihart, dborioh yimam Bro Yifemrhu kingdomkfot tohhato rroh funeft hatoh thombat mirahm nndo marr tewur. Yimbhingangeteko, ndar na kfiwa mrokfot wanykfot.”

Bbinysoft tou yop kafrohmo maru kpthu kfo nhombra mrokfot

⁴⁴ Jisasr wompam kfo memor, “Hefenrhu kingdomkfot kangme maru kptn wom yimar mswirtn tou yop kafrohmort. Kto wom yimar mswirt hingrna hanyhato tou yifkasakmort. Rorn nd maru kpt htihato tfit yak wuna marnyahato tou turna marnyamortn yimor. Nd maru kpthu dukefrpno ruhetrn rorhu tamoh tamoh yakmortn yimampno maruhampno yak tuknahato nd wuskaroh marut yakyukt nd maru kpt rhuyuk bbinysoft wiknamor. Be nd bbinysoft wiknamohat nd maru kpt nd bbinysoft ruhettn be ror fakmort.”

Dborioh wunifroh kfo nhombra mrokfot

⁴⁵ Jisasr tfit wom kfot kfo memor, “Hefenrhu kingdomkfot kangme wunif wiknayuk yimar yi htfaswarn dborioh dborioh wunifm hambro htfaswor. ⁴⁶ Nd wunif wiknayuk yimar dborioh wunifr mhtineft, be mhti tanyhato nd wunifrhru dukefrn tfit yihato rorhu wuss tamoh maruhampno yak tuknahato nd wuskaroh marut yakyukt hanitartn nd dborioh wunifr wiknewurr.”

Rugithu kfo nhombra mrokfot

⁴⁷ Jisasr wom kfo nhombra mrokfot kfomor. “Hefenrhu kingdomkfot kangme rugitn yimam tekt yak yifm womhtet womhtet yirat mnaint. ⁴⁸ Rugit bi furkihte, gmnt teh hawitewumt. Gmnt teh hawitahato kak dbothewumm. Dborioh dboriohrpam yakhato rikant kmbritmm. Nd fasoh fasoht tubatutmt. ⁴⁹ Ndar bbinysofthu wuroh yihar to be inji rhuraht. Mounmotm yawihneruhamn nd fasoh fasoh nefm nayet yimam yak thurahmm. Dborioh dborioh nefm nayet yimarpam rhurahm. ⁵⁰ Nd

fasoh fasoh nefm nayet yimam yakruhamm kahtn turahmm. Kaht tohhato tau nknekrhahm.”

⁵¹ Jisars disaiperm kfo ttiwonn memorm, “Nd kfo nhombriwa mrokforoh yimbu yuhame kekwoomm?” Kfo memorm, “Uwa, kekwoomm.” ⁵² To be Jisars tfit kfo memorm, “To be ndnettn boririfhut yakitohwa tisar, ror bi hefenrhu kingdomkfothu kfo nuhas mrokfot bi wany hikhato bi yaketrn, kangme wom bro kunyrhu kuny sikater. Bi wom bro kunyrhu kuny sikatrn turhu kunyrhu rumr rhuyuk dborioh dborioh wuskar kak hfhan bugewurr. Yatket nfriyet kak hfhan bugewurr.”

Nasaret thofm Jisars mong trohmo yuhat

(Mak 6.1-6; Luk 4.16-30)

⁵³ Jisars nd kfo nhombra mrokfom kfo nhombra tanyhato nd kmit htanyhato ⁵⁴ yimor turhu kmitn. Turhu kmitn mfnahhato Judaroh rhu rifinyuk rmontn fknemor. Fknenhato Bro Nkifrarhu mrokfefm kfo nuhas bonuhasmorm. Nd kunys rhuyuk met yindarim rorhu mrokfefm wanyhato tuha mrokfo duhatm rhumom. Wanyhato kfo memorm, “Nd yimare ndhtet dukefme fitha yakmorm? Yo nd ror hingrnewa mirakerkfome tamohtet tongr thu kihwatrr mirakerkfom hingrniwarm?” ⁵⁵ Nd yimar to wom kamdarhu yoner. Mariat tot rorhu mmemt. Jemsr, Josefr, Saimonr, Judasr, tom rorhu nmemrom. Asha frohm rorhu mmom? ⁵⁶ Rorhu mndaremrom to asom asha nompno tohwom. To nd yimare fitha nd bbukeft yakhato ndhtet nefm niwarm?” ⁵⁷ Ndhtet dukefmpno nhai marimom, “Jisars rihtirahnomr.” Nhai. Mong troh bugamomr. Jisars inji htihato kfo memorm, “Bro Nkifrarhu profetrhu yufat bi kmi kmim rhu htfaswot. Turhu kmiti turhu kuny shofm, rompno nhai yufapa duhater.” ⁵⁸ Turhu kmit nhai wany yakioromm rorhu mrokfom. Ndnetrn nhai bok mirakerkfom turhu kmit hingrnarmotr htirmomm.

14

Jon Baftaisrhu noh yuhat

(Mak 6.14-19; Luk 3.19-20; 9.7-9)

¹ Nd yihart Galilikorhof gafanar, rorhu yufat Herotr, wanyomr Jisars namoa nefm.* ² Wanyhato rorhu hingrnayuk yimam kfo memorm, “Ndr Jon Baftais mifer. Na wasmohat, to bi tor, bi tfit sinyamor. Nd mirakerkfothu hingrnayuk bbukeft rorn sinyanihato hnamort.”

³⁻⁴ To bingot Herotr wom nmem Filifrhuh tuhan Herodias yak hutfamohat, Jonrn kfo memorr, “Ndhtet nefn nhai tu dborioh nefn narmo. Nkifra thfa mntwat kfo kangt, ‘Mirahn womrhu mett ayak hutfayanr.’” Inji kfomotrr, wom yimam kfo tkrurafmotrn Jon Baftaisr fakmorm. Yakhato kalabus htamomr. ⁵ Bi nd yiha Herotr bi memor Jonr bi awasanr. Kmi thofmn mfakrmiyakmor. Kmi thofm Jonr htimoumr profetr kanjo, ndnettn mfakrmiyakmorm.

⁶ Herotrhu bet dekfotn bro yemro burwat htamort. Htamotrt Herodiashu yon mett fnahnihato grhamot. Herotr rothu grheft htihato hti yindhormort.

⁷ Hti yindhohato kfo memorm, “Na kfo mif mifwann, ni tamohm kfo ttiwonrahna na be he mifruhann.” ⁸ Be mmemt kfo kangt, “Jon Baftaisrhu

* **14:1:** Nda veskfot kfiwa yima Herotr, ndr Herot Antipaser. Rorn tohmour Galilikorhof gafanar. Jisars nurmo yiha tohmo king Herotrhu yoner ndar Herot Antipasr. Htikfot Matyu 2.

mfhathu yakneft wakfotwa.” Be inji wanyhato yimotn Herotrpnno rim kfo memot, “Na kanga asomif Jon Baftaisrhu mfhat watmbhaknekahnt plettn wakmbrehiyafona.”⁹⁻¹⁰ Be Herotr inji wanyhato be tuha mrokfo duhatr rhumor. Bi bro mrokfot kfo memort, “Tamoh tamohm ttiwonwona na nhai kfo wokrohotan hanyeft. Be he mif mifruhann.” Bi inji kfetrn to be rot Jonrhu mfhathu tmbhakhatu hiyafneft kfomohat, nhai tfit wom kfo wokrmort. Ror nd yontpno naphamohat nd rhuyuk bro yimam bi wanymomr ror nd pthamohat. To be ndnetrn yimar kfo tkrur twanhomorr kalabus yihato soldiaroh yi mkfohato Jonrhu mfhathu tmbhaknaneft.¹¹ Mfhat tmbhohato plettn kmbriyaknehato nd met tmahtn mhemom. Nd met tmaht nd yima mfhat yaknihato mmemtn rim hemot.¹² Tu Jonrhu disaiperm kalabus yimomn rorhu tfmbrt rimakmottn hany fopmomt. Yop tanyhato Jisar yi mkfo nuhasomr.

*Jisar 5,000 yimam yeshri hemo yuhat
(Mak 6.31-44; Luk 9.10-17; Jon 6.1-13)*

¹³ Jisar Jon Baftaisrhu mfa tmbho yuhat wanyhato be mmbrrt yakni-morn wom turpat tkittn yimor. Turpatn turhu disaiperrpampno yimom. To nhai. Met yindarim rorhu yi nmbuhat wanymomn turoh taunm htanyhato fau hambro hik hanyomr.¹⁴ Jisarom mtadbkafmomn nd yonmari yima rifhur mhtihato yuhuwafmorm. Mhti yuhuwafhato rroh dbohnefm fak tuhemorm.

¹⁵ Jisarrhu disaiperm marr htiaf hanyhato Jisar mkfo memomr, “Marr bi yohnitr, ndart yima toh duha wom tkit furayet. Ndar rifinywa yimam wakfo tkrurafkahtnm anatubatunikahmn tumn yeshrim awikna htfaskahmn aye bmtan.”¹⁶ Jisar tfit kfo memorm, “Tamohmpno kfo tkruraforuhanomm? To nikomn yeshri wahekomn.”¹⁷ Tfit kfo memomr, “Nom tirfa bret nuwami hus yiraf, injirpa harhuwonom.”¹⁸ Kfo memorm, “Wahnakomn nd bretpami yiraf.”

¹⁹ Jisar nd rifinyomo tuhant yindars kfo memorm, “Ndha kibr suhtn warhu hanyko.” Jisar nd tirfa bret nuwami hus yiraf yakmorn, yura mountko yukatohhato kfo bruttnamor. Kfo bruttnanihato turhu disaiperm yak tifak hany hiyaf hanyhato kfo memorm, “Wahe nhombra htfas hanykomn.”²⁰ Nd he hanyomo yeshrt nd yonmari yima rifhur yi hanyi yi hanyi nhai ye bugarmom. Be nd yesbhomomo yeshrt tfit fak nhafohmott. Yak nhafohhato hmbremohat, 12-pela kpm hmbremom.²¹ Nd bret nuwa yamo yimam, 5,000 yimam famomm. Nd thomnafat yindarirparohet. Metmi yonm nhai thomnarmomm.

*Jisar yura tek yuhat yau hanyomo yuhat
(Mak 6.45-52; Jon 6.16-21)*

²² Be Jisar yudbat turhu disaiperm kfo tkrur memorm, “Niko bi mmbrrt wayaknikahkomn tek bari mkuko wahir hayukni hanyko. Na afo met yindarim yak kafho tanyruha.”²³ Met yindarim yak kafho bugarmomn, bi yi bugeme ee turpar kminysoft muhmor kfo bruttnaneft. Marr yohnimohat ror turpar yura kminysoft wutohmor.²⁴ Nd mmbrrt yiyukm bi wuringot rim hiretmn, wifortpno bro sikfot sinyahato sikfot yakmott mmbrrt memom nndo forpukhat tohwot.²⁵ Tu wuruh ksfutn Jisar yimor. Yura tektn fau hanyomr.²⁶ Nd mmbrrt rhuyuk yimam htihakmomr yura tekt yau hnamotr tuha yafotha duhatm rhumom. Memom, ka tek yarhr niewur.

Yakrmiyakhato tuha fengr fengrt tohmot. ²⁷ Jisasn hti hato kfo memorm, “Watoh bmtako. Naya. Ayakrmiwahko.”

²⁸ Pitar Jisasrhu tngt wany nhtahato kfo memor, “Bro Nungothete, ni mifn rhu thombat, wakfokahtna na tekt yau hnehato ninpno nieruha.” ²⁹ Jisasn kfo memor, “Wania.” Pitar sinyahato tekt mitohnihato memor, “Tek yuhat yau hanyhato Jisasrpo ka yiruha.” ³⁰ To nhai, rorhu nyingam bro wifort hti yakrmihato bi yohni hany sitamor. Ndnetrn naku ti memor, “Bro Nungothete, wayakna.”

³¹ Yudbat Jisasn tir tuhato fakmorr. Jisasn kfo memorr, “Na kfo yamuhat wania, kane fak sminena? Kane nhai duka marifo, ‘Ror kfitr kita, tekt yau hanitohat nhai yohnitwota.’” ³² Be inji kfonihato mmbtr mikmbremof. Mmbtr mikmbremof nd wifort tone tmbhomot. ³³ Yimam nd bot rhuyukm Jisasrpo rim tabokme rmonhato kfo memorr, “Ni tu Bro Nkifrarhu Yone.”

*Jisasn Genesarethu bok dbohnet yimam yak marnyamo yuhat
(Mak 6.53-56)*

³⁴ Tek barit hir hayuknimomn Genesaret mkuko rim dbkafmom. ³⁵ Nd Genesarethu yimam Jisasn nhai hti mmormomr. Hti hato memom, to tawom Jisasn. Hti hato mrokfot yudbat frhtfasmott nd brbo rhuyuk kmim. Jisasrhu yi mrokfot brborhof kmim wanyhato nd dbohnet dbohnet yimam hany bugamomm. ³⁶ Yihato dbohnetm kfo ttiwonmomr ror hmbreyuk hmbreshathu psifikorn be tayouti hanyhato dbohnefrohu thu troh tany hanyneft. Be nd yuhat dbohnet yimam hikhato dbohnefm thu troh tany hanyomomn.

15

*Nkifra boririfhu yirmoht
(Mak 7.1-13)*

¹ Wom Farisimi boririfhuthu tisam Jerusalem htanyhato yimom Jisasrpo. Yihato kfo memorr, ² “Tamohmpno ninhu disaiperm nhai hik duha yikahmt nmoh nkifram hayuk boririfhut? Nuwa ye shombat nhai tirm kifsafhato nuwa yekahm.”

³ Jisasn wanyaf hanyhato kfo memorm, “To tamohmpno tukmoh nkifram kfo yirmoh nuhasmo yirmoht hikwakomn Bro Nkifrar kfo yuk boririfhut nhai hik duha yikahkomt?” ⁴ Bro Nkifrar kfo memor, ‘Ni yifammafhu yinhitn rhuhato rofhu mrokfomn hikkfot,’ yo ‘Yimar turhu yifammaf kfo twewurf, nd yimar was hehur thukfot.’ ⁵ Tfit nikomn kfo kangko, ‘Wom yimar turhu yifammafpo wuskam kfo nuhastahihato tfit yifammaf kfo famurf, “Nifn kfo nuhasheyuk wuskam bi Bro Nkifrar htahemoya,” ⁶ to be nd yimar mirahr tfit yifammaf adukakahann ayak marnyayanf.’ Tukmoh nkifram kfo htanihemom mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt.

⁷ Niko mikfo nhehta mkfo nhehtayet yimayeko! Bingot profet Aisaia to nikhom nef mifm kformor, ror dkfo memohat,

⁸ ‘Nd yimam be yura tngpaye kfo yuta yindhawoma.

Yiro yima yuhom nhai nanhu dukefmpno rhukahm.

Ndo wom dukefmpno korhm.

⁹ Be nd yima mifm bingot htamo boririfhut kfo nuhas htaswamm kfo kangm, “Bro Nkifrarhu boririfhut.”

Ndnetrn rom lotuta lotuyeft yafotha duhatet.’”

Ais 29.13

*Yimaroh yima yuhum faso yak bebwa shrm
(Mak 7.14-23)*

¹⁰ Tfit Jisasr nd met yindarim nakuyakhato kfo memorm, “Nanhu mrokfem wawany hik marnyatwa-komm. ¹¹ Tamoh tamoh mur yemrom o hnaru yemrom tng yuhat yiyafoyukm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Ni bi fasoh yimaye.’”

¹² Kto disaiperm yihato Jisasr kfo memorm, “Farisim ni kfoyuk mrokfot wanyhato yima yuhum yikwohate wanukwonn?”

¹³ Tfit Jisasrn kfo memorm, “Nanhu Yifemr, hefenr tohwar, mswirthuru yewurit turhu tire nuhta duhatt, be yuht yimbonetm teh dbifrak hanyrahm. ¹⁴ Mirahko to niko Farisiroh mrofkomm wanyhato bok dukefm ayaknom. Nd yimam tum nyinga kunyjmnm kangm womm ayak hta bohtanom. Nyinga kunyjf nhai tuf nyinga kunyjf yihotat nayak nuhaskfot. Mirahf ka tu yihotat nayak nuhaswono rpat dmehetf muht yohnirahf.”

¹⁵ Pitar kfo memorm, “Tfit afo nd ni kfi mrokfothu yimbu yuhat wakfo hikkahtnt awanynom.” ¹⁶ Jisasr kfo memorm, “Nikome ka yuhre mmoyeko?

¹⁷ Wawanyko! Nd yiyafoyuk yeshrt nhai yima yuhurn yikahm. Nhai. Nd yiyefiwa yeshrim nyungram yuhat yitamnm ript yihom yorhwom. Ript yihom rhuhato kto tfit rikunys kitm. ¹⁸ Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Fasoh yimayer.’

¹⁹ Nd na kfiwa yima yuhur sinyewa fasoh nefm, ndm inji korhm: nd fasoh fasoh dukef; yimar nambur sinyahato womr was furaneft, womrhu mettpno rim fnahneft, yaum kanjo met yindarim niwa nefm, rikohneft, wom mrokfomm be turoh yima yuhurn wakfo fura bofurakneft, womm faso faso harhu htfasneft. ²⁰ Tom nd nd nefmnm yiro yima yuhurnio sinyewamn Bro Nkifrar htihato kfo kangr, ‘Fasoh yimayer.’ Nd nuwa yenyihato tir kifsaduha rhuneft nhai Bro Nkifrar htihato kfo mikahr, ‘Fasoh yimayer.’”

*Jisasr Kenan efkott yak marnyamo yuhat
(Mak 7.24-30)*

²¹ Be Jisasr nd kmit htanyhato tfit kmi Tair yo Saidon inji yimor. ²² Nd ror yimoko wom Kenan efkott yihato kfo naku memot, “Bro Nungothete, Defit frikefthu yone! Wayuhuwafna. Fasoh yafotha bebm nanhu yont dbohneft kahukmt.” ²³ Jisasr be wanymortn nhai wom mrokfomm kfo ptharmort. Tfit turhu disaiperm yihato kfo memorm, “Nd mett be mfro naku hik hnewutnom. Wakfakhahtnt wuri ais.”

²⁴ Jisasr kfo memorm, “Bro Nkifrar na kfo tkrurafmohat, Isrerrparoh dukeftn kfo tkrurafmora. Rom bi sifsifm kanjo frfnah wurasohmom. Roh yak nhafot niamoya.” ²⁵ Jisasr kfo pthamo mrokfot rot wanymort. To nhai. Rot mfrfnahnehato Jisasrhu nyingatikko bangum myuknamotnm nyingatikkt bbinysoft yohnehato kfo memot, “Bro Nungothete, wahti dukana.” ²⁶ Jisasr kfo memot, “Yonroh hayuk yeshrt nhai bi yakhato yaumn afo wahta hekahn.”* ²⁷ Tfitn nd mettn kfo memot, “Bro yimaye, ndt rot hifat kfiwun. To nhai. Nd yauyenm, tebor yinhit toh hanyukm,

* **15:26:** Nd kfo nhombra mrokfothu yimbu yuhat inji: Yonm kfo nhombramor tu Isrerrnm. Yaum ndm wom yima tangi furam kformor. Yeshrim, ndm gutnius mrokfot kformor. Nd mett kfo ttiwonnmohat nhai be kfo yiritikfot kformort. Nhai. Jisasrhu dukeft duka memot, “Nhai tu Isrerrnm hayuk gutniusfot bi wom yima tangikomnm bi yakkfot. Nhai. Afo tu Isrerrnm tohakhato ee btn niko womko.”

rom to nd yonm ye bruraf hanitam ke tuthatak hanitm.” ²⁸ Nd mett kfoyuk mrokfot kfo yakio memort, “Bar mete, na hingrnewa hingrneft, ni nhai hus dukeffpno rhuhato na niahato kfo ttiwonkahna. Ninhu dukeft nann bro dukeft htewun. Ndnetn ninhu yon metthu dbohneft bi be.” Be nd yiha rothu yon metthu dbohneft teh tmbhakmot.

Bok dbohnet yimam Jisatr yak marnyamo yuhat

²⁹ Be Jisatr ndhar htanymortn Galili thmb yuhat yimor. Yihato wom kmi yorgr muhhato mrhumor. ³⁰ Kmi yorgr muh mruhetrn yima rifhur yi rifiny hmbremomr. Dbohnet dbohnet yimam hany hanymom. Womm rikiyem, womm nyinga kunyjetm, tir wura bebetm, womm tng mmkm, ndhtet ndhtet dohneftm yo womhtet womhtet dbohneftm rpat hanymomm. Hanymommn Jisatrhu wurampno rim hta rmonmomm. Jisatr htihato fak marnya hanymorm. ³¹ Nd tng mmkm tfit pthamom, yo tir wura bebetm marnyamom, yo rikiyem tfit faumom, yo nyinga kunyjetm tfit fukatohmom. Nd rifinyuk yimam inji htihato tuha yafotha duhatm rhumom. Yafotha duhatm rhuhato Isrerroh Nkifrar kfo grhamomr.

Jisatr 4,000 yimam yeshri hemo yuhat (Mak 8.1-10)

³² Jisatr turhu disaiperm nakuyakhato kfo kangrm, “Nda yima rifhur yuhuwafwanm. Bi husfirpa marm nanpno tohromn bi yeshriyen duhatem. Nhai wofnkaha be yeshriyen yi tany duha sfno yatinohnt turoh kmiko yinyeft. Yatinoh hanyruhamn buha yihotamn mnoh minysafnirahm.” ³³ Tfit turhu disaiperm kfo memomr, “Ndashart nom yima toh duha tkitt tohwonom. To href fitha bok bretpam yekwanomn ndar yonmari yima rifhur yahukanomm?” ³⁴ Jisatr tfit ttiwon memorm, “Nikome finji finji bretpam harhuwako?” Kfo memomr, “7-pela bretpami rpen rpen yirenem.” ³⁵ Be nd yima rifhur Jisatr kfomotrm tuha bbinysotfn sibosi rmonmomm. ³⁶ Jisatr nd 7-pela bretpami rpen rpen yirenem yakmormn Bro Nkifrar kfo bruttnanihato bretpam fak tif botifmorm yo yirenem fak mku bomkumorm. Tfit turhu disaiperm hemotr romn yaknihato nd met yindars hi hanymomm. ³⁷ Nd yima rifhur fe furkih bugamom. Nd rom yesmbhoyuk yeshrim Jisatrhu disaiperm tfit yak nhafohhato hmbremohat 7-pela kpm hmbremom. ³⁸ Nd yeshrim yamo yimaroh thomnafat, 4,000. Ndt yindarirparoh thomnafayet, metmi yonm nhai thomnarmomm. ³⁹ Jisatr nd yima rifhur kfo tkrurafhato yimotm, ror mmbtrn mikmbrenihato Magadan distrikko yimor.

16

Jisatrhu mirakerkfot memom ahtinom (Mak 8.11-13; Luk 12.54-56)

¹ Farisimi Sadyusim yihato Jisatrpno yuwi mkfo memomr, “Jisase, mirakerkfot wahingrnakahtnt afo ahtinom. Nom htiruhanomn mirahnom, tu Bro Nkifrarhu bbukeftpno hingnewur.” ² Jisatr kfo memorm, “Krif yiham marr miwondh marnyanitr, kfo kangko, yin yifungr tohwor. ³ Dbha yiham mkinykr fnahwot, kfo kangko, hrek toh nyukuhwot. Yihathu rhu yuharpat hti nhtewakomn kfiwuko, to na ndar yiham tohhato niwa nefm nhai htihato

yak nhtakahkomm.* ⁴ Ariharhof yimam, be tu fasohe, nhai Bro Nkifrarhu yima yuhurn rhukahm. Roh dukefm be kangm, nd Bro Nkifrar kfo tkrurafoyuk yimar mirakerkfot hingrnakahtr ndt htihato duka mirahnom, tor nd yimar. To nhai wom mirakerkfot htiruhadm. Nhai. Jonarpno rhumo kanjohot neft hti nhtarahm.” Be inji kfo tanyhato htanymorm.

*Farisimi Sadyusiroh yisparoh kfo nhombra mrokfot
(Mak 8.14-21)*

⁵ Jisasri disaiperm tek barit hir hayuknihato mkuko rim dbkafmom. To rom yimohat, disaiperm nhaf nhai dukarmom bretparoh hanyneft. ⁶ Yimomn Jisadr kfo memorm, “Niko Farisimi Sadyusiroh yispam hti marnyaf hanykfot.” ⁷ Tfit tum rinakfo nakfo memom, “Ka nom bret-pam yakna duha yitnom, ndnetrn nd mrokfot kfiwurnom.” ⁸ Jisadr bi wanyomorm rom inji kfomoahat. Wanyaf hanyhato kfo memorm, “Barenko, tamohmpno kfo yamukako nhai bretpa duhatenom. Nane kak smineuwukma tefi yeshriyenroh yak yurhtahato nd yimam hanyeft? ⁹ Niko na hingrnawa hingrneft ka nhai tafi htikahkom? Ka nhai htirmoko 5-pela bretparpam yak yurhtahato 5,000 yimampno yak nhtahato hemohat? Yo tfit yesmbhehm thomnayet kpmn niko hmbremohat? ¹⁰ Yo womt ka nhai dukakahkom? 7-pela bretparpam yak yurhtahato 4,000 yimampno yak nhtahato hemohat? Yo nd yesmbhehm thomnet kpmn hmbremohat, nd ndm ka nhai htirmokomm? ¹¹ Famuko ka tu bret mifm kfiwurnome? Nhai bret mifmn kforfoyanko. Farisimi Sadyusiroh yisparoh kfo duka mrokfotn kfiyanko. Famuya yo hti marnyaf hanykfot rroh yispam.”

¹² Bi inji kfiwurme, ee dukefm yakhato kfo memom, “Nhai tu bretpa hingrnayuk yispa mifmn kforfornom. Farisimi Sadyusim hatone htfaswa mrokfothu kfo duka mrokfotn kfo famurnom, ‘Yo! Niko, tom ndhtet ndhtet yimam niewum niko dukefmpno rhukfot.’”

*Pitar Jisadr kfo nriyafmo yuhat
(Mak 8.27-30; Luk 9.18-21)*

¹³ Jisadr Sisaria Filipaiko yihato ndharn disaiperm kfo ttiwon memorm, “Kmi thofm na Bro Najomhanu mrokfot wanukohat, kangm frohane?”

¹⁴ Kfo memom; “Womm kangm Jon Baftaise. Womm kangm Irajaye. Womm kangm Jeremaiaye o nkifra thof profete.” ¹⁵ Inji kfomotm, tfit ttiwon memorm, “To niko tuko finji dukewokma?”

¹⁶ Saimon Pitar kfo memor; “Ni, bbinysof thofroh minrfa htikyayuk yima Kraise. Ni, tu toh nkifraniruha Nkifrarhu Yone.”

¹⁷ Jisadr kfo memom; “Jonrhu yon Saimone, wayindhortwa. Nd mrokfot ni kfit, nhai ndar bbinysofthu wom yimar kfo merforn inji wakfotwa. Nhai. Nanhu Yifem; hefenr tohwar, rorn dukefm yahutrn inji kfi. ¹⁸ Pita, kfiwann, ni tahiye. Nd tahisn nanhu sioskfot kasinyaruhant. Nd tahisn sioskfot hatohruhant, noheft nhai niahato yak kasuhruhant.† ¹⁹ Hefenrhu kingdomkfothu kijibont hiruhann ninn yakitohrahnt. Ndar bbinysofthu tamoh tamoh nefm ni kfo raforahnm, tawo hefenrko Bro Nkifrar nd nefm kfo raforahm. Ndar bbinysofthu tamoh tamoh nefm ni kfo yakiorahnm, tawo hefenrko Bro Nkifrar nd nefm kfo yakiorahm.” ²⁰ Be Jisadr inji

* **16:3:** Nd ves 2 kfoti ves 3 kfot yorhwa Jisadr kfoyuk mrokfom, nhai tu Matyurn wandfarmorm, wommn rihtakomm. † **16:18:** Grik mrokfot nd Pita yufathu yimbu yuhat, “tahis.”

pthahato kfo memorm, “Yo! Mirahko mif mif womm akfo amanyomm, ‘Rorn Bro Nkifrar kfo tkrurafmor nmoh minrfa ht iyakyuk yima Kraistr.’ ”

Jisars wuroh noh yibonneftpno turhu disaiperm dkfohemo wuroh mrokmom

(Sapta 16.21–20.34)

Jisars turhu nohhato sinyu yuhat kfo nuhasmorm
(Mak 8.31–9.1; Luk 9.22-27)

²¹ Nd yiha Jisars disaiperm rikfo nuhasak memorm, “Nanhu nmbuhat akfo nuhasanko. Nanhu mrokmom inji korhwot. Na Jerusalemko yi shoft, na Judaroh bro yimamn, prisroh bro yimamn, boririfhuthu tisamn, nd nd yimaroh tirnm hirruha. Nohrhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.”

²² Pitar inji wanyhato Jisars yaknihato ndo rim hatohhato kfo hutt memorr, “Bro Nungothete, nhai mif. Na nhai wofnkaha ndhtet mrokmom wanyneft.” ²³ Tfit Jisars kekutnihato kfo memorr, “Satane, wuri wain. Ni nanhu yihotat toh rafiwun. Ni nhai Bro Nkifrarhu yima yuhur hikkahn. Ndo yima mifroh dukefm hikwo.”

²⁴ Be inji kfonihato kfo memorm, “Wom yimar kangr, na ahik hneya, mirahr tur amdukak hanya. Nd dukefr mong trohhato rorhu bgre mis titahato na hikkfot. ²⁵ Yimar turhu toh marnya nmbuharpot mdukak hanitr; nd toh nmbuhat ror mdukak hanitat nhai tfit wom htiruhahrt. Yimar na dukahato nhai turhu toh marnya nmbuharpot dukarfort, kto tfit htirahrt rorhu toh marnya nmbuhat. ²⁶ Wom yimar ndar bbinysofthu tamoh tamohrpar yakhato kto toh nkifrayuk toh nmbuhat nhai dukarfort, to nd ariha yekwa marut, wuskat, tamoh tamoh toh toh finji hifa toh nkifra nmbuhat hiruhamr? Hifa toh nkifra nmbuhat kangr tfit ayakant, to tfit fitoh yuhatn yakruhart? ²⁷ Bro Najomr, turhu Yifemrhu bro bbukeftpno yawihnerahr turhu mounmotmpno. Nd yiha met yindarim turoh tohefm, o nefm, o hingrnefm, nd ndm ht iyak hanyhato ttha hanyrahm. ²⁸ Na kfo mifwanko, ndasha tohwa womm tafi afo noh duhatmn Bro Najomr king kanjo nia thoft ht iyakrahm.”

17

Jisarsru thatipt fnhumo yuhat
(Mak 9.2-13; Luk 9.28-36)

¹ Kto 6-pela yiham yinyimotm Jisars Pitari Jemsre yo Jemsrhu nmom Jonr, nd husfirpa yimam yaknihato turpatm muhmom to mfro wayakmo kminysoftn. ² Turpatm rhu hasohato asha ht iyaf hanyomomr fnhuyaknimor. Nyingatikt funamohat memom nndoh marrhu nukeftn kambohritnewut, yo yimar hmbremo hmbresham rpat fnhu bugaknihato memom nndo bruwohm katiwur. ³ Ee tfit ht imomf Moses Irajjarof Jisarsrpo mt ohhato pthaknimohat. ⁴ Pitar inji ht ihato Jisars kfo memorr, “Bro yimaye, nmoh asha tohneft hifa. Finji dukiwa? Ka husfirpa kunyenn yimanom nhombrahato singorua. Ninhu womt, Mosesrhu womt yo Irajjarhu womt.”

⁵ Pitar inji ptha hanyomomr wom gribfat yawihnehato kasi hmbremotm. Nd gribfat fnhu bugamot. Yiro nd gribfatn wom tngt niamot. Nd tngt kfo

memot, “Ndarr nanhu Yoner. Be tu marbitn htewanr. Hifa hti yindhorwanr. Ror pthayuk mrokfom wany yakiokfot.”

⁶ Disaiperm Bro Nkifrarhu tngt wanyhato tuha mfham danyr frt-nehmomm. Yimam wutthakhato tuha suhato nyingatikm bbinysofko yohnehmomm. ⁷ Jisasr rompno brbo yiyaknihato kfo memorm, “Wasinyako. Ayakrmiwahko.” ⁸ Nyingatikm kekuthato yura wufukatohmom. Nhai wom frohm htiromm. Nhai. Jisasrpar htinom.

⁹ Be nd kminysofr wuhtanyhato tfit mibrnyimom. Buha yihotatn kfo memorm, “Niko nd yura kminysoft hitawoneft bi mirahko womm akfo nuhasnom. Kto na Bro Najoma bi nohnhato tfit sinyeya, ee btn wakfo nuhastwakomm.”

¹⁰ Tfit disaiperm kfo ttiwon memorm, “Tamohmpno nkifra boririfhuthu tisam kfo yamukam, ‘Afo Iraiarn bi nia gungonrahr. Tfit kto Bro Nkifrar kfo tkrurafrahr nmoh minrfa htiyakyuk yima Kraistr.’”

¹¹ Jisasr wanyhato kfo memorm, “Ndt tu kfo mif kfoyet. To nkifra kfot kfo memot, afo Iraiarn bi nieruharn rorn nd tamoh tamohm bi yak hta bohtarahr. ¹² To tfit kfiwanko, Iraiarn to bi niamor. Yimam nhai hti nhtarmomr. Bi niamotr yimam turoh dukefm hikhato faso faso fak behmorm. Bro Najomr to inji narahmr.” ¹³ Jisasr inji kfomotr, disaiperm yima yuhum yakhato kfo memorm, “Jon Baftaisrn kfiwur.”

*Jisasr yak marnyamo kmi yarhr hatohet yonr
(Mak 9.14-29; Luk 9.37-42)*

¹⁴ Jisasri nd husfirpa disaiperm tfit yimomn nd rom kmi tpit wahtanyo yimampno minahitimom. Ndharn wom yimar yihato Jisasrpo bangum rim yuknahato ¹⁵ kfo memor, “Bro Nungothete, nanhu yonr wayuhu-wafhina. Fasoh noh mmrifeft yekwattr faso korhr. Wom yiham noh mmrifak-hato kahmn kitr tekmpno brbo toh hasonefm tek mkitr. ¹⁶ Ninhu disai-permpno kfo famuya, ‘Wayak thukomr yarhr.’ To nhai, fak thu titawomr.”

¹⁷ Jisasr nd mrokfot wanyhato kfo memorm, “Arom Bro Nkifrarhu dukefm rhu duha met yindarienko, nikmoh dukefmi nikmoh nefm nhai be tu yi marnyakahm. Finji tfit nikompno tohrhoya? Finji tfit nikmoh krhopam titahirhoyanko? Wahnakomr nd yonr.” ¹⁸ Jisasr kfo namburhato kfo hut hikafmotr nd yarhr htanyomr nd yonr. Be nd yonrhu noh mmrifeft htanyomr.

¹⁹ Kto disaiperm turpam Jisasrpo mnahtihato kfo ttiwon memorm, “Tamohmpno nd yarhr to nom yak thu duha yirfonomr?”

²⁰⁻²¹ Jisasr kfo memorm, “Nd yonr hatohyuk yarhr yak thukfot kfihat, nikmoh dukefm aduka mif mif ameko, ‘Bro Nkifrar kak thu mifworr nda yonr hatohwa yarhr.’ Dukefm inji yi mifhato akfoko, nd yarhr yak thurfokomr. Na kfo mifwanko, ndhtet dukefm be tu tefi dukefenr sayor tpiyenr kanjo rhuhatto kfo mirahn, ‘Ndar kminysofe wasinyani nndo warim tohn.’ Htirahn nd kminysofr nndo rim tohrahr. Nhai wom tamohm duka nhiruhatan finjina finjina nefm.”*

*Jisasr tfit wompam kfo pthamort turhu nohhato sinya nmbuhat
(Mak 9.30-32; Luk 9.43-45)*

* **17:20-21:** Wom safemanm duka memom, tot wom mrokfo nmbuhat ndar veskfothut. Nd mrokfo nmbuhat inji kfiwut, “Kfo bruttnarahn yo yeshrim yafhohato kfo bruttnarahn, nd yuhatan yak thurahnm ndhtet yarhm. Nhai wom fitoh yuham.”

22 Be nd kmit htanyhato Galiliko yimom. Nd kmit mfnahhato turhu disaiperm kfo memorm, “Ndar bbinysofthu yimam Bro Najomr yak hndhnarahmr yimampno. Hndhнару-hatmr ²³ yimam wasrahmr. Nohruharn husfirpehyuk marrn tfit sinyarahr.” Disaiperm inji wanyhato yima yuhum foh dbhurmmm.

Jisasr Bro Nkifrarhu temperrhu takis maruha hemo yuhat

²⁴ Jisasri disaiperm bi Kaperneamt yihom fnahetmn, Bro Nkifrarhu temperrhu takis marut yak hnayuk yimam niamomn, Pitar mkfo ttiwon memorm, “Nikmoh tisare temperr hta hakuta takis maruhame hta hakutr?” ²⁵ Pitar kfo memorm, “Uwa, hta hakutr.” Pitar inji kfo tanyhato kuny yuhat rim fknenimor. Pitar tafi wom mrokfot kfo duha be tu Jisasrn sinyahato kfo ttiwon memorm, “Saimon, ni finji dukewa? Ndar bbinysofthu kingm nd takis marut yak htfas thofte froh frohmpno yekwamt? Turoh kantri thofmpno o wom kantri thofmpno?” ²⁶ Pitar kfo memorm, “Wom kantri thofmpno takis marut kek wom.” Jisasr tfit kfo memorm, “Wom nndoh kantrikfot niayuk yimampno takis marut yekwamn, ndnettn nhai turoh kantrithu yimam takis marut hekfot. ²⁷ Bariko wanjukahnn wathuthu htfasn. Barkof yirar furyakyuk, tngt wayak bhnakahn, htirahnt maruhat tngt yiro rhuraht. Nd tngt rhuyuk maruhat, ninhu takis wiknayukti nanhu takis wiknayukt rhuraht. Wayaknikahnt ndtn nnoh yufat wahtatwa. Nd yimam htiruhamn rroh yima yuhum nhai faso yak bebruhatmno.”

18

Hefenrhu kingdomkfothu bro yufa yakyuk yimar (Mak 9.33-37; Luk 9.46-48)

¹ Nd yiha disaiperm yihato kfo ttiwon memorm, “Hefenrhu kingdomkfothu mifrskena thombate, froh mifrn bro yufat yakhato mtohakruhant nd hefenrhu kingdomkfothu?” ² Jisasr wom habhi yonenr kfakhato rroh buha rim tohmotr, ³ kfo memorm, “Na kfo mifwanko, nikmoh nefm, tohefm tfit ndar yon kukenenrhu dukefmi tohefm yakhato rhukfot. Inji tohrahko, hefenrhu kingdomkfothu fknirahko. ⁴ Yimar turhu toh nmbuham o dukefmi tfit yohnihato nda yonenr kanjo rhurahr, nd yimar hefenrhu kingdomkfothu ror bro yufat yakhato tohrah.”

⁵ Fitoh yimar na hikhato na hikwa wom met yindarim yakhato kak marnyewurm, nda yonenr yakhato yak marnyiwa kanjo, nd yimar nann yakhato kak marnyewur.”

Yimam yak kasuhwa fasoh nefm (Mak 9.42-48; Luk 17.1-2)

⁶ “Wom yimar ndar na hikwa yonenm frnhehektrm fasoh nefm fsuhm, nd frnhehakyuk yimar bro tahis yakhato mohtpitn tmbrekhato tek dany yuhat yafhohato miptkokfot. Tohruharn fasoh yihotat hanyrahm.

⁷ Yima yuhum sinyarahmko fasoh nefroh naneft. Be wom yimarn niahato mkfo kangrn, ‘Ndur yuhat warine o ndur shrt warimagn.’ Nd yak tkruryuk yimar dukaf hanykfot. Bro Nkifrar be yak tutfarahr. ⁸ Tirt fasoh nefm hanittn, nd tirt tmbho thukfot. Rpa tirpatpno ruhato toh marnyarahnt ninhu toh nmbuhat. Hus tir bugaf rpat rhurahr, rofn yakruhafn kaht turahfn. Nd kaht nhai wom yiha minoh hmbreni hanykaht. Yo wurat inji newut, nhaf puk thuhato rpa wurarpatpno ruhato toh marnyarahnt. Hus

wura bugaf rhurahf, rofn kaht hanyrahfn. Nd kaht nhai wom yiha minoh hmbreni hanykaht. ⁹ Yo nyingarn fasoh nefm hanitrn fasoh nefm ne, nd nyingar yak rurha thuhato be rpa nyingarpapno rhuhato ninhu toheft toh marnyani-rahtn. Hus nyinga bugaf rpat rhuneft wom nyingarn fasoh nefm hanyruhatrn rorn hel rhuyuk kaht hanyrahfn.

¹⁰⁻¹¹ Niko dukefmpno rhukfot. Mirahko ka nd yonm ka be yima fura-yeme. Nhai.* Yura hefenrko rroh mounmotm brbo Bro Nkifrapno yorhwamr kfo nuhaswomr yimam tamoh fasoh nefm finjina finjina thombat.”

*Yimar hambrakmo sifsifru kfo nhombra mrokfot
(Luk 15.3-7)*

¹² “Wom 100 sifsifet yimar wan handretyukr hti hambrorfohat ka nhai nd wan handretyukr yak hambrorfotr? Na kanga ka nhai mumafroftr. Ndwom 99 kforpat kipr yeyuk tkitt afo yak htanyformn afo nd wan handretyukr afo yau hambro htasforr. ¹³ Na kfo mifwanko. Ndwom frfnahni duha 99 kfothu yindhoreft rot be inji yindhornirfort. To nd wan handretyukr hambro hanyhato tfit yakrfohat, rorhu yindhoreft mirahko ka be tu kukent rhurfotr. Be tu mfro yima yuhur yindhor mifforr. ¹⁴ To inji kanjo nikmoh Yifemr, hefenr tohwar, nhai wofnkahr ndar yonm rpat rhuhato tfit womr frfnahneft.”

Wom yimar fasoh nefm nern, to finji tfit yakruhanr?

¹⁵ “Ninhu wom Kristen yimatr wom fasoh neft nern, nd fasoh neft nayuk yimarpno yikfot. Yihato nifn turpatfn rhuhato kfo nuhas nriyafhekfot ror nayuk neft. Kfo nuhas nriyafhe-ruhatnr nd ror nayuk nefm yafhorahrm. Yafhoruharm tfit nayak marnyahato rpat toh marnyahfn. ¹⁶ Turpatfn rhuhato ror nayuk nefm kfo nriyafnm, tfit kfo namhir, to be tfit yihato nd yimar nayuk nefm htiet yimar o yimaf yakhat rompno yihato kfo nuhas hik bohikhekfot ror nayuk nefm. ¹⁷ Nd yimampno yihato nhai afo tfit kfo namhitr, tfit sioshu tuhan yindarspno nd mrokfot htakfot. Wuroht sioshu tuhan yindarimpno nhombrati be tu kfo namhi mifwor, to be nd yimar yak thuhato mong trohkfot. Rorhu neft bi nhai wom Kristenroh neft hikkahr, bi kspitat tohyuk yimaroh nefti takis marut yak htaswa yimaroh neft hikwor.

¹⁸ Na tu kfo mifwanko, ndar bbinysofthu tamoh tamoh nefm niko kfo raforahkomm, tawo hefenrko Bro Nkifrar nd nefm kfo raforahrm. Ndar bbinysofthu tamoh tamoh nefm niko kfo yakiorahkomm, tawo hefenrko Bro Nkifrar nd nefm kfo yakiorahrm.

¹⁹ Tfit womt kfiwanko. Nifn hus yimafn, ndar bbinysoft tohato wom tamoh dukefr rpa yima yuhur rhuhato kfo bruttnarahfn, htirahfn, nanhu Yifemr hefenr yorhwar htiruharn nifnahu kfo bruttnayuk mrokfo yuhatn hikrahr. ²⁰ Mrokfot bi ruhetet. Husf o husfirpa yimam rpat rhu rifinyhato tamoh dukefm kfo bruttnarahma, na toya brbo rhuhato wany yakitohruhanm.”

Hingrna yimar nhai yafhormorm womr nayuk nefm

* **18:10-11:** Nd ves 6 kfoti ves 14 kfot yorhwa yon mrokfot, Matyu 10.42 kfiwa kanjo inji kfiwut, “ndar nanhu yufapa duha disaiperm.” Nd mrokfot ka Jisasr nhai yonrpm kformor. Turhu wom disaiperm dukahato nd mrokfot inji rpat kfomort.

²¹ To nd yiha Pitar niahato Jisasr mttiwon memorr, “Bro Nungothete, ninhu wom disaiperr nanpno wom fasoh fasoh nefm nahna nahnewura, ka 7-pela yiharpam yafhohiruhann ror nayuk nefm?”

²² Tfit Jisasr kfo memorr, “Nhai kfo mekoha 7-pela yiharpam. Nhai. Kfo kanga 77 yiham womr nayuk nefm yafhohekfot.

²³ Wawanyko. Hefenrhu king-domkfote kangme wom kingrn kangr turhu ofisam yak hanyuk marufam, ndmn ofisampno kingr rhuahato nayak marnya inji newum. ²⁴ Nd hingrneftn bi ruhetrn, 10 milion kina yak dinaumo wom ofisar hanymomr. ²⁵ Nd yimar nhai wom marufam nd ror yak dinaumo rrfathu htayuk marufam. Kingr be inji htitihato kfomorm rorhu hingrna yimam nd yimari rorhu yon tuhanm, yo wuska kunyr, nd ndm yakhato wom yimampno yak htahato nd yimami wuskaroh marut tfit yakhato nd ror yak dinaumo marufaroh rrfatn htakfot. ²⁶ Nd kingr inji kfomotr nd ofisar wanyhato kingrhu wurampno brbo tabokmemor. Tabokmehato kingr mkfo memorr, ‘Wayuhuwafna. Afo yiham wahikahtna nd dinaukfot yak marnyaruhant.’ ²⁷ Nd kingr yuhuwafhato kfo memorr, ‘Nhai mrokfom. Yuhuwafwann. Yuhuwafhato nd ni yakmo marufam mirahn tfit wom adukayanm. Na nhai wom dukarhotanm. Ni be wai warhu mmotwa.’

²⁸ Be inji kfafmotr nd ofisar fnahnimor. Fnahnihato rim htimor rorpno rpat hingrnamao wom ofisar. Rim yakitohhato thu yebitt boyebithato kfo memorr, ‘Nanhu 10 kinakfot ni yak dinaumot asomif wayakkahnt wahina.’

²⁹ Be nd marufa yakmo yimar inji wanyhato womrhu wurampno tabokmehato mkfo nur memorr, ‘Wayuhuwafna. Afo yiham wahikahtna nd 10 kinakfot tfit hambrahato hiruhann.’ ³⁰ To nhai. Womr inji mkfakmohat, womr nhai yuhuwafhato kfo marimorr, ‘Nhai mrokfom. Kto bi hambreknt nd marufat ee btn wahitwona.’ Be yakmorrn kalabus htamorr. Memor, ‘Kalabus toh gnggiruharn hirahra nd 10 kinakfot.’

³¹ Nd ofisar namo neft wom rpat hingrnayukm inji htihato memom, ‘Ndt nhai dborioh neft nakahr.’ Be rom tfit kingrpnio yihato kfo nuhasmomr nd ofisar namo neft. ³² Kingr nd yimar tfit nakuyakhato kfo memorr, ‘Ni be tu fasoh ofisaye. Garkofpam niamo maruharoh mrokfotpno mkfo nurmotna yuhuwafhato nhai dukarmoyant nanhu yonmar maruhat ni yak dinaumot. ³³ Na hifa yuhuwaf marnyamoyann. To tamohmpno niko tuko rpat hingrniwako ninpno yak dinaumohat nhai tfit yuhuwafmorr?’

³⁴ Kingr namburhato tawo nd yimar yakmorrn tfit kalabus htamorr. Memor, ‘Kalabus toh gnggiruharn tawo nanhu marufat tfit hirahra.’”

³⁵ Jisasr nd kingri rorhu ofisampno namo neft kfonihato kfo memorr, “To be rom namo kanjo, wom Kristen yimar o mett ni wompno nayuk nefm nhai yafhorfonm, tawo nanhu Yifemr hefenr tohwarko rpahtet neft narahrn.”

19

*Tuhan yak tuhafo nmbuhathu mrokfot Jisasr kfo pthamor
(Mak 10.1-12; Luk 16.18)*

¹ Jisasr nd mrokfom kfonihato nd distrik Galilit htanymortn tfit tek Jodent hayuknimort. Hayuknihato tfit distrik Judiat yimor. ² Ndko yimohat nhaf yonmari yima rifhur hikmotmr, ndharn rroh dbohnefet yimam fak marnya hanyhemorm.

³ Ndko tohetrn ndkorhof Farisim yuwi yihato ttiwon rhti memomr, “Nmoh boririfhut finji kfiwat, yimar be turhu duka fijo metthu yak tuhafoneft? Hifan o nhai?”

⁴ Jisars kfo memor, “Niko Bro Nkifrarhu rfa borngt kfiwa mrokfom ka nhai htikahkom? Nd mrokfot inji kfiwut, ‘Bingot Bro Nkifrar ndar bbinysoft hingrnahato yimam hingrnahato mete yindariye hingrnahato.’

⁵ Yo wom mrokfot inji kfiwut, ‘Ndnettn yindarir turhu yifammam htanyhato turhu yak tuhantpno frtkafhato be rpa raftn dbkaf hmbrittf.’ ⁶ Bi rpa raftn tou dbkaf hmbrihato tohkfot. Ndnettn Bro Nkifrar yak nmbtekyukm nhai tfit yima mifmn yak tndohkfot.”

⁷ Farisim wanyhato kfo memomr, “To tamohmpno Mosesrhu boririfhut kfo memot, ‘Afo tuhan yak tuhafoyuk kfo yakio gontwat wandfanihat o ee mett yak tuhafokfot?’ ”

⁸ Jisars kfo memorm, “Nd niko wanukwa boririfhut mirahko ka bingot nda bbinysoft trhanimohat ka nd boririfhut ka bi inji rhumot. Nhai. Tukmoh Bro Nkifrarhu mrokfo wany juha nmbuhatn Mosesr nd boririfhut htamort. ⁹ Na kfiwanko, wom yimar turhu yak tuhant nhai rine wunerfott be fak thu furefirtn tfit wom nfri mett fekr; nd nfri mett nhai turhu tuhan mift rhuakaht. Be inji ijoh metet.”

¹⁰ Disaiperm nd mrokfot inji wanyhato Jisars kfo memomr, “To ni kangn, mirahr wom yimar turhu yak tuhant be yak thu furayant. To be ndhtet neft ka nom hhrekwonom tuhan yakneft.”

¹¹ Tfit Jisars kfo memor, “Hifa kfiwuko. To mirahko ka yima bugam tuhan yak duha toh furarrahm. Nhai. Wom womrpam Bro Nkifrar yak htetm, ndmn tuhan yak duha rhurahm. ¹² Wawanyko. Nhai rpahtet ruhet yimam rhukahm. Womm frfuhu yaktetem be inji sfno tuhan yak duha toh furewum. Womm bi mmemroh yatim rhuhato frfuhu duhatn korhm. Womm hefenrhu kingdomkfothu kasinya yuhat dukahato nhai tuhan yakkahm. To nd tuhan yak duha mrokfot yimam kangm yakhato ahiknomt, yakhato hikkfot.”

Jisars yonroh mrokfot kfo pthamo yuhat
(Mak 10.13-16; Luk 18.15-17)

¹³ Nd yiha wom yimam Jisarsrpo yonenm hnehato memom, “Jisars tir htahato kfo bruttnarahm.” Disaiperm inji htihat o tfit kfo huttnakimomm nd yon hnayuk yimam. ¹⁴ Jisars inji htihat o kfo memorm, “Yonenm wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam hefenrhu kingdomkfothu rhurahm.” ¹⁵ Inji kfonihat o yonenm yak nhafohmormn tir htahato kfo bruttnamorm. Inji na tanyhato ndhart htanymortn yimor.

Wuska kunyet yima damiagr Jisarsrpo yihato naphamo yuhat
(Mak 10.17-31; Luk 18.28-30)

¹⁶ Wom yimar Jisarsrpo yau yaknihato mkfo ttiwon memor, “Tisa, nane fitohtet fitohtet dborioh nefm narhoyann Bro Nkifrarpo toh nkifranirhoya?”

¹⁷ Jisars wanyhato kfo memor, “Tamohmpno tfit nann nd dborioh nefroh na yuham kfo ttiwonwa? Bro Nkifrarpo dborioher. Tu kangn Bro Nkifrarpo antoh nkifraniya, rorhu boririfhu mrokfom hikkfot.”

¹⁸ Yimar kfo memor, “To fitoh fitoh boririfhu mrokforoh hikkfot ni kfiwa?” Jisars kfo memor, “Mirahn wanambur sinyahato yima awas furaya,

mirahn ramet tuhantpno arim fnaha, mirahn arikoha, mirahn wom yimar wom mrokfom akfo wokanr, ¹⁹yifammaroh mrokfom wany yakiohato rroh yinhitn rhukfot, tunn yak marnyewa kanjo inji womm yak marnyakfot.”

²⁰Jisars inji kfonimotr tfit nd damiagr yimar sinyahato kfo memor, “Jisase, nd ni kfiwa boririfhu mrokfo bugam na hik bugewanm. To tamohm kangn wahikn?”

²¹Jisars kfo memorr, “Kangn dborioh yimaya aruhane, inji nakfot: Nd ni harhuwa wuss yak htatahato wommn wiknakfot. Nd wusspno yakyuk marut yakhato tfit nd wuskapa duha yimamn nd marut hekfot. Inji narahn, hefenrko mfro wuss harhu-rah. Inji nanihato tfit na nia hikkfot.” ²²Nd yima damiagr wuss mfro haruhetrn nd mrokfot wanyomohat yima yuhur nhai marnyahato yirmor.

²³Jisars kekutnihato turhu disaiperm yukatohhato kfo memor, “Wahtiko, yimam wuss mfro haruhetm be tu mduka nhiekwom hefenrhu kingdomkfothu fkneneft. ²⁴Tfit mkfekwa. Womhtet mong wakuyet fohr kutewumr kamerr. Nd kamerr fknanyirfort nahuyuk nirthu muht. To yimar wuss mfro haruhetr, Bro Nkifrarhu kingdomkfothu fkneneft mduka nhiyakrfor.”

²⁵Tfit tu Jisashu disaiperm inji wanyomohat tfit mifoh rihanimom. Miyoh rihanihato kfo memom, “Barenko, nom kangnom ka ndhtet maru kunyet yimamn hifa rhu nmbuhat miyakrahm. To nhai. Ndhtet yimam mthu nhiyakrahm Bro Nkifrarhu kingdomkfothu fkneneft. To nome ndhtet yima furapanom, to nome finji Bro Nkifrapno yihato mtoh nkifraniruhanom?”

²⁶Jisars yukatohmormn kfo memorm, “Niko yimakomn tamoh tamoh nefroh finjina finjinaneft mduka nhiekwoko. Tu Bro Nkifrar nhai duka nhiyakkfot wom tamoh nefroh finji naneft.”

²⁷Pitarn sinyahato kfo memorr, “Wahti. Nom ninhu hikneftn nmoh tamoh tamohm mong trohhato ni mhikaknamonom. To Bro Nkifrar tamohm hiruharnom?”

²⁸Jisars sinyahato kfo memorm, “Na kfo mifwanko, tfit nfri bbinysoft mfrfnahnehato Bro Najomr king yufat yaknihato kingrhu gajis yakhato rhu thombat, nd yiha niko nanhu disaiperko 12-pela gajim ruhato Iserrroh 12-pela frikeft yakitohrahkmt. ²⁹Yimam nann dukahato rroh kunym, yon tuhanm, yifa mndarm, mswirm htanymm, tfit Bro Nkifrar wom 100 kfot thu hutahi hanyahato Bro Nkifrapno toh nkifranirahm. ³⁰Arihart nyingako tohekwa yimam, kto tfit mongko yihom fnahnirahm. Nd mongko tohyukmn tfit nyingako mfnahnirahm.”

20

Wain swirt hingrnayuk yimaroh kfo nhombra mrokfot

¹Mongko tohyuk yimam mfrfnahnehato tfit nyingako mtoh yuhathu mrokfo yuhat tfit Jisasn wain swirt hingrnayuk yimamn kfo nhombramort. Kfo memor, “Hefenrhu kingdomkfoth inji korht. Wom yiha wain swiret yimar dbha ksfut yimorn yimam fak habrimor wain swirthu hingrnayukm. Yimam yak habrimorn, ²kfo memorm, ‘Rpa rpa yiham wan kina wan kina wikna hanyruhanko.’ Nd yimam kfo fakiomomt nd marufat. Be inji nnakfonihato nd barkof yakmo yimam yimom wain swirthu hingrnat. ³Yo tfit 9 kilok dbha nd bro yimar mhtimorm wom

yimam rifinyuk maket tkittn toh fura hasomom. ⁴ Mhtihato kfo memorm, ‘Nanhu wain swirt wai wahingrnakahtko tukanhu hti fijo wiknaruhanko.’ ⁵ Be nd yimam inji kfo motrm yimom wain swirthu hingrnat. Kto tfit dany marrn womm yakhato hingrneft fak htamorm. Yo tfit 3 kilok tfit womm yakhato hingrneft fak htamorm.

⁶ Yo tfit tu wuroh 5 kilok krif marrn yimorn wom yimam rifinyuk maket tkittn toh hasetmn mhtihato kfo memorm, ‘Nikome ndar yonmari marre be inji hingrna duha rhu furewukomr?’ ⁷ Nd yimam tfit kfo memomr, ‘To frohmn hingrnefm harifotmnom hingrnarfonom?’ Inji kfo motrm kfo memorm, ‘To ndhtet neft nanhu wain swirtn wai wahingrnako.’

⁸ Bi tu wuroh krif miftn wain swir tikatr kfo mormr hingrnefroh tohukatohr. Kfo memomr, ‘Hingrna yimam wanakuyakkahnm rom hingrnehat maruham wahiyaf hanyswanm. Maruham hiruhanme wuroh nia hingrnayuk yimamn warihe gungonaktwa. Hihany hihany, ee nd barkof mhingrnaknayukm wurohm wahitwanm.’ ⁹ Nd yimam tu wuroh krif 5 kilok nia hingrnakniyukm niamotm tohukatohr wan kina wan kina hiyaf hanymorm. ¹⁰ Nd bi barkof mhingrnakniyuk yimam rom yimom. Rom yimomn memom, ‘Ka nomn bro marufam yakrahnm,’ to nhai. Rom to be inji buga wan kina wan kina fak hanymom. ¹¹ Be nd rom yakyuk maruham htihato wain swir tikatr kfo hutt memomr, ¹² ‘Nd yimam tu wuroh niahato wan auakforpat hingrnayukm tfit nom yakyuk marufat kanjo fekm. Nom famunom ka nom bi dbha ksfut ritohakhato yonmari marr hatoh krifafyuknomn yura yakruhanomn rom yiro wayakrahm.’ ¹³ Wain swir tikatr nd hutt mrokfot wanyhato rroh wom hingrna yimar kfo memomr, ‘Bare, na nhai kfo nneh marifoya be wan kinakforpat yakrahn. Nd niko yakhani wan kinakfot to bi tukomn kfo fakiomokomt nd wan kinakfothu yakneft. Na nd kfo yakio mrokfot hikhato inji wikniyanko. ¹⁴ Nhai tfit finji kforuhatn. Ninhu marufam wayaknikahnmn wanju. Nd na niko yahu maruham na tukanhu htihato yak nhta nmbuhatn inji fahuyanko.

¹⁵ Na nhai tukanhu maruhampno wom yimar kfo htakfot. Na kanga finji finji anyanm, to ni womn tamohmpno tfit kfo yuhuwehwa?”

¹⁶ Jisasr kfo memomr, “To inji rhuraht. Yimam mongko tohyukm tfit mfnahnirahm. Yimam nyingako tohyukm tfit mongko yihom fnahnirahm.”

Husfirpehyuk mrokfot Jisasr kfo memomr, “Nohaforhoyann tfit sinyaruha.” (Mak 10.32-34; Luk 18.31-33)

¹⁷ Jerusalemko yinyeftpno buha yihotatn Jisasr turhu disaiperm yakhato turpathato kfo memorm, ¹⁸ “Wawanyko, nom Jerusalemko yitohat, na Bro Najoma hrek kita prisroh bro yimami nkifra boririfhuthu tisaroh tirmn. Kmim rompno nakfo habofkniruhamn, ¹⁹ yima tangimpno htarhotma, rom sinyahato kfo hutatpno kfo hutatpno yenyohrahma. Tfit wife wife yenyoh guruhama. Wife yenyoh guhato tfit yura bgre misn kihegirrhotma nohruha. Nohrahoyann tfit husfirpehyuk marrpno tfit sinyaruha.”

Jems Jonrof memof, bro yimano arhuno (Mak 10.35-45)

²⁰ Sebedirhu mett yon husf yaknihato Jisasrpnno mtabokmehato kfo memomr, “Tisa, nanhu mrokfot kforfohat, wanyrfont?” ²¹ Jisasr sinyahato kfo memomr, “To wakfo ptha.” Kfo memomr, “Na kanga, ni kingn toh thoft

nanhu yon husfn mano mano arhutwaf. Womr wayak htatwanr tirmifkor yo womrne kindonko. Rofn ninpno mano mano rhuhato bro yufat yakhato ninhu hingerneft yakitohnhorahfn.”

²² Jisasn sinyahato kfo memor, “Nifn nhai duka hik marnyahato ttiwonkahfna. Nd na yeruha krhoparoh kaft ka yenyo twanho mifrahfna?” Kfo memorf, “Uwa, no yenyhorahnonn.” ²³ Jisasn kfo memorf, “Na yeruha krhoparoh kaft rot nifn yerahfnt. Tmift nann nifnru rhuyuk tkitroh yak htanefnt, na nhai bi nanhu fijo kfo mekfot ni ndko rhurahn. Yo ni ndko. Nhai. Tu Bro Nkifrarhu duka fijo fak hta nhombra htatamorm tkitm. Kto turhu hti fijo tkitm yak hta nhombra hi hanyrahm.”

²⁴ Jon Jems najohf inji ttiwonmotfr tfit wom 10-pela disaiperm kfo hut memomf, “Tamohmpno ndhett ttiwon nmbuhat ttiwonwafnr?” ²⁵ Jisasn rpat naku nhafoh bugamormn kfo memorm, “Niko bi htieteko, kingm yima tangim yakitohwohat. Yimam be nd tohak yimarhu yinhin tohwom. Nhai womr finji tfit kfo pthakfot. Yimam be rorhu tngprat hikkfot. ²⁶ Niko mirahko nd neft ahiknom. Yimar kangr, tohukatohr atoha, nd yimar afo nikmoh hingeranhu yimar tohkfot. ²⁷ O kangr, tohak yimaya atoha, afo toh tario yimar tohkfot. ²⁸ To Bro Najomr niamohat, nhai turhu rhu nmbuhat dukahato ndar bbinysoft niarmort. Nhai. Nikmoh rhu beb nmbuhat duka tanyhato niamort ndar bbinysoft. Rorn ndar bbinysof thofroh fasoh fasoh nefm suh nanyorrahrm.”

*Jisasn nyinga kunyjf yak marnyamo yuhat
(Mak 10.46-52; Luk 18.35-43)*

²⁹ Jisasn turhu disaiperm kmi Jerikot htanyhato yimohat, yonmari yima rifhur hik hanymomm. ³⁰ Buha yihotatn hus nyinga kunyjf yihota thmbko rhu hasohato wanyak hanymof Jisasn yimohat. Wanyak hanyhato kfo nakuyafmof, “Woi! Bro Nungothete, Defit frikefthu Yone, wayuhuwafnno.” ³¹ Inji kfo nakumotf wom yimam kfo thfamomf. Rof nhai wany yakiomf. Tfit wompam masat kfo nakuyafmof memof, “Woi! Bro Nungothete, Defit frikefthu Yone, wayuhuwafnno.”

³² Be Jisasn nd yimafhu naku tngt wanyhato be mtomhor. Mtohhato kfo memorf, “Bar yimafn, tamohm nakutafna?” ³³ Nd nyinga kunyjf kfo memof, “Broye, kangno nyingam wayak marnyakahtnm ayukatohno.” ³⁴ Inji kfomotf Jisasn yuhuwahtato nyingamn tirm htamotfr nyingam be wuthamomf. Nyingam wuthanimotmf be tfit Jisasn mhikakni twanhomof.

Jisasn Jerusalemn mfnahhato tuhan yindarim kfo nuhas bonuhasmo yuhat

21

(Sapta 21–25)

*Jisasn king kanjo Jerusalemn yimo yuhat
(Mak 11.1-11; Luk 19.28-40; Jon 12.12-19)*

¹ Jisasn turhu disaiperm yimomn brbo Jerusalemn yorhwa Olifet kmi yihofr yorhwa kmi Betfaget mfnahmom. Ndha mhtahato hus disaiperm kfo tkrur memorf, ² “Watohak hanykahfn ndar rihtita kmit mfnahrahfn yudbat htirahfnt wom donkit natifett rhuraht rpat yon donkirpno. Nd donkif wayak nyusakaknetwafn. ³ Yekwatfn yimam kfo ttiwonwomfn,

wakfo wamitwafnm, ‘Bro Nungothetr hingernefetrn kfefitrno be yifrar kakni yahukanonr tfit yudbat yarim htanyrahf.’ ”

⁴ Ndhtet tng mrokfom inji rhumohat, to be bingot profetr kfomo tng yuhatn nd mrokfom rhu hik mifmom. ⁵ Bro Nkifrar kfo memorr Aisaia, “Taun Saion wakfo wamitwant, ‘Wahtiyakko, nikmoh kingr bi ndr bi niewar. Yufapa duha yima furam kanjo yura donkir rhuhato niewur. Yuhre warho hanyet donkiran rhu hnehato niewur.’ ” *Ais 62.11, Sek 9.9*

⁶ Be nd hus disaipperf yimofn hingrna hikmof Jisasr kfomo yuhatn. ⁷ Nd donki husf nyusakaknihato hanyhemofr. Rim htahato tufhu rmontham yakmofmn yima rhuyuk tkitt rmonthaye yak hta marnyahato Jisasr mrhuhato yimor. ⁸ Ror yimohat yonmar yima rifhur ror htihak hanyhato turoh rmontham yakmomm, rorhu yiyuk yuhatn hta nyingtakmomm. Womm miyuhtam yak wokakhato ror yiyuk yihotatn htakmomm. ⁹ Jisasrhu nyingako tohakmo yimam yo mongko tohyuk yimam, romn kfo naku ptha hany memom, “Wayindhorakkomr Defit frikefthu Yonr. Bro Nkifrar ayak marnyatwarr Brorhu yufatpno niayuk yimar. Bro Nkifrarhu yufat yura yura kfo yindhor boyindhorhof.”

¹⁰ Jisasr kmi Jerusalemt yimohat, kmi thofm tfit tum nattiwon hany memom, “Ndar yimar nieware froher?” ¹¹ Nd Jisasrpo yau hanymo yimamn kfo nuhas memomm, “Ndarr Jisaser. Galiliko yorhwa taun Nasaretkorhof profetr niewur.”

Bro Nkifrarhu temperr maket htamoa kmim Jisasr yihato yak thumo yuhat

(Mak 11.15-19; Luk 19.45-48; Jon 2.13-22)

¹² Jisasr Jerusalemt rim fnahnihato rim htimorm Bro Nkifrarhu temperr maket htamoum yimam. Rim htihato maket htamoa yimami yeshrim wiknamoa yimam hik tubatumorm. Hik tubatumormn maruha niak tuknamoa teborm yo nunga ganyom mmkrn htamoa gajim nembos tubatu hikafmorm.* ¹³ Yak thunihato kfo memom, “Bro Nkifrarhu rfa borngt kfo kangt, ‘Nanhu temperr nanhu kfo bruttnayuk kunys rhuraht.’ Tfit nikomn kangko rikoh yimaroh yi kafrohyuk tkitt arhut.”

¹⁴ Jisasr yiro temperr tohetrn nyinga kunyjetm yo wura bebet yimam yimom. Yimotm Jisasr fak marnyamorm. ¹⁵ Jisasr nd mirakerkfot hingrnamohat yo yonkmim yiro rmon kmifar tohhato kfo yindhor grha memohat, “Defit frikefthu Yonr wakfo hagrhakomr.” Nd kfo yindhor mrokfom prisroh bro yimami boririfhuthu tisam htihato wanymohat rroh yima yuhum nhai marnyarmomm. ¹⁶ Yima yuhum faso rikihato Jisasr kfo ttiwon memomr, “Nd yonkmim kfo yindhor grhahato kfiwa mrokfom ni wanuknm?” Jisasr kfo memorm, “Uwa, rom wanukanm. Tone, ka nhai wom mrokfot htikahkomt? Rfa borngt kfo kangt, ‘Ninhu yufathu yuta hagrhanefit yonmpno bi inji rinakmotn tu be ninhu yufatn yonm kfo yuta grha hanitm.’ ” ¹⁷ Be tfit nd taunt htanyhato tfit kmi Betanit yihato nd yifungr ndha toh nfhamor.

* **21:12:** Bro Nkifrarhu temperr htamoa ofakfot yimam wiknamoahat nhai gafmanrhu maruhaye wiknamoamm temperr htayuk tamoh tamoh yeshrim o tamohm. Tu temperrhu maruham yak tuknamoamn tu temperrhu maruhaye wiknamoumm yeshrim o tamohm. Ndnnett yimam temperrhu yeshrim wiknamoahat afo maruham yak tuknakhato ee yeshrim tu temperrhu maruhaye wiknamoumm.

Jisasr kfohato fik tihat nohhato twam yurfmo yuhat
(Mak 11.12-14; 11.20-24)

¹⁸ Dbha ksfut Jisasr memor, tfit taun Jerusalemko aiya, buha myati-nohmor. ¹⁹ Yihota yifembtn tohmot fik tihat. Nd fik tihat nhai yukha hirmoat. Be twa bomrpam rhumomt. Be inji htitihato nd fik tihat kfo memort, “Ni ndar fik tihaye, mirahn tfit yukha hir mifa. Be tu nhai mif.” Be nd fik tihat inji kfomotrt, be yudbat nohhato twam furfmomt.

²⁰ Turhu disaiperm inji htihato be tuha mrokfo duhatm rhuhato kfo memom, “Bar yimako, finji netrt nd mis yudbat nohakni twanhit?”

²¹ Tfit Jisasrn sinyahato kfo memorm, “Na kfo mifwanko, nikmoh yima yuhum be tu rpa yima yuhur rhuhato kfo mirahko, ‘Nom asomif kfiwohat Bro Nkifrar wanukwarn asomif nd mis nohwot.’ Inji dukahato kforahko, to inji htirahko na asomif fik tihat ne kanjo. To mirahko ka be ndrpatn. Nhai. Ndar kminysoft kfo mirahkomt, ‘Asomif nom kfiwunom marombtn wamitoh witani,’ to be htirahkomt nd kminysoft marombt mitoh witaniraht niko kforuha kanjo. ²² Nikmoh yima yuhum rpa dukefrpar rhuhato tamohm kfo bruttna kfo mirahko, ‘Nom asomif kfiwohat Bro Nkifrar wanukwarn nd nom kfo bruttnewa shrm htitnomm.’ Inji dukahato kfo bruttnarahko, to be hti mifrahko.”

Jisasr bro yufat yakmo yuhat kfo ttiwonmorm
(Mak 11.27-33; Luk 20.1-8)

²³ Jisasr Bro Nkifrarhu rmon kmifarn fknenimorn met yindarim kfo ptha nuhasmorm. Kfo nuhas hanyetrn prisroh bro yimam yo Judaroh bro yimam yimomn kfo ttiwon memorm, “Frohmn ndhet bbuka rifhur hemomn? Frohmn bbuka rifhur hehato kfo memomn inji wanatwa?” ²⁴⁻²⁵ Tfit Jisasr sinyahato kfo memor, “Na to tawo tfit ttiwonwanko. Tone Jonr yimam baftaisimmoahate tu Bro Nkifrarn kfomotrt ndhtet hingrneft hingrnamourt o be yima mifm kfomotmr yimam baftaisimmourm? Nd ttiwon nmbuhat kanga wakfo nuhasakhtkma tawo kfo nuhasruhanko na hingrnewa hingrnefthu bbukeft yakmo yuhat.”

Rom inji wanyhato tfit tum nnakfo memom, “Nom sinyahato kfo mirah-nomr, ‘Bro Nkifrarn kfomotrt hingrnamour,’ to tfit mirahr, ‘To tamohmpno wany yakio duha yirmokomr?’ ²⁶ Jonr pthamoa mrokfom profetm kanjo pthamoatrm yimam wanyomumm, tfit nom kfo mirahnom, ‘Yimaroh kfotpno kfo pthamour,’ to be yimam sinyahato tat nohrahmmom.” ²⁷ Be myak nhtaktiyaktihato be kfo memorm, “Nom nhai tawisafkahnom.” Rom inji kfomotm tfit Jisasr kfo memorm, “Na to inji. Na nhai kfo nuhaswotanko na hingrnewa hingrnefthu bbukeft yakmo yuhat.”

Wom yimarhu yon husfhu kfo nhombra mrokfot

²⁸ Jisasr tfit nd prisroh bro yimami Judaroh bro yimam kfo ttiwon memorm, “Tone finji dukewako? Wom yimar hus yonetr tohmor. Wom yiha turhu nkati yonrpn yihato kfo memor, ‘Hrek waikahnn wain mswirt wahingrnatwa.’ ²⁹ Tfit yinembr afo kfo kur nheh memorr, ‘Na wofnkaha.’ Yinembr afo inji kfo kur tefinimorn tfit kto sinyanihato yimor. ³⁰ Bro yonr kfo ttiwontinihato tfit yimor habhirpno. Yihato rpahtet mrokfot kfomorr. Kfomotrt yinembr kfo fakio nheh memor, ‘Uwa, yiruha.’ yakio nhehafhato nhai yimorr.” ³¹ Jisasr inji kfohato ttiwon memorm, “Nd hus yonfe frohnr

yifemrhu mrokfot wany yakiomort?” Rom kfo memom, “Nkatirn yifemrhu mrokfot wany yakiomort.”

Rom inji kfomotmr tfit Jisasr kfo memorm, “Na kfo mifwanko, takis marut yekwa yimami yo ijoh tonita metm, romn tohekwomt Bro Nkifrarhu kingdomkfof. ³² Ndt to nhai be sfno. Nikmoh yihar Jonr tohhato dborioh yihotar fak nuhas hnamorko. To nikomn nhai wany yakiohato yak hikrmokomt. Takis maruha yakyuk yimami ijoh tonayet metm, romn wany yakiohato hikmomt. To niko tfit inji htiyaf hanyomohat, to nhai nikmoh fasoh fasoh nefm mong trohhato Jonrhu mrokfom hikrmokomm.”

*Wain swirt tohukatohmo yima bebroh kfo nhombra mrokfot
(Mak 12.1-12; Luk 20.9-19)*

³³ Jisasr tfit wom kfo nhombra mrokfot yakhato kfo memorm, “Wawanyko. Wom yimar wain swirt htamor. Wain tofm nuhtanihato gnat gna habrimort. Gnanihato muhr toumorr wain yukharoh yahot kembiftyukr. Ndt inji hingrnanihato tfit nd wain swirthu rhu yukatohyuk kumba kunyr hingrnammorr. Be inji hingrna tanymortn wom yimam yakhato nd mswirthu tohukatohhato yukharoh nayak nhata yuham nayak dbkafhato ror be wom kmimn toh habrimor. ³⁴ Kto nd wain swirt yukha hirmott yukha yak yiharn nd tu wain swir tikatr turhu hingrna yimam kfo tkrurafmorm, nd wain swirt yakitoh hasoyuk yimampno. Kfo tkruraf memorm, ‘Waikahkomn nanhu yufathu htahayuk yukham wamiyakhikma.’ ³⁵ Be nd yimam yimohat be mifahotakmom. Nd mswirt tohukatoh hasoyuk yimam sinyamomn womr tabotmomr, womr tabotmotmr nohmomr, womrne tahiya tahiye febhohmomr. ³⁶ Yo tfit kto wom yiha tfit wom yimam kfo tkrurafmorr. Nd yiharne tu bokm. Yimom, nhaf be mifahotakmom rpahtet nefn namomn.

³⁷ Wuroh turhu garbn yon mifr. Duka memor, ‘Tukanhu garbn yon mifr yiruhatre wany yakiorahmr.’ ³⁸ Be nd yonr tkrurafmotrr yimor. Yimorn wain swirt tohyuk yimam htiyakhato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndar wain swirt rorn yakrahrt. Finji dukewako? Awaskahnomr be nd wain swirt be nmoht rhuraht.’ ³⁹ Be mrokfot yak dbkafnihato turhu wain swirt toh hasetrn toh rafaknihato fakmomr. Yakhato tirtir yaknimomr nndo rim htahato washomr.” ⁴⁰ Jisasr inji kfo pthanihato kfo memorm, “Niko to finji dukewako? To nd wain swir tikatr nia thohte, to finji naruharm?”

⁴¹ Kfo memomr, “Nd yima bebm faso faso tabot nohrahmr. Tabot nohhato nd wain swirt yakruharn tfit womm hehato romn yakitohruhamtn wain yukha yak yihar yakruhammn nd wain yukham yak nhtaruhammn turhum hirahmr.”

⁴² Jisasr wanyhato kfo memorm, “Wom mrokfot Bro Nkifrarhu rfa borngt yorhwat htitwokomt? Nd mrokfot kfo kangt, ‘Nd rahur, kamda yimam hti kurhato yak thumor, be bi tfit nd rahurn bi dany rahur tohwor.

Tu Brojn inji hingrna hta bohtamotrr

nom be inji htihato mrokfo duha korhwonom.’

Sng 118.22, 23

⁴³ Ndnnetn kfo dukiwanko. Bro Nkifrarhu kingdomkfof niko yakitohwat, yak tuhakruharn tfit frohm nd kingdomkfothu nefm mhfnahnewum, rom

tfit wahirahr. ⁴⁴ Yimam nd dany rahurpno rim frbrigneft o rachus suhnehato frkarnyaneft to be nhai wom rhukfot o nfrikfot.”†

⁴⁵ Nd nd mrokfom pthamotrm nd prisroh bro yimam yo nd Farisim Jisasrpn toh pthamoam, wanyhato kfo memom, “Nd kfo nhombra kfofot nomn niewut.” ⁴⁶ Ndnetmn nambur sinyahato memom, “Ka bi kak twanhiwunomr.” To nhai, kmi thofm mhti fakrmiyakmom. Kmi thofm Jisasr kfo pthamoa mrokfom profetm kfo pthamoa kanjo pthamoatrm rom wany yindhohato hikmomm. Nd rorhu mrokfom hiket yimam ruhetmn prisroh bro yimaroh namburpam yo Farisroh namburpam romn mhti yakrmiyakhato nhai tafont htarmoamm. Duka memom, “Finji rinakrahom, rom sinyaruhamn tabot nohrahmnom.”

22

Yima sawohf nayak tatrutwa yiha htewa yemro burwathu kfo nombramo mrokfot
(Luk 14.16-24)

¹ Jisasr tfit wom kfo nhombra mrokfot yakhato kfo memom, ² “Hefenrhu kingdomkfofot kangme wom kingrhu yonr tuhan yekwarn yifem kingr bro yemro burwat htewartn kmi kmi nakutrm. ³ Nd yemro burwat yak htatahato bi kfo duka mrokfot bi yak hanyetm, mrokfot frhtfasmot yimaroh yakyukt. Tu kingr kfo tkrurmotrm turhu hingrna yimam yimom yimaroh yak htfass. To nhai, yimam nhai sinyarmom. ⁴ Yo tfit wom hingrna yimam yakhato kfo tkrur memom, ‘Na mrokfo hta htfasmo yimam wayak htfaskomm. Wakfo wamitwakomm, na bi yemro burwat htatahato bi kfo nakuta. Nanhu bulmakau yiram warhet warhet yemrot bi washato nde yemro burwat htiwant. Aniekahmn arhu ayamt.’

⁵ Kingrhu hingrna yimam yi kfofomm, nd yimam nhai wanyrmomm. Rom mrokfom wany sany hanyhato rpen rpen natubatumm. Womr ror turhu mswir yuhatn myak tehni hanyswa, womr ror turhu hingrnfmm waiswa. ⁶ To tfit wommn nd kingrhu hingrna yimam yak tkaftamomm tat beb bobebmotmm nohmom. ⁷ Kingr inji wany namburhato turhu soldiam kfo tkrurmotrm rom yihato nd yimam was witahto rroh kmit tandhi wusmomt.

⁸ Be kingr turhu hingrna yimam kfo memom, ‘Yemro burwat bi htayett korhwot. Tmift nd kfo hanyuk yimamn nhai tu dborioh yimamn nikahmn yekahmt. ⁹ Ndnettn wai htfastwakomm yihota nadbgm. Yihota nadbgm tohhato yimam htiekwoko, wakfakne hnetwakomm ndar yemro burwathu yanyeft.’ ¹⁰ Be inji kfafmotrm yimom. Yi htfashato nd yihotam toh hasoyukm yak bugahato hanymomm. Dborioh yimam, fasoh yimam fak fura bofurani bugamomm. Nd yemro burwat htayuk kunyr be tng mnderpat tohmor.

¹¹ Tuhant yindars rhu hasetmn kingr rroh htit yimor. Yimorn wom yimar htimorr nhai tu nd tuhan yak yiharhu wondhyuk wondh tham hmbrrermor. ¹² Kingr inji htihato kfo ttiwon memorr, ‘Barene, tamohmpno nhai tu dborioh hmbresham hmbrenehato niarfo?’ Be nd yimar tuha mrokfo duhatr tohmor. ¹³ Be kingr toh kekutnihato turhu hingrna yimam

† 21:44: Nd ves 44 kfofot, ndar gonborngt yorhwa mrokfom hti duka tungunet yimam kfo memom nd sentenskfofot nhai tu Matyurn htarmort. Wommn nd sentenskfofot rihtakmomt.

kfo memorm, ‘Nd yimar wayak tumakkahkomr briaahako watuhafokomr. Briyahako kspitat tohrahr. Nd kspitat tohwa yimam tau nknekwom.’”

¹⁴ Nd kfo nhombra mrokfothu yimbu yuhat Jisasr kfo ptha memor, “Bok yimampno nakukfot kitt, to tfit rpen rpenrpam kekwor.”

*Sisarhu maruha he yuhat
(Mak 12.13-17; Luk 20.20-26)*

¹⁵⁻¹⁶ Be nd Jisasr kfoyuk mrokfot Farisim wanyumohat yima yuhum nhai marnyarmomm. Be yihato tfit tu Farisiroh disaipermi Herotrhu politiker patikfot tohyuk yimam mkfo tkruraf memomm, “Nikomn waikahkomn rorhu mrokfo ptha swirmn rhunhohato yuwi ttiwon rhtikfot. Finji finji kfiwur, nd tkittn yakhato kotimrahnomr bro yimampno.” Be inji kfafmotmm yimom. Yihato yuwi kfo memorm, “Tisaye, ni pthewa mrokfom nom hifa wanuknomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunm tuhan yindarim. Mrokfom kfo pthiwohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunm. Nhai yimar o yufam htihato kfo pthakahnm.” ¹⁷ Inji kfonihato wom ttiwon nmbuhat yuwi ttiwon rhtimomr, “To ni finji dukewa? Nome ka Sisarhu takis htahenefte ka htarfonome nhai?”

¹⁸ Jisasr rom yuwi inji ttiwon rhtimohat bi htimorm rroh fasoh yima yuhum. Htihato kfo memorm, “Niko mikfo nhehta mkfo nhehtayet yimayeko! Tamohmpno inji ttiwon rhtitakma? ¹⁹ Wom takis wiknayuk tahifat wayak nuhaskoma.” Yakhato fak nuhasmomr. ²⁰ Nd tahifat yakhato kfo memorm, “To nda tahifat yorhwa nyingatikte frohroh nyingatikti yufat yorhwat?” ²¹ Kfo memorm, “Sisarhu nyingatikte korhwott.” Tfit kfo memorm, “Sisarhu nyingatikte korhwott to be tfit Sisarn hekfot. Bro Nkifrarhum nhaf inji. Tu Bro Nkifrarum hekfot.”

²² Inji kfo wokafmotrm be mrokfo duhatm yimom.

*Sadyusim Jisasr ttiwonmomr yimaroh nohhato sinya yuhat
(Mak 12.18-27; Luk 20.27-40)*

²³ Farisim yimotm tfit Sadyusim yimom. Nd Sadyusiroh dukeft duka memom, “Noh hanita yimam nhai tfit sinyaruhatm.” Rroh dukeft inji rhumout. Nd duketpno Sadyusim Jisasrpno yihato mkfo memorm, ²⁴ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpno yonm nasakhato tfit najomrhu tkitm romn tohkfot. ²⁵ Wom yima najohfitpno to inji rhumot. Nd yima najohfit 7-pelakfot tohmom. Barkof bro najomr tuhan fakmor. Ror tuhan yakmohat nhai yonm nasak htanihatoh nohrmor. Be nohmotr tuhan dhirt tohmott tfit rorhu wayakrn fakmort tuhan dhirt. ²⁶ Rorpno nhaf nhai wom yonm nasak htanihatoh nohrmor. Tfit rorhu mongko nuryukrn tfit fakmort nd tuhan dhirt. Ror yakhato be rpahtefte. Be inji nahany nahany 7-pela yima najohfit rhunhombra bugamotm. ²⁷ Wuroh 7-yukrnone nohmot. ²⁸ Nd 7-pela yima najohfit rpa metrpat rim rhuta mrhutamotm. Kto nd najohfit sinya thoft nd mette fitoh yimarpno tohruhat?” Inji ttiwon rhtimomr.

²⁹ Jisasr wanyhato kfo memorm, “Bro Nkifrarhu mrokfom yo rorhu bbukeftpno nd noheh yimam sinya thoft ka mumiwuko. ³⁰ Wawanyko, nd

bi noh hanita yimam kto tfit sinya thoft nhai tfit tuhan yakruhatm. Nhai. Be inji sfno hefenrhu mounmotn kanjo tohrahm.

³¹ Nd yimaroh nohhato sinya yuhat Mosesrhu tndht duka hanykfot. Wom yiha Bro Nkifrar yihato Mosesr kfo memorr,

³² ‘Nane Abraham, Aisak, Jekofroh Nkifraya.’ *Kis 3.6*

Bro Nkifrar yima nfri yafothet yimaroh Nkifrayer. Nhai noheh yimaroh Nkifrar rhukahr.” ³³ Yimam nd ror pthayuk mrokfom wanyhato mrokfo duhatm rhumom.

Nyingako mtohekwa tu bro boririfhut
(*Mak 12.28-31; Luk 10.25-28*)

³⁴ Sadyusim kfo yuk tngm Jisars kfo wokmohat Farisim wanyomom. Farisim wanyhato yimom Jisarspno. ³⁵ Farisim yimomn rroh womr, nkifra boririfhuthu tisar, rorn Jisars yuwi ttiwon rhti memorr, ³⁶ “Tisa, ndar nom wanuka boririfhum, fitoh boririfhutn tu nyingako mtihak mifwat?”

³⁷ Jisars wanyhato kfo memorr,

“ ‘Bror ninhu Nkifrayer, ndnatn ninhu yuhuwaf marbi bugam, ninhu yafothat, yo ninhu yima yuhu bugam be rorparn htakfot.’

Lo 6.5

³⁸ Nd boririfhutn tu bro mifet. Rotn mtihak mifwot. ³⁹ Yo tfit rotпно myak tkafekwat inji kfiwut:

‘Tunn yak marnyewa kanjo inji womm yak marnyakfot.’ *Wkp 19.18*

⁴⁰ Nd hus boririfhu nmbuhafn tof tu mnako yorhwa boririfhuf. Mosesrhu boririfhuti profetroh mrokfom, nd hus boririfhufn mttaf tanyomom.”

Frohr miyak htiyakruharnom?
(*Mak 12.35-37; Luk 20.41-44*)

⁴¹ Farisim yuhre rifiny hasetmn Jisars yihato kfo ttiwon memorm,

⁴² “Niko finji dukewakomr nd yimaroh minrfa htiyakyuk yima Kraistr? Fitoh frikef yuhathu yimayer?” Kfo memorr, “Defitrhu frikef yuhathu yimayer.”

⁴³ Tfit kfo memorm, “Niko tu kfo mif kfot kfo thoft, to tamohmpno bingot Defitr tohmohat Bro Nkifrarhu Yafothat yihato Defitr yima yuhu hemotrr nd yima Kraistr Defitr futa memorr, ‘Bro Nungothetr’? Defitr kfo memorr,

⁴⁴ ‘Bro Yawer kfo memorr nanhu Bro Nungothetr,

“Nanhu bro bbukeft yorhwa tirmifko wamrhun.

Wamrhukahtn nd ni namburwa yahr kmim

afo ninhu tirtn htahato ninhu mofsinhitn yak htaruhanm.”’ *Sng 110.1*

⁴⁵ To nd yima Kraistr bi Defitr kfo yuta hna memoa, ‘Nanhu Bro Nungothetr,’ to tfit Defitrhu frikef yuhat nierahr?”

⁴⁶ Be inji yak nnariyafomotrm nhai tfit marimom, “Tfit wom kfo ttiwon mrokfot kfo ttiwonrahnomr Jisars.”

23

Farisimi nkifra boririfhuthu tisaroh fasoh nmbuham
(*Mak 12.38-39; Luk 11.43; 11.46; 20.45-46*)

¹ Farisimpno nd kfo ttiwon nmbuhat kfo ttiwonnimormn tfit kecutni-morn turhu disaipermi tuhan yindarim mrokfom hi hanyhato kfo memorm, ² “Boririfhuthu tisami Farisim rom hifa boririfhu mrokfom kfo nuhas-womko Mosesr namoa kanjo. ³ Ndnettn nd rom kfo nuhasyuk boririfhu mrokfom niko wanyhato hikkfot. Tmift, rom niwa nefmn niko htihato

hik duha. Rom inji newum: Yimaroh mrokfo hanyeft, rom mrokfom kahukmm. To tfit tum nd mrokforoh hikneftn nhai hikkahmm. Ndnnett rom nayuk nefm niko hik duha. ⁴ Rom yimam boririfhu mrokfom kfo nuhaswohat, nhai be Bro Nkifrarhu boririfhurpat kfokahmm. Tfit romn turoh fijo wom wom kfo yirmoh mrokfom yakhato tfit hta hutewumm. Btn yimam hikneft htanhitm hik buganeft. Inji htitahat nhai hti yuhuwaf mikahm. ‘Be kfungot rimak myakhato htewatnom yimam htanhitwom hikneft. Womm ayak thunomm.’ Nhai. Nhai inji nakahm. ⁵ Rom niwa nefm kangm yimako htiruhakomn kfo yindhorrahkomm. Kfo bruttna yiham htirahkomm nhai Baiber fesm ruhet tefi kpenm mfhatn kiskaf hmbrihato nyimbikko rhuruhatn. Nhai. Bro kpenm mfhatn kiskaf hmbrebrahmm. Yo saketha psifm hatohet mtin tfuhet saketham nhai kkopen mtin tfuhet mtin tfuhet saketham hmbrebruhatn. Nhai. Tu yuke yuke mtin tfuhet saketham hmbrebrahm. Kangm yimako htiruhakomn kfo yindhorrahkomm.* ⁶ Fitoh rhu rifinyhato kfo bruttnayuk rmonm rom nhai mongkorn o kimbko rim rhukfot. Tu be nhai mif. Rom tu be nyingako mruhakkfot. Bro yemro ye burwa tkitm nhaf inji. Rom inji yimaroh nyingako mruhakkfot. ⁷ Yo tamoh maket swirm rom yau hanyneft kangm, ‘Yimam be tisa yufatpno ayuta hambonna yindhor amemnom, “Hifa dbha Rabai.”’ †

⁸ Nhai yimam nikomn kfo yuta mekfote, ‘Rabai.’ Niko najohfi yagrn tohwoko. Tor womr, rorrpar nmoh Tisayer. ⁹ Ndar bbinysoft, niko nhai wom yimar yuta mekfot, ‘Yifemr.’ Tor womr, rorrpar nikmoh Yifemer. Tor yura hefenrn tohwor. ¹⁰ Yo niko nhai yimam niko kfo yuta mekfote, ‘Tohak Yimam.’ Nhai. Nhai nikomn inji yutakfot. Nikmoh rpa tohak yimayer. Rorn Bro Nkifrar kfo htamorr ndar bbinysof thofroh minrfa htihakneft. ¹¹ Kangn, ‘Bro yimaya atoha,’ afo yimaroh hingrna yima furar kanjo rhukfot. ¹² Yimar kangr, ‘Tamoh nefm nann bmbri nyingako mtohnihato nann tamoh tamoh nefm atohakhtanm yimam kfo yindhorrahma,’ nd yimar kto Bro Nkifrar yak dbhurakruharr yiro wahtarahr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahr.”

*Jisasr Farisimi boririfhuthu tisam kfo huttmu yuhat
(Mak 12.40; Luk 11.39-52; 20.47)*

13-14 “Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! To nikomn hefenrhu kingdomkfothu rim fkneni yuhat toh rafiwukomt. To tuko nhai rim fnahnihakho, tfit wommn kangm arim fnahninom tfit kiyak rafiwukomm.

* **23:5:** Nd tefi kpenm Judam hingrnahato nyimbikko htamoam yo womm kindon tirko htamoam, ndm Baiber fesm wandfa wandfamoamm nd tefi kpenmn hmbremoammn, kfo bruttna yiham ndm htanimoamm yimoum kfo bruttna swirm. Yindaripam ndhtet kpenm hatohomoum. Ndhett kpenroh mrokfot htikfot Kisim Bek 13.9 yo 13.16 yo Lo 6.8 ee 11.18. Yo Judam buk Namba 15.37-41 yorhwa mrokfom hikhato rroh kkopen mtin tfuhet saketham hmbremoum. † **23:7:** Nd Rabai yufathu yimbu yuhat, Tisa.

Ndnettn Bro Nkifrar be yak bebrahrko.”[‡]

¹⁵ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Niko inji newuko. Niko tukmoh hingernefthu yaunhoyuk disaiperm kangko ayaknom, yonmari tkit tkitm frnahik bugewukomm, yo marombt frhtfas bugewukomt. To nd yimar yakneft to tfit niko hel yuhat tohhato niwa fasoh fasoh nefmn tfit kak nuhaswokomr. Yak nuhaswatkomr rorn be tu mfro mfro fasoh nefm kitr.

¹⁶ Nyinga kunyjko kangko tfit womm yihotat ayak nuhasomm, niko duka marnyaf hanykfot! Womm kfo kangkomm, ‘Fitoh yimar Bro Nkifrarhu temperr myutak hanyhato wom mrokfom fak dbkafrmn, to nhai hik duha yirform ror kfoyuk mrokfom, ndt nhai mrokfo duhatet. To nd temperr rim htayuk gorkfotn myutak hanyhato wom mrokfom fak dbkafrn, nd mrokfomn ror hikkfot. Bro Nkifrar kukatoh hasiwur.’ ¹⁷ Ar mmo hari kpt! Nd niko kfiwa tngt be tu nyinga kunyjkomm kfo ptha mumiwuko. Tamohtn tu yafothetet, gorkfotn o nd gorkfot yorhwa temperr? Nd temperr Bro Nkifraruhet. Ndnettn nd temperr rim htayuk gorkfot rpat tu Bro Nkifraruhet. ¹⁸ Yo kfo kangko, ‘Altar[§] myutak hanyhato wom mrokfom fak dbkafrmn, to nhai hik duha yirform ror kfoyuk mrokfom, ndt nhai mrokfo duhatet. Nd yura altarn htayuk yemromn myutak hanyhato wom mrokfom fak dbkafrn, nd mrokfomn ror hikkfot. Bro Nkifrar kukatoh hasiwur.’ ¹⁹ Niko be tu nyinga kunyjeko! Tamohtn tu yafothetet, nd yemrot o nd yemrot htewa altar? Nd altar Bro Nkifraruhet. Ndnettn nd altarn htayuk yemrot rpat tu Bro Nkifraruhet. ²⁰ Na kfo mifwanko, yimar altar myutak hanyhato wom mrokfot fak dbkafrt, to nd altar rhuyuk shrkarpno bi rpat mrokfot fak dbkafrt. ²¹ Yo Bro Nkifrarhu temperr bi yutahato wom mrokfot fak dbkafrt, to nd temperr thu nawohwa Nkifrarppno bi mrokfot kak dbkafwort. ²² Yo yimar mrokfom kfo ptha hanyhato hefenr yutahato wom mrokfot fak dbkafrt, nd mrokfot to bi kak dbkafwort. To nd ror yutewa hefenr to fitharet? Ndr to bi Bro Nkifrar yorhwa gajir bi kutewur. Ndnettn hefenr yutahato mrokfot yak dbkafwohat Bro Nkifrarppno rpat yutahato mrokfot kak dbkafwort.

²³ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Tamoh tamoh wuritwenm, youpenm, wajipenm yakneft nhai Bro Nkifrar yak brur wunanikahkomr. Nhai. Bro Nkifrar hifa kesmbho wunewukomr. Ndm rom to hifa dborioh nefm newuko. To tfit tu boririfhut kfiwa tu bro mrokfothu hik yuhat tfit kak frikatitkomt. Niko yimaroh mrokfom rhuhatoy yakitoh hanyeft, nhai wany hik bohik marnyahato yak hta bohta marnya hikkahkomm. Yo womm nhai yuhuwafkahkomm. Yo nhai Bro Nkifrarhu dukefrn rhu

[‡] **23:13-14:** Wom yimam wom mrokfot hti nhta yak nhtamomtn duka memom tot wom mrokfo nmbuhat korhwot. Ndnettn romn htamomt ves 14-kfot yorhwa wom mrokfo nmbuhat. Nd mrokfo nmbuhat rom rihtakmot inji kfiwut: Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! To nikomm met dhirpampno yitakomm yuwi mkfo nneh bonhehakhnihatoy wasukenm myak rhotaknitwokomm. Yo Bro Nkifrarhu kfo bruttneft rikfo bruttna thoft nhai yudbat kfo bruttna tmhbonikahko. Yuwi kangko, “Akfo bruttna yukekahtomm yimam inji htiruhamnom mirahm, ‘Hifa yimayem.’ ” Ndnettn niko duka marnyaf hanykfot. Kto Bro Nkifrar kotkfot yakitoh thoft niko be tu bro krhopam yakrahko. Htikfot Mak 12.40. **§ 23:18:** yemro tarioh mthayuk tkitt

marnyakahko. Ndm hikhato yakitoh marnyahato tfit wom wom kfo yirmoh mrokfoyenm rpat hikkfot. ²⁴ Niko be tu nyinga kunyj mifkomn kangko, 'Womm yihotat ayak nuhasnomm.' Niko inji newa yuhat kangko womroh yemro bruyoh roht mitayifwa krkonenrpatn ahtihanyom, to tukmoh yemro roht mitayifyuk yonmari kamerr nhai htikahkomr.

²⁵ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Kaf pletm briahako kifsewa kanjo inji briahakorppa kifsewuko. Nikmoh yima rifhumio rikohefti fasoh fasoh nefm furkihwomko. Tukmoh toh nmbuharpas dukahato bi marut wuss tamoh tamoh yak yakhato bi tohwokomt. ²⁶ Arom nyinga kunyjet Farisi kpt, afo kaf pletroh yirokko kifsanihato ee briahakort htirahnt fihuraht rpatn.

²⁷ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Niko yima yopm kanjo yura briahakorppa ganyom penpaye yimam penimwa kanjo inji briahakorppa penimwoko, tfit yiro yoptwe yima gur kfe bdgnihato yima tpi trukti yima gu burioht furkihwot. ²⁸ Niko to inji korhko. Ptha wiyauyau marnyewatko yimam hti kangm ka hifa dborioh yimayem, yiro yima rifhumio yimaroh kfo nheh bonhehneft furkihwotko yo fasoh fasoh nefm furkihwomko.

²⁹ Niko boririfhuthu tisako yo niko Farisiko, niko mikfo nhehta mkfo nhehtayet yimayeko! Wadukaf hanyswako! Bingot noh hanymo profetroh yopm yo Brorhu dukefm yakitohmoa dborioh yimaroh yopm, ndm niko yak marnya bomarnyahato wondh marnya bomarnyewukomm. ³⁰ Yo kfo kangko, 'Nom nd nkifram tohmo yiham bi atohnom, nhai rom namo kanjo profetm wasrmonomm.' ³¹ To niko inji kfiwohat to bi tukomn tafon htewuko. To nikmohnm ndhtet nef namomt. To niko froheko? To rom frohem? ³² To nhai mrokfom. Kangko nfripa tokrpa ayanom, nhai mrokfom. Nkifram yohmo nakur tfit nikomn wayak truftwakomr. ³³ Niko nandomrhu nandom yoneko. Niko finji yamukako tfit ayakrmanyom, bi kah thmbt bi tohetko?

³⁴ Ndnnett kfiwanko, profetm, yo dborioh dukefet yimam, yo tisam kfo tkruraforhotanm nierahm nikompno. Nieruhatm womm wasrahkomm, yo womm yura bgre mimn kim hegirrahkomm, yo womm nikmoh rhu rifinyuk rmonmn wife yenyoh guhato hik tubatuyafrahkomm. ³⁵ Ndnatn niko nd profetm was hnamo yuhatn krhopam yak hanyrahko. Bingot nikmoh nkifram was hnamo profetm, barkofr dborioh yima Aberr wasmom. Ror wasnihato ee wom womt be yimaroh tirmn hirmom. Wurohenr Berekiarhu yon Sekaraiar yiro temperrn tarioh mthamoa tkitt toh hasetrn rim wasakmomr. ³⁶ Na kfo mifwanko, niko bi tukmoh nkiframn katirnamomko. Nhai toh marnyaruhatko. Rroh krhopam tfit nikomn yak hanyrahkomm."

Jisars Jerusalem tanurmo yuhat
(Luk 13.34-35; 19.41-44)

³⁷ Jisars tfit kfo memor, "O Jerusalem! Jerusalem! Kfo tkrurafoyuk profetm ninn was hakutwanm, yo womm tahie tahie tahie yebhoh noh hakutwanm. Bok yiham memoa nanhu mofsinhitn ahta akafrohneyann mmem kris yonm yak kafrohwa kanjo, to nhai. Nhai kfo yakiormona. ³⁸ Be wahti hanyswa, ninhu temperr nhai yima duhatr rhurahr. ³⁹ Ariham nhai wom tfit htirhotna. Bi tunn kfo kangn, 'O Bro Nkifraye, Brorhu yufatpno

niayuk yimar wayak marnya bomarnyatwanr.' Bi tunn inji kfiwune ee tfit htiyakrahna."

24

Bro Nkifrarhu temperrhu yoh nasoh yuhat Jisasr kfomor

(Mak 13.1-2; Luk 21.5-6)

¹ Jisasr Bro Nkifrarhu rmon kmifar htanyhato yuhre wufau hanymor, asha disaiperm. Jisasr mhtihato rmon kmifar tohyuk kunyroh ruheft hti natthato kfo pthamoumr. ² Jisasr wanyhato kfo memorm, "Na kfo mifwanko, ndar niko htita kunym nhai inji rhuruhatm. Yimam niahato kafring witarahmm."

Bok krhopam nieruha yuham Jisasr kfo pthamor

(Mak 13.3-13; Luk 21.7-19)

³ Jisasr yura Olifet kmit muhato mrhumor. Ndha rhu hasetrn turhu disaiperm niahato turpam ttiwon memorm, "Nd rmon kmifarhu kunyroh kafring yuhate fitoh yihar rhuruhatt htiruhanomt? Ninhu nia yihar yo ndar bbinysofthu bati yihar finji finji htihato yak dukaruhamnom nd yiharhu brboh yihar?"

⁴⁻⁵ Jisasr kfo memorm, "You niko! Wanyrahko yimam yi htfasruhamn bok yimam kfo nheh bonheh htfasrahmm. Nanhu yufat yutahato kfo mirahmm, 'Na bi asoya niko gari hasomo minrfa htiyakyuk yima Kraisa.' Niko inji wanukko, mirahko yudbat wany yakiohato amhikakninomm.

⁶ Nna yureft mano mano wanyrahkomt yo fitha fitha rhuyuk nna yurefthu mrokfom wanyakrahkomt. Inji wanuknom, bi mirahko bok dukeftm ayaknom. Ndhtet nefm rom nierahm. To mirahko ka bi nd nefmpno bi brbohwor yihar. Nhai. ⁷ Htirahko yo wanyrahko wom kantrikfot sinyaruhatn wom kantrikfotpno nnarahf. Wom kingr sinyaruharn wom kingrpnno nnarahf. Wom kmim yatinoh wormr tohrahm. Wom kmim bro nunes tonirahf. ⁸ Nd nefm yironarahkomm yon fanet mett barkof riyak yironekwa kanjo.

⁹ Nd yiha htirahko, wom yimam hti namburruhamn yakrahmko. Yakhato was hakurahmko. Niko nanhu mrokfot hiketko be tu hti dbnot thu hakurahmko. ¹⁰ Nd yiha bok yimam Bro Nkifrarhu yihotat myaffonirahmt. Myaffonihato tum nahndhna nahndhnahtato nahti dbnot nahti dbnotrahm. ¹¹ Yo nd yiha nhaf bok profet giamanm mfnahhato bok yimam frnheh bonhehrahmm. ¹² Fasoh fasoh nefrpamn kmi kmim brotaniruhatn yima nayak marnyaneft nhai wom rhuruhatt. ¹³ Fitoh yimar toh bmtahany toh bmtahany bbinysofthu bati yihar mfnahr; nd yimar Bro Nkifrar yakrahrr. ¹⁴ Kingdomkfothu gutnius mrokfot bi ndar bbinysofthu kmi kmim bi frhtfas bugetm ee btn bbinysofthu bati yihar nierahr."

Tu bro krhopam nieruharoh mrokfot

(Mak 13.14-23; Luk 21.20-24)

¹⁵ Jisasr kfo memorm, "Wahtitwako, profet Danierr kfomo yak batiyuk shr bebr htirahkomr Bro Nkifrarhu temperrn mtohrahrr." (Yimar Danierr kfoyuk mrokfom htiyukr hti hik marnya hanyhato mrokfo yimbu yuham yakfot.) ¹⁶ "Nd yiha Judia distriktpno brbo toh hanyuk yimam yura kminysofko yakrmanyikfot. ¹⁷ Yimar bi kunyshu wom yura ken tikrko wurhu mska hasir, mirahr tfit yiro mmem kunyko ayohnikahann wuskam amiyaka. ¹⁸ Yimar bi mswirko yirn ndko tohwor, mirahr tfit kmiko

aikahann turhu yuke hmbreshat afo tfit ai ayaka. ¹⁹ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwafeft korht. ²⁰ Bro Nkifrar kfo bruttnahato mirahr nd bro krhopam bro gonng wormrn o Sabat yiharn arhukahtn yimam nd yiharn ayakrmem. ²¹ Nd neft nia thombat mirahko ka tefi tefi kurhefm rhurahm. Ndar bbinysoft trhanimohat nhai ndhtet krhopam rhurmom. Yo ndar toh hniwa yiham nhai ndhtet kurhefm htikahnom. Yo kto nhai ndhtet kurhefm wompam rhuruhatm. Be tu bro bro krhopam tohrahm. ²² Nd kurheft rhuhany Bro Nkifrar nhai bmbri yak nohrfort, be yima bugam nd kurheftn batirahm. To nhaft Bro Nkifrar tfit dukarahr tur bi kfo htayuk yimam. Romn dukahato nd krhoparoh tohyuk yiham tfit yak kkopnrahm.

²³ Nd yiha wom yimam kfo mirahmko, ‘Barenko, nd Bro Nkifrar kfo htamo minrfa htikyayuk yima Kraiser bi asor, asha.’ Womm kfo mirahm, ‘Usor, usha.’ Inji wanyrahko, mirahko awany yakionomm. ²⁴ Womrne inji narahr. Mirakerkfoft hingrnaruharn kfo mirahr, ‘Na asoya niko toh gari hasiwa minrfa htikyayuk yima Kraisa,’ o kfo mirahr, ‘Na profeta.’ Inji kfohato wonk wonk mirakerkfoft hingrnarahm. Yuwi mirahm, ‘Tu Bro Nkifrar kfo htayuk met yindarim frnehakhato ahiknmom.’

²⁵ Wawanyko, kfo duka mrokfom bi kfo duka htiwanko. ²⁶ Ndnnett yimam kfo kangmko, ‘Wusor bi wesam tik furatn’. Wany yakiohato yi juha. O kfo kangmko, ‘Asor ndar kunysn.’ Wany yakio duha. ²⁷ Htitwokomr toh fnhur yohni thombat. Fnhu trfem yambohitna thombat nhai rpa tkitt htikahm. Kmi kmim hti bugewumr. Bro Najomr nia thombat to inji kanjo wur fitoh ritoh atoh kmi kmim htiyakrahm.

²⁸ Foh gum kfe bdgwa tkitmn kungorohm yi rifinywom.”

*Bro Najomrhu yawihna yihar
(Mak 13.24-27; Luk 21.25-28)*

²⁹ “Nd bro kurheft rhuniruhatt ee htirahko marr rim noh kfirahr, nhai wom taruhatr. Yamt nhaf inji. Rothu nukeft rim fnahniraht, nhai wom taruhatt. Gunym rom nhai mount rhuruhatm. Rom be wuyohninehato misuhrahm. Mount thu habokknamo yifonm mirahm nndo ginunes kekwothm. ³⁰ Ndtppo ee btn Bro Najomr htiyakrahm gribpamn hawihnerahm. Kmi kmim htiyakhato yonmari nurm nurrhahm. Ror yawihna thombat turhu bbuka rifhur yo ror hatoh hneruha nukeft mirahm nndo marrn yifa toh hnewur. Inji htiyakrahm. ³¹ Ror yawihna thombat fumrr tohrah. Nd fumrr mounmotroh kasinyayukr tohrah. Nd fumrrpno mounmotm sinyaniruhamn Bro Nkifrar htayuk yimam yak nhafoh htfasrahm.”

*Kutr hti hikkfot
(Mak 13.28-31; Luk 21.29-33)*

³² Jisas kfo memorm, “Kutr htitwonomr, huktewur kfo kangnom yinr tohrah. ³³ To be inji hti nhtakrahkomr Bro Najomrhu nia yihar. Bi nd nd nefm htitwoko, wakfo wamitwako, Bro Najomrhu nia yihar bi brbohwor. Yifhatikt bi tohwor. ³⁴ To nd nefm rhu thoft to mirahko arihat tohwa yimam bi nohetmn nd neft rhuraht. Nhai. Arihat tohwa yimam yuhre tohetmn nd neft htirahmt. ³⁵ Nd neft rhuneft htirahko mounti bbinysoft mibatinirahf. Nanhu mrokforpat nhai mibatiniruhatt.”

*Nd nefroh rhuyuk yihar nhai wom yimar tawisafkahr
(Mak 13.32-37; Luk 17.26-30; 17.34-36)*

³⁶Jisasr kfo memorm, “Nd na kfiwa nefroh rhuyuk yihar nhai wom yimar tawisafkahr. Mounmotmi Bro Najomr rom nhaf nhai tawisafkahr. Tu Bro Yifemrpar tawisafwort. ³⁷Noarhu tndht wanukwokomt. Nd yiharhof yimam namo kanjo Bro Najomr yawihna thombat inji na mmo bammo hasorahm yimam. ³⁸⁻³⁹Noarhu yiha to inji namom yimam. Rom to be nuwa ye mmo bammohaso, yo tuhan yak, nd nefrpm be na hasomomn, nhai wom tamoh dukefm rhurmomm. Be inji foh nungam kanjo mmo hasetmn Noa riphar sift fknemom. Bi yiro sift tohetmn bro hnut niamot. Nd hnuptno nd wom womt hnutn fak bati witamotm. Bro Najomr yawihna thombat to inji fasoh fasoh nefmpno na mmo bammo hasetmn nierahr. ⁴⁰Hus yimaf mswirt toh hasorahf, Bro Nkifrar womr yakruharn womr rhurahr. ⁴¹Hus metf bretpa hingrnayuk plauapam hingrna hasorahf, Bro Nkifrar womt yakruharn womt rhurahr. ⁴²Ndnetn niko yimbhindangm be tohetoh hasokfot. Nhai tawisafruhatko Brorhu nia yihar. ⁴³Wawanyswako! Wom kunys rikoh yimam kangm ania arikohnomt, bi nd tu kuny sikatr bi fekr nd rikoh yimaroh nia mrokfot, be nhai ror mhwe gushunikfot. Rorhu yimbhindangm be tohetoh hasorahm. ⁴⁴Ndnetn nikmoh yimbhindangm be tohetoh hasokfot. Bro Najomr rhu mmo hasetkomn be yak fohtasakrahkomr.”

*Fasoh nayet hingrna yimarhu kfo nhombra mrokfot
(Luk 12.42-46)*

⁴⁵“Fitoh yimar hingrna marnyewur, tor nd yimarn turhu tu bro tohukatohr wom tkitm yineft, kak htewurr wom hingrna yimaroh tohukatohneft yo kfo nuhasworr hingrna yimaroh yeshr heyuk yiharoh yeshr hanyeft. ⁴⁶Nd tu bro tohukatohr kfoyuk hingrneft hingrna hik marnya hasirt, nd yimar yindhorkfot. ⁴⁷Na kfo mifwanko, bro tohukatohr nd yimarn htarahr rorhu tamoh tamohroh tohukatohyuk yimar. ⁴⁸To nd yimar hingrnahany hingrna hanyhato bi bok yiham toh garitihato nd kfo hta tanyuk hingneft faso faso rihingrna behohaknihato, ⁴⁹nd hingrna yimam faso faso ritat bebakhato ror be nuwa bupa ye mmoyet yimarpampno toh hasir, ⁵⁰inji na mmo hasetrn, nd tohukatohr nia mihti thoft, ⁵¹be nhai wom tohruhatrt nd hingrneft. Be tmbho tekrruharr rpapa rpapa htarahr. Rpapa rpapa htahato tu rpahtet mikfo nhehta mkfo nhehtayet yimampno htarahr. Ndha tohhato tau nknekrahr.”

25

10-pela met tmahroh kfo nhombra mrokfot

¹Jisasr tfit kfo memorm, “Hefenrhu kingdomkfo, akfo nhombranomt wom 10-pela met tmahmpno. Wom yima sawohfhu nayak yihar nd 10-pela met tmahm lamm yaknimomn yimom metthu kunys. Memom, ‘Yindarir yifung niahato kangr mett amiyak htiyakane rpat yirahnom.’ Ndnetmn lamm yaknihato yimom. ²Nd 10-pela met tmahm yimohat inji namom, 5-pela metm dborioh dukef duhatm yimom. Wom 5-pelakfotn dborioh dukefetm yimom. ³Nd duka tunga duhat met tmahm yimohat tu lamroh rhuyuk kerosinpam hmbre furkihato yimom. Nhai wom kerosinpam be yakitoh furakrmomm. ⁴Nd wom dborioh dukefet 5-pelakfot inji namom, tu lamroh rhuyuk kerosinpam hmbre furkihommomn tfit wompam be

botormn hmbre yaknihato fakitoh furakmomm. ⁵ Rom metthu kunys yi rhu gariti garitihato nyingam krkotakmotmm hwemom.

⁶ Bi yifung danysn wom yimarhu naku tngt wanyomt. Nd yimar naku memor, 'Wasinyako. Niko gari hasoyuk yimar tor bi niewur. Wasinyakahkonn watoh htiahtwakomr.' ⁷ Nd 10-pela met tmahm rpat sinyahugahato lamm fak nmbritafmomm. ⁸ Yo nd duka tungna duha met tmahm wasinyahato fak nmbritmomm rroh lamm. To nhai. Rroh lamm bi yifungr toh nfhetmn sfnoh kerosinpa duhatmn nukefm bi yohni hanymom. Inji htihato wom dborioh dukefet metmpno yihato kfo ttiwon memomm, 'Nome wom kerosinpenme bahukkmmom? Nmoh lamme bi minoh witanitm.' ⁹ Nd duka tungunayet metm kfo wok memomm, 'Nome finji kanjohtet kerosinpamn btn niyahukanom? Nhai bro kerosinpam bt nayahukanom. Niko tuko wawiknak htfasko.' ¹⁰ Be inji kfafmotmm, nd dborioh dukef duhat 5-pela met tmahm yimom kerosinpa wikna htfass. Ndko ziyetmn nd rom gari hasoyuk yimar mfnahmor. Mfnahmotr nd ror gari hasomo metm be nd rofhu marit patikfot rhuuyuk kunyr rpat yihato fknemom. Fkne bugamotm kuny kiyakt frkihmomt.

¹¹ Kto nd kerosinpa hambro htfasyuk metm mfnahmomm. Mfnahhato kfo nakuyakni memom, 'Bro yimaye, bro yimaye, yifhatikt watfanyaknom.'

¹² Tfit ror kfo wok memorm, 'Na kfo mifwanko, na nhai tawisafkahanko.'

¹³ Ndnettn Jisasr kfo memor, "Nikmoh yimbhindangm be tohetoh hasokfot. Niko nhai tawisafruhato komt Bro Najomrhu nia yihari yo auakfot."

Hingrna yimam maruha yakmo yuhathu kfo nhombra mrokfot (Luk 19.11-27)

¹⁴ Jisasr tfit wom kfo nhombra mrokfot kfo memor, "Hefenrhu kingdomkfo mirahme wom bisnis hingrnayuk yimarn wom kmiroh yinyeftpno rorhu marut turhu hingrna yimampno htanyhemotrm romn nd maruham yakhato wom hingrnefm htamomm. ¹⁵ Womr htanyhemorr 5,000 kinakfot, womr 2,000 kinakfot, womr 1,000 kinakfot. Maruham yimaroh tirm htany hanymohat, yimaroh hingrna dukefm htiaht hanyhato maruham hi hanymorm. Ror maruham htanyhihato yimor. ¹⁶ Nd maruha yakitohyuk yimam maruham yakmomm wom hingrnefm htamomm. Nd 5,000 kinakfot yakitohyuk yimar, rorhu 5,000 kinakfot wom hingrneft htamohat tfit wom 5,000 kinakfot fakmor. ¹⁷ Nd 2,000 kinakfot yakitohmo yimar nhaf inji. Rorhu wom hingrneft htamohat, nhaf wom 2,000 kinakfot fakmor. ¹⁸ Nd 1,000 kinakfot yakmo yimarne nhai wom hingrneft htarmorm nd ror yakmo 1,000 kinakfot. Nd 1,000 kinakfot yakmohat, be yakmortn bbinysoft tou yop kafrohmort.

¹⁹ Be nd maruha tikatr toh htfasmorn tfit niamor. Niahato nd maruha htanyomo yimampno rruhato kfo nuhas bonuhasmorm maruham hingrnamo yuham. ²⁰ Nd 5,000 kinakfot yakitohyuk yimar kfo memor, 'Bro yimaye, ni htanyomo 5,000 kinakfot wom hingrnefm hingrnahat, tfit wom 5,000 kinakfot fakhemoyann. Asom nd maruham.' ²¹ Bro yimar inji htihato kfo yindhor memorr, 'O, ni tu hifa hingrna marnyet dborioh yimaye. Tamoh tefi marufenm ninhu tire yakitohhato hingrnaneft marufat hifa buriwut. Ndnettn nanhu tamohm ninn yakitoh hakurahnm. Wania. Na rhuruha yindhor nmbuhat ni warhunhotwona.'

²² Yo tfit nd 2,000 kinakfot yakitohet yimar yimor. Ror nhaf yihato rim kfo memor, 'O Bro yimaye, nd ni hemo 2,000 kinakfot wom hingrnefm

hingrnamohat, tfit wom 2,000 kinakfot fakhemoyann. Asom nd marufam.’
²³ Bro yimar inji htihato kfo yindhor memorr, ‘O, ni tu hifa hingrna marnyet dborioh yimaye. Tamoh tefi marufenm ninhu tire yakitohhato hingrnanefit marufat hifa buriwut. Ndnetn nanhu tamohm ninn yakitoh hakurahnm. Wania. Na rhuruha yindhor nmbuhat ni warhunhotwona.’

²⁴ Yo tfit nd 1,000 kinakfot yakyukr yimor. Ror yihato rim kfo memorr, ‘Bro yimaye, htimoya ni yima kfo huttede. Womm nuhtayuk mswir yeshrim ninn yihato kekwonm. Yo womm nuhtayuk yewurim ninn yihato fotwonm.

²⁵ Ndnetann na nd yakrme nmbuhatpno nd ni htanyheyuk 1,000 kinakfot be yakmoyantn bbinysoftn tou kafrohtahemoyann. Asot nd 1,000 kinakfot.’

²⁶ Nd rorhu bro yimar sinyahato kfo memorr, ‘Ni tu fasohtet hhreket hingrna yimaye. Na niwa nmbuham ni bi tunn bi inji htimohat, ²⁷ to tamohmpno na nd htanyheyuk maruhat benktn hta duha yirmotnt, benkt ruhato wom nfri maruham benktn tfit hta hutarmotmt yakrmoyant? ²⁸ Na kfiwa nd 1,000 kinakfot wayakkahkomt tfit wariheko nd 10,000 kinakfot yakitohwa yimarn. ²⁹ Mrokfot inji korht. Yimar tamohm kakitohworm, nd yimar tfit womm hta hutahiruhanr. Yimar nhai wom tamohm yakitohkahr, nd ror yakitohyuk tefi shrenm, to be tfit yak hutfak twanhoruhanr. ³⁰ Nd hingrna yima bebr wayakkahkomr wari tuhafokomr yiro kspita yuhatn. Nd tkittn tohruharn tau nknekrahr.’”

Wuroh kotkfot

³¹ Jisars tfit wompam kfo memor, “Bro Najomr king kanjo turhu mounmotmpno tfit nia thombat, bro bbukayet kingm yorhwa gajirn mirhurahr.

³² Mirhuruhatr kmi kmiroh yimat rorhu nyingako yi rifiny bugarahr. Mrifiny bugaruhatm yak nhtarahrn sifsifroh tohukatohr sifsifmi memem yak nhtewa kanjo. ³³ Sifsifm tirmifko htarahrn yo memem kindonko htarahrn.

³⁴ Yak nhtanihato nd tirmifko tohyuk tuhan yindarim kfo mirahrn, ‘Niko nhai mrokfom, nanhu Yifemrko bi fak marnya bomarnya htamort nikmoh rhu nmbuhat. Be wania furako. Waniakahkomn Yifemr kfo htayuk kindomkfofot nikomn tohrahkomt. Ndar bbinysoftn trhamo yiha bi nikmoh yufampno kfo htamort. ³⁵ Nhais be sfno kfo hta nuhas furakahanko. Na yatinohmohat yeshrim hemokma. Nyungram knamohat bupam hemokma. Yo nikmoh kmit niamohat nikmoh kunym fakmokma.

³⁶ Hmbresha duhata rhumohat niko hti dukahato hemokma. Dbohneft yakmohat niko hti dukamokma. Kalabus tohmohat niahato fau hafotmokma.’

³⁷ To tfit Bro Nkifrarhu mrokfot wany yakiohato yak hiket tuhan yindarim kfo mirahrn; ‘Bro nungothete, fitoh yiha yatinohmotn yeshrim hemonomn? O nyungram knamotn bupam hemonomn? ³⁸ Yo to ni fitoh yiha nmoh kmit niamotn nmoh kunym fakmonomn? O hmbresha duhatn rhumotn hemonomn? ³⁹ Fitoh yiha kalabus tohmotn fau hafotmonomn o dbohnamotn rhu yukatohmonomn?’

⁴⁰ Tfit kingr kfo mirahrn, ‘Na kfo mifwanko, tamoh tamoh dborioh nefm nd yufapa duha yimampno nahnamoam, ndm nanpno nahnamokomm. Nd yufapa duha yimam nanhu nmemen mifm kanjo tohmoum. Ndnetn rompno nahnamoa nefm to nann fak nuhas hnamoko.’

⁴¹ Tirmifko tohyukm inji kfoniruharmn, yo tfit kekutnihato kindonko tohyuk tuhan yindarim kfo mirahrn, ‘Niko Bro Nkifrarhu namburpam hajohwa yimako niko wafnahniko. Bro Nkifrarhu namburpam bi niko

hajohwom. Ndnatn ndar tkitt wahtanyakahkomt wafnahniko. Ahtiwa-hanko. Wafnahniahkomn Bro Nkifrar kfo htamo kahtn waiko. Nd kaht Satanri rorhu hingrneft hingrnayuk mounmotroh yufampno kfo htamo kahtn waiko. Nd kaht nhai wom yiha minoh hmbreni hanyakaht. Be inji kur hasiwut. ⁴² Ndt nhai be sfno inji kfokaha. Na yatinohmohat nhai nuwa yeshrim harimokma. Na nyungram knamohat nhai bupam harimokma. ⁴³ Na nikmoh kmit niamohat, nhai nikmoh kunym yakmiyakrmokma. Yo wuskapa duhata rhumohat nhai marimoko, hti dukahato rmontha wuskam ahenomr. O dbohnefeta o kalabus tohmohat nhai marimoko, ayau hafotnomr:

⁴⁴ Rom tfit kfo wok mirahmr, ‘Bro nungothete, nd ni kfi mrokfom fitha rhu yatinohmon o nyungram knamotn nhai hti dukarmonomn? O nmoh kmit niamotn hti marsisamonomn, o wuska duha rhumotn nhai rmontha wuskam harimonomn, o dbohneyetn o kalabus tohmotn nhai yau hafotrmonomn?’

⁴⁵ Ror tfit kfo mirahrm, ‘Kfo mifwanko, nd yufapa duha yimampno nhai wom dborioh nmbuham yak nuhasrmokomm, to nhai romrpamn nd beb nmbuhat yak nuhasrmoko, nann fak nuhasmoko.’ ⁴⁶ Nd net yimam be bro krhopa yakyuk tkitt bebt yirahm. Nd krhopa yakyuk tkitt rom yi shombat, nhai tfit fnahniruhatm, be nd tkittn toh nkifranirahm. Nd tuhan yindarim Bro Nkifrarhu mrokfom wany yakiewetm, romn tu dborioh rhu nmbuhat yakhato be nd dborioh rhu nmbuhat toh nkifranirahm.”

Jisarr kropham yakhato nohmr. Minohafhato tfit sinyamor.

26

(Sapta 26–28)

*Jisarrhu was yuhathu mrokfot
(Mak 14.1-2; Luk 22.1-2; Jon 11.45-53)*

¹ Jisarr nd mrokfom kfo ptha nuhas bonuhasnimormn tfit kekutnihato turhu disaiperm kfo memorm, ² “Yuwonano Pasofa burwat riruhakrah-nomt. Nd yiharn Bro Najomr hndhna nnehakhato yakruhamrn yura bgre misn kihagirrahmr.”

³ Nd yiha prisroh bro yimam, yo Judaroh bro yimam prisroh bro tohak yima Kaiafarhu kmifarpar yi rifiny bugamom. ⁴ Yi rifinyhato Jisarrhu hndhna nnehakhato was yuhathu mrokfot nafak dbkafmomt. ⁵ Ptha hanyhato kfo memom, “Nd bro Pasofa burwa yihar mirahnom awasnomr, to be you muht kanjo watanhehakrahnom. Bi kmi kmi nia rifinyetmn to be romn wahiyafrahnom.”

*Betani efkott Jisarrhu mfhat mfro mtha yahrnyayet welpaye yuk wunamo yuhat
(Mak 14.3-9; Jon 12.1-8)*

⁶ Jisarr Jerusalem toh tanyhato Betaniko yimor. Yihato Saimonrhu kunys yi tohmr. Saimonr bingot lepra dbohneft yakmotrn to bi frtrufnimot. ⁷ Nd Saimonrhu kunys nuwa ye hasetrn Betani efkott tu dborioh mtha yahrnyet wel botort hanyomt. Yimotn nd bro maruhaye wiknamo welpaye Jisarrhu mfhat fuk wunamotr. ⁸ Nd Betani efkott Jisarr inji namottr, disaiperm htihato tum nakfo nakfo memom, “Nd mett tamohmpno welpam

be wurasoh furetm? ⁹ Nd wel botort yimam bro maruhaye wiknarfotmt nd maruham yakhato tfit maruha duha yimamn nd marufam yirfom.”

¹⁰ Jisasr bi wanyorm rom inji kfo pthamoahat. Inji wanyhato kfo memorm, “Inji akfowahkomt. Rot tu dborioh neft nita. ¹¹ Nd wuska duha yimam, rom yiha yiha nikompno toh hasiwum. Na, na nhai wom tohno-rhotanko. ¹² Nd mett ka tamohr bi kfo memort, ‘Welpam bi wayuk wunafokahtnr yopt yirahr.’ ¹³ Na kfo mifwanko gutnius mrokfot kfo ptha habrineft, ndar mett nefineft nhaf kmi kmi kfo ptha duka htfasrahmt.”

Judasr kfo fakiomor; Jisasrhu hndhna yuhat
(Mak 14.10-11; Luk 22.3-6)

¹⁴ Nd yiha 12-pela disaiperrh wom disaiperr kutewumr Judas Iske-riotr firtromorm wom disaiperm. Frtroh tanyhato yimor prisroh bro yimampno. ¹⁵ Yihato kfo ttiwon memorm, “Na yihato Jisasr mhndhna khe thombat na finji tharhokma?” Inji kfo ttiwonmotr 30 mani silvakfot hemomr. ¹⁶ Judasr marufat myaknihato be yimor Jisasrhu hndhna. Yihato yima yuhur fak nhtamourr Jisasrhu hndhna yuham.

Disaipermmpno Jisasr nuwa yamo yuhat
(Mak 14.12-21; Luk 22.7-14; 22.21-23; Jon 13.21-30)

¹⁷ Yispa hta duha bretpam yeyuk yiharoh barkof yiharn disaiperm Jisasr kfo ttiwon memomr, “Nd Pasofa burwat rhu thombat, nome yeshrim fitha hta mskaruhatnom ni rhuhat ye jukaruhant?” ¹⁸ Inji kfo ttiwonmotm, Jisasr kfo memorm, “Nd taunt tohwa yimarpno waikahkomn wakfo wamitwakomr; ‘Tisare kfo famure, “Na nhai wom rhurhota. Yihar brboh-watr, kanga nani nanhu disaipermmpno ninhu kunysr rhuhat Pasofakfot ayanomt.”’ Inji wakfotwakomr.” ¹⁹ Be disaiperm Jisasr kfomo yuhatn fak hikmomn Pasofakfot ror kfomo tkittn hta mskamomt.

²⁰ Yifungnano Jisasr turhu 12-pela disaipermmpno rhuhat nd Pasofakfot rpat rhuhat rpat famomt. ²¹ Ye hanyhato Jisasr kfo memorm, “Na kfo mifwanko, niko ndar disaipermkmo womrn hndhnarahra.” ²² Be inji kfo motr disaiperrh yima yuhum foh tmbhonimomm. Rpa rpa sinyahato kfo ttiwon memomr, “Ni kfihat frohmn inji naruhamn? Ka nann?” Tfit womr sinyahato kfo memor, “Ka nann?” Womr, “Ka nann?” Womr, “Ka nann?” ²³ Jisasr kfo memorm, “Tor nikmoh womr. Yimar na yawo rohnges tir htanuhir, rorn hndhnarahra. ²⁴ Bro Najomr kangr anoha, ndt mrokfot duhatet. Rorhu noh nmbuwathu mrokfot bi nkiframmpno kfo tndh hnetn nhai finji kforuhatt. Tmift nd Bro Najomrhu yak hndhnyuk yimarne kanga fitoh yuhat yiruhar? Mmemt hiyau duha rhurmotr.” ²⁵ Nd Jisasr hndhnyuk yima Judasr sinyahato kfo memor, “Tisa ka nann kfiwun?” Tfit Jisasr riruhato kfo memorr, “To bi tunn kfo nriyafwo.”

Jisasr disaiperm bretpa, wain bupa hemo yuhat
(Mak 14.22-26; Luk 22.15-20; 1 Korin 11.23-25)

²⁶ Nuwa ye hasohato Jisasr bretpat yakmortn Bro Nkifrar wukfo yindhornimorrn yak tif nhombrahato disaiperm he nhombrahi hanyorm. Kfo memorm, “Nd bretpam wayak wayakomm. Ndm nanhu nmpayem.” ²⁷ Wain bu kaft yakmortn nhaf Bro Nkifrarmpno kfo yindhornihato kfo memor, “Niko bugako nda wain bu kaft wayak wayakomt. ²⁸ Ndm nanhu kkupayem. Yimaroh fasoh fasoh nefroh yak thuyuk nfri yihotar bi tfit yimayanhu kkupaye kak dbkafwanr. ²⁹ Na bi kfo mifwanko, na nhai tfit

wom wain bupam yerhota. Tukanhu Yifemrhu kingdomkforpatn tohhato ee btn nfri wain bupam nikompno yerahnom.”³⁰ Be wuroht, windoht windoh trufnihato be tfit Olifet kmi yorgko yimom.

*Pitar mong trohruha nmbuhat Jisasr kfo pthamor
(Mak 14.27-31; Luk 22.31-34; Jon 13.36-38)*

³¹ Olifet yorgr mfnahhato disaiperm Jisasr kfo memorm, “Bro Nkifrarhu rfa borngt kfo kangt,

‘Tohukatohr wasaknirhotanr sifsifm natubaturahm.’

Sek 13.7

Nd mrokfot bi ruhettn niko bugako hrek yifungr na finji naknewuma, kakrme trohwokma.³² Tfit sinyaruha. Sinyahato na bi Galiliko tohak hanyruha.”³³ Pitar wasinyahato kfo memor; “Ndar wommn wakfo. Romn buha msuhtahato mhik htafrahm. Na nhai mhik htafrhotann.”³⁴ Tfit Jisasr kfo memorr; “Na kfo mifwann, hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’”³⁵ Pitar sinyahato kfo memor; “Be tu nhai mif. Na kanga, ninpno anoha, to nhai tfit kafrohrhotant ninhu yufat.” Pitar kfomo yuharpat wom wom disaiperm rpa yuharpat kfo ptha hikmom.

*Jisasr Getsemanit kfo bruttnamo yuhat
(Mak 14.32-42; Luk 22.39-46)*

³⁶ Jisasri disaiperm afo Olifet kmit tohetmn yimom wom tkitt kutewumt Getsemani. Ndha Getsemanit mfnahhato Jisasr kfo memorm, “Asha afo warhu hasoko. Na afo Bro Nkifrar rim kfo bruttnefiwa.”³⁷ Pitari Sebedirhu hus yonf yaknimorn yimom. Nd yiharn Jisasrhu yima yuhur nhai rimarnyakmorr. Yima yuhur be nur dungunangu yima yuhurpno rhumour.³⁸ Be yima yuhur yak nhombratihato kfo memorm, “Yima yuhur be nd nur dungunangu yima yuhur mtakihwotra kanga be amyakniya. Asha warhu hasoko. Mirahko ahwanyom.”³⁹ Ror wunye kkofmorn msuhhato nyingatikt bbinysoftn yohnihato kfo bruttana memor; “O Dajaye, ndar bbinysofthu yimaroh fasoh nefm na be hta krhorhotma nann nohruhanm. Bi brboh watt kanga akfoyan. Nd krho mis na yakruhat kangn ayak tuhant, be hifa, na yindhorwa. E nhai, kangn ayakrt, be nhai mrokfom, yakruhant. Na be ninn yukatohruha. Kangn, finji anaya, nhai mrokfom.”

⁴⁰ Inji kfo bruttna tanymorn tfit yimor nd husfirpa yimam rhu hasomo tkittn. Yihato yihom htimorm hwi hasetmn. Rim tohhato kfo memorr Pitar; “Niko tamohmpno whitako? Nhai rpa auakfot afo ruhakkfot?”⁴¹ Niko sinya ruhato kfo bruttna hasokfot. Tamoh tamoh nefm nianeft, fitoh yuhatn tohruhakomn yahot-ruhakomm? Yima yuhur sinyarahr finji na finji nanef, to thatipt, fitha bbukeyt yakruhant?”

⁴² Be inji yihom kfo tanymorn tfit wom yis yimorn tur kfo bruttnamo mrokfom wompam kfo bruttnamor. Kfo bruttna memor; “O Dajaye, nd krho mis na yakruhant kangn ayakrt, be nhai mrokfom, ayaktwoyant. Na be ninn yukatohruha. Kangn, finji anaya, nhai mrokfom.”⁴³ Tfit wompam nhaf niahato yihom htimorm nyinga krkotakhato hwe hasetmn.⁴⁴ Be inji yihom hti tanyhato tfit wom yis yimorn tur kfo bruttnamo mrokfom wompam kfo bruttnamor.

⁴⁵ Wurohpam mkfo bruttna tanymorn tfit yimorn hwe hasetm yihom htiyaknihato kfo memorm; “Barenko, nikome asoko yuhre hwe tokr hasiwuko? Be tmift nd hwe tokr hasoneft. Wawanyko. Yihar bi asor. Bi

na Bro Najomanhu fasoh fasoh net yimaroh tirroh yi yihayer bi. ⁴⁶ Wasi-nyakahtko riyahnom. Wahtiko, nanhu mhndhnakyuk yimar tor bi niewur.”

*Judasr yihato Jisasr mhndhnakmo yuhat
(Mak 14.43-50; Luk 22.47-53; Jon 18.3-12)*

⁴⁷ Jisasr yuhre ptha haso hanymor, rorhu yakyuk yimam mhatohmomt bainati mhers. Tu Jisasrhu disaiperr Judasrn hatohakmorm. Prisorh bro yimami Judaroh bro yimam, kfo tkrurmotmm Judasr hasinyamorm. ⁴⁸ Nd Jisasr hndhnakyuk yimarn bi kfo hta bohta memorm, “Wahtiyafo hanyswokma. Na yauyaknihato fitoh yimar mkihendhoraknitwa, wamitwako, tor nd yima Jisasr. Ee inji bi htitwokma, nd yimarn yauyaknihato yakkfot.”

⁴⁹ Be nd Jisasr rhumo tkitt mfnahmohat, Judasr yauyaknimorn Jisasr rim kihendhoraknihato kfo kangrr; “Hifa yifunger, Tisa.” ⁵⁰ Inji rim kihendhoraknimotrr Jisasr sinyahato kfo memorr; “Yinowe, ni tamoh dukefm nia thombat, mirahn tfit wom akuknaya. Wadimanditwa.” Be yimam yauyaknihato tirtir fakmorr.

⁵¹ Rom fak hanymomr, Jisasrpnno toh hasoyuk disaiperr mhti namburnihato bainat watuhakmortn ka prisroh bro tohak yimarhu hingrna yimar bainate yimbhindangt frububafmotrr misuhmot. ⁵² Tfit Jisasr kfo memorr; “Bainat tfit wathuntwe. Yimam bainatpno nambur tonehato nniwam, tfit tu bainatn tmbhiwutm. ⁵³ Tamohmpno ni tfit namburwa? Kangn na ka yifem duhata? Nanhu Yifemr naku kforuha, yudbat 12-pela mounmot rifhum mitoh dbu rafo hmbrebrahma. ⁵⁴ To na nhai inji nakfot. Inji naruha, to be nd Bro Nkifrarhu rfa borngt kfomo nefm, nanpno rhuyukm, be nhai mfnahruhatn.”

⁵⁵ Jisasr yakaknimo yimam, Jisasr sinyahato kfo memorm, “Barenko, nane raskor yimam kanjo bainat, mhers hasinyahato nia kek wokma? Na yiha yiha Bro Nkifrarhu temperr yorhwa kmifat tohhato met yindarim mrokfom hemoahat nhai niko inji yihato hfahaknirmokma. ⁵⁶ To nhai mrokfom. Ndar niko niwa nmbuhat nhai finji kforuhatnom. Bi profetmn mrokfot bi kfo hnettn to be bi rhu hikwot bi.”

Disaiperr htimom bi Jisasr kak hasiwumre, rom fakrme troh tanymomr.

*Jisasr kaunsermpno kot tohmo yuhat
(Mak 14.53-65; Luk 22.54-55; 22.63-71; Jon 18.13-14; 18.19-24)*

⁵⁷ Nd Jisasr yakniyuk yimam hanymomrn tu nd prisroh bro tohak yima Kaiafasrhu kunysn hanymomr. Nd kunysn Judaroh bro yimam yo nkifra boririfhuthu tisam bi rifiny hasomom. ⁵⁸ Pitar, ror be nhowi mongkongotn fau ss hik hanymourm. Bi prisroh bro tohak yimarhu kuny kmifarn bi hanitwomre, ror be nhowi yimorn Bro Nkifrarhu temperr tohukatohyuk yimampno mrhuhato memor, “Htiruha finji naruhamr.”

⁵⁹ Jisasrhu kotkfot yakitohyuk bro prism yo Judaroh kaunserm fak hambromom yimam. Memoum, “Wom yimam ayakkahnomn romn wom kfo wok mrokfom htaruhatmm Jisasr wasrahnomr.” ⁶⁰ To bok yimam yihato memoum, “Wom kfo wok mrokfom ahtanom,” to nhai. Rroh mrokfom be inji ptha mmbrafi-nymoumm. Nhai wom mrokfot krhonirmoat. Tu wurohnano wom hus yimaf sinyahato kfo memof, ⁶¹ “To ndar yimarn kfo memor, ‘Bro Nkifrarhu temperr yak tasohrhoyanrn tfit husfirpa yiharpa tfit kasinyaruhanr.’”

⁶² Jisasr nd yimam pthamoa mrokfom wanymoahat nhai kfo wokmorm. Ndnnettn prisroh bro tohak yimar sinyahato Jisasr kfo ttiwon memorr,

“Tamohmpno ndar rom kfiwa mrokfefm be rhuhatu wanukanm? Waptha!”
⁶³ Jisarr nai ptharmor. Tfit wompam kfo ttiwonmorr, “Bro Nkifrarhu yufatpno na kfiwann, asomif Bro Nkifrarhu yufat wayutant. Ni bbinyosof thofroh minrfa htikyayuk yima Kraiss rhu thombat wakfo nuhas mifnnom. Ni Bro Nkifrarhu Yonen o nai?”

⁶⁴ Jisarr tohhato kfo memor, “Na to tawom nda. Tfit kfiwanko. Kto tfit htirahkoma na, Bro Najoma, tfit bro hta nngrajohet Nkifrarhu tirmifko rhuhatu grippamn hawihnerahmr.” ⁶⁵ Jisarr inji kfomotr prisroh bro tohak yimar inji wanyhato rorhu yarim ruhakyuk hmbreshat teh dborfamort. Teh dborfahato kfo memor, “Wanukomr ror dkfi mrokfot. Ndhtet kfet yimar kangr, ‘Bro Nkifrar kanjo aruha.’ To be nai tfit wom yimam yakhatu ror nayuk nefm nia ptharuhatm. Ror pthiwa mrokfom to bi asomif wom mrokfom bi wanunomr. ⁶⁶ To finji dukewako? Ndar yimare finji naruhanomr?” Tfit nd kot tohyuk yimam kfo memom, “Nd yimar bi mrokfeter anohtwar.”

⁶⁷ Be inji kfonihato tuha kuninfar bokuninfar thumomr. Tirm yak yifi-kathato tat beb bobebmorr. Wommn tire frsrfa bosrfamomr. ⁶⁸ Frsrfa hanyhato kfo ttiwon memomr, “Ni, Kraise, nd ni frsrfiwa yimame frohem?”

Pitar kfo namhimo yuhat

(Mak 14.66-72; Luk 22.56-62; Jon 18.15-18; 18.25-27)

⁶⁹ Pitar kuny kmifarn kah haunyo hasetrn wom hingrnayuk mett mhtimotr. Mhtihato kfo memotr, “Ni to aso womenn Galili thof Jisarrpno tohno htfasmoa.” ⁷⁰ Pitar sinyahato kfo namhi memor, “Bare, nann yari yutewun. Na nai tawisafkahanr.” ⁷¹ Pitar inji kfo hanyhato kmifathu getkfofn yihom tohmor. Toh hasetrn tfit wom hingrna mett htihato nd getpno toh nafifmoa yimam kfo memotn, “Nd yimar tor womr Nasaret thof Jisarrpno toh htfasmoar.” ⁷² Pitar tfit wompam kfo namhi memor, “Na kfo mif mifwanko, na nai tu tawisaf mifkahanr nd niko kfiwa yimar.” ⁷³ Ndt inji kfo namhi nhehafafomort. Tfit toh hasetrn, wom brbo tohyukm yi kfo memomr, “Ni aso rroh womenn. Mrokfo kfo pthefm to wany nhta twanhiwunomn.” ⁷⁴ Tfit Pitar sinyahato kfo memor, “Na kfo mif mifwanko, na nai tu tawisaf mifkahanr nd niko kfiwa yimar. Na kfo furewane Bro Nkifrar yak tutfarahra.” Inji kfo hanyomr, krir nakumor. ⁷⁵ Krirhu naku tngtpno Pitarhu yimbhindangm ndnatn tuppomomr. Tuppohato yima yuhur tfit niamotrr tfit dukamort Jisarr kfomo mrokfot. Kfo memor, “Hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nai tawisafka-hanr Jisarr.’” Nd mrokfot dukakhato briahako fnahnihato nai nur ttifarmor.

27

Pailatrpno Jisarr kot tohmo yuhat

(Mak 15.1; Luk 23.1-2; Jon 18.28-32)

¹ Dbha ksfutn prisroh bro yimami Judaroh bro yimam rhuhatu Jisarrhu was yuhat napha nhtamom. ² Mrokfot nayak nhtamomtn mti baklain tofe

kimomr. Kiyakhato hanyomr Judiaroh gafanar kutewumr Pailatr, rorpno hanyomr.*

*Judasr nohmo yuhat
(Aposer 1.18-19)*

³ Nd Jisasr hndhnayuk yima Judasr wanyomr yimam kfo memomr, “Jisasr nhai rhuruhatr. Wasrahmr.” Judasr inji tfit wanyomohat yima yuhur foh tmbhonimorr. Be tfit yudbat nd ror yakmo 30 silva marum hanyato prisroh bro yimami Judaroh bro yimam tfit mhemor. Mhehato kfo memomr, ⁴ “Nd yimar na be hndhna furahato nikmoh tirnm bi hta furamo-tanr be was furarahkomr. Ror nhai wom tamoh nefm narmor.” Inji kfomotr kfo memomr, “Nom nhai wom finji kforuhatnom. Ninuhem krhopam. Ni tu wayak nhta.” ⁵ Be Judasr inji kfomotmr yima yuhur krhohato nd 30 silva maruham yakhato Bro Nkifrarhu temperrn rithu brur tanyhato fnahnihato yura mis muhato tur tuhatokhato teh yifuhmor mtitofe.

⁶ Be nd maru kpt, Judasr thu brur tanyomt, prisroh bro yimam fak-momt. Rom yakhato kfo memom, “Ndar maruham yimar yak hndhnamo maruhayem. Nhai Brorhu temperrhu maruhampno rpat htaruhatnomm.”

⁷ Be nd maruham rhumotm mrokfo naphahato nd maruhaye wiknamomt wom tkit nmbuhat. Roh hingrnamoa yimarhu tkit wiknahato to be nd tkit nmbuhat yima kopmoumt. Wuri wuri niayuk yimam nohneft ndha hanyhato kopmoumm. ⁸ Jisasr yak hndhnamo maruhaye nd bbinysoft wiknamotmt, ndnetn nd tkit futamomt, “Yimakkut.” Arihat to be nd yufarpat kuta hanitmt. ⁹⁻¹⁰ Rom inji namohat to be profet Jeremiai kfo yuhatn rhu hikmot. Jeremiai kfo memor,

“Bror kfo memora, ‘Isrerm 30 silva marufenrpaye kfomom, yimarhu wiknaneft.

Nd yimar wiknamo 30 silva marufenm yakmomm

nde tfit kecutnihato wiknamomt roh hingrnyuk yimarhu tkit.’” *Sek 11.12-13*

*Pailatrhu kfo ttiwon nmbuham
(Mak 15.2-5; Luk 23.3-5; Jon 18.33-38)*

¹¹ Jisasr Judiaroh gafana yima Pailatrpnno mtomotr Pailatr kfo ttiwon memorr, “Nine Judaroh kinge?” Jisasr memor, “Uwa. Mrokfot to bi kfo twanhiwunt.” ¹² Prisroh bro yimami Judaroh bro yimam kfo wok fura bofuramohat Jisasr nhai ptharmor. ¹³ Pailatr inji htihato Jisasr kfo memorr, “Bare, ni wanuknm nd yimam ninhu yufatpno mhfnahniwa mrokfom?” ¹⁴ Jisasr nhai wom mrokfom ptharmor. Pailatr inji htihato duka nhi memor, “Arr tamohtet yimarn nhai kfo wokkahrm?”

*Pailatr kfomor Jisasr yura bgre misn anohr
(Mak 15.6-15; Luk 23.13-25; Jon 18.39-19.6)*

¹⁵ Pasofa burwa yiharn kalabus tohyuk wom yimar Judiaroh gafanar kak thu hnamourr. Tu kmi thofmn fitoh yimar yibonwom yak tuhafoneft, yufat yutamoatm, nd yimar kak thumour. ¹⁶ Nd yihar fasoh fasoh nefm nayet yimar kalabus tohмор. Nd yimarhu yufat Jisas Barabasr. ¹⁷ Nd

* **27:2:** Nd yima Pailatr Rom thofer. Tu Rom thofmn htamomr Judaroh gafanar. Tu Judaroh kotkfot tohyuk yimam nhai bi wasmoamm, afo tfit Pailatrpnno hanyomoumm. Ndnnetmn Jisasrhu waskfot kfomohat tu Romm htayuk Pailatrpnno hanyomomr.

Pasofakfot yi rifinyuk yimam yi rifiny bugamotm Pailatr wom kfo ttiwon mrokfot htamort. “Ar kmiko! Fitoh yima tungunar yangako ndar Pasofa yihar yak hfhanaforhoya? Jisas Barabasr o Jisasr, yimam kfo yamuka nd Kraistr?”¹⁸ Jisasr be kfo wok furahato kalabus htamomr. Ndnettn Pailatr ndhtet kfo ttiwon mrokfot htamort.¹⁹ Yo Pailatr kotkfot rhuyuk gajis rhu hasetrn Pailatrhu mett wom mrokfot kfaf memot, “Mrokfo duha dborihoyimar finjina finjina duha. Yifung nd yimarn hwe tweh hanyhato yima yuhur mfro kurhira.”

²⁰ Prisroh bro yimami Judaroh bro yimam kmi thofm kfaf hany memom, “Wakfo naku wameko, ‘Pailatr Barabasr ayak hfhanafokahrn Jisasr awasr.’”²¹ Tfit Pailatr kfo ttiwon memom, “Froh mifr yamukako ayak hfhanafoya?” Tuhant yindars sinyahato kfo naku memom, “Barabasr.”²² Pailatr ttiwon memom, “To Jisasr, yimam kfo yamuka nd Kraistr, nd yimare finji narhoyanr?” Kfo memom, “Bgre misn wakihegirkomr.”²³ Pailatr kfo memom, “To tamohmpno? Finji namotr inji narhoyanr?” Tfit mrhuni mrhuni memom, “Bgre misn wakihegirkomr.”

²⁴ Pailatr inji htitihato duka memom, “Na tamoh mrokfom kfoneft be nhai wanukotma.” Be ndnatn bupam yakmorn turoh nyingampno tirm kifsamormn kfo memom, “Ndar yimar noh thombat, na mrokfo duhata rhuruha. Niko tukomn mrokfetko rhurahko.”²⁵ Pailatr inji kfomotr tuhant yindars sinyahato kfo naku memom, “Nhai mrokfom nd yimarhu krhopam nompno rhuhany tfit nmoh yonmpno nd krhopam yakneft.”²⁶ Be Pailatr yakmorr Barabasr, fak hfhana-fomorr. Ror yak hfhanafohemormn tfit Jisasr yakhato soldiaroh tirm htamorr. Memom, “Romn wife wife tabotakhato bgre misn kihegirrahmr.”

*Soldiam Jisasr kfo tfar botfarmo yuhat
(Mak 15.16-20; Jon 19.2-3)*

²⁷ Soldiam Jisasr yaknimomrn hanymomr mrokfo yakitohyuk tkitrn. Nd tkitr hanyhato soldia bugam yi rifiny bugamom.²⁸ Ror hatohmo hmbresham fak rhoh bugamomrn tfit kku kkorpa kanjo fnhuyet rmonthar thu kasimomr.²⁹ Yo soldiam huhra mtitofit yakmomtn kingroh mfham hatohwa yabisoht kanjo yakkemomtn mfhatn wathu hamsismomr. Yo kingm yakitohwa mis nhaf wom miyef mifr yakhemotmr ndr fakitohmorr tirmifkorn. Yo rorhu nyingako bangu myuknamoamn yon mumenm kanjo wukfo tfar botfar memomr, “Woi, Judaroh kingr.”[†]³⁰ Inji kfo tfar botfarmoamr yo kuninfar thumomr. Yo tirt yakitohyuk mis dhemot, ndt tfit yak hutfakmoamr mfhapako warbigmoum. ³¹ Kfo tfar botfar thunimomrn yo tfit nd kku kkorpa kanjo fnhuyet rmonthar yakta thumomrn tfit turhu hmbresha mifm hmbremomr. Hmbrenimomrn hanymomr bgre mis tuhegiryuk tkittn.

*Jisasr bgre mis kihegirmo yuhat
(Mak 15.21-32; Luk 23.26-43; Jon 19.17-27)*

³² Kmi rim fnahnitn soldiam htihakomr Sairini thofr. Rorhu yufat Saimomr. Ror yakmomn nd Jisasr tita hanymo bgre mis rorn tfit wathu titafmom. Rorn titanhota hanymorr.³³ Be yimomn, mfnahmom wom

[†] **27:29:** Soldiam memom, “Kfo tfar botfarrahomr.” Ndnetmn kingm kanjo wondhmomr. Nd yiham kingm thu kasimom kkupitha rmontham yo mfham hatohyuk yabisohm hatohmoum yo miyefr tirmifko kakitohmoum. Ndnetmn Jisasr inji fak hta nhombramomr.

kmit kutewumt Golgotat. (Kfe sfiohniyet yima mfham kanjo nd tkitt rhumoatt futamoumt yima mfha tpit.) ³⁴ Fasoh huthayet wain bupam hnehato hemotmr, huthamotm nhai yarmorm. ³⁵ Soldiam Jisasr yura bgre misn kihegirnihatoy tfit rorhu hmbresham yakhato pirai satumomm.† ³⁶ Pirai satunihatoy rhu yukatohmoumr. ³⁷ Yura mfhatpnonko mimkutn wom mrokfot wandfamomt. Nd mrokfot rom wandfakhato htamot kfo memot, “Ndarr Judaroh King Jisasr.”

³⁸ Jisasr tuhegirmo tkittn hus rikoh yimaf mano mano tuhegirmomf. Womr tirmifko hirmor, womr kindonko hirmor. ³⁹ Jisasr hegirmo bgre mis tu yihota yuhathohtett rim fnahni mfnahniyuk yimam rim grha wase bowasenhato yihom kfo tfarnyi mkfo tfarnyamoumr. ⁴⁰ Kfo memoumr, “Ni kfo mayete, ‘Bro Nkifrarhu temperr yak tasohhato tfit husfirpa tfit kasinyahato hingrnaruhan.’ Ni inji kfet yimaye. To ni tu Bro Nkifrarhu Yon mifn rhu thombat, to btn wamifnahnekahtn ahtinomn.” ⁴¹ Nd prisroh bro yimam yo nkifra boririfhuthu tisam yo Judaroh bro yimam, rom rpat inji kfo tfar memomr; ⁴² “Ndar yimar ror toh hingrna hnamohat bok met yindarim rorn fak marnya hnamorm. Asomift to nhai tur mifnahnekahtn htikahnomr. Ror to Isrerroh kinger. To amifnahnekahtn nom htiruhanomn duka mirahnom tu nmoh nrfa htikyayuk yimayer. ⁴³ Bro Nkifrar hikwarn kfo kangr, ‘Na Bro Nkifrarhu Yona.’ To bt Bro Nkifrarhu yima yuhur rorppno rhu thombat, to Bro Nkifrar wom nefm anakahtr nd bgre mis htanyhato amifnahnekahtn ahtinomr.” ⁴⁴ Nd mano mano hirmo yimaf rof nhaf kfo tfar botfar thumofr.

Jisasr myaknimo yuhatho

(Mak 15.33-41; Luk 23.44-49; Jon 19.28-30)

⁴⁵ Dany marrn marrhu nukett be rim nohnomot. Kantri bugat be yambontift rhumom. Wuroh 3 kilok krif marr tfit niamor. ⁴⁶ Tri kilok kanjo marr toh hanymor Jisasr tau nakuyafmor, “Eli, Eli, lema sabaktani?” Nd mrokfothu mrokfo yimbu yuhatho inji kfiwut, “Nkifraye, Nkifraye, tamohmpno bi frtrohwona?” ⁴⁷ Inji kfo nakumotr brbo tohyuk yimam wanyaf hanyhato kfo memom, “Nd yimar Irajjar nakutr.” ⁴⁸ Yudbat womr toni hanyhato spans yakmorn wainpamn tayifakhato miyefn htahato memom, Jisasr hikahtnom bupam ndtn tmasakrah. ⁴⁹ Tfit womm kfo memom, “Awi bi mirahn ndm ahianr. Afo htiyaf hanyrahnom, Irajjar naku kfihat Irajjar finji naruharr?” ⁵⁰ Be wuroht tau nakuyafmorn be mfaknimor.

⁵¹ Yimar myakni hanymo fijo nd bro rmonthar temperrhu tu Nngrajoh Hnaru Gnanhehr gna rafomor be buha mifn rmonthar yoh nmbmorn mano mano rim rhu mrhumor. Yurak wuyoh nmbmorn miyoh nmbmorn witanihato mano mano rim hir mhirmor. Yo nunes rpat tonehato nd tkitkitroh yonmari yonmari tahim foh dbtoha wumtmom. ⁵² Nd yima gum htamoa tahi muhm nd yiha foh bbomom. Yoh bbomotm bok yimam Bro Nkifrar hikhato noh hanymom nd yiha tfit sinyahanyhato ⁵³ yopm htany hanymomn Jisasr sinyanimo mongkorn Bro Nkifrarhu taun Jerusalemko yihato wufau faumotn bok yimam htimoumm. ⁵⁴ Jisasr toh yukatohmoya keptenri soldiam nd nunesi tamoh tamoh nefm mfnahnom htihatoy nhai yimam rhurumom. Tuha mrokfo duhatm rhuhatoy kfo memom, “To finji

† 27:35: Tahiham tubatu hanymomn htimom, frohrn hifa tahis fturt, nd yimar fakmor Jisarhu wom hmbresham.

tfit kforuhanom? Ndar yimar tu Bro Nkifrarhu Yon mifer.”⁵⁵⁻⁵⁶ Yo tom wom metm be inji wuri kkof tohhato hti hasomoum. Taun Makdala efkot Mariati, Jemsri Josefrofhu mmem Mariat yo Sebedirhu mett, nd nd metm hti hasomoum. Nd metmn Jisars Galilit tohmohat romn uhik ahik htfasmoamrn tamoh tamohm romn hiyaf hanyomoum.

Jisasrhu thatipt tahi muht rihtamo yuhat
(Mak 15.42-47; Luk 23.50-55; Jon 19.38-42)

⁵⁷ Krifnano taun Arimateathu wom maru kunyet yimar yimor. Rorhu yufat Josefr: Ror to Jisasrhu disaiperr tohmo. ⁵⁸ Ror yimorn Pailatr mkfo ttiwonmorr Jisasrhu thatipthu yaknineft. Mkfo ttiwonmotr, Pailatr kfomotr soldiar ror tohukatohmotrr fakmort Jisasrhu thatipt. ⁵⁹ Josefr thatipt rim htahato nfri ganyom rmonthaye rir borirmorr. ⁶⁰ Rir borirnihato turhu nfri tahi muh mift hanyhato rihtamorr. Nd tahi muht bi tu Josefrn yimam kfomotrm hingnamomt. Thatipt rihtamortn tfit bro tahis yakhato tahi muhthu yifhatikt hta titto tanyomortn yimor. ⁶¹ Makdala efkot Mariati wom Mariat brbo yimar rihtamo tahi muhthu nyingatikko rhuhato hti hasomof yimar rihtamohat.

Soldiam yopt tohukatohmo yuhat

⁶² Tfit hwe nfha ndwom marrn, ndr tu Sabat yiharn, prisroh bro yimami Farisim yimom Pailatrhu htiti. ⁶³ Yihato kfo memomr, “Bro yimaye, nom dukewunomt wom mrokfot nd brurmahr yuhre yima nfri tohhato kfomot. Kfo memor, ‘Na husfirpa marm rhunihato tfit sinyaruha.’” ⁶⁴ Soldiam yihato husfirpa marm toh yukatohkfot. Ka turhu disaiperm yaknihato nndo htaruhamtn tfit kfo nneh mirahm, bi sinyani yifir. Nd nohro yimarn bi wom kfo fura nneh mrokfom kfomorm, yo tfit romn tfit wom kfo fura nmbuhat htarahmt, ndtn be tu krhonano yiraht.” ⁶⁵ Pailatr inji wanyhato kfo memomr, “Soldiam wayaknikahkomn yopt romn atoh yukatohtwamt. Nd tahi muht hta tasifyuk tahis wom makkfot htakfot. Yimam nd tahis yak tuhafhato yimar rimak rikohneft nd makkfotn hti nhtaraho.” ⁶⁶ Be inji wany hik marnya tanyhato yimom. Yihato nd tahi muht tahiye frkih marnyamomtn makkfot htamomtn yopthu toh yukatohyuk soldiam htamomm.

28

Jisars sinyamo yuhat
(Mak 16.1-10; Luk 24.1-10; Jon 20.1-18)

¹ Sabat yihar rhunimomrn tfit wom nfri wikrhu barkof yiharn marr yuhre mwondh hanyomor, Makdala efkot Mariati wom Mariat yimof yopthu htiti.* ² Nd metf yi hanyomof, yudbat nunes tonemot. Nd nunespno Brorhu mounmotr hefenko wutoh tanyhato nd tahi muht frtasifmo tahis rihtafmortn yura tahis mrhumor. ³ Nd mounmotrhu nyingatikr hatohmo nukeft yifatohmohat memom nndo binasohtn kak dbratwom, ror hmbremo hmbreshamn memom nndo yindeng nyisofr fnhutwor. ⁴ Soldiam inji wahtimohat nhai yimam rhurmom. Yafotham frbrirakhato tuha wawutthamohat memom nndo ginunes kekwohm. Yimam noheh yimam kanjo rhumom.

* **28:1:** Ndar veskfot kfiwa wikrhu barkof yihar mirahko ka fitoh yihar ka kfiwut, ndr Sande yihar kfiwut.

⁵ Nd yopthu htit ziyuk metf, mounmotr kfo memorf, “Nifn mirahfn ayakrmanyo. Na htitanfn nifn nd bgre mis kihegirmo yima Jisasrhu hti hambrot niefn. ⁶ Mirahfn ka wom asor. Nhαι. Be bi sinyanir tur kfomo kanjo. Afo wania wahtifnt ror htamo tkitt. ⁷ Wahti tanykahfnt, tfit bmbri waikahfnn rorhu disaiperm wakfo hany wamitwafnm bi sinyern be bi tfit Galiliko tohak hanitr. Ndko ai ahtitwamr. Inji wakfo nuhastwafnm nanhu kfo nuhas mrokfot.”

⁸ Be nd yimar htamo tahi muht yakrmenano htanymofn yimof. Wom yima yuhur fakrmemof, tfit wom yima yuhur be yindhorhato tonemof disaiperroh kfo nuhas. ⁹ Tone hanyhato buha Jisasrpnno mnafurhato kfo memorf, “Hifa dbhayer.” Be rof inji wanyhato yauyaknimofn, rorhu wuram rimakitohhato kfo hbraumofr. ¹⁰ Jisasr kfo memorf, “To nifn mirahfn ayakrmanyo. Waikahfnn, nanhu nmemrom wakfokahtnm Galiliko aiswam. Ndko na htirahma.”

Soldiaroh mrokfot

¹¹ Nd met husf yuhre yihotat yau hanyetfn yima yopt toh yukatohmo wom soldiam taunko bi rim fnahnihato prisroh bro yimam kfo nuhas bonuhasmomm rom htimo nefm. ¹² Kfo nuhasmotnm prisroh bro yimam yihato Judaroh bro yimampno rpat rifinyhato wom yima yuhum naptha nafak nhtamom. Naptha nayak nhtahato wom bro marufat yakhato nd yima gur htamo tkitt toh yukatohmo soldiam hehato ¹³ kfo memomm, “Nd yima Jisasr sinyanimo yuhat yimam kfo ttiwon hnewum, wakfo wamitwakomm, ‘Nom hweyetnomn turhu disaiperm yifung yihato rim fak rikohmt rorhu thatipt.’ ¹⁴ Tfit Pailatr nd mrokfot wanyhato finji kfiwur, nom tunomn yihato mrokfot yak marnya bomarnyaruhanomtn niko be mrokfo duhatko rhurahko.” ¹⁵ Be nd soldiam nd maruham yaknihato nd bro yimam kfomo mrokfo yuhat fak hikmom. To be arihat to be nd mrokforpat Judam kfo ptha hanitm.

Jisasr turhu disaiperm pno mfnahmo yuhat (Mak 16.14-18; Luk 24.36-49; Jon 20.19-23)

¹⁶ Jisasrhu 11-pela disaiperm be Galiliko yihato mifnahmomm nd Jisasr kfo htafmo kmi yihofrn. ¹⁷ Ndha Jisasrpnno mnahtimohat kfo hbraumomr. Womm nhαι kfo hbraurmomr, hus dukefetm rhumom. ¹⁸ Jisasr nd yimampno brbo rim tohhato kfo memorm, “Ndar mounti bbinysoft yorhwa tamoh tamohm Bro Nkifrar bi nanhu tirtn htamorm. Bi nann kakitohwanm. ¹⁹ Ndnetn kanganko, kmiyakmim wayau fnahkahkomn nanhu disaiperm wayak hta fnahtwako. Yak hta hanyhato Bro Yifemri yinem Jisasr ee Bro Nkifrarhu Yafotharoh yufampno baftaisim tany hanykfot. ²⁰ Yo nd na niko kfo nuhas bonuhasyuk mrokfom waptha nuhas bugatwakomm. Wawanyko, na toya, tohnhoh hakuruhanko yiha yiham. Be inji tohnhohany tohnhohany tu wuruh yiharne be.”

Makr dwardfamo gutnius mrokfot Barkof kfo nuhas mrokfom

Barkof mrokfot Makrhu gonborngt yorhwat kfo memot, “Asom Bro Nkifrarhu Yon Jisas Krairhu barkof gutnius mrokfefm.” Makrhu gonborngtn htirahn Jisasr bbukayeter yo bro yufayeter. Ror hingrnamo hingrneftn yo ror namo nefmn htirahnt rorhu bbukeft yo rorhu bro yufat. Ror bbuketrn, yo yufayetrn, tuhant yindars gutnius mrokfot kfo tebos nuhas bonuhasmorm, yo kmi yarhm, tek yarhm tamoh tamoh yafotha bebm fak thumorm, yo bbinysof thofroh fasoh fasoh nefm rorn fak thuhemorm. Jisasr kfo memor, “Na Bro Najoma niamoyann bbinysof thofroh fasoh fasoh nefm mfha htaruhanm.”

Makr kfo pthamo mrokfom Jisasr hingrnamoa hingrna yuharoh mrokforpam kfo pthamor, to nd met yindarim hemo skur mrokfom, ndm nhai be mfro ptharmorm ndar gonborngt.

Barkofpam Jon Baftaisrhu tndh mrokfom Makr afo pthamor. Ndm pthani tfit Jisasr baftais yaknihato Satanr yihato Jisasr kfo nneh bonhehmo yuhat kfo tndhmr. Ndm pno ee wonk wonk krhopam yaket met yindarim Jisasr hti yuhuwafhato skur mrokfom hemorm.

Yo Jisasrhu disaiperm nhai hti hik bohikrmomm Jisasr namoa nefm. Kto kto ee hti hikmomm Jisasr namoa nefm. Wuroh mrokfom htirahnm yimam Jisasr nhai hifa nyingar htarmomr. Bro kurheft yakhato nohmor. Minohafhato tfit sinyamor.

Bro Nkifrarhu kingdomkfothu kfo nuhas mrokfom Jisasr mikfo nuhas hanyo yuhat

(Sapta 1.1–3.6)

*Jon Baftaisr Bro Nkifrarhu mrokfom kfo pthamo yiham
(Matyu 3.1-12; Luk 3.1-9; Jon 1.19-28)*

¹ Asom Bro Nkifrarhu yon Jisas Krairhu barkof gutnius mrokfefm. ² Bi profet Aisaiarn bi barkof mrokfot kfo memor,

“Ninhu yi mrokfefthu kfo nuhas hanyuk yimar bi kfo tkruraf hanyrhotanr bi rorn tohak hanyhato mrokfot bi kfo hanyrahrt.

Rorn bi tohak hanyhato yihotar bi yau mngon hanyrahrr.” *Mal 3.1*

³ “Wom yimar nungur tik furatn tohhato kfo mirahrko,

‘Bro Nungothetrhu nia yuhat wayak marnyak hanyhekomr.’ ” *Ais 40.3*

⁴ Nd kfo htamo mrokfot Jonrn kfomot. Jonrn nd nungur tkit furat toh habrihato met yindarim kfo memourn, “Nikmoh fasoh fasoh nefm mngon trohkahkomm baftaiskfot. Baftaiskahtko Bro Nkifrar yak thuhirahrko nikmoh fasoh fasoh nefm.” ⁵ Jerusalem thofm yo Judia-korhofm Jonrpno yihato nd rroh fasoh fasoh nefm kfo nriyafnimoamm tek Jodentn baftaisimourn.

⁶ Nd yihart Jonr kamer tmb hingrayet hmbreshat hmbremour yo let bando thaye nyuh dbkafmour yo rit papkumi winepam, ndm yehato tohmour. ⁷ Ndha ror tohhato kfo memor, “Nanhu mongko nia hnawa yimarn, tu bro bbukeft hatohwor. Na nhai ror kanjo bbukeft hatohkaha. Na,

na be yima furaya rorhu senderfhu ki jbkafyuk mtinf kak nyusakahukanr.*
 8 Na tek bupa furaye baftaisimwanko. Kto ror niko yimako baftaisim thombat Bro Nkifrarhu Yafothaye baftaisimrahrko.”

Jonr Jisasr baftaisimmo yuhat
 (Matyu 3.13-17; Luk 3.21-22)

9 Be tor nd yiharn Jisasr Galilikorhof kmi Nasaret htanyhato niamor. Niamotr Jonr tek Jodentn baftaisim-morr. 10 Jisasr baftaisneftpno wuyak muhakmorn tfit mfrsohneftpno yura mountko htimortko rim rhu mrhumot. Yiro moun rifhu yuhatn wuhtiyak-mort Bro Nkifrarhu Yafothat ganyom mmkrs kanjo yak nhombranehato fawihnamot. Be nd ganyom mmkrs yawihnamotn yimar mirhumot. 11 Tfit yura mountko wom tngt wanymort. Nd tngt kfo hany memot, “Ni nanhu yone. Nanhu marbit korhwot ninn. Hifahti yindhorwann.”

Satanr memor; “Jisasr akfo nhebehahtanr fasoh nefm narahr.”
 (Matyu 4.1-11; Luk 4.1-13)

12 Be yudbatn Bro Nkifrarhu Yafothat niahato yak hatoh hanymottr yimor nungur tik furatn. 13 Jisasr 40 yiham nd tkitt tohhato Satanr niahato kfo nheh bonhehmour. Jisasr ndha tohmohat graf fohmpno tohmour. Mounmotmn yihato romn toh dbu hmbre yaknimotmr bbukeft tfit fakmor.

Jisasr Galilit rihingrnakmo yuhat
 (Matyu 4.12-17; Luk 4.14-15)

14 Jonr bi kalabus yiyetrn to be Jisasrn Galiliko yihato Bro Nkifrarhu gutnius mrokfefm ptha habrimourm. 15 Kfo memour, “Asor bi tu yiha mifr. Bro Nkifrarhu kingdomkfo bi brbohwt. Nikmoh fasoh fasoh nefm wamong trohkahkomm Bro Nkifrarhu gutnius mrokfotn wawany yakiokomm.”

Jisasr yakmo barkof husfhus yimam
 (Matyu 4.18-22; Luk 5.1-11)

16 Jisasr Galili bari thmbt yau hanyhato Saimon Andru najohf rugit yak yif hasetfn htimorf. Rof nd hingrneft hingrnahato maru kakmouf. 17 Jisasr rof htihato kfo memorf, “Nann wania wahikfn. Nann wahikkahtfn yimaroh yakneft yak nuhasruhanfn.” 18 Be rof inji wanyhato nd rugi wuskar myak htanihato mhikakni twanhomofr.

19 Saimon Andru najohf yaknimorn tfit mbrnyi tefihato mhtimorf Sebedirhu yon Jems Jonrof. Rof nhaf mmbtrn tohhato rugim fak nahu dbofta hasomof. 20 Be rof mhtihato kfo memorf, “Nann wania wahikfn.” Be yifem Sebediri wom hingrna yimam mmbtrn htanymofmn Jisasr mhikakni twanhomof.

Jisasr kmi yarh fknayet yimar yak marnyamo yuhat
 (Luk 4.31-37)

21 Jisasr nd tur yak hanyomo hik tamnou yimampno yimomn Kaperneamt mifnahmom. Ndha Kaperneamt tohetmn rhu krna Sabat yihar rhumomr. Nd yiharn Jisasr ndharhof rhu rifinyuk rmonrn yihato Bro Nkifrarhu mrokfom rikfo nuhas bonuhasakmorm. 22 Jisasr mrokfom pthamohat nhai nd nkifra boririfhu tisan kanjo ptharmotr wanyrmomr. Nhai. Tu hifa ptha

* 1:7: Wom yimar hatohyuk senderroh ki jbkafyuk mtinf yak nyusak thumohat, tu yufapa duha yima furapamn womr hatohyuk senderm kak thumourm.

yembindtmotrm, yimam nd ror pthayuk mrokfom wanyhato bok dukefm yakhato duka memom, “Barenko, ndar yimar pthiwa mrokfom hifa ptha yembindt marnyewurm.”

²³ Nd rhu rifinyuk rmonrn rhumor kmi yarh fknayet yimar. Jisasr kfo nuhas hanyetrn nd yimar sinyahato tau nakuyafhato kfo hutt memom; ²⁴ “Nasaret thof Jisase! Ni asha niaronn, nome finji naruhannom? Nmoh yak batit niaro? Hti nhtiwann ni Bro Nkifrar yak htamo yimaye.” ²⁵ Jisasr sinyahato nd kmi yarhr kfo hutt memorr; “Ni nd kmi yarhe, tmifn tngt wayoukikhahnt, nd yimar wathu troh tanyrn.” ²⁶ Nd kmi yarhr inji wany hambtunihato tau tneh fnahmorn nd yimar thu troh tanyrn. ²⁷ Nd yimam inji htihato be tuha mifoh rihanimom. Tuha tum rinakfo nakfo memom, “Bar yimako, ndart be tu wom nfrineft htitwonom. Nd yimar pthe mrokfote tamoh bbukettn nd kmi yarhr wany hambu tanyhato nd yimar thu troh tanyrn?” ²⁸ Be nd yima rifhur nd neft htihato Galili kmi bugat nakfo nuhashi hanyomom.

Jisasr Pitarhu matohemt yak marnyamo yuhat
(Matyu 8.14-15; Luk 4.38-39)

²⁹ Be nd rhu rifinyuk rmont htanyhato tfit yimom Saimon Andruofhu kunysn. Jems Jonrof rpatn nd Saimonrofhu kunysn fknenimof. ³⁰ Saimonrhu matohemt kkah dbohneft yakmott hwemot. Jisasr fknemohat kfo memomr; “Tot rot inji dbohnewut.” ³¹ Be Jisasr wanyhato rotpno yihom tohhato tirtn wayakmortn teh kasinyamort. Be inji teh kasinyamotrt nd dbohneft thu troh tanyrn. Be nd mett yudbat marnyani hanyhato sinyamotn yeshrim hta mskahemotm.

Jisasr bok met yindarim yak marnyamo yuhat
(Matyu 8.16-17; Luk 4.40-41)

³² Krifnano marr bi yohniyetrn, bok dbohnet dbohnetm, kmi yarh fknayetm hne hnamom. ³³ Nd kmithu met yindari bugat niahato nd ror rhumo kuny yifhatikt nia rifiny yukatohmomr. ³⁴ Jisasr fnahnehato bok met yindariroh wonk wonk dbohnefm fak marnya hanyomom. Yo nd kmi yarh fknayetm fak thu hanyomom. Kmi yarhm Jisasr hti hikhato duka memom, “Ndarr tu Bro Nkifrarhu Yoner.” Be ndnatn Jisasr kfo gadiyaf hanyomotrm, nhai tfit pthani hanyrmoam.

Jisasr Galilit ptha habrimo yuhat
(Luk 4.42-44)

³⁵ Tu dbha ksfutn Jisasr fnahnihato nndo yima toh duha tkittn yihato kfo bruttnamor. ³⁶ Saimonri wom yarmotemrom htiafo hanyhato hik hanyomomr. ³⁷ Yau hikaknihato mhtimomr. Mhtihato kfo memomr; “Met yindarim hambriwumn.” ³⁸ Jisasr wanyhato kfo memomr; “Be tmifnom tfit wom nndoh kmimn ainyom. Yiruhanomn na wom mrokfom kfo ptha nuhasruhanm. Na to nd mrokfom ptha habrineftn niamoya.” ³⁹ Be Jisasr Galilithu kmi kmim yi htfasmorn Judaroh rhu rifinyuk rmonm yihato mrokfom ptha nuhas habri yo nd kmi yarh fknayet yimam yak marnya, inji na htfasmor.

Jisasr yak marnyamo lepra dbohneft yaket yimar
(Matyu 8.1-4; Luk 5.12-16)

⁴⁰ Wom lepra dbohneft yaket yimar Jisasrpnno bangu mtabokmehato kfo naku memorr; “Jisase, ndar na hatohwa dbohneft ninhu tnge kforahn,

nd dbohneft thu troh tanyrahta.” ⁴¹ Inji kфомotr, Jisasr yuhuwafhato nd leprayet yimarn tirt rihtahato kfo memor, “Nhai mrokfefm, yak thuruhant.” Inji kфoni hanyhato nd dbohneft kfo memort, “Wathu trohnr.” ⁴² Be inji kфомotr, nd dbohneft yudbat thu trohmotr. ⁴³ Thu troh tanymottr Jisasr wom kfo duka mrokfot kfo memorr; ⁴⁴ “Ni nda dbohneft thu troh tanyhat, mirahn tfit womm akfo nuhasanm. Moserhu boririfhut yak hikkfot. Yimam lepra dbohneft yaketm marnyanimoahat inji namoum. Nd hun gifam prisrпno myak nuhasnimoamn, tarioh mthamoum. Nd tarioh mtha yiharn prism ndt htihato kfo memoum, ‘Nd yimarhu dbohneft bi thu troh tanymotr.’ Ni nd yuhat yak hikkfot.” ⁴⁵ Inji kfo tungunafmotrr yimor. Yihato kfo nriyafmort. Bok tng rihar rhu fnahmott, bok yimam wanyhato niamom. Be ndnatn Jisasr nhai tfit yiro kmim yihato met yindarimpno naffrmoar. Be inji yima toh duha toh htfasmour. Inji toh htfasmoatr yimam be niahato htimourm.

2

Jisasr tir wura minysafet yimar yak marnyamo yuhat (Matyu 9.1-8; Luk 5.17-26)

¹ Dfik marm yinyimotm tfit Kaperneamko yimor. Ndko yihato wom kunys rhuhatо pthamoatr met yindarim rhu wany yakitohmoumr. ² Nd kunyr rifinyaknimohat memom nndo tpmhur tohwor. Kuny yifhatik yuhat finji wom finji yimam yihom fnahni mfnahnikfot. Ror Jisasr nd kunysn rhuhatо Bro Nkifrarhu mrokfom kfo ptha nuhasmourm. ³ Nd kunysn ptha hasetrn wom minysafet yimar husfihus yimam hnamomr. ⁴ Kunyr be tng mnderpat tohmotr, nhai wom yihotoham nd yimarhu hanyukm. Be inji htitihato yura kuny mingiahus yak tmbrafmomt to be nd yuhatn nd minysafet yimar fafho thumomr. ⁵ Nd yimar hany rim htamohat rroh dukefm duka memom, “Jisasr yima yak marnyeter. Nda minysafet yimar ror kforahr be marnyanirahr. Nhai tfit nd minysaf rifhut rhuruhattr.” Be Jisasr rroh yima yuhum inji htihato kfo memorr nd yimar, “Bar yinowe, ninhu fasoh nefm bi fak tuhahuyann.” ⁶ Nkifra boririfhuthu tisam Jisasr pthamo tngt wanyhato tum rinahti nahtihato kfo memom, ⁷ “Tamohmpno ndhtet mrokfot kfiwar? Kangr Bro Nkifrarhu tkitt ayaka. Nhai wom yima furarn yimaroh fasoh nefm yak thukfot. Bro Nkifrarpar yimaroh fasoh nefm kak thuworm.” ⁸ Nd yimaroh yima yuhum inji dukamohat Jisasr bi htimorm. Htihato kfo memorm, “Tamohmpno inji riduka adukiwako? ⁹ Kangko finji akfoyane? Kangko akfo amiyanr, ‘Ninhu fasoh fasoh nefm bi fak tuhahuyann?’ O kangko akfo amiya, ‘Wasinyakahnn krokt wayaknikahnt wayauyakni?’ ¹⁰ Na, Bro Najoma, yimaroh fasoh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kфoni hanyhato nd tir wura minysafetr kfo memorr, ¹¹ “Na kfiwann, wasinyakahnn krokt wayaknikahnt tunhu kunyko wain.” ¹² Be inji kфомotrr, tuha nd yima rifinyrhu nyingahato wasinyamorn, nd tur hwemo krokt yakmortn, be yimor kunyko. Be nd toh rifiny hasoyuk yimam htihato be tuha mrokfo duha tohmom. Tuha Bro Nkifrarhu yufat kfo yindhorhato kfo memom, “Nom hrekrpa ndhtet neft htitawonom.”

*Jisasr Lifair naku yakmo yuhat
(Matyu 9.9-13; Luk 5.27-32)*

¹³ Jisasr tfit bari thmbko yimotr bok met yindarim rifnymotm Bro Nkifrarhu mrokfom hemorm. ¹⁴ Mrokfom ptha tanyhato yimor. Yau hanyhato Alfiusrhu yon Lifair yihom htimorr takis marut tuyuk kunyent rhu hasetrn. Yihom htihato kfo memorr, “Wania wahikna.” Be Lifair sinyahato fak hikakni twanhomorr. ¹⁵ Jisasri disaiperm Lifairhu kunys yi nuwa yamohat bok takis marut yakyuk yimam yo fasoh nefm nayet yimam rpat yihato nuwa famom. Ndhtet ndhtet yimaroh Jisasrpnno rpat yi htfasneft bi riruhakmot. Nhahi be nd yiharpar hikrmomr. ¹⁶ Farisiroh boririfhuthu tisam htihato rorhu disaipermppo yihato kfo memomm, “Tamohmpno nd takis yekwa yimami nd ufasoh nefm nayet yimampno rpat rruhato nuwa ye mskewar?” ¹⁷ Jisasr wanyhato kfo memorm, “Yima furam nhai be yi furakahm hunkotharpno. Nhahi. Dbohnet yimarpam kitwom hunkotharpno. Na nhai dborioh yimaroh dukeftn niarmoya. Nhahi. Na fasoh fasoh nefm nayet yimaroh dukeftn niarmoya. Memoya, fasoh fasoh nefm nayet yimampno yirhoyann, kforuhotanm, nd rroh fasoh nefm yafhorahmm.”

*Nuwa ye juha kfo bruttnanefthu kfo nuhas mrokfeft
(Matyu 9.14-17; Luk 5.33-39)*

¹⁸ Jon Baftaisrhu uhik ahik htfasyuk yimami Farisim nuwa kurhato Bro Nkifrarpar rroh yima yuhum htamom. Nd Jon Baftaisrhu yimami Farisim inji namotm wom yimam htihato Jisasrpnno niahato kfo memomr, “Jonrhu uhik ahik htfasyuk yimami Farisiroh uhik ahik htfasyukm nuwa kurhato tohwam. To tamohmpno ninhu disaiperm nd rom higrnnewa yuhat yak hik duha yitam?” ¹⁹ Jisasr kfo memorm, “Wom yimar kangr tuhan ayaka, ka nd rorhu tuhan yak yihar ka rorhu yimatm marifom afo nuwa kurhato afo brioh tohrahnom? Ka inji narfom? Nhahi. Nhahi rompno yuhre tohetrn ndhtet nefn narfotm. ²⁰ To tfit kto yak hambrafurhamr, ee bt rorhu yimatm nuwa kurhato rhurahm.

²¹ Nhahi yimam bingotrhof hmbresham muhetm rhunefn tfit nfri rmontha nmbm yakhato nahukahmm. Yatk hmbreshathu muht tfit nfri rmonthaye nahunefn nfri rmontha nmbmteh hma bugarfott yatk hmbreshat. ²² Yo nhahi yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreneft nd nfri wain bupam rikur prhoruhamn nd yatk meme tha kpt frtfohhato wain bupam mitoh bugarahm. Ndnnetn nfri wain bupam tu nfri meme tha kpe tas hmbrihati be nhahi kpm yoh ftoh inji naruhatm.”

*Rhu krna Sabat yiharhu mrokfot
(Matyu 12.1-8; Luk 6.1-5)*

²³ Wom rhu krna Sabat yihar Jisasr wit swirthu wit suhmn fau nanyor hanyomor. Turhu disaiperm rpat yau hanyetm to nd wit shuroh wit dmm tmbhakmomn fi hanymom. ²⁴ Farisim tihato Jisasr kfo memomr, “Tamohmpno inji nem? Bro Nkifrarhu thfa mntwat inji kfiwut, rhu krna Sabat yiha nhahi ndpan ndpam tmbhakkfot.”*

²⁵ Jisasr inji wanyhato kfo memorm, “Nikone Defitri wom yimam yatinohtrhu hasohato nkifra rmont rim htayet nuwa rikat rim yakhato yamo

* **2:24:** Wahti Matyu 15.12 yorhwa kfo nuhasyuk mrokfot.

nmbuhathu tndhte, ka htitkomt o nhai? ²⁶ Abaiatar Bro Nkifrarhu temperthu tohak yimar tohmo yiha, Defitr yatinoht rhu hasohato Bro Nkifrarhu temper fkenihato nuwa rikat bi Bro Nkifrarhu yufatpno rim htayukt rimakmortn, briahako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt.

²⁷ Bro Nkifrar Sabat yihar htamohat yimaroh rhu krnayuk yihar htamorr. Nhai be marimor, boririfuhett rhuhatu nd boririfhutn yimam yak hta bohtahato muh wohne tuhnirahm. ²⁸ Wawanyko, na Bro Najomann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

3

Rhu krna yiharn Jisadr yak marnyamo tir minysafet yimar (Matyu 12.9-14; Luk 6.6-11)

¹ Wom yihar Jisadr Judaroh rhu rifinyuk rmomt fkenihato rim htimorr wom tir gram tip minysafet yimar. ² Wom Farisim memom, “Jisadr nayuk tamoh nefm na thombat afo hti hikrahnomr. Hti hikhato kfo hndhnanomr.” Ndnatn rhuhatu memom, “Afo htirahnom dbohnet yimam rhu krna Sabat yiha yak marnyarhme nhai.” ³ Nd tir gram tip minysafetr Jisadr kfo memom, “Buha yima rifiny buharn wasinya watohetohn.” ⁴ Be nd yimar sinya tohmotr, Jisadr kfo tiwon memom, “Niko finji dukiwako? Rhu krna Sabat yiha yimaroh yak marnyakfote, Bro Nkifrarhu boririfhut finji kfiwat? Rhu krna Sabat yihare hifa nefm nakfot o fasoh nefm nakfot? Yimam yak marnyakfot o yimam waskfot?” Inji kfomotrm nhai wom mrokfot kformom.

⁵ Nd yima rifinyr yukatohhato nyingatikt nndo yopaye nrhamomr. Duka memom, “Nda yimam nhai wom duka yuhuwaf yima yuhum rhukahm nda yimar htitahat.” Be inji htitihato wom yuhuwaf yima yuhur niahato nd yimar kfo memorr, “Tir gram tipt wathu susnant.” Be nd yimar tir gram tipt thu susnamort. Thu susnahato marnyanimotr. ⁶ Be nd kunys rhuyuk Farisim inji wahti tanymohat nhai wom warhurmom. Be fnahni twanhomom. Fnahnimomn Herotr hikwa yimampno yihato wajis harhumom. Memom, “Jisadr wasrahnom.”

Jisadr fak nuhasmorm turhu bbukeft, to nd turhu kmi mna thofm nhai yima yuhum sinyarmomm *(Sapta 3.7-6.6)*

Tek bari thmbt rifinyomo yonmari rifuhetr

⁷ Jisari turhu disaiperm ndhart htanyomomtn tfit yimom Galili tek bariko. Yonmari yima rifhur Jisadr htiafo hanyhato mfau hikaknimomr. ⁸ Kmi kmirhof yimam fau hik hanyomomr. Galili thofm, Judia thofm, Jerusalem thofm Idumea thofm, Jodenthua mano mkuko tohyukm, yo Tair thofm, Saidon thofm. Nd nd kmim nia bugamom Jisadr namo nefm wanyhato. Duka memom, “Nom tu nomn yihato hti hikrahnom.” ⁹ Jisadr nd bro yima rifhur htihato turhu disaiperm kfo memom, “Mmbrt bi brbo ania hnetwat. Nda yonmari yima rifhur yakaknerhotma finji yirhoya?” ¹⁰ Bok yimam yak marnyamotrm btn wom womt nd dbohnetm furyakni furyakni memom, “Brbo yihato Jisadr myak tiwonruhatnom dbohnefm marnyanirahm.” ¹¹ Nd

kmi yarhetm o tek yarh fknayet yimam Jisasn htimoahat be taunihany tau-nihany fnahnimoum. Mrokforpat tu tany memoum, “Ni tu Bro Nkifrarhu Yone.”

¹² Tu Jisasn kfo memourm, “Mirahko nanhu yufat yima rifiny buharn ayutanomt.”

*Jisasn yakmo barkof 12-pela aposerm
(Matyu 10.1-4; Luk 6.12-16)*

¹³ Jisasn yura kminysofko muhmorn naku yakmorm nd tur yak yibonmo yimam. Nakumotrm yimom. ¹⁴ Yimotm 12-pelakfot fakmor rorhu siosk-fothu kasinya htfasyuk aposerm. Duka memor, “Nann tohnhorahma. Tkrurafrrhotanm yiruhamn Bro Nkifrarhu mrokfot romn ptha nuhas habri-rahmm kmi kmim.” ¹⁵ Yo memor, “Kmi yarh tek yarhroh yak thuyuk yafothat heruhanm.”

¹⁶ Nd ror yakmo 12-pela yimam: Saimonr (tfit rorn wom yufat hmbremorr Pitar), ¹⁷ yo Sebedirhu yon Jemsr yo nmem Jonr. Wom yufat tfit tu Jisasn futamorf Boanesis. Yufathu yimbu yuhat, “Tohrhu Yonf.” ¹⁸ Yo Andrur, Filifr, Bartolomyur, ee Matyuri Tomasr. Yo womm Alfiusrhu yon Jemsri Tadiusr yo Selot patikfot tohmoa yima Saimonr, ¹⁹ yo wurohr Judas Iskariotr. Tor nd Judas Iskariotr Jisasn hndhnamorr.

*Kfo memom, “Jisasn fasoh tndhrhu bbukeftpno hingrnewur.”
(Matyu 12.22-32; Luk 11.14-23; 12.10)*

²⁰ Jisasn kunys fknemimor tfit bok met yindarim kunys yakaknimotmt nhai nuwa yarmom rorhu disaiperm. ²¹ Be turhu mmemti nmemrom inji wanyhato memom. “Bi bok yimam yak hamumaknitatmr bi ka mfhat mmrifuotr.” Ndnatn memom, “Arim htiyaknomr.”

²² Nd Bro Nkifra boririfhuthu tisan Jerusalemko wutoh tanyhato ni-amom. Niahato Jisasn kfo wok memomr, “Jisasn tndh Belsebur tohworr. Jisasn nd neft nihata yarhroh bro tohak Belseburru bbukeftpno kak thuworm kmi yarhm.”

²³ Jisasn inji wanyhato nakuyakmorm. Nakuyakhato kfo nhombra memom, “Tndh yarh Satanr sinyahato wom yarhm yak thuneft, be nhai wom yarhm tohruhatm. ²⁴ Rpa kantrikfot tohyuk yimam buha nayak mkuhato rim toh mtohhato nnakni-neft, be nd kantrikfot yohniraht. Nhai wom yimam tohruhatmt. ²⁵ Yo rpa kunys tohyuk yimam nhaf inji. Tum nayak mkuhato nnayurneft, be nhai wom yimar tohruhatr. Be tum naye dborha nohhato yima duha tkitm rhurahm. ²⁶ Satanr nhaf to inji buga. Satanr sinyahato wom yarhm yak thuneft, be nhai wom yarhm tohruhatm. Bi be.

²⁷ Nhai wom yimar wom nanyjar nngrajohet yimarhu kunys fknemihato yimar rhuhany rorhu kunys rhuyuk wuskam myaknihekfot. Afo nd kuny sikatr tir wuram kisahato ee btn rorhu kunyshu rhuyuk wuskam yaknikfot.

²⁸ Kfo mifwanko. Bro Nkifrar duka mmorahrm yimam nayuk fasoh fasoh nefm yo tamoh mrokfo bebm tnge pthayukm. ²⁹ To fitoh yimar na Bro Nkifrarhu Yafothathu bbukeftpno hingrmeta kfo famur, ‘Fasoh tndhrhu bbukeftpno hingrnewur,’ nd yimar nhai tfit kfo gbuhuhahrt, be Bro Nkifrar nhai duka mmoruhatr nd yimar kfoyuk tngt. Nhai. Duka hatohraht.” Jisasn inji kfo nuhas bonuhasmorm. ³⁰ Tumn Jisasn kfo memomr, “Fasoh tndhr korhworr,” ndnetrn nd mrokfot kfo nuhasmorm.

Jisasrhu mmemmi nmemrom
(Matyu 12.46-50; Luk 8.19-21)

³¹ Nd yihar Jisasrhu mmenti nmem najohfit niamomn, Jisasr ror yiro kunys ruhetrn briahako tohhato kfo memom, “Jisasr afo afnahnar.” ³² Ror bok met yindarim rhu dbu hmbremomr. Kfo memomr; “Ninhu mmenti nmem najohfit tom niem. Niemn, kangm ahtinomn.”

³³ Jisasr wanyhato kfo memom, “Frohmn nanhu mmemroyem? Frohmn nanhu nmemroyem?” ³⁴ Nd ror rhu dbu habriyuk yimam yukatohhato kfo memom, “Asom ar yorhwam tom nanhu mmemromi nanhu nmemrom. ³⁵ Yimam Bro Nkifrarhu dukefr dukahato yak hikwam, tom nanhu mmemrom, mndaremrom, nmemrom.”

4

Yewuri tpim dborhiwa tkitm
(Matyu 13.1-9; Luk 8.4-8)

¹ Jisasr tfit Galili bari thmbt yihato met yindarim yak nhafohhato mrokfom kfo nuhas bonuhasmorm. Bok yima rifhur rifnynmotr be Jisasr htitihato tek barat hiruyk mmbtrn miruhato to be met yindarim bari thmbtn rhuhatu wany yakitohmoumr ror nd mmbtrn rhuhatu pthamoahat.

² Boknambok mrokfom be kfo nhombramoum. Kfo memom,

³ “Wawanyko. Wom yimar mswirt hingrahato wit tpim yaknihato thu brur htfasmorm. ⁴ Yihota tafont misuhuykm nungam yihato tout buganimomm. ⁵ Wom tpim misuh hanyomom tahi siket tkitmn. Bbpam be htfapamn nd yewuri tpim yudbat dborhahato sinyamom. ⁶ Tfit marr tahato tahi sikthu kkah nadbofnefrpno nd yewuri fanroh nembfam fftahato nohmom. ⁷ Womm hig suhmpno misuh hanyukm rpat hig tofmpno sinyahato kihawot hmbriyafmotmm nhai yukha hirmom. ⁸ Nd tu hifa dborioh bbinysot misuh hany-yukm romn tu hifa sinyanya-momn yukha hir trukmom, womm 30 dmetm, womm 60 dmetm, womm 100 dmetm.”

⁹ Kfo memom, “Yimbhindangeteko, ndar na kfiwa mrokfot wanykfot.”

Jisasr kfomo kfo nhombra mrokforoh yimbu yuham
(Matyu 13.10-17; Luk 8.9-10)

¹⁰ Kto Jisasr turpar rhu hasetrn turhu disaipermi wom yimam rorpno tohmoam niahato nd ror pthamoa kfo nhombramoa mrokforoh mrokfo yimbu yuham ttiwon hikmomr. ¹¹ Kfo memom, “Wanukko, yafuna mrokforoh yakyuk dukefr bi nikomn hemor. Bro Nkifrarhu kingdomkfothu kafrohet mrokfom be kfo nhombra kanjo ptharahlm o mrokfom be yura yafunarahm, nikomn dukefm bi yakrahkomm. Nd Bro Nkifrarhu yinhit toh duha yima furam be kfo nhombra mrokforpam wanukm. ¹² Ndnnett nyingam yukatoh hakurahm, to nhai wom tamohm htiruhatm. Yo mrokfom, wanyrahm, wanyrahm, wanyrahm, to nhai wom dukefm yakruhahatm. Nhai. Tumn htihato mrokfefm wany tungnemn, ee ka ndnatn yima yuhum yak krekutruhamm Bro Nkifrar rroh fasoh nefm yak thuhirahm.”

Yewuri tpiroh kfo nhombra mrokfothu yimbu yuhat
(Matyu 13.18-23; Luk 8.11-15)

¹³ Jisasr kfo memom, “Ka nd kfo nhombra mrokfothu yimbu yuhat ka nhai yakkahkomt? Kane finji kforhota nd kfo nhombra mrokforoh yimbu yuham yakruhakomm? ¹⁴ Nd yewuri tpiroh yimbu yuhat inji

korht: nd yewuri tpi truf hanyomo yimar, Bro Nkifrarhu mrokfom hta hanyomor. ¹⁵ Nd yewuri tpim yihotat misuhhato nungam nia yamom, ndm yimam Bro Nkifrarhu mrokfom yakhato tfit Satanr niahato yimaroh yima yuhum rhuyuk hifa dborioh mrokfom nia yak thuwa nmbuhat kfo nhombramoya. ¹⁶ Yo nd tahi sikm misuhhato sinya duha yewuri tpim, ndm kfo nhombramoya yimam afo barkofpam hifa yindhor nmbuhatpno yudbat Bro Nkifrarhu mrokfot mhik tefi yaknitmt, ¹⁷ tfit tamoh krhopam kekwoomm, to be bmbri thu trohwomt Bro Nkifrarhu mrokfot. ¹⁸ Yo nd yewuri tpim hig suhmn misuhwam, ndm kfomot, yimam afo Bro Nkifrarhu mrokfot kekwoomt. ¹⁹ Mrokfot yekwamn, tfit ndar bbinysoftu dukefm kak wunefiwumt Bro Nkifrarhu mrokfeft. Womm tum hatohyuk krho nmbuhampno duka krho hasiwum. Womm maruharoh dukefrpampno korh hasiwum. Womm hifa rhu nmbuharhu yaknefrpatn duka hasiwum. Nd nd dukefmmn thu nhombranitatmm, Bro Nkifrarhu mrokfeft myafho thunitmt. ²⁰ Wom yimarpam nd yewuri tpim hifa bbinysoft misuhhato yukha hirmo kanjo rom mrokfefm yak marnyewamm yima yuhum htewamm yukha hirwom, womm 30 dmetm, womm 60 dmetm, womm 100 dmetm.”

*Yiro yak kafknayet lamthu mrokfot
(Luk 8.16-18)*

²¹ Jisarr tfit wom ttiwon mrokfot htamort. Kfo ttiwon memorm, “Niko lamm hta thombat ka yiro rohmn kafknitkomm? O womnam yiro hwe tik rfashitn hta hamongwokomm? Ka nhai. Lamm buha dany yuhamm htewukomm. ²² Nd kfo nhombra mrokfothu yimbu yuhat inji kfiwut. Bro Nkifrar, rorhu kfo kafrohet mrokfeft kto be tafontn yak htarahrt. Nd tamoh tamohm Bro Nkifrar yak wuna bowuna hasiwam, kto be tafontn yak htarahrtm yimam htirahmm. ²³ Yimbhingangeteko, ndar na kfiwa mrokfot wanykfot.

²⁴ Niko wanyuk mrokfefm wany hik marnyakfot. Womm finji finji kahuknm, tawo inji hirahmn. Womm he hmarsirahnm, tawo Bro Nkifrarho he hmarsirahrn. ²⁵ Frohr mrokfom wanyhato yima yuhurn hmbri hterm, nd yimar Bro Nkifrar tfit thu hmbrihirahr. Nd yimar mrokfom wanyhato nhai yima yuhur htarform, nd tefi dukefenr rorhu yima yuhur rhuyukr tfit tu Bro Nkifrar yak thurahr.”

Yewuri fanthu sinya nmbuhatu kfo nhombra mrokfot

²⁶ Yo tfit wom mrokfot kfo memor, “Bro Nkifrarhu kingdomkfot inji korht: Wom yimar yewuri tpim trufworm. ²⁷ Nd yewuri tpi trufyuk yimar, ror nd yifung marm hwita fijo rom nd yewuri tpim be turoh fijo dborhanihato sinyewum. Nhai tawisafkahr rom sinyewa nmbuhat. ²⁸ Be nd tu bbinysoftn thu warhewattm yukha hirwom. Sinyewohat afo dborhanitamn ee tuwa rfetm rhunihato ee tfa totwamn yukhetm korhm. ²⁹ Yukha hirnihato bi yak yibon yihayer, ee kekworm.”

*Mastet tpiyenrhu kfo nhombra mrokfot
(Matyu 13.31-32,34; Luk 13.18-19)*

³⁰ Jisarr tfit wom kfo nhombra mrokfot kfo memorm, “Bro Nkifrarhu kingdomkfot finji akfo nhombrayant? Tamohmn akfo nhombraya? ³¹ Bro Nkifrarhu kingdomkfot kangme tefi mastet tpiyenrn yimar yaknihato turhu mswirtn nuhterr. Mastet tpiyenr kangme sayor tpiroh tefi tpiyener.

³² Nd mastet tpiyenr frdborhahato yonmari bufum korhm. Kto tkit tkitroh nungam ndha niahato wuswom.”

³³ Jisasr bok mrokfem Bro Nkifrarhum miyukhamn, mimn, tamohmn kfo nhombramourm. Memour, “Akfo nhombrakahta yimam wany duka tungunarahm.” ³⁴ Nhai be tu mrokfo yimbu yuham kfo hik nuhasmoarm met yindarim. Nhai. Be kfo nhombra mrokfomn rim kfota mkfotamourm. Turhu disaipermno ee tu mrokfo mna yuham kfo nuhasmourm.

*Jisasr kfohato wifort minoh hmbremo yuhat
(Matyu 8.23-27; Luk 8.22-25)*

³⁵ Nd yiharhu tu wuroh krifn Jisasr turhu disaiperm kfo memorm, “Barenko, na kanga tek barat ahir tmbhoni Kahnomn, mkuko ainyom.”

³⁶ Be nd mmbrrt, bi nd tur rhumot, mikmbremomn hahir hayukmomr. Nd yonmari yima rifhur tuha htanyhato yimom. Wom mmbrrm rom rpat hir hayukmom. ³⁷ Hir hanymomn buha dany yuhatn bro wifort sinyamot. Nd wifort sinyahato bi fak mndhu hanymotm. Bi bus tas finjo hanymott mmbrrt. ³⁸ Jisasr mmbrrthu yifhikorn yak tuhtanimorn hwemor. Nd wifortpno yihom yak thohato kfo memorm, “O Tisaye, wasinya. Nom bi wifort kak mndhutwotnom. Nine ka nhai yanhokahn?”

³⁹ Jisasr wasinyahato nd wifort be tnge kfo memort, “Be tmifn, wateh tmbho.” Be inji kfomotr nd wifort teh tmbhohato tek barat nhai wom natormot. ⁴⁰ Jisasr nd turhu disaiperm kfo memorm, “Tamohmpno yakrmitako? Nhai duka mekahko, ‘Rorpno kitwonom. Aduka yanhowahnom?’ ”

⁴¹ Rom inji wany yanhohato kfo memorm, “Ndarr tamohetet yimarn wiforti burifhut wany yakiohato minoh hmbrif?”

5

*Jisasr yak marnyamo kmi yarh fknayet yimar
(Matyu 8.28-34; Luk 8.26-39)*

¹ Hir hanymomn manoh mkuko rim dbkafmom. Gerasaroh tohyuk mkukorn rim dbkafmom. ² Rim dbkafnihato Jisasr yuhre witani hanymor asha wom kmi yarh fknayet yimar yima yopko toh tany niamorn Jisasr mhtimor. ³ Nd kmi yarh fknayet yimar be inji yima gum htamoa tahi bakuny mkumh hweta htfasmour. Yimam nhombratitamoum yakitohtaneft o sene kibokisaneft. ⁴ Bok yiham hankafe, yo sene, tir wuram kisi, tu be nhai mif. Kimourm, tfit tur wabbuka sinyahato frdbombhoniourm. Nhai rorhu yimaroh yakkfot. ⁵ Yifung marm to be yima gum htamoa tahi bakuny mkumh yo yura kmi yihofmn toh hasomour. Btn tur mumakhato tau hifa bohifamour yo tahim yakhato nde tur puk finy bofinymour.

⁶ Yau hnehato bi wuri tohato Jisasr htimorr. Htihato be toniyakni twanhomorn Jisasrhu wurampno msuhmor. ⁷ Msuhhato mtau ssiyakni memor, “Jisase, tu yura myorhekwa Bro Nkifrarhu yone, ni finji newuna? Bro Nkifrarhu yufatpno mirahn krho nmbuhat ahianr.” ⁸ Jisasr bi kfo twanhomor nd yimar thu hammomoa kmi yarhrhu htanyeft nd yimar. Ndnetrn nd mrokfot kfomort.

⁹ Jisasr kfo memorr, “Ninhu yufat wayutant.” Nd yarhr kfo memorr, “Nom rifuhetnom tohwonomr ndar yimar. Ndnatn nanhu yufat, Rifuhetr.”

¹⁰ Nd yarh fknayet yimar mkfo ttiwon rafak hany memourr, “Mirahn ayak tuhafkahtanm nndo wom wuri tkittn ain.”

¹¹ Wom kmi yorgenrn foh rifhum ke wussohmom. ¹² Nd kmi yarhm Jisadr naku memomr, “Wakfo tkrurafkahtnno nd fohmn tfit fknirahnom.” ¹³ Be Jisadr kfo motr nd yimar hatohmo kmi yarhm thu troh tanymomrn tfit fohmn fknemimom. Be fohmn fknemihato thu hafunanimotmm, nd fohm kmi kihahir yuhat mitarhotnihato tek baritn mitayif wurasoh bugamom. Nd mitayifmo fohm 2,000 fohm mitayifmomm.

¹⁴ Nd fohm hatohmo yimam inji htihato be tonayefrpar yakhato taunthu yimam kfo nuhas bonuhashato kmi kmi kfo nuhas fnahmomm rom htimo nefm. Bok yimam inji wanyhato memom, “Ai ahtinom nd neft.” ¹⁵ Jisadrpno nd yimar kmi yarh htanyetr htimomr rmonthat tabhutahato tu hifa yima yuhu dukefrpno rhu hasetrn. Rom be inji mhtihato be duka yanuhefrpno tohmom. ¹⁶ Jisadr nd kmi yarh fknayet yimar yak marnyamohat tuha tohyuk yimam hti hikmorr. Romn nd niayuk yimam kfo nuhas bonuhas hikmomm kmi yarhm nd yimar thu troh tanyhato tfit fohm fknihato tek mitayif wurasohmohat.

¹⁷ Kmi thofim nd neft htihato Jisadr kfo memomr, “Ni be tmifn ndar kmit wahtanykahnt, wain.” ¹⁸ Jisadr tfit mmbtrn mikmbrehato memom, aiya. Nd Jisadr kmi yarh yak thumo yimar tfit Jisadrpno yihato kfo memorr, “Na kanga ahik hneyann.”

¹⁹ Jisadr wanyhato kfo rafo tany memorr, “Tuha kmitn warhu hasakahnn tunhu yimatn wakfo nuhastwanm ni Bror yuhuwafhato yak marnya bomarnyamo yuhat.”

²⁰ Be nd yimar inji wany yakiohato nd distrikthu 10-pela kmim yi habrimorn kfo nuhas bonuhasmorm Jisadr yak marnyamo nmbuhat. Bok met yindarim ror Jisadr yak marnyamo yuhat wanyhato be tu bok dukefm fakmom.

*Jisadr Jairusrhu yonti yo dbottet mett yak marnyamo yuhat
(Matyu 9.18-26; Luk 8.40-56)*

²¹ Jisadr tfit mmbtrn mikmbrenihato barit hir hayuknihato tfit mano mkuko yimor. Rim dbkaf hanymor yonmari yima rifhur nia rifiny hmbriyaknamorr. Be Jisadr tuha bari thmbtn tohmor. ²² Judaroh rhu rifinyuk rmonthat wom tohukatoh yimar, rorhu yufat Jairusr, niamor. Niamorn Jisadr mhtihato rorhu wurampno mtabokmemor. ²³ Mtabokmehato kfo memom, “Nanhu yont noh wururifhut kekwott. Wania tir wahtakahtnt marnyaniraht.”

²⁴ Be Jisadr wanyhato hik hanymorr. Rof yimohat bok met yindari rifhur hik hanymomrn be nahata yaborr hanymom.

²⁵ Nd yima rifiny buharn wom dbottet mett rpat fau hanymom. Nd dbotteft 12-pela gunyimm hatohmott. ²⁶ Yonmari marut be nd rothu dbottefthu htinyuk hunkotharoh wiknaneftpno tubatu witamott. Memout, “Ka hunkothamn htihato nd dbotteft yak raforahma,” to nhai, nd dbotteft nhai teh tmbhakmoat. ²⁷ Nd mett Jisadr hingrnamao bbukeyft bi wanyettnt to be Jisadrhu mongko yauyaknimotn Jisadrhu sakethat mtayoutimott. ²⁸ Rothu dukeft duka memot, “Rorhu hmbreshat be mtayoutiruha be nd dbotteft teh tmbhakraht.” Ndhtet dukeftpno mtayoutimotr.

²⁹ Be nd dukeftpno mtayoutimohat be yudbat nd dbotteft teh tmbhakmott. Tut yironamot nd dbotteft teh tmbhakmohat. ³⁰ Nd mett inji namohat tu Jisadr tfit yironamor rorhu yima yak marnyayuk yafothar nd mett

yak marnyamohat. Yironafhato tfit kekutnihato nd yima rifhur ttiwon memorm, “Frohr nanhu hmbreshat tayoutirt?”

³¹ Turhu disaiperm kfo memorm, “Wahti bok met yindarim tip tip newamn mtayoutini hanitmn. Tfit tamohmpno kfo yamuka frohr mtay-outira?”

³² Jisasr nd met yindarim hti nhombra memor, “Afo htiyanko frohrn tayoutira.” ³³ Be nd dbottet mett bi Jisasr inji kukatoh habriwore, rot tfit duka fanhomot. Duka memot, “To finji wom finji kafrohruhoya? Bi hitawora.” Be yudbat Jisasr pno rim tabokmehato kfo nuhas bugamotr rothu yak marnyamo yuhat. ³⁴ Ptha nuhasmottr Jisasr kfo memort, “O ar yone, nd ninhu dbotteft, nd hatoh hnamot, duka famu, ‘Ror rimaktirhota, be nd dbotteft teh tmbhakraht.’ Ndnnett ninhu dukef yuhat nd dbotteft teh tmbhekt. Be hifa yindhor yima yuhurpno waikahn, watohtwa. Ninhu krho nmbuhat bi fak tuhant.”

³⁵ Jisasr ptha hasetrn Jaiusrhu kunyshom toni hnehato Jaiusr yihom kfo kangmr, “Mirahn Bror ahany furayanr kunykort. Ninhu yont bi mfaknit.”

³⁶ Jisasr rom pthayuk mrokfom wany marsisahato Jaiusr kfo memorr, “Ni mirahn awany yanhoya. Ninhu bro dukefr be duka mekfot, ‘Nanhu yont tfit myenyjworaht.’” ³⁷ Be nd met yindari rifhur ndhar kfo rafo tanyorm rorhu hikeft. Pitari Jemsre Jonr, Jemsrhu habhir, romrpam husfirparpat kfaknimor. ³⁸ Nd Jaiusrhu kunys mwanyaknimomt yimam nur hasomohat. ³⁹ Jisasr kunys fknenihato rim kfo memorm, “Tamohmpno nurwako? Nd yont nhai nohrfot, be hwitwot!”

⁴⁰ Jisasr inji kfomotr haningemomr. Nd nur kunys rhuyuk yimam yak tuhafhato fnah buganimotm, nd yonthu yifammafi turhu husfirpa disaiperm yaknitarim yimom nd yont rhumo rumtn. ⁴¹ Rim fnahnihato nd yonthu tirenr wayekwart kfo kangr, “Talita kumi.” (Nd mrokfothu yimbu yuhat, “Metene, na kfiwann wasinya.”)

⁴²⁻⁴³ Be nd metent inji kfomotrt yudbat wasinyamotn ufaufaumot. Yonthu yifammaf inji htihato be tuha yafotha duhatf tohmof. Jisasr kfo memorf, “You! Mirahfn akfo nuhas mif mifnomm nda nifnihu yont myenyjwi yuhat.” Nd yonenthu gunyjimmm 12-pelakfot. Inji kfonihato kfo memorm, “Nuwa wayak wahefnt.”

6

Nasaret thofm Jisasr mong trohmo yuhat (Matyu 13.53-58; Luk 4.16-30)

¹ Jisasr nd ror tohmo tkitt htanyhato tfit yimor turhu kmitn. Turhu disaiperm rpat yimom. ² Turhu kmitn yihato rhu krna Sabat yiharn yimor Judaroh rhu rifinyuk rmontn. Yihato Bro Nkifrarhu mrokfefm kfo nuhas bonuhasmorm. Bok met yindarim rorhu mrokfefm wanyhato tuha mrokfo duhatn rhumom. Duka memom, “Nd yimare fitha nd bbukeft yakhato ndhtet nefm niwarm? Yo ndhtet dukefme fitha yakmorm? Nd ror hingrnewa mirakerkfome tamohtet tongr thu kihwatrr mhingrniwarm? ³ Nd yimar to wam kamdarhu yoner. Nd yimar to Mariathu yoner. Jemsr, Josef, Judasr, Saimon, tom rorhu nmemrom. Rorhu mndaremrom asom asha korhm.” Ndhtet dukefmpno nhai marimom, “Jisasr rihtirahnomr.” Nhai. Mong troh bugamomr.

⁴ Jisær inji wanyhato kfo memorm, “Bro Nkifrarhu profetrhu yufat bi kmi kmim rhu htfaswot. Turhu kmiti turhu yorgre turhu kuny shofm, rompno nhai yufapa duhater.”

⁵ Be nd dukeftpno nhai turhu kmit tamohetet mirakerkfom hingrnarmotr htirmomm. Be inji rpa rpa dbohnet yimarpam tirt htahato fak marnyanimorm. ⁶ Duka memor, “Tamohmpno nd yimam nhai wany yakiokahmm nanhu mrokfom?” Inji dukahato yimorn Bro Nkifrarhu mrokfom ptha nuhas habrimor.

Jisær hatohmo bbukeyft yak nuhasmotrt kmi thofm htimomt. To nd turhu disaiperm nhai htihato duka tungunefr yakrmom.

(Sapta 6.7–8.21)

Jisær 12-pela aposerroh hingrna yuham kfo hta bohta nuhasmo yuhat (Matyu 10.5-15; Luk 9.1-6)

⁷ Jisær turhu disaiperm yak nhafohmormn tfit hus hus fak nhtamorm. Hus hus yak nhtamormn tek yarh kmi yarh yak thuyuk yafothar hiyaf hanymorm. Nd yafothar henyihato kfo tkruraf memorm, ⁸ “Niko yinyeft kio musrpm yakitohakkfot. Mirahko nuwa nakupam, hmbre wus yohm, maruham, nd ndm ayakitohaknom. Be inji sfno yikfot. ⁹ Su wuraroh hmbrenineft rot nhai mrokfom. Hus yagr thafhu hmbrenineftne nhai. ¹⁰ Yihato wom kmit fak miyekmko, kunys fahumko, be nd kunyrpat toh tanyhato tfit sinyani yikfot. ¹¹ O wom kmit o taunt yihato nhai kunym yakmiyakhato niko hanyuk mrokfom nhai yindhorkahm wanyneft, nd kmit htanyhato fus wuram tuha nd kmitn frdbofta tanyhato htanykfot. Inji naruhatko, ndt htiruhamn, mirahm, ‘O nom yakmiyak duha yifnomm inji nem.’”

¹² Be nd Jisærhu disaiperm yimomn Bro Nkifrarhu mrokfot kfo nuhashato kfo memomn, “Nikmoh fasoh nefm mong trohkfot.” ¹³ Nd kmiroh bok kmi yarh fknayet yimam fak marnya bomarnyamomm. Yo nd wom dbohnet yimam, be nd kahpaye htamoatrm marnyanimomm.

Jon Baftaisrhu noh yuhat (Matyu 14.1-12; Luk 9.7-9)

¹⁴ Nd Jisær namoa nefm nhai wom rpa kmirpat wanyrmomt. Bi kmim rhu fnahmott king Herotr wanymort. Womm Jisær namoa nefm wanyhato duka memom, “Ka Jon Baftaisr minohakhato tfit sinyamorn ndhtet nefm newurm.”

¹⁵ Womm duka memom, “Ka Irajayer.”

Yo womm duka memom, “Ka bingot tohmo wom profeter.” Be turoh yima yuhumn inji inji fak nhtamom.

¹⁶ King Herotr Jisær namoa nefm wanyhato kfo memor, “Nd yimare, Jon Baftaiser. Nd yimar to bi na mfhat tmbhomohat, to bi tor, bi tfit sinyamor.” ¹⁷⁻¹⁸ To bingot Herotr wom nmem Filifrhu tuhan Herodias yak hutfakmohat, Jonrn kfo memorr, “Ndhtet nefm nhai tu dborioh nefm narmo. Nkifra thfa mntwat kfo kangt, ‘Mirahn womrhu mett ayak hutfayanr.’” Inji kfomotrr, wom yimam kfo tkrurafmotrm Jon Baftaisr fakmomr. Yakhato kalabus htamomr.

¹⁹ Herodias Jonrhu mrokfot wanyhato wanyhato namburmort. Nam-burhato memout, “Jonr awasanr.” To nhai, ²⁰ Herotr Jonrhu wasneft

mfanuhakmour. Duka memour, “Jonr tu dborioh yimayer, Bro Nkifrarko kukatohworr.” Ndnetrn Jonrhu toh nmbuham Herotrhu mofsinhitn tohmour. Jonrhu pthayuk tamoh tamoh mrokfem Herotr nhai hamuh tfafmoarm. Nhai. Be rorhu yima yuhur mrokfem wanyhato krhomour. To nd yima yuhur krhomoahat nhai marimoar, “Jonrhu mrokfem nhai tfit wanyrhotanm.” Nhai. Jonr pthayuk tamoh tamoh mrokfem wany yakitohmourm.

²¹ Bok yihotam Herodias nhombrati hnamotn ee wanymot Herotrhu betdekfothu bro yemro burwathu hta yuhat. Rot nd mrokfot wanyhato kfo memot, “Hifa, ka na nd yiharn fura mrom yakruha.” Betde yiharn bro yemro burwat htamortn bok yimam nakumorm. Nd turpno gafman hingrneft hingrnanhoyukm, yo nd turhu amikofthu bro yimam, yo Galilikorhof bro yimam naku bugamorm. ²² Nia rifinyotm Herodiashu yo mett fnahnihato nd bro yufet yimam rhumo tkittn yi grhamot. Nd rhuyuk bro yimam htihato masat yindhormom. King Herotr htihato kfo memot, “Nom hifa hti yindhorwonomn. Kangn tamoh ayaka, wakfokahtn yakhiruhann. ²³ Na kfo mif mifwann, tamohm ttiwonrahna be he mifruhann. Kangn, na tohukatohwa yima rihfur niyak nhtahato kangn, wom rihuhetr atohukatoha, na nhai mrokfom. Na to finji kforuhoya?”

²⁴ Be nd met tmaht yitatn mmemt rim ttiwonwott. Kangtt, “Na Herotr inji inji ttiwonra. Ndnatn kanga attiwonanne ni finji dukewa? Tamohmn akfoya?”

Mmemt kfo kangtt, “Jon Baftairhu mfhathu yakneft wakfotwa.”

²⁵ Be inji wanyhato yimotn kingrpnno rim kfo memot, “Na kanga asomif mif Jon Baftairhu mfhat watmbhakkahnr wom plettn wakmbrehiyafona.”

²⁶ Be wom kingr wanyhato be tuha mrokfo duhatr rhumor. Bi bro mrokfot kfo memot, “Tamoh tamohm ttiwonwona na nhai kfo wokrhottann hanyeft. Be he mif mifruhann.” Bi inji kfetrn to be rot Jonrhu mfhathu tmbhakhato hiyafneft kfomohat nhai tfit wom kfo wokrmort. Ror nd yontpno naphamohat nd rhuyuk bro yimam bi wanyomomr ror nd pthamohat. To be ndnatn nhai tfit ror wom kfo wokkfot. ²⁷ Be yudbat kingr wom soldiar kfo tkrurafmotrr yimor Jonrhu mfhathu tmbhakt. kalabusm tohmoo kunys yimorn Jonrhu mfhat yihom tmbhakmorr. ²⁸ Mfhat tmbhohato plettn kmbriyaknehato nd met tmahtn mhemor. Nd met tmaht nd yima mfhat yaknihato mmemtn rim hemot. ²⁹ Jonrhu uhik ahik htfasmoa yimam rorhu mfhathu pukni mrokfeft wanyhato kalabus kunysn yimomn rorhu tmbt rimakmommn hany fopmott.

Jisasr 5,000 yimam yeshri hemo yuhat

(Matyu 14.13-21; Luk 9.10-17; Jon 6.1-14)

³⁰ Nd rorhu sioskfothu kasinya htfasyuk aposerm tfit Jisasrpnno niahato mkfo nuhas bonuhasmomr rom namo nefm yo rom ptha htfasmo mrokfem. ³¹ Bok yimam yi rifiny hatohmoatmm nhai nuwa ya inji narmom. Be ndnatn Jisasr kfo memom, “Na kamuka wom turpat tkittn aikahnomn rhu wita inji narahko.” ³² Be mmbtr yaknimomn turpatm wom turpat tkittn yimom.

³³ Bok yimam tohhato hti hikaf hanyommom rom hir hanyomohat. Hti hikaf hany memom, “Tom bi ndko kitwom mhtirahnomm.” Be tonayef-rpar yakhato be nd ror yiyuk tkittn mtah hasomom. ³⁴ Jisasrom mtadbkafmomn nd yonmari yima rihfur mhtihato yuhuwafmorm. Mhti yuhuwafhato duka

memor, “Ar yimam sifsifm yima tohukatoh duha kanjo be inji hutraf tto habrisewum.” Be nd yima rifhur yak nhafotamorm mrokfom hemorm.
³⁵ Jisasrhu disaiperm marr htiaf hanyhato Jisasr mkfo memomr, “Marr bi yohnit, ndart yima toh duha wom tkit furayet. ³⁶ Ndar rifinywa yimam wakfo tkrurafkahtnm anatubatunikahmn tumn yeshrim awikna htfaskahmn aye bmtam.”

³⁷ Jisasr tfit kfo memorm, “To nikomn yeshri wahekomm.”

Tfit rom kfo memomr, “Kangne 200 kinakfot yaknihato bret pam awikna hanyomm?”

³⁸ Jisasr tfit ttiwon memorm, “Niko finji bret nuwam harhuwako? Afo wahti nhtakomm.”

Rom yihato hti nhtamommn kfo memomr, “Nom tirfa bret nuwami hus yiraf, injirpa harhuwonom.”

³⁹ Kfo memorm, “Nd yima bugam briaaha hifa kibr suhtn hofhet hofhet arhu nhombatwam.” ⁴⁰ Be rom hofhet hofhet rhu hanyom, wom hofhetr 100 yimam yo tfit wom hofhetr 50 yimam. Be inji inji rhu hanyom. ⁴¹ Be nd tirfa bret nuwami hus yiraf yaknimormn yura mount wuyukatohhato kfo bruttnamor. Kfo bruttnanihato turhu disaiperm yak tifakhany hiyaf hanyhato kfo memorm, “Wahe nhombra htfas hanykomm.” Yo nd hus yiraf be nd rpahtet neft namorf. ⁴² Nd he hanyomo yeshrt nd yonmari yima rifhur yihany yi hanyomn, yatim furkihomm. ⁴³ Yatim furkihomm, be nd yesmbhehm yak nhafohhato tfit 12-pela kpmn hmbre nhafohomm. ⁴⁴ Nd bret nuwa yamo yimam, 5,000 yimam famomm. Nd thomnafat yindarirparohet.

*Jisasr yura tek yuhathau hanyomo yuhathu mrokfot
 (Matyu 14.22-23; Jon 6.15-21)*

⁴⁵ Be Jisasr yudbat turhu disaiperm kfo tkrur memorm, “Niko bi mmbrt wayaknikahkonn Betsaidako wahir hayukni hanyko. Na afo met yindarim yak kafho tanyruha.” ⁴⁶ Be inji kfafhato turpar kmnysoft muhmor kfo bruttnaneft. ⁴⁷ Krifamott nd mmbrt hir hanyukm tek bari dany yuhathn hirmom. Jisasr turpetr yura kmnysofko tohmor. ⁴⁸ Hir hanyetn htmorm wifortn frmmomoattm yangoneft fanygo titamoum. Nhombirati nhombirati tu wuruh ksfutn Jisasr yura tek bupamn mitohhato fau hanyom. Duka memor “Yau hagrot niruhanm.” ⁴⁹ Nd mmbrt rhuyuk yimam Jisasr yura tek bupamn yau hnamotr htiaxhato duka memom, “Ndarr ka tek yarhr niewur.” Be yakrmiaxhato tuha fengr fengrt tohmot. ⁵⁰ Nd yimam tuha nhai wom yafothetn rhurmom.

Jisasr htihato kfo memorm, “Watho bmtako. Naya. Ayakrmiahko.”
⁵¹ Be inji kfonihato rroh mmbrt mikmbrehato buwiform teh tmbhakomm. Nd mmbrt rhuyukm ndt htihato be tuha mifoh rihanimom. Nhai womr ptharmor. ⁵² Ndt to nhai be sfno. Nd yimam Jisasr bret nuwam yak yurhmo yuhath rom nhai hti marimom, “Jisasr tu Bro Nkifrarhu bbukeft yorhwattr kak yuhrworm yeshrim.” Nhai ndtet dukefr rhurmorm. Ndnnett nd yimam Jisasr yura tek bupamn yau hnetr htiaxmohat yafotha duhatn rhumom.

*Jisasr Genesarethu bok dbohnet yimam yak marnyamo yuhath
 (Matyu 14.34-36)*

⁵³ Tek barat hir hayuknimomn Genesaret mkuko rim dbkafhato mmbrt ttafomt. ⁵⁴ Mmbrt ttaftany rim suhnmohat nd Genesarethu yimam

Jisadr nhai hti mmormomr. Hti-hato memom, to tawom Jisadr. ⁵⁵ Be nd yimam inji hti nhta tanyomomr nd brbo rhuyuk kmim ptha nuhas hanymomm Jisadrhu nia nmbuhat. Be nd brborhof kmim wanyhato nd dbohnet dbohnet yimam krokot krokotm hany hanymomm. ⁵⁶ Nd Jisadr yimoa kmim o fitoh fitoh tkitm, dbohnet yimam be hnamoamm bro rifny swirm htatahato Jisadr kfo ttiwonmoumr rorhu hmbresha psifrapatn dbohnet yimam tayoutihato marnyanineft. To nd dbohnet yimam inji namoahat yudbat marnyanimoum.

7

Nkifra boririfhu yirmoht (Matyu 15.1-9)

¹ Wom Farisimi wom boririfhuthu tisam Jerusalem t bi htanyhato yi rifnyomom Jisadrpno. ² Yihato htimom Jisadrhu disaiperm nuwa yamohat nhai tir kifsanihato nuwa yarmom.*

³ Farisimi Juda bugam nkifra mrokfot yakitohetmn, nhai tir kifsarfom, to be nhai nuwa yakfot. ⁴ O maket yihato nhai mhta yukrfom, to be nhai nuwa yakfot. Boknabok nefm hikmoum. Yeshri hta mskamoahat roh, plet, tamoh tamohm afo kifsanihato ee hta mskamoum.

⁵ Ndnnetn nd Farisimi boririfhuthu tisam Jisadr kfo memomr, “Tamohmpno ninhu disaiperm nhai hik duha yitam nkifra yirmoht? Tfit nkifra yirmoht riyak htefiwamt be ke fura bofurewum. Nhai tirm kif-safhato nuwa yekahm.”

⁶ Jisadr wanyhato kfo memomr, “Niko mikfo nhehta mkfo nhehtayet yimayeko! Bingot profet Aisaiar nikomn kfomom. Mrokfom wandfa memom, ‘Nd yimam be yura tngpraye kfo yuta yindhawoma. Yiro yima yuhom nhai nanhu dukefmpno korhm.

⁷ Be nd yima mifm bingot htamo boririfhut kfo nuhas htfaswamm kfo kangm, “Bro Nkifrarhu boririfuhet.”

Ndnnetn rom lotuta lotuyeft yafotha duhatet.’ ”

Ais 29.13

⁸ Jisadr nd profet Aisaiar kfongotmo mrokfot kfo nuhasnihato kfo memomr, “Niko ka bi tu Bro Nkifra mifrhuh yirmoht bi mong trohwakomtn, bi nd yima mifroh boririfhu mrokfot furamn hikwoko.

⁹ Tukmoh nkifram kfo htanihemo mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt. ¹⁰ Mosesrn yirmoh mrokfot kfo memomr, ‘Ni yifammafhu yinhitn rhuhato rofhu mrokfomn hikkfot,’ yo ‘Yimar turhu yifammaf kfo twewurf, nd yimar was hehur thukfot.’ ¹¹ Tfit nikomn kfo yirmoh kangko, ‘Wom yimar turhu yifammafmpno wuskam kfo nuhastahihato tfit yifammaf kfo famurf, “Nifn kfo nuhasheyuk wuskam bi Bro Nkifrar htahemoya,” ¹² to be nd yimar mirahr tfit yifammaf adukakahann ayak marnyayanf.’ Niko inji kfo yirmohwoko. ¹³ Ndnnetn tukmoh nkifram kfo htanihemo yirmoh mrokfom yak hikwakomn Bro Nkifrarhu boririfhut nhai yak hik marnyakahkomt. Faso tfit kfo kekutwokomt. Tfit wom rpahtet fasoh fasoh nefmn kak hikwoko.”

* **7:2:** Nkifra mrokfot inji kfomout, “Yimar nuwa yanefit tirm afo kifsanihato ee btn nuwa yakfot.” Ndnnetn rom Bro Nkifrar yirmoht yakitohetmn inji htimohat namburmom.

*Yimaroh yima yuhum faso yak bebwa nefm
(Matyu 15.10-20)*

¹⁴ Tfit Jisasr nd met yindarim nakuyakhato kfo memorm, “Nanhu mrokfem wawany hik marnyatwa-komm. ¹⁵⁻¹⁶ Tamoh tamoh mur yemrom o hnaru yemrom tng yuhat yiyafoyukm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. Nd yiro yima yuhurio sinyahato newa fasoh nefm, ndmn Bro Nkifrar htihato kfo kangr, ‘Ni bi fasoh yimaye.’”†

¹⁷ Be Jisas inji ptha tanyhato kunyko rim fnahnimor. Rim fnahnimotr tfit turhu disaiperm kfo memorm, “Tfit afo nd ni kfi mrokfothu yimbu yuhat wakfo hikkahtnt awanyinom.” ¹⁸ Jisasr memorm, “Nikome ka nhai yima yuhu duhateko? Yima yuhetko arhuko, to yakrfokomm na pthayuk mrokfem. Wawanyko! Nd tng yuhat yiyafoyuk yeshrt o wom tamohm, nhai ndmn Bro Nkifrar htihato kfo mikahr, ‘Ni bi fasoh yimaye.’ Nhai. ¹⁹ Nd yiyafoyuk yeshrt nhai yima yuhurn yikahm. Nhai. Nd yiyefiwa yeshrim nyunguram yuhat yitamn ript yihom yorhwom. Ript yihom ruhato kto tfit rikunys kitm.” Jisasr duka memor, “Tamoh tamoh yeshrim ye fura bofurayukem.” Ndnatn inji kformorm.

²⁰ Tfit kfo memorm, “Nd yiro yima yuhurio sinyahato newa nefmn, ndmn Bro Nkifrar htihato kfo kangr, ‘Fasoh yimayer.’ ²¹ Nd na kfiwa yima yuhur sinyewa fasoh nefm, ndm inji korhm: nd fasoh fasoh dukefr, yaum kanjo met yindarim niwa nefm, rikohneft, yimar nambur sinyahato womr was furaneft, womrhu mettpno rim fnahneft, ²² yimarhu yima yuhur kangr tamoh tamoh wuskam, maruham nanrpayanuhem, nhai womm henyeft, nd nd fasoh nefm yima yuhur sinyewamn ni womn yak bebneft womr, kfo nhebehneft, tuhagrhatato yimtna duha na fura bofuriwa nefm, womrhu dborih wuskam o mett o tamoh htihato tfit ni womn duka bebneft womr, ‘O tamohmpno ror yekrt nd banuhah mett o shrt. Nann yakrfoyant.’ Ndhtet dukefm o womm faso faso harhu htfasneft, o yufa yurak htaneft, o duka marnya duha naknita nefm. ²³ Tom nd nd nefmn yiro yima yuhurnio sinyewamn Bro Nkifrar htihato kfo kangr, ‘Fasoh yimayer.’”

*Jisasr Fonia efkotthu yont yak marnyamo yuhat
(Matyu 15.21-28)*

²⁴ Be Jisasr nd kmit htanyhato tfit Tairko yimor. Yimorn wom kunys fknienihato ndha rhu kfafrohmr. Duka memor, “Rhu kafrohrhota nd kmithu yimam nhai htirhotma.” To nhai, bi yimam yak switafetrn to be nhai tfit wom kafrohkfot. ²⁵ Wom mett, rothu yont kmi yarhr fknemort. Jisasrhu nia nmbuhat wanyhato be ror rhumo kunysn yimotn Jisasrhu wurampno msuhmot. ²⁶ Nd mett, rot rmon mrokfo wany juha kantri Siria efkott. Rothu profins Fonia. Rot yimotn Jisasr mnaku ttiwonmotr rothu yon mett fknemo kmi yarhrhu yak thuneft. ²⁷ Jisasr wom kfo nhombra mrofkot kfo memort, “Yonroh hayuk yeshrt nhai bi yakhato yaumn afo wahta hekahmn. Nhai. Afo tu yima yonmn barkofpam kahuknom.”†

²⁸ Tfitn nd mettn kfo memotr, “Bro yimaye, ndt rot hifat kfiwun. To nhai, nd yauyenm, tebor yinhit toh hanyukm, rom to nd yonm ye bruraf hanitam ke tuthatak hanitm.”

† **7:15-16:** Wom safemanm duka memom, tot wom mrokfo nmbuhat ndar veskfotuth. Nd mrokfo nmbuhat inji kfiwut, “Yimbhingangeteko, ndar na kfiwa mrokfot wanykfot.” † **7:27:** Wahti Matyu 15.12 yorhwa kfo nuhasyuk mrokfot.

²⁹ Jisasr rot pthamo mrokfot wanyhato kfo memort, “Ni inji kfitn, wanju kunyko. Nd kmi yarhr bi thu troh tanyrt ninhu yont.”

³⁰ Be rot kunyko yihato mhtimott yont bi kmi yarhr thu troh tanyhato tiktn hwe hasettn.

Jisasr tng yimbhindang kihmniyet yimar yak marnyamo yuhat

³¹ Jisasr tfit Tairt htanyhato yimor Saidonko. Saidonko tohni tfit yimorwe distrik Dekapolisko. Dekapoliskorn hingrna hanyhato Galili barat mfnahmor. ³² Galilit bi mfnahetrn wom yimar hnamomr. Nd yimarhu yimbhindangm kihmniomomr yo pthaneftm nhai ptha marnyarmoar. Nd yimar hnehato Jisasr ttiwonomomr nd yimarhu tir htaneft. ³³ Be Jisasr nd yimar yaknimorr, nd yima rifhur htanyhato turpatf wom tkitt yimof. Turpathato Jisasr tirpinyafe nd yimarhu yimbhindangf htamor. Tfit kuninfar yakhato tortn htamort. ³⁴ Ee, Jisasr yura mounko wuyukatohhato yawitakiyafmorn ptha memor, “Efata,” (nmoh mrokfotn, “Atuppomn.”) ³⁵ Inji kfomotr nd yimarhu yimbhindangm tuppomomr. Tuppohato mrokfom riptha marnyakmorm. ³⁶ Jisasr nd yimar yak marnyanihato kfo rafo mrokfot kfo memorm, “Nd nda yimar yak marnya yuhat, mirahko wom yimam akfo nuhas mif mifnomm. Be inji turpatkmoh yima yuhumn arhutwat.” To nhai, nd kfo rafo mrokfot nhai yak hikrmomt. Tfit romn mrokfot yaknihato kuny kuny kfo habrimoumt. ³⁷ Be nd kmi kmirhof yimam Jisasr namo neft wanyhato duka memom, “Barenko! Ndu yima Jisasre be tu nhai hingrna happukkahr. Ror newa nefm be tu yafothetm korhm. Ror kfiwur, yimbhindang kihmniyet yimam mrokfom wanukm. Yo ror kfiwur, tng mmkm pthewum.”

8

Jisasr 4,000 yimam yeshri hemo yuhat (Matyu 15.32-39)

¹ Wom yiha nhaf yonmari yima rifhur rifinymomr. Nhaf nd rifinymo yima rifhur be inji yeshri duhatn tohmom. Be Jisasr htihato turhu disaiperm nakuyakhato kfo memorm, ² “Nda yima rifhur yuhuwafwanm. Bi husfirpa marm nanpno tohromn bi yeshriyen duhatem. ³ Yatinoh tohetmn kfo miruhanm, tukmoh kunyko wanjuko, inji kfafhato yirahm, to be buha yihotatn yatinoh mmrifakruhamn suhrahm. Womm nhai be brboha toh tanyhato niarmom. Wuri wuri tkitrohm womm nia hnamom.” ⁴ Tfit turhu disaiperm kfo memomr, “Ndashart nom yima toh duha tkitt tohwonom. To href fitha bok bretpam yekwanomn ndar yonmari yima rifhur yahukanomm?” ⁵ Jisasr tfit ttiwon memorm, “Nikome finji finji bretpam harhuwako?” Kfo memomr, “7-pela kfoyet.”

⁶ Be nd yima rifhur Jisasr kfomotrm tuha bbinysotfn sibosi rmonmom. Jisasr nd 7-pela bretpam yakmormn Bro Nkifrarko kfo bruttnanihato bretpam fak tif botifmorm. Tfit turhu disaiperm hemotr romn yaknihato nd met yindars hi hanymomm. ⁷ You tfit wom yirayenm yakhato nhaf Bro Nkifrarko kfo bruttnanihato turhu disaipermn yak mkuyakhany, yak mkuyakhany, hiyaf hanymoatrm, tfit romn he nhombra hanymoumm met yindarim. ⁸ Nd yima rifhur fe furkih bugamom. Nd rom yesmbhoyuk yeshrim Jisasrhu disaiperm tfit yak nhafohhato hmbremohat 7-pela kpm

hmbremom. ⁹ Nd yeshrim yamo yimaroh thomnafat, 4,000. Ndt yindarir-paroh thomnafayet. ¹⁰ Be Jisasn nd yima rifhur kfo tkruraf tanyhato turhu disaipernpno mmbtrn mikmbrenihato Dalmanutako yimom.

*Jisasnru mirakerkfofot memom ahtinom
(Matyu 16.1-4)*

¹¹ Farisim yihato Jisarnpno yuwi mkfo memomr, “Jisase, mirakerkfofot wahingrnakahtnt afo ahtinom. Nom htiruhanomn mirahnom, tu Bro Nkifrarhu bbukeftpno hingrnewur.” ¹² Inji kfomotmr Jisasnru yima yuhur krhohato tuha yawita kiyafhato kfo memom, “Tamohmpno ariharhof yimam yamukoma bro mirakerkfofot wayak nuhasakahtnom ahtinom? Na tu be kfo mifwanko. Na nhai tfit ariharhof yimam tfit wom neft yak nuhasrhotanm. Be tu nhai mif.” ¹³ Be Jisasn tfit mmbtrn mikmbrenihato tfit mkuko hir hayuknimor.

*Farisiroh yispami Herotrhu yisparoh kfo nhombra mrokfofot
(Matyu 16.5-12)*

¹⁴ Jisasnru disaipern yimohat nhai dukarmom bretparoh yaknifeft. Rpa bretparpat faknimom. ¹⁵ Yimomn Jisasn kfo memomr, “Niko Farisimi Herotroh yispam hti marnyaf hanykfofot.” ¹⁶ Tfit tum rinakfo nakfo memom, “Ka nom bretpam yakna duha yitnom, ndnetrn nd mrokfofot kfiwurnom.” ¹⁷ Jisasn bi wanyhato kfo memomr, “Tamohmpno tuko tfit rinakfo nakfo yamukako, ‘Nom bretpa duhatenom?’ Niko ka nhai yima yuhu duhateko? Nhais yima dukefm rhukahmko? Yima yuhum ka bi kspitapamn toh tittewumko? ¹⁸ Nyingetko arhuko to htirfoko? Yimbhindangetko arhuko to wanyrfoko? Ka nhai. Ka bi nhai wom duka hanykahko ¹⁹ na tirfa bretpam 5,000 yimam yak dbifhato hany nhombra-mohat? Finji finji kpm nd yesmbhehm yak hutuhahato hmbremoko?” Kfo memomr, “12-pela kpm.” ²⁰ Tfit kfo memomr, “Yo tfit na nd wom yiha 4,000 yimam 7-pela bretpam yak dbifhemohat, finji finji kpm hmbremoko nd 7-pela bretpam ye furkihato yesmbhomom?” Kfo memomr, “7-pelakfofot.” ²¹ Tfit kfo memomr, “Na nd nefm namohat, ka nhai htihato duka hanykahko?”

Jisasn turhu disaipern skurkfofot hemo yuhat
(Sapta 8.22–10.52)

Betsaidathu nyinga kunyjet yimar Jisasn yak marnyamo yuhat

²² Nd Jisasn rim hanymomn Betsaidat rim fnahnom. Nd kmi thofm Jisasn htayahato wom nyinga kunyjet yimar fnamomr. Nhehato Jisasn mttiwiwomomr nd nyinga kunyjet yimarhu tir htaneft. ²³ Be Jisasn wanyhato nd yimarhu tirt yakitohaknihato nd kmit fnahnimofn briyahako fnahnimof. Briyahako rim htahato Jisasn nd yimarhu nyingam kuninfarmorr. Kuninfarnihato tirm htahato ttiwon memomr, “Bi kukatoh wuthewun?” ²⁴ Nd yimar nyingam myukatohhato yimam tamohm htimorm wufau faumom. Kfo memomr, “Htitanm yimam mim kanjo kau hanitm.” ²⁵ Tfit Jisasn wompam tir htamotr ee ndnatpno nyinga rurham mfrfnahnamotmr hti wutha bugamorm yimam, mim, tamoh tamohm. ²⁶ Nyingam yak marnyanimorr kfo memomr, “Ni mirahn tfit yiro kmiko arim fnahniya. Ninhu kunyko wanju.”

Pitar Jisasn kfo nriyafmo yuhat
(Matyu 16.13-20; Luk 9.18-21)

²⁷ Jisasri turhu disaipermmpno Galilikort htanyomomtn yimom tfit Sisaria Filipaikorhof kmimn. Yihofatn turhu disaiperm ttiwon memorm, “Nane, met yindarim finji dukewuma?” ²⁸ Kfo memorm, “Womm kangm Jon Baftaise. Womm kangm Irajaye. Womm kangm wom nkifra thof profete.” ²⁹ Inji kфомotm, tfit ttiwon memorm, “To niko tuko finji yute-wukma?” Pitar kfo memorm, “Ni kangnomn nmoh hbhayeme, Bro Nkifrar kfo tkrurafmorn nmoh minrfa htikyayuke.” ³⁰ Be Jisasr inji wanyhato kfo memorm, “Yo mirahko mif mif womm akfo nuhasnomm. Mirahko akfo amanyomm, ror ndhtet yimayer.”

*Jisasr turhu nohhato sinya yuhat kfo nuhasmorm
(Matyu 16.21-28; Luk 9.22-27)*

³¹ Nd yiha Jisasr disaiperm rikfo nuhasak memorm, “Na, Bro Najema boknabok krhopam yakruha. Na Judaroh bro yimamn, prisroh bro yimamn, boririfhuthu tisamn, nd nd yimaroh tirnm hirruha. Nohruhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.” ³² Inji kfo ptha srh nuhasnimormn tfit Pitarn Jisasr yaknihato nndo rim hatohhato kfo rafo mrokfot kfo memorm, “Ndhtet mrokfot kfo ptha duha.” ³³ Tfit Jisasr kekutnihato turhu disaipermmpno yukatoh hanyhato Pitar kfo memorm, “Satane, wuri wain. Ni nhai Bro Nkifrarhu yima yuhur hikkahn. Nhai. Be nndo yima mifroh dukefm hikwo.”

³⁴ Be met yindarimi turhu disaiperm rpat nakuyakmorm. Nakuyakhato niamotm kfo memorm, “Wom yimar kangr, na ahik hneya, mirahr tur amduduk hanya. Nd dukefr mong trohhato rorhu bgre mis titahato na hikkfot. ³⁵ Yimar turhu toh marnya nmbuharpap mduduk hanitr; nd toh nmbuhar ror mduduk hanitat nhai tfit wom htiruhatr. Yimar nani nanhu gutniuskfot dukahato nhai turhu toh marnya nmbuharpap dukarfort, kto tfit htirahrt rorhu toh marnya nmbuhar. ³⁶ Wom yimar ndar bbinysofthu tamoh tamohrpap yakhato kto toh nkifrayuk toh nmbuhar nhai dukarfort, to nd ariha yekwa marut, wuskat, tamoh tamohkto to finji hifa toh nkifra nmbuhar hiruhamr? ³⁷ Hifa toh nkifra nmbuhar kangr tfit ayakant, to tfit fitho yuhatn yakruhart? ³⁸ Ariharhof yimam Bro Nkifrar mong trohhato fasoh fasoh nefm newum. Frohr yak rihtefiwura yo nanhu mrokfot yak rihtefiwurt, be nd yimar tawo na Bro Najema yak rihtafruhanr. Nani tu dborioh mounmotmpno nia thombat Bro Yifemrhu nukteftpno yawihnehato yak rihtafruhanr.”

9

¹ “Na kfo mif mifwanko, ndasha tohwa womm tafi afo noh duhatmn Bro Nkifrarhu bro nanyaret kingdomkfot htirahmt.”

*Jisasrhu thatipt fnhumo yuhat
(Matyu 17.1-13; Luk 9.28-36)*

² Kto 6-pela yiham yinyimotm Jisasr Pita Jems Jonrom yaknihato turpatm muhmom tu mfro wayakmo kminysoftn. Turpatm rhu hasohato asha htiyaf hanymorm fnhuyaknimor. Memom nndo yindeng nyisofr fnhutwor. ³ Yimar hmbremor hmbresham rpat fnhu bugaknihato memom nndo bruwomr katiwur. Nhai ndar bbinysofthu wom yimar inji rhu wonakrmor. ⁴ Ee tfit htimomf Irajia Mosesrof Jisasrmpno mtohhato pthamohat. ⁵ Pitar inji htihato Jisasr kfo memorm, “Tisaye, nmoh asha tohneft hifa. Ka

husfirpa kunyenm yimanom nhombrahato singorahnom. Ninhu womt, Mosesrhu womt, yo Irajjarhu womt.”⁶ Pitar nd mrokfot kfo pthamohat be yakrmehato be tu furamort nd mrokfot.⁷ Be tfit wom gribfat niamotn yawihnehato kasi hmbremotm. Yiro nd gribfatn wom tngt niamot. Nd tngt kfo memot, “Ndarr nanhu Yoner. Be tu marbitn htewanr. Ror pthayuk mrokfom wany yakiokfot.”⁸ Yudbat yukatoh habri memom ahtinom nd mrokfo pthayuk yimar, to nhai, nhai wom yimar htirmom. Tu nd Jisasrpar htimom.

⁹ Be nd kminyinsofr wuhtanyhato tfit mibrnyimom. Buha yihotatn kfo memorm, “Niko nd yura kminyinsoft htitawoneft bi mirahko womm akfo nuhasnom. Kto na Bro Najoma bi nohnihato bi tfit sinyeya, ee btn wakfo nuhashtiwakomm.”

¹⁰ Be rom nd Jisasr kfo pthamo mrokfot wanyomohat, tfit tum nakfo ptha memoum, “Nd ror kfi yamuhat nohnihato tfit sinyanefte tamohat kfir?”¹¹ Tfit kfo ttiwon memomr, “Tamohmpno nkifra boririfhuthu tisam kfo yamukam, ‘Afo Irajjar bi nia gungonrahr. Tfit kto Bro Nkifrar kfo tkrurafrahr nmoh minrfa htiyakyuk yima Kraiser.’”¹²⁻¹³ Jisasr wanyhato kfo memorm, “Ndt tu kfo mif kfoyet. To nkifra kfot kfo memot, afo Irajjar bi nieruharn rorn nd tamoh tamohm bi yak hta bohtarahr. Tu mrokfot kfiwut. To tfit kfiwanko, Irajjar to bi niamor. Bi niamotr yimam turoh dukefm hikhatoh faso faso fak bebmomr. Wawanyko, Bro Nkifrarhu rfa borngt kfo yamukahat, ‘Bro Najomr bro krhopam yakruharn yimam kfo behohrahmr.’ Ndt tu kfot kfiwut.”

Jisasr yak marnyamo kmi yarhr hatohet yonr
(Matyu 17.14-21; Luk 9.37-43)

¹⁴ Mibrnyimomn tfit wom disaipermmpno minahtimohat mihtiyakni-momm wom yimampno rifiny hasomom. Bro Nkifrarhu boririfhuthu tisampno nakfo hamuh nakfo hamuh hasomom.¹⁵ Be nd rifiny hasomo yonmari yima rifhur Jisasr hti fohtasakhato tfit rorpno mkfo yindhorakni-hato mrifin-yaknitm.¹⁶ Rorhu disaiperm Jisasr ttiwon memorm, “Nikome tamoh mrokfefmn nnakfo hamuh hasiko?”¹⁷ Tfit nd yima rifhurhu wom yimar sinyahato kfo memomr, “Broye, nanhu yonr kmi yarhr mrokfo ptha yafothar yakmotrr ndnetn ninpno hniyanr.¹⁸ Nd kmi yarhr tattuh thombat, yima yonr suhwor. Suhhato tir wuram noh minysafaknihato bisom youkukakni brukti yima yonr hatoh thombat kangm nndo foher. Ninhu disaipermmpno kfo famuya, ‘Wayak thukomr yarhr.’ To nhai, fak thu titawomr.”

¹⁹ Jisasr nd mrokfot wanyhato kfo memorm, “Arom Bro Nkifrarhu dukefm rhu duha met yindiriyenko, finji tfit nikompno tohrhoya? Finji tfit nikomr krhopam titahirhoyanko? Wahnakomr nd yonr.”²⁰ Be nd yonr yaknimomr Jisasrpn hanyomomr. Nd yonr tohmo kmi yarhr Jisasr htihatoh ka nd yonr bbinysoftn wathu tmbhomotr be tuha bruktpno bruktpno tohaknihato tir wuram tubatu yaknimomr. Tuha memom nndo yejefenrn nmbukaswor.

²¹ Jisasr nd yonrhu yifemr ttiwon memomr, “Nda yonre fitoh yiha fakmotr nd mumeft?” Yifemr kfo memomr, “O yuhre habhiyenrn nd mumeft rifakakmotr.²² Rhu hasiwarn nd yarhr thu mumaknitatr kahmn kitr. Womnam tekmi mitayifwor. Nd yarhr kangr, inji anakahtanr anohr. Ndnnetn kanga attiwonann, ka yuhuwafhatoh yak thurfonr nd ror hatohwa yarhr?”

²³ Jisasr kfo memorr, “Rot ndt nhai mrokfom. Tu yimann hus yima yuhufn rhurahn be nhai yak marnyahirhotanr. Rpa yima yuhurpar rhuhato duka mirahn, ‘Href mif mif Jisasr kak marnyahukra.’ Inji dukarahn marnyahirahrn.” ²⁴ Nd yonrhu yifemr waruhato kfo nur memor, “Uwa, uwa na nd yima yuhur kfo kangr, ‘Href mif mif kak marnyahukra.’ To tfit wom yima yuhur nhai be inji masat dukakahar. Ndhtet dukeff yorhwotfa ndnatn kanga ndhtet midukata mdukataneft wayak thunt. Be nd yonrhu marnya dukefrpar wayakhtana.” ²⁵ Jisasr met yindari rifhur brbo toniyaknimotm Jisasr nd yimbhindang tng kihmniyet kmi yarhr kfo nambur hik memorr, “Asomif wathu troh tanyrn. Wathu troh tanykahnr mirahn tfit amfkneyanr.” ²⁶ Be inji kfo nambur hikafmotrr, be nd kmi yarhr tau fnahato thu troh tanyomorr. Thu troh tanymotrr nd yonenr suhhato yebittaknimomr. Memom ka dangnhatn tmbho thum. Yimam htihato memom ka bi fnohr. ²⁷ Tfit tu Jisasrn nd yonrhu tirt wayakhato wateh kasinyakmorr.

²⁸ Kto Jisasr kunyko yihato turpatm turhu disaipermppo rhuhato kfo ttiwon memorr, “Tamohmpno nd yarhr to nom yak thu duha yirfonomr?” ²⁹ Jisasr kfo memorr, “Nhai wom tamoh nefm nahato kmi yarhm yak thukfot. Bro Nkifrarhu kfo bruttna-nefrpat. Bro Nkifrarpo kfo bruttnarahko kmi yarhm yak thurahko.”

*Jisasr tfit wompam kfo pthamort turhu nohhato sinya yuhat
(Matyu 17.22-23; Luk 9.43-45)*

³⁰ Be nd kmit htanyhato buha Galili yuhat yimom. Jisasr nhai marimor, wom yimar kfo nuhasruhanr rorhu yi yuhat. ³¹ Turhu disaiperm kfo kars bokars, kfo nuhasr bonuhas, kfo hta bohta inji nayetrn nhai marimor womm kfo nuhasruha yi yuhat. Turhu disaiperm kfo memorm, “Ndar bbinysofthu yimam Bro Najomr yak hndhnrarahmr yimampno. Hndhna-ruhatmr yimam wasrahmr. Nohruharn husfirpehyuk marrn tfit sinyarahr.” ³² Jisasr inji kfomotr, nhai rom nd mrokfothu yimbu yuhat yakrmomt. Rom tfit fanhomom nd mrokfothu tfit ttiwon hikneft.

*Frohr broyer?
(Matyu 18.1-5; Luk 9.46-48)*

³³ Jisasri turhu disaiperm yimomn Kaperneamt mfnahmom. Ndha mfnahhato wom kunys fkenihato Jisasr ttiwon memorm, “Niko yihotohat yau hnehate tamoh mrokfom rinnakfo nakfo hneko?” ³⁴ Nd yimam yihotoha yuhat niamohat tohakyuk yimarhu nmbuhat nna kfo hamuh nna kfo hamuh hnamom. Womr watohhato memour, “Nann broruhanko.” Tfit womrn, “We, we nann broruhanko.” Tfit womr watohhato memourr, “We, rorn.” Tfit womr watohhato kfo memour, “We, we ror nhai, ndarnr brorahrnom.” Inji inji nna kfo hnamomn Jisasr ttiwonmohat to be nhai womr ptharmor. ³⁵ Jisasr warhumorn nd turhu 12-pela disaiperm kfakmorm. Kfakhato kfo memorm, “Wom yimar kangr, ‘Nyingako atohane,’ nd yimar wom yimaroh mongko tohtahato be rroh hingrnanho yimapar tohkfot.” ³⁶ Wom habhi yonenr yakmorrn rroh buha htatahato tire yakitoh hanymorrn kfo memorm, ³⁷ “Fitoh yimar na hikhato na hikwa wom met yindarim yakhato kak marnyewurm, nda yonenr yakhato yak marnyiwa kanjo, nd yimar nann yakhato kak marnyewur. Na Bro Nkifrar kfo tkrurafmotra, niamoya. Ndnatn frohr na kak miyekwor, nd yimar Bro Nkifrar kak miyekwor.”

Nompno nahti dbnot duha yimar nmoh yimater

(Luk 9.49-50)

³⁸ Jonr kfo memorr, “Tisaye, wom yimar htimonomr ninhu yufat yuta nawohhato kmi yarhm yak thumoatrm kfo rafonomr. Nd yimar nhai nom ni hik habriwa kanjo nd yimar inji hiknho habrikahrn. Ndnatn nd yimar ninhu yufat yuta nawohhato yarh fknayet yimam yak marnyamoahat, nom nhai yindhorrmonom.” ³⁹ Jisasr wanyhato kfo memorm, “Mirahko akfo rafonomr. Yimar nanhu yufatpno wom mirakerkfot hingernewur, nhai be yudbat fasoh mrokfom kforhotra. ⁴⁰ Yimar nompno nhai nahti dbnotkahr, nd yimar nmoh yimater. ⁴¹ Wom yimar niko htihakato kfo kangr, ‘Ndurm Kraistr hikwa yimayem, bu pikt ahianm,’ na kfo mifwanko, nd yimar tawo Bro Nkifrar yak marnyarahr.”

Yimam yak kasuhwa fasoh nefm

(Matyu 18.6-9; Luk 17.1-2)

⁴² “Wom yimar ndar na hikwa yonenm frnhehektrm fasoh nefm fsuhm, nd frnhehakyuk yimar bro tahis yakhato mohtpitn tmbrekhato tek dany yuhaf yafhohato miptkokfot. Tohruharn fasoh yihotat hanyrahm. ⁴³⁻⁴⁴ Tirtn fasoh nefm hanittn, nd tirt tmbho thukfot. Tmbho thuhato be rpa tirrpatpno rhu marnyaruhann toh nkifranirahn. Hus tir bugaf rpat rhurahf, rofn yakruhafn kaht turahfn. Nd kaht nhai wom yiha minoh hmbreni hanykaht.* ⁴⁵⁻⁴⁶ Yo wurat inji newut, nhaf puk thuhato rpa wurarpatpno rhuhato toh marnyarahn. Hus wura bugaf rhurahf, rofn kaht hanyrahfn. Nd kaht nhai wom yiha minoh hmbreni hanykaht.† ⁴⁷ O nyingarn fasoh nefm htihato fasoh nefm ner, be nd nyingar yak rurha thuhato be rpa nyingarpapno rhuhato toh nkifranirahn Bro Nkifrarhu kingdomkfotn. Hus nyinga bugaf rpat rhuneft wom nyingarn fasoh nefm hanyruhatrn rofn hel rhuyuk kaht hanyrahm. ⁴⁸ Ndhart nd yimam rurhahato tabotkurwa yejefm nhai nohkahm. Yo kaht nhai wom yiham minoh hmbreni hanykaht.

⁴⁹ Rho mengongm nhai sfno yak susnakfot. Kahtpno sunfahato ee yoh nfewatm kak susnewum.‡

⁵⁰ To wom mrokfot tfit kfiwa. Youpam tamoh roh nrhayukem. Nd youpam nhai wom you gb ye juha, to tfit finji kanjo naruhatnm tfit you gb yeruham? Youpam yakhato tamoh tamohm nrhafhato htarahnm be nhai finji naruhatm. Be rhu marnyarahm. Youpam yemrom o tamohm yak marnyewa kanjo niko wommpno nayak marnyahato rpat tohkfot.”

10

Jisasr pthamor tuhan yakhato tfit yak tuhafoneft

(Matyu 19.1-12)

¹ Jisasr nd kmit htanyhato tek Jodent hayuknimortn tfit Judia profins yimor. Ndko yimohat nhaf yonmari yima rifhur rifiny hmbriyaknamomr.

* **9:43-44:** Wom safemanm duka memom, tot wom mrokfo nmbuhaf ndar veskfothut. Nd mrokfo nmbuhaf inji kfiwut, “Ndhart nd yimam rurhahato yima tabotkurwa yejefm nhai nohkahm. Yo kaht nhai wom yiham minoh hmbrenikaht.” † **9:45-46:** Wom safemanm duka memom, tot wom mrokfo nmbuhaf ndar veskfothut. Nd mrokfo nmbuhaf inji kfiwut, “Ndhart nd yimam rurhahato yima tabotkurwa yejefm nhai nohkahm. Yo kaht nhai wom yiham minoh hmbrenikaht.” ‡ **9:49:** Wahti Wok Pris 2.13.

Rifiny hmbriyak-namotmr nhaf tur na hnamoa kanjo Bro Nkifrarhu mrokfom yakhato kfo ptha nuhas bonuhasmorm.

² Ndko tohetrn ndkorhof Farisim yuwi yihato ttiwon rhti memomr, “Nmoh boririfhut finji kfiwat tuhan yak tuhafoneft? Ka hifane nhai?” ³ Jisars wanyhato tfit kfo ttiwon memorm, “To Mosesrhu boririfhut finji kfmot tuhan yak tuhafoneft?” ⁴ Tfit Farisim kfo memom, “Mosesrhu boririfhut, nom yak hikwat, kfo kangt, yimar tuhan yak tuhafoneft nhai mrokfom. Afo tuhan yak tuhafoyuk kfo yakio gontwat wandfanihatoo ee mett yak tuhafokfot.” ⁵ Jisars kfo memorm, “Rot ndt hifa kfiwukomt. To nd niko wanukwa boririfhut nhai be sfno inji riruhakrmot. Tukmoh Bro Nkifrarhu mrokforoh wany juhaneftpno nd mrokfot inji htamort. ⁶ rfa borngt inji kfiwut, ‘Bingot Bro Nkifrar ndar bbinysoft hingrnahato yimam hingrnahato mete yindariye hingrnamor.’ ⁷ Yo wom mrokfot inji kfiwut, ‘Ndnnett yindarir turhu yifammam htanyhato turhu yak tuhantpno frtkafhato ⁸ mettn bi tot rorhu tirboh raft.’ Bi rpa raftn tou dbkaf hmbrihato tohkfot. ⁹ Ndnnett Bro Nkifrar yak nmbtekyukm nhai tfit yima mifmn yak tndohkfot.”

¹⁰ Kunyko fknienihatoo tfit turhu disaipermppno nd Farisimpno naphamoo mrokfot tfit wompam ttiwon hikmomr. ¹¹ Kfo memorm, “Wom yimar turhu yak tuhant yak tuhafohato wom mett fekr, nd nfri mett be ijoh yuhathu metet. Nhai turhu tuhan mif rhukaht. ¹² Mett nhaf inji buga. Mett tuthu yak ramr htanyhato wom nfri yimarpno rim suhnineft, nd yimar be ijoh yuhathu yimayer. Nhai tuthu ramem mifr rhukaht.”

*Jisars yonroh nmbuhat kfo pthamor
(Matyu 19.13-15; Luk 18.15-17)*

¹³ Wom yimam Jisarpno yonenm hnehato memom, “Jisars tir htahato kfo bruttnarahrm.” Disaiperm inji htihatoo tfit kfo huttnaknimomm nd yon hnayuk yimam. ¹⁴ Jisars inji htihatoo kfo huttnaknimomm, “Yonenm wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam Bro Nkifrarhu kingdomkfot rhurahm. ¹⁵ To afo wawanyko. Yimam nhai yon mumenm kanjo be Bro Nkifrarparhu kingdomkfot rhukahm be nhai yiruhatm Bro Nkifrarhu kingdomkfot.” ¹⁶ Be nd toni hnamo yonenm yak nhafohmormn Bro Nkifrar kfo bruttnahato fak wus bowusmorm.

*Wuska kunyet yimar Jisarpno yihato naphamoo yuhant
(Matyu 19.16-30; Luk 18.18-30)*

¹⁷ Jisars sinyani yi hanyetrn wom yimar toni yaknehato Jisarpno bangu myuknahato ttiwon memom, “Hifa tisaye, nane finji naruhooyann Bro Nkifrarppno toh nkifraniruhoya?” ¹⁸ Nd Judaroh bro yimar hifa tisa yufat Jisars yutamotrr Jisars wanyhato kfo memomr, “Tamohmpno kfo yamukona, hifa tisa? Nhai wom hifa yimar tohkahr. Bro Nkifrarpar dborioher. ¹⁹ Nkifra thfa mntwat ni bi wanyete. Kfo kangt, ‘Mirahn wanambur sinyahato yima awas furaya, mirahn ramet tuhantpno arim fnaha, mirahn arikoha, mirahn wom yimar wom mrokfom akfo wokanr, mirahn womm amkfo yuhur nheh bonhehkahanm maruham o tamohm amiyakhiyanm, yifammaroh mrokfo wany yakiohato rroh yinhitn rhukfot.’” ²⁰ Jisars inji kfonimotr tfit nd yimar sinyahato kfo memom, “Tisaye, na yuhre yonenann nd thfa mntwam rihikakmoyann. Nhai riyak htaforroyann.” ²¹ Jisars

nd yimar hti yuhuwafhato kfo memorr, “Rot hifa nkifra thfa mntwat kakitohwont. Tmift wom nefrpat nhai nakahnt. Nd ni harhuwa wuss yak htatahato wommn wiknakfot. Nd wusspno yak yuk marut yak hato tfit nd wuskapa duha yimamn nd marut hekfit. Inji narahn, hefenrko mfro wuss harhurahn. Inji nanihato tfit na nia hikkfot.” ²² Jisasr inji kfo motrr nd yimarhu nyingatikt faso yimotr. Boknabok wusketrn nd mrokfot wanyomohat yima yuhur nhai manyahato yirmor.

²³ Jisasr kekutnihato turhu disaiperm yukatohhato kfo memor, “Wahtiko, yimam boknabok wusketm be tu mduka nhiekwom Bro Nkifrarhu kingdomkfothu fkneneft.” ²⁴ Turhu disaiperm wanyhato be tuha mrokfo duhatm rhumom. Tfit Jisasr kfo memorm, “Arenko, yimar kangr Bro Nkifrarhu kingdomkfothu afkneniya, mirahr ka be yak dbhofnaniruha. Nhai. Muh wohne fnahrahr.” ²⁵ Womhtet mong wakuyet fohr kutewumr kamerr. Nd kamerr fknanyirfort nahuyok nirthu muht. To yimar wuss mfro haruhetr, Bro Nkifrarhu kingdomkfothu fkneneft mduka nhiekkrfor.” ²⁶ Tfit tu Jisasrhu disaiperm inji wanyomohat tfit mifoh rihanimom. Miyoh rihanihato kfo memom, “Barenko, nom kangnom ka ndhtet maru kunyet yimamn hifa rhu nmbuhat miyakrahm. To nhai. Ndhtet yimam mthu nhiekrahm Bro Nkifrarhu kingdomkfothu fkneneft. To nome ndhtet yima furapanom, to nome finji Bro Nkifrarprno yihato mtoh nkifraniruhanom?” ²⁷ Jisasr yukatohmormn kfo memorm, “Niko yimakomn tamoh tamoh nefroh finjina finjinaneft mduka nhiekwoko. Tu Bro Nkifrar nhai duka nhiekfot wom tamoh nefroh finjina finjinaneft.”

²⁸ Pitarn sinyahato kfo memorr, “Wahtinnom. Nom ninhu hikneftn nmoh tamoh tamohm mong trohhato ni mhikaknamonom.” ²⁹ Tfit Jisasrn sinyahato Pitar kfo memorr, “Na kfo mif mifwanko, yimam nani gutnius mrokfot dukahato rroh kunym, yon tuhanm, yifa mndarm tamoh tamohm htanymm, ³⁰ tfit Bro Nkifrar wom 100 kfothu hutahi hanyrahm. Tfit htirahm bok yifa mndaretm, kuny rmonetm, tamoh tamohetm rhurahm. Nhai yak mmbra finyruhatm. Yo rom nda bbinysoft toh thombat bok yimam yihato yak bebrahmm. Kto Bro Najomrhu yawihnayuk yiharn tfit Bro Nkifrarprno toh nkifranirahm. ³¹ Arihart nyingako tohekwa yimam, kto tfit mongko yihom fnahnirahm. Nd mongko tohyukmn tfit nyingako mfahnirahm.”

Husfirpehyuk mrokfot Jisasr kfo memor, “Nohaforhoyann tfit sinyaruha.” (Matyu 20.17-19; Luk 18.31-34)

³² Jisasri turhu disaiperm memom, “Jerusalemko yirahnom.” Jisasr tohakmotr yo nd rorprno yaayuk yimam mongt tohnom. Turhu disaiperm inji htihato bok dukefm fakmom. Memom, “Ka Jerusalem thofm yak bebrahmr.” Wom yima furam nhaf inji htihato fanhomom. Jisasr turhu disaiperm yak hato turpathato kfo memorm, ³³ “Wawanyko, nom Jerusalemko yitahat, na Bro Najoma hrek kita prisroh bro yimami nkifra boririfhuthu tisaroh tirnm. Kmim rompno nakfo habofkniruhamn, yima tangimpno htarhotma, ³⁴ rom sinyahato kuninfar wuna kfo hutatpno kfo hutatpno yenyohrahma. Tfit wife wife yenyoh gurahma. Wife yenyoh guhato tfit yura bgre misn kihagir-rhotma nohruha. Nohruhoyann tfit husfirpehyuk marrpno tfit sinyaruha.”

*Jems Jonrof memof, bro yimano arhuno
(Matyu 20.20-28)*

³⁵ Sebedirhu yon husf, Jemsri Jonr, nd hus yonf Jisasrpnio yihato mkfo memofr, “Tisa, no kangno, nnoh wom dukeft bi akfo nuhas htatanonn.”

³⁶ Jisasr sinyahato kfo memorf, “Tamoh mrokfot yamukafn, akfo nuhasnonr?” ³⁷ Nd yon najohf sinyahato kfo memofr, “No kangno, ni kingn toh thofn no najo wayak htatwanno. Womr tirmifko wayak htatwanr, womrne kindonko.”

³⁸ Jisasr sinyahato kfo memorf, “Nifn nhai duka hik marnyahato ttiwonkahfna. Nd na yeruha krhoparoh kaft ka yenyho twanho mifrahfna? Yo na baftaisruha krhopa yakyuk baftaiskfof nifn yakrahfnt?” ³⁹ Kfo memofr, “Uwano.”

Jisasr kfo memorf, “Na yeruha kaft rot nifn yerahfnt. Yo na yakruha baftaiskfof nifn rot yakrahfn. ⁴⁰ Tmift nanhu kindonko yo tirmifko rhuyuk tkitt yak htaneftn, na nhai bi nanhu fijo kfo mekfot ni ndko rhurahn, yo ni ndko. Nhai. Tu Bro Nkifrarhu duka fijo fak hta nhombra htatamorm tkitm. Kto turhu hti fijo tkitm yak hta nhombra hi hanyrahm.”

⁴¹ Jon Jems najohf inji ttiwonmotfr tfit wom 10-pela disaiperm kfo hut memomf, “Tamohmpno ndhett ttiwon nmbuhat ttiwonwafnr?” ⁴² Jisasr rpat naku nhafoh bugamormn kfo memorm, “Niko bi htieteko, kingm yima tangim yakitohwohat. Yimam be nd tohak yimarhu yinhitn tohwom. Nhai womr finji tfit kfo pthakfot. Yimam be rorhu tngprat hikkfot. ⁴³ Niko mirahko nd neft ahiknom. Yimar kangr, ‘Tohukatohr atoha,’ nd yimar afo nikmoh hingrnanho yimar tohkfot. ⁴⁴ O kangr, tohak yimaya atoha, afo toh tario yimar tohkfot. ⁴⁵ To na, Bro Najoma niamohat, nhai nanhu rhu nmbuhat dukahato ndar bbinysoft niarmoyant. Nhai. Nikmoh rhu beb nmbuhat duka tanyhato niamoyant ndar bbinysoft. Nann ndar bbinysof thofroh fasoh fasoh nefm suh nanyorruhanm.”

*Jisasr yak marnyamo nyinga kunyjetr
(Matyu 20.29-34; Luk 18.35-43)*

⁴⁶ Yi yimomn Jerikot mfnahmom. Mfnahhato yonmari yima rifinyrpnio rpatn yuhre fau htany hanymomt kmi Jerikot. Nd kmitn wom nyinga kunyjetr yimar yihota yifembttn rhu hasomor. Nd yimar Timeusrhu yon Bartimeusr. Nd yimar yihotam rhuhat yihotat yau naffyuk yimam maruha tndaumourm. ⁴⁷ yihota yuhat rhuhat wanyak hanymorm yimam ptha hofhta hnamohat. Kfo memom, “Nasaret thof Jisasr niwur.” Ror inji wanyhato kfo nakuyafu memor, “Defitrhu tangishof Jisase, wayuhuwafna!” ⁴⁸ Inji kfo nakumotr wom yimam kfo thfamomr. Ror nhai wany yakiohato naku tmbhormor. Tfit wompam masat kfo nakuyafu memor, “Defitrhu tangishofe, wayuhuwafna!” ⁴⁹ Be Jisasr nd yimarhu naku tngt wanyhato be mtohmor. Mtohhato kfo memorm, “Nd na nakuta yimar wahnakomr.” Yimam yihato rim kfo memomr, “Mirahn adukaya. Wasinya. Jisasr ninn nakutr.” ⁵⁰ Be yudbat sinyanihato nd ror hmbremoa sakethat wathu hrur tanymortn Jisasrpnio yimor. ⁵¹ Jisasr htinyak hanyhato kfo memorr, “Wurene tamohmn nakuna?” Nd nyinga kunyjetr kfo memor, “Tisaye, kanga nyingam wayak marnyakahtna ayukatoha.” ⁵² Jisasr kfo memorr, “Nanhu nia mrokfot ni wanuhat ninhu bro dukeft nann htahato nakuna. Ndnetn wanju. Mirahn adukaya. Ninhu nyingam marnya-rahmn.” Be nd

yimarhu nyingam nhai wom kuknarmomr. Yudbat fukatoh dbtakumorm. Nd nyingam marnyamotmr Jisasr fau hikakni twanhomor.

Jisasr krhopam yakhato nohmor. Nohhato tfit sinyamor.

11

(Sapta 11-16)

*Jisasr king kanjo Jerusalem yimo yuhat
(Matyu 21.1-11; Luk 19.28-40; Jon 12.12-19)*

¹ Jisasri turhu disaiperm yimomn brbo Jerusalemtpno yorhwa Olifet kmi yihofr yorhwa kmi Betfageti Betanit mfnahmom. Ndha mhtahato hus disaipperf kfo tkrur memorf, ² “Ndar rihtita kmit warine hanyfn. Warine hanykahfn htirahfnr natifatayet donkiyenr. Nd donkiyenr nhai yimam tafi rhuhat hatone-rmomr. Nd donkiyenr wayak nyusakaknetwafn. ³ Yekwatfnr yimam ttiwon kangmfn, “Tamohmpno yaknitafnr?” wakfo wamitwafnm, “Bro Nungothetr hingernefetrn kfefitrno be yifrar kakni yahukanonr tfit yudbat yarim htanyrahr.” ⁴ Be ⁸ Rof yimofn mhtimofr donkiyenr kuny yifhatikthu yirawih mispno natifa htatayetrn. Be rof inji mhtihato nyusakaknamofr. ⁵ Yimam inji htiafo hanyhato ttiwon memomf, “Barefn, tamohmpno nd donkiyenr yaknitafnr?” ⁶ Kfo memomf, “Bro Yimar kfo tkrurefitrno kakniyahuknonr.” Be inji wanyhato kfo memomf, “Wayaknihefnr.” ⁷ Be nd donkir nyusakaknihato hanyhemofr. Jisarpno mhtahato tufhu rmontham yakmofnm donkirhu mongtn rhuyuk ktitt htamofm. Htanihato Jisasr mrhuhato yimor. ⁸ Rof yimohat yonmari yima rifhur ror htihak hanyhato turoh rmontham yakmomm, rorhu ziyuk yuhatn hta nyingtak-momm. Womm miyuhtam yak wokakhato ror ziyuk yihotatn htakmomm. ⁹ Jisasrhu nyingako tohakmo yimam yo mongko tohyuk yimam, romn kfo naku ptha hany memoum, “Wayindhorakkomr. Bro Nkifrar ayak marnyatwarr Brorhu yufatpno niayuk yimar. ¹⁰ Bro Nkifraye, nda nmoh bapem Defitrhu frika yuhat niayuk yimar king toh thoft wayak marnyatwanr. O tu tunga Nkifraye.”

¹¹ Be Jisasr kmi Jerusalemr mfnahhato Bro Nkifrarhu temperr rim fnahnihato temperrhu kuny rifhut rhuyuk tamoh tamohm hti htfas bugamorm. Marr bi miyak yifho buga hanyetrn be tfit fnahnimorn turhu 12-pela disaiperm yaknimorn Betaniko yimom.

*Jisasr fik tihat kfo memort, “Mirahn tfit yukha hir mifa.”
(Matyu 21.18-19)*

¹² Betaniko mhwi tanyhato ndwom dbha memom tfit anianom Jisasr buha myatinohmor. ¹³ Nndo kkof tohhato fik tihat htimort twettn. Ror memor, “Ka yukha hirwot.” Brbo yihato fukatoh hambro titamort nhai wom yukhayenm hirmomt. Yuhtam be sfno twabomrpam bommomt. Tu fik wormr atohr awi yukham hirmom. ¹⁴ Be nd fik tihat yukham hti hambrotihato nd fik tihat kfo memort, “Mirahn tfit yukha hirkahann yimam yukham ayak ayema.” Jisasr inji kfomohat turhu disaiperm wanyomr.

*Bro Nkifrarhu temperr maket htamoa kmim Jisasr yihato yak thumo yuhat
(Matyu 21.12-17; Luk 19.45-48; Jon 2.13-22)*

¹⁵ Jisasr Jerusalem rim fnahnihato rim htimorm Bro Nkifrarhu temperrn maket htamom yimam. Rim htihato maket htamoa yimami yeshrim wiknamao yimam hik tubatumorm. Hik tubatumormn maruha niyatu tuknamao teborm yo nunga ganyom mmkrm htamoa gajim nembos tubatu hikafmorm.* ¹⁶ Nd yiha yimaroh wiknayuk tamoh tamohroh temperrhu hiyau hafkneneft kfo rafomort. ¹⁷ Yak thunihato kfo memorm, “Bro Nkifrarhu rfa borngt kfo kangt, ‘Nanhu temperr nanhu kfo bruttnayuk kunys rhuraht.’ Tfit nikomn kangko rikoh yimaroh yi kafrohyuk tkitt arhut.”

¹⁸ Ror kfo pthamoa mrokfom met yindarim wany mohat mfha tha duhatm rhumom. Ror pthayuk mrokfom wany fanhomomm. Ndnnett prisroh bro yimami nkifra boririfhuthu tisam inji wanyhato kfo memorm, “Be wom yuhamn kfo nhehakhato wasrahnomr.” ¹⁹ Be krifnano Jisasri turhu disaiperm Jerusalem htanyhato yimom.

Rpa dukefrparpno ptha bruttnarahm tamohm ni kfoyukm yakrahnm (Matyu 21.20-22)

²⁰ Hwe nfha ndwom dbha Jisasri turhu disaiperm tfit yi hanyhato htimomt nd Jisasr kfo nambur mrokfot kfonimo fik tihat bi twa yuruf hasett. Memom nndo tohrn yitattt fokrta hmbrit. ²¹ Pitar nd mis htihato tfit dukamr Jisasr kfo memohat, “Nda mis miraht tfi yukha hirhato yimam yukham tmбра ayama.” Pitar nd mrokfot dukahato kfo memor, “Tisa, nohok nda mis kfo nambur mero, anohtwat. To wahti bi fokrtewut!” ²² Jisasr wanyhato kfo memor, “Nikmoh bro dukefm Bro Nkifrarpar htakfot. ²³ Na kfo mifwanko, nikmoh yima yuhum be tu rpa yima yuhur rhuhato ndar kmnysoft kfo mirahkomt, ‘Asomif nom kfiwunom marombtn wami-toh witani,’ to be htirahkom nd kmnysoft marombtn mitoh witaniraht. ²⁴ Nikmoh yima yuhum rpa dukefrpar rhuhato tamohm kfo bruttna kfo mirahko, ‘Nom asomif kfiwohat Bro Nkifrar wanukwarn nd nom kfo bruttnewa shrm htinomm.’ Inji dukahato kfo bruttnarahko, to be hti mifrahko.

²⁵⁻²⁶ Kangn, ‘Akfo bruttnaya,’ womm nayuk nefm afo mong trohkfot. Womroh nefm mong trohrahnm, tawo ninhu Yifemr hefenr tohwar mong trohhirahrn ninhu nefm.”†

Jisasr bro yufat yakmo yuhat kfo ttiwonmomr (Matyu 21.23-27; Luk 20.1-8)

²⁷ Jisasri turhu disaiperm tfit yimom Jerusalem. Yihato Bro Nkifrarhu temper kmifarn fknemimorn fau htfasmor. Yau htfas hanyetrn prisroh bro yimam yo boririfhuthu tisam yo Judaroh wom bro yimam fau yukato-haknimomr. ²⁸ Brbo yihato kfo ttiwon memomr, “Frohmn ndhtet bbuka rifhur hemomn? Frohmn bbuka rifhur hehato kfo memomn inji wanatwa?”

²⁹⁻³⁰ Tfit Jisasr sinyahato kfo memor, “Na to tawo tfit ttiwonwanko. Tone Jonr yimam baftaisimmoahate tu Bro Nkifrar kfomotrr ndhtet hingrneft hingrnamourt o be yima mifm kfomotmr yimam baftaisimmourm? Nd

* **11:15:** Wahti Matyu 21.12 yorhwa kfo nuhasyuk mrokfot. † **11:25-26:** Wom safemanm duka memom, tot wom mrokfo nmbuhah ndar veskfothut. Nd mrokfo nmbuhah inji kfiwut, “Nhai mong trohherfokomm rom nayuk nefm, to tawo niko nayuk tamoh tamoh nefenm nhai mong trohhiruhatrko nikmoh Bro Yifemr.”

ttiwon nmbuhat kanga wakfo nuhasakhtkma tawo kfo nuhasruhanko na hingrnewa hingrnefthu bbukeft yakmo yuhat.”

³¹ Rom inji wanyhato tfit tum nnakfo memom, “Nom sinyahato kfo mirahnomr, ‘Bro Nkifrarh kfo motrr hingrn timer, to tfit mirahnom, ‘To tamohmpno wany yakio duha yirmokomr?’ ³² To Jonrhu mrokfom bi profetm kanjo pthahato yimam bi wany hatohetm, tfit nom kfo mirahnom, ‘Yimaroh kfo tano kfo pthamomr,’ to be yimam sinyahato tat nohrhahnom.” ³³ Be myak nhtaktihato be kfo memomr, “Nom nhai tawisafkahnom.” Rom inji kfo motm tfit Jisahr kfo memomr, “Na to inji. Na nhai kfo nuhaswotanko na hingrnewa hingrnefthu bbukeft yakmo yuhat.”

12

Wain swirt tohukatohmo yima bebroh kfo nhombra mrokfot (Matyu 21.33-46; Luk 20.9-19)

¹ Jisahr bro yimampno wom kfo nhombra mrokfot yakhato kfo memomr, “Wom yimar wain swirt htamor. Wain tofm nuhtanihato gnat gna habrimort. Gnanihato muhr toumorr wain yukharoh yahot kembiftyukr. Ndt inji hingrnanihato tfit nd wain swirthu rhu yukatohyuk kumba kunyr hingrn timer. Be inji hingrna tanymortn wom yimam yakhato nd mswirthu tohukatohhato yukharoh nayak nhta yuham nayak dbkafhato ror be wom kmimn toh habrimor. ² Kto nd wain swirt yukha hirmott yukha yak yiharn nd tu wain swir tikatr turhu hingrna yimar kfo tkrurafmorr, nd wain swirt yakitoh hasoyuk yimampno. Kfo tkruraf memomr, ‘Waikahn nanhu yufathu htahayuk yukham wamiyahina.’ ³ Yihato nd mswirt tohukatoh hasoyuk yimam sinyamomn tabotafmotmr be sfnopa tfit yimor. ⁴ Be nd wain swir tikatr htiahtihato tfit wom yimar kfo tkrurafmorr. Nd yimar nhaf be rpahtet neft namomr. Mfhapako frddbithato faso faso kfo yimtna boyimtna tuhafmotmr be yimneftpno yimor. ⁵ Tfit womr kfo tkrurafmorr. Ndrne be wasmomr. Be wom wom yimam yimoahat be mifahotakmoum. Nd mswirt tohukatoh hasoyuk yimam sinyamomn womm tabotakmoum, womm wasmoum. ⁶ Wuroh turhu garbn yon mifr. Nd yonr be marbit htamourr. Duka memomr, ‘Tukanhu garbn yon mifr yiruhatre wany yakiorahmr.’ ⁷ Be nd yonr tkrurafmotrr yimor. Yimotr wain swirt tohyuk yimam htiahtihato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndarr wain swirt rorn yakraht. Finji dukewako? Awaskahnomr be nd wain swirt be nmohr rhuraht.’ ⁸ To be mrokfot nayak dbkafhato turhu wain swirt toh hasetrn wasakhato briaahako rim tuhafo tanymomr.”

⁹ Jisahr inji kfo pthanihato kfo memomr, “Niko to finji dukewako? To nd wain swir tikatr, turhu yonrhu was mrokfot wanynefte to finji naruharm? Na kfiwanko wain swir tikatr nieruharn nd yimam was hehur thuruharm tfit wom nndoh tkitthu yimam yakhato yak htarahrm nd mswirtn.

¹⁰ Wom mrokfot Bro Nkifrarhu rfa borngt yorhwat htitwokomt? Nd mrokfot kfo kangt,
 ‘Nd rahur, kamda yimam hti kurhato yak thumor,
 be bi tfit nd rahurn bi dany rahur tohwor.

¹¹ Tu Brorn inji hingrna hta bohtamotrr
 nom be inji htihato mrokfo duha korhonom.’ ”

¹² Nd nd mrokfom pthamotrm bro yimam wanyhato kfo memom, “Nd kfo nhombra kfot nomn niewut.” Jisasr pthamo mrokfom rom wany-mohat yima yuhumio bi nambur kih bugamomm. Memom, “Ka bi kak twanhiwunomr.” To nhai, yimam htihato afo fakrmemom yakneft. Duka memom, “Finji rinakrahnom, rom sinyaruhamn tabot nohrahmnom.” Inji dukahato fafho thu tanymomr.

Sisarhu maruha he yuhat
(Matyu 22.15-22; Luk 20.20-26)

¹³ Judaroh bro yimam sinyahato Farisimi Herotrhu politiker patikfot tohyuk yimam yakhato kfo memomm, “Nikmoh womm aikahkomn rorhu mrokfo ptha swirnm rhunhohato yuwi ttiwon rhtikfot. Finji finji kfiwur, nd ktittn yakhato kotimrahnomr bro yimampno.” ¹⁴ Be inji kfafmotmm yimom. Yihato yuwi ttiwon rhti memomr, “Tisaye, ni pthewa mrokfom nom hifa wanuknomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunm tuhan yindarim. Mrokfom kfo pthiwohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunm. Nhai yimar o yufam htihato kfo pthakahnm.” Inji kfonihato wom ttiwon nmbuhat yuwi ttiwon rhtimomr, “Nome ka Sisarhu takis htahenefte ka htarfonome nhai?”

¹⁵ Rom yuwi inji ttiwon rhtimohat Jisasr bi htimorm rroh dukefm. Htihato kfo memomr, “Tamohmpno inji ttiwon rhtitakma? Afo wom tahifat wayak nuhaskoma.” ¹⁶ Inji kfomotrm wom tahifat hemomr. Nd tahifat yakhato kfo memomr, “To nda tahifat yorhwa nyingatikte frohroh nyingatikti yufat yorhwaf?” Kfo memomr, “Sisarhu nyingatikte korhwott.” ¹⁷ Tfit kfo memomr, “Sisarhu nyingatikte korhwott to be tfit Sisarn hekfot. Bro Nkifrarhum nhaf inji. Tu Bro Nkifrar hekfot.” Inji kfo wokafmotrm be tuha mrokfo duhatm tohmom.

Sadyusim Jisasr ttiwon rhtimomr yimaroh nohnefti sinyaneft
(Matyu 22.23-33; Luk 20.27-40)

¹⁸ Farisim yimotm tfit Sadyusim yimom. Nd Sadyusiroh dukeft duka memom, “Noh hanita yimam nhai tfit sinyaruhatm.” Rroh dukeft inji rhumout. Nd dukeftpno Sadyusim Jisasrpno yihato mkfo memomr, ¹⁹ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpon yonm nasakhato tfit najomrhu ktim romn tohkfot. ²⁰ Wom yima najohfitpno to inji rhumot. Nd yima najohfit 7-pelakfot tohmom. Barkof bro najomr tuhan fakmor. Ror tuhan yakmohat nhai yonm nasak htanihatoh nohrmor. ²¹ Be nohmotr tuhan dhirt tohmott tfit rorhu wayakrn fakmort tuhan dhirt. Rorpno nhaf nhai wom yonm nasak htanihatoh nohrmor. Tfit rorhu mongko nuryukrn tfit fakmort nd tuhan dhirt. Ror yakhato be rpahtet nef. ²² Be inji nahany nahanysn 7-pela yima najohfit rhu nhombra bugamotm. Wuroh 7-yukrpnone nohmot. Nhai wom yufat kasinya-hermotm nd yima najohfi bugat. ²³ Nd 7-pela yima najohfit rpa metrpas rim rhuta mrhutamotm. Kto nd najohfit siny thoft nd mette fitoh yimarpno tohruhaf?” Inji ttiwon rhtimomr.

²⁴ Jisasr wanyhato kfo memomr, “Bro Nkifrarhu mrokfom yo rorhu bbukeftpno nd noheh yimam siny thoft ka mumiwuko. ²⁵ Wawanyko, nd

bi noh hanita yimam kto tfit sinya thoft nhai tfit tuhan yakruhatm. Nhai. Be inji sfno hefenrhu mounmotm kanjo tohrahm.

²⁶ Nd yimaroh nohhato sinya yuhat Mosesrhu tndht duka hanykfot. Wom yiha Mosesr Bro Nkifrar kahm kanjo mi bufupatn funamotr hti hanymorr. Bro Nkifrar Mosesr kfo memorr; ‘Nane Abraham, Aisak, Jekofroh Nkifraya.’ *Kis 3.6*

²⁷ Bro Nkifrar yima nfri yafothet yimaroh Nkifraye. Nhai noheh yimaroh Nkifrar rhukah: Nikmoh kfoyk mrokmom kfo mumiwuko.”

*Nyingako mtohekwa tu bro boririfhut
(Matyu 22.34-40; Luk 10.25-28)*

²⁸ Jisasri Sadyusim mrokmom nakfo nakfomoahat wom nkifra boririfhuthu tisar rhuhato wany yakitoh hasomourm. Sadyusim Jisasr kfo ttiwonmoatmr tfit Jisasr kfo nuhas marnyamourm. Ror inji wany hasohato ttiwon memorr; “Ndar nom wanuka boririfhum, fitoh boririfhutn nyingako tohekwa?” ²⁹ Jisasr wanyhato kfo memorr; “Nd nyinga tohekwa boririfhut inji kfiwut:

‘Niko Isrerko wawany marnyako, Bro Nkifrarpar nmoh Nkifrar rhukfot.

³⁰ Bror ninhu Nkifraye; ndnatn ninhu yuhuwaf marbi bugam, ninhu yafothat, yo ninhu yima yuhu bugam be rorparn htakfot.’

Lo 6.4-5

³¹ Yo ndwom boririfhutne:

‘Tunn yak marnyewa kanjo inji womm yak marnyakfot.’

Wkp 19.18

Nd hus boririfhutn tu bro boririfhu mifef.”

³² Be nd nkifrar boririfhuthu tisar inji wanyhato kfo memor; “Bro yimaye, ni tu tpiyet mrokmom kfiwun. Brorpar tor tu Nkifrar; nhai tfit womm. ³³ Nom be rorparn nmoh yuhuwaf marbi bugam, yima yuhum, bbukefm rorparn htakfot. Yo tunn yak marnyewa kanjo inji womm yak marnyakfot. Nd hus boririfhut tu fipetef. Rofn tohakhato tarioh mthaneft be yak tariokfot.”

³⁴ Jisas nd yimar kfomo mrokmom wany mohat, tu hifa duka tungunet yimam pthiwa kanjo inji wanymor. Wanyhato kfo memorr; “Ni bi brbohwo Bro Nkifrarhu kingdomkfo rhuneft.” Judaroh bro yimar wanyhato fakrmemom tfit wom ttiwon nmbuham ttiwonneft.

*Froh miyak htihakruharanom?
(Matyu 22.41-46; Luk 20.41-44)*

³⁵ Jisasr Bro Nkifrarhu temper kmifar tohhato tuhan yindars Bro Nkifrarhu mrokmom kfo nuhas hanyhato kfo ttiwon memorm; “Tamohmpno boririfhuthu tisar kfo yamukam, ‘Yimaroh minrfa htihakruharanom yima Kraiser; Defitrhu frikef yuhathu yimayer?’ ³⁶ Bingot Bro Nkifrarhu Yafothatn Defitr yima yuhur hemotr kfo memor; ‘Bror kfo memorr nanhu Bro Nungothet Kraiser;

“Nanhu bro bbukeft yorhwa tirmifko wamrhun.

Wamrhukahtn nd ni namburwa yahr kmim

afo ninhu tirtn htahato ninhu mofsinhitn yak htaruhanm.”’ *Sng 110.1*

³⁷ To nd yima Kraiser bi Defitr kfo yuta hna memoa; ‘Nanhu Bro Nungothet;’ to tfit Defitrhu frikef yuhat nierahr?”

*Nkifra boririfhuthu tisaroh fasoh nefm
(Matyu 23.1-36; Luk 11.37-54; 20.45-47)*

Bro met yindar rifhur rhuhatu wanyomohat nd Jisabr pthayuk mrokfom yindhormom. ³⁸ Jisabr kfo nuhas memorm, “You, niko! Boririfhuthu tisam yukatoh hik marnyaf hanykfot. Turoh yuke yuke saketham hmbrehato maket swirm yau hanyneft kangm, ‘Yimam be ayindhor amemnom, ‘Hifa dbha Rabai.’” ³⁹ Fitoh rhu rifinyhato kfo bruttnayuk rmonm rom nhai mongkorn o kimbohnko rim rhukfot. Tu be nhai mif. Rom tu be nyingako mruhakkfot. Bro yemro ye burwa tkittn nhaf inji. Rom inji yimaroh nyingako mrhu gngonakkfot. ⁴⁰ Met dhirrpampno yitamn mkfo nheh bonhehaknihato wuskenm kak rhoptakni yahukmm. Bro Nkifrarhu kfo bruttnaneft htirahnm. Nhahi be yudbat kfo tmbhoniruhadm. Yuwi kangm, ‘Akfo bruttna yukekahtnom yimam inji htiruhamnom mirahm, ‘Hifa yimayem.’” Kto Bro Nkifrar kotkfot yakitoh thoft nd yimamn be tu bro krhopam yakrahm.”

Maruha duha mett Bro Nkifrar maruham hemo yuhat
(Luk 21.1-4)

⁴¹ Jisabr nd Bro Nkifrar maruha mhtanihemoa tkitt rhu hasohato htiafom hanymourm yimam maruha mhtanimoahat. Nd bro maruhetm bro maruham htanimotr. ⁴² Rroh mongkorn wom met dhirpat niamot. Rothu ramemr nohmotr rot turpatt tohmotr. Rot nhai tamoh wuskam o tamohm. Rot yimotn wuroh tuthu yohriptom rhuyuk wuroh fsohot marufenf yakmotfn Bro Nkifrar maruha htahemoa tkittn nd marufenf htanihemotr. ⁴³ Jisabr inji htihato turhu disaiperm nakuyakhato kfo memorm, “Na kfo mifwanko, yimam nd htahani hany marufam nd metrpatt hte marufenf be tu bro marufaf htes. ⁴⁴ Wom womm htahani marufam, rom maruhetmn yak nhtemmn wom fam Bro Nkifrar hnahehato htahumr. Nd metpatt be tu nhai wom maruhenn kunykort. Tu wuroh yohriptom rhuyuk wuroh rpa toekfot Bro Nkifrar htahat. Rot nhai wom yeshri wiknayuk maruham wom rhukahmt.”

13

Bro Nkifrarhu temperrhu yoh nasoh yuhat Jisabr kfomor
(Matyu 24.1-2; Luk 21.5-6)

¹ Jisabr temper kmifar htanyhato turhu disaiperm-pmpno fau hanymom. Yau hanyhato wom disaiperr kfo memorm, “Tisa, wahtinr ndar temperrhu dborioh tahim yo temper kmifar tohyuk dborioh dborioh kunym.” ² Jisabr wanyhato kfo memorm, “Bare, ndar ni htita kunym nhai inji rhuruhadm. Yimam niahato kafring witarahmm.”

Jisabr kfomor bok kurhefn mfrfnahram
(Matyu 24.3-14; Luk 21.7-19)

³ Jisabr yura Olifet kmit muhato mrhumorn rihtimorr temperr. Ndha rhu hasetn Pita Jems Jon Andrurom turpam niahato ⁴ ttiwon memorm, “Nd ni kfi mrokfot fitoh yihar rhuruhatt htiruhamom? Tamoh neftn yak dukaruhattnom mirahnom nd yihar bi brbohwor?”

⁵⁻⁶ Jisabr kfo memorm, “You niko! Wanyrahko yimam yi htfasruhamn bok yimam kfo nheh bonheh htfasrahmm. Nanhu yufat yutahato kfo mirahmm, ‘Na bi asoya niko gari hasomo yimaya.’ Inji wanukko mirahko yudbat wany yakiohato amhikakinommm.

⁷ Nna yureft mano mano wanyrah-komt yo fitha fitha rhuyuk nna yureftu mrokfom wanyakrahkomt. Inji wanuknom, bi mirahko bok

dukefm ayaknom. Ndhtet nefm rom nierahm. To mirahko ka bi nd nefmpno bi brbohwor yihar. Nhai. ⁸ Htirahko yo wanyrahko wom kantrikfot sinyaruhatn wom kantrikfotpno nnarahf. Wom kingr sinyaruharn wom kingrno nnarahf. Wom kmim yatinoh wormr tohrahm. Wom kmim bro nunes toniraht. Nd nefm yironarah-komm yon fanet mett barkof riyak yironekwa kanjo.

⁹ Niko tuko duka marnyaf hanykfot. Tukmoh kaunsermpno mkotim-ruhatmko Judaroh rhu rifinyuk rmonmn hanyhato tabotrahmko. Nanhu mrokforoh yimaroh ptha nuhas hanyeftn gafmanm, kingm, nd nd yimaroh tirmn htarahmko. Nd tkittn nanhu mrokfot nd bro yimam kfo nuhasrahkomm. ¹⁰ Nd gutnius mrokfot afo yuht kantri bugat afo wany bugarahmt. Bi wany buegmet, ee btn nd yihar nierahr.

¹¹ Fitha kot swirm hanitwomko mirahko yakrmihato akfo amanyom, ‘Amai, na finji kforuhoya?’ Mirahn inji aduka yanhoya. Bro Nkifrarhu Yafothar mrokfo ptha dukefr hirahrn. ¹² Najohfi yagnm tum nahndhnarahr. Womr sinyahato womr hndhnaruhatrr wasrahmr. Nitohfim nhaf to inji. Yifemr sinyahato yinemr hndhnaruhatrr wasrahmr. Yinemrom nhai yifa-mmampno nayak marnyaruhatm. Yinemrom sinyahato yifammam hndhnaruhatmm wasrahmm. ¹³ Nann hikruhatko yimam nhai hifa nyingar hta hakuruhatmko. Be faso hti sr thurahmko. Fitoh yimar toh bmtahany toh bmtahany bbinysofthu bati yihar mfnahr, nd yimar Bro Nkifrar yakrahrr.”

Jerusalemrhu yak bati yihar
(Matyu 24.15-28; Luk 21.20-24)

¹⁴ Jisasr kfo memorm, “Wahtiyaf hanyswako. Bro Nkifrarhu temperrhu kforafet kforafet tkitm bi wom hhrek shrr bi rim yorhtrm nd temperrhu Tahi Yarhr bbnarofakhato fnahnir, to be Judia profins tohyuk yimam mirahm wom atoh hasonom, yura kminyinsofko ayakrmanyitwam. (Yimar mrokfom htivyukr hti hik marnya hanyhato mrokfo yimbu yuham yakkfot.) ¹⁵ Yimar bi kunyshu wom yura ken tikrko wurhu mska hasir, mirahr tfit yiro mmem kunyko ayohnikahann wuskam arimaka. ¹⁶ Yimar bi mswirko yirn ndko tohwor, mirahr tfit kmiko aikahann turhu yuke hmbreshat afo tfit ai ayaka. ¹⁷ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwafekt korht. ¹⁸ Bro Nkifrar kfo bruttnahato mirahr nd bro krhopam bro gonng wormrn arhukahtm yimam nd yiharn ayakrmem. ¹⁹ Nd nefn nia thombat mirahko ka tefi tefi kurhefm rhurahr. Ndar bbinysoft trhanimohat nhai ndhtet krhopam rhurmom. Yo ndar toh hniwa yiham nhai ndhtet kurhefm htikahnom. Yo kto nhai ndhtet kurhefm wompam rhuruhatm. Be tu bro bro krhopam tohrahm. ²⁰ Nd kurheft rhu hany Bro Nkifrar nhai bmbri yak nohrfort, be yima bugam nd kurheft ye wus batirahtm. To nhaft Bro Nkifrar tfit dukarahr tur bi kfo htayuk yimam. Romn dukahato nd krhoparoh tohyuk yiham tfit yak kkopenrahm.

²¹ Nd yiha wom yimam kfo mirahmko, ‘Barenko, nd Bro Nkifrar kfo htamo minrfa htivyakyuk yima Kraistr bi asor, asha.’ Womm kfo mirahm, ‘Usor, usha.’ Inji wanyrahko, mirahko awany yakionomm. ²² Womrne inji narahr. Mirakerkfot hingrnaruharn kfo mirahr, ‘Na asoya niko toh gari hasiwa minrfa htivyakyuk yima Kraisa,’ o kfo mirahr, ‘Na profeta.’ Inji

kfohato wonk wonk mirakerkfot hingrnarahm. Yuwi mirahm, ‘Tu Bro Nkifrar kfo htayuk met yindarim frnhehakhato ahikmnom.’ ²³ Ndnettn duka marnyaf hanykfot. Kfo duka mrokfom bi kfo duka htiwanko.”

Bro Najomrhu yawihna yihar
(*Matyu 24.29-31; Luk 21.25-28*)

²⁴ “Nd bro kurheft rhuniruhatt ee htirahko marr rim noh kfirahr; nhai wom taruhatt. Yamt nhaf inji. Rothu nukeft rim fnahniraht, nhai wom taruhatt. ²⁵ Gunym rom nhai mount rhuruhatm. Rom be wuy-ohninehato misuhrahm. Mount thu habokknamo yifonm mirahm nndo ginunes kekwo tm. ²⁶ Ndtppo ee btn Bro Najomr htiyakrahmr gribpamn hawihnerahmr. Ror yawihna thombat turhu bbuka rifhur yo ror hatoh hneruha nukeft mirahm nndo marrn yifa tohhnewur. Inji htiyakrahmr. ²⁷ Ror yawihna thombat mounmotmn kfo tkrurafhwatr romn tur bi kfo htiyak yima bugam yak nhafoh htfasrahmm.”

Kutr hti hikkfot
(*Matyu 24.32-35; Luk 21.29-33*)

²⁸ Jisars kfo memorm, “Kutr htitwonomr, twam hukteyum kfo kangnom kut yinr tohrah. ²⁹ To be inji hti nhtakrahkomr Bro Najomrhu nia yihar. Bi nd nd nefm htitwoko, wakfo wamitwoko, Bro Najomrhu nia yihar bi brbohwor. Yifhatikt bi tohwor. ³⁰ To nd nefm rhu thoft to mirahko arihat tohwa wom yimam bi nohetmn nd neft rhuraht. Nhai. Arihat wom tohwa yimam yuhre tohetmn nd neft htirahmt. ³¹ Nd neft rhuneft htirahko mounti bbinysoft mibatindirahf. Nanh mrokforpat nhai mibatindiruhatt.”

Nd nefroh rhuyuk yihar nhai wom yimar tawisafkahr
(*Matyu 24.36-44*)

³² Jisars kfo memorm, “Nd na kfiwa nefroh rhuyuk yihar nhai wom yimar tawisafkahr. Mounmotmi Bro Najomr rom nhaf nhai tawisafkahr. Tu Bro Yifemrpar tawisafwort.

³³ Niko nhai tawisafkahko nd nefthu rhuyuk yihar. Ndnettn niko be duka marnyahato hti yukatoh hasokfot. ³⁴ Nd neft wom yimar kunys htanyhato warkmit yita kanjo inji rhuraht. Kuny sikatr kunys htanyneft hingrna yimam rpa rpa hingrnefm kak htanyworm, kuny yifhatikthu tohyukr kfiwurr kunyshu yukatoh marnya hasoneft. ³⁵ Ndnettn niko be yimbhindangm tohetohaf hanykfot. Nd kuny sikatr ka krifn o yifung o ka dbha ksfut nierahr. ³⁶ Miruhatt tfit yudbat ania, mirahn hwe haseta amihtira. ³⁷ Ndar na kfiwa mrokfom yuht met yindari bugam kfiwa. Niko buga difronhato hti yukatoh hasokfot.”

14

Jisarsru was yuhathu mrokfot bro yimam rhu pthamo yuhat
(*Matyu 26.1-5; Luk 22.1-2; Jon 11.45-53*)

¹ Yispa hta duha bretparoh ye yiharhu barkof yihar, kutewumr Pasofa burwa yihar,* nd yihar bi brbohnetrn prisroh bro yimami nkifra boririfhu tisam tum rhu rifiny-hato Jisarsru hndhna nnehakhato was yuhathu

* **14:1:** Isrerm Ijift tohhato Bro Nkifrar miyak htiyakmo yihar kutamoumr Pasofa burwat, nd yihar rhu rifinyhato tfit kedukamoumr Isrerm Ijift htany mohat. To nd Pasofa yihari wom 6-pela yiham yispa duha bretpam kamoum.

mrokfot nafak dbkafmomt. ² Kfo memom, “Nd bro Pasofa burwa yihar mirahnom awasnomr, to be you muht kanjo watanhehakrahnom. Bi kmi kmi nia rifinyetmn to be romn wahiyafrahnom.”

Wom mett Jisasrhu mfhat mfro mtha yahrnyet welpaye yuk wunamo yuhat

(Matyu 26.6-13; Jon 12.1-8)

³ Jisatr Jerusalemr toh tanyhato Betaniko yimor. Yihato Saimonrhu kunys yi tohmor. Saimonr bingot lepra dbohneft yakmotrn to bi frtrufnimot. Nd Saimonrhu kunysn nuwa ye hasetrn wom mett be tu dborioh mtha yahrnyet wel botort hnamot. Nd wel botort frtfnamottn nd bro maruhaye wiknamo welpaye Jisasrhu mfhat fuk wunamotr. ⁴ Nd mett Jisatr welpa wunamo yuhat yimam htihatoto tum nnakfo memom, “Tamohmpno nd mett welpam be wurasoh furetm? ⁵ Nd wel botort yimam 300 silva maruhaye wiknarfotmt nd maruham yakrfonomm herfonom nd maruhapa duha yimam.” Inji kfo huttmomt. ⁶ Jisatr memorm, “Inji akfowahkomt. Rot tu dborioh neft nita. ⁷ Nd niko kfiwa maruha duha yimam, rom nhai fitha yiruhatm. Kangko, fitoh yiha ahti dukanomm, nhai mrokfom. Na, na nhai wom tohnhorhotanko. ⁸ Nd mett ka tamohr bi kfo memort, ‘Yima gur welpam wunefiwa kanjo welpam bi wayuk wunafokahtnr yopt yirahr.’ ⁹ Na kfo mifwanko gutnius mrokfot kfo ptha habrineft, ndar mett nefineft nhaf kmi kmi kfo ptha duka htasrahmt.”

Judasr kfo fakiomor; Jisasrhu hndhna yuhat

(Matyu 26.14-16; Luk 22.3-6)

¹⁰ Nd yiha 12-pela disaiperrhoh wom disaiperr kutewumr Judas Iske-riotr prisroh bro yimampno yimor. Yihato kfo memorm, “Inji inji hndhnaruhanr.” ¹¹ Nd bro prism wanyhato yindhormom. Yindhorhato kfo memorm, “Maruha hirahnomn.” Judasr wanyhato yima yuhur fak nhtamourr Jisasrhu hndhna yuham.

Jisasrhu hus disaiperrf yeshrim hta mskamo yuhat

(Matyu 26.17-25; Luk 22.7-14; 22.21-23; Jon 13.21-30)

¹² Be rhumomn nd yispa hta duha bretpam yeyuk yiharoh barkof yihar niamor. Nd yispa hta duha bretpam yamoa barkof yiharn Pasofa sifsifr washato ndr tarioh mthamoum. Nd yihar disaiperr Jisatr mkfo ttiwon memorm, “Nd Pasofa burwat rhu thombat, nome yeshrim fitha hta mskaruhatnom ni ruhato ye jukaruhant?” ¹³ Jisatr turhu hus disaiperr kfo memorf, “Waikahfnn tauntn wom yimar burioh roht titetprno mnafuryakrahko. To be mirahfn finji ainyo. Rorn wayau hikaknitwafn. ¹⁴ Ror fitoh kunys kitwor, nifn nd kunys yikfot. Fknenihat nd kuny sikatr wakfo wamitwafnr, ‘Tisar kfo famur, “Waikahfnn nd kuny shofr ayak nuhastwarfn nani nanhu disaiperrmpno Pasofa burwa yeyuk tkitt.’” ¹⁵ Inji wakfo ttiwonkahtfn yurakorhof rumt yak nuhasahrfn. Nd rumtn mhtirahfnn tebor gaji nd ndm. Ndharn wahta mskatwafn. Nom nierahnom.” ¹⁶ Be rof yimofn nd Jisatr kfomo yimar kmi yifhatikt n toh hasetr mhtimofr. Ror yimo kunys yimof. Nd nd nefm be Jisatr kfomo tng yuhatn hti bugamofm. Be ndharn ruhato hta mskamofm nd bro yiha yeyuk yeshrim.

¹⁷ Yifungnano Jisatr turhu disaiperr mfna hti bugamotm nd hus yimaf hta mskamom hasomo yeshrim ruhato famomm. ¹⁸ Ye hanyhato Jisatr kfo

memorm, “Na kfo mifwanko, nikmoh womrn hndhnarhotra wasrahma. Tor asha kenuhiwurnom na hndhnaruhar.”¹⁹ Be inji kфомotr disaiperroh yima yuhum foh tmbhonimomm. Rpa rpa sinyahato kfo ttiwon memour, “Ni kfihat frohmn inji naruhamn? Ka nann?” Tfit womr sinyahato kfo memor, “Ka nann?” Womr, “Ka nann?” Womr, “Ka nann?”²⁰ Jisr kfo memorm, “Tor womr korhnuhiwurnom. Nd yimar bretpat yaknhohato wain bupayet dis tayifaknuhir, tor nd yimarn hndhnarahra.”²¹ Bro Najomr kangr anoha, ndt mrokfo duhatet. Rorhu noh nmbuhathu mrokfot bi nkifrapno kfo tndh hnetn nhai finji kforuhatt. Tmift nd Bro Najomrhu yak hndhna hanyuk yimarne kanga fitoh yuhat yiruhar? Mmemt hiyau duha rhurmotr.”

*Jisr disaiperm bretpa, wain bupa hemo yuhat
(Matyu 26.26-30; Luk 22.15-20; 1 Korin 11.23-25)*

²² Nuwa ye hasohato Jisr bretpat yakmortn Bro Nkifrar wukfo yindhornimormn yak tif nhombrahato disaiperm he nhombrahi hanyorm. Kfo memorm, “Nd bretpam wayak wayakomm. Ndm nanhu nmpayem.”²³ Wain bu kaft yakmort nhaf Bro Nkifrapno kfo yindhornihato tengot nhombra he bugamotrm famomm. ²⁴ Kfo memorm, “Ndar wain bu kaft tfit niko yekwat nd nfri yihotar hingrnaruha hingrnefet. Kto na nohhatu nanhu kkut yohni thombat nd kkupamn nd nfri hingrneft be yak dbkafrahtt. Be tawo nd nfri hingrneft wahiktawo.”²⁵ Na kfo mifwanko, na nhai tfit wom wain bupam yerhota. Bro Nkifrarhu kingdomkforpatn tohhato ee btn nfri wain bupam tfit yeruha.”²⁶ Be wuroht, windoht windoh trufnihato be tfit Olifet kni yorgko yimom.

*Pitar mong trohruha nmbuhat Jisr kfo pthamor
(Matyu 26.31-35; Luk 22.31-34; Jon 13.36-38)*

²⁷ Olifet yorgr mfnahhato disaiperm Jisr kfo memorm, “Bro Nkifrarhu rfa borngt kfo kangt, ‘Tohukatohr wasaknirhotanr sifsifm natubaturahm.’”^{Sek 13.7} Nd mrokfot bi ruhetn niko bugako na finji naknewuma, kakrme trohwokma.

²⁸ Tfit sinyaruha. Sinyahato na bi Galiliko tohak hanyruha.”²⁹ Pitar wasinyahato memor, “Ndar wommn wakfo. Romn buha msuhtahato mhik htafrahm. Na nhai mhik htafrhotann.”³⁰ Tfit Jisr memorr, “Na kfo mifwann, hrek yifungnano krirhu husyuk naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisr.’”³¹ Pitar sinyahato kfo memor, “Be tu nhai mif. Na kanga, ninpno anoha, to nhai tfit kafrohrhotant ninhu yufat.” Pitar kfomo yuharpat wom wom disaiperm rpa yuharpat kfo ptha hikmom.

*Jisr Getsemani swirtn kfo bruttnamo yuhat
(Matyu 26.36-46; Luk 22.39-46)*

³² Jisri disaiperm afo Olifet kmit tohetmn yimom wom tkitt kutewumt gaden Getsemani. Ndha Getsemanit mfnahhato Jisr kfo memorm, “Asha afo warhu hasoko. Na afo Bro Nkifrar rim kfo bruttnefiwa.”³³ Pita Jems Jonrompno yimom. Yihato Jisrhu yima yuhurio nhai marnyarmorr. Yima yuhur be nur dungunangu yima yuhurpno rhumour.³⁴ Be yima yuhur yak nhombratihato kfo memorm, “Yima yuhur be nd nur dungunangu yima yuhur mtakihwotra kanga be amyakniya. Asha warhu

hasoko. Mirahko ahwanyom.”³⁵ Wunye kkofmorn bbinysoft msuhhato kfo bruttnamor. Memor, “Akfo bruttnakahta nd krho mis nhai yakrhotta.”³⁶ Kfo bruttna hanyhato kfo memor, “O Dajaye, ndar bbinysofthu yimaroh fasoh nefm na be hta krhorhotma nann nohruhanm. Bi brboh Watt kanga akfoyann. Nd krho mis na yakruhat kangn ayak tuhant, be hifa, na yindhorwa. E nhai, kangn ayakrt, be nhai mrokfom, yakruhant. Na be ninn yukatohruha. Kangn, finji anaya, nhai mrokfom.”

³⁷ Inji kfo bruttna tanyomrn tfit yimor nd husfirpa yimam rhu hasomo tkittn. Yihato yihom htimorm hwi hasetmn. Rim tohhato kfo memorr Pitar, “Saimone, nine aso hwitn? Nhai rpa auakfot afo ruhakkfot?”³⁸ Niko sinya ruhato kfo bruttna hasokfot. Hwe rhu fura hasorahko, to be tamoh nefm mfrnhehrahmko to be suhrako. Yima yuhur sinyarahr finji na finji nanef, to thatipt, fitha bbukeft yakruhat?”

³⁹ Be inji yihom kfo tanyomrn tfit yimorn tur kfo bruttnamo mrokfom wompam kfo bruttnamor.⁴⁰ Tfit wompam nhaf niahato yihom htimorm nyinga krkotakhato hwe hasetmn. Yihom htihato tfit yihom frthumorm. Yihom frthumotrm mfhtas sinyahato nhai hifa yima yuhum yakrmom pthayukm.

⁴¹ Ror inji yihom hti tanyhato tfit yimor. Yimorn tfit niahato rpahtet nef, yihom htihato kfo memorm, “Barenko, nikome asoko yuhre hwe tokr hasiwuko? Be tmift nd hwe tokr hasoneft. Wawanyko. Yihar bi asor. Bi na Bro Najomanhu fasoh fasoh net yimaroh tirroh yi yihayer bi.

⁴² Wasinyakahtko riyahnom. Wahtiko, nanhu mhndhnakyuk yimar tor bi niewur.”

*Judasr yihato Jisasr mhndhnakmo yuhat
(Matyu 26.47-56; Luk 22.47-53; Jon 18.3-12)*

⁴³ Jisasr yuhre ptha haso hanymor, rorhu yakyuk yimam mhatohmomt bainati mhrrs. Tu Jisasrhu disaiperr Judasrn hatohakmorm. Prisroh bro yimami nkifra boririfhuthu tisame Judaroh bro yimam, kfo tkurumotm Judasr hasinyamorm.⁴⁴ Nd Jisasr hndhnakyuk yimarn bi kfo hta bohta memorm, “Wahtiyafu hanyswokma. Na yauyaknihato fitoh yimar mki-hendhoraknitwa, wamitwako, tor nd yima Jisasr. Ee inji bi htitwokma, nd yimarn yauyaknihato yakkfot. Yakhato be yima tire hanyruhakomrn bro yimampno hanykfot.”

⁴⁵ Be nd Jisasr rhumo tkitt mfna-mohat, Judasr yauyaknimorn Jisasr rim kihendhoraknihato kfo kangrr, “Tisa.”⁴⁶ Be yimam yauyaknihato tirtir fakmorm.

⁴⁷ Rom fak hanymomr, Jisasrpn toh hasoyuk disaiperr mhti namburnihato bainat watuhakmorn ka prisroh bro tohak yimarhu hingrna yimar bainate yimbhindangt frubafmotrr misuhmot.⁴⁸ Jisasr sinyahato kfo memorm, “Barenko, nane raskor yimam kanjo bainat, mhrrs hasinyahato nia kekwokma?”⁴⁹ Na yiha yiha Bro Nkifrarhu temperr yorhwa kmifat tohhato met yindarim mrokfom hemoahat nhai niko inji yihato hfna-haknirmokma. To nhai mrokfom. Ndar niko niwa nmbuhat nhai finji kforuhatnom. Bi profetmn mrokfot bi kfo hnetn to be bi rhu hikwot bi.”

⁵⁰ Nd turhu disaiperr htimom bi Jisasr kak hasiwumre, rom fakrme troh tanyomrn.

Wom yima damiagr yakrmemo yuhat

⁵¹ Wom yima damiagenr ganyom hmbresha wondhetr Jisasrn hik hanyomor memom, ka yakrahnom, ⁵² to nhai, yakrmiyakhato hmbreshat thu brhoh tanyhato sfno bmbombrohr fakrme fnahmor.

Jisasr kaunsermpno kot tohmo yuhat

(Matyu 26.57-68; Luk 22.54-55; 22.63-71; Jon 18.13-14; 18.19-24)

⁵³ Nd Jisasr yakniyuk yimam hanyomorn tu nd prisroh bro tohak yimarhu kunysn hanyomorn. Nd kunysn prisroh bro yimam yo Judaroh bro yimam yo nkifra boririfhuthu tisam rifinymom. ⁵⁴ Pitar, ror be nhowi mongkongotn fau ss hik hanyomorn. Bi prisroh bro tohak yimarhu kuny kmifarn bi hanitwomre, ror be nhowi yimorn Bro Nkifrarhu temperr tohukatohyuk yimampno brbo kahtpno haunyomour.

⁵⁵ Jisasrhu kotkfof yakitohyuk bro prism yo Judaroh kaunserm fak hambromoum yimam. Memoum, “Wom yimam ayakkahnomn romn wom kfo wok mrokfom htaruhatmm Jisasr wasrahnomr;” to nhai, wany sitamomm. Rroh mrokfom nndo nndo pthamomm. ⁵⁶ Yimam be yuwi furahato pthamoa mrokfom, womroh mrokfom nndo yimoum, womrohm nndo. ⁵⁷ Wommn kfo wok fura memom, ⁵⁸ “O nomn wanymonom kfo memor, ‘Bro Nkifrarhu temperr yak tasohruhoyanrn tfit husfirpa yiharpa tfit kasinyaruhanr. Kasinya thoft nhai yima tire hingrnaruhatr.” ⁵⁹ To nhai, nd nd mrokfom rom pthayukm nhai be rpa mrokfo yuhat ptha hikrmomm. Womm nndo ptha-moum, womm, rom nndo pthamoum.

⁶⁰ Jisasr nd yimam pthamoa mrokfom wanymoahat nhai kfo wokrmorm. Ndnnetn prisroh bro tohak yimar sinyahato Jisasr kfo ttiwon memorr; “Tamohmpno ndar rom kfiwa mrokfefm be rhuhato wanukanm? Waptha!”

⁶¹ Jisasr nhai ptharmor.

Tfit wompam kfo ttiwonmorr; “Ni asone nda bbinysofthu yimaroh minrfa htiyakuyk yima Kraiss Bro Nkifrar nd kfo tkrurafmor? Ni nd Tunga Nkifrarhu Yon mife?” ⁶² Jisasr wasinyahato kfo memor; “Na to tawom nda. Htirahkoma na, Bro Najoma, tfit bro hta nngrajohet Nkifrarhu tirmifko rhuhato gribpamn hawihnerahmr.” ⁶³ Jisasr inji kfomotr prisroh bro tohak yimar inji wanyhato rorhu yarim ruhakyuk hmbreshat teh dborfamort. Teh dborfahato kfo memor; “Mirahko tfit wom yimam anakukahnomn nda yimarhu nefm ania apthanom. ⁶⁴ Bi wanukomr kfo yamuhat, ‘Na Bro Nkifraya.’ To finji dukewako? Ndar yimare finji naruhanomr?” Tfit nd kot tohyuk yimam kfo memom, “Nd yimar bi mrokfeter anohtwar.”

⁶⁵ Be inji kfonihato tuha kuninfar bokuninfar thumomr. Nyingatikt rmonthaye kitasiftahato tire frsrfa bosrfamoum. Frsrfa hanyhato kfo ttiwon memoum; “Nd ni frsrfiwa yimame frohem?”

Pitar kfo memor; “Na nhai Jisasr tawisafkahanr.”

(Matyu 26.69-75; Luk 22.56-62; Jon 18.15-18; 18.25-27)

⁶⁶ Pitar kuny kmifarn kah haunyo hasetrn bro prisrhu wom hingrnayuk mett mhtimotr. ⁶⁷ Mhtihato kfo memotr; “Ni to aso womenn Nasaret thof Jisasrmpno tohno htfasmoa.” ⁶⁸ Pitar sinyahato kfo namhi memor; “Bare, nann yari yutewun. Na nhai tawisafkahanr.” Pitar inji kfoni hanyhato kmifathu getkfofn yihom tohmor. Ndha yihom toh hanyomr krir nakumor. ⁶⁹ Toh hasetrn tfit nd bro prisrmpno hingrnomoa mett ndha yihom htimotr. Yihom htihato nd brbo toh nafif htfasmo yimam kfo memotm, “Asor womenr Jisasrmpno nd toh htfasmoar.” ⁷⁰ Pitar tfit wompam kfo namhimor.

Kfo namhimotr nd toh nafif htfasmo yimam toh hanyhato kfo memomr, “Bare, ni aso rroh womenn. Ni Galili thofe.” ⁷¹ Pitar tfit wasinyahato kfo memor, “Na tu be kfo mif mifwanko, na nhai mif tawisafkahanr nd niko kfiwa yimar. Na kfo furewane Bro Nkifrar yak tutfarahra.” ⁷² Inji kfo hanyomre, ee tfit wompam krir nakomr. Krirhu naku tngtpno Pitarhu yimbhindangm ndnatn tuppomomr. Tuppohato yima yuhur tfit niamotr tfit dukamort Jisasr kfomo mrokfot. Kfo memor, “Hrek yifungnano krirhu husyuk naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’” Nd mrokfot dukakhato tuha rim nur kaugomor.

15

Pailatrpno Jisasr kot tohmo yuhat

(Matyu 27.1-2; 27.11-14; Luk 23.1-5; Jon 18.28-38)

¹ Dbha ksfutn prisroh bro yimami Judaroh bro yimam, yo nkifrar boririfhuthu tisam, yo wom kaunser bugam rhu rifinyhato Jisasrhu kotim yuhat naphthanom. Naphthahato memom, “Pailatru tirtn htarahnomr.” Mrokfot nayak nhtamomtn mti baklain tofe kimomr. Kiyakhato Pailatrpno hanyomomr.* ² Pailatrpno mtomotr kfo tiwon memomr, “Nine Judaroh kinge?” Jisasr memor, “Uwa. Mrokfot to bi kfo twanhiwunt.” ³ Prisroh bro yimam ritohhato wom kfo wok mrokfom tumomm. ⁴ Pailatr kfo memomr, “Bare, ni wanuknm nd yimam ninhu yufatpno mhfnahniwa mrokfom? Tamohmpno ndar kfo wok bowokwa mrokfom tawo kfo wok duha yitanm?” ⁵ Jisasr nhai wom mrokfom ptharmor. Pailatr inji htitihato duka nhi memor, “Arr tamohtet yimarn nhai kfo wokkahrm?”

Pailatr kfomor Jisasr yura bgre misn anohr

(Matyu 27.15-26; Luk 23.13-25; Jon 18.38-19.16)

⁶ Pasofa burwa yiharn kalabus tohyuk wom yimar Judiaroh gafanar kak thu hnamourr. Tu kmi thofmn fitoh yimar yibonwom yak tuhafoneft, yufat yutamomtm, nd yimar kak thumour. ⁷ Nd kalabus htamo yimam gafmanrpno wom yahrt rhumott wom yimam nambur tonehato yima wasmom. To nd yimam kalabus htamomm. Nd yimaroh wom yimarhu yufat Barabasr. ⁸ Nd Pasofakfot yi rifinyuk yimam yi rifiny bugahato Pailatr kfo memomr, “Ni tu Pasofa yiha na hakuta kanjo hrek inji wana.” ⁹ Pailatr mtohnihato tiwon memomr, “To finji dukewako? Nda Judaroh kingr kangko ayak tuhafoya?” ¹⁰ Jisasr be prisroh bro yimam kfo wok furahato kalabus htamomr. Ndnetn Pailatr ndhtet kfo tiwon mrokfot htamort. ¹¹ Prisroh bro yimam bi kmi thofm kfaf hany memomm, “Wakfo naku wameko, ‘Pailatr Barabasr ayak hfhanafor.’” Be nd bro prisroh kfomo yuhat kfo hikmom. ¹² Pailatr wanyhato tiwon memomr, “To nd niko kfo yamuka Judaroh kingr, nd yimare finji naruhoynr?” ¹³ Nd yima rifhur tohmor wanfak wanfak memom, “Bgre misn wakihegirkomr.” ¹⁴ Pailatr memor, “To tamohmpno? Finji namotr inji naruhoynr?” Tfit mrhuni mrhuni memom, “Bgre misn wakihegirkomr.” ¹⁵ Be Pailatr memor, “Rroh yima yuhum ayak marnyayanm.” Ndnatn Barabasr yak tuhafmorrn

* **15:1:** Nd yima Pailatr Rom thofer. Tu Rom thofmn htamomr Judaroh gafanar. Tu Judaroh kotkfot tohyuk yimam nhai bi wasmoamm, afo tfit Pailatrpno hanyomomm. Ndnetmn Jisasrhu waskfot kfomohat tu Romm htayuk Pailatrpno hanyomomr.

tfit Jisasr yakhato soldiaroh tirm htamorr. Memor, “Romn wife wife tabotakhato bgre misn kihegirrahmr.”

*Soldiam Jisasr kfo tfar botfarmo yuhat
(Matyu 27.27-31; Jon 19.2-3)*

¹⁶ Soldiam Jisasr yaknimomrn hanymomr mrokfo yakitohyuk tkitrn. Nd tkitr hanyhato soldia bugam yi rifiny bugamom. ¹⁷ Ror hatohmo hmbresham fak rhoh bugamomrn tfit kku kkorpa kanjo fnhuyet rmonthar thu kasimomr. Yo soldiam huhra mtitoft yakmomtn kingroh mfham hatohwa yabisoht kanjo yakkemomtn mfhatn wathu hamsismomr. ¹⁸ Yo yon mumenm kanjo wukfo tfar botfar memomr, “Woi, Judaroh kingr.”† ¹⁹ Inji kfo tfar botfarmoamr yo kuninfar thumomr. Yo tirt yakitohyuk mis dhemot, ndt tfit yak hutfakmoamr mfhapako warbigmoumr. ²⁰ Nd kfo tfar botfar tonemomrn yo tfit nd kku kkorpa kanjo fnhuyet rmonthar yakta thumomrn tfit turhu hmbresha mifm hmbremomr. Hmbrenimomrn hanymomr bgre mis tuhegiruyuk tkittn.

*Jisasr bgre mis tu hegirmo yuhat
(Matyu 27.32-44; Luk 23.26-43; Jon 19.17-27)*

²¹ Kmi rim fnahnitm htihakmoumr wom yimar. Nd yimarhu yufat Saimonr, Sairini thofr. Aleksanda Rufusrofhu yifemer. Nd yima Saimonr memor, “Taunko aiya.” Soldiam ror yakmomn nd Jisasr tita hanymo bgre mis rorn tfit wathu titafmom. Rorn tita hanymort.

²² Jisasr soldiam yakni hanymohat hanymomr wom tkitt kutewumt Golgota. (Kfe sfiohnyet yima mfham kanjo nd tkitt rhumoatt futamoumt yima mfha tpit.) ²³ Memom wom marasinm wainpampno bi rpat yak tahmor hmbriyetm Jisasr ahikahtnomr yeruharn nd frtekr botkermo tkitm frifrarrahmr. To nhai. Kfo kurmor. Nhai yak yarmorm. ²⁴ Soldiam Jisasr yura bgre misn kihegirnihato yo tfit rorhu hmbresham yakhato pirai satumomm.‡

²⁵ Dbha 9 kilok tuhegirmomr. ²⁶ Wom mrokfo nmbuhat plan mkutn wandfakmomtn yura mfhatpno frdbkafmomtko. Nd mrokfot rom wandfakhato htamot kfo memot, “Judaroh Kingr.” ²⁷⁻²⁸ Jisasr tuhegirmo tkittn hus rikoh yimaf mano mano tuhegirmomf. Womr tirmifko hirmor, womr kindonko hirmor.§

²⁹ Jisasr hegirmo bgre mis tu yihota yuhat tohettn rim fnahni mfnahnyuk yimam rim grha wase bowaseniato yihom kfo tfarnyi mkfo tfarnyamoumr. Kfo memomr, “Ni kfo mayete, ‘Bro Nkifrarhu temperr yak tasohhato tfit husirpa yiharpa tfit kasinyahato hingrnaruhant.’ Ni inji kfet yimaye. ³⁰ To btn wamifnahnekahtn ahtinomn.” ³¹ Nd prisroh bro yimam yo nkifra boririfhuthu tisam, rom rpat inji kfo tfar memomr, “Ndar yimar ror toh hingrna hnamohat bok met yindarim rorn fak marnya hnamorm. Asomift to nhai tur mifnahnekahtn htikahnomr. ³² Nd Isrerroh kingrn Bro Nkifrar kfo tkruraf thombat nda bbinysofthu yimaroh nrfa htihakneft, afo

† **15:18:** Wahti Matyu 27.9 yorhwa kfo nuhasyuk mrokfot. ‡ **15:24:** Tahiham tubatu hanymomn htimom, frohrn hifa tahis fturt, nd yimar fakmor Jisasrhu wom hmbresham. § **15:27-28:** Wom safemanm duka memom, tot wom mrokfo nmbuhat ndar veskfothut. Nd mrokfo nmbuhat inji kfiwut, “Bi Bro Nkifrarhu rfa borngtn mrokfot kfo memota, ‘Nd yimar htimomr fasoh nefm nayet yimam kanjo. Nhai hifa nyingar htarmoamr.’ Nd mrokfot bi kfo htamot bi tot bi mfrfnah hanitt.”

tur amifnahnakaht r ahtinomr. Htiruhanomn duka mirahnom tu nmoh nrfa htiyakyuk yimayer.” Nd mano mano hirmo yimaf rof nhaf kfo tfar mrokfom kfomofr.

Jisasr nohmo yuhat

(Matyu 27.45-56; Luk 23.44-49; Jon 19.28-30)

³³ Dany marrn marrhu nukeft be rim nohnomot. Kantri bugat be yambontift rhumom. Wuroh 3 kilok krif marr tfit niamor. ³⁴ Tri kilok kanjo marr toh hanymor Jisasr tau nakuyafmor, “Eli, Eli, lema sabak-tani?” Nd mrokfothu mrokfo yimbu yuhat inji kfiwut, “Nkifraye, Nkifraye, tamohmpno bi fritrohwna?” ³⁵ Inji kfo nakumotr brbo tohyuk yimam waynaf hanyhato kfo memom, “Nd yimar Irajair nakutr.” ³⁶ Wom yimar toni hanyhato spans yakmorn wainpamn tayifakhato miyeftn htahato memom, Jisasr hikahta bupam ndtn tmasakrahr. Bupam hehato kfo memom, “Afo htiyaf hanyrahnom, Irajair naku kfihat Irajair finji naruharr?” ³⁷ Be wuroht tau nakuyafmorn be mfaknimor.

³⁸ Yimar myakni hanymo fijo nd bro rmonthar temperrhu tu Nngrajoh Hnaru Gnanhehr gna rafomor be buha mifn rmonthar yoh nmbrmorn mano mano rim rhu mrhumor. Yurak wuyoh nmbrakmorn miyoh nmbr witanihato mano mano rim hir mhirmor. ³⁹ Jisasr pno brbo tohmo amiroh keptenr Jisasr nohmo yuhat htihato tuha mfha tha duhatr rhumor. Memom, “Dajohmn! To finji tfit kforuhanom? Ndar yimar tu Bro Nkifrarhu Yon mifer.”

⁴⁰ Tom wom metm be inji wuri kkof tohhato hti hasomoum. Taun Makdala efkot Mariat, Jemsri Josefrofhu mmem Mariat yo Saromet, nd nd metm hti hasomoum. ⁴¹ Nd yute metmn Jisasr Galilit tohmohat romn uhik ahik htfasmoamrn tamoh tamohm romn hiyaf hanymoum. Yo wom metm rpatn Jisasr Jerusalemko yimohat hik hanymomr.

Jisasrhu thatipt tahi muhtn rihtamo yuhat

(Matyu 27.57-61; Luk 23.50-55; Jon 19.38-42)

⁴²⁻⁴³ Judaroh taun Arimateathu wom yimar tohmour. Rorhu yufat Josefr. Juda kaunserkfot rorn nd kaunserkfot hingrna tohnhomoum. Bok met yindarim rorhu nefm hifa hti wofnmoum. Rorhu dukeft duka memour, “Bro Nkifrarhu kingdomkfot afo nanhu nyingaye afo htiruha!” Nd dukeftpno tohmour. Nd Fraide yihar, bi tu Judaroh bro rhu krna Sabat yihar bi rhu yibon hanymomr. Sarere yihar nd rhu krna yihar rhumoum. Ndnetrn krifnana Jisasr bi nohetrn nhai wofnrmor Jisasrhu tkhat wom rhukfot. Pailatrpno yimorn mtohhato ttiwonmor Jisasrhu thatipthu yakni yopneft. Nhai yakrmi hanyhato yi mttiwonmorr. ⁴⁴ Pailatr Jisasrhu noh mrokfot waynhato tuha mrokfo duhatr rhumor. Be yudbat turhu keptenr nakumorr. Memom, “Afo tu keptenrpno wany marnyaruha Jisasrhu noh mrokfot.” ⁴⁵ Pailatr keptenrpno wany sungunahato ee Josefr kfo fakiowaf-morr Jisasrhu thatipthu yaknifeft. ⁴⁶ Josefr Pailatru tngt wany marnya tanyhato yimorn nfri ganyom rmonthar wiknakmor. Nd nfri rmonthar yak nyingt htatahato Jisasr bgre miyetr wuyak kasuhakmorn ganyom rmontharn wahtahato rir hmbremorr. Rir hmbreyaknihato hanymorr. Hanyhato tahi muhtn rihtamorr. Nd tahi muhtn htamorrn tahis yakhato tahishu muht hta tittafmort. ⁴⁷ Makdala efkot Mariati Josefrhu mmem Mariat tohhato hti hikmom Jisasrhu thatipt htamo tkitt.

16

Jisasr sinyamo yuhat (Matyu 28.1-8; Luk 24.1-12; Jon 20.1-10)

¹ Nd rhu krna Sabat yihar rhuni bugahato Makdala efkot Mariat yo Jems Saromerofhu mmem Mariat welpam wiknakhato memof, “Hanyhato Jisasrhu thatipt gbrorna wunarahnonr.” ² Sande yiha bi dbha ksfutn sinyanihato yimom nd Jisasr rihtamo tahi muht. ³ Yau hanyhato tfit tuf rinnakfo nakfo hany memouf, “Nd tahi muht frtasif tanymo tahise frohmn yak rihtaf nuhafruhamno?” ⁴ Inji nnakfonihato asha mtoghato htimofit nd yonmari tahis muht frkih tanymot nhai wom rhurmot. ⁵ Be sfnohtn be yauyaknihato fau fknemimof. Yiro rim tohhato asha htimofir wom yima damiagr yok thar hmbreyetr tirmifko rhu hasomor. Be tuha mrokfo duha tohmof.

⁶ Nd yima damiagr kfo memorf, “Mirahfn afohtasno. Nifn ka nd bgre mis kihgirmo Nasaret thof Jisasrhu yau hafott niefn. Nd yimar bi sinyani yifir. Ndart ror yarim htamo tkkit, bi sfnoh tkkit furayet. ⁷ Waikahfnn turpno yau htfasmoa yimam yo Pitar wakfo wamitwafnm, Jisasr bi sinyanihato bi Galiliko mtoh gari hanitrm. Tur kfomo yuhatn Galiliko ndko amhtitwamr.”

⁸ Nd yima damiagr pthamohat, be bro yakrme rifhurpno tohhato wanyoufr. Be nd yakrme rifhurpno fnahnihato yimof. Yimohat nhai wom yimar kfo marimofir, “No inji hitawono.”

Makdala efkot Mariat Jisasr htimo yuhat (Matyu 28.9-10; Jon 20.11-18)

⁹ Jisasr Sande yihar dbha ksfut sinyamor. Sinyanimohat barkoft Makdala efkot Mariatpno myak nriyafnimotr htiyafmotr. Nd met Mariatn Jisasr yima nfrir tohmohat 7-pela kmi yarhm fak thumort. ¹⁰ Mariatn hti switafhato rotn yihato Jisasrpno yau htfasmoa yimam nur dungunangu hasetmn mkfo nuhasmotm. ¹¹ Kfo memotm, “Jisasr bi sinyer. Na bi tuka htiyefiyanr.” Nd nur dungunangu hasoyuk yimam nhai wany yakiormomt. Rom memom, ka yuwi furewut.

Hus yimaf Jisasr htimo yuhat (Luk 24.13-35)

¹² Kto Jisasrhu wom hus disaipperf tuha taunt sinya tanyhato yimof. Buha yihotatn Jisasr htiyafmofir. Rorhu ruheft nndo tfit htimofir. ¹³ Be rof inji htiyafhato womm yi kfo pthamofm. Womm rof kfoyuk mrokfom wanyimohat nhai wany yakiormomf. Memom, ka kfo furewuf.

Jisasr rorhu disaiperm kfo tkrurafmo yuhat (Matyu 28.16-20; Luk 24.36-49; Jon 20.19-23)

¹⁴ Kto wuroht tu Jisasrhu 11-pela disaiperm nuwa ye hasetmn mifnahmotr htimomr. Yihato kfo huttmorm. Ror htiyafomoa yimam kfomoahat nhai wany yakiormoam. Memom, ka be kfo furewum. Ndnatn kfo huttmorm. ¹⁵ Kfo memorm, “Nikomn ndar bbinysofthu kmi kmim nanhu mrokfot wakfo nuhashi habri bugatwakomm. ¹⁶ Waptha habrikahkomn fitoh yimam wany yakiohato baftais kak hanitm, nd yimam Bro Nkifrarhu tirtn rhurahm. Yimam nhai wany yakiokahm nd yimam be bro kotkfot tohrahm. ¹⁷ Nanhu mrokfom wany yakio hanyruha yimam wom bbukeft Bro Nkifrar hi hanyrahm. Nanhu yufatpno yarhm yak thurahmm. Yo

wom nndoh yarmumam be ptha furakni hakurahmm. ¹⁸ Yima waset nandom nehun tire yak hakurahmm. Foret yeshrim yerahmm be nhai finji naruhadm. Be fipa duhatm rhu hakurahm. Dbohnet yimam rom tir htarahmm be marnyani hakurahm. Nd nd nefm yimam htiruhamn mirahm, tu Bro Nkifrarhu bbukeftpno hingnewum.”

*Bro Nkifrar Jisasr hefenko hamuhmo yuhat
(Luk 24.50-53; Aposer 1.9-11)*

¹⁹ Bro Nungothet Jisasr nd mrokfom kfo buganihato be Bro Nkifrar yakhato hamuhmorr hefenko. Hamuhmorrn turhu bro bbukeft yorhwa tirmifko fak htamorr. ²⁰ Be Jisasrhu disaiperm kmi kmim yi htfashato Jisasrhu mrokfom kfo ptha habrimomm. Bro Nungothetr tohno-moatrm rom pthamo a mrokmom fipetm rhumoum. Wom wom mirakerkfom rpat hingrna htfasmoum. Ndnatn rom pthayuk mrokfom wany yakiomoum.

Lukr dwardfamo gutnius mrokfot Barkof kfo nuhas mrokfom

Lukr Wandfamo Gutniuskfotn hti dukarahñ Jisasr niahato Isrermi riruh aruh kmiyakmim nrfa htihakmo yuhat. Jisasrhu hingrneft rihingrnakmohat met yindars kfo memorm, “Brorhu Yafothatn thu kasinyamotta nd knbok yuham rirhu arhuyuk yima bebpam nann gutniuskfot kfo hi hanyruhanm,” (wahti Luk 4:18). Ndnnetn Jisasr nda bbinysof thofm yuhuwafhato rorn nohhato rroh rhu nmbuhat fak marnya bomarnyamort.

Lukr tndh hik bohik marnyamorm Mariat Jisasr hiyaumo yuhat yo ror hefenr muhmo yuhat. Tndh hikmotrm yimam htimohat rorhu tndh mrokfom hti yindhormomm.

Jisasr tohhato nahnamo wom wom nefm Lukrparhu rfa borngtn hti-rahnm. Nhai wom rfa borngm htiruhatnm. Lukrhu rfa borngtn wandfa hik bohikmorm Jisasr nurmo yuhathu mrokfom, Samaria thofr yak marnyamo yimarhu tndht, wom yonr yifemr htanyhato nkiranimorhu kfo nhombra mrokfot yo wom wom tndhmi kfo nhombra mrokfom, nd nd mrokfom Lukrhu rfa borngt korhm.

Wom mrokfom Lukr mfro dukahato kfo pthamom, kfo pthamor kfo bruttaneft, Bro Nkifrarhu Yafothathu hingrneft, bbinysof thofroh fasoh fasoh nefm Bro Nkifrar yafho thuhemo yuhat, yo metm Jisasrhu hingrnefm hingrnanhomo yuham. Ndm wom mrokfom ndar gonborngt htamorm.

Lukr wandfamo mrokfom nhai ndar gonborngt rhuahm. Nhai. Rorhu wom mrokfom Aposer gonborngtn korhm. Rorn nd Aposer gonborngt wandfamort.

Lukr Tiofilusrpno gontwat wandfahato nd kfo nuhasmo barkof kfo nuhas mrokfom

¹⁻²O Tiofilus, Jisasrpn rhu hawihnamo nefm bok yimam htimomm. Rom htihato pthamomm. Pthamotmm wom yimam rompno wanyak hanyhato wandfa hanymomm nd Jisasrhu tndh mrokfom. ³Ndnatn na to inji kanga ni Tiofiluspnno awandfakahann, akfo nuhas hik bohik marnyann nd Jisasrhu tndht rhumo nefm. Nd mrokfom kanga akfo nuhasann. Bi tuka nd tu hti hiket yimampno rhuhat wany hik marnyamoyanmn ndnatn kanga awandfa nuhasann. ⁴Tamoh mrokfom ni bingot wanyafmom, nda na wandfayuk mrokfefm htiruhann, mirahn, “Dajohmn, nd na wanyafmo mrokfot tu mrokfot wanyafma.”

Elisabet Jon Baftaisr hiyaumo yuhathu tndhti Mariat Jisasr hiyaumo yuhathu tndht

(Sapta 1.5–2.52)

Sekariar nasakmo yonrhu yuhat mounmotr niahato kfo nuhasmo yuhat

⁵Herotr, Judiaroh kingr tohmo yiharn wom yimar tohmo. Rorhu yufat Sekariar. Rorn bro Nkifrarhu temperrhu hingrnefm kakitohmourm. Nd temperr tohyuk yimar kutamoumr prisr. Sekariar Abiya kuny shofer. Bingot rorhu nkifra Abiyar nd pris hingrneft mfakitoh fnahmort. Sekariar

Abiya kuny shofer. Rorhu metthu yufat Elisabet. Rot nhaf inji buga. Rothu nkifram nd pris hingerneft mfakitoh fnahmomt. Rot Eron frikef yuhatn niamot. ⁶ Sawoh sawohfhu toh nmbuhat hifa tohmoatf, Bro Nkifrar hifa hti yindhormorf. Boririfhu mrokfom rof hifa kak hik marnya-mouf. ⁷ Nd sawohf tohmoahat be inji yon duhatf tohmouf. Mett nhai yon hiyaurmoat. Sawoh sawohf bi tabo buga hanyomf.

⁸⁻⁹ Wom yiha Abiya bukeft tum rhuhato memom, “Wom yimar ayak htanom temperrhu fknihatoh tarioh mtha inji nayukr.” Ndnatn yimaroh yufa yak nuhasyuk neft namom. Nd neft nahato nd neftn Sekaraiarhu yufat fak nuhasmotm Bro Nkifrarhu temperr yihato tarioh mthayukr. Bingot bi ndhtet neft na hnamoum. To be nd nef yuhatn fak hikmom. Bok yimam nd temperr hingernameum. Wommn womhtet hingerneft hingernameum. Tfit wommn womhtet hingerneft hingernameum. ¹⁰ To be Sekaraiar temperr fkenihatoh nd miroh fipam tarioh mthamohat bok met yindarim briahako rhuhato Nkifrarponko kfo bruttnamoum. ¹¹ Nd tarioh mthayuk tkitt toh hasetrn Bro Nkifrarhu mounmotr niamorn, nd tarioh mthayuk tkitt tirmifko mitohmor. ¹² Be wom Sekaraiar inji htihatoh yafotha duhatr rhumor. ¹³ Nd mounmotr sinyahato kfo memor, “Sekaraia, ni mirahn aduka yanhoia. Ni kfo bruttnamohat bi wanyomoyann. Nd ninhu met Elisabett, be yonr hiyauhirahatn. Yon yindarir hiyauhirahatn, yo yufat wayutatwanr Jonr. Bro Nkifrar rorn bro yufat htarahr. ¹⁴ Ni inji htiruhann, ninhu yima yuhur be yifa marnya-ruharn, yindhorrahrn. Bok met yindarim ror htihatoh be yindhorrahrn. ¹⁵ Rorn Bro Nkifrar bro yufat hirahr. Nhai wain upami yima thu hamumet upam yeruhatr. Yuhre mmemthu yatit ruhetrn, bi nd Bro Nkifrarhu Yafothat thu nawohrahr. ¹⁶ Rorn nd Isrer yon kunys tfit yakruharm, tfit turoh Nkifra Yawerpno yak htarahrn. ¹⁷ Rorn nd Irajjar hatohmo yafothat mthu nhombrarahr. Ror bi Brorhu nyinga yuhat bi tohak hanyruhatr, nitohfi nitohfim tfit niak marnya hakurahm. Yifemrom yak marnya hakurahmm yinemrom. Rorn nd hanyjbornetroh yima yuhum tfit yak marnyarahrm hifa duka hik marnyetrohm kanjo. Bi rorn met yindariroh yima yuhum bi yak marnya haso hanyruhatrm, ee btn Bror nierahr.”

¹⁸ Sekaraiar sinyahato mounmotr kfo memor, “Nd ni kfiwa mrokfot mduka nhiyaktitwant. Sawoh sawohno ndu bi tabou bugayetno, finji wom finji rhuruhano? Wom nefm yak nuhasrahno, ee duka mirahno awi ndu mrokfot tu kfofif kfot kfofomr.”

¹⁹ Tawo mounmotr kfo memor, “Na Gabriela. Na Bro Nkifrarpono brbo tohwa. Rorn kfo tkrurefitra, niya ninhu kfot. Tu hifa dborioh kfo nuhas mrokfot hnahuyann. ²⁰ Wawany, na kfoyuk mrokfom nhai wany yakiorfonm. Ndnatn be tng mmkn rhurahrn. Be nhai ptharuhatn. Nd na kfoyuk yonr bi fnurnire, ee btn tng pthetn rhurahrn.”

²¹ Nd briahako rhu hasoyuk yimam gariti garitihatoh duka memoum, “Barenko bingot ziyuk yimare to tamohmn riyak hatohwar?” ²² Ktopa kto be tng mmkr fnahneyetrn, hti yak hanyomomr. Nhai ptharmor. Be inji tng mmkr fnahnehato be tirrpaye fak nuhasmourm tamoh tamohm. Be yimam inji htihakto duka memom, “Ka hwe twehnano Bro Nkifrar hti hanirr. Ndnatn ka mrokfo yafothar fekr.”

²³ Rorhu nd temperrhu hingerneft yiham hingerneft hanyomom, hingerneft tmbhonihatoh be tfit turhu kmiko yimor. ²⁴ Kto rorhu met Elisabett yon

fanett rhumot. Tut inji htihato afo tir yuhut yamm kamongmot. Kfo memot, ²⁵ “Nanhu yon hiyau duhathu yimtna nmbuhat Bror hifa wahtihato yuhuwafmora.”

Mounmotr niahato Mariat kfomo yuhat

²⁶ Elisabetthu yon fanet rhu nmbuhat mounmotr kfo nuhasnimortn, dfik yamm tohnhato 6-yuk yampno Bro Nkifrar tfit mounmot Gabrierr kfo tkurafmorr Galiliko yorhwa taun Nasarethu yinyeft. ²⁷ Nd taunt yorhwa wom met tmahtu yufatpno yimor. Nd met tmaht bi Defit frikef yuhat niayuk yima Josefrpno kfo nanf hanyomomt. Nd met tmahtu yufat Mariat. ²⁸ Nd mounmotr rotpno yihato mkfo yindhoraknihato kfo memort, “O bar mete, nine to? O hifa mete, Brorko hifa hti yindhorworn.”

²⁹ Mounmotr inji mkfo yindhoraknimotr, tfit Mariat duka kinyaknihato memot, “Nane finji kfiwura? Hrekrpa ndtset kfo yindhor mrokfot wanuka.” ³⁰ Tfit mounmotrn kfo memort, “Maria, ni mirahn finji ariduka adukaya. Bro Nkifrar ninn hifa hti yindhorwor. ³¹ Wanukn, yon fanetn rhuruhann, yonr hiyaurahn. Nd yonrhu yufat wayutatwanr Jisasr. ³² Nd yonr sinya thombat be tu bro yufet yonr tohrah: Yimam yuta hakurahmr ‘Tu yura myorhekwa Nkifrarhu Yonr.’ Turhu nkidom Defitr hatohmo bro yufat kindo tfit nd yonr Bro Nkifrar nd bro yufat hirahr. ³³ Nd Jekof frikeft yutiwa Isrerm, rorn tohukatohrahmr. Rorn toh yukatoh hanyrahmr yiha yiham.”

³⁴ Mariat inji wanyaf hanyhato kfo memot, “Na ndtset ram duhat meta, to finji kanjone yon faneta rhurhoya?”

³⁵ Tfit mounmotr kfo memort, “Bro Nkifrarhu Yafothar mithu nawohruharn, tu myorhekwarhu bbukeftpno toh hnkokn hmbriruharn, nd yonr thu hmbrirahrr. Bro Nkifrar thu hmbri-ruhatrr; to be ndnatn nd yonr yutarahmr Bro Nkifrarhu Yonr. ³⁶ Wawany, ninhu tangiyem Elisabett nhai yon hiyaurmoat, futamoumt nmbit. Arihat ar bi tabou bugayett, to nhai, to bi tfit yon fanet. Bi 6-pela yamm yimom. ³⁷ Nhai wom tamoh nefthu finji nanef Bro Nkifrar mduka nhiyakkfot.”

³⁸ Mariat inji wanyhato tawo kfo memotr, “Wawany, na Brorhu hingrneh froh hingrnayuk meta. Kangr nd ror kfiwa tng yuhatn finji anaya, na nhai mrokfom.” Be Mariat inji kfmott, nd mounmotr htanymortn yimor.

Mariat, Elisabett yi htimo yuhat

³⁹ Mariat mounmotr htiafohato kto rorhu mongkorn rot bmbri Judako yimot. Kmynysofm muh wohne fnahhato mifnahmot nd Sekaraia sawohf rhumo kmitt. ⁴⁰ Mifnahhato yimot Sekaraia sawohf rhumo kunysn. Kunys fkneni-hato Elisabett rhu hasettm rim kfo yindhoraknimott. ⁴¹ Rim kfo yindhoraknimott, nd Elisabetthu yatit rhuyuk yonr ka nd yindhor mrokfot rim pthaknimott, ror riyindhorhato ridbuhatokmor yiro yatitn. Bro Nkifrarhu Yafothar yawihnamorn, Elisabett mithu nawohmor. ⁴² Mithu nhombramotr, yimat bro yindhor yima yuhur yakhato Mariat masat kfo ptha memott, “Metroh mkukort be ni Mariann Bro Nkifrar yak marnya bomarnyarahr. Yo nd yatit rhuyuk yonr; ror inji buga yak marnyarahrr. Rpat nimehetfn yak marnyarahrn. ⁴³ Na ndtset met furapaya, to tamohmpno ar Brorhu mmemt tfit nanpno wanies? ⁴⁴ Wawany, Maria, na ninhu yarim kfo yindhorakna tngt wanyhato nanhu yatit rhuyuk yonr; ror nd kfo yindhor tngt wanyhato ror rpat riyindhorhato yiro yatitn

ridbuhatok yindhorrio.” ⁴⁵ Elisabett sinyahato Mariat kfo memott, “Maria, Bror mikfo tanyuk mrokfom ni hifa wany yakiowonm. Ndnatn yak marnya bomarnyarahrn.”

Mariathu yindhor yima yuhur

- ⁴⁶ Mariat wanyhato kfo memot,
 “Nanhu yima yuhur Brorparnko yindhorwor.
⁴⁷ Nanhu yima yuhur na minrfa htiyekwa Nkifrarpar yindhorwor.
⁴⁸ Na rorhu hingrnfem hingrniwa met furapaya.
 Nhai marimor met furayet. Nhai.
 Nanhu rhu nmbuhat htihato hti yuhuwafmora.
 Arihami kto bok met yindarim na nda Bro Nkifrar yak marnyewa
 nmbuhat htiruhamn,
 kfo yindhorrahmt nanhu yufat.
⁴⁹ Bro bbuka nanyjaret Nkifrar be tu hifa fak htamora.
 Ndnatn nanhu yima yuhurio rorhu yufat be inji tahirhut rhuraht.
⁵⁰ Arihat tohwa yimami kto tohruha yimam
 be rorparhu duka yanhowefrpar tohhato
 rorhu yinhit tohruhamn,
 rorhu yuhuwafneft be romn rhuraht.
⁵¹ Nd yimam turoh yufam yura yura htamoam,
 rorhu bbuka nanyjaret tirm thu yukehato
 bi fak thumorm.
⁵² Nd king yufam tohet yimam bi wuyak thurakmotrm,
 tfit nd yufapa duha yimam bi mfrfnahnimom.
⁵³ Yatinohetmn nd hifa hifa shrm bi thu rmonhemor,
 tfit nd bok wusketm brioh hti marsisafomorm.
 Nhai wom tamohm hiyafhato yakitohakrmom.
⁵⁴ To be ndnetn nd kfo tahi mrokfot bi ruhetn niamor.
 Niahato turhu hingrna yimam, kutewumm Isrerm, yuhuwafmorm.
⁵⁵ Bi bingot Bro Nkifrar Abrahamrpnno rikfak memor,
 ‘Rorhu mongko sinyahato toh hanyuk yimam yiha yiham yuhuwaf
 hakuruhanm.’”
⁵⁶ Mariat husfirpa yamm Elisabett pno toh tanyhato tfit tuthu kmiko
 yimot.

Elisabett Jonr hiyaumo yuhat

- ⁵⁷ Elisabett thu yon fant hatoh hanymott, yon hiyau yiharn yon yindarir
 hiyaumot. ⁵⁸ Rothu yifa mndarm inji htihato kfo yindhorhato kfo memom,
 “Bro Nkifrar hifa hti yuhuwafmort.”
⁵⁹ Nd yonr mharuhato namba 8 dei kfofn yonrhu tha puk thut ni-
 amom. Tha puk thunihato yufat memom, “Yifem Sekaraiarhu yufatn tfit
 hmbrenomr.” ⁶⁰ Tfit tu yonrhu mmemtn waruhato kfo memot, “Mirahko
 wom yufat ayutanomr. Jon yufatn wayutatwakomr.” ⁶¹ Tfit rom kfo
 memomt, “Nd ni kfiwa Jon yufat nhai ninhu tangim yuta hnarmomt nd
 yufat.” ⁶² Be inji nna kfonihato memom, “Ka tu yon yifemrn yonrhu
 yufat yuta nuhasrahrom.” Ror tng mmkrn btn tire yak nuhashato
 memom; “Yon yufat wayuta nuhasnrom.” ⁶³ Sekariar memom, “Slet
 mkut wahne hikma.” Slet mkut hnamotmt, Jon yufat wandfa nuhasmorm.
 Wom yimam inji htihato memom, “Mamai! Ndart tu be womhtet neft
 hrekrpa htitwonom.” ⁶⁴ Yufat wandfani hanyhato ee tort rigrhakhato Bro

Nkifrar rikfo ptha yindhor boyindhorakmor. ⁶⁵ Sekaraiarhu kmi thofm nd ror namo neft wahtiyafo-mohat nhai wom yafothetm rhurmom. Nd Sekaraiarpno rhumo nefthu mrokfot nhai brbo wom warhu hasormot. Judiakorhof kminysofm rhuyuk kmi bugam wany bugamomt. ⁶⁶ Nd yonrhu mrokfom wany hanyuk yimam wanyhato bok dukefm yakmoamn, duka memoum, “Nd yonre warhoni thofte nko finji kanjohot yimar tohruhan?” Rorhu sinya nmbuhat be Bro Nkifrarhu tirmn fak hta bohtamomr. Ndnatn inji duka nhtamom.

Sekaraiarhu kfo yindhor yuhat

⁶⁷ Be tfit nd yonrhu yifem Sekaraiar Bro Nkifrarhu Yafothar mithu nawohmotr; Bro Nkifrarhu mrokfom pthamorm. Kfo ptha memorm, ⁶⁸ “O Tunga Nkifrar, arnat bi turhu yon kunys yukatohwarn, be arihatn tfit yak marnyarahnom. ⁶⁹ Turhu hingera yima Defitrhu frikef yuhathu yimar bi yak htarorn, nom be rorn minrfa htihakrarnom. ⁷⁰ Bingot bi turhu dborioh profetmpno pthamo yuhatn yak hikhato kfo tkrurafmotr; niamor. ⁷¹ Bi rompno bi kfo hta memor, ‘Nanhu yon kunys yahr kmiroh buha yorhwamn, be hti srhasiwumm. Yirhoyann, miyak htihakruhanm.’ ⁷² Bingot tohmo nmoh nkifram ror yuhuwafmormn, fakmorm. Bingot ror kfo tahimo mrokfot yuhre duka hanitrt. ⁷³ Bi bingot tunmoh nkifra Abrahamrpo kfo tahimo yuhatn hikwarn, kangr, ‘Amirfa htihakkahann, tfit tukianhu hingerneft yak htaruhanm. ⁷⁴ Tukianhu hingerneft tohruhanm be nhai wom yakmiruhatm. ⁷⁵ Be yiha yiham nanhu yufa yuhat tohruhanm toh marnya bomarnyarahm.’ ⁷⁶ Ni nda yonn, kto yutarahmn yura myorhekwa Nkifrarhu profetn. Ninn Brorhu nyinga yuhat tohak hanyruhann, rorhu nia yuhat bi ninn yak hta bohta hanyrahnt. ⁷⁷ Bi ninn yiruhann, kfo mirahnn, ‘Bro Nkifrar nikmoh fasoh fasoh nefm yak thuhiruharko toh marnyarahko.’ ⁷⁸ Tunmoh Nkifrarhu yuhuwaf nmbuhatn bro nukafat hirarnom. ⁷⁹ Nd yiro kspitat rirhuyukmio yo nd bro yihotar yauwam, rom nd nukafat nieruhatn, nukeft hirahnt. Nmoh yau nmbuham rorn yak ht hanyruharnom, be hifa nd hifa noh hmbre yima yuhurn yaurahnom.”

⁸⁰ Nd yonr warho hanymor; rorhu dukefm rpat yimarpno warho hikmom. Be nd yonr nd yima toh duha bbinysotf toh hanyhato be Isrerko tohyuk yima bugam hti hik bugamomr rorhu nd dborioh dukefr yo rorhu toh nmbuhat.

2

Jisars nurmo yuhathu kfo nuhas mrokfot (Matyu 1.18-25)

¹ Nd yihamn bro toh yukatoh Sisa Ogastar wom mrokfot hta htfasmort. Kfo memor, “Arihat inji narahnom. Romroh gafmanrhu yinhit tohyuk yimam yufam yak bugarahnomm.” ² To be tot nd yiharn Romroh gafmanrhu yinhit tohyuk yimam yufa rihtakmom. Nd yihart Sairiniasrn Siriaroh gafmanroh mfhako rhuyuk yimar tohmo. ³ Ndnatn nd wom wom kmim toh hanyuk yimam tfit turoh kmi mnako yi hanymomn, yufam hta hanymom yufa htayuk bro gonborngtn. ⁴ Josefr Defit frikef yuhat niayetn, ndnatn Galilikorhof kmi Nasaret tohetn to be nd kmit htanymortn, tfit yimor Judiako yorhwa kmi Betlehemtn. Nd kmi Betlehemt Josefrhu nkifra Defitrhu kmitn, ndnetn to be turhu nkifra kmi mnako

yimor yufa htat. ⁵ Mariat Josefrpno yuhre kfo nanf hanyettn yon fanett rhumot. Yimohat yon fanett rpat yimof. ⁶ Yihato bi Betlehemt mfnahetfn, Mariat fak yironamot. ⁷ Yak yirona-hato yon yindarir hiyaumot. Nd nurmo yonr tor rot hiyaumo barkof yonr. Hiyauwakhato rmon thaye yak rir borirakhato bulmakaum yeshrim yamoa mmbtrn wakmbremotr. Yiro bro kuny yirukkort yimam rhu furkihett, to be fohroh yeshri hwe rhu nuwa yemskamoako nurmor, to be nd bulmakaum yeshrim yamoa mmbtrn wakmbremotr.

Mounmotm sifsifroh tohukatohm kfo nuhasmo yuhat

⁸ Nd kmitn sifsifm hatoh yukatohmoa yimam wom tkittn yifung sifsifm hatoh yukatoh hasetmn, Brorhu mounmotr mifnahmorm. ⁹ Nd mounmotr mifnahhato Brorhu bro nukeft, nd mounmotr hatohmohat memom nndo bruwohmrn katiwur. Nd sifsifroh hatoh yukatohyuk yimam nukeftn yakmottm, memom, “Ayakrmanyom.” ¹⁰ Tfit mounmotr inji htihato kfo memom, “Inji ayanhowahko. Na tu hifa dborioh mrokfekt hniya. Nd mrokfot bok met yindarim wanyshoft, wany yindhorrahmt. ¹¹ Wawanyko, hrekn nikmoh hbhakyuk yonr wom mett hiyaur Defitrhu kmitn. Ndr Bro Kraiser. ¹² Wahti hanyawako rmonthaye rir borirakhato bulmakauroh yeshri yeyuk mmbtrn htayeter. Htitawokomre, wamitwako, ‘To tawomr asor nd nom wanu kfo nuhas mrokfothu yonr.’”

¹³ Inji yuhre nd rpa mounmotrpn naptha hasoyetmn, asha tfit wom yonmari mounmot rifhur yura moun yuhat fawihnamom. Yawihnehato nd wom mounmotrpn naptha hasomo tkitt mirifiny hmbri yaknamom. Mirifinyaknehato miptha yindhorakna memom, ¹⁴ “O yura hefenrhu tunga Nkifraye, nda bbinysofthu yimam ni hti yindhorwam wayak marnyakahtnm, yima yuhum noh hmbre rahmm.”

Sifsifroh tohukatohm Betlehemko yihato nd yonr htimi yuhat

¹⁵ Nd mounmot rifhur inji naptha tanyhato tfit wayakhato yura hefenko muhmom. Nd sifsifroh tohukatohm htiafomomm, bi kitwome, ee rom tfit tum rinakfo nakfo memom, “Barenko, Betlehemko aikahnom, htirahnom nd Bror kfi yonr.” ¹⁶ Be inji napthanihato hmbri Betlehemko yimomn, hambro hanyhato mhtimomf Josef Maria sawohf yo nd yonr bulmakauroh yeshri yeyuk tkitt wahtetrn. ¹⁷ Nd yonr mhtihato mkfo memom, “O, nom nda yonrhu nur nmbuhat Bro Nkifrarhu mounmotm niaromn, kfo meromnom nd yonr bi fnurr. Nom rroh tngt wany sanyhato nienom nda yonrhu htii.” ¹⁸ Bok yimam nd sifsifroh tohukatohm inji kфомotm, riduka adukamom. ¹⁹ Mariat nd wanyomo mrokfem wanyomotmn, be yima yuhurn wany hmbritamotm. Be memot, “Be afo htiafo hanyrahnom.” ²⁰ Be nd sifsifroh tohukatohm inji hti tanyhato be tfit yindhorefrparpno yimom turohko. Nd rom htihato wanyomo mrokfom turoh nyingaye hti yimbu hikmomn, be nhai wom mrokfom ptharmom. Be yindhorefrparpno yimom.

Jisars yufa hmbremo yuhat

²¹ Kto 8-pela marm rhunimomn, yonrhu that puk thuniato ee yufat nd yiharn futamomr Jisars. Nd Jisars yufat bi mounmotrn Mariatpno niamohat yonrhu yufat bi mikfo nuhas tany memort, “Jisars yufat wayutatwanr.”

Jisars Bro Nkifrarhu temperr hafknemo yuhat

²² Josef sawohf, Mosesrhu thfa mntwathu mrokfom yak hiketfn, nd yonr nurnimohat afo yuk trufnimofn, ee tfit kto Jerusalemko hanymofr nd nfri yonr Bro Nkifrarhu henyeft. ²³ Bi Bro Nkifrarhu thfa mntwatn bi kfo memot, “Barkof nkati yonr nuryukr, nanhu yufatn rhukfot.” To be ndnetn hanymofr Jerusalemkorn, rorhu hekfotn. ²⁴ Kandhi mthaneft nhaf inji buga, bi thfa mntwatn mrokfot bi ruhetn, memof, “Hus ganyom mmkrf o nda mtimohet rgumif kandhi mtharahnonrko.” Nd nd hingrneftn nd yonr hanymofr.

²⁵ Rom riphar yimom, nd yihart Jerusalem tohmour wom yimar. Nd yimarhu yufat Simionr. Nd yimar be tu hifa dborioh yimar tohmour. Bro Nkifrarhu thfa mntwat kfoyuk mrokfom kak hik bugamourm. Ror tohmoahat gari haso memour, “Nko fitoh yiha nd Isrerroh minrfa htityakyuk yimar nieruhar?” Bro Nkifrarhu Yafothat toh natwihmoutr Simionr. ²⁶ Nd Yafothatn bi kfo memotr, “Ni afo tafi noh duhatn, htirahnr nd Bror kfomo yimaroh minfra htityakyukr nia thombat.” ²⁷ To Josef Mariarof Mosesrhu thfa mntwat yakitohetfn, nd yon Jisarr bi Bro Nkifrarhu temperrn hany hanymofr, Bro Nkifrarhu henyeftn. Josef riphar bi yau hanyetmn Simionr Bro Nkifrar thu yuhurmorr rmonko yinyeft. ²⁸ Simionr be yihato temperr rim fnahnihato nd riphar rhu hasetmn, rim htimorm. Rim htihato nd yon Jisarr fakmorr. Yakitoh hanyhato Bro Nkifrarpo wukfo yindhorr memorr, ²⁹ “O, Broye, nd ni nanpno kfomo mrokfot asorr nd yonr bi tukanhu nyingaye bi htitanr.

Be na arihat nohneft nhai mrokfom.

³⁰ Na bi tukanhu nyingaye bi htitant ni minrfa htityakruha nmbuhat.

³¹ Kto nda bbinysof thofm hti bugarahmt.

³² Bro Nkifrar Isrerm minrfa htityakruha nmbuhat,

nd ror hnaruha nukeftn,
nd wom tangishofm htiruhamn,
nd nukeftn yak dukarahmt.

Ndnatn tfit ninhu yon kunys, rorn nd nukeft hneruhatr,
rom bro nukeft yakruhattr,
ndnatn bro yindhoreft yakrahmt.”

³³ Jisarrhu yifammaf inji wanyhato rof tfit duka nhtahato kfo memof, “Nda Simionr kfiwa mrokfothu mna yuhate, nko finji rhuruhat?” Tfit rof sawo inji fak nhtamouft. ³⁴ Be Simionr Nkifrarhu yufatpno yak wus bowusnimormn, Mariar kfo memorr, “Wawany, Bro Nkifrar ror htafmorr nmoh minrfa htityakyukr. Bok Isrerm rorhu mrokfefm hanyjbornahato suhrahm. Womn nd rorhu mrokfom yak hikyukm, rom tfit yak kasinyaf hanyrahm. Nd yima yuhu behohetm o dborioh yima yuhetm ndnatn hti nhtahato mirahnmom, ‘O arr ndhet yimayer.’ ³⁵ Ndnatn bok yimaroh yima yuhum yak duka tungarahm. Yak duka tungaruhattr, tafont rhurahm. Nd ni hiyayuk yonr bok krho nmbuham yakruhattr, ni nd yonrhu hiyau mmemn htiruhann, krhorahn. Mirahme, ‘Kfraye waswomr yima yuhur.’”

³⁶ Ndharn wom profet mett tohmout. Rothu yufat Anat. Rothu yifemr Fanyuerr. Nd yima Fanyuerr Asa frikef yuhat niamorr. Rot tmaht tohmohat ram fakmot. Ram yakmotn, nhai toh buhtarmor ramemr. Be 7-pela gunyjimrpmam tohhato nohmorr. ³⁷ Ramemr noh htanimotrtr, to be dhirt tohmout. Rothu gunyjim bi 84-kfot rhumom. Nd metthu toh nmbuhat tohmoahat, nhai Bro Nkifrarhu temperr thu trohrmoatr. Yifung marm

be Bro Nkifrarhu temperrn rhuhatu nuwa kurhato kfo bruttna hasomout.
³⁸ Maria Josefrof nd yonrhu nmbuhatn Simionrpn naptha hasetmn, Anat nd temperr ruhettn, niahato Bro Nkifrar mkfo yindhormotr. Kfo yindhornihato nd yonrhu mrokfot kfo nuhas hi hanyomotm yimam. Kfo hi hany memoutm, “Niko Bro Nkifrarngari haso memoa Jerusalemrhu minrfa htikyakyuk yimar ahnarr; to bi tor, bi niamor.” Inji kfo nuhas hi hanymoutm.

Josef riphar Nasaretko tfit yimo yuhat

³⁹ Josef sawohf nd thfa mntwat kfoyuk tamoh tamoh hingernefenm higrna truf bugamofmn, tfit yimof Galilikorhof kmi Nasaretko. ⁴⁰ Nasaretn tohhato yima yonr warhonimor. Yima yonr warho hanyomo fijo, yima dukefm rpat yimarhu warheftpno fak hikmom. Yo yonrhu toh nmbuham Bro Nkifrar toh natwihmotr, be hifa hifa toh marnyamor.

Jisasr Bro Nkifrarhu temperr fknemo yuhat

⁴¹ Pasofa burwat Jerusalemrn rifinyhato htamoumt. Jisasrhu yifammaf rpa rpa gunyjimm Jerusalemko yihato hti rhunhomoufm. ⁴² Josef Maria sawohf nd Pasofa yiham nhai rhurmoaf, yiha yiha yimouf. Wom Pasofa yiharn Jisasr bi 12-pela gunyijimetrn, hik hanyomorf. ⁴³⁻⁴⁵ Jerusalemko yimomn, nd Pasofakfothu rhuyuk yiham rhunimomn, be tfit Josef sawohf memof tufhuko ainyo. To be rof sinyani yimof. Rof sinyanimohat, memof yinem yonr ka bi wommpno nyinga yuhat tohak hanitr. To nhai, ror Bro Nkifrarhu temperr rhu hasetrn, yifamma sawohf htanyomorf. Rof yimofn, nd Nasaretko ziyuk yimampno myau hikaknihato memoufm, “Nnoh yonre htitawokomr o nhai?” Tfit womm mhtimoufm kfo ttiwon memoufm, “Nnoh yon htitawokomr, o nhai?” Ttiwonhansyi, ttiwonhansyi, be tfit mkekutakhato tfit Jerusalemko yimof, rpa marr hambrotihato. ⁴⁶ Jerusalemko yihato ndha tfit wom marr hambromofr. Hambrohany tfit husfirpehyuk marrpnone rim htimofr Bro Nkifrarhu temperrn thfa mntwathu tisampno rhu hasetrn. Rom nd tisan mrokfom ptha boririfhumoahat, ror rhuhatu wany yakitohmourm. Wany yakitohhato wom mrokfom ttiwon inji namourm. ⁴⁷ Nd rhu rifinyuk yimampno ror nd kfo ttiwonmoa mrokfom yo pthamo mrokfom wanymoamrn, duka memoum, “Barenko, ndar yonr be tu bro yimar kanjo tu bro dukayet yoner.” ⁴⁸ Yifammaf tisampno rhu hasetrn, rim hti fohtasmofr. Rim hti fohtashato mmemt memotr, “Bare, tamohmpno ndhtet nefn namo? Ni hambro htfashato nnoh yima yuhum dunguanguwomno. Kangno, ‘Nko fitoko yir?’ Tkit tkitm wusono wusono rim hambrak mhambrokrouno.” ⁴⁹ Tfit yinem Jisasr warhuhato memorf, “Tamohmpno rim hambrak mhambrokrofna? Nhai duka mekahfn, ‘Yifemrhu kunys korhr?’ ” ⁵⁰ Yinemr inji kfo mohat yifammaf nhai yakmofit yinemr pthamo mrokfothu yimbu yuhat.

⁵¹ Be rim hti yakmofrn, rpat tfit yimom Nasaretko. Yiha yiha yifammafhu kfoyuk mrokfom kak hikmourm. Mmemt nd mrokfom Jisasr pthamom nhai mong trohromotr. Nd mrokfom rothu yima yuhurn wany hmbri-tomatm. ⁵² Jisasr bronihato ror yakmo dukefm tu hifa dukefm faktom. Rorhu toh nmbuham Bro Nkifrar yo bok yimam nda bbinysofthum, hifa hti yindhormomr.

Tamoh tamoh hingrnefm Jon Baftaisr hingrnamom, Jisasrhu hingrna yuham hingrna gari hasomor

3

(Sapta 3.1–4.13)

*Jon baftaisr Bro Nkifrarhu mrokfom kfo pthamo yiham
(Matyu 3.1-12; Mak 1.2-8; Jon 1.19-28)*

¹ Jon baftaisr Bro Nkifrarhu mrokfom yakhato pthamoa yihart, nd yihar Taiberius Sisar, Romroh gafmanr tohmour. Toh yukatoh hanyorn, namba fiftinyuk gunyjimrpno Pontius Pailatr, Judiaroh gafanar tohmor. Herotrñ Galilikort, rorhu najom Filifrn Ituriakorti Trakonitiskort, Lisaniarne Abilenekort. ² Yo Anas Kaiafasrofne prisroh nyingako tohyuk yimaf tohmouf. Tot nd yiharn Sekaraiarhu yon Jonr yima toh duha tkitt tohhato Bro Nkifrarhu mrokfo rifhur mithu nawohmohat. ³ Nd mrokfo rifhur mithu nawohmott; tfit rorn nd mrokfot yaknihato tek Jodenthu mkuyef mkuyeffhu kmi kmim yi habrimoarn, met yindarim kfo memourm, “Nikmoh fasoh fasoh nefm mong wahikahkomm, baftaiskfof. Baftaiskahtko, Bro Nkifrar yak thu-hirahrko nikmoh fasoh fasoh nefm.”

⁴ Jonr mrokfom pthamohat bingot profet Aisaiar pthamoa mrokfom kanjo inji pthamour. Aisaiar memour,

“Wom yimar nungur tik furatn tohhato kfo mirahrko,
‘Bro Nungothetrhu niayuk yuhat wayak marnyak hanyhekomr.’

⁵ Nd mi bunduha niyet tkitm Bro Nkifrar yak marnyarahrm.

Nd muh wohneni hanyet kminysofm ror nhaf tou gifa marnya hanyarahrm.

Nd tirngna htani hanyet yihotam rorn touwak hanyruharn be yihotam yak teh marnyarahrm.

Tamoh tahi siket tkitm ror yak marnyarahrm.

Yak marnyahato yihotam be wutham rhurahrm.

⁶ Ndhtet ndhtet tkitm yak marnya bomarnyahato ee nd yimaroh minrfa htiryakyukr Bro Nkifrar kfo tkruraforuhatr, htiyakrah-komr.” *Ais 40.3-5*

⁷ Bok met yindarim Jonr baftaisafo hanyhato kfaf hany memourm, “Arom nandomrhu yon kunyso, Bro Nkifrar yimam yak tutfa thombat, finji yak hhrifnrurahako? ⁸ Nikmoh nefm, tohefm amfrfnah marnyakahtn riruh aruhyukm htiruhamn duka mirahm, ndm bi mong trohmomm fasoh fasoh nefm. Bi mar nukat tohwom. To mirahko, ‘Ka nom Abrahamrhu yon kunysn ka yak trohnirahrnom.’ Nhai. Ndt rot niko mirahko bro yima yuhum ahtanomt. Wawanyko. Na kfiwanko, Bro Nkifrar akfor, nda tahim yak krekutrfoftrm, Abrahamrhu yonm rhurfom. ⁹ Hudarim bi mispimn bi frhamsisetm korhm. Fitoh mim nhai hifa yukha hir marnyakahm, nd hudariye yohakhany yohakhany, kahrpantn dbuhaf hanyrahm.”*

¹⁰ Jonr inji kfomotrm, tfit romn ttiwon memorm, “Tone nome finji naruhanom?” ¹¹ Kfo memorm, “Yimar hus hmbreshetre, wom that yakhato wom hmbresha duhatrn hefot. Yo yimar yeshretr, be nd rpahtet neft nakfot.” ¹² Takis marum yakmoa yimam nhaf baftais yakneft niahato

* 3:9: Nd kfo nhombra mrokfot Bro Nkifrar nda bbinysofthu fasoh yimam yak thuruha nmbuhathu kfo nhombra kfoyet.

ttiwon memomr; “Nome finji naruhanom?”¹³ Kfo memorm, “Niko maruha yakneft mirahko wom maruham be tunmoh duka fijo ayak furanomm. Nd gafmanr kfo htayuk maruharpam yakkfot.”¹⁴ Yo wom soldiam nd baftaiskfot nia yak hanyukm nhaf ttiwon memomr; “Nome nhafne finji naruhanom?” Kfo memorm, “Mirahko yimam kfo yakrmehato marum ayak hanynomm, o yimam kotim furahato maruham ayak hanynomm. Tuko hingrnayuk maruharpam yakkfot.”

¹⁵ Bok met yindarim rroh hbhakyuk yima Kraistr gari hasetmn, tfit Jonr inji kfomohat, to be rroh dukeft duka memom, “Ka asor nd nom gari hasiwa yimar.”¹⁶ Jonr memorm, “Na be nda bupa furaye baftaiswanko. Tor nanhu mong yuhat niewa yimarn, tor tu yimar. Na nhai ror kanjo bbukeft hatohkaha. Na, na be yima furaya rorhu senderfhu ki jbkafyuk mtinf kak nyusakahukanr.† Rorn Bro Nkifrarhu Yafothati kahe baftaisimrahrko.¹⁷ Ror witthu hoftha kr nd ndrroh thu krhayuk safort tirtn kakitohwort. Tu hifa witham yak nhafohruharm, turhu naku dany kunysn htarahrm. Nd hoftha kr tikmn tu yiha yiha nanyjar hatohet kahtn kandhi thurahrm.”‡

¹⁸ Jonr mrokfom pthamohat nhai be nd mrokforpam kformor. Hifa hifa dborioh mrokfom kfo yingmarimorm.

Herotr Jonr kalabusn yak htamo yuhat

¹⁹⁻²⁰ Jonr pthamo mrokfom rom hifa pthamorm tfit turn nd Judaroh gafmanr kutewumr Herotr, ror nahnamo fasoh fasoh nefmi yo najom tuhan Herodias yakmo yuhat, nd ndmpno Jonr kfo nyingo fnahmotr; be wom Herotr namburhato Jonr yakhato kalabusn htamorr. Herotr nd Jonr kalabus htamo yuhatpno tot tu wom bro fasoh neft ror namot.

Jonr Jisatr baftaisimmo yuhat (Matyu 3.13-17; Mak 1.9-11)

²¹ Yima bugam baftaishany baftaishany, ee Jisatr baftaismor. Ror baftaisnihato kfo bruttna hanymor, ee yura mountko htimortko yoh tnehmohat.²² Mount yoh tnehhato nd yoh tnehmo yuhatn wuhtiyakmort Bro Nkifrarhu Yafothat ganyom mmkrs kanjo yak nhombranehato fawihnamot. Be nd ganyom mmkrs yawihnamotn yimar mirhumot. Tfit yura mountko wom tngt wanymort. Nd tngt kfo hany memot, “Ni nanhu yone. Nanhu marbit korhwot ninn. Hifa hti yindhorrwann.”

Jisatrhu nkifram toh hnamo yimaroh yufam (Matyu 1.1-17)

²³ Jisat Bro Nkifrarhu hingrneft rihingrnakmohat bi 30 gunyjimetrn, Bro Nkifrarhu hingerneft rihingrnakmort. Nd yonr niamo yuhat myak hikakmohat wom yimam duka memom, “Ka Josefrn yifemmorr nd yon Jisatr.” Asot nd duge katfonyuk yifemrhu nkifra yuhat inji: Josefrhu yifemr Helir.²⁴ Helirhu yifemr Matatr. Matatrhu yifemr Lifair. Lifairhu yifemr Melkir. Melkirhu yifemr Janair. Janairhu yifemr Josefr.²⁵ Tfit Josefrhu yifemr Matatiasr. Matatiasrhu yifemr Amosr. Amosrhu yifemr Nahumr. Nahumrhu yifemr Eslir. Eslirhu yifemr Nagair.²⁶ Nagairhu yifemr Meatr. Meatrhu yifemr Matatias. Matatiasrhu yifemr Semenr. Semenrhu yifemr

† **3:16:** Wom yimar hatohyuk senderroh ki jbkafyuk mtinf yak nyusak thumoahat, tu yufapa duha yima furapamn womr hatohyuk senderm kak thumoumm. ‡ **3:17:** Nd kfo nhombra mrokfot hifa yimami fasoh yimaroh kfo nhombra kfoyet.

Josekr. Josekrhu yifemr Jodar. ²⁷ Jodarhu yifemr Joanar. Joanarhu yifemr Resar. Resarhu yifemr Serubaberr. Serubaberrhu yifemr Sealtier. Sealtierhu yifemr Nerir. ²⁸ Nerirhu yifemr Melkir. Melkirhu yifemr Adir. Adirhu yifemr Kosamr. Kosamrhu yifemr Elmadamr. Elmadamrhu yifemr Err. ²⁹ Errhu yifemr Josuar. Josuarhu yifemr Elieser. Elieserhu yifemr Jorimr. Jorimrhu yifemr Matatr. Matatrhu yifemr Lifair. ³⁰ Lifairhu yifemr Simeonr. Simeonrhu yifemr Judar. Judarhu yifemr Josefr. Josefrhu yifemr Jonamr. Jonamrhu yifemr Eliakimr. ³¹ Eliakimrhu yifemr Melear. Melearhu yifemr Menar. Menarhu yifemr Matatar. Matatarhu yifemr Netanr. Netanrhu yifemr Defitr. ³² Defitrhu yifemr Jesir. Jesirhu yifemr Obetr. Obetrhu yifemr Boasr. Boasrhu yifemr Salmonr. Salmonrhu yifemr Nasonr. ³³ Nasonrhu yifemr Aminadafr. Aminadafrhu yifemr Atminr. Atminrhu yifemr Arnir. Arnirhu yifemr Hesronr. Hesronrhu yifemr Peresr. Peresrhu yifemr Judar. ³⁴ Judarhu yifemr Jekofr. Jekofrhu yifemr Aisakr. Aisakrhu yifemr Abrahamr. Abrahamrhu yifemr Terar. Terarhu yifemr Nahorr. ³⁵ Nahorrhu yifemr Serukr. Serukrhu yifemr Reur. Reurhu yifemr Pelekr. Pelekrhu yifemr Eber. Eberrhu yifemr Selar. ³⁶ Selarhu yifemr Kenanr. Kenanrhu yifemr Apaksatr. Apaksatrhu yifemr Semr. Semrhu yifemr Noar. Noarhu yifemr Lamekr. ³⁷ Lamekrhu yifemr Metuselar. Metuselarhu yifemr Enokr. Enokrhu yifemr Jaretr. Jaretrhu yifemr Mahalalerr. Mahalalerrhu yifemr Kenanr. ³⁸ Kenanrhu yifemr Inosr. Inosrhu yifemr Setr. Setrhu yifemr Adamr. Adamrhu yifemr Bro Nkifrar. Tom inji Jisasrhu nkifraroh yufam.

4

Satanr Jisas kfo nhebehmo yuhat (Matyu 4.1-11; Mak 1.12-13)

¹ Jisasr tek Jodent htanymohat, bi Bro Nkifrarhu Yafothat thu nhombrayetrn, to be nd Yafothatn yak hatoh hanymott, yimor yima toh duha tkit furatn. ² Jisasr 40 yiham nd tkitt tohhato Satanr niahato kfo nhebehmourr.

Nd ror tohmo yiham nhai nuwa yarmor. ³ Tu wuroh yiharn bi yatinoh namborhohetrn, nd Satanr tfit mfnahhato kfo memorr; “Ni Bro Nkifrarhu yonn rhu thombat, ndar tahis wakfokahtnt, bret nuwat kekutraht.”

⁴ Tfit Jisasr kfo memorr; “Bro NKifrarhu gonborngt kfo kangt, ‘Nhai wom yimar nuwarpat yehato toh wonakrmor.’”

⁵ Inji kфомotr, tfit yaknimorr hamuhmorr yura kminysofmn. Yura mhatohhato fak nuhasmorr ndar bbinysofthu kmi kmim. ⁶ Kfo memorr; “Nda bbinysoft nann tohukatohwant. Fitoh yimar he yibonkfot kfiwa, nd yimarn kahuka. ⁷ Ndnatn kanga akfoyann, ni hikrahna, be ninn nda bbinysoft tohukatohraht.” ⁸ Jisasr sinyahato kfo wok memorr; “Bro gonborngt kfo kangt, ‘Bro Nkifrarpar hikkfot. Rorrpar tor tu Nkifra mifr. Rorrparhu hingrneft yakitohkfot.’”

⁹ Inji nna pthanihato tfit nd Satanr yaknimorr; hanymorr Jerusalemko yorhwa temperrhu mingiahurhu bikatitn. Yura mhatokmorrn, kfo memorr; “Ni Bro Nkifrarhu yonn rhu thombat, watuhatoknikahnn, bbinysoft wamitowonn. ¹⁰ Bro gonborngt kfo kangt, ‘Ni tuhatokni thombat Bro Nkifrarhu mounmotm kforuhatrn, wuyakitohak hanyrahmn. ¹¹ Rroh tirmn mirhuniruhann, nhai tahimpno mita wokruhatnm ninhu wuram.’”

¹² Jisasr tfit kfo wok memorr, “Bro gonborngt kfo kangt, ‘Mirahn Bro Nkifrar be yuwi awastiwonanr.’”

¹³ Be nd Satanr womhtet womhtet nefm nhombra nhombratihato be afo htanymorr.

Jisasr Galiliko yihato rihingrnakmohat Bro Nkifrarhu Yafothathu bbukeftpno rihingrnakmor (Sapta 4.14–9.50)

Jisasr Galilit rihingrnakmo yuhat
(Matyu 4.12-17; Mak 1.14-15)

¹⁴ Be Jisasr tfit yimor Galiliko. Bro Nkifrarhu Yafothathu bbukeft be hatoh twanho hanymort. Jisasrhu mrokfot Galilikorhof kmi kmim ptha habrimotrm, yimam wany bugamomt. ¹⁵ Judaroh rhu rifinyuk rmontn yihato mrokfom pthamoatrm, bok met yindarim ror pthayuk mrokfom wany yindhormoumn.

Nasaret thofm Jisasr mong trohmo yuhat
(Matyu 13.55-58; Mak 6.1-6)

¹⁶ Jisasr tur toh warhomo kmi Nasarethu rifinyuk rmont rhu krna Sabat yihar fknenimohat yiha yiha fkneni hakumoa yuhatn hikmorn fknenimor. Fknenimorn, Bro Nkifrarhu mrokfom ptha yibonetrn, be yau yaknihato rim tohmor mrokfo pthayuk tkittn. ¹⁷ Rim tohmot, profet Aisair wandfamo mrokfom hemomr. Mrokfefm yakrir hmbreyetmn, to be yak nyimbusakak hanyhato wom mrokfom mihtimorm. Nd mrokfom inji kfomom: ¹⁸ “Nann Bro Nkifrar bi fak htamora wuska duha yimami maruha duha yimaroh hifa dborioh mrokfothu kfo nuhasneft. Ndnatn Bro Nkifrarhu Yafothat nann thu nawohmot. Bi kfo memora, ‘Waikahn, mrokfot waptha wamitwa, “Niko kalabus tohyukko tmifko wafahniko. Niko nyinga kunyjetko tfit wayukatohko. Niko yimam yak bebhato yima yuhenn gumuha muhtunitwako, yima yuhum amirhutwamko.” ¹⁹ Yo Bror kfo tkuraf memora, “Wakfo nuhas wamitwann, asor bi rroh yak marnya yihar bi.””

²⁰ Jisasr nd gonborngthu mrokfom ptha buganimormn, tfit yakrirak-mortn, tu kunys tohyuk yimarn rihihato warhumor. Btn nd kunys rhuyuk yimaroh nyingam be rorparn rukatohmoum.

²¹ Jisasr rhuhatu nd kunys rhuyuk yimam kfo memorm, “Nda niko wanu mrokfot to bi asot bi arihatn nd neft htitwokom bi mfrfnah hanitt.” ²² Jisasr inji kfomotr, nd yimam wanyhato duka memom, “Ndar yimarhu mrokfom hifa hifa ptha hik bohik marnyewurm mrokfom. Ka nhai Josefhu yonr rhukahr?”

²³ Jisasr memorm, “Na kfo mifwanko, mirahkma, ‘Ni doktaye ninhu dbohneft tunn wayak thunt. Ni Kaperneamt tohhato namo nefm kanjo nda tunhu kmi mnat tohwohat inji wana.’” ²⁴ Kfo memorm, “Na kfo mifwanko, nhai wom profetr turhu kmi mna thofm yak miyakhato ror pthayuk mrokfom wany yakio wonakrmomr. Nhai. ²⁵ Irajjarhu tndht wadukakomt. Irajjar tohmo yiha Isrerko husfirpa gunyjimmi 6-pela yamm bro yinr tohmor. Bro yinr tohmot, yewurit noh witamot. Noh witamott, yatinoh tohmoum. ²⁶ Nd yiharn bok met dhirm Isrerko yatinoh tohato naku-moum, ‘Irajjaye, wania, wahti dukannom, nom yorhwa krho nmbuhat.’ To nhai, Bro Nkifrar nhai marimorr, ‘Rompno waiswa.’ Nhai. Tfit nndoh

wom Saidonkorhof kmi Sarefathu met dhirtpno yak hatohafo-motr; rotpno yihato htimort rothu krhopam. ²⁷ Yo womt dukakfot. Siriakorhof yima Nemanrhu hun mimbret yak marnyamo nmbuhath, ndt nhaf inji rhumot. Iraisar profet hingrneft tohmohat nd tuha Nsrerthu hun mimbretm nhai marimor; 'Yak marnyaruhanm.' Nhai. Tfit nndo wom kmi Siriakorhof yima Nemanrn Irajair yimorn, fak marnyamor.

²⁸ Nd kunys rhuyuk yimam Jisasr pthamo mrokfom wanyhato nam-burmom. ²⁹ Namburhato Jisasr yaknihato nd taun Nasaret tahiye gna habriyettn, to be briahako fak hfnahnimomr. Briahako hfnahnihato nd taun Nasarett yura wom kmi mfhat ruhettn, to be Jisasr yaknimomr; kmi yengongko mihatohhato memom, "Atashotafkahtnomr; amisuhr." ³⁰ To nhai, nd yimaroh rifiny buharn yau inyar fnahhato yimor.

Jisasr kmi yarh fknayet yimar yak marnyamo yuhath
(Mak 1.21-28)

³¹ Jisasr yimorn, tfit Galiliko yorhwa kmi Kaperneamt n tfit mifnahmor. Ndha mifnahhato ndkorhof rhu rifinyuk rmontn rhu krna Sabat yiham fknemoarn, Bro Nkifrarhu mrokfom kfo nuhash bonuhasmourm. ³² Jisasr pthamo mrokfom tu hifa ptha yembindtmoatrn, yimam nd ror pthayuk mrokfom wanyhato bok dukefm yakhato duka memom, "Barenko, ndar yimar pthiwa mrokfom hifa ptha yembindt marnyewurm." ³³ Nd Judaroh rhu rifinyuk rmontn rhumor kmi yarh fknayet yimar. Nd yimar sinyahato tau nakuyafhato kfo huttt memor; ³⁴ "Nasaret thof Jisase! Ni asha niaronn, nome finji naruhanom? Nmoh yak batit niaro? Hti nhtiwann ni Bro Nkifrar yak htamo yimaye."

³⁵ Jisasr sinyahato nd kmi yarhr kfo huttt memor; "Ni nd kmi yarhe, tmifn tngt wayoukihkahnt, nd yimar wathu troh tanyrn." Be thu troh tanymotr; nd yimar suh hasomor. ³⁶ Yimam nd Jisasr namo neft htihato wutthamom. Memom, "Bar yimako, nd yimar pthe mrokfote tamoh bbukettn nd kmi yarhr wanyhato nd yimar thu troh tanyrr?" ³⁷ Be nd Jisasr nayuk nefm yimam htihato kmi kmi nnakfo nuhashi hanymom.

Jisasr Pitarhu matohemt yak marnyamo yuhath
(Maty 8.14-15; Mak 1.29-31)

³⁸ Jisasr Judaroh rhu rifinyuk rmont htanyhato tfit yimor Saimonrhu kunysn. Saimonrhu matohemt kkah dbohnettn, nd kunys rhumot. Jisasr nd kunys yimotr; kfo memom; "Nd mett wayak marnyant." ³⁹ Jisasr nd mett hwemo tiktpno rim tohhato nd metthu dbohneft htihato kfo nambur-motr; nd dbohneft thu troh tanymott. Be nd mett yudbat marnyani hanyhato yeshrim hta mskahemotm.

Jisasr bok met yindarim yak marnyamo yuhath
(Maty 8.16-17; Mak 1.32-34)

⁴⁰ Marr bi yohni hanyetrn, fitoh yimaroh yimatm womhtet womhtet dbohnefm yak hanyetm hne hna hanymomm Jisasrpno. Jisasrpno hnamoatmm, tir htahfanymoatrn, marnyani hanymoum. ⁴¹ Nd kmi yarhm fknayetm marnyani hanymoum. Nd yimam fknemoa kmi yarhm tau yakhany, tau yakhany, thu troh tany hanymoum. Thu troh tanymoahat kfo tany hany memom, "Ni tu Bro Nkifrarhu yone!" Nd kmi yarhm bi hti nhta memom, "Ndr yimaroh hbhakyuk yima Kraiser." Ndnatn Jisasr

inji wanyhato nd kmi yarhm kfo gadiyaf hanyomoarm, nhai tfit pthani hanyromoam.

Judiaroh rifinyuk rmonm Jisahr yihato mrokfom kfo ptha htfasmo yuhat (Mak 1.35-39)

⁴² Tfit dbha ksfutn nd kmit htanymortn, yimor wom yima toh duha tkittn. Yimotr, yimam hambro hambro be wuruh natn mhtimomrn, kfo memomr, “Tamohmpno htanywannom? Nom wofnkahnom ninhu nmoh htanyneft.” ⁴³ Jisahr inji wanyhato kfo memomr, “Nann Bro Nkifrarhu kingdomkfothu gutnius mrokfot kmi kmim yi htfashato kfo nuhas htfaskfot. Nd hingernefthu hingerneftn Bro Nkifrar kfo tkrurafmora.” ⁴⁴ To be ndnettn Jisahr nhai tuharpa ptha hasormoar. Judiaroh kmi kmiroh rhu rifinyuk rmonm yihato Bro Nkifrarhu mrokfot ptha htfasmoart, wanymoumt.

5

Jisahr yakmo barkof hingrnanho yimam (Matyu 4.18-22; Mak 1.16-20)

¹ Wom yihar Jisahr Genesaret bari thmbt tohhato Bro Nkifrarhu mrokfefm ptha hasomotr, bok yimam brbo brbo hany yukukaknihato memoum, “Awanyanom ror pthiwa mrokfom.” ² Jisahr tohhato htimorf wom hus mmbf yura nungutn teh hatonatamomfn, yimam nd mmbf tikatm rugim, ndm thu kibofsamoum. ³ Jisahr nd mmbf htihato wom mmbf mikmbremor. Nd ror mikmbremot Saimonrhit mikmbremor. Mikmbrehato Saimonr memorr: “Watakiowafokahnn, mmbf wuri kkof arim hirt.” Be nd mmbf wuri kkof rim hahirmotr, Jisahr nd mmbf rhuhato Bro Nkifrarhu mrokfefm kfo ptha nuhasmourm nd yima rifhur.

⁴ Ptha buganimorn, Jisahr kfo memorr Saimonr, “Wayangonikahnn, mmbf tek dany yuhat arim hirkaht, nini ninpno yira yak htfasyuk yimako rugim wayafhokahkomn, yiram watuhaktwako.” ⁵ Saimonr watohhato kfo memorr, “Bro yimaye, hrek yifungr nhombra nhombra nfha titawonom, nhai wom yiren yrakfonom. Nhai mrokfom, ninhu tngtpno tfit afo rugim yafho thuwonrahnomm.” ⁶ Rugim yafho thuhato tfit memom, “Wayaknomm,” rugim be tu yoh tmbrafkot inji namom. Yirat nhai be ffirmhato yakrmom. ⁷ Be wayak nhombatihato tfit nd wom mmbf hiriyukm tire hungasakhato memomm, “Waniako.” Be niamotm, rpat nd hus mmbf mano mano tohhato watch sohakmomm nd yira rugim. Btn nd rugiroh yiram yakhany, yakhany, nd hus mmbf be yoh yifkof inji namof. ⁸ Saimon Pitar inji htihato Jisahrhu wurampno yihom suhhato kfo memorr, “O Broye! Be tmifn wahtanykahna, wanju. Na fasoh nef nayet yimaya.” ⁹ Rori nd mmbf rhuyuk yimam nd yonmari yirat htihato memom, “Barenko! Nome ndar yirate finji yurhtes?” ¹⁰ Saimonrhu yarmotemrof Sebedirhu yonf, Jems Jonrof, rof to inji nhaf nd yirat htihato mrokfo kfo duhat rhumof. Jisahr Saimonr kfo memorr, “Ayanhowahn. Kto ni to inji nd yiram yek kanjo yimam inji yakrahnm.” ¹¹ Be nd mmbf rim tatrnhato nd tamoh tamoh wuskar htanymomrn, Jisahr tfit mhikakni twanhomom.

Jisahr yak marnyamo lepra dbohneft yaket yimar (Matyu 8.1-4; Mak 1.40-45)

¹² Jisahr wom kmit tohetrn, wom lepra dbohneft yaket yimar niahato Jisahrhu wurampno msuhhato mkfo memorr, “Broye, ndar na hatohwa

dbohneft yak thurahnt, to be thu troh tanyrahta.” ¹³ Jisasr inji wanyhato nd leprayet yimarn tirt rihtahato kfo memor, “Uwa, na yibonwa.” Inji kfoni hanyhato nd dbohneft kfo memort, “Wathu trohnr.” Inji kfomotr, nd dbohneft yudbat thu trohmotr. ¹⁴ Thu troh tanymottr, Jisasr nnhuhato kfo memorr, “Ni nda dbohneft thu troh tanyhat, mirahn tfit womm akfo nuhasanm. Mosesrhu boririfhut yak hikkfot. Yimam lepra dbohneft yaketm marnyanimoahat inji namoum. Nd hun gifam prisrpnno myak nuhasnimoamn, tarioh mthamoum. Nd tarioh mtha yiharn prism ndt htihato kfo memoum, ‘Nd yimarhu dbohneft bi thu troh tanymotr.’ Ni nd yuhat yak hikkfot.” ¹⁵ To nhai, nd Jisasr hingrnamo hingrnfethu mrokfot nhai tfit wom kafrohromt. Bok tng rihar rhu fnahmott, bok yimam wanyhato niamom, memom, “Yiruhanomn, ror pthayuk mrokfefm wanyhato dbohneft yak thurahrnom.” ¹⁶ To nhai, yima duha tkitt yimoarn, kfo bruttnamoum.

*Jisasr tir wura minysafet yimar yak marnyamo yuhat
(Matyu 9.1-8; Mak 2.1-12)*

¹⁷ Wom yiha Jisasr wom kunysn rhumor. Nd kunysn rhumotr, yimam nd kunysn rifinymotm, Bro Nkifrarhu mrokfom kfo nuhas bonuhasmorm. Nd yima rifiny buharn wom Farisimi boririfhuthu tisam rpat nia rifiny-mom. Bok kmi kmim rhuyuk Farisimi boririfhuthu tisam niamom, womm Galilikorhofm, womm Judiakorhofm, yo womm Jerusalemkorhofm. Nd yihart yimaroh yak marnyayuk bbukeft Jisasr thu nhombramotr. ¹⁸ Wom yimar tir wura behohetr to bi wom yimamn kroketr hne hnamomr. Nd yimarhu wuram bi noh minysaf bugamomr. Memom, “Hiyau hafkne-nikahnomr, Jisasrpnno brbo rim htarahnomr.” ¹⁹ To nhai, hanyuk yihotat bok yimam rifinyhato toh dbu hmbriyafmotmt, be nhombratihato tfit yura kuny mingiahuko yak tmbrafomomt, nd yimar yura mingiahu yuhat hamuhmomrn, yura mingiahu yuhatn yuht kroketr mano mano mtitofm tafhato thu nyusakaf hanymomrn, tfit yiro kuny yurukko tohyukmn yakmomrn, Jisasrpnno rim htamomr. ²⁰ Nd yimar hany rim htamohat rroh dukefm duka memom, “Jisasr yima yak marnyetr. Nda minysafet yimar ror kforahr be marnyanirahr. Nhαι tfit nd minysaf rifhut rhuruhattr.” Be Jisasr rroh yima yuhum inji htihato kfo memorr nd yimar, “Yinowe, ninhu fasoh nefm bi fak tuhahuyann.” ²¹ Nkifra boririfhuthu tisami Farisim Jisasr pthamo tngt wanyhato tum rinahti nahtihato kfo memom, “Nd yimare, kangr Bro Nkifrarhu tkitt ayaka. Nhαι wom yima furarn yimaroh fasoh nefm yak thukfot. Bro Nkifrarpar yimaroh fasoh nefm kak thuworm.” ²² Nd yimaroh yima yuhum inji dukamohat Jisasr bi htimorm. Htihato kfo memorm, “Tamohmpno inji riduka adukiwako? ²³ Kangko finji akfoyane? Kangko akfo amiyar, ‘Ninhu fasoh fasoh nefm bi fak tuhahuyann?’ O kangko akfo amiya, ‘Wasinya wayauyakni?’ ²⁴ Na, Bro Najoma, yimaroh fasoh fasoh nefroh yak thu yafothat Bro Nkifrar bi hemora. Afo asomif wom neft yak nuhasrhotanko, duka mirahko nd yimar bro yufeter.” Inji kfoni hanyhato nd tir wura minysafetr kfo memorr, “Na kfiwann, wasinyakahn krokt wayaknikahnt tunhu kunyko wain.” ²⁵ Be inji kfomotr, tuha nd yima rifinyrhu nyingahato wasinya-morn, nd tur hwemo krokt yakmorn, be Bro Nkifrarhu yindhorefrparpno yimor kunyko. ²⁶ Nd yima rifhur nd kunys tohmor, Jisasr namo neft htihato be tuha tir pinyafm youtahato tohmom.

Kfo memom, “Hrek be tu womhtet neft htitawonom.” Inji dukahato tuha Bro Nkifrar kfo yindhor boyindhormomr.

*Jisasr Lifair naku yakmo yuhat
(Matyu 9.9-13; Mak 2.13-17)*

²⁷ Nd neft htinimomt, tfit kto Jisasr fnahnihato takis maruharoh yakyuk yimar turhu takis marut tuyuk kunyent rhu hasetrn yihom htimorr. Nd yimarhu yufat Lifair. Ror yihom htihato kfo memorr, “Wania wahikna.”
²⁸ Lifair wanyhato be nd tamoh tamoh wuskam htanyormn, hikakni twanhomorr.

²⁹ Kto Lifair turhu kunysn yemro burwat yak htatamortn, Jisasr naku yakmorr. Jisasr yihato nd yemro burwat rhu famoft. Nd wom wom yimam yo tu nd rpahtet hingrnafat tohyukm rpat fenyhomomf nd yemro burwat. ³⁰ Farisimi boririfhuthu tisan htihato Jisasrhu disaiperm kfo nambur memomm, “Tamohmpno nd takis yekwa yimami nd ufasoh nefm nayet yimam rpat rhuhato nuwa ye mskewako?” ³¹ Jisasr inji wanyhato kfo memorm, “Yima furam nhai be yi furakahm hunkotharpno. Nhai. Dbohnet yimarpam kitwom hunkotharpno. ³² Na nhai dborioh yimaroh dukeftn niarmoya. Nhai. Na fasoh fasoh nefm nayet yimaroh dukeftn niamoya. Memoya, fasoh fasoh nefm nayet yimampno yirhoyann, kforhotanm, nd rroh fasoh nefm yafhorahmm.”

*Nuwa kur nefthu ttiwon nmbuhat
(Matyu 9.14-17; Mak 2.18-22)*

³³ Wom yimam Jisasr kfo memomr, “Jon Baftaisrhu uhik ahik htfasyuk yimam Bro Nkifrarhu kfo bruttna yihar brio nuwa kurhato kfo bruttnewum. Yo Farisiroh uhik ahik htfasyuk yimam, rom nhaf inji na bugewum. To ninhu disaipermne tamohmpno nuwa ye hanitam nd kfo bruttna yihar?”
³⁴ Jisasr kfo memorm, “Wom yimar wom mett yakrah; rorhu yimatm nhai bi nuwa ye kafhokahmr ror afo rompno yuhre rhu mska inji na thombat. Nhai. ³⁵ To tfit kto yak hambrafurhamr, ee bt rorhu yimatm nuwa kurhato rhurahm.

³⁶ Nhai wom yimam muhet yatk hmbreshat tfit wom nfri hmbresharhu mkum yakhato nahu hmbrikahmt. Nhai. Nd yatk hmbreshat tfit wom nfri hmbresharhu puk mku yak hanyhato yakhato nahu hmbriahnt, nd yatk hmbreshat nhai hifa htiruhantn. Faso hti bebrahnt. Yo nhaf nd dborioh nfri hmbreshar nd puk tmbho botmbho neftpno muh bomuh tiketr rhurahr. Nhai hifa hti yindhorruhatnr. ³⁷ Yo nhai yimam nfri wain bupam yakhato yatk meme tha kpmn tas hmbrikahmm. Nfri wain bupam yakhato yatk meme tha kpmn tas hmbreneft nd nfri wain bupam rikur prhoruhamn nd yatk meme tha kpt frtfohhato wain bupam mitoh bugarahm. ³⁸ Ndnnett nfri wain bupam tu nfri meme tha kpe tas hmbrihato be nhai kpm yoh tfoh inji nakfot. ³⁹ Yo yimar yatk wain bupa fut wofnetr nhai tfit wofnkahr nfri wain bupa futneft. Yatk wain bupa fut wofnetr kangr, ‘Yatk wain bupam hifa.’ ”

6

*Rhu krna Sabat yiharhu mrokfot
(Matyu 12.1-8; Mak 2.23-28)*

¹ Wom rhu krna Sabat yihar Jisasri turhu disaipermmpno wit swirr yihato yau nanyor hanyhato nd wit shuroh wit dmm yak tmbhak hanyoamm,

tire tire yak rir tfka botfkamoamm, krm misuhmoatm, ki hanyomoumm. ² Farisim inji htihato kfo memom, “Tamohmpno inji neko? Bro Nkifrarhu thfa mntwat inji kfiwut, rhu krna Sabat yiha nhai ndpa ndpam yak tmbhakkfot.”* ³ Jisasn inji wanyhato kfo memom, “Nikone Defitri wom yimam yatinoht rhu hasohato nkifra temperr rim htayet nuwa rikat rim yakhato yamo nmbuhathu tndhte, ka htitkomt o nhai? ⁴ Defitri to Bro Nkifrarhu temperr fknienihato nuwa rikat bi Bro Nkifrarhu yufatpno rim htayukt rimakmortn, briahako turhu yaunho habriyuk yimampno rim htahato famomt. Nuwa rikat bi Nkifrarhu yufatpno rim htayukt nhai be wom yima furam ye wonakrmomt. Tu prisrpam fiyakmomt. ⁵ Wawanyko, na nikmoh Bro Najomann nd rhu krna yihar kakitohwanr. Nd yihar kanga finji anaya, nhai tfit wom yima furar kfo htakfot.” Ndnatn nd Jisasrom namo neft nhai fasoh neft narmom.

Rhu krna Sabat yiha yak marnyamo tir gram tip behohetrhu mrokfot (Matyu 12.9-14; Mak 3.1-6)

⁶ Tfit wom rhu krna Sabat yiharn Jisasn Judaroh wom rhu rifinyuk rmomt yihato Bro Nkifrarhu mrokfom ptha nuhasmorm. Nd rifinymo kunysn wom tir gram tip behohetr rhumor. Mano tir mifkorhof tir gram tipt yak wok tkittn mnoh minysafakmotr. Tir pinyafm kfe mngomotmr, be nhai thu susnarmoarm, be inji hoketm rhumoum. ⁷ Rom nd Farisimi boririfhuthu tisam, rom bi niamom. Niamomn, nd yima rifinyrn bi mfkmemomn, tohhato memoum, “Jisasn nayuk tamoh nefm na thombat afo hti hikrah-nomr. Hti hikhato kfo hndhনারাহনোম্ৰ.” Ndnnetmn rhuhato memom, “Afo htirahnom dbohnet yimam rhu krna Sabat yiha yak marnyarahrme nhai.” ⁸ Nd yimaroh yima yuhum inji dukamohat, Jisasn bi htingotmorm. Htihato nd tir gram tip behohetr kfo memorr, “Buha yima rifiny buharn wasinya watohetohn.” ⁹ Be nd yimar sinya tohmotr, Jisasn kfo ttiwon memorm, “Niko finji dukiwako? Rhu krna Sabat yiha yimaroh yak marnyanefte, Bro Nkifrarhu boririfhut finji kfiwat? Rhu krna Sabat yihare hifa nefm nakfot o fasoh nefm nakfot? Yimam yak marnyakfot o yimam waskfot?” ¹⁰ Nd rifinymo yimam yukatoh nhombra buganimormn, nd yimar kfo memorr, “Tirt wathu susnant.” Be nd yimar tirt thu susnamort. Tirt thu susnahato marnyanimotr.

¹¹ Inji htihato masat namburhato tum rinakfo nakfo memom, “Nda yimare finji naruhanomr?”

Jisasn yakmo barkof 12-pela aposerm (Matyu 10.1-4; Mak 3.13-19)

¹² Kto wom yifungr Jisasn kfo bruttna nfhamor yura kmynysoftn. ¹³ Kfo bruttna nfahato dbharn nd rorhu disaiperm naku yakmorm. Naku yakhato niamotm, 12-pela kforpat fakmo. Yakhato kfo memorm, “Niko bi nanhu sioskfothu kasinya htfas-yukeko, bi nanhu aposereko.”

¹⁴ Rroh womr Saimonr, (kto tu Jisasrn nfri Pita yufat hmbremorr), yo womr Saimonrhu nmern Andrur ¹⁵ yo womm Jemsr, Jonr, Filifr, Bartolomyur, Matyur, Tomasr, yo Alfiusrhu yon Jemsr, yo Saimonr, wom

* **6:2:** Judaroh nkifra boririfhut, bi nkifram myakitoh fnahmot, kfo memoum, bro rhu krna Sabat yihar nhai wom tamoh hingnefenm hingrnakfot. Kfo memoum, nd yihar nhai wom tamoh yeshrim yakfot. Nhai. Nkifra gonborngt htikfot Kisim Bek 34.21. Farisim memom, nd thfa mntwat kfuyok mrokfotn hanyjbornamom.

yufat Selotr, ¹⁶ yo womr Jemsrhu yon Judasr, yo wurohr Judas Iskariotr. Tor nd Judas Iskariotr n hndhnamorr Jisasr.

Jisasr bok yimam yak marnyamo yuhat
(Matyu 4.24-25; Mak 3.7-12)

¹⁷ Jisasr yimam yaknimorn, tfit rpat fawihnamom. Yawihnehato tuha kmi kurhtn tfit nd wom yak troh tanymo yimampno tfit afo mirifiny-mom. Rifiny hasetmn bok yimam nd Judia-korhofm, Jerusalemkorhofm, Saidonti Tairkorhof tek afsor thmbm toh hanyukm, rpat met yindariyett nia mirifinyaknamom. ¹⁸ Memom, “Ai arifinykahnomn, Jisasrhu mrokfem wanyhato yo nmoh tamoh tamoh dbohnefenm yak thu hirahrnom.” Nd-ttet dukefetmn yimom. Nd kmi yarh fknayetm, rom yudbat marnyani hanymoum. ¹⁹ Nd yima yak marnyayuk yafothat tu Jisasrn hatohmourt. Ndnnetn yimam ndt htihat memom, “Amyaktikahtnomr, rorhu yafothatn nieruhatn, yak marnyarahnom.”

Yindhor yihari nur yihar
(Matyu 5.1-12)

- ²⁰ Jisasr turhu disaiperm yukatoh hanyhato kfo memor,
“Niko fitoh yimako tamoh tamohm yak nafwako, toh beb nmbuhat yi tohwako Bro Nkifrar hti hasiwurt niko tohwa toh nmbuhat. Rorhu kingdomkfot tohwoko.
- ²¹ Niko fitoh yimako arihat yatinoht tohwako Bro Nkifrar hti hasiwurt niko tohwa toh nmbuhat, kto ye furkihrahko.
Niko yimako nur hasiwako, Bro Nkifrar hti hasiwurt niko tohwa toh nmbuhat, kto tfit ningirahko.
- ²² Kto tfit htirahmko Bro Najoma hikruhatko, hti sr thurahmko, kfo yiritirahmko, kfo tfar-rahmko, kfo mirahmko, ‘Ar nthonroh yonm.’ Inji inji kforahmko.
To niko mirahko inji wanyhato tfit anambur kekutnom. Niko be yindhorkfot. Bro Nkifrar hti hasiwurt niko tohwa toh nmbuhat.
- ²³ Nd neft nhai be nikomrpakompno rhuruhatt. Nhai. Nd neft bingot bi profetmpno riruhakmot. Kto nikmoh hifa rhu nmbuhat Bro Nkifrar hirahrkonko yura hefenrn.
- ²⁴ To niko boknabok maruhetko tfit kfiwa. Wayeye! Hifa dborioh rhu nmbuhat bi arihatn htitwokomt.
- ²⁵ Niko arihat ye furkihwako, duka yanuhaf hanykfot. Kto be yatinoht tfit tohrahko.
Niko frohko arihat ninge yifa marnya bomarnyawako afo inji wanako. Kto tfit bu nyingam yoh dbottrahmko.
- ²⁶ Yo womt duka yanuhaf hanykfot bingotr Hof kfo hnu bohnyuet profetm namoa nefn. Rom namoa neft yimam hti-moammn, memoum ka tu neftn newum. Ndnatn kfo yindhore furamoumm. Ndnatn niko yimam kfo yindhore-womkone, mirahko ka dborioh yimanomn kfo yindhorewomnom.”

Niyak marnya yuhat
(Matyu 5.38-48)

- ²⁷ “Niko frohko nanhu mrokfot wanukako kfiwanko. Wom yimar huttworn, ni tawo hifa yima yuhur hmbrekfot nd yimar. Yimar hti srthuworn, ni tawo yak marnya bomarnyakfot nd yimar. ²⁸ Ni kfo beb

bobebuyuk yimar tfit ninn hifa kfo yima boyima marnyakfot. Nd yimam niko fasoh fasoh nefm nayukm niko tawo Bro Nkifrar pno kfo bruttna mekfot, 'Nd na fasoh nefm newa yimam wayak marnyanm.' Inji kfokfot. ²⁹ Wom yimar nambur hnehato yengongfat frtatr, tfit manoko mkukorhoft yak hta hekfot. O sakethat fak hrurekrn, to mirahn yirok hmbreyuk honathat ahakkrant. Rpat yak hrurak-hato hiyafkfot. ³⁰ O wom yimar tamoh tamohm tndauworn, yakhato hekfot. O wom yimar tamohm fahunr, ni tfit me juha, 'O na nd yiha nd yimar fahuyanr nd shrm. Tawo ahira.' Inji kfo duha. ³¹ Kangn, womm ayak marnyamane, barkofpam afo ninn sinyahato womr yak marnyakfot.

³² Tawo tawo hifa yima yuhum nahmbritarpako niyak marnyiwakomn, to tfit tamohmpno yamukako, 'Bro Nkifrar akfo yindhorrnom?' Nhai. Nd niyak marnya nmbuham nd fasoh nefm nayet yimam, rom nhaf newumm. ³³ Yo nd nikompno niyak marnyiwarpam yamukako, 'Tawo ayak marnyanom.' Tamohmpno yamukako, 'Bro Nkifrar akfo yindhorrnom?' Fasoh nefm net yimam nd nefm rom nhaf newum. ³⁴ Wom maruham hiyafhato dbima tndauneft, ndt nhai tu dborioh neft. To inji naruhakomn, frohm hti yindhorrhakomko? Nd fasoh nefm net yimam inji newum. Yimam tamohm hiyafhato tfit kto kangm, 'Nom niko yahuhat nd shrm tawo wahekmnom ndm.' ³⁵ Nikompno nakfo huttyuk yimam hifa yima yuhur htakfot. Hifa hifa yak marnya bomarnyakfot. Womm tamohm fahukomm, tfit kfo me juha, 'Na ni yahuhat nd shrm tawo wahina.' Nd na kfiwa tu hifa dborioh nef yuhat yak hikrahko. Kto be Bro Nkifrar hirahrko hifa rhu nmbuhat. Tu yura myorhekwa Nkifrarhu yonko rhurahko. To mirahko ka Bro Nkifrar nhai yuhuwafkahrn nd kfo yindhorr duhatm yo nd fasoh nefetm. Nhai. Ror yuhuwafworm. ³⁶ Nikomoh Bro Yifemr yima yuhuwafwa kanjo inji wayuhuwafkomm womm."

*Mirahko wom akfo amanyomm, "O ni ndhtet yimaye."
(Matyu 7.1-5)*

³⁷ Jisarr tfit wom mrokfot kfo memor, "Mirahko womroh nefm hti nhta yak nhtahato rroh nefm frhik bohikhenomm. Inji narahko, tngo Bro Nkifrar inji narahrko. Mirahko womm nayuk nefm htihatoy ayuta amenomm, ndr nder, o ndr nd nayet yimayer. Inji narahko, tngo Bro Nkifrar inji narahrko. Mirahko wom womroh nefm ayakitoh hanyinomn. Yafhorahkomm, tngo Bro Nkifrar niko nayuk nefm yafhorahrn. ³⁸ Womm tamoh tamoh hirahkomm, tngo Bro Nkifrar mikahtir tawo ahiyanko htirahko wuss tamohit mano mano nierahit. Yimam mfro mfro thu brurrahkomm, tngo to inji Bro Nkifrar mfro mfro thu brurrahko."

³⁹ Inji kfonihato wom mrokfot kfo nhombra memor, "Wom yimar nyinga kunyjetr nhai tfit yihato wom nyinga kunyjetr yak nuhas hanykfot yiyuk yuhat. Inji nanefit ka be hus bugaf yau mmo hanyhato bandrongfa muhmn myahot bani rpat dmetf yohnirahf. ⁴⁰ Nhai wom yonr yuhre wandfa kunys toh hanyetr rorhu dukefm bmbri wandfaharhum kanjo rhukahmr. Nhai. Ror nd yonr afo skur hany bi skur bugahato fekrf safekfot, ee btn rorhu safekfot tisarhut kanjo khrht.

⁴¹⁻⁴² Tamohmpno ni womnhu nyingatikt thu kasi rafoyuk yonmari doh mkut yaktafo duha tfit yamuka womrhu nyingam rhuyuk krpum ayak thuyayanr? Be tunhu nefm kak wuna bowunewun. Afo ninhu nyingatikt

thu rafoyuk doh mkut yak rihtafhato ee yukatoh marnya hanyruhann, btn womrhu nyingam rhuyuk krpum yak thuhirahr.”

Miyukmthu mrokfot
(Matyu 7.16-20; 12.33-35)

⁴³ “Hifa sinya warho marnyet mis nhai tfit fasoh yukha behohm hirkahmt. Fasoh sinya warho marnya duha mis nhaf inji buga, nhai tfit hifa yukham hirkahmt. ⁴⁴Yimam yukhamn hti nhtewum. Yukham hifayem kangm ee nd mis tu hifa dborioh miyet. Yukham fasohem, kangm o nd mis fasohet. Yimam fik yukha yakneft nhai yiro higef bufuyet tkitrohmm yakkahm. Yo wain mtithu yukha yakneft nhaf nhai nd higef bufuyet tkitrohmm yakkahm. ⁴⁵Yimar, tu hifa dborioh yima rifuhetr, tu hifa mrokfo rifhur, tu hifa dborioh nefm mfrfnahnewumr. Fasoh yima yuhetr fasoh fasoh nefm mfrfnahnewumr. Yima yuhur rhuyuk tamoh tamoh mrokfo rifhur tfit tngtn ptha nriyafwotm.”

Hus kanjohot kunyf
(Matyu 7.24-27)

⁴⁶ “Tamohmpno naku kfo yamukako Broye! Broye! Na inji nakutahat to btn wakhikkomt nanhu mrokfot. To tamohmpno yak hik duha yitakomt. ⁴⁷Fitoh yimar nanhu mrokfom wanyhato yak hikwa nmbuhat, afo kfo nhombraruhanako. ⁴⁸Nd nanhu mrokfom wany yakiowet yimar, tu hifa duka tungunet yimam kanjo rorhu kuny hingerneft, muhm tou hauhnihato yiro tahi siktpno rahu pokm simene simenim hmbriyafhato be nd simen tahimn hatohkfot rahum. Nhai ninor ba inji nakfot. Hnut wuhnu sinyaneft nhai nd kunyr tadboutakhato suhkfot. Bi nd yonmari simen tahi sikt hatohet kunyr to finji kanjo suhkfot. ⁴⁹Tfit nd wom yimar, nanhu mrokfom wanyhato yak hik duhatr, nd yimar akfonom yima dukef duhat yimam kanjo rorhu kunys be inji yak brurtahato, hnut nianeft nhai nd kunys toh bmtakfot. Be yudbat hnu buyeft yihom tadboutaknehato tadbombra tubatunikfot.”

7

Amiroh keptenrhu hingrna yimar dbohnamotr Jisasr yak marnyamo yuhat
(Matyu 8.5-13)

¹ Jisasr ndharhof met yindarim mrokfom kfo ptha dbruf tany buga hehato tfit yimor Kaperneamko. ² Ndarhof amiroh keptenrhu hingrna yimar dbohneft yakhato be tu bi brboht rhumot nohneft. Nd amiroh keptenr be tu marbitn htamourr nd rorhu hingrna yimar. ³ Ndnatn Jisasrhu nia mrokfot wanyhato wom Judaroh bro yufet yimam kutewumm “eldam,” rom tkrurafmor Jisasrhu mihtiyakhato rorhu hingrna yimarhu yak marnyaneft. ⁴⁻⁵ Nd yimam yimomn, Jisasr mkfo naku memomr, “Nd yimar tu dborioh yimayer. Nom Judanom hifa kak marnyewurnom. Rorn nd nmoh rhu rifinyuk rmont hingrnamort. Ndnatn waniakahnn, rorhu hingrna yimar wayak marnyatwanr.”

⁶ Be yihom kfakmotmr yimor. Jisasr bi brbo toh hanyetrn, nd amiroh keptenr turhu wom yimatn tkruraf memomr, “Wakfo rafotwakomr, mirahr nanhu kunys aneya. Na nhai dborioh yimayann nanhu kunys nieruhar. ⁷ Yo nhaf na rorpno yinyeft na nhai tu hifa dborioh yimayann

yirhoya brbo rorpno. Be inji nndo tohhato be akfokaht, nanhu hingrna yimar marnyanirahr. ⁸ Nanhu toh nmbuhat to inji buga. Na to wom bro yufetrhu yinhitn tohwa. Rorn tamoh tamoh hingrnefm kahukra. Soldiam nanhu yinhit tohwom fitoh yimar kfo kangar, 'Wania,' nd yimar niewur. Kfo kangar, 'Wanju,' nd yimar kitr. O nanhu hingrna yimar tamoh hingrnefm kfiwanr, nd hingrnefm hingnewurm. Ndnatn na kanga be inji nndo tohhato akfokaht, nanhu hingrna yimar marnyanirahr."

⁹ Jisasn nd yimarhu mrokfefm wanyhato tuha mrokfo duhatr rhumor. Tfit kekutnihato nd ror hik hanyomo yimam kfo memorm, "Barenko, nd yimar nndo wom kmi thofer. Rorhu nkifrar nndohr. Nd mrokfot kfiwat, nanhu yima yuhur duka kanga, Isrerkort nhai wom yimar htikahanr o wanykahanr kfo mekahra, 'Be inji nndo tohhato wakfokahtn dbohnet yimar marnyanirahr.' Nhai. Nhai ndhtet duket yimar htikaha." ¹⁰ Be nd yimam nd amiroh keptenr kfo tkrurafnmom tfit kunyko yihato mhtimomr nd keptenrhu hingrna yimar bi marnyanietrn.

Kmi Nenthu noheh yimar Jisasn yak kasinyamo yuhat

¹¹ Tfit hwe nfha nd wom yiharn wom kmit kutewumt Naint ndko yimor. Nhaf nd rorhu disaipermi nd wom womt rpat yimom. ¹² Yimomn, yuhre memom, "Ka kmi yifhatikt yau hafknenirahnomt", asha htihak hanyommom yima gur hanur hnamohat. Nd nohmo yimar wom met dhirthu rpa mif yonr nohemort. Be nd met dhirthu yonr nohmotr, nd knithu met yindarim hanynehohato memom, "Yopnhorahnomt." ¹³ Bror nd met dhirt htihato yuhuwahomort. Hti yuhuwafhato kfo memort, "Inji anurwahn." ¹⁴ Inji kfonitart, yau yaknihato nd yima gu krokt rim tayoutitrt. Be tfit nd yima gu krokt tita hanyukm afo yihom tohtewum. Yihom toh tewatm, Jisasn kfo kangr, "Na kfiwann nda yima damiage wasinya." ¹⁵ Inji kfomotr, be nd bi nohet yima damiagr myenyjwohato mrokfo pthamor. Be Jisasn yaknimorrn, nd yonr mmempno rim kfo memor, "Asor bi tfit ninhu yonr." ¹⁶ Be yimam nd noheh yimar yak kasinyamo yuhat htihato nhai yima yuhetm rhurmom. Bro yanuheft fakmotm. Yanuheft yakmottm, tfit Bro Nkifrar naku kfo yindhormomko. Kfo memom, "Bro profetr bi niaror. Bro Nkifrar turhu yon kunys miyak htihakneft bi niaror." ¹⁷ Be nd Jisasn noheh yimar yak kasinyamo yuhathu mrokfot nhai wom brbo warhu hasormot. Ur Juda tkit tkitm ur fitoh fitoh tkitm, wany bugamomt Jisasnru noheh yimarhu kasinya nmbuhat.

Jonr turhu uhik ahik htifasyuk yimafkfo tkrurafhato Jisasnru yimo yuhat (Matyu 11.2-19)

¹⁸ Jonrhu uhik ahik htifasyukm nd Jisasn namo neft wanyhato Jonr kfo nuhas bonuhasmomr. ¹⁹ Jonr wanyhato turhu uhik ahik htifasyuk hus yimaf naku yakhato kfaf memorf, "Brorpnno waifn. Waikahfnn, wattiwon wamitwafnr, 'Ni aso nd nom toh gari hasiwa yima o tor yuhre niewur?' "

²⁰ Be nd hus yimaf yimofn, Jisasnru mfnahhato mkfo memof, "Jonr famurno, 'Wattiwon wamitwafnr, "Ni aso nd nom gari hasiwa yima o tor yuhre niewur?' "

²¹ Nd yihart rof mifnahmohat bok met yindarim womhtet dbohnetm Jisasn fak marnya hasomor. Bok yimam kmi yarh fknayetm fak marnyamourm, yo nyinga kunyjetm fak marnyamourm. ²² To be nd-nettn rof mikfo ttiwonmohat tfit kfaf memorf, "Tfit waikahfnn, Jonr

wakfo nuhastwafnr nd nifn hrek hitawo nefm yo wanuka mrokfom. Wakfo nuhastwafnr nd nyinga kunyjetm marnyani yuhat yo wura bebetm marnyani yuhat nd mimbr yaketm marnyani yuhat yo yimbhindang kihmniyetm marnyani yuhat, noheh yimam myenyjwo yuhat yo nd fasoh knobkroh riruhuyuk yimam Bro Nkifrarhu tu mrokfo mifm wanuka yuhat. Nd ndm wakfo nuhas bonuhastwafnr. ²³ Yo wakfo wamitwafnr, yimam Bro Nkifrar hik hanyhato tfit na niwa nefm mhti yakhato nhai suhkahm, nd yimam ayindhortwam.”

²⁴ Be nd yimaf yimof. Yimotf, rofhu mongkorn met yindarim Jonrhu hingrnafathu mrokfom kfo ttiwonmorm. Kfo memorm, “Niko Jonrhu hit yimohat yima tho duha tkitt, tamohm memoko ai ahtinom? Ka memoko yimar mrokfom rim kfota mkfotetr ai ahtinom? ²⁵ O be nd hifa hifa wondh wuska hmbreyet yimar memoko ai ahtinom? Nd yimam hifa hifa wondh wuskam hmbreyetm, ndhтет yimam kingroh kuny kmifam tohwa yimayem. ²⁶ To nikome tamohroh htit yimoko? Profetrhu htit yimoko? Akfoyanko. Ror tu profeter. Bingotroh profetroh hingrneft nhai rorhu hingrneft kanjo rhukaht. Nhai. ²⁷ Tor nd yima Jonrn Bro Nkifrarhu rfa borngt kfo memot, ‘Wawanyko Bro Nkifrarhu mrokfethu kfo nuhas hanyuk yimar tohak hanyrahrko. Rorn yihotar mngon hanyrahr.’ ²⁸ Na kfiwanko, Jonrhu yufat be tu broyot, nhai wom yimar Jonrhu yufat kanjo rhukaht. To tfit kfiwanko, fitoh yimarn tu Bro Nkifrarhu kingdomkfofn ftohr, tor nd yimarn tu bro yufa mift yakrahr.”

²⁹ Nd met yindarimi takis marut yakyuk yimam bi Jonrpn baftais yaketmn tfit Jisarr nd mrokfom kfo pthamohat rom sinyahato kfo memom, “Bro Nkifrarhu mrokfot tu fipayetet.” ³⁰ To tfit Farisimi boririfhuthu tisamn nhai wany yindhormomt. Hany jbornamomt Jonr pthamo mrokfot yo nhai wofnrmom Jonrhu rroh baftaisneft.

³¹ Jisarr tfit pthahato kfo memor, “Ar yiharhof yimam tamoh shrnm akfo nhombrayanm? Finji kanjo yorhwam? ³² Yon mumenm maket swirm o wumt swirm ruhato nnakfo nnakfiwa kanjo nnakfiwuko. Womm riruhato womm rikfo mirahmm, ‘Nom tuhan yindarif niyak tatrutwa yiha wumtwa musikkfot wumtnomt, niko nhai grharfoko. Nur windohm mayi nmbuhampno rpat windohnomm, niko nhai nurrfoko.’ Inji yon mumenm kanjo nnakfo nnakfiwuko. ³³ Jon baftaisr niamohat, ror nhai nuwa ya bupa yarmor. Ndtm niko hti kfo memoko, ‘O Jonr fasoh kmi yarhm fknemomr. Nhai nuwa bupa yekahr.’ Inji kfomokomr. ³⁴ Tfit ar yihat na nikmho tu Bro Najema niamohat, bupa nuwa yewota, tfit ndt htihat tfit kfo kangko, ‘Wahtiko nd yimar nuwa yemungrofoter yo spaket drinkfot masat hmbritarn spakwor. Yo takis yekwa yimami fasoh nefm niwa yimampno nabnot habriwor.’ Inji inji kfiwukma. ³⁵ Bro Nkifrarhu duka tungunefrn tamoh tamoh nefm mhfnahnewatrm, nd tkittn yimam htihat kfo kangm yafotheter nd rorhu dukefr.”

Fasoh nefm nayet mett niahato Jisarrhu wuram kahpaye yuk kifsamo yuhat

³⁶ Farisir yihato Jisarr kfo memorr, “Krif waniakahnn nanhu kunysn nuwa yerahno.” To be Jisarr nd Farisirhu kunys yihato nuwa famor. ³⁷ To nd kmittn wom fasoh nefm nayet mett tohmout. Ndha tohettn, wanymot Jisarr nd Farisirhu kunysnu nia nuwa ye nmbuhat. Rot inji wanyhato fakmot tahiye hingrnayet wel knt. Yakhato yimot nd Jisarr

rhumo kunysn. ³⁸ Rot nd mett yimotn, Jisasrpnno mtohmot. Mtohhato nurmout. Nurhato nd rothu nur nyingaroh bupam yima Jisasrhu wuramn mitohmoum. Mitohmotm, tfit yimathu tmarifaye trk domtmoutm. Inji na hanyotn, yimarhu wurat rithu kiyakmotrn, frhaddohato nd rot hanyomo welpaye wuram fuk wunamotr.

³⁹ Nd Jisasr naku yakmo Farisir inji htihato be yima yuhurn duka memor, “Ndar yimar tu profet mifr arhur, to bi hti nhtarfort nd mett ror tir htewat. Ndt nhai tu dborioh mett tir htakaht, fasoh fasoh nefm nayet metet.”

⁴⁰ Jisasr inji wanyhato kfo memor, “Saimon, na wom mrokfeft ninpno afo kforhota wawanyswa.” Saimon memor, “Yinowe injuwe, waptha.”

⁴¹ Jisasr kfo memor, “Wom hus yimaf wom yimarpno maruha fakmof. Memof, ‘Kto tfit maruhetenone hirahnomn.’ Wom yimarn 100 kinakfot fakmor. Womrn 10 kinakfot fakmor. ⁴² Be tfit kto nhai womr niahato nd rof yaknimo maruham tfit hermoft. Be nd maru tikat yimar garitihato nhai tfit marimor, ‘Tfit wompam naku tndau hatohruha.’ Be duka mumafmorf. To ni Saimonn waduka nd hus yimaf. Frohrn yirforn nd yimar namo dborioh neft kfo yindorrforr? Nd bro marufa yakmorn o habhi marufa yakmo yimarn?”

⁴³ Saimonr memor, “Na kanga nd bro marufa yakmo yimarn yihato kfo yindhorrforr.” Jisasr memor, “Uwa hifa kfiwun.”

⁴⁴ Jisasr kekutnihato mett htihato Saimonr kfo memor, “Htitwont ndar mett? Na ninhu kunys niehat, nhai bupam yakrfonn, wuram yuk kifsarfona. Nhai. Wahti ndar mettn, niesn rothu nur bu nyingaye fuk kifsetm nanhu wuram, yo rothu tmarshu tmarifaye trk domttm. ⁴⁵ Yo na ninhu kunys nia yarim rhuhat ni nhai rithu kiyakhato frhaddorfona. Nhai. Ndar mett niahato nanhu wuram yakhato frhadditm. ⁴⁶ Ni nhai welpaye yukrfont nanhu mfhat. Ndar mettn niahato nanhu wuram welpaye fuk wunita. ⁴⁷ Ndnatn na kifwann, nd mett namo boknabok fasoh fasoh nefm bi fak thu ahuyant bi. Ndnatn na masat yuhu mongisa. Nd yimar habhi nefenm yak thu hayetr, be inji tefinano yuhu mongiwora.” ⁴⁸ Be nd mett Jisasr kfo memort, “Ninhu fasoh fasoh nefm bi fak tuhahuyann.” ⁴⁹ Be nd rpa tebort rhu hasoyuk yimam tum rinakfo nakfo memom, “Ndre tamohtet yimarn, yimaroh fasoh fasoh nefm yak tuhahukarm?” ⁵⁰ Nd mett Jisasr kfo memort, “Ni Bro Nkifrar yak hikwa nmbuhatn fak marnyern. Hifa yindhor yima yuhurpno wanju.”

8

Jisasr yaunhomo metm

¹ Kto tfit nd wom yiharn Jisasr sinyanihato yi htfasmor kmi kmi. Yi habrihato kfo nuhas bonuhas habrimorm Bro Nkifrarhu kingdomkfot. Nd 12-pela yimam rorpno yau habrimoam rpat yimom. ² Yo nd metm bi barkof Jisasr tohhato rroh dbohnefmi rroh kmi yarhm yak thu hemom, rom rpat Jisasr hik hanyomom. Nd metmpno yimo wom metthu yufat, Mariat, Makdala efkfott. Nd mett rot tohmohat 7-pela kmi yarhm fknemotmt, Jisasr fak thumorm. ³ Yo Herotrhu kuny knifat tohukatohyuk yima Susarhu met Joanati Susanat yo wom metm rpat hik hanyomomr. Nd metmn hik hanyhato tamoh tamoh romn hti duka hanyomomm. Yeshri nd ndm rroh maruhaye wiknahato he bmta hanyomoumm. Yo hweyuk tkitm nhaf romn wiknamoatm hwemoum.

*Yewuri tpim dborhiwa tkitm
(Matyu 13.1-9; Mak 4.1-9)*

⁴ Wom yiha kmi kmirhof yimam mano mano rifiny hmbri yaknamomr jisasr. Rifiny hmbri yak namotmr, wom kfo nhombra mrokfot kformom. Memomr, ⁵ “Wom yimar mswirt hingrnahato wit tpim yaknihato thu brur htfasmomr. Wom tpim yihota yau yuhat misuhmom. Kto yimam wiyau yauhato yahot turnamotmm, nungam niahato tout buganimomm. ⁶ Wom tpim misuh hanymoum tahi siket tkitmn. Kto dborhanihato memom ka nembfa thuhato sinyarahnom, to nhai, bbinysoft yiro bupa duhattn, be ff-tahato nohmom. ⁷ Womm hig suhmpno misuh hanyuyukm rpat hig tofmpno sinyahato kihawot hmbriyaf-momm. ⁸ Wom tpim tu hifa dborioh bbinysoft misuh hanyukm, romn tu hifa sinya marnyahato 100 dmet 100 dmet hir hanymom rpa rpa yewuri fanm.” Nd kfo nhombra mrokfot kfonihato kfo memomr, “Yimbhin-dangeteko, ndar na kfiwa mrokfot wanykfot.”

*Jisasr kfomo kfo nhombra mrokforoh yimbu yuham
(Matyu 13.10-17; Mak 4.10-12)*

⁹ Nd kfo nhombra mrokfom turhu disaiperm wanyhato ttiwom memomr, “Nd kfo nhombra mrokforoh yimbu yuhame finji yorhwam?” ¹⁰ Jisasr kfo memomr, “Wanukko, yafuna mrokforoh yakyuk dukefr bi nikomn hemor. Bro Nkifrarhu kingdomkfothu kafrohet mrokfom be kfo nhombra kanjo ptharahm o mrokfom be yura yafunarahm, nikomn dukefr bi yakrahkomm. Wom yimam be kfo nhombra mrokforpam wanukm. Ndnetn tamohroh htineft nhai hti hikruhatmm. Mrokfo wanyneft rot nhaf inji wanyeft rot wanyrahm, tawo mrokfo yimbu yuhamn nhai wany hik marnyaruhatmm.”

*Yewuri tpiroh kfo nhombra mrokfothu yimbu yuhat
(Matyu 13.18-23; Mak 4.13-20)*

¹¹ Jisasr kfo memomr, “Nd kfo nhombramo mrokfo yimbu yuhat inji korht: Nd yewuri tpim, Bro Nkifrarhu mrokfot kfo nhombramoya. ¹² Nd na kfo nhombra memo yewuri tpim yima yau yuhat misuh hanyukm, nungam niahato toutnimom, ndm Satarn nunga hafise niahato yimaroh yima yuhum rhuyuk hifa dborioh mrokfom nia yak thuwa nmbuhat kfo nhombramoya. Satarn kangr Bro Nkifrar hikruhamn, hbhakrahm. Ndnetrn kak thuworm tu hifa dborioh mrokfom. ¹³ Yo nd tahi sikm misuhhato sinya duha yewuri tpim, ndm kfo nhombramoya yimar Bro Nkifrarhu mrokfot yakitoh bmta duha yita nmbuhatn. Yimam afo barkofpam hifa yindhor nmbuhatpno Bro Nkifrarhu mrokfot mhik teft yaknitmt, tfit tamoh nefm rinhebeh-efiwumm, to be ndha msuhhato myafho thunitmt dborioh mrokfot. ¹⁴ Yo nd yewuri tpim hig suhmn misuhwam, ndm kfo nhombramoya yimar Bro Nkifrarhu mrokfom wanyhato tfit myafho tuhefiwa nmbuhamn. Yimam mrokfom wanukamn, tfit ndar bbinysofthu dukefr kak wunefiwumt Bro Nkifrarhu mrokfot. Womm tum hatohyuk krho nmbuhamn, ndmn be duka kinyaki hasiwum. Womm maruharoh dukefrpampno korh hasiwum. Womm hifa rhu nmbuharhu yaknefrpatn duka hasiwum. Nd nd dukefrmn thu nhombranitattm, Bro Nkifrarhu mrokfot myafho thunitmt. ¹⁵ Nd hifa bbinysoft misuhhato sinya marnyamo yewuri tpim, kfo nhombramoya nd yimar mrokfom

wany yakiohato yakitoh dbkafwa yimamn. Nd yimam tu hifa yima yuhet yimamn, rroh wiyauyau nmbuham hifa kau marnyewum.”

*Lamt yak nukayuket
(Mak 4.21-25)*

¹⁶ “Nhai wom yimar lamt yakhato yiro rohtn kafko hmbriyafkahrt o nhai wom yimar lamt yakhato yiro tik rfashitn hta hamongafkahrt. Nhai. Be inji dany yuhat htewatrt, rorhu kunys yarim fkninayuk yimam lamthu nukeft hitwomt. ¹⁷ Nd kfo nhombra mrokfothu yimbu yuhat inji kfiwut. Bro Nkifrar, rorhu kfo kafrohet mrokfeft kto be tafontn yak htarahrt. Nd tamoh tamohm Bro Nkifrar yak wuna bowuna hasiwam, kto be tafontn yak htaruhatrm yimam htirahmm.

¹⁸ Ndnettn wany marnyakfot. Frohr mrokfom wanyhato yima yuhurn hmbri hterm, nd yimar Bro Nkifrar tfit thu hmbrihirahr. Nd yimar mrokfom wanyhato nhai yima yuhur htarform, nd tefi dukefenr rorhu yima yuhur rhuyukr tfit tu Bro Nkifrar yak thurahr.”

*Jisarhu tu mmem nmemrom
(Matyu 12.46-50; Mak 3.31-35)*

¹⁹ Nd yiha Jisarhu mmemti nmem najohfit niahato memom, “Jisar ania ahtinom.” Niamomn, to be bok met yindarim rifnynmotm nhai brbo yirmom Jisar pno. ²⁰ Wom yimar yihato Jisar kfo memom, “Ninhu mmemti nmem najohfit tom niem. Niemn, kangm ahtinomn.” ²¹ Jisar inji wanyhato kfo memom, “Fitoh yimam Bro Nkifrarhu mrokfefm wanyhato yak hikwam, nd yimam nanhu mmemroyem yo nanhu nmemroyem.”

*Jisar kfohato wifort minoh hmbremo yuhat
(Matyu 8.23-27; Mak 4.35-41)*

²² Wom yiha Jisari turhu disaiperm pno mmbrrtn mirhuhato Jisar kfo memom, “Barenko, na kanga tek barat ahir tmbhoniaknomn, mkuko ainyom.” Be inji kfohato yimom. ²³ Tek yuhat hir hanyhato Jisar hwemor. Ror hweyetrn, bro wifort sinyahato fryif hany titamotm. ²⁴ Be nd disaiperm yihato Jisar naku thuhato kfo memom, “Broye, Broye nom bi wifort fryif boyifwotnom!” Be ror sinyahato nd wiforti nd bu rifhum sinyamom kfo motr, minoh hmbremom. ²⁵ Nd wiforti bu rifhum yak nohniato kfo memom, “Tamohmpno yakrmitako? Nhai duka mekahko, ‘Rorpno kitwonom. Aduka yanho-wahnom?’ ” Rom inji wany yanhoato kfo memom, “Arre tamohet yimarn be tnge pthitr wiforti bu rifhu sinyayukm wany yakiohato minoh hmbrenim?”

*Jisar kmi yarh fknayet yimar yak marnyamo yuhat
(Matyu 8.28-34; Mak 5.1-20)*

²⁶ Be rom hir hany hir hanynomn, Gerasat rifnahom. ²⁷ Nd kmit rifnahato nd kmithu wom kmi yarh thu hamumet yimar niamor. Nd kmi yarh thu hammomoatr, to be sfnoh bubombrohr tohmour. Ror tohmoahat nhai yima kunym tohrmoar, be inji nd yima gum htamoa tahi bakuny mkumn toh htfasmour. ²⁸ Be nd yimar Jisar htayahato rorhu wurampno rim suhhato mtau ssiyakni memom, “Jisas yura myorhekwa Nkifrarhu Yone, ni finji newona? Mirahn krho nmbuhat ahianr.” ²⁹ Jisar bi kfo twanhom nd yimar thu hammomoa kmi yarhrhu htanyeft nd yimar. Yiha yiha nd kmi yarh tuhagrha mmomour nd yimar. Tuhagrhamoatr, yimam to be rorn dukahato kukatoh hasomom. Womnam sene ttaftamomr, womnam

tasomukr hanyhato kimoumr. To nhai, frtebikrnihato yimour. Womnam nd kmi yarhrn tuhafunanimoarr hanymourr wuri yima toh duha tkitmn.

³⁰ Jisas kfo memorr, “Ninhu yufat wayutant.” Nd yimar bok kmi yarh rifhur fknemotmr to be kfo memor, “Rifuhetenom.” ³¹ Nd yimar fknehato tohmo kmi yarhm Jisasr kfo nakuhato kfo memoum, “Nom nhai wofnkahnom kmi yarhm mihmbrita muhrhu yinyeft. Nd muhr yiruhanomn, to finji tfit nieruhanom? Mirahn ndko akfo kkrurafanam.

³² Wahti, wusomio kmi yorgenrn foh rifhum. Be wakfafkahtnmom, nd fohmn fkneni hanyrahnom.” ³³ Be Jisasr kfomotr nd kmi yarhm nd yimar thu troh tanyhato fohmn fkneni hanymom. Be fohmn fknenihato thu hafunanimotmm, nd fohm kmi kihahir yuhat mitarhotnihato tek baritn mitayif wurasoh bugamom.

³⁴ Nd fohm hatohmo yimam inji htihato be tonayefrpar yakhato taunthu yimam kfo nuhas bonuhashato kmi kmi kfo nuhas fnahmomm rom htimonefm. ³⁵ Kmi kmim wanyhato yi hanyhato memom ahtinom. Rom yimomn, nd yimar kmi yarh htanyetr htimomr rmonthat tabhutahato tu hifa yima yuhu dukefrpno Jisasrhu wurampno rhu hasetrn. Rom be inji mhtihato be duka yanuhefrpno tohmom. ³⁶ Jisasr nd kmi yarh fknayet yimar yak marnyamohat tuha tohyuk yimam hti hikmomm romn tfit kfo nuhas bonuhas hikmomm nd niamo yimam. ³⁷ Be nd Gerasa thofm Jisasr namonefm hti yakrmihato kfo memorr, “Ni be tmifn ndar kmit wahtanykahnt, wainy.” Be Jisasr mmbtrn mikmbrenihato tfit yimor. ³⁸ Nd Jisasr kmi yarh yak thumo yimar tfit Jisasrpnio yihato kfo ttiwon memorr, “Ahikann?” To nhai, Jisasr wanyhato kfo rafo tany memorr, ³⁹ “Tuha kmitt warhu hasokahn kmi thofm wakfo nuhas bonuhastwanm ni Bro Nkifrar yak marnyamo nmbuhat.” Be nd yimar wany yakiohato tuha turhu kmitt rhu hasohato turhu kmi thofm kfo nuhas bonuhasmorm Jisasr yak marnyamo nmbuhat.

*Jisasr Jairusrhu yonti yo dbottet mett yak marnyamo yuhat
(Matyu 9.18-26; Mak 5.21-43)*

⁴⁰ Jisasr tfit manoh tek barithu kmi mkuko hir hayuknimohat nd tek bari mkukorhof yimam bi rhu gari hasetmn, to be Jisasr hti yakmohat be tir tir fakmomm. ⁴¹ Be yuhre mtoht tefi hanymor, wom yimar kutewumr Jairusr niamor. Nd yima Jairusr Judaroh rhu rifinyuk rmont tohukatohmour. Ror niahato Jisasrhu wurampno msuhhato mkfo memor, “Jisase, wania. Ainyo nanhu kunyko.” ⁴² Ror inji mkfomohat, rorhu 12 gunyjimet yont noh wururifhut yakmott inji mkfomor. Ror nhai bok yonm. Rorhut nd yon metrpatt.

Jisasr yimohat be bok met yindari rifhur hik hanymomrn be nahuta yaborr hanymom. ⁴³ Nd yima rifiny buharn wom dbottet mett fau hanymot. Nd dbotteft 12-pela gunyjimm hatohmott. Bro hunkothampno yimout, to nhai yak marnyarmoamt. Be rroh wiknaneftpno yonmari marut tamoh tamoh shrt tubatu witamott. ⁴⁴ Be Jisasrhu mongko yauyaknimotn, ror hmbreyuk hmbreshathu psift mfak tiwonafmot. Be inji namott, yudbat nd dbotteft teh tmbhakmott. ⁴⁵ Jisasr yironafhato ttiwon memor, “Na frohr tayoutitawora?” Pitar memorr, “Ka yimam yau hanyhato mtayoutinimn.” ⁴⁶ Jisasr memor, “Tu yima mifr tayoutira. Na tuka yironefiya yima yak marnyayuk yafothat yimar yak marnyehat.” ⁴⁷ Tu nd mett duka memot, “To finji wom finji kafrohrhoya? Bi hitawora.” Be tuha mrokfo duha

Jisasrhu wurampno rim suhmot. Rim suhhato tuha yima rifiny buharn kfo ptha nuhas bonuhas nriyafmotm nd rot Jisasr rim tayouthato rothu dbotteft teh tmbhakmo yuhat. ⁴⁸ Jisasr kfo memort, “O ar yone, nd ninhu dbotteft, nd hatoh hnamot, duka famu, ‘Ror rimaktirhota, be nd dbotteft teh tmbakraht.’ Ndnnett ninhu dukeft yuhatn nd dbotteft teh tmbhektn. Be hifa yindhorr yima yuhurpno waikahnn, watohtwa.”

⁴⁹ Jisasr yuhre nd mettpno nakfo nuhas hasiwume, asha nd Jairusrhu kuny shofr toni hnehato Jairusr yihom kfo kangrr, “Mirahn Bror ahany furayanr kunykort. Ninhu yont bi mfaknit.” ⁵⁰ Jisasr nd mrokfot wanyhato, Jairusr kfo kangrr, “Ni bi mirahn ariduka yanuhaka. Ninhu bro dukeft waduka wame, ‘Nanhu yont tfit myenyjworah.’ Be nd dukefrpat arhukahtn, be tfit marnyaniraht.” ⁵¹ Jisasr yimorn, Jairusrhu kunys mfnahato fknemohat nd wom womt kfo rafo tanyorm kunyrhu fkneneft. Pita, Jon, Jemsromrpampno, nd nohyuk yonthu yifammampno rhumomt nd yima gus rhumo rumt. ⁵² Yimam nd yima gus hanurmoatm Jisasr kfo memorm, “Anurwahko. Nd yont nhai nohrfot, be hwitwot!” ⁵³ Jisasr inji kfo motr, nd met yindarim haningemomr. Roh dukeft duka memom, “Bi nohett to finji wom finji sinyaruhat?” Ndnatn haningemomr. ⁵⁴ Jisasr nd yonthu tirt yakitohhato yufat yutahato kfo naku memom, “Ar yone wasinya.” ⁵⁵ Inji kfo nakumotr nd yonthu yafothat tfit mthu nawohhato sinyamot. Nd yont tfit myenyjwomott, kfo memorm, “Yeshrim wayak wahefnt.” ⁵⁶ Yonthu yifammaf inji htihato be tuha yafotha duhatf tohmof. Jisasr kfo memorf, “You! Mirahfn akfo nuhas mif mifnomm nda nifnhu yont myenyjwi yuhat.”

Jisasr 12-pela aposerroh hingrna yuham kfo hta bohta nuhasmo yuhat (Matyu 10.5-15; Mak 6.7-13)

9

¹ Jisasr turhu disaiperm kfakhato niamotm, tek yarh kmi yarh yak thuyuk yafothar hiyaf hanymorm. ² Nd yafothar henyihato kfo memorm, “Wanjukahkomn, yimam wakfo wamitwakomm, ‘Bro Nkifrarhu kingdomk-fotn tfit ndar bbinysoft rhuraht.’ Nd mrokfot kfo nuhas hi hanyhato yo tamoh dbohnet yimam hitwokomm, wayak marnya hanyswakomm.” ³ Rom sinyani yimohat memorm, “Yinyeft mirahko kio musm, hmbre wus yohm, nuwa nakupam, maruham, hmbresham ayakitohaknom. Be inji sfno yikfot. ⁴ Yihato wom kmit yak miyakhato, kunys fahumko, be nd kunyrpat toh tanyhato tfit sinyani yikfot. ⁵ O wom kmit o taunt yihato nhai kunym yak miyakhato niko hanyuk mrokfom nhai yindhorkahm wanyneft, nd kmit htanyhato fus wuram tuha nd kmitn frdbofta tanyhato htanykfof. Inji naruhatko, ndt htiruhamn, mirahm, ‘O nom yak miyak duha yitnomm inji nem.’” ⁶ Be inji kfo hta bohtafmotm, yimom. Kmi kmi yihato Bro Nkifrarhu mrokfot kfo nuhas hanyhato dbohnet yimam, kmi yarh fknayetm fak marnya habrimomm.

Herotr Jisasr namoa nefm wanyhato bok dukefm fakmor (Matyu 14.1-2; Mak 6.14-16)

⁷ Galilikorhof kmim tohukatohmoa yima Herotr Jisasr namo nefm wanyhato bok dukefm fakmor. Womm yihato kfo memomr, “Nohmo Jon Baftaisr tfit mfnahmor.” ⁸ Womm yihato kfo memomr, “Ka Irajayer.” Tfit womm

yihato kfo memomr, “Ka bingot nkiframpno nohyuk profetr sinyamor.”⁹ Inji mikfota mkfotamoatm, Herotr kfo memor, “Niko kfiwa Jonr to bi mfhat puk tmbhomoyanr. To nd yimar frohrn ndhtet ndhtet nefm newatrm mrokfem wanukanomr. Afo yi htiruhanr.”

*5,000 yimam Jisasr yeshri hemo yuhat
(Matyu 14.13-21; Mak 6.30-44; Jon 6.1-13)*

¹⁰ Nd Jisasrhu yon kunyshu kasinya htfasyuk aposerm yi habrimomn, tfit niahato Jisasrpnno mptha nuhas bonuhasmomr rom nahabrimo nefm. Be tfit romrpam Jisasr yaknimorn tfit wom kmit yimom. Nd rom yimo kmithu yufat Betsaidat. ¹¹ Met yindarim wanyomom Jisasrhu Betsaidathu yi nmbuhat. Wanyhato fau hik hanymomr. Jisasr hti yakhato memor, “O hifa nieko.” Yo Bro Nkifrarhu kingdom-kfothu mrokfot yakhato kfo nuhas bonuhasmorm. Ndm kfo nuhasni, yo nd yi hanyuk dbohnet yimam, dbohnefm fak thu hany hemorm. ¹² Tu krifnanorn, disaiperm niahato Jisasr mkfo memomr, “Nom kangnom nd met yindarim be tmifm wakfo tkrurafkahtnm, natubatunim. Natubatunikahmn, hweyuk tkitm hambrokahmn, nuwa yemaska rhurahm. To asha yorhwamn, fitoh yimam nuwami hweyuk tkitm yahukamm? Asha yima duha tkitt korhnom.” ¹³ Jisasr inji wanyhato kfo memorm, “To nikomn wahekomm yeshrim.” Tfit rom memom, “To nom href fitha yeshrim yakhato yahukanomm? Nome tirfa bret nuwami hus yiraf, injirpa kakitowonom. E, be kangn maruhaye yeshrt wiknahato ndar yonmari yima rifhur ahenomm?” ¹⁴ Nd yihar 5,000 yimam rifnyomom.

Jisasr turhu disaiperm kfo memorm, “Nd yimam wakfokahtkomm fifti fifti inji arhu nhombra hanym. Wom tkittn wom fiftikfot rhukfot, tfit wom tkittn wom fiftikfot rhukfot. To be inji rhu nhombra hanykfo.” ¹⁵ Nd Jisasr kfomo yuhatn fak hta nhombromom. ¹⁶ Rhu nhombromom, Jisasr nd tirfa bret nuwami hus yiraf yakmorn, yura mountko yukatohhato kfo bruttnamor. Kfo bruttnanihato turhu disaiperm yak tifakhany hiyaf hanyhato kfo memorm, “Wahe nhombra htfas hanykomm.” ¹⁷ Nd he hanymo yeshrt nd yonmari yima rifhur yihany yi hanymomn, yatim furkihmomm. Yatim furkihmotmm, be nd yesmbhehm yak nhafohhato tfit 12-pela kpmn hmbre nhafohmomm.

*Pitar kfo nriyaf memor; “Jisasr nmoh minrfa hti yakyuker.”
(Matyu 16.13-19; Mak 8.27-29)*

¹⁸ Wom yiha Jisasr turpar Bro Nkifrarpnno kfo bruttnamohat turhu disaiperm rom tom rhumom. Ruhetmn, kfo ttiwon memorm, “Nane, met yindarim finji dukewuma?” ¹⁹ Kfo memomr, “Womm kangmn Jon Baftaise. Womm kangmn Irajaye. Womm kangmn wom nkifra profetr tfit sinyamor.” ²⁰ Inji kfomotm, tfit ttiwon memorm, “To niko tuko finji yutewukma?” Pitar kfo memor, “Ni kangnomn nmoh hbhayeme, Bro Nkifrar kfo tkrurafmorn nmoh minrfa htikyukn.”

*Jisasr turhu nohhato sinya yuhat kfo nuhasmorm
(Matyu 16.20-28; Mak 8.30-9.1)*

²¹ Pitar inji kfomotr, Jisasr kfo nnhu memorm, “You! Mirahko wom yimampno nd ni kfi mrokfot akfo nuhas mifnomm. Be nikomrpakompno nd mrokfot ayohnes.” ²² Kfo memorm, “Na, Bro Najema, boknabok krhopam yakruha. Na Judaroh bro yimamn, prisroh bro yimamn, boririfhuthu

tisamn, nd nd yimaroh tirmn hirruha. Nohrhoyann tfit husfirpehyuk marrn tfit sinyaruha. Na nhai tfit finji kfo finji kforhota. Na be yi nohnefrpat.”

²³ Ndm kfonihato kfo memorm, “Wom yimar kangr, nann ahika, nd yimar mirahr tamoh tamoh nefm turhu duka fijo anaya. Ror be na yakitoh dbkafhato nd mano mano niayuk krho nmbuham rpa rpa yihar titahato toh bmtakfot. ²⁴ Fitoh yimar turhu toh nmbuharpat dukahato nhai wofnkahr na hikhato krhopa yakneft, kto nd yimar be nhai hifa rhu nmbuhat yakruhatr. Fitoh yimar na dukahato bro krhopam yakhato ftohr, kto nd yimar hifa rhu nmbuhat yakrahr. ²⁵ Wom yimar ndar bbinysofthu tamoh tamohrpar yakhato kto toh nkifrayuk toh nmbuhat nhai dukarfort, to nd ariha yekwa marut, wuskat, tamoh tamoh to to finji hifa toh nkifra nmbuhat hiruhamr? ²⁶ Frohr yak rihtefiwura yo nanhu mrokfeft yak rihtefiwurt, be nd yimar tawo na Bro Najema yak rihtafruhanr. Na nia thombat nani Bro Yifemre tu dborioh mounmotm, nmoh nukeftpno yawih-nehato yak rihtafruhanr. ²⁷ Kfo mifwanko, nikmoh womm tafi noh duhatmn, htirahmt Bro Nkifrarhu kingdomkfot rhu thombat.”

*Jisasrhu thatipt fnhumo yuhat
(Matyu 17.1-13; Mak 9.2-13)*

²⁸ Nd ror kfomo mrokfom kto 8-pela marm tohnihato ee Pitari Jonre yo Jemsr nd husfirpa yimam yaknihato kminysofko kfo bruttnat muhmom. ²⁹ Muhhato Jisars kfo bruttna hanymor, yimarhu nyingatikt fnhuyaknihato memom nndo yindeng nyisofr fnhutwor. Yimar hmbremo hmbresham rpat fnhu bugaknihato memom nndo bruwohm r katiwur. ³⁰ Nd fnhuyeftpno asha Moses Irajarof niahato Jisarspno mitohhato naphamom. ³¹ Kfo nuhas bonuhas memofr, “Ni Jerusalemrn nohrah. Bro Nkifrar bingot kfo htamo mrokfot ndha Jerusalemrn rhuraht.” ³² Pitari nd wom yimaf nyingam krkotakmotmm, memom, “Ahwinom.” To nhai, be nd Jisars hatohmo nufenti nd mitoh hmbremo yimaf htihato nhai marimom hwirahnom. ³³ Nd yimaf Jisarspno mitohmof, memof, ka Jisars htanyhato ainyo. Pitar memorr, “Broye, nmoh asha tohneft hifa. Ka husfirpa kunyenm yimanom nhombra-hato singorahnom. Ninhu womt, Mosesrhu womt, yo Irajarhu womt.” (Pitar inji kfmohat nhai tu hifa yima dukefrpno ptharmor. Be tngrrpatn furamott nd mrokfot.)

³⁴ Inji ptha hanyetrn, yudbat gribt wuyohninamotn thu kasi hmbriyafmotm. Gribt thu kasi hmbriyafmotm, disaiperm fakrmemom. ³⁵ Nd gribpamn wom tngt wanyomot, kfo memot, “Nd yonr nanhu yoner. Nanhu yufatn tohwor. Ror pthayuk mrokfom wawany yakiotwakomm.” ³⁶ Nd tngt inji pthanimott, kto htimomr Jisars turpar toh hasomor. Be rom inji htihato nhai tfit wommpno yihato kfo nuhasrmomm nd rom htimo nefm.

*Jisars yak marnyamo kmi yarhr hatohet yonr
(Matyu 17.14-21; Mak 9.14-29)*

³⁷ Tfit nd wom yiharn Jisarsom yura kminysoft wuhtanyhato yohnemom. Rom yohnemohat yonmari yima rifhur Jisarspno mnafuryakmoma buha yihotatn. ³⁸ Nd Jisarspno mnafuryakmo yimaroh womr sinyahato Jisars naku kfo memorr, “Broye, na kanga nanhu yonr wania wahtihina. Na nhai bok yonm. Nanhu yonr ndarrpar. ³⁹ Mumoyeft kekwo. Nd yarhr fkniyaknehato mmo rifhut yakakne thombat, yima yonr masat tau naku

bonaku yaknitr. Tau naku yaknihato suhwor. Suhhato yebittaknihato tir wuram tubatuhato bruktk bruktk hatoh thombat kangm nndo foher. Nd mumeft hatoh hasiwartn, tfit thu troh tany shombat, be yimar kak tehtewur. ⁴⁰ Ninhu disaiperm pno kfo famuyann, ‘Wayak thukomr yarhr.’ To nhai, fak thu titawomr.”

⁴¹ Jisasr nd mrokfot wanyhato kfo memorm, “Ye, aromenkono! Niko be tu nhai Bro Nkifrar pno nikmoh dukefm htakahkomm. Ar nohof nikompno ritohakhato nikmoh krhopam titahnamoyann? Wahnannr nd ninhu yonr.”

⁴² Nd yimarhu yonr yuhre yau hnetrn, ka nd yarhrn thu mumak-nimotr, nd yonenr suhhato yebittak-nimor. Jisasr inji htihato nd yarhr kfo nambur hikafmotrr nd yonr thu troh tanymorr. Thu troh tanymotr, Jisas nd yonr yak marnyakhato tfit tu yifemrn memor. ⁴³ Met yindarim nd Jisasr nd mumet yonr yak marnyamo nmbuhat htiyafhato tu be mrokfo duhatm tohmom.

*Jisasr tfit wompam kfo pthamort turhu nohhato sinyu yuhat
(Matyu 17.22-23; Mak 9.30-32)*

Nd yimam Jisasr namo nefm htihato duka mmo hasetmn, Jisasr turhu disaiperm ⁴⁴ kfo memorm, “Na kfoyuk mrokfot duka hanykfof. Ndar bbinysofthu yimam Bro Najomr yak hndhnarahmr yimampno.” ⁴⁵ Jisasr inji kfomohat disaiperm nhai nd mrokfothu yimbu yuhat yakrmomt. Nd mrokfothu yimbu yuhat Bro Nkifrar rompno kafrohmort. Ndnnett rom nhai tawisafromt. Rom fanho-mom Jisasrhu tfit ttiwon hikneft.

*Frohr broyer?
(Matyu 18.1-5; Mak 9.33-37)*

⁴⁶ Wom yiha Jisasrhu disaiperm tum rhuhato rinnakfo nakfomoum. Womr waruhato memour, “Nann broruhanko.” Tfit womrn, “We, we nann broruhanko.” Tfit womr waruhato memour, “We, rorn.” Tfit womr waruhato kfo memour, “We, we ror nhai, ndarrn brorahrnom.” Inji inji rinnakfo nakfomoum. ⁴⁷ Jisasr bi htimorm rom inji rinnakfo nakfomoahat. Inji htihato wom yonenr yaknehato yarim hatohmorr. ⁴⁸ Yarim hatohhato kfo memorm, “Fitoh yimar na hikhato na hikwa wom met yindarim yakhato kak marnyewurm, nda yonenr yakhato yak marnyiwa kanjo, nd yimar nann yakhato kak marnyewur. Na Bro Nkifrar kfo tkrurafmotra, niamoya. Ndnatn frohr na kak miyekwor, nd yimar Bro Nkifrar kak miyekwor. Fitoh yimar turhu yufat nhai yura htakahrt, nd yimarn bro yufat yakrahr.”

*Nompno nahti dbnot duha yimar nmoh yimater
(Mak 9.38-40)*

⁴⁹ Jonr kfo memor, “Bro yimaye, wom yimar htimonomr ninhu yufat yuta nawohhato kmi yarhm yak thumoatrm kfo rafomonomr. Nd yimar nhai nom ni hik habriwa kanjo nd yimar inji hiknho habrikahrn. Ndnatn nd yimar ninhu yufat yuta nawohhato yarh fknayet yimam yak marnyamoahat, nom nhai yindhor-rmonom.” ⁵⁰ Jisasr inji wanyhato kfo memorm, “Mirahko akfo rafonomr. Yimar nikompno nhai nahti dbnotkahr, nd yimar nikmoh yimater.”

**Jisasr Jerusalemko yimohat turhu disaiperm pno
rpat yimom**

(Sapta 9.51-19.28)

Samaria thofm kfo kurmom Jisasrhu rroh kmithu yinyeft

⁵¹ Jisasrhu hefenrhu muh yihar bi brbohrn ndnatn Jisasr memor, "Jerusalemko yiruha." ⁵² Inji dukahato wom yimam bi kfaf hanymotrm, bi mrokfot hany hanymomt. Nd yimam yimomn, Samariaroh kmithu yi memom, "Jisasr nierahr. Tkitt rorhu nia mhwenayukt wayak htata hitwakomr." ⁵³ Samaria thofmpno mphamotm, Samaria thofm wanyhato kfo memom, "Nomi Judam nhai niyak marnyakahnom." Ndnatn Samaria thofm nhai yak htata hermomr rorhu hweyuk tkitt. ⁵⁴ Jisasrhu hus disaipar Jonri Pitar nd rom kfo rafomo mrokfot wanyhato kfo memofr, "Bro yimaye, no kangno akfokahtnom, kaht yura hefen yuhat yawihnekahtn, akandhitm ndar kmi thofm." ⁵⁵ Inji kfomotf, Jisasr kfo memorf, "Nifn inji kfo duha. Na Bro Najema nhai be yimaroh yafotharoh fasoh yak bebt niarmoya. Yafotharoh yak marnyat niamoya." ⁵⁶ Be inji kfonihato tfit wom kmit yimom.

*Jisasr hik yibonmo yimar
(Matyu 8.19-22)*

⁵⁷ Yau hanyetmn, Jisasr wom yimar kfo memorr, "Ni fitoh fitoh tkitm ziyukm na hik htfasruhann." ⁵⁸ Jisasr inji wanyhato kfo memor, "Yifakor tohwa yaum tahi muhm hwitm, yo yafuna nungam wusm hwitm. Na Bro Najomrpaya nhai nanhu wom hweyuk tkitt." ⁵⁹ Jisasr kekutnihato wom yimar kfo memorr, "Ni wania nann wahikn." Nd yimar memor, "Nanhu yifemr yinoht, afo rorhu yopt yiruha." ⁶⁰ Inji kfomotr, Jisasr kfo memorr, "Noheh yimam, rom tum anayopm. Ni wania nann wahikkahnn, Bro Nkifrarhu kingdom-kfothu kfo nuhas mrokfot wania wakfo nuhas habriswanm kmi kmim."

⁶¹ Tfit wom yimar ritohhato kfo memor, "Bro yimaye, na hik yibonwann. To kanga ka kfo yakiorfotn, afo yirfoyann, nanhu yimatm kfo wobuh tanyrfoyanm." ⁶² Jisasr memorr, "Yimar Bro Nkifrarhu kingdomkfof toh yibonetr, nhai tfit mongkorhof tamoh tamoh nefm hti thu tany hanykfof o tfit dukakfof."

Jisasr kfo tkrurafmo wom 72 yimam

10

¹ Nd ror hik yibonmo yimampno naphthanihato ee tfit Bror wom 72 yimam fakmor. Yakhato hus hus fak nhtamorm. Yak nhtahato hus hus nd ror yibonyuk kmim yi hanymomm. ² Kfo memorm, "Boknabok rais suhm bi huktewann, nhai bok yimam nd rais yukharoh yakyukm. Ndnatn nd mswir tikatr wakfo bruttnakahtko, wom yimam thu yuhurruhatrm, yi yakhirahmr nd rorhu rais swirthu rais hukham.

³ Nhai mrokfom, wanjuko! Yima dukefmpno waiswako. Sifsifm yifakorhof namburet yauroh rifiny buhar yita kanjo inji nd namburet yauroh rifiny buhar kitwoko. ⁴ Mirahko maru gegb yohenm, hmbre wus yohm o wom hona wuram ayakitohaknom. Be inji sfno yima furako yikfot. Mirahko wom yimampno aptha yifahta hanynommm. ⁵ Wom kmithu wom kunys kitwoko, barkofpam afo nd kuny shofm rim kfo yindhoraknikfot. Kfo yindhoraknihato kfo mekfot, 'Bro Nkifrar nda kuny shofko ayak marnyarko!' ⁶ Inji rim kfo yindhorak-niruhatko, hifa yima yuhet yimar nd kunys rhuneft, nd niko rim kfo yindhorak niyuk tngt to be nd yimarn riyah. Nhai ndhtet yima yuhet yimar rhukah, to be tfit tukompno nierah

nd niko tuyuk kfo yindhor tngt. ⁷ Wom kmit yifiko, mirahko kuny kuny awita fnahnom. Bi rpa kunys fekho, be nd kunyrpat tohhato tamoh tamoh yeshrim kahukmko, be yakhato yakfot. Niko Bro Nkifrarhu mrokfekt kfo nuhas habriwohat tawo ndmn yak yakfot.

⁸ Wom kmit yikomn, kunymn fak htemko, hifa, nhai mrokfom. Tamoh yeshrim nd kuny shofm hayukm, yak yakfot. ⁹ Tamoh tamoh dbohnefm nd kmi thofm korhwomm, yak marnyakfot. Kfo nuhas mekfot, 'Bro Nkifrarhu kingdomkfo bi brbo hnewutko.' ¹⁰ Wom kmit yikomn, nhai nd kmi thofm kunym yakrfomko, yihotat rim tohhato kfo mekfot, ¹¹ 'Ndar nikmoh kmithu bdr̄t nmoh wuram yarim yenym, tukmoh kmitn tfit kahot trk tanywonomn. To niko dukaf hanykfot. Bro Nkifrarhu kingdomkfo bi brbohwt. Rorhu yinhitn ndar bbinysoft tfit rhuraht. Ndnetn dukaf hanykfot.' ¹² Na kfo mifwanko, ndar kmit yakruha krho nmbuhat mirahko ka kuken krho nmbuhat yakraht. Sodomt yakmo krho nmbuhat be inji habhi krho nmbuhat fakmom. Tawo ndar kmitn be tu bro krho nmbuha mift yakrahm."

*Bro Nkifrar yak hik duha kmi kmirhof yimam
(Matyu 11.20-24)*

¹³ "O ar Korasin thofenko, finji rhu bebhirkhokma? Yo niko Betsaida thofenko, niko inji buga. Finji rhu bebhirkhokma? Bro yuhuwaf nmbuhat korhtko. Bi wom yimar Tairti Saidont aikahrn mirakerkfot ahingrnart, na nikompno mirakerkfot hingnamo kanjo, na kanga ka Tair thofmi Saidon thofm tum nayuk fasoh fasoh nefm hti bebhato bi bek tham nyuhunihato yuhun brasingt rhuhato yima yuhum bi yak kekutrmomm. ¹⁴ Kto ndar bbinysoft tohwa yimam newa nefm yak nhtaruha yiha, nd yiha nikmoh krho nmbuhat nhai Tairti Saidonthut kanjo yakruhattko. Nhai. Niko yakruha krho nmbuhat be tu bro krho nmbuha mift yakrahtko. ¹⁵ Yo niko Kaperneam thofko, kangko, 'Ka yura mountko riyahnom?' Nhai. Niko nndo helko riyahkonwe."

¹⁶ Turhu disaiperm kfo memorm, "Niko pthayuk mrokfom yimam wanukwomme, nd yimam nanhu mrokfom wanukwom. Nikmoh pthayuk mrokfom nhai wanyakahmme, nd yimam nann mong trohwom. Yimar na mong trohyukr, na kfo tkrurafyuk yimar mong trohwor."

Nd 72 yimam niamo yuhat

¹⁷ Nd 72 yimam yimom tfit bro yindhor nmbuhatpno tfit niamom. Niahato Jisasr̄pno mkfo memom, "Broye, nom ninhu yufat yuta nawoh-hato tek yarh kmi yarhm wany yakiomomm nmoh tngm." ¹⁸ Jisasr̄ wanyhato kfo memorm, "Na htimoyanr̄ Satanr̄ toh fnhur kanjo wufohninamor. ¹⁹ Wawanyko. Bro bbukeft bi he-moyanko. Nd bbinysofthu karoh-tknami yima waset nandomenm yahotrahkomm. Satanr̄hu nanyjar rifhut yiho hathurahkomt. Be nhai wom tamohm finji naruhatkno. ²⁰ Inji bi htimokomn, to mirahko akfo amanyom, 'Kmi yarhmi tek yarhm nmoh tngm fak hikm.' Mirahko inji akfo yindhornom. Be Bro Nkifrar nikmoh yufam wandfamo nmbuhatn wakfo yindhortwako."

*Jisasr̄ Bro Nkifrar kfo yindhormo yuhat
(Matyu 11.25-27; 13.16-17)*

²¹ Jisasr nd 72 yimaroh mrokfom kfo yakio hanyetrn, Bro Nkifrarhu Yafothat bro yindhor nmbuhat hemotr. Nd Yafothathu yindhor nmbuhatpno Jisasr kfo memor; “Dajaye, ni nda mounti bbinysoft buriwa Nkifraye. Ni tu hifa dborioh neft namo. Nd nefm hifa nd bro duka tungunet yimampno yak kafrohmonmn, tfit habhi yonenmpno fak nriyafmonn. Ndnatn na kfo yindhorwann.” ²² “Nanhu Yifemr nanhu tirn tamoh tamohm hta bugamorm. Nhai wom yimam nd rorhu Yonr hti nhtakahmr. Tu Yifem-rpar hti nhtewurr. Yo nhai wom yimam nd rorhu Yifemr hti nhtakahmr. Tu Yinemrpar hti nhtewurr. Yimam tu Yinem yonrn sinyahato turhu Yifemr yak nuhaswatrm, ndnatn hti nhtewurr rorhu Yifemr.”

²³ Turhu disaiperrpampno rhu hasetrn, nhowi kfo memorm, “Yimam nd niko htiyuk tamoh tamohm bi htiyetmn, ayindhortwam. ²⁴ Na kfo mifwanko, boknabok profetmi kingm nd niko htita shrm memoum, ‘Ahtinom,’ to nhai. Nhai nd shrm htirmoamm. Yo nd niko arihat wanuka mrokfeft memoum, ‘Awanyom,’ to nhai. Nhai nd mrokfot wanyrmoamt.”

Samaria thofr namo dborioh neft

²⁵ Nkifra boririfhuthu tisar memor; “Jisasr afo attiwon wona.” Inji duketrn, ttiwon memorr; “Broye, na finji narhoyann, toh nkifrarhoya?”

²⁶ Jisasr wanyhato ttiwon memorr; “To boririfhut finji kfiwat? To ni wanyshoft finji wanukwann boririfhu mrokfom?” ²⁷ Tfit rorn kfo memor; “Bror ninhu Nkifraye; ndnatn ninhu yuhuwaf marbi bugam, ninhu yafothat, yo ninhu yima yuhu bugam be rorparn htakfot.’ yo, ‘Tunn yak marnyewa kanjo inji womm yak marnyakfot.’” ²⁸ Jisasr inji wanyhato kfo memorr; “Nd ni pthi mrokfom be tu kfo mifn. Inji nahato toh nkifrarahn.”

²⁹ Nd yimar memor; “Be tukanhu yufat ayak marnyaya.” Ndnatn inji ttiwonmorr Jisasr. Ttiwon memorr; “To nanhu yimatr froher?” ³⁰ Jisasr wom tndh mrokfot kfo nuhas memorr; “Wom yimar Jerusalem htanyhato memor; ‘Aiya Jerikoko.’ Yihotat yau hanyetrn, rikoh yimam toh rafakmomrn, tat noh bonohhato wuskam fak rhoptakni buga hemomr. Ror be tu gur yihotatn hwemor. ³¹ Be ror yihotat hwe hasetrn, wom prisr yau hnehato nd yimar yihom htihato manoh yuhaf fau hhrifakmor. ³² Be nd prisr inji yihom hti marsisanehato yimor. Rorhu mongkorn Lifai frikefthu wom yimar niamor. Ror nhaf inji. Ror be nd yimar yihom htihato fau hhrifakmor.

³³ Tfit rorhu mongkorn Samaria thofr niamor. Rorne nd yimar yihom hti yuhuwafmorr. ³⁴ Yihom hti yuhuwafhato brbo nd yimarpno yihato nd yimarhu fhu yuruft wain bupami welpaye kifsamorrn, tawonmorr. Tawonnihato, you, yura nd ror yiyuk donkitn htahato hanymorr yimam yihom hwina mhwenewa kunysn. ³⁵ Ndha hwe nfahato nd wom dbharn nd kunys tohukatohyuk yimar hus kinakfot hehato kfo memor; ‘Ndar yimar ninhu tirn htanywanr. Ninn hatoh hasokahn; tamoh tamohm yaknafrt fahunr; kto na nia thombat maruha hiruhann.’”

³⁶ Nd yimarhu mrokfot kfonihato kfo ttiwon memorr; “Nd yihotat hwe hasoyuk yimar frohr rorhu yimat mifrn tohmr?” ³⁷ Nd yimar kfo memor; “Yimar nd wom yihotat noh hasomo yimar yuhuwafhato yak marnyamo yimar.” Jisasr kfo memor; “Ni waikahnn, nd yimar namo kanjo inji wanatwa.”

Matati Mariat

³⁸ Yau hanyomomn, buha wom kmitn Jisadr ndha riwitamor. Wom mett, rothu yufat Matat, rotn yaknimotr, hanyomotr rothu kunysn. ³⁹ Nd Matathu kunysn mrokfom pthamoatr, Matathu nmem Mariat Jisadrhu wurampno rhuhatu wany yakitohmoutr Jisadr pthamoahat. ⁴⁰ Rot, Matat turperrt yeshrim hta mskamout. Ndnatn Jisadrpno yimotn, kfo memotr, “Broye, nanhu nmemt htanysa turpata yeshrim hta mskiwa. Nhai duka mekahn turpatt hta mskewut? Wakfafahtnt, ania ahingrnanhota.” ⁴¹ Inji mkfomott, Jisadr memort, “Mataye, ni bok dukefem yekwatmn, ninhu yima yuhur kangm bi kminysofem. ⁴² Ndhett bok dukefem arhum. Rpa dborioh dukefrpar wayakn. Mariat ndhett dborioh dukefrpar kangt ayaka. Nhai tftt womm kfo rafokfot. Nhai.”

*Kfo bruttnanef yuhat
(Matyu 6.9-15; 7.7-11)*

11

¹ Wom yiha Jisadr wom tkitt yihato kfo bruttna hasomor. Kfo bruttnani bugamotr; turhu disaiperr kfo memorr; “Yinowe, kfo nuhasrfonnom ni kfo bruttnewa kfo bruttneft? Bingot Jonr tohmohat rorhu disaiperrm kfo nuhas bonuhasmourm ror kfo bruttnamoat kfo bruttneft. Kfo memourm, ‘Inji inji wakfo bruttnako.’ Nom to inji wakfo bruttna nuhasnom.”

² Jisadr inji wanyhato kfo memorm, “Kfo bruttnanef inji kfo bruttnakfot: ‘O nmoh Bro Yifeme. Ninhu yufat tu hnaru yufayet. Nhai yimam yuta rraha borrhakfot.

Nom kangnom ninhu kingdomkfot aniehnat.

³ Nmoh yihof href ye hasoyuk yeshrs wahe hasotwannom.

⁴ Nom niwa fasoh fasoh nefm wayafhonm,
nom womrohnm yafuhiwa kanjo.

Nom niwa kanjo nmoh fasoh nefm waduka mumafonm. Mirahn waduka thu waduka thu hatohanm.

Satanr nia toh nnehaknewurnom, mirahn ahti marsisayanm.’”

⁵ Nd kfo bruttna mrokfem inji kfo nuhasnihato wom kfo nhombra mrokfot yakhato kfo memorm, “Niko nda na ttiwonwa yimako, nikmoh yimatn kunym bi darmbnihato bi hweyetm tftt ni womn yifung dany yihato ninhu yimatr mfrthohato mkfo merfohat, ⁶ ‘Bare, na niya bretpa tndausn nanhu wom nanyma kmi thofr nanhu kunys nierr, na nhai wom yeshrim rorhu hayukm. Ndnatn nia ninpno. Famuya husfirpa bretpam hiyafrahna.’

⁷ Inji mttiwonrfotn tftt ninhu yimatr yiro kunys riruhato kfo merfohat, “Tamohmpno ndar yonmari yifung dany bi kunym darmb kihnihato bi yon tuhanmpno hwe guna tuhetnom myak thewarnom? Frohm hrek sinyahato hiyefiwamr?” Kto ni tuha afo toh kinyakihato tftt ror wany batihato sinyani, yak hiyaforfohat, niko ka finji dukewako? ⁸ Tamoh dukeftpno sinyahato yak hiyaforforr ror mttiwonnyukr? Ka be rorhu yimatrn yak hiyaforforr? Na kfiwanko, nhai be rorhu yimatrn yak hiyaforforr. Nhai. Turhu toh kinyakihato wattiwonthu wattiwonthu hatohntn yak hiyaforforr. ⁹ Ndnatn na kfiwanko, tamohm yak yibonrahko, Bro Nkifrar kfo tatokfot. Kfo tatorahko ee hirahrko. Yimam yak hambrohany yak hambro hanyrahm ee mhtirahm. Yimam brbo yihato mkfo tndaurahm ee htiruharmn yakhato hiyafrahm.

¹⁰ Yimam yihato mkfo tatewumr ee kahukrm tamoh tamohm. Yimam

hambro hanitwom ee mhtitwom. Yimam brbo yihato mkfo tndauwom ee htitwarm yakhato hiyefiwurm.

¹¹ Niko wom yiha ka bi htimoko wom yimar turhu yonr yirar mtndaumotr tfit nandomr yakhato ndr wathu nhehafmorr? Nhai. Nhai wom yimar turhu yonr inji narmorr. ¹² O wom yonr yifemrpnno yihato ginafm mtndaunest ka yifemr pkinast yakhato ndt wathu nhehefiwurr? Ka nhai htirmokomr wom yimar yinem yonr inji narmorr. ¹³ Niko nda bbinysofthu fasoh net yimakmoh yonm hifa yak marnya bomaryewa kanjo inji yura mounthu yifemr mfro kak marnyewurko. Turhu Yafothathu hanyeft nakutwokomr, nhai wany marsisakahrko. Nhai. Kahukworko.”

*Yimam kfo memom, “Jisasr tndhrhu bbukeftpno yarhm kak thuworm.”
(Matyu 12.22-30; Mak 3.20-27)*

¹⁴ Wom yimar yima mrokfo yafothar tukihwa kmi yarhr fknemotr nd yimar be mrokfo ptha duha be inji tng mmkr rhumour. Jisasr yihato nd yimar fknenimo yarhr fak thumorr. Yak thumotr; yima yuhur niamotr mrokfo pthamor. Bok yimam Jisasr namo neft htihato be tuha mrokfo duhatm rhumom. Memom, “Bar yimako, Jisasr be tu tamohet bbukeftpno kfitr, nd yimar tfit bi pthiwar?” ¹⁵ Womn wanyhato kfo memom, “Nd yimar yarhroh bro tohak Belseburrhu bbukeftpno kak thuworm kmi yarhm.” ¹⁶ Tfit wommn duka memom, “Mirahnomr yura waukfokahtn, wom neft ayawihnekaht mirahnom awi tu Bro Nkifrarhu Yafothatpno hingnewur.” ¹⁷ Jisasr bi htimorm rom inji duka-mohat. Htihato kfo memom, “Rpa kantrikfot tohyuk yimam buha nayak mkuhato rimtoh mttohato nnaknifest, be nd kantrikfot yohniraht. Nhai wom yimam tohruhatmt. Yo rpa kunys tohyuk yimam nhaf inji. Tum nayak mkuhato nnayurnest, be nhai wom yimar tohruhatr. Be tum naye dborha nohhato yima duha tkitm rhurahm. ¹⁸ Satanr nhaf to inji buga. Na Satanrhu bbukeftpno nd rorhu tuhaghayuk kmi yarhm yak thunest, be nhai tfit Satanr toh bmtakfot. To fitom rorhu wom thu hamuhyukm? Bi be. Tuko kfo yamukatko Tndhrhu bbukeftpno kak thuwanm yarhm. Ndnatn inji kfiwanko. ¹⁹ Nikmoh wom yimam Bro Nkifrarhu yufatpno kmi yarhm yak thu thoft nhai kfo mekahkomm, ‘Tndhrhu yufatpno kmi yarhm kak thuwomm.’ Nhai. To tamohmpno na Bro Nkifrarhu yufatpno kmi yarhm yak thuwohat, kfo yamukako, ‘Tndhrhu yufatpno kmi yarhm kak thuworm?’ Nikmoh yimatm kfo mirahmko, ‘Kfo furewuko.’ ²⁰ Htikfot. Bro Nkifrarhu bbukeftpno kmi yarhm kak thuwanme kfo mekfot, ‘Nom bi Bro Nkifrar kakitohwornom. Bi rorhu kingdomkfot korhnom.’

²¹ Wom namburet yimar turhu kuny kmifar kfra inyarut yakhato rhu hasiwur, rorhu kmifar hifa rhu marnyewur. ²² Tfit womr tu masat nambur nanyjaretr inji htihato kfo mirahr; ‘Barenko, rorpar nambureter. Na afo nhombrawonanr.’ Tfit rorn hafnahaknitrr, womrhu kfra inyaruti rorhu tamoh tamoh mtuhafnitatrr, womrn myak rhoptekwort. Myak rhoptakhato wommpno nayak nhtewumm nd wuss. ²³ Yimar be buha tohhato nanhu tamoh tamoh nefm be nyingarpaye kukatohworm nd yimar nhai nann tohno yibonkahr. Womrn tohno yibonwor. Na wom tamohm yuhre yak nhafoh hanyhato womr tohhato be nyingarpaye yukatohhato nhai yak nhafohnhokahra, tor ndhtet yimarn tohhato krmah hikworm na yuhre yak nhafoh hanyuk shrm.”

*Kmi yarhr tfit mkekutekwa yuhat
(Matyu 12.43-45)*

²⁴ “Wom yimar nd kmi yarhr thu troh tanyshombat afo kitwor rhuyuk tkitroh hambrot. Hambro habri hambro habri, nhai wom rhuyuk tkitt htirfort, tfit mkekutakhato kitwor tur toh tanyuk tkittn. ²⁵ Yitarn htitwor tkitt be wuhat, nhai wom wusswenm. ²⁶ Be nd kmi yarhr inji mhti tanyasihato tfit wuyekwor. Wuyakhato tfit kitwor womroh yakt. Yitarn 7-pelakfot myekwor. Tom nd 7-pelakfotn tu bro nefm aruhwom. Rompno niahato be nd kunyr kakaknitmr. Yakaknitmr be kspita bugewur. Yimar tefi nefenm afo na hasoyukr tfit nd 7-pela kmi yarhm yak hatoh hanitatmr tu bro nefm newur.”

Tu yindhorwa yimam

²⁷ Jisasr nd mrokfot pthamohat bro rifiny buharn tohhato nd mrokfot pthamort. Nd ror pthamo mrokfot ptha buganimotrt, wom mett nd yima rifiny buharn wasinyahato Jisasr kfo memotr, “Jisase, ninhu hiyau mmemt ninhu hingrneft hti thoft ka be tu bro yindhoreftpno korht.” ²⁸ Jisasr wanyhato kfo memort, “Uwa, to yimam Bro Nkifrarhu mrokfom wanyhato yak hikwam, tom romn yindhorwom.”

*Yimam memom, mirakerkfot ahtinom
(Matyu 12.38-42; Mak 8.12)*

²⁹ Yimam rifinyaknamotm Jisasr kfo memor, “Ndar yiharhof yimako be tu fasoh yimayeko. Kfo kangkma, ‘Wom nefit wanakahtn, afo htirahnom.’ Inji kfiwotkma to na fitoh nefit hingrnhota ndtn htiruhako? Profet Jonar pthamo mrokfef yuharpatn ptharhota ndtn wany duka tungarahko. ³⁰ Bingot Jonar taun Ninifat inji namor. Bro Nkifrar bi kformor taun Ninifathu yak batineft. Jonar yihato Bro Nkifrar nd kmithu yak bati nmbuhat kfo nuhasmotrm, nd kmi bugathu yima bugaroh fasoh nefm mong trohmomm. Nd Jonar pthamo yuhatn na Bro Najema inji ptha hikhrota mhti dukarahko. ³¹ Kto yimaroh yak nhta yiharn sautko tohyuk kwint sinyaruhatn tfit rotn tohhato nikmoh fasoh nefm kfo nriyafhirahtn. Rot kwint tu bbinysofthu wuroh krayeft tohhato wanymot Solomonrhu hifa hifa hingrna dukefm. Wanyhato memot, ‘Afo yirhoyann htiruha ror hingrnewa hingrneft.’ To nhai. Nda ariharhof hingrnayet yimar to broyer. Solomonr nhai. Nhai htihato tukmoh fasoh nefm mong trohromokom. ³² Bro Nkifrar yimam yak nhtaruha yiharn nikmoh fasoh nefm Ninifa thofmn mtohruhamn kfo nriyaf-hirahmko. Jonar Ninifat yihato Bro Nkifrarhu mrokfot kfo pthamohat Ninifa thofm Bro Nkifrarhu mrokfom wany yakrmihato mong trohmomm rroh fasoh fasoh nefm. Rot nd bingotrhof mrokfom Ninifa thofm wany yakrmihato rroh fasoh nefm mong trohmot, nd mrokfot be inji. Ariharhof mrokfot rot tu bro tpiyet mrokfoyet.”

*Dborloh yima yuhur yihota yak nukayuk lamet
(Matyu 5.15; 6.22-23)*

³³ “Nhai wom yimar lamt hta funakhato tfit rikato o wom bro baket yakhato lam funeft hta tasifakahrt. Nhai. Lamt dany yuha tafontn htewatrt yimam witaniyukm htitwomt. ³⁴ Yimar tu hifa dborloh yima dukefet, nd dborloh dukefm kshn kanjo yak nuka hanitatmr, hifa dborloh dborloh nefm newurm. Yimar nd hifa yima rifhur bi fnahniyetr to be

nyinga kunyjetm kanjo yak tato botatohato na fura bofurewurm tamoh tamoh nefm. ³⁵ Ndnatn be tu duka marnyaf hanykfot. Mirahko nd yiro yima rifhur rirhuuyuk ksh nukefr atatpohnomr. ³⁶ Ninhu yima rifhur be hifa dborioh yima rifhurpno rhu marnyarah; nd dborioh yima rifhurn lamr kanjo yak nuka hanyruhatrn, yau marnyarahn.”

*Farisimi nkifra boririfhuthu tisaroh fasoh nmbuham
(Matyu 23.1-36; Mak 12.38-40; Luk 20.45-47)*

³⁷ Jisasr nd mrokfot pthanimotr, wom Farisir niahato Jisasr mkfo memorr, “Jisase, wania nanhu kunys nuwa yerahno.” Be Jisasr wanyhato yimor rorhu kunysn. Yihato nuwa yeyuk tkitt rim rhumor. Rim rhumotr, yeshrim yakhato be fe furakni twanhomorm. Nhai yukhato tir kifsa inji nahato nuwa yi yaknirmor. ³⁸ Nd Farisir inji htihato duka memor, “Tamohmpno Jisasr nhai yuk duha be bmbri nuwa yi yaknir?” ³⁹ Jisasr kfo memorr, “Niko Farisiko kaf pletm briahako yuk kifsewa kanjo be inji briahakorrrpa yuk kifсахato kak marnya bomarnyewuko. Nikmoh yima rifhumio rikohnefmi wom wom fasoh nefm furkihwomko. Tukmoh toh nmbuharpat dukahato bi marut wuss tamoh tamoh yak yakhato bi tohwokomt. ⁴⁰ Yon mumenm kanjo ptha mumiwuko. Bro Nkifrar nhai briahako nayuk nefrpam htikahr. Nhai. Yiro yima rifhurio wagra sinyahato nayuk dborioh nefm ndm rpat hitworm. ⁴¹ Wom yima bebr o met bebt wuskapa duhatn hti yuhuwaafhato hirahnt, ee btn Bro Nkifrar hti yindhorrahrn.

⁴² Tamoh tamoh wuritwenm, youpenm, wajipenm yakneft nhai Bro Nkifrar yak brur wunanikahkomr. Nhai. Bro Nkifrar hifa mhtahukkomr. Ndm rom tu hifa dborioh nefm newuko. To nhai. Tu bro neft myak htanitwokomt. Nhai Bro Nkifrar rpat niyakitohhato rpat tohkahko. Yo nhai wom dborioh nefm nakahko. Ndnnetn wadukaf hanyswako! Bro Nkifrar be yak bebrahrko.

⁴³ Judaroh rhu rifinyuk rmonm rhuneft be kangko bro yufet yimam mruhekwa barkof gajim arhukahtnom yimam htirahmnom. Yo tamoh maket swirm kangko yimam be nomn akfo yindhor boyindhorm. Ndnnetn wadukaf hanyswako! Bro Nkifrar be yak bebrahrko.

⁴⁴ Aromenkono! Yima yopt htitwokomt? Yura bbrmontn hifa hti fughewukomt. Hti fughahato yura wiyauyauwoko. Nd bbrmonthu yirokn torwe yima gur bi kfe bdgnyetr korhr. Yimako to inji rhu nhombrewuko nd yima yopt kanjo. Yimam htitamko kangm ka hifa dborioh yimayem. To nhai. Nikmoh yima rifhum fasoh nefm furkihwom. Ndnnetn wadukaf hanyswako! Bro Nkifrar be yak bebrahrko.”

⁴⁵ Wom boririfhuthu tisar sinyahato Jisasr kfo memorr, “Tamohmpno nd mrokfot nom rpat yekwatnom? Nom nhai ndhtet nefm nakahnom.”

⁴⁶ Jisasr nd boririfhuthu tizam memorm, “Niko to inji buga. Nikmoh neft to inji newuko. Nhai be hifa hifa mrokfefm yakhato kfo hta bohta marnyakahkomm yimam. Nhai. Niko htewa boririfhum be tu kminysofm kanjo tohwamn yimam mnhiyekwom hikneft.

⁴⁷ Niko dukaf hanykfot! Nikmoh nkifram inji na hnamom. Profetmpno nhai hifa nyingar htarmoamm. Yimoamn, faso faso was beb bobeb thumomm. Tfit niko yonkomn arihat yitakomn nd profetroh yopm yak marnya bomarnyewakomm wondh-wokomm. ⁴⁸ Be tu yuwi furewuko. Nd profetm arihat atohkahmn mrokfom aptham, to nhai wany yakior-fotkomm. Tukmoh nkifram namo kanjo nhaf inji wasrfokomm.

⁴⁹ Bro Nkifrar tu hifa dukefetn kfo kangr; ‘Profetmi aposerm rompno kfo tkrurafrohotanm, nhaf be yimamn hirrahm.’ ⁵⁰ Ndnatn ariharhof yimam nd profetm was hnamo yuhatn krhopam yak hanyrahm. ⁵¹ Bingot nikmoh nkifram was hnamo profetm, barkofr Aberr wasmom. Ror wasnihato ee wom womt be yimaroh tirmn hirmom. Wurohenr Sekaraiar yiro temperrn, tarjoh mthamoa tkitt toh hasetrn rim wasakmomr. Ndnatn niko bi tukmoh nkiframn katirnamomko. Nhai toh marnyaruhatko, rroh krhopam tfit nikomn yak hanyrahkomm.

⁵² Niko dukaf hanykfot! Niko kfiwa boririfhut nhai tu yak hik marnyakahkومت. Bok nefmn frhammo bohಾಮuwatomm yimam rom buha mmo bomumiwum. Tu nd Bro Nkifrar hayuk boririfhutn akfo hta marnyakomm yimam, awi, rom hik marnyarfomt.”

⁵³ Jisasr nd kunys htanyhato tfit fnahnimor. Farisimi nd boririfhuthu tisam, duka memom, “Barenko, nom nd yimarn kangr amfrfnahniya. Niko finji dukewako? Nd yimar ayak thunomr.” Ndnatn yuwi ttiwon tebf botebf htfasmour. ⁵⁴ Nd yimaroh dukeft duka memom, “Yuwi inji ttiwon rhti tebf hanyruhanomr, bi finji kfiwur, ee nd wukier nd yiha tathurahr.”

*Farisiroh fasoh nefm hti hik marnya hanykfot
(Matyu 10.26-27)*

12

¹ Bok yimam rifinynimotm, nhai wom tefi rrfenr htikfot. Rim toh mtohneft to be yimamn muhkfot. Nd yihar Jisasr wom mrokfom kfomorm. Barkofpam afo turhu disaiperrn kfo memor; “Niko mirahko ahiknom nd Farisiroh nefm. Kfo fura bofurarahmko. ² Nd kfo fura bofura mrokfom yiro yima yuhur kafroh hasiwam, Bro Nkifrar tafont htarahr. Tamoh tamoh mrokfom kon kafroh hasiwam kto tfit Bro Nkifrar nd kon kafrohet mrokfom tafontn htarahr. ³ Ndnatn nd niko yifung kfoyuk mrokfom Bro Nkifrar tfit mar tafontn htaruhatrm tfit wanyrahmm. Yiro rumtn turpethato kfo kafrohyuk mrokfom tfit kto yima rifiny buharn Bro Nkifrar ptha nriyafruharm wanyrahmm.”

*Bro Nkifrarpar yakrmekfot
(Matyu 10.28-31)*

⁴ “Barenko niko, nanhu yimatomm, kfiwanko. Ndar nom hatohwa thatipt waswa yimam ayakrme furawahkomm. Thatipt wasniruhamt nhai tfit wom finji naruhatm. ⁵ Rot yakrmanyefte, Bro Nkifrarpar yakrmekfot. Ror yimam yak nohniato tfit kangr kaht aim, kaht kitwom. Uwa! Rorpar yakrmekfot.

⁶ Yimam kibr nungam wikna thoft tefi hus toyarpaye wiknewumm tirfa nungam. Nikmoh nyingaye hti thoft kangko, ‘Ndm tefi nunga pirayenem.’ Bro Nkifrar nhai inji hti sminakahrm. Rorhu tirmn korhm. Niko yimako to inji nd nungenm kanjo rorhu tirmn korhwoko. ⁷ Niko yimako be ayakrme furawahko. Bro Nkifrar hti dukewurko. Yimaroh tmariroh tmarifam ror thomna bugewurm. Nhai womfenr rim tohtakahr.”

*Jisasrhu yufat kfo kafroh duha
(Matyu 10.32-33; 12.32; 10.19-20)*

⁸ “Kfiwanko, fitoh yimar na hikhato yimampno kfo habri kangr, ‘Na bi Jisasr kak hikwa,’ na kfiwanko, kto nd yimar tawo na Bro Najoma mounmotroh nyingahato kfo miruha, ‘Ndar yimar nanhu nanyma yimayer.’

⁹ Frohrn na hikhato wom yimampno kfo habri kangr, ‘Na nhai Jisasr hikkaha,’ kfiwanko, nda bbinysoft batiruha yihar tawo na Bro Najema mounmotm kfo miruhanm, ‘Nd yimar nhai nanhu nanyma yimar rhukahr.’

¹⁰ Fitoh yimar na Bro Najema hingrnyuk hingrneft htihat kangr, ‘Nd yimar nhai fipet hingrneft hingrnakahr,’ inji kfoyuk yimar Bro Nkifrarprno tfit kfo gbuhkfot. Ndnatn nhai be kfongot duka hanyruhattr ror pthayuk tngt. Nhai. Duka mmorahrt. To fitoh yimar na Bro Nkifrarhu Yafothathu bbukeftprno hingrneta kfo famur, ‘Fasoh tndhrhu bbukeftprno hingrnewur,’ nd yimar nhai tfit kfo gbuhruhattr, be Bro Nkifrar nhai duka mmoruhattr nd yimar kfoyuk tngt.

¹¹ Yimam na Bro Najema hikwamn kangm, ‘Judaroh rhu rifinyuk rmonkorhof bro tohukatohmi mejistretm, rompno ahanyakahnommn htirahnom toh bmtarahm pthanef?’ Inji duka-hato hanitwomko. Na kfiwanko, mirahko duka amanyom, ‘Na hrek finji kfiwoya ttiwon thoft.’

¹² Mrokfo pthayuk tkittn Bro Nkifrarhu Yafothatn mrokfo ptha rifhur hirahrko.”

Wom maru kunyet yimarhu kfo nhombra mrokfot

¹³ Nd Jisas pthamoa yima rifinyrn wom yimar sinyahato Jisasr kfo memorr, “Tisaye, nnoh yifemr bi nohmor. Nanhu najemr wakfokahtnr nnoh yifemrhu wuskam ror harhuwam ayak nhtakahrm nanhum bi ahira.”

¹⁴ Jisasr wanyhato kfo memorr, “Bare, frohm kfo yamum, na womann yak nhtahato yak nhombra hirhoyanfn?” ¹⁵ Inji kfonihato kfo memorm, “Yo niko, wuskam hti wuttha duha. Womr bok wusketr htiruhann mirahn, ‘Na kanga inji bok wusketa aruha ndu yimar kindo.’ Mirahn wuskam adukaya. Tunhu tohneftn dukakfot. Yimar wusketr nhai nd wuskamn rorhu yafothat thu bmta hatohruhattr toh hatohruhar. Nhai.”

¹⁶ Inji kfonihato wom maru kunyet yimarhu kfo nhombra mrokfot yak-hato kfo memorm, “Wom bro maru kunyet yimar mswirt htamortn nd mswirthu yeshrt hifa sinyahato hirmot.

¹⁷ Nd maru kunyet yimar nd yeshrt htimortn duka memor, ‘To ndar yeshrt yakrhoyante, to fitoh bro kunymn yak htarhoyant? Nhai wom bro kunym nd yeshrthu htayukm.’ ¹⁸ Be inji mduka nhtahato duka memor, ‘Nhai mrokfom. Nd habhi kunypam tfit yak tmbrarhoyanm tfit bro bro kunyrrpam hingrnaruha. Bro kunym hingrnanirhoyann btn nd mswirthu yeshrt yak thoft yo wom wuskam be nd bro kunyrrpamn hta tibmonruhant.

¹⁹ Btn nd yeshrt nd tamoh tamoh bro kunyrrpamn hta tibmonrhoyanm be nhai mrokfom. Nhai wom tamohm tfit wom dukarhota. Tkitt to bi fekant. Bok gunyjim be nd yeshr kunym dukahato tohruha. Be ye mmo rhu mmo nefrpat dukaruha.’ ²⁰ Tfit Bro Nkifrar kfo memorr, ‘Bare ni faso kfo hamumiwun. Ni asomif nohneft. To frohmn yakruhamm nd ni hta tibmonyuk wuskam?’ ²¹ Nd kfo nhombra mrokfot kanjo bok yimam inji newum. Asha bbinysoftn wuss yak yakhato hifa rhu nmbuhat kekwo.

Nhai yima yafothat mrhuyuk tkitt dukahato yak hta bohta marnyakahm.”

*Bok dukefm yak duha
(Matyu 6.25-34)*

²² Jisasr nd mrokfot kfonihato kfo memorm, “Nd dukeftpno kfo kanganko, mirahko tukmoh toh nmbuhat htihato akfo amanyom, ‘Nome tamohm yehato tohruhanom? Hmbreshame tamoh hmbresham hmbriruhanom?’ Ndh tet dukefm yak duha. ²³ Bro dukeft dukakfot tukmoh yafothathu tohyuk tkittn. Mirahko thatipt tohyuk tkitrat adukanom. ²⁴ Nunga kusm hitwokomm. Rom nhai wom yewuri fant nuhtakahm. Rom nhai wom kunys singohato yeshrt o tamoht hta tibmonkahm. Rom be inji rhu furewatm tu Bro Nkifarn kahukrm yeshrt. Niko finji dukewako? Ka be nd nunga furenrpm hti dukewur? Nhai yimako tur yak yeny nhombrayukko dukakahr? ²⁵ Nhai ndar bbinysofthu wom yimar noheft yironak hanyhato afo kfo marifort, ‘Awi ar noheft. Na wofnkaha bmbri noheft. Na kanga afo atohaka. Tafi toh buhtarroya ndar bbinysof.’ ²⁶ Ndnatpno to tamohmpno wom tamoh tamohm dukewakomm?”

²⁷ Htiwoko plauam sinya thoft nhai tum mtinm mtinhato tum rmontham nahukahm. Kfiwanko, bingot Solomonr wondhmohat nhai nd plauathu wondht kanjo rorhu wondht rhurmot. ²⁸ Htiwokomm plaua tfam Bro Nkifarn htamorm nd wondht. Nd plaua tfam rhu thoft nhai rhu buhtakahm. Href rhuhato tfit nohof hafit tmbhohato tuhefiwumm kahtn. Ndh tet mifan furenm Bro Nkifarn nhai hti marsisakahm. Nhai. Roh wondht kahukrm. To ndar yimanom kangko, ‘Bro Nkifarn nd plauam kanjo nhai wondht heruhatrnm?’ Bar met yindariko, Bro Nkifarn ka be psirnano kakitohwokomr? ²⁹ Ndnatn yeshrt be mfro adukawahkomt. ³⁰ Yimam Bro Nkifarnhu mrokfeft yak hik duham, nd yimam be yeshrimi tamoh tamoh dukefm, be nd dukefmm korh hasiwum. Niko be nd tet dukefmm duka haso duha. Bro Nkifarn bi hitworm niko dukiwa dukefm. ³¹ Afo nikmoh bro dukefm afo Bro Nkifarn yak htakfot. Rorhu yinhit rhuhato tamoh tamohm nakurahrkomr be hirahrko.”

*Yura hefenrn tamoh tamohm yak htakfot
(Matyu 6.19-21)*

³² “Sifsifenko, aduka yanhowahko. Nikmoh Yifemr, yura hefenr yorhwarko, bi duka hta memor, ‘Ndar bbinysoft nanhu yinhit rhu thoft, nikomn tohukatohnhorahkma.’ ³³ Niko harhuyuk tamoh tamoh wuskenm yimam awiknakahtmm, tfit nd wuskaye yakyuk maruham tfit hekfot wuskapa duha yimamn. Hiyafruhakomm niko tu burifht kanjo tone haset maru yihotat htayakrahkomt. Htiyakhato yura hefenrn nikmoh hifa dborih wuss rhuraht. Yura hefenrn tamoh tamohm yak htarahkomm, be nhai hti hambroruhatkomm. Nhai wom rikoh yimam yak rikohhiruhatkmo. Yo bfongt o dmt nhai yeruhattm. ³⁴ Hifa hifa dborih wuss yura yak htakahkomm be nikmoh dukefm be nd wuss rhuuyuk tkitt duka duka ruharm.”

*Yiha yiha rhu gari hasokfot
(Matyu 6.19-21)*

³⁵ “Yo niko! Hti yukatoh hasokfot! Hmbresham nyuh dbkaf marnyahato lamm hta funahato hti yukatoh difron hasokfot! ³⁶ Hingrna yimam turoh tohukatohr kuny grhat yihato rhu yukatoh hasiwa kanjo inji warhu yukatoh hasotwakomr. Hti haso, bi kuny kimbko bi myak nmbarwor, ‘O bi tor,’ yudbat toni yaknihato yifhtatikt rim yak tfanyakkfot. ³⁷ Yimam rorhu nia yihar mhtitaworm rhu gari hasimrn, nhai hwerfom, nd yimam yindhorkfot. Na kfiwanko nd tohukatohr niaruharn hmbresham nyuh dbkaf marnyahato nd ror rhu gari hasoyuk yimam turn yak hta-ruharm

yeshrim yak nhtahirahrm. ³⁸ Yifung danys o dbha ksfut barkof krimpno niahato mhtitaworm rhu gari hasimr, nd rhu gari hasoyuk yimam, rroh yima yuhum yindhorkfot.”

³⁹ Ndt inji kfonimortn tfit womtne kfo memor, “Wom kunys rikoh yimam kangm ania arikohnomt, bi nd tu kuny sikatr bi fekr nd rikoh yimaroh nia mrokfot, be nhai ror mhwe gushu-nikfot. Rorhu yimbhindangm be tohetoh hasorahm. ⁴⁰ Ndnetn nikmoh yimbhindangm be tohetoh hasokfot. Bro Najomr rhu mmo hasetkonn be yak fohtasakrahkomr.”

*Fasoh nayet hingrna yimarhu kfo nhombra mrokfot
(Matyu 24.45-51)*

⁴¹ Pitar tohhato kfo memor, “Bro Najeme, nd ni kfo pthiwa kfo nhombra mrokfefe nom rpanom kfo nhombra nuhaswone ndar tohwa met yindar bugam rpatn?” ⁴² Bro Najemr sinyahato tfit kfo memor, “Fitoh yimar hingrna marnyewur, tor nd yimarn turhu tu bro tohukatohr wom ktitm yinyeft, kak htewur wom hingrna yimaroh tohukatohneft yo kfo nuhasworr hingrna yimaroh yeshr heyuk yiharoh yeshr hanyeft. ⁴³ Nd tu bro tohukatohr kfoyuk hingrneft hingrna hik marnya hasirt, nd yimar yindhorkfot. ⁴⁴ Na kfo mifwanko, bro tohukatohr nd yimarn htarahr rorhu tamoh tamohroh tohukatohyuk yimar. ⁴⁵⁻⁴⁶ To nd yimar hingrna hany hingrna hanyhato bi bok yiham toh garitihato nd kfo hta tanyuk hingrneft faso faso rihingrna behohaknihato nd hingrna yimam faso faso ritat bebakhato ror be nuwa bupa ye mmo nefrpat duka hasir, inji na mmo hasetrn, nd tohukatohr nia mihti thoft, be nhai wom tohruhatr nd hingrneft. Be nia yak tuhafrahrr. Yak tuhafhato tu rpahtet net yimampno tohrahrr.

⁴⁷ Nd hingrna yimar, turhu bro tohukatohr kfo tanyuk mrokfo yuhat nhai hingrna hik marnyarfort, be nhai htiruhatr. Mfro namburrahrr. ⁴⁸ Yo wom hingrnamo yimar turhu bro tohukatohr nhai wom hingrna mrokfem kfo tanyhariforr hingrna mmo hasetrn, be nhai mfro namburruhatr. Ndnatn yimar Bro Nkifrarhu mrokfot mwany warho fnahetr, nd Bro Nkifrarhu mrokfo pthaneft mna yuham tou hikak bugakfot. To yimar Bro Nkifrarhu mrokfot mwany warho fnah duhatr, rorn be yura ptha mmbrafinyineft, nhai mrokfom.”

*Jisarr yimaroh yak yibnarneft niamo yuhat
(Matyu 10.34-36)*

⁴⁹ “Na nia bbinysofthu kahthu mihtanyneftn. Kanga bmbri mihtanyant. ⁵⁰ Barkoft kanga krhopam ayaka. Tfit na tuka nd krhoparoh yak nmbuhariduka thoft yima yuhur nhai marnya-kahr. Ndnatn kanga yudbat ayaka. ⁵¹ Na niamohat ka kangko yimaroh nnayur nmbuharoh yak tkafhato yak nohneft niar. Nhai. Na niamota htihato nnakfoni nnanyihato naftrndohmom. ⁵² Arihat be afo wahtiyaf hanyswako. Tirfa yimam rpa kunys tohyukm htirahkomm tfit naftrndohrahm. Wom husfirpat rom inji tohrahm wom husf rof inji. ⁵³ Naftrndohruhamn, yifemr toni-ruharin yinemprno tuf tawo tawo nnarahf. Mmemt sinyaruhatn yinemt-pno tuf tawo tawo nnarahf. Met yimborehfm nhaf inji buga tum tawo tawo nna hakurahm.”

*Tamohmpno Bro Nkifrar niwa nefm hti nhta duha yitakomm?
(Matyu 16.2-3)*

⁵⁴ Wom mrokfot kformorm nd tohmo met yindarim. Kfo memorm, “Dbha yiham marr nhai mwondh fnah marnyakahr kfo kangko, ‘O hrek yihat ka toh nyukuhwot.’ Be nhai kfo fura-kahko. Nd yihar nhai toh marnyakaht. Toh nyukuhwot. ⁵⁵ Htitwoko marr hifa mwondh marnya fnahwor, kfo kangko, ‘O href hifa yihar tohwor.’ ⁵⁶ Ar mmo hari kpt! Yihathu rhu yuharpat hti nhtewakomn to nhai hti nhtakahkma nanhu nianeft.”

*kot mrokfot bmbritn nakfo nohkfot
(Matyu 5.25-26)*

⁵⁷ “Yau foh mmom kanjo tamoh tamoh nefm yudbat naknitwokomm. Nhai yak hti nhtahato hifa hifa nefrpam nakahko. ⁵⁸ Womrpno kot kitwofn, yudbat yihotatn bmbritn ni tufn nakfo nohkfot nd kot mrokfot. Kot yiruhafnn, womr kotimruhatrn kalabus yirahn. ⁵⁹ To kalabus yinyeft to nhai bmbri fnahneruhatn. Kot kfoyuk wuroh wiknayuk wuroh marufat bi wiknanint ee btn fnahnerahn.”

Yimam fasoh nefm mong troh duhatm nohrahm

13

¹ Nd yihart ndha tohmo wom yimam tohhatu Jisasr wom mrokfot kfo nuhas memorm, “Jisase, Galili thofm Bro Nkifrar ko tarioh mthamoatm Pailatr htihatwom wom yimam yak tkrurafmotr rom yihatwom nd yimam tarioh mtha hasoyukm wasmomm.” ² Jisasr wanyhato kfo memorm, “Nd Pailatr yimam yak tkrurhato wasmo yimarpam htihatwom ptha duha. Niko ka duka kangko rroh toh nmbuharpam fasohmn ndnetn Bro Nkifrar Pailatrnr mrhuhato inji namorm? Nhai. Ndt fasoh dukeft kekwoko. ³ Yima bugam, yonent burent, fasoh nefrpam thu nhombra buganimomm. Ndhett yimam Bro Nkifrar yak batirahrm. Ndnetn nd fasoh nefm mong troh bugakfot. Nhai womenr rim tohtakfot. ⁴ Yo nd Siloamthu 18-pela yimam kunys suhakhato tatmom, to ka kangko ka Jerusalem tohwa yimam ka nd Siloamthu kunys tatmo yimarparoh toh nmbuham be tu fasoh mifmn kunys tatmotm? Nhai. ⁵ Na kfiwanko be tu nhai. Niko to inji buga. Rpa-hteteko. Niko buga nikmoh fasoh nefm mong trohkfot.”

Yukha hir duha mishu kfo nhombra mrokfot

⁶ Fasoh nefm mong troh duha yimarhu wom kfo nhombra mrokfot kfo memorm, “Wom yimar turhu mswirt nuhtamort fik fant. Kto yimorm memorm, ‘Afo htiruha bi hirwote nhai.’ Yimorm htimort nd fikt nhai yukha hirrmot. ⁷ Ndnetn nd mswirt tohukatohyuk yimar kfo memorm, ‘Wawanyan. Bi husfirpa gunyimm nia hatohmoyann htimoyant ndar mis nhai yukha hirwonrmot. Hifa hifa bbhat be ndar misn kak furewut. Wayoh hehur thutwant.’ ⁸ Tfit nd mswirt tohukatohyuk yimar inji wanyhato kfo memorm, ‘Bro yimaye, kanga afo wurohpenm wom gunyimm afo tohwonrfot. Tfit afo mishu tpiko bbbpam tou yibufrrhoyanmn bulmakauroh rim yakhato afo mishu tpiko tou yeny boyenywonraht. ⁹ Inji natiwonhato nhai hirkahht ee btn yoh thuraht. Hirwote be tohraht.’ ”

Jisasr Sabat yiharn mett yak marnyamo yuhat

¹⁰ Wom rhu krna Sabat yiharn wom rhu rifinyuk rmonn Jisasr yihatwom Bro Nkifrarhu mrokfom kfo pthamorm met yindarim. ¹¹ Nd kunys rhumot wom mett wom yarhr fknemotrt, nd yarhrn kak dbohnamourt.

Dbohneft nhai yihom tohaf hanyrmoat. 18-pela gunyjimm nd dbohneft hatohmott. Mungranjbimpno inji dbohnamout. Nhai toh susna rhu susna inji narmoat. Benji waswoktahato rhumout. ¹² Jisasn nd mett htihatona nakuyakmorr. Nakuyakhato kfo memorr, “Bar mete, nd dbohnef bebt asomif thu trohwotn.” ¹³ Inji kfoni hanyhato tirt htamorr. Tirt htamorte be yudbat nd dbohneft thu troh tanymott. Nd rhu waswok hasoyuk mett be tfit rhu susnamot. Rhu susnahato Bro Nkifrarhu kfo yindhorr boyindhormotr. ¹⁴ Tfit nd rhu rifinyuk rmonthu bro yimar namburmorr. Memorr, “Tamohmpno rhu krna yihar dbohnet yimam yak marnyewarm Jisasn?” Ndnetrn namburmorr. Tuhant yindars kfo memorr, “Hingrnayuk yiham 6-pela kfoyet. Dbohnefetko, nd hingrna yihamn niahato yimam htirahmko. Rhu krna yiha dbohnefm hna duha.” ¹⁵ Jisasn wanyhato kfo memorr, “Ar brumharpam pthayet kpt! Ka niko rhu krna yiham nhai nikmoh bulmakaum bupa yat hanykahkomm?” ¹⁶ Ndar na yak marnye mett yima Abrahamrhu yonett. Satann 18-pela gunyjimm yimatn hatohmorr. Nd rot hatohyuk yarhr na rhu krna yihar yak thuneft fasoh neft neya?” ¹⁷ Be inji kfomorr nd ror kfomo yimam tfit yimtnamom. Jisasn nayuk nefm nd mett yindarim htihatona kfo yindhormom.

Mastet tpiyenrhu kfo nhombra mrokfot
(Matyu 13.31-32; Mak 4.30-32)

¹⁸ Jisasn tfit ttiwon memorr, “Bro Nkifrarhu kingdomkfo finji akfo nhombrrayant? Tamohmn akfo nhombrraya?” ¹⁹ Bro Nkifrarhu kingdomkfo kangme tefi mastet tpiyenrn yimar yaknihato turhu mswirtn nuhterr. Nd mastet tpiyenr frdborhahato yonmari bufum korhm. Kto nungam tkit tkiroht ndha niahato wuswomtt.”

Yisparoh kfo nhombra mrokfot
(Matyu 13.33)

²⁰ Nd rpa mrokfot tfit wom kfo memorr, “Bro Nkifrarhu kingdomkfo finji akfo nhombrrayant?” ²¹ Bro Nkifrarhu kingdomkfo bronni thoft 3-pela bek plauaroh plauapam tefi yispenn mimf rihtafhato kur yikopwa kanjo inji bronirahnt.”

Tefi yifhatik yuhatt
(Matyu 7.13-14; 7.21-23)

²² Jisasn Jerusalemko yinyeftpno bok kmim toh fnahhato Bro Nkifrarhu mrokfot kfo nuhas fnahmorr. ²³ Wom kmithu wom yimar Jisasn yihato ttiwon memorr, “Jisase, nda bbinysofthu wuroh bati yihare, rpa rpa yimarpam yakrahr?” Jisasn wanyhato kfo memorr, ²⁴⁻²⁵ “Na kfiwanko, yihota rim fnahni yuhate kukentamot. Ndnatn bi arihatn bbukahato bi rim fnahnikfot. Kto tu kony sikatr nd kuny yifhatikt frkihaf thombat be finji fkneniruhako? Bok yimam briahako tohhato kfo mirahm, ‘Wayak tfanyakna.’ Kfo mirahrr, ‘Ni fitha thofe? Na nhai wom tkit ninhu nyingatikt htirmoyann.’ ²⁶ Tfit romn kfo mirahmr, ‘Nom to ninpno rpat nuwa famonom. Yo nmoh kmirroh bro yihotamn Bro Nkifrarhu mrokfefm kfo nuhas bonuhasmonnom.’ ²⁷ Tfit rorn kfo mirahmr, ‘Na nhai wom tkitt htirmoyanko. Ka fitha thofeko? Wur fasoh yima bebko. Wuri waikma.’ ²⁸ Htirahko Abraham, Aisak Jekofromi yo wom profetm, romrpm Bro Nkifrarhu kingdomkfo rhuruhatm htirahkomm. Niko wuri briahako tohhato tau nknekrakho. ²⁹ Nd bbinysof bugathu yimam yiruhamn

Bro Nkifrarhu kingdomkfofot mrhuhato nd bro yemro burwat yerahmt. ³⁰ Ndar yihar yimam mongko niayukm mfrfnahnirahm. Yimam nyingako tohakyukm tfit mongko yihom frfnahnirahm.”

Jisasr Jerusalemt yuhuwafmo yuhat
(Matyu 23.37-39)

³¹ Inji yuhre ptha haso hanyetrn wom Farisim niahato mkfo memom, “Ndashart be tmifn wahtanyakahntn wom tkitm wain. Herotr kangr awasann.” ³² Inji mkfomotmr, Jisasr tfit kfo memom, “Nd rim kfota mkfotahato kfo nneh bonhehet yimar wamitwakomr, ‘Href yuwonanohmbam afo nd yarh fknayet yimami dbohnet yimam htiruha. Ka yuwonanohmbamn nd hingrnefenm hingrna bugaruhanm.’ ³³ Afo bi mirahm, ‘Nd profetr awas-nomr.’ Bingot Jerusalemko profetm wasmoum. Ndnettn na yirhwota Jerusalemtn wasrahma.”

³⁴ Jisasr tfit kfo memor, “O Jerusalem! Jerusalem! Kfo tkrurafoyuk profetm ninn was hakutwanm, yo womm tahiyeh tahiyeh yebhoh noh hakutwanm. Bok yiham memoua nanhu mofsinhitn ahta akafrohneyann mmem kris yonm yak kafrohwa kanjo, to nhai. Nhai wofnrmouna. ³⁵ Be wahti hanyswa, ninhu temperr brio yima duhatr rhurahr. Ariham nhai wom tfit htirhotna. Bi tunn kfo kangn, ‘O Bro Nkifraye, Brorhu yufatpno niayuk yimar wayak marnya bomarnyatwanr.’ Bi tunn inji kfiwune ee tfit htiyakrahna.”

Jisasr wom yubtet yimar yak marnyamo yuhat

14

¹ Wom rhu krna Sabat yihar Jisasr nuwa yat yimor Farisiroh bro yimarhu kunys. Nd Farisiroh nyingam be Jisasrn yimoum. Memoum, “Afo htirahnom ndar rhu krna yihar nhaf tamoh nefm naruhar.” ² Wom yubtet yimar niamorn Jisasrpnno mtohmor. ³ Jisasr nd yimar htihatoh tfit ttiwonmorm Farisimi boririfhuthu tisam, “Niko finji dukiwako? Boririfhut finji kfiwat? Rhu krna yiha dbohnet yimam yak marnyarfohate ka hifa?” ⁴ Jisasr inji kfo ttiwonmohat nhai wom Farisir ptharmor. Be Jisasr nd yubtet yimar yakmorr nd yubteft yak marnyafmotrr tfit yimor. ⁵ Nd yubtet yimar yak marnyafohato tfit toh kekutnimorn Farisim kfo ttiwon memom, “Nd rhu krna yiharn nikmoh yonm o bulmakauum yau hanyhato tekmm yohnifohat ka nhai bmbri yuk hambrakrofukomm? O be hti marsisa merfoko, ‘Rhu krna yihayer, to finji yukhato yakruhanomm?’ ” ⁶ Nd Farisim nd ttiwonkfofot ttiwonmotrm be tuha mrokfo duhatm tohmom.

Yimar turhu yufat yiro wahtakfot

⁷ Jisasr tohato hti hasomourm nd nuwa yat niayuk yimam. Yihato mruhaknimoahat be memoum, “Barkof mruhakyuk gajimn amrhunom.” Inji hti hasohato mrokfot be yura fafunamort. ⁸ Kfo memor, “Wom yimar turhu tuhan yak yihar yemro burwat htahato kfo kangrn, ‘Ni wanietwa nanhu tuhan yak yihar. Nd yiha bro yemro burwat htaruha. Wania wayenyhotwannom.’ Inji kfitrn yifi, ni frohann yihato yudbat tu nyingako amruhakniya. Nd nyingako htayuk gajim miruhatin bro yufetmn ahta hanyom. ⁹ Bi mruhetnn kto tu nd burwat htayuk yimar yauyaknehato kfo mirahrn, ‘Na nhai merfoya ninn yudbat nyingako mrhurahn. Na famuya ndu bro yufetr rhurahr nd tkitt. Ndar tkitt wahtanyns. Ni mongko

warhutwa.' Be bro yimtneft yakrahtn, tfit sinyani mongko yihom rhuneft. ¹⁰ Ndnnetn tuhan yak tatrut yihar yemro burwat htahato nakumn, frohann bi yihato nyingako amruhakniya. Yinyeft afo yihato afo mtohkfot womroh mongkorn. Bi nd tu burwat htayuk yimarn yihom htihato kfo kangrn, 'Asha wamrhun,' ee nd tur kfoyuk tkittn mrhuneft hifa. Nd burwat rhuyuk met yindarim hti yindhorrahmn. ¹¹ Ndt tu bro mrokfot. Yimar kangr, 'Tamoh nefm nann bmbri nyingako mtohnihato nann tamoh tamoh nefm atohakkahtanm yimam kfo yindhorrahma,' nd yimar kto Bro Nkifrar yak dbhurakruharr yiro wahtarahr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahr."

Fasoh yima bebpam nom yak marnyakfot

¹² Jisarr nd nuwam nakuyakmo Farisir kfo memorr, "Kangn zenyhoyuk yimam ayaka, frohann akfo amiya be yimatrpami tunhu kmithu bro maruyet yimarpam anaku tutuhaya. Rom kfakrahn, to be ni hayuk yeshrt bi turoh tire tawo hirahmn. Frohann nd yihotat ahika. ¹³ Ninhu nuwa nngrit, tamoh tamoh yeshrt yaneft fasoh yima bebpam, yimam nd wura bebetm, nyinga kunyjetm, ndmn nakuyakkfot. ¹⁴ Rom nakurahn duka kinyaknirahm, to finji yeshrim yakruhanomn tngo nakuruhanomn. Ndhтет yima bebm Bro Nkifrar kukatohworm. Rom nakurahn tawo Bro Nkifrar wany yakiohato nohnita yimam sinyaruha yiha tawo Bro Nkifrar htiruharn yak marnya bomarnyarahrn."

Yemro burwathu kfo nhombra mrokfot (Matyu 22.1-10)

¹⁵ Nd rpat nuwa ye hasoyukroh womr nd Jisarr kfomo mrokfot wanyhato Jisarr kfomorr, memorr, "Yimar Bro Nkifrarhu kingdomkfofn tohhato nuwa yanyeft ka nd yimar yindhorkfot." ¹⁶ Jisarr wanyhato kfo memorr, "Wom yimar bro yemro burwat hta yibonetrn kmi kmiroh yimam kfo duka hanymorm nd yemro burwathu nianeft. ¹⁷ Nd yemro burwat yak htatamortn tu ye yiharn nd tu yemro burwat htayuk yimar kfo tkrurmorr turhu hingrna yimar. Memorr, 'Waikahnn nd na kfo hanymo yimam wakfo wamitwann, "Hrek korht nd yemro burwathu ye yihar. Wania hnetwako." ' ¹⁸ Nd hingrna yimar inji wany sanyhato yimor. Yihato kfo hanymoatrm nhai rroh womr kfo yibonrmor. Womr yi kfomorr, kfo memorr, 'Na wom bbnysyf nmbuhat wikneyantn afo ndthu htit yiruha. Ndnatn na nhai nierhota.' ¹⁹ Womr yi ttiwonmorr, kfo memorr, 'Na hingrna-yuk 10-pela nfri bulmakaum wiknaroyann afo hanyrhoyanmn htiruha rroh hingrneft.' ²⁰ Tfit womr yi ttiwonmorr, kfo memorr, 'O na hrek tuhan yekann nhai niewota.'

²¹ Be inji kfo kur bugamotm be tfit yimor. Yihato turhu bro yimar mkfo memorr, 'Nd ni kfomo yimam yi ttiwontanm nianeft, nhai womr kfo yibonrfor nianeft. Ndnatn tfit nia.' Be nd bro yimar inji wanyhato namburmorr. Namburhato tfit turhu hingrna yimar kfo memorr, 'Tfit wai habrikahnn fasoh yima bebm wayak habrin. Wuskapa duha yimam, yimam nyinga kunyjetm, wura bebetm, tir bebetm, ndhтет ndhтет yimam wayak habrin. Wayak habrikahnnn nanhu kunys aniam.'

²² Nd bro yimar kfomo yuhatn yak hikhato nd yimam ror kfoyukm yak habrihato mkfo memorr, 'Nd ni kfoyuk yimam bi fak habriyanm. Nd yimarpampno kunys tafi furkihkaht. Tom yuhre wom rrfam korh

furewum.’ ²³ Be nd bro yimar tfit kfo memor, ‘Na wofnkaha wom rrfam rhu furaneft. Kanga kunys afurkiht. Tfit waikahnn nd bro yihota naff yuham yo mswirroh gna nanyor yuhamn tohwa yimam ndm wakfak habri hanyonn. Rompno kunys furkihraht. ²⁴ Na kfiwann, na nd barkof kfo titamo yimam be nhai nd na htayuk yemro burwat nia yeruhatm.’ ”

*Yimar Jisasr hikneft duka marnyahato hikkfot
(Matyu 10.37-38)*

²⁵ Jisasr bok yimam yau hik hanyomotmr kekutnihato kfo memorm, ²⁶ “Yimar nanpno niahato kangr, nanhu disaiperr yimaya aruha, nd yimar turhu yifa mndarm, turhu yon tuhanm yo turhu yima yuhurhu dukefem be mondt hta duha. Nann afo mondt htakfot. Yifammam, yon tuhanm be inji rom dukani hanykfot. ²⁷ Yo yimar kangr, nanhu disaiperr yimaya aruha, nd yimar nhai yakrme-kfot krhoparoh titanef. Na krhopam yakmo kanjo nd yimar krhopam yakkfot. Nhai yakrmekfot.

²⁸ Wom yimar kunys hingrnaneft, nhai be yudbat sinyanihato singanikahart. Barkofpam afo yorhwarn kunyshu hingrna yuham afo dukahato kak nhtewur. Kunys hingrna thoft finji finji hingrnarhoyant? Finji finji marum htaruha nd kunyshu hingrna wuskaroh wiknaneft? Nd ndm afo rhuhato kak nhtewurm. ²⁹ Be asomif waduka sinyahato singa furaknineft htirahnr rahurpam kasinyahato mtuhafnirahrt. Womm htihato haningerahmr nd yimar. ³⁰ Kfo dadidoh mirahmr, ‘Kiwayeye! Kunyr kasinya hasomorr memor, “Ka hingrna bugaruhanr.” ’

³¹ Ten tausen amiyet kantrikfot merfotm wom twenti tausen amiyet kantrikfot ai hfnahnomm nhai be bmbri wahta brurakhato yiyaknikahm. Barkofpam afo nd ten tausen amiyet kantrikfot afo tum yak nhtahato hti nhtewum. Tum yak nhombra hifa hifa ee kitm nnat. Nhai, tum hti nhombra-titme, ³² be wom kantrikfot wuri afo tohetmn bmbri wom yimam yitamn kfo rafiwumm.

³³ To be nd rpahtet yuhatn wom yimarhu dukefr nhai nanhu dukefrn rhu bronikahrr nhai nanhu disaiperr tohruhatr.”

*Youparoh kfo nhombra mrokfeft
(Matyu 5.13; Mak 9.50)*

³⁴ “Youpam tamoh tamoh roh nrhayukem. Nd youpam nhai wom you gb ye juha, to tfit finji kanjo naruhatnm tfit you gb yeruham? Bi be, bi fasohem. ³⁵ Ndhtet youpam be nhai tfit mswirrmn trufkfot. Nhai tfit bulmakau rispno tatkbok hmbrihato mswirmn truf habrikfot. Fasohmn tubatuyefiwum. Yimbhingangeteko, ndar na kfiwa mrokfot wanykfot.”

*Yimar hambrakmo sifsifrhu kfo nhombra mrokfeft
(Matyu 18.12-14)*

15

¹ Jisasr takis marut yak htfasyuk yimami fasoh fasoh nefm nayet yimampno brbo yimom mrokfo wanyneft, ² Farisimi Bro Nkifrarhu borir-ihuthu tisam htihato kfo hutt memom, “Nd yima Jisasr fasoh yima bebmpno rpat nabnothato nuwa kawum.”

³ Inji kfmotm Jisasr wanyhato kfo memor, ⁴ “Bro Nkifrarhu yindhorneft inji. Wom yimar 100 sifsifetr rhuhato nd wan handreyukr hti hambrorfohat ka be mumafrrorr? Na kanga ka nhai mumafrrorr. Ndwom 99 kforpat

kipr yeyuk tkitt htanyrform afo nd wan handretyukr afo yau hambrak habrirforr. Bi mhambrekrre ee yima yuhur mirhurforr. ⁵ Yima yuhur mirhuhato be yindhorefrparpno tita hatoh hanyrforr kmiko. ⁶ Kmifat mhtahato kfo merform, ‘Na hti hambromoa sifsifr bi tfit hambrekannr, wayindhornhokma.’ To inji narfor. ⁷ Na kfiwanko nd kfo nhombrakfot kfiwa 99 yimam, bi dboriohrhut ruhato nhai tfit rroh yima yuhum wom yak kekutkfot. Nd yimam nhai be mfro dukakahrm. Bro Nkifrarhu tu bro dukeft kitt ndwom rpa yimar bi fasoh nefm yihato tfit mtoh kekuthato niamor. Nd yimarn Bro Nkifrar be tu mfro yindhorr.”

Mett hambrakmo marufathu kfo nhombra mrokfeft

⁸ “Wom mett ten kina yak brurfam yakitohhato wom fat hti hambroneft. Htirahnt lam hta funanihato kunyshu wuss hfhan bugaraht nd rpa marufathu hambroneftn. ⁹ Hambro hany hambro hany, bi fekt, htirahnt tuthu yimatm nakuyak bugaruhatm, kfo mirahtn, ‘Wayindhornhokma. Na hambromoa marufat bi fekant.’ ¹⁰ To nd mrokfot kanjo Bro Nkifrar yindhorr-worr wom yimar fasoh nefm tohhato tfit nd fasoh nefm mong trohneft.”

Hus yonet yimarhu kfo nhombra mrokfeft

¹¹ Tfit wom kfo nhombra mrokfot kfo memor, “Wom yimarhu yon husf tohmouf. ¹² Wom nmemr yihato yifemr mkfo memorr, ‘Dajaya, nani nanhu najomr, nmoh wuskam bi wayak nhtahikahtnno nanhum kanga bi ayakanm.’ Be yifemr wany yakio-hato fak nhtahemor. ¹³ Be wom nmemrhu wuskam yakhato tuha kmi thofmpno maruhampno nayak tuknaknihato maruharpam myaknihato nhai wom warhu hasormor. Nido wom wuri kmimn yihato turhu nd fasoh fasoh nefmpno nd ror hanyuk maruhenm tubatu wita bugamorm. ¹⁴ Tubatu witahto kto nd ror tohyuk kmit bro yatinoh wormr tohmor. Be nd yihar nd yimar memor, ‘Be na nohruha yeshrimn. To fitha marufam yakrhoyanm yeshriyenm wiknarhoya? Na hnayuk marufenm to bi tubatu bugamoyanm.’ ¹⁵ Be mdukatihato wom yimarpno yihato wom hingerneft fakmor. Fohm tohukatoh inji nahemourr. ¹⁶ Nd fohm tohukatohhato memour, ‘Nd fohroh heyuk binharoh bin krm ndm ayeya.’ Nhai wom yimarn wom tu yeshriyen mifm hermoarr.

¹⁷ Be toh nhombra hanysihato tfit tur dukamor, ‘Nanhu yifemrhu hinger na yimam nhai be inji yatinoh dbfakahm. Na asha tohwoyann masat yatinoh dbfiwa. Tamohmpno asha na yatinoh dbfa hasiwoya? ¹⁸ Tfit tukanhuko yiruha. Yirhoyann tukanhu yifemr mkfo yongmaknihato mkfo miruhanr, ‘Dajaya, Bro Nkifrari ni be tu fasoh nefm namoyanfn. Nhai tu hifa dborioh nefm narmoyanfn. ¹⁹ Na tu be bi fasoh yon beba. Na nhai tu dborioh yonann kfo mirhona, ‘Nanhu yoner.’ Nhai. Na ninhu hinger na yima furaya arhutwaya.’ ²⁰ Be nd dukeft yakmorn sinyamor. Sinyanihato yimor turhu yifemrpnno.

Yi yimorn kmit mfnahmor. Yuhre wuri yau hanyetn yifemr htiaqkmorr. Htiyakthato tfit yifemrhu yima yuhur yinem yonr inji tfit htiaqkmohat nhai bmtarmorr. Be yinem yonrpnno toni-yaknihato rim kihato hanurmorr. ²¹ Yinem yonr sinyahato yifemr kfo memorr, ‘Dajaya, Bro Nkifrari ni be tu fasoh nefm namoyanfn. Na nhai tu dborioh yonann kfo miruha, ‘Nanhu yoner.’ Nhai.’ ²² To Yifemr nd yonr kfomo tngt wany marsisahato

turhu hingrna yimam kfo memorm, ‘Nanhu wondht wayaknekahkomn wawondh-komr. Tor yuke hmbreshar, yo tirpinyaft hatohyuk ringr yo su wuram. Nd ndm wayaknekahkomn wawondhkomr. ²³ Yo tor bulmakau yogr. Ndr wawaskahkomrn roh tfnhato rpat rhu rifinyhato yerahnom. Nuwa yetahato btn ptha yindhor boyindhorrahnom. ²⁴ Nanhu yonr bi nohniyetrn bi tfit bi tor bi nier. Bi wom kmimn nkiranimor. To nhai, bi asor bi nier.’ Ndnatn nd bro yemro burwat hta yehato grha yindhormom.

²⁵ Bro najomr mswirko toh tanyhato mwanayakanimor. ‘Arme tamohtpno grha yindhorwam?’ ²⁶ Wom hingrna yimar nakuyakhato ttiwonmorr, ‘Ndm tamohmn grha yindhorwam?’ ²⁷ Kfo kangrr, ‘Ninhu nmemr href tfit mfnahrt, yifemr ror htiyakhato rorhu yindhor nmbuhatn bulmakaur washato ndr yehato grha yindhorwom.’ ²⁸ Be najomr inji wanyomohat nhai ror yihato grha yindhornho inji narmorm. Nambur yima yuhetrn be rhumor. Yifemr hti hasotihato yimorn yinemr mkfo memorr, ‘Tamohmpno ni nia duha yita?’ ²⁹ Yinemr sinyahato yifemr kfo memorr, ‘Wawanyin! Na bok gunyjimm hingrna yima furam kanjo ninhu hingrneft fakitoh hnahemoyann. Nhai ninhu wom trgt hanjbornarmoyant. Nhai. Hingrna marnya hnamoya. Ni nhai ndt htihato wom fohetr washato marimor, “Asor fohr. Ndr watasokahnn ninhu yimatn nakukahnm warhu wayako.” Be tu nhai mif inji narmo. ³⁰ Nd kmi kmi yaum kanjo tahuta htfaset yonrn ninhu fohr wasahuknr. Nhai mrokfom.’

³¹ Yifemr tfit sinyahato yinemr kfo memorr, ‘Ni toh hnamohat nanpno brbo toh hnamo. To mirahn ka nanhu tamoh tamohm ka womrohem. Nhai. Ninuhem. ³² Ndnnetn ninhu nmemr bi nohetr bi tor bi sinyer. Bi wom tkitm bi nkiraniyetr bi tor bi nier. Ndnnetn ni niahato nom rpat rruhato yindhorkfot.’”

Hifa yima dukefrpno hingrnamo yuhat

16

¹ Jisars turhu disaiperm wom mrokfot yakhato kfo ptha nuhas memorm, “Wom yimar nhai be kukenhato harhurmoar yeshri wuska maru kunym. Nd yeshri wuska maru kunym wom yimar yakmorn rorn nd rorhu tamoh tamohat tohukatoh hemourr. Wom yiha wom yimam nd yimarpno yihato mkfo memorr, ‘Nd ninhu wuskam tohukatohwa yimar wom wuskam he fura bofura hanitrm yimam, womnam turn kak nfhotiyaf hanitr wom wuskam.’ ² Nd yimar inji wanyhato nakuyakmorr nd wuska tohukatohmoa yimar. Nakuyakhato niamotr ttiwon memorr, ‘Na nd wanymo mrokfot ka tu mrokfot wanymoya? Nd wuskaroh yak nfhoti nmbuhat yo yak he furafhany nmbuhat? Inji wanyomoyann ni be nhai wom tohukatohruhatn nanhu tamoh tamohm. Be yak tuhaforuhann. Wuroht afo waikahnn tamoh tamohm yak hta kars bokars tanykahnm yirahn. Ni nd namo neft gontwatn wahta buga tanykahnm yirahn.’

³ Be nd tohukatohr yimorn kfo memorr, ‘Na nd yimar yak tuhaf thombat be finji narhoya kmiko rhu fura thombat? Na nhai wofnkaha sfno marufapa duha rruhato womn rim tndauneft. Nhai. Be tu bro yimtnaneft yakrahta na inji naneft. Yo nhaft na tu be narho bnhaya. Womm kfo mirahma, “Wania nmoh mswirwu bbbpam watou kekuthennom,” na nhai hingrnrarhota.’ ⁴ Duka hanyasihato kfo memorr, ‘Nhai mrokfom. Tot wom dukeft. Inji naruha, be yimam nanhu neft hti yindhorhato kfakrahma yimarhu hingrneft yak tuhaf thombat.’ ⁵ Be nd dukefetrn naku yak

hanymorm yimam nd wuskam tamoh tamohm afo yak furani hanymom. Barkof yimar niamotr ttiwon memorr; ‘Nine tamohht yakmo?’ ⁶ Nd yimar memor; ‘Na 100 dram welkfot fakmoya.’ Kfo memorr; ‘Nd ni be afo yak furanimo wel dramthu kfo nuhas gontwat mirahn akfo amiya 100 dram welkfot, be wawandfatwa 50 dram welkforpat.’ ⁷ Tfit womr niamotr ttiwonmorr; ‘Ni tamoh tamohm afo yak furanimo?’ Memor; ‘Nane 100 wit bekm afo fak furanimoya.’ Tohukatohr memorr; ‘Asot ni yak furanimo wit bekroh kfo nuhas gontwat Nd gontwatn wawandfa wamitwa, “Na 80 bek witkforpat fakmoya.” Mirahn awandfaya 100 wit bekm.’

⁸ Wandfa buganimotmm nd tohukatohr nd gontwam nd yimarpno hanyhato yimar htihato kfo yindhorr memorr; ‘Be tu hifa yima dukefrpno hingrnamo. Duka tunga yima yuhurpno inji hingrnamo. Nhai mrokfom.’ Nd yimar be inji kfo yindhormorr tohukatohr. Wahtiko. Ndar bbinysofthu yimam bi tum hti dukamomt dborioh rhu nmbuhathu yakyuk yihota yuhat. Niko nukeft tohwa yimako rpahtet neft wanatwako. Waduka marnyatwakomt dborioh ruheft yakyuk yihota yuhat.’

⁹ Jisarr tfit nd mrokfot kfo hik buga memor; ‘Niko nd bbinysofthu tamoh tamoh wuskam yakneft wom yimam nd wuskam kkopentiwam hti dukahato hekfot. Hirahkomm kfo yindhorrhakmo. Inji narahko nd nikmoh noh yihar Bro Nkifrar yakmiyakrahkomn hendhorrahko.

¹⁰ Frohr tefi wuskenm yahutkomr fakitoh marnyerm, bro wuskam ror yakitohneft yakitoh marnyarahrm. Nhai yakitoh marnyarform tefi shrm nd yimar nhai yakitoh marnyaruhatr bro shrm. ¹¹ Nda bbinysofthu tamoh tamoh wuskam nhai yakitoh marnya-rfokomm, to tfit frohm hefenr yorhwa wuskam hiruhatkmo yakitoh-ruhakomm? ¹² Womroh tamoh tamoh wuskam nhai hti duka marnyaf hanyhekahkomm, to tfit frohm tawo ninhu yufathu wuskam yakhiruhamn?

¹³ Nhai wom yimar najomrofhu yinhitr rhurfotr. Nhai. Womrpar yuhur-four, womr yati yejborharforr. Womrhu mrokforpam wany yakiorfour, womrhum nhai. Niko nhai Bro Nkifrarhu dukefti maruharoh dukeft rpat yakitohkfot.’

Mosesr yakmo boririfhuti Bro Nkifrarhu kingdomkfo

¹⁴ Farisim rom be maru hingrneftn rroh dukefm frtkafmoum. Ndnnetmn Jisarr inji kfmohat nd yimam yurak krtit karikomomr. ¹⁵ Jisarr sinyahato kfo memorm; ‘Niko newa nefm yimam htitamko kfo kangm, ‘Ka hifa dborioh nefm newuko.’ Nheno. Bro Nkifrarhu nyinygaye htitworko nikmoh fasoh nefm yirok yima toh rawofm yorhwam. Nikmoh yima rifhumio Bro Nkifrar faso hti bebworm. Tngtn be yuwi furewut. Yimam kfo yamukam, ‘Ndm hifa nefem,’ Bro Nkifrar htihato kfo kangr; ‘Ndm fasoh nefem.’

¹⁶ Bingotrhof nkifra boririfhut, Mosesr yakmot, yo profetm kfo phamoa mrokfom, afo nd mrokfomn yimam yak hik hna yak hik hnamommn wuroht Jon Baftaisrpnone be mfafho-nimomt. Jon Baftaisrn hnamort Bro Nkifrarhu kingdomkfothu mrokfot. Be nd mrokfotn bi bronittm kmi kmim. Bronitatt kmi kmiroh yimam nd kingdomkfothu yinyeftn yima yuhum bi mfro sinyewum.

¹⁷ To wom mrokfot. Ndar mounti bbinysoft rof rim batinirahf. Nhai Bro Nkifrarhu wom tefi tefi mrokfo nmbuhat be inji naruhatt.’

*Tuhan yak thu nmbuhat
(Matyu 5.31-32; 19.9; Mak 10.11-12)*

¹⁸ Tuhan yak thu nmbuhat ndt Jisasr kfo memor, “Fitoh yimar turhu yak tuhant yak tuhafhato tfit wom nfri mett fekr, nd nfri mett be ijoh yuhathu metet. Yo wom yimar yak tuhafet mett tfit womrn fekr, ndt to ijoh yuhathu metet.”

Maru kunyet yimarhu mrokfot yo Lasarusru mrokfot

¹⁹ Jisasr tfit wom mrokfot riyakhato kfo ptha memor, “Wom yiha wom maru kunyet yimar tohmor. Rorhu wondh tha, yeshri, tamoh tamoh be bro bro maru kfetpam fakmour. ²⁰⁻²¹ Yo tor tohmor wom yima bebr. Rorhu yufat Lasarus. Nd maru kunyet yimarhu kuny yifhatikt ndha rhutamour. Duka memour, ‘Nd maru kunyet yimar ye bruraf hanyuk dborioh dborioh yeshrthu krpupenm tebor rfashit misuhyukm nann ye tuthatak hanyruhanm.’ Inji dukahato rim rhuta hasomour. Lasarusenr nd yonmari, yonmari fhutpno kku bebt harhutamoahat memoum, ‘Nndo yau kuteter.’ Nd fhu tikroh kku bunyangrt tonemoatt tfit yaum yimoamn tepen dbrorhamoum.

²² Lasarusenr tohhany toh hanyorne nohmor. Nohmotr rorhu yafothat mounmotm yaknimomt, Abrahamrpn brbo mhtanyomt yura hefenrn. Tfit rorhu mongkorn nd maru kunyet yimar nohmotr fopmorm. ²³ Nd maru kunyet yimar nohnihato rorhu yafothat Maringour yimot. Maringour yihato be mitasismor kahtn. Memor, ‘Kekutak auhtiya,’ Abrahamr yurak wuhtimorr. Abrahamrhu krekorn Lasarus rhumor. ²⁴ Nd maru kunyet yimar nd kah nyunguramt tohhato naku tuhaf memor, ‘Daja Abrahame, wayuhuwafkahna Lasarus wakfokahtnr bupenm tirpinyafe tayifaknekahrn nanhu tort bupaye ahta gonggafort. Na tu be bro kaht tohwa.’

²⁵ Abrahamr kekutak wahtihato kfo memorr, ‘Wawanyan bar yone, ni yima nfri tohmohat ninhu hifa yihar tohmour, Lasarusr nd yihat fasoh tkitt bebt warhutamor. Tfit arihat ror bi hifa tkitt yorhwarn ni bi tfit fasoh tkitt korhn. ²⁶ To ror nakutatnr finji nieruhar? Nhai yihotam. Niko watohngotwoko nom ako yura yuwa tohngotwonom. Nikomi nom buha Bro Nkifrar frtmbhafmort yihotat.’

²⁷ Be wom maru kunyet yimar inji wanysihato kfo memor, ‘Dajaya, be ndnatn tfit wom mrokfot kfiwann. Kangane, Lasarusre wakfo tkrurafkahtnr nanhu yifemroh kunyko air. ²⁸ Nanhu nmemrom tom 5-pelakfot tohwom. Aikahrn akfotwarm, rroh tohneft mirahm na tohmo toheft atoh hiknom. Rroh tohneft hifa hifa atohtwam. Na finji wofnkaha na tohwa tkitt rom niahato kaht yihom tohneft.’ ²⁹ Abrahamr kfo memorr, ‘Lasarusr nhai tfit yihato kfokfot ninhu nmemrom. Tom Mosesrhu boririfhum yo profetroh mrokfom, rom nd mrokfom htihato kfoyuk yuhatn toh hikkfot.’ ³⁰ Tfit nd maru kunyet yimar kfo wok memorr, ‘Daja Abrahame, nd nkifra mrokfom be nhai wany yakio-ruhatmm. Womr nohhato tfit sinyahato ptharahrm ee btn wany yakiorahmr.’

³¹ Tfit Abrahamr memor, ‘Nhai Mosesrhu boririfhum o profetm pthayuk mrokfom nhai wany yakiokahmm. To nhai tfit womr nohhato tfit sinyahato pthahekfot mrokfot. Ror nohhato tfit sinyahato pthayuk mrokfom be nhai wany yakioruhattmm.’ ”

*Yimam yak kasuhwa fasoh nefm
(Matyu 18.6-7; 18.21-22; Mak 9.42)*

17

¹ Jisasr turhu disaiperm kfo memorm, “Yima yuhum sinyarahmko fasoh nefroh nanefit. Be wom yimarn niahato mkfo kangrn, ‘Ndur yuhat warine o ndur shrt warimakn.’ Nd yak tkruryuk yimar dukaf hanykfot. Bro Nkifrar be yak tutfarahr. ² Wom yimar ndar na hikwa yonenm frnhehektrm fasoh nefm fsuhm, nd frnhehakyuk yimar bro tahis yakhato mohtpitrn tmbrekhatu tek dany yuhat yafhohato miptkokfot. Tohruharn fasoh yihotat hanyrahm.

³ Wom Kristen yimar niahato ni wom Kristenn fasoh nefm nern, ni be tohhato kfo mekfot, ‘Wurena mirahn inji anaya.’ Inji kfitn nd yimar tohhato kfo kangr, ‘O, wurene na be tu fasoh nefit neyann. Nhai tu dborah nefit narfoyan.’ Bi inji kfiwurn, to be mirahn nd ror nayuk nefit tfit wom adukayant. Be duka mumafokfot. ⁴ O 7-pela taimkfot fak nhehrn o finji nern o tamoh nefm nahato tfit 7-pela taim niahato nnakfo nuhashato nnakfo gbhufnm, to mirahn tfit adukayanm ror nayuk nefm. Be duka mumafokfot.”

Bro Nkifrarhu dukefrparn rhuneft

⁵ Jisasrhu disaiperm Jisasr kfo memorm, “Wathu bmtatwannom. Be Bro Nkifrarhu dukefrpam arhu-twamnom nmoh yima yuhum.” ⁶ Jisasr wanyhato kfo memorm, “Bro Nkifrarhu dukefenr be ndar sayor tpiyenr kanjo rhuhatu kfo mirahn, ‘Ndar miye wayoh tundonikahnn tfit wusha tektn wamitohkahnn wasinya.’ Inji kforahn be htirahnt nd mis ninhu tng yuhatn hikraht.”

Jisasr hingrna yimarhu hingrneft pthamo yuhat

⁷ Nd mrokfot inji kfonihatu tfit wom mrokfot kfo memorm, “Niko hingrna yimetko rhurfohat ka tfit nikomn hta mska garirfokomm? Na kanga ka nhai. ⁸ Hingrna yimamn mihingrnakhato tfit mhata romn yeshrim hta mskaherfotmko niko be yenyefrpat yarfoko. Nikmoh hta mskafhehato kto wuroh mongko rroh. ⁹ To ka finji dukewako? Nd hingrna yimam niko tohukatohkmoh mrokfom hingrna yimam hikneft ka kfo yindhorrifokomm? Na kanga ka nhai. ¹⁰ To be rpahtet nefit niko Bro Nkifrar kfuyok hingrneft hingrna buga hanyeft. Be kfo mekfot, ‘Nom hingrna fura yimayenom. Ni kfuyok hingrneft bi hingnamonomt.’ ”

10-pela lepra dbohnet yimarah mrokfot

¹¹ Jerusalemko yimoa yihotat buha Galili Sameriafhu kmi nanyor yuhatn yihotat ruhettn nd nanyor yuhatn faumount. Jisasr nd yihotatn yimor. ¹² Yi yihato be yuhre kmit mifau fnah hanymort, ka nd 10-pela lepra dbohnet yimam Jisasrhu nia mrokfot wanyhato fau tebfi hnamom. Yau hnehato Jisasr htiyakmomr. ¹³ Be wuri yau hnehato Jisasrhu yufat naku hnehato kfo memom, “Bro yima Jisase! Wahti yuhuwafnmom.” ¹⁴ Jisasr nd yimam htihatu kfo memom, “Temperr tohyuk prismpno waikahkomn romn hti kotarahmko nikmoh dbohnefm.” Inji kfafmotrm yimom. Buha yihotatn nd lepra dbohneft thu truf tanymotm. ¹⁵ Be nd yimam lepra dbohneft thu truf tanymohat nhai marimom, “Jisasr tfit miyak nuhasrahnomr tham.” Nhai. Rpa Sameria thofrpar lepra dbohneft thu truf tanymohat

Bro Nkifrarhu bro yindhoreft yakmott be yindhoreft-rparpno tfit yihato ¹⁶Jisasrhu wuram-pno msuhmor. Msuhhato mkfo yindhor boyindhormorr. ¹⁷Jisasr nd rpa yimarpar htihakato kfo memor, “Na famuya ka 10-pela yima bugako dbohneft thu truf tanyisiko. Ndwom 9-pelakot to fitom? ¹⁸Tamohmpno ndar womha kmi thofrpar tfit niahato Bro Nkifrar mkfo yindhorwarr?” ¹⁹Be nd yimar Jisasr yak kasinyahato kfo memor, “Nhai mrokfor, wanju. Ni ndar dbohneft thu truf tanyahato tunn duka famu, ‘Na hrek Jisasr pno yitahat ndar dbohneft kak thuwort.’ Inji dukahato niesn Bro nkifrar bi fak marnyern.”

*Bro Najomr yawihna thombat kmi kmim htihakrahmr
(Matyu 24.23-28; 24.37-41)*

²⁰Wom Farisim yihato Jisasr mttiwon memomr, “Fitoh yiha Bro Nkifrarhu kingdomkfof htiruhanomt?” Jisasr kfo memorm, “Bro Nkifrarhu kingdomkfof nhai be tamohetet neftn nyingaye htiyuket. Nhai. ²¹Nhai turn kingr tohruhatr kfo miruham, ‘Asor nmoh kingr. Asor asha bi tohukatohwor nomn.’ O nhai miruhatm, ‘Bi wusor wusharhof yimamn tohukatohwor.’ Nhai inji htihato kforuhatm. Niko ttiwon ttiwoneft Bro Nkifrar nhai wom fitha king tohkahr. Tor bi nikhom yima yuhumn Bro Nkifrarhu kingdomkfof tohhato kak hta bohtewurko.”

²²Jisasr kekutnihato turhu disaiperm kfo memorm, “Niko kto Bro Najomr hti hambrat thoft to inji kfo mirahko, ‘To finji tfit htihakruhanomr yawihna thombat?’ To nhai. Nhai htihakruhatkomr. ²³Mirahko yimam kfoyuk mrokfom awany yakionom. Yimam kangmko, ‘O nd nom gari hasomo Jisasr tor bi ndha nd kmit mifnahr, o tor bi nd kmitn, o wusor ndur kmitn.’ Mirahko wany yakionihato amenyom, ‘E, uwa, afo nd kmit yihato htirahnomr. Bi nia mifr.’ ²⁴Htitwokomr toh fnhur yohni thombat. Fnhu trfefim yambohritna thombat nhai rpa tkitt htikahmr. Kmi kmim hti bugewumr. Na Bro Najoma tfit yawihna thombat to inji kmi kmim htihakrahma. ²⁵Nhai be bmbri, afo barkofpam na Bro Najoma afo tukanhu kmi thofmn wom wom krhopam hihato hanyjbor-narahmm na kfoyuk mrokfom. Nhai wany yakiorhotma.

²⁶Noarhu tndht wanukwokomt. Nd yiharhof yimam namo kanjo Bro Najomr yawihna thombat inji na mmo bammo hasorahm yimam. ²⁷Noarhu yiha to inji namom yimam. Rom to be nuwa ye mmo bammo haso, yo tuhan yak, nd nefrpam be na hasomommm, nhai wom tamoh dukefm rhurmomm. Be inji foh nungam kanjo mmo hasetm Noa riphar sift fknemom. Bi yiro sift tohetmn bro hnut niamot. Nd wom womt nd bro hnutn noh ptko witamom. ²⁸Lotrhu tndht nhaft to inji. Lotrhu yiha tohmo yimam nhaf to be nd turuh nuwa ye mmoneft yo wommpno wuskam yak tuknanefm, yo mswir hingrna, kuny hingrna, nd nd nefm duka hasomomn nhai wom dukefm dukarmom. ²⁹Lotr nd kmi Sodomt htanyomort, bi be kah rifhumi kah rifuhet tahim mountko wuyohninamohat nd kmi Sodomthu met yindari bugam nhai rhurmom. Be tuha kmi Sodomtn mikur batinihato be tounpam rhumom. ³⁰Na yawihna yihar to be nd rpahtet neft rhuraht.

³¹To inji mmo bommo hasorahm. Yimar briahako toh mmo hasohato mirahr ka kunyko toneni wuskam ayaka. Nhai. Yimar mswir toh hasoyukr to inji narahr. Mirahr, ‘Tfit kunyko toni hany wuskam yakruha.’ To nhai. ³²Niko waduka hiktwakomt nd Lotrhu mett yakmo neft. ³³Fitoh yimar

turhu yima yuhurhu dukefm mondt htewurm kto nd yimarhu yafothat fasoh tkitt yiraht. Fitoh yimar Bro Nkifrarhu dukefm mondt htewurm nd yimarhu yafothat kto rhu marnyaraht.

³⁴ Na kfiwanko, mikohta, ‘Na Bro Najoma yifung aneya,’ be htirahko hus sawohf tikt hwi hasetf, Bro Nkifrar rofhu womr o womt yaknirahr. Mett faknir, yindarir tuha sfnoh tikt frhambro hasorahr. Yindarir faknir, mett tuha sfnoh tikt frhambro hasorahr. ³⁵ Hus metf brepna hingrnayuk plaua-pam hingrna hasorahf, Bro Nkifrar womt yakruharn womt rhuraht. ³⁶ Hus yimaf mswirt toh hasorahf, Bro Nkifrar womr yakruharn womr rhurahr.” ³⁷ Jisasr inji kfo nuhas buganimotrm tur hik htfasmoa yimar sinyahato ttiwon memorr, “Bro Yimaye, nd nefm ni kfiwam fitha rhu-ruhatm htiruhanomm?” Jisasr kfo memorr, “Foh gum kfe bdgwa tkitmn kungorohm yi rifinywom.”

Jasrpnno mkfo hatohmoa metthu kfo nhombra mrokfot

18

¹ Jisasr kfomorm yiha yiha Bro Nkifrarpnno kfo bruttna hatohneft. Ndnetrn memor, “Wom kfo nhombra mrokfot akfokahta yima yuhum yakrahm. Yakruhamn nhai fhirmtaruhatm kfo bruttnaneft.” ² Nd kfo nhombra mrokfot kfo memor, “Wom bro tauntn wom jasr tohmour. Nd jasr nhai Bror duka yanhafo hanyrmoar. Yo yimam tamoh mrokfetn nianeft nhai yudbat wanyhermoarm. Nhai marimoar, ‘Afo ruhato wany yakitohhiruhanm.’ ³ Wom met dhirt yiha yiha niamoatn nd jasrpnno mkfo hatoh memour, ‘Nane, yiha yiha yimam niewamn tone dbombho hatohwoma. Na kanga kotkahnomm kotkfofn frhikakraht rom niwa nefthu yimbu yuhat.’ ⁴ Jasr nd mrokfom wany mohat afo be wany marsisafmort. Nhai marimor, ‘Wanyhiruhant mrokfot.’ Tfit kto dukamor, ‘Na Bro Nkifrar nhai duka yanho hanykohahr. Yo yimaroh mrokfom hnayukm nhai wany yakitohhekohanm.’ ⁵ Nd mett nia mptha hatohwat afo wanyafhiruhant rothu mrokfot afo. Hhrekwa be nd rpa mrokfofn mptha hatohneft.’”

⁶ Jisasr memor, “To tfit afo wawanyko. Nd jasr namoneft rot inji namor. ⁷ To finji dukewa Bro Nkifrar? Bro Nkifrar nd turhu yonm yifung marm yiha yiha mnaku hatohneft ka nd jasr bebr namo kanjo be wany marsisa hatohrform? Bro Nkifrar nhai inji wany mariffi hasokfot turhu yonroh naku tngm. ⁸ To kanga Bro Najomrhu yawihnaruha yiha krhopam rhu thombat, nd yiha Bro Nkifrar kfo bruttna hasetm, ka toh bmtaruhamn Bro Nkifrar kfo bruttna yakitoh hanyrahme, ka nd krhopampno Bro Nkifrar myafho thunirahr?”

Hus yimaf kfo bruttnamo yuhathu kfo nhombra mrokfot

⁹ Wom yimam kangm, “Nom tu dborioh yimayenom. Nom nhai ndur ndar yimam kanjo fasoh fasoh nefm nakahnomm.” Ndhtet kfoyet yimam Jisasr wom kfo nhombra mrokfot kfo memor, ¹⁰ “Wom hus yimaf memof, ‘Akfo bruttnano.’ Womr Farisir, womr takis marut yakmoa yimar. ¹¹ Bro Nkifrarhu temperr yimofn wom Farisir turpar rim tohhato kfo bruttna memor, ‘Bro Nkifraye wahtina. Na nhai ndu ndar yimam newa nefm kanjo na fasoh nefm nakaha. Rom be tu fasoh nefm newum. Rikohwom, kfo nhehwom, ramet tuhanmpno kitwom.’ Tfit takis marut yakyuk yimarn tfit rikfo memor, ‘Na nhai nd takis marut yekwa yimar newa nefm kanjo fasoh

nefm nakaha. ¹² Rpa rpa wikm hus marf nuwa kurhato be kfo bruttna-nefrpat korhwa. Tamoh tamohm rpa wikr yakyukm, 10-pela rmonetm htewoyanm tenyuk rmonett Bro Nkifrarhu yufatn htafahuka.’ Nd Farisir inji inji kfo bruttanamor. ¹³ Ror kfo bruttnanimotr tfit ndwom takis marut yakmoa yimarne ror be nndo tohhato nhai mfhat yura kasinyahato kfo bruttnarmor. Tur duka memor, ‘Na nhai dborioh yimayann yura yukatho yindhorhato kfo bruttnarhoya.’ Ndnetrn be tariobttahato turhu mondt fur hanyhato kfo bruttna memor, ‘O Bro Nkifraye, na be tu fasoh yimaya. Wahti yuhuwafna.’ Takis marut yakmoa yimar ror be injirpa kfo bruttnamor.”

¹⁴ Jisasr nd hus yimafhu mrokfom kfo pthanihatō kfo memor, “Na kfiwanko, nd takis marut yakmoa yimar turhu kunyko yimohat rorpamifir hifa yufayetr tohmor. Ndt wawanykomt. Yimar kangr, ‘Tamoh nefm nann bmbri nyingako mtohnihatō nann tamoh tamoh nefm atohakahtanm yimam kfo yindhorrahma,’ nd yimar kfo Bro Nkifrar yak dbhurakruharr yiro wahtarahr. Yimar turhu yufat yiro wahtahato yimam nhai kmi kmim yindhorkahmr, nd yimar Bro Nkifrar tfit yura wuhtarahr.”

*Jisasr yonroh nmbuhat kfo pthamor
(Matyu 19.13-15; Mak 10.13-16)*

¹⁵ Wom yimam Jisasrpnō yonenm hnehato memom, “Jisasr tir htahato kfo bruttnarahrm.” Disaiperm inji htihatō tfit kfo huttnanimomm nd yon hnayuk yimam. ¹⁶ Jisasr wanyaf hanyhato kfo memom, “Yonenm wahti marsisafokahtkomm nanpno aniam. Mirahko akfo rafonomm. Yimam yon mumenm kanjo yorhwam Bro Nkifrarhu kingdomkfof rhurahm. ¹⁷ To afo wawanyko. Yimam nhai yon mumenm kanjo Bro Nkifrarhu kingdom-kfof rhukahm be nhai yiruhatm Bro Nkifrarhu kingdomkfof.” Yonroh mrokfot rot inji kfo mort.

*Wuska kunyet yimar Jisasrpnō yihatō naphamo yuhat
(Matyu 19.16-30; Mak 10.17-31)*

¹⁸ Wom yiha Judaroh bro yimar Jisasrpnō yimorn mttiwon memorr, “Hifa tisaye, nane finji narhoyann Bro Nkifrarpnō toh nkifranirhoya?” ¹⁹ Nd Judaroh bro yimar hifa tisa yufat Jisasr yutamotr Jisasr wanyhato kfo memorr, “Tamohmpno kfo yamukona, hifa tisa? Nhai wom hifa yimar tohkahr. Bro Nkifrarpar dborioher. ²⁰ Nkifra thfa mntwat ni bi wanyete. Kfo kangt, ‘Mirahn ramet tuhantpno arim fnaha, mirahn wanambur sinyahato yima awas furaya, mirahn arikoha, mirahn wom yimar wom mrokfom akfo wokanr, yifamaroh mrokfo wany yakiohato rroh yinhitn rhukfot.’” ²¹ Inji kfo htamotr tfit nd Judaroh bro yimar sinyahato kfo memor, “Jisase, na yuhre yonenann nd thfa mntwat kfoyuk mrokfom bi rihikakmoyann. Nhai riyak htaformoyann.” ²² Nd yimar inji kfo motr tfit Jisasr kfo memorr, “Rot hifa nkifra thfa mntwathu mrokfom kakitohwont. Tmift wom nefrpat nhai nakahnt. Nd ni harhuwa wuss yak htatahato wommn wiknakfot. Nd wusspno yakyuk marut yakhato tfit nd wuskapa duha yimamn nd marut hekfot. Inji narahn, hefenrko mfro wuss harhu-rah. Inji nanihato tfit na nia hikkfot.” ²³ Nd Judaroh bro yimar boknabok wusketrn nd mrokfot wany mohat yima yuhur nhai marnyahato yirmor.

²⁴ Nd yimar inji duka kinyakimohat Jisasr bi htimorr. Htihatō kfo memor, “Wahtiko, yimam boknabok wusketm be tu mduka nhiyekwom Bro Nkifrarhu kingdomkfoftho fkenineft. ²⁵ Womhtet mong wakuyet fohr

kutewumr kamerr. Nd kamerr fkna-nyirfort nahuyuk nirthu muht. To yimar wuss mfro haruhetr, Bro Nkifrarhu kingdomkfothu fknanyineft mduka nhiyakfor.”²⁶ Nd yimam, Jisadr pthayuk mrokfom wany yakitohmoam, inji wanyhato tfit kfo memom, “Barenko, nom kangnom ka ndtset maru kunyet yimamn hifa rhu nmbuhat miyakrahm. To nhai. Ndtset yimam mthu nhiyakrahm Bro Nkifrarhu kingdomkfothu fkneneft. To nome ndtset yima furapanom, to nome finji Bro Nkifrapno yihato mtoh nkifra-niruhanom?”²⁷ Jisadr kfo memom, “Niko yimakomn tamoh tamoh nefroh finjinaneft mduka nhiekwoko. Tu Bro Nkifrar nhai duka nhikfot wom tamoh nefroh finji naneft.”

²⁸ Tfit Pitar mtohnihato kfo memom, “Wahtinnom. Nom ninhu hikneft nmoh tamoh tamoh mong trohhato ni mhikaknamonom.”²⁹ Jisadr memom, “Na kfo mif mifwanko, yimam Bro Nkifrarhu kingdomkfothu rhuneft dukahato rroh kunym, yon tuhanm, yifa mndarm htanym, ³⁰ nd yimam ndar bbinysotf toh thombat Bro Nkifrar wuskam hta hmbirahm. Bro Najomrhu niayuk yiharn Bro Nkifrapno toh nkifranirahm.”

Husfirpehyuk mrokfot Jisadr kfo memom; “Nohaforhoyann tfit sinyaruha.” (Matyu 20.17-19; Mak 10.32-34)

³¹ Jisadr turhu 12-pela disaiperm yakhatu turpathato kfo memom, “Niko bi wawanyko. Nom Jerusalemko yitohat niko mirahko ka nhai wom nefm rhuruhatm. Nhai. Na Bro Najoma ndko nohruha. Bingot bi profetmn Bro Najomrhu noh yuhat kfo htamotmt ndnettn fipett rhuraht. ³² Turhu kmi thofmn hndhnaruhatmr wom yima tangimn kuninfar wuna kfo hutatpno kfo hutatpno yenyohrahmr. Tfit wifm miyaknihato nde nde ye gurahmr. ³³ Nohhato hus marf rhunihato husfirpehyukrpno tfit sinyarah.”³⁴ Jisadr nd mrokfot inji kfomohat turhu disaiperm fak mmomomt ror inji kfomohat. Nhai yakromt ror kfomo mrokfothu yimbu yuhat. Rom memom ka frohmn kfiwur?

Jisadr yak marnyamo nyinga kunyjetr (Matyu 20.29-34; Mak 10.46-52)

³⁵ Jisadr nd Jerusalemko yiyet yihotat yi yimorn Jerikot mfnahmor. Nd kmit wom nyinga kunyjet yimar yihota yifembtn rhumoarn yihotat yihom yauni myauniyukm maruham tndaumourm. ³⁶ Jisadrpno yau hanyhato ptha kimr hofhta hnamo yimaroh ptha kimr hofhta tngm wanyak hanyhato ttiwonmor, “Ndm tamohtpno ptha kimr hnewam?”³⁷ Kfo memomr, “Nasaret thof Jisadrpno ptha kimr hnewum.”³⁸ Nd nyinga kunyjet yimar inji wanyhato naku memom, “Defitrhu tangishof Jisase, wayuhuwafna!”^{*}³⁹ Inji kfo nakumotr nyingako tohak hanymo yimam kfo thfamomr. Ror, nd nyinga kunyjetr, nhai rroh mrokfom wany yakiohato naku tmbhormor. Tfit wompam mfro memom, “Defitrhu tangishofe, wayuhuwafna!”⁴⁰ Jisadr be wanyhato mtohmor. Mtohhato kfo memom, “Wahnakomr nd na nakuta yimar.” Hnamotmr Jisadr ttiwonmor; ⁴¹ “Wurene, tamohmn nakuna?” Nd nyinga kunyjet yimar kfo memom, “Broye, kanga nyingam wayak marnyakahtna ayukatoha.”⁴² Inji kfomotr Jisadr memomr, “Wayukatohn. Nanhu nia mrokfot ni wanuhat ninhu bro dukeft nann htahato nakuna. Ndnnetn ninhu nyingam marnyarahmn.”⁴³ Be nd yimarhu nyingam

* **18:38:** Judam rroh hbhar futamomr “Defitrhu tangishofr.”

nhai wom kuknarmomr. Yudbat fukatoh dbtaku-morm. Nd nyingam marnyamotmr yindhoreftpno Jisasr fau hikakni twanhomr. Yimam ndt htihato rom Bro Nkifrar kfo yindhormomr.

Jisasr Sakiusrhu kunys yimor

19

¹ Jisasr yau hanyhato Jerikot mfnahmor. ² Nd kmitn tohmor takis yakyuk yimaroh bro yimar. Rorhu yufat Sakiusr. Nd yimar be tu masat marut harhumor. ³ Jisasr nd kmi Jeriko taun yihotat yau hanyetrn nd yima Sakiusr memour, “Afo htiafoya Jisasrhu ruheft.” Nd dukefetrn memour, “Ahtiyar,” to nhai, kkopenparn nhai htirmoarr. Bok yimam toh dbu hmbrimoatmr nhimour htineft. ⁴ Ndnetrn nyinga yuhako bi tonemorn mis muhmor. Memor, “Mis muhhato be Jisasr yau hna thoft htiruhanr.” ⁵ Be Sakiusr, ror mis muhhato fukatoh hasomor. Jisasr nd yima rifhurpno nia niamomn nd Sakiusr rhumo tkittn Jisasr mtohhato wuhtimorr Sakiusr. Wuhtihato kfo memor, “Sakius, yudbat wamifnahna. Na href ninhu kunys niewa.” ⁶ Sakiusr yudbat wayoh tfha thumorn Jisasr mikfo yindhoraknehato kunyko hanymorr. ⁷ Jisasr nd Sakiusrhu kunys yimotr womm tum rinakfo nakfo memom, “Jisasr tamohmpno nd fasoh net yimarhu kunys yitar?”

⁸ Sakius Jisasrof kunys ruhato wom Sakiusr wasinyahato kfo memor, “Nanhu Broye afo wawany. Na arihat yakyuk wuskam yak nhta haku-ruhanm. Yak nhtahato wom wuskam nd sfnoh wuska duhat yimamn he hakuruha. Wom yimaroh wuskam o tamohm yuwi kfo nhehhato yak hanymom be tfit husfihus has hi hanyruhanm.” ⁹ Jisasr memorr, “Nda yimar Abrahamrhu wany yakioneft kanjo inji netrn, Bro Nkifrar fak miyekrm nda kuny shofm. ¹⁰ Bro Najomr niamohat bi nd nkiranimo yimaroh yak hambrakneftn niamor.”

*10-pela hingrna yimam maruha yakmo yuhathu mrokfeft
(Matyu 25.14-30)*

¹¹ Jisasr pthamohat yimam wany yakitohmoum. Bi brbo brbo Jerusalemrpno toh hanyetmn Jisasrpno yiyuk yimam be duka memoum, “Nom href finji htitwanom Bro Nkifrarhu kingdomkfot?” Ndnetrn wom kfo nhombra mrokfot kfmort. ¹² Kfo memor, “Wom bro yimar tohmor. Memor, ‘Wom kmit yirhoyann king yufat hiyafrohoma tfit tukanhuko nierhoyann tohukatohruhant.’ ¹³ Yi yibonneftpno afo turhu 10-pela hingrna yimam nakuyakmormn 20 kina 20 kina htany hany hemorm. Memorm, ‘Nd 20 kinakfot rpa rpa yimako yakitohhato nd 20 kinakfot wom yihotamn htahato yak huta maruhat yakkfot. Mirahko arhu furat. Na tfit nierhoyann htiruha.’

¹⁴ Be inji yak hta tany hehato yimor. Rorhu mongkorn wom yimam tohmom. Memom, ‘Wom kmi thofm mkfo mirahnomm, “Mirahko king yufat ahenomr. Nom nhai wofnkahnomr ror nmoh king tohneft.”’ ¹⁵ To nhai, nd yimar king yufat miyakmorn tfit niamor. Niahato nd maruham htany hemo yimam nakumorm.

¹⁶ Barkof yimar niamorn mkfo memorr, ‘Bro yimaye, ni nd htanyo 20 kinakfothu yak huta maruhat asot 200 kinakfoyet.’ ¹⁷ Nd bro yimar inji htihato kfo memorr, ‘Ni tu hifa hingrna yimaye, hingrna marnyamo. Ndnatn 10-pela taunkfot ninn toh-yukatohrahn.’

18 Yo tfit wom hingrna yimar niamor. Ror niahato mkfo memor, 'Bro yimaye, nd ni htanyhemo 20 kinakfothu 100 kinakfot asot.' 19 Kingr inji htihato kfo memorr, 'Ni tirfa kmim watoh yukatohtwa.' 20 Tfit wom hingrna yimar niamorn mkfo memor, 'Bro yimaye, ni htanyhemo 20 kinakfot asot, tfit hnahukann. Be hopttn rmontha nmbuhaye kitawon-moyanmn htatamoyanm. 21 Namburet yimann fakrmemoya memoya, "Tubaturuhanm niahato kforahna." Htiitwann womm htatayuk wuskam ni be myaknitwonn. Womm nuhtayuk yewurim ni be tunhu fijo myakni furewunn. Nd nefm bi htietann fakrmemoyann.'

22 Kingr kfo memorr, 'Ni tu be fasoh hingrna yimaye. Ni to inji hti nhombramohat 23 to mermo, "Be benktn ahtakahtant nd 20 kinakfot," tfit tuka mfnahhato yak huta maru-hampno yakrfoyanm.' 24 Nd toh rifinyom yimam kfo memorm, 'Nd 20 kinakfot wayak hutfakkahkomr, nd 200 kinayet yimarn wariheko.' 25 Kfo memom, 'To bro yimaye, nd ni kfiwa yimar, ror bi 200 kinayeter. Tamohmpno tfit yamuka wom fam wahekomr?'

26 Nd bro yimar inji wanyhato kfo memor, 'Wawanyko. Yimar wom wuskam o tamohm kakitohwor, nd yimar tfit wom nfri wuskam hehutaruhanr. Yimar be tu sfnoh mifr korhr, nd yimar nhai hehutarhotanr. Nd ror yakitohyuk wuskenm tfit yakhutfakruhanr. 27 Nd yimam na tone hikhato kfo memo, "Nom wofnkahnom ror king tohneft," nd yimam na kfiwa asha wahnekah-komm nanhu nyingahato watmb-hokomm.'

28 Jisabr nd kfo nhombra mrokfot kfo ptha buganihato be tfit Jerusalemko yimor. Turn nyinga yuhat.

Jisabr Jerusalemr mfnahhato Bro Nkifrarhu temperrn rifinyhato Bro Nkifrarhu mrokfom kfo ptha nuhasmo yuhat

(Sapta 19.29–21.38)

*Jisabr kingr kanjo Jerusalemr mfnahmo yuhat
(Matyu 21.1-11; Mak 11.1-11; Jon 12.12-19)*

29 Yihato Olifet kmi yihofr yorhwa kmi Betfageti Betanit mfnahmom. Ndha mhtahato hus disaipperf kfo tkrur memorf, 30 "Ndu riyorhwa kmi-tio wai hanykahfn htiarahfnr wom donkiyenr mispno natifatayetr. Nd donkiyenr nhai yimam tafi rhuhato hatonermomr. Nd donkiyenr wayak nyusakaknetwafn. 31 Yekwatfnr yimam ttiwon kangmf, "Tamohmpno yaknitafnr?" wakfo wamitwafnm, 'Bro Nungothetr hingr nefetrn kfeitrno kakni yahukanonr.'"

32-34 Be nd hus yimaf yimof. Yihato be nd Jisabr kfomo mrokfom hti nhombra bugamofm. Donkiyenr htimofr mispno natifatayetrn. Memof, "Anyusakak hanyonr," donki tikatm ttiwon memomf, "Tamohmpno nd donkiyenr thu nyusakaknitafnr?" Memofm, "Bror kfeitrno kakni yahukanonr."

35 Be nd donkir nyusakaknihato hanyhemofr. Jisarpno mhtahato tufhu rmontham yakmofmn donkirhu mongtn rhuyuk tkitt htamofm. Htanihato fak tkaftamofr Jisabr mrhumor. 36 Be mrhuhato yimor. Yimam Jisabr htiyahato yuke hmbresham yakmoamn ror yiyuk yihotatn htak hanymoatm be nd hmbreshamn yura fau fnahmor. 37 Be yimorn bi brbo toh hanyomor Jerusalemtpno Olifet kmi yuhat yau htamort Jerusalem

yuhat riwitamor. Nd Jerusalem yuhatn turhu disaiperm wakfo yindhorak kimrmom. Tum be hti hnamo mirakerm dukahato kfo yindhor memom, ³⁸ “Bro Nkifrar ayak marnyatwarr ndar kingr Brorhu yufatpno yitar. Bro Nkifrarhu yufat yura yura amhtamift. Nom ndar bbinysofthu met yindarimom rorn yima yuhum yak marnyaruhatrm yima yuhum mirhurahmnom.”

³⁹ Jisasrhu disaiperm inji kfo hnamoatm wom Farisim nd rifinyom yimam tohhato kfo memom, “Tisa, nd ninhu disaiperm wakfonm inji akfo yindhorwahn. Be tmifm akfo ptha tmbhakm.” ⁴⁰ Jisasr memorm nd Farisim, “Tamohmpno yamukako aptha tmbhom? Tahimn ngetm rhuruhamn Bro Nkifrar kfo yindhorrahmr.”

Jisasr Jerusalemt hanurmo yuhat

⁴¹ Jisasr Jerusalemrpnno brbo mtoh htihato hanurmorr kmir. ⁴² Nur hanyhato kfo memom, “Jerusalem thofko, hifa rhu marnya nmbuhath bi rhu hnamoko, tukomn kfo kurmoko nd hifa rhu nmbuhathu rhuneft. Arihat nhai. Hifa rhu marnya nmbuhathu yak yuhath bi rinnfakmot. Nhai tfit hifa rhuruhathko. ⁴³⁻⁴⁴ Yahr kmim nieruhamn ye batirahmko. Nd Jerusalemr gna habrimo tahi gnam, yahr kmim nianeft nhai happukruhatm nd kmi gnat mtohnihato kmit mitoh-nineft. Rom yahr yinyeft bbpam yakhato tou yeny hamuhhato nd yuhatn mitohnihato kmit wifor hmbrenihato kmi Jerusalem thofm ye bati witarahmm. Jerusalem thofm Bro Nkifrar mong htamo yuhatn ye bati witarahmm.”

Jisasr nd temperr maket htayuk yimam yak thumo yuhat (Matyu 21.12-17; Mak 11.15-19; Jon 2.13-22)

⁴⁵ Jisasr yimorn Bro Nkifrarhu temperr gna habrimo gnathu yifhatikt rim fnahnimor. Rim fnahnihato rim htimorm wom yimam nungam, sisifm, bulmakaum, nd ndm maketmoumm yiro Bro Nkifrarhu temperrn. Jisasr rim htihato hik tubatuhato nd maket htayuk tikm nembos tubatumorm. ⁴⁶ Yak thunihato kfo memorm, “Bro Nkifrarhu rfa borngt kfo kangt, ‘Nanhu temperr nanhu kfo bruttnayuk kunyr rhurahr.’ Tfit nikomn kangko rikoh yimarah yi kafrohyuk kunyr arhur.”

⁴⁷ Yiha yiha Jisasr nd temperrn met yindarim kfo nuhas bonuhasmourm mrokfom. Prisroh bro yimam yo boririfhuthu tizam yo Judaroh bro yimam Jisasr hingrnamao hingrneft htihato rpat ruhato memom, “Wom yiha yuwi kfo nnehakhato was-rahnomr.” ⁴⁸ Inji dukahato memoun, “Kfo nnehakhato awasnomr,” to nhai, met yindarim, rom nhai rroh yima yuhurn rhurmom. Rom Jisasr pthamoa mrokfom wany wofnhato yiha yiha yuhato wany yakitohmoumr ror pthamoahat.

Jisasr bro yufat yakmo yuhat kfo ttiwonmomr (Matyu 21.23-27; Mak 11.27-33)

20

¹ Wom yiha rmon kmifarn met yindarim rifinyomotm Jisasr Bro Nkifrarhu gutnius mrokfot kfo ptha nuhasmorm. Kfo nuhas hasetrn pris hingrneft tohyuk yimarah bro yimam yo boririfhuthu tizam yo wom bro yimam fau yukatohaknimomr. ² Brbo yihato Jisasr mkfo ttiwon memomr, “Frohmn ndhtet bbuka rifhur hemomn? Frohmn bbuka rifhur hehato kfo memomn inji wanatwa?” ³ Tfit Jisasr sinyahato kfo memomr, “To tawo wakfo nuhaskoma. ⁴ Jonr yimam baftaisimmoahate tu Bro Nkifarn kfomotr

ndhтет hingrneft hingrnamourt o be yima mifm kfomotmr yimam baf-taisimmourm?” ⁵ Rom inji wanyhato tfit tum nnakfo memom, “Nom sinyahato kfo mirahnomr; ‘Bro Nkifrarfn kfomotrr hingrnamour,’ to tfit mirahr; ‘To tamohmpno wany yakio duha yirmokomr?’” ⁶ Jonr pthamoa mrokfom profetm kanjo pthamoatrm yimam wanyomumm, tfit nom kfo mirahnom, ‘Yimaroh kfotpno kfo pthamou;’ to be yimam tahiyе tahiye yenyoh-rahmnom.” ⁷ Be myak nhtaktiyakhato be kfo memomr, “Nom nhai tawisaf-kahnom.” ⁸ Rom inji kfomotm tfit Jisasr kfo memorm, “Na to inji. Na nhai kfo nuhaswotanko na hingrnewa hingrnefthu bbukeft yakmo yuhat.”

Wain swirt tohukatohmo yima bebroh kfo nhombra mrokfot (Matyu 21.33-46; Mak 12.1-12)

⁹ Jisasr tfit wom kfo nhombra mrokfot yakhato nd met yindarim kfo memorm, “Wom yimar wain swirt htamor. Nd wain swirt be htahato tfit womroh tirrn htanyhato ror yimor wom kmitn. Wom kmit yihato ndha tohngotmor. ¹⁰ Kto nd wain swirt yukha hirmott yukha yak yiharn nd tu wain swir tikatr turhu hingrna yimar kfo tkrurafmorr nd wain swirt yakitoh hasoyuk yimampno. Kfo tkruraf memorr, ‘Waikahnn nanhu yufathu htahayuk yukham wamiyakhina.’ Nd yimar inji kfo tkrurafmotrr yimor. Yihato nd mswirt tohukatoh hasoyuk yimam tabotafmotmr be sfnopa tfit yimor. ¹¹ Nd wain swir tikatr htiyaktihato tfit wom yimar kfo tkrurafmor. Yihato nd wain swir yakitohyuk yimam fasoh fasoh kfo huta bohutahato tabotafmotmr be sfnopa tfit yimor. ¹² Tfit womr kfo tkrurafmor. Ror nhaf inji buga. Tat beb bobeb thuhakhato memorm, ‘Wuri wain.’ ¹³ Be nd wuroh yimar inji nafmotmr memor, ‘Be tfit finji narhoya? To frohmn tfit yiruham?’ Be dukatihato memor, ‘Nhai mrokfom, tukanhu mondtпно mfurwa yonrn yirahr. Ror yiruhatr afo htiruha wany yakiorahmre nhai?’ ¹⁴ Be nd yonr tkrurafmotrr yimor. Yimorn wain swirt tohyuk yimam htiyakhato tum rinnakfo nakfo memom, ‘Ndarr turhu yonr nier. Yifemr nohnineft to nd yonrn tkitt yakhato ndar wain swirt rorn yakrahtr. Finji dukewako? Awaskahnomr be nd wain swirt be nmoht rhuraht.’ ¹⁵ Be mrokfot yak dbkafnihato turhu wain swirt toh hasetrn toh rafaknihato fakmomr. Yakhato tirtir yaknimomr nndo rim htahato wasmomr.”

Jisasr inji kfo pthanihato kfo memorm, “Niko to finji dukewako? To nd wain swir tikatr, turhu yonrhu was mrokfot wanynefte to finji naruharm?” ¹⁶ Na kfiwanko wain swir tikatr nieruharn nd yimam was hehur thuruharm tfit wom nndoh tkitthu yimam yakhato yak htarahrm nd swirtn.” Inji kfomotr nd yimam wanyhato kfo memom, “O, mirahr inji anaya.”

¹⁷ Jisasr yukatohmormn kfo memorm, “To tamoh dukeftпно Bro Nkifrarhu rfa borngtn kfo memom,

‘Nd rahur, kamda yimam hti kurhato yak thumor,

be bi tfit nd rahurn bi dany rahur tohwor.’

Sng 118.22

¹⁸ Yimam nd dany rahurpno rim frbigneft o rahus suhnehato frkarnyanefst to be nhai wom rhukfot o nfrikfot.”

¹⁹ Nd nd mrokfom pthamotrm nd prisroh bro yimam yo nd boririfhuthu tisan Jisasrпно toh pthamoam, wanyhato kfo memom, “Nd kfo nhombra kfot nomn niewut.” Jisasr pthamo mrokfom rom wanymohat yima

yuhumio bi nambur kih bugamomm. Memom, “Ka bi kak twanhiwunomr.” To nhai, yimam htihato afo fakrmemom yakneft.

*Sisarhu maruha he yuhat
(Matyu 22.15-22; Mak 12.13-17)*

²⁰ Be nd yima yuhurpno yimom. Yihato tfit wom yimam mkfo tkruraf memomm, “Nikomn waikahkomn rorhu mrokfo ptha swirmn yuwi rhu tebfu botebfu htfaskfot. Yuwi inji rhu tebfu hanyhato yuwi ttiwon rhtikfot. Finji finji kfiwur nd tkittn yakhato kotimrahnomr bro yimampno. Bro lokfot afo htiraht.” ²¹ Be inji kfafmotmm yimom. Yihato fau hik htfasmomr. Yau hik htfas hanyhato wom tkitt mrhumotr be rom ndha mrhumom. Yuwi rhu tebfu hanyhato ttiwon rhti memomr, “Tisaye, ni pthewa mrokfom nom hifa wanuk-nomm. Mrokfom hifa hifa kfo hik bohik marnyewanmn Bro Nkifrar hikwa nefm kfo hik nuhas marnyewunn tuhan yindarim. Mrokfom kfo pthi-wohat nhai hti mekahn ndr yufet yimayer o ndr yufa duha yimayer. Nhai. Mrokfom kfo pthaneft be kfo pthewunn. Nhai yimar o yufam htihato kfo pthakahnm.” ²² Inji kfonihato wom ttiwon nmbuhat yuwi ttiwon rhtimomr, “Nome ka Sisarhu takis htaheneft ka htarfonomo nhai?” ²³ Jisasr rom yuwi inji ttiwon rhtimohat bi fakmorm rroh yima yuhum. ²⁴ Jisasr sinyahato kfo memorm, “Wom tahifat wayak nuhaskoma.” Yakhato fak nuhasmomr. Tfit ttiwonmorm, “To nd tahifat yorhwa nyingatikte frohroh nyingatikti yufat yorhwaf?” Kfo memomr, “Sisarhu nyingatiktk korhwott.” ²⁵ Tfit kfo memorm, “Sisarhu nyingatiktk korhwott to be tfit Sisarn hekfot. Bro Nkifrarhum nhaf inji. Tu Bro Nkifrar hekfot.” ²⁶ Rom memom, “Inji attiwonkahtnomr finji kfiwure yakrahnomr.” To nhai, inji kfo wokafmotrm be tuha mrokfo duhatm tohmom.

*Sadyusim yimaroh nohnefti sinyaneft Jisasr ttiwonmo yuhat
(Matyu 22.23-33; Mak 12.18-27)*

²⁷ Farisim yimotm tfit Sadyusim yimom. Nd Sadyusiroh dukeft duka memom, “Noh hanita yimam nhai tfit sinyaruhatm.” Rroh dukeft inji rhumout. Nd duketpno Sadyusim Jisasrpo yihato mkfo memomr, ²⁸ “Tisaye, Mosesrhu boririfhut kfo kangt, wom yimar tuhan yakhato nhai wom yonm kasinya htanirfor, nd rorhu tuhan dhirt tfit wom nmemrn najom dhirt yakhato rorpno yonm nasakhato tfit najomrhu tkitm romn tohkfot. ²⁹ Wom yima najohfitpno to inji rhumot. Nd yima najohfit 7-pela kfot tohmom. Barkof bro najomr tuhan fakmor. Ror tuhan yakmohat nhai yonm nasak htanihato nohrmor. ³⁰⁻³¹ Be nohmotr tuhan dhirt tohmott tfit rorhu wayakrn fakmort tuhan dhirt. Rorpno nhaf to be rpahtet nef. Nhaf nhai wom yonm nasak htanihato nohrmor. Tfit rorhu wayakrn fakmort nd tuhan dhirt. Ror yakhato be rpahtet nef. Be inji nahany nahanyrn 7-pela yima najohfit rhu nhombra bugamotm. ³² Wuroh 7-yukrpnone nohmot. Nhai wom yufat kasinyahermotm. ³³ Nd 7-pela yima najohfit rpa metrpat rim rhuta mrhutamotm. Kto nd najohfit siny thoft nd mette fitoh yimarpno tohruhat?” Inji ttiwon rhtimomr.

³⁴ Nd Sadyusim inji kfo pthamotm Jisasr memorm, “Ariharhof yimam nhai rhu furakahm. Tuhonet tuhanet bugam korhm. Metm ramet bugam korhm. ³⁵ Kto tfit Bro Nkifrar kasinya thombat noheh yimam nhai tfit sawohet sawohet toh hanyruhatm. Nd tuhan yakneft arihat ndhtet nef

korhwot. Kto nhai. ³⁶ Kto ndar thatipt minoh nnehafhato Bro Nkifrar tfit afo thu kasinya thoft be rorhu yonm tohrahm. Be mounmotroh ruheft kanjo rhurahm. Nhai tfit nohruhatm. ³⁷ Nd thu kasinyaneft Mosesrhu tndht duka hanykfot. Wom yiha Mosesr Bro Nkifrar kahm kanjo mi bufupatn funamotr hti hanyomorr. Mosesr kfo nuhas hany memor, 'Yawer, Abraham, Aisak, Jefokroh Nkifraye.' Nhai kfo marimor, 'Yawer Abraham, Aisak, Jefokrom kfo tatomo Nkifraye.' Nhai. Nd mrokfot htihato kfo kangnom, yimam nohnitam nhai noh mifkahn. Thatiprpat nohruhatn tfit sinyaraht. ³⁸ Bro Nkifrarhu nyingaye htitworm yimam nohwam nhai noh mifkahn. Thatiprpat nohwatn mrokfo rifhur korhr. Ndnetn Bro Nkifrar yima nfri yafothet yimaroh Nkifraye. Nhai noheh yimaroh Nkifrar rhukahr."

³⁹ Bro Nkifrarhu boririfhuthu tisam inji wanyhato kfo memom, "Ni kfiwa mrokfot tu kfo mifwo. Nhai yuwi furakahn." Be inji yak wokmotrm, ⁴⁰ be ndnat fakrmemom tfit wom ttiwonnefm ttiwonneft.

Frohr miyak htiyakruharnom?
(Matyu 22.41-46; Mak 12.35-37)

⁴¹ Jisars wom ttiwonkfot ttiwon-morm, memorm, "To tamohmpno kfo yamukam, 'Yimaroh minrfa htiyakruk yima Kraiser, Defitrhu frikef yuhathu yimayer?' ⁴² To windohmo windoh gonborngtn Defitr kfo memor, 'Bro Yawer kfo memorr nanhu Bro Nungothetr, "Nanhu bro bbukeft yorhwa tirmifko wamrhun.

⁴³ Wamrhukahtn nd ni namburwa yahr kmim afo ninhu tirtn htahato ninhu mofsinhitn yak htaruhanm." ' *Sng 110.1*

⁴⁴ To nd yima Kraiser bi Defitr kfo yuta hna memoa, 'Nanhu Bro Nungothetr,' to tfit Defitrhu frikef yuhat nierahr?"

Boririfhuthu tisam fasoh nefm namo yuhat
(Matyu 23.1-36; Mak 12.38-40; Luk 11.37-54)

⁴⁵ Yimam toh wany yakitoh hany-mom turhu disaiperm kfo memorm, ⁴⁶ "You, niko! Boririfhuthu tisam nia kusmm frsfarahmko. Turuh yuke yuke yok tham hmbrehato maket swirm rhuyuk yimam yihotam toh hasoyuk yimam kangm, 'Be nom-rpanom akfo yindhorm.' Nhai be nyingarpaye htikfot. Fitoh rhu rifiny-hato kfo bruttnayuk rmonm rom nhai mongkorn o kimbohn rhukfot. Tu be nhai mif. Rom tu be nyingako mruhakkfot. Bro yemro ye burwa tkittn nhaf inji. Rom inji yimaroh nyingako mrhu gngonkfot. ⁴⁷ Met dhirpampno yitamn mkfo nneh bonhehato wuskenm kak rhohtakni yahukmm. Bro Nkifrarhu kfo bruttnaneft htirahnm. Nhai be yudbat kfo tmbhonikahn. Afo kfiwom kfiwom kfiwom wurohna wurohnamne ptha tmbhekwom. Kangm, 'Yimam htiruhannom mirahm, "Hifa yimayem." ' Kto Bro Nkifrar finji nanefn nd yimamn be tu bro krhopam yakrahm."

Maruha duha mett Bro Nkifrar maruham hemo yuhat
(Mak 12.41-44)

21

¹ Jisars yukatoh hasohato htiyakmorm maruha maruhet yimam yi hanyomn Bro Nkifrar maruha htahemoa tkittn marufam mhtanihemoumr. ² Roh mongkorn wom met dhirpat niamot. Rothu ramemr nohmotr rot turpatt tohmout. Rot nhai tamoh wuskam o tamohm. Rot yimotr

wuroh tuthu yohript rhuyuk wuroh fsohot marufenf yakmotfn Bro Nkifrar maruha htahemoa tkittn nd marufenf htanihemotr. ³ Jisasr nd mett htanimo marufaf htihato kfo memor, “Na kfo mifwanko, yimam nd htani hany marufam nd metrpat hte marufenfn be tu bro marufaf htes. ⁴ Wom womm htahani marufam, rom maruhetm yak nhtemmn wom fam Bro Nkifrar nnahehato htahumr. Nd metpatn be tu nhai wom maruhenm. Tu wuroh yohript rhuyuk fsohot marufenf Bro Nkifrar htahut. Rot nhai wom yeshri wiknayuk maruham wom rhukahmt.”

*Bro Nkifrarhu temperrhu yoh nasoh yuhat Jisasr kfomor
(Matyu 24.1-2; Mak 13.1-2)*

⁵ Jisasrhu wom disaiperm nd Bro Nkifrarhu temperrhu wondhet tahi gnam yo wom wondh wuskam yimam hi hanyhato temperr wondh nhtamom, nd ndm Jisasrhu wom disaiperm htihato kfo ptha srhmoum. Jisasr wanyhato kfo ptha memorm, ⁶ “Ndar niko htita wondhet tahi gnat to mirahko ka rhuraht. Wom yiha yimam niahato kafring witarahmm.”

*Jisasr kfomor bok kurhefn mfnahrahm
(Matyu 24.3-14; Mak 13.3-13)*

⁷ Jisasr inji kfomotr turhu disaiperm tfit ttiwon memorm, “Tisaye, nd ni kfi mrokfot fitoh yihar rhuruhatt hti-ruhanomt? Tamoh neftn yak dukaruhattnom mirahnom nd yihar bi brbohwor?” ⁸ Jisasr memor, “You niko! Bok yimam niahato mkfo nneh bonhehrahmko. Nanhu yufat yutahato kfo mirahmko, ‘Bbinysofthu bati yihar bi asor bi. Na bi asoya niko gari hasomo yimaya.’ Niko inji wanukko, mirahko yudbat wany yakiohato amhikakninomm. ⁹ Mrokfom wanukwoko kamukm, ‘Bi ndha nnayureft korht,’ mirahko ayakrme difronnom. Ndhtet nefm rom nierahm. To mirahko ka bi nd nefmpno bi brbohwor yihar. Nhai.”

¹⁰ Wom mrokfom kfo ptha memor, “Htirahko yo wanyrahko wom kantrikfot sinyaruhatn wom kantrikfotpno nnarahf. Wom kingr sinyaruharn wom kingrpnno nnarahf. ¹¹ Yo htirahko yonmari yonmari nunem tonirahm. Wom tkitm wanyrahko kfo mirahm nd kmit o kantrikfot yeshri duhatm tohwom. Wom kmimn o kantrikfotn kfo mirahm bro dbohneft korht. Yura moutko htirahko nndo ndo rhuraht. Nhai ndar rot yorhwa kanjo hti-ruhatkmt. Yimako nhai bmtaruhatko. Yonmari yonmari yima brom, nanyaret yimam tfit mikukentarahm.

¹² Nd yutahnefem mongko rhurahm. Barkoft afo Bro Nkifrar hikwa yimako yak tkaftaruhamko faso faso yak beb bobebrahmko. Judaroh rhu rifinyuk rmontn hanyruhamko nkifra boririfhut ttiwon hebosuknarahmko. Inji nahato nhai kfo marnyarfoko, kalabus htarahmko. Yo womt, nanhu mrokfot ptharahkmt be kantrikfothu bro yimampno kotim hakuruhatmko kot toh hakurahko. ¹³ Nd tkittn nanhu mrokfot nd bro yimam kfo nuhasrahkomm. ¹⁴ Mirahko aduka yanhokahnomn akfo amenyom, ‘Amai, na finji kforhoya?’ Inji duka duha. ¹⁵ Mrokfo rifhur nann thu hmbriruhann. Nd kotimyuk yimam nd heyuk mrokfo rifhur kfo hirahnm, be nhai wom finji ptharuhatm.

¹⁶ Tukmoh garbn yifa mndarm tangiyemrom, nhai miruhatm, ‘Arm nmoh yinemroyem o tangiyemroyem.’ Nhai. Tumnn hndhnraruhatmko wasrahmko. ¹⁷ Nann hikruhatko yimam be hti sr thurahmko. Nhai hifa nyingar hta hakuruhatmko. ¹⁸ Nd nd nefm nhombrarahm. To mirahko ka

nikmoh womr finji narahr. Nhai. Toh marnyarahko. Nhai wom tmarifenr yoh rashato misuhruhatr. ¹⁹ Nd yiha toh bntekomn fakitoh bntekoma, be Bro Nkifrar yakrahko.”

*Jerusalemthu bati yuhat Jisasr kfomor
(Matyu 24.15-21; Mak 13.14-19)*

²⁰ “Be afo wahtiyafu hanyswako. Bi htitwoko yahr kmim niahato Jerusalemr bi wohn hmbrimr, ee wakfo wamitwako, ‘Be ndar kmit be batiraht.’ ²¹ Nd yiha bi inji htitwokomt, brbo Judia distrikt toh hanyuk yimam yura kminysofko ayakrmanyitwam. Yo yiro kmi Jerusalem tohyuk yimam afnahkahmn ayakrmanyitwam. Kmi Jerusalemthu briaahako tohyukm mirahm tfit kmiko arim fnaninom. ²² Nd yiha wukierhu tathur yihayer. Nd nakur yihna yihnamomrn inyar tathurhato wukierhu fkni yihayer. Bro Nkifrarhu mrokfot bro rfa borngtn kfomot, be fipett rhuraht. ²³ Metm yon fanetm yo tefi yon hamboriyetm finji yakrmiruham nd bro krhopam yakakna thombat? Romn tu bro yuhuwafekt korht. Be nd yiha Bro Nkifrarhu namburpam mirahr, finji anayanm yimam, be finji naruham? Be htirahko yahr kmim nieruhamn was frekonirahmm. ²⁴ Wom tangishofm be yakni hanyhato kalabusn htarahmm. Be wom kmimn niahato rroh wuram yahotrahmt Jerusalem bbinysoft. Be rom nd bbinysoft romn yakitoh hanimtn kto bi Bro Nkifrar kfiwur yak tuhafonefte ee btn thu troh tanyrahmt.”

*Bro Najomrhu yawihna yihar
(Matyu 24.29-31; Mak 13.24-27)*

²⁵ Jisasr tfit wom mrokfot kfo memorm, “Nd wonk wonk nefm rhuruha yihar be htirahkomm yamt, marr, gunym be nndo htirahkomm. Nndo rhuruhatm mano bro marombt wanyrahmt kur thbi thombat. Bbinysoftu yimam inji wanyshoft nhai bmtaruhatm. Mirahm nndo tamohmn wuttho yibuknewum? ²⁶ Ndar mounti bbinysoft rhuruha neftn met yindarim htiruhamn nyingam mmrifrahmm. Mount tu habokknamo yifonn mirahm nndo ginunes kekwotm. ²⁷ Ndtppo ee btn Bro Najomr htihakrahmr gribpamn hawihnerahmr. Ror yawihna thombat turhu bbuka rifhur yo ror hatoh hneruha nukest mirahm nndo marrn yifa toh hnewur. Inji htihakrahmr. ²⁸ Bi barkof nefm htitwokomm mekfot bi brbohwt Brorhu yimaroh miyak htihak yihar. Yimbhindangm bi tohetohaf hanykfot.”

*Kutr hti hikkfot
(Matyu 24.32-35; Mak 13.28-31)*

²⁹ Jisasr hnu wormrhu kfo nhombra mrokfot kfomorm, memorm, “Kutr htitwonomr, ³⁰ twamr huktewum kfo kangnom kut yinr tohrah. ³¹ Be tfit rpahtet dukeft dukakfot. Bi nd na kfiwa nefm mountn o bbinysoftn htitwonomm, kfo mekfot, yimam Bro Nkifrarhu kingdomkfot rhuneft bi brbohwt.

³² To nd nefm rhu thoft to mirahko arihat tohwa yimam bi nohetmn nd neft rhuraht. Nhai. Arihat tohwa yimam yuhre tohetmn nd neft htirahmt. ³³ Nd neft rhuneft htirahko mounti bbinysoft mibatinirahf. Nanhu mrokforpat nhai mibatiniruhatt.”

Jisasrhu disaiperm yimbhindangm tohetohaf hanyswamm

³⁴ Tfit Jisasr memorm, “Niko yimbhindangm tohetohaf hanykfot. Mirahko bia bupam yewa yimam kanjo ye mmokahnomn fohm kanjo

yatiyefm dukahato mfhat bbinysoftn tariobttakfot. Ndrpat duka hasoruhakomn Brorhu nia yihar be sinya fohtasrahko. ³⁵ Wukier kanjo fohm nakur ye mmo hany ye mmo hanyhato wuroh inyar yihom tathurafhato wukier yohnita kanjo be inji sinya fohtashato yiro wukiern fkne bugarahko ndar bbinysoftu yima bugako. ³⁶ Yiha yiha yimbhindangm tohetohaf hanyhato be kfo bruttnanefrpat yakitohkfot. Yiha yiha kfo bruttnakfot. Kfo bruttnahato toh bmtaruhakomn Bro Najomr kotkfot yakitoh thoft be mrokfo duhatko rhurahko.”

³⁷ Mar yiham Jisasr Bro Nkifrarhu temperr yimoarn met yindarim kfo nuhas bonuhasmourm Bro Nkifrarhu mrokfot. Yifung yiham yura Olifet kminysoftu kunys muhmoarn hwemour. ³⁸ Met yindari bugam turoh kmim hwe tanyomoarn dbha Bro Nkifrarhu temperr yimoamn Jisasr tpayuk mrokfom wany yakitohmoumn.

Jisasr krhopam yakhato nohmor. Minohafhato tfit sinyamor.

22

(Sapta 22–24)

*Judasr dukamor Jisasrhu hndhnayuk yuhat
(Matyu 26.1-5; 26.14-16; Mak 14.1-2; 14.10-11; Jon 11.45-53)*

¹ Yispa hta duha bretparoh ye yihar, kutewumr Pasofa burwat, * nd yihar bi yibon hanymor. ² Prisroh bro yimam yo nkifra boririfhuthu tisam kmi thofm yakrmihato memom, “Jisasr be was kafrohrahnomr.”

³ Tu Jisasrhu disaipar Judas Iskariotr n Satanr fknemorr. ⁴ Satanr fknemotr yimor prisroh bro yimami temperr tohukatohyuk hingrna yimampno. Yihato memorm, “Inji inji hndhnaruhanr.” ⁵⁻⁶ Inji kfomotr maru gondt hemomr. Hemotmr Judasr yihato dukamor hndhnayuk yuham.

*Jisasrhu hus disaiperyeshrim hta mskamo yuhat
(Matyu 26.17-25; Mak 14.12-21; Jon 13.21-30)*

⁷ Be rhumomn nd yispa hta duha bretpam yeyuk yiharoh barkof yihar niamor. Nd yispa hta duha bretpam yamoa barkof yiharn Pasofa sifsifr washato ndr tarioh mthamoum. ⁸ Pita Jonrof Jisasr kfo tkruraf memorf, “Nifn bi wai hanykahfn ndar bro yihar rhuyuk yiha yeyuk yeshrim wamhta mska hanyswafnm.” ⁹ Tfit rof ttiwon memofr, “Nd Pasofa burwat rhu thombat, nome yeshrim fitha hta mskaruhatnom ni ruhato ye jukaruhant?” ¹⁰ Inji ttiwonmotfr kfo memorf, “Waikahfnn kmi yifhatikt n wom yimar burioh roht titerpno mnafurrahko. To be mirahfn finji ainyo. Rorn wayau hikaknitwafn. Ror fitoh kunys kitwor, nifn nd kunys yikfot. ¹¹ Fknenihato nd kuny sikatr wakfo wamitwafnr, “Tisar kfo famur, “Waikahfnn nd kuny shofr ayak nuhastwarfn nani nanhu disaipermppno Pasofa burwa yeyuk tkitt.” ¹² Inji wakfo ttiwonkahtfn yurakorhof rumt yak nuhasrahfn. Nd rumtn mhtirahfnm tebor gaj nd ndm. Ndharn wahta mskatwafn. Nom nierahnom.” ¹³ Be rof yimofn nd Jisasr kfomo yimar kmi yifhatikt n mhtimofr. Ror yimo kunys yimof. Nd nd nefm be Jisasr kfomo

* **22:1:** Isrerm Ijift tohhato Bro Nkifrar miyak htihakmo yihar kutamoumr Pasofa burwat, nd yihar rhu rifinyhato tfit kedukamoumr Isrerm Ijift htanyomohat.

tng yuhatn hti bugamofm. Be ndharn rhuhat hta mskamofm nd bro yiha yeyuk yeshrim.

*Jisasr disaiperm bretpa, wain bupa hemo yuhat
(Matyu 26.26-30; Mak 14.22-25; 1 Korin 11.23-25)*

¹⁴ Pasofa burwa ye yiharn Jisasri aposerm yihato rpa tebert rpat mrhumom. ¹⁵ Mrhu bugamotm Jisasr memorm, “Na wofn mifwa nda wuroh bro yihar nikompno rhuhat wuroh yeshrim yehato krhopam yakneft. ¹⁶ Wuroht yenyhokahanko kto be nhai. Afo toh hanyrhoyann htiruha bi Bro Nkifrar king tohneft bi rorn king tohato rorhu kingdomkfot tohukatohwort ee btn Pasofa burwa mift rpat yerahnom.”

¹⁷ Jisasr inji kfonihato bu kaft yakmortn Bro Nkifranko wukfo yindhornihato kfo memor; “Nda wain bu kaft wayakkahkomtn wanahe habriko. ¹⁸ Na kfo mifwanko, na nhai tfit wom wain bupam yerhota. Bro Nkifrarhu kingdomkforpatn tohato ee btn nfri wain bupam tfit yeruha.” ¹⁹ Tfit bretpat yakmortn nhaf Bro Nkifrar wukfo yindhornimorr yak tif botifhato he nhombramorm tifen tifen. He nhombranihato kfo memorm, “Nd bret tift wayakkomm. Ndm nanhu nmpayem. Nanhu thatipt niko dukahato Bro Nkifrar heshombat inji yoh nembosingoraht. Yekahkomm duka hanyrahkma.” ²⁰ Nd nuwa yesrufnihato tfit nfri wain bupa tas hmbrihato barkof namo kanjo inji namor. Nanihato kfo memor, “Ndar wain bu kaft tfit niko yekwat nd nfri dfa tik yuhar hingrnaruha hingrneft. Kto na nohato nanhu kkut yohni thombat nd kcupamn nd nfri hingrneft be yak dbkafraht. Be tawo nd nfri hingrneft wahiktawo. ²¹ Wawanyko. Wom yimar tor nhowi nompno kawor. Rorn hndhnaraha. ²² Bro Nkifrar kfomo yuhatn Bro Najomr kangr, inji nadborneft nhai mrokfom. To be Bro Nkifrar tutfarahr nd hndhnayuk yimar.” ²³ Tu Jisasrhu disaiperm inji wanyhato tum rinahti nahthato nattiwon nattiwomom, “Barenko niko wakfoko, frohrn kfiwar? Frohm inji naruhamr?”

Jisasrhu disaiperm bro yufat yakneft rinakfo nakfomo yuhat

²⁴ Jisasrhu disaiperm tum rinakfo nakfomom bro yufathu yakneft. Womr sinyahato memour, “Nann bro yufat hatohruha.” Tfit womrn, “Weye, nann hatohruhant.” Tfit womr memour, “We, rorn.” Inji rinatu natumom. ²⁵ Jisasr wanyafhato kfo memor, “Niko ndar rinatu natutako afo wawanyko. Wom wom yima tangi furaroh kingm nhai tohukatoh marnyakahm. Roh womr king tohneft, nhai ror wom yima furarhu mrokfeft o dukeft wanyhato hikkfot. Rorpar finji finji kfiwur o dukewur, kmi thofm be rorhu dukeft yuhat hikkfot. Nhai finji kfkofot. Ror tur inji nahato kfo kangr, ‘O na tu hifa kinga.’ Tot inji korhwot wom yima tangiroh hingrneft. ²⁶ Niko nd yuhat hik duha. Bro yonr tfit nmemenr kanjo rhukfot. Bro yimar tfit afo hingrna yima furam kanjo rhukfot. ²⁷ To afo wawanyko wom mrokfot. Frohrn broyer? Nd be gajis kmit rhu hasohato be wommn mthuhona hasiwa yimar o nd yemro yak habriwa yimar? Finji dukewako? Frohrn broyer? To na nhai inji nakaha. Na nikmoh buha tohnuhiwa yimaya, na be nikmoh hingrnanhoyuk hingrna yimaya.

²⁸ Tamoh nefm memour, ‘Ayak kasus inji nanomr,’ niko nia tohnhomoukma. ²⁹ Na nd Bro Nkifrar nd hemo tohukatohyuk gajim, niko wom gajim yak rhurakomm. ³⁰ Na kinga toh thoft nanhu nuwa yayuk tebertn niko nampno rpat rhuhat rpat nuwa yerahnom. Na yakruha gajis niko to

inji buga wom gajim rhuhato nikomn wom 12-pela tangim tohukatohrah-komm.”

*Pitar mong trohruha nmbuhat Jisasr kfo pthamor
(Matyu 26.31-35; Mak 14.27-31; Jon 13.36-38)*

³¹ Jisasr sinyahato Saimonr kfo memorr, “Saimon, Saimon! Wawany. Satanr niahato ninhu yima yuhur wastiwonrahnr. Tu Bro Nkifrarhu dukefrparpno rhuhrane nhai? Bro Nkifrar bi kfo fakiowafmorr ninhu nia wastiwonfeft. ³² To ni Saimone mirahn duka yanhoya. Na kfo tatiwanr Bro Nkifrarho. Ni buha wom nefmn misuh thombat nhai be wundiati suhniruhathn tfit mkekutrahnr. Tfit bi mkekutekn tfit yihato wom yimatm kfo bmta mrokfom wahitwanm.”

³³ Pitar tfit sinyahato Jisasr memorr, “Broye, na yibonwa ninpno kalabus yinyeft yo ni nohneft na yibonwa ninpno rpat nohneft.” ³⁴ Tfit Jisasr sinyahato kfo memorr, “Pita afo wawany. Hrek yifungt yimam ttiwonrahmn ninhu nanpno rpat tohneft afo kfo namhirahn. Kfo namhitwonn kangnm, ‘Na nhai nd yimar tawisafkahanr.’ Inji kfo namhiany, kfo namhi hanyruhann husfirpehyuk kfo namhi tngtpno wanyrahnr krir nakurahr.”

Jisasr kfomorm maru kpmi bainatroh yakitohneft

³⁵ Jisasr kfo memorm, “Wom yiha niko nanhu hingrnehthu hingrnat yimohat kfo rafomoyanko su wuram hmbreni duha yo nhai kpm o maruhenm yakitohakkfot. To nd yihart be inji sfno tirrpat yimohat wom shrm faknafmokone nhai?” Kfo memorm, “Nhai. Nhai wom shrm yaknafrmonom.” ³⁶ Inji kfofotm tfit Jisasr kfo memorm, “Tfit arihat yinyeft nhai sfno yaukfot. Arihat maruhete maruham yaknikfot, kpete kpt yaknikfot. Bainat duhayeko yimakmoh saket tham maruhampno yak tuknahato nd maruhaye bainat wiknaknikfot. ³⁷ Ndt nhai be kfo furakaha. Bi Bro Nkifrarhu rfa borngthu mrokfotn na kfo memota, ‘Nd yimar htimomr fasoh nefm nayet yimam kanjo. Nhai hifa nyingar htarmoamr.’ Nd mrokfot bi kfo htamot bi tot bi mfrfnah hanitt.” ³⁸ Tfit turhu disaiperm kfo memorm, “Wahiti. Asof bainat husf.” Jisasr memorr, “Nhai mrokfom, tmift.”

*Jisasr Olifet kmitnko kfo bruttnamo yuhat
(Matyu 26.36-46; Mak 14.32-42)*

³⁹ Be inji naptha hasomomn nhaf turhu neft. Turhu disaiperm yaknihato muhmom Olifet kmitnko. ⁴⁰ Muhhato mfnahmom. Mfnahhato turhu disaiperm kfo memorm, “Niko kfo bruttnaneft yakitoh kihtakfot. Inji narahko be nhai suhruhatko Satanr nia nhehneft.” ⁴¹ Be inji kfo tanyomomn yimor. Be wunye kkofomrn mtabokmehato kfo bruttnamor. Kfo bruttna memorr, ⁴² “O Dajaye, ndar bbinysoftu yimaroh fasoh nefm na be hta krhorhotma nann nohruhanm. Bi brboh watt kanga akfoyan. Nd krho mis na yakruhat kangn ayak tuhant, be hifa, na yindhorwa. E nhai, kangn ayakrt, be nhai mrokfom, yakruhant. Na be ninn yukatohruha. Kangn, finji anaya, nhai mrokfom.” ⁴³ Be wom mounmotr yawihnehato mithu bmtamorr. ⁴⁴ Jisasrhu yima yuhur nhai marnyarmorr. Ndhett ndhett dukefmpno yima yuhurio rikrho hmbritamorrne be. Nd yima yuhurpno kfo bruttnamor. Kfo bruttnahato yikiatpno yikiatpno tohmor. Nd yikiat tfit kkut kanjo rhuhato bbinysoftn mitohmom. ⁴⁵ Be injirpa kfo bruttna tanyhato tfit yihato yihom htimorm turhu disaiperm hwe hasetmn. Rom to inji nhaf krho yima yuhumpno hwemom. ⁴⁶ Yihom tohhato naku thomorm, “Barenko, nikone

be hwitwoko? Sinya rhuhato kfo bruttnanefto nhai? Inji be hweta hasoneft to be tamoh wifor yiham be suhaknirahko.”

*Judasr yihato Jisasr mhndhnakmo yuhat
(Matyu 26.47-56; Mak 14.43-50; Jon 18.3-11)*

⁴⁷ Yuhre inji ptha hasomor, asha Judasr mhatone fnahmorm Jisasrhu yakyuk yimam. Nd Judasr mirahko ka wom nddoh yimar. Nhai. Ror tu Jisasrhu disaiperr, rorn nd Jisasr yakyuk yimam hatohakmorm. Judasr yau yaknihato mkihendhoraknimorr Jisasr. Judasr mkihendhoraknimohat nhai be sfno. Bi tum rpat rhuhato memom, “Bi Judasr mkihendhor tebfiyaknitr ee ndnatn yudbat wayur sinyahato yakaknikfot yimar.” Bi inji kfo htamomt mrokfot. ⁴⁸ Be Judasr mkihendhoraknimotrr Jisasr memorr, “Judas kangn, ‘Yuwi inji amki yindhorr tebfiyaknikahtanr yudbat yimam mrrhnehato yakrahmr.’ Ndhett dukefetnn inji naknewuna?”

⁴⁹ Turhu disaiperr inji htiaf hanyhato ttiwonmorr, “Broye, nome finji naruhanom? Ndar nom hnayuk bainate nd ni yakaknyuk yimam tawo hik tubatuyafrahnom?” ⁵⁰ Be inji yuhre nnakfo ptha hanyom Jisasr fakakni twanhomorr. Be wom disaiperr inji htihato sinyamorn prisroh bro tohak yimarhu hingrna yimar bainate tirmifkorhof yimbhindangt frubafmotrr misuhmot. ⁵¹ Be Jisasr nd yimarhu yimbhindangt inji htihato turhu disaiperr fak dbohfamorm. Be nd yimbhindangt duha yimar Jisasr rim tohnhato tir htamort nd yimbhindangt tfit nathu nanyjhomot.

⁵² Jisasr tohato prisroh bro yimam, Bro Nkifrarhu temperr tohukato-hyuk yimam yo wom bro yimam tohato kfo memorm, “Barenko, nane raskor yimam kanjo bainat, mhrr hasinyahato nia kekwokma?” ⁵³ Na yiha yiha Bro Nkifrarhu temperr yorhwa kmifat tohato met yindarim mrokfom hemoahat nhai niko inji yihato hfahaknirmokma. Hrefn nd Satannr thu rifhutrko nieko.”

Pitar kfo namhimo yuhat

(Matyu 26.57-58; 26.69-75; Mak 14.53-54; 14.66-72; Jon 18.12-18; 18.25-27)

⁵⁴ Jisasr pthanimotr fakmorr. Yakhato be hanyomorr. Hany hanymourr Pitar, ror be nhowi mongkongotn fau ss hik hanymourr. Jisasr hanyhato hanymorr prisroh bro tohak yimarhu kunysn. ⁵⁵ Nd prisroh bro tohak yimarhu kmifarn kaht yimam tenghato haunyo hasomom. Pitar nhowi yimorn rompno mruhaknimorr. ⁵⁶ Kaht haunyo hanyetrrn kahtu nuketpno nd bro yimarhu wom hingrnayuk mett htimotr. Hti hasohato kfo memot, “Barenko, asor wom yimar Jisasrpnno nd wiyauyau htfasmoar.” ⁵⁷ Pitar kfo namhi memot, “Bare, nann yari yutewun. Na nhai tawisafkahanr.” ⁵⁸ Kto tfit womr yihato mhtimorr. Mhtihato kfo memorr, “Bare, ni aso womenn Jisasrpnno wiyauyau htfasmoa.” Tfit wompam kfo namhi memot, “Bare, na nhai tawisafkahanr.” ⁵⁹ Kto rhungotafhato wom yimar tu mfro kfo memot, “Na kfo mif mifwa ndar yimar rpat tohato rpat ufaufaumom. Ndar yimar Galili thofer.” ⁶⁰ Pitar wompam kfo namhi memot, “Bare, nd ni pthiwa mrokfot na nhai tawisafkahanr.” Inji ptha hanyom asha krir nakumohat. ⁶¹ Jisasr kektunihato fukatohmorr Pitar. Pitar ndnatn dukamorr Bror kfo memohat, “Hrek yifungnano krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’” ⁶² Nd mrokfot dukakhato briahako fnahnihato nhai nur ttfarmor.

*Yimam Jisatr kfo tfar botfarhato ritatakmo yuhat
(Matyu 26.67-68; Mak 14.65)*

⁶³ Jisatr toh hti yukatohaf hanyomoa yimam kfo tfar botfar kfo yukioh boyukioh thuhato ritatakmo: ⁶⁴ Nyingatikt kitasiftahato tatmoumr. Tat hanyhato kfo memoumr; “Wakfo ni frohm tatwamn. Wayutanm ni tatwa yimaroh yufam.” ⁶⁵ Be womhtet womhtet fasoh fasohtet mrokfom rorpar yi bugamom. Be inji na nfhamomr yonmari yifungr.

*Jisatr kaunseroh nyingahato kotimmo yuhat
(Matyu 26.59-66; Mak 14.55-64; Jon 18.19-24)*

⁶⁶ Dbharn bro yimam, prisroh bro yimam, boririfhuthu tisam rifiny bugamom. Rifiny bugamotm Judaroh mrokfo wanyuk wanyuk kaunsermpno yimom. Jisatr hanyomr rroh mrokfo wanyuk bro yimampno. ⁶⁷ Mhtatahato ttiwonmoumr; “Ni ndar yimann Bro Nkifrar kfomor yimaroh minrfa htiyakneft?” Jisatr sinyahato kfo memom, “To na kfo miruhanko, na nd yimaya be nhai wany yakioruhato. ⁶⁸ Yo wom ttiwonkfom kfo ttiwonruhanko be nhai ptharuhato. ⁶⁹ Wom mrokforpat akfoyanko. Ndar yiham be Bro Najomrn Tu Nngrajohet Nkifrarhu tirmifko be tohnirahr.”

⁷⁰ Inji kfomotr tfit kaunser bugam sinyahato ttiwonmoumr; “Ni inji kfiwohat ka Bro Nkifrarhu Yonn inji kfiwun?” Kfo memom, “To finji tfit kfo nuhasrhoyanko? To bi kfo twanhiwuko. Bro Nkifrarhu Yonn to naya.” ⁷¹ Be wany hikmomn kfo memom, “Bi wany hik twanhinomr. Be nd mrokforpat memonom awany hikkahnomn nd tkittn yakrahnomr. To nhai tfit womm yakruhatnom rorhu toh nmbuhathu kfo hikyukm.”

23

*Pailatrpno Jisatr kot tohmo yuhat
(Matyu 27.1-2; 27.11-14; Mak 15.1-5; Jon 18.28-38)*

¹ Juda kaunserkfothu kaunser yimam sinyahato Jisatr yaknimomr hanyomr Pailatrpno. ² Pailatrpno mhatohmomrn Pailatr kfo memom; “Nda yima Jisatr buha nia mtohwarn kmi thofm faso kfo hta kangrm, ‘Mirahko nda kmithu bro yima Sisar takis ahenomr. Nanrpaya Bro Nkifrar kfomo yimaroh minrfa htiyakyuk kinga.’” ³ Pailatr sinyahato Jisatr kfo ttiwonmoumr; “Nine Judaroh kinge?” Jisatr memom; “Uwa. Mrokfot to bi kfo twanhiwunt.” ⁴ Pailatr kecutnihato nd Jisatr kotimmo yimam kfo memom, “Nd yimar nhai wom fasoh neft narmor. Nhai kfo mirhotanko, ‘Wayaknikomr.’” ⁵ Pailatrpno mpthayuk yimam kfo memom, “Ndr kfo furewur. Mirahn awany yakiowanr. Rorn tfit buha mitohwarn nda Judathu kmi kmiroh yimam faso faso kfo hta bohta hnewurm. Bi Galiliko bi inji rihingrnakmorn to bi tfit bi asor Judako niewur.”

Jisatr Herotrhu nyingahato kotimmo yuhat

⁶ Pailatr inji wanyhato ttiwonmoumr, “Ndar yimare fitha tohofer? Galili thofere fitha tohofer?” ⁷ Jisatrhu toh yuhat Pailatr frhikakhato kfo memom; “Nd yimar Herotr tohukatohwa Galili profins tohwa yimayer.” To be inji mhti hikakhato Pailatr kfomotr Jisatr hanyomr Herotrpno. To nd yihart bi Pasofa burwathu rhu yiharn Herotr Jerusalemko bi tohetrn to be ndko hanyomr.

⁸ Herotr htihakato memor, “O hifa hnekomr. Nd ror hingrnewa hingrneft afo hingrnaruhatrt htirahnomt. Be wany wanutnom ror hingrnewa bbukeft.” ⁹ Herotr sinyahato Jisasr ttiwon nhta bonhtamourr. Jisasr nhai ptharmor. ¹⁰ Prisroh bro yimami boririfhuthu tisamm mtohnihato mfro mfro nd kotkfot kfo nnuhaknimomt. ¹¹ To be Herotri turhu soldiakfom faso faso kfo kuken bokuken kfo tfar botfar thumomr. Inji nanihato tu hifa dborioh rmonthar yakhato nd rmon-thaye tu Judaroh rmontha nyuh yuhatn nyuhafmorm. Nyuhafhato kfo memomr, “Tfit Pailatrpno wain.” Be inji kfafmotmr tfit yimor. ¹² Be Jisasrhu kotkfot rpat rpat wany hnamoftn be nd hus yimaf rinfak marnyakmof. Barkofpam afo nna huttt nna inji namouf.

*Pailatr kfomor Jisasr yura bgre misn anohr
(Matyu 27.15-26; Mak 15.6-15; Jon 18.38-19.16)*

¹³ Pailatr Jisasr htihakato nakumorm prisroh bro yimam yo kmithu bro yimam yo nd yima fura bofurat nakuyak bugamorm. ¹⁴ Nia mrfiny bugamotm kfo memomr, “Niko nda yimar tfit hnekomr kfo kamukko, ‘Ndar yimarn kmi thofm faso faso kfo hta kangrm, ‘Mirahko Sisar maruham ahenom. Asoya na kinga.’” Inji kfiwatko na duka mumiwa. Nda yimar nhai niko kfiwa fasoh nefm narmor.” ¹⁵ Pailatr kfo memomr, “Barkofpam Herotrpno kotkfot hanikomr. Herotr wanurm ndar yimarhu mrokfom nhai kfo marifor, ‘Nd yimar fasoh nefm ner.’ Wanyhato tfit nanpno nianeft kfefitr nanpno nier. Ndar yimare be wakfo furakhato was furarahnomr? ¹⁶⁻¹⁷ Ndhett neft be soldiam kforhota romn tat noh bonohafhato fnahnirahr.”

¹⁸ Nd tohyuk met yindariroh tng rihar wanfak nfakmom. “Wawaskomr! Wawaskomr! Rorn wawaskahto tawo Barabasr afnahnahernom.” ¹⁹ Nd yima Barabasr kalabusmo nmbuhat to nnakfo hamuh nnakfo hamuhhato wom yimar wasmorr. Nd nmbuhampno kalabus htamomr. ²⁰ Tfit wompam Pailatr kfo memomr, “Jisasr fnahni kitwor. Nhai yorhwatr.” Be inji kfo hanymor. ²¹ Be watabrurhakmorm. Waniak waniakhato kfo memomr, “Bgre misn wakihegirkomr! Bgre misn wakihegirkomr!” Nd yimaroh tngm be ndo grmim yakitohmoamn memomr, “Be yudbat atayifuhakninomr.” ²² Tfit husfirpehyuk ttiwonkfot kfomorm. Kfo memomr, “Nda yimar nhai wom fasoh nefm narmor. Be kotim furahato was furarahnomr? Nhai ror wom tng bebt htakahr. Ndnetrn be tabotneft tabotrahmr. Tabothato fnahnerahr.” ²³ To nhai, rorhu mrokfot yiro yimot. Fitha ttfarmotm btn finji yima mrokfom wanykfot. Rom be Jisasrhu noh mrokfot ritohakmohat to be nd tkitrpat tohmom. ²⁴ Be Pailatr wany batihato be memor, “Jisasr nohrahr.” ²⁵ Be nd Romroh gafman yimam yakhato kalabus htamo yima Barabasr rorn fnahnimotr tfit Jisasrn tkitt yakhato be soldiaroh tirmn yimor.

*Jisasr bgre mis tu hegirmo yuhat
(Matyu 27.32-44; Mak 15.21-32; Jon 19.17-27)*

²⁶ Be soldiam yakmomr hanymomr. Kmi rim fnahnitn htihakmomr wom yimar. Nd yimarhu yufat Saimonr, Sairini thofr. Ror yakmomn nd Jisasr tita hanyomo mnohyuk bgre mis rorn tfit wathu titafmom. Rorn titanhota hanymorr.

²⁷ Bok met yindarim fau hik hanymomr. Met kmimn nurefr hatoh hanymomr. ²⁸ Nurefr hatoh hany-motmr Jisasr kekutnihato kfo memomr, “Jerusalem efkotko, anur hik hnewohkma. Be inji wahti marsisako. Niko

nurneft tuko dukahato nurkfot. Yoneneteko yonm yakhato bi hanur hanykfot. ²⁹ Nhai be sfno inji kfokaha. Kto wom yiha bro kurheft nia thoft metm yon hiyau duham, rom hifa, nhai be mfro duka kinyakiruhatm. Yon kkukenetm be tu mfro duka kinyakirahm. ³⁰ Womm nd kurheft htihato kmbruf fkokh kanjo tatti bottirahm. Kminysofm kfo mirahmm, 'Nda kmnysofe wawuyoh nafurnekahn wamithu kasikahtnm anohom.' Wom womt kfo mirahm, 'Nda kmnysofe watoh rafonnom. Nom wofnkahn nom krhopam yakneft.' Inji narahm. ³¹ Yimar dborioh neft nayet yimar faso faso kak bebwomr yimam nfri nyume kah tengwa kanjo. Tfit kto nd fasoh nayetm tawo yak bebrahmm yimam inji ffnyume kah tengwa kanjo."

³² Jisasr yak htamomrn you tfit soldiam yihato fakmomf wom hus yimaf kalabus kunys tohetfn. Nd yimaf rikoh yo fasoh fasoh nefm namoatf fak htamomf kalabus kunysn. Yakhato memom, "Jisasr nohruha yiha rof rpat nohrahf." ³³ Be nd husfirpa yima bugam hanymomm yima mfha tpitn. (Kfe sfiohniyet yima mfham kanjo nd tkitt rhumoatt futamoumt yima mfha tpit.) Ndha nd husfirpa yimam bgre mimn nire tir wuram frdbkafhato yuht bgre miyetm kasinyamomm. Nd fasoh nefm nayetf mano mano tohmof. Womr tirmifko, womr kindonko. ³⁴ Jisasr yura bgre misn hegir hanyhato Bro Nkifrar wukfo memorr, "Bro Yifeme, ndar na nda yimamwe newa nefm mirahn ni htihato anambur inji naya. Nhai yima dukefrpno inji nakahm. Rom newa nefm waduka mumafotwanm. Mirahn adukayanm." Yo nd Jisasrhu hmbre-sham yak taborhotamom soldiam tahiam tubatu hanymomn htimom, frohrn tahis hifa fturt, nd yimar fakmorm.

³⁵ Yima rifinyroh nyingahato Judaroh tangi tangiroh bro yimam mtohnimoam wukfo ddo memomr, "Ndar yimar ror toh hingrna hnamohat bok met yindarim rorn fak marnya hnamorm. Nd yimarn Bro Nkifrar kfo tkruraf thombat nda bbinysofthu yimaroh nrfa htiyakneft, afo tur amifnahnakahtr ahtinomr." ³⁶ Soldiam rom nhaf niahato nd fipa ye juha faso wain bupam hnehato mthu nhehmomr. ³⁷ Mthu nhehtahato wukfo memomr, "Ni Judaroh kingn rhu thombat asomif tu wamifnahnakahtn ahtinomn." ³⁸ Wom mrokfo nmbuhat plan mkutn wandfakmomtn yura mfhatpno frdbkafmomt. Nd mrokfot rom wandfamot kfo memot, "Judaroh kingr."

³⁹ Tfit nd rorpno kasinyamo yima husfn womr riruhato kfo ddo hany memorr, "Ni yimaroh nrfa htiyakyuke? Ndhitet yima rhu thoft btn ninn wamifnahnikahtn no ninn nyusakak-rahno." ⁴⁰ Inji kfo ddo hanymotr tfit manoko hiryukrn kfo memorr, "Bare inji akfowahn. Nom rpahtet krhopam kekwonom. Bro Nkifrar ka nhai yakrmikahr?" ⁴¹ No yekwa krho nmbuhat nhai be sfno no tunnoh nefmpno krhopam kekwono. Ror nhai. Ror be sfno nd krhopam kak furewur." ⁴² Inji kfonihato Jisasr kfo memorr, "Jisase, ni kto kingn toh thombat na wadukatwona. Mirahn ammoniyanr. Nanhu rhu nmbuhat wayak htatwona." ⁴³ Jisasr memorr, "Na kfo mifwann, hrek na yita kmi paradais ni rpat yi myorhwono."

Jisasr nohmo yuhat

(Matyu 27.45-56; Mak 15.33-41; Jon 19.28-30)

⁴⁴ Jisasr afo yura hirmour yura bgre misn. Dany marrn marrhu nukeft be rim nohnimot. Kantri bugat be yambontift rhumom. Wuroh 3 kilok krif marr tfit niamor. ⁴⁵⁻⁴⁶ Be inji yarmon tift rhu hanymotn marr tri kilok yihom toh hanymor Jisasr mfaknimor. Wuroh myakni yibonruha turhu

yifem Bro Nkifraruko naku tau ttinimorr, “Bro Yifeme, na bi toya bi niewa wamiyakna.” Nd Bro Nkifrarhu temperrhu tu Nngrajoh Hnaru Gnanhehr gna rafomoa rmonthat yimar mfakni hanymor, nd rmonthat rpat buha foh tnehmot. Buha yoh tnehhato nmbuhaf mano mano rim rhu mrhumof.

⁴⁷ Amiroh keptenr inji htimohat mfhat danyr foh tnehmotr. Bro Nkifrar kfo yindhorhato kfo memor, “Dajohmn! Nda yimar be tu nhai wom tamoh nefmpno nohrfor. Dborioh yimar be noh furer.”

⁴⁸ Nd met yindarim toh hti hasomom rom nhaf inji hti tanyhato natubatunimohat bro dungunangu yima yuhumpno yi hanymom. Masat yuhuwafmorr Jisasr.

⁴⁹ Jisasrhu yimatm yo ndwom met kmit Jisasr Galilit hik htfasmoam rom be inji nndoh tohmoamn htimoumm Jisasr tamoh tamoh nefm namoahat.

Jisasrhu thatipt tahi muht rihtamo yuhat
(Matyu 27.57-61; Mak 15.42-47; Jon 19.38-42)

⁵⁰ Judaroh taun Arimateathu wom yimar tohmour. Rorhu yufat Josefr. Ror be dborioh yimar, ror nhai wom tamoh tamoh nefm. Juda kaunserkfot rorn nd kaunserkfot hingrna tohno-mourm. ⁵¹ Rom wom kaunser pthamoahat Jisasrhu finji naneftr ror nhai rhunhohato ptha nuhaknirmoarm. Rorhu dukeft duka memour, “Bro Nkifrarhu kingdomkfot afo nanhu nyingaye afo htiruha!” ⁵² Jisasrhu thatipt yakhato yopafneft rorn Pailatrpno yimorn Pailatr mkfo memorr, “Nann Jisasrhu thatipt yaknirhoyantn yopruhant.” Mkfomotr Pailatr memorr, “Nhai mrokfom, ninn wayoptwanr.” ⁵³ Be inji kfafmotrr yimorn Jisasr yura bgre misn hiretrn yuht bgre miyetr fak kasuhakmorr. Yak kasuhhato yimar yak tundakmorr nndo rim htamorr. Rim htahato ganyom rmonthaye rir hmbremorr. Rir hmbrenihato hanymorr. Hanyhato wom tahi muhtn rihtamorr. Nd Jisasr htamo tahi muht be tu nfri mift htamorr. Tafi wom yima gu hta duha tahi muht htamorr. ⁵⁴ Jisasr muht rihtamohat Fraide rihtamorr. Nd Fraide yihar bi tu Judaroh rhu krna Sabat yihar bi rhu yibon hanymomr. Sarere yihar nd rhu krna yihar rhumoum.

⁵⁵ Nd Jisasr Galiliko htiyaknamo metm rpat Josefrpno yimomn hti hikmorr Jisasr rihtamo tahi muht. ⁵⁶ Hti hik tanyhato tfit turohko yihato Jisasrhu thatipt gbrornayuk welpam yi fak mska inji namom. Memom, “Ka yirahnom thatipthu gbrornaneft,” to nhai, rhu krna yiharn nhai yirmom.

24

Jisasr sinyamo yuhat
(Matyu 28.1-10; Mak 16.1-8; Jon 20.1-10)

¹ Sande yiha bi dbha ksfutn met knim Jisasrhu thatipthu gbrorna wunayukm sinyani yimom. Nd rom yak mska htatamo welpam yaknihato yimom. ² Yihato nd Jisasr rihtamo tahi muht frkihafmo tahis mtoghato mhti hambraknimomt. Nhai wom rhurmot. “Barenko, to fitot tahis? Frohm yak tuhefimt?” ³ Be mhti hambrohato fknenimom yiro tahi muhtn. Fknenihato asha tfit yima gu tfkhat rim hti hambriuwmt. ⁴ Be tuha mrokfo duhatm tohmoum. “Barenko, barenko, ndu yimare tamohr yaknirorr?” Be tuha inji yuhre kfo ptha haso hanymom asha hus yimaf ganyom hmbreshetf mtohmof. Hmbresham wafnhumohat memom nndo binasoht yak dbratwatm fnhutwot. ⁵ Be tfit fanhomom nd yimaf htihato. Nhai marimo kukatohwonomf. Yanho rifuhetmn nyingatikm nndo bbinysoftn

wafukatohmom. Nd mtohyuk yima husf kfo memofm, “Barenko, nikone mumiwuko? Tamohmpno tfit yamukako, ‘Yopko anianom?’” ⁶ Nd noheh yimar bi tfit sinyani yifir. Niko ka nhai duka hanykahko ror Galilit hingrnanehato kfomoa mrokfom. ⁷ Kfo hna memour, ‘Bro Najomr fasoh nefm nayet yimamn tat noh bonohakruhamr yura bgre misn mnohrahr. Nohhato hus marf rhunihato husfirpehrpno tfit sinyarahr.’ Nd mrokfom nhai wany hnarmokomm?”

⁸ Be inji kfomotfm tfit dukakmomm Jisasr pthayuk mrokfom. ⁹ Be tfit yimom. Yihato nd Jisasr hik habrimoa 11-pela yimam yo wom met yindarim kfo nuhas hanyomm. ¹⁰ Makdala efkot Mariat, Joanat, Jemsrhu mmem Mariat yo wom wom metm rompno tohyukm, romn yi hti tanyhato kfo nuhas bonuhasmomm nd Jisasrhu disaiperm. ¹¹ Nd Jisasrhu disaiperm met kmim inji kfo nuhasmohat nhai wany yakioromm. Memom, “Ka be kfo ddiwum.” ¹² Pitar sinyahato memor “Na tukann afo yi hti tungunaruha.” Inji kfo tanyhato toniyefrpar fakmor. Yimorn tahi muht mtohmorn yewirnahato rihtimor yima gurr htamo tkitt. Nhai wom tamohm rihtimor. Sfnoh, rmontharpam rim htimor. Inji htimohat tuha mfhat hifa mmbrahato mrokfo ptha duha kekutni tfit yimor. Yihota yuhat be duka hany memour, “Ndu yimare sinyani mifr o yimam yekmr nndo htemr?” Boknabok dukefm fakmoumr.

*Hus yimaf htimofr Jisasr Emeusko yiyet yihota yuhatn
(Mak 16.12-13)*

¹³ Nd yiha Jisasrhu hus disaiperm Jerusalemt sinya tanyhato memof, “Emeusko anyo.” Jerusalemti nd kmi Emeus 11-pela kilomita yaukfot. ¹⁴ Nd hus yimaf yihotat yau hanyhato nd Jerusalemtipno rhumo nefmn ndm tuf naptha srh hanyomf yau hanyhato. ¹⁵ Inji naptha hanyomf Jisasr ror yimorn rpat mnathu kmbrenihato rpat fau hanyomom. ¹⁶ Rof nd hus yimaf nhai hti nhtahato marimorf, “Arr Jisasr.” Rof memouf, “Ka wom yima furar kaunho hnewurno.”

¹⁷ Yau hanyhato buharn ttiwon memorf, “Nifne tamohmn naptha han-itafn?” Inji ttiwonmotrf rof tfit mtohhato yima yuhum nhai marnyarmomf. ¹⁸ Nd yau hanyomo yimafhu yufam womr Kliopasr. Rorn kfo memor, “Jerusalemr kmi kmiroh yimam nia tohwom. Ka ninrpa mifn nhai wanykahnm nda Jerusalemt yorhwa nefm?” ¹⁹ Inji kfomotr tfit Jisasr ttiwonmorf, “Tamoh nefm Jerusalemt yorhwam?”

Kfo memofr, “Nasaret thof Jisasrpnno rhumo nefm kfiwuno. Nd yimar profetr tohmor. Nd yimar Bro Nkifrar yo yima mifm rorhu hingrnefm yo mrokfom htimomr be tu yafothet hingrneft hingrnamour. ²⁰ Tunmoh prismi tunmoh bro yimamn Romroh tirmn htahato bgre misn hegimotmr nohmor. ²¹ Nmoh dukefm duka memounom, nd yima Jisasrn Bro Nkifrar tkrurafmor Isrerroh minrfa htiyakneft.

To wom mrokfot wawanyns. Nd yimar wasni rhuro yiham bi asor href korhwonomr husfirpehyuk yihar. ²² Nompno tohyuk wom metmn dbha yopko mhti tanyhato nia pthitm nom be sinya fohtasnom. ²³ Rom yihat nhai htirfomr Jisasrhu thatipt. Tfit kmifako niahato mkfo famum, ‘Mounmotrpam htitawonom.’ Romn kfo nuhas famumnom, ‘Jisasr bi sinyani yifir.’ ²⁴ Nompno tohyuk womm nhaf nd met kmim kfuyuk mrokfom wany sanyhato rom tunn yihato famum turoh nyingaye, ‘Amhti yimbu tanyom.’ Yihato rom nhaf sfnoh tkitt mhtitawom.”

²⁵ Nd hus yimafhu mrokfom kfo ptha buganimotfm Jisahr kfo memorf, “Nifne ka nhai yima yuhu duhatefn yon mumenm kanjo mumiwuko? Bingot profetm pthayuk mrokfom ayakitohkomm, nhai ndhtet bok dukefm yakrfotko. Href inji htitawohat to be nikmoh dukefm yirfom nd profetm pthayuk mrokfomn. ²⁶ Bro Nkifrar kfo memor, ‘Nd yimarn nieruharn nda bbinysofthu yimam minrfa htihakrahm.’ Nd mrokfot Bro Nkifrar kfoyokt ka nhai wanyrmokomt? Nd yimar niahato yimaroh minrfa htihakneft afo yahrt tohhato kku yaknihato ee tfit kto nd yahrt tohyuk yimar Bro Nkifrar pno bro yufat yakkfot.” ²⁷ Inji kfonihato tfit Krairpno rhuyuk nefm Mosesri profetme wom womm bi kfo mom, ndm rom mkfo htifasakhato kfo hik bohik nuhas morf.

²⁸ Be inji nakfo ptha hany be rof yimo kmit mfnahmom. Ror Jisahr memor, “Yau fnahruha.” ²⁹ Tfit ndwom yimafn memorf, “Marr bi yohnit, asha nonpno wahwe.” Be inji kfo motf be rofpno rhumor. ³⁰ Nuwa yenyefpno tebort mrhumomn bretpat yakhato Bro Nkifrar wukfo brutnanihato yaktifmorn hemorf. ³¹ Inji namotr ee ndnatn hti dukamofr: To be rpa htit nhai tfit wom htirmofr. Yudbat be tuha miftrnehnimor. ³² Hti hambrafhato tfit tuf nna ptha memof, “Barenko, Bro Nkifrarhu mrokfot ptha nuhas hanyetrn yima yuhum sinyem.”

³³ Be inji nakfo ptha hasohato tfit yudbat sinyanihato Jerusalemko tfit yimof. Tfit yihato Jerusalemr Jisahrhu 11-pela disaiperm mhtiyaknimofm wommpno rhu hasomom. ³⁴ Romn kfak memorf, “Barefn, Bror sinya mifmor. Saimonr bi hti mifmor.” ³⁵ Tfit rof sinyahato tawo rof htiyuk nefm kfo srh nuhas bonuhasmofm. Kfo memorf, “Ror pthanihat nhai merfono, ‘Arr Jisaser.’ Nhai. Bretpat yaktifhato hanyefpno ndnat hti dukenonr.”

Jisahrhu disaiperm htimomr
(Matyu 28.16-20; Mak 16.14-18; Jon 20.19-23)

³⁶ Disaiperm inji napha hasetm Jisahr yihato mfnahmorm. Mfnahhato kfo memorm, “Yima yuhum ami-rhumko.” ³⁷ Rom Jisahr htihato memom, “Ka nthoner.” Memom, “Amyakrmiyakninom.” ³⁸ Kfo memorm, “Ayakrmiwahko. Nikmoh yima yuhum tamohmpno boknabok dukefm yekwako?” ³⁹ Naya. Wahti-komm nanhu tir wuram. Nanhu thatipt wahti kothakomt. Nthonm nhai nann kanjo tha tpitiketm rhukahm.” ⁴⁰ Inji kfonihato tir wuram fak nuhasmorm. ⁴¹ Rom inji htihato yindhorwom. Tfit wom yima yuhumn duka memom, “Nom mirahnom ka Jisas mifr sinyer. Rorhu yafothatn nia mkfo nhehrahtnom.” Tfit ttiwomorm, “Niko tom wom yeshrim?” ⁴² Tandhiyet yiraparpat rhumott ndt yakhato hemomr. ⁴³ Ror nd yirapat yakhato rroh nyingahato famort.

⁴⁴ Yenyihato kfo memorm, “Na nikompno toh hnamohat bi kfo memoyanko, ‘Bingot Mosesrhu boririfhut yo profetroh mrokfomn yo windohmn hta hnamom nhai be hta fura hnamomm. Nd mrokfom fipetm rhukfot.’” ⁴⁵ Rroh yima yuhum fak wutha inji namom memor, “Yak wuthakahtanm rfa borngt rhuyuk mrokfom dukarahm.” ⁴⁶ Kfo memorm, “Bro Nkifrarhu rfa borngt kfo kangt, ‘Yimaroh minrfa htihaknyuk yimar, Bro Nkifrar kfo ktrurafyuk; afo bro yahrt tohhato nohkfot. Nohhato tfit hus marf tohnihato husfirpehyukrpo sinyakfot. ⁴⁷ Kto ndar bbinysofthu yimaroh mrokforoh kfo nuhas htifasneft rorhu yufatpno kfo nuhas htifashato yimaroh fasoh nefm mong trohkfot. Inji narahm Bro Nkifrar yak thurahrn

ndar bbinysof thofroh fasoh nefm. Nd hingrneft tuha Jerusalemtn rihingrnakhato hingrna hanykfot.’ ⁴⁸ Niko ndar Jerusalemtn rhuro nefm kfo ptha srh htfaskfot kmi kmim. ⁴⁹ Wanukko, Bro Nkifrar kfomor turhu Yafothathu niko hanyeft. Ndnnetn bi brbohwa nd Bro Nkifrarhu Yafothathu niko hanyeft. Tuha Jerusalemtn nd Yafothat rhu garikfot.”

Bro Nkifrar Jisasr wayakhato yura kmi hefenr muhmo yuhat (Mak 16.19-20; Aposer 1.9-12)

⁵⁰ Jisasr turhu disaiperm yaknihato rpat yimomn Betanitn tirm hamuhato Bro Nkifrar kfo memorr, “O Bro Nkifraye, ndar disaiperm wayak marnya bomarnyatwanm.” ⁵¹ Inji kfo ptha hanymor be wafakmorn yura hefenr muhmor. ⁵² Kfo tato tanyhato be yindhorefrparpno tfit Jerusalemko yimom. ⁵³ Yihato Bro Nkifrarhu temperr ruhato yiha yiha kfo yindhormour.

Jonr dwanfamo gutnius mrokfot Barkof kfo nuhas mrokfom

Nda Jonr wandfayuk Gutnius mrokfom, Jonr kfo memor, “Jisasr Bro Nkifrarhu toh nkifraniyuk Mrokfoyer, nd Mrokfor tfit yima yonr kanjo yak dborhanehato yimanompno nia mitohmor.” Nda Gutnius mrokfot htayuk yima Jonr duka memor, “Yimam nda gutnius mrokfomn Jisasrhu tndh mrokfom hti duka tungunaruhamn, Jisasr hti mirahm tu Bro Nkifrar kfo htamo Yoner. Bro Nkifrar rorn kfomor yimaroh minrfa htanyakft. Nd dukefrpar yimam yakitohruhamn toh nkifrarahm.” Jonr nd dukefetrn rorhu gonborngt wandfamort (kfo nuhas mrokfot htikfot 20.31).

Barkof mrokfom Jonr htaknimom, kfo memornom, “Bingot Mrokfor Bro Nkifrararno afo wutohmour.” Ndt kfonimortn tfit Jisasr hingnamoa mirakerroh mrokfom kfo nuhasmornom. Jonr duka memor, “Nd Jisasr hingrayuk mirakerroh mrokfom yimam tndh nuhasrhotanm rom htiruhamn rroh yima yuhum duka mirahm, ‘Jisasr tor tu Bro Nkifrar kfo htamo Yonr nmoh minrfa htanyakuk.’” Yo nd mirakerroh mna yuham ndm Jonr kfo hik nuhas bugamornom. Jisasr mirakerm inji hingnamotr womm Jisasrn rroh yima yuhum htahato hikwomr, womm nhai.

Sapta 13-17 Jonr kfo tndhmr wuroh yifungr Jisasr turhu disaipermno wuroh mrokfom hi hasetrn yahr kmim yaknihato kot htanihato bgre mis htamo yuhat. Tu wuroh mrokfomne Jisasr sinyanihato disaiperm htimo yuhathu mrokfom htamor.

Nda Jonr wandfayuk gonborngt, htirahn bok tkitm Jonr Kristenroh tohyuk toheft tfit yimam yihof href toh hasiwa toheftpno rim kfo nhom-brakmourm. Ndnnett htirahn buparoh mrokfot, bretparoh mrokfom, nukethu mrokfot, wain tofthu mrokfot, sifsifroh tohukatohrhu mrokfot, nd ndm yakhato kfo nhombramourm Kristenroh tohyuk tohefn.

Mrokfor yimar kanjo niahato yimampno mitohmo yuhat

(Sapta 1)

Mrokfor yimar kanjo niamo yuhat

¹ Mrokfor bingot bi rhu gungonmor. Mrokfor bi ruhetrn ee kto nda mounti bbinysot trhamof. Mrokfor bi Bro Nkifrararno rhumorn, to nd Mrokfor Bro Nkifrar kanjo rhumor. ² Bingot Mrokfor to bi Bro Nkifrararno rirhungotakmor. ³ Mrokfor kfomor, nd tamoh tamohr Bro Nkifrar hingnamorr. Mrokfor akfo duha yir, nhai wom tamohr Bro Nkifrar hingnarmorr. Nhai. Mrokfor bi ruhetrn nd Mrokfor kfomor tamoh tamohr Bro Nkifrar hingnamorr. ⁴ Mrokfor yimaroh ruhefr tohefr kakitohworr. Yakitohhato nukeftpno yimaroh wiyauyau nmbuhat kak hta bohtewurm. ⁵ Nd nukeft yifung tahasiwut, to nhai tfit yifungpamn yakaknihato nd nukeft yifungpamn yak tasifkfot.

⁶ To tor wom yimar niamor, rorhu yufat Jonr. Bro Nkifrar kfomotr niamor. ⁷ Ror be nukeft hatohyuk yimarhu mrokfothu kfo nuhasneft niamor. Niahato tuhan yindarim kfo nuhasmotrm be nd mrokfot yakhato

hikmomt. ⁸ To mirahko ka Jonrn nd nukeft hatohyuk yimayer. Nhai. Jonr to be nd nukeft hatohyuk yimarhu mrokfothu kfo ptha nuhasneftn niamor. ⁹ Tu yima bugaroh hayuk nukef mift hatohyuk yimar bi niamor ndar bbinysoft.

¹⁰ Nd yimar to bi ndar bbinysoft tohmor. Bingot ror kфомotr ndar bbinysoft mount trhamof. To nda bbinysoft tohwa met yindarim nhai hti nhtarmomr. ¹¹ Turhu kantri mikfo yimor. To nd turhu kantriko tohwa kmi Judam nhai kfakrmomr. ¹² Wom womrpamn hti nhtahato kfakmorm. Kfakhato rroh yima yuhum rorn htamom. Ndnettn romn yakhato htamorm Bro Nkifrarhu yonm. ¹³ Nhai be yifamaroh kkupam yak nhombrewa yuhatn Bro Nkifrar nd yuhatn yifemrmorm. Nhai. Rroh yima yuhum Kraistrn htamomm. Bro Nkifrar ndt htihato to be rorn yifemmorm.

¹⁴ Nd Mrokfor tfit yima yonr kanjo yak dborhanehato nia mitohmor nmoh buha. Bi htimonomr rorhu bro yufati rorhu bbukeft. Nd Yonrpar Bro Yifemrhu yoner. Bro Nkifrarhu tu yuhuwafeti yafothet nef mift tu bro mifwotr. ¹⁵ Jonr rorhu nia mrokfot kfo pthahato kfo nakuyaf memor, “To nda yimarn na kfo hna memoya, ‘Tor nanhu mongko nierahr wom yimar, ror bi Bro Nkifrapno rpat ritohngotakmor. Ndnettn rorn buriwura.’”

¹⁶ Nd yimar, yima yuhuwafetn tu bromotr. Nd rorhu yima yuhuwafetn, yima yimanom yihof href kak marnya hasiwurnom. ¹⁷ Rot boririfhut Bro Nkifrar hemornom Mosesrhu tirtn. To tfit Jisra Kraistrpno, htitnom Bro Nkifrarhu tu yuhuwafeti tu yafothet nef mift. ¹⁸ Nhai nom nda bbinysofthu yimanom Bro Nkifrar bi hti nkrirmonomr, be tu nhai mif. Nd tu Bro Nkifrarhu Yonr, ror tu Bro Nkifrar, tu Yifemrpno toh tany niern, rorpno Bro Nkifrarhu ruheft htimonomt.

*Jon Baftaisr pthamo mrokfom
(Matyu 3.1-12; Mak 1.7-8; Luk 3.15-17)*

¹⁹ Judaroh bro yima boyimat kfo tkrurafmomm prismi yo Lifaim. Taun Jerusalem htanyhato yimomn Jonr kfo ttiwon memomr, “Nine frohe?” ²⁰ Be Jonr nhai marimor finji kforuhar. Toh bugamotm kfohe memomr, “Na mirahko na ka nd rom kfiwa Kraisa.”* ²¹ Tfit ttiwon hasuknakni memomr, “To nine frohe? Ka Irajaye?” Tfit Jonr kfo memomr, “Nhai.” “E, frohe, ka nd Mosesr kfomo profetr nom gari hasiwar, ka nd profete?” Tfit ror kfo memor, “Nhai.” ²² Tfit wompam kfo memomr, “Ni to frohe? Nom kangnom ni wakfo nuhas marnyafkahtnnom, nom awany marnya tanykahnomn, ee bt yiruhanomn, nom kfo tkrurafyuk bro yimam kfo marnya bomarnyarahnomn.” ²³ Inji kфомotm profet Aisaia kromo mrokfot yakhato kfo ptha hik memomr, “Na nd nungur tik furat kfo nakuta yimaya: ‘Bro Nungothetru niayuk yihotat bi wayak marnya bomarnya hasohekomr.’”

²⁴ Farisimn nd yimam kfo tkrurmotmm niamomn, ²⁵ Jonr kfo ttiwon memomr, “To ni Kraistrn rhu duha yi shoft, o Irajian rhu duha yi shoft, o nd profetr rhu duha yi shoft, to tamohmpno yimam baftaiswanm?” ²⁶ Jonr tfit rroh mrokfot kfo wok memomr, “Na be bupa fura baftaisim-wanm yimam, to tor wom yimar tor nikompno tohwor. Niko nhai tawisaf-kahkomr. ²⁷ Nd yimar nanhu mongko niewur. Na, na be yima furaya rorhu senderfhu ki

* **1:20:** Nd Kraistrn yufat, Grik mrokfothu yimbu yuhat inji kfiwut, “Bro Nkifrar yak htamo yima nra hbhakyuk yimar.”

jbkafyuk mtinf kak nyusakahukanr.”† 28 Jonr nd mrokfot pthamohat tek Joden mkukor yorhwa kmi Betanit nd mrokfot pthamort. Nd tkittn Jonr yimam baftaisimmourm.

Jisasn Bro Nkifrarhu sifsif yoner

29 Tfit hwe fnah ndwom marrn Jonr htihakmorr Jisasn. Htiyakhato kfo memor, “Wahtiko. Ndr Bro Nkifrarhu sifsif yoner. Rorn bbinysoft tohwa tuhan yindari bugaroh fasoh fasoh nefm yak thuhirahrm. 30 To nda yimarn na kfo hna memoya, ‘Tor nanhu mongko nierahr wom yimar, ror bi Bro Nkifrarpno rpat ritohngotakmor. Ndnnett norn buriwura.’ 31 Na nhai tawisafmoyanr. Na tamohr kfo marimora, tor nd yimarn Kraiser? Nhai. Na, na be yimaroh tekthu baftaisimhato Isrerpmpno nd yimarhu myak nriyafyuka. Nd nayukann niamoya.”

32 Tfit Jonr kfo ptha memor, “Na nd yimarhu baftaisimneftpno htimoyant Bro Nkifrarhu Yafothat yura hefenr wutoh tanyhato ganyom mmkrs kanjo yak nhombranehato fawihnamot. Be nd ganyom mmkrs yawihnehato be yimarn mifakmort. 33 Na to tamohr kfo marimora, tor nd yimarn Kraiser? Nhai. Na tuhan yindariroh baftaisim-neftku kfo tkrurafyuk yimarn bi kfo memora, ‘Yimam baftaisim hanyhato wahti hanyswa fitoh yimar htitn Bro Nkifrarhu Yafothat yawihnehato mithu nawohwot; tor nd yimarn Bro Nkifrarhu Yafothaye tfit baftaisimrahm tuhan yindarim.’ 34 Na tukianhu nyingaye htimoyanrn kfiwanko, nd yimar tu Bro Nkifrarhu Yoner.”

Jisasnru barkof husfirpa disaipern

35 Hwe nfha ndwom marrn Jonr tfit turhu uhik ahik htfasyuk hus yimafpno tek Jodent toh hasomom. 36 Jonr htihak hanyomorr Jisasn fau hanyomotr; nd turhu uhik ahik htfasyuk yimaf kfo memorf, “Htifnr. Bro Nkifrarhu sifsif yoner.” 37 Be nd yima husf inji wanyhato be Jisasn mfau hikakni twanhomof. 38 Jisasn kekutakhato htimorf yau hik hanyomotr; kfo ttiwon memorf, “Nifne tamohmn hambro hnewafn?” Tfit rof ttiwon memorf, “Rabai, ni fitoh kunys tohwa?” Nd Rabai mrokfothu yimbu yuhat inji kfiwut, Tisa. 39 Be Jisasn kfo memorf, “Wania. Wahtifn.” Marr bi 4 kilok tohmo. Be rof yimofn nd ror tohmoa kunys htihato nd krifr be rorhu kunysn rhu krif bugamofr.

40 Nd Jisasn yau hikaknimo yima husf, to Andrur tor womr. Andrur, Saimon Pitarhu najomr. 41 Andrur Jisasn htanyhato barkofpam afo turhu najom Saimonr yau hambra-khato kfo memorr, “Nd profetm kfomoa yima Mesaiar bi htitawo-nomr.” Nd Mesaia yufathu yimbu yuhat, Bro Nkifrar yak htiwa yima nrfa hbhakyuk yima Kraiser. 42 Be turhu najom Saimonr mkfakhato Jisasnro hanyomorr. Jisasn htihakhato kfo memor, “Ni Jonrhu yinem Saimone. Kto yimam yutarahmn Sifas.” Grik yarmumatn nd Sifas yufat kutewumt Pita. To tfit nd Sifas yufat yo Pita yufat, nd yufafhu yimbu yuhat, tahis.

Jisasn Filif, Natanier yima husfnakuyakmo yuhat

43 Tfit ndwom marrn Jisasn memor Galiliko aiya, Filifir yihom htimorr. Yihom htihato kfo memorr, “Wania, wahikna.” 44 Filifir taun Betsaida thofr. Nd kmi Betsaidat Andru Pitarof tohmoa kmiyet. 45 Tfit Filifir yau hanyhato

† 1:27: Wom yimar hatohyuk senderroh ki jbkafyuk mtinf yak nyusak thumohat, tu yufapa duha yima furapamn womr hatohyuk senderm kak thumoumm.

Natanier mhtimorr. Mhtihato kfo memorr; “Bare, nom wanymoa tndh kfothu yimar, nd Mosesrhu boririfhu gonborngm kfo tndhmoar, yo nd profetroh gonborngm kfo tndhmoa yimar, tor bi htimonomr. Nd yimar, Nasaret thof Jisasr, Josef rhu yinemr.”⁴⁶ Tfit Natanier sinyahato kfo ttiwon memorr; “Nasaret to tefi kmiyenet. To nhai ndhtet tefi kmiyentn ndhtet bro yufet yimar mfnahkfot.” Tfit wom Filifr kfo memorr; “To tu waniekahn afo wahitwa.”

⁴⁷ Jisasr Natanier htiyak hanyhato kfo memorr; “Asor tu Isrer thofen mifr. Ror nhai wom kfo nhehefen nmbuham rhukahmr.”⁴⁸ Natanier inji wanyhato tfit Jisasr kfo ttiwon memorr; “Nane fitoh yiha htihato inji kfiwa?” Tfit Jisasr kfo memorr; “Ni afo tafi Filifr mnakuyak duha, na bi hitawoyann fik tihathu tpitn rhu hasetn.”⁴⁹ Natanier nd mrokfot wanyhato kfo memorr; “Tisa, ni Bro Nkifrarhu Yone, Isrerroh Kinge.”⁵⁰ Jisasr kfo memorr; “Kfo yamukann ndu fik tihathu tpit rhu hasetn bi hitawoyann. Ka ni ndt wanyhato ninhu dukefr sinyahato famuna, ni Bro Nkifrarhu Yone. Kfiwann, ndt rot be inji hitiwont. Kto bro bro nefm yak nuhasrhotann htirahnm.”⁵¹ Tfit wom kfo Jisasr kfo memorr; “Na kfo mifwanko, kto htirahkomt mount frtnehato rim rhu mrhuruhatt mounmotm mano hefenko muh tfit Bro Najomanpno nia, yo tfit hefenko muh, tfit Bro Najomanpno nia inji naruhattm htirahkomm.”

Jisasrhu bro yufati mirakerkfot rihingrnakmo yuhathu mrokfot

2

(Sapta 2–4)

Taun Kanat wom yimar tuhan yakomo yuhat

¹ Filif Natanierrof Jisasr yakmohat tfit wom hus marf rhunihato ee Galili profinsko yorhwa taun Kanatn wom yimar tuhan fakmor. Nd yima sawohf nayak tatrutmo yihart Jisasrhu mmemt rot yihato rhunhomotm.² Yo Jisasri rorhu disaiperm rom to inji buga nakumotmm yimomt nd yima sawohf nayak tatruthato htamo yemro burwat.³ Nd yima sawohf nayakyuk yiha yayuk wain bus yihany yi hanymotm be fe bugamomm. Jisasrhu mmemt inji hti tanyhato Jisasrpn yimotn mkfo memotr; “Nd yima sawohfhu nayakyuk yiha yayuk wainkfot bi yihna yi hnaromm, be bi fe bugaromm.”⁴ Inji mkfomottr tfit Jisasr kfo wok memotr; “Mamai, to nanpno mkfiwann to na finji narhoya? Na nhai bi arihatn na tamoh nefm bi finji narhota. Nanhu mirakerroh hingrna yihar tor afo riyorhor.”⁵ Be wom mmemt inji kfomottr, yimotn hingrna yimam kfo ptha memotm; “Ror finji kfiwurko, to be ror kfo pthayuk tng yuhatn hikkfot.”

⁶ Nd kunys rhumoum 6-pela bro bu rohm. Nd bro bu rohm 100 lita bupam tas hmbremoumm. Nd bu rohroh bupam tu Judam nkifra yuk truf o tir kifsa inji nayukmn kakitohmoumm.⁷ Nd bu rohm brioh bupa duhatmn Jisasr kfo memorr; “Bupam watas hmbrekomm.” Be nd bu rohm tas furkih hany bugamomm.⁸ Be tas hmbreni bugamotmm Jisasr kfo memorr; “Nd asomif tas hmbrehani bupam wahanyekomr nd burwat mtohekwa yimar.” Be inji kfomottr wompam hanyhemomr.⁹ Nd bupa mifm bi wain bupam kecutmom. Nd bupam hanyhemotmr nd burwat tohakyuk yimar fesiwonmorm. Ror be yesiwonhato nhai tawisafmorm

nd wain bupam niayuk yuhat. Nd bupam yakyuk hingrna yimarpam tawisafmom nd bupam niayuk yuhat. Nd burwat toh yukatohyuk yimar tfit nakuyakmorr nd tuhan yakyuk yimar. ¹⁰ Nakuyakhato kfo memorr, “Bare, dodh yima bugam inji newum, nd tu marukfet dborioh wain bupam hihany hi hanyinitamm, bi fe furkihme ee tfit wom wain bupa furam yakhato kahukmm. To ni nhai inji nakahn. Nhai. Ninhu tu marukfet dborioh wain bupam afo yak htatamonmn tfit asomif fak htenm.”

¹¹ Tot barkof mirakerkfof Jisasr rihingrna gngonakmot. Galili profinsko yorhwa taun Kanat tohhato nd miraker-kfof hingrnamort. Nd mirakerkfof hingrnamot, ror yakitohwa yufati bbukefthu yak nuhasyuk neft fak nuhasmor. Nd nefmn disaiperm htihato to be rroh dukefm Jisasrn htamom.

¹² Be Jisasri turhu mmemt, yo nmemrom, ee turhu disaiperm nd taun Kanat htanyhato tfit Kaperneamko yohnehato ndha tohmom wom yiham.

Bro Nkifrarhu temperr maket htamoa yimam Jisasr yak thumo yuhat (Matyu 21.12-13; Mak 11.15-17; Luk 19.45-46)

¹³ Judaroh wom bro yihar kutewumr Pasofa Burwat bi brboh hnamot.* Nd yihar bi brboh hanyetrn ndnetn Jisasr yimor Jerusalemkor.

¹⁴ Jerusalem yimorn Bro Nkifrarhu temperr gna habrimo gnathu yifhatikt rim fnahnimor. Rim fnahnihato rim htimorm yimam tarioh mthayuk bulmakaum, sifsifm, ganyom mmkrm maketim hasomomm. Tfit manoko maruha yak tuknayukm rhuhatu maruham nayak tukna-moum.†

¹⁵ Ndhtet ndhtet hingrnefm hingrnamoatm Jisasr rim htihato wom mtitof nmbuham yakmorn wift kanjo hingrnahato nd wiftpon yimam hik nembos tubatumorm. Nd rom maketim haso hanyuk bulmakau sifsifm, rpat fak tubatumorm. Yimam maruha yak tukna hasoyukm, ndm nhaf maruham frbrur bobrur fnahhato teborm yakhato fak kekut fnahmorm. ¹⁶ Be nd nungam maketmoa yimam kfo hutt memorm, “Be na kfiwa asomif nungam tamohm wayakni hany wafnahniko! Ndarte ka nikmoh ndhtet ndhtet hingrnefroh hingrnayuk kunyet? Nhai nanhu Yifemrhu kunys rhukaht? Tamohmpno ndar temperr tfit maket swirt nhombriwat?” ¹⁷ Ror namo neft turhu disaiperm htihato tfit dukamomt Bro Nkifrarhu rfa borngtm Defitr kfomo mrokfot. Nd mrokfot inji kfo memot, “Nanhu bro yima yuhur ninhu temperrn bro dukefr korhwor.

Ndnetann kanga nd temperr be inji arhu marnya hasor.” *Sng 69.9*

¹⁸ Judaroh bro yimam nd Jisasr namo nmbuhat htihato kfo ttiwon memorm, “Bare, frohm kfo memomn ndhtet neft wanatwa? To bt asomif wom mirakerkfof wahingrnakahtnt ndt htihato nom kfo mirahnom, ‘Awi, nd yimar Bro Nkifrar kfo ktrurafmorr. Tempert maket htayuk yimam ror nia yak thuneft, nhai mrokfom.’” ¹⁹ Inji kfomotm tfit Jisasr kfo wok memorm, “Nda tempert wayak tasohkomt. Watasohkahtkomt tfit nann husfirpa yiharpa kasinyaruhant.” ²⁰ Be nd yimam Jisasrhu kfomo mrokfot wanyhato kfo memom, “Bar yimako, nda temperr hingrnamohat 46 gunyjm bugam hingrnamomt. Tfit ka ninn be husfirpa yiharpa bmbri kasinyahato hingrnarahnt?”

* **2:13:** Nd Pasofa yihar Judam bro burwat htahato tfit dukamoumt rroh nkifram ljiht tohetmn Bro Nkifrar nrfa htanyakmohat. † **2:14:** Romroh gafman maruham yak tuknakhato tfit tu Judaroh maruham yakhato temperrhu takis nd tu Judaroh maruhaye wiknamoum.

²¹ To nd ror kfomo tempert nhai tu temper mift kformor. Turhu thatipt kfomor. ²² Ndnetn kto Jisadr nohhato husfirpa yiham yopt rhuhato tfit sinyamohat, disaiperm tfit dukamomt ror kfoyuk mrokfot. Nd mrokfot dukahato memom, “Bro Nkifrarhu rfa borngt rhuyuk mrokfom yo ror kfoyuk mrokfom fipet mrokfoyem.”

Jisadr htitworm yimam niwa nefm yo rom dukewa dukefm

²³ Jisadr afo nd Pasofa burwa yihar Jerusalemr tohhato bok mirakerkfot hingrnamoam bok met yindarim htimoumm. Htihato ndnetmn rroh dukefm rorn hتاموم. ²⁴⁻²⁵ To Jisadr yimaroh yima yuhu mifm bi htitworm. Nhai wom yimar tfit rorpono yihato kfo nuhaskfot. Ndnetn inji htimohat, duka memor, “Rroh yima yuhum nann be inji hta tefinitammn tfit kto mong trohrahma.”

3

Jisadr Nikodemusrpno pthamo yuhat

¹ Wom yimar, rorhu yufat Nikodemusr, nd yimar Farisiroh hingrneft yakitoh yo Judaroh bro yimar toh inji namour. ² Nd yimar turpathato Jisadrpno yifung yimorn mkfo memorr, “Tisaye, nom wom Judanom htitwonomni ni Bro Nkifrar kfo tkrurafoyuk tisaye. Bro Nkifrarhu Yafothat mthu nawoh duha yimar nhai ndar ni hingrnewa kanjohot mirakerkfot hingrnakfot.”

³ Ror inji kfomotr tfit Jisadr kfo memorr, “Na kfo mifwann, yimar nhai miyak dborharfor nfri yonm kanjo, nd yimar nhai htiruhatr Bro Nkifrarhu kingdomkfot.” ⁴ Tfit Nikodemusr ttiwonmorr Jisadr, “To yimar bi tabou hanyetr, to finji tfit mmemt fkniruhatr mmemt wompam hiyauruhatr?”

⁵ Inji kfomotr Jisadr tfit kfo memorr, “Na kfo mifwann, yimar nhai bupami Bro Nkifrarhu Yafothat yak kekuthato nfri yimar frdborharfor nd yimar nhai fkniruhatr Bro Nkifrarhu kingdomkfot. ⁶ Yima sawohfn kasinyewar, yima mif their kak nhombrewur. To tfit Bro Nkifrarhu Yafothatn htewutr yafothar. ⁷ Mirahn bok dukefm ayaka nd na kfo yamukohat, ‘Nfri yonm kanjo miyak dborhakfot.’ ⁸ Wifort wifor thombat, rot be tuthu yiyeft kitt. Ni be mirefrpat wanukantn, nhai htikahnt rot sinya tanywa tkitt yo rot yita tkitt. Bro Nkifrarhu Yafothat yimam yak kekuthato nfri yimam frdborha thombat, to inji htirahnm. Nhai htiruhatnt Yafothathu hingrna yuhat.”

⁹ Tfit Nikodemusr ttiwonmorr Jisadr, “To nd Yafothathu hingrnanefit finji kanjo rhuruhat?” ¹⁰ Tfit Jisadr kfo memorr, “Bare, ni to Isreroth tisaye. Tamohmpno ni tawisaf duha yita? ¹¹ Na kfo mifwann, nom kfo pthiwohat, nom bi tunom tawisafhato, yo nom tunmoh nyingaye hti hik bohiket nefmn nom kfo ptha nuhas-wonomko. Nhai be kfo furakahnom. To niko, nom kfo pthiwa mrokfot yekwakomt mongko htewukomt. ¹² Nda bbinysofthu wuskam, na kfiwanko, nhai wany yakiohahkma. To na tfit yura hefenkorhof wuskam wukfo ptha thombat, to niko finji kanjo wany yakioruhakma? ¹³ Nhai nda bbinysofthu yimar yura hefen muhrmor. Nhai. Bro Najomrpar yura hefenr bi muhrmor. Tur yura hefenr wuhtanyhato fawihnamor. ¹⁴ Bingotn Mosesr nungur tik furatn snekbras tuhegirimo kanjo, Bro Najomr tuhegirrahmr. ¹⁵ Nd yuhatn, fitoh fitoh yimam rroh bro dukefm Bro Najomrn htemm, be inji toh nkifranirahm.”

16 Bro Nkifrar ndar bbinysof thofm be tu mfro marbit hta mifmorm. Ndnetrn nd rorhu rpa yon mifr tuhemorm. Memor, 'Inji anakahta, fitoh yimam rorn rroh dukefm htemm, be nhai nohruhاتم. Nhαι. Be inji tahi nrwim kanjo toh nkifranirahm.' 17 Bro Nkifrar nhai turhu Yonr ndar bbinysofthu met yindariroh nefroh kothu yakitoh hanyeftn kfo tkrurafmorr. Nhαι. Rroh nrfa hbhakneftn kfo tkrurafmorr. 18 Fitoh met yindarim rroh bro dukefm nd Yonrn hteuwumm, nhai mrokfo duhatem. To nd Bro Nkifrarhu rpa Yon mifrpārnhai rroh bro dukefm htakahmm, nd yimam bi mrokfetm korhm. 19 To nd rom kotkfot tohruha nmbuhat nhai be sfno. Nda bbinysofthu yak nukayuk kshr bi niamor. To nhai nd met yindarim htihato nd ksh nukefrn yarim tohkahm. Be nd turoh fasoh fasoh nefmpno yesiswamm nndo kspitat rim tohwom. 20 Met yindarim fasoh fasoh nefm niwam be tu hti nambur mifwomt nukeft. Nhαι wofnkahm nd rroh fasoh fasoh nefm nukeft yakhato tafont rhukfot. Ndnetmn nhai nukeftpno yarim tohkahm. 21 To yimam tu dborioh nefm niwam nukeftpno yarim tohwom. Nukeftpno yarim tohwatm, yimam htihato kfo kangm, 'Rom niwa nefm tu Bro Nkifrarhu dukef yuhat hikwom.'

Jon Baftaisr Jisasrhu toh yuhat kfo ptha hikmo yuhat

22 Nikodemusrpno nakfo ptha buganihato kto tfit Jisasri turhu disaiperm Jerusalemr htanyhato tfit tuha Judia profinsn toh htfasmom. Ndha toh htfashato ndharhof met yindarim baftaisimmorm. 23 Jonr nhaf kmi Ainonthu met yindarim baftaiskfot hemorm. Nd kmit brbo Salimtpno korht, ndombhart bok bu yinham ruhetmn bok met yindarim yihato baftaiskfot yi fakmoum. 24 Nd yihart Herotr tafi Jonr yakhato kalabus hta duhatrn hingrna htfasmor.

25 Jonrhu uhik ahik htfasyuk yimami wom Judar, turoh nkifra yuk truf yuhatpno rinahtakhato nnakfo huttmom. 26 Ndnatn wom Jonrhu uhik ahik htfasyuk yimam yimomn Jonr mkfo memomr, "Tisa, nd yimar ninpno rpāt Joden mkukor tohhato kfo memo, 'Nd yimar Bro Nkifrarhu Yoner,' to nd yimarn bi bok met yindarim baftais yahukatrm bi rorparpno yimam kitm." 27 Jonr nd mrokfot wanynihato kfo memor, "Yura hefenr wuyorhwa Bro Nkifrar rpa rpa hingrnefm kahukrm rpa rpa yimam. 28 Nikom bi tukmoh yimbhindange wanymokomt na nd kfo pthamo mrokfot. Memoyanko, 'Na htiruhakomn mirahko ka asor nd yimar met yindariroh minrfa hbhakuyuk yimar Bro Nkifrar kfo tkrurafmorr. Na nhai. Na be rorhu nyingako tohak hanyuk yimaya.' 29 Yimar turhu kfo nanf tuhant yakyukr, ror tor. Yinowemr ror be tohhato wanukr mett yindarirhu yufat yuta thombat. Mett bi yindarirhu yufat kutewutr yinowemr be bro yindhoreft kekwoṭr. Ndtntot nanhu tu bro yindhorr nmbuhat yorhwat.* 30 Na kanga rorhu yufatn abrot, nanhu yufat ayohnes.

31 Nd yimar ror yura hefenr wutoh tanyhato yawihnamoyer. Yawihnehato rorn yura buriwurm tamoh tamohm. Na, na be ndar bbinysof thofena, ndar bbinysofthu tamoh tamoh nefmn na pthiwa. 32 Ror, ror tu hefenr toh tanyetrn turhu nyingaye hti hik tanyuk nefm yo wany anyuk mrokfom, nd ndmn pthiwur. To nd ror kfo pthiwa mrokfom nhai bok yimam wuyakkahmm. Dfik yimenrpam wany yakiwomm. 33 Met yindarim nd

* 3:29: Jisasr mett yakruha yimar kanjo inji tohwor. Met yindarim Jisasr yakruha kfo nanf metem.

rorhu mrokfot wany yakiohato yak hikwam, nd yimam rroh dukefm kangm Bro Nkifrarhu mrokfot tu fipayett. ³⁴ Nd yimar Bro Nkifrar kfo tkrurafetrn ndnatn tu Bro Nkifrarhu mrokfo yuhamn ptha hikwor. Ror mrokfom inji ptha hik bohikwohat to tu Bro Nkifrarhu Yafothar thu dbothat bugayetrn inji ptha hik bohikworm. ³⁵ Nd yimar ror tu Bro Yifemrhu Yinemrn tu marbit htewurr. Ndnetrn tamoh tamohm rorhu tirtn hتامotrm rorn bi kakitohworm. ³⁶ Ndnetn fitoh yimam o metm Bro Nkifrarhu Yonrn rroh bro dukefm htemm, nd yimam be inji toh nkifranirahm. Nhαι inji narfom, be nhαι toh nkifraniruhatm. Bro Nkifrarhu namburpam romn yirahm.”

4

Jisasr Samaria efkottpno nakfo pthamo yuhat

¹ Farisim wanymomt Jisasr baftaisimmoa yimaroh thomnafat muhmot, Jonrhut yohnemot. Nd Jisasr baftaisimmoa yimam Jisasrn uhik ahik ht-fasmoamrn rorhu mrokfom wany yakitohmoumm. ² Nd Jisasrhu yimaroh baftaisimneft nhαι tu Jisasrn baftaisimrmoarm. Nhαι. Rorhu disaipermn baftaisimmoumm. ³ Jisasr tur hti nhtahato kfo memor, “Kmim bi nanrpaya bi hikwatm tom Farisim bi htihato kfo pthewum.” Be ndnatn nd Judia profins htanyhato tfit Galili profinsko yimor. ⁴ Judia profins toh tanyhato Galili profinsko yinyeft, Samaria profins yuhat yiyetet yihotat. Ndnetrn Samaria yuhat yimor.

⁵ Yimorn Samaria yorhwa taun Sikart mfnahmor. Nd taun Sikart korht brbo Jekofr yinem Josefr kfo nuhasmo tkit nmbuhatpno. ⁶ Bingot Jekofr toumo bujr nd tkitt rhumor. Jisasr myau minysafmorn nd bujrpno mrhumor. Marr bi dany marr kanjo toh hanymor.

⁷⁻⁸ Jisasrhu disaiperm ndha mhtanimomrn taunko yeshri wiknat yimom. Ror turpatr nd bujr rhu hasetrn Samaria efkott yimot bupa tasis. Jisasr nd mett htihato kfo memort, “Bupam wahina.” ⁹ Nd Samaria efkott inji wanyaf hanyhato kfo memotr, “Bare, ni finji kfiwa? Ni Judaye na Samaria efkota. To tamohmpno na nndo Samaria efkota kfo yamukona, ‘Bupam wahina?’ ” Judami Samariam nhαι rpat rhuhato yemsa inji narmonoam. Ndnetn inji kfomotr. ¹⁰ Inji kfomottr tfit Jisasr kfo memort, “Bro Nkifrar yahuka tamoh tamohm ni bi wahti hik bohiknm yo na bupa tndauwa yimaya bi wahti nhtana, to tfit ninn toh kekuthato womhtet bupam kfo tndaurfona. Inji tndaurfotna womhtet bupam herfoyann. Nd womhtet bupam yanyeft yimam toh nkifranitm.” ¹¹ Jisasr inji kfomotrt, tfit mett kfo memotr, “Bro yimaye, to ni bupa yakyuk baket duhate. Bujrhu bupam watohngotwom. To fitha yakhirhoyann nd ni kfiwa bupam?” ¹² Nmoh nkifra Jekofr ndar bujr tou htanihemornom. Bujr mfro yohnemotr bupa tashato rorhu yon tuhanm, sifsif bulmakaum, bupa tashemoahat be baketrpaya bupa tasakhemourm. Ndnetn nhαι wom fitoh yuhamn bupa tasruhatnom. Ka ni kangn, wom yuhatn bupam yakruha?” ¹³ Nd Samaria efkott inji kfomottr tfit Jisasr kfo memotr, “Fitoh met yindarim nda bujrhu bupam tas yewam, nyunguramm tfit knarahmm. ¹⁴ To fitoh yimar nd na heruha bupam fawor, be nhαι tfit wom nyunguram knaruhatr. Nd na hayuk bupam yiyafhato mirhuharam, nd bupam tfit yinha kanjo mfrfnah hasohato nd bupam yakitohruhatmt rorhu toh nmbuhat, be inji toh nkifranirahr.” ¹⁵ Jisasr inji kfomotr tfit rot kfo memotr, “Bro yimaye, nd ni kfi bupam wahina. Nd bupa yekahann, nhαι tfit nyunguram knakhato tfit bupa tasis nierhota.”

¹⁶ Inji kfo mot tfit Jisasr kfo memort, “Afo ninhu ramemr wamkfaknr.”
¹⁷ Tfit rot memotr, “Na nhai ram duhata.” Tfit Jisasr kfo memort, “Nd ni kfo yamukohat nhai ram duhate, ndt tu kfot kfiwun, ¹⁸ yimam bi yakhna yakhnamonmn bi tirfa yima rhuhnamo. Nd 6-yukr to bi tor womr. To mirahn ka ndr nanhu tu ramem mifer. Nhai. Ni kfi mrokfot tu kfot kfina.” ¹⁹ Jisasr inji kfo motrt kfo memotr, “Bro yimaye, bi wany nhtewann ni ka profete. ²⁰ Nom Samarianmoh nkifram Bro Nkifrar bro lotum yakitohmoahat nda kminysofr mrifinyhato lotu hakumoum. * Tfit arihatn niko Judako kangko, ‘Be Jerusalemrpar yihato walotuko.’”

²¹ Mett inji kfo mot tfit Jisasr kfo memort, “Bar mete, na kfiwa mrokfom wawany yakionm. Tor wom yihar riyorhwar. Nd yihar nhai ndar kminysofrn yuwa muhato Bro Yifemr loturuhatkomr o Jerusalemr yihato loturuhatkomr. ²² Niko Samariako Bro Nkifrar lotutwohat niko be nmbuha nmbuha mrokfom wanyhato lotutwoko. Nhai tawisaf marnyahato lotukahko. Nom tu Judanom Bro Nkifrar lotutwohat nhai be lotu furakahnomr. Nmoh nkifra tndh mrokfot kfo nuhas-wotnom Bro Nkifrar yimam nrfa htanyakuk yuhat. Nom nd tndh mrokfot bi nkiframn yo profetmn ptha hnamotmt nom wanyhato ndnetn nom Judanom tawisaf marnyahato Bro Nkifrar lotutwonomr. ²³ To kfiwanko, yihar niayukr to bi asor bi niaror. Yimam Bro Yifemr kangm alotunom, nhai tfit kminysofm o Jerusalemr dukahato loturuhatm. Nhai. Bro Nkifrarhu Yafothat thu nawohruhattm tu Bro Nkifrar dukewa dukef yuhatn kanjo loturahmr. Ndhtet yimam Bro Yifemr hifa hti yindhor-wor. ²⁴ Mounti bbinysot Bro Nkifrar thu yurhato kukatohwor. Ndnnetn yimam kangm Bro Nkifrar alotunom, turhu Yafothat thu nawohkahttm tur dukewa dukef yuhatn kanjo lotukfot.” ²⁵ Jisasr inji kfo motrt tfit nd Samaria efkott kfo memot, “Na tawisafwa, Bro Nkifrar kfo htamo yima nrfa hbhak-yuk yima Kraistr nierahr. Ror niere, rorn kfo nuhas bonuhas bugahrnom tamoh tamoh mrokfom.” ²⁶ Rot inji kfo mot tfit Jisasr kfo memort, “Na to nda. Na ndann kfo pthanuhiwann.”

²⁷ Rof inji nakfo ptha haso hanyomo fijo disaiperm mfnahmom. Be yihom hti fohtasmomr nd Samaria efkott pno nakfo ptha hasetfn. Rom inji yihom htimohat be gonng yagonngt toh natohmom. Nhai womr marimor, “Ttiwon miruhanr, Tamohmpno nd mettpno napthiwan? Yo tamoht kangn ayaka?” Nhai womr inji kfo ttiwonmorr. ²⁸ Be nd met bu baket wuskam wahtanyomotmn taunko tfit yimot. Yihato kmi thofm mkfo memotm, ²⁹ “Bar yimako, waniakah-komm wahtikomr wom yimar. Na nahnayuk tamoh tamoh nefm kfo hik bohik bugerm. Ka tor nd yima Kraistr Bro Nkifrar kformor.” ³⁰ Be inji mkfomottm taunthu tuhant yindars sinyahato yi htimomr Jisasr.

³¹ Nd yiharpno disaiperm Jisasr kfo memomr, “Tisaye, ni nuwa afo waya.”
³² Rom inji kfo motmr tfit Jisasr kfo memorm, “Nanhu yayuk yeshrim niko nhai tawisafkakhomm.” ³³ Disaiperm tum rinahti rinahtihato kfo memom, “Ka nom taunko tohetnomn wom yimam yeshrim hnahumr.” ³⁴ Jisasr inji wanyaf hanyhato kfo memorm, “Nanhu yeshrim akfo nuhasanko. Nd na tkrurafmo yimarhu dukef yuhatn na be hikhato nd ror kfo yuk hingrnafat afo na hingrna bugakfot. Tot nanhu tu yeshrt.

* **4:20:** Nd met kfo m kminysofr Gerisimr kfo mot. Samaria profins korhr nd kminysofr. Samarian bro lotum yakitohmoahat to nd kminysofrpar muhato lotumoum. Nd kminysofrhu kfo nuhas mrokfot Lukr kfo motr saptu 9 ves 53 kfotn.

³⁵ Wom mrokfot kfo kangko, ‘Kto husfihusyuk yamtpno ka mswirroh yeshrt bi yeshriyettn yakrahm.’ To tfit kfiwanko, mswir mswirroh yewurit afo wayukatohkomt bi finji yorhwam? Bi yak yibon nefrpayet bi. ³⁶ Nd yimar mswirroh yewurithu yak nhafoh htfasyukr dborioh marufat bi yekwarn, nd mswir mswirroh mtoh nkifraniyuk yewurit kak htfaswort. Ndnnetn nd yimar yewuri nuhtayukr yo yewuri yak nhafoh htfasyukr rpat yindhorrahf. ³⁷⁻³⁸ Bi womm nuhta htamo yewuriroh yakneft kfo tkrur-afomoyanko. Bi wommn yikiat hta-motmt, niko be rroh yikiat htayuk yewuritrn yihato fakmoko. Ndnnetn nd mrokfot niko kfiwat, tu kfof kfiwuko. Womr yewuri fan nuhta hanyuker, tfit womrn mongko tohhato nd bi yak yibon hanyet yewuriroh yak nhafoh hnayuk yimayer.”

³⁹ Nd Samaria efkott taun yihato mkfo memohat, “Na nahnayuk tamoh tamoh nefm kfo hik bohik bugerm.” Inji mkfomohat, boknambok Samaria thofm wanyhato rroh bro dukefm Jisasr htamom. ⁴⁰ Jisasr nd mettpno naphamo bujrpno rhu hasetrn Samaria thofm yihato mkfo ttiwon-momr rompno afo toh tanyneft. Inji mkfomotmr afo hus marf tohno tanyomom. ⁴¹ Nd ror tohmo yihaf tohhato kfo phayuk mrokfom hifa wanyomom. Ndnnetn bok met yindarim wany yakiohato hikmomt rorhu mrokfot. ⁴² Nd Jisasrhu mrokfom wany yakiohato hikmo yimam yihato nd mett mkfo memomt, “Ni mirahn ka nd ni kfoyuk mrokfo-rpatpno riwanyakhato ka nmoh bro dukefm rorn htewunom. Nhai. Nom tunmoh nyingaye yo yimb-hindange hifa wanukwanomn ndnatn kangnom ror tu ndar bbinysofthu met yindari-roh nrfa htayakyuk yimayer.”

Jisasr kingrhu ofisarhu yonr yak marnyamo yuhat

⁴³ Jisasr hus marf Samariat toh tanyhato tfit Galili profinsko yimorko. ⁴⁴ Bingot tu Jisasr bi kfo memor, “Bro Nkifrarhu profetrhu yufat bi kmi kmim rhu htfaswort. Turhu kmiti turhu kuny shofm, rompno nhai yufapa duhater.” ⁴⁵ Jisasr Galili profins yimohat, yindhorakmomr. Nd Jerusalem rhumo bro Pasofa burwa yihar rom tum yimomn nd Jisasr hingrnamo mirakerkfof turoh nyingaye htimomom. Ndnatn tfit Jisasr Galiliko yimohat yindhormomt rorhu yi nmbuhat.

⁴⁶ Jisasr Galili profins yihany yi hanyhato bupa mifm tfit wain bupam yak kekutmo kmi Kanat mfnahmor. Nd yihar kingrhu ofisarhu yonr taun Kaperneamko dbohnetr rhumor. ⁴⁷ Nd ofisar wany memohat Jisasr bi Judiako htanyhato Galiliko nier, nd ofisar yimorn Jisasr mkfo ttiwonmorr Kaperneamko yihato rorhu yonrhu yak marnyanef. Rorhu yonr bi nohyuk tkitt rhumor. ⁴⁸ Inji kfo pthamotr tfit Jisasr kfo memor, “Niko mirakerkfof hti duha, nhai nann nikmoh bro dukefm htakahkma.” ⁴⁹ Kingrhu ofisar kfo memor, “Broye, bmbri wania. Nanhu yonr nohhirahra.” ⁵⁰ Jisasr nd ofisarhu mrokfot wanyhato kfo kangrr, “Wanju, ninhu yonr nhai nohruhatr.” Be wom ofisar nd Jisasr kfoyuk tngt wany yakiohato yimor.

⁵¹ Nd ofisar yihotat yi hanyhato tafi taun Kaperneamt mfnah duha turhu hingrna yimam toni hnehato yihotatn mkfohiyak memomr, “O, ninhu yonr tor yima nfriyer. Nhai nohror.” ⁵² Rom inji mkfohiyakmotmr tfit ror ttiwon kangrm, “To fitoh yiharn nd dbohneft thu trohrotr?” Tfit rom kfo memomr, “Yihofnano 1-kilok krif marr dbohneft thu troh tanyrotr.” ⁵³ Be yifemr inji wanyomohat tfit duka memor, “Dajohmn, na Jisasr to ndhtet yiharn kfo mariora, ‘Ninhu yonr nhai nohruhatr.’” Be nd ofisar ndt htihato

rori yo nd rorhu rpa kuny shofm Jisasrn rroh bro dukefm rihtakmom. 54 Tot ndt husyuk mirakerkfot Jisasr Judiat toh tany tfit Galiliko yihato hingrnamot.

Jisasr nd bro rhu krna lotu yiharoh mrokfo yuham kfo nuhas bonuhasmo yuhat

5

(Sapta 5–10)

Betesda yuk bfar Jisasr yak marnyamo yimarhu mrokfo yuhat

¹ Tfit kto Judaroh wom bro lotu yiharhu yemro burwat Jerusalemr htamotmt, Jisasr Jerusalemko yimor.

² Nd Jerusalemrhu wom bro kmi yifhatikt kutewumt Sifsifroh Yifhatikt, to brbo nd kmi yifhatikt pno hingrna-momr wom bro yuk bfar. Hibru yarmumat kutewumr Betesda.* Nd yuk bfarhu manoh manoh thmbmn yimaroh rhu mskayuk tirfa kuny nafom hingrna habrimomm. ³⁻⁴ Nd kuny nafomn rhu hasomoum dbohna yimam, nyinga kunyjetm, wura bebetm, yo wura noh minysafetm.†

⁵ Ndha nd tkittn rhumor wom dbohnet yimar. Nd yimar 38 gunyjimr rorhu dbohneft hatohmort. ⁶ Jisasr yau hanyhato nd yimar hwe kkor hasetr mhtimorr. Nd dbohneft htimorr bi rihatohngotakmor. Inji htihato kfo ttiwon memorr, “Nine tu waduka. Kangn nd dbohneft athu trohta?”

⁷ Jisasr inji kfomotrr tfit nd dbohna yimar kfo kangr, “Bro yimaye, nda tek bupam hamuh dbrufwohat to fitoh yimarn yaknihato wahtewotra bt nd dbohneft thu trohkahta? Buparoh hamuh wohnepam htihato kanga tukann yudbat aikahann amitozniya, wommn bi dimandinihato mitohnitatm dbohnefm thu trohwomm.” ⁸ Inji kfomotr Jisasr kfo memorr, “Wasinya! Wasinyakahnn yitwat wayakkahnt wayauwakni.” ⁹ Be yudbat nd yimar marnyanimor, nndo memom ka kparn watuyekwor. Be nd tur hwe hasoyuk yitwat miyak riraknihato fauyaknimor.

Sabat yiharn ndhtet neft rhumot. ¹⁰ Ndnetn Judaroh bro yimam inji htihakmohat kfo memomr, “Bare, tamohmpno nda bro Sabat yiharn nd yitwat yihom hauyak mhauekwant? Boririfhut kfo kangt, ‘Mirahn Sabat yiharn yitwat yihom hauyak mhauekant.’” ¹¹ Tfit ror sinyahato kfo memor, “Nd na yak marnyafoyuk yimar kfo famura, ‘Wasinyakahnn yitwat wayaknikahnt wayauwakni.’” ¹² Tfit kfo ttiwon memomr, “To frohrn kfo yamurn, ‘Yitwat wayaknikahnt wayauwakni?’” ¹³ To nd wura noh minysafet yimar nhai hti hik marnyaf-rmorr nd ror yak marnya tanyuk yimar. Yonmar yima rifinyrn Jisasr nd yimar yak marnya tanyumohat to be nd yima rifiny buharn tayinyarnihato frtkunimor.

¹⁴ Kto Jisasr Bro Nkifrarhu temper kmifar rim fnahnihato nd yimar yiro temper kmifar toh hasetrn rim htimorr. Rim htihato kfo memorr, “Wahti.

* **5:2:** Wom yimam kutewumt Betsata. † **5:3-4:** Ndar Bro Nkifrarhu rfa borngthu mrokfom hti hik bohiket yimam ndar hus vesfhu mrokfom hti nhta yak nhtamommn kfo memom tom wom mrokfom. Nd mrokfom kfo memom, “Nd wonk wonk dbohnet yimam rhu hasohato nd yuk bfarhu hamuh wohnepam hti hasomoum. Wom yiham Brorhu mounmotr nd yuk bfar yimoarn yohnenimour. Yohnenihato bupam hamuh dbfamourm. Nd dbohnet yimam nd hamuh wohnepam hti hasohato bi nd hamuh wohnepam wuthani hanyetmn fitoh yimar fukni gngonr, nd yimarhu dbohneft thu trohmotr.”

Ni bi tu yimaye. Nd ni hatohmo yonmari dbohneft be bi thu troh tanymotn. Arihat mirahn tfit wom tamoh nefm arim naya. Tfit finji rim narahn, to be nd yiha be tu bro krhopam yakrahn.” ¹⁵ Be nd yimar ror yak marnyamo yimar hti hikhato Judaroh Bro yimampno yihato kfo nuhas memorm, “Nd na yak marnyamo yimare, Jisaser.”

¹⁶ Be nd Judaroh bro yimam inji wany hikak marnyahato Jisaser rihti dbnotakhato riptha namburak memorm, “To nd yima Jisaser frohm kfo memorm, Sabat yiha ndhtet hingernefm wah-ingrnatwa?” ¹⁷ Jisaser nd rroh kfo hutt mrokfom wanyhato kfo memorm, “Nanhu Yifemr nhai rhu witakahr hingerneft. Na to nd yuhatn na nhai rhu witakfot hingerneft.”

¹⁸ Be nd ror kfomo tngprno Judaroh bro yimaroh yima yuhum kahm kindo wakur sinyahato kfo memorm, “Nome ndar yimar finji anakahtnomr anohr. Sabat yiham nhai mikahr nd yihar be wom tamoh nefm finji na duha. Yo nhai be nd nefrpat nakahr, Bro Nkifrar kangrr rorhu Yifemer. Kangr Bro Yifemr kanjo aruha, nd dukeftn nd nefm newurm.”

Bro Nkifrarhu Yonrhu yakitohyuk hingernefm

¹⁹ Jisaser nd Judaroh bro yimam kfomo mrokfot wanyhato tfit ror kfo memorm, “Na kfo mifwanko, Yonr turhu Yifemrhu hingernefm hingernewur. Nhai be turhu yima yuhurn o dukefrn tamoh hingernefm hingernekahrm. Nhai. Ror turhu Yifemr hingerneyuk hingernef yuhum hti hikakhato hingerne hik hanitr.” ²⁰ Nd Yonr be Yifemrhu mondt yihom furwarn nd ror niwa nefm yak nuhaswatrr newurm. To mirahko ka be nd nefrpam htirahnom. Nhai. Tu bro bro nefm yak nuhasruhattr tfit rorn nd nefm nikompno naruhattrm nikom tfit hti kshrfahato kfo mirahko, ‘Mamai! Ndart tamoh tet nefet?’ Mfham danyr yohtnehrhm. ²¹ Ndt nhai be kfo nhehkfoyet. Bro Yifemr noheh yimam yak kasinyahato yima tkonham kafkni yahuka kanjo, to be nd yuhatn yinem Yonr turhu hti fijo yimam tkonham kafkni yahukrm. ²² Yo nhai tfit Bro Yifemrn kotkfot yakitohruhatr. Nhai. Nd hingerneft bi Yonrhu tirtn htamort. ²³ To be ndnatn nda bbinysofthu yimam be yinem Yonrhu yufat yuta hagrharahm Bro Yifemrhu yufat wuyuta hagrha hakutwa kanjo. Fitoh yimam nhai yinem Yonrhu yufat yuta hagrhakahm, nd yimam nhai nd yonr kfo tkruryuk Yifemr kfo hagrhakahm.

²⁴ Na kfo mifwanko, fitoh yimam na kfo tkrurafyuk Yifemrn rroh dukefm rhuhatn nanhu mrokfom hikwom, toh nkifranirahm. Nhai nd kotkfot roruhattrm. Be mrokfo duhatm rhurahm. Nd hel yita yihotat bi htanyhato Bro Nkifrar htayuk dfa tikr bi rim tohnihato hefenrhu yihotat kau hanitwom.

²⁵ Na kfo mifwanko, yihar niayukr to bi asor bi niaror. Nd hel yi hanita met yindarim yinem Yonrhu tngt wanyrahm. Wanyakhato Bro Nkifrarhu yihotat toh hanyrahm. ²⁶ Yimaroh rhu tohefr tu Yifemrn kakitohworr. Nhai wom yima furam yakitohkahmr. Yifemr yakitoh hasohato tfit tu Yinemrhu tirtn yimaroh rhu tohefr fak htamorr. ²⁷ Yo kotkfothu yakitohneft bi tu Yinemr, nmoh Bro Najomr, turhu tirtn fak htamort. ²⁸ Mirahko nd na kfiwa mrokfompno mfha tha duhatnom arhunom. Yihat nierah, noheh yima bugam yopm toh hanyukm tfit Yonrhu naku tngt wanyhato ²⁹ tfit sinya hanyrahm. Fitoh yimam toh marnyem nd yimam tfit sinya thombat, be mrokfo duhatm rhuruhamn dborioh rhu nmbuhat yakhato toh nkifranirahm. Fitoh yimam fasoh nefm nayetem, nd yimam sinya thombat, be kotkfot tohniruhamn rroh toh nmbuhat, fasoh toh nmbuhat yakrahm.”

Jisasrhu rhu toh nmbuhat womm htihato kfo pthamo yuhat

³⁰ Jisasr tfit kfo memorm, “Na nhai wom hingrneft be nanhu yima yuhurpar wakfakhato hingrnakfot. Nhai. Na tukianhu Yifemr kfo htafmo mrokfo yuhatn hikwoyann met yindarim nayuk tamoh tamoh nefm htihato kak hta bohtahukanm. Ndnatn na yimaroh nefm yak hta bohtiwohat na tuka kfo tkrurafmo Bro Yifemrhu mrokfo yuham hikhato kak hta bohta marnyahukanm. Nhai nndo mando riyohne ayohnekaha.

³¹ Be na tukiann, na tukanhu toheft aptha srhant, be nhai nanhu mrokfom wany fugharfotkomm. Nhai. ³² To tor womr riyorhwor. Rorn nanhu yufat kfo ptha yimbu hikwort.†

³³⁻³⁴ Yo Jon Baftaisr tu nanhu rhu toh nmbuhat kfo ptha yimbu hikmort. Ndnettn nikmoh wom yimam Jon Baftaisr pno yihato rorhu kfoyk mrokfom wanyakomm. Nanhu dukeft duka kanga, nd mwanyakyuk mrokfom hikrahkomm, Bro Nkifrar nrfa htihakrhrko. To na nhai duka mekoaha, ‘Tfit wom yimarn buha tohhato nanhu rhu toh nmbuhat rorn yimampno kfo ptharuhatrt yimam wanyhato hikrahma.’ Nhai. ³⁵ Jonr kshr kindo niahato fakitohmorr. Ror nd yakitohmo kshrhu nukeftpno afo myindhor tefnimoko.

³⁶ Yima Jonr niahato kfo pthamo mrokfom rom tu nanhu rhu toh nmbuhatu mrokfom kfo pthamor. To nd Yifemr na hemo hingrnefm na hingrniwam, tom nd hingrnefmn yimam kak nuhaswomm na Bro Yifemr kfo tkrurafmo yuhathu tu hingrnefm. Nd hingrnefmn yimam htihato kfo kangm, tom tu Bro Yifemrhu hingrnefm. ³⁷ Na Yifemr tkrurafmotra nda bbinysoft niamoya. Turn nanhu rhu toh nmbuhat kfo ptha nuhasmor. To rorhu tngt nhai nikmoh yimbhindange wanymokomt yo nhai rorhu nyingatikt nikmoh nyingaye htirmokomt. Nhai. ³⁸ Na nd Bro Yifemr kfo tkruryuk yimaya, to na nhai hikkahkma, ndnettn nhai rorhu mrokfom yakitohkakkomm.

³⁹ Nikmoh dukeft duka kangko, ‘Bro Nkifrarhu mrokfomn tu toh nkifraniryuk dborioh rhu nmbuhat yak htarahnmom.’ Ndnettn nd mrokfom htitakomm kak nhta bonhtewukomm. To nd mrokfom to nann kfo hik bohikwom. ⁴⁰ To niko nhai wany yakiohato na hikkahko. Ahikko to hifa rhu nmbuhat herfoyanko.

⁴¹ Na nhai mikaha, mrokfom apthakahta yimam wany kafhurrahma. Nhai. ⁴² Na hti hasiwanko nikmoh yuhuwaf marbim nhai Bro Nkifrar rhukahm. Nhai. ⁴³ Na niamohat, tu Bro Nkifrar tkrurafmotra fawih-namoya. To niko nhai marimoko, nd na kfoyk mrokfot wuthu km-briyakhato ayak hiknomt. Nhai. Be wom yima furar be turhu fijo niahato mrokfo kfo pthaneft niko be yudbat myoh brurnihato bmbri hikaknitkomt. ⁴⁴ Niko ndhtet met yindariko be tu nhai mif yak hikruhatkomt nanhu mrokfot, nhai mif. To nikmoh bro dukefm be kangko, ‘Be tunom nayuta yindhorhato bro yufat ayak hasonom.’ Nhai wofnkahko Bro Nkifrarpar yahuka bro yufat.

⁴⁵ To niko mirahko ka nann kotimruhanko Bro Nkifrarhu nyinga-tikhato. Nhai. Nd niko kotimryuk yimar tor riyorhwor. Mosesrn kotimrhrko. Niko kangko, ‘Nda Mosesrhu mrokfotn hifa tkitt htarahnmom.’ To nd mrokfotn tfit toh kekuthato kotimrahtko. ⁴⁶ Nd Mosesr wandfamo mrokfom to nanhu rhu toh nmbuhat wandfa hikmor. Ndnettn kanga niko Mosesrhu mrokfot

† 5:32: Nda veskfot kfo yamuka, “tor womr riyorhwor,” ndr to Bro Nkifrar kifwut.

yakhato ahikko, nann hikrfoko. To nhai. ⁴⁷ Na bi htitanko nd Mosesr wandfayuk mrokfot nhai yak hik marnyakahkomt. Ndnatn to nanhu mrokfot nhai yak hikruhatkomt.”

6

*Jisasr 5,000 yimam yeshr hemo yuhat
(Matyu 14.13-21; Mak 6.39-44; Luk 9.10-17)*

¹ Tfit kto Jisasr tfit mmbrrt yaknihato tek Galili barithu mkuko yimor. Nd tek barithu wom yufat kutewumt Taiberias. ² Boknabok met yindarim Jisasr hingrnamao mirakerkfom htimoumm. Yimam tamohtet tamohtet dbohnefm hatohetm ror kfomour marnyanimoum. Ndnnetmn yonmari rifuhetr yihom hikak mhikakmoum. ³ Ndnnetrn wom kmir muhato turhu disaipermmpno afo rhumom. ⁴ Jisasr inji namohat nd Judaroh bro rhu krna yihar, kutewumr Pasofa burwar, nd yihar bi brboh hanyetrn turhu disaipermmpno rhumor. ⁵ Jisasr memor, “Ayukatohafoya,” asha htihakmorm yonmari rifuhetr. Be ror nd yonmari met yindari rifhur htihakato tfit Filifir ttiwon rhti memor, “Nda yonmari rifinyr niwarne, to yeshrim fitha wiknahato yahukanomm?” ⁶ Nd ttiwon mrokfot Jisasr kfomot, be yuwi Filifirhu yima yuhurhu was tiwonneftn inji ttiwon rhtimor. Tu Jisasr ror tor rhumor rorhu yima yuhur nd yimaroh finji nayukr.

⁷ Jisasr inji kfomotrr tfit wom Filifir kfo memorr, “Mirahnom 200 kina yak nhafohkahnomm 200 kinakfet bretpam ayaknom nda yonmari rifhur href finji yak nhtahukam?” ⁸ Tfit tu Jisasrhu disaiperr Andurr, Saimon Pitarhu habhir, ror waruhato kfo memor, ⁹ “Asor wom yima damiagr kakitohwor bari plauapaye tonet 5-pela bretpami hus yira bjhenf. To kangnome nda yonmari yima rifinyre ka hifa kak nhombra twanhiwum nd 5-pela bretpenmi hus yira bjhenf?” ¹⁰ Jisasr sinyahato disaiperr kfo memorm, “Nd yimam wakfokahtkomm afo ndha nd kivr suhtn asibosi rmon hanyom.” Be kfomotmm tuha kivr suhtn sibosi rmonmom. Nd yindarim nd rifinymom, 5,000 yindarim rifinymom.

¹¹ Be nd tuhan yindars sibosi rmonmotm Jisasr nd bret nuwat yakmorn Bro Nkifrar wukfo yindho-rakhato yak tif botif rmonmortn fak nhtahemorm. Yimam be turoh yak fijo fakmom. Yo nd yira bjhenf yak nhtahemohat, nhaf rpahtet neft namor. ¹² Ye furkihmotm Jisasr turhu disaiperr kfo memorm, “Waikahkomm nd rroh yesmbhehm wayak nhafohkomm, rhu gbitnarahm.” ¹³ Be nd turhu disaiperr sinyahato nd 5-pela bretparoh yesmbho hta hanyuk bretpam fak nhafoh bugamomm. Yak nhafohhato kpm hmbremohat 12-pela kpm hmbremomm nd yesmbhehm.

¹⁴ Met yindarim nd Jisasr namo mirakerkfot htihato be tfit tum rinakfo nakfo memorm, “Dajohmn, nd Bro Nkifrarhu rfa borngt kfo hnamo profetr ka asor bi niamor.” ¹⁵ Nd rom nakfo pthamohat, Jisasr bi wanymormn ror duka memor, “Arm bi inji rinakfo pthekwamn tir tir yak rim htahato kfo mirahma, ‘Rorn nmoh kingr tohrahr.’ ” Jisasr nd dukefr yakmotrr nd tkitt htanymortn tfit turpetr yura kminysofko muhmor.

*Jisasr yura tek yuhat yau hanyomo yuhat
(Matyu 14.22-33; Mak 6.45-52)*

¹⁶ Krifn disaiperr tfit tek bariko yimomwe. ¹⁷ Yimomn mmbrrt yaknihato memorm, “Tek barit hir hayuknihato tfit Kaperneamko riyahnom.” Yifungta

hanyomot nhai bi Jisasr mifnahrmorm. ¹⁸ Hir hanyetmn bro wifort sinyahato sikfot rpat sinyamot. ¹⁹ Nd wifortpno rihirhany rihirhany, ka bi 5 o 6 kilomita kanjo bi rihir hanyetmn ee Jisasr htiyak hanyomomr yura tek yuhat yau hnehato brbo mmbtrtpno fau yaknimor. Rom inji htiyakhato fakrmemom. ²⁰ Be bmbri tu Jisasr kfo kangrm, “Mirahko ayakrmenom. Na Jisasa niewa.” ²¹ Be inji kfomotrm disaiperrh yima yuhum miruhato rroh mmbtrtn tfit fak kmbremomr. Mikmbremotr be yudbat nd mmbtr rim fnahmot rom yiyuk tkittn.

Met yindarim Jisasr yau hambromo yuhat

²²⁻²³ To nd Jisasr kfo bruttnahato yeshrim yak nhtahemo tkitt toh hasomo yimam, tfit ndwom dbha marrn barat hirmo mmbm htihato kfo memom, “To nom yihof Jisasr yeshrim herohat afo rpa mmbrrpat htironom. To nd mmbtr to bi disaiperrpam krif fakniromt. Jisasr nhai hikrrorm.” To ndha hirmo mmbm Taiberiuskorhof mmbm hirmoum. ²⁴ To Jisasri rorhu disaiperm hti hambromohat, be tfit nd Taiberiasroh mmbm myaknihato Kaperneamko hir hikmomm.

Jisasr hefenrhu bretpayer

²⁵ Kaperneamko rim htanihato Jisasr hambro hanyhato mhtimomr. Mhtihato kfo ttiwon memomr, “Tisaye, to nine asombha niarohate fitoh yiharn niaro?” ²⁶ Be rom inji ttiwon-motmr tfit Jisasr kfo memomr, “Na kfo mifwanko, niko na hambro hnewohat nhai be na nahniwa mirakerm htihato kfo mikahkma, ‘Dajohmn! Tu Bro Nkifrarhu Yon mifer.’ Nhai. Be nd bretpam yak yurhato ye furkihmo yuhat htimokomn ndtpno tfit kak hambro htfaswokma. ²⁷ Mirahko be yatiyef t yakyuk yeshrt adukanom. Yiro yafothat yakyuk yeshrt dukakfot. Nd yafothathu yeshrt ye hmbrihato toh nkifranirahko. Nd yeshrt na Bro Najoma hiruhanko. Bi Bro Yifemr nd hingrneft bi fak htamora.”

²⁸ Jisasr inji kfomotrm tfit rom ttiwon memomr, “To nom finji nahato nd Bro Nkifrar kfoyuk hingrnefm yak hikruhanomm?” ²⁹ Rom inji kfomotmr tfit Jisasr kfo memomr, “Bro Nkifrarhu hingrnefthu hingrneft inji korht: Nikmoh bro dukefm nd tu Bro Nkifrar kfo tkurafomo yimarn rhukfot.”

³⁰ Rom nd mrokfot wanyhato tfit Jisasr ttiwon memomr, “To ni finji kanjohtet mirakerkfot hingrnaruhatnt nom htiruhanomn kfo miruhanom, ‘Dajohmn! Tu Bro Nkifrarhu Yon mifer.’ To ni tamohtet hingrneft hingrnaruha? ³¹ Nmoh nkifram nungur tik furat, kutewumt deset, nd tkitt hwe toh hnehato manakfot yakmohat, to rfa borngt kfo kangt, ‘Yura hefen yuhat yawihnayuk bretpam ndm hemotrm famom.’” ³² Be rom inji kfomotmr tfit Jisasr kfo memomr, “Na kfo mifwanko, Mosesr nhai yura hefen yuhat yawihnayuk bretpam yakhato hermorko. Nhai. Nanh Yifemrn kahukrko tu yura hefenkorhof bretpa mif mift. ³³ Nd bretpat Bro Nkifrar heyukt yura hefen yuhat wutoh tanyuket. Nd bretpat yayuk tuhant yindars be toh nkifranirahm.” ³⁴ Jisasr inji kfomotrm tfit rom kfo memom, “Bro yimaye, nom kangnom, nd bretparpam yiha yiha wahi hanyswannom.” ³⁵ Rom inji kfomotrm tfit Jisasr kfo memomr, “Na to nd toh nkifraniyuk yafothat heyuk bretpaya. Yimam nanpno nierahm be nhai tfit yatinohruhatm. Yo nann rroh bro dukefm rhurahm, be nhai tfit bupa knaruhatm.”

³⁶ Jisasr inji kfonihato tfit kfo memorm, “Mrokfot to bi kfiyanko. Niko na nahnayuk nefm ar bi htietko, to nhai nann nikmoh bro dukefmi rhuhato hikkahkma. ³⁷ Yimam Bro Yifemr bi nann fahur nanpno nia tohrahm. Nhai kfo krmah o yak thu inji narhotanm. ³⁸ To na hefenr wuhtanyhato yawihnamohat, nhai be tukianhu dukefthu hikneftn yawihna-armoya. Nhai. Memoya, ‘Bro Yifemrhu dukef yuhat na be hikhato nd ror kfoyuk hingnafat hingrnaruha.’ ³⁹ Na Bro Yifemr kfo tkrurafetann fitoh met yindarim bi tu Bro Yifemr nanhu tirtn bi hterm na nhai womr yak troh tanykfot wuroh ndar bbinysofthu bati yihar. Nhai. Nanhu tirt bi hterm yahot tathakni bugaruhanm. ⁴⁰ Nanhu Yifemrhu yima yuhur inji duka kangr, nd dodh met yindari bugam Yonr yukatohhato ror yak hikwam, rom tu dborioh toh nmbuhat yakhatu be toh nkifranikfot. Na tukann wuroh yihar nann yahot tathakniruhanm.”

⁴¹ Jisasr kfo memotr, “Na yura hefen yuhat yawihnayuk bretpaya,” nd mrokfotpno Judam wanyhato rroh yima yuhum nhai marnyarmomm. Kfo hutt memom, ⁴² “Nd yimar nom tawi-safwonomr. Josefhu yinem Jisaser. Rorhu yifammaf nom tawisafwonomf. To tfit tamohmpno kfo yamukar, ‘Na hefen yuhat fawihnamoya?’ ”

⁴³ Jisasr kfo memorm, “Be tmifko tukmoh rim pthata mpthataneft. ⁴⁴ Na tu Bro Yifemr kfo tkrurafmotra fawihnamoya. Nhai wom yimar be turparhu duka fijo wayibon sinyahato nanpno niakfot. Tu Bro Yifemr nd yimar thu yuhurworre ee btn nanpno niakfot. Kto wuroh yihar nd yimar yahot tathakniruhanr. ⁴⁵ Profetm wandfamo mrokfot kfo memom, ‘Tu Bro Nkifranr mrokfom hirahrm.’ Yimam nd ror hayuk mrokfom wanyhato dukefmi yekwam nanpno niewum.

⁴⁶ Nhai wom yimar Bro Yifemr htirmorr. Nhai. Nd tu Bro Nkifrapno toh tany niayuk yimarpn Bro Yifemr htimorr. ⁴⁷ Na kfo mifwanko, yimar rorhu bro dukefmi nann rhuhato nanhu mrokfom wany yakiohato yak hikwar, tor nd yimarpn dborioh toh nmbuhat yakhatu toh nkifranirahr. ⁴⁸ Na nd toh nkifraniyuk yafothat heyuk bretpaya. ⁴⁹ Nd nikmoh nkifram nd nungur tik furat yutewa deset, ndko hwe sohhnahato manat yi hnomo yimam be bi noh witamom. ⁵⁰ Nd bretpat yura hefen yuhat yawihnayukt ndt womhtet bretpayet. Yimam nd bretpat yanyeft to be nhai tfit nohruhatm. ⁵¹ Na to nd yura hefen yuhat yawihnamo toh nkifraniyuk yafothat heyuk bretpaya. Yima nd bretpat yak ye hmbriahn to be toh nkifranirahn. Nd bretpat na yakhiruhath to tukanhu yima nmpayem. Ndar bbinysofthu met yindariroh rhu nmbuhat dukahato suh nanyorruha.”

⁵² Jisasr inji kfomotr, Judam wanyhato tum rinakfo nakfo memom, “Bar yimako, tone nda yimare finji turhu nmhapam yakhatu hiruhatnom yeruhanomm?”

⁵³ Rom inji kfomotm tfit Jisasr kfo memorm, “Na kfo mifwanko, nhai Bro Najomanhu nmhapami yo nanhu kkupam yak yarfokomm be nhai dborioh rhu nmbuhat yakruhatko. ⁵⁴ Yimar o mett nanhu nmhapami kkupam kekwoomm nd yimam be toh nkifranitn. Kto wuroh yihar yahot tathakniruhanm. ⁵⁵ Nanhu nmhapam tom tu yeyuk yemrot yo kkupam tom tu yeyuk bupam, ndnetann inji kfiwanko. ⁵⁶ Yimar nanhu nmpami nanhu kkupam yewar, bi ke hmbriye-kwora. Ror bi nann thu nhombrewur yo na bi rorn thu nhombrewa. ⁵⁷ Na tu toh nkifraniyuk yafothat heyuk Yifemr kfo tkrurafmotra fawihnamoya. Na to nd Bro Yifemr nanhu rhu toh

nmbuhat yakitohwatrt tohwa. Nanhu toh nmbuhat inji ruhettn, ndnettn yimar nanhu nmpam yaneft to be rorhu rhu toh nmbuhat yakitohrhotant tohrah. ⁵⁸ Tot tu bretpa mift yura hefen yuhat yawihnamot. To mirahko ka nikmoh nkifram yamo kanjohot bretpayet. Nhai. Rom yamo bretpat nhai ndt yehato toh nkifranirmom. To nd ariharhof bretpat yimam yakhato yaneyft be inji toh nkifranirahm.” ⁵⁹ Jisars Kaperneam taunthu rhu rifinyuk Judaroh rmont rhuhato nd mrokfom kfo ptha nuhasmorm.

Toh nkifrani yuhathu kfo nuhas mrokfot

⁶⁰ Bok disaiperm Jisars kfoyuk mrokfom mwany frnatahato kfo memom, “Jisars mrokfom inji kfo pthaneft to frohm wanyhato hikruham?” ⁶¹ Jisars bi htimorm rom inji kfo pthamoahat. Inji htihat kfo ttiwon memorm, “Ka nd na kfoyuk mrokfot wanyhato mfrnahirtewuko? ⁶² To kto Bro Najomr mikahtr, nd tur toh tanymo kmikor muhwa, to niko htiaf hany thombat to finji? ⁶³ Bro Nkifrarhu Yafothatn kahuktnom tu toh nkifraniyuk yafothat, nhai yima mifmn. Nd na kfoyuk mrokfot, ndt tu yafothet mrokfoyet. Nd mrokfotn kahuktn yimam toh nkifraniyuk yafothat. ⁶⁴ To tom nikmoh womm nhai wany yakiokahmt nda na pthiwa mrokfot.” Bingotn Jisars bi htimorm fitoh yimamn nhai wany yakioruhatmr. Yo bi htimorr fitoh yimar hndhnrahr. ⁶⁵ Ndnatn Jisars wom mrokfot kfo memorm, “Yimam nhai wany yakiokahm. Nd yuhatn niko bi kfo kanganko, nhai wom yimar be turparhu duka fijo wayibon sinyahato nanpno niakfot. Tu Bro Yifemrn nd yimar thu yuhurworre ee btn nanpno niakfot.”

⁶⁶ Be nd yiharpno Jisars nd mrokfot inji kfomotrt bok disaiperm frtrohmomr. Nhai tfit uhik ahikrmoamr. ⁶⁷ Be Jisars inji htiaf hanyhato nd turhu 12-pela disaiperm ttiwon memorm, “To nikone, rpat htany bugarahkma?”

⁶⁸ Tfit Saimon Pitar warhuhato kfo memorr, “Broye, nom ni htanyruhanomn to wom frohrpno rim tohruhanom? To ninrpanhu mrokforpat harhuwott tu toh marnya hatohyuk yuhat. ⁶⁹ Nom ninn nmoh yima yuhum htahato duka kangnom, ni tu Bro Nkifrar yak htamo yimaye.”

⁷⁰ Ror inji kfomotrr tfit Jisars kfo memorm, “Rot nann niko 12-pela disaiperko fakmoyanko. To ror tor nikmoh womr. “Rot Satanrhu hingrneft hingrnayuk yimayer.” ⁷¹ Nd ror kfoyo yimar to Saimon Iskariotrhu yinem Judasrn kfomor. Nd Judasr to nd 12-yuk wom disaiperm yimayer. To rorn kto frfnahniato tfit Jisars hndhnamotrr yahr kmim yihato wasmorm.

7

Judaroh briaha kuny nafa mkuroh rhuhato ye burwa yihar Jisars yi htimo yuhat

¹ Jisars nd mirakerm Galili thofm yak nuhasnimohat, afo tuha Galili distriktn afo fau habrimor. Judiako bi yinyeft nhai. Judiakorhof bro tohak yimam bi rorhu wasneftu wajis bi haruhetmn to be Jisars nhai bi marimor, “Judiako bi yiruha.” ² Judaroh briaha kuny nafa mkuroh rhuhato ye burwa yihar bi brbo rhu hnetmn, ³ Jisarsru wom habhim kfo memorm, “Nom kangnom ni nda kmit wahtanykahnn tu Judiako waiswa. Tu Judiako waikahnn nd ni hingrniwa womhtet womhtet miraker hingrnefm wahingrnakahtnm tunhu disaiperm afo htirahmm nd hingrnefm. ⁴ Wom

yimar kangr, ror niwa nefm yimam ahtimm, ror nhai be hingrna kafroh-kahrm. To ni kangn, mirakerm ahingrnayanm, tafontn met yindariroh nyingatikhato wahingrnakahtnm ahtimm.”⁵ To tu Jisasrhu habhim nhai rroh bro dukefm Jisasrn rhurmom.⁶ Be rom inji kfomotm, tfit Jisasr kfo memorm, “Nanhu tu yi yihar tafi afo bi niakahr. Niko fitoh yuha fitoh yuha yinyefm niko tuko yakitohwakomn yiham, niko tuko yi furaknitko.”⁷ Niko nda bbinysof thofm nhai be mfro hti srkahnko. Na be rroh gobenann be fndr hitwoma. Kangm, ‘Tamohmpno kfo ptha nriyafwarm nom niwa fasoh fasoh nefm?’⁸ Nd niko Jerusalemr yihato Judaroh kuny nafo mkuroh rhuhatoto lotunefi yi shombat, na nhai hik hanyrhotanko. Nanhu yi yihar nhai bi niakahr. Tuko waiswako.”⁹ Inji kfaf nuhasafhato ror tuha Galilitn thoi gari hasomorm.

¹⁰ Ror wom habhim afo htia-fmormn bi kitwome, ee ror kto mongkor yimor. Nhai yimam htiafomorm ror sinyanimohat.¹¹ Nd Judaroh kuny nafo mkuroh lotu yiharn Judaroh bro yimam Jisasr yukatoh hasotihato kfo ttiwon hambro memoum, “Bar yimako, nd yima Jisasre to fitor? Nhai niarfor?”¹² Tuha met yindars be nhowi brumhamn nakfo nuhas nakfo nuhas memoum, “Ndr tu dborioh yimayer.” Tfit womn kfo memoum, “Nhen, ndr yima frnhehet yimayer.”¹³ Met yindarim Jisasrhu mrokfom kfo pthamoahat, Judaroh bro tohak yimam yanhohato, nhai be masat tafontn kfo ptha nriyaf inji narmoam.¹⁴ Nd Judam turoh bro yiham rhu haso hanyom Jisasr yiro Bro Nkifrarhu temper kmifar rim fknenihato met yindarim mrokfom hemourm.¹⁵ Judaroh bro tohak yimam Jisasr kfomo mrokfom wanyomohat tuha mrokfo duha rhumomn tfit afo Jisasr yukatohhato hifa mmbra memom, “Ndhtet skurr yi juha yimar to finji kanjo ndhtet duka tungunefm yekwarm?”¹⁶ Jisasr tawo kfo memorm, “Nda mrokfom, na nd kfiwam, niko mirahko ka be tukanhu yima yuhuruhem. Nhai. Nd na kfo tkrurafyuk Bro Nkifrarhu mrokfom kfo ptha nuhaswanko.”¹⁷ Wom yimar kangr, ‘Be tu Bro Nkifrarhu dukef yuhat ahik mifa,’ nd yimarn yakrahrt nda na kfo pthiwa mrokfothu mna yuhat. Rorn yak nhtarahrt nda na kfiwa mrokfot tu Bro Nkifrarhu mrokfot kfiwan o tukanhu dukefrn niewatm kfiwanm.”¹⁸ Yimar be turhu yima yuhurn mrokfom wakfo pthakneft, nd yimar kangr be yuwi yimam akfo kafhurma. To yimar nd tur kfo tkrurafyuk yimarhu yufat kfo kafhurwort, nd yimar tu dborioh yimayer. Nhai yimam frnhehkahrm.

¹⁹ Bingot Mosesr hemo boririfhu mrokfom, to nhai nikmoh wom rpar myakni marnyakahrt nd boririfhu mrokfot. To tamohmpno tfit nann kfo yamukako, ‘Ror nhai hikkahr nkifra boririfhut.’ Nd nambur yima yuhumpno nanhu waskfot kfiwuko?”²⁰ Ror inji kfomotr, tfit met yindarim sinyahato kfo memorm, “To frohm waskfot kfiwamn? Nine ka womhtet kmi yarhr mthu nawohtrn inji kfo mumiwun.”²¹ Rom inji kfomotm tfit Jisasr kfo memorm, “Na Sabat yiha wom mirakerkfot hingrnamotant, niko to htihato tuha yafotha duhatko rhumoko.”²² To niko Mosesrhu nkifra boririfhu mrokfot nkifra tha pukneft yak hikwakomn womnam Sabat yihamn yonroh tham puk-wokomm. Nd tha pukneft nhai be Mosesrn buha wahtakrmort nd hingrneft. Nhai. Bingot bi nikmoh nkiframpon

* **7:21:** Nd Jisasr kfomo mirakerkfot ka nd Betesdathu yuk bfar hingrnamo mirakerkfotn kfomor. Nd tndh mrokfot htikfot Jon 5.1-18 kfotn yo tfit htikfot Kisim Bek 31.14-15 kfotn.

rihingrnakmomt nd hingrneft. ²³ Nikmoh nkifra tha puk yuhat Mosesr kфомот nhai yafhokah-komt. Yonr nurnineft 8-yuk marrn tha pukwokomm. To Sabat yiharn nd yonrhu tha puk yihar rhuneft nhai mekahko, ‘Afo Sabat yihar rhunihato tfit ndwom yiha tha pukrahnomr.’ Nhαι inji nakahko. Nd Sabat yiharn tha pukwokomr. To tfit tamohmpno na Sabat yiha wom yimar yak marnya-motanr niko kfo namburwako? ²⁴ Mirahko be nyngaye htiyuk tamoh tamoh nefm htihatо bmbri mrokfom tubatu furakninomm. Afo hti nhta yak nhta marnyahato ee btn mrokfom tukfot.”

Met yindarim memom, Jisasr ahti hiknomr; tu Kraistr mifer?

²⁵ Jerusalemrhu wom met yindarim nd Jisasr pthamo mrokfom wanyhato kfo memom, “Ka nda yimarn Judaroh bro tohak yimam kangm awasnom? ²⁶ To nd yimar to asor nda yonmari yima rifiny buhar pthiwohat, to nhai wom rpa yimar kfo wokkahrr. Nhαι. Ka ror pthiwohat, ka rorhu mrokfom wany nhtiwamn ka duka kangm asor met yindariroh minrfa htiyakyuk yimar Bro Nkifrar htangotmor. Ka inji dukewamn nhai kfo wokkahmr?” ²⁷ To tfit wommn kfo memom, “Nd niko kfiwa tngr hifa. Tmift nd niayuk yima Kraistr nhai wom yimar tawisafruhatrt rorhu trha yuhat. To nda nom kfo pthiwa yimar ror nom tawisafwonomt rorhu nia yuhat.”

²⁸ Jisasr Bro Nkifrarhu temper kmifar tohhato met yindarim kfo yahrnya memorm, “Niko ka duka kangko ka tawisafwokma yo nanhu trha yuhat ka tawisafwokomt? Nanhu nia nmbuhat, nhai na be tukanhu fijo niarmoya. Tu Yifem mifr kfo tkrurmotra niarmoya. Niko nhai tawisafkahkomr. ²⁹ Na, na tawisafwanr. Na rorpo тоh tanymoya. Rorn kfo tkrurmotra niarmoya.” ³⁰ Inji kфомotr rom wanyhato memom, “Ayaknomr.” To nhai. Tafi rorhu yak yihar bi niarmor; to be nhai wom yimar bi yakaknirmorr. Nhαι.

³¹ Bok met yindarim rroh bro dukefm Jisasrn yihato kfo memom, “Ka asor nd yimar met yindariroh minrfa hbhakyuk yimar Bro Nkifrar kfo tkrurafmor. Ka rorn nd Kraistr hingrnayuk mirakerkfom mfro hingrnewur.”

Bro Nkifrarhu temperrhu tohukatohyuk polism Jisasrhu yakt yimo yuhat

³² Yimam nd Jisasrhu hingrnfroh mrokfom nhowi nakfo nuhas nakfo nuhasmoatm, Farisim wanyomom. Wanyhato memom, “Jisasr myakhato kalabus htarahnomr.” Ndnnetn romi prisroh bro yimam yihato Bro Nkifrarhu temperrhu tohukatohyuk polism kfo tkrurafmotm rom yimom. ³³ Jisasr kfo memor, “Na be inji dfik yiham tohno tanyrhoyanko tfit yiruha tukia kfo tkrurafyuk Yifemrhu kmiko. ³⁴ To nd yiha yak hambro hasorahkma, to nhai htirhotkma. Nd na yiruha kmit niko nhai yiruhatkomt.” ³⁵ Be Judam inji wanyhato tum rinakfo nakfo memom, “Bar yimako, fitohko yiruhatr nom hti hambro hasoruhanom? Ka ndu nmoh wom yimatm kantri Grikko tohyukmpno yihato ndkorhof yimam mrokfom hirahr? ³⁶ Yo kfo kangrnom, ‘Yak hambro yak hambrorahkma, to nhai htirhotkma.’ Yo tfit wom kfot kfo kangrnom, ‘Na yiruha kmit niko nhai yiruhatkomt.’ Tone finji dukahato inji kfiwarnom?”

Tu yafothet bu yinhar bupam mfrfnah hasoruha yuhat

³⁷ Nd lotu burwa yiharoh wuroh tikofhna yihar ndr tu bro yihar rhu-momr. To nd wuroh bro yihar rhumorn Jisasr wasinyahato kfo yahrnya memor, “Ni fitoh yima nyunguram knewun, nanpno waniekahtn, bupam hiruhann. ³⁸ Mrokfot Bro Nkifrarhu rfa borngt yorhwat to inji kfo kangt, yimar nanhu mrokfom wany yakiohato hikwar, rorhuko tu yafothet bu

yinhar bupam be mfrfnah hasorahm.” ³⁹ Nd Jisasr kfomot, ndt yimam rorhu mrokfom wany yakiohato yakruha Bro Nkifrarhu Yafothat, ndtn kfomor. Nd yiham Jisasr tafi nohhato sinya duhatrn ndnettn Bro Nkifrarhu Yafothat nhai bi yimam hermorm.

Met yindarim nayak mkumo yuhat

⁴⁰ Wom met yindarim Jisasr kfoyuk mrokfom wany nhtahato kfo memom, “Dajohmn, ka asor nd profetr Bro Nkifrar kfo tkrurkfot kfomor.” ⁴¹ Womm waruhato kfo memom, “To tawom ndr. To nd yimar Bro Nkifrar kfo memo, yimaroh minrfa htikyayuk yima Kraistr nierahr.” Tfit womm waruhato kfo memom, “Nhen. Ror arhur to nhai Galili yuhat niarmotr. ⁴² Bro Nkifrarhu rfa borngt bi kfo hta memot, ‘Kraistr nianeft tu Defit frikef yuhatn nieruharn Defitru taun Betlehemtn minurrah.’ ” ⁴³ Be ndtpno rinakfo nakfakhato nafak mkumom. ⁴⁴ Womm wasinya fnahhato memom, Jisasr ayaknom, to nhai, nhai womr tir htarmorr.

Judarah bro tohak yimam Jisasr kfoyuk mrokfom nhai wany yakiormomm

⁴⁵ Nd temperr tohukatohyuk polism tfit yimotm prisroh bro yimami Farisim kfo ttiwonak memomm, “To tamohmpno nhai yakna duha yir-fokomr nd yimar?” ⁴⁶ Inji kfo ttiwonakmotmm tfit kfo memomm, “Nhai wom yimar ror pthiwa kanjohot mrokfom kfo pthakahrn. Nhai.” ⁴⁷ Tfit Farisim kfo wok memomm, “Ka kfo nheh bonhehmorko? ⁴⁸ To htitkmmom nom Farisinomi Judarah bro tohak yimam wany yakiowonomr nd yimar? Nhai mif. ⁴⁹ Yimam rorhu mrokfom wany yakiohato hikwam, nd yimam boririfhut yakitoh duhatm, romn wany yakiowomr. Bi Bro Nkifrar yak tutfakfot kfomorm nd yimar.”

⁵⁰ To Farisiroh womr, rorhu yufat Nikodemusr, ror bingot bi Jisasrpnio yihato naphthetfn, ndnat womm pthamohat tfit ttiwon memorm, ⁵¹ “Nmoh nkifra boririfhut nhai inji kfokaht, wom yimar tafi rorhu mrokfom wany hik marnya duha, be bmbri finji naknikfot.” ⁵² Ror inji kfomotm tfit rom kfo memomr, “Bare, nine rorhu kmi Galili thofe? To wahtint Bro Nkifrarhu rfa borngt yorhwa mrokfot. Mrokfot nhai kfo mekaht wom profetr Galili profinsn nierahr. Nhai.”

Wom ramet mett ijoh yuhat yimott Jisasrpnio hanyomtt

⁵³ Nd nia rifiny hanyuk yimam bi turoh kuny kmifako yi hanyomom.

8

¹ To Jisasrpar afo tuha rhu hasohato tfit yura Olifet kmit muhмор. ² Tfit bi dbha ksfut yohnemorn Bro Nkifrarhu temper kmifar yimor. Met yindarim yimomn rhu hasetrn rifiny hmbremomr. Be Jisasr waruhato mrokfom hemorm. ³ Met yindarim mrokfom he hasetrn wom boririfhuthu tisami yo Farisim wom ramet mett wom yima furar yimoatt rom htihato yaknimomtn nd met yindar rifinyrpnio mhatohmomt. ⁴ Mhatohhato Jisasr mkfo memomr, “Tisaye, nda mett wom yimarpno fasoh neft na hasettn hti nriyafaknimomt. ⁵ Mosesr yakitohyuk boririfhut inji kfo kangt, wom mett ndhtet nefet nem be tahiye tahiye frdbofna nohkfot. To nom inji na thombat ni finji kforuha?” ⁶ Nd rom kfo ttiwonmo mrokfot be yuwi memom, “Inji akfo ttiwon rhtikahnomr finji kfiwure, nd ror kfoyuk mrokfot nom tohhato yakrahnomr.” Rom inji kfo ttiwonmohat, Jisasr nhai

mfhata kasinyarmort. Ror bbinysoft tario-bttahato bbinysoft tir pinyafe wandfa-mour.

⁷ Masat masat ttiwon hasuknamoatmr Jisasr wasinyahato kfo memorm, “To niko ndar tohwako nhai womr womr fasoh neft narmor ee rorn ndar met barkof tahis atutwart.” ⁸ Ror inji kfonimormn tfit nyingatikt bbinysoft tariobttahato tir pinyafe wandfamour. ⁹ Be rom nd mrokfot wanymomn be mrokfo kfo duha mrokfo kfo duha fnahni hanymom. Nd bro yima boyimat tohak gngonmotm, ee bt womr womr rifiny hanyukm mongtn fnah yakitohmom. Jisasr turpar tariobt hasetr htanymomr. Mettne rorhu nyingatikko tohmout.

¹⁰ Be Jisasr mfhata kasinyahato nd met kfo ttiwon memort, “Ndasha tohhasi yimame bi fitoh yuhata yitam? To nine frohm tohhato ni nayuk nefm kfo pthiwamm?” ¹¹ Be inji kфомotrt tfit kfo memort, “Bro yimaye, to nhai womr.” Tfit Jisasr kfo memort, “Na nhai inji kforhotann. Wain. Waikahn mirahn tfit womr fasoh neft anaya.”

Jisasr ndar bbinysoft yak nukewa ksher

¹² Jisasr tfit kfo memorm, “Nann nukeft hatohhato nda bbinysoft kak nukewant. Fitoh yimam nanhu mrokfot wanyhato hikma, rroh nda bbinysoftu toh yuham yi marnyarahm. Nhai yifungt yau mmo bommiwa kanjo yau mmo bammoruhatm.” ¹³ Womr Farisim nd mrokfot wanyhato Jisasr kfo memorm, “Ni be tunhu hingrnfroh mrokfomi yo tamoh tamoh nefroh mrokforpamn kfo ptha srhwon. Ndnatn met yindarim nhai nd ni pthayuk mrokfom wany fugha-ruhatm.” ¹⁴ Rom inji kфомotm tfit Jisasr kfo memorm, “To hifa inji kfo kangko, na be tukianhu tamoh nefroh mrokforpamn ptha srhwa. Na, na sinya tanyuk kmir na tuka tawisafwanr yo na yiruha yuhata na tuka tawisafwant. Ndnatn nanhu toheft kfo ptha yimbu hikwant. To niko nhai tawisafkakhomt nanhu kmit yo nhai tawisafkakhomt na yiruha yuhata. Ndnatn nanhu toheft niko nhai hti hikkfot. ¹⁵ Niko kak nhtewukma ndar bbinysoftu yimam yak nhtewa kanjo. Na, na nhai inji womr yimarhu nefm htihato kfo pthakaha. ¹⁶ To na kanga womr yimarhu nefm htihato akfo pthaya, nhai turpeta kfo pthakaha. Nhai. Nd na kfo tkrurafmo Yifemrpno tohhato nonn kfo pthewuno. Ndnatn nd na pthayuk mrokfom met yindarim wanyneft rom wany yakiorahma. ¹⁷ Mosesrhu boririfhuthu mrokfot inji kfo kangt, ‘Womr hus yimaf kfo srhyuk mrokfom be rpa yuhata mrokfom kfo hikfm, be nd mrokfot tu kfo mif kfoyet.’ ¹⁸ Na tukianhu hingrnfroh mrokfo yuham kfo ptha srhwam, na tkrurafoyuk Yifemr to be na kfiwa yuhata kfo hikworm.” ¹⁹ Be Farisim inji wanyhato ttiwon memorm, “To nd ni kfiwa yifemre fitha yorhwar?”

Tfit Jisasr kfo memorm, “Na nhai tawisafkakhma, nhai nanhu Yifemr niko tawisafkfat. Na tawisafrahko, nanhu Yifemr tawisafrahkomr.”

²⁰ Ror nd mrokfom met yindarim kfo hemohat temper kmifarn brbo ofa maruham htamoa tkittpno mrokfom hemorm. Tafi rorhu yak yihar bi niarmor, ndnetmn nhai yimam sinyarmom rorhu yakneft.

Jisasr kfo memor, “Na yiruha kmit, niko nhai yiruhatko.”

²¹ Met yindarim Jisasr wompam tfit kfo memorm, “Na frtrohruhanko. To niko yak hambro hasorahkma. Niko tukmoh fasoh fasoh nefm nahaso nahasoruhakomn nohrahko. Nd na yiruha kmit nikom nhai yiruhatkomt.”

²² Judaroh bro yimam nd Jisadr kromo mrokfot wanyhato tum rinakfo nakfo memom, “Bar yimako, to tamohmpno kfo yamukarnom, ‘Niko nhai yiruhatkomp nd na ziyuk kmir?’ Nd mrokfote finji dukahato inji kfi? Ka turn yak nadborrahr?” ²³ Rom inji kfo motm tfit Jisadr kfo memom, “Niko ndar bbinysoft watohyukeko. Na yura hefenr watohyuka. To na mirahko ka nda bbinysoft thofa. Nhai. ²⁴ Na kfo famuyanko, niko tukmoh fasoh fasoh nefm na hasoruhakomn nohraho. Niko nhai kfo miruhatkoma, ‘Tor Bro Nkifrarhu kfo tkrurafyuk yimar.’ Ndnetn na kfiwanko, niko tukmoh fasoh fasoh nefm na haso-ruhakomn nohraho.”

²⁵ Kfo ttiwon memomr, “Bare, nine frohe?” Tfit Jisadr kfo memom, “Na bi asonhof rikfo nuhasakmoyanko. ²⁶ Na nd niko niwa nefmpno bok mrokfom kforfoyo ko yo jasm kanjo rhuhatu nikomh nefm yak nhta-herfoyo. Tmift na nhai be nanhu dukefrn na tamoh tamoh mrokfom kfo pthakfot. Na, na be nd na kfo tkrurafyuk Yifem mifrhu tng yuhatn hikhato ndar bbinysofthu yimam mrokfom kahukanm.” ²⁷ To rom wanymohat nhai duka marimom, “Jisadr ka Bro Yifemrn kfiwurnom.”

²⁸ Ndnatn Jisadr kfo memom, “Na Bro Nkifrarhu kfo tkrurafmohat, kto niko na Bro Najoma yura bgre mishu wuhta yiharn, nd yiha nyingam yoh dhorhahato hti dukarahko. Yo hti hikrahko, na nhai wom nef be tukanhu dukefrn hingrnakaha. Na Yifemr kfo htiwa yuhatn hingrna hikwa. ²⁹ Na kfo tkrurafyuk Yifemr toh tkafwora, nhai frtrohhato turpetpaya yak mmbrafnykaha. Nhai. Na niwa nefm tur hti yindhorwa nefm na hikwa, ndnatn nhai frtrohkahra.” ³⁰ Bok met yindarim nd Jisadr kfo pthamo mrokfot wanymohat rroh bro dukefm rorn htamom.

Nd tu yafothet mrokfot met yindarim mhti hikakruhamtn, nd fasoh fasoh nefm frtrohhato frfnahrahm

³¹ Be nd Judam, Jisadrhu mrokfom wany yakiowetm, kfo memom, “Niko nanhu mrokfot yakitoh kihrahkomt, be nanhu disaipar mifko rhurahko. ³² Nanhu disaipar mifko rhuhatu nd tu yafothet mrokfot mhti hikakruhamkomtn be nd mrokfotn nd niko kihmbre htatewa fasoh fasoh nefm yafhohato frfnahrahko.” ³³ Be rom nd mrokfot wanyhato kfo memom, “Nom Abrahamrhu frikef yuhathu yonenom. Nom nhai wom yimarhu yinhitn hingrna hafknekanom. To tamoh dukeftpno kfo yangannom, ‘Tfit frfnahrahko?’”

³⁴ Jisadr kfo memom, “Na kfo mifwanko nda yima yimat fasoh nefm niwam, rom be turoh fasoh nefm kihmbre htatewum. ³⁵ Wom slefr wom ripharpno tohwohat, nhai be rompno rim tohnihatu rorhu yufat rompno rhukaht. Nhai. Be hingrnfroh hingrna hanyeftn tohekworm. Tu nasak yonrpar yifamaroh yufampno korhr. ³⁶ Ndnetn bi Yinem Yonrn nd fasoh fasoh nefm mtitikt kanjo kihmbritayukm bi frtmbho tebikr trufekrko, to be niko nhai wom fasoh nefm kihmbrekahmko.

³⁷ Rot to niko Abrahamrhu frikef yuhayet. To tmift nanhu mrokfot nhai rhukahtko. To ndnetkomn nanhu wasneft waji yaukma. ³⁸ Na kfo pthiwa mrokfot na tukianhu Yifemr kfo hta bohtayuk mrokfo yuhamn kfo pthahiko. Niko rot tukmoh yifemr kfo nuhasyuk mrokfo yuhamn hikwoko.”

³⁹ Judam nd Jisadr kfo pthayuk mrokfot wanyhato tfit kfo memomr, “Abrahamr to nmoh nkifrayer.” Tfit Jisadr kfo memom, “Niko tu Abrahamrhu frikef yuhathuko arhuko, to be nd ror namo nef yuham yak hikrfoko.

⁴⁰ Na kfo pthiwa mrokfom, na tu Bro Nkifrarhu tu mrokfo mifm kfo pthiwa.

To tfit kangko awasnomr. To ndt nhai tu Abrahamrhu neft hikkahko. ⁴¹ Nd niko niwa nefm, ndm niko tukmoh yifemrhu yuhamn kak hikwoko.” Tfit rom kfo memomr; “Nmoh mmemrom nhai ijoh tonehato hiyaurmomnom. Nhai. Nmoh yifemr, to Bro Nkifrarpar.” ⁴² Rom inji kфомotm, tfit Jisasr kfo memorm, “To na to froha? Na to rorpo wusinya tanyhato niayuka asha tfit nia tohwa. Niko tu Bro Nkifrarhu mifko arhuko, to na yakrfokma nikompno tohrfoya. Nanhu nia nmbuhat, nhai na be tukanhu fijo niarmoya. Tu Yifemr kfo tkrurmotra niamoya.

⁴³ To tamohmpno na pthayuk mrokfo yuham wany hik duha yitakomm? Ndt nhai be sfno. Nanhu mrokfom nhai wanyuruhatkomm. ⁴⁴ Niko tukmoh yifem Satanrhu yonkomn kangko tukmoh yifemrhu dukef yuhatn ahiknom. Bingot to frohmn yima wasmoam? To ror yima wasmoarn nhai tu mrokfot yakitoh-rmoar. Yo yima kfo nehneft to frohm yifemmoamt? To rorn yifemmourt. Ror nd neft bi mhatoch fnahmort. ⁴⁵ Nd na kfiwa mrokfot tu yafothet mrokfot kfiwanko, to niko Satanrhu yonkomn nhai wany yakiokahkma. ⁴⁶ Ka na fasoh nefm nayet yimayann nhai wany yakiokahkma? To niko inji duka thoft, to bt wakfo nuhaskma na niwa fasoh fasoh nefm. To na tu yafothet mrokfot ptha thoft, to tamohmpno na pthayuk mrokfom wany yakio duha yitakomm? ⁴⁷ Bro Nkifrarhu yonm Bro Nkifrarhu mrokfom wanukomm. Niko nhai ka tu Bro Nkifrarhu yonko rhukahko, ndnetkomn nhai rorhu mrokfom wanykahkomm.”

Jisasr kfo memor, “Abrahamr tafi trha duha na bi inji rhungotmoya.”

⁴⁸ Tfit Judam sinyahato Jisasr kfo memomr; “Nome ka kfo mifwonom nom kfo yamukahat ni Samaria thofnn kmi yarhr thu hamumiwurn?” ⁴⁹ Rom inji kфомotm tfit Jisasr kfo memorm, “Na nhai wom kmi yarhr thu hammokahra. Na tukianhu Yifemrhu yufatn wuyuta grhiwota, to tfit nikomn nanhu yufat yiro wahtewukomt. ⁵⁰ Na nhai be tukianhu yufatn yura yura htakaha. Tor wom yimar, rorn nanhu yufat yura wuhtaraha, ror jaser. ⁵¹ Na kfo mifwanko, wom yimar nanhu mrokfot wanyhato yak hikhahrt, nd yimar nhai nohruhatr. Be tu nhai mif.”

⁵² Tfit inji kфомotr Judam kfo memomr; “To nom bi wany nhte-wunomn ni ufasohtet kmi yarhr thu hamumiwatrn bi kfo mmo bamumiwun. To Abrahamr Bro Nkifrarhu mrokfom hiketr to nohmor, yo profetm Bro Nkifrarhu hayuk mrokfom kfo pthamoam to nohmom. To tamohmpno tfit nom kfo yangannom, ‘Wom yimar nanhu mrokfot yak hik marnyarahrt, nhai nohruhatr?’ ⁵³ Bar yimako, ka tu inji kfiwohat ka kangn nanrpaya tu bro yufeta. Ka nohmo nmoh nkifra Abrahamri profetme ka nhai yima furayem?”

⁵⁴ Tfit Jisasr kfo memorm, “Na be tukianhu yufat yura wuhtayant, nanhu yufat fipa duhatt rhurfot. Tu hifa nanhu Yifemr, nikhom Bro Nkifrar, rorn nanhu yufat wuhtamort. ⁵⁵ To niko rorhu ruheft nhai htirmokomr. Na awi htiyeta rorhu ruheft. To na tfit kfo miruha, nhai htirfoyanr, to be niko kanjo kfo brurmaha rhurfoya. Na bi rorhu ruheft hti hiketann to be ndnatn rorhu mrokfom kak hik marnyewann.

⁵⁶ To nikhom nkifra Abrahamr dukamohat nanhu nia yiharhu htineft, ror yindhormor. To na niahato turhu nyingaye htimohat, yima yuhur mirhumor.” ⁵⁷ Judam nd mrokfot wanyhato Jisasr kfo memomr; “Bare, ni tafi 50 gunyijim duhaye, to finji kanjo htiyafmonr Abrahamr?” ⁵⁸ Tfit Jisasr

kfo memorm, “Na kfo mifwanko, Abrahamr tafi mmemt hiyau duharn, na bi inji rhumoya.”* ⁵⁹ Rom inji wanyhato tahim yakmomn memom, tahiye frdbofna nohnomr. To nhai, Jisasn nhofijo temper kmifar htanyomorrn fnahnimor.

9

Nyinga kunyjet yimarhu mrokfot

¹ Wom yiha Jisasn wiyauyau hanyomrn nyinga kunyjet yimar mhtimorr. Mmemt ror hiyaumohat bi inji nyinga kunyjetrn hiyaumotr. ² Jisasn disaiperm nd nyinga kunyjetr htihato ttiwon memomr, “Tisaye, frohmn fasoh fasoh nefm namotm nyinga kunyjetr mmemt hiyaumotr? Nd tu yimarn fasoh fasoh nefm namotr o yifammafn fasoh fasoh nefm namotf nyinga kunyjetr rhumor?”

³ Tfit Jisasn kfo memorm, “Nhai ndar yimar wom fasoh neft narmor yo nhai rorhu yifammaf wom fasoh neft narmof. Nhai. Nd yimar inji rhu-mohat Bro Nkifrar memor, ‘Nanhu hingerneft rorpno tafont mhfnahrhotant met yindarim htirahmt.’ ⁴ Na Bro Nkifrar tkrurafmotra fawihnamoya. Nda mar nukar yorhwa fijo nom Bro Nkifrarhu hingerneft hingerneft. Kto tfit mirkahtt yifung tiwa, yimam nhai wom tamoh hingernefm hingernefm. Nhai. ⁵ Na afo nda bbinysoft tohhato nann nukest bbinysoft kahukant.”

⁶ Jisasn inji kfonimorn bbinysoftn wabrucktumor. Wabrucktuhato nd brukpami bdrpam rpat yaktk botkak-mormn nd nyinga kunyjet yimarhu nyingamrn rifak yenyumr. ⁷ Riyak yenyafhato kfo tkruraf memomr, “Siloam bujr warim yuk rufafont nd bdr yeny.” (Nd yufa Siloamthu yimbu yuhat inji korht: Kfo tkrurafkfo). Be nd nyinga kunyjr yimorn fuk truf thumorm nd nyingaf thu yenymo bdrpam. Rim yuk truf tanyhato tfit kmifako yimohat nyingam bi yukatohetm kmifako yimor.

⁸ Nd nyinga yukatohetrhu kmi thofmi yo ror barkof afo nyinga kunyjetr rhuahato buha yihota yuham rhu hasohato met yindarim maruha wuskam tndaumoam, htimomrn tum rinakfo nakfo memom, “Barenko, nd yimare ka ndu yihotam rhu hasohato maruha wuskam tndaumoam yimayer?”

⁹ Womm kfo memom, “Uwa to tawomer.” Tfit womomrn kfo memom, “Nhai. Arr womer. Rpahtet ruhettfn inji hti mumiwunomr.” Tfit turn kfo memom, “Nhai womm, to tawomaya.”

¹⁰ Tfit rom ttiwon memomr, “To nyingam finji netnm yukatohwanm?”

¹¹ Tfit ror kfo memom, “Nd rom yutiwa yima Jisasn, rorn brukpami bdrpam rpat yak yeny boyenyakhato nanhu nyingam nde yak yenyafhato kfo tkrur famura, ‘Siloam bujr waikahnn nyingatikt wayuk truffwant.’ Inji kfefitra na yihato tek bujr nyingatikt yuk truffhat, be nyingam rifukatohekanm.” ¹² Tfit rom ttiwon memomr, “To nd yimare fitha inji yorhwar?” Tfit ror kfo memom, “To na nhai tawisafkaha.”

¹³ Be nd yimar yaknimomrn Farisimpno hanyomrn. ¹⁴ Jisasn nd yimarhu nyingam brukpami bdrpam rpat yak yenyakhato nyingam htahato nyinga yukatohmohat, nd hingerneft Sabat yihar hingernefm. ¹⁵ Farisim-pno hanyomotmr tfit romn wompam ttiwonmomr rorhu nyingam frdbtakmo yuhat. Tfit ror kfo memom, “Rorn brukpami bdrpam rpat yak yenyakhato nyingam htitra tfit bujko yihato nd yak yenyafyuk bdrpam yuk trufftanm

* 8:58: Jon 8.24 htikfot.

nyingam frdbtakma.” ¹⁶ Be wom Farisim inji wanyhato kfo memom, “Nd yimar Sabat yiharhu boririfhut nhai yak hikkahrt. To mirahko ka Bro Nkifrar kfo tkrurafmotr niamor. Nhai.” Tfit wommn kfo memom, “Yimar, ndhtet mirakerkfofom nayet; to finji kanjo ufasoh nefm hingrna-rform?” Rom tum inji rinakfakhato nafak mkumom. Womm Jisasrpn tohmom, womm rom tum inji tohmom.

¹⁷ Farisim tfit wompam ttiwon memomr, “Ninhu nyingam yak marnye yimare, ni finji dukiwanr?” Ror tfit kfo memom, “Nd yimar, ror profeter.”

¹⁸ Nd Judaroh bro yimam nhai marimom, nd yimar tu nyinga kunyjetr rhumotr nyingam marnyamomr. Nhai. Memom, fura kfoyet. Ndnnetmn tfit nd yimarhu yifammaf nakuyakmomf. ¹⁹ Be rof niamotf ttiwon memomf, “Nifn wakfofn. Ndarre nifnihu yoner? Mmemt hiyaumohate ka bi inji nyinga kunyjetr hiyaumotr? To finji netr rorhu nyingam bi yukatohwarm?” ²⁰ Be nd yonrhu yifamma sawohf kfo memof, “Nda yonr nnoher. Ror nurmohat nyinga kunyjetr nurmotr htimononr. ²¹ To nda rorhu nyingam frtrhahato yukatohwa yuhat nhai tawisafkahnno, yo yimar rorhu nyingam yak marnyayukm no nhai tawisafkahnno. Turn wattiwonkahtko kfo ptha nuhasahrko. Bi bro damiager turn ptharahr.” ²² Nd yonrhu yifamma sawohf bi Judaroh bro yimaroh yima yuhum bi tawisafetfn to mrokfom kfo pthamohat tfit kfo memof, “Tu yonrn kfo ptharahr.” Bi Judaroh bro yimar kfo hta memom, “Frohr kfo kangr, Jisahr tor nd yimar ndar bbinysof thofroh nrfa htiryakyur. Inji kfoyuk yimar nhai nom Judanmoh lotukfot rhunho hakuruhatrnom.” ²³ Yifamma sawohf bi nd mrokfot bi wanyetfn to be tu yonr kfomof mrokfo kfo pthaneft.

²⁴ Tfit wompam nakumomr nd bi marnyaniet nyinga kunyjr. Tfit wompam yimotr kfo memomr, “Ni Bro Nkifrarhu nyingampno wakfo miftwannom ni asomif tfit kfo pthiwohat. Ni nd barkof kfi yimar nom tawisafwonomr tu fasoh fasoh nefm nayet yimayer.” ²⁵ Inji kfomotm, tfit kfo memom, “Yo ka, ndhtet ufasoh nefm nayeter? Ndm na nhai tawisafkaha. Na tawisafwat akfo nuhasanko. Bingot na nyinga kunyjeta rhu hnamoya, tfit ariha na bi kukatohwa.”

²⁶ Tfit rom ttiwon memomr, “To ror finji namorn? Finji namotr ninhu nyingam yukatohwamn?” ²⁷ Tfit kfo memom, “To bi kfo nuhasanko. Kfo nuhastanko nhai wanyrfoko. To tamohmpno kfo yamukako, ‘Wompam awany hatohnom?’ E, kangkone, ‘Rorhu disaipenko arhunom?’”

²⁸ Farisim inji wanyhato kfo memomr, “Arom rhupete, tfit nomn yari yutewun. To tunn rorhu disaipere. Nom ndoh Mosesrhu disaiperenom. ²⁹ Nom wany hnamo mrokfot Moses-rpar Bro Nkifrar pthamorr. To nd yimar fitoh yuhat niamotr nom nhai tawisafkahnno? Nom mmiwunomt rorhu nia yuhat.” ³⁰ Be nd yimar kfo wok memomr, “Nd niko kfiwa mrokfot be tu ndohtet hnomha mrokfot kfiwuko. Nd yimar nanhu nyingam yak marnyamom mumiwukomt rorhu nia yuhat. ³¹ Nom womt hitnom Bro Nkifrar nhai wanyhekahrm fasoh fasoh nefm nayet yimaroh mrokfom. Yimar Bro Nkifrarhu yima yuhur rhuhat rorhu dukefrn hikwar; tor nd yimar tamoh mrokfom Bro Nkifrarpo kfo pthaneft wanukr. ³² Bingot mifn nmoh nkifram toh hnamompno nhai wom tndhkfot wanyrmonomt, kfo marimom wom yimar mmemt nyinga kunyjetr hiyaumottr; kfo tfit wom yimarn wom hingrnefm hingrnamotrr nyingam frtrhahato fukatohmor.

Nhai. ³³ To Bro Nkifrar akfo tkruraf duha yirr nd yimar to nhai wom tamoh nefm narfotrm.”

³⁴ Farisim nd mrokfot wanyhato kfo memomr, “Ni wanurtamohat fasoh fasoh nefm bi rpat mihasuhmonm. To tfit frohm yamuka akfo tebosa?” Be inji kfohato nd rifiny kunyr toh hasetr fak tuhafmomr.

Yimam, Bro Nkifrarhu mrokfom yak hik duham, nyinga kunyjet yimam kanjo korhm

³⁵ Judaroh bro tohak yimam nd yimar yiro rifinyuk kunyr ruhetr yak tuhafmotmr Jisasr inji wanyhato fak hambro hanyomrr. Yak hambro hanyhato mhtimorrn ttiwon memorr, “Ni Bro Najomrhu dukefrpno korhn o nhai?” ³⁶ Tfit nd yimar kfo memor, “Bro yimaye, nd ni kfiwa Bro Najomr to froher? Wakfo nuhaskahtna nanhu dukefr be rorpno htaruhanr.” ³⁷ Tfit Jisasr kfo memorr, “To bi hitwonn. To nd ninpno pthiwa yimayer.” ³⁸ Tfit nd yimar kfo memor, “Broye, nanhu dukefr ninpno htewanr bi.” Be inji kfonihato Jisasrhu wurampno mtabokmehato mfhat wasimort.

³⁹ Jisasr kfo memor, “Na nda bbinysoft niamohat nda yimam niwa fasoh fasoh nefroh tafonthu yak htaneftn niamoya. Ndnnetn met yindarim, nyinga kunyjetm yorhwam, tfit yukatohhato nann hikrahm. Tfit nd nyingetm, rom tfit nyinga kunyjetm rhuhatu yau mmo bammoramh.”

⁴⁰ Wom Farisim Jisasrpno tohetmn Jisasr nd mrokfot tumohat kfo ttiwon memomr, “Nome ka rpat nyinga kunyjetenom?” ⁴¹ Tfit Jisasr kfo memorm, “Niko nyinga kunyjetko warhuko, to nhai wom tamoh mrokfoyetko rhur-foko. Nhai. To tfit tukomn kfo kangko, ‘Nom hifa dborioh nyingetenom.’ Ndnatn niko nayuk fasoh nefm tom afo korhmko.”

10

Jisasr sifsifroh tu dborioh tohukatoher

¹ Jisasr tfit wompam kfo memor, “Na kfo mifwanko, yimar nhai nd sifsifm yorhwa gnathu yifhatik yuhat rim fnahnikaahr, be turn buha gnat muhnihato miftohnir, ndhtet yimar rikoh yimayer. ² Yimar tu yifhatik yuhat rim fnahnitar, ndr tu sifsifroh tohukatoher. ³ Nd sifsifroh gnat tohukatohwa tohukatohr yifhatikt yak tfanyekwatrr rim fnahnitr. Sifsifroh yufam yutahato nakunest rorhu tngtn wany tonitatom kak hfhanwatrm fnahnitm. ⁴ Sifsifm rim hfnahti thombat turn hatoheworm. Sifsifm bi rorhu tngt wany nhtetmn be rorn kak hikwom. ⁵ Rom nhai wom yima furam hik furakfot. Nhai. To wom yima furar nakunest wany kakrmitmr. To rom nhai wom yima furaroh tngm wany tonekfot.” ⁶ Jisasr nd kfo nhombra mrokfot kfo pthamohat rom fak mnotamomt, nhai yakrmomt. ⁷ Ndnatn Jisasr kfo memorm, “Na kfo mifwanko, nanrpaya nd sifsifroh rim fnahni yuhathu yifhatika. ⁸ Ndwom womt nanhu nyinga yuhat tohak hanyukm, rom rikoh yimayem, wuska teh hbotfayet yimayem. To ndnatn sifsifm nhai rroh tngm wany tone-rmoamm. ⁹ Na, na tu yihota rim fnahni yuhaya. Yimar nanpno nierahr, Bro Nkifrarhu tirmn rhurahr. Nhai wom tamohm finjina finjinaruhatmr. Yarim fnahna rim fnahnihato ye wussoh htfas hakurahr.

¹⁰ Rikoh yimar nianeft ror nhai wom tamoh dukefrpno niakahr. Nhai. Ror be nd sifsifroh yak rikohhato was yenyefn niewur. To na niamohat, nhai nd dukefr niarmoya. Na yimaroh toh marnyaneft dukahato niamoya.

Yimam nanpno tohhato be nhai tfit wom tamohm yak hambroruhatm o dukaruhatm. ¹¹ Na, na sifsifroh dborioh tohukatoha. Dborioh tohuka-tohr inji niewur, ror turn rorhu sifsifroh tamoh nefm mfha htewurm. ¹² Yimar be maru dukefrn hingrna-neft, nhai sifsif tikat mifr tohukatohwa kanjo sifsifm tohukatohkahrn. Nhai. Yifako tohwa yaum htihakneft sifsifm yakrme htanyrahm. Yakrme htany-ruhatm yifakorhof yaum niahato sifsifm ye jborfahato rpa rpa hik tubaturahmm. ¹³ Nd yimar inji nayukr rorhu dukefr be maru hingrna dukefrparn korhrr. Rorhu bro yima yuhur nhai sifsifmn rhukahr.

¹⁴⁻¹⁵ Na tukia sifsifroh tu dborioh tohukatoha. Nanhu Yifemr na tawisafwora. Ror na inji tawisafwa kanjo na inji tawisafwanm nanhu sifsifm. Yo na Yifemr tawisafwa kanjo nanhu sifsifm inji tawisafwoma. Na sifsifm dukahato kanga anoha, nhai mrokfom. ¹⁶ Tom nanhu wom sifsifm. Nhai bi ndarwom sifsifmpno bi tohkahm. Ndmn kanga aiyakkahanmn wom sifsifmpno rpat htahato nanhu trgt bi wany nhtarahmt. Rpat wom sifsifmpno htahato rpa tohukatohrpaya yakitohruhanm. ¹⁷ Na, na be wofnwa mfha htahato tfit sinyaneft. Ndtpon nanhu Yifemr yindhorr mifwora. ¹⁸ Nhai wom yimarn nanhu yak nadborhato nohkfot. Nhai. Na be tukianhu fijo mfha htaruha. Na tukianhu Yifemr bi inji kfo htamora. Ndnatn kanga, mfha htahato tfit sinyaya, be inji naruha.”

¹⁹ Judam nd mrokfot wanyhato tfit nafak mkumom. ²⁰ Bok yimam kfo memom, “Kmi yarhr thu hamumiwatrr inji kfo mumiwur. Tamohmpno rorhu mrokfom wany yakitohwakomr?” ²¹ Tfit womm kfo memom, “Ndm to mirahko ka kmi yarh thu hamumet yimaroh mrokfoyem. Nhai. Kmi yarhm athu hammomr nd nyinga kunyjet yimar yak marnyarforr?”

Judam nhai hifa nyingam htarmoamr Jisarr

²² Bro frfon wormr tohmo yiharn Judam bro tofs Jerusalemko faki-tohmom. Nd tofs rom rhumot bingot Bro Nkifrarhu temperr Judam hingrnamohat nd yiha Bro Nkifrarhu tirtn nd temperr htamomr. To nd yihar tfit Judam ruhato rhu duka hanymoum. ²³ Jisarr temper kmifar yihato Solomon yufet kuny mkur yihom fauyak mfauyakmour. ²⁴ Yihom yauyak myauyak hasetrn Judam rifiny hmbriyaknihato kfo ttiwon memomr, “Nome ar nohof rigariyakronomn ninhu toh yuhati ninhu nia yuhathu kfo nuhasneft. Fitoh yiha kfo nuhas-ruhannom? Ka ni ndar yimann Bro Nkifrar kfo htamoh yimaroh nrfa htiaakyukr?”

²⁵⁻²⁶ Jisarr tfit rroh mrokfot kfo wok memom, “Na to bi kfo nuhas hnamoyanko, to niko nhai wany yakiokahkma. Nanhu Yifemrhu yufatpno hingrnefm hingrnewohat niko nhai ndmn mhti nhtak mikahko ndr ndhtet yimayer. Niko to nanhu sifsifkomn btn wany yakiokahkma, niko wom nndoh yima furayeko. ²⁷ Nanhu sifsifm awi nanhu mrokfom wany yakiowoma. Na tawisafwoyanmn nanhu mrokfom hikwomm. ²⁸⁻³⁰ Toh nkifranuyuk yafothat yahukotanm nhai finjinaruhatm. Bi tu nngrajohet Yifemr bi nanhu tirtn htayet yimam nhai wom yimar tfit nia yakruhatm. Nani nanhu Yifemr nhai wom nndoh nndoh. Nnoh ruheft rpat. Ndnatn Yifemrhu tirtn bi ruhetmn nhai wom yimar niahato yakkfot.”

³¹ Judam nd mrokfot mwanyhato tfit tahim yakmomn memom, tahiye frdbofna nohrahnomr. ³² Tfit Jisarr kfo memom, “Na fak nuhasmoyanko

nanhu Yifemrhu bok dborioh dborioh hingrnefm. To fitohtn niko hti namburhato yangako afrdbofnanomr?”

³³ Judam sinyahato tfit kfo memomr, “Nom nhai nd ninhu dborioh hingrnefm htihatoh tahiye frdbfnakfot kfokahnom. Nhai. Tunn kfo yamukatn, ‘Bro Nkifrarhu tkitt ayakant.’ Tot nd yuhatn kangnom, tahiye afrdbofna nohnomn. To ni be yima furann kangn, ‘Tfit Bro Nkifrar kanjo aruha.’”

³⁴ Jisasr inji wanyhato kfo memorm, “Niko htiiyeteko. Niko yakitohwa Bro Nkifrarhu yirmoht inji kfo kangt, ‘Na inji kfo memoyanko, “Niko Bro Nkifrar kanjo korhko.”’ ³⁵ Mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. Bingotn bi Bro Nkifrar yimam mrokfom hemoahat inji kfo memorm, ‘Niko Bro Nkifrar kanjo korhko.’ To mrokfom, Bro Nkifrarhu rfa borngt yorhwam, nhai kfonihato tfit kfo kekutkahrm. Nhai. ³⁶ Na tu Yifemr bi kfo htahato kfo tkrurafmotra nda bbinysoft fawihnamoya. To ndnetann na tfit kfo yamukahat, ‘Na Bro Nkifrarhu Yinema,’ to tamohmpno wany namburhato kfo yamukokma, Bro Nkifrarhu tkitt kangr ayaka?

³⁷ Na ndar tukianhu Yifemrhu hingrnefm nhai hingrnakanhanme, ee btn nanhu mrokfom wany yakio duha. ³⁸ To na, na hingrnewann rorhu hingrnefm. Na Yifemr thu hamuhmora na tawo thu hamuhmoyanr. To nd na pthayuk mrokfomn nhai wany yakiohahkomme, tfit na hingrnayuk hingrnefmndm wamhti dukakko. Wamhti dukakkahkomn waduka wameko, ‘Rof nito rofhu toh nmbuhat nhai nndo nndo.’”

³⁹ Inji kfo motr tfit memom ayaknomr to nhai, ror yak hhrifnimormn yimor.

⁴⁰ Be Jisasr tfit yimorn tek Jodent yau hayuknimortn rim fnahmor bingot Jonr yimam baftaisimmoa tkittn. ⁴¹ Ndha tohetrn bok met yindarim ror mhtimomrn kfo memom, “Rot Jonr hingrnamoahingrneft nhai wom mirakerkfom hingrnarmoar. To Jonr ndar yimarhu mrokfom kfo pthamoahat, be tu fi pet mrokfom kfo pthamourm.” ⁴² Jisasr ndha tohmohat bok met yindarim rroh bro dukefm htamourm.

Jisasr Judiakoni Jerusalemko yimotr Judaroh bro yimam memom, “Awasnomr.”

11

(Sapta 11–12)

Lasarusrhu noh nmbuhat

¹ Wom yimarhu yufat Lasarusr. Nd yimarhu kmit Betanit. Turhu kmit tohhato dbohneft rifakakmotr. Nd kmi Betanitn tohmouf Martati tuthu nmem Mariat. ² To nd met Mariatn Jisasrhu wuram sanda welpaye yuk wunahato tfit tuthu yuke tmarifaye wuram trk domtmotr. Nd dbohnamo yima Lasarusr to nd Marta Maria met najohfhu mndaremer. ³ Nd met najohf Jisasrpnno mrokfot htahato kfo memof, “Broye, nd yimar ninpnno nabnot hakutar dbohnewur.” ⁴ Jisasr nd mrokfot wanyakhato kfo memom, “Nd dbohneft nhai Lasarusr wundiati minohnihato mifnahniruhatr. Nhai. Nd dbohneft tuhan yindariroh Bro Nkifrarhu bbukeft htihatoh Bro Yifemr bro yufat hayuket. Yo nd yuhatn Bro Najomr bro yufat yakrahr.”

⁵ Jisasr Marta Maria najohfi rofhu mndarem Lasarusr be tu marbit htamourm. ⁶ Lasarusrhu dbohna mrokfot wanyakmohat nhai bi marimor,

“Bmbri yirhoyann rorhu dbohneft htihiruhanr.” Nhai. Afo wom hus yihaf toh tanyomor nd ror tohmo kmit. ⁷ Nd hus yihaf toh tanyhato Jisasr disaiperm kfo memorm, “Tmfinom ashart ahtanykahnomt tfit ainyom Judia profinsko.” ⁸ Jisasr kfo yibonmotr Judiako yinyeftpno disaiperm kfo memorm, “Tisaye, ni dukewun ayuwonanoh nmbuhat Judam tahiye tahiye frdbofna noh hany sitamohat, tamohmpno yamuka tfit Judiako ainyom?” ⁹ Tfit Jisasr kfo wok memorm, “Marr yuwa muhato yohni thombat ka nhai 12-pela auakfot mar nukeft rhukaht? Yimam ndar bbiny-softhu mar nukeftpno yauwamn nhai suhkahm. ¹⁰ Yimam yifung yauhato suhwam, yifung nkrt yak tato hanyhato mimpno mfrughato suhwom.”

¹¹ Jisasr inji kfonihato tfit kfo memorm, “Nmoh yimatem Lasarusr be hwitr. Na yi shombat yak thakruhanr.” ¹² Jisasrhu disaiperm nd mrokfot wanyhato kfo memorm, “Broye, be hwe mif thombat, rorhu dbohneft htanyrahr.” ¹³ Disaiperm nhai marimom Jisasr kfiwohat Lasarusr bi nohetrn hwefkot kfiwurr. Rom memom, “Ka be hwe mifneft kfiwur.” ¹⁴ Ndnnett Jisasr kfo nuhas marnya memorm, “Lasarusr bi noh mifmor. ¹⁵ Na hifa nhai bi marimoya bi yirhoyann Lasarusr htiruha. Nhai. Niko mdukakmoya. Memoya, ‘Rpat yiruhanomn rom turoh nyingaye htiruhann rroh bro dukefm htarahma.’ Yo be waniako yi htirahnomr.”

¹⁶ Jisasr pthanimotr you Tomasr, rorhu wom yufat Didimusr, wom disaiperm kfo memorm, “Wasinyako. Aikahnom rorpno rpat nohrahnom.”

Jisasr kfo memor; “Na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm.”

¹⁷ Jisasr kmi Betanit mfnahmohat Lasarusr bi tahi muht rim htafhato bi husfihus marm bi tohetm mfnahmor. ¹⁸ Nd kmi Betaniti Jerusalemr nhai wuri wuri rhukahf. Wom kmit toh tany tfit manoh wom kmit yinyeft be 3 kilomitakforpat yauniyetet. ¹⁹ Brbo brbo ruhetfn ndnett tum Judam yimat yimat toht yima nur bb kunys yi tohnhohato Marta Mariarof bmtamof rom htihato.

²⁰ Nd nur kunys rhu hasetmn Martat Jisasrhu yi mrokfot wanymohat be wasinya fnah twanhomotn Mariat kunys rhu htanyomtn fnahnihato Jisasr yi rim htimot. ²¹ Jisasr rim htihato Martat kfo memotr, “Broye, ni asha atohkahnn nanhu mndaremr nhai inji nohrmotr. ²² To nanhu yima yuhur duka kanga asomift ni Bro Nkifrapno tamohm wukfo bruttnarahnr, wany yakiohato wahirahrn.”

²³ Inji kfomott Jisasr kfo memotr, “Ninhu mndaremr tfit sinyarahr.” ²⁴ Jisasr inji kfomotr tfit kfo memotr, “Uwa, nanhu yima yuhur duka kangr wuroh ndar bbinysofthu bati yihar sinyarahr.” ²⁵ Jisasr kfo memotr, “Na ndar yimaya na noheh yima kasinyayet yimaya. Na yimam kasinyahato toh nkifraniyuk yafotham yahukotanm toh nkifranitm. Yimam na htihato rroh bro dukefm nann htem, htirahnnd yimam ar bi nohetm tfit sinyahato toh nkifranirahm. ²⁶ Yo yimam yima nfrim tohhato na htihato rroh bro dukefm nann htem, nd yimam nhai nohruhatm. Nhai. Rom be inji toh nkifranirahm.” Jisasr nd mrokfot pthanihato Martat wattiwon memotr, “Ni nd na kfiwa mrokfot wanukohat wany yakio kangn tu kfot kfiwa?”

²⁷ Tfit Martat kfo fakio memotr, “Uwa nanhu Bror, na ni kfiwa mrokfom wanyhato htitann ni tu Bro Nkifrarhu Yone. Ni nda yimann Bro Nkifrar kfomor nda bbinysofthu tuhan yindariroh minrfa htihakneft.”

Jisasr nurmor Lasarusr riduka yuhuwafakhato

²⁸ Martat Jisasr pno inji ptha tanyhato tuthu nmem Mariat rim htiyakmott. Rim htiyakhato nhowi yimbhindangm kfohe memott, “Tisar tor bi nier. Ni kfefirn.” ²⁹ Mariat be inji wanyhato yudbat memot Jisasr yi htiruha. ³⁰ Jisasr tafi kmit rim fnahrnor. Martat rim htimo tkittn yuhre rhu hasomor. ³¹ Mariatpno yima nur bb kunys rhu hasomo Judam Mariat fnahnimott rom htiyaf hanyhato memom ka yima gur rhuyuk tkitt kangt, yikahann yihom nur tanyruha, ndnetmn mhikaknimomt.

³² Mariat yimotn yihom fnahmot Jisasr rhu hasomo tkittn. Rim fnahhato Jisasrhu wurampno brbo rim tabokmehato kfo memotr, “Broye, ni asha atohkahn nhanu mndaremr nhai inji nohrmotr.”

³³ Jisasr htimort Mariat nurmoatt yo nd rotpno yiyuk Judam rpat nurmoatm tfit Jisasr rom htihato rorhu yima yuhur tfit wamortakihato memor anura. ³⁴ Yima gur htamo tkitt kfo ttiwom memorm, “Fitha htamokomr?” Kfo memorm, “Broye, afo wania wahti.” ³⁵ Be Jisasr nurmor. ³⁶ Judam inji htihato kfo memom, “Wahtiko rorhu yima yuhur nd yimar korhr.” ³⁷ Tfit womm riruhato kfo memom, “Nda yimar to nyinga kunyjm fak marnyamorm. To tamohmpno nhai kformotr ndar yimar nhai nohrmotr?”

Jisasr Lasarusr kasinyamo yuhat

³⁸ Jisasrhu yima yuhur nhai marnyarmorr. Be nd nur rifhurpno yimor yima gur htamo tkitt. Kmi yihofr hingrna htamo tahi muht ndtn htahato tfit wom tahis yakhato muht frtittafmomt. ³⁹ Jisasr kfo memorm, “Nd yopthu tahis wayaktakomt.” Inji kfmotr Martat, nd nohmo yimarhu mndaremt, kfo memotr, “Broye, nd yimar bi husfihus marm bi ruhetrn tahis yaktewohat yima gu mthefr fnahwor.” ⁴⁰ Jisasr rothu mrokfom wanyaf hanyhato kfo memort, “Na bi kfiyann, ninhu yima yuhur duka kangr kasinya mifwor, nd dukefr kakitohwo htitwont Bro Nkifrarhu bro bbukeft.” ⁴¹ Be nd muht frtittafmo tahis faktamomt. Yaktamotmt Jisasr yura hefenr wuyukatohhato kfo bruttna memor, “Bro Yifeme, na kfo yindhorrwann. Na kfo bruttnaneft wany yakiohnewuna. ⁴² Yiha yiham na ninpno kfo bruttna hna thombat wany yakiohnewuna. Na ndar tohwa yimam dukahato inji kfiwa, htiruhamn duka mirahm tu Bro Nkifrar kfo tkrurafmotrr niamor.”

⁴³ Jisasr inji kfonihato yufat yutahato mfro rinakumor, “Lasarus, wari-sinyana.” ⁴⁴ Be Lasarusr sinyahato yarim fnahna twanhomor. Rorhu tir wurami nyingatikt nohet yimam rir borirmoa rmonthaye kitf botfomomr. Be yuht rmontha kitf kihetr fnahnamor. Jisasr kfo memorm, “Nd rmontham kitf botfetm wayak nyusakafokahtkomr ayir.”

Bro yimam waji famom. Memom, “Jisasr wasrahnom.”
(Matyu 26.1-5; Mak 14.1-2; Luk 22.1-2)

⁴⁵ Nd tuhant yindars Lasarusrhu nur kunys niahato Mariat rhunhoyukm, Jisasr Lasarusr kasinyamo yuhat htihato nd yiha hti memom, tu Bro Nkifrar kfo tkruraf mifmorr. ⁴⁶ Tfit wommn Farisimpno tfit yihato mkfo nuhas bonuhasmomm Jisasr nayuk nefm. ⁴⁷ Be ndnatn Farisimi prisroh tohak yimam Judaroh kausernm yakhato kfo ttiwom memomm, “Nd yimar bok mirakerkrom hingrnewur. Niko finji dukewako, finji ananomr? ⁴⁸ Nom be inji rihti marsisakrahnomr kmikmi rorrpar hikrahm. Bi kmikmi rorn mhikaknitm htirahko tfit Romrhu bro yufet yimam mrokfo naphakhato

nieruhamn Bro Nkifrarhu temperr riyohniyakrahr ee yuht kantrikfot bha wohndrahmt.”

⁴⁹ Nd bro yimam rhumom tor wom yimar rhunhomorm. Rorhu yufat Kaiafasr. Rorn nd gunyjimr htamomr rroh bro tohak prisr. Ror wasinyahato kfo memorm, “Niko ka be tu nhai yima dukefmi! ⁵⁰ Kangko yuht kantri bugat abha wohndu duha rhumot, to be rpa yimarpur Judanmoh tkitt yakhato nohneft hifa. Nd dukefrpar hikkfot. Mirahko tfit wom dukefr ayaknom.”

⁵¹ Kaiafasr kfomo mrokfot nhai be turhu yima yuhurn ptharmor. Nhai. Ror nd gunyjimr prisroh tohakr tohetrn kfo htata mrokfeft kfo memorm, Jisasr Judaroh tkitt yakhato nohrahr. ⁵² To mirahko ka Jisasr Judarpam dukahato nohmor. Nhai. Bro Nkifrarhu yonm wur fitoh fitoh tkitm riruh aruh hanyukroh yak nhafohhato rpa yimarhu yon kunys kanjo yak htaneft dukahato nohmor.

⁵³ Tor nd yiharn Judaroh bro yimam Jisasrhu was yuham riphthakmomm. ⁵⁴ Jisasrhu was mrokfot bi yiro yiro nakfo hafknuyetn Jisasr nhai Judaroh nyingahato yau nriyafrmoar. Ror mrokfot wany nkriyaf tanyhato nd kmit htanyomortn yimor wom nungur tik furat yorhwa kmi Efraimtn. Ndha turhu disaiperpmpno tohmom.

⁵⁵ Nd kmit tohetm Judaroh bro Pasofa burwa yihar rhumomr. Wuri wuri toh hanyuk yimam bi Jerusalem-rpar bi yi rifiny hanyhato rroh tamoh tamoh fasoh nefm bi yi hanyhato bi fak wus bowus hanymoumm. ⁵⁶ Jerusalemr yi rifinyhato tfit Jisasr fukatoh hambromoum. Yukatoh hambrohato tfit tum Bro Nkifra rmonrhu temper kmifar tohhato nakfo ttiwon nakfo ttiwon memoum, “Niko finji dukewako? Rore ka niahato rhunhorahrnom ndar nom yorhwa bro yihar o ka nhai?” ⁵⁷ Prisroh mtihak yimami Farisim bro mrokfot kfo memom, “Fitoh yimam Jisasr fitha htitwomr mrokfot bmbri nompno aniekahtt yakrahnomr.”

12

Mariat Jisasrhu wuraf sanda welpaye wunamo yuhat (Matyu 26.6-13; Mak 14.3-9)

¹ Afo yuhre 6-pela yiham Pasofa burwathu rhuyuk yiham afo ruhetm Jisasr Betaniko yimor. Nd kmi Betanit, Jisasr kasinyamo yima Lasarusrhu kmiyet. ² Betani thofm Jisasr htihakato you yeshrt yakhato Jisasrpno yimam rpat ruhato nuwa famom. Martatn nd htamo yeshrt fak nhata nhombrahemotm. Yimam Jisasrpno ruhato yeshri yamom, Lasarusr tor ruhato fenyhomorm. ³ Mariat nd bro marukfoyet sanda knt yakhato Jisasrhu wuram fuk wunamotr. Yuk wunanihato tfit tuthu yuke tmarifaye trk domtmotr. Nd sanda knt yuk wunamohat mtha yarfon gbefr yuht kunys thu kasi bugamort. ⁴ Mariat nd hingrneft Jisasr hingrnamottr tfit Jisasrhu wom disaiperr tu nd Jisasr hndhnaaruha yima Judas Iskariotr, rorn kfo memom, ⁵ “Bar yimako, tamohmpno nd met Mariat yonmar bro marukfet sanda knt be wawurasohitt. Marifotnom, nd sanda knt 300 kinakfoye yimam wiknarfoymt tfit nd maruham yakhato wuskapa duha yimamn nd maruham hi hanyrfonom.” ⁶ Judasr nd mrokfot pthamohat nhai wuska duha yimaroh he mifneft dukahato kfo ptharmor. Turhu rikohneft kfo rhtimor. To rroh maru kpt to frohm yakitohhato yak nfhotimoamm? To ror. To rorn yakitohhato tfit rorn kak rikohmoum.

⁷ Jisasr Judasr pthamo mrokfot wanyhato kfo memor, “Inji akfowah-komt. Aruhess nd sanda knt. Aharhu-kahttt afo nanhu nohhato yop yihar afo nierahr. ⁸ Nd wuska duha yimam, rom yiha yiha nikompno toh hasiwum. Na, na nhai wom tohnhorhotanko.”

Prisroh bro yimam memom, “Lasarusr awasnom.”

⁹ Bok Judam wanymom Jisasrhu Betanithu toh nmbuhat, ndnetmn memom Betaniko yihato Jisasr htirahnom. To nhai be Jisasrhu htinefrpat marimom yirahnom. Nhai. Jisasr Lasarusr kasinyamo mrokfot bi wanyetmn, be memom Jisasr yi htihato Lasarusr htirahnom, ndnetmn yimom. ¹⁰ Ndnetmn prisroh bro yimam bi kfo habofkni htamom Jisasr Lasarusrofhu rpat wasneft. ¹¹ Nhai be sfno nd Lasarusrhu wasneft kfo ptha kasinya-rmomt. Roh dukeft duka memom, “Ni Lasarusn, Jisasr kasinyamotr Judam ndt wahtiyafhato prisroh bro yimaroh tngm bi yakhato yiho tuhaf tanywamm bi Jisasrn hikwom.” Nd dukefmpno memom, “Lasarusr awasnom.”

*Jisasr king kanjo Jerusalemr mfnahmo yuhat
(Matyu 21.1-11; Mak 11.1-11; Luk 19.28-40)*

¹² Jisasr Betaniko Lasarusrhu kunys nuwa ye tanyhato nd wom marrn memor, “Yiruha Jerusalemko.” Bok met yindarim Jerusalemr turoh Pasofa burwat rifinymom. Wanymom Jisasrhu Jerusalemkorhof yi nmbuhat. ¹³ Rom inji wanyhato yomkpo kanjohot twa gham yakmomn yihotoha yuhat toh gariyakmomr. Toh garihato yimotr rom grha hayuyak hanyhato kura het grhahato kfo hany memom, “Wa! Wa! Wa! Tunga Nkifrra wayak marnyatwanr ndar Isrerroh kingr Brorhu yufatpno niewar.” ¹⁴ Jisasr yimohat donkir mrhumotr nd donkirn hiyau hanymorr. Ror donkir rhuhat yimohat to gonborngt kfoyuk mrokfot rhu hikmot. Nd mrokfot gonborngt profet Sekaraiar kfo memor,

¹⁵ “Niko Saion thofko, mirahko ayarkmenom.

Wahtiko nikhom kingr bi donkiyenrn myorhtr hnewurr.”

Sek 9.9

¹⁶ Jisasr donkir hanymohat Jerusalemko rorhu disaiperm nhai yima yuhu yakrmomt mrokfothu yimbu yuhat. Kto Jisasr nohhato sinyani bi bro yufat yaketrn nd mrokfothu yimbu yuhat fak dukamomt. Nd rom Jisasr kfo yindhorkhato namo neft gonborngt kfo hik twanhomott.

¹⁷ Lasarusr yopt husfihus yiham rhuhat tfit Jisasr kasinyamohat bok tuhan yindarim Jisasrno tohhato htimomr Jisasr Lasarusr nakuhato sinyamohat. Romn tfit wommpno yi rhuhat Jisasr namo neft naptha nuhas hi hanymom. ¹⁸ Womm wanyhato ndnetmn Jisasr yihota yuhat toh gari hasomomr. ¹⁹ Farisim inji htiafo hanyhato tum rinakfo nakfo memom, “Niko htitko? Yimam bi rorrpar bi hikwom. Nom kangnom, akfo rafonomm, be nhai. Tuhan yindarim ror hingrnamo mirakerkfof naptha nuhas hihany, naptha nuhas hi hanitamn bi rorrpar kak hikwom.”

Wom Grik thofm memom, “Jisasr ahtinom.”

²⁰ Nd Pasofa burwa yiharhu lotuneft Judam niamohat wom Grik thofm rpat hik hnamomm Jerusalemko. ²¹ Nd Grik thofm niahato afo Filifrpno yimom. Nd yima Filifr Galili profinsko kmi Betsaida thofer. Rorpon niahato mttiwon memomr, “Broye, nom kangnom, Jisasr ahtinom.” ²² Yo be Filifr wany sanyhato Andrupno mnahtiyaknihato Jisasr mkfo memofr, “Ni Grik thofm kangm, ahtinomn.” ²³ Jisasr tfit kfo wok memomr, “Bro Najomrhu

bro yufathu yak yihar bi brbohwor. ²⁴ Na kfo mifwanko, wit tpit nhai bbinysoft misuhhato nohrfot, to be inji rpa tpirpat rhuraht. Misuhtn fnoht, tfit frdborhahato sinyaruhatn dmet dmet hirrahmt. ²⁵ Yimar be turhu toh marnya nmbuhat mfro dukewur, kto nd toh marnya nmbuhat tfit hti hambrafraht. To fitoh yimar nda bbinysofthu toh marnya nmbuhat mong trohhato tfit nhai mfro dukakahrt, rorhu toh marnya nmbuhat toh nkifrarahr. ²⁶ Fitoh yimar nanhu yinhit tohwor, nd yimar na hikhnahato nanpno rpat tohkfot. Yimar nanhu yinhit tohrah, nd yimar nanhu Yifemrn bro yufat hirahr.”

Bro Najomrn kfo grhakfot

²⁷ Jisatr tfit kfo memor, “Nanhu yima yuhur krhohato bok dukefm kekma. To finji kforhoya? Ka kfo miruha, ‘Bro Yifeme, na wofnkaha nd krhoparoh yakneft?’ Ka inji kforuha? Nhai. Na kanga finji anaya na nhai inji kfo rafokfot. Na to nd krhoparoh yakneftn niamoya. ²⁸ Bro Yifeme, ninhu yufat abrotwat.” Jisatr inji pthanimotr wom tngt yura hefen yuhat niamot. Nd tngt kfo memot, “Nanhu bro yufat bi fak nuhas hnamoyanm. Tfit wompam yak nuhasruhanm.” ²⁹ Jisatr pno brbo tohmo tuhan yindarim nd mrokfo kfo tngt wanyhato kfo memom, “Ka toher.” Womm memom, “We, ka mounmotr pthiwur.”

³⁰ Jisatr rroh mrokfom wanyafo hanyhato tfit kfo memorm, “Nda niko wanu tngt nhai nann dukahato nd tng yawihnarfot. Nhai. Niko dukahato nd tngt fawihnes. ³¹ Ar yiharn Bro Nkifrar nda bbinysofthu tuhan yindariroh nefm yak nhtarahr. Yo nda bbinysofthu tndhr yak wahtarahr. ³² Na ndar bbinysoft tohhato bgre miyeta kasinya thombat tot nd yiharn nda bbinysofthu tuhan yindarim rpat nanpno yarim tohrahm.” ³³ Jisatr nd mrokfot pthamohat turhu noh yuhathu mrokfo yuhatn kfo ptha nuhasmorm.

³⁴ Yo tfit nd rorhu mrokfom wany yakitohmo tuhan yindarim ttiwon memorm, “Bro Nkifrarhu boririfhut kfo kangt, ‘Nd yimar Bro Nkifrar tkrurafohato yimam minrfa htihakruhar toh nkifrarahr.’ To ni tamohmpno inji kfo yamuka Bro Najomr bgre miyetr tuhegirrahmr? Nd yimare froher?”

³⁵ Jisatr tfit kfo memorm, “Tor afo nukefenr. Nd nukefenrpno afo wawiyauyauko. Nd wuroh nukefenr wuteh psukyakrahr to be finji yihotat htihat yauruhako? Yimam nd yifungt wuyau-yauhato yak tato botatiwam nhai yihotat htihakmt. ³⁶ Niko wuroh nukefenr yorhwa fijo nd nukefenr yak hikhato nd nukefenrhu yonko rhurahko.”

Bok Judam Jisatr hingrnamo mirakerkfom htimohat nhai rroh bro dukefm jisatrn htarmomm

Jisatr met yindarimpno napha buganihato be htanymorm. Htanymohat be yihato rhu kafrohmr. ³⁷ Jisatr ar yonmari mirakerkfom hingrnamoahat nhai rroh yima yuhum sinyahato rroh bro dukefm rorn htarmoam. ³⁸ Rom inji namohat profet Aisaiar kfoyuk mrokfot fak hikmom. Profet Aisaiar to kfo memor,

“Broye, nom pthiwa mrokfom frohm wanukamnom?”

Yo frohm nd ni hingrnawa bro hingrnefm htihat rroh yima yuhum sinyewamm?”

³⁹ Be nhai Jisasr nayuk nefm htihato yima yuhum sinyarmomm. Nhai be sfno Jisasrhu mrokfom hik duha yirmomm, tot tfit wom mrokfot profet Aisaiar kfo memor;

⁴⁰ “Bro Nkifrar nyingam takunyj-motrm nhai yukatohruhatm, yo duka yima yuhum takih-motrm nhai tamoh mrokfom tfit dukakfot. Nyingetm rhuhatom wom nefm htiruhamn, yo yima dukefetm rhuruhamn mrokfo mna yuham yakruhammn, yima yuhum yak kekuthato tfit nanpno yarim tohruhamn yak marn-yaruhamn.” Ais

6.9-10

⁴¹ Aisaiar nd mrokfot pthamohat Jisasrhu bro nanyjar bbukeft htihato inji kformor.

⁴² Jisasr mrokfom kfomoahat Judaroh bro yimam bokm wany yakiomoum. Tmift tafonthu yak nriyafneftne nhai. Farisim yakrme-moamn nhai yak nriyafmoam. Memoum, “Farisim htirahmnom be nhai Judaroh rhu rifinyuk rmonm kfakruhatmnom.” ⁴³ Roh dukeft be duka memoum, “Be yima mifmn akfo yindhor boyindhormnom.” Nhai marimoam, “Bro Nkifran akfo yindhorrnom.”

Jisasr pthayuk mrokfomn yak nhtarahmm tuhan yindariroh nefm

⁴⁴ Jisasr buha yima rifiny swirtn nnhuhato kfo ptha memorm, “Fitoh yimam na wany yakiohato hikwom, to mirahko ka nanrpayann hikwom. Nhai. Na tkrurafoyuk Bro Yifemrpnno rpat hikwomno. ⁴⁵ Yo frohroh nyingam nann kukatohwom nhai nanrpaya yukatohkahn. Nhai. Na kfo tkrurafyuk Bro Yifemrpnno rpat kukatohwomno. ⁴⁶ Ndar bbinysoft yiro kspitat rhumohat nann niahato kshr mifakitoh nuka-moyanr. Ndnnetn yimam na hikwom nhai yifung kspt tohato yak tato botatoruhatm. ⁴⁷ Yimam nanhu mrokfom hik duha yitam na nhai htihato tfit rroh nefm yak nhtahekahanm jasm kanjo. Na nhai ndhtet neft niarmoya. Na niamohat yimaroh minrfa htihakneft niamoya. ⁴⁸ To yimam na mong trohhato nanhu mrokfom yak duha yitam, tot rroh nefroh yak nhtayuk jaskfot. Nd na pthayuk mrokfotn jaskfot kanjo tu wuroh ndar bbinysoftu bati yihar yak nhtarahm rroh nefm. ⁴⁹ Nd na kfiwa mrokfom mirahko ka be nanhu yima yuhuru mrokfom pthiwa. Nhai. Bro Yifemrhu yima yuhuru mrokfom pthiwa. Na to rorn tkrurafomotra niamoya. Ror kfo hta bohtafoyuk mrokfomn na kfo pthiwa. Ndnnetn nd na pthayuk mrokfotn jaskfot kanjo yak nhtarahm rroh nefm. ⁵⁰ Bro Yifemrhu mrokfot tu hifa rhu nkifrani nmbuhat mhfahnewutt, ndnatn nd na pthiwa mrokfot tu Bro Yifemr kfo yuyuk tng yuhatn kfo ptha hikwa.”

Jisasr turhu Yifemrpnno yiyuk kfo duka nmbuhat kfo dukamorm turhu disaiperm

13

(Sapta 13–17)

Jisasr slefyimar kanjo turhu disaiperrh wuram bupaye yukmo yuhat

¹ Pasofa burwathu rhuyuk yihar yibonmo marrn Jisasr rhuhatom duka hik duka hikhatom kfo memor, “Hrek marr yorhwanomn nohok nd Pasofat riruhakrahnomt. Be nda marrn asor nanhu wuroh yihar rhuyuk. Nohokn nanhu nohhato nda bbinysoftu htanyhato tfit tukanhu Yifemrhu yi yihar.”

Jisasr nhai duka mmormoarm turhu disaiperm. Rorhu yima yuhur be romn rhumour. Noh-nefrpatpno mfafhonimorm. ² Nd wuroh marr rhumo krifn Jisasri disaiperm rpat ruhato nuwa famom. Nd yiharn Saimon Iskeriotruhu yon Judasr, bi Satanr fasoh yima yuhu bebr htamorr Jisasrhu yahr kmimpno hndhnanest. ³ Jisasr bi tur fak nhombramort Bro Yifemrhu yahr bbukeft bi fakmort yo bi hti hikmort ror niamohat Bro Nkifrarprno wutoh tanyhato niamor tfit nohneft tfit sinyanihato Bro Yifemrprno yirahr. Ndm bi tur hti hik bohik bugamormn, ⁴ be Jisasr wasinya fnahhato nuwa yeyuk tebort htanyhato turhu yuke hmbreshar yak hrur thumorr tfit trkthar yakmorn ndar nyuhmor. ⁵ Bro dis yakmorn bupam tas hmbremort. Tas hmbrenihato nd bupaye turhu disaiperroh wuram yukaf hanyhato tfit nd ror nyuhmo trkthaye trkaf hanymourm.

⁶ Yo be yima yimaroh wuram yukaf hany yukaf hanymour memor, "Saimon Pitarhu wuram ayukanr," Pitar sinyahato kfo memorr, "Broye, nine nanhu wuram kangn ayuka?" ⁷ Tfit Jisasr Pitar wahtiyak hti hamuhhato kfo memorr, "Ni nhai tawisafkahnt nda na hingrniwa hingrneft. Kto tawisafrahnt." ⁸ Pitar kfo memorr, "Mirahn nanhu wuram ayukanr. Mirah mifn." Jisasr inji wanyhato tfit kfo memorr, "Nhai ninhu wuram yukrfoyann, nhai nanhu disaipern rhuruhatn." ⁹ Saimon Pitar Jisasr pthamo mrokkot wanyhato tfit kfo memorr, "Broye, kangn ayukanr, to btn mirahn wurarpam ayukanr. Tirfi mfhat rpatn wayuktwona." ¹⁰ Jisasr tfit kfo wok memorr, "Yimam bi yuht yimam yuketm nhai tfit wompam yukkfof. Bdr wurarpam yukkfof. Bi wurarpam fukme, yuht yimam fnhu bugewun. Nikmoh thatipm fnhu bugewunko. To nhai be niko buga kfokaha. Nhai." ¹¹ Jisasr inji kfomohat bi htimor turhu wom disaipern yahr kmiroh tirm htarahr. Ndnetrn kfo memor, "Nhai niko buga kfokaha."

¹² Jisasr disaiperroh wuram yuk buganimormn tfit tur hmbremoa yuke hmbreshar hmbrenihato rim rhumor tur rhu tanymo tkittn. Rim ruhato ttiwon memorm, "Niko tawisafwoko nd na nefinefthu yimbu yuhat? ¹³ Niko kutewukma Tisaya yo womnam kutewukma Bror. Rot hifa inji kutewukma. ¹⁴ Na nikmoh Tisaya yo na nikmoh Broya nikmoh wuram fukanko. To niko, nd na yak nuhasafi yuhatn niko tuko wuram nayukkfof. ¹⁵ Na bi fak nuhasanko to be nd yuhatn wahiktwako. ¹⁶ Wawanyko, na kfo mifwanko, hingrna yimar be turhu tohak yimarhu yinhit tohwor. Yo mrokkot hanyuk yimar nhaf kfo tkrurafyuk yimarhu yinhit tohwor. ¹⁷ Bi fekkomt nd na yak nuhasefinefthu yimbu yuhat. Nd yuhatn hingrna hikrahko tfit tuko rhu nmbuhat hifa yiruhatt tfit yindhorrhako.

¹⁸ Na nhai nikom buga kfokaha. Na tawisafwanm tukanhu yufatpno bi kfo htatayukm. Yo tuka bi htitat nd Bro Nkifrarhu gonborngt bingot htamat to yimbuyefett ruraht. Nd mrokkot kfo kangt, 'Yimar, nannpno nuwa yenyho-yukrn,

bi toh kekuthato nanhu wasyuk wajis hatonemort.'

Sng 41.9

¹⁹ Tafi nd neft mfrpskena duha bi kfo nuhaswanko. Kto nd neft mfrpskena thombat tfit nikmoh yima yuhum nanrpaya htahato kfo mirahko na to nda, tu Bro Nkifrar kfo tkrurafyuka. ²⁰ Na kfo mifwanko, frohr na tkrurafoyuk hingrna yimar yakmiyakhato fak marnya bomarnyerr, nd yimar nann yakmiyakhato kak marnya bomarnyewur. Yo nd yimar na yakmiyakyur, nhai be nann yakmiyakkahr. Nhai. Nd na tkrurafoyuk Bro Yifemrn kakmiyekwor."

*Jisasrhu hndhna yimarhu mrokfot
(Matyu 26.20-25; Mak 14.17-21; Luk 22.21-23)*

²¹ Jisasr nd mrokfom kfonihato tfit yima yuhur rimortakihato kfo memorm, “Na kfo mifwanko, nikmoh womrn hndhnarhotra wasrahma.”
²² Jisasr inji kfomotr disaiperm tfit tum rinahti nahtihato natiwion memom, “Nd ror kfi mrokfote frohr kfir?”
²³ Wom disaiperr Jisasr mfro yuhu mongimoar, ror nuwa yeyuk tebort rhumohat be Jisasrpnro brbo rhumor.
²⁴ Saimon Pitar nyingaye rikfo memorr, “Wattiwonnr, frohr kfir.”
²⁵ Be nd disaiperr brbo rhu kekutni hanyhato ttiwon memorr, “Broye, ni kfi yimare frohr kfi?”
²⁶ Jisasr tfit kfo memorm, “Frohr bretpat yekantn nnari disn bretpat tayifakhato fahuya, tor nd yimarn hndhnarhotra wasrahma.” Inji kfonihato bret nuwat yakhato watayifakhato rihemor Saimon Iskariotrhu yon Judasrn.

²⁷ Judasr nd bret nuwat yakhato famort. Fenyi hanymort Satannr fkne twanhomorr. Jisasr kfo memor, “Judase, kangn finji anaya, to be asomif fura mrom wayakn. Mirahn wom kukna hatoha.”
²⁸ Nd yima bugam nuwa yeyuk reborthu mku mku rhu wohnmom, nhai yakrmomt nd Jisasr kfomo mrokfothu yimbu yuhat.
²⁹ Judasrn maru gegb yoht haruhetrn, Jisasr inji kfo pthamohat disaiperm duka memom, “Ka Pasofa burwat rhuruha bro yiharhu yeyuk yeshri wiknaneft kfirr. O ka wuskapa duha yimaroh hayuk wuskaroh wikna hanyeftn kfirr.”
³⁰ Be nd nnaripam tayifaket bret tifenr Judasr yak yenyimorr fnahnimor. Yihat bi wufak bugamot.

Jisasr nfri boririfhu mrokfot hemo yuhat

³¹ Nd yima Judasr fnahnimotr Jisasr kfo memor, “Be bi asor bi Bro Najomanhu bro yufathu yak yihar. Na nohruha noh nmbuhatn Bro Nkifrar bro yufat yakrahr.”
³² Nanhu nohneftpno Bro Nkifrar bro yufat yakruha yuhatn tawo Bro Nkifrar sinyahato be yudbat bro yufat hirahra.
³³ O arenko, bi brbohwor nikmoh htanyuk yihar. Hti hasiwokma tfit hti hambraforahkma. Judam rpahtet mrokfot kfo nuhas-moyannm yo tfit nikompno rpahtet mrokfot pthiwa. Na yiruha yihotar nikom nhai yau hikruhatkomr.
³⁴ Bi wom nfri boririfhu mrokfot kfo nuhas tanywanko. Niko rpa rpa yimako wommpno nayak marnyahato rpat tohkfot. Niko nanhu tirtn rhu bugamoko.” Tawo niko wommpno nayak marnyahato rpat tohkfot.
³⁵ Niko wommpno nayak marnyahato tohrahko, wom riruh aruhuykm htiruhamn kfo mirahm, ‘Ndm tu Jisasrhu disaiperr mifem.’ ”

*Pitar kfo namhimo yuhat
(Matyu 26.31-35; Mak 14.27-31; Luk 22.31-34)*

³⁶ Saimon Pitar warhuhato Jisasr kfo ttiwon memorr, “Broye, ni fitoko yiruha?” Jisasr kfo memorr, “Na yita yuhat ni nhai hik hnewotna. Kto mongkorne ee btn nierahn.”
³⁷ Tfit Pitar warhuhato kfo ttiwon memorr, “Broye, to tamohmpno nhai hik hnewotann? Na kanga, nann hikhato nann ninhu nohyuk tkitt yakruhant.”

³⁸ Jisasr inji wanyhato tfit kfo ttiwon memorr, “Tu kfo mif mifwona? Na kfo mif mifwann, krirhu naku tngt tafi wany juha, husfirpa kfo namhit kfo namhi kangnm, ‘Na nhai tawisafkahanr Jisasr.’ ”

¹ Jisasar tfit kfo memorm, “Niko nda mrokfot wanuk-wohat mirahko bok dukefm ayakkah-nomn yima yuhum akrhomnom. Nikmoh dukefm be Bro Nkifrar duka yo na duka, be nd dukefrparpno rhukfot. ² Nanhu Yifemrhu kmir yonmari yonmari kuny rmonr korhr. Ndnatn na yi shombat nikmoh kunyroh bi yak hta hanyneftn bi yi hanyruha. Be kuny rmon duha arhut na nhai inji kfo tany hanyrfotanko. ³ Na yi shombat kuny rmonr yak marnya hta tanyrhoyanmn tfit niahato miyak htiyakhato be rpat yihato rpat nanpno rpat tohrahnom. ⁴ Na yita kmikorhof yi yuhat niko bi htiyeteko.”

⁵ Tomasr inji wanyhato ttiwon memorr, “Broye, ni kfiwa yihota yuhat nome nhai tawisafkahnomt. Tone fitoh yuhatn nieruhanom?” ⁶ Tfit Jisasar kfo memorr, “Yimam kangm Bro Nkifrar pno ainom, nann yihotaya, yo nann Bro Nkifrar fak nhombranamor, yo nann toh nkifrayuk yafothat yimam kahukanm. Nhai wom fitoh yuhamn yimam Bro Nkifrar pno yikfot. Tu be nhai mif. Nanrpayanpno niakfot. ⁷ Bi ahti tawisafkma, nanhu Yifemr hti tawisafrokomp. Ariham bi hti hik bohikwakomrn bi tawisaf-wokomp.”

⁸ Filifir wom ttiwon mrokfot wakfo memor, “Broye, nom kamuknom, Bro Yifemr wayak nuhasakhtnom nmoh yima yuhum mirhurahmnom.” ⁹ Jisasar tfit memor, “Filif, ni tamohmpno kfo yamuka, ‘Bro Yifemr wayak nuhasnom?’ Ar yonmar yiham nikompno toh hnamohate ka nhai hti tawisafmokma? Yimam na htitwom, to Bro Yifemr htitwom. To tamohmpno tfit kfo yamuka, ‘Bro Yifemr wayak nuhasnom?’ ¹⁰ Ni ka nhai duka mikahn na Yifemr thu hamuhmoya yo Yifemr na thu hamuhmora? Nani nanhu Yifemr pno nnoh toh nmbuhat nhai nndo nndo. Mrokfom na niko kfohemoam nhai be nanhu tngtn ptha hnarmottm wany hnarmokomm. Nhai. Bro Yifemr nann mrhuhato mrokfom ptha hnehato mirakerkfom hingrna hnamor. ¹¹ Na ptha yamu-kohat na Yifemr thu hamuhmoya yo Yifemr thu hamuhmora, nd mrokfot na kfiwat wawany yakiotwakomt. To nd na pthayuk mrokfom nhai wany yakiohahkomme, tfit na hingrna hnamo mirakerkfomn dukakhato wahiktwokma.

¹² Na kfo mifwanko, frohm rroh bro dukefm nann hteuwama, nd na niwa nefm nd yimam narahmm. Uwa, ndt nhai be kfo furakfot kfokaha. Na Bro Yifemr pno yi tohruha. Ndnatn rom naruha nefm tu bro nefm narahm. ¹³ Tamoh tamohm nanhu yufatpno kfo ttiwonrahko, hiruhanko. Nd yuhatn Bro Yifemr bro yufat yakrahr. ¹⁴ Ndt to bi kfiwant tamoh tamohm nanhu yufatpno kfo ttiwonrahkoma, hiruhanko.”

Jisasar kfo memor, “Bro Nkifrarhu Yafothar yawihnerahr.”

¹⁵ Jisasar tfit kfo memorm, “Nikmoh yima yuhum nanpno korhme, na pthayuk mrokfom yak hik marnya bomarnyarahkomm. ¹⁶ Na yi shombat nanhu Yifemr kforhotanr nikmoh toh tamnouhato thu bmtayukr kforuhatr yawihnehato be nikompno toh nkifranirahr. ¹⁷ Nd toh tamnouyukr nieruhar to Yafothar nieruharn toh tamnourahrko. Nd Yafotharn yimam kak nuhas bonuhasworm Bro Nkifrarhu tu yafothet nef mifm. Ndar bbinysof thofm nhai hti tawisafkahmr, ndnetn nhai rom yakkkfot. To niko awi nd Yafothar nikompno yorhwarn hti tawisafwokomp. Kto nd Yafothar mithu nawohrahrko.

¹⁸ Na yi shombat nhai mong trohnhato yon kute nm kanjo yak mm-brafiny hasoruhatko. Nhai. Tfit niahato mihtiruhanko. ¹⁹ Ndar bbinysof thofm wurohpam hti hasiwuma hti hambrafrahma. To niko awi hti

hanyrahkoma. Na nohhato tfit sinyaruha. Niko to inji nohhato tfit sinyarahko. ²⁰ Na nohhato tfit sinyarahota, nd yiharn hti dukarahko nani nanhu Yifemrpnno nnoh toh nmbuhat nhai nndo nndo yo nikomi na nmoh toh nmbuhat nhai nndo nndo. ²¹ Yimam nanhu boririfhu mrokfom yakhato kak hik marnyewumm, rroh yima yuhum nanpno korhm. Yo nd yimam nanhu dukefr yorhwam nanhu Yifemr hifa yima yuhur hmbritrm, yo na hifa yima yuhur hmbrihato rompno mfnahhato yak nriyafruhanm.”

²² Jisasr inji kfomotr tfit Judasr, nhai tu Judas Iskeriotr, wom nndoh Judasr kfo ttiwon memorr, “Broye, tamohmpno nomrpanompno yak nriyafhato ndar bbinysof thofmpno nhai yak nriyafruhatn?” ²³ Jisasr kfo memorr, “Yimam rroh yima yuhum nanpno korhm, nd yimam na kfo nuhasyuk mrokfom hikrahmm. Mrokfom hikruhatmm nanhu Yifemr hifa yima yuhur hmbrihato to be nani nanhu Yifemr rompno yihato tohnhorahnonm. ²⁴ Yimam nhai tu rroh yima yuhum nanpno rhukahm, nd yimam nhai nanhu mrokfom hik marnyakahmm. Nda niko wanuka mrokfom nhai be na tukanhu dukefrhu mrokfom ptha nuhaskahanko. Nhai. Na kfo tkrurafyuk Yifemrhu mrokfom kfo ptha nuhaswanko.

²⁵ Na nikompno afo tohwa fijo nda mrokfom bi kfo ptha nuhas tanywanko. ²⁶ Nikmoh toh tamnouyuk Yafothar, Bro Nkifrarhu Yafothar nierahr. Nanhu yufatpno Bro Yifemr tkrurafuhatr nierahr. Rorn nikmoh dukefm yak hta bohtaruhatrm na ptha nuhas bonuhas hnamo mrokfom dukarahkomm.

²⁷ Na bi htanywanko. Niko rhu haso thombat mirahko tamoh tamoh dukefmpno arhunom. Tamoh tamoh dukefm yafhohato be warhu furatwako. Nanrpaya ndhtet yindhoh yima yuhur kahukwanko, nhai ndar bbinysof thofr ndhtet yima yuhur herfotrko. ²⁸ Bi wanukma kfo yamuhat yirhoyann tfit nieruha. Nanhu Yifemr yura mtohekwor, na be rorhu yinhitn ritohtewa. Ndnnetn nikmoh yima yuhum nann korhm, be nanhu yinyeft be hti yindhorrhako. ²⁹ Nd neft tafi mfrpskina duhattn bi kfo nuhastewanko. Tfit kto nd neft mfrpskinaneft tukmoh nyingaye hti ruhakomn na kfoyuk mrokfom wany yakiorahkomm.

³⁰ Nhai tfit wom ptha hatohwota. Nda bbinysofthu tndhr bi tor bi niewur. To ror nhai nanhu toh nmbuhat yak hta bohtakahra. Nhai. Bro Yifemrhu dukef yuhat hikwa. ³¹ Tmift kanga na tukanhu Yifemrhu dukeft ruhato rorhu mrokfom hikwa yuhat afo ndar bbinysofthu met yindarim afo yak nuhasakhtanm ahtim. Be tmifko wasinyakahtko ainyom.”

15

Jisasr tu wain tof mifer

¹ Jisasr tfit wom mrokfot kfo memorm, “Na tu wain tof mifa. Nanhu Yifemr wain swir tikater. ² Na nd wain tofanhu yuhtam yukha hir duha yitam wain tof tikatr puk thuworm. Nd yukha haret yuhtarpam be frtept wusworm yukha hir marnyaneft yihato. ³ Niko bi nd na pthaheyuk mrokfotn bi fak wus bowus marnyamottko be bi yukha hir yibonwoko. ⁴ Ndnnetn nanpno niko frtkafhato na nikompno frtkafruha. Nhai wom wain tofthu yuhtam mmem toftpno nadodru duhatm yukha hir furakahm. Nhai. To inji kanjo niko nanpno frtkaf duha yirahko be nhai yukha hirruhatko. Nanpno frtkafrahko ee btn yukha hirrahko.

⁵ Na tu wain tofthu mmem tofa. Niko wain tofthu yuhtayeko. Yimam nanpno frtkafhato na rompno frtkafneft nd yimam yukha hirneft yuhtam be yihohathuwom. Nhai hir ffirmkahn. Na duha nhai wom finji naruhatko. ⁶ Nanpno frtkaf duha yita yimam kak thuwomm yuhtam puk thuhato ffitewa kanjo. Kto nd ffuyhtam yak nhafohhato kandhi thuwomm.

⁷ Niko nanpno frtkafhato nanhu mrokfot yakhato yakitohrahkomt, nhai mrokfom, tamoh tamohm ttiwonneft, to be tukmoh duka fijo kfo ttiwonruhatkomr hirahrko. ⁸ Niko nanhu disaiper mifko rhurahko tu mfro mfro hir natrahko. Ndtпно nanhu Yifemr tfit bro yufat yakrahr. ⁹ Na be Bro Yifemrhu yima yuhurn korhwa. Nd yuhatn tawo nanhu yima yuhur nikomn niamor. Yiha yiha niko be nanhu duka yima yuhurn rhukfot. ¹⁰ Na Bro Nkifrarhu boririfhu mrokfom hikhato rorhu yima yuhur rhumo kanjo niko na hayuk boririfhu mrokfom wany yakiohato hikrahkomm, nanhu yima yuhurn rhurahko. ¹¹ Na inji kfiwohat nanhu dukeft duka kanga, nanhu yindhor rifhur nikomn arhukahrn be nd bro yindhor yima yuhurparn arhurko. ¹² Na wom mrokfot kfiwanko: Niko tuko niyak marnya niyak marnyakfot na niko dukahato nikmoh rhu nmbuhat yak marnyamo kanjo. ¹³ Kfiwanko, Kfiwanko, wom yimar yimat tohtn yimatm dukahato fnohr; tot tu yimat toheft. ¹⁴ Nanhu kfoyuk mrokfo yuhat hikrahko, nanhu yimatko rhurahko. ¹⁵ Na nhai wom kfo mekaha, ‘Arm hingrna yimayem.’ Nhai. Hingrna yimam nhai turuh tohak yimam hingrnawa hingrna yuham tawisafkahn. To na Bro Yifemrpnо yakmo mrokfom bi ptha dbruf nuhasmoyanko. Ndnetann kfo kanganko, niko nanhu yimateko.

¹⁶ Na nhai nikomn yakrmokma nikompno tohneftn. Nhai. Nann fakmoyanko. Nann yakhato hingrneft hemoyanko. Memoya nd hingrneft wayakni waikahkomn niko hingrnayuk hingrneft fipett rhuhatu yukhett rhuraht. Tu rhu nkifraniyet yukham hirrahm. Ndnetn nanhu yufatpno Bro Nkifrar wom shrm ttiwonrahkomr be hirahrko. ¹⁷ Ndnetn boririfhu mrokfot kahukwanko. Nikmoh womm marbit htakfot.”

Bbinysof thofm hti dbnotrahmm disaiperm

¹⁸ Jisahr tfit wom mrokfot kfo memom, “Nda bbinysofthu yimam hti dbnotwomkone, mirahko ayak mmonom. Nhai be ar nohofrpa nikomrpakompno inji nakahn. Nhai. Nanpno to inji namom. ¹⁹ Be nda bbinysoft tohwa yimaroh ruheft arhuko, yakmiyakhato hifa yima yuhur hmbreerfomko. To nhai. Ndar bbinysofthu yimampno toh hasetkomn yakmotanko rom tfit kfo kangm, “Tamohmpno firtrohwanom?” Ndnetmn namburhato hti dbnotwomko. ²⁰ Waduka hik marnya hanyswako na kfoyuk mrokfot. Wom hingrna yimar turhu tohak yimarhu yinhit tohwor. Ndnetn rom ahti dbnotma, niko to inji hti dbnotrahmko. Nanhu mrokfom ayak hikmm, to inji nikmoh mrokfom hikrahmm. ²¹ To nhai. Rom nhai tawisafkahn na kfo tkrurafoyuk Bro Yifemr. Ndnetmn niko bi nanpno yarim fnahnehato tohwatko be hti srthurahmko.

²² Na nia duha yihato Bro Nkifrarhu mrokfom aptha nuhas duha yiyann be nd rom nayuk fasoh nefm be nhai mrokfo duhatm rhurfom. To nhai. Arihat bi mrokfot wayetmn to be nhai nd rroh fasoh nefroh kamongyuk tkitm. ²³ Fitoh yimam na hti dbnotwoma, to nanhu Yifemrn hti dbnotwom. ²⁴ Be na niahato rompno tohhato nd yimam hingrnawon duha bro bro nefm ahingrna duha yiyann, be rom nayuk fasoh fasoh nefm mrokfo duhatm

rhurfom. To nhai, na nayuk miraker-kfom bi turoh nyingaye htimommn tfit hti dbnotwomno nanhu Yifemrpnno. ²⁵ Nd rom nayuk nefm to bi turoh boririfhut kfomo mrokfo yuhatn bi kak hikwom. Nd mrokkfote inji kfiwut: ‘Be hti dbnot furamoma.’ *Sng 35.19, 69.4*

²⁶ Nikmoh toh tamnouyuk Yafothar Bro Yifemrpnno tohwor. Nd Yafothar tu Bro Yifemrpnno tohato tawisafwort tu Bro Yifemrhu rhu toheft. Bro Yifemrhu rhu toheft tawisafhato yimam kak nuhas bonuhasworm Bro Yifemrhu tu yafothet nef mifm. Na yihato tkrurafrohatar nierahr nikompno. Nd Yafothar nieruharn nanhu nefm yo hingrneft ptha srh nuhasahrko. ²⁷ Yo to niko inji buga waptha srh nuhas-twakomm nanhu hingrneft. Na rihingrnakmohat niko tohnhohato htimokomt nanhu hingrneft. Ndnnett n ptha srh nuhasfot yimam.”

16

¹ “Na nhai wofnkaha niko Bro Nkifrarhu mrokkfot miyafhonineft. Ndnatn nd mrokkfot kfiyanko. ² Judaroh rhu rifnyuk rmonm kfo yiritikfot kforahmko. Yo wom yiham was beb bobebrahmko. Rom inji na thombat mirahm, ‘Nom Bro Nkifrarhu dborioh nefm newunom.’ ³ Nd yimam niko ufasoh nefm naruham nhai Bro Nkifrar tawisafkahmr yo na nda tohwohat nhai hti dukakahma. Nhai. Ndnnett nd fasoh nefm narahmko. ⁴ Bi kfo nuhasanko nd yimam naruha ufasoh nefm. Kto ndhtet nefm hitnomm tfit wadukatwakomt ndar na kfo nuhaswa mrokkfot.”

Jisars ptha nuhasmorm Bro Yifemrhu Yafotharhu hingrneft

Jisars kfo memorm, “Na nikompno tohmohat nhai nd nd mrokkfom kfo nuhasrmoyanko. Bi tukanhu Yifemrpnno yiyuk yiham bi abrboh nham, ee btn kfo nuhasrmoyanko. To nhai. Yiham afo wuri ruhetmn ndnett nhai kfo nuhasrmoyanko. ⁵ To be bi kita tukanhu Yifemrpnno. Tur kfo tkruraf-motra niamoya. Ndnnettann bi tfit kita turpnno. To niko nhai kfo ttiwon mikahkma, ‘Nine fitohko yita?’ ⁶ Na bi inji kfiwota nikmoh yima yuhum bi rinur finywom. ⁷ Na kfo mifwanko, nane sinya troh tanyruhanko. Hifa inji sinya trohruhanko. Na sinya troh tany shombat, Bro Yifemrpnno muhruha. Rorpnno yirhoyann tfit nd toh tamnouyuk Yafothar kfo tkrurafrohatar thu hamuhrahrko. ⁸ Nd Yafothar nieruharn nda bbinysofthu tuhan yindarim yak nuhasrahm fasoh fasoh nefm niewa yihotam, yo yimaroh toh marnyahato yima yuhum wutham rhuneft, yo ariham finji finji toh marnyahato Bro Nkifrarhu kotkfot mrokfo duhatm rhurahm. Nd ndm Yafotharn yak hta bohta nuhasrahm. ⁹ To frohmn fasoh fasoh niwa yihotam hikwam? To nd na hik duha yita yimam, romn nd yihotam hikwom. ¹⁰ To frohmn Bro Nkifrar hti wuthewar? Nhai wom frohm hti wuthakahr. Ndnnettann nann nohhato Yifemrpnno yihato nhai wom htirhotkma. ¹¹ To frohmn Bro Nkifrarpnno mrokkfetm rhuruham? Nda bbinysofthu yurmo tndhr, rorn bi Bro Nkifrarpnno mrokkfeter. Ndnnettann yimam nd tndhr hikwam to rom inji buga Bro Nkifrarpnno mrokkfeterm.

¹² Rom tom nanhu yima yuhur yorhwa bok mrokkfom. Htitanko nhai yimbhindangm tohetohkahmko nanhu mrokkforoh yakneft. Ndnatn nhai ptha dbuf nuhas bugewotanko. ¹³ Kto Bro Nkifrarhu yafothet mrokkfot mhfnahwa Yafothar yak nuhas bonuhasahrko Bro Nkifrarhu tu yafothet nef mifm. Nd Yafothar nieruharn nikmoh yima yuhum yak hta bohtaruhatrko nd yiharn yak dukarahko nd na pthayuk mrokkfom. Nd

Yafothar pthayuk mrokfom nhai be turhu fijo ptha fura bofuraruhatr. Nhai. Mrokfom na kfo nuhasyukrpm ptha nuhashirahrko. Yo ktopakto rhu hanyruha tamoh tamoh nefm yak nuhasrahrko. ¹⁴ Na harhuyuk mrokfo rifhur rorn yakruharr pthahirahrko. Ror nayuk tamoh nefm nann bro yufat yakruha. ¹⁵ Bro Yifemr harhuwa tamoh tamoh nanuhet. Ndnettn kanganko, nanhu mrokfo rifhur rorn yakruharr kfo nuhasrahrko.”

Krhopami yindhor nmbuhathu mrokfot

¹⁶ Jisadr tfit kfo memor, “Bi brbohwt nanhu yinyeft. Afo hti hambrafrahkma, ee tfit toh hany tefihato tfit htihakrahkma.” ¹⁷ Jisadr inji kfo-motr wom disaiperm wanyaf hanyhato tum rinahti nahtihato kfo memom, “Ror kfi mrokfothu yimbu yuhat finji yorhwat? Kfo famur, ‘Toh tefi hasiwakomn hti hambrafrahkma yo tfit toh tefinihato tfit htihakrahkma.’ Yo womt kfo famur, ‘Ndnettn nann nohhato Yifemrpnio yihato nhai wom htirhotkma.’” ¹⁸ Yo kfo memom, “To nd wom mrokfot kfo famur, ‘toh tefinihato,’ nd mrokfo nmbuhathu afo myak mmetewunomt nd mrokfo nmbuhathu yimbu yuhat.”

¹⁹ Jisadr bi htimorm rom ror pthayuk mrokfot myak mmetamohat. Jisadr inji htihato kfo ttiwon memorm, “Nikome nd na kfo yamu, ‘Toh tefi hasiwakomn hti hambrafrahkma, yo tfit toh tefinihato tfit htihakrahkma,’ ndtn kak mmetewuko?” ²⁰ Wawanyko! Na kfo mifwanko, niko nur dungunangurahko. Ndar bbinysofthu tuhant yindars rom nhai inji naruhatm. Rom be yindhorhato rhurahm. To nhai mrokfom. Niko warhu dungunangu-twako. Kto tfit niko rhu yindhorrahko. ²¹ Wom kfo nhombra mrokfot akfoyant. Wom mett yon yak yibonraht rhu kurhiwatn bro krhopam kekwt yon yak yihar. Krhopam yak hanitatn bi yonr fnurnir, bi be. Nd yonrn tfit bro yindhor nmbuhathu hnewurt, nd rot hatoh hasoyuk krhopam nhai wom dukakahtm. ²² Niko inji narahko. Nikmoh yima yuhum krho hasoruhann kto na nikompno nahtiruha yiharn tfit nd krho yima yuhum yohniruhann tfit bro yindhor nmbuhathu yakrahko. Niko yakruha yindhoreft nhai yimam yak nohruhatmt. ²³ Nd yihar mfrpskina thombat niko nhai nanpno wom tamoh kfo ttiwonruhatko. Na kfo mifwanko, tamoh tamohm nanhu yufatpno Bro Yifemr kfo ttiwonrahkomr, be yakhato wahirahrko. ²⁴ Niko toh hnamo yiham niko nhai inji nawon-rmoko. Afo ariham wanhombrawon-twako. Afo Bro Yifemr nanhu yufatpno wom shrm wakfo ttiwon wontwakomr. Inji ttiwonhato fekkomm, htirahko tfit bro yindhoreftpno rhurahko.”

Jisadr be bi mfrfnahnihato nda bbinysofthu bbukeft mano mano fahotmort

²⁵ Jisadr tfit kfo memorm, “Ariharhof mrokfom kfo nhombra mrokfompno ptha nuhas hnaroyanko. Kto nhai kfo nhombra mrokfompno kforhotanko. Tamoh tamoh rim kfota mkfota mrokfom Yifemrhum be kfo hik bohik nuhasruhanko. ²⁶ Kto nd yihar be nanhu yufatpno tamoh tamohm Yifemr kfo ttiwonrahkomr. Nhai nann tfit nikmoh mrokfom Yifemrpnio kfo ptharhotanm. ²⁷ Bro Yifemr hti wofnworko. Nhai be sfno inji hti wofnrfoftrko. Na hti yindhorhato niko na htimohat, duka memoko, ‘Ndar Bro Nkifarpno niamo yimayer.’ Ndnettn Bro Yifemr hti wofnworko. ²⁸ Na afo Bro Yifemrpnio wutohmoa. Tfit Yifemr wuhtanyhato ndar bbinysoft fawihnamoya. Tohmoyann be bi tfit kanga ndar bbinysoft htanyhato tfit Yifemrpnio aia.”

²⁹ Tu Jisasrhu disaiperm inji wanyhato kfo memom, “Nd mrokfom asomif ni pthem, nhai be kfo nhombra mrokfom kanjo ptharfonm. Ptha hik mifnm. ³⁰ Nom bi hti hik bugewunomn tamoh tamoh mrokfom yimam duka kkopenhato hus yima yuhetem, ni bi htitnm. Nhai afo mekahn, ‘Afo turoh tnge kfo ttiwonrahma.’ Ndnatn nom inji htitanomn kangnom, a to Bro Yifemrpn toh tanyhato niayetn tamoh tamoh dukefm bi htitrm.”

³¹ Rom inji kfomotm tfit Jisasr kfo memorm, “Bi duka ppohato bi hti duka tungunewukma? ³² Wawanyko! Na kfo hnamohat to be bi yihayer. Rpen rpen hik tubatuyafruhamko na turpetena tuhaf tanyrahko. To mirahko ka nhai nanhu wom frohr. Nhai. Tor nanhu Yifemr. ³³ Nanhu dukeft kanga nanpno waftrkafkakhomn be rhu mmorahko. Ndnnetann nd mrokfom kfo pthianm. Niko nda bbinysoft toh thoft, to ka mirahko ka be toh yindh-orrhnom. Nhai. Krhopam yakrahko. To mirahko riyakrmiyahkato arisuhak-nom. Toh bmtakfot. Bi nann ndar bbinysoftu bbukeft mano mano fahot tkafmoyant.”

17

Jisasr turhu disaiperm Bro Nkifrarpmo kfo bruttnamo yuhat

¹ Jisasr turhu disaiperm pno mrokfo kfo pthahe buganimormn yura hefenr wuyukatohhato kfo bruttna memor, “Bro Yifeme, be bi asor bi yihar. Ninhu Yonr bro yufati bro nanyjar bbuka rifhur wahenr. Wahekahtnr tawo ror hingrnayuk hingrneftn ni tfit bro yufat yakrahn. ² To bi rorhu tirtn ninhu hingrneft hnamont. Rorn tuhan yindariroh bro tohak yimar fak htamo. Ni hayuk yimam rorn toh nkifraniyuk yafothar kahukm. ³ Yimam ni htihato duka kangm, ninrpa tu Bro Nkifraye, yo Jisas Kraistr tu Bro Nkifrar kfo tkrurafmo yimayer, inji duket yimam toh nkifranirahm.

⁴ Nd ni hayuk hingrneft bi hingera bugamoyant. Inji nahato ninhu bro yufati bro nanyjar bbuka rifhur bi nd bbinysoft thofm bi fak nuhas bonuhas bugamoyanm. ⁵ Bro Yifeme, nda bbinysoft tafi dborha duha na ninpno tohmohat afo bro yufeta tohmoya. Na kanga arihat nd bro yufat tfit wahekahtna ninpno tohruha.

⁶ Nda bbinysoftu tuhan yindarim, nanhu yufatpno kfo htahemom, bi ptha nuhasmoyanm ninhu yufati ninhu toh yuhat yo ninhu dukefr. Ni tunhu yufatpno rhuyukm, to bi nann hemo. Hifa fak hik marnyamomt ninhu mrokfot. ⁷ Arihat bi tawisafwom, ndar nanhu tirt yorhwa tamoh tamohm ninn hemoyem. ⁸ Nd ni hayuk mrokfo bugam kfo ptha nuhas bugamoyanm. Nd mrokfom yak duka tungunamotmm na ninpno toh tany nia yuhat bi wany hikmomtn rroh bro dukeft duka kangm, ni mifnn kfo tkrurafmotna niamoya.

⁹ Na rroh dukefrpno kfo bruttniwa nhai nda bbinysoftu yima bugam dukahato kfo bruttnakaha. Nhai. Nd ni tu hayukm kfo bruttniwa. Nd yimam to tunhu yufatpno korhm. ¹⁰ Na yakitohwa tuhan yindar bugam ninuhem. Yo ni yakitohwam to nanuhem. Rompno na bro yufat kekwa.

¹¹ Na nieruha, na nhai nda bbinysoft wom toh hatohrhota. Na nia thombat rom nda tuha bbinysoft toh hasorahm. Rom asha tuha bbinysoft toh haso thombat ni tu yura myorhekwa Bro Yifeme, bi ninhu bro bbuka nanyjaret tirtn htewanm, wayukatohaf hanyswanm, nd yimam ni tunn hemona. Ninhu tirtn rhu haso thombat nayakitohkahmn rpat atohtwam no rpat tohmo kanjo. ¹² Na rompno toh hnamohat ni hemo bro bbuka

nanyjaret yafotharpno toh hongmb hnamotanm toh marnya hnamom. Nhai womr firtrohromnom. Nd firtrohmo yimar, ror bi hukrn, rorpar firtrohmoat be yihato nohmor. To Bro Nkifrarhu rfa borngt bi nd mrokfot ruhettn, to be nd neft rhu twanhomot. ¹³ Na bi nia yibonwoyann nda bbinysof afo tohetann nd mrokfom kfo pthiwanm. Kanga tuka hatohwa yindhoreft kanjo rom inji bro yindho-reftpno atohm.

¹⁴ Ninhu mrokfot bi kfo pthahe-moyannm. Kfo pthahemotanm nhai ndar bbinysof thofroh dukefm hikkahm. Nhai. Ni dukiwa dukefr, na dhikwar, ndr kanjo inji hikwatm, ndnettn nda bbinysof thofm hti srthuwomm. ¹⁵ Na nhai kfo mikahann, wayaktwanm. Nhai. Be kfo bruttna kanga ninhu mofsinhit watabohifat hmbrikahtnm Tndhr nhai finji naruhatrm. ¹⁶ Rom nhai ndar bbinysof thofroh dukefm hikkahm. Nhai. Ni dukiwa dukefr na dhikwar, ndr kanjo inji hikwom. ¹⁷ Ninhu mrokfot tu fipet mifet. Ndnatn kanga, nd mrokfot nd yimaroh yima yuhum ahingrnakahtn ayak wus bowuskahttm be ninpno rim tohni bugarahm. ¹⁸ Na ni tkrurafmotna nda bbinysoft niamoya. Nd yuhatn nd yimam tkrurafmhotanm kmi kmim rhu fnahrahm. ¹⁹ Rom dukahato na bi ninhu tirtn rhuhato ninhu dukef yuhatn hikwa. Tawo rom na hikwa kanjo ninhu tirtn htahato ninhu dukef yuhat hikrahm.

²⁰ Na nhai nanhu disaiperpam dukahato kfo bruttnakaha. Nhai. Rom pthayuk mrokfom wanyhato na hikruha yimam rpat duka nhafoh bugahato kfo bruttniwa. ²¹ Na kanga no nito tohwa kanjo rom inji rpat naftrkafhato rpat atohm. Yo rom nonpno aftrkafkahtnm nda bbinysofthu tuhan yindarim htiruhamn nanhu nia nmbuhat duka mirahm tu Bro Nkifra tkrurafmotna niamoya. ²² Nd ni nanpno hayuk bro yufat bi hemoyannm. Nd bro yufatpno rpa yima yuhur rhurahm no rpa yima yuhur yorhwa kanjo. ²³ Na kanga na romn thu hamuhkfot, yo ni tfit nann thu hamuhkfot, inji inji anakahnomm rom be rpa yima yuhur rhurahm. Tfit ndar bbinysof thofm inji htiruhamn nanhu nia yuhat duka mirahma, Bro Nkifrar tkrurafmo yimayer. Yo duka mirahm, nanhu disaiperm ni Bro Nkifra mondt htewunm na ni Bro Nkifra mondt htamo kanjo.

²⁴ Bro Yifeme, nd ni hemo yimam na kanga na tohruha kmit rom rpat atohtwanom. Na kanga nd na hatohruha bro nukefiti bro yufat afo ahtitwamt. Nda bbinysoft tafi dborha duhattn na hti wofnhato hemona nd nukefiti bro yufat. ²⁵ Tu dborioh nefm yakitohet Yifeme, nda bbinysoft tohwa tuhan yindarim nhai tawisafkahnm. Nanrpaya tawisafwann. Ndar nanpno tohwa yimam, rom tawisafwomt nanhu nia nmbuhat. Kangm, Bro Nkifrar kfo tkrurafmo yimayer. ²⁶ Bi fak nuhasmoyannm ninhu yufati ninhu toheft yo ninhu dukefr. Tfit wom yiha wom yiham yak nuhas hanyruhanm. Inji narhotanm, ni Bro Nkifra na marbit htewa kanjo rom tfit nd neft yakhato womm marbit htarahmm. Yo na inji htirhoyann thu hamuhruhanm.”

Jisars bro krhopam yakhato nohmorn tfit sinyamor

18

(Sapta 18–20)

*Judasr yahr kmiroh tirmn Jisars htamo yuhat
(Matyu 26.47-56; Mak 14.43-50; Luk 22.47-53)*

¹ Jisasr Bro Nkifrararno kfo bruttna buganihato turhu disaiperm myakni-hato tek Kidront hayuknihato mkuko yimom. Nd tek mkuko rhuyuk olif suhtn yi rhumom. ² Nd olif suhtn bok yiham Jisasr turhu disaiperm yaknimoarm ndha yi rhu rifinymoum. To Jisasr hndhnayuk yima Judasr ror bi htimort nd tkitt. ³ Ndnetn Judasr to be nd yuhatn hanymorm Romroh soldiami polism. Polism prisroh bro yimami Farisim kfo tkrurafomm. Yahrt tohyuk kfra inyarut yo kshn rpat fakitohakmomm.* ⁴ Jisasr nd yimam htihak-mohat nhai yak mmormort rroh yi nmbuhat. Ror bi tawisafmorm rorhu yakyuk krhopa bugam. Bi tawisafetn kfo ttiwon memorm, “Nikome frohm hambriwako?”

⁵ Kfo memorm, “Nom Nasaret thof Jisasr kak hambro hnewunom.” Jisasr sinyahato kfo memorm, “Na to asoya.” Nd Jisasr hndhnayuk yima Judasr, ror rpat nd yahr kmimpno rpat tohmoum. ⁶ Jisasr kfo memotr, “Na asoya,” nd yimam tfit mongthur mongthur yihato tuha dangn yukha dangn yukham tmbho thumom.

⁷ Tfit wompam Jisasr kfo ttiwon memorm, “Niko frohr hambriwako?” Kfo memorm, “Nasaret thof Jisasr hambriwunom.” ⁸ Jisasr kfo memorm, “To bi kfiyanko, na asoya. Na hambro hne thombat to bt ndar na hik htfaswam afo aim.” ⁹ Ror nd yima yuhur inji mfnahhato inji kfo pthamohat, to bingot mrokfot bi kfo memotr, “Nd yimam ni hayukm nhai rroh womr yakrmotmr frtrohrmornom.” Nd mrokfot bi inji ruhettn to be ka yimam fak htamotmr inji kformor.

¹⁰ Saimon Pitar ror bainat fakitohakmor. Nd bainat kimt teh tundakhato prisroh bro tohak prisru hingrna yimarhu tirmif yimbhindangt frbubaf-motrt misuhmot. Nd yimarhu yufat Malkusr. ¹¹ Pitar inji namotr tfit Jisasr kfo memotr, “Bainat tfit wathuntwe. Ni finji dukewuna, ka kangn, nd krho nmbuhat bi Bro Yifemr dkfoyukt ayak duha yirte? Nd dukeftpno inji newun?”

Jisasr Anasrarno hanyomo yuhathu mrokfot

¹² Nd Jisasrhu yakt yimo yimam Jisasr tir tir yakmomr mtitofe kibokimomr. ¹³ Kibokiyakhato afo Anasrarno hanymomr. Anasr Kaiafasrhu matoh-emer. Kaiafasrn prisroh bro tohak yimarhu hingrneft fakitohmort nd gunyjimr. ¹⁴ To nd Kaiafasrn bro tohak prisr tohhato Judaroh bro yimam bi kfo memorm, “Rpa yimarpar Juda buga-nmoh tkitt yakhato suh nanyorneft hifa.”

Pitar mett kfo nhehmo yuhat

(Matyu 26.69-70; Mak 14.66-68; Luk 22.55-57)

¹⁵ Jisasr hanymohat Saimon Pitari wom disaiperr hik hanymofr. Nd wom disaiperr bro tohak prisr bi tawisaf-morr. Ndnetn ror rim fnahnimor nd bro tohak prisru kuny kmifako Jisasr hafknemohat. ¹⁶ Pitar ror kmifa rim fnahnitn mtoh hasomr. Tfit ndwom disaiperr Pitar hti hambrohato tfit nd kmifa rim fnahnit tohukatohmoa mett kfo ttiwonhato Pitar fknenimor. ¹⁷ Nd mett inji htihak hanyhato Pitar kfo ttiwon memotr, “Ka ni aso nd yimarhu wom disaipern?” Pitar kfo memotr, “Nhai na. Na wom yimaya.” ¹⁸ Yifung-nano bro frfoneft yakmottm nd bro tohak prisru kuny kmifaf yukatohaf hanyuk yimami polism kaht tenghato haunyomoum. Pitar ror nd yimampno rpat tohhato kaht haunyomoum.

* **18:3:** Nd temperthu prisroh bro yimam kfo tkrurmo polism Bro Nkifrarhu temper tohukatohmoum.

*Prisroh bro tohak prisrn Jisasrhu kotkfot yakitohmo yuhat
(Matyu 26.59-66; Mak 14.55-64; Luk 22.66-71)*

¹⁹ Prisroh bro tohak prisr sinyahato kfo ttiwonmorr disaiperroh nmbuhat yo tu Jisasr mrokfom kfo pthamoa yuham. Ndm kfo ttiwon hik bohikmorr. ²⁰ Jisasr sinyahato kfo memorr; “Na mrokfom kfo pthamoaohat nhai wom kafroh tkitt tuhan yindarim yak nhafohhato kfo ptharmoayanm. Briyaha tafontn Judam rifiny hakuta rmonmn yo Bro Nkifrarhu temperr rifinymoatm mrokfom hemoanm. ²¹ Ndnettn to tamohmpno na ttiwonwa? Na pthamo mrokfom wanymo yimamn wakfo ttiwonn. Rom tawisafwomm na pthamoa mrokfom.”

²² Jisasr inji kfo pthamotr brbo tohyuk polismanr sinyahato Jisasr nyin-gatik frsrfamorr. Frsrfehato kfo memorr; “Tot inji tohak prisr kfoyuk mrokforoh kfo wokneft?” ²³ Tfit Jisasr kfo memor; “To na finji kfiya? Faso kfiya? Faso kfo thombat to wakfo nuhasna na kfoyuk tng bebt. To na dborioh mrokfot ptha thoft to tamohmpno nyingatikpako be frsrfa furena?”

²⁴ To be yuht baklain kiyetr Anasr yakmorr Jisasr tfit Kaiafasrhu tirtn htamorr.

*Pitar tfit wompam kfo namhi nhehmo yuhat
(Matyu 26.71-75; Mak 14.69-72; Luk 22.58-62)*

²⁵ Saimon Pitar afo kahtpno tohhato haunyomour. Kaht haunyo hasetrn wom yimam rorpno tohmom kfo ttiwon memomr; “Ka ni aso nd yimarhu wom disaipern?” Pitar nhaf kfo memor; “Nhai na. Na wom yimaya.” ²⁶ Tfit nd bro tohak prisrhu wom hingrna yimar tohhato Pitar kfo ttiwon memorr; “Ka ni ndar yimann mswirt yihof htiroya?” Ror nd Pitar yimbhindangt frbbomo yimarhu yimater. Ror tohhato htimorr Pitar sinyahato nd prisrhu hingrna yimarhu yimbhindangt frbbomohat ndnetrn inji kfo ttiwonmorr. ²⁷ Inji ttiwonmotrr tfit wompam Pitar kfo namhi memor; “Nhai.” Pitar inji kfo namhi hanymor krir nakumorr.

*Jisasr Pailatrpno hanymo yuhat
(Matyu 27.1-2; 27.11-14; Mak 15.1-5; Luk 23.1-5)*

²⁸ Be Jisasr prisroh tohak yima Kaiafasrhu kmifat ruhetrn tfit Judaroh bro yufet yufet yimam yaknimomr Judiaroh gafanarhu kunyko tfit hanymomr. Yihat bi nitre dbtaku hanyettn Judam nhai rpat hafknermomr gafanarhu kmifat hanymohat. Be inji briaahako mtohmom. Turoh nkifra tndht yakitohetmn rom Pasofa burwa tofi yihar bi brboh hanyetr rom nhai tfit tamoh tamoh nefm yihato turoh rhu nmbuhat yak beb hanykfot. Be rhu marnya bomarnyahato Pasofakfot htayuk yemro burwat rom yakfot. Nd dukefetmn nhai fknermom Jisasr gafanar rhuyuk kmir hanymohat.† ²⁹ Pailatr fnahnihato nd briaahako tohyukm kfo ttiwon memorm; “Tamoh tofirpno nda yimar yamukako kot atohr?” ³⁰ Kfo memomr; “Ror ufasoh nefm ana duha yir nhai ninpno hnarfotnomr.”

³¹ Pailatr kfo memorm; “To be ndhtet nefst toko wayaknikahkomr tukmoh boririfih yuhat wahikko. Yimar finji finji nayetr finji niwakomr nd yuhatn wahiktwako.” Tfit Judam sinyahato kfo memom; “Romroh gafmanr kfo rafo memor; nom Judanom nhai wom tofiyet yimar nmoh tire bgre misn kihegir

† **18:28:** Nd gafanar o Pailatri rorpno tohyuk yimam rom nndo Rom thofmn nhai hikrmoamm Judam rhuyuk tofim o tamoh nefm. Nd dukeftpno Judam memom; “Nd nndoh kmimpno nhai nom brboh yihato rompno nabnotkfot. Inji narahnom Bro Nkifrar hti bebrahrom.”

nohkfot. Be tu nhai mif.”³² To nd nd nefm Jisasr pno rhumom, to bi tur kfomoa kanjo nd yuhatn to be rhu hik twanho mifmom. Bi kfo memor, “Na ndar bbinysoft tohhato bgre miyeta kasinyarahma.”[‡]

³³ Pailatr tfit turhu kmifar rim fnahnihato Jisasr nakumorr. Jisasr yi rim tohmotr kfo ttiwon memorr, “Nine Judaroh kinge?”³⁴ Pailatr inji ttiwonmotrr tfit Jisasr ttiwon memorr, “Ni inji kfo ttiwonwohate tunhu dukefrn inji ttiwonwona o womm nanhu toh yuhat kfo nuhasmotmn inji kfo ttiwonwona?”³⁵ Tfit Pailatr kfo memorr, “Tamohmpno ndhtet ttiwon nmbuhat nanhu yima yuhurn wadukakhato ttiwonrfoyan? To na Judayann inji ttiwonrfoyan. Ni tunhu kmi thofmi tunhu prisroh bro yimam nanhu tirt htaromn. To tamoh neft namotn asha hnaromn?”

³⁶ Tfit Jisasr kfo memor, “Nanhu kingdomkfot nhai ndar bbinysofthu kingdomkfot rhukaht. Nanhu kingdomkfot be ndar bbinysofthut arhut, nanhu hingrna yimam sinyarromn toh raforrotma nhai yimam yakhato Judaroh bro yimaroh tirt htarotma. Nhai. Nanhu kingdomkfot nndoh womharhoftn ndnetmn Judaroh bro yimaroh tirt htaroma.”³⁷ Jisasr kingdomkfot kfomoatr tfit Pailatr kfo memorr, “Ni ka kinge, ndnetnn kfo kangn, ‘Nanhu kingdomkfot nhai ndar bbinysofthut rhukaht.’” Jisasr kfo memorr, “Uwa, na to finji kforhoya? Mrokfot to bi tot bi tunn kfiwunt. Na mmem hiyauhato ndar bbinysoft niamohat, to yimaroh king tohato Bro Nkifrarhu tu mrokfo yimu yuha mifthu kfo ptha nuhasyuka niamoya. Yimam Bro Nkifrarhu mrokfo mift yakitohwam, nd yimam nanhu mrokfot wanukwomt.”³⁸ Pailatr tfit kfo ttiwon memorr, “To nd ni kfiwa kfo mif mif mrokfot to tamoh mrokfoyet?”

Jisasr bgre mis frdbkafmo yuhat

(Matyu 27.15-31; Mak 15.6-20; Luk 23.13-25)

Pailatr Jisasr pno ptha tanyhato fnahnimorn Judam rim kfo memorm, “Nd yimar htiita nhai wom tamoh neft narmor.”³⁹ To niko bi hti hnayeteko, ndhtet bro Pasofa rhuyuk yihamn kalabus tohwa yimaroh womr fnah-newur. Niko tukomn kangko frohr afnahnar, tukomn yufat wayuta-twakomt. Kangko ndar Judaroh kingr afnahr?”⁴⁰ Tng rihar wayur sinyahato kfo memom, “Nhai, nhai rorn. Barabasrn afnahr.” Nd yima Barabasrn kalabus htamohat, rorn rikohnefti yima tatneft damiagt hatonemourm. Nd nefm inji namoatr kalabus htamomr. §

19

¹ Rom inji waniak waniak-motm Pailatr wanysi wanysi-hato soldiam kfomotrm soldiam wifkfot yakhato Jisasr nd wife wife smbho bosmbhakn-imomr. ² Tfit huhra mtitofit yakmomtn kingroh mfham hatohwa kraunkfot kanjo yakke yakmomtn yuht huhra rmonett mfhatn wathu hamsismomr. Yo kku kkorpa kanjo fnhuyet yuke hmbreshar yakmomn hmbremomr.*

[‡] **18:32:** Fasoh net yimam kot tohnihato nohmoahat husfirpa yuham nohmoum. Judaroh kotkfot tohyukm be yakmoamm tahiye tahiye frdbofna nohmoumm. Romroh kotkfot tohyuk yimam hus yuhaf htamoumm. Womnam bgre mimn kihegir nohmoumm. Womnam mfham tmbhomoumm. § **18:40:** Ndar rfa borngthu mrokfom hti hik bohiket yimam duka memom, Barabasr nhai yindhorrmoar Romm Judaroh kantrikfot tohato tfit Rommn gafnam yufat yakhato tohkfot. * **19:2:** Nd Jisasr hmbremo yuke hmbreshar, briahako yarim ruhakyuk hmbresha kanjohot hmbreshar hmbremomr. Yo nhai batenim duhater, be tirpaf tuheter.

³ Inji natamomrn bt tom yuwi kfo nhehakni memom, “Asor nd rom kfiwa Judaroh kingr.” Inji kfo nhehaknihato tire srfamoumr.†

⁴ Pailatr tfit wompam fnahnihato briahako tohmo tuhan yindarim rim kfo memom, “Wawanyko. Nd yimar tfit kforhota nikompno tfit hnerahmr. Ndt n niko hti kshrfaruhakomn duka mirahko ror nhai wom krhopam htikahr.” ⁵ Be Jisasr yarim fnahnamor. Nd mfhat wathu hamsismo huhra mtitofiti nd hmbremo kku kkorpa kanjo fnhuyet hmbreshar, ndm rpat yarim hatohmorm. Yarim hatohmotrm Pailatr kfo memom, “Wahtiko. Asor nd yimar.”

⁶ Yarim hatohmotr prisroh bro prismi Bro Nkifrarhu temperr tohukato-hwa polism wayur sinyahato kfo memom, “Wahegirkomr; wakihegirkomr. Bgre misn wathu hegirkomr” Pailatr rom pthamo mrokfot wanyhato kfo memor, “To ndhtet neft tuko wayaknikahkomr tukomn wakihegirkomr. Nane htitita nhai wom nefm narmotr btn nann finji narhoyanr.” ⁷ Tfit nd Judaroh bro yimam kfo memomr, “Nmoh nkifra thfa mntwat mkfo fnahmot, kfo kangt, wom yimar kfo kangr, ‘Na Bro Nkifrarhu yona,’ nd yimar bi mrokfeter anohtwar.”

⁸ Pailatr nd mrokfot wanyhato yima yuhur mfro fanhomorr. ⁹ Pailatr tfit gafanarhu kmifako yimorn tfit Jisasr rim ttiwon memorr, “Ni fitoh kmi thofe?” Jisasr asor. Nhai wom mrokfom kfo ptharmor. Be wany marsisamorr. ¹⁰ Jisasr Pailatrhu kfo ttiwon mrokfot nhai kfo yakiormotr kfo memorr, “Ni nhai kfo yakiokahna. Wawany. Nanrpaya kforuha ni nhai bgre mis tuhegirruhatmn. Yo nanrpaya kforuha bgre misn tuhegirrahmn. Ndm ni ka nhai tawisafkahnm?”

¹¹ Jisasr kfo memorr, “Yura bro kmi hefenr tohwa Bro Nkifrar nd ni hatohwa bro yufat memotr nanhu mrokfot ninn kakitohwont. Na yiro ritohtayuka na nhai finji kforhota. Ndt mrokfot duhatet. To tmift nd yimar na hndhnayukr, mirahn ka tu dborioh neft namor. Ni nayuk nefmi ror nanpno namo neft yak htineft, ninhu nefm be inji yura kitm, nd ror na hndhnamo yuhat ndt tu krhonano kitt, rothu krhopam broyem.” ¹² Jisasr pthamo mrokfot Pailatr wanyaf hanyhato memour, “Fitoh yuhamn ayak hfhanafoyanr,” to nhai, Judaroh bro yimam wayohrfat wayohrfathato kfo memom, “Nd yimar be inji yafhorahn, ndt ni nhai tu Sisarhu yimatn rhukah. Rorhu yimatn arhun to nhai inji narfotn. Yimar kfo kangr, ‘Na kinga,’ nd yimar kangr, ‘Sisar riyak htafhato tfit nann kinga atoha.’”

¹³ Be Pailatr nd mrokfot wanyhato Jisasr fak hfhanmorr. Yak hfhanhato Pailatr ror jasr yorhwa gajis rim rhumor. (Nd Pailatr jasrhu gajis rim rhumo tkitt Hibru yarmumat kutamoumt Gabata.) Nd rhu yefinyuk tkitr tahirpaye thu trku hftas bugamorr. ¹⁴ Nd yihar Judaroh Pasofa burwa yeyuk yeshriroh yak hta msa yibon yihar rhumor. Mar bi dany marrn Pailatr kfo memom, “Judako wahtikomr nikmoh kingr.” ¹⁵ Judam wayur sinyahato kfo memom, “Wuri air! Wuri air! Yura bgre misn wakihegirkomr!” Pailatr ttiwon memom, “To kangko nikmoh kingr yura bgre misn akihegirre?” Prisroh bro yimam kfo memom, “Nom nhai wom kingm. Sisarpar nom tawisafwonom. Nom rorrparhu yinhitn korhnom.”

† **19:3:** Soldiam Jisasr wondh nhta bonhtamohat yuwi memom inji kingm kanjo wondhruhanomrn bt mkfak mkfak srfa bosrfarahomr. Nd dukefetmn kingm hatohwa wondht kanjo wondhmomr.

¹⁶ Pailatr be Jisasr yakhato kfo memorm, “Asor Jisasr. Bi tukmoh tirmn htewanr. Tukomn wakihegirtwakomr.”

*Jisasr bgre mis kihegirmo yuhat
(Matyu 27.32-44; Mak 15.21-32; Luk 23.26-43)*

Inji kfonihato soldiaroh tirm htamorr. ¹⁷ Be Jisasr fakni hanymomr. Rorhu tuhegiryuk bgre mis tur tita hatohta hanymort. Kmi taunt htany-mortn wom kmi mfhat kutewumt yima Mfha Tpit, ndha hanymort. † (Hibrukfot futamoumt Golgotat.) ¹⁸ Ndha bgre misn tir wuram nire frdbkafhato yuht bgre miyetr kasinyahato tou fopmomr. Wom hus yimaf yakmomf bgre miyetyf mano mano tohmof. Womr tirmifko, yo womr kindonko. Jisasr buha tohmor.

¹⁹ Pailatr kfomotrm wom mrokfot mimkutn wandfakmomtn Jisasrhu bgre misn yura mfhako frdbkafakomnt. Nd mrokfot rom wandfakhatato htamat kfo memot, “NASARET THOF JISASR, JUDAROH KINGR.” ²⁰ Pailatr memorm, “Nd mrokfom Hibrukfotn, Romkfotn, yo Grikkfotn inji wawandfa hanyswakomm mimkutn.” Jisasr hegirmo tkitt brbo tauntpno hegiretrn bok Judam rim fnahni mfnahnimoamn nd rom wandfamo mrokfom rim htini mhtinimoumm. ²¹ Prisroh bro yimam nd mrokfot htimohat Pailatr mkfo memorm, “Awandfawahn, ‘Judaroh Kingr.’ Wawandfa wame, ‘Nd yimar kfo memor, ‘Na Judaroh kinga.’”

²² Tfit Pailatr kfo memorm, “Mrokfot bi inji wandfityant to be inji arhut.”

²³ Soldiam Jisasr yuht bgre miyetr tou yopnihato nd ror hatohmo hmbre wuskar husfihus yimam nhombrahato fak nhta nhombramomm. Nd yiro rim ruhakmoa yuke hmbresharpar fak trohmomr. Nd hmbreshar nhai be nmbuha nmbuha rmontham yakhato nahurmomr. Nhai. Be yuht thar hmbremourr. ²⁴ Be inji htihitato soldiam kfo memorm, “Be inji yuht arhukahtir pirai saturahnomr. Frohr winr rorn yakrahr.” Rom namo neft nkifra rfa borngt kfomo mrokfo yuhatn fak hikmot. Nd nkifra rfa borngt rhumo mrokfot kfo memot, “Na hatohmo hmbresham yak nhtahato fak nhombrani-momm. Yiro rim ruhakyuk yuke hmbresharne pirai satuhatato yimam fakmomr.”

Sng 22.18

Soldiam to nd nkifra rfa borngt rhuyuk mrokfo yuhatn fak hik mifmom.

²⁵ Jisasr tuhegirmo bgre mispitn tohmo met kmime, tu Jisasrhu mmemt yo rothu nmemt, yo Klopasrhu met Mariat ee Makdala efkot Mariat. Nd husfihus metn Jisasr thu hegirmo mispit tohmom. ²⁶ Jisasr memor wahtiyafoya htimort turhu mmemt. Yo nd tu Jisasr yuhu mongimoo disaiperr htimorr rorhu mmemtpno brbo tohmor. Inji htihato mmemt wakfo memort, “Nd ninpno brbo tohwa yimar bi ninhu yoner.” ²⁷ Tfit kekutnihato nd disaiperr wakfo memorr, “Rot bi ninhu mmemet.” Be nd yiha nd disaiperr Mariat kfaknimortn be rorpno ritohakhato rorn rifakitoh-akmort.

*Jisasr myaknimo yuhat
(Matyu 27.45-56; Mak 15.33-41; Luk 23.44-49)*

²⁸ Jisasr ndar bbinysoft niahato hingrna hnayuk hingrnefm mdukakhato duka hna duka hnamormn duka memor, “Nd na niahato hingrnayuk hingrnefm bi hingrna buga twanho-moyanm. Bi be nanhu hingrnefm.” Inji

† **19:17:** Nd kmi mfhat kfe sfiohniyet yima mfham kanjo rhumoatt to be futamoumt yima Mfha Tpit.

kfonihato kfo memor; “Bupa knewa.” To nd ror kfomo mrokfot nhai be kfo furarmort. Bi nkiframpno kfo htamo mrokfot to be tfit kfo hik mifmort. ²⁹ Wain buroht rohett tohmot. Wom spans yakmomn nd wain rohnt thu yifakhato hisop yuhtarn kiyakhato Jisasr wuhemotm tmasakmorm spans ruhetmn. ³⁰ Jisasr nd wain bupam yenyi hanymorn wuroht kfoni memor; “Be bibe.” Be inji kfonihato mfhat yohnemotrnfaknimor.

Wom soldiar kfrat yakhato Jisasrhu kkreko was tiwonmo yuhat

³¹ Nd yimam kihegirmohat Fraide yihar kihegirmomm. To nd Fraide yihar tor Judaroh Pasofa Sabat yiha rhuyuk yeshriroh yak mska yihar. Nd Sabat yiha Judaroh tu bro yihayer, rom nd yihar nhai rom wom tamoh nefm nakfot o hingrnfem hingrnakfot. Turoh nkifra yirmoht mdukakhato duka memom nhai ndar hirwa yimam tfit Sabat yiha hirkfot. Ndetmn Judaroh bro yimam Pailatrpfno yihato kfo ptha memom; “Nd kihegiret yimam wuram frwokratmm nohrahm. Nohruhatm yak thurahmm. Nhai tfit nmoh bro Sabat yihar nd yimam tfit yura bgre mimn hirruhatm.” ³² Be nd kfofno soldiam yimomn barkof yimarhu wuraf fryifikatmofm. Rorhuf fryifikatni yo tfit yimomn womrhuf yi fryifikatmofm. ³³ Yo tfit yimomn memom Jisasrhu wuraf afryifikatnomf to nhai, htimomr bi nohetrn to be nhai fryifikatmomm rorhu wuraf. ³⁴ Be wom soldiar kfrat yakhato Jisasrhu mano kkreko wuwashato htimor kkupami bupam rpat yudbat fnahmom. ³⁵ Wom yimar ndar nefm turhu nyingaye htihato kfo ptha srhow, rorhu mrokfom kfo mif mifworm. Ror tur htir nd ror kfoyk mrokfo kfo mif mifworm, ndnetn niko nd ror kfoyk mrokfom wany yakiokfot. ³⁶ Jisasrhu wuraf fryifikat duha yimohat to rfa borngt yorhwa mrokfo yuhatn hikmot. Nd mrokfot inji korhwot: “Nhai rorhu wom tpit fryifikatruhatmr.” ³⁷ Yo wom mrokfot kfo kangt, “Tum wasyuk yimarn tfit yukatohrahm.”

*Jisasrhu thatipt nfri tahi muhtn rihtamo yuhat
(Matyu 27.57-61; Mak 15.42-47; Luk 23.50-56)*

³⁸ Arimatea taunthu yima Josefr yimorn Pailatr mttiwon memorr; “Na kanga Jisasrhu thatipt yakniruhant?” Pailatr kfo memorr; “Hifa, nhai mrokfom, wayaknitwant.” Be Josefr nd mrokfot wanyhato Jisasrhu thatipt mfakmort. Nd yima Josefr to Jisasrhu wom disaiperer. To Jisasr hikmoahat nhai Judaroh bro yimampno yak nriyafrmoar. Nhai. Be inji kafrohnano hikmorr. ³⁹ Josefr nd Jisasrhu thatipt yakmohat Nikodemusr faknhomorr. Nd yima Nikodemusr, to rorn wom yiha yifung yimorn Jisasrpfno mfnahmor. Nd yima Nikodemusr Josefr yaknhot yimohat ror dborioh mtha yarfonet pauraokfot hanymor. Hushtet mtha yarfonet mifhu mtha yarfonet pauraokfot hanymor. Ror hanymo pauraokfothu kropham 30kg kurhet pauraokfot hanymor. ⁴⁰ Josef Nikodemusrof yihato thatipt wuyak thurakmoft tu Judam noheh yimam hingrnamao hingrnfem yuhat hikmof. Nd Nikodemusr hanyuk dborioh mthet pauraokfot yakmofn yuke yuke rmontha nmbur nmbuham truf wuna hmbre buganimofofn, ee nd pauraayet rmontha nmbur mkuye ki tawonmofr yagr nmbuhar. ⁴¹ Nd Jisasr soldiam yakhato bgre mis tuhegirmo tkittpno rhumor wom bro mswirr. Nd mswirrn rhumor wom nfri tahi muhr. Nd tahi muhr nhai wom yimam bi htarmomr.

⁴² Nd yihar Judaroh Sabat yiharhu rhuyuk yeshriroh yak mska yiharn, to be Jisasrhu thatipt yaknimofn nd tuha brbo mswirr rhuyuk tahi muhtn rim htanymoft.

20

Jisasr sinyamo yuhat

(*Matyu 28.1-8; Mak 16.1-8; Luk 24.1-12*)

¹ Sande yiha dbha ksfu mif Makdala efkot Mariat sinyahato yimot Jisasrhu tahi muhthu htii. Yimotn htimott nd tahi muht frittomo tahis nhai wom rhurmot. ² Mariat be inji mhti tanyhato be tfit mkecutnihato tonayefrpar yimotn mtone fnahmot Saimon Pitari Jisasr mfro yuhu mongimoa disaiperrpno. Rof htihakato ttiwon memoft, “Nine?” Mariat kfo memot, “Brorhu thatipt be bi fakniromr. Yaknihato ka fitha htaromr?”

³ Pitarof be inji wany sanyhato rof yimof tahi muhthu htii. ⁴ Rpat afo tone hanyomf, tfit buha wom disaiperrn tone dimandihato tone troh tanymorr wom Pitar. Rorn bi tone dimandinihato yima gur htamo tahi muht mfnah gungonmor. ⁵ Tahi muh yifhatikt mtohhato wayirnamorn rihtimor nd yima gur tawonmo yuke rmontha nmbrrpam. Nhai yiro fknenirmor. ⁶ Kto Pitar mongko mtone fnahmor. Ror mtone fnah thuhato be fau hafkneni twanhomor. Yau hafknenihato rim htimorm nd yimarhu yagr nmbuhat tawonmo rmontha nmbm many. ⁷ Yo wom rmontha nmbuhat tng tpithu teh dbkafyukr mfhatpno mthu kiyakhato mfhatpno rpat kitawonmor, ndr ror be turpatr yak marnya bomaryahato mfha mthutamoko rhumor. ⁸ Tfit ndwom disaiperr bi barkof mtone fnahmor, ror fknenihato rim htimorm nd yima gur ki tawonmo wuskam. Htihato memor, “Dajohmn, yimar bi sinyani twanhir.” ⁹ (To nd Krairhu nohhato tfit sinya mrokfothu mna yuhat nhai bi yakrmoft. Nd Bro Nkifrarhu rfa borngt yorhwa mrokfot afo yuhre fak mmotamoft.) ¹⁰ Nd disaiperr mhti hambro tanyhato be tfit yimof kmifako.

Makdala efkot Mariat Jisasr htimoyuhat

(*Matyu 28.9-10; Mak 16.9-11*)

¹¹ Makdala efkot Mariat yima gur htamo tahi muhtpno brbo tohhato nurmout. Nur hanyhato wasifamotn memot, “Yiro tahi muh yuhat arihtiyafoya.” ¹² Asha rihtimotf hus moun-motf ganyom hmbresha hmbreyetf rhumof yima gur htamo tkittn. Womr mfha mthutamoko rhumor. Womrne wurasifko rhumor. ¹³ Nd mounmotf ttiwon memoft, “Bar mete, nine tamohmpno inji nurwa?” Kfo memotf, “Nanhu Brorhu thatipt ka yimam yaknihato nndo htaromt. Ndt hti hambrohato nurwa.” ¹⁴ Mariat inji kfone hanyhato memot, kekutniya, htimotr Jisasr. Rot Jisasr htimohat nhai duka marimot, “Arr Jisasr.”

¹⁵ Tfit tu Jisasrn kfo ttiwon memort, “Bar mete, ni frohmn nur hambriwa?” Jisasr Mariat ttiwonmohat rot duka memot, “Ka nd Jisasr htamo tkitthu mswir tikatr kfo ttiwonwora.” Ndnetn kfo memotr, “Yinowe, nanhu Bror ni yaknihato nndo hta thombat, wakfo nuhasafkahtna tfit yihomakruhanr.” ¹⁶ Jisasr tfit tuthu yufat naku memort, “Maria.” Mariat kekutnihato Hibru mrokfotn wukfo memotr, “Rabonai!” Nd mrokfothu yimbu yuhate, “Tisa.” ¹⁷ Jisasr kfo memort, “Mirahn bi ayaktiyanr. Na tafito afo Bro Yifemrpnno muhromoya. Be waikahnn nanhu nmemrom wakfo wamitwanm, na tfit yura muhhato na yifemwa Yifemr yo niko

yifemwa Yifemrpnō tfit yiruha yo na kfo bruttnewa Bro Nkifrar yo niko kfo bruttnewa Bro Nkifrarpnō tfit yiruha.”

¹⁸ Be Mariat yihato kfo memotm, “Na bi Bro Nungothetr htitawoyanr.” Yo Jisasr kfo pthayuk mrokfom kfo nuhasmotm.

Disaiperm Jisasr htimo yuhat

(Matyu 28.16-20; Mak 16.14-18; Luk 24.36-49)

¹⁹ Sande krif yifung disaiperm Judaroh bro yimam yakrmihato kuny kiyake yiro kunys rhu hasetmn Jisasr buha mitohmor. Mitohhato kfo memorm, “Yima yuhum amirhumko.” ²⁰ Inji kfonimorn tirfhu fhuf yo kkreko kfraye wasmo fhut fak nuhasmorm. Disaiperm turoh Bror htihato yima yuhum tfit yindhormom. ²¹ Jisasr tfit wompam kfo memorm, “Yima yuhum amirhumko. Na Bro Nkifrar tkrurafomora. To tawo niko, tfit nann kfo tkrurwanko.” ²² Inji kfonihato fahsha wunamorm. Yahsha wunanihato kfo memorm, “Bro Nkifrarhu Yafothat athu hamuhtko. ²³ Womm nayuk fasoh fasoh nefm yafhorahkomm, tawo Bro Nkifrar yafhorahrm. Womm nayuk fasoh fasoh nefm nhai yafhokahkomm, tawo Bro Nkifrar nhai yafhoruhatrm.”

Tomasr Jisasr htimo yuhat

²⁴ Nd yiha Jisasr turhu disaipermpnō mfnahmohat rroh womr nhai rhu-nhormorm. Nd yimar, Tomasr. Rorhu wom yufat Didimusr. ²⁵ Nd yima Tomasr wom disaiperm kfo memorm, “Nom Jisasr bi htitawonomr.” Tomasr wanyhato kfo memorm, “Na nhai bmbri wany yakiowotanko. Na kanga afo tukanhu nyingaye tirroh fhum yo kkrekorhof fhut htihato tukanhu tirpinyafe yaktiwone, ee btn wany yakioruhanko.”

²⁶ Tfit 7-pela yiham rhunihato nd disaiperm tfit yimomn kunys frk-ihnihato yiro rhumom. Nd yiha Tomasr rhunhomorm. Yiro kunys rhu hasetmn Jisasr buha mitohmor. Mitohhato kfo memorm, “Yima yuhum amirhumko.” ²⁷ Jisasr Tomasr htihato kfo memorr, “Tomas, ninhu tirpinyaft asha yarim htakahnt tirf wahti kothanf. Yo tirt waftrhtfasnekaht mano kkreko wahtant. Mirahn hus yima yuhufpno atoha. Rpa dukefrparpno tohkfot.” ²⁸ Tomasr turhu nyingaye Jisasr htihato kfo memorr, “Ni nanhu Bro Nungothete. Ni nanhu Bro Nkifraye.”

²⁹ Tfit Jisasr kfo memorr, “Hifa ni tunhu nyingaye htihato kangn na Bro Nkifraya. Yimam na tafi hti duha be mrokforpat wanyhato rroh yima yuhum nanpno htewumm, nd yimam rroh rhu nmbuhat hifa yi marnyaraht.”

Nda gonborngt yimbu yuhat

³⁰ Jisasr bok mirakerm hingrna-moatrm turhu disaiperm htimoumm. To na nhai nd miraker bugam hta bugarmoyanm ndar na wandfayuk gonborngt. ³¹ To nd dfik mirakerroh mrokfo nmbuham na htayukm, ndm be nikhom hti, yo wany yimbuyukmn htamoyanm. Memoya ndm htiruhamn Jisasrhu mrokfom yakhato hikrahmm. Nd yima Jisasr tor nd Yonr yimaroh minrfa ht iyakyukr Bro Nkifrar kfo tkrurafmor. Rorhu mrokfom wany yakiorahkomm, be toh nkifranirahko.

Jisasr tfit disaipermpnō mfnahmo yuhat

21

*(Sapta 21)**7-pela disaiperm Jisatr htimu yuhat*

¹ Tfit wom yiha Galili baritn Jisatr tfit wompam turhu disaiperm pno rim fnahmor. Nd Galili barithu wom yufat Taiberias. ² Jisatr disaiperm pno mfnahmohat inji mfnahmorm. Wom yiha, Saimon Pitar, Tomasr (rorhu wom yufat Didimusr), yo Galili profinshu kmi Kana thof Natanier, yo Sebedirhu yon najohf, yo wom disaiperm husf rpat toh hasomom. ³ Saimon Pitar sinyahato womm kfo tany memorm, “Nane barit rugi htat kitwa.” Womm sinyahato kfo memorm, “Nom to kamuknom ahiknomn.” Be inji kfomotm rpa mmbrrpat mikmbrenihato yimom. Nd yifungr rugim htati htati nhai wom yiren r yakrmom.

⁴ Marr mwondh fnah hanymor Jisatr tek bari thmbtn mitohmor. Disaiperm nhai duka marimom nd yimar Jisaser. ⁵ Jisatr mitohhato rittiwon memorm, “Wurenko, yiram fekko?” Rom kfo memorm, “Nhenom.” ⁶ Rom inji kfo namhimotm tfit Jisatr kfo memorm, “Rugit wayakkahkomt mano tirmifko watukahtkomt bok yiram tuhakraht.” Jisatr kfomo yuhatn tirmifko rugit tuhato memom tfit wateh sohaknomt, nhai watehakkfot. Yirat nhai be kukenhato tuhakrmot. Ndnnetn watehakneft nhombratimoum.

⁷ Nd disaiperr Jisatr mfro yuhu mongimoar sinyahato Pitar kfo memorm, “Nd yimar Broyer.” Kfo memotr Broyer, Saimon Pitar inji wanyhato turhu yak hrur thumo yuke hmbreshar tfit yakrmom ndr nyuhmor. Nyuhnihato tekt fuknimorm rifune hanymor thmbko. ⁸ Wom disaiperm rom bot ruhato yira rugit riteh hanymomt. Nhai be wuri danyko rihirmom, be brbo thmbtpno hirmom. Boti mano bari thmbt be 100 mitakforpat.

⁹ Rom rim dbkafnihato mhtimom kaht yo yirat kahtn kurmour yo wom bret pam htatamorm. ¹⁰ Jisatr kfo memorm, “Nd niko yek yiram womm wahnako.” ¹¹ Jisatr inji kfomotr, Saimon Pitar tfit mmbtr mitohnihato rugit ritehakhato teh hawitamor nungurn. Nd rugit tuhakmo yiram 153 yiram tuhakmot. Be tu bro yirarpam tuhakmot. To nhai frtmbrarmomt rugit.

¹² Jisatr kfo memorm, “Waniakahkomn afo nuwa wayako.” Disaiperm bi hti nhta yo wany nhtahato duka memorm, “Arr Bror nier.” Ndnatn yakrmenano nhai womr duka marimor, “Kfo ttiwon miruhanr, ‘Nine frohe?’ Nhai.” ¹³ Jisatr kahtpno yauyaknihato bret pat yakhato hemorm yo yirat nhaf yakhato hemorm.

¹⁴ Jisatr nohhato tfit sinyamohat nd yiha husfirpehyuk htiti htimorm turhu disaiperm pno mfnahmor.

Jisatr sinyahato Pitar kfomorr sifsifroh tohukatohneft

¹⁵ Jisatri turhu disaiperm nuwa yenyimomn Jisatr sinyahato Saimon Pitar kfo ttiwon memorm, “Saimon, Jonrhu yone, wur arm rroh dukefr nanpno korhr. To ninn ka marbit htewuna?” Pitar sinyahato kfo memorm, “Broye, nanhu yima yuhur htitnr, nanhu yima yuhur nhai wom frohmpno rhukah. Nhai. Nanhu yima yuhur ninrpanpno korhr.” Be Jisatr inji wanyhato kfo memorm, “Nanhu sifsifenom wayukatohaf hanyhitwona.” ¹⁶ Tfit wompam Jisatr ttiwon memorm, “Jonrhu yon Saimone, ninhu dukefr ka nanrpa mifanpno hta mifwonn?” Saimon Pitar kfo memorm, “Uwa, uwa Broye, nanhu yima yuhur ninrpanpno korhr.” Tfit Jisatr kfo memorm, “Nanhu sifsifm wayukatohafo hanyhitwona.”

¹⁷ Jisasr tfit husfirpeh ttiwonneft ttiwon memorr, “Jonrhu yon Saimone, ninhu dukefr ka nanrpa mifanpno korh mifwor?” Saimon Pitar Jisasr husfirpeh ttiwonneft ttiwonmotr duka krhohato memor, “Arr be masat ttiwon hasukna hatohwora. To finji wom finji kforhoya?” Kfo memorr, “Broye, tamoh tamoh nefm htitnm. Nanhu dukefr ninrpanpno korh mifwor.” Jisasr kfo memorr, “Nanhu sifsifm wayukatohaf hanyhitwona.

¹⁸ Na kfo mifwann, ninhu damiag tohtpno tunn hmbreshat hmbrehato tunhu tire foh thaye dbkafnihato fitoh fitoh tkitm tunn ufau fau htfasmoun. Tfit kto tabou buganihato tirm mano mano tuhayitruhatnm womnm tirm kjbkafakniruhamn wom tkitt hanyrahmn. Nd tkitt nhai be tunhu duka fijo yiruhatn.” ¹⁹ Jisasr nd mrokfom inji kfomohat to Pitar nohruha noh yuhatn Bro Nkifrar bro yufat yakrahr, nd yuhatn Jisasr kfo mrokfom inji kfomorm. Jisasr nd mrokfot kfo pthanihato Pitar kto tfit kfo memorr, “Wania wahikna.”

Jisasr mfro yuhu mongimoa disaiperrhu mrokfot

²⁰ Pitar kekutakhato yihom hti-yakmorr Jisasr mfro yuhu mongimoa disaiperr mongko fau hik hnamorf ror Jisasrpnno. To Jerusalemr Jisasrpnno wuroh nuwa yamohat to nd yimarn Jisasrpnno brbo rhu kekutni hanyhato ttiwon memorr, “Broye, frohrn ni hndhnaruharn?” ²¹ Pitar kekutnihato Jisasr rikfo memorr, “Broye, ndar nnoh mongko niwara yimare finji finji rorhu rhu nmbuhat yiruhat?” ²² Jisasr kfo memorr, “Na tuka kanga afo yima nfrir atohkahrn nanhu nia yihar atoh gari hasorr, to nhai mrokfom. To ni womn tamohmpno kfo pthiwa? Be tunn wania wahikna.” ²³ Kto wom Kristenm Jisasr kfomo mrokfot yak kekutnihato nnakfo hihany memom, “O, kfo memor nd disaiperr nhai nohruhatr.” To Jisasr nhai kfo marimor, “Nhai nohruhatr.” Nhai. Ror be kfo memor, “Na duka kanga afo yima nfrir atohkahrn nanhu nia yihar atoh gari hasora, to nhai mrokfom. To ni womn tamohmpno kfo pthiwa?”

²⁴ To nd kfiwa disaiperrn wandfa-morm nda mrokfom. Nom htinom nd ror kfoyuk mrokfom tu kfo mif mif kfoyem. ²⁵ Jisasr namo nefm mirahko ka rpa nefm namor. Tu boknabok nefm namor. Be amikahmn nd nef bugaroh mrokfom gonborngmn awandfa bugam, kane finji htarfom gonborngm. Ka nda yuht bbinysoft gonborngroh htayuk tkitm kkopen-tarfom.

Aposerm namo nefm Barkof kfo nuhas mrokfom

Ndar Aposer gonborngt yorhwa mrokfom, Lukr gutnius gonborngt wandfahato wandfa tmbhonimo mrokfomn ndmn wandfamor. Ndar Aposer gonborngt to Lukrn wandfamort. Nd aposer hingerneft Bro Nkifram yak nuhas bonuhas yo yak hta bohtamotrm Jisasrhu gutniuskfot Jerusalemr yo Judia Sameriafhu kmi kmim hingrna htfas buganihato tfit nda bbinysofthu kmi kmim hingrna htfasmom (htikfot Luk 1.8).

Nda aposer hingernefthu mrokfom yorhwa rfa borngtn hti hikrahnt Jisasrhu sioskfot waburakmo tkitt. Kristen sios bromo tkitt htirahnt Judampno ndha waburakhato kto kmi kmi thu yufurnimot. Nda gonborngt Kraistr hingrnayuk hingernefti yo kmi kmim rorhu hingernefti htihato yakhikmo yuhat htirahnt be tu Bro Nkifrar Isrerpno kfo htamo yuhatn fak hik twanhomot.

Wom bro mrokfot nda Aposer gonborngt yorhwat, Bro Nkifrarhu Yafothathu hingerneft yuhathu kfo nuhas mrokfom korhmt. Barkofpam afo tu Jisasrhu disaipermn nd Bro Nkifrarhu Yafothat Pentikos yiha mithu nawohhato bbuka rifhur fakmom.

Ndar gonborngt htirahn aposerm yihato wom met yindarimpno gutnius mrokfom kfo ptha nuhashemoahat nhai be yudbat kfo tmbhonirmoamm mrokfom. Nhai. Yuke yuke mrokfom pthamoum. Nd neft hitnom nd yuhatn gutniuskfot yakhato toh bmtamom.

Ndar gonborngt kfo tndh hikmotm bok aposer yimaroh hingernefm, womroh tndhm rom be inji tndhni hanyomotn, Pita Porrof namo nefroh tndh yuhamn tu mfro tndh hik bohikmotm ndar Aposer gonborngt. Pitar tor wom yimar Jisasrpnno wiyauyau htfasmoa yimar. Porrne nhai. Ror be inji nndo tohhato memour, “Jisasrhu sioskfot ayak bebobebohtant anohnit.” Porr inji na hanyetrn Jisasr nakumorr. Nakuyakhato be rorn barkof yimar tohmor Jisasrhu hingernefthu yakitohyuk yimar.

Lukr Porrru tndh mrokfom kfo hanymoahat Lukr tfit kfo nhaftik hany memour “nom”. Inji kfo nhaftiknimoatr bok yimam, ndar gonborngroh mrokfom hti hik bohiket yimam, inji htihato duka memom ka Lukr tur kfo nhaftiknimoa tkitm ka Porrpno wom yiham rpat kau htfasmom. Ndnetrn kfo memour “nom”.

Aposerm Jerusalemko yihato Jisasrhu mrokfom kfo pthahemo yuhat

(Sapta 1.1–8.3)

Jisasr kfo memor; “Tu Bro Nkifrarhu Yafothat thu nawohrahtko”

¹ O Tiofiluse, na Luka bi na barkof wandfamo gonborngtn bi wandfa bugamoyann Jisasr ndar bbinysoft tohhato namoa nefm yo ror hingrnamoa hingernefm. ² Ror ndar bbinysoft tohhato rinakmo nefm yo ptha nuhasmo mrokfom wandfa buganimoyann tu wuroh mrokfomn ror nohhato tfit hefenr muhmo yuharoh mrokfom htamoyann. Tu wuroh sinyanineftpno Bro Nkifrarhu Yafothat thu kasinyamottr tur aposer hingerneft yak htamo yimaroh hingrna yuham kfo hta bohta tanymorm. ³ Barkofpam afo

krhopam yakhato nohmor. Kto tfit sinyahato yima nfrir tohmor. Yima nfrir tohhato ufaufaumor. Ufaufau-moatr turhu aposerm tafontn nahtihato naphamoum. Ndhtet nefm namoatr htihato duka memom, “Asor sinyern tohwor.” Foti yiham tohmor. Tohhato yimam Bro Nkifrarhu kingdomkfo kfo nuhas bonuhasmoum. ⁴Wom yiha turhu aposerm yak nhafohhato kfo memom, “Na bi yifiya niko mirahko bi kmi Jerusalem ahtanynomt. Nann kfo memoyanko, tu Bro Nkifrarhu Yafothat afo hirahrko. Hiyafruhatrko ee btn waiswako. ⁵Jonr ndar tek furaroh bupaye, baftaisimworm. Bro Nkifrarror dfik yiham turhu Yafothaye baftaisimrahrko.”

⁶Aposerm Jisarpno narhu rifinymohat aposerm sinyahato Jisarp wom ttiwon mrokfot kfo ttiwon memomr, “Bro Yimaye, ka asor ndar yiharn Isrerm thu bmtaruhatn bbukeft yakhato tum king yakhato tum rito-hakrahm?” ⁷Tfit Jisarp sinyahato kfo memomr, “Nd niko ttiwon mrokfot, nhai be nikmoh fijo bi wakfakkfot. Tu Bro Nkifrar be afo htiafo hanykfot. Turhu fijo dukaruharn hirahrko. ⁸Niko inji adukawahko, niko tu Bro Nkifrarhu Yafothat mithu nawoh-ruhattko mrokfo ptha bbuka rifhur yakrahkomr. Nd bbukeft yakniruhakomn, Jerusalem, Judia, Samaria, yo ndar bbinysofthu kmi kmim nanhu mrokfot ptha htfa buga habri-rahkomt.”

Jisarp hefenr muhmo yuhat

⁹Wuroh wuroh mrokfom kfo ptha nuhas tany bugamormn, be Bro Nkifrar yaknimorr hamuhmorr. Aposerm tohhato htiafo hanymomr ror hir hamuhmo yuhat. Wuroh gribpam fkenimotr be hti hambrafmorr. ¹⁰Yuhre inji yukatoh hasetmn asha wom ganyom rmontha hmbreyet yimaf rom toh hasomo tkitt mitohmof. ¹¹Mitohhato kfo memofm, “Galili thofko tamohmpno be mfro yukatoh-wako? Nd niko htieyefi yimar, kto tfit inji wuhtiyakrahkomr.”

Judasrhu tkitt yakmo yimar

¹²Aposerm Jisarp mtoh kafhomo kmithu yufat, Olifet kmit. Ndha toh hasohato tfit Jerusalemko wohnemom. Olifet kmitti Jerusalem nhai wuri wuri rhukahf. Be wan kilomitakforpat yaunihato wom kmit mifnakhkfo. ¹³Aposerm Jerusalem mifnakhato tum toh tanyomo kunyshu wom yura rhuuyuk tikpar mrhu rifiny bugamom. Nd rifinymo yimaroh yufame Pitar, Jonr, Jemsr, Andrur, Filifr, Tomasr, Bartolomyur, Matyur, Alfiusrhu yon Jemsr, Selot grufkfothu yima Saimonr yo Jemsrhu yon Judasr. ¹⁴Nd nd yimami ee Jisarp mmem Mariati wom metme Jisarp mmemrom, inji inji y rhu rifinyhato rroh yima yuhum rpa yima yuhurpar rruhato kfo bruttna hasomoum.

¹⁵Inji kfo bruttnamoatm bok yimam rifinyhomoumm. Wom yiha 120 yimam rifinymotm Pitar tohhato wom mrokfot kfo memomr, ¹⁶⁻¹⁷“Barenko, Judasr afo nompno rpat tohhato rpat hingrnamounom. Bingot Bro Nkifrar Defitn mthu nawohhato wom mrokfot Defitn pthamort. Nd mrokfot Bro Nkifrarhu rfa borngtn korht. Tu fipet mrokfot pthamort. Bi Judasrn nd kfomo mrokfot rhumot. Rorn yahr kmim hasinyahato Jisarp fakmorr.

¹⁸Judasr Jisarp hndhahato yakmo maruham bbinysoftn wiknamor nd maruham. Kto tfit tur wiknamo bbinysoftn yatit mifrtfohhato danyrn frtnehato wirto grmt yuht fnahmotr. ¹⁹Kto Jerusalem thofm Judasrhu misuhhato yatit mifrtfohhato wirteft fnahmo nmbuhat wanyhato nd ror

mifrtfohmo tkitt futamoumt Akeldamat. Akeldama yufathu yumbu yuhate, yima kkut.”

²⁰ Pitar Judasrhu rrfathu yakyuk yimarhu mrokfot kfo memor, “Windoh gonborngtn kfomot,

‘Rorhu kunys be inji yima toh duha arhunitwat.’

Sng 69.25

Tfit nd windoh gonborngthu wom tkittn kfo memot,

‘Ror yakitohnamao hingerneft tfit wommn yakkfot.’

Sng 109.8

²¹ Ndnetn rorhu rrfathu yakyuk yimar yak htakfot. ²² Yimar yak htaneft htikfot, Jisasn Jonr baftaisim-moahat, Jisasn ndar bbinysoft niahato hingernefm rihingrnakhato kto nohnihato muhmo yiha rpat nompno rpat tohhato hti bugern nd nefm, tor nd yimarn yak htakfot. Yak htahato rorn Jisasn sinyamo mrokfo yuham pthanho htasahrnorn.”

²³ Pitar inji ptha buganimotr hus yimaf fak htamom. Barkofr Josefr, wom yufat Barsabas Jastusr yo wom yimarne Matiasr. ²⁴ Nd yimaf yak htatahato Bro Nkifrarprno kfo bruttna-mom. Kfo bruttna memom, “Broye, yima yimaroh yima yuhum ninn htitwonn. Ndar nom yek yimaf ninn htihato wayak nuhasnorn. ²⁵ Fitohrn ni yibonwa Judasrhu tkitthu yakyuk; ni tunn wayak nuhasnorn. Judasr nohhato nd aposer hingerneft bi htany-mortn bi yimor Maringour.” ²⁶ Inji kfonihato yo yufayet tahiham tuhato kfo nhta memom frohrn nd hingerneft yakruhant. Be Matiasrn Judasrhu tkitt yakhato aposer hingerneft tohyuk wom 11-pelakfotpno rihingrnakmor.

2

Bro Nkifrarhu Yafothat yawihnamo yuhat

¹ Judaroh wom bro yihar kutewumr Pentikos.* Nd Pentikos yiharoh riruhakyuk barkof marrn Jisasn hiket yimam rpa bro kunyrpar yihato rifinyugamom. ² Rifinyhato rhu haso hanymom asha yura moun yuhant wuwanyakmom wifort kanjo wumir nadidar sinyamohat. Nd nadidareft yimotn nd rom rhu hasomo kuny yuht nadidaranimot. ³ Asha tfit htityaf hanymom kah funefm yima toren kanjo rhu hanyhato yimaroh mfhamn mitoh nhombra hanymom. ⁴ Nd kunyr rifinyomo yimam Bro Nkifrarhu Yafothat thu kasinya hanymottn kmi kmiroh yarmumat ptha bugamomt.

⁵ Nd yihar, Judaroh bro yiharn, Juda yimam boririfhut yak hiketm wuri wuri kmi toh hanyukm yimomn Jerusalempran rifinyomom. Nd kmi kmi tohyuk Judam nhai rpa yarmumat pthetpam rifinyomom. Nhai. Nndoh nndoh yarmumat pthetm rifinyomom. ⁶ Nd nadidareft wanyhato memom, “Afo ai ahtinom.” Yimomn asha be mwan yftas hanymom nd yiro kunyr rifinyomo yimam nndo nndo yarmu-mamn pthamoumn. Womr yi mtahato memour, “Awanya,” turhu yarmumatn pthamoatmt mrokfot wanymour. Womr nhaf inji. Memour, “Amtah awanya,” turhu yarmumatn mrokfom wanymourm. ⁷ Be nd Judam inji mwan hanyhato tum rinahti nahtihato nnakfo memom, “Barenko, ndarm nndo Galili thofem. ⁸ To tamohmpno kmi kminom pthiwa yarmumatn mrokfom pthiwatmm wanukwanomn? ⁹ Nom asha Jeru-salemt nia rifinywanom kmi kminom rifinywonom. Nom Partianom Midia-nom, Elamnorn, Mesopotemia distrik thofnom, yo nom Kapadosia, Pontus, Esia, nd nd distrik thofnom. ¹⁰ Yo

* **2:1:** Nd Pentikos yihar, Pasofa yiham rhu hanyhato fiftiyuk marrpno tfit Pentikos yiham riruhakmom.

Frigia Pamfilia distrik tohyuknom, kantri Ijift tohyuknom, Libia thofnom brbo taun Sairinitpno tohwanom yo kantri Rom thofnom be yifra yaus niayuknom. ¹¹ Yo nom Judanom yo wom kmi thofm turoh nefm htany-hato nom Judanom nefm yak hiketm, Krit thofnom yo Arebia distrik thofnom. Nom nd nd kmi thofnom, to tamohm-pno kmi kminmoh yarmumamn Bro Nkifrar bbuka nanyjarefmpno niwa nefm pthiwatmn wanukanomm?" ¹² Be nd Judam inji htihato be tuha mrokfo duhatm tohmom. "Nome ndarte tamoh neft yorhwat." Tum inji rinakfo nakfomom. ¹³ Womm kfo memom, "Nd yimam niko mirahko nko tamohrn fknitrm kmi kmiroh yarmumam pthewum. Ndm nndo bupa ye mumimn ptha mmo bomumiwum." Inji kfo huta bohutamomm.

Pitar Kraistr toh hanyruha yiham kfo pthamo mrokfom

- ¹⁴ Pitari wom 11-pela aposerm rpat sinya tohmomn Pitar kfo memor, "Niko Judako yo niko wom womko niahato nompno Jerusalem nia rifinywako asomif yorhneft nann ptha ntreyafrrhotant afo wawanyswako. ¹⁵ Asomif yorhneft htitawokomn womm kfo famumnom, 'Bupa yawomn kfo ptha mmo bomumiwum.' ¹⁶ Wahtiko marr yuhre asomif mfahwor. Yuhre 9 kilokkfoyet. Ndhtet yihar nom nhai bmbri bupa nuwa mye fnahkahnom. Nd niko asomif htitawo neft to mirahko profet Joerr ndt ka nhai kfo pthamort. Nhai. Profet Joerr ndt bi pthangotmort. ¹⁷ Kfo memor, 'Bro Nkifrar kfo famur, "Kraistr toh hanyruha yiham nanhu Yafothat tkrurafrrhotant met yindar bugam Yafothat mithu nawohhato thu dbothatruhattm tamoh tamoh nefm kto rhyuyukn bi romn kfo ptharuhatmm wanyrahmm yimam. Metenm yindariyenm rom ptharahm. Damiagm rom yimam hwe tweh hanita kanjo rom hti hanyruhamn ptharahm. Bro yimam bi kunyrypam ruhetm rom nhaf tweht htihato ptharahm. ¹⁸ Nanhu hingnefm yakitohwa tuhan yindars rom nhaf kfo ptha bugarahm. ¹⁹ Mounti bbinysoft nndo rhuruhatf htirahmf. Kah hipefr thu sinya thombat mirahm ka kku rmontharn faknattmf. ²⁰ Mount mirahm ayukatohnomt htirahmr marr yarmbon tiftarah. Yamt htirahmt mirahm nndo kku baritn hirwot. Ndhtet ndhtet nefm rhuniruhattm bt Bror nierahr. ²¹ Nd yihar yimam Bro Nkifrar nakurahm hbhakneft yudbat yakrahm." ' *Joel 2.28-32*

Tom bingot pthamo mrokfom.

- ²² Niko Isrerko na kforuha mrokfom wany marnyaf hanyswakomm. Nasaret thof Jisasrhu mrokfom ptharuha. Nd yimar miraker hingrnayuk bbukefti dbohnet yimaroh bbukeft hehato kfo tkrurafmorr. Ror nd bbukeftpno ndar bbinysoft bok nefm namotrm htimokomm. ²³ Nd yimar niamohat nikmoh tirmn htamorr. Bi turhu dukeftpno inji htamorr. Rorhu dukeft duka memor, 'Rompono toh hasoruharn fasoh nefm nayet yimamn htaruhatmr nohrah.' To bi htamokomr. ²⁴ Htamohat nhai wundiat nohnirmor. Nhai. Tfit tu Bro Nkifrar kasinyamotrr tfit sinyamor. Bro Nkifrar nhai wofnrmor nd noh yafotharn Jisasr yaktakfot. Yudbat fak thumort nd noh yafothat. Nd nohyuk tkitt nhai Jisasr yak tkakfot. ²⁵ Defitr Jisasr nohhato sinyaneft kfo htamort, memor,

'Na htitanr Bror be nanpno brbo mfrtkafwor.

Ndnatn nhai nanhu yima yuhur be bmbri woh dbuknaknikfot.

²⁶ Ndnatn nanhu yima yuhur marnyewarn windoh ptha yindhorwa.

Bro Nkifrar kfomo rhu marnya yihar, ndr rhu gari hasiwa.

²⁷ Bro Nkifraye na nhai kfo miruhatn bi nohniyet yimaroh kmitn atohtwar. Nhai.

Ni bi tunn kfo htayet yimar nhai kfo miruhatn yoptn amibdgnir.

²⁸ Wom nfri tohefthu toh yuhat to bi fak nuhasmona.

Nd nfri toheft na toheft, be tunn toh tkafrrhotna na be yindhorhato tohruha.' ”

Sng 16.8-11

²⁹ Pitar wom mrokfot yakhato kfo memor, “Barenko, nmoh nkifra Defitru mrokfot ptharhotant wawanyswakomt. Nd Defitr pthamo mrokfot nhai turn yirmot. Defitr ror bi nohngotmotr fopmomr. Rorhu yopt tot yuhre rhu hanitt. ³⁰ Defitr profet hingrneft tohetrn Bro Nkifrar bi kfo hta memorr, ‘Ni yakitohwa king hingrneft kto tunhu frika yuhathu yonrn nd hingrneft yakitohrahr.’ ³¹ Nd Defitr kfo memo nhai nohniyet yimam yita tkitt yiho tohruhatr, yo nhai mikfe bdgniruhatr, nd hus mrokfo nmbuhaf nhai tur kformor. Nhai. Bro Nkifrarhu dukefm yakhato kfomor. Bbinysof thofroh minrfa htiahyuk yimarn kfo pthamor. Nd yimarn nohruharn tfit sinyarahr. ³² Nd yima Jisasr yopt bi ruhetr Bro Nkifrar kasinyamotr tfit yafothetr rhumor. Nd yimar sinyamohat nom hti bugamonomr. Nom tunomn htihatoh rorhu sinya yuhathu mrokfomn pthewunom. ³³ Jisasr bi sinyanihato hefenko muhmo. Tu Bro Nkifrarhu bro bbukeft yorhwa tirmifko mrhonor. Mruhato Bro Nkifrarhu Yafothat fakmort. Yakhato hrek nd Yafothat nom buganom yahutrnom nd Yafothatn thu nhombrettnom pthewunom. ³⁴ Defitr nhai Jisasr muhmo kanjo muhrmor. Nhai. Ror tor be kfo memor,

‘Yawern nanhu Bror kfo memorr, “Nanhu bro bbukeft yorhwa tirmifko wamrhun.

³⁵ Wamrhukahtn nd ni hti dbnotmoa yimam

afo ninhu mofsinhitn yak htahiruhann.” ’

Sng 110.1

³⁶ Ndnatn niko Isrerko dukakfot. Nd niko wasmo yima Jisasrn bi Bro Nkifrar fak htamorr nmoh Nungothetr. Rorn nrfa htiaakrahrm kmi kmim.”

Bok met yindarim fasoh nefm mong trohhato baftaismo yuhat

³⁷ Nd mrokfom Pitar sinyahato pthamom, bok met yindarim kfram kanjo wasmomm. Sinyahato mkfo memom, “Nd mrokfom nndo kfraye fwitmm nmoh yima yuhum. Finji naruhanom?” ³⁸ Pitar kfo memorm, “Nhai finji. Nikmoh yima yuhum yorhwa fasoh fasoh nefm mong trohkfot. Mong trohhato Jisas Krairru yufatpno baftaiskfot. Inji narahko, nikmoh fasoh fasoh nefm Bro Nkifrar nhai wom dukaruhatrm. Duka mumafhatoh turhu Yafothat hirahrko. ³⁹ Bi tu Bro Nkifrar kfo hta memor, ‘Na kfak hanyruha yimam tukanhu Yafothat hi hanyruhanm.’ Nhai be nikomrpakom. Nikmoh yonm hi hany bugarahrm. Wuri toh hanyukm he buga hanyraharm.”

⁴⁰ Pitar nhai be nd mrokforpam ptharmor. Bok kfo yanho mrokfom kfo memorm, “Yo niko dukahato tohkfot. Fasoh fasoh nefm nayet yimampno kanga rpat faso yak bebrahrko.” ⁴¹ Pitar kfo pthamo mrokfom nhai hanybornarmomm. Hifa wany yakiohato baftaismom. Nd yiha wom nfri 3,000 yimam Jisasr hiket yimampno mnathu hmbrehato be yonmari rifuhetr rhumor.

Met yindars rpa yima yuhurpar rhumo yuhat

⁴² Nd nfri yimam nia hanyukm tu aposermjno afo rpat tohhato afo kak nuhas bonuhasmoumm Jisasrhu hik yuham, Kristen yimaroh tohefm, tamoh komunion yaknefm, kfo bruttnanefm, hti hik bohikmoum afo. ⁴³ Bok mirakerkfom Bro Nkifrar aposermn mithu nawohhato namoatmm bok met yindarim yafotha duhatm rhumoum. ⁴⁴ Nd tuhant yindars Jisasrhu mrokfom yi wany yakiomoam nhai nndoh nndoh yima yuhetm rhurmom. Rroh yima yuhum be rpa yima yuhurpa mifr rhumor. Tamoh tamoht tum be rim nahiyak mnahiyakmoum. ⁴⁵ Yimam bbinysofetm wom yimam yihato wiknamoahat nd bbinysofetmny yakjuk marut yakmoatm tfit yimam wuska duhatm o marufapa duhatm tfit nd marut thu brurhemoum. ⁴⁶ Yiha yiha Bro Nkifrarhu temperr yi rifinyneft rom rpat yihato rifinymoum. Nuwa yanyeft nhaf, wom yiha womrhu kunys famoam tfit wom yiha womrhu kunys yi famoum. Tum rpat ptha yindhorhato niyak marnyahato rpat nuwa famoum. ⁴⁷ Rpa yima yuhurn rhu yindhormoatm womm inji htihato kfo yindhormoumm. Yiha yiha bok met yindarim Bror yak miyak hanyomoatm nd Kristen yimam nhai wom kuken rifhur rhurmor.

3

Rikiye yimar marnyamo yuhat

¹ Wom yiha Pita Jonrof memof, “Bro Nkifrarhu temperr yihato kfo bruttnarahno.” Krifmar tri kilok kfo bruttnetm to be krif yimof. ² Yihato yuhre mtoh hanymof asha htiyak hanymofm wom yimam rikiye yimar hnamomr. Nd Pitarof yimo rmonthu yifhatikthu yufat futamoum “dborah yifhatikt.” Nd rikiyer nd yifhatikt mhtamomr. Ndha rhumoarn yimam rmont fkneniyukm maruha tndau yakitoh hanymour. Nd yima rikiyemohat mmemt bi inji ruhetr hiyaumotr. ³ Pita Jonrof fau fkneni hanymof tndaumorf. ⁴ Tndaumotr rof rim tohmof. Pitar memorr, “Wayukatohno.” ⁵ Inji kfomotr ror Pitarof yukatohhato memof, “Ka wuska kahukfa.” ⁶ Pitar kfo memorr, “Na nhai ninhu hayuk maruham. Ndar na uhiyau ahiyauwam hiruhann. Na kfiwa Nasaret thof Jisas Krairhu yufatn wasinya wayauyakni.” ⁷ Pitar inji kfonihato tirmifkorhof tirt yakhato wateh kasinyakmorr. Be nd hokmo wuram susnanimomr. ⁸ Susnanimotmr tuha yura msuh tanyhato mitohmorn tuha rim fau nfau nfakomr. Pitarof rmont fknenimohat ror rpat fknenihato ror yauhany tuhatokhany yauhany tuhatokhany inji nahanyhato Bro Nkifrar kfo yindhor hanymour. ⁹⁻¹⁰ Nd rmont rhuyuk yimam tuhatok hnehato Bro Nkifrar kfo yindhor hanyomotr memoum ka froher. Kto hti hik marnyamomrn kfo memof, “Nd yimar dborah yifhatikt ruhato maruha tndaumoa yimayer.” Be tuha nd rmont rhuyuk yimam inji htihato mrokfo duhatm rhumoum.

Pitar yiro rmont kfo pthamo mrokfom

¹¹ Solomonrhu rmonthu rhu nafifyuk tkittn rhu hasetfn ror niahato mkinyafinyaknihato ki yindhormorf. Ndha mtohmotr yimam toneyaknihato mtoh htimoum. Inji htihato mrokfo duhatm rhumoum. ¹² Nd yimar mtoh-hato yukatohmoa yimam Pitar sinyahato kfo memof, “Niko ndar Isrer thofko tamohmpno ndar rikiye yimar marnye nmbuhat htihato duka kinyakiwakomn tfit nonn yukatoh-wako? Niko to mirahko nko ka nnoh

bbukeftpno nnoh dborioh nefmn Bro Nkifrar htihato no kfitno ndar yimar marnyer. Nhai nonn. Afo apthakahta wawanyswako. Jisadr fak marnyer. ¹³ Abraham, Aisak, Jekofroh Bro Nkifrar, nmoh nkifraroh Bro Nkifraye. Nd Nkifrar turhu hingra yima Jisadr tu bro yufat hemor. Tor, nd yimarn niko hndhnamoko. Pailatr yafho yibonkfot kfomohat niko nhai kfo yakioromoko. ¹⁴ Nd yimar be tu Bro Nkifrarhu yinhit tohmour. Tu hifa yufayet yimar tohmour. Nd dborioh yimar Pailatr yafho hermorko. To nhai. Nd fasoh yima wasetrn kfomotko fafuhafhemorko. ¹⁵ Tu hifa dborioh rhu nmbuhat hnayuk yimar nikomn wasmokomr. Wasmohat nhai Maringour mitohnirmor. Nd yimar nohmorn tfit sinyamor. Ror sinyamohat nnoh nyingam htimomr wiyau yaumohat. No htihat kfo nuhaswononko. ¹⁶ Ndar yimar marnyehat rorhu bbukeftpno marnyanir. Nnoh dukefm rorpar htanyonm. Inji dukahato kfo pthino nikmoh nyingahato ndar yimar marnyer.

¹⁷ Rot nd nikomi nikmoh bro yimam namo neft Jisadr nhai be yima dukeftpno narmokomr. ¹⁸ Bi tu Bro Nkifrar profetm mthu nawohhato kfo pthamohat rorhu noh nmbuhat to be fak hik twanhomot.

¹⁹ Ndnnetn nd niko hatohwa fasoh fasoh dukefm mong troh bugahato Jisadrpar tfit nikmoh dukefm htakfot. Inji narahko, Bro Nkifrar htiruharko nikmoh yima yuhum rhuyuk fasoh fasoh nefem yak wus bowus thu bugarahm. ²⁰ Yima yuhum wutham rhurahmko Bror tfit nfri bbukeft hirahrko. Rhu marnya hasetkomn nd niko nia yakyuk yimar nierahr. Bro Nkifrar fak htamorr nd yimar. Rorhu yufat Jisadr. ²¹ Afo yura hefenrn korhwor. Profetm kfomo yuhatn bi tamoh tamohroh yak wus bowus yihayere ee btn yawihnerahr.

²² Bingot to Mosesr kfo memor, 'Bro Nkifrar na kanjohot Juda frikefthu profetr yak htarahr. Ror tamoh tamoh mrokfom kfiwurko niko wanyhato hikkfot. ²³ Rorhu mrokfom wany yakio duha yimam be Bro Nkifrar yak tufa wurasohruhatm noh witarahm. Nhai tfit Isrerpno fkniyakruhatm.' ²⁴ Profet Samuerr rorhu mongko tohnamo profetm pthahnamoa mrokfom ndar yiha rhuro nefmn pthahnamoum.

²⁵ Niko to nd profetroh yon kunyet. Nikmoh nkifrapno Bro Nkifrar kfo htatamo mrokfot to kangko frohm nd neft rhuraht? To nikomn. Bro Nkifrar Abrahamr kfo memor, 'Ninhu frikefthu wom yonr tohruharn rorn bbinysof thof bugam tu hifa rhu nmbuhat hirahm.' ²⁶ Nd dukeftpno niko dukahato rorhu hingra yimar nia nohhato tfit kasinyamorr. Bro Nkifrar duka memor, 'Yak marnya bomarnyarhotanm fasoh fasoh nefm mong trohrahm.' Ndnetrn inji inji hingra hta bohtamor."

4

Pita Jonrof kalabus yak htamo yuhat

¹ Pita Jonrof yuhre nd rifnymo yimam mrokfom kfo ptha nuhas haso hanymofm asha prismi Sadyusim yo rmont tohukatohyuk yimaroh bro yimar rmont yau fknenihato rim tohmom. ² Nd yimaroh dukeft duka memom, "Nd yimaf nhai wom tamoh mrokfom kfokahfm. Noheh yimaroh tfit sinyu yuhatn kfo nuhaswofm. Kfo kangfm, 'Jisadr nohhato tfit sinyamo kanjo inji narahm yimam noh neft.'" Nd dukefm yakmotmm namburmom. Memom, "Tamohmpno inji kfiwafm?" ³ Be ndnatn tir tir fakmomf. Marr

bi yohniyetrn to be afo rumgatn afo fak htatamomf. ⁴ Nd Pitarof pthamo mrokfom bi 5,000 yimam wany yakiohato hiketmn rof fakmomf.

Pita Jonrof kaunseroh nyingampno myak htamo yuhat

⁵ Hwe nfha dbha Juda kaunserroh bro yimam, yo prisroh bro yimam, ee boririfhuthu tisan niyak nhafohhato Jerusalemrpar rifinyhato naphamom. ⁶ Nd yihart Anasrn Judaroh bro tohak prisr tohmor. Rori rorhu tangimi Kaiafasr, Jonr yo Aleksanderom, rompno rpat rifinymom. ⁷ Roh nyingampno myak htatahato kfo ttiwonmomm, “Nifn nd yimar yak marnyewohate tamoh bbukeftpno yak marnyewafnr yimar? Frohroh yufat yutahato kasinyewafnr nd yimar?”

⁸⁻⁹ Pitar bi Bro Nkifrarhu Yafothat bi mthu nawohetrn kfo memorm, “Niko nda Juda kaunserroh bro yimakomi yo niko nda prisroh bro yimako, kangko nd rikiyer marnyamo yuhat attiwon hiknom? ¹⁰ Nda rikiyer marnyamohat nhai finji nahato marnyarmor. Nd niko Isrer thof bugako kihagir nohhato tfit sinyamo Nasaret thof yima Jisarhu bbukeft kfo mot nd yimar marnyanimor. ¹¹ Bro Nkifrarhu rfa borngtn kfo memom, ‘Nd kunyshu dany rahur htayuk yimam hti hhrekhatu yak tuhafmor, bi tfit dany rahur tohwor.

Nd dany rahurn kunyr hatohworr.’

Sng 118.22

¹² Nhai wom fitoh yimarn nom bi yitohwa tkit bebt yakruhatrnom. Jisasrpar yakrahrnom. Rorrpar Bro Nkifrar fak htamor nmoh yakyukr.”

¹³ Pita Jonrof toh pthamohat nhai yakrmehato mrokfom ptharmomf. Juda kaunserthu bro yimam htihato tuha mrokfo duhatm rhumom. Duka nhta memoum “Ndar yima furayef. Fitha yakmofr ndhtet mrokfo rifhur? Ndar yimaf ka Jisarpno toh habrihato nd mrokfo rifhur fakmofr.” Inji dukamom. ¹⁴ Nd marnyanimo rikiyer Pita Jonrofpno tohmotr be nhai wom mrokfom ptharmom.

¹⁵ Be ndnatn afo kfo memomf, “Wafnahnifn.” Fnahnimotf tum bro yimarpam rhuhatu mrokfom nafak nhtamomm. ¹⁶ Womm sinyahato kfo memom, “Barenko, niko finji dukewako? Nd yimaf naro neft bi Jerusalem thofm bi hti bugaromt. Nhai kfo miruhatnom, ‘Nd yimar finji yak marnyarfofr.’ ¹⁷ Kfo raforahnomf Jisarhu yufat yutahato yimam yak kasinyaneft.” ¹⁸ Nd mrokforpat yak dbkafmomm tfit nakuyakmomf. Nakuyakhato kfo memomf, “Arihat nifn mirahfn tfit Jisarhu yufat yuta nawohhato yimam ayak kasinyanomm. Arihat Jisarsr yufat wayafho thufant.”

¹⁹ Pita Jonrof inji wanyhato kfo ttiwonmofm, “Niko to finji dukewako? Fitoh yuhat no hikneft Bro Nkifrar htihato yindhorrfor? Niko kfi tngtn o Jisarsr kfo yuk tngtn? ²⁰ No nhai niko kfo yuk tng yuhatn hikruhatno. No htimi nefm no wanyomo mrokfom afo tunonn kmi kmi kfo nuhas bugarahnonm.”

²¹⁻²² Nd rof yak marnyamo rikiyer bi bro yimar, bi 40 gunyjimetr. Kmi thofm nd rikiyer yak marnyamo neft bi hti yindhohhato Bro Nkifrarpar yindhormom. Be ndnatn kaunserm htihato be kfo yanho mrokfot kfo memomf, “Jisarhu yufat yuta nawohhato dbohnet yimam yak marnyarahfnm, be yakrahnomfn.”

Jisarhu mrokforoh ptha rifhu yakneft Bro Nkifrar kfo bruttnamo yuhat

²³ Pita Jonrof kaunserm kfo tkrur memomf, “Tufnhuko waiswafn.” Be tufnhuko yihato tufhu yimatm kfo nuhas bonuhasmofm rof kot tohhato bro prismi kaunserroh bro yimam kfo pthamo mrokfom. ²⁴ Kfo srh nuhas buganimofmn tfit tum rpat rhu rifiny-hato Bro Nkifrarpo kfo bruttnamom. Kfo bruttnahato kfo memomr, “Broye, ninn hingrnamomn bbinysoft, mount yo marombt ee nd husfirpa tkitm yorhwa shrm. ²⁵ Bingot tunhu Yafothatn nmoh nkifrar ninhu hingrnatat tohmoa yima Defitr wom mrokfot kfo nuhasmotnr tfit ror kfo memor, ‘Tamohmpno tuhan yindars be mfro namburwam?’

Tamohmpno nd wajis be harhu fura bofuriwamt?

²⁶ Wuri kmirhof kingm wajis bi harhuwom.

Kmi kmirhof bro yimam bi rpat rhuhatom mrokfom nayak dbkafwomm Bro Nkifrar nmoh nrafa htikyakyuk yimarhu nambur tonineft.’ *Sng*

2.1-2

²⁷ Ndar kmit to nd neft bi korht. Herotr, Pontius Pailatr, yo wom yima tangim yo tu Isrerm bi rpat nathu hmbritamn kangm ninhu kfo htamo hingrna yima Jisasr awasnomr. ²⁸ To ninhu bbukeftpno bingot kfo hta mrokfot to tot inji ruhaknitatn be was mifrahmr. ²⁹ Bro Nkifraye, nd yimam kfo kakrmitwommom. Nom nhai wofnkahnom yakrmayeft. Ni tunn wathu bmtatwannom ninhu mrokfothu pthaneft. ³⁰ Dbohnet yimam wayak marnya bomarnyatwanm. Ninhu hingrna yima Jisasrhu yufatpno mirakerkfo wanakahtn yimam htirahn.”

³¹ Inji kfo bruttna hanymom, nd rom rhumo kunys memom nndo nunes kekwo. Bro Nkifrarhu Yafothat thu nhombra bugamottm rom tohhato pthamohat mrokfom nhai yakrmehato ptharmomm mrokfom.

Jisasr hiket yimam tum nahti duka nahti dukamoa yuhat

³² Jisasr hikom yimam nhai womr wom ndoh yima yuhetr rhurmor. Yima bugam be rpa yima yuhurpar rhumom. Rom yakitohyuk tamoh tamohm nhai womr marimorr, “Nanhu tamoh tamohm turpetanuhem.” Nhai. Tamoh tamohm be inji rpat yakitoh-hato rpat nayaktirmomm.

³³ Aposerm Jisasrhu nohhato sinya yuhathu mrokfom kfo pthamohat Bro Nkifrarhu Yafothathu bbukeftpno pthamootm mrokfom tuhan yindars rhuhat wany marnyamomm. Bro Nkifrar tohnhomomrn fak marnyamourm. ³⁴ Yak marnyamomtr nhai rroh womr yeshrim o tamohm sfno tohrmoar. Yimam bbinysofetm, kunyetm womm hemoatm wiknahe-momm. ³⁵ Nd yuham yakjuk marut hnamoamt tfit aposermn mhemom. Aposermn yakthato romn yak nhtahato frohm tamohmn kaknafwom nd marut romn kak nhtahemom.

³⁶ Ndha tohmour wom yimar. Rorhu yufat Josefr. Aposermn tfit wom yufat futamomr Barnabas. Nd Barnabas yufathu yimbu yuhate, “Yima kfo bmta marnyetr.” Barnabas, Saiprus tohmoa Lifai tangishofer. ³⁷ Nd yimarhu bbinysoft yimam wiknamohat marut yakmot aposerroh tirmn mhtamom.

Ananias Sapairarof Bro Nkifrar kfo namhi nehmo yuhat

5

¹ Yo tof wom yima sawohf tohmouf. Ramemrhu yufat Ananiasr. Tuhanemthu yufatne Sapairat. ² Wom yiha Ananiasrhu bbinysoft womm yihato wiknamomt. Nd bbinysofthu marut yakmortn nhai marimor, “Be

hopptn aposerm hne-hiruha.” Nhai. Nd marut yakmortn womm yak hamong tanyhato wom farpam hanyhato aposerm mhemor. Ananiasr inji namohat turhu tuhanemt htimotr. To nhai kfo marimotr; “Mirahn inji anaya.” ³ Aposerm pno mhtamotr Pitar htihato kfo memorr; “Ananias, tamohmpno Satarn fasoh yima yuhur yahutrnm wom maruham yak hamong tanynmnm wom farpam hnehato Bro Nkifrarhu Yafohat nd farpam mfrnnehwanr? ⁴ Nd bbinysoft yima tafi wikna duha rhumohat nhai wom frohroht rhurmot. Ni tunhut rhumot. Tfit yimam wiknahato marut yakrohat nhaf tunrpann hmbreeront. Tamohr inji namotrnm inji naro? Nhai yimanomn kfo namhi nhehkahn. Bro Nkifrar kfo namhi nhehwo.” ⁵ Pitar inji kfo hanymor Ananiasr nndo dangn yukhat tmbho thumom. Be tuha gur. Kmi thofm Ananiasrhu noh mrokfot wany hanyhato mfha tha duhatm rhumom. ⁶ Be nd yima Ananiasr bi gurn, damiagt rmonthaye rim yakrirakmomrn hany fopmomr.

⁷ Husfirpa auakfot bi yiyetn asha tuhanemt. Rot memot ramemr yuhre yima nfriyer. ⁸ Rim tohmott Pitar ttiwonmort. “Nifn sawo bbinysofthu maruhame be dfik fenrpam fakmofn?” Sapairat sinyahato memot, “Uwa, to be nd hne dfik fenrpam.” ⁹ Pitar sinyahato kfo memort, “Bare, tamohm-pno nifn sawo memofn, ‘Bro Nkifrar afo mkfo namhi nhehwonrahnonr.’ Wahti ninhu ramemr myop tanyuk yimam bi tom bi nd kuny yifhatiktn tohwom. Ninhu tha tipt yoprahmt.” ¹⁰ Pitar inji kfo hanymor Sapairat memom nndo dangnhatn tmbho tuhefim. Be tuha gus Pitarhu wurampno suhmot. Be nd damiagt bi mtoh gari hanyukt yaknimomtn ramemr yopmo tkittn rpat fopmomf. ¹¹ Bro Nkifrar hiket yimam yo ndwom yima fura bofurat nd yima sawohfhu noh mrokfot wanyhato fanho bugamom.

Aposerm yak marnyamo dbohnet yimam

¹² Boknambok nefm aposerm namoatmm tuhan yindars htihato mfham danyrn foh tnehmoumm. Jisasr hiket yimam Solomonrhu rmonthu rhu nafifyuk tkitt ruhato Bro Nkifrar kfo bruttnamom. ¹³ Barkofpam nhai wom yima furam rhunhohato kfo bruttnanhormomm. Duka yanhoneftpno be tngrpaye kfo yindhormoumm. ¹⁴ Kto memom nndo tek bu yenyfahtn tehbebekm. Boknambok yimam Jisasrhu mrokfot hikmom.

¹⁵ Aposerm hingnamao nefm bi kmi kmim wanyetmn rroh dbohnet yimam yaknimoamm Pitar yauhnamao yihotamn mkahahwetamom. Duka memom, “Pitar yauhnehato rorhu yafohat yak hnkoknruhattm tamoh dbohnefm thu trohrahm.” ¹⁶ Jerusalem taunpno toh hanyuk kmiroh dbohnet yimam, yo kmi yarhm fknayet yimam yaknimoamm aposerm pno hanymoumm. Hanymoatmm dbohnefm o kmi yarhm thu troh tany hany-moumm.

Aposerm kalabus tohmo yuhat

¹⁷ Bro tohak prisri rorhu yarmotem Sadyusim, rom nd aposerm hing-namo nefm htihato yuhuwehmoum. ¹⁸ Namburhato be nd yimam yak-momm kalabus htamomm. ¹⁹ Aposerm bi kalabus kunys tohetmn yifung-nano Bro Nkifrarhu mounmotr yihato tfanyakmorm. Tfanyakhato kfo memorm, ²⁰ “Waikahkonn rmont rim tohato tuhan yindars wakfo nuhas-twakomm ndar nfri yuhathu tohneft.” ²¹ Be nd aposerm inji wanyhato dbha rmont yimomn tuhan yindars kfo ptha nuhasmomm nd nfri yuhathu toh hikneft.

Bro tohak prisri rorhu yarmotem Sadyusim nhai tawisafrmom aposerm fnahnimohat. Rom memom ka tom. Ndnnetmn naku nhafohmomm kaunsermi yo Isreroth bro yimam. ²² Yi nhafoh bugamotm aposerroh yakyuk polism kalabus yimom. Yimomn be yihom tone hambromom brioh tkittn. ²³ Nd polism tfit yihato mkfo memom, “Barenko, nom yifinonm kalabus darmb kihett yo gatyuk yimam mano mano ftohm. Nom tfanynihato rim fnahni famunom ka tome yaknirahnomm. To nhai, be brioh tkitt rim htawonom. Nhai htirfonomm.”

²⁴ Rmont tohukatohmoa yimaroh bro keptenri bro prism inji wanyhato duka memom, “Tone nd yimame fitoh yuhatn yimom? Nome nko finji wany-ruhanom?” ²⁵ Wom yimarn yihato kfo memom, “Barenko nd niko hambriwa yimam wusom bi rmontn tohhato Bro Nkifrarhu mrokfom tuhan yindarim kfo ptha nuhaswomm.”

²⁶ Be nd bro prism inji wanyhato nd keptenri polism kfo tkrurafmotmm yihato nd aposerm fakmom. Myak-mohat nhai finji narmomm. Kmi thofm hti yakrmihato memom, “Tahiye tahiye tabotrahmmom.” Ndnatn nhai finji narmomm.

Aposerm kaunsermpno kot tohmo yuhat

²⁷ Polism yihato aposerm yak-mommn kaunsermpno hanyomm. Kot tohhato prisroh bro tohak yimar sinyahato aposerm kfo memom, ²⁸ “Nikome wanymoko nom kfo rafo mrokfot kfomohat. Kfo memonomko, ‘Mirahko Jisasr kfo htanyuk mrokfom tfit niko yaknihato Jerusalem thofm akfo nuhas htfasnomm.’ Inji kfomo-nomko. To nhai. Niko nhai wany yakniomoko. Yi pthamotko Jerusa-lempno brbo rhuyuk knim bi wany bugarom. Tfit nomn kfo kangko, ‘Romn nd yimar fwitmr.’”

²⁹ Pitari wom aposerm sinyahato kfo memom, “Nom nhai wom yima furaroh kfoyuk tngmn hikkfot. Tu Bro Nkifrar kfoyuk tngmpatn nom hikkfot. ³⁰ Niko to bi yura bgre misn Jisasr tuhegirmotkomr yura bgre misn mfaknimor. Hifa nmoh nkifram yakitohmoa Nkifrarn Yafothat thu hmbremotr tfit mfenyjwomor. ³¹ Bro Nkifrarn Yafothat thu hmbreyaknihato yura hefenrn hamuhhato turhu tirmifko htamorr. Htamotr nmoh nrfa htiryakyur tohwor. Rorn nom Isrernom dfa tkr hta tehakmornom. Nd fasoh fasoh nefroh mong trohhato yak thunefm rorn fak nuhasmornom. ³² Bro Nkifrar hingrnamo hingrneft bi tunmoh nyingaye be hti hikhato kfo nuhas hanitnomm yimam. Bro Nkifrarhu Yafothatn kak nuhas marnyewutm nom kfo mmoni hanita mrokfom. Yimam Bro Nkifrarhu mrokfom hikwam Yafothar hi hanitrm.”

Gamaliel aposermpno tohmo yuhat

³³ Kaunserm nd Pitar pthamo mrokfom wanyhato yima yuhum nhai marnyarmomm. Yima yuhum namburhato memom, “Aposerm awasnom.”

³⁴ Hifa wom kaunserr tohhato wom kaunserm memom, “Aposerm afo afnahnim.” Nd kaun-serrhu yufat Gamaliel. Farisi hingrneft rorn kak-itohmourt. Nkifra boririfhut to ndhtet yimamn fakitohmourt. Rorhu nefm tu dboriohmnm wom rirhu arhuyuk yimam kfo yindhormour.

³⁵ Aposerm fnahnimotm Gamalierr wom kaunserm kfo memom, “Niko, Isrerko, kangko, ‘Tamoh nefm ananomm ndur aposerenm?’ Afo duka marnyaf hanyhato btn tamoh nefm nakfot. ³⁶ Niko Teudasrhu gngr yakitoh hanykfot. Ror inji namor. Kmi thofm kfo brur bobrurmotrm kmi kmi nafakmomm memom wom hingrneft hingrnarahnom. Ndnnetmn 400

yimam nayakhato Teudasrn nyingako tohmor. To nhai. Nd Teudasr yimam wasmotmr, nd hingrneft mfak htanimomt. ³⁷ Yo tfit Galili thof Judasrn wom neft namor. Bro sensispno yimam yak nhafohmorn memor, 'Nd yima wohnr-pno yihato gafman yimampno nnarahnom.' Nd kmim nayak hasomomn Judasr mteh yifhumor bi be, nd yimam natubatumom. ³⁸ Na nd nefm bi hti hnayetann ndnetann kfo rafiwanko aposerroh wasneft. Rom tamoh hingrneft hingnewum be nyingarpaye yukatohaf hanykfot. Rroh fijo hingrnewum, nhai toh bmtaruhatm. ³⁹ Bro Nkifrar yima yuhum yahutrm nd hingrneft kasinyemt, nhai nikomn tfit buha mtohhato kfo rafokfot. Inji naneft be yuwi kangko, 'Bro Nkifrar yak batirnome.'

Gamalier bi inji kfiwure, be wom kaunserm nhai wom ptharmom. Be ror kfoyuk yuhatn hikmom. ⁴⁰ Be inji nakfo nohmomn tfit aposerm nakuyakom. Nakuyakhato rim fnahnimom. Rim fnahnimotm be wife frtmbho botmbhomm. Inji frtmbhoniato bro kfo rafo mrokmom hemomm. Kfo memomm, "Arihat be tfit mirahko Jisasrhu mrokmom met yindarim akfo nuhas habrinomm. Be tmifko." Inji kfonihato memomm, "Wafnahniko." ⁴¹ Be fnahnimom. Fnahnimohat nhai wommpno yihato rim kfo nur marimom, "O nom nd yimam ftatmnom." Nhai. Rom to be yindhor yima yuhurpno yihato kfo memom, "Nhai mrokmom. Nom Jisasrhu mrokmom kmi thofm kfo ptha nuhaswatnom tatwomnom, nhai mrokmom." ⁴² Nd Jisasrhu hingrneft nhai yafhormomt. Yiha yiha rmomt yihato Bro Nkifrarhu mrokmom met yindarim kfo ptha nuhasmoumm. Met yindarim kfo nuhas marnya memoumm, "Bro Nkifrar kfo hnamoa yimar tor nd yima Jisasrn kfo hnamour yimaroh minrfa htiahyukr."

6

Aposerm yakmo wom 7-pela nfri yimam

¹ Barkof yimam Jisasr hikmoam nhai bokm rhurmom. Kto hingrna hanyspno rifinysamom. Rifinysahato tfit tuhan dhirroh maruha yak nhta marnya he duha nmbuhatpno wom Judam, Grik yarmumat pthetm, duka marimom, "Barenko, ndar aposerm yekwa marut nmoh tuhan dhirpam nhai hekahmm. Be Aram kfetroh tuhan dhirrpam kahukm." ² Be 12-pela aposerm wanyhato naku nhafoh bugamomm Jisasr hiket yimam. Nakuyak bugahato kfo memomm, "Nhai wofnkahnom Bro Nkifrarhu hingrneft yakitohhany yo tfit tuhan dhirroh maruham yakitohkfot. Ka hus hingrneft bugaf yakitohneft ka Bro Nkifrarhu hingrneft miyafho thuniraht. ³ Ndnatn nom kangnom 7-pela yimam wayakko. Wayakkahtko romn nd hingrneft yakitohrahm. Tuko hti hanyhato fitoh yimar Bro Nkifrarhu Yafothat yorhwatrror rorhu dukefr riduka adukewurm tamoh tamohm, ndhtet yimam yakhato nd hingrneft yak htarahnomr. Nome nhai nd hingrneft yakitohkfot. ⁴ Nmoh hingrneft to be kfo bruttnaneft yo Bro Nkifrarhu mrokmom kfo nuhas to be nd hingrneft nom tohkfot." ⁵ Nd rom pthamo yima yuhur met yindars ufakmomr. Me-momm, "Nd niko kfiwa yima yuhur hifa pthiwuko." Ndnatm Stifenr, tu Bro Nkifrarpo frtkafhato Bro Nkifrarhu Yafothat ruhetr, yo Filifr, Prokorusr, Nikanorr, Timomr, Parmenasr ee Nikolasr, nd nd yimam fakmom. Nikolasr ror ndo yima tangiroh kmi Antiok thofr. Bro Nkifrarhu rmon mrokmom riwanyak-hato Bro Nkifrar hikmor. Tfit kto Jisasrhu mrokmom hikmoatr ndnatn ror rpat fakmomr.

⁶ Aposermjno hanyotmm romn tir htahato kfo bruttnamomm. ⁷ Be nd Bro Nkifrarhu mrokfot mfaknimomt kmi kmim ptha fnahmotmt bok met yindarim wany wofnmomt Jisasrhu mrokfot. Tuha Jerusalem ndnatn bok Kristenett rhumot. Yo nd Bro Nkifrarhu temperr tohukatohyuk yima prism, Bro Nkifrarhu mrokfot wanyhato rroh bokm Jisahr hikmom.

Judam sinyahato Stifenr kotimmo yuhat

⁸ Bro Nkifrar hifa hifa yak marnya bomarnyamorr Stifenr. Yak marnya bomarnyahato bro hingrna bbuka yafothar thu hmbremotr work wonk nefm namourm. Met yindarim ror namoa nefm htihato yafotha duhatm rhumoum. ⁹ To tfit wom kmi thofm sinyahato Stifenr pthayuk mrokfom kfo hanyjbornamomm. Nhai fitoh kmim inji narmom. Judaroh wom rhu rifinyuk rmonr kutamoumr Frimanroh rmonr rifinymoa yimamn kfo hanyj-bornamomr Stifenr. Nd yimam Areksendria thofmi Sairini thofm yo Siristia thofmi Esia thofm rpat nathu hmbrihato Stifenr pthayuk mrokfom kfo hanyjbornamomm. ¹⁰ Memom, “Ka nomn sinyahato tamoh mrokfom kfo nohafrahnomr Stifenr.” To nhai. Bro Nkifrarhu Yafothar dborihoh dukefm hemotr nhai romrpam ptha nohrmomr. ¹¹ Ptha nohafmotrm ndnetmn wom yimampno yihato mkfo memomm, “Wakfo wamitwako, ‘Stifenr wanymonomr Mosesri Bro Nkifrar faso faso kfomor.’” ¹² Rom nd mrokfot yaknihato mhta wokmotm kmi thofm, tohak yimam, boririfhuthu tizam sinyanihato Stifenr fakmomr. Yakhato kausermpno kot hanyomr. ¹³ Stifenr bi mrhumotr ee mrokfot hta wokyuk yimam mongko yimom. Mtohmomn mkfo memom, “Nd yimar yiha yiha Bro Nkifrarhu temperr faso faso kfo bebwort yo Mosesrhu boririfhut ndt nhaf faso kfo bebwort. ¹⁴ Nd yima Stifenrparn nhaf kfo memor, ‘Nasaret thof Jisasrn nd nkifra rmont yak tebosohrahrt. Nkifra boririfhut nhaf inji. Yatkt yak tuhaf-ruharn tfit nfrit yak htarahr.’” ¹⁵ Nd kot swirt tohyuk yimam Stifenrhu nyingatikt wahtimohat memom nndo mounmotrhu nyingatikt fnhutwotr.

7

Stifenr kot swirt pthamo mrokfom

¹ Bro tohak prisr kfo ttiwonmorr Stifenr; “Stifen, ni wakfo ptha marnya. Nd rom kfo pthiwa mrokfome ka tu wany mifmomm phewum?” ² Stifenr wasinyahato kfo memor, “Yinouroko, nann afo pthakahta wawanywako. Nmoh nkifra Abrahamr tafi Mesopotemiat htanyhato Haranko yi duhatrn yura mounthu tu bro bbukayet Bro Nkifrarpo nahtimofn nakfo pthamof. ³ Nd yiha Bro Nkifrar kfo memor; ‘Ndar tunhu kmit, ninhu yifammam, ndm wahtanywanm. Wahtanykahnm waiswa na kfo nuhasaforuha tkittn.’ ⁴ To be nd yiharn Abrahamr Kaldiaroh kmit htanyomrn yimor Bro Nkifrar kfomo kmi Haranko. Be Haranko tohetrn yifemr nohtanimotr Bro Nkifrar yak hatohhnamorrn tfit ndar nom Isrer-nom arihat tohwa bbinysoftn fak htamotr tohmor. ⁵ Bro Nkifrar ndar bbinysoft yak htamohat nhai kfo nuhas marimorr; ‘Ndar bbinysoft ninuhet.’ Nhai. Be kfo memor; ‘Ni ndar bbinysoft toh hanyruhann nohnirahn kto tfit ninhu yon frikar ndar bbinysoft yakrahm.’ Bro Nkifrar Abrahamr nd tkitt nakfo nuhasmohat Abrahamr to mirahko ka yonetrn inji nakfo nuhasf. Nhai. Abrahamrhu mett nmbit tohmout. ⁶ Bro Nkifrar kfo memor; ‘Ninhu yon frikar sinyahato 400 gunyjimm afo womroh yinhit tohato afo wommn hingrna

hafknirahm. Wom kmimn yejimmoh thurahmm nd yiham. ⁷ Inji nahany inji nahanyruhamm to tfit kto rom yak beb hasoyuk kmim nann krhopam hirhotanm ndt htihato yafuhafrahmm. Yafuhafruhathmm tfit ndar ni kfo nuhaswa tkitt nieruhamn na kfo tatorahma.' ⁸ Bro Nkifra Abrahamrof mrokfom nayak dbkafni-mohat Bro Nkifrar sinyahato Abrahamr kfofomorr tha puk thuneft. Memorr; 'No mrokfom nayak dbkafhat, ni tha puk thuwa tkitt hti hanyruhann mduduk hanyrahn nani ni mrokfot nayak dbkafhat.' Kto rorhu barkof yon Aisakr nurnimohat trku rijohit rhunihato 8-yuk marrpno tha puk thumorr. Tfit Aisakr bronihato tuhant yakni ror nasakmo yon Jefokr nhaf nd rpa yuhat hikhato tha puk thumorr. Tfit Jefokr nasakmo 12-pela yonm, nmoh nkifram, nd nkifra neft hikhato tha pukthu bugamorr.

⁹ Nd 12-pela nkifram rroh womr Josefr. Nd yima Josefr rorhu wom najomrom nhai dborioh neft narmomr. Faso riduka bebakhato wom kmimpno nahehato wiknanimomr. Ijifmn wiknani hanymomr. Josefr Ijift yi tohmohat Bro Nkifrar nhai mong trohrmorr. Tamoh tamohm Bro Nkifrarhu tirmn rhumor. ¹⁰ Bro Nkifrarhu tirmn ruhetrn ror yakmoa krhopam Bro Nkifrar fak marnya hnamourr. Ror yihato Ijifthu kingrpnno yi mtohhato pthamohat Bro Nkifrar tu dborioh dukefm hemotrr mrokfom hifa ptha marnyamomr. Ijifthu kingr wany yindhorphato be tfit rorn Ijifthu praiministar htamor. Kingrhu kuny kmifar rorpar tohukatohmour.

¹¹ Josefr bi nd nd hingrnefm yakhato tohetrn bro yatinoh wormr Ijifti Kenant tohmor. Nd hus kantrif tohyuk yimam rim ta ttiyak mta ttiyak-moum yeshri yakneft. Nmoh nkifram rom inji buga. Bi yeshrimn foh tebehmom. ¹² Kto wanyakmom memom Ijifko harhuwom wit. Jefokr wanyhato nmoh nkifram barkof yiha kfo tkrurafmotrm yimom wit wiknat. ¹³ Barkof yiha miyakyukm mye buga tanyomom, yo tfit yimom. Nd yispno Josefr kfo nuhas memomr, 'Na hti mmorahkma. Na nikmoh wuroh nmemen Josefa.' Bi inji kfo nuhas-worme, kingr ndnatn hti duka tungunamomr, 'E na kanga ka wom yima furayem. Arm Josefrhu najomroyem.' ¹⁴ Josefr sinyahato ttiwon-morm, 'Nmoh yifem Jefokfre tor yuhre?' Memomr, 'Tor.' 'O wamhtiyakkomr.' Be wom najomrom inji wanyhato yimom yifemrhu yakt. Rorhu mhtiyak-neftpno rorhu yorgtothru rhu hasoyuk wuroh 75 yimam mhtiyakhato rpat yimom Ijifko. ¹⁵ Be Jefokr Ijiftn yi tohhato ndharn nohmor. Nmoh nkifram nhaf ndharpn noh wita bugamom. ¹⁶ Be noh bugamotm tpi tikrpam yaknimomomn hanymom Sekemko. Ndko hanyhato Abrahamr Hamorhu yonmpno wiknamo bbinysofthu tahi muhmn hany htamomn.

¹⁷ Nd rom noh htaniyuk yon rifhur nhai kuken rifhur sinyarmor. Bi Bro Nkifrar Abrahamrpnno kfofomorr Isrerm Ijift yi tohyuk yiham. Bi yonmari rifuhetrn to be Ijift htanyuk yiham bi brbohmom. ¹⁸ Nd yiharn nd nfrir kingr nhai tawisafarmor Josefr Ijift yima nfrir tohhato namoa dborioh dborioh nefm. ¹⁹ Be nd Josefrhu kmi thofm Ijift noh htanimom nhai yak marnyar-moarm. Isrerm gumuha muht muh thunimomr. Kingr htimorm Isrerm nhai siny ffhirmrmom. Ndnatn kfo memor, 'Arihat Isrerroh yon yindarim akisupaf hanyswamm.' Be Isrerm nasak hanymoa yon yindarim yihom kisupaf hanyomom. ²⁰ Wom yiha wom mett wom yonr hiyaumot. Nd yonrhu yufat futamotr Mosesr. Bro Nkifrar nd yonr hifa hti yindhormorr. Nd yonr tu dborioh yonrn nhai kisupafmotr. Ndnatpno fak hamong-motr

husfirpa yamt. ²¹ Kto tfit yak-nimotr briahako htamotr. Briyahako htamotr kingrhu yont htihato fakmotr. Yakhato be rotn duge warhomotr. ²² Be toh warhonimorn Ijifroh hingr-nefm, hingrna dukefm, tamoh tamoh nefm fak buga bugamorm. Yak bugamormn rorn tohmor tu bro ptha nanyjaret yimar.

²³ Tohhany toh hanyomorn bi 40 gunyjimetrn yima yuhur sinyamorr turhu kmi Isrer thofroh yau hafott yinyeft. ²⁴ To be yimorn turhu nyingaye htimor wom Ijifr sinyahato wom Isrerr tmbho botmbhafmotrr wasuh bebmor. Mosesr ndt mhti namburnihato tawo wom Ijifr tmbho botmbhomotr be tuha gur rhumor. ²⁵ Mosesr memor, 'Inji nakahta Isrerm hti dukarahma. Duka mirahm, "Ka nd yimarn yak hakrmenirahrnom." ' To rom nhai hti dukarmour. ²⁶ Tfit wom yiha nhaf tu Isrerf tuf tawo tawo nna hasetfn memor, 'Kfo dbohfarhoyanfn afo htiruha hti nhtarhfan o nhai.' Nna hanyetfn yak dbkafaknihato kfo memorf, 'Barefn, tamohmpno tufn tfit tawo tawo nnewafn?' ²⁷ Tu rinam-burakyukrn Mosesrhu tirm frtfafhato kfo memorr, 'Nine frohm kfo memomn turoh nefmpno ni buha mitohhato wakfo dbohfatwanm?' ²⁸ Bi nohok womr yewofnronn tfit kangn wompam?' ²⁹ Mosesr inji wanyhato fakrmenimor. Yakrmenihato yimor Midianko. Ndko yi tohhato mett yakhato hus yonf nasakmor.

³⁰ Be ndko bok gunyjimn tohmor. Tohhany 40-yukrpnno Sainaitn yima toh duha nungu furatn toh hasetrn mounmotr yimorn mifnahmorr. To nd mounmotr kah funefm kanjo mi bufupamn funa nuhasmorr. ³¹ Mosesr nd kah funefm htihato memor, 'Ka tu kah funef mifet.' Memor, 'Yauyaknihato brbo yi htiruhant.' Yuhre fauyakni hanyomr asha Brorhu tngt kfo memor, ³² 'Na ninhu nkifra Abraham Aisak Jekofrom kfo bruttnamoa Bro Nkifraya.' Be Mosesr Bro Nkifrarhu tngt wanyhato yimar wutthamohat memom nndo ginunes kekwo. Kaht htihato nyingam mmrtamotmr nhai htirmort. ³³ Bror kfo memorr, 'Nd ni hmbrita hona wuram wayak thunm. Nd tkitt na Broya wiyauyauwa tkitet. ³⁴ Nanhu yon kunys Ijift tohwom. Ijifm yak bebwatmm na yuwa naku nurwohat rom kangn ka nhai htihato wanyakarnom. Na wanyhato htitanm. Na nd nmbuham htihato ninpno nia ninhu kfotn. Ninn na be kfo tkrurwa Isrerroh mihtiyakneft.'

³⁵ Isrerm sinyahato afo Mosesr kfo memorr, 'Nine frohm kfo memomn turoh nefmpno ni buha mitohhato wakfo dbohfatwanm?' Afo frtfaf-momr kto nd rom frtfafmo yimarn Bro Nkifrar kfo tkrurafmotrr fak hakrminamorm. Tur kah funefm kanjo htimo moun-motrn bro bbuka nanyja rihfur hemotrr hakrminamorm. ³⁶ Mosesr Ijift tohetrn wonk wonk mirakerkfot hingrna tanyhato fak hakrminamorm. Rom Retsit yo yima toh duha tkitt yau fnahmohat to be mirakerkfot kfomot 40 gunyjimn nd yonmari yihotar fau sufnahmorr. ³⁷ Nd yima Mosesrparn Isrerm kfo memorm, 'Na hingrnawa hingrneft kanjohot yimar kto wom yiha tukmoh frikeft toh hamuhyuk yimarn Bro Nkifrar nd profet hingrneftn yak htarahrr.' ³⁸ Nmoh nkifram yima toh duha tkitt yi tohmohat to nd yima Mosesr tohnhomorm. Rorn Sainait muhhato rhu nkifraniryuk mrokfot mounmotr hemotrr hemornom.

³⁹ Mosesr nd mrokfot yaknihato Isrerm kfomourm nhai wany yakior-moamr. Ijifkorhof dukefr rhumoatrm ndnatn hanyjbornamoumm Mosesr kfoyuk mrokfom. ⁴⁰ Mosesr Sainait muhhato wutoh hatohmohat, Isrerm Aronrpn yihato kfo memorr, 'Nmoh hatohakmoa yima Mosesr nhai ka tfit

nieruhatr. Nom bi duka mumiwunom yiyuk yihotam. Nom kangnom wom yifonm wahingrnakahtn nd yifonmn yihotat toh tamnou hanyrahnmom.’

⁴¹ Be nd dukeftpno bulmakaur hingrna nhombramomr. Hingrna nhombranihato bulmakaur washato tarioh skurn mthanihato nd yemrot yehato grha yindhormomr nd nfri bulmakau yifonr tum hingrnayukr. ⁴² Be inji rinakmotm to be Bro Nkifrar mong trohmorm. Mong trohmotr tfit mount rhuyuk mar yam guny ndmn kfo tatomoum tamoh tamoh nefm. Profetm kfomo mrokfot to be kfo twanhomom. Kfo memom, ‘Niko Isrerko, niko yima toh duha wesana furat

40 gunyjim hwe toh fnahmo yiha bulmakaum washato tarioh mthamoahat
nhai nann tarioh mtharmoako.

⁴³ Nd niko hiyau habrimo ser tha rmont
ndt nndo tahi Molekr tohyuk ser tha rmonti
yo gunyr kanjo hingrna nhombret tahi Refanr
hatoh habrimouko.

Ndm nndo tukmoh kfo tatoyuk tahi yifonm hingrnamoko.

Tuko inji newatko nhai asha tohruhatko

wuri Babilonko htaruhanko.’

Amos 5.25-27

⁴⁴ Nmoh nkifram yima toh duha tkitt toh fnahmohat Bro Nkifrar mithu nawohyuk ser kuny rmont kakitoh-moum. Nd ser kuny rmont hingrna-mohat tu Bro Nkifrar Mosesrpno kfo nuhasmo yuhatn hingrna nhombra-momt. ⁴⁵ Kto nd nmoh nkifraroh yon frikeftn nd ser kuny rmont Josuarpo yaknimotm hanymomt wom kanriroh bbinysotn. Nd kantrikofthu yimam Bro Nkifrar yak tuhafmorm nd ser kuny rmont tfit ndha mkasinyamomt. Be nd rmont tohettn ee Defitr king tohmor. ⁴⁶ Defitrn Bro Nkifrar hifa kak marnyamour. Jefok frikefthu Bro Nkifrarhu nfri rmonthu kasinya nmbuhat Defitrn Bro Nkifrar kfo naku ttiwonmorr. ⁴⁷ Kto Solomonrn nd nfri rmont kasinyamort. ⁴⁸ Nd nfri rmont to be hingrna furamomt. Nd yurak myorhekwa Bro Nkifrar yimamif hingrnayet rmonm tohetrn to btne tohmort? Nhai. Profetm to kfomomt mrokfot, ⁴⁹ Bro rhu mrokfot kfo kangr,

‘Hefenr nanhu sia kinger.

Bbinysot nanhu wuraf wayahotwa tkitet.

Ndnetn to tfit fitoh tkittn yamukako

nanhu rhu witayuk tkitt ahingrna hanyomr tfit?

To fitoh tkittn nanhu rhu witayuk tkitt rhuruhat?

⁵⁰ Nd nd shrm nann hingrna hta bohtamo shrkayem.’”

Ais 66.1-2

⁵¹ Stifenr nd kaunserm kfo memorm, “Niko ndar Judaroh kaunserko niko be tu mfro tahisamomko nikmoh yima yuhum. Yimbhindangm kihmnimom. Nhai Bro Nkifrarhu mrokforoh wany-kfot. Bro Nkifrarhu Yafothat kfoyuk mrokfom be tu frtfa thuwokomm tukmoh nkifram nahnamo kanjo. ⁵² Nhai wom profetr nikmoh nkifram hifa yak marnyarmomr. Bro Nkifrarhu hifa yufayet yimarhu mrokfot me-moum akfo nuhasomko rom riyak-moamm was beb bobeb thumoumm. Nd hifa yufayet yimar to bi niamotr nikomn hndhnamotkomr wasmomr. ⁵³ Ar mounmotmpno boririfhut yakyuk kmiko to nhai nd boririfhut hikrmokomt.”

Stifenr tahiye frdbofnomo yuhat

⁵⁴ Stifenr pthamo mrokfom kaun-serm wanyhato nhai yindhormom. Nyingatikm memom nndo krpaye srfemm. ⁵⁵ Stifenr Bro Nkifrarhu

Yafothat tohmoutr. Memor, yura auhtiya, htimorr Bro Nkifrarhu wondht hatohmohat memom nndo marrn yifa tohwor. Bro Nkifrarhu tirmifkorn htimorr Jisasr: ⁵⁶ Stifenr inji htihato kfo memorm, “Wawanyko, na bi htitwant hefenrhu rim fnahni yuhat. Tu rim fnahni yuhatn htitawanr Bro Najomr tohwor Bro Nkifrarhu tirmifkorn.” ⁵⁷ Stifenr inji ptha hanymor kimr wunahato yimbhindangm takihmomm. Nhai wofnrmom ror pthayuk mrokforoh wanykfot. Be yudbat rpat wayur sinyamomm toneyaknihato tir tir fakmomr: ⁵⁸ Yakhato fakni hanymomr. Taunt yau troh tanyhato wuri nndo rim htahato tahim yakhato tahiye tahiye febhohmomr. Nd mrokfot wakfo wokakyuk yimaroh yuke hmbresham yakhato wom yima damiagr, rorhu yufat Sorr, rorhu wurampno wahtamomm. ⁵⁹ Tahiye yenyohafmotmr Jisasr nakumorr, “Nungohtet Jisase, nanhu yafothar wayaknr.” ⁶⁰ Wura yihom tabokme-hato kfo memor, “Broye, rom na ndar tat bebwohat mirahn finji anayanm.” Be inji kfonihato mfaknimor. Sorrn kfo yakio mrokfot hemorm Stifenrhu tat nohneft.

8

Sorrr hatonemorm Jisasr hiket yimaroh hik tubatunef

¹ Nd yima Stifenr tat nohmo yiharn Jerusalemthu Kristenm yak beb bobebafmotmm fakrme tubatumom. Womm tuha Judiakorhof kmimn fakrmenimom womm Sameria-korhof kmimn. Aposerrpamn tuha Jerusalem toh hasomom. ² Bro Nkifrarhu mrokfot hiket yimam Stifenrhu thatipt hanurmomtn fop hmbre-momt. ³ Jisasr hiket yimam turoh kunym ruhetmn Sorr hik hawitahato myakmoarm kalabus htamourm. Memour, “Inji anakahann yak bati bugayanm Jisasr hiket yimam.”

Aposerm Judiati Sameriako yihato ndkorhof kmi kmim Jisasrhu mrokfom kfo pthahemo yuhat (8.4–12.25)

Bro Nkifrarhu mrokfot Sameriat hany pthamo yuhat

⁴ Nd yakrmenimo met yindarimn gutniuskfot romn kmi kmim hany-momt. ⁵ Filifr yakrmenimohat Sameriako yorhwa taunt yimor. Rorn Kraishrhu kfo nuhas mrokfom kfo nuhasmorm. ⁶ Filifr mrokfom pthamoahat kmi thofm rom rhu marnyahato wany yakitohmoum ror pthayuk mrokfom. Wonk wonk mirakerm namoatr rom rhu marnyahato htimoum: ⁷ Tek yarh fknayetm rom yarhm yak thumoatrm tau tanyhato fnahnimoum. Wura bebets, rikiyem ror kfo bruttnamour marnyanimoum. ⁸ Kmi thofm Filifr namo nefm htihato bro yindhoreft fakmotm.

Saimonrhu tndht

⁹ Nd kmitn wom yimar tohmour rorhu yufat Saimonr. Nd yimar duka memor, “Na bro yufayet yimaya.” Nd yimar metroh thu bbrakyuk hingrnefm yo kiret nyinga hingrnefm yakitohhato wonk wonk nefm namoatrm Sameria thofm htihato duka memoum, “Barenko, nd yimare finji hingrniwar?” ¹⁰ Sameriat tohyuk yima fura bofurat, kukent, burent, fitoh fitoh yimat, be rorrparn bro dukeft htamoum. Rroh dukeft duka memom, “Nd nmoh nkifraroh bro bbukeft, tot nd yima Saimonrn.”

¹¹ Wonk wonk nefm nahatohmotr Sameria thofroh dukefm rorrpar htamoumm. ¹² To tfit Filifr yihato yimam Bro Nkifrarhu kingdomkfoti

Jisas Krairsru yufat kfo pthamor Sameria thofm wany yakiomomt. Filifr nd ror pthayuk mrokfom wany yakiomo met yindarim baftaisimmorm. ¹³ Nd yima Saimonr, ror Filifr pthayuk mrokfom wany yakiomotr Filifr baftaisimmorr. Saimonr baftais yakni-hato Filifrpno rpat tohhato Filifr wonk wonk nefm namotr Saimonr htihato tfit mifoh rihamor. ¹⁴ Jerusalem toh hasomo aposerm wanyak memom, “O, Sameria thofm Bro Nkifrarhu mrokfot wanyhato kak hikwomt.” Be inji wanyakhato Pita Jonrof kfo tkrur memomf, “Wamhti marnya tanyfnm.” ¹⁵⁻¹⁶ Be rof tufn mhti tungunahato htimofm Bro Jisasru yufarpatpno baftaiskfot yakmomn nhai Bro Nkifrarhu Yafothat yakrmom. Inji mhtitihato yo rofn Bro Nkifrapno kfo tatomofm Bro Nkifrarhu Yafothathu yakneft. ¹⁷ Kfo tatonihato tir htamotfm Yafotha fakmom. ¹⁸ Saimonr inji htihato maruham yaknihato mkfo memorf, ¹⁹ “Nd nifn yakitohwa bbukeft kanga awiknayanfn. Na nd bbukeft yakitohhato na fitoh yimam tir htahato kfo tatoruha Yafothathu yakneft yudbat yakrahm.” ²⁰ Inji mkfomotr Pitar kfo memorr, “Bro Nkifrar he furiwa nefm wiknakfot kfiwatn, tunhu maruhampno hel yirahn. ²¹ Ninhu dukefr nndo korhr, nhai Bro Nkifrarhu dukefr hikkahr. Ndnatn nhai nom hingrnawa hingrneft tohnhoruhatnnom. ²² Ninhu ndhet fasoh dukefr wayafho thunr. Wayafho thukahtnr Bror kfo brutnahato nd ni yakitohwa dukefr ror nhai wom dukaruhatr. ²³ Htitann ninhu dukefr Bro Nkifrar he furiwa nefm htihato be mfo mfrhutewur. Nd dukefr yorhwatn be tu fasoh neft newun.” ²⁴ Inji kfomotr Saimonr kfo memorf, “Bro Nkifrapno wakfo brutnakahtfna yuhuwafhrora nd nifn kfi nefm nhai yakrhotma.” ²⁵ Be Pita Jonrof Bro Nkifrar yak nuhashato kfohemoa mrokfom kfo nuhas tanymofm be rof tfit Jerusalemko yimof. Yinyeftpno yihotathu kmim Sameriathum Bro Nkifrarhu mrokfom kfo nuhas hanyomfm.

Filifr Itiopia thofr Bro Nkifrarhu mrokfot kfo nuhasmo yuhat

²⁶ Filifr wom mounmotr yihato kfo memorr, “Wasinayahann sautko yorhwa yihotat waiswa. Nd yihotat Jerusalem mkiomotn yimot Gasako, yima toh duha tkitko nd yihotat korhwot.” ²⁷ Be Filifr sinyahato nd mounmotr kfoyuk yihotarn yimor. Yau hanyhato wom Itiopiathu yimar-pno yihom nafurmof. Nd yimar frfuha duhatr. Frfuhaf faktanomr. Itiopiathu kwin met Kandasithu maruham rorn kakitohmourm. Jerusalemko Bro Nkifrapno kfo tato tanyhato ²⁸ memorf, “Tfit kmiko aiya.” Turhu karis toni hanyhato profet Aisaiarhu mrokfot htihato ptha hanymour. ²⁹ Bro Nkifrarhu Yafothat yihato Filifr kfo memotr, “Nd yimarhu karispno brbo waikahnn ror ptha hanyuk mrokfom wawany yakitoh hanyswanr.” ³⁰ Filifr tonenihato karispno brbo yau hanyhato wanymorr nd yimar profet Aisaiarhu mrokfot htihato ptha hanymour. Filifr sinyahato kfo ttiwonmorr, “Nd ni htihato kfo pthiwa mrokforoh yimbu yuhame ka kekwonm o ka nhai?” ³¹ Nd yimar sinyahato kfo memorf, “Nanrpaya htineft to finji mrokfo mnam yakkfot. Wom yimam akfo nuhasma, awi yakrfoyanm.” Inji kfonihato kfo memorr, “Yuwa muhn karisn.” Be Filifr muhmor karisn. ³² Nd yimar karis rhuhnehato htihnamo mrokfom kfo memom, “Sifsifr nhombrarahr.

Yimam was thombat nhai tauruhatr.

Yimam yakhato tmbm yoh thombat nhai yififaruhatr. To inji na nhombrarahr.

³³ Womrparoh tng rihar grmim kanjo tayifuhafrahm.

Nhai be ptha hik marnyahato nohyuk tkitt htaruhatmr.
Ror bi nohruhatr to frohmn rorhu yimatm arihat tohruhamn
kfo nuhasruhamn ror yak bebmo nmbuhat?" *Ais 53.7-8*

³⁴ Nd yimar nd mrokfo nmbuhat hti buganihato kfo ttiwonmorr Filifr; "Filif, ttiwonwann, profet Aisaiare frohm dukahato nd mrokfot inji kfomort, turn o wommn?" ³⁵ Filifr sinyahato kfo nuhas bugamorr ror hti hnamo mrokforoh mna yuhat. Kfo nuhasnihato ee Jisasrhu mrokfom kfo ptha nuhasmorr. ³⁶⁻³⁷ Yi yimofn wom tekt htihato nd Itiopia thofr kfo memor, "Asot tekt. Na ndar tektn baftaisnirfoya? Ka wom fasoh nefm yorhwatma nhai baftaiskfot?" Filifr inji wanyhato kangrr, "Yinowa, na nhai mrokfom ninhu baftaisimneft. Tunhu yima yuhur wayibon sinyewur Jisasr hikneft, to na nhai tfit kfo rafokfot." Itiopia thofr wanyhato memor, "Jisas Kraistr Bro Nkifrarhu Yon mifna."

³⁸ Inji kfomotr karis mtohmot. Be Filifr mitohnihato nd Itiopia thofr tekt hanyhato baftaisimmorr. ³⁹ Baftaisimnimorrn yuhre mtohna hnamof, be yudbat Bro Nkifrarhu Yafothatn Filifr thu hafunanimotr. Be wom Itiopia thofr brioh tkitt hti hambro hasohato be yindhorefrparpno yimor yihotar. ⁴⁰ Filifr Bro Nkifrarhu Yafothat thu hafunanimottr Asdot mifnahmor. Be ndarhof kmim Jisasrhu mrokfom kfo ptha nuhas habrimorm. Inji yi hanyhato Sisariat mifnahmor.

9

Sorrhu fasoh yima yuhur yak kektmo yuhat

¹ Sorr nhai ttifarmor Jisasrhu disaiperroh yak bebneft. Ror hatoh hnamo neft to be fakitoh hany swanhomort. ² Wom yiha prisroh bro tohak yimarpno yimorn mkfo memor; "Nanhu bro kfo nuhas mrokfot wawandfakkahnt Damaskus yorhwa Judaroh bro rifiny rmonm bi wahe nhombratwann. Gontwaroh mrokfom wakfo wamitwa, 'Fitoh yimar o mett, Jisasr hikwam, nd yimam, Sorr yak-ruharm Jerusalem kalabus hany htarahrm.' Nd mrokfot wakfotwann." ³ Nd mrokfot bi ruhettn wom yiha Sorr Jerusalem toh tanyhato Damaskusko yimor. Yimorn brbo Damaskuspno toh hanymor asha nukeft wuhtiyakmort. Memom ka nndo bro ksh nmbuhatn yura mountko wuhatohhato wayak nukewumt. ⁴ Nd nukeft masat funa rramott yima Sorr yura hos ruhetrn memor auhtiya nyingam mmrifakhato bbinysoft misuhmor. Be tuha nyinga kunyjetr rhumor. Tfit yura hefenko wom tngt kfo memot, "Sor, Sor, na tamoh dukeftpno yak bebwona?" ⁵ Sorr wanyaf hanyhato kfo memor; "Broye ni frohe?" Yura hefenko wukfomo yimar kfo memor; "Na Jisasa. Ni nd niwa nefm Kristenmpno nhai romn yak bebkahn. Nann kak bebwo. ⁶ Asomif wasinyanikahn Damaskusko wanju. Tor nd kmit korhr wom yimar. Rorn wom mrokfom kfohirahrn."

⁷ Nd Sorrpno ziyuk yimam nd neft htihato be tuha yafotha duhatm tohmom. Nd Sorrpno pthamo yimar nhai nyingatikm htirmomr. Be tngprat wanymoun. ⁸ Be Sorr wasinyahato memor ayukatoha fitohat yukatohrmor? Be yimamn tirtir yakitohaknihato Damaskusko yimor. ⁹ Husfirpa marm nyingam nhai yukatohrmor yo nhai bupa nuwa yarmor.

¹⁰ Nd kmi Damaskusn Jisasrhu disaiperr tohmour. Rorhu yufat Ananaias. Ananaiasr Bror yimorn minakumorr. Yimam hwe tweh hanita kanjo inji minakumorr. Ananaiasr wanyaf hanyhato kfo kangr; "Broye na

asoya.” ¹¹ Bror kfo memorr, “Judasrhu kunyko waiswa. Rorhu kunyko yita yihotarhur yufat ‘Dborioh Yihotar,’ nd yihotarpar waikahnn Judasrhu kuny shofm wattiwon wamitwanm, “Tasis thof Sorre tor?” Ror tor nd kunysn kfo bruttna hasiwur. ¹² Yak nuhasruhatm htirahrn nyinga kunyjeter. Nd yima Sorr ror nhaf hwe twehnano bi Ananaiasr htihak hanymorr. Yi hanyhato tirm hta hanymotrr nyingam fukatoh hanymorm.”

¹³ Ananaiasr wanyhato kfo memor, “Broye, Jerusalem ni hikwa yimam yak bebhnewa yimar bok yimam nd yimarn kutewum. Kangm ror kak bebhnewurm. ¹⁴ Bro prism kfo yakiomotmr Damaskushu yimaroh yakneft ndnetrn bi ako niewur.” ¹⁵ Ananaiasr inji kfomotr tfit Bror kfo memorr, “Wanju nd yima Sorrpno. Nanhu hingrneft rorn hingrnarahrt. Rorn yima tangim yo kingm yo tu Isrerm yihato kfo nuhas hirahrm. Kfo nuhasruhatm na mhti dukakrahma. ¹⁶ Ror nd hingrneft tohhato yakruha krhopam na tukann kfo nuhasruhanr.”

¹⁷ Ananaiasr inji wanyhato yimor nd Sorr rhumo kunys. Yihato tir rim htamorrn kfo memorr, “Yinowe, Jisasr kfo tkrurefitra niya ninpno. Ni ako Damaskusko niahato yihotat htimo yimar, to nd Jisasr htimo. Ninhu nyingaroh yak marnyanefn kfo tkrurefira yo womt duka kangr Bro Nkifrarhu Yafothat nd yimar amthu nawohtwat. Ndnetrn kfo tkrurefitra niya.” ¹⁸ Ananaiasr inji kfonimotr be nd Sorrrhu nyingam hta tasifmo shrm yira nfm kanjo yohrofnihato misuhmom. Be nyingam tfit fukatoh wuthamorm. Yukatoh wuthahato baftais fakmor.

Jisasrhu mrokfom Sorr Damaskus pthamo yuhat

¹⁹ Kto Sorr nuwa ye bmta marnya-hato tu yima rifhur tfit niamorr. Nd kmit afo dfik yiham Jisasrhu disai-permpno tohmor. ²⁰ Nd ror tohmo yihamn Judam rifnymoa rmonm yihato Jisasrhu yufat rikfo nuhasak memorm, “Jisasr tu Bro Nkifrarhu yon mifer.” ²¹ Sorr pthayuk mrokfom yimam wanyhato kfo memom, “Barenko, nd yimar tamoh yakt asha niaror? Jerusalem tohyuk Jisasr hikwa yimam to nd yimarn kak bebhnewurm. Tfit bi asha niahato asha tohyukm kangr ayakni hanyanm kalabus.”

²² Damaskus tohyuk Judam inji kfo hanymoumr ror nhai wanyhato kfo marimor, “Dajohmn, bi inji kfiwuma, be tmifa pthaneft.” Nhai. Bro Nkifrar bro nanyjar rifhur hemotrr kfo nuhas bonuhas memorm, “Jisasr tor tu yimar Bro Nkifrar kfo tkrurmor bbinysof thofroh minrfa htikyayuk yimar.” Judam inji kfo nuhasmotmr be nhai wom ptharmom.

Sorr yakrmenimo yuhat

²³ Tohhany toh hanyhato wom yiha tu Judam rhu rifinyhato Sorrrhu was mrokfot nafak dbkafmomt. ²⁴ Sorr ror bi wanymor rorhu was mrokfot. Judam yifung marm taun yifhatikt n toh hajoh haso memorm, “Kmi yifhatikt n toh tatakhatoh wasrah-nomr.” ²⁵ To nhai, Jisasr hikwa yimamn yaknimomr yura kmi gnat mhatohhato kpetr yafho tuhafmotmr misuhnihato fakrmenimor.

²⁶ Sorr yakrmenimohat Jerusalemko yimor. Yihato memor, “Jisasrhu disaipermno atohaka,” to nhai, rom hti fakrmemomr. Sorr Jisasr ri-hikakmohat wanyhato memom, “Ka kfo nhehwornom.” Ndnetrn afo fakrmemomr. ²⁷ Barnabasrn yihato Sorr yaknihato aposermno hany-morr. Hanyhato aposerm kfo nuhas memorm, “Sorr Damaskus yihotoha yuhatn bi Bror htihato mrokfom hemotrr ror asha Jerusalem namao nefm

bi fafho thumorm. Ror nd fasoh nefm yafho thunihato Damaskus tohmohat nhai yakrmermor pthaneft. Jisasrhu mrokfot kfo nuhas tanyorm.” ²⁸ Kfo nuhasmotrm be rpat Jerusalem tohhato rpat ufaufaumoum Jisasrhu mrokfom ptha htfasmoahat. Ror nhai yakrmermor mrokfo pthaneft. ²⁹ Grik yarmumat pthet Judampno nakfo hamuh nakfo hamuhmotm memoum, “Awasmomr.” ³⁰ Rorpno wiyayau htfasmoa yimam wanyhato Sisariat mihtafmotmr Tarsusko yimor. ³¹ Be nd yiharn Judia, Galili, Samariaroh siosm rhu marnymom. Turoh tamoh tamoh dukefm minoh hmbre bugamoatmm Brorhu Yafothat tfit fak hta bohtamoutm rroh toh nmbuham. Yak hta bohtamoatrm bok yimam Jisasrhu mrokfot hikaknimomt.

Pitar Ainiar yak marnyamo yuhat

³² Pitar Samariat tohmohat kmi kmim nhombra bugamorm. Wom yiha Lidat yimorn ndha tohyuk Jisar hikwa yimampno memor, “Ai atoha.” ³³ Nd kmit yihato wom noh minysafet yimar mihtimorr. Rorhu yufat Ainiar. Nd yimar bingot noh minysafet yakmottr 8-pela gunyijim be inji kunyrpat rhumour. ³⁴ Pitar mtohni-hato yufat nakumorr, “Ainiar wasinya. Jisas Kraistr hrek kak kasinyewurn. Wasinyakahnn hwe wuskam wayaknm.” Inji mkfomotrr to be yudbat wayur sinya twanhomor. ³⁵ Taun Lidati Saronfhu tuhan yindars inji htihato rom hatohmo fasoh fasoh nefm kfo dbruf bugahato Brorhu mrokfom hikmom.

Pitar Tabitat kasinyamo yuhat

³⁶ Taun Jopatn wom mett tohmout. Jisasrhu mrokfom hikhato dborioh nefm namout. Yimam tamoh tamohm kaknafmoum rothumn yakhato hemoutm. Nd metthu yufat Tabitat. Grik mrokfotn futamount Dorkas. ³⁷ Wom yihar bro dbohneft yakmott nohmot. Nohmott yak marnyamomtn wondht wondhakhato wom yura rhuyuk buha tikrn mhtamomt. ³⁸ Jopati Lidat nhai wuri rhurmoaf, be brbo. Jisar hiket yimam Pitarhu Lidathu yi nmbuhat wanyhato wom hus yimaf kfo tkrurafmomf. Memomf, “Waikahfnn Pitar wamihtiyakfnr. Mirahr tfit wom awi kanga hatoha. Bmbri anietwar.” ³⁹ Nd hus yimaf yi mkfomofr nhai wom kuknarmor. Rpat mnahtiyakhato yimom. Pitar Lidat mfnahmotr nd yima gus rhumo kunyshu wom buha tikr hamuhmomr. Rom nd met dhirm bodhirm rpat Pitarpno mtohhato nd nohmo mett yima nfrir tohhato nahumo wuskam nur hanyhato kak nuhasmoum. ⁴⁰ Nd rifinyomo met yindars Pitar yak tuhaf bugamormn turpar nd mettpno rim bangu yuknahato Bro Nkifrar wunakuhato nd yima gushu yufat nakumorr, “Tabita wasinya.” Tabitathu nyingam mfrdborhahato mfukatoh fnahmotm. Pitar rihtihato wasinyamot. Wasinyahato rhumot. ⁴¹ Pitar yauyaknihato tirt fakmort. Yakhato teh kasinyamort. Tohmott Pitar rim tohnihato Bro Nkifrar yakitohet met yindarmi tuhan dhirm nakuyakmorm. Nakuyakhato mtoh-motm kfo memorm, “Tabitat asot bi tfit mfanyjwit.” ⁴² Nhaf Pitar nd mett kasinyamo yuhat nhai brbo tohrmot mrokfot. Jopa thofm bokm inji wany-hato Bro Jisar rifak hikakmom. ⁴³ Pitar Jopat bok yiham Saimonrpno tohmor. Nd yima Saimonr bulmakau tha hingrneft tohmour.

¹ Wom yimar taun Sisariat tohmor, rorhu yufat Korniliusr. Italit tohyuk 600 soldiam rorn Rom-korhof 100 soldiam tohukatohmorm. ² Rori rorhu kunys rpat tohmoa yimam Bro Nkifrar yakrmehato rorhu tamoh tamoh mrokfom o tamoh tamoh nefm fak hik marnyamoumm. Kfo bruttnaneft nhai yafho thurmort. Yima bebpa met bebpa tamoh tamoh kak nafthumoum, rorhum yakhato hemourm. ³ Wom yiha 3 kilok krif marrn Korniliusr be rhu hasohato mounmotr be tafontn twe kanjo htiyak hanymorr. Nd mounmotr niaknehato yufat nakumorr, "Korniliuse." ⁴ Korniliusr be yakrmehato be yeny-jworfnano kfo fakio memor, "Broye, tamohet?"

Tfit mounmotr kfo memorr, "Ninhu kfo bruttnanefti dborioh nefm Bro Nkifrarnt htiहत dukewurm. ⁵ Href-nano wakfokahtnm wom yimam Jopako anjukahmn amkfactwamr wom yimar, rorhu yufat Saimon Pitar. ⁶ Nd yimar tohwor nd foh bulmakau thaye wonk wonk wuskam hingrniwa yimarhu kunysn, rorhu yufat Saimonr, bro maromb thmbko watohwor." Be nd mounmotr inji kfo tanyhato yimor.

⁷ Korniliusr mounmotr htiyafhato nakuyakmorf turhu hingrna yimafi wom soldiar. Nd soldiar tu Korniliusrhu brbo tohyuk hingrna yimar. Rorn Bro Nkifrarhu mrokfeft kakitohmour. ⁸ Nd yimam niamotm ror htiyak nefm kfo nuhas buganihato ee kfo tkrurafmotrm Jopako yimom.

Pitar tweht kanjo htimi yuhat

⁹ Nd Saimon Pitar miyakmo yimam buha mihwemom. Tfit nd wom yiha tfit sinyani yimom. Rom brbo Jopatpno bi toh hanyetmn Pitar ror sinyaninor turhu kunyshu wom ken tikr muhhato memor, "Kfo bruttnaruha." Marr bi dany yuhat toh hanyetrn. ¹⁰ Pitar yatinohhato memor, "Nuwa yeruha." Yuhre yeshrim hta mska hanyetmn ka Pitar hwe tweh hanita kanjo rmonthar htiyak hanymorr fawihna hanymor. ¹¹ Yura mountko rim hir mhirhato nd rmontharhu manoh manoh psifm memom, "Ndo yimamn ka psifm mano mano yakitohhato yafuhaf hanitatmr kawihnewur." ¹² Nd rmonthar wonk wonk yeshrim hawihnamor. Rhumom bukorm, nungam, yo nd wonk wonk yemrom. ¹³ Pitar nd rmonthar hawihnamo yeshrim hti hanyetrn naku tngt niamot, "Pita, wasinyakahnn nda yemrom wawasak waya." ¹⁴ Tfit Pitar kfo wok memorr, "Broye, ka nhai mif inji narhota! Bingot nom tohnamohat nhai ye hnarmoyanm. Mur yemroyem." ¹⁵ Tfit kfo memorr, "Tamohtet yemrom arihat Bro Nkifrar kangrn wayanm mirahn akfo kurann." ¹⁶ Tfit wompam be nd rpahtet tngt kfomorr. Wurohpam kfonihato tfit nd rmonthat mount rim fnahnimot.

¹⁷ Be Pitar nd nefst htiyafhato duka nhta bonhtamour, "Tamoh nefst na hitawoya?" Inji duka hasetrn nd Korniliusr kfo tkrurafmo yimam Pitar tohmoa kunys kfo ttiwonhnamom. Kfo ttiwonhna be nd tu Pitar tohyuk kuny yifhatikt mtohmom. ¹⁸ Mtohhato naku ttiwon memom, "Barenko, Saimon Pitar tor? Asha tohwor?" ¹⁹ Pitar turhu tweht duka hasetrn Bro Nkifrarhu Yafothar kfo memorr, "Saimon, husfirpa yimam naku hambrohnewumn. ²⁰ Wasinya wahiknm. Nanhu tngtpno nd yimam hambrahnewumn. Mirahn aduka kinyaki bokinyaki hanya. Be wai furatwa."

²¹ Be Pitar mibrnyimorn memorm, "Barenko, na asoya. Tamoh yakt nieko?" ²² Tfit kfo memorr, "Nom 100 amiroh tohak yima Korniliusr kfo tkrurafmotrn nom niamonom. Nd yima Korniliusr Bro Nkifrar yakrmihato ror nhai wom fasoh nefm nakahr. Judam hifa hti yindhorwomt rorhu

toh nmbuhat. Bro Nkifrarhu mounmotr rorpno yimorn kfo memorr, ‘Pitar mrokfeter. Afo nd mrokfom ninpno nia rhuhatu ptharfotrm wanyherfonr.’ Mounmotr inji kfo motrr to be tfit nomn kfo tkrur memor, ‘Pitar wamhtiyakkomr.’ Ndnatn nom niamonom ninhu htihaktn.” ²³ Pitar nd rorhu htihakyuk yimam kunyko hafknihatu nd yifungr rorpno hwe nfhomomn dbha tfit tum toh tanyomoko yimom. Pitar rpatn yimom. Jopat tohyuk Jisasr hiket yimam Pitar hik tamnou hanyomomr.

Pitar Korniliusrhu kunys yimo yuhat

²⁴ Be nd yimam yau hanyomomn buha mihwemom. Nd wom marrn taun Sisariat mfnahmom. Ror Korniliusr bi turhu yimatm yo turhu froh frohm bi yak nhafohmormn be rhu gari hasomom. ²⁵ Pitar kmit mfnahhato memor, yau fkneni hanyruha, ka Korniliusr rorhu wurampno mtabokmehato mfhat wasifamort. ²⁶ Pitar inji htihatoh wateh kasinyakmorrn kfo memorr, “Wasinya. Na yima furapaya.” ²⁷ Pitar Korniliusrpno ptha hanyomorn kuny yuhat yau fknenimorn rim htimorm boknambok met yindars rhu rifiny hasomom.

²⁸ Inji rim htihatoh kfo memorm, “Niko tuko tawisafwoko, nom Judanomi niko yima tangiko nhai rpat tohhato tamoh tamoh nefm nakfot o rhu nafif inji nakfot, tu be nhai mif. Nd bro mrokfot inji rhuhamotn tfit ar yuwonano Bro Nkifrar kfo nuhas memora, ‘Mirahn wom yimar akfo beb amiyar,’ “Tamohmpno yima tangimpno rhu duha yitako?” ’ ²⁹ Tfit niko kfafmohat nanhu nianeft nhai tfi wom kfo kurrmoya, be nia twanhomoya. Ndnatn kanga attiwonanko, ‘Tamohmn kfafmokma?’ ”

³⁰ Pitar inji ttiwonmotrm Korniliusr kfo nuhas memorr, “Bi husfirpa marm rhuronomm, husfihusyuk marrpno johrafont 3 kilok marr toh hanyetn na Bro Nkifrar pno kfo ptha bruttna hasetann nanhu nyingatikko wom mounmotr mtohmor. Rorhu nukeft memom nndo marrn tewur. ³¹ Mtoh-hato kfo ptha hany memor, ‘Korniliuse, ni nd kfo bruttnewohat Bro Nkifrar bi wany hasiwarn yo met bebpa yindari bebpa wuska yahukwohat ndm Bro Nkifrar htitworm. ³² Ndnatn wom yimam wakfo tkrurafkahtn Jopako aikahmn Saimon Pitar amyakm. Nd yimar wom yufa wasariyem Saimonrhu kunys tohwar. Nd yufa wasariyem Saimonr bulmakau tha hingerneft tohwar bro maromb thmbko tohwar.’ ³³ Bro Nkifrar inji kfo motra to be yimam kfo tkrurafmota mikfakmomn. To be hifa ni bi aso nie. To be nom bi aso buganom nia rifiny bugenom. Hrek Bro Nkifrar kukatohwormon ni yakmo mrokfom kfo ptha nuhaswohat.” Korniliusr inji kfo pthamor.

Pitar Korniliusrhu kunysn pthamo yuhat

³⁴ Pitar inji wanyhato kfo memor, “Dajohmn! Na to bi hti yimbutwa Bro Nkifrar nhai yimam yakitohwa yufam o rom yakitohyuk tamoh tamohm htihatoh yakitohkahrm. Nhai. ³⁵ Fitoh fitoh kmim ror yakrmihatoh dborioh dborioh nefrpan niwam, tom nd yimamn Bro Nkifrar hti dukahato kakmiyekworm. ³⁶ Niko tawisafwokomt Bro Nkifrarhu gbhu yuhathu mrokfot nom Isrernompno niamot. Yima bugaroh Bro Nungothet Jisas Kraistr nd gbhu yuhathu mrokfotn mkfo nuhasmornom. ³⁷⁻³⁸ Niko tawisafwoko Nasaret thof Jisasrhu wiyauyau nmbuhat. Jonr Jisasr baftaisim-nimotrr tfit Bro Nkifrarhu bbukayet Yafothar yaknihato fau habrimor distrik Galilit. Distrik Galilit yau habri bugamortn tfit kantri Judiathu kmi kmim inji

buga. Yi htfasetrn Satanr yakitohmoa yima bugam fak marnya htfasmorm. ³⁹ Ror kantri Isrerti Jerusalemt namo nefm yo ror yura bgre mis mnohmo yuhat hti hikhato mrokfot kfo pthayuk yimayenom. ⁴⁰ Tfit husfirpehyuk yiharn Bro Nkifrar kasinyamohat mfenyiwomotr htimonomr. ⁴¹ Ror sinyamohat nhai yuht Juda thof bugam htirmomr. Nom Bro Nkifrar kfo htayuk yimarpanom htimonomr. Nomrpanom ror sinyamohat nuwa fenyhomonomr. ⁴² Rorn kfo htany memornom, 'Bbinysof thofm wakfohi hany wamitwakomm, "Nd yimarpar Bro Nkifrar yak htamotrr noheh yimam yo ar yuhre tohwa yimaroh kotkfot yakitohrahm." ' ⁴³ Profetm mrokfom kfo pthamoahat kfo memom, 'Rorhu dukefrpno ruruhatko be rorhu yufat yutahato nikmoh fasoh nefm yak thuhirahrko.' "

Yima tangim Bro Nkifrarhu Yafothar yakmo yuhat

⁴⁴ Pitar yuhre ptha hanyomor, Brorhu Yafothar yawihnamorn thu nawohak-nimorm. ⁴⁵⁻⁴⁶ Thu nawohaknimotrm wonk wonk yarmumam pthaknihato Bro Nkifrarhu yufat yura yura kfo nafhurmomt. Juda thofm Pitar hikhna-mom nd neft htimohat yima yuhum kkopentamomm. Kfo memom, "Dajohmn, yima tangim Bro Nkifrarhu Yafothar bi kekwoimr." ⁴⁷ Pitar ptha sinyahato kfo memor, "Rom bi nom yak hakumoa Yafothar bi kak twanhi-wumr. To nhai tfit wom frohr kfo raforuhatrm baftais yakneft." ⁴⁸ Pitar kfo memorm, "Niko Jisas Kraishru yufatpno baftaiskfot." Inji ptha buga-nimotr tfit kfo memomr, "Afo asha nom-pno wom yiham watohnhotwannom."

11

Pitar Jerusalemt yihato kfo nuhas bonuhasmorm ror Antiokt yimo yuhat

¹ Judaroh aposermi Jisasr hiket yimam wanyakmom kfo memom, "Yima tangim bi arihat gutnius mrokfot wanyhato hikwomt." ² Bi nd mrokfot wany htatetmn tfit Pitar Jerusalemt yimohat nkifra tha puk thuneft yakitohet yimam Jisasr hikwam Pitar htihato namburmomr. ³ Kfo memomr, "Nine tamoh dukeftpno nome yima tangiroh kunym yihato nuwa yenyhomomr?"

⁴ Pitar inji wanyhato ror namo nefm kfo nuhas bonuhasmorm. ⁵ Kfo memorm, "Na Jopat tohmoya. Ndha tohhato wom yiha kfo bruttna hasohato wom shrt hwe tweh hanita kanjo yura moun yuhat htiyak hanyomoyant. Memom ka bro rmontharn yimam manoh manoh psifn yakitohhato kafuhefiwumr. ⁶ Inji htiyak hanyhato memoya, 'Afo hti hik marnyaruha.' Yukatohak hany asha wonk wonk tirt graf foh nungat yo nd wonk wonk bukor yemrot inji hti hanyomoya. ⁷ Inji hti hanyetann barkof tngt wanymoya. 'Pita, nd yemrom watufnahkahn waya.' ⁸ Na inji wanyhato kfo memoya, 'Broye, ka nhai mif inji narhota! Bingot nom tohnamohat nhai ye hnarmoyanm. Mur yemroyem.' ⁹ Inji kfomoya tfit wom tngt kfo memor, 'Tamohtet yemrom arihat Bro Nkifrar famurn wayanm mirahn akfo amiya hnaruyem.' ¹⁰ Tfit wompam be nd rpahtet tngt kfomora. Wurohnam kfo-nihato tfit nd rmonthat rim fnahnimot.

¹¹ Inji htini hanyhato asha nanhu htiyakuyk husfirpa yimam mfnahmom na tohmo kunysn. Sisariako toh tany niamom nanhu htiyakt. ¹² Bro Nkifrarhu Yafothatn kfo memota, 'Mirahn aduka kinyaki hanya hik hanyneft. Wahik hanyswannm.' Inji kfomotta ndar Jisasr hiket 6-pela yimampno

rpat yimonomn Korniliusru kunys mfnahmonom. ¹³ Mfnahmotnom kfo memornom, ‘Bro Nkifrarhu mounmotr kfo memora, “Wom yimam wakfo tkrurafkahtn Jopako aikahmn Saimonr amihtiyaktwam. Rorhu wom yufat Pitar. ¹⁴ Nd yima Pitar nieruharn niko riphari ninhu hingrna yimam, wom mrokfom kfo hirahrko. Ror kfoyuk mrokfom wanyhato hikruhakomn Bro Nkifrar yakmiyakrahrko. Nhai finji naruhatrko niko fasoh nefm niwohat.”’ ¹⁵ Nd yimarhu mrokfom inji kfo ptha buganimotrm ee memoya, ‘Nanhu mrokfom kfo ptharuhanm,’ yuhre riphak hanymoya Bro Nkifrarhu Yafothat mithu nawohmotm. Nom Bro Nkifrarhu Yafothat barkof mithu nawahmo kanjo rom inji mithu nawohmotm. ¹⁶ Na inji htihato tfit dukamoya Bro Jisasr kfomo mrokfot. Kfo memor, ‘Jonr tek bupa furaye baftaisimmorm met yindarim. Tfit nikomn Bro Nkifrarhu Yafothaye baftaisimrahrko.’ ¹⁷ Bingot nom Bro Jisasr Krairhu mrokfom wany yakiohato Bro Nkifrarhu Yafothat yakmot, kangr, nd rpahtet Yafothat ahiyanm, na nhai tfit buha mtohhato Bro Nkifrar kfo rafokfot.”

¹⁸ Pitar bi inji kfiwure, be nd nambur hasomo yimam nhai tfit wom nam-burmmom. Tfit Bro Nkifrar kfo yindhor-hato kfo memom, “Be, arihat bi htitwonom Bro Nkifrar wom wom knim bi kukatohworm. Yima yuhu yak kekuthato toh nkifrayuk yihotat bi kak nukak kahukrm. Arihat bi yihotetem.”

Antiok thofm Bro Nkifrarhu mrokfot yakmo yuhat

¹⁹ Stifenr wasmo yiharn Jisasr hiket yimam fakrme tubatunimom. Wom Fonesia distrikko fakrmenimom. Womm ailan Saiprusko. Womm Antiokko. Nd nd knimn yakrmenihato Jisasrhu mrokfot ndko kfo ptha htfasmomt. To nhaf nhai be yima fura bofurampno ptharmoamt. Nhai. Tu Judarpampno pthamoumt nd Jisasrhu mrokfot. ²⁰ Rom tom rroh womm Saiprusi Sairinikor thofm. Romn nd Bro Jisasrhu mrokfot Antiokt hanyhato Antiokt tohyuk Grikm romn kfo ptha nuhasommom. ²¹ Bro Nkifrarhu bbukeft-pno pthamotm bok met yindarim wanyhato rroh fasoh fasoh yima yuhum yafho thuhato Jisasr rihikakmom.

²² Jerusalemr tohyuk Jisasrhu yon kunys inji wanyakhato Barnabasr kfo tkrurafmotm Antiokko yimor. ²³ Yihato mhti yindhormorm rroh rhu nmbuhat Bro Nkifrar kfo marnyamotrt. Mhtihato Jisasrhu yiha yiha yakitoh kihhato yafuahafo duha nmbuham, ndm rorn kfo habokknamorm. ²⁴ Barnabasr nd kmi Antiokt tohmohat tu hifa dborioh yimar tohmor. Bro Nkifrar kakitoh kihmourr. Yo Bro Nkifrarhu Yafothat rhumoattr mrokfom kfo pthamoahat yimam wany yindhorni wany yindhorni Jisasr hikmoum. Nd Jisasr hiket yimam tfit nfri nfri yimampno thu hmbrimohat be tu bro rihuhetr rhumor.

²⁵ Barnabasr bok yimam htihato tfit Sorrhu hambrot yimor Tasisko. ²⁶ Yihato mhtiyakmorr. Mhtiyakhato rpat Antiokko tfit yihato Antiokt tohyuk Jisasr hikwa yimampno rpa gunyjimr tohnhohato Jisasrhu hik yuham, ndm kfo nuhas bonuhasmoufm. Tot nd yiharn nd Jisasr hikmo yimam rifutakmomn Kristenm.

²⁷ Nd yiharn Jerusalemr tohyuk wom profetm Antiokko yimom. ²⁸ Rroh womr, Agabusr, Bro Nkifrarhu Yafothat mthu nawohmottr kfo memor, “Nda Rom thofm tohukatohwa bbinysof bugat bro yatinoh wormr tohrahrr.” Nd ror kfomo mrokfot fiwet mrokfot kfomor. Kto Sisa Klaudiasr king tohmo yiharn nd yatinoh wormr tohmor. ²⁹ Nd yatinoh wormrhu mrokfot

wanyhato Antiokt tohmo Kristenm Judat tohyuk Kristenm dukamom wom maruharoh yak nhafohhato htaf hanyeft. Yima yima turoh marut hti nhombrahato hta nhafohhemomm. Womm bok maruhetm bro maruham hta hanyhemomm. Womm nd dfik maruhetm dfikm hta hanyhemomm.³⁰ Hta nhombra buganihato Barnabas Sorrof hemotm rofn hanyhato Jerusalem tohyuk sioshu bro yimaroh tirmn mhtamofm.

12

Jemsrhu was mrokfoti Pitar rungat htamo yuhat

¹ Nd yiharn sioshu wom yimam king Herotr kfomotr riwas beb bobekmomm. Nhai hifa nyingar htarmomm, be yimamn hirmom. ² Jonrhu najem Jemsr riyakhato bainate rithumotmr nohmor. ³ Herotr inji namohat Judaroh yima yuhum yindhormomm. Herotr inji mhtinihato tfit kfomotr Pitar fakmorr. Yispa hta duha bretparoh ye yiharn fakmorr. ⁴ Yakhato afo rungatn kafkne htatamorr. Sikistin polism yakhato fak nhtamorm husfihus husfihus. Wom husfihus polism husfirpa auakfot yi tohukatohmoum. Tfit wom husfirpa auakfot wom husfihus polism. Be inji husfihus husfihus yi hanyhato tohukatoh-moum. Herotrhu dukeft duka memor, “Isrerroh bro yemro burwa yihar kutewumr Pasofa, nd yihar bi forhnimre, ee yakrhoyanr Judam rifinyruhamn roh nyingahato kfo ptharuhanm ror nahnayuk nefm.” ⁵ Nd dukeftpno be rungat kafknehato polism tohukatoh-moum. Pitar rungat tohmo yiham sioshu yimam, rom be rorhu dukeftpno rhuhato masat kfo bruttna hasomoum.

Bro Nkifrarhu mounmotr yihato Pitar yaknimo yuhat

⁶ Herotr bi kfo yibon hanyomor Pitarhu kot tohneft. Nd wuroh yifungr Pitar hwemor hus sene tmbrekhatu hus polisf mano mano hwe tkaf rafomofr. Womf kalabus kunyshu yifhatikt toh hajohmof. ⁷ Yudbat Bro Nkifrarhu mounmotr yawihnehato Pitar hwemo rungat nukamot. Nd mounmotr Pitarpno rim tohhato bringako yakhato teh thomorr. “Bmbri wasinya.” Nd Pitar hatohmo senf tuf yoh nyusaknihato misuhmof. ⁸ Mounmotr kfo memorr, “Foh that wanyuh dbkafkahnn hona wuram wahmbre.” Pitar foh that nyuh dbkaf-hato hona wuram hmbremor. Tfit kfo memorr, “Yuke hmbreshar wahmbre-kahnn wamhikaknetwona.” ⁹ Pitar rungat htanyhato mounmotr mhikak-nimor. Pitar inji namohat memour, “Ka be hwe twehato inji na hanita.” ¹⁰ Rum gathu yifhatikt toh hajohmoa polisf yau hehurnimoffn tfit wuroh kalabus gna habrimo gnathu ain yifhatikt mfnahmof. Be tut yoh tfanyini furamott fnahnihato taunko yimof. Yihato tfit wom yihotat riwihatato be nd mounmotr frtkunimor.

¹¹ Pitarhu yima rifhur tfit niamotrr kfo memor, “Asomif bi nd tu hifa yima rifhur niewotra bi dukiwa. Na bi Herotrhu tirmn rhuhato nanhu noh yuhat bi Judam bi kfo hta bohtatayettm hifa Brorhu mounmotr fak hakrminera.” ¹² Pitar yimorn memor, “Jon Makrhu mmem Mariathu kunys yiruha.” Nd Mariathu kunys bok yimam rhu rifinyhato Pitarn kfo bruttna hasomoum. ¹³ Pitar yihato kuny yifhatikt mfrnyungumor. Mfrnyungumotr wom hingrna mett, rothu yufat Rodat, rot yimotn memot, “Yifhatikt yak tfany-ruhant.” ¹⁴ To nhai, Pitarhu tngt mwany yindhoh tanyhato bmbri rim kfo memotm, “Barenko, na Pitarhu tngt wanuya. Bi tor, bi nier.” ¹⁵ Inji rim

kfomott kfo memomt, “Bare, ni ka mumiwun?” Memotm, “Nhai mif, Pita mifruh tngt wanuya.” Kfo memomt, “Ka rorhu mounmotr wanu.”

¹⁶ Rom inji rinnakfo hamuh nnakfo hamuhmoahat Pitar ror yifhatikt tohhato frnyungumour. Rim tohni memom, “Ayak tfanynomt,” asha be rim hti fohtasmomr Pitar kuny yifhatikt toh hasetrn. ¹⁷ Nahti nahtihato tire frgadimorm. Frgadihato kfo ptha nuhasmorm ror rumgat tohhato Bror yak hakrminamohat. Kfo memorm, “Nd na nikompno kfo nuhas tanywa mrokfom wakfo nuhaswakomm Jemsri womm Jisasr hikwam.” Inji kfo tanymorn wom tkitt yimor.

¹⁸ Pitar bi yiyetrn dbharn polism, ror hatoh hajoh nfhamom, sfnoh tkitt hti hasomom. Be tuha mrokfo duhatm tohmom. Tum nattiwon nattiwonmoum, “Pitare fitoh yuhah yifir?” ¹⁹ Pitarhu hti hambro nmbuhah Herotr wanyhato wom yimam kfo tkrurmotr yi hambromomr. Hambro hanyisi nhai yakrmomr. Ndnatn nd Pitar toh hajoh nfhamo polism Herotr kot fakmorm. Kot yakhato Herotr kfo ttiwonmorm Pitarhu hti hambro nmbuhah, nd polism nhai ptha marnyarmom. Ndnatn Herotr wom polism kfomotr romn ndwom polism hanyhato tufnahmomm. Kto Herotr Judakort htanyhato tfit taun Sisariako yi mitohmor.

Herotrhu noh mrokfot

²⁰ Herotr nhai yak marnyarmoarm Tair thofmi Saidon thofm. Nd hus kmif yeshrim yakmoahat nd king Herotr yakitohmoa kantritrn yihato yeshri wiknamoum. Herotrhu hwe rumr tohukatohmoa yima Blastusrpno yihato mkfo yongm boyongmaknimotmr kfo fakiomorm Herotrpnno yihato pthaneft. Herotrpnno yihato kfo memomr, “Nom wayuhuwafnnom. Nom be mfro anamburwahnnom.”

²¹ Inji mkfomotm Herotr yiha hemorm. Memorm, “Nd yiha wanie-twako.” Nd kfomo yiharn Herotr kingroh wondht wondhnhato kingm rhuyuk gajir mrhuhato mrokfom hemorm. ²² Nd yimam Herotrhu tngt wanyhato kfo naku memoum, “Nd pthiwar mirahko ka yima mifruh tngt. Nhai. Wom nkifra tahiru tngt.” ²³ Herotr inji wanymohat nhai Bro Nkifrarhu yufat kfo yuta yindhormort. Ndnatn Bro Nkifrarhu mounmotr yak tutfamotr nhmn ye nohmotmr nohmor.

²⁴ Bro Nkifrarhu mrokfot nhai mnohrmot. Kmi kmi yimot bok met yindars wanyhato fakmomt.

²⁵ Barnabas Sorrof Jerusalemthu hingrnefm hingrna buga tanyhato Jon Makr yaknihato rpat Antiokko yimom.

Porr bok kantrim yi htfashato Jisasrhu mrokfom kfo pthahe htfasmo yuhah

13

(Sapta 13.1–21.14)

Antiok tohyuk Kristenm Barnabas Sorrofn fak htamom Bro Nkifrarhu hingrnefthu hingrna htfasneft

¹ Antiok tohmo sios, roh womm profet hingrneft kakitohmoum. Wommn Bro Nkifrarhu mrokfot kmi thofm kfo hta bohta nuhasmoumm. Nd hus bro hingrneff yakitohmoa yimaroh yufam Barnabas, Simeonr

wom yufat futamoumr Niger* yo Sairini korhof yima Lusiusr yo Manainr, gafana Herotrpno myewarho fnahmo yimar ee womr Sorr. ² Wom yiha nuwa kurhato be Bro Nkifrarprno kfo bruttna yifahtamom. Inji namotm Bro Nkifrarhu Yafothat fak nuhas memotm, “Barnabas Sorrof nanhu hingrneftn wayak htatwako. Nd hingrneft hingrnayukfn fakmoyanf.” ³ Inji wanyhato nd yimam nuwa kurhato kfo bruttnamomn tir htany-momf. Inji nafmotmf yimof.

Barnabas Sorrof Saiprus yihato Bro Nkifrarhu mrokfot pthamo yuhat

⁴ Bro Nkifrarhu Yafothat kfo tkrureftn to be yimohat Selusiat yimof. Ndarn tfit sift yaknihato yimof ailan Saiprus. ⁵ Nd ailarhu taun Salamis yau habrihato Judam rhu rifiny inji namoa rmonmn yimoafn Jisasrhu mrokfom kfo ptha nuhasmoufn. Jon Makr rpat yimom. Rorn hingrnanho hany inji namourf.

⁶ Nd ailan Saiprushu kmim fau htfas bugamofm. Yau htfas bugahato Pafos mfnahmf. Nd kmi Pafosn wom Judar mhtimofr. Rorhu yufat Bar-Jisas. Nd yimar metroh thu bbrakyuk shrmi yo kiret nyingayetroh hingrneft kakitohmour. Yimam kfo nneh memourm, “Na profeta.” ⁷ Nd yimar nd ailan Saiprushu primiarprno tohmour. Primiarhu yufat Sergius Paulus. Nd Sergiusrhu dukefm tu dboriohm, Jisasrhu mrokfom wany yibonetn Barnabas Sorrof nakuyak-morf. ⁸ Barnabas Sorrof yihato memouf, “Jisasrhu mrokfom akfo ptha nuhasnonr.” Nd yima Bar-Jisasr Grik yarmumat ndhtet yimam kuta-moumr Elimas. Ror buha tohhato rof mrokfom kfo wok bowokhato kfo ptha wuna bowunamourf. Nd Elimasr nhai wofnrmor Sergiusr Jisasrhu mrokfothu wanyneft. Ndnetrn kfo ptha wuna bowuna hanymourf. ⁹ Be Sorr, wom yufat Porr, Bro Nkifrarhu Yafothat thu bmtaknimottr nd Elimasr yukatohhato kfo memorr, ¹⁰ “Ni tu be tndhrhu yone. Bro Nkifrarhu dborioh rhu nmbuham, dborioh nefm kangm yimam ahiknomm ninn tfit buha mtokhato faso faso kfo hta bohtewunm. Ninhu ndhtet nefst be tu nhai yafho thuwonkahnt. ¹¹ Hrek Bro Nkifrar kfiwatr ninhu nyingam mmrta kih bugewum. Nhai bmbri yukatoh wutharuhatnm tamoh tamohm.” Porr inji kfo hanymor yudbat Elimasrhu nyingam hti ksptaknimomrn bi be. Nyingam kspta kih bugamomr. Be tuha yak tato botatohato yakitohakniyuk yimam fak hambro habrimour. ¹² Nd ailan Saiprushu primiar inji htihato memor, “Dajohmn, ndar yimaf tu yafothet hingrneft hingrnawuf.” Inji htimorn Jisasrhu mrokfom riwany yakiowakmorm.

Barnabas Porrof Pisidia distrikkorhof kmi Antiokt yihato Bro Nkifrarhu mrokfom kfo hemo yuhat

¹³ Porri nd roprno yimo yimam Pafos htanyhato tfit sift yaknihato Pamfilia profinskorhof taun Pergat yimom. Jon Makr Pergat mkekutak-morn tfit Jerusalemko yimor. ¹⁴ Pergat htanymomtn tfit Pisidia distrikkorhof kmi Antiokt yimom. Sabat yiharn rom rpat yihato Judam rhu rifiny moa rmonn rpat rim rhumom. ¹⁵ Nd rmonthu bro yimam Bro Nkifrarhu boririfhu mrokfomi profetroh mrokfom kfo ptha bugani-momn wom yimar kfo tkrurafmom Por Barnabasrofnu yihom kfohato wom kfo bmta mrokfom mtokhato kfo pthaneft.

* **13:1:** Krta yimam kutewumm Niger. Wom yimam Simeonrhu tha krtat htihato memom Afrika toher, ndnetrn Niger yufat futamoumr.

¹⁶ Nd yimar yihato rof yihom kfomotr Porr sinyahato frgadimorm rmont rhu rifinymo tuhan yindars. Frgadinihato barkof mrokfot tumort, “Niko Isrerko yo niko yima tangiko rpat asha rhu rifinyhato Bro Nkifrar kfo bruttniwako wawanyaf hany marnyatwakomm na ptharuha mrokfom. ¹⁷ Isrerroh Bro Nkifrar nmoh bapem mrom krugomrom fakmorm. Memor, ‘Bi nanuhem.’ Ndnetmn turoh kmit htanyhato Ijifko yitohmohat tur kfomotr nhai kukenhato sinyarmom. Kto tur kfomotr Ijift htanyomomt. Nhaf turhu bbukeftpno hanyomom. ¹⁸ Rom 40 gunyjim bugam yima toh duha tkit yuhar yau fnahmohat turhu tirmn rhu hanyomom. ¹⁹ Yi hanyomomn Kenan bbinysoft bi 7-pela kantri kmimn bi tohett Bro Nkifrar yak bati toh buga-hato nkiframn tfit fak htamor. Kfo memorm, ‘Asot bi nikmoh tohyuk bbinysoft. Asha watohtwako.’ Nd nefm 450 gunyjim rhuhamom. ²⁰ Isrerm nd Kenan bbinysoft yak bi tohwomt ee rhu nmbuharoh yak hta bohta marnyayuk yimam, kutewumm jasm, fak htahemorm. Nd jaspno tohhany toh hanyomomn profet Samuerrpnone be.

²¹ Yo tfit memom, ‘Kingmn tawo yakrahnom.’ Inji kfomotm Kisrhu yinem Sorrn, Benjamin yon kunys, rorn nd king hingerneft Bro Nkifrar fak htamor. Ror nd king hingerneft yakhato 40 gunyjim tohhato hingeramor. ²² Bro Nkifrar Sorr yak tuhafhato nfri kingr yak htahemohat Defitr fak htamor. Yak htanihato Bro Nkifrar Isrerm kfo ptha nuhas memorm, ‘Jesirhu yinem Defit kanjohot yimam nanhu yima yuhur wofnwor. Ndhtet yimarn nanhu yima yuhur hik marnyarahrr.’ ²³ Nom Isrernom nmoh nrfa htanyakuk yima Jisasr Bro Nkifrar kfomotr to nd Defitrhu frikef yuhatn niamor.

²⁴ Jisasr tafi rihingrnak duhatrn afo Jon Baftaisrparn Bro Nkifrarhu hingerneft yakitohhato Isrerm kfomourm rroh fasoh fasoh nefroh mong trohhato baftais yakneft. ²⁵ Hingrna hanyomorn tu wuroh hingrna tmbho twanhoruha Isrerm ttiwonmorm, ‘Nane finji duke-wokma? Ka nikmoh dukefm duka kangko, “Ka asor bi nmoh nrfa htanyakuk yimar?” Kfiwanko na nhai. Nd yimar niko gari hasiwar htirahkomr nanhu mongkorn. Na hingrna tmbho-niruha ror nierahr. Na nhai ror kanjo tu dboriohann, btn na wasihato rorhu hona wuraroh dbkaf mtitofm teh nyusakafhekfot.’

²⁶ Niko nanhu nanyma kmi Isrerko, Abraham frikeft trhayuk yon kunys yo niko yima tangiko, Bro Nkifrar hikwako, Bro Nkifrar kfo memohat, ‘Minrfa htanyakruhanm,’ nd mrokfot to nmoh minrfa htanyakneft kfomor. ²⁷⁻²⁸ Jerusalemt tohmo yimam yo rroh tohak yimam profetroh mrokfom yiha yiha Sabat yihato rhuhat wanyomomm. To nhai marimom, ‘Jisasr nmoh nrfa htanyakuk yimar nier.’ Kotkfot tohmohat htimomr nhai wom neft narmor, btn nd nefm htihat waskfot. Nhai. Yimamn Pailatr kfo tkrur kfo tkrurmotr be Pailatr rroh tng yuhatn hikhato be bgre misn tuhegir furahato nohrom. Ndnetmn nd profet-roh mrokfom gonborngtn rhuhamom fipetm rhumom. ²⁹ Profetm kfomo mrokfom rhu hik bugamom. Nhai wom neft profetm kfoyukt rim tohtarmot. Kto yuht bgre miyetr yak kasuhak-momn thatipt yaknihato tahi muhtn rihtamomt. ³⁰ Rihtamomr to nhai rhurmor. Bro Nkifrar tfit kasinyamorr. Tfit ufaufamorr. ³¹ Ror sinyanimohat rorpno Galiliko toh tany Jerusalemk rpat yiyukmpno, rompno mnriyafmoatr htiyafomour. Romn htiyaf hatohhato Judam kfo nuhasni hanitmm rorhu nohhato sinyani nmbuhat.

³² No Barnabasrpnno gutniuskfot kfo nuhaswononko, Bro Nkifrar nmoh nkifrapno kfo memohat, ‘Niko minrfa htanyakruha yimar nierahr.’

³³ Arihat nd ror nkifrapmpno kfomo mrokfot nom yonnom htimonomt nd mrokfot rhu hik mifmot ror kfomo yuhatn. Nd yimar ror kfomor to Jisaser kfomor. Nd yimar to bi nia twanhomorn nohhato tfit sinyamor. Bi tu Bro Nkifrarhu Yoner. Nd mrokfot to be Defitru windohm yorhwa windoh gonbornngthu sapta 2-kfot Bro Nkifrar kfomor,
'Ni nanhu yone. Hrek na bi ninhu yifema.'

Sng 2.7

³⁴⁻³⁵ Bingot Bro Nkifrar Isrerm kfo memorm,

'Bi king Defitrpno kfo memoyanr,
'Ninhu yonm nanhu tirtn rhu hakurahm.'

Na kfo mifwanko niko to inji buga nanhu tirtn rhu hakurahko.' *Ais 55.3*

Yo arihat nom turhu tirtn rhuwonom. Ndnettn nmoh nrfa htiyakyuk yima Jisaser bi fak kasinyamorr. Yo wom mrokfot Defitr sinyahato Bro Nkifrar kfo memorr,

'Ni bi tunn kfo htayet yimar nhai kfo miruhatn yoptn amibdgnir.' *Sng 16.10*

Nd Bro Nkifrar kfo htayet yimar, to nd Jisaser. Tu Bro Nkifrar fak kasinyamorr. Yak kasinyamotrr rorhu tha tipt nhai yoptn kfe bdgrmot.

³⁶ Defitr ror bbinysoft tohmohat Bro Nkifrarhu dukefrn hikmor. Ror nohmohat turhu nkifra bbinysoft yop-motmr rorhu tha tipt mikfe bdgnimot.

³⁷ Nd yima Jisaser Bro Nkifrar kasinya-morn nhai rorhu thatipt mikfe bdgnimot. ³⁸ Ndnettn niko nanhu yimatko wawany marnyakomm no Barnabasrpno pthiwa mrokfom. Wahtiko, nd yima Jisaser nikmoh fasoh nefroh yak thuyukr niamor. ³⁹ Nhai Mosesrhu boririfhu mrokfom yimam hikhato rroh yima yuhum Bro Nkifrar hti wuthakahm. Nhai. Yimam Jisaserhu dukefrpno korhm, tom nd yimaroh yima yuhum Bro Nkifrar hti wuthewurm. ⁴⁰ Yimbhindangm atohetohaf hanyswamko. Bingot profetm kfomo neft yakrahtko, yo! Profetm kfo memom,

⁴¹ 'Niko yimako na pthiwa mrokfom wanyhato
burmham hamuh snouwako
be siny fohtashato miprho-nirahko.

Htirahko asha nikmoha wom neft naruhant wom yimam niahato

na nayuk neft kfo nuhasmko nhai wany yakioruhatkomm.'

Mirahko nd bingot tohmo yimam hanyjbornamo kanjo
inji hanyjbornanom.'

Hab 1.5

⁴² Porr nd mrokfom kfo pthanimormn memof, "Barnabasrpno fnahni-hato yirahno," kfo memomf, "Tfit nd wom Sabat yiha waniekahfnn nd hrek pthi mrokfot wompam wakfo nuhas hik bohik nuhaswafnnom."

⁴³ Kfo ptha dukafmotmf fnahni hanymof asha yonmari Juda rifhur yo nd yima fura bofurat Judaroh nefm hiketm fau hik hanymomf. Kfo memomf, "Nikmoh rhu toh mbuham Bro Nkifrar yak htayuk dukefrpar hikkfot."

⁴⁴ Tfit ndwom Sabat yihar yimof. Nd Sabat yihar nd taunthu met yindars yi rhu rifinyhato Brorhu mrokfom wany yakitohmom. ⁴⁵ Judam nd rifinyimo yonmari rifhur htihato kfo memom, "Tamohmpno Bro Nkifrarhu mrokfom kfo ptha nuhaswafm?" Nd nambur rifhurpno ruhetmn Porr ptha hanymoa mrokfom rom kfo ptha nneh hany ptha wuna hany inji namom. ⁴⁶ Por Barnabasrof inji htihato kfo nnhu memomf, "No nia pthaneft niko Judakompno bi nia pthanihato kto yima tangimpno yihato Bro Nkifrarhu mrokfot ptharfonont. Tmift, tukomn kfo kurmoko mrokfom yakhato toh marnya nkifranest. Ndnettn nhai nikompno yihato mrokfom kfo ptharuhatno. Tawo wom kmimpno yihato ptha nuhasrahno. ⁴⁷ Nhai

be tunmoh fijo nd wom yimampno yihato Bro Nkifrarhu mrokfot ptha nuhasruhatnomm. Nhαι. Bror Nkifrar kfo memornom,
 ‘Kmi kmim, ndar bbinysofthum, yima tangim ninn yihato
 Bro Nkifrar yimam nrfa htiyekwa yihotat kfo nuhasruhatnm
 rom hti dukarahmt.

Ninn kshr kanjo yak nuka nuhasakrahnm

Bro Nkifrar yimam yekwa yihotar.’ ”

Ais 49.6

⁴⁸ Nd yima tangim nd Porr pthamo mrokfom wanyhato rroh yima yuhum yindhormomm. Yima yuhum yindhor-hato Bro Nkifrar kfo yindhormomr. Bok yimam Bro Nkifrar thu yuhur hanymorm hifa rhu nmbuham yakhato be nd dborioh rhu nmbuhamn toh nkifraneft. Nd yimamn Porr pthamo mrokfom fakitohmomm. ⁴⁹ Rom yakitohhato tfit romn nd Brorhu mrokfot myaknihato nd distrik bugat kfo nuhas fnah bugamomm. ⁵⁰ Judam inji htihato Antiokthu bro yimam yo tu Bro Nkifrar hikwa yufet metm rpat wanakfo kasinyakhato yimomn Barnabasrof faso faso yak bebobebak-hato fak tuhafmofm. ⁵¹ Wuroh yi swanhorahno wom neft fak nuhas tanymofm. Rof hmbreyuk hona wuraroh bbfut frdbofta nuhasmofm. “Be nhai tfit ndar kmit nieruhatno, bi be.” Nd dukeftpno frdbofta nuhasmofm. Be rof nd kmi Antiokt htanyhato Aikoniamko yimof. ⁵² Nd rof htanyimo kmi Antiokthu yimam, Jisasrhu mrokfom yakitohetm, rom Bro Nkifrarhu Yafothar thu nawohmotrm rom be yindhorrifhurpno toh hasomom.

14

Barnabas Porrof Bro Nkifrarhu mrokfeft Aikoniamt pthamo yuhaf

¹ Por Barnabasrof Antiokt htanymohat Aikoniamko tfit yimof. Aikoniamt yihato nhaf Antiokt namo neft fak hikmof. Nhaf Aikoniamt tohyuk Judaroh rhu rifinyuk rmont yihato Bro Nkifrarhu mrokfom kfo pthamofm. Kfo ptha hik bohik marnyamotfm boknabok Judami Grikm wany yindhorrhato fak hikmomm. ² Wom Judam nhai wany yindhorr-momm Porrof pthayuk mrokfom. Tfit romn yihato yima tangim tfit fasoh fasoh yima yuhum hemotmm sinyamom Jisahr hiket yimaroh yihato yak bebnest. ³ Por Barnabasrof bok yiham Aikoniamt tohmof. Nhai Aikoniam thofm yakr-mihato marimof, “Be inji pthani hanyhato yirahno.” Nhαι. Rof yiham tohhato Bro Nkifrar ndar bbinysof thofm yuhuwafmo yuhathu mrokfom kfo ptha nuhasmofm. Bror bro bbukeft hemotrf wonk wonk mirakerm namoufm. Nd nefm tuhan yindars htihato kfo memom, “Dajohmn, Brorhu yuhuwafmo yuhathu mrokfom rof pthiwam, tu mrokfom pthiwum.” ⁴ Nd taunthu yimam nafak mkumom. Womm Por Barnabasrof namo nefm htihato rofpno tohmom. Womm Judaroh yima yuhum hikhato rrohko tohmom. ⁵ Kto Judami yima tangim rpat nathu hmbrihato rpat rroh tohak yimam rpat waji yehato memom, “Por Barnabasrof hfnahrahnmof.” Memom, “Tahiye tahiye yebhoh gurahnomf.”

Barnabas Porrof Bro Nkifrarhu mrokfeft Likoniat pthamo yuhaf

⁶ Rofhu hfnah mrokfot wanyhato Likonia distrikkio yorhwa taunf Listrati Derbet, ndko fakrmenimof. Yakrmenihato nd hus kmifpno brbo rhyuyk kmimn toh htfasmof. ⁷ Ndha yimofn gutniuskfot kfo nuhasmofm.

⁸ Nd taun Listratn wom yimar tohmour. Nd yimar nhai wiyauyaurmoar. Wuram bi nohmomr mmemthu yatit ruhato. ⁹ Porr Bro Nkifrarhu

mrokfom kfo pthamohat nd yimar wany yakitohmour. Wany yakitoh hasohato duka memor, “Ndar na nhai wiyauyau duha yitahat, Bro Nkifrar kforahr, na marnyanihato wiyauyauruha.” Nd yimar inji dukamohat Porr bi fakmorr rorhu yima yuhur. ¹⁰ To be Porr rim tohni kfo memohat, “Wasinya watohn,” be nd yimar wasinya twanhomorn tohhato hwatok yura msuh tanyhato fauyakni twanhomor.

¹¹ Kmi thofm rof hingrnamo hingrna bbukeft htihaturoh Likoniakfotn wakfo nakuyak memom, “Barenko, nkifram yima nyingatikm yak dborhanehato niem!” ¹² Barnabasr futamomr Susr. Porrne futamomr Hermesr. Hermesr nkifraroh mrokfom wuhatone hatonemourm. Porrn mrokfom uhatone hatonemourm ndnetrn nd Hermesr yufat futamomr. ¹³ Susrhu rmont taunthu taun gnathu briyahako tohmout. Nd rmont tohmoa Susrhu prisri tuhan yindars bulmakaumi misfam yaknihato taunthu yifhatikko hanymomm. Ndha hanyhato mhtahato memom, “Porrof tarioh mtharahnomf.”

¹⁴ Por Barnabasrof inji wanyhato wondh wuskar dborfahato nd yirifinyo yima rifiny buharn tone nanyor fnahhato kfo naku hany memof,† ¹⁵ “Bar yimako, tamohm-pno ndhtet neft yamukako ananom? No niko kanjohot yimayeno. No be nikmoha nia tohhato kangno gutnius-kfot akfokahtnonko niko wanyhato nikmoh tamoh tamoh nefenm yakitohwam, yafho thuhato yafothet Nkifrar hikrahko. Nd Nkifrar nda mounti bbinsoft yo marombt yo nd tkitm rhuyuk shrkar hingrna htamorr. Nd dukeftpno no asha nia tohwono. ¹⁶ Bingot nikmoh bapemrompno yimam be inji hti marsisomaotr tamoh nefm be turoh fijo nafura bofuramoum. ¹⁷ To mirahko ka nd yihar Bro Nkifrar ka rim fnahnihato nhai tamoh tamoh nefm yak nuhasrmorm. Nhai. Ror turhu kmi hefenr ruhato kfomoatr bum wihmoum, hifa hifa yewurithu sinyu yihar sinyamout, yemrot thu brur hemourko yima yuhum thu yindhormoatrko yindhorrifhumpno tohmouko.” ¹⁸ Nd mrokfom hemofm. To nhai marimom, “Inji mwanayakhato nhai tarioh mtharahatnomf.” Nhai. Rroh yima yuhum memom, “Tarioh mtha mifnomf.”

¹⁹ Wom yiha Antiokti Aikoniamt tohyuk Judam taun Listrat niamom. Niahato kfo memomm, “Ndar yimaf niko be inji hagrhwukomf. Tatkfote nhitwokomf?” Nd yima yuhum hemotmm rom sinyahato Porr tahiye tahiye yebhoh boyebhoh guyakhato teh briraknimomr. Teh briraknihato kmi gnathu briyahako rim teh htany-momr. Rom memom, “Ka bi fnohr.” ²⁰ Tfit Jisarr hiket yimam yihato rifiny hmbremotmr yafothat tfit niamotr. Yafothat mthu nawohmottr sinyahato tfit taunko yimor. Taunko yihato hwe nfha dbha Barnabasr yaknihato Derbeko yimof.

Barnabas Porrof kfo yembindt mrokfom Jisarr hiket met yindars hemo yuhat

²¹ Por Barnabasrof Derbet yihato Bro Nkifrarhu mrokfom kfo pthamotfm bok met yindarim wanyhato hifa wany yindhorrhato Jisarrhu hiket yimam toh hanyomom. Ndha toh tanyhato tfit Listrako yimof. Listratn bi tfit

* **14:12:** Grikroh dukeft duka memom boknabok nkifra tahi yifonm korhm. Susrn tor tu nkifraroh bro tohak nkifrar. Yo Hermesrne nkifraroh mrokfo uhatone hatone yuker. Grikm inji dukamoum.

† **14:14:** Wondh wuskaroh dborfanefst ndt Judaroh nkifra neft. Yimar wom neft htihaturoh nhai yindhorkahrt, wondh wuskar dborfamoum. Womm ndt htihaturoh duka memom, nhai yindhorkahr.

kmim gutniuskfot kfo ptha nuhas-ruhatrm rom wanyhato yakrahmt.' ⁸ Bro Nkifrar yimaroh yima yuhum htitar, rroh yima yuhum htimormn turhu Yafothat hemorm nom tu kminom Yafothat hemo kanjo. Ror Yafothat hemohat to rroh yaknefthu yindhor yima yuhurn fak nuhasmornom. ⁹ Nhai yak nhtahato marimor, 'Tukanhu ttha kmimn ndar neft naruhanm, tfit ndur wom yima tangimn nd neft naruhanm.' Nhai inji dukarmor. Rorhu mrokfothu wany yakiohato hik nmbuhatn htimor. Nd wom yima tangim wany yakiohato fak hikmotmt ndt htihato rroh fasoh fasoh nefm fak thumorm. ¹⁰ Mosesrhu boririfhut nmoh nkifram nhai yak hik marnyarmomt. Nom ariharhofnom nom inji buga nhai hik marnyakahnomt. Ndnnett to tamohm-pno yamukako wom kmiroh Kristenm nmoh nkifra Mosesrhu boririfhu mrokfot ahikmt? Ndtet neft Bro Nkifrar htihato namburrhnom. ¹¹ Nom tunmoh bro dukeft duka kangnom, Nungohtet Jisasrhu yuhuwaf nmbuhatn nom yakrahnom rom yakmo kanjo."

¹² Pitar pthanimotr nd rhu rifinymo yimam tfit nhofijo rhuhato memom, "Afo Porrof pthayuk mrokfom wany-rahnom." Tfit Porrofn nd bro bbukeft Bro Nkifrar pno yakhato wom kmimpno mirakerm namom kfo nuhas bonuhas bugamofm. ¹³ Rof pthanimotf tfit Jemsr ninyahato memorm, "Bar yimako, afo tfit nann ptharhota wawanywako. ¹⁴ Bro Nkifrar yima tangim hti yuhuwafhato yakmiyakmo yuhat bi wanukomt Saimonr pthirt. ¹⁵ Bingot profetm pthamo mrokfo yuhatn bi inji rhu hik hanitt. Profetm to kfo memom,

¹⁶ 'Bror kfo kangr, "Defitrhu frikeft rmonr yoh nafurwa kanjo inji foh nafurmot.

Kto tfit nann yakaknihato kasinyaruhanr.

Nann habokkna marnyar-hoyanr toh bmtarahr.

¹⁷ To be yima tangim na Broya kfo ptha hambrorahm.

Nd yimam bi na tuka kfo htamom romn hambrohna hambrohna mhtirahma."

¹⁸ Ndar mrokfot na pthiwat Brorhu mrokfoyet.

Bingot kfo htata memor, "Nd nefm inji rhu hik hanyrahm." ' *Amos 9.11-12*

¹⁹ Ndnnett nanhu dukeft duka kanga, nd Bro Nkifrar bi hti yuhuwafhato yakmiyekwa yima tangim, nhai kfo miruhatnom boririfhu bugam ahiktwamm. Nhai. Be nd ye kars nd nd nefenrpam kforahnomm.

²⁰ Ndnnett be gontwarpat wandfakhato kfo mekfot, mirahm tfit turoh tahi rmonm o yifonmpno mhtayuk yeshrim ayak ayanomm. Bro Nkifrar fasoh hti bebworm. Mirahm ijoh yuhatn mett ayaknomt o metm be turoh wuramn ariyaknomm. Yo mirahm mti mkuye teh yifuhet fohm o tamohm ayanom. Mirahm kkuyet yemror aye fura bofurakninomr. ²¹ Nhai be nfri mrokfot pthakahnom. Bi Sabat yiha bugamn Judam rroh rhu rifiny rmonm ptha hnamomt nd boririfhut."

Aposermi eldam gontwat wandfakhato yima tangim hemo yuhat

²² Jemsr mrokfom pthanimotrm you aposerm, eldam yo nd sioshu yimam rhu rifinyhato hus yimaf fakmom Por Barnabasrofu hik hanyukf. Fak-mome Judasr, rorhu wom yufat Barsabasr. Rori ee Sailasr. Nd Jerusalem sios rofn tohakmouft. Rofpno Por Barnabasrof yimom taun Antiokko.

²³ Porrof hikmo yimafthu tirmn Antiokko yiyuk gontwat fakitohak-moft. Nd gontwat htamo mrokfom inji htamomm: "Nom aposernomi nom

eldanom, nom nikmoh yimatenom. Nomn ndar gontwat kahuknomko. Nom bok kfo yindhor mrokfom kahukwonomko niko, yima tangiko, Antiokt tohwa Kristenko, Siria profinsi Silisia profins toh bugewako. ²⁴ Bi wanyakmonom wom mrokfom, nmoh yimatn yimomn mrokfom hemotmko duka kinyakimoko. Nom nhai marimonomm, ‘Inji inji wakfo-twako,’ nhai. ²⁵ Nom nd mrokfot wanyakhato rhu rifinymonom. Rhu rifinyhato napha naphamonomn hus yimaf kfomonom Porrofpno yinyeft, Porrof nmoh yima yuhum korhf. ²⁶ Rof nhai yakrme hnarrof nmoh Bro Jisas Krairhu hingrnefthu hingrnaneft. Nd hingrneft be tu nohyuk hingrneft. To nhai rof yakrmehnarrof. ²⁷ Ndnetn Judas Sailasrof rofpno niahato rofn yima tnge tfit kfo nuhasrahfko, gontwat rhuyuk mrokfom. ²⁸ Bro Nkifrarhu Yafothati nom yimamifnom nmoh yima yuhum rpat korhm. Kang-nom nhai nom tfit wom nfri mrokfot kfohato wom krhopam hiruhatomko. Nhai. Nd nkifra boririfhurpat yakitohkfot. ²⁹ Mirahko tahi rmonm htayuk yemrom ayanomm. Mirahko kkuyet yeshrt bmbri aye fura bofurakinom. Mirahko mti mkuye teh yifuhet yemror ayanomr yo ijoh yuhatn mett ayaknom. Nd nefm yakitoh duha be toh marnya bomar-nyakfot. Nmoh mrokfom to be injirpa.”

³⁰ Be nd Jerusalem sios kfomo yimam Jerusalemt htanyhato Antiokko yimom. Yimomn ndharhof met yindarim yak nhafohmomn nd gontwat hemomm. ³¹ Nd gontwathu mrokfom htihato yima yuhum yindhormomm. Kfo memom, “Hifa kfo hta bohtemnom.” ³² Judas Sailasrof profet hingrneft yakitohetfn Antiok thofnpno afo tohmofn kfo bmta mrokfom hemofn. ³³ Dfik yiham Antiokt tohmof. Kto tfit tuf toh tanymoko yimof. Antiokthu Kristenm rof yimohat rhu kafho marnyamomf yimof. ³⁴ (Sailasr wom yima yuhur yakhato Antiokt toh hasomor). ³⁵ Por Barnabasrof tuha Antiokt toh hatoh-hato tuha Antiokthu yimampno Brorhu gutniuskfot kfo nuhas bonuhasmofm.

Por Barnabasrof naftrndohmo yuhat

³⁶ Tohhany toh hanyhato Porr kfo memorr Barnabasr, “Na kamuka no Brorhu gutniuskfot kfo ptha habri htfasmo kmiroh met yindarim yau hafot htfasrahnonm rroh toh nmbuham.” ³⁷ Barnabasr kfo memor, “Jon Makr ayaknikahnonn rpat ainyom.” ³⁸ Porr nhai kfo yakioromor. Memor, “Nd yimar no hingrnahnamo hingrneft nhai rpat hingrnahnehato rpat mhingrna tmbhornom, buha Pamfiliatn mhingrna kafhornomo.” ³⁹ Be inji nnakfohato naftrndohmom. Barnabasr Makr yaknihato rof nndo Saiprusko sife yimof. ⁴⁰ Porrne Sailasr fakmor. Ror yakhato rof inji yimof. Kristenm kfaf hany memomf, “Brorhu yuhuwafeft ayak hta bohta hanyswatfn.” ⁴¹ Be rof Siria, Silisia inji yihato Kristenm kfo bmta mrokfom kfo bmta hanyomfom.

16

Timotir Por Sailasrof hik hanyomo yuhat

¹ Porr tfit Derbet yimor. Derbet tohni tfit Listrat yimor. Listrat yi tohmohat wom Kristen yimar tohmor. Nd Kristen yimaru yufat Timotir. Timotirhu hiyau mmemt Juda kott. Yifemrne Grik thofr. Timotirhu mmemt Jisasr hikmout. ² Listrati Aikoniamt tohyuk Kristenm Timotirhu toh nmbuhat hifa hifa kfo yindhormomt Porrpno. ³ Porrru yima yuhur wofnmor

Timotirhu yaknihato rpat kmi kmi yau htfasneft. Tfit Timotirhu sinya yuhat Porr mdukakmor. Duka memor, “Rorhu yifemr Grik thofer. Kmi kmim yitohwa Judam bi wany bugamomt rorhu sinya yuhat.” Nd dukeftpno Timotir yakmorr afo tu Judaroh nkifra hingernef yuhat hingername. Tha puk-thu inji namorr. ⁴ Inji hingername be rpat yimom. Porr Jerusalem yihato aposermi eldam nd kfafmo mrokfom, nd nd mrokfom kmi kmi kfo nuhas fnahmomm. Kfo memomm, “Nda nom kfiwa mrokfom yakitohato hikkfot.” ⁵ Inji kfo htfasmotmm kmi kmiroh Kristenm wany hik bohik marnyahato fakitoh bmtamomt Bro Nkifrarhu mrokfot. Yiha yiha nfri nfri yimam nd Jisarhu sios nathu hmbri hany nathu hmbri hanyomom be nd sios bronimot.

Porr Troasn twe Masedonia thofr htiyakmo yuhat

⁶ Rom yimohat distrik Frigia, Galesia inji inji yi htfasmom. Bro Nkifrarhu Yafothat nhai marimot, “Asia profinsko yihato ndkorhof kmim Bro Nkifrarhu mrokfom wakfo nuhaswakomm.” ⁷ Be nd Bro Nkifrar kfo htafoyuk yuhat yimom Misia thofm myau nanyor tmbhiwa tkitt mfnahmomm. Mfnahhato memom, “Profins Bitiniako yiho witarahno,” to nhai, Jisarhu Yafothat nhaf nhai marimot, “Ndko wayiho witatwako.” ⁸ Be Misiat yau hehurnihato tfit Troasko yimomwe. ⁹ Yifungnano yimam hwe tweh hanita kanjo Porr inji kanjo yifungnano Masedonia thofr mtoh hanyhato kfo hany memorr, “Pore, bro marombt wahir hayuk-nekahnn Masedoniati niahato afo wahtinnom.” ¹⁰ Porr inji htihato yudbat wuskam yak kebirsmonom rhu yibonmonom yinyeft. Nmoh dukeft duka memonom, “Bro Nkifrar kangrnom, ‘Ndko yihato mrokfot wakfo nuhaskomm.’” Nd dukeftpno Porr fak nuhasrr.

Lidiat Jisarr hikmo yuhat

¹¹ Be Troasn sift fakmonom. Sift yaknimohat afo Samotres yimonom. Tfit ndwom marrn Neapolis yimonom. ¹² Neapolisn sift htafmotnom tfit fau hamuhmonom kmit. Yihato profins Masedoniathu wom distrikt yorhwa bro yufet kmi Filipait mfnahmonom. Nd taun Filipait Rom gafmanru tirt rhumout. Nd taun Filipait mfnahhato nd kmit wom yiham tohmonom. ¹³ Ndha tohhato Sabat yiharn taunt htanyhato wom tekthu thmbko yimonom. Duka memonom, “Judam rifinyhato kfo bruttniwa tkitt tek thmbko tohraht.” Nd dukeftpno ndko yimonom. Yimonom wom tkitt wom metm rifiny hasetnm nom yi htihato rompno rhuhat mrokfom nom hanyukm kfo nuhas bonuhasmonomm. ¹⁴ Nd rhu rifinyhato nom pthayuk mrokfom wany yakitohmoa metm rroh womt Lidiat. Nd met Lidiat Taiataira efkott. Nd mett Bro Nkifrar hikmout. Rot tohmoahat kukupitha rmontham yakitohmoatn yimam rotpon nia wiknamoumm. Rothu yima yuhur Bro Nkifrar yak marnyamotr Porr pthayuk mrokfom be fak twanhomotm. Rothu yima yuhur nd yiharn fak krekutmotr. ¹⁵ Yima yuhur yak krekuthato baftais fakmot. Rot baftaismot yo rothu kunys tohyuk yimam rpat baftais bugamom. Lidiat baftais yaknihato kfomotnom rothu kunys yinyeft. Kfo memot, “Na Bro Nungothetr hikwa yuhat niko hifa hti thoft to bt nanhu kunyko afo niarfoko.” Be inji kfo yongm hatohmottnom be rothu kunyko yimonom.

Por Sailasrof Filipait kalabusmo yuhat

¹⁶ Wom yiha kfo bruttnayuk tkitt yi hanyetnomn kmi yarh fknayet met tmaht, nd taun Filipaithut, mfuryak-motnom. Nd met tmaht sleft tohmout. Kmi yarhr tukihmoatrt tamoh tamoh nefm bi rotn kfomoutm. Tamoh tamoh nefm yimam memoum atawisafnom, rot wiknamoatm rotn tukihhato rotn kfo nuhas bonuhasmoutm. Nd mett nhai be turpat nd hingrneft yakitohr-mott. Tom rothu tohukatoh yimam. Rot yakmoa bro marut to tuthu tohukatoh yimamn kakmoumm. ¹⁷ Nd mett Porri nom yau hik hanymoatn kfo naku hany memout, “Nd yimam tu yura miyorhekwa Bro Nkifrarhu hingrna yimayem. Bro Nkifrar yima nrfa htiyekwa yuhat nda yimamn kfo hik nuhashnewumko.” ¹⁸ Bok yiham nd mett inji na hatohmott Porr nhai yindhormor. Ndnatn Porr kekuthato nd mett hatohmo kmi yarhr kfo memorr, “Ni nd kmi yarhe na Jisarsru yufatpno kfiwann, nd mett asomif wathu troh tanyns.” Porr inji kfomotr nd kmi yarhr be thu trohmort.

¹⁹ Be nd metthu tohukatohm inji htihatoh kfo memom, “Barenko, nmoh maru yakyuk yihotat be bi frtmbhefirt. To tamohmpno inji nahurnom?” Inji wakfo nambur sinyahato Porr Sailas-rof rpat tir tir fakmomf. Yakhato be tehr tehr hanyomf maket swirt rhuyuk mejistretmpno hanyomf. ²⁰ Nd mejistretmpno hanyhato kfo memom, “Nda yimaf nndo Juda thoff nmoha niarof. Niahato rofhu bori-rifhut mhtahato kangf, ‘Ndt wahikko.’ Kmi thofm inji wanyhato yima yuhum nhai marnyakahmm. ²¹ Rofhu boririfhut, rofhu nkifra mrokfot nndohet, nom Rom thofnmohet nndohet, nhai rpat niyak tkafkahf.” ²²⁻²³ Nd rifinymo yimam to be nd rpa yuharpat mnarhuni mnarhuni, be mejistretm kfomotm Porr Sailasrofhu hmbresham yakta thumomf kumbuhom yakhato kumbuhe kumbuhe yenyoh bonohakhato rumgat htamomf. Rumgat tohukatohmoa yimar kfo memom, “Nom htewa yimaf wayukatohaf hanyswanf.” ²⁴ Be nd rumgathu yimar inji wanyhato tu yiro yihom ruhakyuk rumtn hanyomorfn wuru dbkafyuk pran mkut yakhato wuram dbkaf hmbremorf.

²⁵ Be rof wuru dbkafetf rhuhato yifung dany Bro Nkifrapno kfo bruttnahato windohm windohmof. Rof windoh inji namoahat wom kalabum wany yakitoh hasomomf. ²⁶ Yuhre windoh bugani hanyomf asha nunes. Nd nunes tonehato nd rumgathu kuny rahum teh tut botut-mottm kuny yifhatikm foh bbomom. Nd yimam senimtamo senm ndm rpat foh dbombhomom. ²⁷ Nd rumgat toh yukatohyuk yimar hweyetrn mfohtashato mhti fnahmorm kuny yifhatikm be bi yoh bubetm. Be tuha mrokfo duhatr rhumor. Memorr, “Kalabum ka be bi fnahnim.” Nd duka yanuheft yakhato turhu bainat yakhato memorr tur awasa. ²⁸ Porr inji htihatoh yudbat fak thfamorr, “Bare inji anawahn. Nom aso buganom!” ²⁹ Be nd rumgathu yimar inji wanyhato memom, “Ksht wahnahikma.” Ksht hemotmr yihom brnyihato Por Sailasrofno yihom suhhato tuha nndo ginunes fakmotr. ³⁰ Briyahako hafnahnimorfn kfo memorr, “Barefn, nane finji narhoyann Bro Nkifrar yak miyakrhora?”

³¹ Inji kfomotr kfo memorr, “Bro Nungothet Jisarr hikrahko ninhu kunyshu tohyuk yimampno rpatn yak miyakrahrko.” ³² Nd rumgat tohyuk yimarpno pthanihato tfit yimofn rorhu kunys tohyuk yimampno tfit rompno Brorhu mrokfot pthamof. ³³ Nd tu yifungprar nd rumgat tohyuk yimar Por Sailasrof harhumo fhu yuruft fuk kibofsa marnyamorf. Inji nanihato Por Sailasrof tfit sinyahato nd rumgat tohyuk yimari rorhu kunys

rpat tohyuk yimam rpa kfot yudbat baftaisimmofm. ³⁴ Baftaisnihato nd rungat tohukatohr tfit Por Sailasrof yaknimorfn kunyko hanyhato nuwa yeshri hemorf. Nd rungat tohukatohri rorpno tohyuk yimam be tu bro yindhoreft fakmotm tum Bro Nkifrar rihikakmo yuhat mhtiyakhato.

³⁵ Hwe fnah dbha mejistretm polis kfo tkrur memomm, “Wanjukahkomn nd rungat tohyuk yimar wakfokahtkomr nd hus yimaf rungat tohwaf akfokahtf rungat ahtanyswaft. Atfauyafokahtf aiswaf.” ³⁶ Be nd polism yi rungat tohyuk yimar mkfomotmr tfit rorn Por Sailasrof kfo memorf, “Mejistretm mrokfot htefimt. Kfo famum, ‘Por Sailasrof wayafho-kahtnf aiswaf.’ Ndnetn nifn href fnahnitfn. Nifnhu yima yuhum ayindhortwam mirahm tfit aduka krhonom.” ³⁷ Tfit Porr sinyahato nd polism kfo wok memorm, “No Rom thofeno. No rungat yak htamohat nhai wom nefm namotno rungat htarmomno. Nhai. No be yimaroh nyingahato tat noh bonohakmomno rungat hta furatamomno. Hta furamomno tfit kangm, ‘Be nhowi wom wany juha yak hfhanaforahnomf.’ Frohm inji kfim? Nd tu mejistretm aniekahmn ayak hfhanafotwamno.”

³⁸ Be nd Porr pthayuk mrokfot polism tfit mejistretmpno hany mpthamomm. Kfo memomm, “Nd yimaf kfo famuf, ‘No Rom thofeno.’” Nd mrokfot mejistretm wany mohat fanho bugamom. ³⁹ Be nd mejistretm yihato Por Sailasrofno mrokfom naptha gbhunihato kfo memomf, “Nifn fnahnitahat mirahfn tfit asha wom atoh hasono, nndo wom kmi tfit waiswafn.” ⁴⁰ Be Por Sailasrof inji wanyhato fnahnimohat be Lidiathu kuny rpat yihato Kristenm kfo bmta mrokfom kfohi tanyomfom be nd kmit htanyhato yimof.

17

Tesalonaika thofm kangm, “Por Sailasrof atat noh bonohnomf”

¹ Porri rorpno yau htfasnho-moa yimampno Masedoniat htanyhato yimohat Amfipolis mihtini-hato Apoloniapnone Tesalonaikat mifn nahmom. Ndha Tesalonaikatne Judaroh rhu rifinyuk rmont tohmout. ² Porr tur nahnamoa nefn nhaf rroh rmont tumpno rpat fknehato Bro Nkifrarhu mrokfot kfo nuhasmorm. Husfirpa rhu krna Sabat yiham rhu-nhohato Bro Nkifrarhu mrokfot kfo ptha nuhas bonuhasmorm. ³ Memorm, “Bro Nkifrar kfomo yimar, yimaroh nrfa htiyakyur afo yahr kmiroh tirmn nohruharn ee kto tfit sinyarah. Na kfo pthiwa yimar Jisars kfo pthiwa.” ⁴ Wom dfik Judam Porr pthamo mrokfom wany yindhohato wuthu kambriyakmomm. Tom bok Grikm ndha tohhato Bro Nkifrar hikmoam, rom nhaf Porru mrokfom thu yuhurmotmm rorhu dohrn mitohmom. Yo bro yufet metm rom rpat Porrofhu dohrpar mitoh bugamom.

⁵ Judam inji wahtiyafhato yima yuhum nhai marnyarmomm. Yima yuhum wakiyakhato maket swirm yihato nd maketm toh fura htfashato fasoh nefm namoa damiagm fakmomm. Yak nhafohhato nd taunt yihom hetak mhetakmom. Yihom hetak mhetakhato Jesonrhu kunys yihato tmbrahato memom, “Porr Sailasrof ndha korhf.” ⁶ Jesonrhu kunys yirok thu yurak thutihato tawo Jesonri wom Kristenm yak hfhanhato mejistretmpno hanyhato kfo memom, “Asom nda yimam kmi kmim yorhwa rhu nmbuhat faso faso kak hta htfaswomt. To bi asom nmoha niamom. ⁷ Jesonrhu kunys hatohworm. Nmoh Sisarhu bro lokfot hanyjbornahato kfo kangm Jisars tor nmoh wom kingr.” ⁸ Nd mejistretmi rifinyuk yimam inji wanyhato

yima yuhum duka fanhomomm. ⁹ Be nd Jesonri rorpno yakmo yimam kfo memom, “Nhai yafho thu furaruhatom. Afo kotkfot wiknahato btn fnahnirahm.”

Por Sailasrof taun Beriako yihato gutnius mrokfeft pthamo yuhat

¹⁰ Bi yifungtn Por Sailasrof Kristenm kfo memomf, “Bi yifunget wanjufn.” Be rof tfit taun Beriako yimof. Beriat mifnabhato ndha tohyuk Judaroh rhu rifinyuk rmontn nhaf yimof. ¹¹ Beriat tohyuk Judam awi tu dborioh yimam. Nhai Tesalonaikat tohyuk Judaroh neft kanjo htermom. Porr pthayuk mrokfom hifa wany yindhormomm. Tfit tumn Bro Nkifrarhu gonborngt yakhato ror pthayuk mrokfompno yak hta nhtahato kfo memom, “Awi tu dborioh mrokfom kfiwur.” ¹² Tum inji hti nhtahato bok Judam fak hikmomm Porr pthayuk mrokfom. Grikm nhaf tumn wanyhato rroh yufet metn yo bok yindarim Porr pthayuk mrokfom hikmom.

¹³ Beriathu yimam Porr pthamo mrokfom hikmotm tfit Tesalonaika tohmo Judam wanyakhato rom Beriat yihato kfo memom, “Mirahko Porr pthayuk mrokfom awany yakionmr. Kfo ptha furewur.” Inji kfohato nnakfo sinyamomm memom, “Porr hfnahrahnom.” ¹⁴ Be yudbat Beriathu Kristenm Porr yaknihato maromb thmbko hanymomr. Sailas Timotirofrpaf tuha Beriat toh hasomof. ¹⁵ Porr hanymomrn Atensn mikafhomomr. Ndha mitohakhato memom, “Tfit Beriako ainyom.” Porr rompno kfafo hany memom, “Sailas Timotirof bmbri aniekahfn amihtiyaknetwofa.”

Porr taun Atensn gutnius mrokfot ptha nuhasmo yuhat

¹⁶ Porr bi Sailas Timotirof kfafo hanyetn to Atensn toh gari hasomorf. Sailasrofhu garineftpno nd kmit nhai be kukenhato htirmort nd kmi thofm kfo tatomoa nkifra tahim. Inji htihato yima yuhur nhai marnyarmorr. ¹⁷ Porr nd krho yima yuhurpno Judaroh rhu rifinyuk rmontn yihato Judami Bro Nkifrar hikmoa Grikm rompno gutnius mrokfot kfo nuhas-mourm. Yo yiha yiha maket swirt yihato maket niayuk yimam yakmoarm kfo ptha nuhasmourm. ¹⁸ Epikuria Stoikrof hikmoa tisan* Porr pthamo mrokfom wanyhato nnakfo hamuh hamuhhato womm kfo memom, “Ndre fitoh yimar kfo pthewar. Be yuwi kangr, ‘Afo wany yindhorrhama.’ Fitoh nkifrar, fitoh nfri mrokfot yamukar akfo nuhasanm.” Porr Jisarhu gutniuskfoti Jisar sinyamo yuhat kfo pthamoatr nd mrokfot tumount. ¹⁹ Be nd mrokfotpno Porr fakmomr. Yakhato Areopagas rifinymoa kaunsermpno hanymomr. Rompno hanyhato kfo ttiwon memomr, “Nom kangnom awany hiknom nd ni yimam kfo nuhaswa nfri mrokfot. ²⁰ Nmoh yimbhindangm wanukwomt nd ni pthiwa mrokfot be tu nfri mrokfoyet. Ni pthiwatn nom be afo tunom rinahti nahtitwonom. Ndnetnomn kangnom waptha hikkahtn awanyom.” ²¹ Tuha Atens thofm yo womha thofm Atens nia toh hanyukm nhai wom tamohm dukakfot. Be kangm, “Womm pthayuk nfri mrokfom wanyhato aptha hasonom.”

²² Porr nd Areopagashu kaunserm-pno kfo memom, “Niko nda kmi Atens thofko tamoh nkifra tahim o tamoh tamohroh lotu neftn be tu mfro buriwutko. ²³ Nikmoh nda taun Atens yau habrihato nikmoh kfo tatoyuk tkitm hti htfasmohat wom kunysn wom altar htimoyanr. Nd altarn wom

* **17:18:** Epikuria Stoikrof bingot tohhato duka tungunefet mrokfot kfo ptha nuhasmouf. Wom Grikm rofhu mrokfom kakitoh hnamomm.

mrokfom htamomm. Nd mrokfom kfo memom, ‘Yima hti won duha nkifrarhu altar.’ To nd hti duha nkifrar niko be kfo tatohato kfo bruttna furiwarhu mrokfot na ptha nuhaswanko.

²⁴ Bro Nkifrarn ndar bbinysofti ndar bbinysoft yorhwa shrkahar hingrnamorr. Nd Bro Nkifrarn bromort ndar mounti bbinysoft. Ndnetrn ror nhai yimam hingrnayuk kunymn tohkahr. ²⁵ Tuhan yindars Bro Nkifrarhu bbukeftpno tohwom. Ndnetrn ror nhai wom tamohmn mkkopentahato tfit yima mifnomn nd ror kkopentayuk tamohm yakhekfot. Nhai. ²⁶ Rpa nkifrarpar hingrnamotrr rorpno yimam dborhamom. Dborhahato nda bbinysoft yifammanimomt. Yimam tohyuk yiham turn kfo htahato nda bbinysofthu tkitm fak nhta nhom-brahemorm. ²⁷ Bro Nkifrar duka memor, ‘Tuhan yindars ayak hta-kahanm kto tumn hti yukatoh hamuhrahma.’ Bro Nkifrar nhai wuri rhukahr. Tor brbo yimampno. ²⁸ Rorn kfiwatr nom tohhato wiyauyauwonom. Nikmoh tisam kfo memom, ‘Nom rorhu yon bugayenom.’ ²⁹ Nom Bro Nkifrarhu yonenom, to mirahko ka Bro Nkifrar ka gor silva yo tahi kanjohot yimayer. Yo mirahko ka yimanomn tth kaugomonmr. Nhai.

³⁰ Bingot tohmo yimam mmohato tamoh tamoh nefm namoatmm Bro Nkifrar nhai mfro krhormorm. To arihat rorhu bro mrokfot kfo kangr kmi kmiroh yima bugam fasoh nefm mong trohkfot. ³¹ Yimaroh kot tohyuk yihar bi kfo htamorr. Yo nd kotkfot yakitohyuk yimar tor bi rpatn fak htamorr. Rorn yimam nayuk nefm htiyak hanyhato kotim hanyrahm. Nd yimar minohafohato tfit sinyamor. Ndtm nom htihato duka mekfot nd hingrneft tu Bro Nkifra mifrn fak htamorr.’”

³² Yimarhu minohafohato tfit sinya yuhat wanyomn burmham hamuh snou bosnouhato kfo memom, “Ndr yuwi frnhehwornom.” Tfit womm kfo memomr, “Bare afo nd yima nohhato sinya yuhat afo tfit waptha hikkahtn afo tfit awanyanom.” ³³ Porr nd mrokfo ptha swirt htanyhato fnahnimor. ³⁴ Nd rifiny swirt rhumo yimam, wommn nd Porr pthayuk mrokfom wany yindhorhato wufakmomm. Rroh womr Dionisiusr. Dionisiusr tor wom Areopagas kaunser membar. Metroh-kort Damaris tot wom mett nd Porr pthayuk mrokfom wany yindhorhato wuyakmot. Yo tom wom met yindarim nd Porr pthayuk mrokfom hifa wany yindhorhato yakitohmom.

18

Porr taun Korint gutnius ptha nuhasmo yuhat

¹ Porr Atens htanyhato tfit Korinko yimor. ² Korinko yihato wom Judar mhtimor. Rorhu yufat Akwilar. Akwilar Pontas profins thofr. Bingot Romko tohyuk Judam Sisa Klodiasr Romko yak tuhafmotrm rpa rpa natubatunimom. Ndnetrn Akwila Prisila sawohf yakrmanyihato Korinko yi tohmof. Rof sawo ser kunyenroh hingrneft hingrnamouf. Porr rofhu hti yihato ³ be mhti foh-tasmorf rof nd hingrneft hingrnamoatf. To Porr nd ser kunyen hingrneft ror hingrnayetrn to tfit Akwila sawohf inji mhtimohat to be rofpno tohhato ser kuny hingrneft rpat hingrnamoum. ⁴ Be nd sawohfpno tohhato Sabat yihamn Judaroh rhu rifinyuk rmomt yimoarn Judami Grikmi Jisasrhu mrokfom kfo ptha nuhasmoum. Memour, “Akfo nuhaskahtanm rroh yima yuhum Jisasrpar htarahm.”

⁵ Sailas Timotirof Masedoniako tohmohat Korint Porr toh hasetrn mihtimofr. Porr Sailas Timotirof htiyakhato Porr nhai wom yiham rhu

furarmor Jisarhu mrokfothu kfo pthanef. Yiha yiha Korin tohyuk Judam kfo nuhas memourm, “Niko wany hnamoa nrfa htityakyuk yimar tor Jisr.”⁶ Porr Korint tohyuk Judam mrokfom kfo nuhas hanyi mrokfom nhai wuyakrmomm. Hamuh tfahato kfo wuna bowunamomr. Be Porr inji htitihato hmbresham frdsoftanihato kfo memor, “Nhai mrokfom. Tukomn myahot nafni wohniko mirahko nann akfonom. Tuko wakfotwako. Arihat na tfit yima tangimpno yihato Jisarhu mrokfot kfo ptha nuhasruhanm. Niko nhai, firtfa thuwokomt.”⁷ To be Porr nd rmont htanymortn tfit yimor Titius Jastusrhu kunysn. Nd yimar bi Judaroh rmon mrokfot bi wanymort. Rorhu kunys Judaroh rmontpno rorhu kunys tohmout.⁸ Nd Judaroh rmont tohmoo bro yimarhu yufat Krispusr. Rom riphari wom bok yimar Korinthum Porr pthamo mrokfom hikhato baftaisomr.

⁹ Wom yifungt Porr hwe sweh kanjo Bror kfo ptha hany memorr, “Mirahn yakrmehato tngt ayoukihant pthanef. ¹⁰ Na toh tamnouruhann. Nhai wom yimar finji naruhatr. Tom nanhu yufat yorhwa bok yimam nd taun tohwom. Ndnnett nhai wom yimar ninhu finji nakfot.”¹¹ Porr nd taun Korint rpa gunyjimti 6-pela yamm tohhato Bro Nkifrarhu mrokfom kfo nuhas bonuhasmorm.

¹² Porr afo hifa toh hanymor. Tohhany ee Galiorn tfit Akaia profinshu bro gajis fakmort. Rorn gajis yakmohat Judam Porrhu yak mrokfot rim harhuta mharhutamomt. Mrokfot rim harhuta mharhuta hasohato Porr fakmorm. Yakhato kot hanymomr.¹³ Hanyhato kfo memom, “Ndar yimarn tuhan yindars faso kfo htewatrm nkifra boririfhut bi nhai hik marnyakahmt. Bro Nkifrarhu tu hik marnya yuhat be fahoromtn bi nfri yihato yuhat ndar yimar yak nuhaswatn bi mhikaknitm.”¹⁴ Porr memor, “Ka nd Judam kfoyuk mrokfom kfo wok-ruhanm,” to nhai, Galiorn sinyahato Judam kfo memorm, “Niko Judako nda yima Porr nhai nanhu lokfot o wom fasoh nef. Wom lokfot o wom fasoh nef anar, awi mrokfot yakitohherfoyanko.”¹⁵ Nd niko kfiwa mrokfot be nd tukmoh Judakmoh mrokfo ptha yuhat yo yufa yuhat yo tukmoh Judakmoh nkifra yirmohthu yakitoh yuhatan pthiwuko. Ndnnett na nhai ndhett mrokfot wanyhirhotanko. Tuko wahanyakahkomt waphakomt.”¹⁶ Be nhai yakitohrmort rroh mrokfot. Fak thumort kot.¹⁷ Galior yak tuhaf-motrm Korint tuha kot swirtn Judaroh rmonthu bro yima Sostenesr yak tkaftahato rbig borbigmorm. Galior nhai marimor finji naruha. Be nyingarpaye fukatoh marsisatamorm.

Porr Korint htanyhato Antiokko yimo yuhat

¹⁸ Porr bok yiham Korint wom Kristenmpno rpat toh hasohato ee htanymorm. Prisila Akwila sawohfpno Senkriatn sift yaknihato yimom Siriako. Porr Korint tohhato kfo tahiato tmars hatohmohat be tu kmi Senkriatn rorhu tmars foh tanymort.*¹⁹ Akwila sawohf rpat Porppno yihato Efesus mdbkafmom. Nndhar Akwila sawohf htanymorf. Turpar Judaroh rhu rifinyuk rmont fkenimorn Judampno nakfo pthamom.²⁰ Kfo ttiwon nhombratitamomr Efesusu afo tohneft. To nhai, kfo kurmor Efesus tohneft.²¹ Be nd kmit htanyhato kfo memorm, “Warhuko. Kto Bro Nkifrar kangr tfit, ‘Aruhat wania,’ ee aruhat tfit nieruha.” Be inji kfo tanyhato yimor.²² Be nd ror yimo sift hirhany hir hanymotn Sisariat mdbkafmot.

* **18:18:** Juda yimam inji namoum: wom mrokfot Bro Nkifrarpono nakfo htatahato kto nd kfo ptha tng yuhat hikhato finji ner, nd yimar tmars koh bbomour.

Porr fnahnihato be yimor Sisariatko. Sisariathu Kristenm yindhorrhato kfo pthanho tanyhato tfit yimorwe taun Antiokko.

²³ Be tfit Antiokko tfit yimohat afo dfik yiham afo tohmor. Tohhato ee tfit sinyanihato yimor. Tfit sinyani yimohat yihotat yimor. Galesia distrik, Frigia distrik, nd nd distrik yuham yimor. Yihato nd kmiroh Kristen met yindarim mrokfom kfo bmta hanyorm tfit.

Apolosr taun Efesus ptha nuhasmo yuhat

²⁴ Aleksandria taunthu wom Juda yimar niamorn Efesus tohmour. Rorhu yufat Apolosr. Nd yimar tamoh mrokfom kfo pthaneft, mrokfom hifa ptha hik bohik marnyamoatrn yimam wany yindhormour ror pthayuk mrokfom. Yo Bro Nkifrarhu nkifra gonborngt rhuuyuk mrokforoh duka tungunefr ror fak marnyamorr. ²⁵ Jisasrhu toh yuham yo rorhu hingrna yuham Apolosr fak marnya tungunamorm. Yak tungunahato ror wommpno nd Jisasrhu mrokfom tumaohat tu kfo yembindt mrokfom tumour. Tmift ror be nd Jonr bupa mife yima baftaismoa yuharpot ror tawisafmour. ²⁶ Judaroh rhu rifinyuk rmonm Apolosr yihato mrokfom pthamoahat nhai yakrminano mrokfom ptharmoarm. Akwila Prisila sawohf ror pthayuk mrokfom wany nhtahato rofhu kunyko fakmofr. Rofhu kunyko yakhato tfit Bro Nkifrarhu wom dukefm hemofr. ²⁷ Kto Apolosr memor, “Akaia profinsko aiya,” Efesushu met yindarim kfo memomr, “O hifa ndko wainy.” Yo tumn rhu-hato rorhu yi nmbuhathu kfo nuhas gontwat, wandfakmomtn Akaia profins thofmpno yimot. Kfo nuhas memomm, “Apolosr nia thoft wayind-horaktwakomr.” Apolosr yihato Akaia profins mifnahmohat rorn nd Bro Nkifrar yuhuwafhato yakmo yimam kfo bmta kfo hta marnya bomarnyamorm. ²⁸ Judaroh rmont yimohat, nhai be nhowi kformorm. Be tu nnuhato Bro Nkifrarhu gonborngthu mrokfom yakhato kfo ptha nuhas memorm, “Jisasr torpar yimar Bro Nkifrar kfomom yimaroh nrfa htikyayukr, nhai wom fitoh yimam.” Judam mfnahhato memom, akfo woknomr, Apolosr tohhato kfo wokhato mrokfom hemorm.

19

Porr taun Efesusn gutnius ptha nuhasmo yuhat

¹ Apolosr Korint tohmohat Porr afo yuhre yura kminy-sofroh kmimn afo fauhnemor. Ktone Efesus mifnahmor. Efesusn Kristen yimam mihtimor. ² Mihtihato kfo ttiwon memorm, “Niko Jisasr hik-wohate Bro Nkifrarhu Yafothat mthu nawohwotkome nhai?” Kfo memomr, “Nom nhai mekahnom Bro Nkifrarhu Yafothat korhwot.” ³ Tfit Porr ttiwon memorm, “Tone fitohet baftais niko yekwako?” Kfo memomr, “Nom yekwa baftais Jonrhu baftaiskfof kekwonom.”

⁴ Tfit Porr kekutnihato kfo memorm, “Jonr tohmo yiham, yimam baftaisim-moahat kfo memourm, ‘Yimako kangko baftais ayaknom, afo fasoh nefm mong trohhato ee btn baftais yakkfot. Baftais yakhato nd nanhu mong yuhat niewa yimar nikmoh bro dukefm htakfot.’ Nd Jonr kfomo yimar Jisasrn kfomom.” ⁵ Nd yimam inji wanyhato Jisasrhu yufatpno baftais fakmom. ⁶ Porr mfham tir htamotrm Bro Nkifrarhu Yafothat mithu nawohmotm. Bro Nkifrarhu Yafothat mithu nawohmottm nd yimam tfit nfri nfri yarmumat ptha hanyomom. Bro Nkifrar mrokfo ptha rifhur hi

hanymoatrm turhu mrokfot kfo ptha nuhas bonuhasmoumm wom yimam.
⁷ Nd Yafothat thu nawohmo yimam ka 12-pela yimam.

⁸ Porr Judaroh rhu rifinyuk rmont yihato mfro mfro gutniuskfot kfo ptha nuhas bonuhasmourm. Judampno rhu pthahato kfo nuhas bonuhasmour Bro Nkifrarhu kingdomkfot. Husfirpa yamm Judampno ruhato kfo nuhas bonuhasmorm. ⁹ Nd husfirpa yamm Judampno tohhato Porr mrokfom kfo nuhasmoahat womm nhai wany yindhorrmoamm. Fasoh nambur yima yuhumpno fasoh kfo bebmomm nd Bro Nkifrarhu yuham. Be inji namotm Porri Jisasr hikwa yimam nhai tfit marimom tfit Judaroh rmont yirahnom. Nhai mif. Yiha yiha tfit Tiranusrhu skuryuk kunyr yihato ndha mrokfom naptha nhtamoum. ¹⁰ Be inji na hanysn inji na hanysn hus gunyjimf kur spohmof. Porr inji hingrnahato Esia profinsroh Judami Grikm Brorhu mrokfot rpat wany bugamomt.

Sefarhu yonm memom, “Tek yarh fknayet yimaroh yarhm ayak thunomm.”

¹¹ Bro Nkifrarhu Yafothat Porr mithu nawohhato nd mirakerkfom hingrna-moatrm yimam hti bugamoumm. ¹² Wom yimaroh dbohnefm yak marnyamoahat inji htimoum. Porr yak gbet hangisifm yaknihato nd dbohnet yimam mhemoahat, dbohnefm thu trohmoumm. Kmi yarh tek yarh fknayetm nhaf nd Porr yak gbet hangisifm mhemoahat, yarhm thu trohmoumm.

¹³ Wom Judam kmi kmim yau htfashato kmi yarh tek yarh fknayet yimaroh yarhm yak thu htfasmoam, duka memom, “Afo anhombranom Jisasrhu yufat yuta nawohhato yarh yak thuneft.” Kfo memoum, “Porr kfo ptha htfaswa yima Jisasrhu yufatpno nom kfiwonon nd yarhn wathu trohnt mett o yindarir.” ¹⁴ Judaroh prisroh tohak yimar Sefarhu 7-pela yindar yonmn inji hingrnoum. ¹⁵ Wom yiha wom yimarhu tek yarhr memom ayak thunomr, ka wom yarhr kfo ptha memom, “Na Porri Jisasr tawisafwanf. To nikone froheko?” ¹⁶ Wo, ka nd yimar rom yarh yak thu hasomor sinyahato nd yimam srfa bosrfaknimorm. Nhai tfit marimom, “Tfit tohhato tatrahnomr.” Nhai. Rorrpar tohhato fe noh bonohafmotrm fhutikmpno sfno rmontha duhatm fakrme tubatoum. ¹⁷ Nd kmi Efesus tohmo Judami Grikm inji wanyhato bro yakrme rifhur yakhato Bro Jisasrhu yufat yura yura htamom. ¹⁸ Bok yimam bi Jisasr hiketm yima rifinyrn niahnahato rom nayuk fasoh nefm kfo nriyafmomm. ¹⁹ Bok met yindarim for bi singm wandfet gonborngm tafont kandhi wurasoh bugamomm. Nd gonborngroh marufam thomnamohat 50,000 kiniakfet gonborngm kandhi-mom. ²⁰ Inji nahato Brorhu mrokfot mtoh nnuhaknihato nhai tfit suhrmot.

Efesus thofm

²¹ Porr htimort Brorhu hingrneft, mrokfot, bi hifa hifa bi kakitoh bmtewumte dukamor nd kmi Efesus htanyneft. Porrhu dukeft dukamor, Masedonia, Akaia, nd nd profins yuhat yihato Jerusalemko mifnahneft. Kfo memom, “Nd nd kmim tohni hany tfit Romko yihato nd kmit htini hanyruhant.” ²² To be hus yimaf, Timoti Erastusrof kfo tkrurmotr rofn bi Masedoniako tohak hanymof. Porr afo Esia profinsn afo dfik yiham tohmor.

²³ Tot nd yiharn yimam faso faso kfo rindho borindhomom Jisasrhu hikneft. ²⁴ Wom yimar tohmour, rorhu yufat Demetriusr. Nd yimar silva tahiye wonk wonk shrkar hingrnoum. Efesusroh nkifra tahi Artemis

tohmao rmont Demitriusrn tfit nd silva tahiye habhi rmonenm hingrna hta nhombramourm. Bok yimam nd hingrneft hingrna hemoamrn bok marut fakmoum. ²⁵ To be nd yimami wom nndoh yimam wom nndoh shrm hingrna tafsetm Demitriusr rpat yak nhafohmormn kfo memorm, “Bar yimako nom yekwa bro marut nom hingrnawa hingrna yuhatn bro marut niewut. ²⁶ To nd yima Porr be tu yonmar yima rifhur faso kfo hta mmo bamumiwurm. Nd na kfiwat bi tuko htihatoyanyeteko. Nd neft nhai be Efesusrpat nakahr. Nhai. Yuht Esia profins inji kak hamumiwurm. Kmi kmim kfo kangrm nom yimanom hingrnawa tahi yifonm nhai yafotha duhatem.

²⁷ Mirahko ka nd Porr yi tuta mrokfot ka nmoh bisnis hingrnefthu yufat ka wom yufett rhurfot, be tu nhai mif. Rorhu mrokfotn yak nohrfottt be yufat minohnirfot. Yo mirahko ka ndrpat, nhai tahi Artemis tohwa rmont be inji kuny furam kanjo htirfomt nhai bro dukefm nd rmont htarfotmt. Afo Esiat tohyuk kmi kmim nda yuhut bbinysofthu kmi kmim afo tahi Artemis fakitoh hnamom, Porr hatone habriwa mrokfotn yak nnarirottm be bi mhti narsewumt tahi Artemis.”

²⁸ Nd mrokfot inji wanyhato nd toh rifinyomo yimam wanambur het sinyahato kfo memom, “Nom Efesus thofnmoh Artemisn tot tu yafothet nkifra tahis.” ²⁹ Nd yiha nd taun Efesus nhai yima mrokfom wanyrmom. Kmi yuht nadidarmot. Nd het grha hasoyuk yima rifhur teh tmbho fnah bro rifiny swirrpap mirifinyom. Gaius Aristakusrof Masedonia thoff to Porrpno rpat kmi kmi rpat yi htfas-moum. Rof yakmomf nd rifiny swirrn hanyomof. ³⁰ Porr memor, “Nd yima rifiny buhar afknekahann rpat ainyom,” tfit Kristenmn kfo rafomomr. ³¹ Esia gafmanrhu wom bro yufet yimam Porrpno niyak marnyamoum. Romn mrokfot htafmomt. Kfo memom, “Mirahr Porr nd bro rifiny swirt amfnaha.”

³² Nd bro rifiny swirr yi mirifinyuk yimam nhai mrokfom nawany nawanyrmom. Womm rom nndo waptha hanyswako, womm rom nhaf nndo waptha hanyswako. Be tu nhai yima mrokfom nawanykfot. Nndo gobis ndha nfehimmot. Nhai wom yimar tawisafrmort nd rom rifinyomo yuhathu mnat. ³³ Judam hti batihato Areksendar kfo tkrur memomr, “Ni rifiny buhar waikahnn afo wafrhikaknt mrokfo mna yuhat.” Areksendar rim wany hikakhato memor, “Yura mtohhato ptharuha.” Yuhre tirm yura htahato memor, “Ptharuha.” ³⁴ Nd rifinyomo yimam bi hti nhta memom, “Arr Juda thofer.” Be ndnat tu mfro mfro rpatn tng rihar kfo memoum, “Artemis tu bro yafothet tahiyet! Artemis tu bro yafothet tahiyet!” Be nd mrokforpat kfo hany kfo hany be 2 auakfot yohnemot.

³⁵ Kto Efesushu kuskusr wasinyahato fak thfamorm. Yak thfanihato kfo memom, “Niko be nndo nunga mafmham kanjo pthiwuko. Kmi kmim bi htihnamomt Artemis tohyuk rmont. Nd yura moum yuhat yawihnamo hnaru tahis nda kmi Efesus thofn kakitohwomt. ³⁶ Nhai wom fitoh kmi thofrn riyak htafruhatrt. Ndnnett niko be nhowi afo rhukfot. Mirahko be nikomn bmbri bmbri finji ananom. ³⁷ Niko nda hus yimaf nda rifiny swirt hnehat nhai wom tamoh nefm narfotf hnarfokomf. Nhai nmoh rmomthu tamohmn yak rikohrfot o nhai nmoh nkifra tahi Artemis faso faso riyuta ayutarfoft. ³⁸ Demitriusri rorhu hingrna yimam wom mrokfom korhwom wom yimarpno, kot yiharn mejstretmpno yihato nd mrokfom nafrhikakkfot. Nafrhikakhato nayak dbhofnakfot. ³⁹ Wom mrokfom rhuneft tuko rhu rifinyhato yak nohrfokomm. Inji nanefth gafmanr htihatoy

yindhorrfor. ⁴⁰ To nd nom hrek marr nefi neft nhai tu dborioh neft narfonom. Mrokfo mna yuhat wany hik marnya duha asha be het fura bofurenom. Gafmanr ahtirt nd nom nefi neft finji kforfonom?" ⁴¹ Nd mrokfem ptha buganimormn be tuhan yindars kfomotr natubatu-nimom.

20

Porr Masedonia yo Grikko inji yimo yuhat

¹ Nd taunt rhumo neft minoh-nimott Porr nakuyakmorm nd taunthu Kristenm. Yi rifinymotm toh bmtayuk mrokfom hemorm. Mrokfom kfo hta tanyhemormn be Masedoniako yimor. ² Masedoniako yihato ndkorhof kmi kmiroh Kristenm toh bmtayuk mrokfom hi hanymorm. Mrokfom hihany hihany be tfit Grikko mifnah-mor. ³ Grikko mifnahhato ndko husfirpa yamm tohmo. Ndko toh hanyhato memor, "Sift yakni Siriako yiruha," wom mrokfot wanyomr. Judam memom, "Awasnomr." Nd mrokfot wanyhato be tfit kekuthato tu Masedonia yuhat yimor. ⁴ Beria thof Pirusrhu yon Sopater, Tesalonaika thof Aristakusri Sekundusr, Derbe thof Gaiusr, Esia korhof Tikikusri Trofimusr ee Timotir, nd nd yimam hikmomr Porr Filipaiko. ⁵ Ndha rom yimomn Troas mtoho gari haso hanymomnom. ⁶ Nom yispa duha bretpam yemoa yiham rhunihato Filipait htanymonomt. Htanyhato sift yaknihato be yimonom. 5-pela marm sift yimonom. Yihato Troas mfnah-monom. Troas minahtihato ndha 7-pela marm rpat tohmonom.

Porr Troasn Yutikusr yak marnyamo yuhat

⁷ Sarere krif yifung Troashu Kristen yimampno rhuhato komunion fakmo-nom. Porr bi wom kmiko yi yibonyuk yifungr mrokfom pthahany tu wuroh yifung dany mfak htanimort. ⁸ Nom rhumo myorhakyuk rumr bok lamroh nukeftpo nd rumr rhumonomr. ⁹ Wom yima damiagr rorhu yufat Yutikusr. Ror nd yifungr rhunhomornom. Ror tatuna muhtpno rhuhato wany yakitoh hasomour Porr pthamoahat. Wany yakitoh hasohato nyingam hwe krkotahato ka myak banihato bbinysoft mitmbhomor. Yura husfirpehyuk rumt tohetrn btn myak bani yawihnamohat nhai be brbo yawihnamor. Be tuha gur, nhai wom nfirmor. ¹⁰ Be Porr mifnahnimorn nd yimar yak kebisanaknihato kfo memorm, "Mirahko adukanom, nda yimar tor nfriyer". ¹¹ Inji kfonimormn be tfit tum rhu tanyuk rumr muh mrhumorn bretpam yak mkumormn famomm. Ror pthamo mrokfom nhai be brboh mrokfom ptharmor. Yifungr ptha nitremorr. Nitrenimott be Porr ptha tmbhonihato yimor. ¹² Nd misuhmo yima damiagr tfit myenyjwomotr yima yuhum marnyanihato yimom.

Porr Troas htanyhato Miletusko yimo yuhat

¹³ Ndha Troasn nom bi sift yakni hanyhato nom bi Asos mgari haso hanymonom. Memonom, "Ndha Porr kmbrenirahnomr." Bi kfo memornom, "Na yihotat yirhoyann Asos ndha wakmbrenitwokma." ¹⁴ Asos garihato mfnahmotr kmbrenimomrn be yimonom. Yimonomn Mitilinit mfnahmonom. ¹⁵ Mitilinit htany yimohat ndwom marrn Kios mfnahmonom. Tfit ndwom marrn Samos. Tfit ndwom marrn Miletus mfnahmonom. ¹⁶ Porr bro Pentikos yihar mdukakmorn ndnetrn Efesus hir hagrotnimortn Miletus

midbkafmor. Duka memor, “Nhai Esia profins awi kanga hatohrhota. Bi tuha Jerusalem rhuhato Pentikos yihar rhuneft hifa.”

Porr Efesushu eldam kfo wobuh mrokfom kfomo yuhat

¹⁷ Ndnetrn Efesus hir hagrotnimor Miletus midbkafmor. Be Miletus rhuhato Efesusko be gontwat yimotn fakmotm Efesus sioshu eldam. ¹⁸ Yimotm kfo memorm, “Na barkof yiha Esia profins yimohat niko tukmoh nyingaye htimoko na nikompno tohhato namo nefm. ¹⁹ Nanhu yufat nhai kfo grha hnarmoyant. Judam waji ya hatohmoahat niko tuko wanyhato htimoukomm. Bok yiham yima yuhur krhohato bu nyingar kawihnamour. ²⁰ Na nhai Judam namoa nefm hti yakrmermoa. Nanhu yima yuhur yakitoh dbkaf marnyahato Brorhu hingrneft hingrnamoant. Fitoh bro rifiny swirm o tukmoh kunymn na yihato mrokfom hemoanko. Finji finji tohneft o mrokfo hikneft nd ndm kfo hta bohtamoanko. ²¹ Fasoh fasoh nefm mong trohhato Bro Nkifrar hikhato nmoh Bro Nungothet Jisasrhu mrokfom wany yakiohato hikneft, nd nd mrokfom yiha yiham Judampno, Grikmpno ptha buga bobugamoanm. ²² Bro Nkifrarhu Yafotharhu tng yuhatn na hikwoyann na Jerusalemko bi yi hanita. Na Jerusalemko yi hanyhato na tamoh nefm nanpno rhu thombat na nhai tawisafkaha. Be yirhoyann yukatoh hasoruha. ²³ Kmi kmim yi htfashato Bro Nkifrarhu Yafothat yak nuhaswa mrokforpat na kakitohwa. Bro Nkifrarhu Yafothat kfo kangt, ‘Ni nhai toh marnya hakuruhatn. Yiha yiha krhopam yakhato kalabus hta hakurahmn.’

²⁴ Na nhai nanhu toh nmbuhatn bro dukeft mdukakkaha. Nhai. Nanhu dukeft kanga nd Bro Nkifrar hayuk hingrneft afo amhingrnafo bugayant. Bro Nkifrar yimam yuhuwafmo nmbuhat kanga afo kfo nuhas bonuhas bugayanm kmi kmim.

²⁵ Na nikompno toh hnamohat kfo nuhashnamoyanko Bro Nkifrarhu kingdomkfot. Arihat mdukak kanga, kto be nhai nanhu nyingatikt htiruhatkومت. ²⁶⁻²⁷ Tfit mrokfom bi kahukanko. Na nhai duka marimoya, ‘Tamohmpno Bro Nkifrarhu yima yuhur kfo nuhas-rhoyanm.’ Nhai inji dukarmoya. Kfo nuhas bugamoyanko. Ndnnetann nikmoh womr fasoh tkit bebt yinyeft na mrokfo duhata rhuruha. ²⁸ Niko tukmoh toh nmbuham hti yukatoh marnyafo hanykfot. Yo Jisasrhu sios rpat yukatohaf hanykfot. Bro Nkifrarhu Yafothatn bi nd yimam nikmoh tirtn htamotm. Bro Nkifrarhu sios bi turhu Yonrn bi noh wiknamorm. Ndnnetn niko toh yukatoh marnyafo hanyhekfot. ²⁹ Na tuka hti nhtewa kanga na htanyruhanko nd yifako tohwa yaum fnahnehato sifsifm riyakhato yejborfa wumtrahmm. ³⁰ Kto nd niaruha yiham niko tuko nakfo nheh nakfo nhehrahko. Womr yihato womr mfrnhehruhattr rorhu mrokfem yak hikrahrr. ³¹ Ndnnetn yiha yiha niko duka marnya bomarnyahato tohkfot. Na yak nuhashnamoa nefm mirahko ayafhonomm. Na husfirpa gunyjimm nikompno tohmohat yifung marm dborioh dborioh yima yuhum yima yimako he nhombra bugamoyanko. Bu nyingarpno mrokfom hihnamoanko.

³² Bi Bro Nkifrarhu tirtn htiwanko. Rorhu tirt htewohat ror yuhuwafmo yuhathu mrokfot wayakitohwakومت. Nd Bro Nkifrar yuhuwafmo yuhathu mrokfot yakitohrahkومت htirahko be toh bmtarahko. Toh bmtahato dborioh rhu nmbuhat hirahrko. Bro Nkifrar tur kfo htayuk yimam hta garita wuskam nikomn hirahr. ³³ Na tohmohat nikompno nhai wom yimarhu maruham o wuskam hti yuhurhato marimoya, ‘Na finji ndu yimar

kanjo aruha,' nhai. ³⁴ Tuko htimokma na tukanhu tire hingrnahato tamoh tamohm yakhato nanpno tohyuk yimam hemoanm. ³⁵ Na hingrnahnamo hingrnefn memoya, 'Ahingrna nuhaskahtanm rom htihatmo hingrna hingrnahato wuskam o tamohm yak-hato nd hingrnapa duhatm heshu-rahmm.' Bro Jisasr kfomo mrokfot nom dukakfot. Kfo memor, 'Wom yima furam tamohm hirahmn, nhai be mfro yindhorrhuhatin. Ninn tamohm yakhato womm hirahnm, ndt be tu bro yindhorr nmbuhat yakrahn.' "

³⁶ Porr inji kfoni bugamorn nd Efesushu eldampno rpat bangu mtabok-mehato kfo bruttnamom. ³⁷ Nd eldam Porr myakitohhato hanurmomr. ³⁸ Porr nhai tfit htiruhatmr ndnetmn bro dungunangu yima yuhum fak-momm. Be Porr yaknimomr hanyhato yihom toh kafhomomr sif yakniyuk ktittn.

21

Porr sift yaknihato Jerusalemko yimo yuhat

¹ Be nd Efesuskorhof eldam htanymonomn sift yaknihato yimonom. Nom yimohat be hir hayukni twanhonihato Kos rim dbkafmonom. Tfit hwe fnah tfit sift yakni yimohat Rodes midbkafmonom. Rodes htanyhato taun Patarar mifnah-monom. ² Taun Patararn memom, "O! Sift Fonisiako kitt." Be nd siftn kmbrenimonomn yimonom. ³ Hirhany hirhany Saiprus be inji htini hanymo-nomt. Saiprus be inji kindonko rihti tany hanyhato nom be hir fnahhato Siria profinsko mifnahmonom. Profins Siria mifnahhato taun Tairt rim dbkafmonom. Ndha rim dbkafhato ndharhof wuss fak htanymomt. ⁴ Tairtn wom Kristenm mhtihato be ndha rpa wkr rompno tohmonom. Bro Nkifrarhu Yafothat nd Kristenm thu yuhur memotn, "Porr wakfo rafokahtkomr Jerusalemkort mirahr aiya." ⁵ Sift Tairt htany yibonmott nom be taunt htanyhato yimonom sifm dbkafmoa bekfako. Nd taunthu Kristenmi rroh yon tuhane yaknimom-nom yimonom bekfako. Nungur yihom htahato bangu mtabokmemonomn kfo bruttnamonom. ⁶ Kfo bruttnanihato be nakfo wobuh tanyhato nom be sift yakni yimonom. Rom tfit turoh kunyko yimom.

Profet Agabusr Porr mrokfom hemo yuhat

⁷ Be nom Tairt htanymohat hirhany hirhany Tolemes mifnahhato rim dbkafmonom. Rim dbkafhato nom ndharhof Kristenmpno nahtihato be ndha rpa marr tohmonom rompno. ⁸ Tfit ndwom marrn Tolemes htanyhato hirhany hirhany Sisariat rim dbkafmonom. Be nom ndharn Filifrrhu kunys yimonom. Ndharhof yimam rorn Bro Nkifrarhu mrokfom kfo ptha nuhasmourm. Be rorpno ndha tohmonom. Nd 7-pela yimam aposermmpno hingrnanhomoam to ror rroh womr. ⁹ Rorhu yon metm husfihus yon metm. Tafi ram yak duhatm. Be inji toh furahato Bro Nkifrarhu mrokfot profetm pthamoa kanjo inji pthamoumt.

¹⁰ Siriatsn tfit wom yiham tfit tohmonom. Ndha toh hasetnomn wom profetr, rorhu yufat Agabusr, Judiat htanymortn fawihnamor Sisariako. ¹¹ Niamorn nompno yihato Porru nyuh tkafyuk foh that yakhato turhu tir wuram kibokimorm. Kibokinihato kfo memor, "Bro Nkifrarhu Yafothat kfiwotta kfiwanko, 'Ndar foh tha katr Jerusalemr tohwa Judam inji kanjo kibokiyakhato yima tangiroh tirtn htarahmr.' "

¹² Nom nd taunthu Kristen yimam-pno inji wanyhato kfo rafo memomr, "Mirah mif mif Jerusalemko aiya." ¹³ Tfit Porr sinyahato kfo memor,

“Tamohmpno nurwatko nanhu yima yuhur gumuhatewar. Na to kanga fitoh kmimn ndhtet neft anama. Na to wofnwa Jerusalemthu nohneft. Na inji narhota Jisasrhu yufat yura yura htarahmt yimam.” ¹⁴ Htimonomr Porr tur mfro kfo yibonmotr to nom nhai tfit kfo kekutkfot. Be kfo memonom, “Tu Bro Nkifrarng kangr inji anamr, a to nhai mrokfom.”

Porr Judiako kalabus tohhato rorhu kotkfot yakitohmo yuhat

(21.15–26.32)

Porr Jerusalemt mfnahmo yuhat

¹⁵ Dfik yiham yinyimotm be wuskam yak kebirshato yimonom Jerusalemko. ¹⁶ Sisariathu wom Kristenmpno rpat yimonom. Yihato hanymomnom Saiprus thof Nasonrhu kunysn. Nd yimar bi bingot Bro Nkifrarhu mrokfot rifakitohakmort. Nd yimar memor, “Afo nanhu kunysn wamtohniko.” ¹⁷ Jerusalemr mfnah-mohat ndharhof Kristenm nom htiyakhato rroh yima yuhum yindhormom.

¹⁸ Hwe fnah dbha Porr hik hanymornom Jemsrhu htit. Nd sioshu eldam rpat rifiny bugamom. ¹⁹ Porr kfo yindhormrokfot tunihato ee btn ror yima tangimpno hingrnamo hingrneft kfo ptha nuhas bugamorm. Tamoh tamoh nefm Bro Nkifrar rorpno namom, yo nd yima tangim Bro Nkifrar rihikakmo yuham, ndm kfo nuhas bugamorm.

Jerusaremthu sioshu eldam kfomomr Porr Bro Nkifrarhu rmonko yinyeft

²⁰ Porr kfo ptha buganimotr Bro Nkifrar kfo yindhormomr. Kfo yindhornihato tfit kfo memomr, “Bare, to boknambok Judam bi Jisasr hikwom. Jisasr hikwamn tfit nkifra boririfhut rpat kakitoh tkafwomt. ²¹ Tfit wom Judam yitamn kfo fura kangmm, ‘Porrn yima tangimpno tohyuk Judam kfo kangrm, “Nd Mosesrhu boririfhu mrokfot wayafho thukomt. Nikmoh yon yindariyenroh tham mirahko apuk thu hanynomn. Yo nkifra yirmoht masat yak hik duha.” ’ ²² Nom tawisafwonom ninhu asharhof bi nia nmbuhat wanyrahm. Nome to finji kforuhanom? ²³ Wom kfo hta mrokfom kangnom akfo htanomn. Asombhat tom wom husfihus yimam bi Bro Nkifrarppno nakfo tahimom. ²⁴ Nd yimampno rpat waikahnn rom yuk trufuha yuhat wayuk truf hiktwa. Rom tmarim yoh bbo thombat ninn rroh tarioh mthewa yemrom wawik-nahitwamn. Inji wanakahtn womm duka mirahm, ‘Ka rorhu yufat be kfo wok furemr. Ror nhai nkifra boririfhut yafho thurfort.’ Inji kforahmn. ²⁵ Nd yima tangim, Jisasr hikwam, bi gon-twat wandfahato kfo memonomm, ‘Niko mirahko tahi rmonm tarioh mthewa yemroroh yemropam yo nd kkupayetmi nd mtiye teh tfnayet yemrom ayanom. Ndm ye juha. Yo mirahko ijoh atonenom.’” ²⁶ Porr nd Bro Nkifrarppno nakfo tahimo yimam yakmormn hwe fnah dbha fuk trufimom. Yuk trufnihato Porr nd Bro Nkifrarhu temperr yimor. Yihato prism kfo nuhas memorm, “7-pela yiham yinyiruhatm nieruhanomn rpa rpa yimanom Bro Nkifrar tarioh mtharahnom.”

Porr yiro Bro Nkifrarhu temperr toh hasetrn Judam yakaknimo yuhat

²⁷ Nd kfomo 7-pela yiham bi yi hanyetmn Porr yiro Bro Nkifrarhu temperr toh hasetrn Esiakorhof Judam htimomr. Mhtihato kmi thofm romn hasinyamomm. Kmi thofm hasinyahato Porr tir tir fakmorm. ²⁸ Yaktahato naku hany memom, “Niko Isrerko wania yaknhokmnom. Nda yimar

kmi kmim kfo habri kangr, nom Isrernomi nd Mosesrhu boririfhut yo nda rmont, ndm kangr, 'Yak wuna bowunayanm.' Yo tfit yima tangim yaknewarm nda rmont hnewurm. Hnehato nd rroh futn rmont thu kasitt."²⁹ Bi taunkorn htimomr Porr Efesus thof Trofimusrpnou ufau faumour. Nndetmn memom, "Ka rpat fknif rmont."

³⁰ Nd Porrhu mrokfot rim wifnak mwifnak rim wifnak mwifnakhato be Jerusalemthu yimam wany bugahato kmi thofm yursnanihato Porr rmont toh hasetrn tir tir yakhato teh brir hanyomr. Teh brir fnahhato yudbat rmonthu yifhatikt frkihmont.

Romkorhof soldiam Porr yakmo yuhat

³¹ Porr tat noh bonohmoatmr mrokfot yimot Rom soldiaroh krnungothetrpno. Memomr, "Jerusalem thof bugam bi foh yaum kanjo nnayur mmo bomumiwum." ³² Be yimar wanyhato ofisami soldiam yakhato yimomwe Porr tat noh hasomo tkittn. Be nd Porr tatmo yimam nd yimam htihakato Porr fafho thumomr. ³³ Be krnungothetr brbo Porrpno yayukni-hato Porr fakmorr. Yakhato soldiam kfomotrm hus senf yakhato kimomr. Tfit kekutnihato Judam ttiwon memom, "Nda yimare, fitoh yimayer? Finji ner?" ³⁴ Bt nd rifinyr waniak waniakmohat nhai yima mrokfom wanyrmomm. Womm inji waptha hanyomr womm mano. Be nd krnungothetr wanyasihato soldiam kfomotrm Porr yaknimomrn memom, "Soldiaroh kmifako hanyrahnomr." ³⁵ Yuhre kuny dda tiktpno mtoh hanyomr nd yima rifinyr toniyakna memom, "Awesak kitohomr." Soldiam inji htihakato Porr titamorr. Titaknihato hawitamomr. ³⁶ Nd yima rifinyr yau hik hanyhato kfo memom, "Wawas hehur thukomr."

Porr Judam kfo nuhasmorm ror tohnamo yuham

³⁷ Soldiam memom, "Porr hafkneni twanhorahnomr," tfit Porr kfomorr nd krnungothetr. Grik yarmumatn kfo memorr, "Ka na wom mrokfot ptharfoyann?" Tfit krnungothetr kekutnihato ttiwon memorr, "Ni pthewunt nd Grik yarmumat? ³⁸ Ni htitwoyann kanga Ijif thofe. Bingot wom Ijif thofr Rom gafmanroh mrokfom hanyjbornahato 4,000 yahr kmim yakhato yima toh duha tkitt kafrohmom. Na kanga ka ni nd yimaye." ³⁹ Tfit Porr inji wanyhato kfo memom, "Na Juda tangishofa na ndu Silisia distrikko yorhwa bro taun Tarsus nurmoya. Na kangane met yindarim wom mrokfom kfo ptharfo-yanm?" ⁴⁰ Krnungothetr kfo memom, "Nhai mrokfefm." Kfo yakiomotr be tuha kuny ddamis wasinya tohetoh-hato met yindarim tire frgadimorm. Be rom inji htihakato gadi rhumotm Porr Hibru yarmumatn pthamorm.

22

¹ Hibru yarmumatn kfo memom, "Bar yimako yo niko yifemroko, nanhu mrokfot ptharhotant wawanyswakomt." ² Porr pthamohat Hibru yarmumat pthamotr rom be gadi rhumom. Kfo memom, ³ "Na tu Juda tangishofa, na mmemt hiyaumota distrik Silisiako yorhwa taun Tarsusn. Tfit asha Jerusalemrn toh warhomoya. Bi bro yimayann Gamalierrhu skurfot yihato fak nuhas bonuhasmora nd nmoh nkibaproh yirmoht. Bro Nkifrar fakitoh hnamo-yanr niko arihat Bro Nkifrar yakitohwa kanjo. ⁴ Na toh hnamohat bok met yindarim Jisasrhu mrokfot wany yakiohato yak hiketm memoa awasanm. Womm mtitofe kihato kalabusn hany

htamoanm. ⁵ Bro tohak prisri kaun-serm htimomm nd na nahnamo nefm. Romn kfo nuhasyuk gontwam wandfahemomm Damaskus tohyuk Judaroh bro yimam. Be nd gontwam yaknihato fau hanyumoya Damaskusko yiyet yihotar. Memoya, ‘Nd kmithu Kristenm Jerusalemko hnerhotanm ndharhof bro yimam yakhato afo kalabus htarahmm.’ ”

Porr kfo nuhasmorm nd ror Jisasr rihikakmo yuhat

⁶ Porr wompam pthamor, memor, “Na yimohat Damaskus bi brbo yau hanyetann, marr danyr tohetrn asha wom nukeft yura mount wutoh tanyhato yawihnamotn fakmota. Memom ka nddo bro ksh nmbuhat yura mountko wuhatohhato wayak nukewum. ⁷ Na be nd nukeft yakmotta mmrifakhato bbinysoftn misuhmoya. Bbinysoft misuhhato wanyumoya wom yimar naku memora, ‘Sor, Sor, na tamoh dukeftpno yak bebwona?’ ⁸ Tfit na kekutnihato kfo memoyanr, ‘O, broye, ni frohe?’ Memor, ‘Na Nasaret thof Jisasa. Ni Kristenm yakbebwohat nhai romn yak bebkahn. Nann kak bebwo.’ ⁹ Nd nanpno yau hanyumo yimam rom htimomt nukeft to yimarhu tngt nhai wanyromt.

¹⁰ Tfit na ttiwon memoya, ‘Bro yimaye, na finji niwoya?’ Tfit kfo memor, ‘Wasinyakahnn Damaskusko wanju. Ndharpno tor wom yimar, rorn kfohirahrn nd na kfo htamo hingernefm ni hingeraruham.’ ¹¹ Nd nukeft masat fnuhato nyingam yakmotma nhai wom tamohm htirmoyann. Nyingam kuny kihmoma. Be nd nanpno yau hanyuk yimam inji htihato tir tir yaknimoma Damaskusko hanyumoma.

¹² Nd taun Damaskusn tohmour wom yimar, rorhu yufat Ananaiasr. Nd yimar Bro Nkifrarhu yinhit tohmoarn rorhu boririfhu mrokfom kak hik marnyamourm. Nd Damaskus tohyuk Judam rorhu toh nmbuhat kfo yindhormout. ¹³ Ror nanhu tohyuk kunys niahato brbo nanpno yarim tohhato kfo memora, ‘Yinowe, na kfiwann ninhu nyingam afrdbtakukahnm wayukatohn.’ Be inji kfomotra nanhu nyingam mfrdborhahato fukatoh hamuhmoyanr. ¹⁴ Tfit kfo memora, ‘Nmoh nkibaproh Bro Nkifrar bi kfo hta memor, “Ni Pornn hti hikrahn nanhu yima yuhur yorhwa dukefm. Nd nanhu tu hifa yufayet yimar* htiruhann ror pthayuk mrokfom wanyrahn.” ¹⁵ Ni nd htiruha nefmi yo wanyuk mrokfom yakhato met yindarimpno ptha nuhasrahn. ¹⁶ Bmbri wasinyakahnn Jisasrhu yufat wayutatwa. Yutahato be nd ninhu ufasoh nefm rorhu kkupaye yak thurahrn. Inji nanihato wabaftaistwa.’ ”

Bro Nkifrar Porr kfo tkrurafmo yuhat

¹⁷ Porr kfo memorm, “Na tfit asha Jerusalemr niamoyann yiro rmont fknihato kfo bruttnamoya. Kfo bruttna hasohato tfit hwe twehnano ¹⁸ Bror htihak hanyumoyanr. Nia hnamorn kfo memora ‘Nanhu mrokfom ni ptharuham nd Jerusalem thofm nhai wany yakio-ruhatm. Ndnnetn nda Jerusalemr yudbat wahtanyakahrn wanju.’ ¹⁹ Tfit kfo memoya, ‘Broye, na Judaroh rhu rifinyuk rmonm yi htfashato Jisasr hiket yimam yaknimoanm tfit kalabus hanyhato ufasofaso tabot bebmoanm. Nd Jerusalem thofm na namoa nefm bi htimoum. ²⁰ Nd ninhu mrokfot uhatone hatone htfasyuk yima Stifenr wasmohat na toya brbo tohmoya. Toh hanyetann rorhu tak noh bonohmo yimaroh yuke hmbresham hatohhato hti yindhormoyann.’ ”

* 22:14: Nd hifa yufayet yimar Jisasr.

21 Tfit Bror kfo memora, ‘Ni wanju. Ni be ndu yima tangimpno inji watoh habriswa.’ ”

Porr kfo nuhas memorm, “Na Rom thofa.”

22 Be Porr yima tangimpno toh habrineft pthamotr bt nd ror rhu wany yakitohmo met yindars wahet sinyahato kfo memom, “Wayaknikah-komrn wawaskomr! Nom wofnkah-nom nd yimarhu tohneft!” 23 Be kfo hut hanyhato yuke hmbresham teh tmbrak hanyhato nungufut yura tu hanymomm. 24 Ndnetn Judaroh kimr hofhta tngm krnungothetr wanyhato wom soldiam kfaf memorm, “Wanju-kahkomn Porr wamiyaknikahkomr soldiaroh kmifako wahanykomr. Wahanykahkomr wamtatakkahkomrn rorpno nd met yindarim hofhtiwa nmbuhathu mrokfo mna yuhat frhikakrahnom.” Be ror kfafmo yuhat hikhato mifakmomr.

25 Be myak tumakhato rahuspno kihato memom tat twanhorahnomr Porr ndha tohmo ofisar ttiwon memorr, “Romroh thfa mntwat finji kfiwat? Kfo kangt na Rom thofa nayuk nefthu mna yuhat tafi frhikak marnya duha be bmbrit tat furaknikfot?”

26 Be wom ofisar inji wanyhato krnungothetr mttiwon memorr, “Tamohmpno inji niwa? Nd yimar Rom thofer.” 27 Be nd krnungothetr inji wany sanyhato yimorn Porr mttiwonakni memorr, “Wakfo nuhas marnyana. Nine, Rom thof mife?” Porr tfit kfo fakio memorr, “Uwa. Na Rom thofa.” 28 Tfit krnungothetr kfo memorr, “Na to wom kmi thofa nikmoha tohwa. Na Romko yari witamohat bro maruha wiknahato tohwa.” Tfit Porr kfo memorr, “Na nhai. Nanhu yifamma sawohf Rom thoffn ndnetn na Rom thofa.” 29 Be nd Porr miyakmo soldiam nd mrokfot wanyhato fanhomom. Krnungothetr tfit nd Rom thofrhu tummo yuhat mhti dukakhato fakrmemor.

Porr Judaroh kaunsermpno pthamo yuhat

30 Hwe fnah dbha Porr kismomo mtitofm yaktanihato krnungothetr memorr, “Afo frhikak marnyaruha Judami Porr nna kfomo yuhat.” Be ndnatn bro prismi Judaroh kaunserm kfomotrm rifinymom. Rhu rifiny bugamotm rroh nyingatikko Porr mtohmorr.

23

1 Porr kaunserm yukatohhato kfo memorm, “Bar yimako, na Bro Nkifrarmpno rim tohnihato toh hnamo yiham na nhai wom fasoh nefm na hnarmoya. Nanhu yima yuhur nhai krho ba inji nakahr. Nanhu yima yuhur be yindhorwor.” 2 Inji kfo hanymotr prisroh bro tohak yima Ananaiasr brbo toh hanyuk yimam kfomotrm tngko frsrfa thumomr. 3 Porr kfo memorr, “Ananaiase, Bro Nkifrar tawo inji frsrfarahrn. Ni kangn, ‘Nkifra boririfhut htiyakhato kotimwann.’ Ndt fura mrokfot kfiwun. Nkifra boririfhut ahtiyakkahnn to inji kforfotnm tngko frsrfarfoma?”

4 Porppno brbo tohyuk yimam kfo memom, “Bro Nkifrarhu bro tohak prisr inji faso kfo duha.” 5 Porr kfo memorr, “Na nhai merfoya, ‘Ndarr Bro Nkifrarhu bro tohak priser.’ Bi ahti dukayanr, to nhai inji kforfotanr. Bro Nkifrarhu rfa borngt kfo kangt, ‘Mirahn ninhu kmi thofroh tohak yimar faso akfoyanr.’ Na nd mrokforpat tawisafwa.”

6 Nd kaunser yimam Porr bi hti nhtamorm. Nd kaunser yimam tohmo yimam womm Sadyusim, yo womm Farisim. Inji hti nhtahato wom mrokfot kfo memorr, “Bar yimako, na Farisiya. Na Farisiroh yona. Nanhu dukeft

duka kangt, yimam noh hanitam kto tfit sinyarahm. Na inji kfiwota ndnatn kot tohwa.”

⁷ Porr inji ptha hanyomor ka Sadyu-simi Farisim tum mnatuhaknihato nna kfo hamuhakni nna kfo hamuhaknihato nafak mkumom. Sadyusim rom inji tohmom. Farisim rom inji tohmom. ⁸ (Sadyusim kfo kangm, “Yimam noh hanitam nhai tfit sinyaruhatm.” Yo womt kfo kangm, “Mounmotni yafotham nhai rhukahm.” Sadyusim inji inji kfiwum. Farisim nndo kfiwum. Rom kfo kangm, “Yimam nohwam kto tfit sinya hanyarahm. Yo mount mounmotetet. Yimam yafothetem.”) ⁹ Inji nna kfo hamuhaknihato Farisim Porrpno tohhato ptha nuhaknimomr. Nkifra boririfhuthu tisam Farisimpno rpat tohmoam, romn sinya tohhato kfo memom, “Nome nda yima Porr nhai wom krhopam htikahnomr. Ror pthiwa mrokfom ka wom yafotharn o mounmotrn pthahemo mrokfom pthiwur.” ¹⁰ Farisimi Sadyusim masat masat nakfo hamuh nakfo hamuhmotm amiroh krungothetr inji htihato kfo memor, “Ndar yimam inji nakfo hamuh nakfo hamuhakniruhamn Porr kmbru pukum kanjo rinatehta rinatehtaruhamrn teh tmbhorahmr.” Be nd dukeftpno soldiam kfo tkrurafmotrm soldiam mibrnyihato mifakmomr. Judampno tohetrn miyakhato tu soldiam tohyuk kuny kmifako hanyomomr.

¹¹ Ndwom yifungrn Bror Porrpno brbo yihato kfo memor, “Mirahn ayakrmeya. Watoh bmtatwa. Nanhu mrokfot asha Jerusalem ni pthamohat, nhai yakrmehato ptharmont. Tohhato nanhu mrokfot ptha nanyjarmont. Romko yi shoft to be nd yuhat wahiktwa.”

Judam waji yamo yuhat

¹² Hwe fnah dbha wom Judam waji famom. Memom, “Porr awasnom.” Mrokfot fak dbkafmomt. Kfo memom, “Porr was mif mifrahnomr. Yimar tafi wasfonomr, nhai womr bmbri nuwa ya bupa ya inji naruhatr. Awi afo.” ¹³ Porru was mrokfot kfo htamo yimaroh nambakfot 40-kfoti wom yimam. ¹⁴ Nd yimam bro prismi eldampno yihato kfo memom, “Nome tu kfo mifmifwonom. Nom nhai bmbri nuwa yemaska inji naruhatnom Porr was duha. Bi Porr was tinghato yima yuhum miforhnmom ee bt nuwa ya inji narahnom. ¹⁵ Ndnnett nom kfo kangnom nikomi kaunserm amiroh krungothetr wakfakahtkomr afo hnerahr Porr. Wakfawamitwako, ‘Porr afo aniekaht afo mrokfom frhikakrahnomr.’ Inji wakfo nhehakahtkomr mirahr, ‘Aneya,’ yihotohat toh rafakhato wasrahnomr.”

¹⁶ Rom inji kfomohat Porru yindamem yonr inji wanyhato soldiaroh kuny kmifako yihato Porr kfo nuhas bonuhasmorr Judam kfo htatamo mrokfom. ¹⁷ Porr inji wanyhato wom soldiaroh tohukatohr nakuyakhato kfo memor, “Nda yima damiagr yaknihato krungothetrpno wahanyswanr. Rorpno wom mrokfeter.” ¹⁸ Be nd tohukatohr nd yima damiagr yaknihato krungothetrpno hanyhato mkfo memor, “Rumgat tohwa yima Porr kfeftira nda yima damiagr hniyanr. Wom mrokfetrn hniyanr.”

¹⁹ Be nd krungothetr nd yima damiagr yaknimorr rim rhumof. Turpaf rim ruhato kfo memor, “Tamoh mrokfom hne? Wakfo pthakahtn awanya.” ²⁰ Nd yima damiagr kfo memor, “Judam bi kfo htarom Porru hanyuk mrokfot. Merom, ‘Kfafruhato nom nohok hnerahr.’ Merom, ‘Kfo nheh mirahnom, ‘Afo ahnekahtrr kaunsermn rorru mrokfot frhik bohik marnyarahmt.’” ²¹ Na kfiwann mirahn rroh tng yuhatn ahika. Rroh

yimaroh nambakfot 40-kfoti wom thomna yimam rhu rafak memom, 'Porr wasrahnom.' Bro mrokfot fak dbkafhato memom, 'Nom nhai bmbri nuwa yemaska inji naruhat-nom. Bi Porr wasninome ee bt nuwa yemskarahnom.' Nd mrokfot inji kfo htahato to be ninhu kfo yakio tngrrpat gari hasiwum." ²² Be nd krnungothetr nd yima damiagrhu mrokfom wany-hato memorr, "Hifa nd kfo hamong htatamo mrokfom bi wanuyann. Ni yi shoft mirahn womm akfo amiya, 'Nann nd nd mrokfom kfahuyanr.' "

Porr gafmanroh tohak yima Feliksrpno hanyomo yuhat

²³ Nd krnungothetr nakuyakmorf hus soldiaroh tohak yimaf. Yimotf kfo memorf, "Wayak htatafnm 200 soldiam yo hos hatoneyuk 70 soldiam yo kfra inyarut hatoneyuk 200 soldiam. Wayak htatakahfnm hrek 9 kilok yifung wahasinyakahfnm Sisariako wahanyswafnm. ²⁴ Porrhu hatonayuk hosm rpat wayak hta bohtatwafnm. Rpat wahany marnyakahfmr aiswar Feliksrpno. Feliksr nambawan gaf-maner." ²⁵ Nd soldiaroh krnungothetr gontwat wandfahato kfo memor,

²⁶ "Na Klodius Lisiasa. Ndar gontwat ni gafmanrhu tohak yima Feliksrpno wandfiwant. ²⁷ Wom yimar Judam yakmomr memom, 'Awasnomr.' Nd yimar Rom thofrn memom, 'Awasnom.' Na inji wanyhato nanhu soldiam yaknihato mita nrfak-monomr. ²⁸ Kfo memotm, 'Awasnomr,' nd-natn tu Judaroh kaunsermpno memoya, 'Ahanykahanr afo wany hikruha. Tamohmpno yamukam, "Awasnomr?" ' ²⁹ Be tu Judaroh kaunsermpno rhuhat nafrhikhato nhai wom tamoh krhopam hirmoyanrn, bt miruha wasrahmr o kalabus htarahmr. Be nd nkifra boririfhuthu hik marnya duha nmbuhatpno memom, 'Awasnomr.' ³⁰ To bi wanyroyant mrokfot bi kfo habofkni kangm, 'Awasnomr nd yimar.' Ndnat ninpno niewur nd yimar. Nd rorppno namburwa yimam kfafroyann. Ninpno tohhato rroh mrokfom ptharuhatnm wawanyswann. Be injirpa"

³¹ Be nd soldiam krnungothetrhu mrokfot hikhato nd yifungrn Porr yaknihato hanyommr taun Antipatrisn. ³² Tfit ndwom marrn hos hatonayuk soldiamn tfit Porr yaknihato taun Sisariako hanyommr. Be nd bbinysof yuhat yau hanyomo soldiam bi hos hatonayuk soldiam miyaknitwomre be rom ndha mtahakhato tfit tu soldiaroh kuny kmifako yimom Jerusalemko. ³³ Nd hos hatonayuk soldiamn Porr yakni hanyomohat be hanyommrn Sisariat mfnahhato bro gafman yimar myak nuhashato gontwat memorr. ³⁴ Gafmanroh tohak yimar nd gontwat yakhato htimortn Porr kfo ttiwonnorr, "Nine fitoh profins thofe?" Porr memor, "Na Silisia thofa." ³⁵ Be inji ttiwonnihato kfo memorr, "Nd yimam ninpno nna kfiwam bi nieme, ninhu mrokfom wanyruhanm." Be soldiam kfomotm Porr hanyommr Feliksrhu bro kunyr htatahato toh-yukatohmomr.

24

Porr Judaroh bro yimam kotimmo yuhat

¹ Faifpela marm yinyimotm prisroh bro tohak yima Ananaiasri Judaroh eldam yo Rom thofroh thfa mntwat yakitohet yimar, rorhu yufat Tertulus; nd nd yimam yimom Sisariako. Sisariat yi mfnahhato gafmanroh tohak yima Feliksrpno memom, "Porr na hnamoa nefm ptharuhatnomm wanyrahm." ² Feliksr inji htiyakhato Porr nakuyakmorr. Porr yi mtohmotr Tertulus riphthak-morm mrokfom. Kfo memor, "Bro yima

Felikse ni gafman hingrneft myakaknimohat nmoh rhu nmbuhath yak hta bohta marnyamotn nom rhu marnya hnaronom, nhai nahutt nna inji na hnarronom. Ninhu dborioh yima yuhurpno yatn lokfot yak thumontn nfri lokfot htaron. ³ Nom nd nefm htihatoh nmoh yima yuhum yindhorhato kfo yindhorwonomm.

⁴ Nhai be yakitoh hatohrhotann wurohte kangane afo nmoh mrokforpat wany yakitoh tany herfonnom? ⁵ Nome nd yimar htitwonomr ror nom Judanompno tohwaro rorn wom mro-kfom wahtekwatrm ndar bbinysophu kmi kmim tohwa Judanom nhai toh marnyakahnom. To tor nd yimar tohhato fak tndohmornom. Yak tndohmotrn nom tunom nna kfo hamuh nna kfo hamuhmonom. Rorn wom yimam rim hatohmorm. Nd ror rim hatohmo yimam Nasaretm. ⁶⁻⁸ Yo nd yimarpn nmoh nkifra rmonr kangr, ‘Faso faso ayak bebanr;’ ndtpno kotkfot htamonomr. Ndnnetn ni tunn wayakkahn wattiwon hikkahn yakrahnm mrokfom. Mirahn ka be kotim furemr.”

⁹ Judam rom Tertulusrpn tohhato Porrpar krhopam thu hutamomm. Kfo memom, “Nd Tertulusr pthiwa mrokfom tu kfot kfiwur.”

Porr Feliksrapno mrokfo pthamo yuhath

¹⁰ Roh mrokfom pthanimotmm gafmanroh bro yimar mfhaye Porr kfo memorr, “Ni wapha.” Porr sinyahato kfo ptha memorr, “Na hti hnamoyann ni tu bok gunyijimm ndar kmiroh mrokfom fakitoh hna hemomm. Ndnatn nanhu yima yuhur yindhorwor nanhu mrokfom kfo pthaneft. ¹¹ Yimam ttiwon habirahn kfo mirahmn 12-pela yiharpam yirom na Jerusalemko yihato kfo bruttnamohat. ¹² Na yimohat nhai wom Judarpno rroh nkifra rmon kmifarn nna kfo hamuh nna kfo hamuhrmotno womm htirmomno. Na nhai taunt n taun tohyuk rifiny rmonm yihato faso fasoh yima yuhum hermoyann. ¹³ Nd rom pthiwa mrokfot tu fipa duhatet. To fitoh yimar o mett htimota o wanymota, btn rorn o rotn ptha miruhath, ‘Uwa, na htitawoyann o wanuyann o ndha ni inji pthamo?’ Nhai, ndar mrokfot tu fipa duhatet.

¹⁴ Tu mrokfot mna yuhath nann kforhotant wawanyswant. Nanhu nkifraroh Nkifrar kfo bruttna hnamoya. Nd nkifram yakitohmo boririfhuti profetm kfo ptha htamo mrokfom na yakitohhato yimam Jisasr hikwa yuhath kfo pthamota memom, ‘Wom nfri mrokfot mhfahnewur.’ Ndntpno namburhato kotimmoma. ¹⁵ Nani ndar Farisim nmoh dukeft duka kangnom, dborioh yimami ufasoh nefm yakitohet yimam kto Bro Nkifrar tfit kasinyarahrm. ¹⁶ Ndnatn yiha yiham be toh marnya hna twanhoroya. Na nhai wofnkaha Bro Nkifrar yo kmi thofm nanhu toh nmbuhath faso htineft.

¹⁷ Boknambok gunyijimm wom wom kmim toh hnamoya. Toh htifashato ee tfit Jerusalemko tukanhu yimatmpno yimoya. Wuskenm rpat hanyimoya. Memoya, ‘Hanyhato wuskapa duha yimam hi hanyruha.’ Yo memoya, ‘Jerusalemko yihato afo Bro Nkifrar tariroh mtha inji naruha.’ Nd nd dukefmpno kniko yimoya. ¹⁸ Tunmoh Nkifra rmont fknihatoh na tariroh mtha hasomohath nhai yimam rim rifiny tohhato htirmoma. Yo nhai wom yimam ptha kimr inji narmom. Nd yima toh rawofroh yak marnya nmbuhathu hingrneftm hingrna buganimota ee yimam rim htimoma. ¹⁹ Asia profinsko tohyuk Judam, romn yauyaknihato fakmoma. To nd yimam nanpno mrokfetm rhu thombat romn aniekahmn ninpno amptham. ²⁰ Nhene, to ndar tohwa yimam, romn na nd kaunserroh nyingampno

tohmohat wom nefm htitawoma, romn aptham. ²¹ Wom mrokforpat nann apthayant. Wom mrokforpat nanhu tnge ptha-moyant. Kfo memoya, ‘Nanhu bro dukeft duka kanga, “Noheh yimam kto Bro Nkifrar tfit kasinya hanyrahm.” ’ Ka nd mrokfot kfmotpno kotimwoma.”

²² Feliksr Kristenroh dukefm bi hti hik bohiketrn to be afo kfo rafo memorm, “Awi bi nhai wom mrokfom kforhotanko. Afo amiroh krnungothet Lisiasr bi niere, ee nikmoh mrokfot yak marnya hiruhanko.”

²³ Inji kfonimormn Feliksr sinyahato amiroh ofisar kfo memorr, “Porr yaknikahr afo rumgat wahtatwanr. Mirahn tamoh tamoh nefm kfo rafo bugayanr. Turhu yimatm kangm, ‘Tamohm ahenomr,’ ndm rom nhai mrokfom.”

Porr Feliksr yakhato hus gunyijmf kalabus htamo yuhat

²⁴ Dfik marm tohnhato Feliks Drusila sawohf niamof. Drusilat Juda kott. Niahato Feliksr afo Porr nakuyak-hato memor, “Afo wom mrokfom afo awanyanr.” Porr niahato Kristenm Jisas Kraiser hikwa yuham kfo hik bohik nuhasmorr. ²⁵ Tamoh tamoh nefroh duka marnyahato rhu marnya nmbuham yo wuroh yihar Bro Nkifrar kotkfot yakitohruhat, nd nd mrokfom Porr kfo nuhasmotrr Feliksr fakrmemor. Yakrmehato kfo memorr Porr, “Wanju. Kto wom rhu fura yihamn tfit nakuruhann.” ²⁶ Wom dukeft Feliksr dukamoat duka memour, “Porr hirahra maruham.” Nd dukeftpno yiha yiha Porrpno yihato pthamou.

²⁷ Kto hus gunyijmf yinyimotf Posias Festusr fakmort Feliksru tkitt. Feliksr memor, “Judaroh yima yuhum ayak marnyayanm.” Ndnatn Porr kalabus kafkne tanyomorr.

25

Porr pthamor Sisarpno rorhu kotkfothu tfit wanyheneft

¹ Festusr turhu profins yi mfnahmor. Mfnahhato husfirpa yiham tohmor. Husfirpa yiham Sisariat toh tanyhato tfit Jerusalemko yimor. ² Jerusalemt mfnahmotr bro prismi Judaroh bro yimam kfo huttt memomr, ³ “Kangn, nmoh yima yuhum ayak marnyayanm to bt nd yimar wakfafkahtn anietwar asha Jerusalemko.” Yuwi memom, “Inji kfo nnehakhato mirahr, ‘Aneya,’ yihotat rhu rafakhato wasrahnomr.” ⁴ Festusr sinyahato kfo memorm, “Porr Sisariat kalabus tohwor. Na asha be dfik yiham toh tanyhato tfit Sisariako tuka yiruha. ⁵ Ndnnetn nikmoh bro tohak yimam nanpno Sisariako aiswam. Aikahmn nd yimarhu nefm kotkfot htahato htikfot.”

⁶ Festusr rompno Jerusalemt 8-pela o 10-pela marm toh tanyhato Sisariako yimor. Sisariat yihato marr rhumo yiharn kotyuk kunys yihato kfo memorm, “Porr wayakkomr.” ⁷ Porr kotyuk kunys yi mfnahmotr nd Jerusalemko toh tany yimo bro yimam kot mtohhato rroh mrokfom mtumomm. Be tu krho mrokfom tumom. To nd rroh mrokfom be mtu furamomm. Nhahi tu mna duha mrokfom ptharmom. Be kfo wok fura bofuramomr. ⁸ Porr sinyahato kfo memor, “Na nhai wom tamoh neft narmoya. Na nhai Judaroh boririfhu mrokfom faso kformoyanm o Judaroh nkifra rmontn o Sisarn. Nhahi.”

⁹ Festusr memor, “Judaroh yima yuhum ayak marnyaya.” Ndnnetn ttiwonmorr Porr, “Nine Jerusalemko yinyefte yibonwo? Yi yibonwone ee btn wusha Jerusalemtn ninhu kotkfot wany hiruhann.” ¹⁰ Porr sinyahato

kfo ptha memor, “Ndar na tohwa kunys asot Rom gafmanrhu kot wanyuk kunys. Asot ndar kunyrpat kot wanyuk kunys. Ni tu tawisafwo na nhai wom neft narmoya. ¹¹ Na wom neft mnamota kangm, ‘Awasnomr,’ to na nhai yakmekfot. Nd rom kotkfot htewat nhai mna duhatet. Na nhai be rroh tirmn yi furakfot. Na kfiwa Sisarn nanhu kotkfot bi htewant.” ¹² Be Festusr rorhu kaunsermpno rruhato naphthamomn kfo memor, “Ninhu kotkfot Sisarpno htamont to be bi Sisarpno htewunomn. Rorn wany hirahrn ninhu kotkfot.”

Porr king Agripa Bernaisirofpno hanyomo yuhat

¹³ Wom yiham rhunihato king Agripari turhu mndarem Bernaisit niamof Sisariat. Memof, “Aikahnonn Festusr mkfo yindhor tanyrahno.” ¹⁴ Bok yiham Sisariat tohmof. Ndnnetn Festusr kingrpo yihato Porrru mrokfom kfo nuhas bonuhasmorr. Kfo memor, “Tor wom yimar Felixsr kalabus htamotr tor kalabus tohwor. ¹⁵ Na Jerusalemto yimohat htimoaya Judaroh bro prism yo eldam rorrpar krhopam htahato kfo memoma, ‘Inji nayet yimar was hehur thukfot.’ ¹⁶ Inji kfomotma tfit kfo wok memoyanm, ‘Nom Rom thofnom nhai ndhtet nef duhatenom. Nhai wom yimar mrokfot tafi frhikak duha be bmbri was furaknikahnomr. Nd yimar mrokfeter afo nd kotimiyuk yimampno natoh natohhato mrokfo pthakfot.’

¹⁷ Ndnnetn rom asha nanpno niamohat nhai wom kuknarmoya rroh kotkfothu yakitohneft. Hwe fnah ndwom marrn na kotyuk kunys rruhato nakumoyanm nd yimarhu niahato rroh mrokfothu toh pthaneft. ¹⁸ Nd ror kotimiyuk yimam tohmom to memoya, ‘Rorn kotim twanhiwum.’ To nhai. Nhai wom tamoh tamoh nefm ror nayukn ptharmom. Nhai. ¹⁹ Be nd turoh lotu yuharoh kfo nambur nmbuham, ‘o nhai nd yimar tunmoh nkifra lotu yuhat yak hikkahr,’ nd mrokfom pthamom yo jisars nohmohat, ndm kfo pthamom. Porr bi kfo memorm, ‘Jisars nohmohat to mirahko ka yopt tohwor. Nhai. Ror bi sinyamor.’ ²⁰ Memoya, ‘Mrokfo mna yuham afo frhik bohik marnyakruhanr.’ To nhai. Nhai yima yuhur afo yak marnyarmoya, ndnetn kfo ttiwon titamoyanr Jerusalemko yihato tfit wompam frhikak marnyanef. ²¹ Porr tfit kotkfot kfo memort, ‘Na kanga afo rumgat tohkahann kfo Sisar tfit nanhu kotkfot wany hirahra.’ Be Porr inji kfomotr be rumgat afo htanymoyanr. Kto tfit Sisarpno rorhu kotkfot kotrahrt.” ²² Agripa sinyahato kfo memor, “Na kanga na tukann afo rorhu kotkfot wany hiruhanr.” Festusr memor, “Nohokn bt wawany hitwanr.”

²³ Hwe fnah dbha Agripa Bernaisi-rof kotyuk wondht wondh hmbrinehato kotyuk kunys yimof rpatn nd taunthu bro tohak yimami amiroh bro krnungothetm. Nd kotyuk kunys bi kawondh hmbre bugamomt. Kotyuk kunys rim rhumotm Festusr kfomotr Porr tfit faknamomr. ²⁴ Porr kotyuk kunys rim tohmotr Festusr kfo memorm, “Wahti bugako ndar yimar. Jerusalemto tohyuk Judami asha tohyukm bro mrokfot kfo memom, ‘Nd yimar wawastwanr. Mirahr nd yimar wom aruha.’ ²⁵ Na inji wanyhato kfo memoya, ‘To ndar yimar tamoh neft namotr yamukoma, “Wawasnr?”’ Turn sinyahato kfo memor, ‘Nanhu mrokfot Sisar afo wany hirahra.’ To be na rorhu tng yuhat hikhato memoya, ‘Sisar wany hirahr.’ ²⁶ Ror barkof kotkfot toh hnamohat tafi mrokfom yak marnyarmoyanm, ndnatn nhai rorhu mrokfom gontwat htahato nmoh bro yima Sisarpno htafrmoyant. Ndnatn king Agripaye yo niko bro yimako, nikompno ndar yimar hnewanr.

Rorhu mrokfom ptharuhatrm wany hik marnyahato gontwatn rorhu mrokfom htaruhanm. ²⁷ Be yimarhu mrokfom yak marnya he duha Sisarpno htafneft, ndt nhai hifat.”

26

Porr King Agriparpno kfo pthamo yuhat

¹ Agripa kfo memorr Porr, “Ninhu mrokfom wakfo ptha dbruftwanm.” Porr inji wanyhato tirt kasinyanihato kfo ptha memor, ² “King Agripa, na duka kanga, hifa nanhu mrokfom ninpno ptharhotanm afo wanyrahnm. Judam kfo pthamo mrokfom tawo tfit nanhum ptharhotanm afo wawanswanm. ³ Nom Judanom nmoh toh nmbuham, nmoh yirmoht, tamoh tamoh dukefm ni bi tawisafete. Ndnetn kanga afo rhu wawanswanm nanhu mrokfom. Mirahn bi ahhreka.

⁴ Na habhiyena ritohakmohat tukanhu kantriko toh yo Jerusalemko toh inji toh hnamoya. Nanhu rhu toh nmbuham Juda bugam hti hnamomm. ⁵ Bingot bi rihtiyakmoma. Kngm nanhu nefm womm akfo ptha srh nuhasnom to nhai mrokfom. Htimoma na toh hnamohat. Na Farisiroh toh yuham toh hnamoya. Rroh nefm be tu yima duka marnyahato rim tohnikfot. ⁶ Na asha kot tohwohat, na bi Bro Nkifrar nmoh nkifrapno kfo htanyuk mrokfom na yakitohhato kanga fipett rhuraht, rom inji hti namburhato kotimwoma. ⁷ Nmoh 12-pela tangim Bro Nkifrar yiha yiha yifung mar kfo tathato kakitohwonomr. Bro dukefm Bro Nkifrar yihato duka kangnom, ‘Afo ror kfiwa nefm afo htirahnom.’ To kinge, na to nd dukeft duka hasiwota rom ndt htihato kotimwoma. ⁸ Tamohmpno niko womko kfo yamukako, ‘Nom mduka nhiyekwonom Bro Nkifrarhu noheh yimaroh tfit kasinyaneft?’ Wadukako, Bro Nkifrar bi kfomor yimaroh kasinyaneft kasinya mifrahm.

⁹ Bingot na tohmohat boknambok nefm namoam memoa, ‘Nasaret thof Jisarhu yufat amifnahnit.’ ¹⁰ Na Jerusalem tohato nd nefm namoahat bro prisroh tngtn hikhatu bok yimam Jisar hikmoam yakmoayanm kalabus htamoanm. Waskfot kfomoahat na rompno fknehato kfo memounom, ‘Wawaskomm.’ ¹¹ Na nd Kristen yimam riyak bebakmohat turoh rhu rifinyuk rmonm hik hafknehato rim ki bokiyakmoanm. Memoa, ‘Inji ayak bebkahtanm Bror yafho thurahmr.’ Yima yuhur nambur kihhato fitoh fitoh taunm tohetm afo rim hikak mhikakmoanm nhai rroh wom kafrohyuk tkitm.”

Porr kfo pthamor rorhu fasoh nefm mong trohhato Jisar hikmo yuhat

¹² “Bro prisroh tngtpno memoya, ‘Yiruha Kristenroh yakt.’ Damaskusko yita yihotar yimoya. ¹³ Yihotat yau hanymoyann dany marrn wom nukeft yura moun yuhat fawihnamot. Be tu mfro mif funamot. Marrhu funeft rot be inji. Funeft nann fak yukiohmot. Nanpno yau hanyuk yimam nd funeft rpat fak bugamotnom. ¹⁴ Nd funeft yakmottnom nd yau hanyuk yima buganom bbinysoft suhnasuhmonom. Suhnasuh hanyetnomn wom tngt Hibrukfofn kfo memot, ‘Sor Sor, na tamoh dukeftpno be kak bebwona? Ni be tu hura krt tu frtatotwo.’ ¹⁵ Na nd tngt wanyhato kfo ttiwonmoya, ‘Broye, ni frohe?’ Bror kfo memor, ‘Na Jisasa. Ni nd niwa nefm Kristenmpno nhai romn yak bebkaht. Nann kak bebwo. ¹⁶ Be tfit wasinya watohn. Ni bi nanhu mrokfothu kfo hta htasyuk yima bi kak htewann. Nd

dukeftpno mifnahann. Yo ni asomif htitwa nefm, kto yak nuhasruha nefm, nd ndm wakfo srh nuhas hanyswann. ¹⁷ Ninhu toh nmbuhat tfit nndo yak htaruhant. Tunhu kni thofm yo yima tangim, ndm yak beb thombat nann hbhakruhann. ¹⁸ Nann yakrhoyann nyinga kunyjet nyinga kunyjetm ninn nyingam yak dborha htfasrahnm. Nyingam yak dborharuhatnm yima yuhum yak kebokthato kspitat htanyhato mar tafont rim tohrahm. Satanr ki jbkafteowohat nd mtitikt mfrtebikrnhato Bro Nkifrar-pno rim tohrahm. Inji nahato rroh fasoh fasoh nefm yak thuhato be nd bi na hiket yimampno yufa yakhato Bro Nkifrarhu yonm rhu bugarahm.’ ”

Porr Agriparpno turhu misin hingrneft kfo pthamo yuhat

¹⁹ “King Agripa, na nd nefm htimohat nhai rorhu tngt hanyjbornarmoyant. Nhai. ²⁰ Na wany yakiohato rorhu mrokfom tuha Damaskus yo Jerusalemko yo yima tangimpno mrokfot kfo ptha htfas bugamoyant. Kfo memoyann, ‘Niko yima yuhum wayak kekutkahkomm Bro Nkifrar wahikko. Hikhato tu yima yuhu yak kekutet yimam tohwa kanjo inji tohkfot.’ ²¹ Nd nd nefm namota Judam yiro rmont fakmoma. Yakhato kangm, ‘Awasnomr.’ ²² Bro Nkifrar toh tkaf hnamora, nhai yafho thurmora. Yakitoh hnamotra na tohhato na href asha tohhato mrokfom pthiwotann yima furam, yufet yimam rpat wanukwomm nanhu mrokfom. Na pthiwa mrokfom nhai wom fitoh mrokfom pthakaha, bi nd nkifrapmpno profetm ptha htayuk mrokfom yo Mosesr ptha htayuk mrokfom ndm pthiwa. ²³ Nd nkifrapmpno pthayuk mrokfom kfo hta memom, ‘Kraisr krhopam yakhato nohhato tfit sinyarahr. Sinya thombat rorn sinya gngonrahm wom yimam. Sinyahato yima tangim minrfa htihak yuhat kfo ptha nuhasrahm.’ ”

Porr Agripa kformor Brorhu hikneft

²⁴ Porr inji inji mrokfom pthamotrm Festusr wafohrfatmor, “Por ni ka bi mumiwun. Masat skurwann nd safekfotn bi kak mumiwutn.” ²⁵ Tfit Porr sinyahato kfo ptha memor, “Bro yima Festuse, na nhai mmohato mrokfom pthakanann. Tu mrokfot kfiwa. ²⁶ Kingr, ror nd mrokfom bi wanyeter ndnetann nhai yakrmehato ptha nuhas hekahanr. Nd na pthiwa mrokfom bi turhu nyingaye htimorm to turhu yimbhindange wanyorm. Nd na kfiwa nefm nhai be yak hamong-rmom. Yima yimam hti bugamomm. ²⁷ King Agripa, profetm pthiwa mrokfom nine wany yakiowonm? Awi htitan wany yakiowonm.”

²⁸ King Agripa sinyahato kfo ptha memor, “Pore, ka be kak kekut twanhiwuna?” ²⁹ Porr memor, “Yihof href, yihof href na kfo bruttna kanga nini ndar wany yakitohwa yima bugako kanga asomif na Jisasr hikwa kanjo wahikko. Mirahko ka na kalabus tohneft kfiwurnom. Nhai.”

³⁰ Porr inji kfonimotr be nd kingri Festusr, Bernaisit, yo wom yimam rpat tohmom fnahnimom. ³¹ Fnahnihato tum rim toh rifinyhato kfo ptha memom, “Ndar yimar nhai wom neft namotr yamukanom, awasnomr o kalabus atohr.” ³² Agripa sinyahato Festusr kfo memor, “Ndar yimar be Sisarpno rorhu mrokfom ahta duhat yirm be href fnahrfor.”

Porr Romko yimor

27

(Sapta 27–28)

Porr Romko yimo yuhat

¹ Italiko nmoh yiyuk mrokfot bi kfo htatamomt. Porr yakmomr wom kalabusmpno ofisarhu tirtn htamomm. Nd ofisarhu yufat Juliusr. Sisar bi kfo tkrurafmorr. ² Adramitiumroh sift memot, “Esia profins yuhathir hanyhato sifroh bekfam dbkaf hanyruha.” Inji wany-hato to be nd siftn Masedonia yorhwa kmi Tesalonaikathu yima Aristakusr rpat yimonom. ³ Hirhany hirhany ndwom marrn Saidont midbkafmonom. Juliusr dborioh neft namorr Porr. Hti marsisamotrr Porr rim suhnihato turhu yimatmpno yihato nuwa tamohm turhu yimatmpno fakmor. ⁴ Be tfit sift kmbrenihato yimonom. Yihany yihany wifortn tfit yaknimotnom kmi yumb Saiprushu mongko hanyomotnom. ⁵ Be bro marombt inji hir hanyhato profins Silisiati Pamfilia hir hagrotnimonomn Lisiakorhof kmi Mairat mfnahmonom.

⁶ Mairatn Aleksandria thofroh sift memot, “Italiko yiruha.” Nd ofisar kfo-motnom nd sift tfit kmbremonom. ⁷ Be nd Italiko yiyuk sift kmbrenihato yimonom. Sift nhai hir yukermot. Be nd hir you hanyasn bok yiham yimom. Wurohnam wurohnam Nidas mfnah-monom. Ndharn wifort mfro mfro sinyamott to be nhai wom hir hanykfot. Be Salmonethu kmi ktu yuhathir habrinihato kmi yumb Krit yuhathir yimonom. ⁸ Hta nhimounom sifthu yak hta bohta hanyneft. Ndnnetn brbo nambispno hir sshanymonomn wom kmit mfnahmonom. Nd kmit kutewumt Sifroh Dborioh Bekfat. Nd kmi korhwot brbo taun Laseatpno.

⁹ Be nd marombthi hir hanyasn bok yiham yimom. Judaroh nuwa kurhato toh fura yiham be nd marombthi hir hanyasn nd yiham yimom. Marombt fifrtumotn burifhum memom nndo kminyinsofem. Be Porr inji htihato kfo memorm, ¹⁰ “Bar yimako, na kanga mirahnom nda tekt inji htini hany mirahnom anhombranom be bok wuskam marombt yirahm. To mirahko ka wuskarpamn o sifrapatn, nhai yimam rpatn burifhut yak namotku hmbriyafrahm.” ¹¹ To nhai, ofisar nhai wany yakiomort Porru mrokfot. Nhai. Tu sif tikatri sifthu keptenrhu tng yuhathir hikmor. ¹² Nd rom mdbkafmo bekfathir bro burifhu sinyayuk tkitt mdbkafmom. Ndnatn bok yimam inji htihato kfo memom, “Ndar tkitt ahtanykahnomt Finisksko ainyom.” Nd tkitt kmi yumb Krithu sautko yorhwatn kukyohwot marr yhnitako. Finiks yorhwa sifroh bekfathir hifa nhai burifhum mfro mfro sinyakahm. Ndnnetn memom, “Nd burifhu sinyewa yiham afo Finisksko mtohrahnom.”

Wifort sinyahato marombt mfro natonmo yuhathir

¹³ Wifort bi noh hmbre hanyettn duka memom, “Nhai mrokfom. Tunom kfoyuk yifau yuhathir marnyanirahnom.” Sifthu ankakfot yak kmbremomt be Krit mkuyef yuhathir hir hanyomom. ¹⁴ Hirhany hir hanyomomn asha bro wifort kutewumt “Notkorhof Wifort.” Kritko wawifor sinyamot. ¹⁵ Be nd wifortpno hirhanyasi hirhanyasihato be wiforeftn hanyomotnom. ¹⁶ Be nd wiforeftn hany hanyomotnom kmi yumb Kaudathu saut mkuko mihirmonom. Ndharn memom dingit atehaknomt to nhai wifortpno nhombrati nhombrati wurohnamn yimaroh bbukapampno fakmomt. ¹⁷ Yakhato yura siftn teh hamuhhato baklain tofm yakhato sifpno dbkafmomt. Dbkafnihato wom baklain tofm yakhato tu sift kiboki-momt. Memom inji nakahtnomt nhai burifhut dbmbraruhatt. Be inji hingrnanihato wiforeftn hanyomotnom. Be inji wiforeftn hany hanyomotnom memonom Afrikatpno brbo yorhwa rifkfotn sift mrhutarahthir. Be inji dukahato sifthu hatonayuk sertham yak dbourakmomom be sfno hir hanyomom. ¹⁸ Ndwom marrn

wifor bum masat masat yakaknimotmnom be sift rhuyuk wuss marombtn dbuhafmomm. ¹⁹ Wifor bum yuhre toh hanyetmn hwe fnah ndwom marrn tu sifthu hingera wuskam dbuhafmomm. ²⁰ Bok yiham be nd wifor bum frmno hatohmotmnom nhai marr o gunym htirmonomm. Nhai marimonom kmim mfnahrahnom. Bi memonom marombtn mmbrawonirahnom. Yima yuhum bi inji duka hanyomnom.

²¹ Bok marm nhai yima yuhum bi mirhurmotm nuwa yemaska inji narmonom. Porr kfo memornom, “Na Krit kfomo tngr wany yakiohato ahtany duha yinomt nhai yonmari wuss marombt yirfott. ²² Na asomif bi kfiwanko. Mirahko yima yuhum aduka yanhomnom. Nhai nmoh womr tekt yohnitatr, sifprat yohnitt. ²³ Na Bro Nkifrar hikwa yimaya. Rorn yak htamotra rorhu hingerneft tohwa. Hrek yifungt Bro Nkifrarhu mounmotr nanpno brbo mtah hanyhato kfo hany famura, ²⁴ ‘Pore, mirahn aduka yanhoya. Sisarhu nyingako wantohtwa. Wawany, ni kfo bruttnamohat bi Bro Nkifrar wanyhato nd ninpno sift yorhwa yimam nhai finji naruhatm. Rhu bugarahko.’ ²⁵ Ndnetn na kfiwanko, mirahko aduka yanho inji nahanyom. Nanhu bro dukefr duka kanga, Bro Nkifrar nhai kfo furarfora. Ror kfi yuhat hikhato nhai womr marombt yohniruhatr. ²⁶ Nanhu dukeft duka kanga inji hir hanitanomn wom kmi yumbr sift yihom rhutewut.”

²⁷ Be hirhany hir hanyonomn 14-yuk marrpno wom maromb nmbuhat kutewumt Mediterenian, ndha hirmonom. Yifung dany boskrum yimam kfo memom, “Bi wom kmi yumbtpno hir hanitnom.” ²⁸ Marombthuhafott yakmomt tek dany yuhat makimmomt 40 mites tfit wompenm rihir kkof hanyhato tfit makimmomte 30 mites tohmot. ²⁹ Be inji makimnihato duka memom, “Nhai tfit wompam rihir hanyruhatnom. Yura tahim sift mrhutarah.” Be inji dukahato sifthu yifihikorhof 4-pela ankam yakhato fahho thumomm. Be ankam yafho thuhato yihathu yudbat nuka dimandineftn kfo bruttnamoum. ³⁰ Sifthu boskrum memom, “Ayakrmanyinom.” Ndnetmn dingit yakmomt sifthu mfha yuhatn fahho thumomt. Yuwi kfo nheh memom, “Mfhakorhof ankam kahho thuwonom.” ³¹ Porr inji htiafom hanyhato soldiaroh ofisari soldiam kfo memom, “Nd yimam sift htanywomt be niko yimako nhai yorhwatko.” ³² Be soldiam dingithu mtitofit pufafomotmt suhmot.

³³ Nitre twanho hanyruha ee Porr yeshriyenroh ye bmta nmbuham kfo ptha memom, “Yonmari yiham nhai yima yuhum bi mirhurrotmnom nuwa ye dukefm niarrom. Wur yonmari 14 marm be inji nuwa ye juha toh hnaronom. ³⁴ Ndnatn na kfo bmta mrokfot kfiwanko, afo nuwa waye bmtako. Wawanyko, nhai nikmoh womr finji naruhatr. Hoptt rhu buga marnyarahko.” ³⁵ Kfoni hanitaromn ror bretpat yakhato rroh nyingahato Bro Nkifrar kfo yindhornihato yak tifhato kiyaknitrt. ³⁶ Be nd yimam inji htiafom hanyhato rom yima yuhum mirhuhato rom nuwa fe mska inji namom. ³⁷ Nom nd sift yimo yima-nmoh nambakfot 276. ³⁸ Ye furkih marnya bomarnyamomn wom witkfot yakmomtn marombt tubatumomm. Memom, “Bok wuskatpno sift yohnitt,” ndnett wom witkfot tubatumomt.

Sift tekthu natonpam frmku bomkumo yuhat

³⁹ Marr mta fnahmotr boskrum htimom wom kmit. Htihato memom, “Fitoh kmiyet?” Be htimom wom bro tek yingaftr rim htahato nungum htamor. Htihato kfo ptha memom, “Yinyeft to nd nungumn sift witarfot.”

⁴⁰ Be nd sift hatohmo ankam puk thumomm. Yifhikorhof mnangf hatohmo mtitofrapf be nyusakakmomfn mnang husf fafho thumomf marombt. Yo wiforparoh yakyuk serthat kasinya-momt. Kasinyamotmm sift nungu thmbko ritone hanyomot. ⁴¹ Ritone hanyhato dany nungur sift tone hamuhhato mrhutamat mfhakort. Yifhikorrapa nhai mfro mrhutarmot, ndnetn burifhut rim fur mfurmoatt yihom thuta mthutahato frdbombra wumtmott. ⁴² Soldiam memom, “Kalabusm fune fnahhato yakrmenirahm,” ndnetmn memom, “Atufnah-nomm.” ⁴³ Soldiaroh ofisar Porr mdukakhato kforafo mrokfot kformort. Memorm, “Mirahko inji ananom. Frohm funayetem rom funenihato be nunguko yi hanykfot. ⁴⁴ Frohm fune duhatem romne, nd sifthu pran mkum, marombt frdbombra tubatutam, ndmn mhutahato funeni hanykfot.” Inji kfo hta bohta barnyahato be nd yuhath hikhato nd yima bugam nungu thmbko yi bugamom.

28

Porr kmi yumb Maltat tohmo yuhath

¹ Be kmi yumbrpar rim tnwa bugamonom. Nd kmi yumbrhu yufat wanymonom kfo memom, “Maltayer.” ² Nd kmi thofm dborioh nefm fak nuhasmomnom. Bro bruyohr niamorn frfon bugamonom. Nd kmi thofm inji htihato kahm thunahato kfo memom, “Wania wahaunyoko.” ³ Porr nyumm yak habrimoarn kaht mthunamour. Nyumm thuna hanyetntr to yiro nyumtn wom nandomr rhumor. Kaht yakmottr fnahnehato tirt foutamotr. ⁴ Kmi thofm htimomr nandomr yimarhu tirt youtahato yimar hatohmoatrr kfo memom, “Nd yimar ka wom yimam wasmor. Tekt funenehat nhai nohrfor, ndnetrn nd ror wasmo yimaroh nkifram htihato kfitm, nd nandomr nihato fwitr.” ⁵ Porr nd nandomr hifa pkriyafomotrr kaht yimor. Porr nd nandomr wasmohat yimar nhai finji narmor. ⁶ Hti haso memom, “Afo htirahnom Porr nandomr yawohat yubtorahr o suhrahr.” To nhai, hti hasoti hti hasoti nhai suhrmor o finji narmor. Inji htihato kfo memom, “Nd yimar ka tahi yifoner.”

⁷ Nd kmitpno brbo rhuyuk bbinysof nmbuhath kmithu bro yima Publiusrhu bbinysof nmbuhayet. Nd yima Publiusr rorhu kmifako hanyomnom rorpno husfirpa marm tohmonom. ⁸ Publiusrhu yifemr dbohnefti rikmbuheft yakmottr rhumor. Porr yihato kfo bruttnamorr yo tir htahato fak marnyamorr. ⁹ Inji namotr wom dbohnet yimam inji htihato yi hanymoatn fak marnyafu hanyomnom. ¹⁰ Nom nd kmi yumbr tohmohat hifa hifa fak marnya bomarnyamomnom. Kto tfit nom nd kmit htanyhato yimohat hti nhtamom, nom nd nd duhatenom, rrohnm yak hanyhato sift htafohemomnom.

Porr Romt mfnahmo yuhath

¹¹ Maltat afo husfirpa yamm ndha toh tanymonom. Nd wifortpno Aleksandria thofroh sift nd kmi yumbtn afo wifort garimout. Nd siftn tfit kmbrenihato yimonom. Nd sifthu mfhakorn nkifra Susrhu hus yonfhu nyingatikm rhumom. ¹² Be nd siftn yihato Sirakyus mfnahmonom. Nd kmitn husfirpa marm tohmonom. ¹³ Ndha Sirakyus htanyhato tfit hi hany hirhany Regiumt mfnahmonom. Ndwm marrn sautkorhof wifort sinyahato tonemot. Tfit ndwm marrn Puteolit mfnahmonom. ¹⁴ Nd kmi Puteolitn wom Kristen yimam mhtihato ndha rpa wikt tohnhomonomm.

Ndha toh tanyhato Romko mfau fnahmonom. ¹⁵ Nmoh yimatm Romt tohmoam nmoh yi mrokfot wanyakhato rom yihato mtohari hasomom Apius Maket yo husfirpa pasindia kunym tohmoa nmbuhatn. Ndha mnahtiyakhato Porr rom htihato Bro Nkifrar kfo yindhor-hato rorhu yima yuhur tfit bmtamorr.

¹⁶ Rom taun yihato soldiaroh ofisar kfo memom, “Nhai mrokfom Porr turpatr wom kunys tohneft be wom soldiarn tohnhoahato hti yukatoh hanykfot.”

Porr Bro Nkifrarhu mrokfot ptha nuhasmo yuhat

¹⁷ Husfirpa marm tohniato Porr nakumorm Judaroh bro yimam Rom taunt tohmoam. Yi rifinymotm kfo memorm, “Barenko, na asha Romko kalabus hnamohat na nhai nom tunom Judanompno wom tamoh nefm narmoyann o nmoh nkifra boririfhut kfo bebrmotant asha Romt kalabus hnarmoma. Be usha Jerusalemko yakmoma Romroh tirtn hta furamoma.

¹⁸ Romroh tirm htamotma Rommpno nanhu mrokfom pthamoyanm. Rom nanhu mrokfom wanyomohat nhai mrokfom faso yirmom. Hifa wanyhato memom, ‘Ni nhai mrokfo duhate.’ ¹⁹ Tfit Judam inji wanyhato rom nhai yindhormom. Be ndnatn memoya, ‘Sisarn nanhu kotkfot wanyhirahra.’ Na kotmohat nhai marimoya, ‘Tfit tu Judam kotimruhanm,’ nhai. ²⁰ Nd dukeftpno niko memoya, ‘Aniekahtm mrokfom hiruhanm.’ Nanhu bro dukeft Bro Nkifrar htahato kanga nom Isrernmoh nrfa htikyayuk yimar bi niamor. Ndar na hatohwa sent to nd yuhatpno ndar sent hatohwant.”

²¹ Tfit Romt tohyuk Judamn kfo memomr, “Nom asha tohyuk Judanom nhai Jerusalemkorhof Judam wom gontwam kfo ptha srhrmorn ninhu mrokfo nmbuham yo nhai nmoh womr ndko toh tanyhato faso mkfo bebrmorn o mkfo ptha wokrmorn. ²² Nom kangnom ninhu yima yuhurhu mrokfom ni tunhu tnge wakfo ptha nuhasnorn. Nd ni yauwa nfri yihotat kmi kmim tohwa yimam kfo wok bowokwomt. Ndnnetnomn kangnom ni tunn waphthakahn afo tfit awanyorn.”

²³ Be rifinyuk yiham tu Porrpno yudbat yak nhtahato kfo memom nd yihar. Be nd kfomo yiharn wom wom met yindari bugam rpat yi rifinymom Porr rhumo kunysn. Dbha nd king-domkfothu mrokfot Porr riphthakmohat ptha yifungafomor. Bingot profetm kfo ptha htayuk mrokfom yo Mosesru nkifra boririfhu mrokfom, ndm ptha nuhas hik bohikmorn. Memor, “Mrokfom kfo nuhas hik bohik marnyarhotanm yima yuhum sinyarahmm Jisasru tfit yakitohneft.” ²⁴ Wom yimam nd ror pthamo mrokfot wanyomohat fak duka tungunamotm. Wom yimam nhai, nhai wuyakrmomt. ²⁵ Be nd yimam tum nhai rpa yima yuhurparpno yirmom. Nhai. Womm wom yima yuhurpno yimom, womm wom yima yuhurpno yimom. Memom, “Yauyakninom,” afo Porr wom mrokfot kfo memorm, “Bro Nkifrarhu Yafothat nmoh nkifrapno profet Aisaiarpno tu kfo mifmifmot. ²⁶ Bro Nkifrarhu Yafothat kfo memot, ‘Waikahnn wakfo nuhas wamitwann.

Ar yonmari mrokfor wany wanyruhakomn nhai wany sakriruhatko.

Ar yonmari htit htiruhakomn to nhai htiruhatko.

²⁷ To tamohmpno nhai wany sakriruhatm, o nhai htiruhatm?

Nd yimaroh yima yuhum nhai wom dborihok dukef duhatem.

Wanyuk yimbhindangm bi be, bi kihmnimomm
yo yukatohyuk nyingam bi kunyj kihmomm.

Inji ana duhat yima to nyingam yukatohrfomm,
yimbhindangm yima mrokfom wanyrfomm,
yima yuhum dborioh dukefetm rhurfom.

Dborioh dukefetm rhuhato yima yuhum yak kekuthato nanpno tfit niar-
fom.

Niarfotm na yak marnyarfoyanm.'

Ais 6.9-10

²⁸ Niko womko na kfoyuk mrokfot nhai wuyakrfokomt, ndnettn waduka-
twako. Nd nmoh nrfa htiyakyuk mrokfot be bi kitt yima tangimpno. Bi
yitatt rom wanyhato wuyakraht."

²⁹ (Porr nd mrokfot kfo nuhasafo-motrm kmiko yihato tfit tum ri-
natuhakhato natkbotkmom.)

³⁰ Porr hus gunyjimf wom kunys yakhato wikna hanyhato tohmourt.
Turhu toh kunys tohhato yimam mrokfefetm yimoahat kakmourm. ³¹ Bro
Nkifrarhu kingdomkfothu mrokfom yo Bro Nungothet Jisas Kraishu mrok-
fom, nd ndm nd kmit tohhato kfo nuhas bonuhasmourm. Bro Nkifrarhu
mrokfot Porr nd kmit pthamohat nhai yenyjworfnano ptharmor. Nhai.
Mrokfot kfo ptha bromort. Ror Bro Nkifrarhu mrokfot kfo pthamohat nhai
wom yimar kfo raformorr pthaneft.

Rom thofroh gontwat Porr dwandfakhato htafmot Barkof kfo nuhas mrokfom

Porr bro kmi Romko tohyuk Kristenmpno tohni hanyhato tfit Spenko yihato gutniuskfot kfo nuhas yibonetrn ndar kfo nuhas gontwat Rom Kristenmpno bi htaf hanymort. Ndar gontwatn Kraistrhu gutnius mrokfom wandfa hik bohik nuhasmorm. Jisasr hikwa yimam tohwa yuham, nd ndm kfo nuhas bonuhasmorm.

Barkof mrokfom afo kfo hambonna mrokfom hemorm. Ndm kfonihato tfit rom dukahato kfo bruttnamoa yuham kfo nuhasmorm. Ndm kfo nuhasnihato ee ndar gontwat rompno wandfamo yuhat kfo nuhasmorm. Kfo memorm, “Kangko Bro Nkifrar yima rifhumio ahti wutharnom, Jisasrhu mrokforpam yakitohhato hikkfot. Hikrahkomm Bro Nkifrar nikmoh yima rifhum hti wutharahm” (1:17). Porr kfo memor, “Nhai wom dborioh yimar tohkahr. Fasoh nefrpam kmi kmim furkihwoomm. Tu Judami yima tangim be nd ruhefrpat korhm. Ndnettn Bro Nkifrar inji hti yuhuwafhato turhu yon Jisasrpnno bro hingrneft hingrnarmort. Jisasrn yihotat fak hta bohtarmort. Fitoh yimam Jisasr hingrnamo hingrneft mhtiyakhato rroh bro dukefm rorn htemm, nd yimam o metm yakruharm turpno rim tohrahm. Rim tohhato Jisasrhu nmemrom rhurahm.”

Fitoh yimar Bro Nkifrar bi yekrr turpno brbo fak hterr, nd yimar nfri toheft, nfri wuyayau nmbuhampno tohwor. Nd yimar Bro Nkifrarpnno tohwarn Bro Nkifrarhu Yafothat yuht yimar thu nhombra bugewatt; nhai fasoh fasoh nefm o noheft niahato yak kasuhkfot. Sapta 5-8 Porr kfo hik bohikmorm Bro Nkifrarhu kfo yirmoh mrokforoh mna yuham yo Jisasr hikwa yimam Bro Nkifrarhu Yafothat thu nhombrahato hingrnawa bbukeft. Ndm kfo nuhasmorm.

Sapta 9-11: Porr yakmo wom bro krho nmbuhathu mrokfom htamor. Porr Judayer. Bro Nkifrar nd Juda frikeftn kfo memor; “Juda frikeft tom tu tannefenm.” Jisasr nda bbinysoft niamohat, Judam nhai Jisasrpnno brbo yirmoam. Yima tangirpam Jisasr brbo yimoum, tu Judam nhai. Porr kfo memor, “Nd tu tannefenm (Judam) nhai htermomt nd Bro Nkifrar hingrnamo hingrneft. Rom dukahato hingrnarmort nd bro hingrneft. To niko mirahko ka Judam inji namo nmbuhat ka Bro Nkifrar htihato nhai yakruhatrm. Nhai. Kto rituhakruharmn turpno rim tohrahm.”

Gontwat htamo wuroh mrokfom Kristenm nayuk nefm, ndm wurohm htamorm. Nd womroh yak marnya nmbuham, yo Bro Nkifrarhu hingrnefroh hingrna yuham, yo gafman hingrneft tohyuk yufet yimaroh yinhithu toh yuham, ndm wurohm kfo pthamorm.

Jisas Kraistr yakitohhato hikneftn Bro Nkifrar yima yuhum hti wuthewurm

(Sapta 1–4)

Porr yakmo aposer hingrneftu kfo nuhas mrokfot

¹ Na Pora, nann ndar gontwat wandfiwanko. Jisas Kraistr nann aposer hingerneft fak htamor. Na be rorhu yinhitn tohhato nd aposer hingerneft yakitohwoyantn Bro Nkifrarhu gutnius mrokfot kfo ptha htfaswant.

² Bi bingot nkifrapmpno tohmo profetmpno Bro Nkifrar kfo nuhas memorm, “Kto kmi kmim nanhu gutnius wany bugarahmt.” Nkifram inji wanyhato nd Bro Nkifrar kfo nuhas mrokfom gonbornngtn htatamomm.

³ Nd gutnius mrokfom turhu yonrhu kfo tndh mrokfoyem. Nd yonr tfit yima mifr kanjo miyak dborhamohat King Defitrhu frikef yuhatn mifak dborhamor.

⁴ To rorhu ruheft finji rhumor? Bro Nkifrar memor, “Athu habokknakahtanr bbinysof thofm hti hamuh mirahm, ‘Arr tu Bro Nkifrarhu yoner.’” Nd dukeftmpno yopt ruhetr kasinyamorr. Kasinyahato thu habokknamorr. Nd yonr na kfiwar, Jisas Kraiser, nmoh Nungothetr.

⁵ Bro Nkifrar nann aposer hingerneft yak htamohat memor, “Kraisrhu yufatmpno nd gutnius mrokfothu mna yuhat kfo tndh hik nuhasrahm yima tangim. Yima tangim wany hik bohikruhamn Jisasrpnno yarim fnahnerahm. Yarim fnahnehato be rorhu skurfittn tohrahm.”

⁶ Niko, yima tangiko, be bi Jisas Kraistrhu skurfittn tohwoko. Bro Nkifrar bi inji fak htamorko.

⁷ Bro Nkifrar be tu mfro dukewurko. Niko, Rom thofko, be bi rorhu yufatn korhko. Bro Yifemri Nungothet Jisas Kraiser, nikmoh yima yuhum ayak marna bomarnyakahtfko yima yuhum mirhurahtko.

Porr Romroh htineft duka hasomour

⁸ Barkof kfo nuhas mrokfot kanga akfo nuhasanko. Wawanyko, kmiyakmim niko Jisas Kraistr yakitoh kihwa nmbuhat bi kfo ptha htfaswomt. Na ndt wanyhato Bro Nkifrar tu kfo yindhor mifwanr.

⁹ Bro Nkifrarhu yonrhu gutniuskfot kfo ptha htfasneft awi kfo ptha htfaswant nhai yafho thukahant. Bro Nkifrar na hti mifwora, yiha yiham be nikmoh dukefrn korhwa.

¹⁰ Nikmoh dukefrn rhuhato kfo bruttna thoft to be nikmoh nia htiyuk yihotamn Bro Nkifrar kfo bruttniwa. Tu Bro Nkifrar n kangra Rom thofm wayau hafot htfasnm, nhai mrokfom. Na nieruha.

¹¹ Yima yuhur mfro wayibon sinyewur nikompno yihato tohneft. Kanga, nikompno anekahann kfo bmta mrokfom ahiyanko. Kfo bmta mrokfom hirhotanko Bro Nkifrar yakitoh kihrahkomr.

¹² Nanhu dukeft kanga na Bro Nkifrar yak hikwa yuhat niko htiruhakomn yima yuhum yakrahko. Yo na nhaf inji, niko Bro Nkifrar hikwa yuhat htirhoyann yima yuhur yakruha.

¹³ Wom mrokfot kanga akfo nuhasanko. Niko mirahko ka ror nhai yibonkahr nikmoh yi htineft. Nhai. Na yibon hatohmoa nikmoh yi htineft, tmifm bok nefm wuyak ayakmouma. Memoya, “Aikahann Romko tohwa Kristenm kfo bmta mrokfefm hiruhamn wom yima tangim mrokfo hemo kanjo.”

¹⁴ Ndar na hingrnawa hingerneft nhai Grikrpampnon o skur yiyet kmirpampno tohhato na hingrnakfot. Nhai. Wom riruh aruh kmim yo nd skur yi juha kmim rpat buga na tohnhohato Bro Nkifrarhu hingerneft hingrnakfot.

¹⁵ Ndnetann nanhu yima yuhur wayibon sinyewur niko Rom thofkompno yi tohhato gutniuskfot kfo nuhasneft.

Bro Nkifrarhu gutnius mrokfot tu yafothetet

¹⁶ Gutniuskfothu kfo ptha htfasneft na nhai yimtina hanykaha. Nhai. Na bi htimoyant gutniuskfothu bbukeft. Froh froh yimam gutnius mrokfot wany yakiohato hik thoft Bro Nkifrar kekworm. Afo Judam fakmor. Rom yakhany yakhanyomn, arihat bi yima tangim kak hanitr.

¹⁷ Nd gutnius

mrokfothu hik yuhatn met yindariroh yima rawofm hifa hti wuthewurm. Yimam gutnius mrokfot wany yakiohato hik thoft yima yuhum yak wus bowuswarm yima rifthum wutham korhm. Nkifra profetr nhaf inji kfo memor, “Yimam Bro Nkifrar yakitoh kihhato hifa tohwam, rom nhai mrokfom, toh nkifranirahm.”

Nhai wom hifa yufayet yimar tohkahr

¹⁸ Nd yimam, Bro Nkifrar myafho-nihato be nd fasoh fasoh nefmn fknihato Bro Nkifrarhu dukefenr rhu won duha yita yimam, miyorhekwa Bro Nkifrar namburworm. ¹⁹ Nd yimam Bro Nkifrar hingrnayuk hitwomt. To nhai nd ror hingrnayuk hingrneft mhtiyakhato yakitohkahmr, ndnetrn namburworm. ²⁰ Bi ndar bbinysoft hingrnamo yiha ritohakmo yimam bi hti hawihnamomt Bro Nkifrarhu ruheft yo ror hingrna hawihnamo wonk wonk bbukefm, ndm hti buga hnamomm. Nhai tfit wom yimar riyaktahato kfo miruhatr, “O, na nhai htirmoyanm nd Bro Nkifrar hingrna hawihnayuk hingrnfem o bbukefm.” Nhai.

²¹ Yima tangim Bro Nkifrarhu tamoh tamoh nefm, wonk wonk bbukefm bi hti hnayetm, to nhai marimom, “Tor tu Bro Nkifrar. Rorn yakitohhato kfo yindhor inji nanom.” Nhai. Mmo yimam kanjo yiro kspitat tohhato fau mmo bammomom. ²² Nd fasoh mmo rihur rhumoatrm kfo memom, “Nom hifa dukefetenom.” To nhai, mumetm kanjo mmo bammomom. ²³ Mmo bammohato tu toh nkifret Nkiframifr yafhonihato foh nungam, nandomm, yimam, yifonm, tamoh tamohm yoh nhombrahato ndmn tfit kfo tatomom.

Tuhan yindars newa fasoh fasoh nefm

²⁴ Ndnettn tuhan yindars to nd fasoh fasoh nefm nayetmn Bro Nkifrar fukatoh marsisamorm. Yukatoh marsisamoatrm turoh fasoh fasoh nefm hatonemoatrm yau fohroh nefm hikmom. Nhai tu yimaroh nefm hikrmom. Be tu yimaroh yak yimtnayuk nefm namom. ²⁵ Tu Bro Nkifrar yak nuhasmo nefm yafhonihato tfit turoh yifonm kfo tatohato hikmom. To Bro Nkifrar torpar tu yiha yiha kfo tato hatohyuk Nkifrar. Ndt tu kfoyet. To nhai, ndhtet met yindarim tu Bro Nkifrar hingrna htayuk tamoh tamohm, ndmn kfo tatohato hikmom. Nhai Bro Nkifrar kfo tatohato hikrmom. Nhai.

²⁶ Ndnettn Bro Nkifrar yukatoh marsisamoatrm to be nd turoh fasoh fasoh nefmn thu kasi htatamoatrm metm nhai yindarimpno yirmoam nhai, metm tfit tum metm nafak kafrohmmoum. ²⁷ Yindarim nhaf inji buga. Nhai metmpno yirmoam. Tfit tum yindarim nahtimoum. Tum yindarim inji namoamn to be tumn fasoh tkitt htamom.

²⁸ Nhai be marimom, “Bro Nkifra-rparhu yinhit tohhato rorn yak htarahrnom.” Nhai nd dukefr rhurmoarm. Nhai. Turoh fasoh dukefm yimoatm to be Bro Nkifrar riyaktahato be yukatoh marsisamoatrm turoh fasoh nefm namoum. ²⁹ Be nd fasoh yima yuhu bebm rhumoatrm tuhan yindarim nhai tu dborioh nefm yakitohrmoam. Wuskat tamoht hmarsiyakt kakmoumt. Womnam be wanambur fura sinyahato womm faso kak beb thumoumm. Womroh dborioh shrm htimoahat yima yuhum be sinyamoumm. Duka memoum, “Na ndur shrt ayakitoha o banuha.” Yimaroh was dbufnahneft nhai yihom tohaf hanyrmoam. Womn nhai yak nanyarmoumm. Nndo you fuham kekutmoum. Roh mrokfom pthayukm yak suka bosuka marnyamoatrm womm memoum, ka tu kfot kfiwum. Wom metenm, yindariyenm riyak-moamm kfo nyinga fnah bonyinga

fnahtamoumm. Womroh mrokfem romn tafurnya furamoumm. Ndhtet ndhtet fasoh fasoh nefm furkih-moumm. Yo womnam inji namoum. ³⁰Yima rifiny buharn womm kfo wok fura-moumm. Bro Nkifrar tu be nhai mif wofnrmoamr. Womm kfo huta bohutamoumm tamoh tamohmpno. Roh dukeft duka memoum, “Nomrpanom tamoh mrokfom pthahato womm be hikkfot.” Turoh yufam be yura yura htahato kfo hagrhamoum. Fasoh fasoh nefroh na yuham romn tfit wom nfri nfri nefm mhfnahnamoumm. Romn nd fasoh nefroh mnat harhumoumt. Yifammam pthayuk mrokfom nhai hikrmoamm. ³¹Nhai wom dborioh dukefm rhu mifrmoumm. Tum bi kfo htayuk mrokfo yuham nhai hikrmoamm. Nhai turoh najomrompno nmemrompno mndarem-rompno nayak marnyahato tohrmoam. Wom yima furam nhai yak marnyakrmoamm. ³²Bro Nkifrarhu mrokfot kfo kangt, “Ndhtet net yimam nhai toh buhtakfot.” Nd mrokfot bi wanyetm. To nhai mwany yakrmiyakrmoamt. Nhai. Hany yukukaknimoum. Yo nhaft nhai be nd fasoh nefrpm nar-moam. Nhai. Yimam nd fasoh fasoh nefm namoam tfit kfo yindhor boyindhor marnyamoumm.

2

Bro Nkifrarhu kotkfot

¹ To tfit niko womko mirahko inji htihato akfo grha amanyom, “Tu hifa Bro Nkifrar nd fasoh fasoh net yima tangim afo yak gnggtatrahm.” Niko inji kfoyuk yimako duka hik marnyahato ndhtet mrokfot pthakfot. Niko to rpahtet net yima bugayeko. Bro Nkifrar amekahr, “Finji anayanko,” niko finji kforfoko? ² Wahtiko, Bro Nkifrar yima tangim yak gnggtat thombat nhai be sfnoh inji naruhatrm. Nhai. Tum niwa fasoh nefmpno yak gnggtatrahm. ³ Ndnnetn niko duka hik marnyahato womm kfo pthakfot. Ni mirahn ka womrpm mrokfetm rhurahm. Bro Nkifrar tfit mekaht, “Kekutni finji akfoyan,” finji kforuha? Nhai wom yak rafo mrokfot turuhatn. Niko to rpahtet fasoh net yima bugayeko. ⁴ Niko mirahko Bro Nkifrar nikompno niwa dborioh nefm ariyak htafnom. Niko niwa fasoh nefm Bro Nkifrar nhai htihato yudbat nambur-kahr. Nhai. Hifa hifa yima yuhur hmbritworko. Duka kangr, “Hifa yima yuhur hmbrekahtanm, ndt htiruhamn rroh fasoh nefm myafhoni hanyrahm.” ⁵ To nhai, nikmoh yima yuhum tahisewamn nhai yima yuhum yak kekutkahmko. Be nd fasoh dukefrpar yorhwakomn nd fasoh nefm mfro mfro newakomn bi kangm kminysofem. Be tukomn Bro Nkifrarhu namburpam fknitko wukier kanjo. Kto mekaht, kotkfot ayakitohant nd yiha rpa rpa nefroh krhopam yak nhombra bugarah-komm. ⁶ Yima yima niwa rpa rpa nefm hti nhombrak hanyhato rpa rpa nefroh krhopam yak nhombra hany-rahkomm. ⁷ Yimar bbinysoft tohhato be dborioh dborioh nefrpm yakitoh-hato rorhu dukefr Bro Nkifrapno mrhuniyuk dukefrn korhwo yo toh hatohyuk bro yufati toh nmbuhat duka duka korhr, nd yimar Bro Nkifrapno mtoh nkifranirahr. ⁸ Tfit nd wom yimar bbinysoft tohhato fasoh nefm nahato kfo kangr, “Kokrwa Bro Nkifrar kfo htayuk mrokfom hikneft. Tukanhu duka fijo tohruha,” nd yimar Bro Nkifrar masat namburrah. ⁹ Fasoh net yima bugam bro krhopam hiruhatrm yima yuhum nur bugarahmm. Krhopam tu Judam-pno riyohniyakruhathm ee bt tom yima tangimwe. ¹⁰ Dborioh nefm yakitohet yima bugam Bro Nkifrar kfo yindhor marnyaruharm dborioh rhu nmbuhat hirahm. Nd dborioh rhu nmbuhat he shombat nhaf tu

Judam afo dborioh rhu nmbuhat yakniruhatm ee btn yima tangim. ¹¹ Bro Nkifrar nhai yimam yakitohwa yufam o rom yakitohyuk tamoh tamohm htihato tamohm hekahrn. Nhai. Ndnetrn Judami yima tangim rpahtet neft newurm.

¹² Fasoh nefm nayet yima tangim Mosesrhu nkifra boririfhut yak duham, Bro Nkifrar yak thurahrm. Yo fasoh nefm nayet Judam bi rorhu boririfhut yaketm, rom tum boririfhu mrokfom riyak htafnihato fasoh nefm niwa nmbuhatn kotkfot tohrahm. Kotkfot tohhato kotkfotn yak nhtarahtm rroh mrokfom. ¹³ Yimam boririfhut wany marsisewam, nd yimaroh yima rawofm Bro Nkifrar nhai yak wushato hti wuthakahrm. Nhai. Yimam rorhu boririfhut wanyhato hikwarpamn, nd yimaroh toh rawofm yak wushato wutham korhmn. ¹⁴ Yima tangim tafi Mosesrhu boririfhut wany juha be turoh fijo turoh boririfhut hikwamn, tumn kak nhtewumm tum niwa nefm. ¹⁵ Yimam inji hikwam bi tu yiro yima yuhur rihtayuk yima dukefr hikwom. Tamoh nefm nanefn nd dukefr yak hta bohtewurm. ¹⁶ Gutniuskfot na kmi kmim kfo htfaswat kfo kangt, “Kto tu wuruh yiharn nd kon kafrohet kon kafrohet nefm tafontn Jisas Kraistr yak htarahrn. Fasoh net yima tangim yo fasoh net Judam rpatn yak thurahrm. Tu Jisasrn wuruh Bro mrokfot yakitohraht.”

Judam kangm, “Boririfhut yakitohhato dborioh nefm hikwonom.”

¹⁷ Niko Judako wom mrokfot kforhotant wawanyswakomt. Niko kfo grha kamukko, “Nom Judanom, nomrpanomn tu Bro Nkifrarhu boririfhut yakitohwatnom, rorhu kmiyenom. ¹⁸ Rorhu kminomn boririfhut yak hta bohtiwattnom Bro Nkifrarhu dukefr hti hikwanomn nd yuhat hikwonom.” ¹⁹ Yo kamukko, “Nyinga kunyjetm yak nuhasak hanitnomm yimam kshr yakitohhato womm yak nukak hanita kanjo. ²⁰ Bro Nkifrarhu tu fipet boririfhut yakitoh-hato yimam yon mumenn kanjo mmo bamumiwam nomn yihato kak hta bohtewunomm.” ²¹ Niko inji kfo grhiwako, mirahko womrpam akfo htanom. Tuko afo mhtiyakkfot. Womm kfo kangkomm, “Mirahko arikohnom,” to ka niko nhai rikohba inji nakahko? ²² Ramet tuhanroh rim fnahneft kfo pthiwakomn, to ka niko nhai inji nakahko? Tahi yifonroh kfo tatoneft kfo rafiwakomtn, to ka niko nhai tahi rmon rhuyuk yifonn rikohba inji nakahko? ²³ Niko kfo grha yindhor kangko, “Nom Judanomn Bro Nkifrarhu boririfhut yakitohet kmiyenom.” To tfit nd boririfhut riyak htefiwohat Bro Nkifrar kak yimtnewuko. ²⁴ Bingot tohmo profetm wom mrokfot kfo memom, “Niko Judako inji niwatko yima tangim Bro Nkifrar kfo garibwomr.”

Tha puk thuneft

²⁵ Bi barkof kfofuk mrokfot tfit wompam kforhota wawanyswako. Niko Judako kfo kangko, “Nom Judanom tu nkifra tha pukthu yuhat yakitohwatnom Bro Nkifrarhu yonenom.” Nde nhai. Rote Bro Nkifrarhu kfo boririfhu mrokfompno nd hingneft rpat yakitohneft, ndt hifa. To nd tha puk thunefrpat yakitohhato Bro Nkifrarhu boririfhut hanyjbornaneft tha puk thu duha yima tangim kanjo inji tohwoko. ²⁶ Tha puk thu duha kmiroh toh nmbuham Bro Nkifrarhu boririfhu yuhatn toh hikneft, to be Bro Nkifrar htitrm turhu frikeft kanjo. ²⁷ Niko tha pukwa Judako boririfhut bi hanyjbornewukomt. Nd tha puk thu duha yimam, tu boririfhu yuhat toh hikwam, kto nd yimampno mrokfetko rhurahko. ²⁸ Nd na kfo hne

mrokfom tfit kfo hik marnyarhotanm wawany marnyatwakomm. Yimar, Juda tangishofr tohyukr, nd tha puk thunefrpat yakitohhato kfo kangr, “Na Bro Nkifrarhu yona,” nd yimar nhai tu Juda mifr rhukahr. Nhai. ²⁹ Yimar be tu Bro Nkifrarhu duka yima yuhur korhr, nd yimarn tu Juda mifr korhr. Bro Nkifrar nhai tha pukneft yukatoh-kahr. Nhai. Yimarpam wom yimarhu tha pukneft htihato kfo yindhorwom. Yimar be turhu yima yuhur Bro Nkifrarhu Yafothat yak wus bowuswatr yima rifhur wuthar korhr, tor nd yimarn Bro Nkifrar yukatohhato kfo yindhorwor.

3

Nhai fasoh nefmn yak nohruhattmm dborioh nefm

¹ Bro Nkifrar nd tha pukneft ahti duha yirt, Judam ka be yufapa duhatm rhurfomn nd rroh tha pukneft nhai wom fipa duhatt rhurfott? ² Nhai. Judam yufayetem. Bro Nkifrar barkof htayuk boririfhut rroh tirtn htamort. Rroh tirtn ruhato romn kakitohahukwomr. ³ Wom Judam nd Bro Nkifrar htayuk boririfhut hik duha rhuneft, Bro Nkifrar ka nhai wom hikruhatr nd Judampno bi kfo htayuk mrokfom? ⁴ Nhai. Rompno bi finji finji kfir, ror to be nd tur kfoyuk mrokfo yuharpattn hikwor. Nhai yima mifnom kanjo kfo nhehtahato tfit mikfota mkfotakahr. King Defitr kfoyuk mrokfom kanjo ror kfo memohat,

“Yimam htirahmm ni kfoyuk mrokfom tu fipet mrokfom kforahn. Yimam inji htihato mirahm ayak wunanomn,

to nhai, ninn mrokfom myakni myakni kfo wunafrahnm.” *Sng 51.4*

⁵ Wom Judam kfo mirahm, “Nmoh fasoh nefm yorhwatm Bro Nkifrarhu dborioh neft tafont mfrfnahnewut. Nmoh fasoh nefm arhu duha yim to fitoh yuhattn rorhu dborioh neft tafont mfrfnahnarfot? Nmoh fasoh nefm kfiwatm rorhu dborioh neft mfrfnah-newut. Ndnnett to tamohmpno tfit kfo yamukar, yak gnggat mnggiranom?” Yimar inji kfoneft yima dukef duha yimar kanjo inji pthewur. ⁶ Bro Nkifrar kangr ayak gnggatann, nhai mrokfom. Inji anawarnom. Yo tfit kto tur ndar bbinysofthu tuhan yindari bugaroh kotkfot yakitohhirahrm. ⁷ Wom Judam duka mirahm, “Nmoh mrokfom kfo fura kfo nhehwatnimm, ee Bro Nkifrar inji htihato rorhu mrokfom kfo yembindthato kfo mifworm. Nom akfo fura duha yinom Bro Nkifrarhu mrokfom nhai kfo yembindthato kfo mifrfotm. Ndnnett to tamohmpno tfit kfo yamuka, yak gnggat gnggi-ruhanm?” Inji kfoyuk yimar tu be yima dukef duha yimar inji kfiwur. ⁸ Be nd yimarhu mrokfom aptha hik marnyarm, ka kfo marifonom, “To btn nom fasoh fasoh nefm ananom. Inji nakahtnom yimam Bro Nkifrar hifa hti yindhorrahmr.” Wom yimam nanhu yufat yutahato kfo kangm, “Rorn inji wapthakmor.” Inji kfo wokwoma. Tamoh tamoh nefm nd yimam nayukm Bro Nkifrar yak nhombra bugaruharm fasoh tkit yuhattn yak hatohafarahrm.

Nhai ndar bbinysofthu wom yimar dborioh neft nakahr

⁹ Nom Judanom toh nmbuhati wom yima tangiroh toh nmbuhati Bro Nkifrar finji htitart? Bi kfo hniyanko Judanom yima tangim rpahtet ruheft korhnom. Rpahtet fasoh nefrpam kuny ki hmbritamnom nd fasoh nefmn hatonitnmom. ¹⁰ Bro Nkifrarhu rfa borngt yorhwa mrokfot to kfo kangt, “Nhai wom rpa yimar rorhu yima rifhurio wuthar ruhato dborioh yimar tohkahr.

- 11 Nhai wom yimar Bro Nkifrarhu dukefrn rhuhatu
kfo bruttna ba inji nawon o rorpno brbo yi rhuwon inji nakahr. Nhai.
- 12 Kmi kmim be tu mong troh twanhiwumr.
Nhai ndhtet dborioh dukefm rhukahmm.
Nhai wom rpa dborioh net yimar ndar bbinysoft tohkahr.” *Sng 14.1-3*
- 13 “Rroh tngm nnarihayem. Womm yak nnariyefiwatmm fasoh yuham
kitwom.” *Sng 5.9*
- 14 “Womm nhai be tu hifa nyingar hmbrikahmm.
Riyakhato kfo rindho borindho thuwomm.” *Sng 10.7*
- 15 “Kangm, ‘Be asomif womm amtuhaknikahnomm
aye nohnomm gobenm kanjo.’
- 16 Wom fitoh kmim yinyeft wuskapam tamohm riyaka-hukamm
kafring bokafring tanyahu-kammn
yo tfit wom kmim yinyeft to be rpahtet nefit nahukmm.
Kmi kmiroh wuska yawonr tamohr be nur krer korhr.
- 17 Rroh toheft nhai wommpno nayak marnyahato rpat tohkfot.
Tu be nhai mif.” *Ais 59.7-8*
- 18 “Bro Nkifrar nhai duka yanho mifkahmr.” *Sng 36.1*
- 19 Nom Judanom bi hti duka tungunewunom, nom nd boririfhuthu yinhit
tohwonom. Nhai wom Judar tfit wom yak hhrif mrokfot kfo miruhatr,
“Nhai dborioh dukeftppo nd fasoh nefm narmoyanm.” Nhai wom dborioh
yimar asha tohkahr. Ndar bbinysoftu tuhan yindars Bro Nkifrarppo bi
mrokfet bugayetem. 20 Ndnnetn nhai boririfhu mrokforoh hikneftn Bro
Nkifrar yukatohhato yima yuhum yak wuskahrnom. Nhai. Nom niwa nefm
nd boririfhutn yak nuhas kangtnom ndt fasoh nefet.

Yimar Kraistr hikwar dborioh yufeter

21 To tfit arihat yima toh rawofm tu Bro Nkifrar hti wutha marnyewa
htiyeftn Bro Nkifrar kfo pthewur. Nhai boririfhu hikneftn kfo pthakahr.
Nd yima toh rawofroh hti wutha yuhat bi Mosesr pthamor. Yo tfit profetm
pthamohat, Mosesr pthamo yuhatn ptha hikmom. 22 Bro Nkifrar yima toh
rawofm hti wutha thoft nhai be hti wutha furakahrm. Yimaroh dukefmm
hti hikwor. Tu yimamn duka kangm, “Nmoh fasoh fasoh nefm bi Jisas
Kraistr hanohnimorm.” Yimam inji dukewam, nd yimaroh yima toh
rawofm hti wuthewurm. Bro Nkifrar nhai Judam yakitohwa yufam o
yima tangiroh tamoh tamohm yukatohkahr. Nhai. 23 Kmi kmi buganom
bi fasoh fasoh nefmn kasimotmmom to be Bro Nkifrar frtrohmornom.
Nhai nompno brbo niarmoar. 24 Nmoh fasoh nefmn Jisas Kraistr suh
nanyormorm. Bro Nkifrar inji htihatoh yuhuwafmornom. Yuhuwafhatoh
nmoh fasoh fasoh nefm fak wus bowus thumorm. 25-26 Bingot toh hnamo
fasoh net yimam Bro Nkifrar hti namburmourm. Inji hti namburmoahat
nhai finji narmoarm. Be inji nyingarpaye kukatoh marsisamourm. Duka
memour, “Kto rom nayuk fasoh fasoh nefm nhai yukatoh marsisarhotanm
arihat niwa kanjo. Nhai. Rroh fasoh fasoh nefm yak thuhirhotanm hti
duka tunguna-rahma.” To be nd mrokfot inji rhu hnamotn tfit arihat nd
fasoh nefroh yak thuyuk yihat Bro Nkifrar hingnamotrt htitnomt bi.
Jisasr nohmo yuhatn Bro Nkifrarhu nambur rifhur minoh hmbremorr.
Jisarhu kkut yohnemohat Bro Nkifrar be kukatoh hasiwur. Fitoh yimam
kfo kangm, “Nom nahnayuk fasoh fasoh nefm bi Jisarhu kkupamn fak
thumomm,” yimam inji dukayukm, Bro Nkifrar hti wuthewurm.

²⁷⁻²⁸ Ndnettn mirahko boririfhut ahikkahnomn akfo grhanom. Nhai. Arihat nhai boririfhut hiket yimaroh toh rawofmn hti wuthakahr. Nhai. Arihat bi nd Jisasr hikwa yimarparoh toh rawofmn hti wuthewur.

²⁹ Bro Nkifrar nhai be turhu kmi Judarpam yukatohkahr. Nhai. Wom yima tangim rpat kukatohworm. ³⁰ Nhai wom nkifarn yima tangim yak wuskahrm. Nhai. Nd rpa Bro Nkifrarpar Judami yima tangim kak wusworm. Fitoh yimamn Jisasr nohmo yuhat duka kangmt, “Bi nd Jisasrn suh nanyormorm nmoh fasoh nefm,” inji dukiwa yimaroh yima yuhum wutham korhmm. ³¹ To mirahko ka bi Jisasr hikwanomn nd boririfhut bi fipa duhattn riyak htafrahnomt. Nhai. Nom Jisasr hikneft nom tohhato wiyauyauneft, tamoh nefm naneft, boririfhut kfiwa yuhatn hikwonom.

4

Bro Nkifrar Abrahamrhu yima rifhurio hifa hti wuthamo yuhat

¹ Bro Nkifrar yimaroh yima tohrawofm hti wutha thofte finji niwatm hifa htitarm? Nmoh nkifra Abrahamrhu yima tohrawofm Bro Nkifrar hifa hti wuthamo yuhat tndh hikrhota wawanyawako. ² Abrahamr rorhu ruheft hifa rhuhato Bro Nkifrar ahti wutharr; Abrahamr ka kfo grharfor? Uwa. Kfo grharfor. To nhai, Abrahamr nhai nd yuhat hikrmor. ³ Bro Nkifrarhu rfa borngt kfo kangt, “Abrahamr Bro Nkifrar pthamo mrokfefm yakitoh kihmotrm Bro Nkifrar rorhu yima yuhur hti wuthahemorr.” ⁴ Yimar wom hingrnafam hingrnahato maruham yak thombat nhai kfo mekahr, “Be he marufat kahukma.” Nhai. Ror turhu hingrna yuhatn nd marum kekworm. ⁵ To yimar kangr Bro Nkifrar ahti wuthara, ka boririfhut yakitohhato dborioh dborioh nefm naruharn o hingrnefm hingrnaruharn hti wutharahrr? Nhai. Yimar Bro Nkifrar yakitoh kihhato rorhu yima dukefr riduka kangrr, “Fasoh fasoh net yimam Bro Nkifrar yuhuwafhato yak marnya bomarnyewatrn yima yuhum wutham korhmm.” Inji dukarahr; Bro Nkifrar yak wutharuhatrr yima yuhur wuthar rhurahrr. ⁶ To yimam nkifra boririfhut yakitoh duhatm, be nd Bro Nkifrarhu yakitoh kih yuhatn Bro Nkifrar hti wuthahato kfo yindhorwam, to ndmn Defitr kfo memor,

⁷ “Fitoh yimaroh fasoh nefm

Bro Nkifrar yak wuswushi-hato bi fafho thurm,
nd yimam yindhorkfot.

Bro Nkifrar hifa htitrm.

⁸ Fitoh yimar Bror nhai wom duka hany hikahrr rorhu fasoh fasoh nefm, nd yimar yindhorfot.

Bro Nkifrar hifa htitr.”

Sng 32.1-2

⁹ Nd Defitr kfomo mrokfot finji dukewakomt? Bro Nkifrar, ror hikwa tha puktuhet yimarparm ka hifa htitworm? Nhai. Ror hikwa tha puktuhet yimami tha pukthu duha yimam rpat hifa htitworm. Bi kfiyanko, Abrahamr Bro Nkifrar pthamo mro-kfefm yakitoh kihmotrm rorhu yima yuhur Bro Nkifrar hti wuthakmorr. ¹⁰ Bro Nkifrar Abrahamr rihti wuthak-mohat tafi tha puk duhatrn yima yuhur rihti wuthakmorr. ¹¹ Rihti wuthakhato kfo memor, “Ni barkof yima nanhu mrokfom riyakitoh kihak-motnm yima yuhur hti wuthamoyann. Ndnettn tha wapuktwa.” Ndnettn tha puk duha yima tangim Bro Nkifrarhu mrokfom yakitoh kihhato yima yuhum hti wuthamom, Abrahamrn tor nd kmi kmiroh barkof nkifra yimar. ¹² To mirahko ka nd rpayet. Abrahamrn tor tha puket Judaroh barkof nkifra

yimar Bro Nkifrar hti wuthamor. Ror tafi tha puk duha bi Bro Nkifrar rifakitoh kihakmor. Judam, Abrahamr namo neft hikmo yuhatn, Abrahamr tor Judaroh barkof nkifrar.

Tamoh tamohm, Bro Nkifrar kfo htayukm, Bro Nkifrar hikwa yimamn kekwoomm

¹³ Bingot Bro Nkifrar Abrahamr pno yihato heyuk rhu marnya nmbuhat kfo nuhasmohat nhai boririfhut hikmoa nmbuhat htihato rhu marnya nmbuhat kfo nuhasmorr. Nhai. Abrahamr tu Bro Nkifrar yakitoh kihmotr Bro Nkifrar hti wuthahato kfo nuhas memorr; “Kto ninhu frikeftn hifa rhu marnya nmbuhat hiruhann.” ¹⁴⁻¹⁵ Mirahko ka boririfhut hik-ruhanomn ee Bro Nkifrar kfo htayuk hifa rhu nmbuham hirahrnorn. Nhai. Mrokfot nhai inji yikaht. To nom boririfhuthu hik yuhat nhai hik marnyakahnomt, wom kfo boririfhu mrokfom yak frikatiyafoni hanitnomn. Yak frikatini hanitatnomn Bro Nkifrar namburwornom. Ndnnetn nhai boririfhuthu hik yuhat htihato ror kfo htayuk hifa rhu nmbuhat hiruhatnom. Nhai. Bro Nkifrarhu mrokforoh yakitohhato hikneftn htiruharn ee btn ror kfo htayuk hifa rhu nmbuhat hirahrnorn.

¹⁶ Ndnnetn nmoh dukefn nd Bro Nkifrar bi kfo htayuk tamoh tamohroh yak dukefn rhukfot. Bro Nkifrar nmoh yima yuhum inji htiruharn nd ror kfo htayuk tamoh tamoh hirahrnorn. Arihat fitoh fitoh Judami yima tangim Bro Nkifrar kfo htayuk mrokforoh dukefn korhm, nd yimam kekwoomm nd ror kfo htayuk tamoh tamohm. Ndh tet dukefn ruhet yimam Abrahamrhu yonm korhm. Abrahamrhu yonm yorhwamn nd rorhu yufatpno kfo htamo tamoh tamoh rhu nmbuham o nefm nd yonmn yakrahm. ¹⁷ To Bro Nkifrarhu rfa borngt Abrahamrhu toh yuhat kfo memot, “Na, Bro Nkifraya, kforuha tangi tangi kasinyarahn.” Bro Nkifrarhu htieft inji htirt. Rorhu tngt yafohayetet. Ror kfoneft noheh yimaroh sinyaneft noheh yimam tfit sinyarfom. Abrahamrhu bro dukeft duka memor; “Bro Nkifrar tamoh mrokfom rorhu tngt bi kfoneft nhai yi furakaht rorhu tngt. Fipett korht.”

¹⁸⁻¹⁹ Abrahamrhu yon frikefthu kasinya yuhat Bro Nkifrar nd kfomot, Abrahamr wanyumohat nhai marimor; “No sawohno bi tabon bugahato bi bas kasi hmbriyetno. Na bi 100 gunyjimeta. Nhai tfit wom yonm nasakkfot.” Nd yon frikefthu kasinya yuhat Bro Nkifrar kfomot nhai marimor; “Duka mumafruhant.” Nd dukefn be yima yuhur ruhato be duka hasomour. Dukahaso dukahaso ee kto htimort nd Bro Nkifrar kfo yuk mrokfot fipett rhumot. ²⁰ Tufhu tohefti ruheft htimohat nhai kfo marimor; “No ndar bi tabon bugahato bas bi tebitt hmbriyetno to finji wom finji yon frikeft kasinyarahano?” Be nd Bro Nkifrar kfo yuk mrokforat yakitoh kihmour. Yakitoh kihhato toh bmtamoarn be Bro Nkifrar kfo yindhor hasomour. ²¹ Nhai finji finji dukarmor. Be kfo memour; “Bro Nkifrar kfo yuk mrokfot nhai furarmor. Htiruhant tu fipett rhuraht.” ²² Bro Nkifrar kfomo dukefn rhu motr ndnetn “Bro Nkifrar hti wuthamor rorhu yima yuhur.”

²³ Bro Nkifrarhu rfa borngt kfo yamuka, “Bro Nkifrar rorhu yima yuhur hti wuthamor;” nd mrokfot nhai Abrahamrpar kformor. Nhai. ²⁴ Nom rpat buga kfomor. Jisasr nohhato tfit sinyamo yuhat nom duka famunom, “Nmoh Nungohtet Jisasr nohmohat Bro Nkifrar tfit kasinya mifmorr.” Inji dukanefst Bro Nkifrar kangr; “Tu yima toh rawof wuthayet yimayem.”

²⁵ Jisasr nohmohat nmoh fasoh nefmn yak hatoh hanyomotmr yahr kmimn wasmomr. Be rorn nohhato nd fasoh nefm minoh nhehafmorm. Jisasr nohmohat tfit tu Bro Nkifrar fak kasinyamorr. Yak kasinyamotr nd yiha Bro Nkifrar nmoh yima yuhum rihti wuthakmorm.

Kraisr pno rpat nohmonomn tfit rpat sinyahato rpat tohwonom

5

(Sapta 5–8)

Bro Nkifrar kutewurnom dborioh met yindarinom

¹ Na bi kfo ptha hnayuk mrokmom tfit wompam kfo ptha wutha bugarhotanm wawanyswakomm. Nom Bro Nkifrar yakitoh kihwatnom nmoh yima yuhum hti wuthewurnom. To be nmoh Nungohtet Jisasr Kraisr nohmo yuhatn Bro Nkifrar nime bi nayak marnyahato rpat toh marnyewunom. ² Kraisr nohmo yuhatn Bro Nkifrar nom bi hti yuhuwafwarnom yak marnya bomarnyewur-nom. Duka kangnom, “Bro Nkifrarhu tu dborioh rhu nmbuhat kanjo rhu marnyarahnom.” Nd dukeftpno yindhorwonom. ³ Nmoh dukefm inji yorhwatm btn tamoh tamoh nefm ndar bbinysofthum, nhai nom bmbri wohsisaknikfot. Nom be yindhorhato toh bmtakfot. Krhopam yakhany yak-hany be toh bmtarahnom. ⁴ Krhopam tpi hayukem. Krhoparoh yak yihar nom toh bmtahato frdbruf thu thombat Bro Nkifrar htihato yindhorwornom. Yindhorwatrn timer duka kangnom, “Bro Nkifrarhu tu dborioh rhu nmbuhat kanjo rhu marnyarahnom.” ⁵ Nd mrokmot fipett rhuraht. Bro Nkifrar nom bi hti dukamornom. Hti dukahato marbit htamornom. Marbit htahato rorhu Yafothat hemotrn timer thu nawohmotnom.

⁶ Nom fasoh nefm hatone hnamo yiharpn Bro Nkifrar kfomotr Kraisr suh nanyormorm nmoh fasoh nefm. ⁷ Nom ndar bbinysof thofnom nhai womrhu nefm womr htihato rorn tkitt yakhat nohkahr. Nhai. ⁸ Bro Nkifrar-rpar ndhtet nefn namor. Nmoh toh nmbuhat be nd fasoh fasoh nefrpnam gribt kanjo kasi hmbretamotrn timer Bro Nkifrar hti yuhuwafhato Kraisr nd nmoh nefm nohmorm. ⁹ Kraisr washato rorhu kkut yohnemot. Nd kku hongmbtn ndar bbinysoft kasimott nd fasoh nefm wafaknimom. Nd fasoh nefm wayaknimotm Bro Nkifrar nmoh yima yuhum hti wuthamorm. Yo tfit kto bro kotkfot yakitoh thombat nhai nom namburruhatrn timer. ¹⁰ Nomi Bro Nkifrar krhopam kasimohat be turhu yon Jisasr suh nanyormotr be nd krhopam wafaknimom. Wayaknimotm be Bro Nkifrar nd yiha rifakniyak-mornom. Ror nohhato tfit sinyanihato Bro Nkifrar pno yimo nmbuhatn nom be rorpno mtohrahnom. ¹¹ Barenko mirahko ka be ndrpayet. Bro Nkifrar Jisasr Kraisr pno hingrnamo hingrneftpno nom Bro Nkifrar pno nayak nanyamahato rpat tohwanomn yindhorwonom.

Adamr namo nefi Jisasr namo nefi

¹² Bro Nkifrar hingrnamo barkof yima Adamr, rorn tu fasoh nefn ri-nakmotr to be ndar bbinysoft nd fasoh nefn kasimott gribt kanjo. Nd fasoh nefn noheft hnamott, nhai be nia furarmot. Asomif wanurtayuk yonenm to be fasoh nefm niwatm noh wita bugewum. ¹³ Tafi Mosesr tohhato boririfhut yak duha, yimam fasoh nefm namoum. Boririfhut tafi rhu

duha nmbuhatn nd fasoh nefm Bro Nkifrar be inji nyingarpaye kukatoh marsisamourm. ¹⁴ Nd boririfhut yak duha yimam nhai Adamr hanyjbornahato fasoh neft namo kanjo inji Bro Nkifrarhu kfo rafo mrokfot hanyjbornarmom. Nhai. Nd yimam to mirahko ka Bro Nkifrar hti marsisamoatrm toh nkifranimoum. Nhai. Noh wita bugamom.

To barenko, Adamrhu ruhefti Krairhu ruheft waduka nhtakomt. ¹⁵ Nmoh nkifra Adamr namo neft yo nmoh tohak yima Jisars namo neft nhai rpat rhukahf. Rpa yima Adamrpar fasoh neft namo yuhatn bok yimam noh witamom. Tfit nd tu rpa yima Jisas Krairpar yuhuwafmo yuhatn Bro Nkifrar bok yimam hti yuhuwafhato fak wusmorm. ¹⁶ Yo Adamr namo neftn Bro Nkifrar hti namburhato memor, “Yima bugam fasoh nefetem.” Tfit kto yimaroh fasoh nefm kminysofm kanjo rhumotm yuhuwafhato fak wusmorm. ¹⁷ Kanga, rpa yima Adam-rpar fasoh neft namotr to be noheft bbinsoft kasimott gribt kanjo. To mirahko ka be nd nohefthu yinhitn toh hanyrahnom. Nhai. Jisas Krairparhu noh nmbuhatn Bro Nkifrar hti yuhuwafmormom. Hti yuhuwafhato nmoh toh rawofm yak wus bowushato be hti wuthamornom. Kto Jisars king toh thoft king hingrneft yakitohnhohrahnomr.

¹⁸ Yo wom kfo nuhas mrokfot kfo nuhasruhanko. Rpa yimarparhu fasoh neftn Bro Nkifrar htihato memor, “Nd fasoh net yima bugam noh witarahm.” Tfit wom rpa yimarparhu dborioh neft htihato memor, “Nd yima rifhu wutha-yet yima bugam toh nkifranirahm.” ¹⁹ To rpa yimar Bro Nkifrar kfoyak mrokfom hanyjbornahato fasoh neft namo yuhatn fasoh nefm kasi buga-momm yima bugam. To tfit rpa yimar wany yakiomom nmbuhatn yima bugaroh yima yuhum wutha bugarahl.

²⁰ Boririfhut mfnahhato yimaroh fasoh nefm yak nuhasmottm yimam mfro mfro rihanyjbornakhato fasoh nefm rinakmom. Fasoh nefm nefm mfro mfro rinakmotm, Bro Nkifrar mfro mfro riyuhuwafakmorm. ²¹ Yimam fasoh nefm uhatone hatonemoatmm to be noh witamom. Tfit Bro Nkifrarhu yuhuwafest uhatone hatonitwattnom toh nkifranirahnom. Nmoh Nungohtet Jisas Krair hingrnamo yuhat hikruhanomn nmoh toh rawofm Bro Nkifrar hti wuthahato toh nkifranirahnom.

6

Kraisrpnno rpat nohmonom

¹ Nom fasoh nefm niwohat Bro Nkifrar hti yuhuwafwornom. Arihat finji kforuhanom? Ka nom fasoh nefm na hanyeft nd Bro Nkifrarhu yuhuwafest tfit rhu yakitoh hany-rahtnom? Ka inji akfonom? ² Nhai mif. Nd fasoh nefm yafothar bi minohnimor. To finji tfit nd yafothar sinyahato hatoneruharnom? Nhai. ³⁻⁴ Nmoh baftaisneft wadukako. Nom bi Jisas Krairspno rpat ritohakhato baftaismonom. To be nd baftais yuhatn Krairspno nom rpat nohhato fop hmbremomnom. Bi yopt tohetnom tfit tu Nanyaret Yifemr Krair yak kasinyamo kanjo inji yak kasinyar-fornom. Yak kasinyahato nfri rhu nmbuhat herfornom.

Kraisrpnno rpat tohrahnom

⁵ Jisarspnno rpat tohhato rpat nohmonom, to be tfit rorpnno rpat sinarahnom. Nd mrokfot kfiwa kanjo nmoh fasoh nefm bi yafho thumonommn, bi tfit Krairspno frtkafhato hikwonomr. ⁶⁻⁷ Yimar, fasoh yima rifhur bi minohniyetr, nhai tfit fasoh nefm uhatone hatone-kahmr.

Ndnettn mirahko fasoh yima rihfur tohyuk yafotha bebr uhatone hatoner-nom. Nhai. Kraistr yura bgre misn kim hegirhato nohmohat to be nd yiharn nd fasoh yima rihfur bi rorn mhanohetrn to be arihat nom nhai bi nd fasoh yima rihfur tohyuk yafotha bebr uhatone hatonekahrnom.

⁸ Nanhu dukeft duka kanga nom Kraistrpno tu noh mifneft, to be Kraistrpno rpat tohrahnom. ⁹ Kraistr nohmohat tfit tu Bro Nkifrarnd fak kasinyamorr. Nd ror minohafhato tfit sinyamohat, nd yiha nd noh yafothar minoh nnehafmorr. To be arihat nhai tfit ror nohkfot. ¹⁰ Bi nd rpa noht nohmohat to be nd fasoh fasoh nefm nd yiha minoh nnehafmorm. Kraistr nd hingrneft hingrnafhato to be, bi Bro Nkifrarnd bi tohwor. ¹¹ Ndnettn niko mirahko tfit bok dukefm ayaknom. Be kfo mekfot, “Nd nom hatoh hnamo fasoh fasoh nefm bi Kraistr Jisarpno rpatn nohhat minoh nnehafmnom. Nhai wom fasoh fasoh nefm uhatone hatonekahnom. Nom bi Jisarpno rim tohhat Bro Nkifrarnd rpat tohwonom.”

¹² Kraistrpno bi noh mifetnomn ndnettn mirahm tfit nikmoh tirm, wuram, tngm, nyngam, yuhut yimanysof bugat tfit fasoh yima rihfurn ayak hta bohtarm. ¹³ Mirahm nikmoh tirm, wuram o yuhut thatipt be fasoh fasoh nefmn arhunim. Nd niko hatohmo fasoh yima rihfur bi nohmomrn tfit Bro Nkifrarnd nri yima rihfur hemorko. Ndnettn nikmoh toheftm to be Bro Nkifrarnd tohwa toheftn toh hikkfot. Nikmoh thatip bugam Bro Nkifrarnd par hehato rorn yak htarahrko. ¹⁴ Niko nhai duka mekahko, boririfhut yaki-tohhat nd boririfhutn yak hta bohtakahttm nikmoh wiyauyau nmbuham Bro Nkifrarnd yakmiyakahrko. Nhai. Kraistr yakitohwatko Bro Nkifrarnd hti yuhuwafhato kakmiyekworko. Ndnettn nhai tfit nd fasoh nefroh yafothat rim kuni singohato yak hta bohtaruhatto.

Dborioh nefroh hingrna yimanom tohkfot

¹⁵ To finji bi dukewako? Ka bi Bro Nkifrarnd yuhuwafeft tohwanomn fasoh nefroh nanefst ka mrokfo duhatet? Nhai mif! ¹⁶ Wom yimarnd slef yimako tohneft nhai be tukmoh fijo tamoh tamoh nefm nakfot. Tohukatoh-rhu yinhipat hingrna hafknitwoko. Nd fasoh nefroh yinhit tohneft to inji newuko. Fasoh nefmn doh pukm kanjo thu yebitt habitwomko. Inji na hanyhato nd fasoh nefmn yak hatoh-aforuhatmko hel yirahko. Bro Nkifrarnd yinhit tohneft hifa rhu nmbuhat yakrahko. ¹⁷ Bingot afo fasoh fasoh nefroh yinhitn tohmoko. To tfit nd gutnius mrokmom wanyomohat nhai wom bok dukefm yak hanyrmoko. Nikmoh yima yuhu bugam be nd niko wanyuk mrokmomn nikmoh dukefr yimor. ¹⁸ Bi nd fasoh fasoh nefmn kihmbre htatamotmko nhai wusinya asinyarmoko. Tfit Bro Nkifrarnd puk dbrufakmotrko frfnahhato be bi dborioh yima rihfur yorhwa dborioh yafothar bi kak hta bohtewurko. ¹⁹ Na kfoyk mrokmom nhai yak marnyaruhatkomm. Ndnetann nom bi tawisafef nefm yakhato kfo nhombra nuhaswanko. Niko toh hnamohat afo fasoh nefmn kuny kihmbre bugamomko. Be arihat dborioh nefroh yafotharn yak hta bohtakahttrko dborioh nefrpam wahiktwoko.

²⁰ Afo fasoh fasoh nefroh yinhit tohmohat nhai yima yuhum sinyarmomko dborioh nefroh nanefst. ²¹ Nd niko na hnamoa fasoh nefm tamoh dborioh rhu nmbuham hemomko? Nd nefmn bi hel fak hatohaf hany sitamomko. Tfit nd tuko na hnayuk nefm mhtiyekwohat tfit bro yimneft korhtko. ²² To fasoh fasoh nefm yukr mtit kanjo kihmbre htatamohat Bro Nkifrarnd niahato puk dbruf wusakmorko. Puk dbruf wusakhato rorhu yufat

rim tohhato kak hta bohtewurko. Turn yak hatohafo hanyruhatrko be turpno rim toh nkifranirahko. ²³ Fasoh fasoh nefmn yimam yak hatohewiwatmm hel kitwom. Bro Nkifrar yak hatohewi-watrm nmoh Nungohtet Jisas Kraistr-pno toh nkifranirahm.

7

Arihat bi nfri yima rifhurhu hingrneft hingrnewunom

¹ Bar yinouroko, nkifra boririfhut yakitoh marnyewa yimako ndar mrokfot kforhota wawanyawako. Yimar, yima nfrir afo tohwor, boririfhu mrokfom kak hta bohtewumr. Yimar, nohnitr, nd boririfhute bi be, ftrtrohwotr. ² Tfit ramet tuhant kfo nhombrarhota wawanyawako. Mett afo ramemr tohwor nd mett nd yimarhu mett korht. Ramemr noh trohwort bi be. Nhai nd yimarhu mett wom rhukaht. Boririfhut inji kfiwut. ³ Mett afo ramemr yuhre tohhany, wom yimar yakneft nd mett kutewumt yihotohathu mett. Dhirt tohhato wom nfri yimar tfit yakneft nhai inji fasoh kfokahmt. ⁴ Yinouroko, to nd metthu mrokfot kanjo niko nhai bi Mosesr yakmo nkifra boririfhut toh hikkahko. Bi Kraistrpno nayakitohhato rpat nohmoko. Ndnettn nd boririfhut nhai yak hta bohtakahtko. Bi nd Bro Nkifrar yak kasinyamo yima Kraistruhenom. Ror yak hta bohtiwatrko niko hingrniwa hingrneft hifa sinya marnyiwatn yukha thuburrwot. ⁵ Nom mhatoh fnahyuk nefm yakitoh hnamohat boririfhut ruhettn nd fasoh nefroh nayuk dukefmm mfro sinyamoum. Sinyahato fasoh nefm namounom. To be nd nefm namounom be hel yiyuk yihotat bi tohmonom. ⁶ To be arihat bi nohmonomn, nd boririfhut nhai wom yak hta bohtakahtnom. Ndnettn nom nhai nd wandfamo boririfhut ruhato Bro Nkifrar hikkahnom. Nhai. Nfri yihotat hikwonom. Nd yuhatn Bro Nkifrarhu Yafothat kak hta bohtewutnom.

Fasoh nefmn fak bebmomnom

⁷ Kane finji dukewako? Ka boririfhut ruhettn fasoh fasoh nefroh nanefit yima yuhum mfro sinyewum. Ndnettn boririfhut fasohet? Ka inji? Nhai mif. Mosesr Bro Nkifrar pno boririfhut ayak duha yirt arihat to finji htihato kfo merfoya, wurt art fasoh nefet? Womroh metm, wuskam, tamoh tamohroh hti yuhurnefte, tamohr kfo merfora ndt fasoh nefet? Boririfhut kfo memot, “Mirahn womroh tamoh tamohm ahti yuhura.” Boririfhut inji kfomott, ee kanga ndt fasoh nefet. ⁸ Boririfhut arhu duha yis fasoh fasoh nefm nhai be kfongot sinyarfotm. To nd thfa mntwat inji kfomott, ee nd womroh tamoh tamohroh hti yuhuryuk yima yuhur mfro sinyamor. ⁹ Na nkifra boririfhut tafi wany juha toh mmomoa. Nd thfa mntwat wany moyant ee nd fasoh fasoh nefroh dukefr mfro wasinyamor. ¹⁰ Be ndnatn Bro Nkifrar fak yiritiyafmora. Na memoya, ka thfa mntwat yakitohhato Bro Nkifrar pno tohruha. To nhai, nd thfa mntwat yakitohmoyann Bro Nkifrar fak yiriti bugafmora. ¹¹ Thfa mntwat kfo memohat, mirahn inji anaya, ee nd fasoh yima yuhur mfro risinyamotr fasoh nefmn misuhmoya. Ndnatn Bro Nkifrar fak yiritiyafmora.

¹² To finji kforuhanomt boririfhut? Boririfhut rot tu Bro Nkifrar yak htayuket. Nd thfa mntwa mrokfom ndm rom Bro Nkifrar hta bugayukem. Ndm dboriohem. ¹³ To na nhai kfo mirhota tu dborioh thfa mntwatn fak yiritiyefita. Nhai. Tukianhu yima yuhur sinyayuk fasoh dukefmm

fasoh yima yuhur hemotma Bro Nkifrarhu dborioh thfa mntwat rifak htafmoyant. Ndnettn Bro Nkifrar fak yiritiyafmora. Na Bro Nkifrar yak yiritiyafmohat memor, “Inji anakahantnr nd rorhu fasoh yima yuhur sinyewa fasoh nefm hti duka tungunarahrm.”

Nmoh toh nmbuham fasoh nefmn kak hta bohtamoumm

¹⁴ Nd Bro Nkifrarhu Yafothat hemo boririfhut rot tu dboriohet. To nane tu fasoh yima bebann na tohwa toheft fasoh nefmn uhatone hatonitwotma na be rroh yinhitn tohwa. ¹⁵ Nd na niwa nefm nakni thombat tfit tuka duka mumiwa. Tamoh dukeftpno niwoyanm? Tamoh tamoh nefm kanga ndmn anaya, to nhai, ndm mhtafnihato tfit nd fasoh nefm na hti hhrekwam, ndmn tfit yihato niwa. ¹⁶ Nd fasoh nefm nanitayanmn tfit nkifra boririfhut mhti dukakhato yima yuhur tfit duka kangr, ndt fasoh neft ne. ¹⁷ Ndnettn nd na niwa fasoh nefm nhai be nann nakahanm. Nhai. Nd na hatohwa fasoh fasoh yima rifhurn nd nefm newurm. ¹⁸ Na tuka hti nhtewa. Na mhatoh fnahyuk nefm fasohem. Nd nanhu dborioh yima rifhur wayibon sinyewur dborioh nefroh naneft, to nhai nd dborioh nefm nakahanm. ¹⁹ Dborioh nefm kanga naya, to nhai. To tfit na hti hhrekwa fasoh nefmn tfit ndmn niwa. ²⁰ Nd na hti hhrekwa nefm newohat nhai be yimayann nakahanm. Nhai. Nd na hatohwa fasoh yima rifhurn nd nefm newurm.

²¹ Ndnettn bi tuka hti nhtewa. Ndhtet nefmn be tu kakitoh dbkaf kih tewuma. Kanga dborioh nefm anaya, nhai mif, yudbat nd fasoh nefm mfrfnahnewum. ²² Nanhu yima yuhur, ror hifa yindhorwort Bro Nkifrar hemo boririfhuthu hikneft. ²³ To tfit htita mano wom dukefr kekwoza tfit mano wom dukefr kekwoza. Nd hus dukeff mano mano nateh natehhato fasoh dukefrn mfro wabbuka sinyahato be nd dukefrn uhatone hatonitra. ²⁴ Nd fasoh dukefr uhatone hatonitwotra be hel yita yihotatn bi tohwa. Na nd yihotohat bi tohwohat to frohmn toh raforwoma? ²⁵ O Tunga Bro Nkifrar, rorn nanhu Nungohtet Jisas Kraistr tkrurafmotrr mitoh rafomora!

To bi kfo hne kanjo nanhu ruheft inji korht: yima yuhur ror wayibon sinyarahr boririfhuthu hikneft, to tfit nd na hatohwa fasoh nefmn uhatone hatonitwoma.

8

Kraisrn fasoh nefm yak thumorm, tfit Bro Nkifrarhu Yafothat thu hmbremornom

¹ Nom fitoh fitoh met yindarinom bi Kraistr nisarpno bi rpat niyak tkafhato rpat bi tohetnom, nom bi nhai wom mrokfom. ² Jisasrn nfri dfa tik yuhar htakmorr. Nd nfri dfa tik yuhar hefenko mkiorom. Nom helko yita yihotar tohhato nd fasoh yima rifhur yak hatohwohat Bro Nkifrarhu Yafothatn rinta nrfekwatnom tfit hefenko yita nfri dfa tik yuharn rimak hteuwotnom. Rimekwatnom kak hta bohtaf hanitwotnom. ³ Nd nom mhatoh fnahyuk nefm nhai yak htaf hanyrfotmnom boririfhut yak hik-rfonomt. Nhai. Bro Nkifrar inji htiitahato turhu yonr kfo tkrurafmotrr fasoh net yimam-ifnmoh thatipt kanjo yak dborhanehato bbinysoft mitohmor. Bbinysoft mitohmohat nmoh toh ruhefm fak hik bugamorm. Fasoh nefrpamn ror nhai yakitohrmorm. Be Jisasr asha bbinysoft nia tohhato nmoh fasoh nefm rorn minoh nhehafmorm. ⁴ Bro Nkifrar duka memor, “Jisasrn yimaroh fasoh nefm aminoh nhehaf-kahtnm tuka Bro Nkifrayanhu boririfhu yuhatn toh hikrahm.” To be nd yuhatn ariham be bi Bro Nkifrarhu Yafothat kak

hta bohtewutnom. Nhai tfit yimanom mhatoth fnahyuk yima rifhur yak htakahrnom.

⁵ Yimam tum mhatoth fnahyuk fasoh nefmn yudbat mrhunineft, to be nd nefmn rim tehta mtehtarahmm. Yimam tu Bro Nkifrarhu Yafothat kfuyuk yuhat hikneft to be Bro Nkifrarhu Yafothatn yak hta bohta-rahtm rroh toh rhu nmbuham. ⁶ Yimam tum mhatoth fnahyuk nefmn hikneft Bro Nkifrar yak yiritiyafrahrm. Yimam Bro Nkifrarhu Yafothar yak hta bohtiwam, nd yimam toh nkifranihato rroh yima yuhum mirhunirahmm. ⁷ Yimam be nd tum mhatoth fnahyuk fasoh nefrpam hatohwam, Bro Nkifrapno nhai nayak marnyahato rrorhu kfo boririfhu mrokfom hikkahm. Boririfhu mrokforoh hikneft nhombrati nhombratitwom. ⁸ Inji niwatm Bro Nkifrar nhai yindhorkahrm.

⁹ Niko Rom thofko nhai tuko mhatoth fnahyuk fasoh nefm bi yak hta bohtakahmko. Nhai. Bi Bro Nkifrarhu Yafothat yaketakomn kak hta bohtewutko. Yimar Kraistr htayuk Yafothat yak duha yimar nhai Kraistrhuko tohkahr. ¹⁰ Kraistrhu hayuk Yafothar yimakomn hatohhato nikmoh toh rawofm wutham rthurahm, to be nikmoh yafotham be inji Bro Nkifrar-pno toh nkifranirahm. Thatipm fasoh nefm hatohetmn rom nohrahm. ¹¹ Bro Nkifrarhu Yafothat, Jisatr kasinyamot, nd Yafothat niko hatoh-neft, to be mirahko adukanom. Nd Yafothatn kforaht, nd nohyuk thatipt tfit thu kasinyaraht.

Bro Nkifrarhu Yafothat kfiwut Bro Nkifrarhu yonnom korhnom

¹² Ndnettn froh frohnom, Jisatr hikwanom Bro Nkifrarhu Yafothat kfo htewa yuharpatn nom hikkfot. Nhai tfit tunom mhatoth fnahyuk nefm yakitohhato tohkfot. ¹³ Thatipt mhatoth fnahmo nefm tohrahko to be Bro Nkifrar yak yiritiyafrahrko. Tukomn Bro Nkifrarhu Yafothathu bbukeftpno yak thurahkomn ee Bro Nkifrapno toh nkifranirahko. ¹⁴ Yimam, Bro Nkifrarhu Yafothatn yak hta bohtiwam, tu Bro Nkifrarhu yonm korhm. ¹⁵ Bro Nkifrar nhai duka marimor, “Kfo yanhorhotanm hikrahma.” Nhai. Turhu Yafothat hehato rorhu yonnom yorhwanomn naku kfo kangnomr, “O Dajaye, ni nmoh Yifeme.” ¹⁶ Bro Nkifrar turhu Yafothat nom yahukohat bi rorhu yonnom yohrwatnom kak nuhaswornom. ¹⁷ Bro Nkifrarhu yonnom rthurahnom, ee Kraistrpno mrhuyuk dhorioh rhu nmbuhat yakrahnomt. Kraistr yakmo krhopam afo yaknihato ee btn rorpno bro yufat yakrahnom.

¹⁸ Bro Nkifrar tu bro yufat he thombat be nhai arihat rhuwa ruheft kanjo ruruhatnom. Ndnettn na duka haso kanga, ar nom hatoh hasiwa krhopem, nhai mrokfom. ¹⁹ Nda bbinysoft Bro Nkifrar hingrna htamo tamoh tamoh be Bro Nkifrar kukatoh hasiwurm. Kto tu Bro Nkifrarhu yonm bro yufat yakruha yiha, nd yiha tfit yak marnyarahrm tamoh tamohm. ²⁰⁻²¹ Bingot Bro Nkifrar bi duka hta memor, “Ndar bbinysoftu tamoh tamohm afo fasoh rhunirahm. Kto tfit yak hta marnyahato rhu marnyarahm. Yak hta marnyaniruhanm nhai tfit fasoh rhu bebruhatm o bdgtaruhatm o nohruhahm. Nanhu yonm hifa nmbuhat yakrahm, nd yiha ndar bbinysoftu tamoh tamoh be inji rhu marnyanirahm. Nhai inji naruhatm. Nd rhu marnya nmbuhat ruhakni thombat barkofpam afo krhopam yakrahm.”

²² Ndnettn Bro Nkifrar hingrna htayuk tamoh tamoh krhopam kekwo. Metm yon yakrpehka kanjo be inji krhopam kak hnewum. ²³ To mirahko

ka nd Bro Nkifrar hingrnayuk tamoh tamohrpmam ka krhopam yakhato kfo nurwom. Nhai. Yimanom to inji buga. Bi Bro Nkifrarhu hayuk Yafothat bi yimanomn hatohett, to nhai, yiro yima rifhur afo yuhre nurwor. Nurhato gari haso kangnom, “Bro Nkifrar turhu yonnom yak htarahrnom. Tot nd yiharn nmoh thatipt yak marnyahato nndo rhuraht.” ²⁴ Bro Nkifrar gari haso memounom, “Rorn nrfa htiyakhato yak marnya-rahrnom.” Nom inji duka duka tohneft nhai be sfno. Yimam duka darwon yukatoh hasiwam, tafi hti duha o yakitoh duha be dukahato kukatoh hasiwum. Yimam bi nd ror duka darwon hasoyuk tamohm bi fekmm o hitawomm, nhai wom dukahato yukatoh hasokahm. ²⁵ Nom be mrokforpat wanyhato rhu darwon hasiwohat kto be yak mifrahnom. Nd dukeftpno rhuhatu gari hasiwunom.

²⁶ Ndar bbinysofthu krhopam yakrpak yakrpak hta karmtta thombat nhai wom ptha rifhur rhukah. Dborioh dukefr nhai wom rhukah. Be nd yiro nur mmng rifhurn Bro Nkifrapno kfo nur thombat Bro Nkifrarhu Yafothatn kekwothm nd kfo nur mmng rifhur. Yakhato Bro Nkifrar wukfo nuhaswotr. ²⁷ Bro Nkifrar bi hititwornom be yima yuhurparn kfo bruttna thombat. Ndnnett Bro Nkifrarhu dukefr hikhato wukfo bruttna thombat Bro Nkifrar wanyhato htitworm nd dukefm.

²⁸ Nom Bro Nkifrarhu dukefr ruhet yimanom, Bro Nkifrar nompno wom dukefetrn bi rorhu yufatn fak htamor-nom. Ndnnett tamoh tamoh krhopam yakneft bok dukefm yak duha. Nd krhopampno mrhu tefinihato tfit dborioh rhu nmbuhat htirahnt. ²⁹ Bingot Bro Nkifrar bi hti htamor fitoh yimamn rorhu yonm rhurahm. Inji htihato yufam bi fak nhombra bugamorm. Yufam yak nhombrahato memor, nd nd yimamn turhu yon Kraistru toheft ruheft yakruhamn turhu yon Kraistrn brohato rom be nmemen kanjo tohrahm. ³⁰ Nd yimam bingot Bro Nkifrar bi hti htahato yufam yakmom, nd yimaroh yima rifhum fak wus bowusmorm. Kto bro yufat hirahrm.

Nhai wom tamohntn Bro Nkifrarhu yima yuhur hta rafokfot

³¹ Ndnnett nome finji kforuhanom? Nom bi Bro Nkifrarhu tirtn ruhetnom, frohmn riyak hutfakhato yak beb-ruhamnom? ³² Nom dukahato Bro Nkifrar nhai yak tkafrmor turhu yon Jisasr. Nhai. Tkrurafmotr niahato suh nanyormor. Turhu yonr tkrurafmo nmbuhatn htihato kangnom, tamoh tamohm he bugarahrnom.

³³ Bi Bro Nkifrar nmoh toh rawofm yak wus bowusmormn rorhu yufatn fak htamor-nom. Ndnnett nhai tfit wom yimar yimaroh nyingahato kfo miruhatr, “Nd yimar nd nd neter.” ³⁴ Bi Kraistr Jisasr nohmorn tfit sinyamor. Sinyahato tu Bro Nkifrapno rim tohhato tu bro yufat fakmor. Tu Bro Nkifrapno tohetrn, yimam nmoh yufampno tamoh tamoh mrokfefm mpthaneft, rorn kak thuworm. ³⁵ Kraistru bro dukeft nompno yorhwatt nhai wom frohrn o wom tamoh nefmn yak tuhafruhahatnmom. Nhai. Yimam yak bebwohat o, nom yatinohwohat, wuskam yaknafwohat, bi nohyuk tkitm tohwohat, yahrt tohwohat, nhai nd nd nefmn Kraistru tirm ruhetnom yak tuhafruhahatnmom. Nhai. ³⁶ Nd thomna hne nefm nhai kfo mirhota, “Nhai yakkahmnom,” nhai. Kekwomnom. Bro Nkifrarhu rfa borngt kfo kangt, “Ninpno yi tohwatnom rom hti namburhato yihof href kak beb hasiwumnom. Foh nungam kanjo inji hititwomnom.”

³⁷ Kraisrhu bro dukeft nomn htamor. Ndnnettn nd tamoh tamoh nefm ror kfiwur, to be nd nefm mmbrawonitm. ³⁸⁻³⁹ Uwa, Bro Nkifrar nomn bro dukeft htewur. Ndnnettn nhai noheftn o krho nmbuhamn, nhai mounmotmn o kmi yarhmn, nhai arihat yorhwa nefm o tfit kto rhuruha nefm, nhai tamoh nanyjaretn o yura mount tohyukmn o yiro bbinysoft tohyukmn, yak tuhafruhahatnmom. Tu be nhai mif. Bi nmoh Nungohtet Jisas Kraisr bi suh nanyormor. Nd yuhatn Bro Nkifrarhu bro dukeft nomn korht.

Bro Nkifrar Isrerpno namo nefm, ndm Porr kfo ptha srhmor

9

(Sapta 9–11)

Porr mfro yuhuwaform Isrerm

¹ Na tu Kraisrpn toh tkafwa yimaya, ndnetann na nhai wom mrokfom kfo furakaha. Tu Bro Nkifrarhu Yafothatn nanhu yima toh rawofr yorhwatta nanhu yima yuhur kfo kangr na kfiwa mrokfom kfo mifwanm. ² Na tukanh garbn yimatm Kraisr mong trohmotmr nanhu yima yuhur nhai tu marnyakahr. Nd dukeftpno yima yuhurio rikrho hmbritewarane, be. ³ Nanhu yima yuhur duka kanga, nanhu tangiyemromn ayakmiyakr. Ndnnettn be Kraisr nanhu yima yuhur ahikr, to be kfo bruttnar-fotanr nanhu yufat yak thuhato tfit rroh yufamn htarfor. ⁴ Rom tu Isrer frikeftuhem. Nd Isrer frikeft Bro Nkifrar kfo memor, “Isrerm tom tu nkifra tannefenm.” Romn Ijift toh tanyhato tfit kmiko yimohat, turhu nukafat tohakmoatt rom be nd nukafat hti hti yimoum. Yo turoh nkiframpno Bro Nkifrar mrokfom nafak dbakafmomm. Yo Mosesrpn Isrerroh toh nmbuham kfo boririfhu nuhashato lotu yuham kfo hta bohta nuhasmorm. Yo tamoh tamoh kfo hta mrokfom rompno rhuyukm ndm bi kfo nuhas bonuhas bugamorm. ⁵ Turoh nkifram, Abraham Aisak Jekofrom, Bro Nkifrar fak htamorm. Nd rroh frikeft yuhat niayuk mettn nom hbhakyuk yima Kraisr tfit hiyaumotr. Nd yima Kraisr tu yura myorhekwa Nkifrayer. Nd dukeftpno yiha yiha nom rorhu yufat kfo yuta hagrhaany, yuta hagrha hanye, be. Nmoh dukefm to be inji duka hanykfof.

Bro Nkifrar Isrerpno namo nefm ndm Porr pthamor

⁶ Kanga, bok Isrerm nhai nd nom hbhakyuk yima Kraisr yakitohkahmr. To mirahko ka Bro Nkifrar Isrerroh rituhakhato rorpno yarim tohnefthu kfo hta mrokfot ka fahomort. Nhai. Yo to mirahko ka Isrer bugam ka Bro Nkifrar rituhak bugamormn rorpno yarim toh bugamom. Nhai. ⁷ Yo mirahko ka Abraham frikef yuhathu yima bugam ka Bro Nkifrar yakmormn rorpno yarim toh bugamom. Bro Nkifrar yihato Abrahamr kfo memorr, “Aisakrhu yonrpam kfo miruha ninhu yon frikefet.” ⁸ To bi asot tu mrokfo yimbu yuhat. Mirahko ka be nd yima Abrahamr nasfuryuk yon bugamn Bro Nkifrar rituhakmor. Nhai. Nd Bro Nkifrar kfo htayuk yima Aisakrhu yon frikefrpatn Abrahamrhu yon frikefet. Ismerrhu yon frikeft fak yiritiyafmort. ⁹ Nd kfo hta mrokfot Bro Nkifrar kfomot inji kfomort, “Na nia thombat tuka kfo htamo niayuk yiharn ninhu met Sarat yon yindarir hiyaurah.”

¹⁰ Yo womte Rebekathu yon fant hiyauyuk yon husfhu tndht dukakfot. Rothu yonfhu yifemr rpar, nmoh nkifra Aisakr. ¹¹⁻¹³ Nd Aisakrhu yon husf

tafi nur duhatfn yo tafi wom nefm na duhatfn Bro Nkifrar Rebekat kfo memort, “Najemr; tfit nmemrhu yinhitn tohrah:” Rebekat hiyaumo yonf womrpar Bro Nkifrar htihato fakmor. Yakmohat Bro Nkifrarhu rfa borngtn Bro Nkifrar kfo memor, “Jekofrpar hti wofnhato fakmoya. Isor nhai.” Bro Nkifrar yima yakneft nhai yimam niwa nefm htihato yakkahrm. Nhai. Be turhu hti fijo kekworm.

¹⁴ Bro Nkifrar inji namohat to nom finji kforuhanom? Ka kfo mirahnom nhai hti nhta marnyahato yak nhta marnyarmorf? Nhai mif. ¹⁵ Bro Nkifrar Mosesrpn kfo memorr, “Na wom yimar kanga ayuhuwafa, yuhuwafwanr. Kanga wom yimar ayak marnyaya, kak marnyewanr.” ¹⁶ To be ndnettn Bro Nkifrar nhai be yimam dukiwa dukef yuhatn o niwa nefm htihato hikkahr. Nhai. Be yuhuwafhato kekworm. ¹⁷ Bro Nkifrar king Feror kfomohat Bro Nkifrarhu rfa borngt kfo kangt, “Ni Fero king yufat yakmohat nann fak htamoyann. Memoya, ‘Feror nanhu kfoyuk mrokfom hanyjborna-ruhatrn nanhu bbuka rifhur yak nuhasruhanr. Yimam nanhu nefm kmi kmim kfo nuhas htfasruhatmm wanyrahmm.’” ¹⁸ Ndnettn duka hik marnyakfot. Bro Nkifrar kangr; wom yimar ayuhuwafanr, nd yimar yuhu-wafwor. Yo kangr womrhu yima yuhur atahisar nd yimarhu yima yuhur tahisewarn nhai wany yakiokahr Bro Nkifrarhu mrokfefm.

¹⁹ Nikmoh womr sinyahato kfo mirahra, “To nanhu yima yuhur tahise-wohat tamohmpno Bro Nkifrar tfit nann kfo huttwar? Nhai be nanhu kfotpn yima yuhur inji tahisarmor. Nhai. Tu Bro Nkifrar kfomotr nanhu yima yuhur inji tahisamor. Nhai wom yimar Bro Nkifrar kfo htayuk mrokfo dukef yuhar kfo kekuthato rorn wom dukefr tfit kfo pthakfot. To Bro Nkifrar finji htihato kfo yamukarnom, ‘Niko fasoh nmbuhat htewuko?’” ²⁰ To ni tamohtet yimann Bro Nkifrarhu dukefm kfo wokruhanm? Tu Bro Nkifrar hingrna htamo yimayeko, nhai tfit nikomn kfo wokkfot rorhu dukefr. Roht nhai tfit tngett rhuhatn tfit nd roht hingrnayuk yimar kfo merfotr, “Tamohmpno inji hingrna nhtena?” ²¹ To mirahn ka nd roht hingrnayuk yimar ka nhai hingrnarfotr hushtet roh. Nhai. Turhu duka fijo, hus roh hingrna nhtarforf rpa dif kranyjihaye. Womr hingrna marnya bomarnyahato wandfa marnyarforr bro yiharparoh roh mskayukr. Womr be hingrna furarforr yiha yiha roh mska hasoyukr.

²² Bro Nkifrar turhu duka fijo yimam fak htamorm. Yimam fasoh nefm namohat bi yak batingotrmorm. To nhai, be afo kukatoh marsisa hasomourm. ²³ Womm bi hti htamorm. Memor, “Afo yukatoh marsisa-hato yak nuhasruhanm nanhu dborioh nefm.” Memor, “Nd nd yimamn yuhuwafhato hifa rhu nmbuhat hirhoyanmn nanpno tohrahm.” ²⁴ Nd Bro Nkifrar yuhuwafwa yimam, to nd Bro Nkifrar bi yak htamo yimanom yuhuwafwor. Nhai Judarpanom yak htarmor. Yima tangiroh wom rpa rpa yimam fak htamorm nd dborioh rhu nmbuhathu yakneft. ²⁵ Bingot Bro Nkifrar profet Hosearpno kfo memor,

“Fitoh fitoh kmim nhai nanpno brbo niarmoam
kto nanpno brbo nierahm.

Fitoh kmim nhai nanhu yima yuhurn rhurmoam
kto nanhu yuma yuhurn rhurahm.”

Hos 2.23

²⁶ Yo, “Wom wom kmim nanpno yarim fnahne duham
kto tfit yimam yutarahmm, ‘Hta nngrajohet Nkifrarhu yon kunys.’”
Hos 1.10

²⁷ Aisaiar Isrerm dukahato nd kfomo mrokfotn kfo memor,
 “Isrerm nasfurhato yonmari rifuhetm rhu thoft,
 ndar nungurtik furam kanjo rhu thoft,
 to mirahko Bror ka yak bugarahm. Nhai.
 Dfikenrpam yakrahr.

²⁸ Bro Nkifrar nhai wom kukna-ruhatr kotkfothu yakitohneft.
 Yima yimaroh yak hanyuk krhopam bi hajohetm rhurahm.
 Kotkfot yakitohni thombat to be yudbat turoh krhopam fknirahm.” *Ais*
10.22-23

²⁹ Bingot Aisaiar kfomo mrokfot kfo memor,
 “Be nd tu yura myorhekwa Nkifrar nhai womenm ayak htani duha arhur,
 to be Sodomti Gomorat kanjo nhombrahato mibatini-rfonom.” *Ais 1.9*

Isrerm nhai tu Bro Nkifrarhu mrokfot yakitohhato dborioh yimam tohrmom

³⁰ To finji tfit kforuhanom? Yima tangim nhai wom dukefm duka marimoam, “Wom yihotam ahikkah-nomn Bro Nkifrar yak wus bowusrahrnom.” Nhai. Be inji rhu furamoum. To gutnius mrokfot wanyomohat nd yuhatn hikmom. Nd yuhat hikhato rroh yima yuhum Bro Nkifrar fak wus bowusmourm. ³¹ To Isrerm wom dukeft fakmotm. Romn duka memoum, “Nko fitoh yuhatn hikruhanomn Bro Nkifra yak wus bowusruharanom?” Nd dukeftpno memom, boririfhut hikrahnom. To nhai. Boririfhut hik nhombratimoumt. To nhai Bro Nkifrar htihato rroh yima yuhum yak wusmorm. ³² Tamohmpno Bro Nkifrar nhai yak wusmorm? Mirahko ka Isrerm Jisas Kraishu dukefrn tohmom. Nhai. Boririfhurpat hikhato memoum, “Ka nd yuhatn Bro Nkifrar yak wus bowusrahrnom.” To nhai, nhombrati nhombratihato buha rhuyuk tahirn htakmotrm suh nasuh bugamom. ³³ Bingot Bro Nkifrar profet Aisaiarpno kfo memor, “Wawanyko. Wom tahir taun Saiontn htiwanr.

Nd tahirn htakruhatrm suhrahm.

To yimam ror hikruham nhai suhhato yak nambtng-ruhatm.” *Ais*
8.14, 28.16

10

Isrerm nhai hti duka marnyarmomt Bro Nkifrarhu neft

¹ Bar yinouroko na Isrerm yutahato kfo bruttnewohat nanhu bro dukeft duka kanga, Bro Nkifrar arituhakkahrm rorpon arim tohm. Nd dukeftpno kfo bruttnewa. ² Isrerm Bro Nkifrar hikwa yihotat bi tuka hti hikwant. Rom Bro Nkifrar hikwohat nhai wom tamoh nefm rim tohnikahm. Rim hikak bugekwomm. To rom inji hikwohat nhai tu Bro Nkifrar dukewa dukef yuhatn hti hikkahm. ³ Bro Nkifrar yima rifhum yak wus bowuswa yihotat nhai hti htkrmoamt. Rom duka memoum, ka boririfhu hikneftn Bro Nkifrar kak wus bowusworm. Ndnnett nhai Bro Nkifrar yima rifhum yak wus bowuswa yuhat hikrmoam. ⁴ Wawanyko, Mosesr yakmo kfo boririfhu mrokfom bi be. Yimam Krairpar yakitoh kihwa yuhatn Bro Nkifrar kak wus bowusworm.

⁵ Bro Nkifrarhu boririfhut hikhato yima rifhur wuthar rhuneft, Mosesr kfo memor, “Yima boririfhu mrokfo bugat yak hik bugarahn to be toh nkifranirahn.” ⁶⁻⁷ Yimar kangr yima rifhur wuthar arhura, ka nd yima rifhu yak wusyuk yimar ka tfit hefenko yak hambro hanykfot o Maringouko yak hambro hanykfot? Nhai. Nd yimar, nd yima rifhu yak wusyuk

yimar, tor bi niamor. Nd yimar Kraiser. ⁸ Bro Nkifrar yimam rituhakhato rorpno rim tohwa yuhathu kfo nuhas mrokfot to bi fakmokomt. Bi tukomn harhuwacomtn nd mrokfotn rim nakfo nuhasak mnakfo nuhasekwoko. Nd mrokfot to nd nom ptha nuhaswa gutnius mrokfoyet. ⁹ Ptha nuhashato kfiwunom, “Kfo mirahn, ‘Jisasr nanhu Nungotheter,’ yo ninhu dukeft duka mirahn, Jisasr nohmohat Bro Nkifrar kasinya mifmorr, inji dukarahn, Bro Nkifrar yakruharn rorhu tirmn htarahrn.” ¹⁰ Nmoh yima yuhumio, Bro Nkifrarhu dukefrpar yorhwatm Bro Nkifrar yak wus bowushato hti wuthewurnom. Yo tnge kfo kangnom, Jisasr nmoh Nungotheter. Inji kfiwunom, Bro Nkifrar wanyhato be yekwarnom rorhu tirtn htewurnom.

¹¹ Bro Nkifrarhu rfa borngt kfo kangt, “Yimam, ror hikruham, nhai suhhatoyak nambtngruhahm.” ¹² To mirahko ka Judami yima tangim rorhu nyingaye nndo nndo htitworm. Nhahi. Nmoh Bror rpa mifer, nhai nndo nndo. Froh frohm nakutmr kak marnyewurm. Nhahi womrpam yukatoh-kahr. ¹³ Bro Nkifrarhu rfa borngt kfo kangt, “Froh froh yimam nakutmr rituhakruharmn rorpno rim tohrahm.”

¹⁴ Kanga, tafi yimam Jisasr myakitoh kihakni duha, to finji nakurfomr? Yo Jisasrhu gutnius mrokfot tafi yimam kfohehato wany juha, to finji hikrfomr? Yo tafi wom yimar yihato mrokfom kfo ptha nuhashe duha, to finji kanjo wanyrfom? ¹⁵ Yo tafi yimar Bro Nkifrar kfo tkrur duha, to finji kanjo mrokfot kfo ptha htfasrfor? Bro Nkifrarhu rfa borngtn Aisaiar kfo memor, “Kmi kmim yindhorwom gutniuskfot hanyuk yimaroh htihakneft!”

Isrerm nhai gutniuskfot yakrmomt

¹⁶ Judam nd gutniuskfot yakmohat dfikenrpam wany yakiomomt. Bro Nkifrarhu rfa borngtn Aisaiar kfo memor, “Broye, nom hany pthayuk mrokfot dfikenrpam wanyhato wufakmomt.” ¹⁷ Ndt to wawanykomt. Yimam Kraiserhu gutnius mrokfot kfo pthiwatmm womm wanyhato hikwomm.

¹⁸ Mirahko Judam ka nhai gutnius mrokfot wanyrmom. Nd gutnius mrokfot yimam ptha nuhasmohat rom bi wanyomom.

“Kmiyakmim bi wany bugamomm rroh tngm.

Rom pthayuk mrokfom bi wany bugamomm.”

Sng 19.4

¹⁹ Yo mirahko ka tu Isrerm nhai yakrmomt nd mrokfothu yimbu yuhat. Nhahi. Rom bi fakmomt. Tfit mdukakkfot Mosesr kfomo mrokfot. Kfo memor,

“Yufapa duha yima tangim na Bro Nkifraya yak marnya thombat, niko Isrerko kfo gungmih-rahkomm.

Nd mumet yima tangim hti namburrahkomm.”

Lo 32.21

²⁰ Bro Nkifrar Aisaiar to kfo memorr,

“Yima tangim, nanhu yufat nhai wom yiha kfo nakuwon duham, naku kfomotma wanyhato fakiomoyanm.

Nanhu yufat yutawon duha kmim htimoma.”

Ais 65.1

²¹ Yo kfo memor,

“Na yonmari yiham Isrerm nakuhaso nakuhaso memoa ka yudbat wany tonirahm.

To nhai, rom be wany marffitahato rhumoum.”

Ais 65.2

11

Bro Nkifrar fak marnyamorm wom Isrerm

¹ Wom ttiwon nmbuhat kfo ttiwonwanko. Nikone ka finji dukewako? Ka duka kangko ka Bro Nkifrar bi kfo yiriti bugamorm turhu tannefenm? Nhai Isrer thof buganom kfo yiriti bugarmornom. Nhai. Na Pora wahti dukako. Na mirahko ka mhafkneya. Nhai. Na tu Isrerena. Tu tannefena. Nanhu nkifrar, Abrahamr. Abraham frikeft niayuk yima Benjaminr nasurmo yon frikeftn na niamoya. Na Bro Nkifrar nhai bi kfo yiritirmora. ² Bro Nkifrar nhai kfo marimorm Isrerm, “Na bi mong trohwanko.” Nhai. Rom, Isrerm, tu Bro Nkifrar kfo hbha htayuk kmiyem. Irajjarhu kfo tndh mrokfot, Bro Nkifrarhu rfa borngt yorhwat, htitwokomt? Irajjar Bro Nkifrapno kfo bruttnahato kfo memohat, ³ “Broye, ninhu profetm bi was bati buga hnamommn yo ninhu tarioh mthayuk tahi bajum bi kabofring wita hnamomm. Be tfit kangm, na wuroh taftuhena awasnom.” ⁴ Irajjar inji kfomohat to Bro Nkifrar tfit finji kfomorr? Kfo memorr, “Nanhu yufatpno tohhato tahi Barr kfo bruttna duha yimo yimam, 7,000 yimam, tohwom.”

⁵ Tfit arihat mirahko ka Bro Nkifrarhu yufat rhuyuk Judam ka nhai tohkahm. Tom womm tohwom. Tu Bro Nkifrar yuhuwafhato kfo hbha htamorm womm. ⁶ Turhu yuhuwaf nmbuhatn kfo hbha htamorm. To mirahko ka rom hingrnayuk hingrneft htihato kfo hbha htarmorm o rom nayuk tamoh nefm htihato kfo hbha htarmorm. Nhai. Turhu hti duka fijo hti yuhuwafhato fakmorm.

⁷ To finji kforuhanom? Isrerm turoh nkifra boririfhu mrokfom fak bnka hik bugamommn memom, “Ka inji nahato Bro Nkifrar yak wus bowusrahrnom.” To nhai, Bro Nkifrar nhai yak wus bowusmorm. Dfikenrpam yak ttuhakhato fak wus bowusmorm. Wom womt nhai. Roh yima rifhum tahisa hmbremomm. ⁸ Bro Nkifrarhu rfa borngt to kfo hik twanho kangt,

“Bro Nkifrar kfomotr rroh yima yuhum tahisamomm.”

Ais 29.10

“Yimbhindangm takih bokih-motrm

nhai wany marnyahato yak nhtarmomm tamoh mrokfom.

Yo nyingayet bet takunyjmotrm

nhai yukatohrmom.

Memom nndo mi nmbuha furam puk tmbho htatem.

Be ndhtet toheft rituhakmohat to be toh hik hnewum.”

Lo 29.4

⁹ Defitr to nhaf wom mrokfot Bro Nkifrapno kfo memor,

“Na kanga rom yemro burwat wahta nhehakahtnm

nd yemro burwat yeruha yiha amyak bakkahmn

yiram kanjo rugit afkntiwam

yo mim knbasekwa kanjo wahtakkahtnm asuhtwam.

Ndnatn gnngtatrahm.

¹⁰ Yo kanga nyingam watakunyj-kahtnm mirahm ayukatoh-nom

yo krhopam wahta krhokahtnm be nd krhopamn hta kasuh-ruhatmm

nhai toh susnawonruhatm.

Be nd ruheftn toh nkifrani-twam.”

Sng 69.22-23

Yima tangim Bro Nkifrar fakmorm

¹¹ Ndnatn na be ttiwonwa. Ka Isrerm Kraiser hti kurmo nmbuhatpno ka Bro Nkifrar bi fak yiritiyaf buga-morm? Nhai. Isrerm yak yiritiyafmohat tfit yima tangimn rithu nhirakmor. Bro Nkifrar duka memor, “Yima tangim rithu nhirakrhotu Judam htihato kfo mirahm, ‘Nome, wom furanomn yak yiritiyaforuharn wom furam yakrahr? Nom tunomn yakrfor.’ Nd dukefr

rhuruhatrm nanpno frtkafyuk yima yuhur mfro sinyarahrm.” ¹² Isrerm Kraistr hti kurmo nmbuhatn Bro Nkifrar yak yiritiyafmormn tfit yima tangim fak marnya bomaryamorm. Ndnettn kto nd Judam Kraistr hikwam bi nd tur dukayuk thomnafat fekme ee nom rpat buga nd tu hifa rhu nmbuhat rhuhanom.

¹³ Tfit niko yima tangikomn bi tfit kfiwa. Na yindhorwa yima tangimpno tohhato Bro Nkifrarhu mrokfothu kfo ptha nuhasneft. ¹⁴ Isrerm Bro Nkifrar mong trohmo nmbuhat htihato nanhu dukeft duka kanga, nikompno Bro Nkifrarhu mrokfot akfo ptha nuhasahta nikmoh womm wany yakiohato Bro Nkifrar rithu nhirakruhatrm tfit wom Isrerm inji htihato rroh yima yuhum sinyarahmm Kraistrhu hikneft. Hikruhatm Bro Nkifrar inji htihato tfit rithu nhirakrahm. ¹⁵ Bro Nkifrar afo Isrerm myafho tefinihato yima tangim rithu nhirakmor. Tfit kto Bro Nkifrar Isrerm rithu nhirakrahm. Nd mir bi yahot kasuhafhato suhnimor mekahttr tfit asinya atoha, nd yiha Isrerm womhtet rhu nmbuhat yakrahm.

¹⁶ Yimam bretpam hingrnewohat bi barkofpathu tift bi yak tifakhato Bro Nkifrarhu yufatn htefimt, to be nd yak tif tmbhoyuk bretpat Bro Nkifrarhu yufatn korht. Yo mirhu nyisoft bi Bro Nkifrarhu yufatn htemt to be nd mirhu yuhta tikt Bro Nkifrarparhut rhu bugewut. To be nd yuhatn Isrer frikeft inji rhu hikwot. Isrerroh barkof tohyuk nkiframn bi Bro Nkifrar rifakitohakmor. To be nd Isrer frikeft to be Bro Nkifrar yakitoh hanyrahm. ¹⁷ Wom kfo nhombra mrokfot akfoya. Isrerm tirf olif tihayet. Yima tangim graf olif tihayet. Nd tirf olif yuhtam Bro Nkifrar puk thumohat tfit nd graf olif tihathu yuhtam pukakmorn rithu nanyjihomor. Rithu nanyjihonihato nd olif tihat warhiwut nd rithu nanyjihoyuk yuhtam rom nadodru hmbrihato warhiwum. ¹⁸ To niko, yima tangiko, mirahko inji htihato akfo hagrhanom. Niko graf olifthu yuhtako duka marnyakfot. Nhai niko yuhtakomn thu warhokahkomt mmem nyisoft. Nhai. Tu mmem nyisoftn sinyahato thu warhiwutko yuhtako.*

¹⁹ Kfo mirahkma, “Nom kfo hagrhaneft nhai mrokfom, Bro Nkifrar hifa wom yuhtam frtmbho thuhato nom yakhato rifak natt hmbremor.” ²⁰ Ndt rot Bro Nkifrar inji hingrna twanhomor. Na nhai finji kforhota. Tumn nd gutnius mrokfeft nhai wany yakiomomt. Nd nmbuhatn rom riyak htafhato tfit niko yima tangikomn, nd gutnius mrokfeft wuyakmotkomt rithu nhirakmorko. Ndnettn niko be yakrmehato rhukfot. Mirahko akfo hagrhanom. ²¹ Bro Nkifrar Isrermpono namo nefit mdudukfot. Nhai marimor; “Arm tukanhu garbn kmiyem. Nhai yak thurhotanm.” Nhai. Fak thumorm. Ndnettn niko duka marnyaf hanykfot. Niko nhai gutnius mrokfot hikkahkomt, to be yak thurahrko. ²² Niko duka marnyakfot. Bro Nkifrarhu nefm inji newur. Wom yiham hifa yima yuhur hmbritrm yimam, tfit wom yiham tumn fasoh dukefr yinyeft nhai hti marsisa hasokahrm. Judam Bro Nkifrar mong trohwam, nd yimam krhopam kahukrm. Niko yima tangiko awi hifa kak marnyewurko. Niko, tukomn, nhai yakitoh hanykahkomr; nhai hifa yima yuhur hmbreteruhatrko. Nhai. To be yak thurahrko. ²³ To nd tu Isrer frikeft yak thumot, be tumn Bro Nkifrar dukakhato tfit niem ee tfit yakmiyakrahm. Bro Nkifrar be gari hasiwur

* **11:18:** Nd mrokfot inji kfiwut. Yima tangimrpamn finji Bro Nkifrar hti dukahato yakitohfomr. Hifa tu Bro Nkifrarhu tannefen Isrerm nhai wany yakio bugarmomr. Ndnettn nd wany yakio duha yimam yak tuhafhato rroh ktittn tfit yima tangim yakhato rihtamorm.

yakmiyakneftn. ²⁴ Niko yima tangiko be Bro Nkifarn rithu nhirakhato rorpno yarim tohmoko. Tfit nd tu garbn Isrer frikeft kangr, “Tfit yakmiyakhoyann tukanpno yarim fknirahm.”

Bro Nkifrar yimam yak marnyewa yuham kangr kmi kmim ayak nuhasanm

²⁵ Bar yinouroko, nikmoh dukeft duka kangko, “Bro Nkifrar nhai Judam bi wom yak marnyakahrm, bi nom yima tangirpanom kak marnyewur.” To Bro Nkifrarhu yima yuhur, kafrohetr yorhwar, niko nhai htikahkomr. Bro Nkifrarhu kafroheth yima yuhur inji korhr: Nd Isrerm Bro Nkifrar mong trohwa nmbuhat, ndt tukfot kfiwuko. To afo wawanyko. Nd Isrerm be inji afo nndo toh tefi hanyruhamn kto nd yima tangim Kraistr hikwam bi nd tur dukayuk thomnafat fekme ee tfit Bro Nkifrar Isrerm rithu nhirakrahm. ²⁶ Rom rithu nhirakhato romn tfit yak hany yak hanyruharn bi nd Isrer bugam turpno rim tohni bugeme, be. Bingot profet Aisaia bi ndt pthamort. Kfo memor,

“Isrernom nrfa htiyakruha yimar tu Judarohr frfnah-nerahr. Frfnahnehato nd Judam hatoh-nayuk fasoh fasoh neft rorn yak wus bowus thu bugahirahm.

²⁷ Nd Bro Nkifrar bi kfo htayuk mrokfot hikhato yak wus bowusrahm.”

Ais 59.20-21, 27.9

²⁸⁻²⁹ Isrerm, rom tumn gutnius mrokfot rimong trohakmotmt to be rihti namburakhato tfit niko yima tangikomn rithu nhirakmor. To nd Isrerm to mirahko ka mong troh buganirahrm. Nhai. Bingot bi rroh nkifra Abraham Aisak Jekofrompno, kfo tahikfot htamort. Kfo memor, “Isrerm tom tu nanhu tannefenm. Tukanhu tannefenm yak marnya bomarnyaruhanm.” Ndnatn nhai wom dukefm yakhato mong trohkfot.

³⁰ Bingot afo niko yima tangikomn Bro Nkifrarhu mrokfom rifak htaf-mokomm. Tfit arihat tu Isrermn Bro Nkifrarhu mrokfot rifak htafrotmt Bro Nkifrar htihato tfit nikomn rorhu yuhuwafeft korht. ³¹ Arihat Isrerm Bro Nkifrarhu mrokfot hanyjbornewum to kto niko yuhuwafmo kanjo Bro Nkifrar rom yuhuwafrahrm. ³² Tu Bro Nkifarn Isrermi yima tangim hti marsisamotrm fasoh hanyjborna rihurpar brotamorm. Tu Bro Nkifrar duka memor, “Inji anakahann tfit kto nanhu yuhuwafeft htirahmt.”

Bro Nkifrarhu yufat ayuta hagrhanomt

³³ Bar yimako, Bro Nkifrar hatohwa riduka aduka yima yuhur be tu bro mifer. Nhai wom yimar rorhu dukefr kanjo rhu kfot. Nom yima mifnmoh dukefr kkopener. Nmoh dukefr buha mduka simbutewunom. ³⁴ Bro Nkifrarhu rfa borngtn Aisaia kfo memor, “Frohmn Bro Nkifrarhu dukefr yekwamr?

Frohmn kfo hta bohtiwamr?”

Ais 40.13

³⁵ “Yo frohmn wuskam o tamoh shrkam hemotmr ror ndt htihato tawo hiruharm?”

Jop 41.11

³⁶ Bro Nkifrar ror turhu tnge kfomotr tamoh tamohm trhamom. Trhahato tur kfiwatr rhu hanitm. Rhu hanitatm Bro Nkifrar bro yufat kekwor. Ndnatn rorpar yuta yindhoh hatohkfot yiha yiham. To be inji.

Kraistr hiket yimam nayuk nefm, ndm Porr kfo pthamor

12

(Sapta 12.1–15.13)

Yimanmoh toh nmbuhat Bro Nkifrarpar he bugakfot yimam yemro tarioh mthewa kanjo

¹ Bar yinouroko, Bro Nkifrarhu yuhuwafest nomn htamort. Ndnatn nanhu bro dukeft kanga niko yima yuht bugako tir wuram, nyingam, tngm, tamoh tamohm Bro Nkifrarpar he bugakfot, yimam yuht yemror Bro Nkifrar mhtahuka kanjo. Be rorrpar hihato nikmoh toh nmbuham Bro Nkifrarhu toh yuham toh hikrahkomn Bro Nkifrar hti yindhorrahrko. Inji toh thombat, Bro Nkifrar lotu mif mifrahko. ² Mirahko Bro Nkifrar yakitoh duha yimaroh toheft atoh hiknom. Nhai. Nikmoh yima yuhum Bro Nkifrar yak kekut bugahato tfit nfri yima yuhum yakkfot. Inji narahko, Bro Nkifrarhu dukeft, niko rpa rpa yimokompno rhuyukt, hti hikrahkomt. Yo fitoh fitoh dborioh nefm nahato Bro Nkifrarhu yima yuhur yindhorruhar, nd ndm hti hik bugarahkomm.

³ Bro Nkifrarhu yuhuwaf rifhut nann htamort. Nann htahato aposer hingrneft nann hemor. Nd hingrneft hemotra kfo hta mrokfom kahukanko. Mirahko amanyom, “Nom bro yufetenom. Nomn Bro Nkifrarhu hingrneft kakitohwonom. Womm nhai nom kanjo Bro Nkifrarhu hingrneft yakitohkahn.” Mirahko inji adukanom. Ndh tet mrokfefm duka marnyahato kfo pthakfot. Bro Nkifrar womhtet womhtet hingrnafam kahukrko. Ni womn womhtet hingrneft kahukrn, womr ror womhtet hingrneft kahukrr. Ndn etn duka hik marnyahato kfo pthakfot. ⁴ Yimanmoh tabhat rpayet. Nd rpa tabhatn korhm mfha nmbuhat, yagrt yo wurasift. Nd mfha nmbuhat yorhwa yimbhindangf, tngt, kusmt, tamoh tamoh to yagrt yorhwa tamoh tamohm yo wurasift yorhwa tamoh tamohm nhai rpahtet hingrneft yakitohkahn. Nhai. Nndoh nndoh hingrnefm kakitohwom. ⁵ Nom Kristen yimanom nom bok met yindariyenom. To mirahko ka rpa rpa tohwonom. Nhai. Nom Krairhu hik yuhatn rpat yak tiphato rpat tohwanomn tunomm nahti duka nahti dukewunom.

⁶ Bro Nkifrar nom yuhuwafhato wonk wonk hingrna tafsefri ptha tafsefri he nhombra buga hanymornom. Ndn etn ni womn Bro Nkifrarhu mrokfothu pthayuk mrokfo ptha yafothar fahutrn Bro Nkifrarhu mrokfom ptha hik bohik tafs marnyewunm, to be ni nd hingrneft yakitohhato tu Bro Nkifrarhu dukef yuhatn ptha hikkfot. ⁷ Ni womn fahurn wom Kristenroh hingrnane fm o sios hingrnefm hingrnanho fura bofuranest to be ni ndhtet neft na hanykfot. O ni womn Bro Nkifrarhu mrokforoh kfo nuhas bonuhasneft hingrna tafs marnyewunt, to be ninn nd hingrneft hingrna hanykfot. ⁸ O ni womn wom Kristen-roh kfo bmta mrokfo hanyeft ni hifa tafs marnyewunt, to be ninn nd hingrneft hingrna hanykfot. O ni womn wom Kristenroh tamoh tamoh hanyeft kakitohwont, to be nd yima he wiforneft yakitoh hanykfot. O ni womn Bro Nkifrar hikwa yimaroh tohak yimam hingrnefthu hingrna yuham hingrna tafs marnyewunm, ni nd hingrneft yakitoh marnyakfot. O ni womn yima yak marnya fura bofurayete, to be ni nd neft yindhorhato nd neft yakitoh hanykfot.

⁹ Womm hifa hifa yima yuhumpno yuhuwafwanme, mirahko tngpaye akfo haddo yindhor furanomm. Fasoh nefm mong trohhato dborioh nefm yakitohkfot.

¹⁰ Niko Kristenko, tuko nayak marnya bomarnyakfot najohfiko kanjo. Mirahko tamoh tamoh nefm tukmoh yufamn yura yura awuh-tanommm. Womroh tamoh nefmn kfo yindhorneft hifa. ¹¹ Mirahko Bro Nkifrarhu hingrneftu yakitohneft ahhreknomt. Be nd dukefrn tohkfot. ¹² Bro Nkifrar nikmoh yufampno kfo htamo tamoh tamohroh dukefrpno rhuhatu yindhoh hasokfot. Tamoh tamoh krhopampno mirahko ariwohsisaknom. Toh bmtakfot. Toh bmtahato Bro Nkifrar kfo bruttna hasokfot.

¹³ Fitoh Kristenm tamoh tamohm kaknafwom niko ndetko rhuneft yudbat yakhatu hekfot. O fitoha toh tanyhato nikmoha niem, hifa rika bukr yak htakfot.

¹⁴ Wom yimam fasoh kak bebwomko, be niko mirahko finji ananommm. Bro Nkifrar kfo bruttna-kahtko yak marnyarahrm. Uwa, tfit wompam kfiwa, be Bro Nkifrar pno kfo bruttnahato yak marnyarahrm. Bro Nkifrar pno kfo toya duha. ¹⁵ Wom fitoh yimam tamohmpno yindhohwom, niko rpat yindhornhokfot. O womm tamohmpno nur dungunangu inji newum, niko womko rpat rhuhatu nur dungunangunhokfot. ¹⁶ Niko rpahtet rhu nmbuhat wommpno rhukfot. Mirahko bro yufat ayak hanyom. Nd yufapa duha yimampno niko rhu mskakfot. Mirahko womruh yufam wahtahato tukmoh yufamn yura auhtanommm.

¹⁷ Womm fasoh fasoh nefm newumko, mirahko tfit toh kekuthato tawo fasoh nefm ananommm. Ndt bebet. Niko be dborioh dborioh nefrpam nakahtkomm yima bugam hti yindhoh-rahmko.

¹⁸ Finji newumko, niko hifa yima yuhurpno tfit kfo yongm boyongmaknihato brbo furyaknikfot. ¹⁹ Bar yinouroko, womm finji naknewumko mirahko bi finji ananommm. Be Bro Nkifrarpar yukatohaf hanykfot. Bi Bro Nkifrarhu rfa borngtn Bro Nkifrar kfo memor, “Yimam finji newumko, bi mirahko nikomn finji ananom. Nann nd yimam htiruhanm.”

²⁰ “Yimam namburwomko, niko tawo nambur duha.

Hifa yima yuhur rhuhatu tamoh tamohm nd yimam he wiforkfot.

Nuwa yatinohwom, nuwam yak hekfot.

Bupam kfiwum, bupam yak hekfot.

Inji narahkomm htirakomm tfit tum yimtnarahm.”

Snd 25.21-22

²¹ Mirahko yudbat sinyahato tawo fasoh nefm ananommm. Nhahi. Hifa nefm narahkomm, htirahko nd rom hatoh hnayuk kah rifhur tfit migongng hmbrenirahr.

13

Nom be gafmanroh yinhit rhukfot

¹ Fitoh yimam gafman hingrneft yakhatu tohwomt niko wom yima furako be rroh yinhitn rhukfot. Nd gafman hingrneft yakitohet yimam nhai be tumn nd hingrneft rifak furakrmom. Nhahi. Bro Nkifrar kfomotr nd hingrneft rifakak-mom. ² Ndnnetn wom yimam gafman yimam kfoyuk tngt hanyjbornaneft to be kalabus htakfot o womnam wom nefm nakfot, to nhai tfit wom yimar finji kfokfot. Nd gafmanm Bro Nkifrar fak htamorm. ³ Gafman hingrneft nhai be dborioh yimaroh yak yanhoiyuk hingrneft Bro Nkifrar yak htarmort. Nhahi. Nd hingrneft fasoh nefm nayet yimaroh yak yanhoiyuk hingrneftn htamort. Ndnnetn be dborioh nefrpam yakitohkahkomn nhai hti yakrme-ruhatkomm. Inji narahko be kfo yindhohrahmko. ⁴ Gafman hingrneft tohwa yimam nikmoh dborioh

nefroh kfo hta marnyayuk yimam Bro Nkifrar fak htamorm. Be yak yanho fura duha. Tukomn tamoh neft neko, ee btn yakrmehato rhukfot. Mirahn ka be wumtrahma. Fasoh nefm newa yimaroh yak bebyuk yimam Bro Nkifrar fak htamorm. ⁵ Nd dukeftn gafman yimam kfoyuk tngm yak hikkfot. Nikmoh dukeft duka mekfot, “Bro Nkifrar fak htamorm. Ndnnetn ndhtet yimam kfoyuk tng yuhatn nom be hikkfot.” Inji dukahato hikrahko nd dukeft hifayet. Gafman yimaroh tngm hik duha yirahnomm Bro Nkifrar namburrahrom.

⁶ Gafman yimam Bro Nkifrar fak htamorm. Rom nd hingerneft yiha yiha tohhato kak hta bohtewumko. Ndnnetn takis marut tuhato rroh hingerneft hingerarahmt. ⁷ Afo kfo hik bugarhotant wawany hik marnyatwako. Tamoh tamoh takis gafman yimam ttiwonwom hanyeft, hekfot. Kfo kangm ser takis o kastam takis o het takis o fitoh fitoh takis kangmn wawikna, ni mirahn ahanyjbornaya. Fitoh yimar gafman hingerneft yakhato nikmoh kmit gafman hingerneft kakitohwort, rorhu kfoyuk mrokfom wany yakiohato hikkfot. Dborioh nefm yak marnya bomarnyakfot. Yo nd yimarn bro yufat htakfot.

Wommpno nayak marnyahato tohkfot

⁸ Mirahko wommpno tamohm yakneft aye mumafongotnomm. Nhai. Wommpno tamohm fekho yudbat hiyafhato rhu mmorahko. Yima nayak marnyanefrpat kfiwanko. Womm kak marnyewanme, to be nd nefrpat yakitoh hanykfot. Yimar womm kak marnyewurm, nd yimar tu Bro Nkifrarhu boririfhut kfiwa yuhat kak hikwor. ⁹ Bro Nkifrar htamo boririfhut bi wanyetenom. Boririfhut kfo kangt, “Niko tuhanet yimako mirahko wom mettpno arim fnahnom. Niko ramet metko mirahko wom yindarirpno arim fnahnom. Mirahko womm awas furanom. Mirahko arikohom. Mirahko womroh tamoh tamohm ahti yuhurnomm.” Nd boririfhu mrokfo bugam rpa mrokfo nmbuhatn myak tkaf bugewum. Nd mrokfot inji kfiwut, “Tunn yak marnyewa kanjo inji womm yak marnyakfot.” ¹⁰ Yima yak marnyet yimar nhai womm yak bebkahrm. Nkifra boririfhuthu mnat to tot inji.

Nom be hifa hifa wiyauyaukfot

¹¹ Nhai be sfno kfo furakahanko. Wawanyko. Ndarr bi wom yihar bi tohwonom. Nyingam frtrhahato yima yuhum adifronm. Jisas Kraistr kfo memohat “Yak marnyaruhanko wom yiha,” nd yihar to bi asor bi brbohwor. Nom fasoh tkitt afo tohhato Kraistr nrfakmohat, nd yihart afo wuri rhumot afo. Tfit arihatn bi brboh hanitt. ¹² Yifungr yinyihato tfit marr mta fnah yibonwor. Ndnnetn yifunghu fasoh nefm nom yafho thuhato mar nukefthu nefm tfit yakkfot yima yahrt yiyuk wondh wuskam yak hmbrita kanjo. ¹³ Nmoh yau nmbuhat yau marnyakfot yimam mar nukat yauwa kanjo. Nhai wommpno ruhato drinhato ptha mmokfot, yo kminyinsofm yihom toniyak mtoniyakhato kimr het grha hasokfot spakmanm kanjo. Wom met furampno rim fnah duha. Nmoh thatipm nhai foh yaum niwa nefm kanjo nahikkfot faso yimtnayet nefm. Yimayenom tu yimaroh neft nahikkfot. Nhai nayak nhtahato womm rom inji, womm rom inji tohkfot. Nhai womroh tamohm hti yuhurhato kfo yihuweh-hato kfo wokkfot. ¹⁴ Jisasr wohn rikar kanjo wahmbrekomr. Tfit mirahko ndar bbinysofthu fasoh fasoh dukefm ayaknom.

14

Mirahko tu garbn yimatroh nefm htihato kfo babobanomm

¹ Arihat wom yimam, Krairshu mrokfom hikwam, afo hik mmo bomu-miwum. Nhai be yudbat myak tehnikahm nfri dukefrn. Nhai. Tom womm afo nkifra boririfhut rpat kakitoh hanitmt. Ndnettn kanga akfo nuhasanko. Mirahko ndhtet yimam htihato wom mrokfom akfo pthanomm. Be yakhato nikompno rpat tohhato tamoh tamohm rpat hingrna mskakfot. ² Wom yimam, Krairshu hik yuham bi hti hik bohiketm, nhai tamoh yeshri ye kars yuham mdukakhato ye hikkahm. Nhai. Rom be ke fura bofurewumm nd tamoh tamoh yeshrim. Womm, rom nhai. Rom tamoh tamoh yeshrim kurhato yewurirpat kawum. ³ Fitoh yimam nhai tamoh tamoh yemrom o tamohm ye fura bofurakahmm, mirahko niko tamoh tamohm ye fura bofuriwako rom htihato apthanom. Tfit fitoh yimam ye fura bofurewum tamoh tamoh yeshrim tfit mirahko niko womko kekuthato akfo amanyom, nd yimam, yemska fura bofurewam, nhai tu hik marnyakahm. Mirahko inji akfonomm. Nd yimam bi Bro Nkifrar hifa hti yindhorworm. ⁴ Ni frohnn rom kfo pthiwa? Rom wom yimarhu yinhitn tohwom. Nd yimarn kfo merform, ni fasoh neft newun o dborioh neft newun. Nd yimam tu Bro Nkifrar yak htaf hanitatrm rroh toh nmbuham hifa yi tohwa tm hti yindhorworm.

⁵ Yo wom yimam duka kangm, nd nd yiham tom Judaroh bro yiham. Tfit womm kfo kangm, nd yiham Bro Nkifrar nhai wom yukatohkahm. Inji nakfo nakfiwum. Ndnettn na kfiwanko. Mirahko womroh dukefmm ahiknom. Tukmoh dukefmm hikkfot. Tunhu yima yuhur kfo kangr, inji inji wahikn ee nd dukefrn hikkfot. ⁶ Wom yimar Bro Nkifrar mdukekwarn kfo kangr, “Nd yihar bro yihar rhurahr.” To be nd ror kfoyok yihar htewurr Bro Nkifrarhu bro yihar. O womr duka kangr, “Tamoh tamoh yemrom be ye fura bofurayukem, nhai mrokfo duhatem.” Inji kfonihato tamohm yenyeft Bro Nkifrar mdukekwarn kfo bruttnanihato kawurm. O yemrom kurhato be nd mswir yeshrirpat yanyeft nhaf inji. Bro Nkifrar mdukekwarn, yewurirpat kfo bruttnahato kawur.

⁷ Nom ndar bbinysoft tohwohat nhai wom yimar kfo mikahr, “Na tukann kfohato ndar bbinysoft tohwant.” O “Tukann kakitohwanr tukanhu nohyuk yihar.” Nhai. ⁸ Nom ndar bbinysoft yi tohwohat tu Bro Nkifrar kfiwatr tohwonomt. Nohneft nhaf tu Bro Nkifra kfiwatr ee nohwonom. Ndnettn ndar bbinysofthu tohnefti nohneft Bro Nkifrarpar kakitohworf. ⁹ Nhai be sfno inji kfokaha. Krairsr nohmohat be minoh nhehafhato tfit myenyjwohato tohmo. Nd nmbuhatn rorpar kakitoh-worm noheh yimami yima nfrim. ¹⁰ Bro Nkifrar bro mrokfot yakitoh thombat nom buga rpat toh bugarah-nom. Ndnettn to tfit tamohmpno tfit tuko nakfo nakfiwako? ¹¹ Bro Nkifrarhu rfa borngt kfo kangt,

“Na Broya, na toh nkifraniruha Nkifraya, na kfo mifwa,
nda bbinysofthu tuhand yindars nia bugaruhamn
nanrpayanpno bangu myukna-ruhamn kfo mirahm,
‘Asor ndar Nkifrarpar ayakitoh-kahrnom
rorrpar nmoh tamoh tamoh nefm akfo ptharm.’ ”

Ais 45.23

¹² Ndar bbinysoft tohhato niwa nefm kto tunomm Bro Nkifrarhu nyingahato rpa rpa mtohhato tamoh nefmpno riruhakhato tamoh nefm namomm, nd yiharn kfo dbruf nuhas buga hanyrah-nomr.

Mirahn womr wom nefm anhehkahtanr fasoh nefmn amsuhr

¹³ Ndnettn mirahko nd womroh nefm htihato akfonom. Be nyingarpaye yukatohkfot. Rom turoh dukeftn Bro Nkifrar inji hikwomr. Tfit nikmoh nefm hikruhamn yima yuhum nhai marnyaruhatnm. Ndnettn mirahko ndhtet nefm ananom. ¹⁴ Na, Jisahr hiket yimaya, nanhu yima yuhurio kfo kangr; nd tamoh tamoh yemrom ye fura bofurayukem. To wom yimaroh dukefmn kfo kangm, nd yemrom hnaruyem, to be nd yemrom hnarum korhm. ¹⁵ Ndnettn niko tuko Jisahr hiket tuhan yindariko tuko nahti dukakfot. Womm tamoh tamoh yemrom yuhre ke hik hanitmm, rompno niko womko ye fura bofura duha. Niko htihakato womm ye fura bofurarahm, kto tfit yima yuhum krho hmbrirahmm. Jisahr nohmohat nmoh nefm rpat minoh nhehafhemornom. Ndnettn ni womn mirahn womrhu yima yuhur inji anakahann yima yuhur faso arhurr. ¹⁶ Ni womn bi tat yima yuhetn, ninhu dukeft duka kangn, na nd nd nefm nanefn, nhai mrokfom. To be ni htihato womm ninhu yuhat hikhato msuhrahm, to be tfit ninn mrokfot yiraht. ¹⁷ Yimam Bro Nkifrarhu kingdomkfot tohetm nhai nd yemro ye hik yuham o bupa ye hik yuham dukakahm. Nhai. Bro Nkifrarhu kingdomkfot tohet yimam htirahnm dborioh yima yuhumpno rhurahm. Yo noh hmbre yima yuhumpno rhurahm. Yo be Bro Nkifrarhu Yafothathu yindhorefrarpno rhurahm. ¹⁸ Ndhtet dborioh yima yuhet yimar, Kraistr hikwar, Bro Nkifrar hti yindhorr. Yo kmi thofm rorhu nefm htihato kfo yindhorrwomr.

¹⁹ Ndnettn nayak marnyahato rpat tohkfot. Yo fitoh nefm ni womn niwatnm womr htihato toh bmtewur, nd nefrpam yakitohkfot. ²⁰ Na kanga, nd tamoh tamoh yemrom ye fura bofurayukem. To Bro Nkifrar wom yimarhu yima rifhur bi finji fak hta marnyerr, to ni womn mirahn rorhu nyingahato tamoh tamohm aye fura bofuraya. Ni htihakato womr ye fura bofurarahr, kto tfit rorhu yima yuhur krhorahr. Mirahr, “Be bi tuka fewoka.” ²¹ Womroh ye nhehneft ndt fasohet. Ndnettn ni womn nd yemro ye fura bofuraneft, wain bupa yanyeft, be yafho thu bugakfot. O wom tamoh nefm ni womn yakitohwatnm womr htitwarn hikhato yima yuhur fasoh korhr, ndm rpat yafhokfot. ²² Nd kfo hnayuk tamoh nefenm ni womn yima yuhur kfo kangr, “Nhai mrokfem nd nefthu yakitohneft,” ni be hifa yimaye. To be nd dukeft turpanhu yima yuhur rhukfot. Ninrpani Bro Nkifrar nd nefn tawisafkfot. ²³ Tamoh tamoh yemro yenyeft yakrme yima yuhurpno yemrom yerahr, Bro Nkifrar pno mrokfetr rhurahr. Nhai rpa yima yuhurpno yekahr. Ndnettn Bro Nkifrar pno mrokfetr rhurahr.

15

Kraisrhu dukefti nefn hikkfot

¹ Nom froh frohnom Bro Nkifrarhu yihotam bi hti hik bohiketnom mirahko turpatnom ahti duka hasonom. Nomn nd Kraistr hikyuk muhra yimam hifa yima yuhurpno yakkfot. ² Yakrahnom Kraistrhu hik yuham myakitoh trpaknirahmm. ³ Kraistrhu dukeft nom yak hikkfot. Nhai turhu ruhefthu rhu yuhat dukarmor. Nhai. Nd rorpo rhumo nefm to Bro Nkifrarhu rfa borngt kfomo yuhatn nd nefm rorpo rhumom. Bro Nkifrarhu rfa borngt kfo kamukt, “Ninppo tumo tng bebm, nhaf inji buga, nanppo nd tng bebm nhaf tumomm.” ⁴ Bingot Bro Nkifrarhu rfa borngt

htamo mrokfom, nmoh yak hta bohtayuk mrokfomn wandfamomm. Nd mrokfomn htiruhanomn yima yuhum bmtaruhamn tamoh tamoh nefm toh bmtahato Bro Nkifrar duka duka gari hasorahnom. ⁵ Bro Nkifrarpar thu bmtewatrnom rorhu mrokfot yakitoh kihhato hikwonomt. Kanga, Bro Nkifrar nikmoh yima yuhum ayak marnyakahtmr Kraiss Jisarhu dukeft yak hikrahko. Yak hikhato tuko niyak marnyahato rpat toh marnyarahko. ⁶ Rpat toh marnyahato nmoh Nungohtet Jisas Kraissrhu Yifemrhu yufat rpat naku yutahato kfo yindhorrahko.

⁷ Ndnetn niko womko, bi Jisasr hikwako, Kraissr niko yakhato rorpno tohwa kanjo tfit womm inji wayakkah-komm rpat watohko. Inji narahko htirahko wom womm Bro Nkifrar kfo yindhor boyindorrahmr. ⁸ Na kfiwanko, Kraissr yawihnamohat nom Judanmoh yak marnyanefn fawihnamor. Bingot Bro Nkifrar nmoh nkiframpno kfo hta memohat wom nrfa htiryakyuk yimar niahato dborioh rhu nmbuhathnerahrt, to be nd mrokfefthai kfo furarmort. Nd mrokfot rhu hikmot. ⁹ To nhaft, womt duka memor, “Yimam yuhuwaf-hato nrfa htiryakyuk yimar aikahtr yima tangim htiruhamn Bro Nkifrar kfo yindhorrahm.” Bro Nkifrarhu rfa borngt to kfo kamukt,

“Na yima tangimpno ninhu yufat yutahato kfo yindhorruha. Yo ninhu yufat yutahato windoh yindhorruhan.”

Sng 18.49

¹⁰ Yo wom mrokfot kfo kamukt,

“Niko yima tangiko,

Bro Nkifrarhu frikefthu tuhan yindarspno rpat yindhorkfot!” *Lo 32.43*

¹¹ Yo tfit wom tkittn wom mrokfot kfo kamukt,

“Niko yima tangi bugako Bro Nkifrar yuta yindhorkfot.

Niko yima bugako windoh yindhorkfot.”

Sng 117.1

¹² Tfit Aisaiarn wom mrokfot kfo memor,

“Kto Jesirhu frikeftn wom yimar sinyaruharn king tohrah.

Nd yimarn king tohhato kmi kmim yakitoh bugarahrn.

Nd yimarn yima tangiroh dukefm yukatohrahm.”

Aisaia 11.10

¹³ Hifa rhu nmbuhathu yak nmbuhath bi tu Bro Nkifrar mrokfot kfo htamort. To be nom ndtn dukahato toh gari hasiwunom. Niko nd ror kfo htamo mrokfot duka duka toh gari hasiwatko na kanga tu Bro Nkifrarhu Yafothatn hifa yindhor rifhur ahikahterko yima yuhum mirhurahrnko.

Porr turhu hingrnefthu mrokfom kfo pthanihato kfo yindhor mrokfom hemorm

(Sapta 15.14–16.27)

Porr tu yindhormor turhu misin hingrneft

¹⁴ Bar yinouroko, nd wom yimaroh hifa hifa yak marnya nmbuhath, nanhu bro htieft htita bi kak bugewukomt. Nd riduka adukayefm bi kekwokomm. Nikomn womm yak hta nuhas bonuhasrfokomm. ¹⁵ Na gontwat htayuk mrokfom wom kfo nnhu mrokfom htiwa. Mirahko nd mrokfom htineft ayak bebnomm. Kanga, Bro Nkifrarhu dukeftn wahikko. Ndnetann kfo nnhu mrokfom kfiwanko yo nhaft nd hingrneft nann Bro Nkifrar htamor.

¹⁶ Nann yima tangikompno tohhato Jisas Kraissrhu gutniuskfot kfo ptha nuhaswanko. Nann prism hingrnamoa hingrneft kanjo niko yekwoyanko Bro Nkifrarpano hanitanko yimam tarioh mthayuk yemrom yaknihato Bro Nkifrar hanyhemoa kanjo. Be rorpno hanitatanko rorn turhu Yafothat thu hmbritarko be turhu bugako korhko.

¹⁷ Na hingrnawa hingrneft Krai Jisarpno yak tkafhato hingrniwant. Na tuka yindhorwa nd hingrnefthu hingrnanefth. ¹⁸⁻¹⁹ Nhai na wom tamoh mrokfom ptharhota. Na rorhu hingrneft tohmohat htimoya tu Krai r toh nhomoatra tamoh tamoh nefm be rorhu tirtn mrhunimoum. Yo nhaft htimoya tamoh tamoh nefm Bro Nkifrarhu Yafothat nhai frtrohrmoata. Rotn thu bmtamouta tamoh tamoh nefm. Nd wonk wonk miraker nefm na mthu nawohhato namoam memour, “Yima tangim hti yuhurhato Bro Nkifrar hikrahm.” Nd dukeftn nd wonk wonk nefm namourm. Na gutnius ptha nuhasneft rihingrnakhomohat tuha Jerusalemn hingrnakhato kmi kmi hingrnahany, wuroht Ilirikum profinsn mihingrna tmbhomoya. ²⁰ Na Krai rshu gutnius mrokfot wany juha yimampno yihato mrokfroh yi kfo ptha nuhasneft yindhor mifwa. Na wofnkaha bi wom yimamn wohnfah rahum kasinyahato na kto yayyak-nihato wohnfah rafonm thu tabotruthato hegir kiyaknikfot. ²¹ Na kanga Bro Nkifrarhu rfa borngt kfiwa mrokfo yuhatn ahika:

“Yimam rorhu mrokfot tafi wany juham htirahmr.

Yo yimam rorhu mrokfot wany juham turoh nyingaye hti switrahm.” *Ais 52.15*

Porr memour Rom thofm htinihato Spenko aiya

²² Ndar na tohwa hingrneftn ufak afakimoatta nhai nia htirmoayanko. ²³ To be bi hingrna hnamoyann, akorhof hingrneft bi be. Kmi kmim bi fak bugaromt Bro Nkifrarhu mrokfot. Bok gunyjimmb diyaf hatohmoa nikmoh yi htineft. ²⁴ Ndnnetann na Spenko yi shoft afo nikompno afo mtohniruha. Na yindhorwa nikompno Romt tohneft. Nikompno tohnihato tfit Spenko yi shoft tfit nikomn yihotam hingrnafhirhotkma Spenko yiruha.

²⁵ Afo arnat afo Jerusalemko yihato Jisarr hikwa yimam maruham hany-hiruha. Maruha duhatmn nhai yeshri tamohm wiknakahm. ²⁶ Ndnnetn Masedoniakorhof Kristenmi Akaia-korhof Kristenm maruha yak nhafoh-momn nanhu tirtn htamomm rroh hany heyukm. Ndnnetann afo nd maruham Jerusalemko hanyruha afo. ²⁷ Nd marut rom yak nhafohmot be turoh dukeftn fak nhafohmomm. Ndt tu dborioh nefth namom. Bingot Judaroh Kristenm gutnius mrokfot hanymotmt yima tangim wanyhato hikmomt. Ndnnetn Judaroh Kristenm tamohm yak nafneft tawo yima tangim hti dukakfot.

²⁸ Afo nd bro hingrneft afo ahingrna bugayant. Afo Jerusalem thofroh marut mhtanyhiyanm afo. Kto mekahta Spenko aiya afo nikompno mtohniruha. ²⁹ Nd yiha na nikompno yi tohneftpno nikomi na nahti nahtihato Jisarrhu hik yuham rpat ruhato nakfo tndh nuhas thombat be tu bro yindhor nmbuhat yakrahtnom.

³⁰ Bar yinouroko, nmoh toh nmbuhat nmoh Nungothet Jisarr Krai rpn tohwa tnom Bro Nkifrar inji htihato rorhu Yafothatn thu kasinyewutnom womroh hti dukanefth. Kanga kfo yingmari mrokfot kfiwanko. Bro Nkifrar pno wakfo bruttna hasotwokma. ³¹ Jisarr hik duha yimam, Judiako tohwa, kangm, “Ayak bebnomr.” Ndnnetann kanga Bro Nkifrar kfo bruttnakahtkomr hti yukatohaf hanyrahra. Yo kfo bruttnakahtkomr Jisarr hikwa yimam nd na hanyuk maruham yindhorhato yak hutfarahma. Nhai kfo kurruhatmm. Mirahm akfo kurnomm. Nd nd nmbuhampno kanga wakfo bruttnatwako. ³² Be Bro Nkifrarpar hti yukatohaf hanyrahrom. Tur yibonwor nanhu nikmoh kmi yuhat yinyeft, be hifa. Nanhu yima yuhur

yindhorrahr. Nikompno mrhu krna tefinihato yima yuhum wuthahato tfit nfri bbukeft nieraha.

³³ Dborioh rhu nmbuhati dborioh yima yuhur hayet Bro Nkifrar atohnho bugatwarko. To be inji.

16

Porrhu kfo yindhor mrokfot

¹ Nmoh mndarem Fibithu yakitoh nmbuhat kanga akfo nuhasanko. Fibit taun Senkriat tohhato ndharhof sios hingrnefm kakitohwotm. ² Nd mett tu dborioh Kristen metet. Nikmoha mfnahwot kfo yindhorakhato hifa tkitt yak htakfot. Tamoh tamohm nikmoh tirmn arhutwat. Bok yimam rothu tirtn rhumom yo na buga. Na rothu tirmn rhumoya.

³ Prisila Akwila sawohf wakfo-twakomf, na rof dukahato kfo yindhor mrokfot htefiwant rofpno. Na hingrnawa hingrneft rofn kakitohnuhiwufa.

⁴ Nanhu nrfa htiyakneftno bi noh hany sitamof. Na ndt htihato na be tu kfo yindhor mifwanf. Nhai be nanrpaya kfo yindhorkahanf. Nhai. Yima tangim, Jisars hikwam, wanyhato kfo yindhorwomf rof namo neftno. ⁵ Yo wom kfo yindhor mrokfot wakfo hitwakomm rofhu kunys rifinywa sioshu yimam.

Yo wom kfo yindhorkfot nanhu yimatr, Epainetusrn, wakfohitwako. Rorn Asia profinshu barkof yimar Kraistr rihikakmor. ⁶ Yo nanhu wom kfo yindhorkfot Mariatn wakfohitwako. Rot hifa hingrna bbukanhotamotko.

⁷ Yo wom kfo yindhorkfot Andronikus Juniasrofn wakfohitwako. Rofi na rpa kantriko niayukenom. Na kalabus tohmohat rof rpat tohmonom. Jisarrhu hik nmbuhat rofn bi rihikakmotf ee kto na. Rofhu aposer hingrnefm bi kmi kmi wany bugewumm.

⁸ Tfit wom kfo yindhorkfot Ampliatusrn wakfohitwako. Ror tu nanhu Kristen yimater.

⁹ Yo tfit Urbanusrn wom kfo yindhorkfot wakfohitwako. Kraistrhu hingrneft ror hingrnanuhiwurnom. Yo Stakisr rpat kfo nuhaskfot. Ror tu nanhu yimat mifer.

¹⁰ Apelesrn wom kfo yindhorkfot wakfohitwako. Ror Kraistrhu yufatpno krhoparoh yakneft bi htimort. Nom htihato kfo kangnom, nd yimar tu Kraistr yakitoh kihwa yimayer. Yo nanhu wom kfo yindhor nmbuhat wakfohitwako Aristobulusri rorhu kuny shofm.

¹¹ Nanhu wom kfo yindhorkfot wakfohitwako Herodionrn. Rori na rpa kantriko niayukeno. Yo Narsisusrhu kunys tohwa Kristenm, romn nanhu wom kfo yindhorkfot wakfohitwako.

¹² Yo wom kfo yindhorkfot Trifina, Trifosa Persisromn wakfohitwako. Nd metm Brorhu hingrneft hingrna nnfewumt.

¹³ Yo nanhu wom kfo yindhorkfot wakfohitwako Rufusrn. Nd yimar tu dborioh yimayer Brorhu hikneft. Yo rorhu mmemtn nanhu wom kfo yindhorkfot wakfohitwako. Na tuthu yona kanjo tamoh tamohm fak marnya bomarnyamouta.

¹⁴ Yo tfit nanhu wom kfo yindhorkfot wakfohitwako Asinkritus, Flegon, Hermes, Patrobasr, Hermas yimandountn yo wom yimam rompno rpat rifinyhato Bro Nkifrar kfo bruttniwam.

¹⁵ Tfit nanhu wom kfo yindhorkfot wakfohitwako Filologus Julia sawohf yo Nereus mndarehf, yo Olimparsi Kraistr yak hiketm rompno rpat tohwam.

¹⁶ Niko nd yimako yo metko, niko wom yiham rpat rifinyhato Bro Nkifrar kfo bruttnaneft tuko naki yindhor yo tirnhe inji nakfot. Nahti marsisa duha.

Ndar na tohwa tkitthu sioshu tuhan yindars niko dukahato kfo yindhorkfot htefiwumt.

Wom yimam kangm Kristenm ayak nanyornomm

¹⁷ Bar yinouroko, wom bro mrokfot kfiwanko. Niko ndar Jisasrhu mrokfot bi yakhato hikwako yukatoh hik marnyakfot. Tom wom yimam mrokfom kfo kekut bokekutwam. Ndar Jisasrhu mrokfot niko wanukat rom buha mfnahhato frtmbho botmbhiwumt. Rom nhowi nieruhamn rikfo akforuhatmko rpa rpa tfit fnahnirahko. Ndhtet yimam nikmoh rifiny swirm rhu hnewum, frohnomn amanyom nd yimam wom mrokfom atum.

¹⁸ Rom nhai tu nmoh Nungohtet Krairpno toh tkafkahn. Nhais. Be nd turoh yima yuhuroh yak marnyakfot mrokfomn kfo pthewum. Kfo yongm boyongmak-nitam nd yimam, mrokfom yak nhta marnya duhatm be yudbat wany yakioruhaknitamm rroh dohmn mikmbritm. ¹⁹ Nikmoh gutnius mrokfothu wanyhato hikneft, bi kmi kmi wanyomom. Hifa na yindhorwa. To tfit wom mrokfot mkfekwant. Nanhu dukeft kanga dborioh nefrpamn niko htihatoyakitohneft ndt hifa. Na wofnkaha niko mmo bommohato tfit fasoh fasoh nefmn yakitohneft. ²⁰ Bi brbohwoht nikmoh Satanrhu yahot tkaf yihar. Hifa dborioh yima yuhur hayet Nkifrar tohnhoruhatrko yahot tkafrahkomr Satanr. Nmoh Nungohtet Jisasr yuhuwaafhato ayak marnya bomarnyatwarko.

Romko wom yimam kfo yindhor mrokfot htatfom

²¹ Nanpno hingrnewa yima Timotir kfo yindhorkfot kahukrko. Yo wom husfirpa yimam, Lusius, Jeson, Sosipater yimandountn wom kfo yindhorkfot kahukmko. Romi na rpa kantriko niayukenom.

²² Na Tertiusa, nann nda Porru gontwat wandfahukanr. Na nhaf wom kfo yindhorkfot kahukanko.

²³⁻²⁴ Gaiusr nhaf inji buga. Rorn wom yindhorkfot kahukrko. Na rorhu kunys tohhato rorn kakitohwora. Ndasharhof Kristenm rorn kakitohworm.

Erastusr ndasharhof bro gafman hingrneftu maruha yakitohwa yimayer. Rori Kwartusr, nmoh yimatr, rof wom kfo yindhorkfot kahukfko.*

Bro Nkifrarhu yufat yuta yindhorkfot

²⁵ Nom Bro Nkifrarhu yufat yuta hagrha yindhorkfot. Jisas Krairhu gutniuskfot, na kfo nuhaswat, thu bmtarahtko. Nd gutniuskfot bingot bi nkifra nkifrapno afo Bro Nkifrar kafroh hnamourt. ²⁶ Tfit arihatn tafont htamotrtr nomn kfo nuhaswonomm. Nd toh nkifraniyet Bro Nkifrar rorn kfo htewatrnom nom yihatoyakitoh tohmo profetm htayuk mrokfom kmi kmim kfo ptha nuhaswonomt. Kfo pthiwatnom kmi kmim bi wanukwomt. Memor, "Inji anakahta yima tangim wany yakioruhamn hikrahm."

²⁷ Nd nom kfiwa Bro Nkifrar ror tu be bro dukefeter. Ror kfomotr; Jisas Krair fawihnamor. Nom ndt dukahato rorhu yufat yiha yiha yuta hagrha yindhorkfot. To be inji.

* **16:23-24:** Ndar rfa borngt yorhwa mrokfom hti hik bohik marnyet yimam ndar veskfothu wom mrokfo nmbuhaf fak frikatiyafnimomt. Wommne htamomt. Nd yak frikatiyafonimo mrokfo nmbuhaf inji kfiwut: "Nmoh Nungohtet Jisas Krair yuhuwaafhato ayak marnya bomarnyatwarko. Be."

Korin thofroh barkof gontwat Porr dwandfakhato htamot Barkof kfo nuhas mrokmom

Wom taunt futamomt Korin. Nd taunt kantri Griskorhof Akaia profins rhumot. Porr tohhato hingrnamo yiham nd taun Korint nhai be tu kuken taunt rhumot. Tu bro taunt rhumot. Akaia profinsu kapiter taunt to Korint rhumot. Porrn tu barkof yimar nd taunt wurat htahato Bro Nkifrarhu mrokmot pthamotr nd taunt Bro Nkifrarhu mrokmot misuhhato Kristen sios kasinyamort. Kto Porr nd taunt htanyhato bi wom kmimn hingrna htfas hanyetrn nd ror kasinya tanyomo sioskfot krhopam fakmom. Porr wanyakhato ndar gontwatn wandfamom rroh krhoparoh kfohtayuk mrokmom yo rroh yima yuhuroh yak marnyayuk dborioh mrokmom.

Porrhu dukefr memor, “Nhai yukatoh marsisarhotanm. Yukatoh marsisaruhanm, rroh dborioh nefm yohnirahm.” Ndnnetn tuhanet yimaroh krhopam yo ramet metroh krhopam mrokmom hemorm. Yo yimam nhai marimoam Bro Nkifrarhu Yafothathu yak hta yuhatn hikrahnom, nhai. Be turoh dukeftn yaumoatm mrokmom hemorm. Yo Bro Nkifrarhu tu lotu yuham, yo Bro Nkifrarhu Yafothat yahuka dukefrhu hingrna yuham ndm kfo hta bohtamorm. Yo nd noheh yimam sinyaruha yuharoh mrokmom, ndm rpat kfo nuhas bonuhasmorm.

Nd Korin Kristenm krhopa yakmoa nefroh mrokmom kfo hta bohta nuhas marnyamorm. Porr wandfayuk mrokmom, sapta 13-thu mrokmomn Kristenm tu hifa hti yindhorwomm. Nd saptakfotn Porr kfo memor, “Wom yima fura bofuraroh htihato yak marnya bomarnyanef, tot tu nef Bro Nkifrar yimam he furiwat.”

Kristenm mirahm tum nakfo nna bonnanom yo tuoh yufam akfo yuta yindhornomm

(Sapta 1–4)

¹ Na Pora, na Krai Jisasrhu aposera. Tu Bro Nkifrarhu duka fijo nd aposer hingrneft fak htamora. Nani nanhu yinowem Sostenes, ² no ndar gontwat wandfewononko niko Korintu Kristenko. Niko bi Bro Nkifrar yak was bowus marnyakhato Krai Jisasrpnno bi fak dbkafmorko. Yab dbkafhatu turhu yufatpno rim fak htamorko. Yimam nmoh Nungothet Jisas Krai rhu yufatpno rhu rifinyhato kfo bruttniwam, niko rpat rorhu yufatpno rim fak hta bugamorko. Jisas Krai rpar tor nmoh rpa Nungothetr. ³ Nmoh Yifem Bro Nkifrar, nmoh Nungothet Jisas Krai ayuhuwafkahfko nikmoh yima yuhum ayak marnyakahtfm mirhurahmko.

Porr kfo yindhormorr Bro Nkifrar

⁴ Niko bi Jisas Krai rpnno rpat tohwa nmbuhatpno Bro Nkifrar yuhuwafwarko kak marnya bomarnyewurko. Na inji htihato yiha yiha Bro Nkifrar bro kfo yindhoreft htiwanr. ⁵ Niko Krai rpnno rpat tohwa nmbuhatpno mrokmot pthefm, riduka aduka yima yuhum yo tamoh tamohm bi yak bugewa yuhampno na htihato Bro Nkifrar tu kfo yindhor mifwanr. ⁶ Yo nd Krai rhu mrokmom nom pthahato niko wanyhato yakmom, bi nd mrokmomn kuny kiwomko. ⁷ Ndnnetn niko tohhato nmoh Nungothet

Jisas Krairhu yawihna yihart toh gari hasiwohat, Bro Nkifrar niko nhai mong trohnikahrko. Bro Nkifrarhu Yafothat niko hatohwokomt. Ndnnett tamoh tamoh nefm Bro Nkifrarhu Yafothat kasinyewam, niko nd nefm newukomm. ⁸ Jisas Krair thu bmtaruhatrko, toh bmtahany, toh bmta hanyuruhakomn Nungothen Jisasrhu nia yihar, nhai wom tamoh mrokfetko rhuruhatko. ⁹ Nd Bro Nkifrar, niko kfo nakuyakhato turhu yon Jisas Krair, nmoh Bro Najomr, rorpno rim htamo Bro Nkifrar, awi nmoh bro dukefm ror htakfot. Tamoh mrokfom ror bi kfo ptha htayukm, nhai yi furakahm. Yafothetm korhm.

Mirahko wannakfo nnakhato nafr tndohnom

¹⁰ Bar yinouroko, nmoh Nungothen Jisas Krairhu yufatpno bro mrokfot kfiwanko. Tamoh tamoh mrokfom kfo ptharahnom, be rpa yima yuhurn rhuhato mrokfefenm kfo pthakfot. Mirahko mrokfom nateh natehakhato womm yuhuwelhato womm nndo rim rhu, yo womm rom nndo rim rhu inji ananom. Be rpat tohhato rpa yima yuhur yo rpa dukefrpar rhukfot. ¹¹ Klowirom kfo memoma, niko tohwat niko tuko nnakfo nnewuko. ¹² Kfo memoma, niko nnakfo nna thombat, womm kfo kangm, “Nom Porr kfiwa mrokfomn nom kak hikwonom.” Yo womm riruhato kfo kangm, “Nom Apolosr kfiwa mrokfomn nom kak hikwonom.” Tfit womm riruhato kfo kangm, “Nom Pitar kfiwa mrokfomn nom kak hikwonom.” Yo tfit womm kfo kangm, “Nom tu Krair kfo yok mrokfomn kak hikwonom.” ¹³ Tamohmpno Krairhu sioskfot bi kasinya hanyett tfit wannakfo nnakhato niyak mku niyak mkutakomt? Ka na Porann niko nayuk fasoh fasoh nefm bgre mis nohhato minoh nnehafmoyanm? O ka na Poranhu yufat yuta hanyhato baftaismoko? ¹⁴ Nd baftais hanyuk yimam, na Krispus Gaiusrofrpaf baftaisimmoya. Womm nhai. Hifa ndrpfaf baftaisimmoyann Bro Nkifrar kfo yindhorwanr. ¹⁵ Ndnnett nhai wom yimar kfo miruhatr, “Na Porr baftaisimmo yimaya. Ndnnettann na ror kfo yok mrokfomn hikruha.” ¹⁶ E, tfit asomif tfit dukekwanm Stefanas riphar. Nd ripharpar na baftaisimmoyanm. Nhai tfit wom frohm wom dukakaha na baftaisimykum. ¹⁷ To hifa nhai bok yimam baftaisimrmoya. Krair na kfo tkrurafmohat, to nhai yima baftaisimneft kfo tkrurafmora. Nhai. Na gutnius mrokfotuh kfo ptha htfasneftn kfo tkrurafmora. To na mrokfom kfo pthaneft nhai be nanhu yima yuhurn mrokfom frpsa marnya bomarnya yo yak marnya bomaryahato yimam be wany yindhorhato mrhunakfot. Nhai. Be nanhu yima yuhurn tamoh mrokfom kfo pthaneft, Krair bgre mis nohmo yuhat be nhai duka miruhatm Krairhu noh mrokfot tu yafothet mrokfoyet. Nhai. Nd tndh mrokfot be wany huhrasahmt.

Krairna hatohwort Bro Nkifrarhu bbukefti dukeft

¹⁸ Nd helko bi yiyet yihotar bi tohet yimam, duka kangm, “Jisasr bgre mis nohmo yuhathu mrokfot yimbuyef duhatet. Mmom kanjo kfo pthewukomt.” To tfit nom, nd hefenr bi yiyet yihotar bi tohet yimanom, htitnomt, nd Jisasr bgre mis nohmo tkittn Bro Nkifrarhu yakitohwa bbukeft hingrnamot. ¹⁹ To nd na kfiwa mrokfot to bingot Bro Nkifrarhu rfa borngt kfgongt memot, “Bro duka tungunefr haruhet yimaroh dborioh dukefm yak thuhato mmom tfit rhurahr, yo tamoh tamoh dukefm yimam bi duka hta hanyukm

na kforuha nd dukefm nhai hingrnaruhatm.”

Ais 29.14

²⁰ Tone to fitom nd bro riduka aduket yimam? Yo nd Mosesrhu boririfhut kfo hta bohtiwa yimam? Yo mrokfo kfo ptha marnya bomarnyet yimam? Nd nd yimam nhai tu Bro Nkifrarhu dukef yuham hti hik marnyakahmm. Nhai. Rorhu dukefm myak mmota-hato be turoh yima yuhumn kfo fura bfofurewum.

²¹ Bro Nkifrar to tu bro riduka aduka yima yuhetrn nhai marimor, ndar bbinsofthu yimam turoh duka yima yuhumn hti hikrahmt ror fasoh nefm nayet yimam yekwa yihotat. Wonk wonk yihotam nhombra bugamomm, to nhai htirmomt Bro Nkifrar yimam yekwa yihotat. Nhai. Ndnnetn Bro Nkifrar htamort wom yihotat. Nd nom kfo pthiwa mrokfot, rom kfo yamuka, “Yimbuyef duha mrokfot.” Tot nd mrokfotn yimam wanyhato hikrahmt, Bro Nkifrar yak-rahm. ²² Nd nom kfo pthiwa mrokfot Judam kfo kangm, “Afo mirakerkfot afo ahtinom. Ndt htiruhamn kfo mirahnom, niko kfo pthiwa mrokfot tu yafothet mrokfot kfo pthiwuko.” Yo Grikmn kfo kangmnom, nd nom kfo pthiwa mrokfom yafotha duhatem. Kangm, “Riduka adukayet yimam kfo pthayuk mrokfomn awany yakionom.” ²³ To nom, nom kfo pthewunom Jisas Kraistr bgre mis nohmo yuhat. Ndt kfo pthewunom, Judam wanyhato namburwomnom. Namburhato kfo kangmnom, “Nd mrokfoye kak nnariyefiwoknom.” Grikm o yima tangim kfo kangmnom, “Mmom kanjo kfo ptha mumiwuko.” ²⁴ To nd met yindarinom, Bro Nkifrarhu naku tngt wany soneyuknom, nom Judanom yo Griknom htitnom Bro Nkifrar tu bro riduka aduka yima yuhetrn Kraistr bgre mis nohmo yuhat bro bbukeftpno nmoh fasoh fasoh nefm yak thuhato fakmornom. ²⁵ Ndar bbinsofthu yimam duka kangm, “Dborioh dukef duhat yimam Jisasr bgre mis nohmo yuhat kfo ptha mumiwum.” To nhai, nd rom kfiwa yima yuhum faso kfiwumm. Tumn nhai Bro Nkifrarhu dborioh dukefmpno inji kfokahm. Yo Jisasr bgre mis nohmo yuhat htihato nhaf kfo kangm, “Bro Nkifrar bbuka duhater. Ndnatn Jisasr bgre mis nohmo.” Inji kfiwum. To nhai, Jisasr nohmo yuhatn Bro Nkifrar nmoh fasoh fasoh nefm yak thuhato fakmornom. Yima mifm nhai fasoh nefm yak thu inji naruhatm.

²⁶ Bar yinouroko, tfit wamdukaktwakomt niko Bro Nkifrar nakuhato niko Bro Nkifrar rihikakmohat, niko finji htimoko? Ka nikmoh womm ka bro riduka aduka yima yuhetmn Bro Nkifrar rihikakmomr? O, ka kmiroh bro yimakomn fakmorko? O, ka bro yufet yimaroh yonkomn nakuyakmorko?

²⁷ Bro Nkifrar nhai ndhtet ruhet yimakomn nakurmorko. Nhai. Ndar bbinsofthu yimam kfo kangm, “Ndhtet dborioh dukef duha yimam yo bro bbukef duha yimam ka Bro Nkifrar yak twanhorahm?” Nd mrokfot inji kfiwatmt, ndnetn nikomn fak tutuhakmor. Memor, “Ndhtet ruhet yimam ayakkahta nd riduka aduket yimam yo nd bro bbuket yimam htiruhamn kfo mirahm, ‘Nom famunom ka nom ndarhtet yimanomn yakrahr. To nhai, bi romn kekwor.’” Tum inji htiruhamn tfit tum bro yimtneft yakrahm.

²⁸ Bro Nkifrar fakmor yufapa duha yimam, yimam hti behohwam. Bro Nkifrar inji nahato tfit yimam bro yufetm yo bro bbuketm rroh yufam nhai wom mfrfnahkahm. Rroh yufam be mifrnahnitm. ²⁹ Ndnnetn nhai wom yimar Bro Nkifrar pno rorhu yufat kfo hagrhakfot. ³⁰ Tu Bro Nkifrar bi yakmorko Kraistrhu tirtnt htamorko. Yo Kraistrn htamorr nmoh riduka aduka yima yuhurhu hayuk yimar. Turn nmoh fasoh nefm

suh nanyormorm. Nd yima Kraisorparhu yuhatn Bro Nkifrar nom hti wuthewurnom, yo turhu yufatpno korhwonom. ³¹ Ndnetn Bro Nkifrarhu rfa borngt kfiwa yuhat wahikko, “Yimar kangr ayindhora, nd yimar to be Brorparhu nayuk nefm yindhorkfot. Mirahr turhu nefm akfo hagrha yindhora.”

2

Kraisr bgre mis nohmo yuhathu mrokfom

¹ Bar yinouroko, na nikompno yi tohhato Bro Nkifrarhu kafrohet mrokfom tohhato kfohemohat, na nhai marimoya, “Yimyanhu riduka aduka yima yuhum be mfro rim kfak mkfakhato wany yindhorrhmm.” Nhai. Nanhu mrokfom be inji kfoni hanyoanm. ² Nanhu dukefr duka memoya, “Na Korint tohruha yiham na nhai wom tamoh mrokfom kfo ptharhota. Be Jisas Kraisorhu mrokforpam kfo ptharuha, yo Jisas Kraisor bgre misn nohmo yuhathu mrokforpam kfo ptharuha.” ³ Na nikompno yi tohhato mrokfom kfo pthamoahat, be yakrminano tohhato mrokfom kfo pthamoanm. Duka memoa, “Ndarhtet kmimpno tohhato mrokfom kfo ptha-nefte, finji finji mrokfom kfo ptharhotanm, rom wanyhato hikruhamm?” Nd bro duka yanuheft rhumoatta mrokfom kfo pthamoahat yikiat buga htamoant. ⁴ Yo na kfoyuk mrokfom yo gutnius mrokfom na kfo pthamom, nhai marimoya duka tungunet yimam kanjo tfit yimyanhu duka tungunefr-pno mrokfom mfro mfro tfit frhik bohikrhotanm mrokfom wanyruhamn yima yuhum yak kekutrahm. Nhai. Mrokfom be inji pthanimoatanm tfit tu Bro Nkifrarhu Yafothatn nikhom yima yuhum hingrnamotm. ⁵ Nanhu yima yuhur duka memoya, “Nhai nanhu ptha dukefrn mrokfom kfo ptharhota, Korin thofm Bro Nkifrar mhikaknikfot. Nhai. Tu Bro Nkifrarhu Yafothatn rroh yima yuhum yak dborhahato Bro Nkifrar hikneft hifa.”

Bro Nkifrarhu Yafothat dborioh dukefmi dborioh yima yuhum kahuktom

⁶ Nd yimam bi Bro Nkifrarhu riduka aduka yima yuhum yaketm, nd nom kfo pthiwa mrokfom kekwo. To nd nom pthiwa mrokfom nhai ndar bbinysofthu yimaroh dukefr yakitohhato pthakahnom. Yo nhai ndar bbinysoft yakitohwa yimam, bi nd hel yita yihotat tohwa yimaroh dukefr yakitohhato pthakahnom. ⁷ Nhai. Nd nom kfo pthiwa mrokfom, ndm Bro Nkifrarhu duka yima yuhurhu kafrohet mrokfom kfo pthewunom. Nd Kraisorhu yawihnehato ndar bbinysofthu yimaroh fasoh nefm minoh nhehafneft, nd dukefr bingot ndar bbinysoft yorhwa tamoh tamohr tafi hingrna duha, nd dukefr bi duka htangotmorr. Yimam yura hefenr yihato Bro Nkifrar rhu marnyewa kanjo rhuneftn, nd dukefr duka htamorr. ⁸ Nd dukefr, nhai wom yimar ndar bbinysoft tohukatohwar nd dukefrpno yakmorr. Nhai. Bi ayakmr, to nhai nmoh bro bbuka nanyaret Bro Nungothetr washato bgre misn frdbkafmomr. ⁹ Bro Nkifrarhu mrokfom kfo kangm, “Nd Bro Nkifrar duka htamo dukefr nhai wom yimar htirmorr o wanyrmorr o nhai wom yimar nd dukefr niarmotr duka marimor, ndhtet neft rhuraht. Nhai. Tu Bro Nkifrarhu yima yuhur ruhet yimam dukahato nd dukefr dukahato fak nhombra htamorr.” ¹⁰ Nd dukefr be afo kafrohet rhumour. Tu Bro Nkifrarhu Yafothatn nd kafrohet dukefr nompno mfak nriyafmotr. Bro Nkifrarhu Yafothatpno nhai wom tamohm kafrohkfot. Nhai. Tafont rhu bugewum. Ar Bro Nkifrarhu kafrohet

dukefm tu Yafothatn hti hikwotm. ¹¹ Nhai wom yimarhu dukefm ni womn htikfot. Nhai. Nd tu yimarhu yafotharpatn htitwotm nd yimar yorhwa dukefm. Nndnetn nhai wom froh yimar Bro Nkifrarhu yima yuhur rhuyuk dukefm htikfot. Nd turhu Yafotharpat htitwotm Bro Nkifrarhu dukefm. ¹² To nom tu Bro Nkifrarhu Yafothatn hemornom, tur yak marnya bomarnya nmbuhathu hti dukaneft yihato. Nd Yafothatn yak nuhasrahtm, nd dukefetrn turhu Yafothat hemornom. Ndar bbinysofthu dukefr yima dukiwar ayaknom, to nhai hti dukarfotnom nd Bro Nkifrar yak marnya bomarnyiwa nmbuham. ¹³ Nom ndar Bro Nkifrarhu bro riduka aduka yima yuhur rhumoa mrokfom kfo pthewunom. To nd nom kfo pthiwa mrokfom, nhai ndar yimanmoh dukefm nd mrokfom niakahm. Nhai. Nd mrokfom Bro Nkifrarhu Yafothatn mrokfo dukefr yahukattnom mrokfom kfo pthewunomm. Nd Bro Nkifrarhu Yafothat yahuka mrokfom, nd mrokfom kfo pthiwunomm Bro Nkifrarhu Yafothat ruhet yimampno.

¹⁴ Yimar Bro Nkifrarhu Yafothat rhu duhar, nhai nd Bro Nkifrarhu Yafothathu dukefm hti dukakfot. Nhai. Hti huhrasworm. Nndnetn nhai nd dukefm ror yakkfot. Yimam Bro Nkifrarhu Yafothetm, romrpam ruhato hti duka nhta yo yak nhta inji newumm nd Bro Nkifrarhu Yafothathu dukefm. ¹⁵ Yimar Bro Nkifrarhu Yafothat ruhetr, tamoh tamohm yak nhta hti nhta bugewurm. To nhai wom yima furar Bro Nkifrarhu Yafothat ruhet yimarhu nefm hti nhta yak nhta inji nakfot. Nhai. ¹⁶ Bro Nkifrarhu rfa borngt kfo kangt,

“Frohrn Bro Nkifrarhu dukefr yorhwatrr

tfit rorn tohhato Bror kfo hta bohtaforrr?”

Ais 40.13

To nom awi, Krairhu dukefr korhrnom.

3

Sios hingnewa hingrna yimam, ndm Bro Nkifrarhu hingrna yimayem

¹ Bar yinouroko, niko Korint tohwa metko, yindariko, na nikompno yi tohhato mrokfom hemoahat, nhai bi Bro Nkifrar rihikngotakhato Bro Nkifrarhu Yafothat yaket yimam mrokfom yahuka kanjo inji mrokfom kfo hermoyanko. Nhai. Fasoh nefm mhatoth fnahet yimam mrokfom yahuka kanjo inji mrokfom hemoyanko. Nd na yi tohmo yiham nhai bi fitoh dfik Krair rihikakrmokomr. Krairhu dukefr yuhre yon mumenroh dukefr kanjo nikmoh dukefr inji rhu hanymor. ² Be yuhre mingapamn hi hanymoyanko. Nhai bi tat yeshrim bi hermoyanko. To ariham nhaf inji, nhai bi tat yeshrim niko bi yakfot. ³ Nd mhatoth fnahyuk nefm afo tom rpat kakitoh dbkafwokomm yuhre. Nd wom Kristen yimampno mrokfom nateh natehakhato womm yuhuwelhakhato womm nndo rim rhu, yo womm rom nndo rim rhu inji nanefm, ndm tom yuhre korhmko. To nd niko niwa nefem, ndm to tuko mhatoth fnahyuk fasoh nefem. Ndar bbinysofthu yimaroh nefem nd nefem. Mirahko mrokfom nateh natehakhato womm yuhuwelhakhato womm nndo rim rhu, yo womm rom nndo rim rhu inji ananom ⁴ Womr sinyahato kfo yamukahat, “Na Porr kfiwa mrokfo yuhat hikwa.” Yo tfit womr sinyahato, “Na Apolosr kfiwa mrokfo yuhat hikwa.” Ndhtet nayak nanyor nayak nanyor nefm ndm ndar bbinysofthu yimaroh nefm newuko.

⁵ To no afo wamdukakkmno. Apolosr froher? To na froha? No, no be hingrna yimayeno. Rpa yimarparhu hingrneft hingrnewuno. Hingrnefmn

nndoh nndoh hingrnefm hingrnewuno. No nd Krairhu hingrneft ahingrna duha yino, to niko to finji Krairhu mrokfom htihato rorhu mrokfom hikrfokomm? Nonn nd rorhu hingrneft hingrnamotnont niko tuko hti hik yo wany hikmokomtn hikwokomt. ⁶Nnoh hingrneft, mswir hingrneft kanjo yimot. Nann mrokfot hnehato kfo ptha nuhasmoyanko, yimar yihato yewurit nuhtiwa kanjo. Tfit nanhu mongko Apolosr yihato rorn nd na kfo ptha nuhasyuk mrokfom frhik bohik nuhasmotrko fak duka tungunamokomt, wom yimar yihato bupam yewurim yahuka kanjo. Nnoh hingrnefm inji hingrnamononm. To tu Bro Nkifrar thu bmtamotrko Krairhu mrokfot mfak trpaknimokomt, to tu Bro Nkifrar dborioh bbhar yo bu marm hihato mswirroh yeshrt sina marnyiwa kanjo. ⁷To htitkomt nd kfo nhombra mrokfot? Yewuri nuhtayuk yimar yo bupa hayuk yimar, nd hus yimaf nhai yufa duhatef. Yimar nd yewurim thu warhiwarn yufeter. ⁸Nd hus yimaf, yewuri nuhtayuk yo bupa hayuk; nd yimaf nhai wom nndoh nndoh dukefrn hingrnarmof. Nhai. Rpat tohhato rpa dukefrn Krairhu hingrnefthu hingrna dukefrn hingrnarmof. Rof hingrnewa hingrneft Bro Nkifrar ttha thombat, turhu hti fijo ttharahrf. ⁹No rpat rpat Krairhu hingrneft hingrnewunont, nikone rorhu mswireko.

Sios hingrnewa hingrna yimam kamdam kanjo hingrnewum

Yo niko Bro Nkifrarhu tohyuk kunyko hingrna htamorko. ¹⁰Bro Nkifrar bi dborioh dukefr hemotra kunyrhu hatohyuk rahum bi ndmn kasinyamoya, bro duka tungunet kamdam kanjo. Tfit womr yayuaknehato rorn wohnfam yo rafonm thu tabotrutnihato hingrnammor. To tfit niko womko nd kunyshu hingrna buganhoneft, dukefrpno duka marnyahato hingrneft hingrnakfot. ¹¹Nd kunyrhu hatohyuk buha dany rahur, Jisas Krair Bro Nkifrar bi htamor. Ndnettn nhai tfit wom yimar yihato nd kunyrhu hatohyuk rahum tunda thuhato tfit wom rahum yakhato kasinyakfot. Nhai. ¹²Nd kunyrhu htayuk rafon wohnfam, mingiahum, hegir tikm, womm bro tat mim yakrahm, womm tefi gmohefenm rim yak wokakhato nde htarahmr kunyr. Gahturm, womm darhi mkum, mofnyuk mkum yakhato nde htarahmm. Womm yesuta gmoh mkum o yof mkum htarahm. Nanginy sikr, womm nanginy mifm yakrahm, womm rpa yamt rhuyuk misham yakhato nde dboh tikrahmr kunyr. Kpa gnam, womm mfu mkum o kpm yakhato nde gnarahmm gnam. Wommne be gtwaye thu rabforahmm. ¹³⁻¹⁴Nd rpa rpa yimam hingrnayuk hingrnefm, Bro Nkifrar kfomo kothu yakitohruha yiharn, nd rpa rpa yimam hingrnayuk hingrnefm yak nhtarahrm. Fitoh yimam, rom hingrnayuk hingrnefm yak marnyahato rroh hingrnefm fipetm forhm, nd yimam ttha hanyrahm Bro Nkifrar. ¹⁵Yimam nhai hingrna marnyarmomm rroh hingrnefm, nd yimam be nhai ttha hanyruhatrm Bro Nkifrar. Hefenrhu yinyeft, rot riyahm. Tfit yinyeftn nhai bi romn tohakruhatm. Nhai. Rom tu wuroh mongtn tohrahm.

Niko Bro Nkifrarhu kunyeko

¹⁶Niko bi tawisafeteko. Niko yimako, Jisas hikwako, nikomn bi Bro Nkifrarhu rmonr kasinyewukomr rorhu nia tohyuk. ¹⁷Niko, Bro Nkifrarhu kunyokomn, turhu yufat fak htamorko. Fitoh yimar nd Bro Nkifrarhu nia tohyuk kunyr finji narahr, nd yimar mrokfetr rhurahr. Ndnettn fitoh yimar fasoh nefm nayuk yihotohat tfit hanirko, nd yimar Bro Nkifrar kaht htarahrr.

Yimaroh yufam nom kfo yuta hagrha duha

¹⁸ Mirahko tuko ndar bbinysofthu duka tungunefr yakhato akfo amanyom, nom bro duka tungunefetenom. Nd bbinysofthu duka tungunefr rihtafhato tfit Bro Nkifrarhu duka tungunefr yakkfot. Nd Bro Nkifrarhu duka tungunefr ndar bbinysofthu met yindarim hitimr mumetroh duka tungunefr kanjo. ¹⁹ To ndar bbinysofthu duka tungunefr Bro Nkifrar hitimr mumetroh duka tungunefr kanjo. Bro Nkifrarhu rfa borngt kfo kangt, “Duka tungunet yimam kfo yamukam womm faso ayak bebnomm, rom inji dukewohat, rom be turoh fkneyuk wukier kim hegirwom.” *Jop*

5.13

²⁰ Yo wom mrokfot Bro Nkifrarhu rfa borngtn kfo memot, “Duka tungunet yimaroh dukefm Bro Nkifrar hitimr. Tamoh tamoh dukefm rom duka htatewam, be tu nhai fipa duhatm rhurahm.”

Sng 94.11

²¹ Ndnettn mirahko niko hikwa yimam akfo hagrhanomm. Niko nhai roh tirmn rhukahko. Nhai. Niko Bro Nkifrarhu tirtn korhko. Nikmoh hayuk tamoh tamohm bi tom Bro Nkifrar bi hemotrko ndmpno korhko. ²² Nikompno nia hingrna tohnhoyuk yima Pora, Apolosr, Pitar, nd nd yimanom tom bi hemorko. Yo Bro Nkifrar ndar bbinysofth hingrna htamo tamoh tamoh to bi nikomn hemotr bi nikmohem. Yo Bro Nkifrar pno toh nkifrani nmbuhat ndt bi fak marnyahemotrko rorpno mtoh nkifranirahko. Yo nikmoh nohhato sinya nmbuhat ndt rot to bi fak marnyahemotrko nikmoh nohneft tfit kasinyarahrko. Ndar yiha yorhwa tamoh tamoh to kto rhuruha tamoh tamoh, nikmoh bugam rhurahm. Bi fak hta marnyamotrko bi korhkomt rhu nmbuhat. ²³ Niko Krairsruheko. Krairsne, Bro Nkifraruher.*

4

Krairspar turhu hingrna yimaroh hingrnefm htihato kfo nhtakfot yo yak nhtakfot

¹ Nom Krairsru hingrna yimanom kanjo wahtikmnom. Nomn nd kafrohet mrokfot Bro Nkifrar nmoh tirmn htamotr kfo ptha htfaswonomt. Nd hingrneftn Bro Nkifrar fak htamornom. ² Wom yimar yihato wom yimar yakhato rorhu hingrneftn fak htter, nd yimar mrokfom wany yakiohato hikkfot. ³ Na kanga, yima mifmn na hingrnawa hingrneft htihato kfo kangm, faso hingrnnewurt o hifa hingrnnewurt, nhai mrokfom. To na tuka hingrnnewohat, nhai tfit rhuhato hti nhtakahant tuka hingrnnewa hingrneft. ⁴ Na kanga hingrneft ka be yi marnyewut. Ndnetann hingrna fura bofura-knita. To na fitoh yuhamn tukanhu hingrneft tuka hti nhtarfoyant? Kto Bro Nungothet rpar nanhu hingrneft hti nhtaruhartn ror rpar kfo mirahra, “Hifa hingrnamon o faso hingrnamo.” ⁵ Ndnettn bi mirahko bi nikomn Krairsru hingrna yimam hingrnawa hingrnefm bi nikomn akfo amanyom, “Nd yimarhu hingrneft hifa, nd yimar nhai.” Kothu tohyuk yihar afo tor

* **3:23:** 1 Korin 1.12 yo 3.4 Porr kfo memot, Korin thofm tum nakfo yiriti nnamomn, womm kfo memom, nom Porruhenom, womm kfo memom, nom Apolosruhenom. Ndhtet mrokfom yimam kfo yukm, ndm ndar bbinysofthu yimaroh nakfo nneft. Por Apolosrof, rof be Korin thofroh Krairsru mrokfothu kfo nuhashato mrokfothu hikneftn yi tohmof. Be Korin thofm tu Bro Nkifrarhu dukefr ayakm, kfo marimom, “Por Apolosrof, nmoh hingrna yimayef.” Wahtiko 1 Korin 3.1-9.

riyorchwor. Bi mirahko bi nikomn akfo nhtanomm o ayak nhtanomm. Bro Nungothetr afo nierahr. Ror nieruharn nd kafrohet kafrohet nefm yo kafrohet kafrohet duka yima yuhum yimam wany won duham yakhato tafontn htarahrm. Nd yiha yima yimanom hingrna hanyuk hingrnefroh kfo yindhor mrokfom, Bro Nkifrar kfohi hanyruham, wany hanyrahnomm.

Korin thofm kfo grhamom

⁶ Bar yinouroko, no Apolosrpno, nnoh yufampno rim pthakmo mrokfom nhai be sfno rim pthakmoyanm. Memoya, “Mrokfom inji akfo pthakah-tanm dukefm yakruhakomn Bro Nkifrarhu rfa borngt kfiwa yuhatn hik marnyahato nhai wom yimaroh hingrnefm kfo grhahato tfit womrohm kfo bebruhatkomm.” ⁷ Frohm memomko, “Bro yimako warhukahkomn Kraistrhu hingrneft hingrnewa yimaroh hingrnefm nikomn hti nhta kfo nhta inji narahkomm?” Nd niko kfo grhiwa yimam, romrpmn ndhtet hingrnayuk dukefm finji yakrfomm? Nd hingrna dukefm Bro Nkifrar hayukem. Ndnetn kfo grha fura duha.

⁸ Niko to finji wom kforuhanomko? Nikmoh dukeft duka kangko, “Jisas Kraistrhu hik yuham nom bi fak bugamonomm. Yo Bro Nkifrarhu Yafothat kasinyewa nefm bi fak bugamonomm. Nhai wom yimam niahato tfit kfo nuhas bonuhaskfot.” Yo kangko, “Nom bi Kraistr kanjo king yufat yakhato bi nomn ndar bbinysofti mount bi kakitohwonomf.” Inji kfiwuko. To nom aposernom nom be nndo knbokt rhuyukenom. Ndt rot to hifa. Hifa, niko kingko watohkahtko nom be rpat king hingrneftthu hingrnanhoyukenom. ⁹ To ka nhai. Nom nhai king hingrneft yakitohnhokahnomko. Nanhu htiyeft inji htitant. Nom aposernomn, Bro Nkifrar yakmorn tu yiro knbokt htamornom. Nom yimam hti srthuhato yak bebwohat yonent burent hti bugewumnom. Yimam htitwom yo mounmotm htitwom yimam inji newohat. ¹⁰ Yimam kangmnom, “Niko, dborioh dukef duhat yimako Kraistr nohmo yuhat kfo ptha mumiwukomt. Bro Nkifrarhu bbukeft nhai niko rhukahtko.” To nikmoh dukeft duka kangko, “Nom hifa Kraistrpno brbo frtkafwanomn bro duka tungunefr kekwonom. Yo Bro Nkifrarhu bbukeft harhuwonom.” Nikomn bro yufetkomn, nikmoh yufam met yindars kfo yuta hagrhwummm. To nom yufen duhatnomn yimam nhai nmoh yufam kfo hagrhakahmm. ¹¹ Nom ndar toh hnawa toheft to be inji yatinoht tohwonom. Hmbresham yoh nmbr bonmbretm ndm fura hiyauwonom. Nom nd toheft ritohakmohat, to be toh hik twanho hanitnomt. Yimam riyekwomnom rir borir thuwomnom. Nom be inji hutraf htfaswonom. Wom kmitn rpa wurat tfit wom kmitn rpa wurat. Rpa kmit tohrfonomn fitha rhurfonom? ¹² Nom tunmoh tireh yeshrim kaunom, yo tunmoh tireh wuskam hmbritnom o tamoh tamohm nom tunom korhnom. Yimam fasoh fasoh mrokfom kahukmnom, nom tfit kfo kangnom, “O Bro Nkifraye, wayak marnyanm.” Fasoh fasoh yak bebmmom, nom nhai kekuhato tawo wom mrokfom hekahnomm. Nhai. Nom be tngm youkikhato korhnom. ¹³ Rom fasoh hnomha mrokfom heshombat, nom tfit dborioh mrokfom kahuknomm. Yimam faso hti bebwomnom. Ndt mirahko ka be nohokrhofrpayet. Nhai. Nd nefit bi riruhakgotmot.

Tu Porrhu nefm Korin thofm hikkfot

¹⁴ Na mrokfom inji wandfiwohat, mirahko ka nikmoh yak yimtnaneftn mrokfom inji wandfiwanm. Nhai. Niko nanhu yon bugakomn kfo hta

mrokwom kahukanko. ¹⁵ To na kanga wom mrokwom finji akfoyanko, to nhai wom frohm kfokwot. Yonmari ten tausen tisam yihato Kraistrhu mrokwom tisimrahmko, to niko Kraistr hikwa yuhat, nanrpaya yifemwanko. Nann gutnius mrokwot nikmoha hanyhato mrokwom hemotanko, niko Kraistr rihikakmokomr. Nd yuhatn nanrpaya yifemwanko. ¹⁶ Ndnettn yifema tohwa yuhatn niko hti hikak hanyhato watoh hikko. ¹⁷ Nd dukeftpno Timotir kfo tkrurmoyanr. Gutnius mrokwofothu hik yuhatn ror nhaf nanhu yoner. Rorhu hingrneft hifa hti yindhorwant. Bro Nungothetrhu hingrneft ror hifa kakitoh marnyewurt. Nd yonrn nikompno nia tohruharn, rorn na Kraistrpno frtkafhato hikwa hikeft tfit kfo nuhasrahko. Nd nikompno yi tohhato hiruha mrokwom, na nd mrokwomn kmi kmim rhu htfaswa sios kfo nuhas htfaswanm.

¹⁸ Nanhu nia nmbuhat wanyakti wanyaktihato tuko nakfo nakfo memoko, “Porr nhai nieruhatr.” Inji nnakfomokomn na kfoyuk mrokwom kfo bebmokomn tfit tukmoh mrokwom kfo grha yindhormoko. ¹⁹ To nanhu nia nmbuhat niko kfiwohat, na nieruha. Na bi brbohwa nianeft. Bro Nungothetr kangr fitoh yiha, nd yiha mfnahruha. Na nia thombat, mirahko ka nd niko kfo grha yindhorwa yimaroh mrokwofroh wanyneftn nieruha. Nhai. Na be nierhoyann afo hti hikruha nd rom hingrnewa bbukeft. ²⁰ Yimam bi Bro Nkifrarhu kingdomkwot fknihato bi rorn kak hta bohtewurm, htirahn rorhu bbukeft kforaht, rroh toheft nndo htirahnt. To mirahn ka tngt kfoyuk mrokwomn htiruha. Nhai. Rom nayuk nefmn hti nhtarahnt. ²¹ Kfo ttiwonwanko. Na nikmoha niahato nd niko womroh mrokwom kfo bebhato tfit womroh mrokwom kfo grha yindhorneft tfit mhtineft finji narhoyanko. Kumbuhu nmbuhaye tathato nd neft yafhorahkomt? Nd neft yafhorahkomt na be nia mhtineft na be yindhor yima yuhurpno mrhuhato htirahkma kfo ptha yindhornhohato hifa yima yuhum hmbriuhanko.

Kristen yimampno buha rhyuyuk nefm tum ruhato nakfo gubhukfot

5

(Sapta 5–6)

Korin sioshu met yindariroh fasoh beb nmbuhat

¹ Wom yafotha duha neft nikompno rhumot yimam bi kfo ptha habriwomt. Nd neft be tu fasoh beb nmbuhat korhtko. Wanymoya kfo memom, nikmoh sioshu wom Kristen yimar turhu yifemrhu fndoh tuhant hatohmort. Nd ror namo neft, Bro Nkifrar hik duha yimam nhai ndhtet neft nakahm! ² To nd neft htitokomt? Ndt tamoh neft yorhwattko tfit niko kfo yindhor yamukako, “Nom hifa korhnom?” Nikmoh womr nayuk neft wahti yimtnakomt. Wahti yimtnakahkomt yima yuhum akrhomko. Yima yuhum krhohato nd yimar nhai tfit nikmoh rifiny swirm o tamoh nefm yi rhunhokfot. Be inji wuri tohkfot. Turn nd neft bi fafho thurt, ee btn niko yakmiyakkfot. Na kanga inji narmokomr.

³⁻⁴ Ar wuri toheta, thatiprpat wuri tohwot, nanhu yima yuhur nikompno korhr. Yima yuhur nikompno yorhwarn nd yimar nayuk neft na bi htimoyant. Ndar na yimaya hatohwa nyingam htita kanjo nd yimarhu neft bi htimoyant. Htihato nd yimarhu finjina finjina yuham bi duka htamoyann. Ndnettn na nmoh Nungothet Jisarhu yufatpno kfiwa. Ndhtet neft nayet

yimar wayak gnggtattwakomr. Warhu rifinykahkomn nd yimar kangko finji ananomr, mrokfot bi rifiny swirtn wayak dbkaftwakomt. Nanhu duka yima yuhur nd rifiny swirt rhurahr yima mifa yorhwa kanjo. Nd niko yak dbkafruha mrokfom, nmoh Nungohtet Jisasrhu bbukeft hingrnarahtm. ⁵ Na kfiwanko, nd yimar wayak tuhafotwakomr. Mirahr tfit nikmoh rifiny swirm o tamoh nefm tfit arhunhoyanko. Be inji atoh furatwar. Tur inji toh furaruharn tfit tur htirahrt nd ror tohruha toh nmbuhat finji tohruhart. Tur htiruharn rorhu yima yuhur yak kekutrahr. Yak kekuthato bro kotkfot toh thombat mrokfo duhatr rhurahr.

Korin thofm fasoh net fasoh net yimam yak thukfot

⁶ Nd womrhu mett hatohet yimar hatohwakomrn tfit nikmoh sios kfo hagrha yindhorwokomt. Ndt nhai tu nefi nakahko. Niko htitwokomt bretparoh hingrneft? Tefi yispennm bretpat rihtafraht, htirahrt bretpat tfit kur fannahato bropat rhurahr. Ndnettn nd womrhu mett hatohet yimar tuha siosn hatohrahkomr; to be rorhu neftn womm htihakany htihakany be nikmoh sios be nd neftn broniraht. ⁷ Nd kunym yorhwa yatk yatk yis yak thuwa kanjo nd womrhu mett hatohet yimar wayak thukomr. Nikmoh sios tfit wom toh duha. Inji narahko, nhai tfit wom yispam nikmoh kunym wom rhuruhatm. Niko bi tu Bro Nkifarn yak wus bowus marnyamorko bi tur kanjo bi ruhetkomn, ndnettn ndhtet fasoh rine wuniyet yimam yak tuhato turpatko Kristenko inji rhukfot. Bi Kraistr nmoh fasoh fasoh nefm minoh nhehafmorm. Bingot Pasofa burwa yiha Judam sifsifm wasmoa kanjo inji wasmomr. Ndnettn nikom wutha yima yuhumpno rhukfot. ⁸ Ndt tu kfot kfiwanko. Nom fasoh fasoh nefm yafhohato Bro Nkifrar hiket yimam kanjo nom inji rhukfot. Nhai tfit tunom toh hnamo yatk yima yuhur kanjo nom tfit inji tohkfot. Nhai. Womroh hti srthu hasohato yuf bunyim kanjo rir borir hasoneft, yafhokfot. Nd nefm yafhohato tfit hifa yima yuhurpno womm yak marnya bomarnyakfot.

⁹ Ndwom gontwat na nikompno htafmot, wom mrokfot kfomoyanko. Kfo memoya, “Mirahko nd ijoh tone htifaset yimampno arhunom.” ¹⁰ Na nd mrokfot kfomohat, nhai kfo marimoya, ndar bbinysoftu ijoh tonayet yimam, o wuss hmarsi yakt yaket yimam, o rikohet yimam, o nkifra tahi rmonm o nkifra tahim kfo bruttnayet yimam, rompno brbo arhunom. Ndhitet ndhtet yimam ndar yuht bbinysoft toh htfas bugewumt, ndnettn nhai romn nd kfo rafo mrokfot kformoya. ¹¹ Na kfomo mrokfot yimot, nd yimam kfo yamuka, “Kristenenom,” to tfit htirahnm metmpno yi habri-rahm, wuss hmarsi yakt yakraht, nkifra tahim kfo bruttnarahm, womm faso faso kfo rindho borindhorahm, drin spak htfasrahm, womroh wuskam rikoh htfasrahm, tom ndhtet ndhtet yimam na kfo memoyanko, mirahko arhunhonomm, o ayemskanhonomm. ¹²⁻¹³ Mirahko wom yima fura bofuram tafi sios yarim fnahna duhatm nayuk nefm htihato ayak gnggtatnomm. Nhai. Rom Bro Nkifarn htirahrm. Bi sios tohet rhunefm htihato yak gnggtatneft, nhai mrokfom. Wayak gnggtattwakomr. Bro Nkifrarhu rfa borngt kfiwa mrokfot kfo kangt, “Fasoh fasoh nefm nayet yimar wayak tuhafotwakomr.” Ndnettn nd womrhu mett hatohet yimar rhunho duha.

6

Tuko Kristenko nakotim nakotim duha

¹ Niko Kristenko tuko nakotim nakotimwoko. Nndnetann kfiwanko. Niko tuko Kristenkompno mrokfom rhuneft, tamohmpno Bro Nkifrar hiket yimam myak trohnihato tfit Bro Nkifrar hik duha yimampno mrokfom hanitakomm? Ka tu sioshu yimam yakhato romn nikmoh mrokfom wanyheneft, ka nhai? ² Wawanyko, kto bro kotkfot yakitoh thombat, nom Bro Nkifrarhu yimanomn Krairspno rhuhato ndar bbinysofthu yimaroh mrokfom yakitohnhorahnomr. Nndnetn ndhtet tefi mrokfenm tuko Kristenkompno rhuyukm, tamohmpno niko Kristenko nhai yakitohhato yak nohrfotkomm? ³ Yo mounmotroh mrokfom nomn wany yakitohirahnomm. Nndnetn ndar bbinysofthu tamoh tamoh nefenm yihof href yimam na hasiwam, nomn wany yakitohhato yak nohrfonomm. ⁴ Nndnetn niko tuko Kristenkompno rhuyuk mrokfenm tamohmpno tfit Bro Nkifrar hik duha yima furampno tfit hanitakomm? Tukmoh sioshu yimar yakhato rorn yak noh marnyahirahrko. ⁵ Wayimtnako niko ndhtet neft newohat. Niko tukmoh sioshu yimam myak htanihato tfit Bro Nkifrar hik duha yimampno mrokfom hanitahat, kangme sios ka ndhtet yima duhattn mrokfom tfit wom yima furampno hanitkomm. ⁶ Tamohmpno wom Kristenr sinyahato tfit wom Kristenr kot hanitarr? Kot hanyhato tfit Bro Nkifrar hik duha yimarn mrokfom wanyahukarf.

⁷ Nd niko tuko Kristenko niwa neft, wom Kristenr sinyahato wom Kristenr kot hanitahat, ndt be tuko nayak kasuhwoko. Nhαι bi Jisasrhu yihotat hikkahn. Tamohmpno ni Kristenn wom Kristenr tamohm yak nhehneft yak marsisa duha yita? O, wuska yak rikohniheneft hti marsisafo duha yitanr? Womr kot hanitnr, to be nd tkittn tu kak suhwo. ⁸ To nhαι duka mekahko, “Ndhtet dborioh nefm ahiknom.” Nhαι. Tfit tuko nayak nheh nayak nhehwoko. Yo tuko narikoh narikohwoko. Ndhtet nefm tuko Kristenkompno korhm. ⁹ Niko mrokfom bi wany hneteko, fasoh fasoh nefm nayet yimam nhαι Bro Nkifrarhu kingdomkfot fkniruhatn. Mirahm wom yimam niahato amkfo nheh bonhehnomko. Yimam nd ijoh tonitam yo nkifra tahim kfo brutnewam, yo womroh metm hatohwam, yo yindarim tfit tum yindarim nahti kecutwam, ¹⁰ yo rikohwa yimam, yo wuskat hmarsi yakt yaket yimam, yo drin spaket yimam, yo womm faso faso kfo rindho borindhēt yimam, yo womroh wuskam teh hutfaknita yimam, ndhtet ndhtet yimam nhαι Bro Nkifrarhu kingdomkfot fknihato tohruhatn. ¹¹ Nikmoh womm nd tkitt afo tohmoum. To hifa bi Bro Nkifrar fak wus bowusmorko. Yak wushato bi turhu yufatpno fak nmbtekmorko. Bi yima yuhum bi wuthamn bi dborioh met yindariyeko. Jisasrhu yufati yo Bro Nkifrarhu Yafothathu bbukeftpno bi dborioh tuhan yindariko korhko.

Nmoh thatipt Bro Nkifrarhu Yafothathu kunyet

¹² Womm kfo kangm, “Mrokfo duhatenom tamoh tamohroh finjina finjina nefm. Nhαι wom kfo rafo mrokfot rhukahtnom.” Tmift, to mirahko ka nd tamoh tamoh nefm ka be na fura bofurahato hifa hifa rhu nmbuhat yakrahnom. Nhαι. Kfo kangm, “Mrokfo duhatenom tamoh tamohroh finjina finjina nefm.” Tmift, na tamoh tamohroh nanefn, na nhαι nd nefn na ttafakhato nd nefn na hatone htfaskfot. ¹³ Womm kfo kangm, “Tamoh tamoh yeyuk yeshrt yatithu yiyuket. Yatit yeshri yanyeftn yuhurwot.” Ndt rot hifa. To tfit kfiwa. Kto yati duhatnom rhurahnom. Nndnetn nhαι

nd yeshri yayuk dukefr rhuruhatr. Nd ijoh tone dukefr ruhet yimam kfo kangm, yatit yeshri yanyeft yuhurwa kanjo thatipt sinyewut ijoh yi htfasneft. Nd dukeft fasohet. Thatipt Bro Nkifrar htamohat nhai marimor, “Ijoh tone htfasyukt ahingrnayant.” Nhai. Thatipt Bro Nungothetruhet, turhu hingrneftn nd thatipt hingrnakfot. Rorn ndar thatipt kakitohwort. ¹⁴ Jisasr bi nohetr, Bro Nkifrarhu bbukeft kfomot kasinyamorr, nom to inji kanjo kasinyarahrnorn Bro Nkifrar.

¹⁵ Niko Jisasrpnno rim tohnhato hikaknitahat, to nd yiharn niko bi rorpnno nathu nanyjhohato kangme bi rpa yima Kraiser. Ndnettn nd Kraiserpnno nathu nanyjhohato bi Kraiser kanjo ruhet thatipt nhai tfit wom tirt o wurat o tamohat yakhato tfit ijoh yuhatn htakfot. Inji naneft ndt nhai tu dborioh neft. ¹⁶ Yo wom mrokfom nhaf bi wanyeteko. Yimar nd yima yimampno yi htfaset mettpno bi yifir, to be bi rotppno frtkafwarn bi hti kangm rpa yimayer. Bro Nkifrarhu rfa borngt kfo kangt, “Nd hus met yindarif be rpat nafrtkafruhafn be mirahme rpa yimayer.” ¹⁷ To nd yimar Bro Nungothetrpno frtkafetr, nd yimar bi Bro Nungothetrhu Yafothatpno frtkafwor. ¹⁸ Niko dukefmpno yiha yiha rhukfot. Nd ijoh tone dukefr mfnahwor yak karhukfot. Yimam ndar tamoh tamoh nef furam niwohat nhai turoh yafotham faso yak bebkahmm. Yimar wom metmpno yi htfaswor o mett wom yindarimpno yi htfaswot, nd neft yimam niwat, ndt be turoh yafothat kak bebwom. ¹⁹ Ka nhai hti mikahko, thatipt Bro Nkifrarhu Yafothathu rhuyuk tkitet? Nd tkitt bi tu Bro Nkifrarhu Yafothat rihtamort. Bi rorhu Yafothat rihtamort, niko bi rorhuweko. Bi rorhu yinhit korhko. Nhai tukmoh yinhitn wom rhukahko. ²⁰ Nikmoh nmbuhatpno kmi tiamr fohmorn. Ndt tu bro nmbuhat. Ndnettn tamoh tamoh nefn nikmoh thatipm naneft, afo htikfot. Tamoh nefmn thatipm naruhatm riruh aruhuyuk yimam htiruhamn Bro Nkifrar kfo yindhorrhahm, nd nefmn nakfot.

Porr kfo ptha memor, “Yimam tuhan yakkfot.”

7

(Sapta 7)

Tuhan yaknefthu mrokfot

¹ Nd niko wandfamo tuhan yak yuharoh kfo ttiwon mrokfotn, bi afo kfo ptha nuhasaforuhanko. Yimar kangr tuhan yak duha be inji sfno atoha, nhai mrokfom. ² Tmift, htinorn met yindarim nhai warhukahm. Thatipm he htfaswom. Ndnettn duka kanga met yindarim nhai toh furakfot. Metm ramet bugam rhukfot yo yindarim tuhanet bugam rhukfot. ³⁻⁴ Metm yindarim ramet bugam yo tuhanet bugam rhuhat tuhanem nhai hakkrkfot rothu thatipt. Rothu thatipt ramemruhet. Yo ramemr nhaf inji, nhai rorhu thatipt hakkrkfot. Rorhu thatipt tuhanemtuhet. Tuhanemthu thatipt, nhai tu tuhanemtn kfohato ramemr be hikkfot. Nhai. Ramemrhu tngtn rot be wanyhato hikkfot. Ramemrhu thatipt nhaf inji. Nhai tu ramemrn turhu thatipt kfohato tuhanem be hikkfot. Nhai. Tuhanemthu tngtn ror be wanyhato hikkfot. ⁵ Ni ramet metn, yo ni tuhanet yindarim mirahfn thatip nahanyeft nakfo kur o nakfo hrekno. Bro Nkifrarpnno kfo bruttnanefrpatpno kangfn rhu furahato Bro Nkifrar afo kfo bruttnano, ee afo tufnn rhu naphahato hifa yindhorrowfnr nd dukefr ee btn inji nakfot. Nd yiharpa rhu furafohato tfit kto rpat tfit hwekfot. Inji na duha

yirahfn, Satanr ndha yarim tohnerahr. Yarim tohnehato wom dukefr mtawastiwonrahrn ni metn o yindarin. Mwastiwonruhatrn yima yuhur sinyahato wom mett o yindarirpno yihato msuhrahn. ⁶ Ndt be kfo nuhas mrokfot kfiwa. Nhai kfo mikaha inji wahiktwako. Nhai. ⁷ Na, na damiag toht tohwa. Nanhu dukeft kanga, na tohwa toheftn niko buga be inji tuhan yak duha atoh furanom. To nhai. Bro Nkifrar nd tuhan mitofr harhuworr. Womm nd tuhan dukefr kahukrm, womm nhai. Metm nhaf inji wommn yindari dukefr kahukrm, womm nhai.

⁸ Nd brio toh furewa met yindarin yo met dhirm o tuhan yafonm, ndm kfo kanga, rom hifa be inji na tohwa kanjo be inji damiag toht tohneft. ⁹ Ndt be tukomn tukmoh yima yuhum yak nhombrakfot. Kak nhombra titko brio toh furaneft, to be ni metn ram yakkfot, yo ni yindarin met yakkfot. Briyo tohrahn, metmpno yo yindarimpno yi htfasneft yak tfaktirahnr.

¹⁰⁻¹¹ Yimam nd bi ram yaketm o met yaketm wom mrokfot kahukanm. Nd mrokfot mirahko ka nanuhet, nd mrokfot, Bro Nungothetruhet. Nd mrokfot inji kfiwut: Mirahr ramemr turhu mett ayak tuhafoyant, yo mett miraht tutu ramemr ahtanykohahr ayakrmanyiya. Bi htanytre, nd mett be inji toh fura habrikfot, miraht nfri ramr ayaka. Tutn toh hanyhato tut toh fura habrinyeft kokrwote, tfit tut yakafo tanyuk yimarpno tfit yikfot.

¹² Yo tfit niko wom Kristen met yindarikompno wom mrokfot kfiwa. Nd mrokfot be tukanuhet. Mirahko ka Bro Nungothetruhet. Nann be kfo kanga, wom Kristen yimar, rorhu mett nhai Bro Nkifrar hikkaht, to metthu toh nmbuhat hifa yindhorwot nd Kristen yimarpno tohneft, nd Kristen yimar mirahr ayak tuhafoyant. ¹³ Kristen mett nhaf inji. Rot yakyuk yimar nhai Bro Nkifrar hikkahr, to yindarin hifa yindhorwot nd Kristen metpno tohneft, mett miraht ayak tuhafoyanr. ¹⁴ Kristen yimarhu toh nmbuhat hifa nd Bro Nkifrar hik duha metpno rpat nafrtkaf marnyahato rpat tohwof, nd sawohf Bro Nkifrar hifa hti yindhorhato nd Kristen yimarhu mett Bro Nkifrar kukatohaf hanitrt. Kristen mett nhaf inji. Nd Bro Nkifrar hik duha yimarpno hifa rpat nafrtkafhato tohwof, Bro Nkifrar hifa hti yindhorhato rothu ramemr Bro Nkifrar kukatohaf hanitrr. Ndnetn nd sawohfhu yonm Bro Nkifrar nhai hti marsisakfot. Tur hiket tuhan yindarin kanjo rorhu tirtn korhm. ¹⁵ Bro Nkifrar hik duha mett kangt nd rot yakyuk Kristen yimar ahtanyanr, nhai mrokfom. Kristen yimar hti marsisafokfot. Yo Bro Nkifrar hik duha yimar nhaf inji. Kangr nd ror yakyuk Kristen mett ahtanyant, nhai mrokfom. Kristen mett hti marsisafokfot. To tfit Bro Nkifrarhu bro dukefr nhai wofnkahr naftrndohneft. Kangr be inji rpat watohfn. ¹⁶ Ka rpat tohhato Bro Nkifrar hik duha yimar, ni nd ror yakyuk Kristen metnhu rhu nmbuhatn yak kekutruhattr Bro Nkifrar yakrahrr. Yo Bro Nkifrar hik duha mett nhaf inji. Ka rot yakyuk Kristen yindarinhu rhu nmbuhatn, yak kekutruhantt Bro Nkifrar yakrahrr.

Bro Nkifrar kfo htamo toh yuhatn nom toh hikkfot

¹⁷ Nom rpa rpa yimanom, bi tu Nungothet Jisarhu hti fijo bi fak hta nhombramornom. Ni womn bi tuhan yakniyetnn Bro Nkifrar fakmorn, to be tuhanetni tohhato Bro Nkifrar hikkfot. O finji finji tohetn Bro Nkifrar fakmorn, ni be nd toheft tohhato Bro Nkifrar hikkfot. Na kmi kmiroh sios yi htfas thoft, to be nd na kfiwa mrokforpat kfo ptha htfaswanm. ¹⁸ Wom yimar bi tha pukniyetrn Bro Nkifrar fakmorr, to be tha puketr rhukfot, nhai tfit that rimakhato yak nanyjhokfot. O tafi tha puk thu duhatrn Bro

Nkifrar fakmorr, to be tha puk duhatr rhukfot, nhai tfit that puk hhrif thukfot. ¹⁹ Nhai tha puketnomn Bro Nkifrar htihato hti yindhorkahrnom. Nhai. Nd tha puk hhrif thu hingrneft nd nndo thatipthu hingrnefet. Ror kfo pthayuk mrokforoh hikneftn tot tu Bro Nkifrar yimam hti yindhorwat. ²⁰ Finji finji tohetnomn Bro Nkifrar fakmornom, nom to be nd toheft toh hikkfot. ²¹ Ka nikhom wom yimam o metm bi slef tohetmn Bro Nkifrar fakmorm Kraistrhu hikneft. Slef tohetmn Bro Nkifrar yak thombat, to be mirahm nd yimam o metm yima yuhum krhohato akfo amanyom, “O nom slef tohwanomn nhai Kraistr hik marnyaruhatnomr.” Bi inji kfakni duha. Tum yak hanyuk yimaroh duka fijo kangm ayafhonomn, to be hifa. ²² To fitoh yimamn o metmn slef tohetmn Bro Nkifrar fakmorm Kraistrhu hikneft, nd yimam o metm be bi fnahomn bi Kristenem. Fitoh yimamn o metmn slef toh duhatmn Bro Nkifrar fakmorm, nd yimam o metm be bi tfit Kraistrhu slef yimayem o metem bi. ²³ Nd fasoh fasoh nefm yak nhirtamoa mtitikt be bi thu nyusakmokomtn be bi nhai wom mtitofit yakitohkahtko, be bi tfit Kraistruheko. Niko dukahato turhu yonr niahato rorn nikhom nohyuk tkitt yakhato rorn nohmor. Ndnnetn yimam kfo kangmko, inji inji watohkahkomn o inji inji waikahkomn Bro Nkifrar hti yindhorahrko, mirahko yimam kfoyk tngmn ahiknom. ²⁴ Bar yinouroko, tfit wompam nd na kfi mrokfot mkfekwant. Nom finji finji tohetnomn Bro Nkifrar yakhato Kraistr mhikaknimonomr, to be tunom tohyuk toh yuhatn tohhato Bro Nkifrar yakitohkfot.

Tuhan duha yimami ram duha metroh mrokfom

²⁵ Tuhan duha, yo ram duha met yindariroh mrokfom niko kfo ttiwonmot, ndtn afo kfo ptharuha. Met yindarim tafi ram yak duham yo tuhan yak duham, ndm Bro Nungothetr nhai rompno yiyuk wom tamoh mrokfom kformorm, be nanhu duka yima yuhurn wom kfo hta mrokfom kfo ptharuhanm. Nd na kfoyk mrokfom niko yakkfot. Nd tamoh tamoh riduka aduka yima yuhum na kfiwam Bro Nkifrar nann hti yuhuwafhato nd riduka aduka yima yuhum hemora. Ndnnetn nd na kfoyk mrokfom niko yakkfot. ²⁶⁻²⁷ Nom Bro Nkifrar hiket yimanom be tu fasoh yiha bebr tohwanomn bro krhopam kekwonom. Ndnnetn kfo kanga frohm bi tuhanetem rom be inji tuhanetm tohkfot. Mirahm tfit wom fitoh yuhamn tuhanemrom ayak tuhafonomn. Frohm damiagm tohwom rom be inji damiagm tohkfot. Mirahm tuhan yakneft adukanom. ²⁸ Kto tuhan yakrahn, ndt mirahn ka Bro Nkifrapno mrokfeta rhuruha. Nhai. Yo Bro Nkifrar hiket tuhan tmaht, tafi yindari dukefr toh duha met tmaht, nhaf inji, kto wom yimar yakneft miraht ka ndt Bro Nkifrapno mrokfeta rhuruha. Nhai. Yimam tuhanetm rhuneft bok krhopam yakrahn, ndnetn nhai wofnkaha niko tuhanetko rhuhato ndhtet krhopam yakneft. Nd dukeftpno nd mrokfom kfiwanko.

²⁹ Bar yinouroko, nhai be sfno inji kfokahanko. Yiham bi klopen hnewum. Ndnnetn ndar dfik yiham Kraistr nom toh gari hasoruham, tuhanet yimam Bro Nkifrar barkof bro dukeft htakfot. Nhai tuhanemromn. Yo metm nhaf inji. Bro Nkifrar barkof bro dukeft htakfot. Nhai ramemromn. ³⁰ Bro Nkifrar hiket yimako tamoh nmbuhampno yima yuhum dukahato nurwoko, mirahko nd nefm bro dukefm ahtanom. Nd nefm nhai wom rhuruhatm. Yo tamohmpno yima yuhum yindhorwomko,

mirahko be nd yindhoreftn bro dukefr ahtanom. Nd yindhoreft nhai wom rhuruhatt. Kristen yimam wuss wiknewam nhaf inji. Be nd tum wiknayuk wussn bro dukefm hta duha. Nd wuss nhai romn tfit wom yakitohruhatmm. ³¹ Ndar bbinysofthu kur bnka yihar to bi brboh hanitr. Ndhтет hingrnefenm nom hingrnewam, ndm bbinysoftpno rpat hti hambrafrahnomm. Ndnetn yima yuhum mirahm be nd bbinysofthu hingrnefmn yo dukefmn afrtkafm.

³² Tfit wom mrokfot kforuhant. Na nhai wofnkaha niko bok krho dukefmpno rhuneft. Niko hitiwokomm tuhan duha yimam hingrnewa yuhat. Rom nhai wom bok dukefm rhukahmm. Rroh dukeft duka kangm, “Hifa be damiagnom tohhato Bro Nungothetrhu hingrna dukefrpar tohneft. Bro Nkifrar hifa hti yindhorwornom.” Rroh dukeft inji korhtm. ³³ To tfit tuhanet yimar nhai rorhu dukefr inji rhukahrr. Nhai. Rorhu dukefr tuhanemtn bro dukefr afo kitr. Kangr, rhu nmbuhat yak marnya bomaryahato mett yindhorraht. ³⁴ Ndnetn yindarirhu dukefr bok dukefm kekwo: Bro Nungothetrhu hingrnefm dukaf hany yo tfit turhu mett dukaf hany inji newarn hus bok dukefetr korhr. Ram duha mett o wom yimarpno tafi yi juha mett, rothu dukefr Bro Nungothetrhu hingrnefthu hingrna dukefrpar korhrt. Kangt, “Be Bro Nkifrapno rim fnahni bugahato yuht thatipti yima yuhu bugam Bro Nkifrapar he bugakfot.” Ram duha metthu dukefr inji korht. To tfit ramet metthu dukefr nddo korhrt. Rot, tuthu yindarirhu hti yindhor nmbuhat dukahato tamoh tamoh kunyshu hingrnefenm yak kars, hingrna kars, yo briaahakorhof hingrnefenm hingrna, yo tufhu sawoh rhuyuk rhu nmbuham ndm dukaf hany ndhet ndhet bok dukefmi hingrnefmn korht ramet mett. ³⁵ Na nd nd mrokfom kfo pthiwohat, nikomm dukahato nd mrokfom kfo pthiwanm. Ndm nhai nikmoh kfo rafoyuk mrokfom kfo pthakahanko. Nhai. Kanga dborioh nefm wahikkahkomm Bro Nungothetrhu hingrneft wahingrnako. Na wofnkaha nikmoh yima yuhum krho hanyhato Bro Nungothetrhu hingrneft yakitohneft.

³⁶ Wom nakfo nanfet met yindarif tohhany tohhany, yindarir nhai wofnkahr toh hatoh furaneft, kangr, “Be yudbat mett ayaka,” nd yima yuhur be mfro tohworr; to be nhai mrokfom yudbat niyakneft. Bro Nkifrar nhai finji kforuhatr. ³⁷ To yimar met dukefr nhai bmbri tohkahr; kangr, “Be inji afo toh furarahno, nhai bmbri niyakruhatno,” ndr tu dborioh dukef mifer. ³⁸ Ndnetn yimar turhu kfo nanf tuhant nuwat kanjo yatinohwort yudbat yakneft, ndt dborioh nefet. To yimar nd kfo nanf tuhant nhai nuwat kanjo yatinohkahr yudbat yakneft, kangr be inji afo atoh furano, ndt tu dborioh dukef mifet.

³⁹ Tfit ramemrom noh htanita metroh mrokfotn tfit kfo ptharuha. Niko bi wany hneteko. Mett tafi rot yakyuk yindarir noh duha, afo rpa raft kakitohwotf. Nd rot yakyuk yimar bi fnohnir, nd raft nhai wom rpat yakitohkahtf. Kangt, wom nfri ramr ayaka, nhai mrokfom. Tmift nfri yimar yakneft, hti hanyhato Kristen yimarn yakkfot. ⁴⁰ Be nanhu duka yima yuhurn duka kanga nd yindarir nohtaniet mett tfit wom yimar yak duha yinyeft hifa, rothu rhu nmbuhat rhu yindhorraht. Na inji htita, na nd kfiwa mrokfom, Bro Nkifrarhu Yafothat yorhwotta mrokfom kfo pthiwanm.

Tahi yifonm rim htahuka nuwa rikat ka Kristenm yakfot o nhai?

8

(Sapta 8–10)

Tahi rmonm rim htahuka nuwa rikathu mrokfot

¹ Tahi rmonm rim htahuka nuwa rikathu ya nmbuhat kfo ttiwonmokma. Nd mrokfotn tfit kfo ptharuhanko.* Wom Kristen yimam kfo kangm, “Tahi rmonm rim htayuk yeshriroh ye hik yuham nom nhai wom mmokahnomm, nom bi tawisaf bugewunom. Ndm rom hifam. Nd yeshrim rimakhato yak yerahnomm, Bro Nkifrar nhai faso htiruhatrnom.” Hifa kfiwum. To tfit kfiwa, ndhtet dukefet yimaroh mrokfom kfo pthaneft, nhai wom nfri Kristenm dukahato pthakahm. Mrokfom be kfo grhanano kfo pthewumm. Wom Kristenm afo hti dukahato tamoh mrokfom kfo pthaneft, ndm hifa. Tfit womm wanyruhamn dukeftm yakruhamn myakitoh trpaknirahmt Bro Nkifrarhu mrokfot. ² Yimam kfo yamukam, “Nom tahi rmonroh tamoh tamoh yeshri ye yuham nom nhai bi wom mmokahnomm, nom bi kak bugewunomm yeshri ye yuham.” Na kfiwa ndhtet kfet yimam kfo furewum, nhai tafi dukeftm yakkahm. ³ Yimar marbitn Bro Nkifrar htewar Bro Nkifrar bi htitworr.

⁴ Tahi rmonm rim htahuka nuwa rikathu ya nmbuhat nom Kristenmoh htiyefit inji hitinom, nkifra tahi rmonm nhai yafotha duhatem. Yo hitinom, nhai Bro Nkifrar kanjohot nkifrar ndar bbinysot rhukahr. Nhai. Rpa Bro Nkifrarpar ndar yuht bbinysot kakitohwort. ⁵ Rom tom yimam kfo yamuka kmi yarhm, tek yarhm, tkit nkim, tangi tangiroh nkifram, yo mar gunyr, yamt, mim, foh nungam yiram tamoh tamohm kfo tndhet bugam korhm. Kangm nmoh nkifra shrem. Ndm rom hifa nd tndh mrokfom korhm, ⁶ to nom Kristenmoh htiyefit hitinom, rpa Bro Nkifrarpayer. Rorn tor nmoh Yifemr. Rorrpar kfomor tamoh tamohm nom htitam dborhamom. Yo yimanom rorn hingrnamornom. Hingrnhato nmoh dukeftmpno, yima yuhu bugampno toh hikwonomr. Yo rpa Bro Nungothetpar korhr, ndr Jisas Kraiser. Tamoh tamohm rorn hingrnamorm. Ror kfiwur nom korhnom.

⁷ Wom Kristenm nhai mekahm, nkifra tahi rmonm yafotha duhatem. Rom bi hti hnamoumm tahi rmonm yemrom rim htahehato bbukeft hingrnamoahat. Ndnetn nd nkifra tahi rmonm rim htayuk yemrom yanyefit bok dukeftm kekwoomm. Wom dukeftm kangrm wayak wayakomm, tfit wom dukeftm kangrm mirahko ayak ayanomm nd nkifra tahi rmonm htayet yemrom. Ndhtet bok dukeftm yekwamn yima yuhum be krho htatewumm. ⁸ Mirahko ka yeshr ye yuhamn Bro Nkifrarpo brbo yirahnom. Nhai. Bro Nkifrar nhai nd yeshr ye hik yuham dukakahr. Nd yeshrim rimakhato yak yerahnomm, Bro Nkifrar nhai faso htiruhatrnom, o kfo kurrahnom nd tahi rmonm htayuk yeshrim, nhai toh marnyaruhatrnom Bro Nkifrarhu nyingampno. ⁹ To niko bi ritohngotaket Kristenko dukeftmpno niko nkifra

* **8:1** Porr nd kmi Korinko hingrnamoa yiham Bro Nkifrar hik duha yimam (haidenm), fohm, nungam, kmbrum, nd ndm yaknimoamm turoh nkifra tahi rmonm rim htamoumm. Kto tfit nd yemrom yaknimoamm maket swirmn htamoatmm yimam wiknamoumm. Kristenm ndhtet nefm htimoamn kfo ttiwon mrokfot Porrpo htamomt.

tahimpno rim htayuk yemrom yakfot. Nfri Kristenroh nyingampno niko ye fura bofura duha. Rom kfo kuryuk yeshrim niko rihtiyakhato yeruhammn yima yuhum tfit mkrhotarahmm.

¹⁰ Ni yima bi Kristen tohngotetn nd tahi rmonm htayuk nuwa rikat yak yanyeft afo rihti ahtihato yak yiyaknikfot. Wom nfri Kristenr rorhu yima yuhur yuhure yonenrohr kanjo rhu hanyetr; rorhu nyingampno yak yerahn, to be ror inji mhti wofnnihato yerahr. ¹¹ To be ninn mrokfot yiraht. Nd Kristenr bi Kraistr nohhato nrfa htiyakmor ninn fe nhehmoatr ror yehato suhmor. ¹² Wawanyko. Wom Kristenm tafi tohngot duhatm rroh yima yuhum yuhure yon mumenrohmm kanjo yuhure korhmm. To niko inji narahkomn niko Kraistrpno mrokfetko rhuahko. ¹³ Ndnettn na wom yemropat yehato wom Kristenr mhti wofnnihato yehato fsuhr, to be na nhai tfit ndtset yemropat wom yiha womroh nyingampno yakfot.

9

Porr aposer hingrneft hingrnamoahat nhai marimoar; tir htaruhanm ror hingrnamoa kmim

¹ Nhai wom tamohat yakitohkahta. Kraistr kfiwa yuharpot hikwa. Kraistr kfiwa yuharpot hikwoyann, aposer hingrneft kakitohwa. Kraistrhu kfofotno nd hingrneft kakitohwant. Na tukianhu nyingaye nmoh Nungothet Jisasr htimoyanr. Na Jisas Kraistrhu mrokfom kfo pthamohat, to bi toko nikomn bi Jisas Kraistr hikwokomr. ² Yimam hitma yima furam kanjo. Niko nhai inji htikahkma. Bro Nungothetrhu mrokfot na kfo pthamot, niko wany yakiohato hikmokomtn Jisas Kraistrpno brbo frtkafwoko. Nd yuhatn niko hitkma aposerm kanjo.

³ Na hingrnawa hingrnefthu maruha yakneft wom yimam kfo ptha yamukahat, “Tamohmpno hti dukaruhanomr;” mrokfom inji kfiwanm: ⁴ Nom yimanom aposer hingrneft yaknihato kmi kmikompono yi tohwanom, ka nhai yeshriyenm yakhato yak hekfot? ⁵ Nom nmoh Kristen metm ka nhai Pitar yo wom aposerm yo Bro Nungothetrhu nmemrom turoh metmpno rpat yi htfaswa kanjo nom tunmoh metmpno kmi kmi rpat yi htfaskfot? ⁶ Ka no Barnabasetno nonrpanonn wom maruha hingrnefenm hingrnakfot? Ka nhai womm nikmoh tirm rhuwa kanjo no nikmoh tirm rhukfot? ⁷ Yimar wom amikfotn soldia tohneft nhai turn yeshri wiknahato yak yekahr. Nhai. Yimar nnari fanm nuhtewohat, rorhu hingrneft nhai yi furakaht, tfit tur nuhtayuk nnari mishu nnarihamn yakhato kawur. Yimar sifsifmi memem tohukatoh htfaswohat, nhaf inji, tur tohukatohwa sifsifroh mingapam yekwarn tfit kawur. Ndnettn nom aposer hingrneft hingrnayuk yimanom nikmoh tirm arhunom.

⁸ To mirahko ka be yimaroh mrokfot kfo pthiwa yuhatn hikhat kfo pthiwa. Nhai. Ndt nkifra boririfhut kfiwa yuhatn kfo hikwa. ⁹ Nkifra mrokfot Mosesr wandfamot, kfo memor, “Bulmakaur wit yukham kahot rofworm, mirahn tngt akitasifkahanr ror yi yak hany juha.” Nd mrokfot ka bulmakaurpam kfomot? Ka nhai yimanom nd mrokfot rpat kfokaht? ¹⁰ Nd mrokfot rpat yimanompono niamot. Yimar bbinysoft tou yibufirwar yo wit yukham tmbrahato krha rmonwar nhai hingrna furakah; rorhu hingrnefthum kekwor womm. Nd yuhatn wom Kristen yimar wom kmittn yi hingrnaneft nd kmi thofmn ror wiknakfot. ¹¹ Kraistrhu mrokfom, Bro Nkifrar kfoyukm, nom nikompono yi tohhato kfo ptha nuhasmohat, yimam

yewurit nuhtiwa kanjo inji yihato nuhtamonomt. Nom inji namohat, tawo niko nom tamohm hanyefte fasoh nefet?

¹² Wom yimam nikompno yi tohhato Bro Nkifrarhu mrokfom yahukahat niko tawo kahukkomm wuskenm, yeshrim tamohm. Nom to aposerenom. Aposer hingrneft hingrnayuk yimanom nikmoh tirmn arhunom.

To nhai. Nom nhai kfo mikahnom, “Nom rroh tirmn rruhanom tamoh tamohm.” Nom nhai inji nakahnom. Kangnom, “Nhai romn tfit krhopam hiruhatom. Nom tunmoh wuramn tohkfot. Rroh tirmn rruhanom, hingrneft nhai yi marnyaruhatt. Krairhu gutnius mrokfot, nom pthayukt, nhai wany yakioruhatt. Kfo mirahm, ‘Maruha dukefrparpno hingrnawum.’” ¹³ Niko htieteko, Bro Nkifrarhu temperrhu hingrneft yakitohwa yimam, romn tu Bro Nkifrarhu temperr rim htayuk yeshrimn kawum. Nd tarioh mthiwa yemroroh yemropamn kawum. Tu Bro Nkifrarhu kfo yuhatn kak hikwom. ¹⁴ To be nd yuhatn, yimam gutnius mrokfom kfo ptha htfaswam, to nd rom mrokfom hta htfaswa kmimn tawo rroh rhu nmbuhatt hti dukakfot. Tu Bro Nungothetr inji kfo htamor.

¹⁵ Na ndar yimaya, na nhai kfohna marimoya, “Na aposera. Na gutnius kfo hanyuk kmimn na tamoh tamohm hti dukarahma.” Nhai inji kfo hnarmoya. Nhai. To tfit mkfekwa, na ndar mrokfom inji wandfiwohat, mirahko ka wuskam o tamohroh hanyeft dukahato mrokfom inji htewanm. Nhai. Na wofnkaha na hingrnawa hingrneft maruha yakneft. Ka btn womroh tirm hirhotma maruham yakruha. ¹⁶ Na ndar gutnius mrokfot kfo ptha habriwohat, na nhai tuka kfo grhahato kfo mekaha, “Na ndar yimayann gutnius mrokfot kfo ptha habriwotant kmim wanukmt.” Na nhai inji kfo grhakaha. Rot nd gutnius mrokfothu kfo ptha htfasneft, ndt tu Bro Nungothetrn nd hingrneft hemotra hingrnawant. Na nhai nd hingrneft yafhokfot. Na nd gutnius mrokfot na yakitohyukt akfo ptha htfas duha yiyant, Bro Nkifrar krhopam herfora. ¹⁷ Na gutnius mrokfothu kfo ptha htfasneft be tukanhu duka fijo nd hingrneft ahingrna furayant, ee btn marufa yakrfoyant. Ndar hingrneft tu Bro Nungothetrn hemotra hingrnawant. ¹⁸ Ndnetn tone tamohat yakrhoya na ndar hingrneft hingrnawohat? Na kmi kmimpno gutnius mrokfot kfo ptha htfaswohat, nhai mekaha, “Na gutnius mrokfot kfo ptha htfaswa aposera, Kristenmn marufam tamohm hirahma.” Na nhai inji nakaha. Nanhut to be bro yindhorefrpat kekwota. Kmi kmim na mrokfom kfo ptha htfaswam mrokfom yakhato hikwatmm, na nd yindhorefrpatpno korhwa. Nhai marufam na kfokfot.

Porr yima yimaroh hingrna yimar tohmor

¹⁹ Na, na be inji tohwa. Na nhai wom yimarhu yinhitn tohhato rorn hikkfot. Na ndar tohwohat, na be inji tohhato yima yimaroh hingrna yimaya. Na kanga, inji tohakni hanyhato gutnius mrokfot watuhiruhann, be wuyak marnyaruhamtn hikrahmt. ²⁰ Ndnetann na Judampno tohhato Jisas Krairhu mrokfom kfo pthamoahat, na Judaroh toh yuhatn na toh hikmoa. Na kanga, rroh toh yuhatn inji tohakni hanyhato gutnius mrokfot watuhiruhann, be wuyak marnyaruhamtn hikrahmt. Mosesrhu boririfhuthu yinhithu tohneftn na nhai boririfhuthu yinhitn tohkfot. To boririfhut hiket yimampno tohmoahat, be rhu mska inji nanefst boririfhut hiket yimam kanjo boririfhuthu yinhitn tohmoa. Na kanga, inji tohakni hanyhato gutnius mrokfot watuhiruhann, be wuyak marnyaruhamtn hikrahmt. ²¹ Yo yima tangim, Mosesrhu nkifra boririfhut yakitoh duha

kmim, rompno tohmoahat, nhaf to Mosesrhu boririfhut yakitoh duha yimam kanjo tohmoa. Na kanga, inji tohakni hanyhato gutnius mrokfot watuhiruhamn, be wuyak marnyaruhamtn hikrahmt. To mirahko ka Bro Nkifrarhu borsisha mrokfom myafhonihato tohwa. Nhai. Na Krairhu kfo borsishayuk mrokfomn hikwa. ²² Yo yimam Jisas Krairhu hik yuham o tohefm tafi tu bro duka tungunefm yak duha yimampno tohmoahat, na to be rom kanjo tohmoa. Na kanga, inji tohakni hanyhato gutnius mrokfot watuhiruhamn, be wuyak marnyaruhamtn hikrahmt. Na Krairhu mrokfom kfohemoahat, womhtet womhtet tohefm tohet yimam, womhtet womhtet boririfhut yakitohet yimam o tamoh ruheft ruhet yimampno yi tohmoahat, na be rroh yuhat fknihato tohmoa. Duka memoa, rroh ruhefm o tohefm tohakni hanyhato gutnius mrokfot watuhiruhamn, be wuyak marnyaruhamtn hikrahmt. ²³ Na ndhtet ndhtet nefm namoahat, memoa ndar nom yakitohwa gutnius mrokfot kmi kmim awany bugamt, nd dukeftpno inji inji yimoa. Memoa awany bugakahtmt romi na nd Bro Nkifrar kfomo dborioh rhu nmbuhat rpat yak bugarahnomt.

Niko praiskfot yakneft dukahato tone tmbhoyuk makkfot hti hti tonekfot

²⁴ Niko htiyeteko, yimam tone resiskfot tonitam, rpa yimarpar praiskfot kekwor. To inji kanjo niko nd tonita resiskfot watonekahkomt praiskfot yakrahko. ²⁵ Yimar tone resiskfot yiyukr, ror bi wuri yihamn ror bi tur tone nhombra bonhombrafkot. Kto nd tone yihar ror mtoghato tonineft nhai wuram bmbri minysafhato buha msuh hasoruhatr. Bi tone nhombrayetrn nd tone resiskfot fnahnineft, nd resiskfot winhato praiskfot yakrahr. Nd praiskfot nom kfiwat ndt be ndar bbinysofthu toniyefthu praiskfoyet nhai rhu buhtaruhatt. Nd praiskfot nom Kristennom dukewat yakneft, ndt nhai finji naruhatt. Nd praiskfot be inji rhu nkifraniraht. ²⁶ Ndetann na tu tonita yimam kanjo nhai na rihti ahti hanykaha o mongko yiho hti thu tanykaha. Nhai. Nanhu dukefr, nanhu nyingam makkfot hti hti tonita. Yo boksam nnewa kanjo tirt tutahat nhai yi furakaht. ²⁷ Nhai. Bi tukann tukanhu yatit tukanhu tirm yak kufhahato tananh bonanhhato yatit bi tattewut. Kto wommpno nnahato womroh tirm yak kufhahato tananhneft nhai yironakhato suhrhota. Nanhu toheft to be inji kanjo tohwant. Nanhu tohefm, nanhu wiyauyau nmbuham, nanhu pthefm duka hik marnya bomarnyahato tohkfot. Na wofnkaha gutnius mrokfom womrpam hehato romrpamn praiskfot yakkfot. Ndetann nanhu tir wuram, nyingam, yimbhindangm, yima yuhum, tamohm na tukann yak hta bohtahato praiskfot yakkfot.

10

Tahi yifonm kfo bruttna duha

¹⁻² Bar yinouroko, kanga wadukaf hanyswakomt nmoh nkifram, Mosesrpno nungur tik furat yau fnahmo yuhathu tndht. Rom yimohat, Mosesrn tohakmotr Isrern rom be Mosesr hikmoum. Yura Bro Nkifrar htamort gribfat. Ndtu yura hir hanymoatt yimam ndtn wuhtiyakhany wuhtiyakhany fau hikmoum. Nd gribfatn hanymotm hanymotm Retsi barit fau hayukni marnyamomt. To nd tndht tfit ariharhof mrokfot to tfit finji kfiwatt? Yimam Mosesr hik hanyhato gribfathu yinhit yau hanymohat yo Retsit yau hayuknimohat, ndt nom Jisasr hikhato baftais yekwa kanjo inji

yimot nd tndht. ³ Nd yima rifhur yimor; yura moun yuhat yiha yiha yawihnamao bretpam yak hutuhahato fi hanymoum. Ndm Bro Nkifrar thu brurhemoatrm yakhato famoumm. ⁴ Yo rom ye habrimoa bupam nhaf inji. Bro Nkifrar kfomoatr bu rifhut harhumoa bu tahis rpat yimampno yi htfasmoatt ndtn bupam yakhato famoum.* To nd bu tahis yimampno yi habrimoate tu tahi mift yi habrimout o frohnm kfo nhombriwat? Nd bu tahis Kraiser kfo nhombrewut. Kraiser hik htfasmourm rom yimoa tkitm. ⁵ To nd yima rifhur nd nungur tik furat yau fnahmoroh nefm Bro Nkifrar nhai hti wofn hanyrmoarm. Ndnettn tu bro rifuhetr buha nungur tik furatn noh wurasohmotm htanimomm.

⁶ Nd Isrerpno rhumo nefm ndm be kfo nhombra mrokfoym. Nom rroh tndh mrokfom mhtiyakhato nom yima yuhum yakhato nom nhai rom namo kanjo yima yuhum sinyahato fasoh nefm nakfot. ⁷ Yo mirahko rom namo kanjo nkifra tahi yifonm yeshri mhtahihato kfo tatonomm. Bro Nkifrarhu rfa borngt kfo kangt, "Rom rhuhato nd tahi yifonr htayuk yemro burwat ye yehato yo drin spakmomm met yindarim sinyahato tir mniyaknihato grhahato nd tahi yifonr grha yindhormomr." ⁸ Nom mejuha rom namo kanjo metm wom yimampno waiswako yo yindarim wom metmpno waiswako. Rom inji namomm yonmari 23 tausen met yindarim be rpa marrn bafinat yimom. ⁹ Yo mirahko aduka amanyom, "Fasoh nefm naruhanomm afo htirahnom Kraiser finji naruharnom." Mirahko inji ananom. Rroh womm inji namotm nandomm wasmotmm nohmom. Nd gnngur yakitoh hanykfot. ¹⁰ Yo mirahko gutnius mrokfot kfohayuk tohak yimam wom tamoh kfo hutt mrokfom akfonomm. Rroh womm Moses Aronropno kfo huttmohat nhai rhurmom. Noh yafothat hatohyuk mounmotr fukatohmotrm noh wita bugamom.

¹¹ Nd bingot tohmo nkifrapno ndhtet ndhtet nefm rhu hnamom, ndm nmoh ariharhof yak duka tungunayuk nefm yimam Bro Nkifrarhu rfa borngtn wandfa htamomm. Bi wuroh yiharhu yiham bi tohwanomm kfo dukayuk mrokfom wandfa htamomm. ¹² Ndnettn wom Kristen kfo kangr, "Nanhu toh nmbuhat awi hifa tohwoyann toh bmtewa." To ndhtet kfet Kristenr; to tfit mirahr asuha. ¹³ Tamoh tamoh nefm o dukefm niahato nikmoh yima yuhum mtawastiwonwam, to mirahko ka womm ndhtet dukefm o nefm nhai yakkahmm. Nhai. Nd nefm yima yima kekwoomm. To ndhtet nefm o dukefm nikompno rhunefm, niko finji duka duha, Bro Nkifrar toh tkafuhratko, Bro Nkifrar tur bi kfoyuk mrokfom hikhato toh tkafhato yima yuhum thu bmtarahrko. Nhai tamoh tamoh nefm yak kasuhrhatmko.

Nkifra tahi yifonmi Bro Nkifrar rpat yakitohhato kfo bruttna duha

¹⁴ Ndnettn niko nanhu dborioh yimatko kfiwanko, yimam kfo bruttniwa nkifra tahi yifonmpno brbo yi juha. ¹⁵ Niko htitanko, tamoh tamoh mrokfom kfoyukm awi kak nhtewukomm. Ndnettn nd na niko yahuka mrokfom wayak nhtatwakkom. Tu yafothet mrokfot kfiwankon o nhai? ¹⁶ Barkof mrokfot inji akfowanko. Nd wain bupam yorhwa kafti yo bretpat, nd hus shrf nom kfo bruttna yindhornihato nayahukaf, ndf inji korhf:

* **10:4:** Mosesr tahis tathato bupam yakmo yuhat, hus gonborngfn kfo tndhmoft. Wom tndh kfot korht Kisim Bek 17.1-7 yo wom tndh kfot korht Namba 20.1-13. Judam nd hus buk f kfo tndhmo tahishu mrokfot htimohat, rpa tahishu tndhrpat kfomof. Nd tahis Isrerm fitoh fitoh tkitm yimoahat nd tahis rpat yimoum.

Wain bupame Krairhu kkupayem yo bretpate rorhu nmpayem. Nd hus shrf nom yekwanomn to be Krair yak nhafohwarnom kak hongmb hmbritrnom. ¹⁷ Nd rpa bretparpat niyak tif nhombrahato yewat, ndtn ar boknabok yimanom kak nhafohwotnom. Yak nhafohhato rpa thatipnom korhnom. ¹⁸ Niko nmoh nkifra Isrerm namoa neft dukewukomt? To inji kanjo kitt. Nmoh nkifra Isrerm Bro Nkifrar rim htahemoa nuwa rikat ye ttamoahat,† fitoh fitoh yimam nd altarpno rifinyukm, Bro Nkifrar kak hongmb hmbremourm.

¹⁹ To tfit wadukakomt tahi rmonm rim htahuka nuwa rikathu ya nmbuhat. Na nhai kfo mekoha tahi rmonm rim htahuka yemrom wom ndoh ruheft korhm. Yo nhai kfo mekaha tahi rmonmn tom tu yafothetm. ²⁰ Nhai. Nhai inji kfokaha. Na kfo kanga yima tangim yemrom yakhato tahi rmonmpno rim htewohat, ndm nndo Satanru hingeret yakitohwa yafothamn rim htahukm. Nhai tu Bro Nkifrar rim htahekahm. Yo nhai wofnkaha niko nd Satanru hingerneft yakitohwa yafothampno rhuyuk tamoh tamoh nefm fknekfot. ²¹ Nhai niko Bro Nungothetrhu kafti Satanru hingerneft yakitohwa yafotharoh kaft rpat yakhato yakfot. Yo niko nhai Bro Nungothetrhu teborti Satanru hingerneft yakitohwa yafotharoh tebort ruhato nuwa yakfot. ²² Nom Bro Nungothetr yakitoh hany tfit mano wom tirtn tfit tahi rmonm yakitoh hanyneft, ka be yuwi kangnom, “Bro Nungothetr anamburrnom.” Ka nmoh namburefti rorhu namburefti rpahtett?

Bro Nkifrarhu yufarpat nom yiha yiha kfo yuta grha yindhorkfot

²³ Na nd bi barkof kfoyuk mrokfot tfit kfiwanko. Womm kfo kangm, “Mrokfo duhatenom tamoh tamohroh finjina finjina nefm. Nhai wom kfo rafo mrokfot rhukahtnom.” Tmift, to mirahko ka nd tamoh tamoh nefm ka be na fura bofurahato hifa hifa rhu nmbuhat yakrahnom. Nhai. Kfo kangm, “Mrokfo duhatenom tamoh tamohroh finjina finjina nefm.” Tmift. To mirahko ka nd tamoh tamoh nefm ka be na fura bofurayukmn wom Kristenm htineft hifa toh bmtarahm. Nhai. ²⁴ Tamoh tamohroh nanest mirahko tuko dukahato tamoh tamoh nefm be ana fura bofurakninomm. Womm dukaf hanyhato tamoh tamoh nefm nakfot. Womrhu nyingampno ni wom neft na thombat, womr hti marsisahato toh bmtarahr o finji naruhar? Ndhtet dukefm yakkfot.

²⁵ Tamoh tamoh yeshrim maket htayukm niko wiknahato ye fura bofurakfot. Mirahko bok dukefm yakhato tfit nd yemroparoh niayuk yuhat nakfo ttiwon hiknomt. ²⁶ Bro Nkifrarhu rfa borngt kfo kangt, “Ndar bbinysoft Broruhet. Yo nd bbinysoft harhuwa tamoh tamoh Brorparuhet.”

²⁷ Yo tfit wom mrokfot kfo dukewanko. Jisasr hik duha yimar kfkeworn rorhu kunyshu nuwa yanyeft, yo ni kangn aiya, mirahn bok dukefm ayaka ror htayuk yemroroh yanyeft. Tamoh yeshrim hter, be ye fura bofurakfot. Tfit kfo ttiwon me juha, “Ndar yeropame, fitha yakmokomm?” Inji tfit kfo ttiwon hik duha. ²⁸⁻²⁹ Be yimar yemropam htihato yimako hti yo yemropam hti inji hti hasohato kfo ttiwon kangrko, “Nda tahi yifonmpno htayet yemropame yakhato keswanhiwokomm?” Bi ndhtet mrokfot wanukomt, to be mirahko nd yemropam ayanomm. Yerahkomm, nd kfo nuhasyuk yimarn kfo mirahr, “Tamohmpno nd yimam bi tahi yifonmpno mhtayet yemropam tfit yewamm? Ndt fasoh neft newum. Na

† 10:18: Wahtiko Wkp 7.6, 7.15

nhai ndtset yemropam yarfota.” Ndnnettnd nd kfo nuhasyuk yimarhu yima yuhur dukahato nd yemropam ye juha.

Nikmoh womm kfo mirahma, “Nd ror kfo pthiwa mrokfom tur kfo ptha mmbrafinyworn. Frohm wanyhiruhamr? Nom, nom tunmoh dukeft hikrahnom. ³⁰ Nd tahi yifompno htayet yemropam Bro Nkifrar pno kfo bruttna yindhornihato be ye furarahnom.”

³¹ Bro mrokforpat kfiwanko, nd yemrom htihato nikmoh yima yuhum finji dukahato kangko finji ananom afo dukakfot. Niko nd neft na thombat, yimam htihato Bro Nkifrar kfo yindhorrhahmr o nhai? Nd dukefrpat mdukakhato ee btn tamoh nefm nakfot. ³² Tamoh tamoh nefm nanefst afo mdukakkfot, wom Juda thofr tohhany nom nd neft na thombat finji dukaruar o Grik thofr tohhany o sioshu wom yimar o mett tohhany nom nd nefm nanefm finji dukaruarom? Ndtset dukefm afo dukakfot. Mirahko wom tamoh nefm ana nhehkahtnomm womm nd nefm nahato asuhm. ³³ Na tohwa toh yuhatn toh hikkfot. Na kanga yimam o kmi thofm ahti yindhorma, nanhu toh yuham yo nanhu nefm to be rroh yuhatn hikkfot. Kanga, inji tohhato Bro Nkifrar tfit yakrahm.

11

¹ Kraistr yorhwa ruheft na htihakato nd yuhat korh hikwa. Niko tfit na yorhwa ruheft htihakato nd yuhat warhu hikko.

Bro Nkifrarhu Yafothat yahuka hingrna dukefmi yo tu Kristenroh tamoh tamoh rifiny yuharoh mrokfom Porr kfo pthamor

(Sapta 11–14)

Mfharoh kasi yuharoh mrokfom Porr kfo pthamor

² Na kfo yindhorwanko. Na nhai duka mmokahkma. Dukiwakomn na kfo hayuk mrokfom kak hikwokomm. ³ To tfit kanga wom kfo nuhas mrokfot akfo nuhasanko. Kraistr hikwa yindari bugam tu Kraistrn mfhako mtohekwarn turn kak hta bohtewurm. Yo mett nhaf inji. Tuthu ramemrn mfhako mtohekwarn mett kfo hta bohtewurt. Yo tfit Kraistr nhaf inji. Bro Nkifrar Kraistrhu mfhako mtohekwarn Kraistr kfo hta bohtewurr. ⁴ Ndnnt kanga akfo nuhasanko. Wom yimar kangr mfhat kasihato bro lotu swirm kfo bruttnayan o wom mrokfom Bro Nkifrar hayukm kangr nd kongrigesenkfot akfo nuhasanm, nd yimar be tur tfit kak yimtnewur. Metroh mfha kasiyefst tfit kak hikwor. Metroh nefrpayet mfha kasihato lotu swirm kfo bruttnakfot o Bro Nkifrar hayuk mrokfom kfo nuhasanfot nd kongrigesenkfot. ⁵⁻⁶ Yo mett mfhat tohyuk kasi that yak thuhato brioh mfha furat tohhato bro lotu rifiny swirm kfo bruttnaneft o Bro Nkifrar hayuk mrokfom kongrigesenkfot kfo hanyeft, kangme yindarir tohwr. Ka kangt yindarim kanjo atohane, to be rothu tmars yohhato bijis rhukfot yindariroht kanjo. To nhai. Nhai inji naruhatt. Inji naraht to be tut bro yimtneft yakraht. Ndnnettnd mett bro rifiny swirm tohhato kfo bruttnaruhan o Bro Nkifrar hayuk mrokfom kfo ptharuha, nd metthu mfhat kasi thett mfhat rhukfot. ⁷ Yindarir myorhekwr. Bro Nkifrar yorhwa ruheft rhu hikwor yo rorn bro yufat kahukr Bro Nkifrar. Ndnnettnd rorhu mfhat brioh kasi tha duhatt rhukfot. To mett, rot yindarir bro yufat kahukt. Ndnnettnd rothu mfhat kasi thett rhukfot.

⁸ Bro Nkifrar yimar barkof hingnamohat nhai metthu kkrespir yakhato hingnarmorr. Nhai. Yindarirhu kkrespir yakhato mett hingnamort. ⁹ Bro Nkifrar nhai mett dukahato yindarir hingnarmorr. Nhai. Yindarir dukahato mett hingnamort. ¹⁰ To ndnatn mett bro lotu rifiny swirm tohato kfo bruttnaneft o Bro Nkifrar hayuk mrokfom kongrigesenkfo kfo ptha nuhas hanyeft mfhat kasikfot. Mfha kasiyett mett bi yufayett bro rifiny swirm kfo bruttnaneft o Bro Nkifrar hayuk mrokfom kongrigesenm kfo ptha hanyeft. Mounmotm mfha kasi that hti nhtaruhamn duka mirahm, awi nd mett rifiny swirroh kfo bruttnaneft o Bro Nkifrar hayuk mrokfom kfo pthaneft bi yufayetet.

¹¹ To arihat Kristen mett nhai rot tut tohkahtt rothu toh nmbuhat yo Kristen yindarir nhai ror tur tohkahrt rorhu toh nmbuhat. Nhai. Mett yindarirhu tohnhoyuk toh tamnou metet yo yindarir metthu tohnhoyuk toh tamnou yindariyer. ¹² Bro Nkifrar mett hingnamohat, yindarirhu kkrespir kformor mett mfnahmot. To tfit ndar bbinysoft, arihat mett kfiwut ndar bbinysoft yimett korht. Tu Bro Nkifrar bi inji hingrna nhtamorm ndhtet ndhtet yihotam.

¹³ Niko tukomn nd mrokfot wayak nhtakomt: Mett mfha kasi duha tohato bro lotu rifiny swirm kfo bruttnaneft ka dborioh nefet? ¹⁴ Nom yimanmoh htiyeftn hti kangnom, yimar yuke bro tmari hatohetr faso korhr. Tfit metm kanjo tmars hatohwort. ¹⁵ Mett yuke tmars hatohneft ndt hifa. Yuke tmarim metroh wondhet. Bro Nkifrar bi inji kfo hta memor, “Yuke tmarim rroh mfharoh kasiyukem.” ¹⁶ To nd na kfo hawihne mrokfom fitoh yimar wanyhato rorhu yima yuhur nhai mikmbrekahr, nd yimar adukatwar, nomi Bro Nkifrarhu siosroh met yindarim nhai wom fitoh yuhat hikkahm. Nom buga be nd na kfiwa mrokfo yuharpat hikwonom.

Bro Nungothethru bretpati wain buparoh ye yuhat Porr kfo ptha nuhas-morm Korinm

¹⁷ Tfit wom kfo hta mrokfom kfo ptha hta nuhasruhanko. Na nikmoh rifiny yuharoh mrokfom wanymohat nhai wany yindhormoya. Niko Kristenko rifiny shombat, nhai mekahko, “Be rpat rifiny marnyarahnom.” Nhai. ¹⁸ Barkof mrokfot na kforuhat, wanyakmoya kfo memoma niko Kristenkmoh rifinyneft rifinyhato Bro Nungothet Jisasr ya nyuhas tanymo yeshrt dukakhato tfit niko rifinyhato nd yeshrt htahato ye shombat, tuko nnakfo nna nnakfo nnewakomn naftrndohwoko. Womm rom nndo, yo tfit womm rom nndo. Inji inji nayak nhtewuko. Na inji wanyakmohat nanhu dukeft duka memoya, ka nd mrokfot tu kfoyet. ¹⁹ Tukmoh toh nmbuhathu nahti nhombraneftn, kangko, “Naftrndohkahnomm htirahnomm fitoh yimamn tu hik mif mifwamr Bro Nkifrar.” ²⁰ Niko tuko Kristenkmoh rifinyneft rifinyhato nd Bro Nungothet Jisasr ya nyuhas tanymo yeshrt niko tfit ye dukanefth rhu rifinyhato ye shombat, nhai nd yeshrthu tu ye yuhat yak hik marnyakahko. ²¹ Wom yimam yeshrim hanitwohat, be yudbat mhta thuhato yudbat nd yeshrt yakhato kiyefiwumt. Nhai womm gariyakhato wommpno rpat nayak nhtahato yekahmm. Nhai. Womm yewamn tfit womm yatinohht korhm. Wain bupam nhaf inji womrohm tum mhtahato yeyehato spakwom. Nhai wommpno nayak nhtakahmm. Nhai womm hti dukaf hanyakahkomm. Ndt nhai tu dborioh nmbuhat nakahko. ²² Kangane ka nhai kuny juhateko tukmoh kunymn yeshri ya yo bupa ya inji naneft?

Ndnetkonn tfit nd Kristenroh rifinyhato yeyuk yeshrt rpa yimakomr-pakomn yudbat kiyefiwukomt? Bro Nkifrar hikwa Kristen yimam niko ka nhai duka mikahko ndhtet yimam Bro Nkifrar kukatohworm? Ndnettn yeshri duha yimam niayukm ke hatitohefiwukomm. Inji newatkomm tfit tum yimnewum. Finji kangko akfoyanko nd niko niwa neft? Ka akfo yindhoranko? Nheno. Nhai kfo yindhorrhotanko nd niko niwa neft.

*Nungothen Jisasr hemorm disaiperm bretpami wain bupam
(Matyu 26.26-29; Mak 14.22-25; Luk 22.14-20)*

²³ Nd bretpa wain bupa ye yuhathu mrokfot na niko kfohemot, Bro Nungothenrpo fakmoyant. Nd mrokfot inji kfofot: Bro Nungothen Jisasr hndhnamo yifungrn turhu disaipermno nuwa famom. Bretpat yakmortn, ²⁴ Bro Nkifrar wuyak nuhasakhato kfo bruttna yindhornimorrn fak tif botifmort. Yak dbif rmonnihato kfo memorm, “Ndar na yak dbif rmon bretpam nanhu nmpayem, nikmoh yak marnyayukem. Wadukakahkma wayet-wakomm.” ²⁵ Bretpam yenyihato tfit wain kaft wafakmort. Wayakhato nhaf Bro Nkifrar wuyak nuhasakhato kfo bruttna yindhornimorn kfo memorm, “Ndar wain bupam nanhu kkupayem. Na nohhato nanhu kkut yohniruhatt fasoh fasoh nefm wayaknirahm. Ndar wain bu kaft tfit niko yekwat, nd nfri dfa tik yuhar hingraruha hingrefet. Kto na nohhato nanhu kkut yohni thombat nd kkupamn nd nfri hingrneft be yak dbakafraht. Yiha yiha wain bupam yenyeft tfit wadukak hanywakomt nanhu kkut yohniruha yuhat.” ²⁶ Ndnettn niko yiha yiha nd bretpami wain bupam yewohat, ndt kak nuhas hany kangko nikmoh fasoh fasoh nefm bi Bro Nungothenr fak wus bowusmorm. Nd neft be inji nahany nahanykahkomtn kto Jisasrhu nia yiha miyak htanirahkomt.

Nikmoh yima yuhum yak nhata marnyahato ee Bro Nungothenrhu yeshrt rhunhohato yakfot

²⁷ Ndnettn fitoh yimam kangm, “Be yeshri furam yewa kanjo wom dukefen duha be aye fura bofuranomt,” nd yimam mrokfetm rhurahm. Nhai Jisasr nohmo yuhat mduka hikakhato nd bretpami wain bupam yekahmm. ²⁸ Yimar afo tur duka hik marnya, tu hifa hifa korhr, ee btn nd bretpami wain bupam yak yakfot. ²⁹ Yimar nhai Jisasr nohmo yuhat mduka hikakhato ke fura bofurewurt yeshri furat kanjo, nd yimar be mrokfetr korhr. ³⁰ To nd ye fura bofuranefn nikmoh bokm rhu kriyohtewum yo wadbohna thu wadbohna thunewum, yo bokm bi noh wurasohwom. ³¹ Be tunom nd yeshrt duka hik marnyahato ayanomt, nhai ndhtet nefm rhurfotmnom. ³² To nd nefm Bro Nungothenr newohat, hifa ndhtet nefm newurnom. Rorhu dukeft duka kangr inji anakahtanm dukefm yakruhamn dborioh nefm hikrahm. Dborioh nefm hikhato kto nohneft nhai fasoh nefm nayet yimampno hel yiruhatm.

³³ Ndnettn, yinouroko, nd Bro Nungothenrhu yeshrt ruhato yanyeft, afo narhukatohak narhukatohak marnyakfot. Bi mfnah bugeme ee btn rpat ruhato rpat yakfot. ³⁴ Wom yimar yudbat yatinoheter, duka kangr womroh rhu gari hatohneft yudbat yatinohuruha, ee ndhtet yimar bi turhu kunyko ye bmtanehato niakfot nd rifiny swirt. To rorn yudbat yatinohakhato ror yudbat mirahr ayeya, be nd rhu rifiny swirt rhuyuk yimam mrokfetm rhurahm. Nd wom wom kfo nuhas mrokfom kto tuka nieya nikmoh htit ee nd yiha kfo nuhas marnya bomarnyaruhanko.

12

Bro Nkifrarhu Yafothat yahuka wonk wonk hingrna dukefm

¹ Kfo ttiwonmokma Bro Nkifrarhu Yafothatpno hingrnayet yimaroh hingrneft. Bar yinouroko, mirahko ayak mmonomt rorhu Yafothat hingrnewa yuhat. ² Niko bi tuko htiyeteko, niko afo Bro Nkifrar hikhna duha tohnamohat, nd tng ptha duha tahi rmonm tohyuk yifonmn nndo nndo yak hatohafomoatmko nikmoh yau nmbuat faso yimot. ³ Ndnnetn kanga wom mrokfom akfo nuhas marnyayanko. Bro Nkifrarhu Yafothat yak hatohet yimarhu mrokfom kfo pthaneft, nhai kfo towa miruhatr, “Jisasr kaht aiswar.” Bro Nkifrarhu Yafothat yak hatohet yimar kfo mirahr, “Jisasr Bro Nungotheter.”

⁴ Nndohtet nndohtet hingrna dukefm yimam yakitohwam, rpa Yafotharpatn nd nndohtet nndohtet hingrna dukefm kasinya hakuttm. ⁵ Yo nd nndohtet nndohtet hingrnefm yimam yakitoh hakutam, nhaf rpa Bro Nungothetrhu hingrnefrpat hingrna hakutm. ⁶ Yo nd nndohtet nndohtet hingrna yuham hingrnawam, to rpa nd Bro Nkifrarpar nd hingrna dukefm kasinya hakutatrm Kristen bugam hingrna hakutmm. ⁷ Nd nndohtet nndohtet hingrna dukefm yima yima hingrna hakutam, sioshu rhu marnya nmbuat dukahato yima yima bi Yafothat thu nawohhato kahukattm nndohtet nndohtet hingrnefm hingrnawum.

⁸ Womr Bro Nkifrarhu Yafothat kasinya hakuttr sioshu tuhan yindariroh yak hta bohta marnyaneft.

Tfit nd rpa Yafotharpat womr kasinya hakuttr Bro Nkifrarhu mrokfo yimbu yuharoh kfo nuhas hik bohik marnyaneft.

⁹ Yo tfit womr nhaf nd rpa Yafotharpat kasinya hakuttr Bro Nkifrarpar rorhu bro dukefm yinyeft.

Tfit nd rpa Yafotharpat womr kasiny hakuttr dbohnefroh yak marnyaneft.

¹⁰ Yo tfit womr mirakerkfohu hingrnaneft kasinya hakuttr.

Womr Bro Nkifrar hayuk mrokforoh kfo pthaneft kasinya hakuttr.

Womr nndohtet nndohtet yafotham yimam fknihato mrokfo kfo pthiwaroh yak nhtaneftu dborah dukefr kasinya hakuttr.

Womr wom nndoh yarmumaye Bro Nkifrarparno kfo bruttnayuk yarmuma pthaneft kasinya hakuttr.*

Tfit wom nndoh yimarn womr kfo bruttnayuk mrokfom Bro Nkifrarhu Yafothat kasinya hakuttr tfitn kfo kekutneft.

¹¹ To nd rpa Yafotharpat nd yima yimam nndohtet nndohtet hingrnefm he nhombra hanittm. Tu nd Yafothathu hti duka fijo womr kasinyewutr wom hingrneft yo tfit womr wom hingrneft kasinyewutr. Inji he nhombra hanittm.

Yima yima buganom yimar hatohwa tir; wura, mfha, nd ndenom

¹² Yimar rpayer. Nd yimar hatohwa tir; wura, mfha, nd tamoh tamoh boknambokem. Nd shrkar yimar hatohwar nhai rpa hingrneft hingrnakahm. Nhai. Nndoh nndoh hingrnefetem. Nd nndoh nndoh shrkar rpa yimar rhuhato hingrna nhombrewumm nndoh nndoh hingrnefm. To Kraisorhu hingrneft to inji kitt. Yimar rpayer. Nd yimar hatohwa

* **12:10:** Tu nd yimar wom yarmumaye kfo bruttnayukr nhai ror kfoyuk yarmumat wanykfot. Bro Nkifrarhu Yafothatn kasinyahato kfoyet mrokfomn ndnetn nhai tu yima mifr wanykfot ror kfo pthayuk mrokfom.

tir, wuru, mfha, nd tamoh tamoh boknambokem. To Krairhu yon kunys to inji korht. Rorhu yon kunys rpayet. Nd yon kunys yorhwa yimam boknambokem. ¹³Nom Krairhu yon kunyshu yimanom nhai rpa kmithunom o rpa rhu nmbuhath ruhetnom hikkahnomr. Nhai. Nndoh nndoh kmiyetenom yo nndoh nndoh ruhefetenom. Nmoh womm Judayem yo womm Grikem yo womm slefem yo womm nhai slef tohkahm. To Bro Nkifrarhu rpa Yafotharpatpno yima buganom baftaismotnom kangme bi rpa yima bugayer. Yo rpa Yafotharpat Bro Nkifrar htewurnom yima yimanom.

¹⁴Yimar nhai wurarpafn htihat kfo mikahnom yimayer. Nhai. Yuht wurasif bugat yo wurasif yorhwa tamoh tamoh yo yuht yima nyisof bugat yo yima nyisof yorhwa tamoh tamoh yo mfhat yo mfhat yorhwa shrka bugar nd ndm hti nhombra bugahato kangnomr yimayer. ¹⁵Wuraf sinyahato akfo amef, “No nhai tirf kanjo rhukahno. Ndnnett nhai yimar hatohkahrno.” Ndt ka tu kfoyet? Nhai. Nd wuraf to yimar hatohworf. Nhai rof ndhtet kfo hhrif mrokfot kfo pthakfot. ¹⁶Yo yimbhindangaf akfo amef, “No nhai nyingaf kanjo rhukahno. Ndnnett nhai yimar hatohkahrno.” Ndt ka tu kfoyet? Nhai. Nd yimbhindangf to yimar hatohworf. Nhai rof ndhtet kfo hhrif mrokfot kfo pthakfot. ¹⁷Be yukatohyuk nyingarpaf yimar aharhur, to tamohe mrokfom wanyrform? Yo yimbhindangrpfaf yimar aharhur, to tamohe gbefr mthatirforr? ¹⁸To hifa Bro Nkifrar turhu hti duka fijo tamoh tamohm hingrna hta nhombra bugamorm, yo hta fijo htihat hta nhombra bonhombramorm turoh rhuyuk tkitm. ¹⁹Be wurarpaf arhuf, to nhai kfo marifotnom yimayer. Nhai. ²⁰Yimar nhai inji rhukah. Yimar tireter, wurayer, yimbhindangeter, ngeter, tmarifayeter, nd ndeter. To nd shrkar yimar hatohworm. Krairhu yon kunys to inji korht. Rorhu yon kunys rpayet. Nd yon kunys yorhwa yimam boknambokem.

²¹Nhai nyingaf sinyahato tirf kfo merfotff, “Nifn tirfn arhu duha yifn no banuha rhu marnyarfono.” Yo nhai mfhat sinyahato wuraf kfo merfotf, “Nifn wurafn arhu duha yifn na turpeta banuha rhu marnyarfoya.” ²²Nhai inji nakfo nna nakfo nnahato nayak thukfot. Thatipt yorhwa tamohm nom htihat kfo yamuka, “Tamohmpno ndarm rhumom?” Nd kfiwa tamoh tamohm hingrna bugefetem. ²³Yo wom tkitm faso hti bebwom hmbresha duha rhuneft, tfit yimanomn hmbresham yakhato hmbre hutefiwunomm. Yo fitoh tkitm briyo ruhato yimam htineft tham bbnarofwom, hmbresham yakhato hmbre hutefiwunom. ²⁴Yo nd wom wom tkitm be inji rhu furewun. To nd nd tkitm bi tu Bro Nkifrar bi inji hingrna nhombra htamotrm inji korhm. Womm hmbresha duha korhm, womm wondhetm korhm. ²⁵Bro Nkifrar yimarhu thatipt bi inji rpat hingrna nhombra htamort. Memor, “Inji ahingrna hta nhombrakahtant nd nd tkitm nhai nafrndohhato nahti marsisaruhatm. Tum nahti duka nahti dukarahm.” ²⁶Ndnnett wom fitoh tkitt kaut o ke nyrikewut, yuht yimar yironewurt nd ye nyrikeft. Fitoh tkitt bro yufat kekwo, yuht yimar yindhor bugewur.

²⁷Niko Krairhu yima thatipeko. Womr tirer, yo womr wurayer, yo womr yimbhindanger. ²⁸Bro Nkifrar nndohetet nndohetet hingrnefm yakitohet met yindarim sios hta nhombramorm.

Barkofm aposerm htamor.

Yo tfit rompno Bro Nkifrar hayuk mrokfom kfo pthayukm htamorm.

Yo tfit rompnonwe Bro Nkifrarhu mrokfo mna yuharoh kfo nuhas hik bohik marnyayuk yimam htamorm.

Ee btn miraker hingrnayuk yimam htamorm.

Yo dbohnefroh yak marnyayuk yimam,

yo wom yimaroh hti dukayuk yimam,

sios hingrnefroh yak nhtahato kfo hta bohtayuk yimam,

yo nddohtet nddohtet yarmumaye kfo bruttnayuk yimam htamorm.†

²⁹ Bro Nkifrar nhai marimor be aposer bugam tohrahm o profet bugam tohrahm o Bro Nkifrarhu mrokfo mna yuharoh kfo nuhas hik bohik marnyayuk yima bugam tohrahm o mirakerkfothu hingrnayuk bbukeft yak bugarahm ³⁰ o dbohnefroh yak marnyayuk bbukeft yak bugarahm o wom nndoh yarmumaye kfo bruttnayuk mrokfot yak bugarahm o wom nndoh yarmumat kfo bruttnayuk mrokfom be yima bugam tohhato nd mrokfom tfit kfo kekutrahmt. Nhai. Bro Nkifrar nhai hingrneft inji yak htarmort. Yima yima nd hingrna dukefm he nhombra hanymorm. ³¹ Kangko, Bro Nkifrarhu Yafothat yahuka hingrna dukefm ayaknom, sioshu kasinya nnuhakniyuk hingrna dukefm mfro yakkfot.

Wom met yindarimpno nayak marnyahato rpat tohkfot

Bro Nkifrarhu Yafothathu kasinyewa nefm, rom hifa yakrahkomm. To tfit kfo nuhasruhanko tu toh marnya yuhathu tu bro mna mrokfot.

13

¹ Na ndar bbinysof thofm kfo bruttniwa wom nndoh nndoh yarmumatn o mounmotm kfo bruttniwa yarmumatn Bro Nkifrar akfo bruttnayanr, to nd na kfo bruttnayuk yimaya, nanhu tu yiro yima yuhurio nhai wom yima fura bofuram htihato yak marnya bomarnyakahanm, nanhu kfo bruttneft fipa duhatet. Nrwir frdrango fura bofuriwa kanjo inji dbrango fura bofuriwa.

² Yo na tohhato Bro Nkifrar hayuk mrokfom akfo pthayanm o Bro Nkifrarhu kafrohet kafrohet yima yuhum bi nann aharuhanm o rorhu mrokfo yimbu yuham akfo hik bohikanm o nanhu yima yuhur Bro Nkifrarpar rhuhato rorhu yufat yutahato kminysoft kfo tkrurhato nndo arim toht, rom nd nefm mrokfo duhatem, tmift nanhu tu yiro yima yuhurio nhai wom yima fura bofuram htihato yak marnya bomarnyakahanm, na tu be yima furapaya.

³ O nanhu yonmari yonmari wuss yakhato wuska duha wuska duha yimam ahian, o nanhu thatipt kahe kahe akandhi nohma, rom nd nefm mrokfo duhatet. Tmift nanhu tu yiro yima yuhurio nhai wom yima fura bofuram htihato yak marnya bomarnyakahanm, nd na nayuk dborioh dborioh nefm be yi furarahm.

⁴ Yimar wom yima fura bofuram htihato marbitn htewurm, htirahr womm finji naknerahmr ror nhai finjina finjinakahrm. Hifa yima yuhur hmbritrm. Yo ror nhai wom yimaroh marut o wuss htihato kfo yuhuwehkahr o kfo dabiny kfo nurkahr. Yo ror tamoh nefm nanefm nhai rorhu yufat tur kfo yuta haghakahr. ⁵ Yo ror nhai wom yimam fasoh fasoh nefm yak nuhaskahrm o mrokfom kfokahrm. Yo nhai ror turpar dukakahr. Nhai ror tamoh nefm be yudbat namburaknikahr. Wom yimam rorpono finji naneft nhai rroh nefm tfit duka hanyhato thomna hanykahrm.

⁶ Fasoh fasoh nefm na haset yimam nhai hti yindhor hasokahrm. Dborioh nefm na haset yimam hti yindhorworm. ⁷ Womr sinyahato wom fasoh nefm nerr, nhai yudbat rorhu fasoh nefm mhtiyakhato kfo mikahr, "O be tmifa

† 12:28: Wahti 12.10 kfo nuhasyuk mrokfot.

nd yimarpno tfit wom dborioh nefm nanefst.” Nhai. Nhai yudbat rorhu yima yuhur bi inji yiyaknikahr. Nd yimarpno bi barkof tohhnayuk rofhu dborioh toh nmbuham mhtiyakhato to be rofhu dborioh toh nmbuhat be inji rhu yakitoh hanitwof.

⁸ Nd wom yima furaroh marbithu htanefst be inji rhu yakitoh hanyraht. Nhai minohniruhatt. Nd yimam sinyahato Bro Nkifrar hayuk mrokforoh kfo pthanefst minohniraht. Nhai wom rhuruhatt. Yo nd nndoh nndoh yarmumaye Bro Nkifrar kfo bruttnanefst minohniraht. Nhai tfit wom nndoh nndoh yarmumaye kfo bruttnaruhatmm.* Yo nd Bro Nkifrarhu mrokforoh pthayuk bro riduka aduka yima yuhum, ndm nhaf nhai tfit yimam wom yak hanyruhatmm. Kto Bro Nkifrar nmoh rhu nmbuhat yak marnya bomarnyani thombat, nd nd nefm nhai wom rhuruhatm. ⁹ Nom ndar yiham tohhato Bro Nkifrarhu mrokfo yimbu yuham kfo nuhas hik bohikwohat, nom nhai Bro Nkifrarhu dukefm yorhwa yima yuhum bi yak bugahato frhik bugakahnomm. Nhai. Yo nom Bro Nkifrar hayuk mrokfom kfo pthiwohat, nom nhai bi Bro Nkifrarhu dukef bugam yak bugahato kfo pthakahnomm. Nhai. Be inji nmbuha nmbuha dukefrpam yakhato kfo pthewunomm. ¹⁰ To tfit kto, Bro Nkifrar tur duka htewa duka yuhatn nmoh rhu nmbuhat yak marnya bomarnyani buga thombat, nd tamoh tamoh duka nmbuham nom yakitohwam, be myafhonirahm. ¹¹ Na afo yuhre yon mumena waruhakmohat nanhu ptheft, dukeft, htiyefst yon mumen rhut kanjo rhumot. Kto warhonimoya nd yonroh nefm mfafhonimoyanm. ¹² Ariham Bro Nkifrarhu nefm nom htitwohat, nom be binasoht hti mmrtiwa kanjo rorhu nefm hti mmrtewunomm. To tfit ktone, ee tu Bro Nkifrarhu nyingatikt hti wutharahnomt. Yo ariham Bro Nkifrarhu dukefm frhikwohat, na be nmbuha nmbuham frhikwa. To kto Bro Nkifrarhu dukefm frhik bugaruhanm ariham ror na hti hik bugewa kanjo. ¹³ Husfirpa bro nefm rhu hanyrahm. Barkof husf, Bro Nkifrar bro yima yuhum yihato rorn duka duka rhu gari hasoneft, ee wuroh nefst, yima furaroh htihato marbitn htanefst. Nd husfirpa nefm rhu yakitoh hanyrahm. Tu bro nefst, wom yima fura bofuraroh htihato yak marnya bomarnyanefst. Tot tu bro nefst.

14

Bro Nkifrarhu Yafothat yahuka hingrna dukefr

¹ Yima yak marnya yuk duka yima yuhurn niko dukakfot yakneft. Yo nd Bro Nkifrarhu Yafothat yahuka hingrna duka tungunefroh yak dukefr dukafot. To nd dukefr dukewunome, to afo barkoft profetm hingrnamao hingrna dukefr; ndr barkofr yakkfot. ² To yimam Bro Nkifrarhu Yafothatn kasinyahato wom nndoh yarmumatn mrokfom kfo bruttna thoft, nhai yima mifroh kfo hayuk mrokfomn bt yima mifm wanykfot. Nhai. Tu Bro Nkifrarpo kfo hayuk mrokfomn yima mifm wany mmotewum. ³ To profetm Bro Nkifrarpo mrokfom yakhato kfo pthiwa mrokfomn, yimam wanukwamn dukefm yakhato Bro Nkifrar myakitoh nnuhaknitm, yo dukefm kekwom yo nd mrokfom wanyhato yima yuhum bmtewumm. ⁴ Yimar wom nndoh yarmumat kfo bruttnewar; ror turn inji pthewarn tpi kekwor. To profetr Bro Nkifrarpo mrokfom yakhato kfo pthiwam,

* 13:8: Wahti 12.10 kfo nuhasyuk mrokfot.

nd mrokwom sioshu yimam wanukwamn tpi kekwo. ⁵ Nanhu yima yuhur kanga wom nndohet yarmumat kfo bruttnayuk yafothar wayak bugakahkomn wom nndoh yarmumatn wakfo bruttnako. To wom bro dukefr kanga Bro Nkifrapno profetm mrokwom yakhato mrokwom kfo pthiwa kanjo mrokwom inji wakfo ptha htfasko. Yimar Bro Nkifrarhu Yafothatn mrokwom rifhur thu hmbrihato wom nndoh yarmumatn mrokwom ptha sinyaneft rot hifa, tmift nd mrokwom kfo kekut yimar tohhato kfo kekutkfot. Wom yimarm mrokwom kfo kekutruhatm tuhant yindars mrokwom wanyhato tpi yakrahm. ⁶ Bar yinouroko, nd na kfoyk mrokwom waduka hik marnyatwakomm. Na wom yiham nikompno niahato wom yarmumatn na kfo bruttneya, to nd na kfoyk kfo bruttna mrokwom finji naruhanko? Na Bro Nkifrapno yakyuk kafroh mrokwom kfoheruhanko hifa. O Bro Nkifrarhu mrokwom yimbu yuharoh mrokwom kfo nuhasruhanko hifa. O Bro Nkifrapno yakyuk kfo hta bohta mrokwom kfoheruhanko hifa. O Bro Nkifrarhu yuhat kfo boririfhu nuhasruhanko hifa.

⁷ Tng duha shrkam, akfonom yirofinym dbint, nd yirofinym dbint yimam yakhato nhai tu yirofinymt yakyuk windohm windohkahn, to yimam finji wany miruham yirofinymt windohwot? ⁸ Yahrt yiyuk tanmbar nrwir nhaf inji. Yimar guryukr tu tanmbar nrwir kanjo gur hta marnya duha yirahr, womm finji wany hikruhamn kfo miruham yahrt yiyuk nrwiyer? ⁹ Niko to inji. Bro Nkifrarhu Yafothatn niko kasinyahato wom nndoh yarmumatn kfo bruttnaneft, womm rhu wanyukm to finji wanyruhamm nd niko kfo pthayuk mrokwom? Mrokwom wany mmotarahmm. ¹⁰ Wom mrokwom tfit kfo ptharuha. Ndar bbinysofthu kmi kmim nndoh nndoh yarmumat kfo pthewum. Rpa yarmumat kfetm rom turoh mrokwom nakfo pthahato nawanukm. ¹¹ Wom yimar nanpno niahato turhu yarmumatn kfo pthahato na nhai wanyrfoyanr. Kfo mirahr no wom nndoh nndoh kmi thofeno. ¹² Nikmoh yima yuhum kekwanke, kangko Bro Nkifrarhu Yafothathu kasinyewa nefm ayaknom. To nd dukefetekone, sioshu tpi heyuk yafotham yakkfot.

Nndoh nndoh yarmumathu kfo bruttna yuham

¹³ To nd nmbuhatpno kfo kanga, yimar wom nndoh yarmumaye kfo bruttnayuk mrokwom Bro Nkifrarhu Yafothat kasinyewutr kfo pthaneft, nd yimar tfit Bro Nkifrapno akfo bruttnakaht Bro Nkifrar tfit wom yafothat hirahr; nd tur kfo bruttnayuk mrokwom kfo kekutuyuk yafothar. ¹⁴ Tfit akfo nhombra. Na wom yarmumatn akfo bruttnaya, nd na kfoyk mrokwom nhai na yimayanhu dukefr rhuyuk mrokwom kfo kfo kaha. Nhai. Mrokwom be tukanhu yafothatn mhfnahnewutm. ¹⁵ To ndnetn finji narhoya? Na kfo bruttnaneft, rot yafothat htayuk mrokwom kfo bruttnaruha, to tfit yiro yima yuhur rhuyuk mrokwom kfo bruttnaruha. Yo windohneft nhaf inji. Yafotha htayuk windohyuk windohefm mfnahrahm, yo yiro yima yuhur rhuyuk windohroh windohefm windohruha. ¹⁶ Be yafothat htayuk mrokwom Bro Nkifrar kfo bruttna yindhorrahnr to finji nd yiro lotu swirt rhuyuk yimam wany hik hanyhato wuroh yak dbkafyuk mrokwom miruham, "To be inji?" Wom nndoh yarmumatn mrokwom kfo bruttna hanyetm yimam nhai wany hik hanyruhatm. ¹⁷ Nd ni kfo bruttnahato kfo yindhoryuk mrokwom hifa kfo yindhorrahnm, to mirahn ka wany yindhorhato tpi yakrahm. Nhai. ¹⁸ Na Bro Nkifrar kfo yindhorwanr,

nanrpaya wom yarmumatn kfo bruttna hakuta, niko nhai na kanjo wom nndoh yarmumatn kfo bruttnakahko. ¹⁹ To na sioshu bro lotu rifiny swirm yinyeft, be tirfa mrokfo nmbuha marnyam, tu yimam wany hik marnyiwam, ndrmpam kekwa. Kanga wom nndoh yarmumathu yonmari 10 tausen mrokfo nmbuham yakhato kfo pthiruhanm, yimam nhai wanyhato yima yuhum yakruhatm.

²⁰ Bar yinouroko mirahko yon mumenroh dukefm kanjo nikmoh dukefm arhumnom. Tu bro yimaroh dukefm kanjo rhukfot. Fasoh fasoh nefroh nanefm yon mumenm kanjo inji rhu mmokfot. ²¹ Bro Nkifrarhu boririfhu mrokfot kfiwut,

“Bror kfiwur, ‘Wom nndoh yarmumat kfet yimam kforhota

romn yihato wom nndoh yarmumatn nanhu yon kunys mrokfom kfo pthahirahmm.

To nhai wany yakioruhatm.’ ”

Ais 28.11-12

²² Ndnettn yimam Bro Nkifrarhu Yafothat kasinyahato wom nndoh yarmumatn kfo bruttna thombat, ndt nhai Bro Nkifrar bi hiket yimaroh yak nuhasyuk hingrneft rhukaht. Nhai. Ndt Bro Nkifrar hik duha yimaroh yak nuhasyuk hingrneft. Tmift profet kanjo Bro Nkifrarpm mrokfom yakhato pthanefst, ndtne bi Bro Nkifrar hiket yimaroh yak nuhasyuk hingrneft, nhai Bro Nkifrar hik duha yimaroh yak nuhasyuk hingrneft rhukaht.

²³ Ndnettn niko sioshu tuhand yindars rpat rifiny bugahato wo nndoh nndoh yarmumamn mrokfom kfo bruttnarahkomm, nd Bro Nkifrar hik duha yima furam fknenihato wanyruhamn kfo mirahmko, “Mmohato mrokfom wom yarmumamn kfo bruttna mumiwum.” ²⁴ To niko nd profet mrokfom rifiny swirtn ptha hasetkonn nd Bro Nkifrar hik duha yima furam nd niko rifinyyuk kunyr rim fknenihato nd profet mrokfom wanumm, nd mrokfomn tafont htarahmm rroh nefm. ²⁵ Roh fasoh fasoh dukefm, rhu kafrohuykm, Bro Nkifrar tafont htaruhatrm mtabokme rmonhato nyingatikm yohniruhamn Bro Nkifrar naku kforahm. Bro Nkifrar nakuruhamn kfo mirahm, “Dajohmn, Bro Nkifrar tohno mifworko.”

Lotu yiharah hingrnefm hingrna hik marnyakfot

²⁶ Bar yimako, ndnettn niko lotu yiha rifinyhato lotunefst inji nakfot. Womr windoheter, rorhu windoht windohkfot. Womr kangr Bro Nkifrarhu mrokfo yimbu yuharoh mrokfom akfo nuhasanm, ror sinyahato kfo pthakfot. Womr Bro Nkifrar wom mrokfom yahutr kangr nd mrokfom womm akfo nuhasanm, ror nhaf sinyahato rorhu mrokfom kfo pthakfot. O womr wom nndoh yarmumatn kangr akfo bruttnaya, ror sinyahato kfo bruttnakfot. Yo womr Bro Nkifrar nd kfo bruttna mrokforoh kfo kekutyuk yafothar yahutr kangr apthaya, be tfit rorn sinyahato nd womr wom yarmumatn kfo bruttnayuk mrokfom rorn tfit kfo kekutkfot. Nd tamoh tamoh nefm niko nayukm, sioshu met yindarim htiruhamn yo wanyruhamn tpi yakrahm. Ndnettn lotu yiham rifinyhato loturahnom, inji inji hingrna hikkfot. ²⁷ Kangm wom yimam wom nndoh yarmumatn akfo bruttnanom, husf o husfirpa yimarpam kfo bruttnakfot. Nhai be rpat tipetm sinyahato mrokfom kfo bruttnakfot. Nhai. Rpa rpa sinyahato kfo bruttnakfot. Yo mrokfo kfo kekutyukm rom nhaf yimam nhombrahato tohhato mrokfom kfo kekutkfot. ²⁸ Nd yimam kfo bruttnayuk mrokforoh kfo kekutyuk yimam kak hambriwokome, to be nd wom yarmumat kfo bruttnayuk yimam tohhato kfo bruttna duha. Be nhowi ruhato yima

yuhurio Bro Nkifrarparpno kfo bruttnakfot. ²⁹ Yo Bro Nkifrarpno mrokfo yakyuk yimam kfo pthanefit hus yimaf o husfirpa yimarpam mrokmom kfo pthakfot. Womm be rhuahato nd rom kfo pthayuk mrokmom wanyhato yak nhtakfot. ³⁰ Yo wom yimar Bro Nkifrarhu mrokmom kfo ptha hanitrn, tfit nd rifiny swirt rhuyukm Bro Nkifrar womr wom mrokmom yahutrr kangr sinya tohhato akfo pthaya, nd barkof yimar afo rorhu mrokmom kfo ptha tmbhonikfot. Bi kfo ptha tmbhonirm ee btn womr sinyahato rorhu mrokmom kfo pthakfot. ³¹ Lotu yiharoh hingrna yuham inji yi marnyarahm. Htirahko womr pthayuk mrokmomn wom dukefm yakrahm tift womrpno wom dukefm yakrahm tift womrpno wom dukefm yakrahm, yima yimam kfo pthayuk mrokmom sioshu met yindarim wany hik bohikakruhamn dukefm yakruhamn toh bmtarahm. ³²⁻³⁴ Bro Nkifrar nhai mekahr mrokmom rpatn nathu mrkaknihato tfit wnmroh yima yuhum myak mmotarahmm. Nhai. Kangr mrokfo kfo pthanefit rpa rpa kfo pthahato rpa yima yuhur rhurahnom. Ndnnett yimam Bro Nkifrarparpno mrokmom yakhato mrokfo kfo ptharahm, nhai be rpat sinyahato mrokmom thu mrkaknikfot. Rpa rpa sinyahato mrokmom kfo pthakfot.

Bro Nkifrarhu yimaroh lotu rifiny swir bugam metm sinyahato mrokmom kfo ptha duha. Moses kfo boririfhumo mrokmom hikhato metm rom be yindariroh yinhitn rhukfot. ³⁵ Nd lotu swirtn wom mett wom yima yuhur nietrt kangt akfo ttiwona, nhai tuha rifiny swirtn sinyahato kfo ttiwonkfo. Inji naraht fasoh yimtnayuk nefit naraht. Tamoh ttiwon nmbuham korhm kto kunyko yihato tuthu ramemrn kfo ttiwonkfo. ³⁶ Tone finji? Nd Bro Nkifrarhu mrokmom ka nikompno misuh gungonmot? Ka nikompakomn mrokmom fakmokatn, womme ka nhai yakrmomt? ³⁷ Wom yimarhu dukeft duka kangr, Bro Nkifrarparpno mrokmom yakhato met yindarimpno kfo ptha he htfasyuk yimaya, o duka kangr Bro Nkifrarhu Yafothat kasinyet yimaya, nd yimar adukatwart ndar na wandfiwa mrokmom, Bro Nungo-thetrrhu boririfhu nuhasyuk mrokmom. ³⁸ Nd yimar ndar na wandfiwa kfo nuhas mrokmom nhai hikkahm, kfiwanko nd yimar mirahko aduka amanyom ka nd Bro Nkifrarparpno mrokmom yakhato womm kfo hanyeft ka tu Bro Nkifrar nd hingrneft hemorr. Nhai. ³⁹ Ndnnett, bar yinouroko, Bro Nkifrarparpno mrokmom yakhato met yindarimpno mrokmom kfo ptha habrinnyeft, ndt niko Bro Nkifrar kfo ttiwonhato nd hingrneft yakkkfot. Yimam Bro Nkifrarhu Yafothat kasinyewattm wom nndoh yarmumatn kfo bruttnewum, niko mirahko akfo rafonomm. ⁴⁰ Tmifm lotu yiharoh hingrnefroh yak hta bohta marnya nmbuhamn yak hta bohta marnyakfot.

Noheh yimam tfit sinyarahm

15

(Sapta 15)

Krais nohhato sinyamo yuhat

¹ Bar yinouroko, nd gutniyo mrokmom na niko kfo nuhashehato niko bi nd wany yakihato yakitohwat, nd mrokmomn kanga tfit akfo dukayanko. ² Nd gutniyo mrokmom, nikmoh yima yuhum yakitoh kih hanyhato hikrahkomt, htirahko Bro Nkifrar yakmiyakrahko. Yakitoh duha yirahkomt, Bro Nkifrar be hik furarahkomr.

³ Nd bro mrokfot bingot Bro Nungothetprno fakmoyant. Nd mrokfot inji kfomot: Nmoh fasoh fasoh nefm Kraistr suh nanyormorm. Bro Nkifrarhu rfa borngt inji kfo tndhmott. ⁴ Nohmotr; yakhato tahi muht htamomr. Husfirpa marm tahi muht rhuhat tfit sinyamor. Bro Nkifrarhu rfa borngt to inji kfo tndhmott. ⁵ Tfit sinyanimohat Pitarprno mfnahmotr Pitar htimorr; yo tfit nd 12-pela aposermprno mfnahmotr htimomr. ⁶ Yo tfit 500 Kristemr; yo yindarimpno mfnahmotr rom htimomr. Nd htiafoyuk yimam bokm tom yuhre tohwom, wommne bi nohmom. ⁷ Tfit kto Jemsrprno mfnahmotr Jemsr htimorr. Yo tfit kto aposer bugampno mfnahmotr rom htimomr.

⁸ Bi nd wom wommpno yak nuhashna yak nuhashnamorn ee kto tu wuroht nanpno mfnahmotr htimoyanr. Na memome, “Yiro yatit rhuhat fasoh bebtamotr mett bmbri hiyautr.” ⁹ Aposer hingrneft hingrnewa yimam na ndar yimena hingrnanuhiwanm. To mirahko ka rom aposer yufat yutewa kanjo na inji aposer yufat ka yutakfot. Nhai. Na namo fasoh beb nmbuhathu tndh mrokfot broyet. Nann Bro Nkifrarhu sioskfot faso faso fak bebhnamoyant. ¹⁰ Tu hifa Bro Nkifrar yuhuwafmora. Rorhu yuhuwaf nmbuhatn na bi ndarhtet hingrneft bi kakitohwant. Yo nd rorhu yuhuwaf nmbuhat nhai be yi furarmot. Nhai mif. Na hingrnewa hingrnafat htitan wom aposerm nhai na hingrnewa kanjo inji mfro hingrnakahm. Nhai. Na tu mfro hingrniwanm. Nanhu fijo ndarhtet yonmari hingrneft finji hingrnarfoyant? Bro Nkifrar yuhuwafhato bbuka rihfur yahukotra hingrnefm hingrnewanm. ¹¹ Na hingrnewa hingrnafat yo wom aposermn hingrnewa hingrnafat, nom nhai wom nndo mando hingrneft hingrnakahnom. Nhai. Romi na, nom hingrnewa hingrneft rpa Kraistrhu nohhato Bro Nkifrar kasinyamo yuhathu mrokfot kfo pthewunom. Nd mrokfom nom kfo pthamotnomm niko wany yakiomokomt.

Noheh yimam kto tfit sinyarahm

¹² Nom Kraistrhu nohhato Bro Nkifrar kasinyamo nmbuhat kfo ptha hakutwohat, to tamohmpno nikmoh womm wanyhato kfo yamukam, “Bi nohet yimam nhai tfit sinyaruhatm.” ¹³ Niko tu kfo mif thombat, ka Bro Nkifrar nhai kasinya mifmorr Kraistr. Ka yuhre yopt thowor. ¹⁴⁻¹⁵ Ndnnett rorhu nohhato tfit sinya nmbuhat nom kfo ptha htfaswat be kfo fura htfaswonomt. Nom be tu yimam frnheh htfas kangnomm Bro Nkifrar kasinyamorr Kraistr. Yo niko nom kfoyuk mrokfot wany yakio wako, mrokfot be wany yakio furewukomt. Bro Nkifrar be tu nhai kasinya mifkahrn noheh yimame, to ndhtet nef Kraistr nhai kasinyamorr. ¹⁶ Tu kfo mifwanko. Bro Nkifrar be tu nhai mif noheh yimam kasinyakahm, to be Bro Nkifrar nhai kasinyamorr Kraistr. ¹⁷ Bro Nkifrar be tu nhai mif kasinyamorr Kraistr; to nd niko mrokfom hikwa nmbuhat be hik furewukomm. Nikmoh fasoh fasoh nefm tom yuhre korhmko. ¹⁸ Yo yimam Kraistr hikhato bi noh hanyomom nhai wom rhukahm. Be nohhato hel yimohat mmbrafnyinimom. ¹⁹ Nom Kraistr hikhato kukatohwonom nmoh rhu nmbuhathu yak marnyanef. To mirahnom nmoh rhu nmbuhat bi ndar bbinysofrpat ayak marnyatwatrt, to tfit Kraistrprno yiyuk bro dukeft be yi furahrt.

²⁰ To nhai. Nhai inji. Kraistr bi noh mifmorr. Nohmotr bi Bro Nkifrar tfit kasinyamorr. Nd noh hanita yimam to rorn bi tor barkof yimar sinya gngonmor. Bi ror inji namotr to be kto noheh yimam tfit sinyarahm.

²¹ Wom yimar namo nmbuhatpno noheft niamot. Tfit wom yimar namo nmbuhatpno yimam tfit sinyarahm. ²² To inji korht. Adamr hanyjbornamo yuhatn nd ror kasinyamo frikar rinohakmom. Tfit Kraistr wany yakiomo yuhatn to be tfit arihat Kraistrpno frtkafyuk yimam tfit sinya bugarahm. ²³ To nom buga, nmoh sinya yihar nierahr, nom sinya bugarahnom. Barkofr bi Kraistr sinyamor. Kto tfit ror nieruha yiharn nom rorhu buganom, sinya buga hanyrahnom.

²⁴ Nd yiharn Kraistr hingrna hnayuk hingrnefm mhingrna tmbhorahrm. Kmynysof kmynysofm thu yurmo tongr, kmynysof kmynysofroh yarhm, kmikmiroh gafman yimam Kraistr yak bisisruhatrm rom hatoh hnayuk bbuka nanyjareft yohniraht. Nd rorhu kingdomkfof yakruharn Bro Nkifrar, nmoh Yifemr, rorhu tirtn htarahatrt, rorn yakitohrahrt. ²⁵ Afo tu Kraistrn king yufat yakhato kingr tohrah. Kingr tohato yahrt afo rorn yahot tpojhato rorhu mofsinhitn htarahrm yimam. ²⁶ Nd rorhu yahr kmim bi mofsinhitn hterm ee tfit yimam nohwa yuhat frtitafrahrt. ²⁷ Bro Nkifrarhu rfa borngtr kfo kangt, "Bro Nkifrar nd tamoh tamohm yakmorm Kraistrhu yinhitn htamorm." Bro Nkifrarpar nhai Kraistrhu yinhitn tfit rhukfot. ²⁸ Kto, nd tamoh tamohm bi Kraistrhu yinhitn bi forhni bugem, ee Bro Nkifrarhu Yonr tfit Bro Nkifrarhu yinhitn tfit rim rhurahr. Barkofpam Bro Nkifrar afo nd tamoh tamohm Yinem Yonrhu tirtn htamotrm rorn fakitohmorm. To tfit Yinem Yonr turhu Yifemrhu yinhitn rim rhu thombat, tfit nd yiha Bro Nkifrar tfit yura mrhurahr.

²⁹ Yimam bi nohetm sinya duha yi shombat, to tamohmpno nd yimam tafi baftaisnihato nohwam tfit yima nfrimn nohehroh yufam tfit baftaisahukamm? ³⁰ To nome tamoh nmbuhatpno ndar nom hingrnawa hingrneftpno be nohyuk tkitt yorhwanom? Yimam bi nohetm sinya duha yi shombat, to tamohmpno be nd noheh yimaroh mrokfotn yihom pthak mpthak hasohato nhai yafhowonkahnomt? ³¹ Bar yinouroko, niko bi Kraistr Jisasr, nmoh Nungothetr, hikwatko bro yindhor nmbuhat korhta. Ndnetann na kfo mifwanko. Na yiha yiha be nohyuk tkitt korhakuta. ³² Yimam bi nohetm sinya duha yi shombat, to tamohmpno na Efesus tohato nd namburet namburet fohmpno nnayurmoya? Ka be tuka ndar bbinysofthu toh nmbuharpat dukahato nd fohmpno nnayurmoya? * Nhai. Nanhu dukeft duka memoya, "Nd fohmpno nna hanyhato mfnoha, nhai mrokfefm. Tfit sinyaruha." To yimam bi nohetm sinya duha yi shombat, to be, tamoh tamoh nefm nafura bofura hasohato nohokne be miyawitanitnom.

³³ Mirahko wom yima fura bofuran arihti marsisakkahtnomm aniekahmn afrmmo hammomko. Niko wom mrokfot bi wanyeteko, nd mrokfot inji kfiwut, "Fasoh nefm nayet yimampno nabnohato tamoh tamoh nefm rpat finji na finji narahnom, to be nmoh dborioh nefm yohniruhamn to be tfit rroh fasoh yuhatn mhikaknirahnom."† ³⁴ Nikmoh fasoh mmo nmbuhat wayafhotwakomt. Wayafhokahkomt tfit dborioh yima dukefm wayaktwako. Yo nikmoh fasoh nefm wayafhotwakomm.

* **15:32:** Womm duka memom ka tu foh mifm Porr kformor. Rom gafmanr nefst inji namour. Wom yimar wom fasoh nefst mner, fohmpno yak htatamoatrm nd fohmpno nnamour, akfonom laionmpno nnamoum. To nd mrokfot bok yimam duka kangm Porr nhai tu namburet foh mifm kformor. Nhai. Ndt ror waskfot kformoa yimamn kformor. † **15:33:** Nd mrokfot Grikkorhof wom safemanr kfomo mrokfoyet.

Nikmohart, tom womm tafi Bro Nkifrarhu dukef yuhat hikkahm. Nhai. Hti mmo bomumiwum. Nd mrokfot na niko inji kfiwohat wayimtnakomt.

Nfri thatipt tfit sinyaruhat nndo rhuraht

³⁵ Ka womm riruhato kfo ttiwon mirahm, “Yimam nohwam finji kanjo sinyaruham? Sinya thombat to rroh thatipm finji rhuruham?” ³⁶ Ndt tamohet mmoroh ttiwon mumefet? Niko wom yewuri tpim bbinysoft nuhtiwam htitwokomm. Yewuri tpim tou yoprahkomm afo yiro bbinysoft ruhato tpim rinohrahm. Kto tfit htirahkomm tfit frdborharahm. ³⁷ Nd ni nuhtayuk wit tpim o tamohm frdborha thombat nhai tfit tu wanuhtewa tpi furam kanjo rhukahm. Nhai. Tfit nndo korhm. ³⁸ Tu Bro Nkifrar kfiwur, nd yewuri tpim o tamohm frdborhahato sinyewamn twa rfetm, yuhtetm, nyisofetm, thetm korhm. Tu Bro Nkifrar kangr nd yewuri tpim finji arhum, ee inji sinyahato inji korhm. ³⁹ Yimam, fohm, nungam, yiram, tamohm nhai rpahtet ruheft rhukahm. Nhai. Yimaroh ruheft nndohet, fohroh ruheft rot nndohet, nungaroh ruheft rot nhaf nndohet, yiraroh ruheft rot nndohet. ⁴⁰ Yura mount hatohwa wondht rot nndoh korht rothu ruheft. Yo ndar bbinysoft hatohwa wondht rot nndo korht. ⁴¹ Marr hatohwa wondht nndohet. Yamt hatohwa wondht rot nhaf nndohet. Yo rpa rpa gunym hatohwa wondht nndoh nndoh wondht hatohwom.

⁴² Yimam nohhato sinya thombat inji rhuraht. Ndar nom hatohwa thatipt yopefiwohat mikfe bdgnitt. Tfit Bro Nkifrar kasinyaruha thatipt rot nhai tfit nohruhata. ⁴³ Thatipt nohhato yopefiwat fasoh rhu bebwot. Nd thatipt tfit sinyaruhat, ginafm frdborhewa kanjo inji frdborharaht. Yo thatipt yopefiwat nhai bmtakaht. Yudbat mikfe bdgnitt. Nd thatipt tfit sinyaruhat tu tat thatipt sinyaruhatn nhai tfit mikfe bdgniruhata.

⁴⁴ Ndar nom yopefiwa thatipt ndar bbinysofthu thatipet. Nd tfit sinyaruha thatipt tu hefenrhu thatiptn tfit sinyaruha.

Mirahko ka rpahtet thatipt hatohwonom. Ndar bbinysofthu tohyuk thatipt, rot womet yo hefenr tohyuk thatipt, rot womet. ⁴⁵ Bro Nkifrarhu rfa borngt inji kfiwut, “Barkof hingrnamo yima Adamrn, Bro Nkifrar ssfoneft hemotrr tohmor.” Tfit kto wom nfri Adamr niamor.† Nd nfri Adamr Kraiser. Ror niahato Bro Nkifrar tu toh nkifraniyuk yafothat hemotrr tfit Kraiser nd toh nkifraniyuk yafothat hemornom nom. ⁴⁶ Nhai bi hefenr toh nkifraniyuk yafothatn bi niahato tohkaht. Nhai. Afo ndar bbinysoft tohyuk yima mif thet yima thatipt niewut. Rot niewatt ee btn yafothat niewut. ⁴⁷ Barkof Adamr Bro Nkifrar hingrnahato htamor, ndar tu bbinysofthu bbpaye yak yeny nhombramo Adamer. Tfit ndwom mongko niamo Adamr, ndr yura hefenkorhof Adamer. ⁴⁸ Ndar bbinysoft tohyuk yimam korh nhombrewum nd bbpaye yak nhombramo yimar kanjo. Yimam, hefenr tohyukm, korh nhombrewum tu hefen yuhat niayuk yimar kanjo. ⁴⁹ Arihart afo nd bbpaye yak nhombramo yimar kanjo inji afo korhnom. Kto tfit nd hefenrhu yimar kanjo rhurahnom.

⁵⁰ Bar yinouroko, na kfiwa mrokfom inji akfo wutha hikkahtanm wawany hik marnyatwakomm. Ndar nom hatohwa thatipm, nhai Bro Nkifrarhu kingdomkfo fknihato tohkfo. To nhaf womt, ndarhtet mikfe bdgniyuk thatipm nhai toh nkifranikfo. ⁵¹⁻⁵² Wom kafroh mrokfot kfo ptharhotant wawanyswakomt. Nom ndar yima buganom nhai noh

† 15:45: Nd wom nfri Adamr kto niamor, ndr Kraiser. Mrokfot htikfo 15.21-22 yo Rom 5.14-19.

bugaruhatnom. Ndar bbinyosofthu toh bnkayuk kfo dukayuk fumrr toh hanyrahr, yudbat toh mhunfat kanjo frdborha rmon bugarahnom. Nd noh hanyuk yimam rom sinyahato frdborhahato nd hefenr toh nkifraniyuk thatipt yakrahm. Yo ndar yima nfrinom nhaf nd fumrrpno frdborha bugarahnom. ⁵³ Ndar thatipt nohhato mikfe bdgnitat, ndt thu hrur tuhraht. Thu hrur tuhato tfit nfri thatipt yakrahnom. Nd nfri thatipt nhai tfit nohruhatt. Be inji toh nkifraniyuk thatipt tfit yakrahnom. ⁵⁴ Nd nmbuhat bi inji forhnt, ndar nohhato mikfe bdgnita thatipt bi frdborhanihato bi tfit toh hatohyuk thatipt bi feknom, be kfo mirahnom nd nkifra mrokfot bi nkiframpno rhumot bi asot fipetet. Rom nd kfo memo, “Bro Nkifrar noheft bi fak nohrt.” ⁵⁵ “Ni nd noh yafothaye, fitot ni nd hatonita nohefthu bbukeft? Ni nd noh yafothaye, to fitot yima wasyuk kfrat ni nd hatonitat?”

⁵⁶ Nd noheft hatonita kfrat to fasoh nefet. Mosesrhu boririfhutn kfiwohat, mirahn inji anaya, ee yimaroh fasoh yima yuhum mfro risinyewatm fasoh nefmn misuhm. ⁵⁷ Tu hifa Bro Nkifrar fitha arhu duha yir nom finji narfonom? Hifa rorn kfomor nmoh Nungohtet Jisas Kraistr nohhato nd fasoh nefm yak thuhato nfri yafothar tfit thu hmbremornom.

⁵⁸ Ndnnett bar yinouroko, niko toh bmtakfot. Mirahko tamoh tamoh nefenm awohsisnom. Wadukako, nd niko Brorhu hingrneft hingrnewat nhai yi furaruhatt. Ndnnett yiha yiha Brorhu hingrneft hingrnakfot.

Porr turhu hingrnayuk mrokfo yuharoh mrokfo yuham kfo pthamor

16

(Sapta 16)

Jerusalem tohyuk Kristenroh maruharoh htafhe yuhat Porr kfo pthamor

¹ Kfo ttiwon mrokfot kfo ttiwonmokma Jerusalem tohyuk Kristenroh maruha hta nhafohhato htaf hanyeft. Ndthu yuhatn kanga akfo nuhasanko. Maruham kangko hta nhafohhato Jerusalem thofm ahtaf hanyomm, na Galesia thofm kfo nuhasmo yuhatn hikkfot. ² Niko yiha yiha yakyuk maruham, Sande yihamn niko rpa rpako tuko rhuhat maruham yak nhtahato womfam nndo yak htafkfot. Wom wizr yakyukm Sande yiha rhuhat yak nhtakfot. Yo tfit wom wizr yakyukm nhaf be inji. Inji na hanysn maruham brorahm. Kto na nia kfoneft, bi yak hta nhafotayetmn be yakhato hirahkma, nhai tfit yak hambroruhatko. ³ Na nia mfnah thombat, tukomn wom yimam wayakkahkomn romn nd maruhami yo na wandfayuk kfo nuhas gontwampno rpat Jerusalemko hanyrahmm. ⁴ Be tukann, kanga tukanpno rpat ainyom, be tukanpno rpat riyahnom.

Korin thofroh yi hti yuhat Porr kfomor

⁵ Na nia thombat afo Masedonia profins tohyuk yimampno inji hti hnerhoyanmn ee kto nikompno mfnahruha. ⁶ Nikompno ka dfik yiham mtohnho nahneruhanko. Afo htiyaf hanyruha ka nd frfon wormr ka nikompno tohruha afo. Nd frfon wormr bi ftohnir ee btn sinyaniruha. Na tfit wom kmit yi shombat wahti dukaf hanyswakomt nanhu yi nmbuhat. ⁷ Na ndar niat nia thombat, na nhai wofnkaha na be yifrar mtohni hanyneft. Bror kangr wom yiham afo ndha watohni ee wom yiham tohniruha.

⁸ Pentikos yihar afo ar tuha Efesusn afo tohruha.* ⁹ Asha htita Bro Nkifrarhu mrokfothu pthaneft bi yihoteta. Bro Nkifrar bi fak wuthamotr na nhai nd hingneft mhtanikfot. Tot nanhu tu bro hingneft. Nd dukeftpno afo asha tohruha. To htita na higrnewa higrneft yimam wahtewumt.

¹⁰ Timotir nikmoha mfnahwor, wayaktwakomr. Mirahko finji anakaht-nomr be yakrme yima yuhurpno kukroht arhur. Turhu kmit yorhwa kanjo inji arhutwar. Ror Brorhu higrneft higrnewur na tuka higrnewa kanjo.

¹¹ Mirahko ka yima furarn nyingarpaye ayukatohnomr. Nhai. Nd yimar na higrnewa higrneft kanjo higrnewur. Rorhu nia yihar watoh kaffo marnyakahtkomr yihotar nia marnyarahrr. Rori rorpno yiyuk yimam rpat nia marnyarahmr yihotar.

¹² Apolosrhu ndkorhof nia nmbuhat kfo tkrur titamoyanr ndko wom yimampno rpat yinyeft. To nhai, nd yiha yima yuhur nhai sinyarmorr yinyeft. Kto turn wom yiham yibonwore, ee btn nierahr.

Wom mrokfom

¹³ Yo niko! Niko tuko duka marnyaf hanykfot. Bro Nkifrarhu dukefr-parpno rhuhato toh bmtakfot. Toh bmtahato tamoh tamohm duka yakrmi duha. ¹⁴ Tamoh tamoh higrnefm higrnarahnomm, hifa yima yuhurpno higrnefm higrnakfot.

¹⁵ Bar yinouroko, niko Stefanas riphari rorhu kunys tohyuk yimaroh mrokfot wanymokomt. Romn nd Akaia profins Bro Nkifrarhu mrokfom ri-hik gungonakmomm. Romn bi tohhato Bro Nkifrarhu met yindarim mfnah hanyukm romn wafakitohakmomm. Tfit kfiwanko, ¹⁶ ndhtet yimampno niko yi tohneft, niko be yihato romi rompno higrnewa yimampno, rroh yinhitn niko tohakkfot.

¹⁷ Nanhu yima yuhur niko duka darwon hasomoar, hifa Stefanas, Fortunatus, Akaikusromn niamotm to be romn na htihato yima yuhur miyorhwoa. ¹⁸ Romn niahato nanhu yima yuhur mirhumora yo nikmoh yima yuhum mirhumomko. Ndhtet yimaroh mrokfom wany yakitohkfot.

¹⁹ Asia profins yorhwa kmi kmiroh sioshu met yindars niko dukahato kfo yindhor mrokfot htefiwumt. Akwila Prisila sawohfi rofhu kunys lotunefm rhu rifiny hakuta Kristenm, rom buga Jisasrhu yufatpno kfo yindhor mrokfot htefiwumt. ²⁰ Nom asha Kraistr hikwa Kristen buganom, nom buga kfo yindhor mrokfot htefiwunomt.

Niko tuko Kristenko tir nhekfot. ²¹ Na Pora, na tukanhu tire kfo yindhor mrokfom wandfiwanm.†

²² Yimar nhai Bro Nungothetrhu yima yuhur rhukahr, “O, Bro Nkifraye, nd yimar wayak tutfatwanr. Na kfiwa nmoh Nungothetr ayawihnar.”

²³ Bro Nungothet Jisasrhu yuhuwafeft arhuwatko. ²⁴ Jisas Kraistrhu yuhatn nanhu yima yuhur nikomn korhr.

* **16:8:** Pentikos yiharhu kfo nuhas mrokfot htikfot Aposer 2.1. † **16:21:** Porrhu gontwam nhai tu Porrn wandfa hnarmorm. Rorhu mrokfom wommn wandfamoumm. Womm wandfamoatmm ror be kfo yindhor mrokfomi yufa sainimnefrpatn Porr yikt yakhato wandfamour.

Korin thofroh husyuk gontwat Porr dwandfakhato htamot Barkof kfo nuhas mrokfom

Taun Korinthu sios tohyuk wom yimamn wom mrokfo bebm Porr hemotmr, ndtpno Porrrhu yima yuhur nhai marnyarmorr. Memor, "Gontwaye nd krho yima yuhur Korint tohyuk sioshu yimam kfo dbruf nuhas-rhotanm yima yuhur mirhuruharn tfit hifa yima yuhur hmbriuruhanm." Ndnetrn ndar gontwat wandfamort.

Barkof kfaknimo barkof mrokfom, Porr kfo srh nuhasmorm ror bingot sinyahato Korin thofm kfo nnhu mrokfom hemo yuhat. Nhahi be rorhu fijo kfo nnhu mrokfom hermorm. Nhahi. Tumnn fasoh mrokfom hemotmr ndnetrn kfo nnhumorm. Kfo nnhumotrm rom wanyakhato rroh fasoh nefm fafho thumomm. Kto Porr wanyakhato yima yuhur tfit mirhumorr.

To nd yihart Judia profinsko tohmoa Kristenm nhai hifa toh nmbuhat tohrmom. Faso yatinoh bebobeb yo tamoh hmbresham kaknaf inji namoatm Porr yima yimampno fak nhafohakhemorm. Ndar gontwathu sapta 8-9 Porr to nd maruha yak nhafohneftn Korinmpno mrokfot htamort.

Ndar gontwat kfonimo wuroh mrokfom, Porr kfomor giaman aposerm Korint tohhato Porrrhu yufat wahtahato rorhu aposer hingrnefm kfo bebmoya yuham.

Bro Nkifrar aposerm hemo hingrnefthu mrokfot Porr kfo pthamor

(Sapta 1-7)

¹ Na Pora, na Kraiss Jisasrhu aposera. Bro Nkifrarhu duka fijo aposer hingrneft fak htamora. Nani nanhu yinouwem Timotirpno ndar gontwat no wandfewunonko niko taun Korinthu Kristenko, yo Akaia profinshu Kristen bugako. ² Nmoh Yifem Bro Nkifrarmoni nmoh Bro Nungohtet Jisas Kraissr ayak marnya-kahtfko yima yuhum amirhutwamko.

Porr hatohmo krhopam Bro Nkifra yak thuhemotrr Porr ndt htihato Bro Nkifrar kfo yindhormorr

³ Bro Nkifrarhu yufat akfo yindhorm-nomt. Turn nmoh Bro Nungohtet Jisas Kraissrhu Yifemer. Ndr yima yuhuwafet Bro Nkifrar. Tamoh tamoh krho yima yuhumpno rhu hasoneft nd Bro Nkifrar hifa yima yuhum hnewatrm yima yuhum thu jubtwanitm. ⁴ Tamoh tamoh krhopam nom yakneft rorn nmoh yima yuhum kak marnyewurm. Ndnettn tfit womm tamoh krhopam-pno rhuneft, nomn yihato nd yimam-pno rhuhat kfo yima boyima marnya-hato nd rom haruh hasoyuk krho yima yuhum thu jubtwarahmm. ⁵ Nom Kraissr krhopam yakmo kanjo nom inji kanjo krhopam kekwonom. To inji kanjo Kraissrhu hifa dborioh yima yuhur nmoh yima yuhum htewurnom. ⁶ Nom krhopam yekwohat Kraissrn tfit hifa yima yuhur hnewarn yima yuhum yak marnyewatrm yima yuhum miyorhwomnom. Ndnettn niko krhopam yakneft, nom nd yuhat hikhato nikompono yi rhuhato nikmoh yima yuhum yak marnya bomarnyahato yima yuhum mirhurahmko. Yima yuhum mirhuruhatmko Bro Nkifrar tfit yak miyakrahrko. Nom yihato nikmoh yima yuhum yak marnya

bomarnyanefit, tamoh krhopam tfit nianefit, nhai tfit wom finji wohsis-ruhatko. Nom krhopam titahnamo kanjo be inji tita hanyrahkom. ⁷ Nmoh dukefti htiyefit hti kangnom nhai suhruhatto. Htitnom nom yak htfaswa krhopam kanjo niko inji kekwoke. Nom nd krhopam yekwohat, to tfit Bro Nkifrar finji finji niahato nmoh yima yuhum kak marnya bomarnyewurm, nd yuhat Bro Nkifrar hikhato niko inji narahrko.

⁸ Bar yinouroko, nom Esia profins yakmo krhopam tndh nuhasrhotanko wawanyko. Nom Esia profins tohmohat mirahko be tu kuken krhopam titamonom. Be tu bro krhopam titamonom. Nhai marimonom rhurahnom. Bi memonom ndar krhopampno nohrah-nom. ⁹ Bi memonom bi nohyuk tkitt bi tohwonom. Ndt to nhai be sfno inji rhurmot. Ndt nmoh yak dukayuk neftn rhumotnom. Ndhtet krhopam yakneft nhai tfit tunmoh bbukeft yukatohkfot. Nhai. Bro Nkifrarpar nom tfit yukatohkfot. Rorpar bi nohet yimam tfit kasinyewurm. ¹⁰ Nom bi nohyuk tkitt tohyuknom Bro Nkifrar toh rafomotrnom nom rhumonom. Ndt inji htihato nmoh dukefti htiyefit duka kangnom kto to inji toh rafo hanyruhattrnom nhai nohruhattrnom. ¹¹ To niko wakfo bruttnakahtkmmom Bro Nkifrar tamoh nefm toh rafo hanyrahnom. Bok yimaroh kfo bruttna tngm wanyruharn toh raforahrnom. Rirhu arhuyuk yimam ndt htiruhann, Bro Nkifrar ko yindhorrahmr.

Porr Korinko yi juha yimo nmbuhathu kfo duka mrokfom

¹² Nanhu toh nmbuhathu yo nanhu nefm nikompno tohhato niwam ridukak thombat, nanhu yima yuhur nhai finji duka yimtnakahr o duka krhokahr. Nhai. Bro Nkifrar yak hta bohtamotra nanhu toh nmbuhathu be yi marnya mifmot. Nhai wom beb nmbuhathu nikompno htarmoyant. Bro Nkifrar yuhuwafhato hemora ndhtet ruhefthu rhuyuk rhu dukeft. Nhai ndar bbinysofthu yimaroh rhu dukeft hikrmoya. Nd Bro Nkifrar heyuk nefmpno nikompno yo ndar bbinysofthu yimampno toh hnamoya. Ndnnetann nanhu yima yuhur nhai finji duka yimtnakahr o duka krhokahr. Nhai. Nanhu yima yuhur be yindhorwor. ¹³⁻¹⁴ Na nikompno gontwam wandfa hnamohat, na nhai wom mrokfom mkfo rhti tany o yura be yafuna hnarmoyann. Nhai. Tamoh mrokfom wandfafmoahat, wandfa nuhas marnyamoanko. Rot wom yiham wandfamao mrokfomn mfak mmota-moukemm. To nanhu dukeft memoa nanhu mrokfom htiruhakomm nanhu dukeft yakrahkomr. Htiruhakomrn, kto Jisasr, nmoh Bro Nungothetr, bro kotkfot yakitoh thoft tfit tunom wusha nahtihato nnakfo yindhorrahnom. Niko na htiruhakomn tfit kfo yindhor-rahkma. Na tfit niko htirhoyann kfo yindhor mrokfot kforuhant.

¹⁵⁻¹⁶ Ka bi fakmokomm na kfoyuk mrokfom. Nd dukeftpno duka hta memoya Korin yuhathu niko mhtinihato kto tfit Masedonia profinsko yiruha. Masedonia profins mtoht tanyhato tfit wompam Korin yuhathu nierhota tfit wom htiti htiaforuhakomn yindhorrahko. Tfit nanhu Judia profinshu yi yuhathu nikomn hingrnafhirahkma. ¹⁷ To nhai, na nhai Korinko niarmoya. Tone finji dukewako? Ka duka kangko ka be nomn frnehemor? Kangko ka na nda bbinysoft tohwa yimam kanjo hus yima yuhetann mrokfom kfonihato tfit kto kfo kecutwanm? Nhai mif. ¹⁸ Bro Nkifrar nhai mikfota mkfotakahr. Tur bi kfoyuk tngrrpat hikwor. Na to inji kanjo bi barkof kfoyuk tngrrpat hikwa. Bi kfo yakio tngt kfiyant, to be nd bi kfo yakio tngt hikwa. ¹⁹ Na, Sailas, Timoti, nom husfirpa yimat

nikompno tohhato mrokfom hemoam, Bro Nkifrarhu yon Jisas Krairhu mrokfom hemounomko. Kraistr nhai mikfota mkfotarmor. Bro Nkifrar kfoyk mrokfom hikmorn Bro Nkifrar kfo htayuk mrokfom Jisasrpo mfrfnahnamom. ²⁰ Bok mrokfom nmoh yufatpno Bro Nkifrar yak dbkaf htatamom, Kraistrpo mfrfnahna bugamom. Ndmn nom mhtiyakhato duka mekfot Bro Nkifrar nhai mikfota mkfotakahr. Tamoh mrokfom ror bi kfo htayukm hingrna hikworm. Ndnnetn Bro Nkifrar nom kfo yuta hagrha yindhorkfot. ²¹ Tu Bro Nkifrar nikomi nmoh toh nmbuhat Kraistrpo tohyukt thu bmtewurt. Yo yakhato bi kfo hbhamornom. ²² Barkof nia kfo hbhamohat inji namor, turhu Yafothat hnamortn nmoh toh rawofmn htamort. Rotn hta tehakmotm tamoh tamohroh niayuk yihotat. Ndnnetn nmoh yufam-pno yorhwa tamoh tamohm Bro Nkifrar be yafho hasorahrm.

Porr tfit Korinko yi juha yimo nmbuhathu kfo duka mrokfot

²³ Bro Nkifrar nanhu yima yuhur hti mifworr na nhai kfo nhehrmoyanko Korinkorhof nianeft. Nhai. Duka kanga bmbri yihato wom mrokfom kforuhanko, tfit niko wanyruhakomn tfit wom krhopam yakrahko. ²⁴ Na nhai tatkrur mikahanko, “Nikome be inji korhko. Inji inji wanakon o mrokfom inji inji wahikkomm.” Nhai. To nikmoh Bro Nkifrarhu tohhato hik yuham faso yitatn btn inji tatkrurfo-yanko? Nhai. Niko hifa toh bmtahato bi Bro Nkifrarhu mrokfot wanyhato hikwokomt. Nom, nom be kangnom Bro Nkifrarhu hik yindhorefrpat abronitko. Nom ndrpat kukatohwonom.

2

¹ Na nhai Korinko niarmoya. Nanhu dukeft duka memoya, tfit ndko yihato wom mrokfom kforuhanm, rom tfit wanyruhamn yima yuhum krhorahmm. Ndnnetann nhai niarmoya. ² Na niahato nikmoh nyingatikhato wom mrokfom kfohato niko yima yuhum krhorahmko, to tfit na frohmpno rhuhato naptha yindhorrhuanom. ³ Nd dukeftpno bi wom gontwat htamoyant. Memoya afo bi gontwaye kforhotanm bi tumn rhuhato rom nayuk nefm bi yak marnya hasorahmm. Kto na yinyeft, yindhoreftpno rhu hasoruhatm na be mhti yindhorak-niruhanm. ⁴ Na nikompno wom gontwat bi wandfaf hany mohat, nd yiha nanhu dukefr nhai rhu marnyarmor. Yima yuhur rigumuhata bugahato nur hanyhato wandfamoyant. Na nd gontwat wandfafmohat, nhai marimoya krho mrokfom hirhotanko yima yuhum krhorahmko. Nhai. Nanhu yima yuhur nikompno rhumor. Nd dukeftn nd gontwat wandfahato memoya gontwatn nd nanhu yima yuhur htirahkomr.

Korinm nd yimar nayuk fasoh neft yafhohato tfit dukak hanyhato ptha duha

⁵ Gontwatn bi kfomoyanko. Nikmoh wom yimar wom fasoh neft ner, nd yimar tfit yakhato kfo yima boyima marnyahato mrokfom hekfot. Ndar gontwat nhai tfit nd mrokfotn tfit kfo ptha hatohrhota. Nd yimar nayuk neft nhai nanrpaye krhomoyant. Niko rpat krhomokomt. ⁶ Be bi fak gngngtat-mokomr, be tmifko mirahko tfit wom nefm ananom. ⁷ Be tfit wayakkahkomr ror nayuk nefm wayafhohikahkomr hifa hifa mrokfom hihato rorhu yima yuhur tfit thu jbtwarahrr. Be mfro mfro krhopam hi hatohrahkomr be rorhu yima yuhur krhohato Jisasrhu hik dukefr yafhoni bugarahrr. ⁸ Tfit yakmiyakhato, ndt htiruharn duka mirahr nd yimam

dukewuma. ⁹ Na bi wandfafmo gontwat, memoya, “Afo htiruhanm, nd na gontwat kfoyuk mrokfom hikrahmm o nhai?” ¹⁰ Wom yimar nayuk neft mong trohhirahkomr; na to inji mong trohahukanr. Yimam nanpno mrokfetm rhuneft, Kraistrhu nyingahato nd yimam nayuk nefm yafhohato mong trohwanm. Duka kanga na inji anaakhta niko htiruhakomn nd yuhat hikrahko. ¹¹ Nd yuhat hikru-hakomn Satanr nhai frnehakruhatrko. Nom bi hti hiketenom Satanrhu neft. Ror yima frnehaketer.

Porr memour Troasn Taitusrpno mnahtihato ror yimo nmbuhathu mrokfom wanyruha

¹² Na Troas gutniuskfothu kfo pthaneft yimohat, htimoya Bro Nungo-thetrn ndko yi hingrnayuk yihotat fak nukakmort. ¹³ To na Troas yimohat, nhai nanhu yinouwem Taitusr htermoyanr. Ndtпно yima yuhur nhai marnyarmora. Be tfit Troas htanyhato tfit Masedonia profinsko fak hambro hanymoyanr.

Kraisrhu bbukapampno aposerm yahrt kahot noh fnahwomt

¹⁴ O Tunga Nkifraye, yiha yiham ninn yekwannom ninhu tire tkity-atkitm kak hatoh hanitwonnom. Yak hatoh hanitatnnom, kfo nuhas fnahwonomm, nom Kraistr nrfah bhakhato tfit rorhu yufatpno rim htamo yuhat. Nd yuhatn kmi kmiroh met yindarim Bro Nkifrar mhti dukekwomr. Rorhu mrokfot kangme paura gbefr o wel gbefr kanjo frfnahwatr kmi kmi gbefr kekwoomr. ¹⁵ Ndt tu kfo mif kfoyet. Nom to nd dborioh mthet paurafoyet. Kraistr yakhato Bro Nkifrar wutarioh mthamotr, nd paurafothu tarioh mtha gbefr kekworm hefenko yita yihotat tohyuk yimami helko yita yihotat tohyuk yimam. ¹⁶ Hel yuhar tohyuk yimam, nd gbefr nohyuk gbefr kanjo mthatitmr. To hefenko yita yihotat tohyuk yimam, nd gbefr toh nkifraniryuk gbefr kanjo mthatitmr. To tum frohmn ndhtet hingrneft hingrnarfomt? ¹⁷ Nom, nom nhai wom yimam kanjo nd Bro Nkifrar hingrneft maruha yak hingrneft kanjo hingrnakahnomt. Nhai. Hifa yima yuhumpno Bro Nkifrarhu mrokfot kfo ptha htfaswonomt. Tu Bro Nkifrar n kfo tkrurafetnomn nmoh toh nmbuhat Kraistrpno tohwonom. Ndnnett Bro Nkifrar kukatohwonom. Mrokfom nhai be kfo brur fnahhato kfo furakahnomm.

3

Yimaroh yakyuk nfri yihotoharhu yak dbkaf mrokfot aposerm kfo nuhasmom

¹ Gontwathu mrokfom nom inji htewohate, ka kangko ka be tunmoh yufaroh kfo hagrha yindhorneftn mrokfom inji htewunomm? O ka wom yimam kanjo nmoh dborioh hingrneftu kfo nuhasyuk gontwat kangnom, yimam awandfahikahtnmom nd gontwatpno yimam yak nuhasneft hti mirahm, “Ndm tu Bro Nkifrarhu tu dborioh hingrna yimayem?” O ka kangnom nikomn ndhtet gontwat wawandfahitwaknmom? Nhai mif. ² Nmoh hingrneftu kfo nuhas gontwat, to bi nikomn toko nmoh hingrneftu kfo nuhasyuk gontwako. Niko nmoh marbimn korhko. Niko Bro Nkifrar hikhato yauwa dborioh yau nmbuham nom kmi kmi kfo nuhas hanitnomm. ³ Nom Bro Nkifrarhu hingrneft hingrnamt to toko niko Bro Nkifrar hikwokomr. Nd yuhatn to bi nikomn bi toko nmoh hingrneftu kfo nuhasyuk gontwat Kraistr wandfamot. Yimam niko htihato

kfo mirahm, “Nd yimam Porrhu mrokfom wany yakiohato Kraistr hikwom.” Kraistr nd gontwat wandfamohat, nhai ndar tu yimam yakitohwa pene wandfarmort. Nhai. Toh nkifraniruha Nkifrarhu Yafothaye nd kfo nuhas gontwat wandfamort. Yo nd gontwat wandfamohat, nhai yura nmbi tahimn wandfarmorm. Nhai. Yimaroh yiro yima yuhumn riwandfamorm.

⁴ Nom bi Kraistrpno rim toh-niyetnomn Bro Nkifarn nd aposer hingr-nafat htamornom. Nmoh bro dukeft duka kangnom tu Bro Nkifarn bi hingrna tafsefr htamornom. ⁵ Nomrpanomn ndhtet hingrna tafsefr fitha yakrfonomr? Nhai. Tu Bro Nkifarn nd hingrna tafsefr hemotrnom nd hingrnefm hingrna hik marnye-wunomm. ⁶ Bro Nkifarn hingrna duka tafsefr hemotrnom, ee btn Bro Nkifrar yak dbkafmo nfri yihotoharhu mrokfot kfo pthamonomt. Nd Bro Nkifrar duka htamo nfri yihotoharhu yak dbkaf mrokfot nhai bingot Mosesr yakmo boririfhut kanjo inji yikaht. Nhai. Ndt tu Bro Nkifrarhu Yafothatn mhfnahnewutt. Mosesrhu boririfhut-pno yimam nohwom, tfit Bro Nkifrarhu Yafothatn toh nkifraniyuk yafothat thu hmbritrm.

⁷ Wadukakomt nkifra boririfhut hingrnamo yuhat. Boririfhut niamot, noheft rpat boririfhutpno fak tkafak-namot. Nd boririfhu mrokfom nmbi tahimn wandfakhato hemohat, Bro Nkifrarhu bro funa nanyjareftpno niamom. Mosesr nd boririfhu tahim wuyaknamohat, rorhu nyingatikt memom nndo marr tewur. Isrerm htimohat nyingam mmrtamomm. Kto nd nyingatikt hatohmo funeft tfit wuyak hanyomtn be minoh hmbrenimot.

⁸ Nd nkifra boririfhut niamohat, afo Bro Nkifrarhu funa nanyjareftpno niamot. Tfit arihat nd funa nanyjareft tfit bi tu Bro Nkifrarhu Yafothatpno bi rim suhnimotn Bro Nkifrarhu Yafothatpno bi tfit hingrnewut. ⁹ Rot nd noheft hnamo boririfhut Bro Nkifrarhu funa nanyjareftpno niamot. To nhai. To nd yima yuhuroh yak wuthayuk nfri yihotohar to htirfonomr Bro Nkifrarhu bbuka nanyjareft mfro hatohrfort. ¹⁰ Nd boririfhut hatoh hasomo bro funa nanyjarefr nhai yima yuhum yak wutha hnarmorm. Nhai. Ndnettn nd boririfhuthu funa nanyjarefr bi be. ¹¹ Nd boririfhut bi yohnenirott tfit bi Bro Nkifrar yak dbkafmo nfri yihotar fakrort tkitt. Nd yihotar be inji rhu nkifranirahr. Ndnettn Bro Nkifrarhu bro bbukeft nd yihotarn mfro hatohwotr.

¹² Nd nfri yihotar Bro Nkifrar yak dbkafmor hitnom tu yafotheter. Nd-netnomn nhai yakrmikahnom nd nfri yihotarhu mrokforoh kfo pthanefst.

¹³ Nom nhai Mosesr namo kanjo inji nakahnom. Mosesr inji namor, nd ror hatohmo nukeft htuyaf hanyomort bi rim noh hmbreni hanitte, rmonthat yakmorn nyingatikt thu kasimort. Duka memor, Isrerm nhai htiruhatm nyingatikthu nukeft minoh hmbreni thombat. ¹⁴ To nd yihart nhai Mosesrhu nyingatikrpat kasimort. Nhai. Isrerroh duka yima yuhum nhai dukefm yakrmoam. Tfit ariham tohwa Isrerm nd bingot Bro Nkifrar nkifram-pno yak dbkafmo mrokfothu mrokfom ritimrahmm, nhai yima yuhum yakruhatm. Duka tungunefroh nia yuham yuhre rmonthamn thu rafiwumm. Kraistrpno rim tohnhato rorpno frtkafrahm, ee btn Bro Nkifrar htihato nd duka yima yuhum hta rafiwa rmontham yak thuruhatm dukefm yakrahm. ¹⁵ To ndar yiham rom nd Mosesr yakmo boririfhum ritim nuhasneft nhai dukefm yakkahmt nd boririfhuthu yimbu yuhat. Nd rmonthamn yuhre hta rafiwumm dukefm. ¹⁶ Yima yuhum yak kekuthato tfit Brorpno rim tohnirahm, Bro Nkifrar yak thuhirahrm dukefm hta

rafiwa rmontham. ¹⁷ Na kfo yamu-kahat, “Bror,” ndr Brorhu Yafothatn kfiwa. Brorhu Yafothat yukatohrahr wom yimar, nd yimar nhai wom tamohm wom wuyak tkaftaruhatr. Bi be. ¹⁸ Yimanom, bi Bro Nkifrar hiketnom, nhai tfit Mosesr namo kanjo nmoh fnhuyet nyingatikm tfit kafrohkahnomt. Nhai. Brorhu Yafothatn nd nyingatikm hta rafomo rmonthar yak tuhato tfit nfri yima yuhum htewutnom. Nd nfri yima yuhum turhum kanjo korhm. Ndnetn Brorhu nukeft mfro mfro tanuka hasiwatt wom riruh aruhukm hti hasiwumt.

4

Nom aposerom tu dborioh gutniuskfothu yakitohyuk yima furayenom, nom bupam nyungombre hmbrita roh tambon kanjohot roh furayenom

¹ Bro Nkifrar hti yuhuwafhato hemornom nd gutnius ptha nuhasyuk hingrneft. Ndnetnomn nhai hingrna noh hingrna nohkahnomt nd hingrneftu hingrnaneft. ² Bi mong trohmonom nd fasoh yimtnayet yimtnayet nefm yimam kafrohato niwam. Bro Nkifrar nom hitwornom, nom nhai yihato yimam kfo nneh bonhehhato Bro Nkifrarhu mrokfom tfit kfo kekut bokekutkahnomm. Nhai. Nom kfo hik marnya bomarnyahato kangnom yimam nom hingrniwa hingrneft htihato yak nhtaruhamt duk mirahm, asom armn tu hingrneft hingrnewumt. ³ Yimam ndar nom kfo pthiwa mrokfot wanyhato nhai yakkahmt mrokfo yimbu yuhat, ndm bi hel yuhat bi tohetmn nhai mrokfo yimbu yuhat yakkahmt. ⁴ Ndar bbinysoft tndhrn yima yuhum hta kurhiwatrn, nhai Bro Nkifrarhu mrokfot hikkahmt. Nd tndhrn dborioh gutniuskfothu nukeft toh rafiwatrn nhai nukeft tanukakahtm rroh yima yuhum. Ndnetmn nhai Kraistr hti mikahm, arr tu Bro Nkifrar yak nhombranamo yimayer.

⁵ Nom ndar mrokfot kfo ptha htfaswat nhai nmoh mrokfotn nom tunom dukahato mrokfom kfo pthakah-nom. Nhai. Nom kfo kangnom, “Jisas Kraistr nmoh Broyer. Nom rorhu mrokfom hikwanomn kmi kmi kfo ptha htfaswanomn, nom kmi kmikmoh hingrna yimayenom.” ⁶ Bingot Bro Nkifrar kfo memor, “Yifung tayuk nukeft amfnahtwat.” To be ror kfomo yuhatn nukeft tanuka wuthamott yifungt. Nom gutnius mrokfot tafi wany juha, to inji tunmoh fasoh fasoh nefroh yifungtn tohmonom. Kto gutnius mrokfot mar nukeft kanjo niamott nom wanyhato hikmotnomt nd fasoh nefm thu trohmonom, nukeft niahato yifungt tanuka hikefiwa kanjo. Nom nukeft tohato nd Bro Nkifrarhu yuhuwafefi bbukeft hti duka tungunewunomt. Kraistr nmoh yima yuhumn htahato rorhu gutnius kakitoh kihwonomt.

⁷ Nom, nom be nd gutniuskfothu yakitohyuk yima furayenom. Bupam nyungombre hmbrita roh tambon kanjohot roh furayenom. To nd gutniuskfot nom yakitohwohat, nhai be tunmoh nanyjarpampno nd gutniuskfot yakitohkahnomt. Nhai. Bro Nkifrarhu nanyjarpampno kakitohwonomt. ⁸ Krhopam mano mano niewum. To nom nhai bi riyoh yibuknakahnom. Wonk wonk nefm yak yibukkakna thombat, nhai duka kinyaki hasokahnom. ⁹ Yimam yek-wannom faso faso kak bebwomanom, to nhai. Bro Nkifrar nhai frtrohkahnom. Yimam tataknihat tat kasuhwomanom, to nhai. Tfit sinya tohwonom. ¹⁰⁻¹¹ Yiha yiha Jisar yakmo krhopam kanjo inji kekwomanom krhopam. Jisarhu gutnius mrokfothu pthaneftpno nom tohwa yiham be nohyuk tkitt toh-wonom. Ndnetn nd Jisar tohmo toh yuham

tfit nompno yimam tfit htitmt Jisasr tohmo toheft. ¹² Nom nd nohyuk tkitt tohwatnom niko gutnius mrokfot wanukakomn hifa rhu nmbuhat yakhato toh nkifranirahko.

¹³ Bro Nkifrarhu rfa borngthu mrokfot kfo kangt, “Na bi Bro Nkifrarhu mrokfom wany yakiohato hikmoyann mrokfom kfo pthamoyann.” Nom to inji. Nom Jisasrhu gutnius mrokfom wany yakiohato hikwanomn gutnius mrokfom kfo pthewunomm. ¹⁴ Nom bi tunom tawisafwonom. Bro Nungothet Jisasr nohetr; Bro Nkifrar kasinyamorr; nom to inji kanjo Bro Nkifrar kasin-yarahrnom. Kasinyaruhatrnom Jisasr-pno mrifinyrahnom. Tfit nikomi nom rpat Bro Nkifrar yakniruharnom turpno brbo yak htarahrnom. ¹⁵ Na nd bi kfo tndhhne krhoparoh mrokfom yak hnamoam to niko gutnius mrokfot yakmo yuhat yihato nom nd krhopam fak hnamonom. To be arihat be bi Bro Nkifrar bok met yindarim yuhuwaf-watrm Bro Nkifrar kfo yindhorwomr. Inji newatm Bro Nkifrar bro yindhor nmbuhat kahukmr.

Aposerroh dukefm nd hefenr rhuyuk dborioh rhu nmbuhatn rroh dukefm yimom

¹⁶ Nd Bro Nkifrar hingrnomo dborioh hingrneft mdukakhato nom nhai hingrna noh hingrna nohkahnomt hingrneft. Nhai. Briyaha thatiprpam bi yohni hanitm tfit yiro yima rifhumio hatohwa yafotham, rom nhai. Rom yihof href yihof href bbuka sffonefm hta huta hasiwatrm bbuka sffonefm be inji korh hasiwum. ¹⁷ Ndar nom ariha yak hasiwa krhopenm nom nhai ndmn yukatohkahnom. Hifa to ndmn tfit tu toh nkifraniyet dborioh rhu nmbuhat htarahmnom hefenr. ¹⁸ Ndnetnomn nmoh dukefm nd hefenr rhuyuk dborioh rhu nmbuhatn nmoh dukefm kitm. Nhai nd nom yekwa krhopam yukatohkahnom. Nd krhopam rom be inji ariharpa rhunirahm, nd hefenr rhuyuk dborioh rhu nmbuhat rot rhu nkifranirahnomt.

5

¹ Kanga akfo nuhasanko ndar nom hatohwa thatipthu mrokfot. Ndar nom hatohwa thatipt kangme mngra kunyet. Nhai toh buhtaruhatt. Be inji toh dfikniruhatn suhhatto mikfe bdgniraht. To nd mngra kunys suhhatto mikfe bdgni thoft to tfit wom nfri kunys tu Bro Nkifrar hirahrnom. Nd kunys nhai yimamn hingrnaruhatmt, tu Bro Nkifrar hingrnarahrt. Ror hingrnetn nhai finji naruhatt, be inji toh nkifraniraht. ² Nom ndar bbinysof-thu kunys toh hhrekwanomn tfit kfo duka darwon haso kangnom be tmifnom, hefenrhu nfri thatipt hmbrihato atohnom. ³ To hefenko nhai be brioh yafotharpatpno tohruhatnom. Nhai. Tfit tu hefenrhu thatipt hmbrihato tohrahnom. ⁴ Ndar bbinysofthu thatiptpno tohwanomn krhopam yakhato bu nyingam yohni hasiwum-nom. Nhai be ndar bbinysofthu thatipthu thu hrur thoneft yihato nd krhopam yakhato bu nyingam yohnikahm. Nhai. Be kangnom yuhre yima nfri nyingetnom ndar bbinysofthu tohwa fijo hefenrhu nfri thatipt yakhato ahmbritanom nfri hmbresham yakhato hmbrita kanjo. Inji nahato ndar noheh thatipt thu hrur thuhato tfit yiha yiha toh nkifraniyuk nfri thatipt yakhato hmbrihahnom. ⁵ To ndt to bi tu Bro Nkifrar nom hingnamohat bi ndt bi duka htamort. To nd rhu nmbuhatu ruhakni yuhato to bi turhu Yafothat yaktomrt nompno hta gungonmort. To bi tot bi barkof htateh minghat htamort. To bi inji yiyaknitahat to be Bro Nkifrar hirahrnom ror kfoytayuk shrm.

⁶ Nom ndroh dukefrpno nmoh toheft toh bmtewunom. To nom nda thatiptpno ndar bbinysoft tohwohat nhai bi Bro Nungothetpno rorhu kmit brbo tohkahnom bi. Nhai. ⁷ Be inji afo wuri tohhato be dukefrparpno Bro Nungothetrn duka duka tohwonom, nhai bi yima mif nyingaye htikahnomr. ⁸ Mrokfot to bi kfiyant. Yima yuhur ror tor korhr. Ndnetnomn kangnom ndar thatipt nohhato htanykahnomt, Bro Nungothetpno tu kmi mnako amtoh nkifraninom. ⁹ To ndnetnomn nom wur kmi mnako tohneft o asha tohneft nom yiha yiha Bro Nungothet hti yindhorwa nefm na hasokfot. ¹⁰ Ndt nhai be sfno inji kfokaha. Kraisorhu kotkfot toh bugarahnom. Nd kotkfotn nom thatiptpno tohhato niwa dborioh nefm o fasoh nefm yak nhta-ruharomn ttha nhombra hanyrahrom.

Yimam yakhato Bro Nkifrapno rimak hta yuhat

¹¹ Nom to nd kotkfotpno yakrmi-tanomn kangnom wom met yindarim gutnius mrokfom ahikahtnomn Kraisor hikrahm. To nom nd gutnius hingrneft hingrna thombat nom nhai wom dukefrpno nd hingrneft hingrnakahnom. Nhai. Bro Nkifrar hti mifworm nmoh yima yuhumi dukefm. Niko Korinko to hti hnewukmnom. Nom nhai ndar hingrneft tohhato wom yiha nikompno yihato mfrnhehrmonomko. ¹² To mirahko ka be kangnom inji akfokah-tnom niko wanyruhakomn nom hingrnawa hingrnef yuhat kfo yindhorrahkoto. Nhai. Nom nhai inji dukahato kfokahnom. Be kangnom nom hingrnawa hingrnef yuhat akfo nuhaskahtnomko niko bi wanyrasahko. Wanyсахato wom yiham wom yimam be briahako yimam niwa nefrpam htihato kfo yindhorwamn, nhai tu yiro yima rifhum mfrfnahnyuk nefm htihato kfo yindhorkahm, tfit nikomn tohhato nompno htita yiro yima rifhum mfrfnahnyuk nefm kfo nuhashirahkomm. ¹³ Womm kfo kangmnom nom hingrnawa hingrneft hingrna mumiwunomt. Nhai mrokfom. Inji akfo hanyomn. Nom be kangnom Bro Nkifrar hikhato rorhu hingrnefm ahingrnanom. Nhai hingrna mmokah-nom. Niko dukahato nom hingrne-wunom. ¹⁴ Nom nhai be sfno hinger-narfotnom. Kraisor nmoh rhu beb nmbuhat yuhuwafhato hti dukamort. Hti dukahato nom met yindarinmoh nohyuk tkitt rorpar yakhato nohmort. Nd ror nohmo yuhatn nmoh fasoh yatk yima yuhum bi minoh nhehafmorm. Nom ror yuhuwafhato nohmo yuhat htihato nom ndtn kasinyewutnom ndar hingrneftu hingrneft. ¹⁵ To be bi nd yimarn bi nmoh tkitt nohhato tfit sinyamor. To nom frohnom yima yuhum ror dukahato yauwanom, to nhai nmoh yima yuhum tfit tunmoh dukefr hikhato yaukfot. Nhai. Be rorhu dukefrpar dukahato yaukfot.

¹⁶ Ndnetnomn nom nhai ndar bbinysoftu fasoh yatk yima yuhur hikhato yimam nayuk nefm yukatoh-hato hti kebokthikahnomm. Nhai. Rot barkofpam afo ndar bbinysoftu yatk yima yuhur tohetnomn Kraisor nefm hti kekut hti kekutmonomm. Tfit ariham bi nfri yima yuhumpno yorhwanomn nd fasoh yatk yima yuhum fahomonomm. ¹⁷ Ndnetn fitoh yimar Kraisorpno frtkafwor, nd yimar bi nfri yima yuhurpno korhr. Yatk nefm bi be mifn. Bi tfit nfri nefm mfrfnahwom.

¹⁸ Tu Bro Nkifrar inji kak htewur-nom. Nom bi barkof toh hnamo yiham, Bro Nkifrapno nhai bi inji yak nanyama hnarmornom. Be inji narhu mong narhu mongmounom. Kto Kraisorpone ee gbhu mtir rorn hnamorr. Nd yiha Bro Nkifrar rifak marnyakmornom. Riyak marnyakhato tfit nomn kfo tkrurmor wompno yi kfohato Bro Nkifrapno nayak nany-maneft. ¹⁹ Nom

kfo pthiwa mrokfote inji: Kraistr nohhato sinyamotr be Bro Nkifrar inji htihatoto be nd yiha yimam yakitoh hawihnamo fasoh fasoh nefm rimong trohakhato rifak marnyak-morm. Nomn nd kfo nuhas mrokfothu kfo duka htfasyonom htamornom. ²⁰ Ndnnetnomn nom Kraistrhu tkitt yakhatoto kfo nuhas htfaswonomm yimam. Bro Nkifrarhu naku tngt nmoh tngmn mrhuhato nakutrm yimam. Kraistrhu mrokfom kfo hany kangnom, “Nd Bro Nkifrar pno narhu mongwa nmbuhato be tmifko wayafhokahkomt, Bro Nkifrar pno nayak marnyahato rpa yima yuhur warhuko.” ²¹ Tu Kraistr nhai wom fasoh neft nahato nohrmor. Nhai. Bro Nkifrar nomn dukamor. Nom dukahato tfit nom nayuk fasoh fasoh nefm tfit yakhatoto Kraistrn thutamor. Kraistr tfit fasoh nefm nayet yimam kanjo nd fasoh nefm thu kasimomr. Bro Nkifrar memor inji anakahta, nom Kraistr pno brbo frtkafhato ror hingrnayuk hingerneft pno Bro Nkifrar hti wutharhrnom.

6

Aposerm bok krhopam fakmomt aposer hingerneft

¹ Nom Bro Nkifrar tohnhohato hingerneft yakitohnuhiwanom, bro mrokfot kfiwunomko. Kraistr nohmo yuhato niko Bro Nkifrar yuhuwafmorko. To tfit mirahko hus dohfn atohnom. ² Bingot Aisaiarpno Bro Nkifrar kfo memor,

“Nikmoh nrfa hbhakhato yak marnya yihar bingot bi kfo htamoyanr.

Tu nd yiha mif naku kfmokone ee nikmoh naku tngm wanymoyanm.” *Ais* 49.8

To wawanyko. Nom ndar yiha tohwa yimanmoh yak marnya yuhato to bi ndar yihamn Bro Nkifrar kangr, ayak marnyayanko yo ndar yihamn kangr, anra hbhakanko.

³ Nom nhai wofnkahnom nom ndar hingerneft tohhato nomn wom fasoh nefm nahato o wom mrokfo bebm tuhato tfit yimam ndm htihatoto o wanyhato tfit ginyetm kanjo mongthur mongthur yikfot. Nhai. ⁴ Nom Bro Nkifrarhu hingerneft yimanom kanjo tohhato nmoh toh nmbuhato be yak teh marnyakfot. Tamoh tamoh krhopam nianeft o yakneft o finjina finjina neft toh bmtakfot. ⁵ Yimam tat nohakhato kalabus htewunom nom yo yimam yahr hmbritatnom, nhai yifungm hwekahnom yo nhai rim fnahni mfnahnihato tamohm yak mskakahnom. ⁶ To nom inji htihatoto nom nhai mekahnom, tfit wanambur sinyahato kfo huttrahnom. Nhai. Dborioh duka yima yuhumpno hifa hifa nefm kak nuhaswonomm. Tu Bro Nkifrarhu Yafothat tohnuhiwatnom ndhet dborioh nefm newunom. ⁷ Nom tu tpiyet mrokfom kfo pthewunom. Bro Nkifrarhu bbuka nanyjar rifhur korhrnom. Yo tfit nmoh dborioh nefm wohn rikati kfrat kanjo yakitohwanomn yahrthu kfra inyarut frdbfewunomt.

⁸ Womm nmoh yufam kfo yindhoro-womm, tfit womm kfo kangm, “Tamohmpno kfo yindhoro furaruha-nomm?” Womm kfo yindhoro htfaswomt nmoh hingerneft, tfit wommn kfo kangm, “Nheno, rroh hingerneft fipa duhatet.” Womm kfo kangmnom, nom kfo pthiwa mrokfom kfo fura bofurewunomm. To nhai. Nom pthiwa mrokfom kfo mifwonomm.

⁹ Nom hingernewa aposer hingerneft nhai yimam hti duka mekahn, “Arm aposerm.” Nhai. Yima furam kanjo inji htittnom. To nhai, tom bok yimam htittmt ndar nom hingernewa hingerneft aposer hingerneft hingernewunom. Ar nohyuk tkitt bi tohyuknom, to nhai. Nom asonom tohwonom.

Ar yimam tat noh bonohetnom, nhai nohkahnom. ¹⁰ Ar yima yuhum nur dungunangunirahm, to nhai. Tfit yindhor yima yuhum tfit niewum. Nom ar wom womroh toh nmbuharpas yak marnyahato rom hifa rhu nmbuhar rhuhato nom tfit fasoh rhu nmbuhar rhuneft, to nhai. Nmoh rhu nmbuhar Bro Nkifrar kfatohwort.

¹¹ Niko Korinko, nmoh yima yuhum rhuyuk dukefm to bi kfo nriyaf bugamotnomm wanymokomm. Niko nmoh marbimn korhko. ¹² Mirahko ka romn nhai yuhu mongikahmnom. Nhai. Niko tukomn nhai nmoh yima yuhur rhukahko. ¹³ Yifemr sinyahato yonm mrokfom yahuka kanjo bi inji mrokfom kahukanko. Niko to inji nom nikompno niwa kanjo inji wanatwakmnom. Nikmoh yima yuhum nomn arhu bugatwam.

Nom Bro Nkifrarhu tohyuk kunyenom

¹⁴ Niko mirahko Kraisrhu mrokfom wany yakiohato hik duha yimampno anabnot htfasnom. Rroh nefmi nikmoh nefm nhai rpat niyak tkafkahn. Nhai. Rom nndoh nefetem. Nhai dborioh nefti fasoh neft rpat nabnotkfot. Nhai marri yifungit rpat nabnotkfot. ¹⁵ Tone Satanri Kraisre ka rpat tohhato nabnotwof? Kraisr hiket yimari Kraisr hik duha yimar ka rpa yima yuhur tohwof? ¹⁶ Tone finji kanjo Bro Nkifrarhu temperrri tahi rmonm rpat yak htakfot? Nom to toh nkifraniruha Bro Nkifrarhu kunyenom. To bi tu Bro Nkifrar bi kfo memor;

“Isrerm tom tu nanhu tannefenm.

Na toya rompno tohhato rompno ye wussoh htfasruha.

Na kfo bruttna hakurahma rroh Bro Nkifraya kanjo.

Rroh fitoh rim yau myau yuham yo tamoh nefm rom nayukm,

na toya yukatoh hakurahamanm.”

Wkp 26.12; Ese 37.27

¹⁷ Ndnnett Bror kfo kangr,

“Waftrnahko. Waftrtroh tanykah-komm nndo turpako watohko.

Fitoh yemrom o tamohm Bro Nkifrar wofnkahr niko tir htaneft o yanyeft, to be nyingarpaye yukatohkfot.

Inji naruhato tfit nann yakmiyakruhanko.”

Ais 52.11; Ese 20.34

¹⁸ “Nann yifemhato nanhu yonko rhurahko.

Tu yura myorhekwa Bror inji kfiwur.”

2 Sml 7.14; 1 Sto 17.13

7

¹ Bar yinouroko, ndar Bro Nkifrar nmoh rhu nmbuhar dukahato kfo htamo mrokfot, nom to bi ndtn bi korhnom. Ndnnett ndar nom hatohwa thaptit niwa fasoh nefm yonm hatohwa fasoh yima rifhur yak was bowus marnyakahtnomr nmoh toh rawofm Bro Nkifrar hti wutharahm. Yo nom Bro Nkifrar duka yakrmihato be rorpno rim tohni bugahato tamoh tamoh nefenm yafho bugahato be dborioh rhu nmbuharpas rhukfot.

Korin thofm nahnamo fasoh nefm mong trohmotmm Porr htihato yindhormor

² Wayakmiyakkahkmnom nikmoh yima yuhumn wayak htakmnom. Nom nhai wom yimar yak bebrmonomr. Nom nhai wom yimar Bro Nkifrar hik hanyetr tfit nom mtohnihato tfit rorhu yima yuhur frtmbhomonomr; o wom yimar kfo nhehhato rorhu marum o tamohm yak hermonomr;

³ Mrokfom na inji kfiwohat na nhai kfo wok kanjo mrokfom inji kfokahanm. Nhai. Bi kfo memoyanko, niko marbit hteuwonomko. Nhai mong htaruhat-nomko. Nohnefrpatpno mduka muma-fonirahnomko. ⁴ Na bi wanymoya

niko Bro Nkifrarhu mrokfom hikwa yuham. Nikmoh toh nmbuham hifa yitadm na tu bro kfo yindhor nmbuhat htiwanko. Na tamoh tamoh krhopam yakneft nhai mekaha ndmn yukatoh-hato yima yuhur krhorahr. Nhai. Nanhu yima yuhur tfit niko duka yo niko Bro Nkifrarhu mrokfom hikwa yuham dukahato yima yuhur miyorh-warn tfit yindhor yima yuhur niewura.

⁵ Nom Masedoniako yimohat nhaf nhai rhu marnyarmonom. Be krhopam mihamuhmonom. Fitoh fitoh tkitm yimounom be krhopam fknihato yakrme yima yuhumpno rhu htfasmounom. ⁶ Tu hifa Bro Nkifrar kak marnya bomarnyewurm krhopampno rhu haset yimam. Ndnnetn nd nmoh krho yima yuhum rhu hasoyukm, hifa Bro Nkifrar kasinyamotr Taitusr; rorn niahato ror hnayuk mrokfom nom wanyhato be nmoh yima yuhum mirhumom. ⁷ To nhaf nhai be ndrpat-pno nmoh yima yuhum mirhurmom. Nhai. Womt Taitusr kfo memornom niko Taitusr nikmoh tirmn rhumor. Nom ndt kfo nuhasmotrnom nom wanyhato yima yuhum mirhumomnom. Yo kfo nuhas memornom nikomi na nafrtrohmo yuhat tfit kangko aniekaht nakfo dbruf nuhasrahnom. Na inji wany moyann nanhu yima yuhur mfro yindhormor.

⁸⁻⁹ Na tuka htimoya nd na bi barkof wandfayuk gontwathu mrokfom htihato krhomoko yo yimtnamoko. Na ndtpno afo duka krhomoya. To tfit arnat na tfit yindhorwa. Nhai nd krhopam hemo yuham htihato yindhor-kaha. Nhai. Niko nd krhopami yimtna nmbuham yakm, ndmn yima yuhum rihingrnahato nikmoh yima yuhum fak kektm. Nanhu yima yuhur ndmpno yindhorwor. To nd krho nmbuhami yimtna nmbuham ndm tu Bro Nkifrar htamotrko ndmpno niko yima yuhum tfit fak kektm. To ndnetn na kfoyuk mrokfom nhai nikmoh yima yuhum yak bebrmomko. Nhai. Nd krhopami yimtnapam rhu tefinihato tfit hifa nmbuhat mfnahmot. ¹⁰ Tamoh tamoh krho nmbuham o yimtna nmbuham Bro Nkifrar yahukam nom ndm mhtiyekwanomn fasoh nefm mong trohwonom. Inji newatnom Bro Nkifrar tfit kekwarnom. Ndt tu hifa nmbuhat. Ndar bbinysofthu yimamn ndhtet krhopami yimtnapam yakhato fasoh nefm nhai mong trohrfomm Bro Nkifrar nhai yakruhatm. ¹¹ Niko waduka hikkomm nd krhopami yimtna nmbuham Bro Nkifrar tfit finji yak htafmorm. Nd krhopami yimtna-pam niko yakm memoko, nom ndm harhuruhatmnom Bro Nkifrar wom nefm narahnom. Nd dukefrpno tfit niko sinyamokomn niko harhumo krhopam fak nohmokomm. Yo nd yimtna nambur nmbuham niko harhumom tfit yimokomn nd fasoh neft nayuk yimar kfo huttmokomr. Ndt hifa nmbuhat namoko. Ndt kangko tfit nom ahtinom. Nd dukeftpno mrokfom yak nohmokomm yo nd yimar kfo huttmokomr. Ndt htitnomt niko bi nhai wom mrokfo duhateko.

¹² Na ndwom gontwat nikompno wandfamohat nhai nd fasoh neft namo yimarhu mrokfo kfoneftn wandfarmoya. Yo nhai nd fasoh neft yakmo yimar dukahato nd gontwat wandfarmoya. Nhai. Na nd gontwat wandfamohat, nanhu dukeft duka memoya, akfo-kahtanm nanhu mrokfom hikhato nd fasoh neft namo yimar kfo huttruhatmr nd rom nayuk neft Bro Nkifrar htirahr. ¹³ To be nd niko namo nefmn nom wanyakhato nd krho yima yuhum nom yakitoh hasomom be yohnemom. To nhai be ndrpatn, womt Taitusr yimo dukefr wufakmokomr yo fak marnya bomarnyamokomr, ndm tfit mkfo nuhasmotrnom nmoh yima yuhum mirhumom. ¹⁴ Bi barkofpam bi Taitusr kfo yindhor nuhasmoyanr nikmoh dborioh dborioh nefm. To tfit

ror nikompno yihato tfit niko nd dborioh nefm yak nuhasmohat, na nhai tfit wom yimtnefm rhukahma. Na kfomo mrokfot tu kfo mifkfot kfomoyanr. Be fasoh nefm ayak nuhaskomr, o be nann bro yimtneft niarfot. ¹⁵Taitusr yuhre duka hanitrm nikmoha yihato niko yakrme yima yuhumpno yakhato rorhu mrokfom hikmohat. Nd dukefr yak thoft masat dukewurko. ¹⁶Nanhu bro dukefr duka kanga ariham niko be dborioh nefrpm na hakurahko, ndnetann na bro yindhoreftpno korhwa.

Judia Kristenm hayuk maruham Korinm bi yak htata hanykfot

8

(Sapta 8–9)

Judiakorhof Kristenm hayuk he marufat fak nhafohmom

¹ Bar yinouroko, kanga Masedonia profins yorhwa sios niwa nefm akfo nuhasanko. Rom Bro Nkifrarhu tu yima yuhuwaf yuhat kak hik marnya mifwomt. ² Rom tu bro krhopam fakmom. Nd yiha be inji marufen yeshriyen duha toh furatamom. To rroh toh nmbuhat inji tohmohat nhai duka marimom, “Nom rhu bebwanomn to fitha maruham yakhato wom Kristenm hiruhanom?” Nhai inji dukarmom. Bro Nkifrar yindhor yima yuhum hemotrm marut yindhortpno yindhort-pno yak yakmomt Kristenroh yufatpno hta rmonmomt. ³ Kfiwanko, marut htamohat nhai tu hayuk thomnafat hta hanyrmoam. Yima yimam be turoh yindhor nmbuhatn bro bro marufarpat hta hanymoum. ⁴ Tum nompno nia-hato yihof href yihof href kfo hatoh-moumnom nom kfo yakio mrokfot hihato marufathu yak nhafohhato wom sios htayuk marufatpno thu hmbrehato Judia profinshu Kristenroh hanyeft. ⁵ Nom memonom, ka nhai inji hta hanyruhatm. Nhai. Barkofpam afo Brorpno rroh yima yuhum htahato kfo bruttnanimomn tfit Bro Nkifrar yima yuhum kasinyamotrm maruham hta hanymommm.

⁶ Nd Judia Kristenroh yuhuwafhato he marufathu hanyeft, Taitusrn nikompno tohhato nd dukefr mhfnah-namorr. To be ndnetn tfit mfro kfomonomr tfit nikompno yihato nd marufathu yak nohhato Judia Kristenm hanyheneft. ⁷ Niko niwa tamoh tamoh nefm niko dborioh dborioh nefrpm newuko. Bro Nkifrar kakitoh bmtewukomr. Yakitoh bmtahato Bro Nkifrar hikwa hikeft kfo nuhaswokomm womm. Bro Nkifrarhu mrokfot niko tawisaf marnyewakomtn yima yuhum yindhorwom Bro Nkifrarhu hingrnfethu hingrnanefth yo nom be nikmoh yima yuhumn korhnom. To be nd yuhatn Judia Kristenm yuhuwafhato maruham yak nhafoh marnyahato hekfot.

⁸ Na nd Judia Kristenroh maruha hanyeft kfiwohat nhai be kfo tkrur mekaha wahitwakomm. Nhai. Be kanga Masedonia Kristenm inji akfowonkahann htiruha yima yuhum sinyaruhamn Judia Kristenm hti dukarahmm o nhai? ⁹ Nmoh Nungothet Jisas Krairhu yuhuwafeft bi htimokomt. Niko duka tanyhato hefenr tohmao dborioh rhu nmbuhat wuhtanymortn fawihnamor. Yawihnehato tfit ndar yima furanom tohwa kanjo inji toh mmbrafinysamor. Nom yimanmoh rhu beb nmbuhathu yak marnyanefth yihato tfit yimanom kanjo tohmo.

¹⁰ Nd niko yak nhafohwa maruhathu dukefrn kanga nanhu wom dukefr akfo nuhasanko. Nd maruhathu hta dukefr bi ndwom gunyjimrn riduka gngonakmoko. Nikomn nd dukefr wapthakhato nikomn barkof maruhat hta gngonmokomt. ¹¹ To be arnatn kanga nd maruhat wayak nohafokomt. Bi bro yindhor yima yuhumpno nd maruhat rihtakmokomt tfit bro yindhor yima yuhumpno wayak nohafotwakomt. Tukmoh maruham yak nhtahato kangko finji finji ahtanom to be inji hta hanykfot. ¹² Yima yuhur wayindhor sinyahato Bro Nkifrar hayuk shrm Bro Nkifrar wofnhato kekworm. Bro Nkifrar nhai hti tmanyhiruhatr n yima myak kkopenakhato finjirpa hta hanyeft. Yindhor yima yuhurpno hayuk shrm Bro Nkifrar nhai tfit hti manyehato ninhu nefm yak nhtakfot.

¹³⁻¹⁴ Na nhai mekaha wom kmim yakyuk krhopam womrpakomn titaheaktomm rom rhu marnya nmbuhat yakrahm. Na nhai inji dukahato kfokahanko. Nhai. Na kanga womm bi myak kkopenekwom, niko thu hmbrehekfot. Tawo niko myak kkopentarahko, tawo rom thu hmbrehirahmko. Krhopam tawo tawo nahti duka nahti dukahato niko tuko Kristenko maruhet bugako rhu bugarahko. Nhai womr mfro harhukfot yo nhai womr be tu sfnopa mifr rhukfot. ¹⁵ To Bro Nkifrarhu rfa borngt kfo kangt,

“Bro Nkifrar manat thu brurhato yimam yak hutuhamohat tum nahti nhtamom.

Nahti nhtahato nd yimam mfro mfro yak hutuhamom nhai womm yak furarmomm.

Yimamn nhombrahato mfro fakmom.

Yo nd dfikpam yakyukm rom nhaf yimamn nhombrahato dfikpam fakmom.”

16.18

Kis

Porr yimam kfo tkrurhato Korinko yimo yuhat

¹⁶ Taitusr nikompno yi hanyuk yima yuhur sinyewatrr na Bro Nkifrar kfo yindhorwanr. Taitusr nmoh dukefr hikwor. Bro Nkifrar yima yuhur hemotrr ror yibonwor nikompno bi yi hanyhato maruha yak nhafoh mrokfot bi kfo hanyhato maruhat bi yak nhafohtha hanykfot. ¹⁷ Nikompno tfit yinyeft kfo ttiwonmotnomr kfo fakiomor. To nhai be nmoh kfo ttiwon nmbuharpatpno yibonrmor. Nhai. Ror to nikmoh yi hti dukefr bi ruhetrn to be kfo ttiwonmohat be kfo fakio twanhomom yinyeft. ¹⁸ Tor wom yimar hik hnerahrr. Nd yimarhu gutnius kfo ptha htfasneft awi hifa. Kmifa kmifaroh siosm kfo yindhorwomr. ¹⁹ Yo nhaf nhai be ndrpatpno. Nhai. Asharhof siosm rorn kfomom nompno rpat yi htfashato maruha yak htfashato Jerusalemn hanyneft. To nmoh yima yuhum yindhor mifwom Brorhu dukefrn hikhato Judiakorhof Kristenroh maruhat yak nhafohaknihato hanyhe-neft. ²⁰ Nom wofnkahnom yimam hta nhafohwa he marufathu mrokfothu titanef, ndnetnomn ndar Kristen bratar fakmonomr. Tamoh mrokfom mfnahneft rorn tohnhorahrnom. ²¹ Nmoh bro dukeft duka kangnom nom hingrnayuk hingrneft mfrfnah marnyakfot. Nhai be Brorhu nyinga-rpampno hingrneft yi marnyakfot. Nhai. Met yindarimpno nom hingrnayuk hingrneft yi marnyakfot.

²² Yo tor wom Kristen Kristen bratar Taitusrofpno niayukr. Nd yimarhu hingrneft bi hti nhombramonomr tu mfro hingrneteter. Nd yimapenr yima hingrnanhoneftm be inji korhr. Rorhu bro dukeft duka kangr

niko yak nhafoh mifrahkomt nd maruhat, ndnetrn ror yibonwor niahato hingrnanhoneft.* ²³ Taitusr nanhu toh tamnou yimayer yo na nikompno hingrnewa hingrneft hingrnanuhiwa yimayer. Yo ndwom Kristen brataf rof Kraistr mdukakhato rofhu tohefm toh marnyewuf. Asharhof siosroh yufatn rof nierahf.

²⁴ Dborioh dborioh nefm nd yimam wayak nuhastwakomm. Nikmoh dborioh nefm nom kfo grha htfas-wonomm kmi kmim. Ndnettn nd yimam niayukm dborioh nefm wayak nuhas-kahtkomm rroh siosmpno kfo mirahm, “Nd kmiroh dborioh nefm nom wanu-kam bi tunmoh nyingaye htimonomm.”

9

Kristenroh he marufathu htahe yuham Porr kfo pthamorm Korinm

¹ Bro Nkifrarhu met yindariorh he marufathu hta nhafohhato hayuk marufathu mrokfot bi kfomotant wanymokomt, ndnettn nhai tfit wompam kforhotant. ² Htitanko niko yima hanyeft be inji korhko. Na tuka bi htiyetann Masedoniampno nikmoh yufam yura htamoyanko. Kfo memoyanm, Akaia thofm nhai ar yihof Kristenroh hayuk he marufat rihtakromt, bi nd rim nohnimo gunyijimrn bi rihta nhafohakomt. Inji kfomota Masedonia thofm wanyhato rom maruha rihtakmom.* ³ To niko Korinko wahtiko nikmoh yufam kfo yindhor htfaswanm. To na nhai wofnkaha nikmoh yufam be kfo yindhor fura htfasneft. Na kanga nikmoh yima hanyeft tfit turoh nyingaye ahtimt. Nd dukeftpno maruha yak htfasyuk Kristen bratam nierahm. Turoh nyingaye htiruhamn kfo mirahm, “Awi, nom wanymohat asot nd nefi bi tunmoh nyingaye htitnomt.” ⁴ Nanhu bro dukeft htitanko nikmoh maruhathu Kristenroh he nmbuhat, ndt mrokfo duhatet, htarahkomt. Tmift nani Masedoniakorhof yimampno bi rpat nianeft afo duka krho hanita. Kanga bi miruha bi rpat aikahnomn maruhat yak htfasnomt, tfit mhtirahnom tafi htata duhattn, be nd tkittn nikomi na bro yimtneft yakrahtnom. ⁵ Nd dukeft-pno maruhathu yak nhafoh mrokfot bi Kristen bratam tohak hanyhato kfo hanyrahmko. Kto na nianeft, nd nanpno niayuk yimam htirahmt marufat bi yak htatettn. Nhai be yima kfo tngtpno htaruhatkomt. Nhai.

⁶ Nkifra mrokfot wamdukak hanyswakomt: Yima yewurit mfro mfro htarahn, yewurit mfro mfro sinyaruhatt yohet kpet yakrahn. Yima be inji dfik fanenf nuhtarahn, to be nhai mfro yakruhatn. ⁷ Ndnettn niko tuko rhuhatto yak nhtakfot afo. Tu yindhorwo hanyeft, ee btn hekfot. Mirahn krho yima yuhurpno htahato tfit akfo amiya, “Be yimaroh kfotpno marufat hteyant, nhai be tukanaha yindhor yima yuhurn htarfoyant.” Ndhitet dukefmpno yima hanyeft ndt Bro Nkifrar nhai yindhorkahrt. Yind-hor yima yuhumpno yima hanyeft Bro Nkifrar yindhorwor. ⁸ Nd yindhorpampno Bro Nkifrar mikaht athu brurhi-yanko, nikmoh rhu nmbuham nhai wom tamohm yak nafruhatko. Mfro mfro harhuruhakomn wom womt hti duka hanyrahkomm. ⁹ Nkifra mrokfot kfohna memom, “Yimar, wuskapa duha yimampno rorhu tamoh tamoht thu brurwort, nd yimar Bro Nkifrar nhai mong htaruhatr ror nayuk dborioh nefi. Yiha yiha Bro Nkifrar

* **8:22:** Hus yimaf Taitusrpno yiyukf, Porr dkfomof nhai yufam yutarmorf Porr. Womr ves 18-20 kfomorr, yo tfit womr ves 22 kfotn kfomorr. Nd yimafnu yufam nhai yutarmorf. * **9:2:** Taun Korint Akaia profins korht.

yak marnya hasorahr.” 10-11 To nd Bro Nkifrar yimam yewuri tpm hihato mswirm trufwam yo yeshrim hihato yeshri yewam, to nd Bro Nkifrar wuskat, marut, tamoh tamoh mfro mfro thu rmonhiruhatrko mfro harhuruhakomn, wom Kristenm tfit hti dukarahkomm. Nd niko nmoh tirmn htayuk he marufatn wom Kristenm htihakruhamtn Bro Nkifrar mfro mfro kfo yindhorrahmr.

12 To ndnetn nd niko htaheruha marufatn wom Kristenm yak hiruhatmm nd marufatpno nhai wom yak kkopentaruhatm, yo womt, nd niko hayuk marufat htiruhamn Bro Nkifrar mfro mfro kfo yindhorrahmr. 13 Wom Kristenm marufam yak hiruha yuhatn nikmoh dborioh neft kfo ptha bro mirahm, “Nd kmim tu yima hayet kmiyem.” Kfo tndh mirahmko tu gutnius mrokfot kfiwa yuhat tu kak hik mar-nyewukomt. Yo niko Jerusalemko tohyuk Kristenm thu rmonhiruha bok maruham yo wom riruh aruhyuk Kristenm thu rmonhiruha maruham yimam htiruhamn Bro Nkifrar kfo yindhorrahmr. 14 Kfo mirahmko, Bro Nkifrarhu yuhuwafest be tu niko mif korht. Inji kfohato rroh dukefr be nikomn rhuhato Bro Nkifrar kfo brutnarahmr nikmoh yak marnyaneft. 15 Bro Nkifrar nom tu bro neft namornom nom ndar bbinysof thofnom. To nd ror namo yonmari neft to finji kfo ptha hikkfot. Nhai. Nom be Bro Nkifrarparhu kfo yindhor nmbuharpot kfo yindhorkfot.

Wom yimam Porr faso kfomotmr tfit Korinm namburmotmr Porr, tfit Porr Korinroh yima yuhum fak marnyamorm*

10

(Sapta 10-13)

Bro Nkifrarhu hingrneft Porr dhingrnamaot yimam memoum ateh brufakahnomt ais, tfit Porr mtone rafak hanymour

1-2 Krairhu noh hmbre yima yuhurpno na Pora mrokfot kfiwanko. Mirahko na kfoyuk mrokfom awany marsisanomn. Wom yimam kfo wok kangma, “Porr be bbinysofthu yimam kanjo turhu rhu nmbuhat dukahato hingrneft hingrnewur. Rorhu neft inji htitwonomr, nompno tohrahmr nmoh nyingampno rorhu mrokfom kfo marnya bomarnya, yak marnya bomarnyarahrnom. Tfit wuri tohwo, rorhu mrokfom kaht kanjo kurwom.” Inji kfiwuma. Wawanyko, na nia thoft inji kfoyuk yimam afo kaht kurnirahm. Na mirahko kfo ddiwur. Afo kaht kur gnngirahm. Niko awi nhai kforhotanko. Mrokfo kfoyuk yimarpam afo htiruhamn. 3 Rot to bbinysoft tohwonom, to nom Kristenom nhai be ndar bbinysof thofm kanjo yahrt tohneft rika kfra inyarut myaknihato nnakahnom. 4 Nom yahrt tohhato yakitohwa kfra inyarut nhai ndar bbinysofthu kfra inyarut kanjohot kfra inyarut yakitoh-kahnom. Nhai. Nom yakitohwa kfra inyarut bi Bro Nkifrarhu kfra inyarut kakitohwonom. Yahr kmim tu hmbre-neft

* 10:: Mrokfom sapta 10-13 yorhwam nhai 2 Korinthu wom saptam yorhwa mrokfompno niyak tkafahm. Nhai. Sapta 9 yorhwa mrokfom htirahnm Porr kfoyuk mrokfom afo kfo yindhormorm Korinm, tfit sapta 10 htirahnm Porru mrokfom tfit nnuhato Korinm kforahm. Ndnnetn ndar Bro Nkifrarhu rfa borngt yorhwa yimaroh mrokfom hti hik bohiket yimam inji hti nhtahato duka memom nd sapta 10-13 yorhwa mrokfom Porr wom nndoh yiha wandfamo wom nndoh gontwathu mrokfom yaknomn tfit ndar gontwatpno rpat rihtaknomn.

nhai wom hamuhkahn. ⁵ Nom tohhato nd yimam yakitohwa nd tamoh tamoh fasoh riduka aduka yima yuhum kak thuwonomm yo yimam Bro Nkifrarhu hik dukefr wuteh nhirtewa fasoh dukefr kak thuwonomr. Yak thuhato tfit nomn Krairspno hik yuham kfo tebos botebos nuhaswatnomm nd yuhat mhikaknitm. ⁶ Nom afo nikomn yukatohrahnom, nom kfoyuk mrofkfom htinomko bi hikwokomm, nom be nd mrokfo hany-jbornet yimarpamn yak gnggtatrahnom.

⁷ Niko nhai yimam nayuk nefm htihato yak nhta marnyakahkomm. Yimar tur hti nhombra yak nhom-brakfot. Tur yak nhombrahato duka kangr, “Na Krairspno bi rim tohnmoya.” To nd yimar tfit adukatwar, mirahr ka be nanrpaya Krairspno tohwa. Nhai. Nom to ror kanjo nom bi Krairspno rim tohnimonom. ⁸ Niko Jisasr yaki-tohwa nmbuhat nomn Bro Nungothetr kfomor nikmoh kfo bmta mrokfo hanyeft. Nom nhai mtohnhato niko Jisasr hikwa dukefr tfit kfo wok bowokkfot. Nhai. Ndnettn na kanga kfo yindhorhato nmoh yufa yufam yura ahtayanm, nhai mrofkfom. Na nhai myimtnak hanyrhota. ⁹ To mirahko nd na wandfiwa gontwam ka be nikmoh kfo yakrmeyuk gontwamn wandfiwa. Nhai. ¹⁰ Rot womm kfo kangma, “Porr wuri tohhato gontwaye htafyuk mrofkfom nnhu nnhuhato mrofkfom kfiwurm. Tfit yima tnge yima nyingahato kfoyuk mrofkfom wanyrahkomr noh hmbrenano mrofkfom be inji kfo mmbrafiny bommbrafinyrahm. Mrofkfom nhai wany fugharuhatkomm.” Inji kfiwuma. ¹¹ Nd yimam ndtset mrofkfom kfiwam ka nhai dukef duhatem? Nom gon-twam htefiwa mrofkfom yo yima tnge yi kfiwa mrofkfom nhai tfit ndo ndo kfokahnomm. Ndnettn nom wuri tohhato gontwamn htafmo mrofkfom, nom tfit nia thombat nd yuhatn kfo hikrahnomm.

¹² Nom nhai kfo miruhatnom nom nd yufa yura htet yimam hingrnawa kanjo nom inji hingrnawunom. Yo nhai kfo miruhatnom nmoh nefm rroh nefm kanjo korhm. Nhai. Rom niwa nefm duka tungunef duha yimam kanjo inji na mmo bamumiwum. Tum hingrnawa hingrnefrpam yuka-tohhato kfo kangm, nomrpanom hifa hingrna marnya ptha marnyanom.

¹³ Nom nhai tfit wom tamohmn kfo yindhor furakfot. Nom Bro Nkifrar kfo htayuk hingrnef yuhat nom htihato kfo yindhorwonom. To nd kfo hta nuhasmo hingrna yuhat to be bi niko Korinkom-pno mfnahmonom.

¹⁴ Nom nd gutnius mrofkot hnehna hnehnahato nomn nikompno mfnah gungonmonomt. Ndttn kfo yindhorwonomt. ¹⁵ Nom nhai mekahnom nomrpanom nikompno yihato hingrnamonom. Nhai. Kto nmoh mongkorn tfit womm nikompno yihato hingrnamonom. Rroh hingnefm nom htihato yindhorwonom. To nmoh bro dukeft duka kangnom gutnius mrofkfom akfo nuhas marnya bomarnyakahnomko Krair myakitoh bmtaknirahkomr. Myakitoh bmtakni-hato nikmohart Krairhu mrofkot broniraht. ¹⁶ Kto tfit nikmoh mongko toh hanyuk kantrim mrofkot hanyrah-nomt.† Nhai bi yimam yihato mrofkfom bi kfo nuhaset kmim yiruhatnom. Nhai. Tafi gutnius mrofkot yi juha nfri kmim nom yirahnom. Nom tu nfri kmim tunomn yi hingrnahato tfit nom kfo yindhor mirahnom, nom nd gutnius mrofkot hnehato nomn mfnah gungonmonomt. Kanga ndtset kfo yindhorneft, be nhai mrofkfom. ¹⁷ Bro Nkifrarhu mrofkot kfo kangt,

† **10:16:** Porr kfomor wom mongko tohyuk kmim. Nd mongko tohyuk kmim to ka bro taun Romr kfomor yo kantri Spen kfomor. Tom nd nd kmimn Korinthu mongko marr yohnitako tohwom. Nd kmiroh kfo duka mrofkfom htikfot Aposer 19.21 yo Rom 15.24-28.

“Yimar kangr akfo grhaya, Bro Nungothetr hingrnayuk hingrneftn kfo grhakfot.” *Jer 9.24*

¹⁸ Nom bi tawisafetenom. Yimar be turn turhu yufat kfo hagrhwur, nd yimar Bro Nkifrarpo nhai yufapa duhater. Yimar tu Bro Nungothetrn yufat yura kfo grhwur, nd yimar yufeter.

11

Porr niwa nefmi giaman aposerm niwa nefm

¹ Na wom mrokfom afo faso kfo mmoni hanitanme, afo wawany mar-sisafo hanyswokma. Bi mirahko finji akfonom. ² Bro Nkifrarhu bro yima yuhur duka kangr dodh met yindari bugam be rorrparhu yinhitn atohm. To Bro Nkifrar dukewa kanjo to nanhu bro yima yuhur duka kanga niko Krairpar wahik mif mifko. Kanga Krairpno ayak htakahtanko Krairsn ayakrko. Wom met tmaht tafi wom yimarpno yi juha be yifammam yakhato yindariro yak htiwa kanjo kanga inji kanjo ayakkahanko Krairpno ayak htayanko. ³ Tmift Tndhrn kakrmitanko. Ror tu mfro yima frnhehet nandomer. Bingot to rorn Ift yihato frnhehmostr suhmot. Ndtu na kakrmitanko. Kanga inji kanjo yimam nieruhamn mfrnhehakruhatmko rroh yuhat mhikakniruhakomn Krair myafhonirahkomr. ⁴ Na nhai be sfno yakrmikahanko. Wahtiko! Tom wom yimam nikompno niewamn Jisasrhu gutnius mrokfot nom kfo pthiwat tfit yak kekutnewamt tfit romn ndo kfo pthewumt. To niko wanukahat, nhai afo mrokfot yak nhtakahkomt. Niko wanukahat, be yudbat rroh mrokfo yuhatn mitohnitko. Mitohnihato tfit nfri yafothat yo nfri gutnius kekwo. Nd barkof yakyuk Bro Nkifrarhu Yafothat myak htafonitkomt yo nom barkof kfo nuhasyuk gutnius mrokfot myak htafonitkomt.

⁵ Wawanyko. Nd yimam niko kfo yamuka, “nmoh aposerm,” rom nhai nanhu duka tungunefr kanjo rroh duka tungunefr rhukahr. ⁶ Mrokfo pthanefrpat nhai ptha marnyakaha. Bro Nkifrarhu mrokfothu duka tungunefr, ndr nhai yimam na kfokfot. Nd duka tungunefr na bi fakmoyanr. Nd duka tungunefr na yakitohwar niko bi htimokomr.

⁷ Na gutnius mrokfot nikmoha yi kfo pthamohat, na nhai kfo marimoya wawiknatwokma. Nhai. Nikmoh gutnius mrokfothu yi kfo ptha nuhasneftn na yufapa duha yimam kanjo yi hingrna furatamoya. Na inji namohate ka fasoh neft namoya? ⁸ Na nikmoha tohhato hingrnahomohat, wom nddoh kmiroh siosroh maruhaye wiknamoatma na nikmoha gutnius mrokfot kfo ptha nuhasmoyanko. Nhai nikomn wiknar-mokma. To ndte ka fasoh neft namoya? ⁹⁻¹¹ Na brio maruha duha, yeshri duha yo hmbresha duha rhumohat, na nhai marimoya nikomn khrhopam hiruha nd tamoh tamohroh yak hanyeft. Nhai. Wur ndo Masedoniako tohtany niayuk yimamn marut, yeshrt, yo hmbresham hnahemoma. Na nd rom hnayuk shrkamn rhumoya. To nikom-pno kfo tndau duha yimohat, nhai wom dukefmpno inji narmoya. Nhai mif mif. Bro Nkifrar hti mifwora. Nanhu yima yuhur nikompno rhu mifwor. Be duka memoya, nhai khrhopam hirhotanm nanhu tamoh tamohroh yak hanyeft, ndnetann ariham yo kto wom yiha wom yiham toh hnayukm nhai kfo mirhota nikomn yak hirahkma na tamohm myak kkopenakneft. Nhai mif mif. To na gutnius niko he furamo nmbuhatpno na kfo grhanefn nhai wom Akaia thofrn kfo raforhotra.

¹² Na nikompno yi hingrnanefn na nhai maruha yak hakurhotanko. Bi inji rinakmoya to be inji nahanyruha. Inji narhota nd wom giaman aposerm nhai tfit turoh yufam kfo grhahato kfo miruhatn, “Nom Porrom Korint niwa nef yuhat hikwonom.” ¹³ Nd yimam nndoh giaman aposerem. Rroh nefm yak kekutnewamm yuwi kangm niko htiruhakomn duka mirahko tu Kraiserhu aposer mif mifem. Ndm yuwi nikmoh frnehaknefn inji newum. ¹⁴ To niko rom nayuk nefm htineft, to mirahko htihato bok dukefm ayaknom. Niko tawisafwoko. Satanr kangr afrnehakanm ndnetrn rorhu nefm yak kekutwarm tfit fnhuyet mounmotr kanjo kak dborhewur. ¹⁵ Ndnetn Satanrhu hingrna yimam to inji inji newum, rroh nefm yak kekutwamm tfit dborioh nefthu hingrna yimaroh nefm kanjo newum. Nom inji htineft, to bi bok dukefm bi yak duha. Kto tum niwa nefroh krhopam yakrahm.

Porr aposer hingrneft hingrnahato yakmo krhoparoh mrokfot

¹⁶⁻¹⁷ Na nhai wofnkaha tfit wompam wompam nanhu nefmi yo na hingrnawa hingrnefn mrokfot be waphathu waphathu hasoneft. To tfit womt akfoyanko. Nd nanhu tohefti nanhu hingrneft tuka kfo grha yindhorwante, to mirahko akfo amanyom, “Ndr nhai bi Bror kfiwa yuhat hikkahr; bi mmom kanjo bi kfo mumiwur.” Mirahko bi inji akfakinom. Niko inji htitwokma o wanukwokma, afo wahti marsisatwokma. ¹⁸ Niko inji newuko, wom yiham wom yimam nayuk nefmpnon o tum hingrnayuk hingrnefnpno bro yindhoreft yakhato yihof href yiho href kfo ptha yindhor thombat, niko to be rompno brbo ruhato wany yakitoh yindhor hasi-wukomm. Na tfit wawanywako na ka inji tukanhu nefmi tukanhu hingrnefn kfo yindhor grharuhan o na tu yafothet mrokfot kforuha?

¹⁹ Wawanyko. Niko hifa dborioh dukefeteko. Yimam kfuyuk mrokmom kak nhta marnyewukomm. To tfit tamohmpno nd faso faso kfo mmo bammoyetroh mrokmom mfrhamumi-watmko niko be rroh mmo yuhatn mhikaknitako? ²⁰ Ar mmohari kpt. Niko to rpat mmo bugewakomn rom niewamn mfrhammo bohamumiwamko, niko riwany yakiwakhato nikmoh waskenm kak rhohtakni bugahukmko. Inji mnewamko tfit tur-ohko yitamn turoh yufam yura yura htahato niko tfit yiro wahtewumko. Ndt dborioh nef newumko? Nikmoh kusmm mfrsfewohat niko to be dukiasroh nyingam kanjo karnt hasiwukomm, nhai wom mrokmom kfokahkomm. ²¹ Na nhai mfro inji narmoyanko. To niko finji dukewako, na dborioh nef namoyan o nhai?

Ndnetn rom kangm tum niwa nefm o hingrnawa hingrnefn akfo ptha yindhornomm, to nhai mrokmom. To nanhum to kfo ptha yindhorruhanm. Awi nhai, ka inji kfiwohat kanga ka bi faso kfo mmoni hanita. ²² Rom kfo kangm, “Nom Hibruyenom,” yo kfo kangm, “Nom Abraham frikef yuhat niayukenom,” yo kfo kangm, “Nom Isrerenom.” To na froha? Na to Hibruya, na Abraham frikef yuhatuha, yo na Isrera. To finji kforuha? ²³ Kfo kangm, “Kraisrhu hingrna yimayenom.” To rom fitha bi Kraisrhu hingrna yimam tohhato bi wonk wonk krhopam bi yakrom? Wawanyko. Asoya yimaya Kraisrhu hingrneft tohhato bok krhopam yakyuk yimaya. Rom bi hingrnarotm kalabus htaromm? Yo wife smbhoromm? Yo nohyuk

* **11:22:** Hibrumi Isrerm trhamo yuhat inji: Hibrum tthamo yuhat, rom yima Abrahamr kasinyamo frikefet. Isrerm tthamo yuhat, rom tu Bro Nkifrar kfohato tthamo frikefet.

¹ Na tukanhu toh nmbuhathu mrokfotn kfo ptha hasohato niko be ndtn yihof href wany hasorahko, nhai nikmoh toh nmbuham yak htaruhattm. Be wany wanyrahko. To nhai mrokfom. Na hwe twehany kanjo wany hanyo kafrohet mrokfom yo kafrohet nefm, ndroh mrokfomn kfo ptharuhanko. ² Na tawisafwanr wom Kristen yimarhu tndh mrokfot. Bingot wom Kristen yimar, Bro Nkifrar tuhafunanimotrr yimor tu hefenrhu tu wuroh kmi mfhatn. Nd tndh mrokfot bi 14 gunyimm yohnemom. Nd yimar tuhafunanimohat na nhai tu tawisaf marnyakaha, ka yuht thatipetr tuhafu-nanimorr o be yafotharpat fnahni yimot. Bro Nkifrarpar tawisafwor.* ³⁻⁴ Tu Bro Nkifrar tuhafunanimotrr yimor hefenko. Nd yimar hefenr yihato wanyomr wom kafrohet mrokfom, yo wom kafrohet nefm. Na nhai tawisaf marnyakaha ka yuht thatipetr tuhafunanimorr o be yafotharpat yimot. Bro Nkifrarpar tawisafwort rorhu yi nmbuhat. Nd ror wanyom mrokfom yo htimo nefm, nhai yimam kfo ptha hikkfot yo nhai nd mrokfom yimam kfo ptha nriyaf mif mifkfot. ⁵ Kanga nd yimarhu yufat ayuta grha yindhorante, to nhai. Na nhai tukanhu yufat tfit yuta grha yindhorkfot. Na ndhtet yimena, be nanrpayann finji narmoyanm tamoh nefm o finji hingrnarmoyanm tamoh hingrnefm. Bro Nkifrar tohnhomotra tamoh tamoh nefm namoyanm o hingrnefm hingrnarmoyanm. Ndtppo na Bro Nkifrar kfo grha yindhorwanr.

⁶ Nanhu tamoh tamoh mrokfom be kfo mif mifwanm. Ndnnett na kanga nanhu yufat ayuta grhayant, to nhai mrokfom, to na mrokfom kfo pthanefit nhai mmo kanjo mrokfom be tubatu-yaknikahanm. Nhai. Nanhu mrokfom dukak hanyhato kfo pthiwanm. Yo mrokfom kfo mif mifruhanm. To na, na nhai wofnkaha na Bro Nkifrar tuhafunanimom yuhathu mrokfomn yimam wanyhato be nd mrokfotn rim rhuta mrhuthato nann yimam bro yufat htaneft. Nhai. Na nikompno tohato namo nefm yo pthamo mrokfom dukakkfot. Nd tkittn htirahn, na tamoh tet yimaya.

Krho nmbuhat Porr wasmotr huhrat kanjo

⁷ Bro Nkifrar hefenrhu dborioh dborioh shrkar fak nuhasmora yo dborioh dborioh mrokfom kfo nuhas-mora. To Bro Nkifrar nhai wofnkahr na kfo grha yindhor manyeft, “Nanrpayann Bro Nkifrar fak nuhasmor hefenrhu kafrohet shrkar yo kafrohet mrokfom. Nanrpaya yufeta.” Ndnnett nann wom bro krho nmbuhat hemora. Nd krho nmbuhat huhrat washato hiyarmonwa kanjo inji yironamoa. Bro Nkifrar nd krho nmbuhat hemohat Satanr htihato memor; “Hifa nd krho nmbuha yuhatn rim tohnriruha.” To be Satanr nd yuhat buha yarim tohnehato nd krho nmbuhat tfit rorn yakhato tfit rorn nd krho nmbuhaye hta karhumorr nd kfo grha yima yuhur. ⁸ Husfirpa kfo bruttnat kfo bruttnamoyanr Bror nd krho nmbuhathu yak thuneft. ⁹ Kfo bruttnamotanr nhai yak thurmot nanhu krho nmbuhat. Be kfo memora, “Nd krho nmbuhat nhai yak thurhotann. To mirahn ka nhai yuhuwafkohann. Nhai. Na yuhuwafwann. Na nhai yukatoh marsisarhotann ni ndar krho nmbuhat titewohat. Na titahiruhann.” Bror inji kfomotra na tamoh krhopam titaneft na be yindhorhato titewann. Nanhu Kraistr tor, rorn bmtEFR hnewurr. ¹⁰ Ndnnett na Kraistrhu hingrneft hingrnahany hingrna hanyhato mhingrna narhohtewan o wonk wonk

* **12:2:** Nd yimar Porr dkfo memo Kristen yimar yura hefenrhu tu wuroh kmi mfhat yimor, ndr tu Porer.

kurhufenm kekwoman o yimam sinyahato rir borirwoma, nhai mrokfom. Nanhu Kraiser tor, rorn bmtetf hnewurr.

Porr dukamort Korinm Jisars hikwa nmbuhat

¹¹ Nd nanhu dborioh nefroh kfo yindhor mrokfom tfit tukann kfo pthiwanm, ndm rom nikomn kfo ptharfokomm. Tamohmpno nhai nikomn kfo yindhorkahkomm na niwa dborioh nefm? Nd yimam niko kfo yamuka, “nmoh aposerm,” nd yimaroh hingernefroh kfo yindhorneftn niko be mrhunisko. Rom hingernewa hingerneft nhai na hingernewa hingerneft kanjo inji hingernekahmt rroh hingerneft. Nhai mrokfom. Na htikoma yima furapam kanjo. Rot htikoma yima furapam kanjo, ¹² to htimokomt na nikompno tohhato hingername hingerneft? Finji tohhato hingername? Tot fak nuhasmoyanko tu aposerroh hingerneft hingerneft yuhat. Nd wuruha aruha niyuk krhopam na tohhato titamohat ndm htimokomm, yo htimokomm na wonk wonk mirakerm na hingername, yo wonk wonk nefm na hingername tuhant yinders miyoh riha rmonhato Bro Nkifrarhu bbukeyft htimohat. ¹³ Na nikompno tohmohat, na wom siosmpno tohhato nahname nefm kanjo inji nikompno name. Wom rpa nefrpat nikompno namot, nhai wom siosmpno narmoyant. Yeshri, maruha, hmbresha nd ndroh he nmbuhatn na nhai nikomn kfo tndaukfof htarmoya. Ndrpat nndo name. To na inji namohate ka ufasoh beb nmbuhat name? Nikone yima yuhu duhateko na nayuk nefroh yak nhtaneft? Yima yuhume yaum famomko? To na fasoh neft na thombat wayafhotwakomt na nayuk beb nmbuhat.

¹⁴ Tfit bi yibon hanita nikompno namba tri taim nianeft. To ndar yaus na nia thombat nhaf nhai kfo mirhota nikomn krhopam hiruha nanhu tamoh tamohroh yak hanyeft. Nhai. Na nhai wofnkaha nikomn tamohroh yak hutfaneft. Kanga niko yimakomn na ayak ahatoha. To mrokfot nhai kfo mekaht yonm yeshri tamoht yak htfashato yifammam mthu wuna hasorahmm. Nhai. Yifammam yeshrt yak htfashato yonm mhtahukmm. ¹⁵ Na nia thombat na be yindhorruha nanhu tamoh tamohroh nikomn yak hanyeft. Na nhai wom tamohm dukarhota, niko dukahato nanhu yiam, nanhu hingerneft, nanhu dukeft, nanhu yikia tpt nikompno htarahant. To wahtiko, ka nanrpaya ndhtet yima yuhur nikompno hta-ruhanr, to niko nhai tawo mfro nan-pno nikomn yima yuhum htarahant-komm.

¹⁶ Tfit nikomn womm kfo kangma, “Porr nompno tafon yuhat niahato tamohm tndauneft ror nhai ndhtet neft. Rorhut to be yima mkfo yongm boyongm yo mkfo nheh bonhehhato wuskam tamohm kekwor.” ¹⁷ Niko inji kfiwatka na duka mumiwa. Ka nd maruharoh yak nhafohyuk mrokfothu mkfo hanyuk yimam na kfo tkrurafmom, ka nikomn yi mfrnhehhato nanhu wuskaroh yakneft yimam kfo tkrurafmoyan o nhai? ¹⁸ Taitusr nann kfo kasinyafmoyanr nikompno yinyeft, yo tor wom Kristen bratar rpat niamof. Ka Taitusrn wom yak brurfam yak nfhotehato hna-morm? Nd no wiyayauwa dukeft ka nhai tuno rpa yima yuhur ruhato Bro Nkifrarparhu bbukeyft pno wiyau-yaukahnono nhai? Niko waduka hik marnyakahkomn mrokfom wakfo pthakomm.

¹⁹ Nom ndar gontwat wandfiwohat, nom nhai duka mekahnom, “Inji inji akfokahtnom Korinm hti mirahm, ‘Ndm tu aposer mifem.’” Nhai. Nom nikompno wandfiwohat, niko Jisars hikwa hik yuhathu kfo bmtayuk mrokfom gontwat htewunomm. Nom Kraiserpno bi rim tohniyet yimanomn

nom Bro Nkifrarhu nyingampno kfo mifwonomko. ²⁰ Na wom dukefr duka yanho hanitar, kanga kfo duha yirah-nomm, tfit miruha nikmoha aneya, tfit niko nayuk nefm mhti hhrekruhanm. Mhti hhrekhatu tfit miruha kfo tebos mrokfom o kfo hta mrokfom ahiyanko nhai yindhorruhatko. Na wofnkaha na rhu hanyhato niko mrokfom gijohmt kanjo nateh natehneft o womroh hifa nefmpno o womroh dborioh wuskam-pno kfo nur yuhuwehneft o tamoh mrokfom be watanhehakneft o niko tuko Kristenko naftrndohhato rpen rpen o husen husen tohneft. Yo na wofnkaha rhu hanyhato tuko nakfo rindho borindhoneft o kfo rkmok kfo gungmihneft o niko tuhagrhatu sioshu nefm tfit nikomn kfo kekutneft. ²¹ Yo na miruha nikompno aneya, ka nia mhti yimtnaruhann bok met yindarim nhai yima yuhum yak kekuthato mong trohrmom turoh ijoh tone yuham, fasoh nefroh nanefn o wom mett o yindarir htihat u yima yuhu tohetoh nefm. Na ndhtet nefm mhtineft na be bro duka dungunangu-nefti bro yimtneft Bro Nkifrarhu nyingampno yakruha.

13

Wuroh kfo duka mrokfom

¹ Ariha namba tri yaus nikmoha niahato htiruhanko. Bi wom nianefmpno bi mhtimoyann nikmoh fasoh nefm, tfit ar yauspno tfit finji mhtirhoyanko? Bro Nkifrarhu rfa borngt kfo kangt, “Hus yimaf o husfirpa yimam wom yimar wom neft nahasitr hti nriyafaknimr, nd yimar nhai wom kfo namhikfot kot htakfot.” ² To ndt finji dukewako? Na bi namba tu taim nianeftpno nikmoh fasoh nefm mhtiyaknihato bro kfo duka mrokfot kfo tanmoyann nd fasoh nefm nayet yimam. Tfit ariha afo yuhre nndo tohhato kfo duka mrokfot kfo duka kanganko, na tfit niahato nd fasoh neft mhtineft, nhai hti marsisa-rhotann nd fasoh neft nayet yimam. ³ Kangko awany hiknome, wawanyko! Kraistr nhai hti marsisa hasokahrn fasoh nefm nahaset yimam. Nhai. Ror bbuka nanyjaretrn rorhu bbuka nanyjareftpno nd fasoh nefm nayet yimam kak hta bohtewurm. Ndnnett na rorhu tkitt tohhato rorhu mrokfot kfo pthayuka, na kfo nyinga fnah-wann nd fasoh nefm nayet yimam. ⁴ Jisars bgre mis frdbkafhato bgre miyetr kasinyamohat, afo tafi bbuka duhatrn inji namomr. Tfit Bro Nkifrarhu bbukeftn thu kasinyafmottr, ariha bi nd bbukeftpno tohwor. Nom Jisarpno frtkafhato tohyuk yimanom womnam bbukeftn thu trohwot-nom. Womnam Bro Nkifrarhu bbukeftn korhtnom. Nom nianeft to nd bbukeft-pno nom nia htirahnomko.

⁵ Niko tuko yak nhtahato htikfot, tu Kraistr kakitohwokon o nhai. Niko tuko hti nhtakfot nhai Kraistr ninhu yima yuhur rhukah, to be ni nd yima mirahn ka Kristena. Nhai. Ni bi yima furaye. ⁶ Nom ndar hingrnawa aposer hingrneft niko rhuhato hti hik bohik-rahkomt nom hingrnawa hingrna yuhat, htirahko nomn tu aposer hingrneft mift hingrnawunom. ⁷⁻⁹ Nom Bro Nkifrar kfo bruttna thombat nikmoh fasoh nefroh yafho nmbuhatn kfo bruttnawunomr. Kangnom akfo bruttnakahtnomr dborioh nefrpam yakitohhato nd fasoh nefm yafhorahkomm. Kto nom yi mhtineft nd nikmoh fasoh nefm bi yafho thuhato Kraistrhu dborioh dukefmi yima yuhur hiketkonn mfnahrahnom. Bi inji dborioh rhu nmbuhat ruhetko nom mhtineft be nhai kfo nyinga fnahruhatnomko. To tfit kfo nyinga fnah duha yirahnomko, womm kfo mirahm na Pora nhai aposer hingrneft tohhato

kfo nyinga fnahrforom. Mrokfom inji kfoneft, to nhai mrokfom. Nom to be niko Kraistr hikwa nmbuhatpno nom be yindhor yima yuhumpno korhwonom. Tor nmoh tu bro dukefr. ¹⁰ Bror nd aposer hingrneft fak htamora. Nd hingrneft yak htamohat nd hingrneftthu hingrna-yuk hingrna yafothar rpat htamora. Na wuri afo tohhato ndar gontwarpatn mrokfom htefiwohat, nanhu yima yuhur duka kangr hifa bi wuri tohhato mrokfom bi akfohiyanko, kto na nianeft na nhai wofnkaha tukmoh nyingatikhato tuko nayuk fasoh nefm-pno na kfo nyinga fnahneft. Na aposer hingrneft tohwohat, na nhai niko Jisasr hikhany tfit na mtohnihato nikmoh yima yuhum frtebikr botebikr-kfot. Nhais. Nann Jisasr hik hanyet yimako kfo bmta mrokfom hi hany-hato tpi habokkna hanykfot. Nd dukeftn nd aposer hingrneft fak htamora.

Porrhu kfo wobuh mrokfom

¹¹ Bi asom wuroh mrokfom. Watoh marnyatwako. Nikmoh tamoh tamoh nefenm nanest be Kraistr dukewa dukefrpar hikkfot. Niko buga rpa dukefr hikhatoh rpa yima yuhur rhukfot. Inji narahko Bro Nkifrar toh tamnourahrko. Toh tamnouhato rorhu yima yuhur nikompno rhurahr. Nikompno rhuhato noh hmbre yima yuhum htarahrko. Torpar yima yuhur bi kfohneyanr, ndrpar hikkfot.

¹² Niko lotu yiham rifinyneft, niko tuko Kristenko naki yindhorhato tir nhekfot.

Bro Nkifrarhu met yindarim kfo yindhorkfot htefiwumt.

¹³⁻¹⁴ Nungothet Jisas Kraistr yuhu-wafhato ayak marnya bomarnya-twarko. Yo Bro Nkifrar mondt n ahtatwarko. Yo Bro Nkifrarhu Yafothat tuhamuhkahttko tuko Kristenko nayak marnya nayak marnyahato rpat tohrahko.

Galesia thofroh gontwat Porr dwandfakhato htamot Barkof kfo nuhas mrokfom

Judam tom tu barkof kmim Jisasr rihik gungonakmom. Kto yima tangim. Aposer Porrn gutnius mrokfot hany habrihato kfo ptha nuhas htfasmotr yima tangim wanyhato Jisasr rihikakmomr. To nd yima tangim rom tohnnamo yiham nhai Mosesrhu boririfhut hikrmoam. Ndnnetmn bok dukefm kakmoum. Duka memoum, “Nom Jisasr hikwohate ka Mosesrhu boririfhut ka hikrahnomt o nhai?” Nd bok dukefm kakmoum. Judam sinyahato kfo memom, “Yimam kangm Jisasr ahiknom, nd yimam Judaroh nkifra tha pukwa yuhat hikkfot. Yo Mosesrhu wom boririfhum hikkfot.” Porr ndhtet mrokfom wany mohat kfo memor, “Arihat Bro Nkifrar nhai tha puketm htihato hti yindhorkahrm, nhai. Arihat Jisasr hiket yimarpam hti yindhorwor. Hti yindhorhato tohwom.”

Galesia thofmpno ndar gontwat wandfafmohat, Porr wanyakmor wom Judam Galesiako yihato Galesiakorhof Kristenm kfo tkrurmomm Mosesrhu boririfhuthu hikneft. Porr nd mrokfot wanyakhato ndar gontwat Galesiampno htamort. Porr duka memor, “Nd Judam yihato nkifra boririfhu hikneftn frhammorahmm.” Ndnnetrn ndar gontwat wandfakhato htamort.

Porr ndar gontwat htamo barkof mrokfot kfo memor, “Bro Nkifrar nda Aposer hingerneft htamora. Nhai be tukanhu fijon o wom yimar htarmora. Nhai. Bro Nkifrar yima tangim dukahato memor, ‘Rorn nd kmimpno yihato gutnius ptha nuhasrahm.’” Ndt kfonihato tfit wom mrokfot kfo memor, “Yimam Kraisi Jisasr yakitohwam tom nd yimarpam roh toh rawofm Bro Nkifrar hti wuthewurm.” Wuroh mrokfom kfo memor, “Nom bi yiro nyimsrn rir hmbreyetnom Jisasrn fak nyimbisakakmornom. Yak nyimbisakakmotrn nom yimanom korhnom. Yo Bro Nkifrarhu Yafothatn yak hta bohtiwattnom dborioh dborioh nefm newunomm.”

Tu Bro Nkifrar Porr Aposer hingerneft fak htamorr.

(Sapta 1.1–2.14)

Tu Bro Nkifrar Porr aposer hingerneft fak htamorr

¹ Na aposer Pora, nann ndar gontwat wandfiwanko. Nd aposer hingerneft yakmohat nhai wom fitoh bro yimamn wakfakhato kfo tkrurrmoma gutniuskfothu kfo htfas habrineft. Nhai. Jisas Kraisi ee Jisas Kraisi kasinyamo Bro Nkifrar, nmoh Bro Yifemr, rofn nd hingerneft fak htamofa. ² Nani nanpno hingernewa Kristenm, nom rpatn kahukwonomko ndar gontwat niko Galesia profins yorhwa siosroh met yindariko.

³ Bro Nkifrar, nmoh Yifemri yo Nungohtet Jisas Kraisi, rofpno kfo bruttna kanga, nikmoh rhu nmbuham, yima yuhum yak marnya bomarnya, yak hta bohta marnyakahtfko be rhu marnyarahko. Nhai wom tamoh dukefenmpno rhuruhatko. ⁴ Kraisi Bro Nkifrar, nmoh Yifemr, kfomo tng yuhath hikhatu suh nanyormor. Nhai be sfno noh furarmor. Memor, “Anoh-kahta, yimam nanhu noh nmbuhat htihato toh bmtaruham nd fasoh fasoh nefm mong trohhato dborioh nefrpm hikrahm.” ⁵ Ndnnettn yiha yiha kfo yuta hagra yindhorrahnomr.

Rpa gutniuskforpat korht

⁶ Nd niko niwa nefmpno na tfit mduka nhiyakahukanko. Bro Nkifrar niko hti yuhuwafhato Kraistr kfo tkrurafmotrr ror niehato fakmorko. To bi rorhu tirt ruhetko tfit yudbatn mong trohmokomrn tfit womhtet gutniuskfot hikmoko. Na wofnkaha niko ndhtet neft naneft. ⁷ Nd womhtet gutniuskfot niko hikwat niko mirahko ka tu Kraistrhu mrokfo mifet. Nhai. Be wom yimam niewamn kfo kekut bokekut nhehwomko. Niko rom kfoyuk mrokfom wanyhato mduka happuktewuko. ⁸ Bi niko barkof wany htayuk gutniuskfot tfit nomn o mounmotmn niahato tfit womhtet gutniuskfot kfo nuhaswomko, nd yimar inji nayuk; na kfiwa, “Bro Nkifraye, wayak hatohafokahtnr kaht aiswar.” ⁹ Bingot bi kfomononko tfit ndar gontwatn tfit rpahtet mrokfot tfit wompam kfiwanko. Wom yimar niahato nhai niko barkof yakyuk gutniuskfot kanjo kfo pthakahrt, na kfiwa, “Bro Nkifraye, wayak hatoh-afokahtnr kaht aiswar.”

¹⁰ Na nd kfiwa mrokfot to niko finji dukewakomt? Bro Nkifrar kanga awany yindhorra, ndnetann nd mrokfot kfiwanko? E, yimam kanga awany yindhorma, ndnetann nd mrokfot kfiwant? Nhai. Na kfiwanko, amekahann yimam inji dukahato awany yindhortwoma, na nhai Jisarrhu hingrna yimaya tohrfota. Nhai.

Porr aposer hingrneft yakmo yuhat

¹¹ Bar yinouroko, kfo mifwanko, nikompno na nia kfo nuhashemo gutniuskfot, nhai wom yima mifmn wakfo pthakrmomt. ¹² Nhai wom yimarn kfo nuhas bonuhasrmotra na wanyhato nia kfo nuhasrmoyanko. Nhai mif. Tu Jisas Kraistrn mrokfom yak nuhasmotra na mrokfom rorpno yakhato nia kfo nuhasmoyanko.

¹³ Na bingot namoa nefm wany-moukomm. Na bingot tohmohat Judaroh nkifra boririfhut fak hik marnyamoyant. Na nd boririfhut yakitohhato Jisarr hikwa met yindarim bi fak bati hany titamoyanm. ¹⁴ Na toh hnamohat, na nhai Judaroh nkifra boririfhut riyak htafo wonrmoyant. Nhai. Judakorhof bok damiagn nanpno rpat warho hanyuknom nann boririfhut yak marnyahato nann tfit kfo hta bohtamoanm. Nanrpaya tunmoh nkifrar boririfhut fakitoh kihmoyant. ¹⁵ Na yuhre mmemthu yatit ruhetann bi Bro Nkifrar hti yuhuwafhato kfo memor, “Nd yonrn aposer hingrneft yakitohrahrht.” Hti yuhuwafhato yakmora rorhu hingrneftn fak htamora. ¹⁶⁻¹⁷ Rorhu dukeft duka memor, “Tukanhu yonr ayak nuhasokhtanr ror htiruharn yima tangim kfo nuhas hi hanyrahm.” Nd dukeftpno fak nuhasmora. Na ror htinimohat nhai tfit marimoya, “Wom yimarpno yirhoyann rorn kfo hta bohtahato yak nuhasrahra hingrnefthu hingrna yuhat.” Nhai. Yo nhai marimoya, “Jerusalemko afo yiyaknirhoyann nd aposer hingrneft bi ritoh gngonakyuk yimampno afo yiruha.” Nhai. Na Bro Nkifrarhu yonrpno nahtimohat be kantri Arebiako be yiyakni twanhomoya. Be ndko afo tohafonihato ee tfit taun Damaskusko yimoya.

¹⁸ Husfirpa gunyjimmm yinyimotm Jerusalemko yifrar yihato Pitar mhti tanymoya. Fiftin yiham tohno tanymoyanr. ¹⁹ Pitarpno mtoht tany-mohat nhai wom aposerm htirmoya. Brorhu nmem Jemsrpar htimoya. ²⁰ Na mirahko, ka kfo furewurno. Na tu kfo mif mifwanko.

²¹ Jerusalemko tohni hanyhato kto tfit Siria yo tukanhu distrik Silisiako, nd hus distriktf yi htfasmoya. ²² Judia distrikthu Kristen yimarpam nhai

tafi htirmomt nanhu nyingatikt. ²³ Be wany wanyomoum kfo memoum, “O nd yima Porr, nom yak bati hany sitamo yimar, rorn tfit arihatn tfit kfo kangrm, ‘Kraisrhu mrokfot wawany yakiohahkomtn wahikkomt.’ Arihat bi inji kfiwurm.” ²⁴ Inji bi wanyomomn Bro Nkifrar kfo yindhormomr.

2

Porri wom aposer tfit rpa yima yuhur fakmom

¹ Fotin gunyjimm tohniato ee kto tfit Jerusalemko Barnabasr-pno yimno. No yimohat Taitusr faknimno. ² Tu Bro Nkifrar niahato kasinyamora Jerusalemko yinyeft. Na Jerusalemko yi tohmohat tuha Jerusalemthu sios hingerneft tohwa yimarpampno turpatnom rhuato kfo nuhas bonuhasmoyan na yima tangimpno yihato gutniuskfot kfo nuhasmo yuhat. Memoya, “Roh dukeft wany marnya duha be nanhu dukefrpatn hingraruha nanhu hingerneft yi furaraht.” ³⁻⁴ Na sios hingerneft tohwa yimampno rhu rifinyhato nom naphamohat nmoh mrokfefm wany rikohyuk yimam yuwi yimomn mkfo nheh memomnom, “Nom Jisarr hiket yimayenom. Kangnom, rhuato niko pthayuk mrokfefm wany yakitohrahnomko.” Yuwi inji mkfo nhehmemom. Roh dukeft memom, “Ruhato wany yakitohrahnom. Judaroh boririfhut finji kforuhant? Yak yiritiyafrahmt o yakitohrahmt?” Na nd riny swirt mrokfo kfo pthamohat nhai marimoya nd nkifra boririfhuthu nmbuhat ptha srhrahnomt, nhai. Rifak htafmoyant. Gutnius mrokfothu mrokforpat rhu naphamonom. Ndnatn nd yimam wanyasihato kfo memom, “Wakfotwanm, ‘Judaroh nkifra tha puknefti boririfhut mirahn ayafho thunomt.’ Yafho thurahmt Bro Nkifrar nhai yindhorrhahtrm.” Rom yihato inji kfo pthamohat Jerusalemthu sios hingerneft tohwa yimam nhai rom pthamo mrokfot hikhato kfo mari-moma, “Nd ninpno niayuk yima Taitusr ndo Grik thofer, tha wapuk-twanr.” Nhai inji kformoma. ⁵ To na nhai marimoya, “Nd yi pthayukroh mrokfom wany yakiohato Taitusrhu that puk thurahnomt.” Nhai. Nanhu yima yuhur nhai wofnkahr gutnius mrokfo yuhat kfo nuhashany tfit wuyakhato tfit wom yuhat pthakni inji nakfot. Gutnius mrokforpat pthewunomt ndrpat ptha nuhashato niko yimako nd gutniuskfot wanyukko wanyhato ndrpat hikrahko.

⁶ Na nhai bro yufat mhtiyakkaha. Yo Bro Nkifrar nhai yima hatohyuk bro yufatn htikahr. To na nd Jerusalemthu sios hingerneft tohwa yimampno rhuato na hingrna habrimo hingerneftu hingrna yuham kfo ptha nuhasmohat rom nhai wom mrokfom kfo ptharmom. ⁷⁻⁸ Kfo memoyanm, “Bro Nkifrar Pitar mrokfo rifhur hemotrr aposer hingerneft Judampno hingrna habrimort. Nd Pitar mrokfo ptha rifhur hemo kanjo, na inji mrokfo ptha rifhur hemotra aposer hingerneft yima tangimpno hingrna habrimoyant.” Na inji kfomota nd bro yimam kfo memom, “Pitar Bro Nkifrar fak htamor Judampno tohato gutniuskfothu kfo ptha htasneft. Porne yima tangim-pno.” ⁹ Sios hingerneft, met yindarim htimoahat htimoum Jemsri, Pitare, Jonr, romn bromount sios hingerneft. Nd bro yimam nanhu hingerneftu mrokfom wanyomohat memom, “Be tu Bro Nkifrar yuhuwafhato nd aposer hingerneft fak htamor.” Be nd yiha rifakitohakmomno Barnabasr-pno. Riyakitohakhato hingrna yuham nafak nhtamonomm. Nonn yima tangimpno aposer hingerneft fakitoh-mono. Romn tu Judampno. ¹⁰ Hingrna yuham nayak nhtanimohat rpa mrokforpat

kfomomno. Memomno, “Nmoh siosn tohwom wom yimam maruha duhatm o wuskapa duhatm. Nd yimam mirahfn, ahti marsisanonm. Nifnhu tirtn arhutwam.” Na bi ndhtet yimam bi yakitoh hnetann tfit nd bro yimaroh tngt inji wanymohat na be yindhormoya nd yimaroh yakitohneft.

Pitar namo neftpno Porr yima nyingahato kfomorr

¹¹ Kto Pitar tfit yimor Antiokko. Ndko tohhato wom neft namotr tu Pitarhu nyingahato kfo nyinga fnahmoyanr.

¹² Na Pitar kfo nyinga fnahmo nmbuhat nhai be sfno. Pitar Antiokt tohmohat yima tangimpno yimoarn nuwa yemsa inji namour. Wom yiha Jemsr kfo tkrurafyuk Juda Kristenm yimom nd Pitar tohmo kmi Antioktn. Pitar nd Juda Kristenm htiyakmohat nhai yima tangiroh kmifam tfit yihato yemskarmoar. Fakrmemor, memor, “Yima tangimpno rhu nafinyrhota hti nriyafrahma.” ¹³ Wom Judam nd tuha Antiok tohyukm, nd Pitar yimo yimbuyef duha yuharpatn hik bugamom. Barnabasr, ror nhaf nd yuharpat yimor. ¹⁴ Nhai gutniuskfot kfuyok yuhatn hikrmom. Na nd rroh nefm htimoyann, Pitar yimaroh nyingahato kfo nyinga fnahmoyanr. Kfo memoyanr, “Ni Juda thofn arhun nhai tfit yima tangimpno yihato rhu nafif inji narfotn. Ni wom tangishofm kanjo tfit wom tangimpno yitann rompno rhu mska inji newun, to tamohmpno tfit kfo yamukann, ‘Judaroh boririfhut wahikko?’ Ndt nhai tu dborioh neft nakahn.”

Met yindarim Kraiss Jisasr yakitohhato hikwam, tom nd yimann Bro Nkifrar kak wus bowuswor.

(Sapta 2.15–4.31)

Yimam Kraiss Jisasr yakitohhato hiketm Bro Nkifrar kak wus bowusworm

¹⁵ Nom Juda nmoh trha yuhat, nom tu Juda frikef yuhtn trhamonom, nhai nd fasoh nefm nayet yima tangiroh frikef yuhatn trharmonom. Nhai. ¹⁶ To nom nhai duka mekahnom, Mosesr htanihemo boririfhutn yimam hikwamn Bro Nkifrar kak wus bowus-worm. Nhai. Nom nhai inji dukakah-nom. Nmoh dukeft duka kangnom, yimam tu Jisas Kraissr yakitohhato hikwam, tom nd yimann Bro Nkifrar kak wus bowusworm. Ndnnett nom to inji buga. Nom Kraiss Jisasr yakitoh-watnom Bro Nkifrar kak wus bowusworm. Nhai nd boririfhuthu hikneftn. Bro Nkifrar bi kfo memor, “Yimar nhai boririfhu hikneftn yak wus bowusshotanr. Nhai.” ¹⁷ To nom Judanom kangnom Jisas Kraissr hikruhanomn Bro nkifrar hifa hti wutharahrnom. Nd yuhat kangnom ainom, to tfit htinom nmoh ruheft yima tangim kanjo fasoh fasoh nefm furkihwom. Tom nom inji htineft ka tfit kfo mekfot Kraissr nd fasoh nefm mhfnahnamorm? Ka inji kfofot? Ka nhai. ¹⁸⁻¹⁹ Nanhu htiyef inji htitant, bingot Mosesr htanihemo nkifra boririfhut hikmoahat Bro Nkifrar nhai hifa hti wutharmorr nanhu yima yuhur. Nhai. To be ndnatn nd nkifra boririfhut yafho thunimoyantn Jisasr bi hikwa. Jisasrpn bi tir niyakitohhato Bro Nkifrarpn rpat tohwono. Tfit arihat na Jisas Kraissr hik hany hik hany tfit Jisas Kraissr ryafhoniato nkifrar boririfhut hikakneft na nhai tu dborioh yimaya rhurfota. Tu fasoh yimaya rhurfota. ²⁰ Na bi bgre misn Kraissrpn rpatn tuhigirmoyann bi rpatn nohhat nfr yima yuhur fakmoya. Nd na yakitohwa nfr yima yuhur, tu Kraissrhu nfr yima yuhur korhra. Be nanhu duka yuhuwaf nmbuhatn nohmor. Ndnnett na tamoh tamoh nefm finji naneft nda bbinysoft, Bro Nkifrarhu Yonr yakitoh kihhato hingnewann. ²¹ Bro Nkifrar yuhu-wafmora. Ndnatn nd rorhu

yuhuwaf nmbuhat na nhai yakhato rituhaftakfot. Mosesrhu boririfhutn nmoh yima yuhum yak marnyahato Bro Nkifrar ahti wutharnom, to be Krairshu noh nmbuhat be noh furarmort.

3

Nkifra boririfhuthu hiknefti Krairshu yakitohneft

¹ Galesia thofko, be tu mmo hariyeko, Jisas Krairshu bgre mis nohmo yuhathu mna yuhat bi kfo nuhasmoyanko. To tfit frohmn kfo mmo bommomomko? ² Rpa ttiwon nmbuharpat kanga attiwonanko. Niko Bro Nkifrarhu Yafothat yakmohate fitoh yuhatn yakmokomt? Judaroh nkifra boririfhut hikhato fakmokomt o Krairshu gutniuskfot wany yakiohato fakmokomt? ³ Ka bi yon mumenm kanjo nhai wom dukefm rhukahmko. Afo Bro Nkifrarhu Yafothat thu bmta hnamottko Bro Nkifrar hik marnya hnamokomr. Tfit arihat nd Bro Nkifrarhu Yafothat yafho thunihato kangko, “Tukmoh fijo ahiknomr Bro Nkifrar.” ⁴ Niko bi barkof yakmo krhopam ka be fak furamokomm? Na kanga, ka nhai yak furamokomm. ⁵ Ka niko Bro Nkifrahu Yafothat hihato nd mirakerm hingerina thofte ka Judaroh boririfhut hikwatko mirakerm hingernewukomm? O ka gutniuskfot hikwatko mirakerkfot hingernewuko?

⁶ Abrahamrhu tndht dukakkfot. Abrahamr Bro Nkifrarhu mrokfom wany yakiohato yuhatn Bro Nkifrar fak wus bowusmorr. ⁷ Ndnnett niko ndt hti dukakfot. Abrahamr Bro Nkifrar wany yakiohato kanjo yimam Krairshu wany yakioneft Bro Nkifrar kutewurm Abrahamrhu yon kunys. ⁸ Bro Nkifrarhu gonborngt kfo kangt, “Bingot Bro Nkifrar bi duka hta memor, ‘Kto yima tangim nanhu mrokfot wany yakio-ruhatmt yak wus bowusruhanm.’” Nd dukefetrn bi Abrahamrpnno gutniuskfot bi kfo nuhas hta memor, “Nanhu mrokfom bi ninn wany yakionm. Ni bi wany yakiohato mahikkahtnm kto ninhu frikef yuhatn wom yimar nie-ruharn rorn wom hingerneft hingerina-ruhatrt na ndt htihato nda bbinysof-thu kmi kmim yak marnyaruhanm.” ⁹ To be Abrahamr Bro Nkifrarhu mrokfom yakitohhato Bro Nkifrar yak marnyamo kanjo, fitoh yimam Bro Nkifrarhu mrokfom inji fakitohmm, to be inji Bro Nkifrar yak marnyarahrm Abrahamr kanjo. ¹⁰ Yimam Judaroh nkifra boririfhut hikhato kangm, “Bro Nkifrar nmoh yima yuhum ayak wus bowusrm,” nhai yak wus bowusruhatrm. Yak hatohaforuhatrm kaht riyahm. Bro Nkifrarhu gonborngt kfo kangt, “Yimam nhai nkifra boririfhuthu mrokfo bugam hik marnyakahmm be Bro Nkifrar yak hatohaforuhatrm kaht riyahm.” ¹¹ “Bro Nkifrarhu mrokfom wany yakiohato hikwa yimam yak wus bowusruhatrm be rroh tohefm toh marnyarahm.” Nd mrokfom htitanomn duka kangnom, “Be tu nhai mif yimam nkifra boririfhut hikhato rroh yima yuhum Bro Nkifrar yak wus bowusneft. Nhai mif.” ¹² Judaroh nkifra boririfhuthu hiknefti Krairshu mrokfothu wany yakiohato hikneft nhai rpat niyaktkafkahf. Nndoh nndohef. Krairshu mrokfom wany yakiohato hikrahkomm hifa rhu marnya hatohrahko. To mirahko nkifra boririfhut hik hanyhato amyak yafdatni ayohninom.

¹³ Boririfhut inji kfomot, “Yimam nhai nd boririfhut kfuyok mrokfo toh hikkahr, nd yimar bi huker.” Nd tkittn Krairshu yawihnehato rorn nmoh nohyuk tkitt yakhato rorn nohmorn nom be nhai nohrhwatnom. To Bro Nkifrarhu gonborngt kfo memot, “Yimam misn tuhegirhato nohmoam kfo miyakmom, “Bro Nkifrar yak hatohafoyukem.” ¹⁴ Bingot Bro Nkifrar bi

kfo hta memor, “Abrahamr yak marnyamo kanjo yima tangim inji yak marnyaruhann. Yak marnyahato nanhu Yafothat rompno htaruhant.” Nd dukeftpno Kraistr nohmotr to be Bro Nkifrar ndt htihatohai namburhato yak hatohafokahrnom. Kak marnya bomarnyewurnom. Nom Jisas Kraistrhu mrokfom wany yakiohato hikneft rorhu Yafothat thu hamuhwotnom.

Bro Nkifrarhu boririfhuti Bro Nkifra Abrahamrof nayak dbkafmo mrokfot

¹⁵ Yinouroko, Bro Nkifrar Abrahamr-pno mrokfom nayak dbkafmohat nhai Bro Nkifrar tfit mrhu kekuthato tfit kfo kekuotrмор. Nhai. Wom yimar noh yibonneftpno tamoh tamohm bi yonroh yufamn fak htaniyahurm nhai womm tfit nddo yak nhtakahmm. ¹⁶ To be nd yuhant Bro Nkifra Abrahamrof inji namof. Bro Nkifrar sinyahato Abrahamr kfo memor, “Nini ninhu frikeft yak wus bowushato yak marnyaruhant.” To nd Bro Nkifrar kfo memo frikeft yak marnyaruhant, nhai frikeft bugathu yimam yak marnyarmor. Nhai. Kraistrpar fak marnyamor. ¹⁷ Na kfiwa mrokfothu mna yuhant inji korht. Bingot Bro Nkifrar Abrahamr bi kfo htamorr rorhu frikefthu yak marnyanef. Bi nd mrokfot kfonimortn kto 430 gunyijimm yohnenimotm ee tfit mongkorn boririfhu mrokfom fakmomm. Ndnnett nhai tfit nd mongko niayuk boririfhu mrokfomn tfit myak tuhafokfot nd yimaroh yak marnyayuk mrokfot Bro Nkifrar bi kfo pthamot. Nhai. ¹⁸ Bro Nkifrar hifa yima yuhurpno Abrahamr kfo htamo mrokfom hikhato fak wus bowusmorr. Bro Nkifrar yimam yak wus bowus thoft nhai boririfhut hikwa nmbuhat htihatohai yak wus bowuskahrm. Nhai. Bi Abrahamr kfo htamo mrokfot yakitohhato kak wus bowusworm. ¹⁹⁻²⁰ To tamohmpno Bro Nkifrar boririfhu mrokfom hemorm? Tamoh dukeftpno? Nd boririfhut hemohat bi Bro Nkifrar Abrahamrhu frikefthu yak marnya yuhant kfonimorr ee kto boririfhut htamort. Rorhu dukeft duka memor, “Boririfhu mrokfom ahtakahtann tamoh nefm yimam nanef tfit boririfhu mrokfeft mhtiyakhato duka mirahm, ‘O art fasoh nefet. Art dborioh nefet.’” Memor, “Nd boririfhutn yakitoh hanyruhamn ee nd Abrahamr-pno nnakfo nuhas htamo yima Kraistr nierahr. Nieruharn nd boririfhut rorn riyak htaforahrt.” Nd boririfhut Bro Nkifrar hemot mounmotm kfo nuhasmotr tfit romn Mosesr kfohemomr. Tfit rorn kfo nuhasmornom. Ror be buha tohhato Bro Nkifrar-pno mrokfom yakhato nom kfohemornom. Abrahamr nhai wommn Bro Nkifrar-pno mrokfom yakhato kfoharimomr. Ror tu Bro Nkifrar kfohemorr.

Bro Nkifrar hemo boririfhuthu mna yuhant

²¹ Bro Nkifrar hus yihotaf htamor. Abrahamr-pno wom mrokfot nafak tkafmoft. Yo tfit Mosesr-pno boririfhut htamor. Ka Bro Nkifrar Abrahamr kfo htamo mrokfom rihtafohato boririfhutn htamort? Nhai mif. Bro Nkifrar ame-kahrn, “Yimam boririfhut hikhato yakrhoyann nanpno yarim tohrahm,” inji akfor to nd boririfhutn yimam hikrfomn Bro Nkifrar yak wus bowusrform. Nhai inji kformor. ²² Turhu gonborngtn kfo memor, “Ndar bbinysofthu met yindari bugam ndar bbinysofthu fasoh nefmn yak kasitwatmm nhai dborioh yima yuhum yakkahm.” Ndnnett Kraistr yakitohet met yindarirpam Bro Nkifrar kak marnyewurm.

²³ Kraistrhu gutniuskfot tafi nia duha afo nkifra boririfuhe Bro Nkifrar fak hta bohtamornom. Duka memor, “Boririfhut yakitoh tefi hanykahmn ee kto Kraistrhu gutniuskfot hiruhann.” ²⁴ Boririfhutn yak hta bohta hnamot-nom

ee Kraistr niamor. Bro Nkifrarhu dukeft duka memor, “Boririfhutn yak hta bohta tefi hanyruhattm Kraistrhu gutniuskfot wany yakioruhamn yak wus bowusruhanm.” ²⁵ Arihat bi Kraistrhu gutniuskfothu hik yihayer bi. Nhaitft boririfhuthu yak hta bohta yihar wom rhukahnom.

Kraistrhu mrokforoh wany yakiohato yak hik yuhat

²⁶ Niko bi Kraistr Jisarhu mrokfom hikhato rorpno frtkafwatko to be bi Bro Nkifrarhu yon bugayeko korhko. ²⁷ Niko bi baftaisnihato bi Kraistrpno rim tohet yimako bi Kraistr hmbritkomr hmbrrsham hmbrita kanjo. ²⁸ Nom bi Kraistrpno tohyuknom Bro Nkifrar nhai yak nhtahato kfo mikahr, “Wurr Judayer wurr Griker, o wurr slefer o wurr nhai, o wurr yindariyer wurt metet.” Nhaitft inji kfo nhtakahrnom. Bi Kraistrpno rim tohni bugewanomn bi kangme rpa yimayer. ²⁹ Niko rpat yak tiphato Kraistrpno rim tohneft to bi Abrahamrhu frikefthu yon bugayeko. Nd Bro Nkifrar Abrahamrpnno nnakfo nuhas hta memohat, “Ninhu frikeft kto hifa yak marnyahato hifa rhu nmbuhat hiruhanm,” to nhaitft womm yakruhatmt nd hifa rhu nmbuhat. Nikomn yakrah-komt nd rhu marnya nmbuhat.

4

Kraistr hingrnamo hingrneftn nom Bro Nkifrarhu yonnom korhnom

¹⁻² Nanhu dukeft inji dukiwa. Wom yimar turhu yinemrhu yufatpno htayuk yewurit o tamohit nhaitft wommn yakkahmt. Tu yinem yonrn kekwort. Yinem yonr tafi duka tungunakahr nd rorhu yufatpno htayuk yewurit o tamohit afo yifem nmbritomromn yakitohwatmt ror be wom yima furar tohorw afo. Bi Bro damiagere ee tftit turhu tirtn korhm. ³ Nom to inji namonom. Yon mumenm kanjo nkifra boririfhuthu yinhit tohhato fak hta bohtamoutnom. ⁴ Nd boririfhutn toh hanyomonomn yonrhu nia yihar niamotr ee kfo tkrurafomotr fawihnamor. Yima mif thet mettn hiyaumotr. Hiyaumotr to be Juda thofr tohmor. Juda thofr tohhato Judaroh nkifra boririfhutn hikmor. ⁵ Bro Nkifrar duka memor, “Nanhu yonr aikahrn kfo hta bohta mirahrm, ‘Boririfhut be tmift wayafho thukomt. Hikrahkomt be nhaitft hifa rhu nmbuhat o hifa tkitt yak hturuhattko.’” Nd dukeftpno kfo tkrurafomotr. Memor, “Nanhu yonr aikahrn boririfhu hiket yima buharn suh nanyorrah. Suh nanyorruhatr ndt htiruhanm nanpno yarim fnahnehato nanhu yonm rhurahr.”

⁶ Arihat bi Bro Nkifrarhu yonko korhko. Ndnnettn turhu yinemr mithu nawohmo Yafothat kfo tkrurafomotr mithu nawohmotnom. Nd Yafothatn mithu nawohhato thu kasinyewatt-nom Bro Nkifrar kutewunomr dajar. ⁷ Ndnnettn niko nhaitft bi wom slefko wom tohkahko. Bi Bro Nkifrarhu yoneko. Bro Nkifrar nikmoh yufatpno htayuk tamoh tamohm nikomn yihato yakrahkomn.

Porr Galesia thofm dukahato yima yuhur nhaitft marnyarmorr

⁸ Niko tafi Bro Nkifrarpno nahti duka duha toh hnamo yiham tukmoh nkifra tahi yifonmn hik hnamouko. Nd niko hik hnamoa tahi yifonm nhaitft ndar nom hikwa Bro Nkifrar kanjo rhurmom. ⁹ Tftit bi arihatn Bro Nkifrarpno nahti duka nahti dukewuko. To tftit tamohmpno ginyetm kanjo mongthur mongthur yitakomn yamu-kako tftit, “Nd yatnkifra boririfhut ahiknom?” Nd yafotha yimbuyef duha boririfhut hikruhakomn to ka mirahko hifa rhu marnya nmbuhat hirahtnom. Nhaitft. Nd boririfhut

hikrahko be tfit fnykt mim ki tawon hmbrita kanjo ki hmbriyaforahtko. ¹⁰ Niko inji newuko. Fitoh yiharn o yamtn o gunyjimtn tamoh neft bi kfiko rhuhato yemro burwat o tamoh neft finji naneft, nd niko kfoyuk yihar nhai rhu mmoni-kahko. Nhai. Nd niko kfoyuk yiham korhwokomm. ¹¹ Nd nefm tfit hikwatko nanhu yima yuhur nhai marnyakahr. Ka nd gutniuskfot na nikompno yi pthamot ka nhai yakitoh-kahkomt?

¹² Bar yinouroko, inji newatko yima yuhur nhai marnyakahr. Ndnetann kanga, akfo nnuhanko. Nanhu toheft hikkfot. Na nhai wom Judaroh neft yakitohrmoyant nikompno yi tohmohat. Niko na htimohat nikmoh tirmn rhumoya. ¹³ Niko ka duka hanitko na wom yiha dbohneto nikompno yitoh-hato barkof yiha gutniuskfot kfo nuhasmohat. ¹⁴ Nd yiha niko na dbohneft yakmohat nhai hti marsi-sarmokma. Nhai. Mounmotm o Kraiser kanjo inji yakmokma nikmoh tirmn rhumoya. ¹⁵ Na nd bro dbohneft yakhatoh nyingam bebtamohat na tukanhu nyingaye hti mifmoyanko. Nyingam be yak rurhaketm arhum, ka nikmohmn yak rurhakhato nanhu nyinga bebr yak rurha thuhato nikmohmn htarmokma. ¹⁶ Nd yiha hifa yima yuhur hmbremokma. Tfit arihatn faso yima yuhu bebr hmbritkma. Bro Nkifrarhu tu mrokfom kfo nuhas hanitwotanko gobemn kanjo hitiwokma.

¹⁷ Wawanyko. Nd niko mkfo yuhur boyuhuryuk yimam, nhai hifa rhu nmbuhat hiruhatnko. Yuwi kangm, “Inji amkfo yuhuraknikahnomm ayak tndohnomm. Yak tndohhato nompno yarim tohrahm.” ¹⁸ To nanhu yima yuhur nhai fitoko rhukah. Nikomn be korhr. Nikompno brbo tohneft o wuri skitm tohneft na nhai duka mmonikahanko. ¹⁹ Niko nanhu tu dborioh yimateko. Niko ridukak thoft nanhu yima yuhur kurhiwur. Be nd kurho yima yuhur rhu hanyruharn bi tfit Kraiserhu mrokforpamn tfit hikwokome be yima yuhur marnyanirahra. ²⁰ Na wuri tohwoyann nikmoh mrokfot wanyhatoh yima yuhur nhai marnya-kahra. Be rpa tkitt rpat atohnom, awi, hifa hifa tfit kfo marnya bomarnyar-fotanko dborioh yima yuhum tfit niarfomko.

Hagar Sararofhu kfo nhombra mrokfot

²¹ Nikmoh womm duka kangm, “Nkifra boririfhut ahiknom.” Afo Mosesr wandfamo mrokforoh mna yuham afo myak hik marnyakkfot. ²² Mosesr wandfamo mrokfot kfo memot, “Abrahamr hus metf yakhatoh hus yon yindarif kasinyamor. Tu yak tuhan mif Sarat hiyaumotr Aisakr. Rorhu hingnefroh hingrnyak fndoh tuhan Hagarthn Ismerr.” ²³ Wom yak tuhanthur Bro Nkifrarhu tngtpno nasakmorr. Wom fndohthur nhai be Bro Nkifrar kformotr nasakrmorr. Nhai. Ror be nasak furakmorr. ²⁴⁻²⁵ Bingot Bro Nkifrar Abrahamr wom mrokfom nafak dbkafmofm. Tfit kminysof Sainaitn Judampno nafak dbkafmomm boririfhu mrokfom. Sara Hagarrofn rhu nhombromoff nd Bro Nkifrar yak dbkafmo hus mrokfeff. Sainait korhwot Arebiako. Nd Sainait Arebiam kute-wumt “Hagar”. Yimam nd boririfhu mrokfom hikmoahat tohukatohroh tngm yak hikwa kanjo be inji hikmoumm. To mirahko ka bingotpra nd boririfhut hikmoum. Nhai. Arihat taun Jerusalemthu yimam nd boririfhut yuhre kakitoh hanitmt. Ndnettn Hagarthu yon Ismerr kanjo yuhre boririfhuthu hingrna yimam korhm. ²⁶ Nom tu Bro Nkifrarhu taun Jerusa-lem mift tohyuknom, nom nhai nd boririfhu mrokfom tohukatohroh tngm yak hikwa kanjo hikkahnom. Abrahamrhu yak tuhan Sarathu yon Aisakr kanjo korhnom. ²⁷ Bro Nkifrarhu rfa borngtn profet Aisaiar wom mrokfot kfo memor,

“Ni, yon hiyau duha mete, yindhorrahn!
Yon yak rphawon duhatn yonmari yiham toh hnamo mete,
kfo yindhor boyindhorrahn!

Yindari frtroh tanyet metn, to nhai,

tfit yindariyet metm kanjo yonmari yon rifhur hiyau-rah.

Yindariyet metm nhai ni hiyauruha yon rifhur kanjo hiyaukahn.” *Aisaia*
54.1

²⁸ Bar yinouroko, nikomn Aisakr kanjo Bro Nkifrar kfohato dborhayuk yoneko. ²⁹ To tfit nd Bro Nkifrar kfo duha nasak furakyuk yonrn sinyahato Bro Nkifrar kfohato nasakyuk yonr faso fak bebmorr. Arihat to be nd rpahtet neft korht. Nkifra boririfhut hikwa yimam sinyewamn Krairshu mrokfom hikwa yimam faso kak bebwomm. ³⁰ Bro Nkifrarhu rfa borngtn kfo kangt, “Wayak tuhafonf hingrna metti rothu yonr. Fndoh tuhanthu yonr nhai tfit niahato yifemrhu wuskam yakitohkfof. Nhai. Tu bro tuhanthu yonr yakneft nhai mrokfom.” ³¹ Bar yinouroko, nom nd tndht htihato nmoh yima yuhum duka mekfot, “Nom nhai nd fndohthu yonnom rhukahnom. Nhai. Nom tu bro tuhan mift hiyauyuk yonenom.” Ndnnett nomrpanomn hifa rhu nmbuhat Bro Nkifrar hirahnom.

**Kraisrn nmoh toh rawofm yak wus bowuswatnom
ee Bro Nkifrarhu Yafothat yak hta bohtewattnom
womm dborioh nefm newunomm.**

5

(*Sapta 5–6*)

Judarah nkifra boririfhut hik duha

¹ Be nd nkifra boririfhutn tfit rim hikak mhikak yifahta hatoh duha. Krair bi nfri yihotar fak hta nuhasmornom. Tfit wom yimam niahato mtawas tiwonwomko tha pukneft wany marsisafohato toh bmtakfof. Ri-wany yakiwakrahkom to be nd boririfhutn yak hta bohta hasorahtko.

² Wawany marnyafu hanyawako na Pora kforuha mrokfom. Tfit mirahko Judam kanjo boririfhut hikhato tha apuk thunom. Inji narahko to be Bro Nkifrar nhai Krair nohmo yuhat mhtiyakhato yak marnyaruhatrko.

³ Tfit wom mrokfot kfiwanko. Fitoh yimam kangm, “Nd nkifra boririfhut hikhato tha apuk thunom,” nd yimam to be mirahm wom kfo boririfhu mrokfem arim tohnm. Nhai. Nd kfo boririfhu mrokfom rim hikak mhikak bugakkfof. ⁴ Niko kangko, “Ka boririfhut hikruhanomn Bro Nkifrar yak wus bowusrahnom.” Nhai. Niko be tukomn boririfhut hikwakomn tfit Krair yekwakomr nndo riyak htefiwukomr. Inji newuko Bro Nkifrar nhai hti yuhuwafhato yak marnyaruhatrko. ⁵ To nom nhai. Nom be Krair wany yakiohato rorhu mrokfom bi hikwanomn nmoh yima yuhum be rhu duka haso kangm, “Nmoh yima yuhum Bro Nkifrar yak wus bowusrahm.” Bro Nkifrarhu Yafothatn nd dukefr kahukwotnom. ⁶ Bro Nkifrar yimam yukatoth thoft nhai tha puket yimam o tha puk duhat yimamn htikahr. Nhai. Yimam Krairpno rim tohhato womm hti dukewam, tom ndtset yimam Bro Nkifrar kukatohworn.

⁷ Barkofpam afo hifa Krairshu mrokfot fak hik marnya hnamokomt. Yak hik hnamokomtn to tfit tamohrn buha tanhehafomotrko manysifm kanjo yihom kke rmonmoko? ⁸ Nhai nd niko nakuyakmo Bro Nkifrar

tanhehaformorko. ⁹ Nikmoh yima yuhum tom bi nndo yiyaknitm. Inji tefinitamn kto be nndo yirahm. Htitwokomt bretparoh hingrneft. Tefi yispenn yakhato plauapamn rihtafo-rahnm kto htirahnt nd bretpat tfit broraht. ¹⁰ Nanhu dukeft duka kanga, “Bror fitha yiruhatr rroh yima yuhum nndo yiruham?” Na duka kanga, “Nd rom yorh hasiwa yima yuhum be Kraistrn yak marnya bomarnya-ruhatrm tfit nanhu yima yuhurn mikmbrehato hikrahm.” Nd niko harhuwa yima yuhurparne kangane, “Tamohrn frmmo bomumiwatrko mduka happuktewako?” Nhai mrokfom. Nd niko frmumiwa yimar Bro Nkifrar afo htiwonrahrr.

¹¹ Bar yinouroko, nanhu mrokfom kfo pthamom, be akfo mekahann, “Tha pukneft nhai mrokfom,” yimam nhai namburrfotma. To nhai, kfo memoyann, “Tha pukneft bi bgre misn Kraistrn mfha htahato fak nohmort. Nd neft wayafho thukomt.” Nd mrokfot kfo mota namburwoma. ¹² Nd yimam niko kfo mmo bomumiwam, tha pukneft kangm, “Ayakitoh hanynomt.” Nhai mrokfefm. Tumnn nd neft yakitoh-hato be yuht nyisofetm puk tmbha thu hanykfot.

¹³ Niko, nanhu yimatko, afo nkifra boririfhu mrokfomn afo ufak afakmoumko. Tfit arihat bi Kraistrn nd niko yak nhirtamoa mtitoft puk thumortn rorn yakaknihato rorhu mkuko rim fak htamorko. To mirahko akfo amanyom, “Nkifra boririfhut bi be. Bi nhai wom yakitohkahtnom tfit tunom hatohnayuk fasoh yima yuhu bebmnn ahiknom.” Mirahko ndhtet yima yuhum ayaknom. Niko Bro Nkifrar hikwako tuko rpatn nahti duka nahti dukakfot. ¹⁴ “Tunn yak marnyewa kanjo inji womm yak marnyakfot.” Nkifra boririfhuthu mnat tot inji. ¹⁵ Be nd foh yaum nahti srthuwa kanjo inji nahti srthu haso-rahko be nhai rpat tohruhatko. Inji rinahatakhatu nathu mmbranirahko. Bro Nkifrarhu temperr be ndnatn tfit yoh nasohrahr.

¹⁶ Kfo hta mrokfot kfiwanko. Bro Nkifrarhu Yafothat yak htafo hanyuk yuharpat hik hakurahko, be nd fasoh yima yuhum yiho sinyaneft nd Yafothatn yak karhurahtn. ¹⁷ Nd fasoh yima yuhuri Bro Nkifrarhu Yafothathu dukefr nhai rpat nayak tkafkafh. Bro Nkifrarhu dukefr ror nndo. Fasoh yima yuhurhu dukefr ror nndo. Ndnetsn mano mano tohwafn tehwofm nikmoh yima yuhum. Dborioh nefm kangko ananom, to nhai nakahkomm. To tfit fasoh nefm niko hti hhrekwm tfit nd nefmn newuko. ¹⁸ Bro Nkifrarhu Yafotharpat yak hta bohtarahtko be htirahko boririfhut nhai tfit yak hta bohtaruhattko.

¹⁹ Nd fasoh yima yuhur rhuyuk nefm bi htiiyeteko. Fasoh yima yuhur yorhwa nefm to,

Ijoh tonanyeft.

Ijoh tonehato yihof href to be nd dukefrn tohetoh hasokfot.

²⁰ Nkifra tahi yifonroh kfo tatoneft.

Yima tipneft, grwasneft, fortawon, nd nd yakitohneft.

Womm be hti srthuneft.

Kfo nambur kfo hutnefm.

Womroh hifa hingrneft o wuskam o tamohm hti yuhurhato kfo yuhuweh-hato kfo wokneft.

Yima yuhum kaht kanjo wakur sinyaneft.

Nhai mfhat kasinyahato womm tamohm hti dukakfot.

Nayak mkuhato womm rom inji, womm rom inji, ndhtet tohneft.

²¹ Womroh hifa hingerneft o wuskam o tamohm hti yuhurhato yakneft.
Drin spak nefm.

Drin spakhato yaum kanjo yihom nakuyak mnakuyakneft.

Ndhtet ndhtet nefm.

Mrokfot to bi kфомoyanko tfit wompam kfiwanko. Ndhtet ndhtet fasoh nefm na haset yimam to mirahko Bro Nkifrarpo ka muhrahm Kraistr yawihna thombat. Tu be nhai mif.

²² Yimar Bro Nkifrarhu Yafothat ruhetr htirahrn:

Wom yimam hti dukarahrm.

Yindhor rifhurpno rhurahr.

Wommpno hifa hifa nayak marnyahato rhu marnyarahr.

Tamoh mrokfom wanyneft nhai be bmbri kaht kanjo wakuryakhato huttakniruhatr.

Hifa hifa yima yuhur womm hmbrearahrm.

Wom yimam yak marnya bomar-nyarahrm.

Rorhu wiyauyau nmbuhat hifa yau marnyahato kmi thofroh dukefm rorpar bro dukeft htarahr.

²³ Rorhu ruhefm, pthefm, ptha yima boyimarahrm.

Fasoh fasoh nefm duka hikhato yak hhrifnirahr.

Tom ndhtet net yimam Bro Nkifrarhu Yafothat korhtm. Nhai wom borir-ihut kfo mikaht, “Ndhtet nefm mirahko ananomm.” Nhai. ²⁴ Kraistrpno bi rim tohet yimam rroh fasoh fasoh yima yuhum bi Kraistr Jisasrhu bgre misn bi frdbkafmomm.

²⁵ Bi Bro Nkifrarhu Yafothatn nfri yima yuhur thu hmbremornom. Ndnnetnomn Bro Nkifrarhu Yafothat finji kfiwutnom be nd Yafothat kfoyuk yuhatn nom hikkfot. ²⁶ Mirahko akfo haghakahtnom womm wanyhato yima yuhum atifranjimm. Mirahko womroh hifa hingerneft o wuskam o tamohm htihato yima yuhum asinyanmom.

6

Fitohtet yewurit nuhte, ndhtet yewurit kekwo

¹ Bar yinouroko duka marnyafo hanykfot. Nikmoh womr htita-wokomr wom fasoh nefm yifir, niko womko, Bro Nkifrarhu Yafothatn nikmoh wiyauyau nmbuham yak hta bohtiwako, nikomn yihato hifa yima yuhur nd yimar kfo hta bohta marnya-kfot. To niko, nd yimar mrokfom kfo ptharahnomr, niko tuko duka marnyafo hanyhato womr kfo pthakfot. Satanr nikomn tfit rim suhnihatone hatone nhehruhatrko suhrahko. ² Tuko nahti duka nahti dukakfot. Nikmoh womm tamoh tamoh krehopam kekwo, niko womko yihato titanhofkfo. Tot tu Kraistr hiket yimaroh nefm.

³ Ni womn mirahn akfo amiya, “Na nd yimar kanjo krehopam yekwoyann na yi htiruhahr?” Ndhtet tngt ka be kfo fura twanhiwun. ⁴ Yima afo tunhu rhu wiyauyau nmbuham hti tungunahato ee kfo pthakfot. Tu hifa hifa korht ninhu rhu wiyauyau nmbuhat ee btn kfo yindhorneft hifa. To mirahn ninhu rhu wiyauyau nmbuhat hifa htihato tfit womr faso akfoyanr. ⁵ Ni womn tunhu wiyauyau nmbuhat hti yukatohaf hanykfot. Mirahn womrhu nefm htihato apthaya. Womr, ror turhu duka fijo rhurahr.

⁶ Fitoh yimarn Bro Nkifrarhu mrokfeft kak nuhasworko niko tawo maruham o wuskam o yeshrim ndm yakhato hekfot.

⁷ Mirahko aduka amanyom, “A, nhai mrokfom. Nom nhai bi wom boririfhut rhukahtnom. Tunmoh fijo wiyauyau thombat Bro Nkifrar nhai htiruhatrnom.” Ka Bro Nkifrarhu kusmt frsrfewuko? Na kfiwanko, be tu nhai mif. Tamohtet wuri fanm trufn o nuhte be ndhtet wuri fanm sinyarahm. Nhai tfit kekuthato womhtet wuri fanm sinyaruhatm. ⁸ Yimar turhu fasoh yima yuhur mhatoh fnahmor afo rhu yakitoh hanitr, nd yimar Bro Nkifrar yak hatohaforuhattrr kaht riyahr. Nd fasoh yima yuhur yak thuhato Bro Nkifrarhu Yafothathu dukefrn hiketr, be nd yimar tu Bro Nkifrar yak hatohaforuhattrr turpno mtoh nkifranirahr. ⁹ Ndnettn dborioh dborioh nefroh naneft nom nhai hhrekakhato yafho thukfot. Yakitoh kihhato Bro Nkifrar fitoh yiharn dborioh rhu nmbuhat heshombat nhai rim tohtaruhatnom. ¹⁰ Ndnettn nom Jisasr hiket yimanom wom yiham wom Jisasr hikwa yimam htihato kangnom, “Womm dborioh nefm ayak nuhasnomm,” nhai mrokfom. Yo nom wom wom yima bugamn dborioh nefm yak nuhaskfot.

Jisas Krairhu yufarpat kfo yuta hagrha yindhorkfot

¹¹ Ndar na asomif kforuha mrokfot tukanhu tire wandfamoyant. Nanhu wandfetem nd bro wandfafam. Wahtikahkomm duka marnyakfot! ¹² Wawanyko, nd nikmoha nia kfo pthiwa yimam yuwi duka kangm, “Tha pukneft akfokahtnomm Galesia thofm tha pukruhamn nom hingr-nayuk hingrneft Judam htiruhamn kfo yindhorrhahmnom.” Nd dukeftpno tha pukneft kak tkrurwomko. Duka kangm, “Kfo mirahnom, ‘Bi bgre misn nikmoh fasoh fasoh nefm Krair mfha htamorm.’ Inji kforah-nom Judam nhai hifa nyingam htaruhatmnom.” Nd dukeftpno inji kfiwumko. ¹³ Nd yimam rom tha puketm. To nhai Judaroh boririfhut hik marnyakahmt. Be yuwi kangm, “Wommn akfokahtnom, tha apukkahmn, Judam wanyruhamn kfo yindhoh mirahm, ‘O hifa hingrneft hingrnewum.’ ” ¹⁴ Na nhai inji kfo yindhorkfot. Nanhu kfo yindhorneft nanhu fasoh nefmn mfha htahemo yima Jisas Krairhu yufarpatn na kfo yuta hagrha yindhorkfot. Rorn nanhu fasoh nefm mfha htamotrm nhai wom dukakahanm ndar bbinysofthu fasoh nefm. Womrpmn ndar bbinysofthu nefm dukewamn nhai dukakahmt Jisasr mfha htamo nmbuhat. ¹⁵ Arihat Bro Nkifrar nhai tha puket yimam o tha puk duha yimam htihato yindhorkahr. Nhai. Yimar tu Bro Nkifrar yima yuhu yak wus bowuswam, tom ndhtet ruhet yimamn Bro Nkifrar hti yindhorrwor. ¹⁶ Ndhtet ruhet yimam hti yuhuwafruhamn yak marnya bomarnyahato Bro Nkifrarhu yon kunys rhurahm. ¹⁷ Na nhai wom wofnkaha yimam tfit wom krhopam hanyeft. Bi yonmari fhu gifa trukt harhuwa. Nd fhu gifa trukt kfiwut na Jisasrhu hingrna yimaya. ¹⁸ Be injirpa nanhu mrokfom. Warhutwako. Bro Nkifrar kukatohaf hanitworko.

Efesus thofroh gontwat Porr dwandfakhato htamot Barkof kfo nuhas mrokfom

Ndar gontwat Porr kalabus tohhato wandfamort. Be wandfamortn Tikikusr hiyafmotr rorn Efesus thofm hanyhemor. Porr hus bro dukeffpno ndar gontwat wandfamortn Efesus thofmpno htamot. Barkof kfo nuhas mrokfot kfo memorm, “Kto ndar mounti bbinysoft yorhwa tamoh tamohm Bro Nkifrar yakruharm tfit Kraistrhu tirtn htarahrm. Be tfit Kraistrhu yinhitn rhurahm” (1.10). Ndm kfo nuhashato kfo bmta mrokfom hemorm. Kfo memorm, “Ndar niko htita tamoh tamohm mount yorhwam yo bbinysoft yorhwam kto Kraistrhu yinhitn be rhu bugarahm. Ndnnetn niko be rpa yima yuhurpar rhu bugahato Jisas Kraistrpno frtkafhato tohkfot.”

Barkof mrokfom Porr pthamom afo nd rpa yima yuhuroh toh nmbuham ndm afo pthamor. Kfo memorm, “Bro Yifemr kfo hta memorm, nom rorhu yon kunyenom. Turhu yon Jisas Kraistrn nom hatohyuk fasoh fasoh nefm fak wus bowusthumorm. Yima yuhum wutham rhumotm, Bro Nkifrarhu Yafothat niahato mithu nawohhato nmoh rhu nmbuham hifa rhuhato rpa yima yuhur korhnom.” Wuroh mrokfot Porr nd kfomot kfo memorm, “Niko bi Kraistrpno nayakitohhato tohwoko, ndnetn wommpno nayak marnyahato toh marnyakfot.”

Nd Kraistrpno nayakitohhato wommpno nayak marnyahato tohneft Porr bok kfo nhombra mrokfom kfomorm. Barkoft kfo nhombra memorm, “Sioskfot yimar kanjo inji korht. Tu Kraistrn mfhayer. Sioskfot o Kristenm tir wuru nd ndem.” Yo womt kfo memorm, “Sioskfot kunyr kanjo korht. Kraistr dany rahur kanjo tohhato nd sioskfot hatohwort. Kristen yimam nd dany rahur hatohwa kunyrhu wohnfa hegir tik nd ndem.” Yo womt mett kfo nhombramor. Kfo memorm, “Sioskfot metet. Kraistrn ramemorm.” Nd nd kfo nhombra mrokfom kfo hta bohtamorm. Porrhu bro dukefr Kraistr yuhuwafhato yura bgre mis mnohhato fasoh fasoh nefm yak thuhato yiha yiha yak marnya bomarnyewa yuhamn ndm kfo nuhas bonuhasmorm Efesus thofm.

Kraistrhu kkupaye Bro Nkifrar fak wus bowus thumorm yimaroh fasoh fasoh nefm

(Sapta 1–3)

¹ Na Pora, na Jisas Kraistrhu aposer hingrneft tohwa. Tu Bro Nkifrar nd hingrneft fak htamora. Nann ndar gontwat niko Efesus thofkmoh yufatpno htefiwant. Niko Bro Nkifrar hikhato Jisas Kraistrpno rpat tir nayakitohhato tohwoko, nikmoh yufampno ndar gontwat niewut. ² Bro Yifemri nmoh Nungohtet Jisas Kraistr ayak marnya bomarnyakahtfko nikmoh yima yuhum mirhurahtfko.

Nd rhu marnyayuk yafothar nomn bi kukatohwor

³ Bro Nkifrarhu yufat yuta yindhor boyindhorkfot. Bro Nkifrar nmoh Nungohtet Jisas Kraistrhu Yifemr. Nmoh toh nmbuhat Kraistrpno nayakitohhato hifa tohwahtnom Bro Nkifrar inji htihato nd hefen rifhur yorhwa dborioh dborioh wuskar yak hirahrm. ⁴ Bi ndar bbinysoft tafi hingrna duha bi Bro Nkifrar kfo hta memorm, Kraistrpno tir nayakitoh-ruhanomn tu

Bro Nkifrar kanjo rhuhato yima yuhum wutham rhuruhamn nhai wom kspitefenm rhuruhatm. Bingot Bro Nkifrarhu yima yuhur bi nompno riruhakmor. ⁵ Ndnetn yima yuhur bi Jisasrn duka hta memor, “Jisasrn nohruhatr nd rroh yarim fnahna yuhat yak nukakruhattr be nd yiha nanpno yarim fnahnehato nanhu yufatn rhurahm.” Inji duka htamor. ⁶ Bro Nkifrar nmoh rhu beb nmbuhat htihato be tu bro yuhuwafeft rhumotr. Ndnatn turhu marbit htamoa yonr yakmorr nd yuhatn htamorr. Nd yonr inji htamohat nhai wom dukefm yakitohrmor. Bro yindhoreftpno htamorr. Nom nd Bro Nkifrar yuhuwafmo nmbuhat mhtiyakhato Bro Nkifrar be tu mfro kfo yindhor boyindhorhato rorhu yufat yuta yindhorkfot.

⁷ Bro Nkifrar nom be tu mfro mif yuhuwafhato rorhu yon Jisas Kraistr nahato nmoh fasoh fasoh nefm rorn suh nanyormotr nd fasoh nefm wuthanimom. Bro Nkifrar be mong troh bugamorm nmoh fasoh nefm. ⁸ Bro Nkifrar yuhuwafmo nmbuhat finji kforuhanom? Rorhu yuhuwaf nmbuhat be tu bro mift rhumotr. Bro Nkifrarhu riduka aduka yima yuhur be tu bro mifr. Hingrneft finji yiraht o ruheft finji rhuruhat ndm bi yak tkafetm kakitohworm. ⁹ Kraistrpno hingrnamo hingrneftn fak dukamot-nom rorhu wom yima yuhur rhu kafrohmoa dukefr. Nd dukefr be rorhu yima yuhurpar duka htatamorrn be rhumour. Nd yiha mfrpskenamor. ¹⁰ Bro Nkifrarhu yima yuhur yorhwa bro yima yuhur to be bi inji rhu hik hanitr. Rhu hikhany rhu hik hanyruharn nd tur bi duka htayuk yiharn be nd mounti bbinysoft yorhwa tamoh tamohm be Kraistrhu tirtn htaruharm be Kraistrhu yinhit rhu bugarahm.

¹¹ Bro Nkifrar bi tur duka htayuk dukeft hikwarn tamoh tamoh nefm rorhu dukefrn rhu hik hanitm. Nom Judanom to nhaf bi tu Bro Nkifrarhu dukefrn memor, “Nd kmim Kraistrpno tir nayakitohruhamn Bro Nkifrarhu yon mifm rhurahm.” ¹² Nom Juda-nomn tu barkof kminom Kraistrhu mrokfom yakhato hikmonomm. Nom nd kminomn bro nuka nanyjareft hatohet Bro Nkifrarhu yufat yutahato kfo yindhor boyindhorkfot.

¹³ Niko yima tangiko to bi wanye-teko gutnius mrokfot. Nd mrokfot wanyhato hikmotkومت, Bro Nkifrar inji htihato fakmorko. Yakhato nikomi nom bi Bro Nkifrarhu yon bugayenom. Bro Nkifrar tur kfo htayuk mrokfot hikhato turhu Yafothat thu hmbremorko. Bro Nkifrarhu Yafothat hatohet yimam to be bi Bro Nkifrarhu yimayem. ¹⁴ Nom Bro Nkifrarhu Yafothat yakmo yimanom to bi tot barkof htatehyuk minghat. Ndt nom mhtiyakhato duka mekfot, froh frohnom bi Bro Nkifrar yakhato bi rim tohni bugiwanom Bro Nkifrarpno mrhuruhanomn hirahrnom nmoh yufampno yorhwa tamoh tamohm. Ndt pno nom nd bro nuka nanyjareft hatohet Bro Nkifrarhu yufat yutahato kfo yindhor boyindhorkfot.

Porr kfo bruttnamo yuhathu kfo nuhas mrokfom

¹⁵ Na wanyakmoya niko nmoh Nungohtet Jisasrhu mrokfom wany yakiohato hikwa yuhat yo Bro Nkifrar hikwa yimam niko yak marnyewa nmbuham. ¹⁶ Nd ndm wanyakhato na kfo bruttna thombat Bro Nkifrar nikmoh yufam yutahato kfo yindhor-wanr. ¹⁷ Nmoh Nungohtet Jisas Kraistrhu Bro Nkifrar, tu bro nuka nanyjareft hatohet Bro Yifemr kfo bruttna thombat kfo kangar, “O tunga Nkifraye, nmoh Bro Yifeme wayak hta bohtakahnm riduka aduka yima yuhum wahanym. Wahekahtnm ninhu mrokfothu yimbu yuhat yak-rahmt. Yakhato mhti dukakrahmn.

Mhti dukakruhamn ninpno nia tohrahm.” ¹⁸ Yo womt na Bro Nkifrar-pno kfo bruttnewat kfo kangar; “Bro Nkifraye wom riduka aduka yima yuhum wahekahtnm, ninhu naku tngr htafmor nhai yak mmotaruhatmr. Yima yuhum wahekahtnm duka mirahm, ‘Bro Nkifrar nakumohat, nmoh rhu nmbuhathu yak marnya nmbuha yuhatn nakumornom. Nom rorhu mrokfom hikhato rorhu Kristen yimanom tohwatnom dborioh rhu nmbuhat hirahrnom. Nd dukefrn nakumornom. ¹⁹ Dborioh rhu nmbuhat yakruhanomn Bro Nkifrarhu bro bbukeft nierahtnom nom Kristennom.’” Nd bro bbukeft nompno hingrniwat, ²⁰ to nd bro bbukeftn hingrnamot Kraistr nohmohat. Kraistr bi nohniyetr to Bro Nkifrarhu bbukeftn kfomot Kraistr tfit myenyjwohato Bro Nkifrar yaknimorr hefenr hamuhhato tirmifko htamorr. ²¹ Kraistr tu Bro Nkifrarhu tirmifko yorhwatr bro bbukeft korhtr. Kminy-sofroh nkiframi hefenr yorhwa mounmotm rorn yura mtohekworm. Nd bro yimam, gafman yimam, nd bro yufet bro yufet yimam rorpar toh wasitrm. Arihat yorhwam yo kto rhuruham be rorpar toh wasi hany-rahm. ²² Tamoh tamoh hingrnefm, rhu nmbuham, o tamoh tamohm Bro Nkifrar to bi Kraistrparhu tirtn htamorm. Rorn yura mtohekworm bi. Ndnetn Kraistrn sioshu tohak yimar fak htamor. ²³ Nom sioshu tuhan yindarinom Kraistrn nmoh yima mrokfo rifuher. Sioshu tuhan yindarinmoh rhu nmbuhat yau nmbuhat Kraistrn kakitohwort mnat.

2

Bro Nkifrar nmoh yafotham yakmorm kafknehemornom

¹ Bingot tukmoh hanyjbornahato fasoh fasoh nefroh naneftpno yima yafotham bi frnahmomm bi hel yita yihotarn bi yi hanyomom. ² Ndar bbinysofthu fasoh fasoh nefm niko yakitohhato na hnamoam, to ndar bbinysoft yakitohwa tmb nyingetr; kutewumr Satanr, rorhu nefm fak hik hnamoko. Bro Nkifrar hanyjborniwa yimaroh toh nmbuham rorn kak hta bohta hnewurm. ³ Nom buga to nd nefm toh bugamonomm. Tunom mhatoh fnahyuk fasoh nefm fakitoh hnamonom. Bi nd tunom nayuk fasoh fasoh nefm yak hikafmotmm nmoh yafotham fnahhato bi hel yita yihotar bi fak mmbrafiny hanyomom. Be wom yimam kanjo mekahnom nd nefrpam atoh hik hanyomom to be Bro Nkifrarhu namburpam yakrfonom.

⁴ To hifa Bro Nkifrarhu hti dukefti yuhuwafeft tu brot rhumot. ⁵ Kraistr-pno nayakitohmotnom nd nmoh yafotham yak mmbrafinyomom, Bro Nkifrar yakmormn tfit kafknehe-mornom. Hifa Bro Nkifrar hti yuhuwafhato fakmornom. ⁶ Bi Kraistrpno tir nayakitohetnomn to be Bro Nkifrar kafknehemornom. Kafknehato rpat Kraistr Jisasrpn hefenrhu king hingrneft kakitohnuhiwunomr. ⁷ Nd Bro Nkifrar nom hti dukahato Kraistr hemohat, rorhu tu bro yuhuwaf nmbuhat rhumotn fak nuhasmornom. Duka memor, “Kto toh hanyuk yimam ndt duka hanyhato ptha tndh hanyrahmt nanhu yuhuwaf nmbuhat.” ⁸⁻⁹ Ndt nhai tukomn fitoh fitoh yuham yihato Bro Nkifrar htihato yakmiyakrmorko. Nhai. Ndnetn mirahr wom yimar sinyakahann akfo hagrhaya. Nikmoh yima yuhum Kraistr bro dukefm htahato hikmo yuhatn Bro Nkifrar hti yuhuwafhato fakmorko. ¹⁰ Jisas Kraistr nohmotr to be nd yuhatn Bro Nkifrar htihato nmoh yima yuhum yak marnya bomarnyamormn memor, “Na dukewa dborioh dukef yuhatn tfit toh hikrahm.”

Kraisr hnamorr gbhu mtir

¹¹ Niko yima tangiko, niko tfit wamdukaktwakomt niko tafi Bro Nkifrar pno yarim fnahna duhatko tohmohat. Nikmoh nkifram nhai Judam kanjo tha puk hnarmom. Nd yuhatn Judam kutewumko tha puk duha yima tangim. ¹² Niko Kraisr pno tafi nayakitoh duha, nhai bi Bro Nkifrar kfo htayuk kmi Isrerpno bi fkehato rompno nabnothato tohrmoko. Nhai. Niko be inji yau fohm kanjo tohtamoko. Bi frohmn hti dukahato yakrmomko. Bro Nkifrar Isrerpno nakfo tahihato kfo memohat, “Niko Isrerkomn nanhu tannefen mif mifeko.” Inji nakfo tahimohat niko nhai bi yakrmorko Bro Nkifrar. Ndnnetn Isrerm yak marnyamo kanjo nhai yak marnya hnarmorko. ¹³ To tfit arihatn Kraisr nohmo yuhatn Kraisr pno tir nayakitoh-hato Bro Nkifrar pno brbo tohwoko. ¹⁴ Kraisr nd gbhu mtir hnamorr. Rorn Judami yima tangim yakhato rpat fak htamorm. Barkofpam afo Isrermi yima tangim Mosesr yakmo nkifra boririfhuthu hik yuhamn fak tndohmotm. Yak tndohhato nahti dbnotmoum. Tfit Kraisr nohhato rorn gbhur hnehato rpat fak htamornom. ¹⁵ Kraisr niahato nd Mosesr pno yakyuk boririfhu mrokfomi wom kfo yirmoh mrokfom rpat fak thumorm. Nhai be sfno. Barkofpam afo nd boririfhutn Isrermi yima tangim fak tndohmotm. Kraisr nd boririfhut yak thumortn be tfit rorpno rpat fak htamorm. Nhai wom nakfo yiriti inji nakahm. Be bi rpat rhu yemka inji newum. ¹⁶ To be bi Kraisr n yura bgre mis mnohhato Isrermi yima tangim yak nhafohhato rpat fak htamorm. Rpat yak htahato be Bro Nkifrar pno rinayakmiyahato rinfak nanymakmorm. ¹⁷ Kraisr bbinysofko yawihnehato gutnius kfo ptha memor, “Niko kmi kmiko, nikompno nhai bi wom mro-kfom Bro Nkifrar pno. Bro Nkifrar pno nayakmiyahato nayak nanyama-rahko.” Nd tngr niko wuri ritohtewa yima tangipakomi Bro Nkifrar pno brbo toh tkafwa Isrer tangim, niko rpat dukahato nd tngr kfomorr. ¹⁸ Bro Nkifrarhu Yafotharpat bi hatoh nhombra bugewunom yima yimanom. Nd yihotar Bro Yifempno yiyukr Jisas Kraisr yak htakhemor, nd yima yimanom hatohwa Yafotharn hta tehak hanitrmom.

Kristenm Bro Nkifrar mithu nawohwa kunyem

¹⁹ Niko yima tangiko afo gobiyenm kanjo miswamn ttaf hnamoko, tfit arihat nhai bi inji rhukahko. Arihat bi bbinysofeteko. Bi nd Bro Nkifrar yakitohwa kmimpno bi fknihato bi rompno rpat tohwoko. ²⁰ Niko Bro Nkifrar hingrnayuk kunyrhu hegir, wohnfa, tikeko. Nom aposernomi profetm nd kunyrhu wohnfa rahuye-nom. Tu Kraisr dany rahuyer. ²¹ Tu Kraisr nd kunyrhu dany rahur tohhato kunyr hatohwatrr, kunyrhu hegir, tik, wohnfa, tamoh tamoh, rpat nathu dbkaf kihhato korhm. Nd kunyr Bro Nkifrar yuhre yiho hiyak hanitrr. Yiho hiyak hanitatrr kunyr tfit brota hanitr. Brorhu ye wussohyuk kunyr korhr nd kunyr. ²² Kraisr pno nayakitohwa yuhatn, to be Bro Nkifrar yekwarko nd rpat kak htewurko. To be Bro Nkifrarhu Yafothathu tohyuk kunyko korhko.

3

Porr gutnius mrokfot yima tangimpno hanyhato ptha htfasmo yuhat

¹ Na Pora, na Krai Jisasrhu hingrna yimaya. Na kalabus tohwohat nhai wom tamohmpno kalabus yak htarmoma. Kfo yamukota, yima tangi

furam bi Bro Nkifrapno fknihto tohwom. Inji kfiwuta kalabus fak htamoma. ² Na nikompno yihato gutnius mrokfothu kfo ptha nuhas hanyeft ka bi wanymoko. Bro Nkifrar niko hti yuhuwafhato nann fak htamor nikompno yihato kfo nuhas hanyeft. ³ Nd yima yuhur be Bro Nkifrarparhu yima yuhurpar rhumour. Kto nanrpa-yanpno fak nriyafmorr. Ndthu kfo nuhas mrokfom to bi ndar gontwathu barkof htamo mrokfomn kfo nuhas-moyanko. ⁴ Nd Bro Nkifrar Kraiser htafmo yuhathu kafrohet yima yuhur na yakmohat, ndar gontwat yorhwa mrokfom hti hik marnyewukomme, ee btn hti hikrahkomm na nd rorhu kafrohet mrokfom yakmo yuhat. ⁵ Bingot toh hnamo yiham Bro Nkifrar nhai wom yimampno kfo nriyaf hnarmorm rorhu yima yuhur rhuyuk mrokfom. Asot ariharpa tu Bro Nkifrarhu Yafothatn nom rorhu yak htamo aposernomi profetmpno kak nuhaswotnom nd kafrohet mrokfom. ⁶ Nd kfo kafrohet mrokfot inji kfiwut: Nd gutnius mrokfot nikompno yitat niko yakhato hikrahkomt, to be nd yuhatn nom Judanmoh skurfitn yarim fnahnerahko. Nompno yarim fnahnehato nompno rpat tohhato nom yakitohwa Nkifrarpar rpat yakitohrahnom. Kraiser rpat yakitohhato tohruha-nomn tamoh tamohm Bro Nkifrar kfo htayukm mekaht, ahiyanm, niko rpat yakrahnomm.

⁷ Bro Nkifrar nann hti yuhuwafhato fak htamora gutnius mrokfothu kfo ptha htfasneft. Nd hingneft yak htatahato gutnius mrokfothu kfo ptha htfasyuk mrokfo yafothar tu Bro Nkifrarhu bbukeft kfomot, nd mrokfo yafothar nann muhmo. ⁸ Barkopfam afo Kraiserhu sioskfot fak beb hnamoya. Inji nahnamota fasoh yufa bebt fak-moya. Tmift, Bro Nkifrarhu yuhuwaf nmbuhatn wom hingnafat fakmora. Yima tangiroh gutnius mrokfothu hanyeft dukahato nd hingerneft fakmora. Nd gutnius mrokfot, Kraiser nompno hinger na hta bohta marnyewa yihataroh gutnius mrokfoyet. ⁹ Bro Nkifrar ndar bbinysoft hingrnanimohat rorhu rhu kafrohet yima yuhur nhai tafont htarmotr yimam wany bugarmomr. Arihatn nd rorhu yima yuhur rhuyuk mrokfom nann kfomor kfo ptha htfasneft. ¹⁰ Arihat Judami yima tangim bi rpat fak nhafohmormn bi rpat Bro Nkifrapno fknihto rpat tohwom. Inji yak htamohat duka memor, “Kminysofroh nkiframi hefenr yorhwa mounmotm htirahmr nanhu riduka aduka yima yuhur rhu kafroh-moar.” ¹¹ Bi bingot Bro Nkifrar nd dukefr bi duka htamor. Tfit arihat nmoh Nungohtet Kraiser Jisarsrpo nd dukefr mfrfnahnamotr htimonom. ¹² Kraiserpno nayakitohhato rorparpno yima yuhum htarahnomm, to be nhai duka kinyaki hanyruhatnom Bro Nkifrapno brbo yihato tamohm kfo pthanef. ¹³ Niko mirahko tfit na yekwa krhopam mhtiyakhato gutnius aduka amanyom, “O, nom dukahato gutnius mrokfot kfo ptha nuhaswatnom Judam krhopam kahukmr. Nom be tmifnom nhai rorpo brbo yiruhah-nom.” Mirahko inji adukanom. Na nd gutnius mrokfot akfo ptha nuhas duha ziyanko niko nhai Kraiserhu dukefrn rhurfotko.

Efesus thofroh toh bmta nmbuhat Porr kfo bruttnamorm

¹⁴ Na Bro Yifemr bro riduka aduka yima yuhurpno namo bro neft mhti dukewoyann na bangu myuknahato kfo bruttnewanr. ¹⁵ Nom yima rinomror wany yakiohato tohwanom yo ror hiket yimam noh hanitam rorparhu yufatn toh bugewunom. ¹⁶ Na bangu myuknahato kfo bruttna kanga, bro nuka nanyjareft hatohet Bro Nkifrarhu Yafotharhu bbuka rifhur athu bmtarm nikmoh yima yuhum. ¹⁷ Yo niko Kraiser wany yakiohato

hikwa nmbuhat, ndt kfo bruttna kanga, Kraistr nikmoh yima yuhum rim rhuhatu athu yuhur-kahturko wompmpno nayak marnyahato tohneft yakitohruhakomtn toh bmtarahko mim bbinysoft nembfa thuhato toh bmtewa kanjo. ¹⁸ Niko be tu Kraistrhu marbi miftn korhko. Ndnnetann kanga niko, Kraistr hikwa yima bugako afo wahti dukakomr rorhu yima yuhur. Be inji rihtewurkon o marbi mif mift htewurko? Kanga afo tukomn wahti dukakomtr ror yima hti yuhuwafwa nmbuhat. ¹⁹ Rorhu yima yuhuwafeft nhai yima mifnom yima yuhuwafwa kanjo inji yima yuhuwafkahr. Nhai. Rorhu yima yuhuwafeft nndo. Na kanga Kraistr yakitohwa yima yuhuwafeft ahikahturko ndt niko wayakitohko. Nd yima yuhuwafeft wayakitohkahkomn to be nd Bro Nkifrarhu nefrpam rhu-rahmko. ²⁰ Bro Nkifrar wukfo ttiwonrahnom rorhu bbuka rifhurhanyefte, to be nd bbuka rifhur yakrahnomr. ²¹ Ndnnett tu Kraistrpno frtkafwa met yindarim Kraistr nom nrfa htiyakmo yuhatn yiha yiha kfo yuta yindhorhany, kfo yuta yindhorhanye to be inji.

Bro Nkifrarhu nefm hikhato wompmpno nayak marnyahato rpat tohkfot

4

(Sapta 4–6)

Wompmpno nayak marnyahato rpat tohneft

¹ Na Pora, na kalabus tohwohat, Brorhu hingrneft uhatone hatonemoatant kalabus fakmoma. Bro Nkifrar memor; “Nanhu yonm tohrahm,” ndnetrn nakumorko. Na kfo bmta mrokfot kahukanko. Hifa nd niko womkompno ziyuk naku tngt wany fakiomokomt. To be niko mirahko tfit finji ananom, be nd naku tngt htafyuk dukefrpar toh hikkfot. ² Wom Kristenmpno be dborioh yima yuhurparpno nayak marnyahato rpat rhu marnya bomarnyakfot. Toh nmbuhat be noh hmbre yima yuhur-pno tohkfot. Wom Kristenmpno kfo ptha yima boyima marnyakfot. Tamoh nefm be yak marsisakfot. ³ Bro Nkifrarhu Yafothatn hemotnom wompmpno nayak marnyahato rpat tohneft. Nd neftn rpat dbkaf hmbritattnom be rpat rhuhatu rpa yima yuhur korhnom. Ndnnett nd neft yakitoh nhirtakfot. ⁴ Nom Kraistr hikwa yimanom rpa yon kunyenom yo Yafothat rpa Bro Nkifrarhu Yafotharpat kahukrnom. Rpa yima Kraistrhu duka dukahato tohneftn Bro Nkifrar nakumornom. ⁵ Kraistr torpar nmoh Bro Nungothetr. Gutniuskfot nhaf rpa gutniuskforpat nom yakitohhato hikwonom. Yo rpa yufarpatpno baftais kekwonom. ⁶ Rpa Nkifrarpar tohwor. Nd Nkifrarpar tor yima buganmoh Yifemr. Rorrpa mifr brohato nyingako tohekwor. Rorrpar tuhan yindariroh yima yuhum rhuhatu kangrm inji waiko, inji wahingrnako, nd nd nefm wanako. Yo nd Nkifrarpar korhrm rorhu mrokfot hikwa yimam.

⁷ Mrokfot rot kfo kangt nom rpa thatipenom. To rpa rpa yimanom Bro Nkifrarhu hingrneftn Kraistr htamor-nom. Turn hti nhtahato fitoh hingrneftn hingrna tafs marnyewunom, to be nd hingrneftu hingrna yafothat yahu-katrnom hingrnawunom. ⁸ To be Kraistr inji yak nhtahato yimam inji yak hta nhombriwohat to be bro gonborngt kfiwa yuhatn Kraistr yimam inji kak hta nhombewurm. To gon-borngt kfo kangt: “Ror yura kmiko muhmohat,

nd ror hikakhato yak nhafohmo yahr kmimm hamuhmor. Turn hatohakmorm.

Yura mhtahato wuskam yak-morm kmi thofm fak nhtahemor.”* *Sng 68.18*
 9 To nd mrokfo nmbuhat kfo yamuka “yura kmiko muhmohat” nd mrokfote finji dukahato nd mrokfo nmbuhat inji kфомomt? Ndt to afo yiro ndar bbinysofthu kmi rifhut yohnemorn tfit kto yura muhmor.† 10 Nd yima Jisasr yiro yohnemor, yohnehato tfit muhmor. Tu Bro Nkifrar yorhwa tu kmi hefenr muhmor. Yura mrhuhato ndar yuht bbinysofti mount thu nhombra buga-morf. 11 Rorrparn ndar bbinysofthu yimam hingrna yafothar yo mrokfo ptha yafothar o tamoh tamoh nefm hi hanitrm. Womm aposer hingrnefthu hingrna yafothat hi hanitrm, womm profet hingrneft hingrnayuk hingrna yafothar hi hanitrm, womm gutnius mrokfothu ptha htfasyuk mrokfo rifhur hi hanitrm, wommne pasto hingrnefthu hingrnayuk hingrna yafothar hihato nd hingrneft tohato Bro Nkifrarhu rfa borngt kfiwa mrokfem kfo hta bohtewumm. 12 Kraiser nd hingrna yafothar hi hanitahat kangr, “Nd hingrna yafothar bi ahi hanyahtanm, Bro Nkifrarhu hingrneft hingrna hik marnyarahmt. Nd rom hingrna hta bohtarua hingrnef yuhamn rroh Kristen toh yuham bmfem yakni hanyrahm.” 13 Nd hingrneft be hingr-nahany hingrnahany, be Kraiserhu hik yuhathu rpa yima yuhurpar ruhato Bro Nkifrarhu Yonr dukiwa dukefr, hingrnewa hingrneft, niwa nefr, hti hik bohik bugarahnomr. Be ndnatn nd Kristen yihotar mtoh trpnirahnomr. Mtoh trpnihato be tu Kraiser tohwa toheft kanjo toh hikrahnom. 14 Inji toh hikrahnom, to be nhai tfit yon mumenm kanjo toh mmoruhatnom. Nhais toh mmo hasohato mfrnhehyuk yimam niahato frnheh bonhehaknehato dohm wifort frhammohato doh mfar nndo yukatohwa kanjo nndo yak yukatohruhatnom. Nhais. 15 Nom rom kfo nhehwa kfo nheheft yakitoh duha. Nom yima yak marnyaneft yakitohhato tamoh mrokfom womm kfo nef, mrokfom kfo mifkfot. Ndhete nefm nahanyruhanomn nmoh tohefm nd yuhamn yi marnykniruhamn be Kraiserhu tohefm yakrahnom. Ror yura mfhayer, 16 tir wura nd ndm nd rpa mfarpat hatohwotm. Nd mfhat kfiwut tirthu hingrneft hingrnewutt yo mfhat kfiwut wurathu hingrneft hingrnewutt o tamoh tamoh mfarpat hikwamn hingrnefm hingrnewumm nhais tum nnakfo nnakahm. Nhais. Tum nahti duka nahti dukewamm nd thapti rhu marnyewatn warhiwut.

Kristenm nfri nefm yakitohkfot

17 Ndnnetn wom mrokfot kfiwanko. Bro Nungothetrhu yufatpno kfo nnhuwanko. Mirahko tfit Bro Nkifrarhu mrokfom yakitoh duha yita yima tangim kanjo atohnom. Nd yimaroh dukefm nhais tu rhu digr yima yuhumpno rhukahmm. Nhais. Be inji duka mmbrafiny yima yuhumpno korhwom. 18 Roh dukefm be inji nkrtn korhmm. Bro Nkifrarhu mrokfom mhamuh tfanihato mong trohwomr. Ndnnetn nhais Bro Nkifrarpro brbo yikahm. Be inji wuri korhm. 19 Tamoh tamoh nefroh nanefst nhais wom yimtna hanykahm. Tu be nhais mif. Yima yuhum be tohetohwomm, nhais ritohakahm. Nndo yaum nhombrewum. Nhais yimat tuhant yakitohkahmt, o froht. Nhais.

* 4:8: Wuskam ror yakhato yak nhtamom, ndm nom yahuka yafotham kфомor. † 4:9: Ndar bbinysofthu kmi rifhut ror yohnemor, ndte yiro Maringour yohnemo yuhathu mrokfoyet.

²⁰ Kraisrhu mrokfom niko yimam nia kfo nuhasmom, nhai marimomko, “Yima tangim niwa nefm wahiktwako.” Nhai. ²¹ Rom Jisasn hti yindhorna nefm kfo nuhas memomko, “Jisasn nd nd nefm hti yindhorna. Ndm yakitoh-kfot.” ²² Kraisrhu mrokfom inji korhm: bingot niko afo nd fasoh yima yuhuru nefm, nd womroh tamohm hti yuhur hanyeft, ndm yakitoh hnamokomm bi nd nefm bi fasoh tkitt hta hany sitamomko. Ndnetn nd niko hatohwa fasoh yima yuhuru nefm mong troh bugakfot. Yak thu bugakfot. ²³ Tfit nfri yima yuhur yakkfot. ²⁴ Nfri yima rifhur yakkfot. Nd nfri yima rifhurhu toheft tu Bro Nkifarn kak htewartn turhu tu dborioh toheft kanjo korht. Nd nfri toh nmbuhat tu Bro Nkifrarhu toheft toh hikwot. Ndnatn Bro Nkifrar yindhorna.

²⁵ Nd womroh kfo nneh, frnhed nefm be tmifm ayohnitwam. Mirahko ayakitohomm. Niko bi rpa thatipeko, ndnetn womm tamoh mrokfom kfiwukomme, tu kfot kfokfot. ²⁶ Womr tamohm yak nhehtrn yima yuhur namburworn, to mirahn nd nambur rifhur be tfit faso arhuni bugar. Mirahn nd nambur rifhur aharhu krifafoyanr. ²⁷ Inji narahn to be Satanr hta tehakrah. ²⁸ Rikoh yimam mirahm tfit arikohom. Rom tum hingrnakfot. Tum hingrnahato turoh tirehm yakhatu womm hekfo. ²⁹ Mirahko fasoh fasoh tng bebm akfo pthakahtom womroh yima yuhum akrho htatamm. Dborioh mrokforpam kfo ptharuhatu womm wanyruhamn yima yuhum thu jubtwarahm. ³⁰ Mirahko Bro Nkifrarhu Yafothat ahta krhonomt. Bro Nkifrar nom tanrfak thombat, to tot bi barkof yak nuhasyuk minghat bi turhu Yafothat hi hanitrom. ³¹ Ndnetn nd fasoh yima rifhur mfnahnewa yima kfo mari hany nefenm, yimampno namburhato nakfo hutnefenm, yimaroh kfo yukioh boyukioh nefenm, nd nd nefenm wayafho bugakomm. ³² Be dborioh yima yuhurpno, dborioh nefrpampno wom Kristenmpno yuhuwafhatu rhukfot. Womm tamoh nefm newumko niko tfit dukahany juha. Kraisr nohhatu Bro Nkifrar niko namo fasoh nefm yafhohemo kanjo womm nayuk nefm yafhohekfo.

5

Mar nukeft tohkfo

¹ Bro Nkifrar hifa hti dukewarko, rorhu yonko korhko. Ndnetn nikmoh rhu nmbuham be tur dukewa dukef yuhatn rhu hikkfot. ² Kraisrhu bro yima yuhur nompno rhomour. Nd dukeftpno rorn nohmor nom dukahato. Rorhu noh nmbuhat yimot dborioh narotwa gbet yemror Bro Nkifrar tarioh narotwewa kanjo. Ndnetn nom tawo womm hifa yima yuhur htakfot. ³ Niko to bi Bro Nkifrapno fknihat bi rorhu yoneko. Be inji rorhu yonko rhu mif mifkfo. Mirahko tfit met yindarim nayak kafroh htaswa nefm tfit ahiknom. Yo mirahko yima yuhum wabbrekwa nefm ahiknom. Yo mirahko be maruha dukefrn arhunom. Nd maruha dukefm yorhwakomm nhai Bro Nkifrar dukakahkomr. ⁴ Mirahko womm akfo dbotna bodbotnanomm. Yo mirahko womm fasoh mrokfom akfonom. Yo mirahko fasoh fasoh nakfo ddonom. Ndhett nefm tohetnomn Bro Nkifrar fakmornom. Ndnetnomn nom be ruhato Bro Nkifrar kfo bruttna yindhorkfot. ⁵ Na kfo mifwankom, yimam o metm rine auniyetm o yimaroh yima yuhum fasoh nefroh nanefn be tohetoh hasiwam o maruha dukefrpar yorhwam, ndhett yimam nhai Bro Nkifra Kraisrof kfoyuk tamoh tamohm yakruhatm. Nd nd nefm lotutwomm

nkifra tahim kanjo. Dukefm be nd dukefm korhm, nhai Bro Nkifrarhu dukefm rhukahm.

⁶ Niko waduka marnya hanyswako. Ndhtet ndhtet net yimam mfrnhehak-ruhatmko rim suhnirahko. Bro Nkifrar ndhtet ndhtet net nefm hikwa yimam namburworm. ⁷ Ndnettn mirahko rompno nabnothato rpat awiyauyau-nom, tu be nhai mif. ⁸ Niko to rom kanjo afo yiro kspitatn tohmouko. Tfit bi ariha bi Bro Nungothetrhu tuhan yindariyeko. Bi rorhu mar nukeft tohwoko. Ndnettn niko mar nukeft tohwa yimam kanjo tohkfot. ⁹ Mar nukeft dborioh dborioh nefm mhfnah-newutm. Nhai yau nmbuham, pthefm, rhu nmbuham, faso faso rine wunekfot. Nhai mikfota mkfotakfot. ¹⁰ Tamoh tamoh nefm nhombra bonhombrawon-kfot. Fitohe neft Bro Nkifrar hti wofnwor, be nd nefrpat yakitohkfot. ¹¹ Mirahko ndhtet kspitathu nefm nayet yimampno nabnot habrinyom. Nhai. Ndhtet yimam htikomm tfit kfo hta mekfot, “Bar yinowe, ndhtet neft ni niwat fasohet. Wayafhont.” Nikomn tfit inji kfo htakfot. ¹² Rom niwa nefm tu fasoh yima nyingatik duha hnomha nef mifm newum. Na yimtnewa rom niwa nefm nikom kfo ptha nuhasneft. ¹³ To nd Bro Nkifrarhu nukeft, to nd nukeftn nd tamoh tamoh nefroh mnayukm tafon mar nukatn korhm. ¹⁴ Wom shrt bi marrhu nukeft fekt, to be nd shrt tfit mar nukeft hatohwott. Ndnettn wom mrokfot kfo kangt,

“Ni yima hwes rhut hwes rhut rhu hasiwa,
be tmifn wamfryurnikahnn wasinya warhun.

Yima yopt wathu trohkahtnt,

Kraisrhu nukeft yakrahtn.”

Aisaia 26.19, 60.1

¹⁵ Ndnettn nikmoh rhu toh nmbuham duka marnyahato tohkfot. Mirahko dukef duha yimam kanjo arhu mmo bammonom. Tu yima duket yimam kanjo tohkfot. ¹⁶ Arihat yimam be tu fasoh nefm fknitamn fasoh nefrpam korhmm. Ndnettn yima duket yimam kanjo tohhato dukef duha yimam kfo hta bohta marnyaf hanykfot. ¹⁷ Mirahko be mmom kanjo tamoh tamoh nefm mtusohnihato amhik fura bofurakninomm. Bro Nungothetrhu dukefr mhti hikak hanyhato hikkfot. Ror finji finji kak htewurn be ror yakhtiwa yuhatn hikkfot.

¹⁸ Mirahko drinkfot masat masat aye mmokahnomn ammo bammonom. Inji narahko to be nikmoh rhu nmbuhat nhai hifa rhuruhatt. Bro Nkifrarhu Yafothatn yuht yimako thu nhombrahato be nd Yafothatn yak hta bohtakfot. ¹⁹ Yimampno rifinyhato lotuneft, Windoh Gonborngthu windoh mrokfompno windohnhokfot yo Bro Nkifrarhu windoh furam windohnhokfot. Niko Bro Nkifrar kfo yindhorhato Windoh Gonborngthu windohm yo nd Bro Nkifrarhu windoh furam, nd nd windohm windohkfot. ²⁰ Yiha yiha nmoh Nungothet Jisas Kraisrhu yufatpno Bro Yifemr tamoh tamoh nefm kfo yindhor buga bugakfot.

Porr pthamort ramet tuhanmi tuhanet yindariroh mrokfot

²¹ Niko Kraisrhu yinhit toh buge-wuko. Ndnettn niko tuko Kristenko nawany yakio nawany yakiokfot. Nawany marsisa duha. ²² Niko Kristen metko, Jisasrhu yinhit tohwa kanjo yindariroh yinhitn rhuhatn roh tngm hikkfot. ²³ Nhai sfno inji kfokahanko. Kraisr sioshu mfhako tohwa kanjo yindarimm metroh mfhako tohwom. Sios Kraisrhu thatipet ndnettn nnrfa hbhamort. ²⁴ Sioskfot tu Kraisrhu yinhitn korht. Ndnettn niko metko nd yuhat hikhato tukmoh yindariroh yinhitn rhu hanykfot.

²⁵ Niko yindariko tukmoh metm marbitn htakfot. Sioskfotn Kraistr marbit htahato mfha htamo kanjo niko yindariko ndhtet dukefr yakhato nikmoh metm marbit htakfot. ²⁶ Ror inji namohat Bro Nkifrarhu yufatpno yimaroh yak htaneftn inji namor. Rom rorhu mrokfot yakhato hikmo yuhatn yo baftais yakmo yuhatn Kraistr fak wus bowus marnyamormn yima yuhum wutham rhumomm. ²⁷ Rorhu dukeft nhai wofnrmor sioskfot wuspenm o krtafenm rhukfot. Rorhu dukeft memor, “Be inji Bro Nkifrar yorhwa ruheft kanjo arhukahmn nhai wom tamoh nefenm rhukfot.” ²⁸ Ndnnetn niko yindariko tukmoh thatipm yak marnyiwa kanjo tukmoh metm yak marnyakfot. Yimar turhu mett yak marnyiwar, nd yimar turhu thatipt hti wofnhato yak marnyiwa kanjo inji kak marnyewurt mett. ²⁹ Nhai wom yimar turhu thatipt tfit turn krjbowur inji nakahrt. Nhai. Rot yak marnya bomarnyiwartn yeshri kahukrt. Kraistr sioskfot yak marnyiwa kanjo inji newurt turhu thatipt. ³⁰ Nom Kraistrhu thatipthu tir, wura, nyinga nd ndenom. ³¹ Bro Nkifrarhu gonborngt kfo kangt, “Ndnnetn yindarir turhu yifammam htanyhato turhu yak tuhantpno frtkafhato rpat tohkfot rpa yimar kanjo. Nhai tfit husf tfit rhukfot.” ³² Nd kfo nhombra mrokfot tu bro mnetet. Nd kfo nhombra mrokfot kfiwut Kraistr rorhu sioskfot o ror hikwa met yindarim. ³³ To mirahko nd mrokfot ka Kraistr ror hikwa yimarpampno kitwot nd mrokfot. Nhai. Nd mrokfot to rpat kitwot niko rpa rpa yimako yo rpa rpa metko. Ni yindarin, tunhu yak gb tuhant marbit htakfot. Tunhu thatipt yak marnyiwa kanjo mett inji yak marnyahato yakitohkfot. Yo ni metn tamoh nefm naruha, tunhu yindarir mhiti yakrmiyak hanykfot.

6

Porr pthamort yonmi yifammaroh mrokfot

¹ Niko yonko, yifammam tamoh tamohm kfiwumko, hanyjborna duha. Be rroh tng yuhamn hikkfot. Tot tu neft. Ndhtet neft Bro Nkifrar hti yindhorwort. ²⁻³ Bro Nkifrarhu yirmoht kfo kangt, “Yifammaroh yinhit tohhato rroh mrokfom hikkfot. Yifammaroh mrokfom hikrahko, nikmoh tamoh tamoh hingernefm yi marnyaruhamn ndar bbinysoft toh yifahtarahko.” Ndnnetn nd boririfhut be tu bro mrokfoyet.

⁴ Niko yifammako mirahko yonm fasoh nmbuhat ayak nuhasnomm. Inji narahko, to be fasoh nmbuhat wahiyaforahkomm. Tfit nikompno nakfo nna inji narahm. Niko yifa-mmako be hifa yima yuhurpno yonmpno rhuhatu Bro Nungothetrhu mrokfom kfo nuhas bonuhaskfot.

Tohakmi hingrna yimaroh mrokfom Porr kfo pthamor

⁵ Niko hingrna yimako, niko tukmoh tohak yimaroh tng yuhamn hingrna hikkfot. Tamoh tamohm romn mhiti yakrmiyak hanyhato romn hikkfot. To mirahko brumharpam apthanom. Yima yuhumpno pthahato rroh mrokfom hikkfot niko Kraistrhu mrokfom hikwa kanjo. ⁶ Mirahko be rroh yima yuhuroh yak marnya nmbuhatn rroh nyingahato tamoh tamoh hingrnefm ahingrna marnya bomarnyanomm. Nikmoh dukefm Bror duka yanhohato be dborioh hingrna yihotam hingrnakfot. Kraistrhu hingrna yima mifko tohhato hingrnafat hingrnakfot. ⁷ Yindhortpno yindhortpno tamoh tamoh hingrnefm yakitohkfot. Brorhu hingrnefet. Nhai yima mifroh hingrneft rhukaht. ⁸ Tu Nungothet Kraistr kukatohworm niko niwa

nefm yo hingrniwa hingrnefm. Kto niko froh frohko ttha hanyrahrko. Nd nmbuhat bi wanyeteko.

⁹ Niko hingrnefroh tohak yimako, tukmoh hingrna yimam dborioh nefm yak nuhaskfot. Mirahko akfo yakrme boyakrmenomm. Nikomi tukmoh hingrna yimam hefenr tohwa tohak yimarpa mifrrhu hingrna yima bugayeko. Ror yimam yak marnya thombat nhai hti tuthahato kfo mekahr, “Nd ndr pam yak marnyaruha, nd ndm nhai.” Ror nhai inji nakahr. Rpat kak marnya bugewurnom.

Kristenm soldiam kanjo tohkfot

¹⁰ Wuroh mrokfot kfiwanko. Nikmoh toh nmbuham Bro Nungothetrpno frtkafkfot. Rorpno frtkafhato rorhu bro bbukeft yakkahkomtn toh bmtakfot. ¹¹ Yahrt tonayuk wondh tham Bro Nkifrar yahukamn, niko ndm hmbrihato tohkfot. Nd wondh tham hmbrihato frdbfaknirahkomm Satanr tuyuk kfram. ¹² Nhai be yima mifrpampno nd yahrt tohkahnomt. Nhai. Nda bbinysofthu Satanr uhatone hatonita fasoh nefm kangm, ayak kasuh-nomm, nom tfit wabbuka sinyahato nd fasoh nefm kangom frdbfa thuhato amtahnomm. Inji natoh natohwonom. Yo namburet namburet yarhm, tahi nasungarm, nthonn, nd ndmpno nd yahrt tohwonomt. ¹³ Ndnnett Bro Nkifrar yahuka fitohtet fitohtet wondh bugat yakhato hmbrekfot. Nhai rhu fura bofura hasokfot. Satanrhu yahrt nianeft nhai kfat o rikat o ramoht yak hambro-ruhatn. Satanr tuyuk kfat frdbfa thurahnt. Satanr mnhombratiruharn nhai tfit wom yiha nieruhart.

¹⁴ Kangko atoh bmtanom, tu Bro Nkifrarhu mrokfo mif mift yakhato bro let bando tham kanjo nd mrokfom yakhato yufur mtintn nyuh tkafkfot. Yo Kraistrhu hayuk wutha yima yuhur yakhato mondt hta kafrohyuk siot kapakfot kanjo nd yima yuhur yakhato dbkafkfot. ¹⁵ Bro Nkifrapno rpat tfit tir nayakitoh yuhathu gutnius mro-kfothu kfo nuhas htfas nefthu wayibon sinyaneft, nd dukeft su wuram kanjo hmbrekfot. ¹⁶ Nd nd wondh wuskar yak bugahato yahrt tohkfot. Bro Nkifrarhu wany yakio nmbuhat, ndt wohn rikat kanjo hmbrekfot. Nd wohn rikat hmbrehato hta tfakrahkomm Satanr tuyuk kahet kahet kfram. ¹⁷ Bro Nkifrar nrfa htiyakmo yuhat dukahato nd dukeft hat kapakfot kanjo nd dukeft mfhat htahato rhukfot. Bro Nkifrarhu Yafothathu bainat kimt yakitohkfot. Nd bainat kimt Bro Nkifrarhu mrokfoyet. ¹⁸ Nd nd nefm kangko ananom, Bro Nkifrar kfo bruttnahato nd nd nefm nakfot. Tu Bro Nkifrarhu Yafothatn yak hta bohtakahttko nd Yafothathu dukeftpno kfo bruttnakfot. Mirahko arhu wita-nom kfo bruttnaneft. Kraistr hiket yimaroh yufam yutahato kfo bruttna hatohkfot. ¹⁹ Nanhu yufat mirahko ammonomt. Nanhu yufat yutahato kfo bruttnakfot. Na kanga, Bro Nkifrar turhu mrokfot nanhu yima yuhur ahtakahttr apthayant. Nhai yakrme yima yuhur rhu hanykfot. Bro tat yima yuhurpno nd gutnius mrokfot Bro Nkifrar hta kafrohmoat ptha nuhasruhanm tuhan yindarim. ²⁰ Nd nd gutniuskfot kfo ptha htfaswa yimaya. Ndt pno na kalabus tohwa. Ndnnett wakfo bruttnakahtkma Bro Nkifrar yakrme yima yuhur yak thukahtrr tat yima yuhur ahikahtra gutnius mrokfot kfo ptharuhant.

Wuroh mrokfot

²¹ Tikikusr kfo nuhas hik bohik-rahrko na hingrnawa hingrnafat. Tikikusr nompno rpat nabnothato rpat tohnuhiwa yimayer. Bro Nungothetru hingrnafat ror hifa kakitoh marnyewurt. ²² Rorn nikompno nieruharn tndh hik bohik nuhasrahrko nom yorhwa ruheft. Kfo nuhasruhatrko yima yuhum bmtarahmko.

²³ Bro Yifemri Nungothet Jisas Kraistr ahitwafko noh hmbre yima yuhum. Noh hmbre yima yuhum ahikahtfko wom yimam hifa yima yuhur hmbrihato Bro Nkifra Jisasrofhu dukefr nhai yafho thuruhatkomr. ²⁴ Nanhu dukefr kanga Bro Nkifrar ayak marnyarm nmoh Nungothet Jisas Kraistr yafho thu duha yita met yindarim.

Filipai thofroh gontwat Porr dwandfakhato htafmot Barkof kfo nuhas mrokfom

Porr wandfamort ndar gontwat. Ror Yuropko yihato Bro Nkifrarhu hingrneft kasinyamo barkof kmit. Filipait Masedonia Profins korht. Porr nd kmi Filipait Bro Nkifrarhu hingrneft kasinya tanyhato wom kmit tfit yimor. Wom kmit yi hingrna hasetrn fakmorr. Yakhato kalabus htafmorr. Kalabus tohhato wanyakmor Filipaithu Kristenm wom yimam yihato tfit wom yima yuhum hemotmm nd rom wanyuk mrokfom mfafhonommm. Nd mrokfom ror wanyakmohat nhai krhohato rorhu krho yima yuhurhu mrokfom tfit ndar gontwat htafmorm. Nhai. Ror Jisasr yakitoh kihhato tohmor. Ndnetrn ror be yindhor yima yuhurpno tohmor.

Porr Bro Nkifrarhu hingrneft tohhato marufen duhatr rhumohat, Filipaithu Kristenm marufam hta nhafohhato htafhemorr. Ndnetrn Porrhu kfo yindhor mrokfot ndar gontwatn htafmort. Yo womt kalabus tohetrn duka memor, “Na kalabus tohwa mrokfot Filipai thofm wanyakruhamn bok dukefm yakruhamn yima yuhum krhorahmm.” Ndnetrn wom kfo bmta mrokfom gontwatn htafmorm.

Porr kfo memorm, “Nd niko Jisasrpnno yakmo nfri toh nmbuhati nfri yima dukefr, nhai Judaroh nkifra boririfhut hikhato yakrmokomr. Nhai. Jisasr hikhato fakmokomr.” Memorm, “Jisasr tohmo toheft tohhikfot. Jisasr nhai marimor, ‘Na bro yimaya,’ yo nhai turhu dukefr hikrmor. Nhai. Ror be hifa yima yuhurn Bro Nkifrar hayuk hingrnefrpat fakitohmor.” Kfo memorm, “Yimam Kraisorpno brbo frtkafwam, rroh yima yuhum miyorhwamm yindhor rihfurparpno korhrm.”

Ndar gontwathu mrokfom hti thombat, htirahn Porr be tu marbitn htafmorm Filipaithu Kristenm.

Porrhu tamoh tamoh nefm Filipai thofm hti dukamoumr. Ndnatn Porr bro yindhor rihfurpno tohmor.

(Sapta 1–4)

¹ No Por Timotirono Jisas Kraisorhu hingrneft hingrnewa yimayeno. No niko Filipaithu yimako dukewunonko. Ndnetrn na Pora wandfiwant ndar gontwat. Niko Filipaithu yimako, Kraisor Jisasr hikwako yo niko pastoko yo niko Kraisorhu hingrneft hingrnanuhiwa yimako, nikmoh yufampno ndar gontwat htefiwant. ² Nmoh Bro Yifemrkoni nmoh Nungohtet Jisas Kraisor nikmoh toh nmbuham atoh natwihkahfko ayak marnyatwafko.

Porr Bro Nkifrar kfo yindhormo yuhat

³ Yiha yiha na nikmoh dukefr yak thoft, Bro Nkifrar kfo yindhorwanr. ⁴⁻⁵ Na nikompno barkof mtihakni-hato gutnius mrokfot Filipait pthakni-mohat, hifa nikomn nd mrokfot bi yakhato, tfit nikompno rpat nd gutnius hingrneft hingrnanuhaknimokma. Rihingrnakmohat to be toko yuhre hingrnanho hanitkma. Ndnatn nanhu yima yuhur yindhorwor niko yutahato kfo bruttna yindhorneft. ⁶ Nanhu htiyefit inji htitant, Bro Nkifrar bi nikompno bi inji ndhtet dborioh hingrneft rihingrnakmohat, to be

nikompno hingrnahany hingrnahany Kraistr nierahr. ⁷ Niko nanhu hingrna tamnouwa yimayeko. To na ndhtet yimena Bro Nkifrar yuhuwaftato dhemo hingrneft hifa nikomn kakitoh-nhohnewukma. Na kalabus tohneft o kalabus toh duha yimam kangm gutnius ayak thunomt o finji ananomt hifa nikompno rpat tohato gutnius yomn kanjo kakitohwonomt. Nhai yimam gutnius mrokfot finjinakfot. ⁸ Bro Nkifrar nanhu yima yuhur htitworr. Na tu kfo mif mifwanko, nanhu yima yuhur niko dukewur nikmoh yi htineft. Kraistr Jisast niko duka yuhuwafto kanjo inji dukiwanko.

⁹ Na niko yutahato kfo bruttna thombat, nikmoh yima nayak nanyimaneft, o yima nayak marnyaneft yo tuko nahti duka nahti dukaneft, nd neft kanga mfro mfro yakitohaknikah-komn, Bro Nkifrar dukewa dukef yuham hti duka tungunarahakomn yo hti duka tungunarahakomn fasoh nefmi dborioh nefm. Ndm kfo bruttne-wanko. ¹⁰ Fasoh nefm hti nhta mirahko ndm fasoh nefem. Dborioh nefm inji buga, hti nhtarahakomn. Hti nhtarahakomn, nikmoh toh nmbuham be hifa toh marnyarahko. Nhai wom fasoh nefm wom yimam yak nuhasruhatkomn. Be hifa dborioh toh nmbuhatn toh hasetkomn Kraistr yawihnerahr. ¹¹ Nd Jisast Kraistr yak nuhasyuk dborioh nefrpm womm yak nuhasruhatkomn womm nikmoh dborioh nefm htiruhamn Bro Nkifrar kfo yindhorrahmr.

Porr kalabus tohmotr Kraistrhu mrokfot bromot

¹² Niko nanpno hingrnawa brata-kfot kanga, akfo dukayanko. Mirahko ka bi kalabus tohwarn gutniuskfot ka nhai wom yiruhatt. Nhai. Kfiwanko nd ktittn gutnius tfit hingrneft mburaknitatn hingrneft mfro mfro yiyaknitt. ¹³ Nd asharhof yimam yo kingrhu kuny kmifat tohukatohwa yimam na kalabus htamo nmbuhat htihato kfo memom, “Na Kraistrhu gutniuskfot kfiwota yakhato kalabus htamoma.” ¹⁴ Bok yimam asha Kraistr hikwam na Bro Nkifrar tohukatohmo nmbuhat htihato rom bi Kraistrpar rroh bro dukefm htewum. Nhai wom yakrme yima yuhumpno rhukahmm. Kraistrhu mrokfot ptha habri thombat, nhai yakrme hanyhato pthakahmt bro rifiny skitm. Nhai. Rifiny skitm tohato pthiwumt.

¹⁵⁻¹⁷ Kfo ptha htfas thombat womrpm kfo yuhuweh htfaswom. Kangm, “Tamohmpno Porrpar Bro Nkifrar yak marnyewatr kmi kmi rorhu yufarpat kfo yindhorwam? Nom to inji kangnom Bro Nkifrar ayak marnyakahtromn nmoh yufam kmi kmi akfo yindhor habrimnom.” Rom ptha yuhuweh htfas thoft, rroh dukefm duka kangm, “Inji akfo htfasakahtnom, na Pora wanyakrhoyann yima yuhur krhorahra.” Be yuwi kangm, “Wom nfri krhopam ahtanomr.” Ndnnetmn inji newum. Womm nd hifa yima yuhetm rroh dukefm duka kangm, “Tamohmpno Porr kfo yuhuweh htfasruhanomr? Nom be gutniuskfot akfo htfasakahtnom kmi kmi nd gutniuskforpat broniraht. Ror be Bro Nkifrarhu hingrneftu htiafohany yuker. Nd hingrneftn Bro Nkifrar fak htamorr. Kraistr hik duha yimam mirahm, ‘Akfo dburna inji ananomt tfit rom tohato kfo nuhas hik marnyarahmr.’” ¹⁸ Na nd kfo yuhuweh htfaswa yimam na nhai kfo mekfot, “Tamohmpno inji kfo yuhuwehwama?” Na nhai inji kfokfot. Nd kfo yuhuwehet yimami nd hifa yima yuhet yimam rom bugam na yindhorwanm Kraistrhu mrokfot romn kfo ptha htfaswatmt.

Porr kangr atohkahann Filipai thofm kfo bmtaruhamn

¹⁹ Nanhu yima yuhur duka kangr, niko Filipaithu Kraistr hiket yimako kfo bruttniwotkma Jisas Kraistrhu Yafothat toh natwihwota. Rot kforaht na fnahniruha. ²⁰ Toh bmtarhoyann ptha thombat, nhai bso yewirnano yimtnahato ptharhota. Ptha brorhotann mrokfom wanyrahmm. Na yima nfriya tohan o fnohniya dborioh nefm na nayukm yimam htiruhamn Kraistr kfo yindhorrahmr. ²¹ Nanhu htiyefi inji htitant, yima nfriya afo ftoha nhai mrokfom. Kraistrhu hingrneft tohhato hingrnaruhant. Fnohane ndt to hifa mrokfo duhatet. Nd tkittn Kraistrpno yi tohruha. ²²⁻²³ Afo yima nfriya ftohane, be Kraistrhu mrokfot kmi kmi kfo ptha fnahruhant. Nd hus yima yuhuf korhwofa. Bro yima yuhur duka kangr, hifa anohkahann be Kraistrpno amtoha. ²⁴ Tfit wom yima yuhur nikom mdukekwoyann kanga afo atohkahann Kraistrhu mrokfom kfo bmtaruhanko. ²⁵ Nanhu yima yuhur inji htitanr nikomn afo mdukak hanita, kanga afo niko Jisarrhu mrokfom afo wayakitoh bmtakomm, nd dukeftpno afo tohhato nikompno niahato Kraistrhu mrokfot kfo ptha bmtarhotanko Jisarrhu mrokfot yakitoh bmtaruhakomn yima yuhum yindhorrahmko. ²⁶ Na afo yima nfriya ftohann nieya nikmoh kmit, be nhaf Kraistr Jisarr masat kfo yindhor mirahko, “O hifa Kraistr toh rafomotnr, nhai yimam wasrmomr. Asor yima nfrir tohwarn nia kau hafotwornom.” Inji kfo yindhorrahko.

Porr yakyuk krhopam kanjo Filipai thofm yak hnerahm

²⁷ Bro mrokfot kfiwanko. Nikom tohyuk toh nmbuham, be Kraistrhu mrokfot kfiwa yuharpat toh hikkfot. Na be tukann yima nfriya afo ftohane, ee btn tuka nia htiruhanko. Nhai asha afo kalabusn ftoha, kanga nikmoh toh nmbuhathu mrokfot awanyaktwoya amitwam, “Filipaithu Kristenm, nhai rinatuhtakahm. Rpatn rpa yima yuhurparn tohwamn Kraistrhu mrokfot kukatohaf hanitmt. Yimam kangm faso ahanyinomt o kfo dburnanomt, romn tfit kfo hik bohik marnyewumt. Inji newatn Kraistrhu mrokfot buriwut.” Na kanga inji awanyaktwoya. ²⁸ Yo tu bro nmbuhathu na kanga awanyaktwoya amitwam, “Nhai yakrmikahm Kraistrhu mrokfom yak dburnayuk yimampno nna kfo hamuh nna kfo hamuh thoft. Tum Kristenm rpatn natoh dbkafwamn Kraistrhu mrokfot kfo hta bohta marnyewumt.” Na kfiwanko, inji rpat tohhato Kraistrhu mrokfot yakitohhato ptharahkamt, be nd nikompno nia pthayuk yimam mhti yanhorahmko. Mhti yanhothato kfo mirahm, “Nom injina injinaneft, Bro Nkifrar nom yak batiruharn, Filipai thofmn yakmiyak-rah.” ²⁹ Ndnatn nikmoh toh nmbuham be rpat tohhato rpa yima yuhurpar yakitohkfot. Bro Nkifrar hifa nikomn hti dukahato Kraistrhu hingrneft wafak htamorko. To mirahko ka be rorhu mrokfothu hiknefrpat hikkfot nhai, krhopam rpat yakkfot. ³⁰ Niko htimoko na Filipait tohhato yakmo krho nmbuham, yo tfit arihat na asha Romt tohhato yekwa krho nmbuham wanyekwoko. Niko krhopam yakneft mirahko ka nndo. Nikomi na rpa yihotar kauwonom. Na yakyuk krho-pam niko to kekwoomko.

2

Rpa yima yuhur yakitohhato rpat tohkfot

¹ Rpa yima yuhur yakitohhato rpat tohneft kfiwanko. Kraistr thu bmtiwartrko niko rorhu mrokfeft hikwohat o krhopam yekwohat, toh bmtewuko. Yo rorhu mondt htewatrko nikmoh yima yuhum miyorhwomko. Yo nikmoh yafothami Bro Nkifrarhu yafothat rpat nabnothato rpat tohwom. Yo

nikmoh wom yimatn hifa yak marnyahato hti yuhuwafwokomm. ² Tmift rpa yima yuhurparhu toh nmbuharpak kanga rpa yima yuhurpar tohhato tuko niyak marnya niyak marnyakahtko na htihato nanhu yima yuhur yindhorrahr. ³ Rhu nmbuham mirahko be turpakmoh rhu nmbuham-rpam o yau nmbuharpam htihato ayak marnya bomarnyanom. Nhai. Womroh rhu yau beb nmbuham hti dukakfot. Womm finji rhu bebwom, afo romn yak marnya bomarnyafu, ee, kto tukmoh rhu nmbuham yak marnya-kfot. Mirahko be turpako yak marnya bomarnyahato womm ahti yindhorm-nom. Nhai. ⁴ Yo mirahko turpakmoh shrkam ahti dukanom. Womm tamoh shrketem rrohm afo yak marnyafhe-hato kto tukmohm.

Kraisr yima furam kanjo toh hnamotr Bro Nkifrar tu bro yufat hemorr

⁵ Niko Krais Jisasrhu yima yuhurhu dukefm kanjo inji dukahato tohkfot. ⁶ Ror inji tohmor. Ror yura hefenr Bro Nkifrar pno wutohmohat, rofhu toh ruhefm nhai nndoh nndoh. Nhai. Rofhu ruheft, toheft, yufat rpat. Kto Kraisr nda bbinysoft yawihnamohat, nhai nd ruheft, toheft, yufat tfit dukarmort. Nhai. Monghemort. ⁷ Monghehato nda bbinysoft nia tohmohat, tfit hingrna yima furapa kanjo nia tohmor. ⁸ Be yima furam kanjo tohmor. Yimam htimoahat htimoumr yima furam kanjo. Ror nhai marimor, “Yindhohato yufat yura yura htaruhant.” Nhai. Ror be yima furam kanjo tohhato nd Bro Nkifrar kfoyuk tng yuharpak toh hik hanyomrn yura bgre misn kihegirmotmr nohmor. Tu bro yimtnayuk tkittn nohmor. ⁹ Nd nmbuhatpno Bro Nkifrar tu yura myorhekwa tu bro yufa brot hemorr. Nhai ror yakmo kanjohot yufat wom yimam yakitohkahn. ¹⁰ Nd bro yufat hemotrr be bbinysoftu yimam, Maringour watohyukm, yo yura hefenr wutohyukm be rorhu yufat yutahato tabokmerahm. ¹¹ Tabokmehato Bro Yifemr kfo yindhoh mirahmr, Jisas Kraisr tu Broyer.

Bro Nkifrar duka yanho hanyhato hikkfot

¹² Niko tu nanhu yimat mifkomn kfiwanko. Na nikmoha tohmohat, hifa htimoyanko Kraisr hifa hik marnya-mokomr. Be nd na htimo htiyefst kanjo wahiktwakomr. Mirahko be na htihato Kraisr ahiknomr. Ndt nhai hifat. Na wuri tohwa niko Kraisr hikkfot. Nikmoh fasoh nefm bi Bro Nkifrar fak thu hemorko. Ndnatn niko Bro Nkifrar hikneft duka yanho hanyhato hikkfot. ¹³ Bro Nkifrar thu yuhurhato kasinyewatrko tur hti yindhorwa nefm newukomm. Yo turn thu bmtaf hanitatrko nd nefm newukomm.

¹⁴ Tamoh tamoh nefenm kangko ananomm, mirahko nna kfo baboba hanyhato ananomm. ¹⁵ Niko nda bbinysoft fasoh fasoh nefm nayet yimaroh buha tohwoko. Ndnatn be rpa yima yuhurparn rhuhato tamoh tamoh nefenm nakfot. Nd rirhu arhuyuk yimam htihato mirahm, “Tu hifa dborioh nefm newum.” Nd niko tohwa tkitt nhai be dborioh yimarpam tohkahmt. Nhai. Fasoh yimam tom rpat tohwoko. Ndnatn nd niko nayuk dborioh nefm nd kspita yauyuk yimam kshr kanjo yakitohhato yak nukak hanyrahkomm. ¹⁶ Yak nukak hanyruhatakomm hti dukarahmt tu tohyuk toheft. Niko inji narahko, be kto Kraisr yawihna thombat, kfo ptha yindhorrhuhanko. Kfo yindhoh miruha, “Na Filipaimpno tohhato hingrnamo hingrneft nhai be hingrna furarmoyant. Nanhu hingrneft Filipait hingrnamt yafothett rhumot.”

¹⁷ Na fnohane, nhai mrofkfom. Niko Bro Nkifrar ofa yahuka kanjo nikmoh yima yuhum ofa kanjo hemokomr. Na washato prisroh wain ofa yak

nengitwa kanjo nanhu kkut yohnineft, nhai mrokfom. Na to yindhorwa.
 18 Ndnnetn niko rpat ayindhornom.

Timotir Filipaikorhofyi nmbuhat Porr kfo tkrurmo yuhat

19 Bi brbohwt Timotirhu nianeft. Nhai be bmbri nanhu fijo kfo tkrur-rhotanr. Bi tu Bro Nkifrarng kangr, wakfo tkrurnr, ee btn kfo tkrurafrrhotanr myau hafot tanyahrko. Rorn mhti tanyruharko tfit nia ptha nuhasrahra nikmoh toh nmbuham. 20 Nhai wom yimam na kanjo duka kfo pthakahmko. Nhai. Timotirpar na kanjo dukewurko. 21 Wom womt rom turoh rhu nmbuha-rpam hti dukewum. Krairshu tamoh tamoh dukefenm be inji dukani hanitmm. Nhai Krairshu dukefm rhukahmm. 22 Niko htimokomr Timotir, Bro Nkifrarhu hingerneft na hingrnanhomoahat, yima nitohf kanjo inji hingrnamouno Bro Nkifrarhu tamoh tamoh hingrnefm rorn hingrna-nhomoura. 23 Ndnatn yimaroh kfo tkrurneft nhai wom yima furam kfo tkrurfot. Tu Timotir kfo tkruraforuha. Afo nda Romt tohwa bro yimam kanga afo awany marnyayanme, finji finji kforhoma. Wany marnyahato ee btn kfo tkrurafrrhotanr nierahr. 24 Na tukianhu nia nmbuhat nanhu bro dukeft duka kanga Bro Nkifrar be nhai wom kuknaruhatr nanhu kfo tkrurafneft. Be Timotirhu mongko hti yakrahkma.

Epafradaitusr Filipaikorhofyi nmbuhat Porr kfo tkrurmo yuhat

25 Epafradaitusr, nanhu yimatr, ka tfit kmiko nierahr. Filipaithu yufathur ror asha nanpno nia tohmohat htimo-yanr Bro Nkifrarhu hingrnefm rorn hifa fakitohnho marnyamora. Na soldiam hingrniwa kanjo inji hingrna-nhomora. Tamoh krho nmbuham rorn titanhomoura. 26 Ror bro dbohneft yakmohat kmi thofko wanyakmokomt rorhu dbohneft. Ndnnetn duka kangr, “Bmbri yirhoyann htirahma. Nhai bmbri yirfoya rom duka mirahm, ‘Ka bi fnohr.’” Ndnnetn nierahr. 27 Nd rorhu dbohnefthu yak mrokfot niko wanyomot, ndt nhai kfo fura mrokfot wanyrmoko. Dbohneft fak mifmotr. Bi noh nyingam fak hany sitamor. Bro Nkifrar ahti yuhuwaf duha yirr bi nohngotrмор. Hifa Bro Nkifrarng hti yuhuwafhato fak kasinyamorr. Yo nhaf Bro Nkifrar nann wom dukeft mdukakmor. Duka memor, “Nd yimar nohrah, tfit wom krhopam yakrah.” Nd dukefmpno nd ror yakmo dbohneft fak thumort. 28 Ndnatn nanhu bro dukefr duka kanga ayikahtu tu Filipai thofm htiruhamrn rroh yima yuhum yindhorrahmm. Yo nd na duka krho hasiwa krho yima yuhur mirhurahra. 29 Epafradaitusr asha niahato tohmohat, Bro Nkifrarhu hingerneftn niamor. Ndnatn tfit kmiko nia thoft wayindho-raktwakomr Krair yima yindhorwa kanjo. 30 Wadukako, Filipaithu yufathur ror niamorn, asharhof Krairshu hingerneft rorn nia hingrnanhomora. Nd hingerneft tohhato bi noh hany sitamor. Ndnatn ndhtet hifa dborioh nefm nayet yimam bro yindhor nmbuhat htakfot.

3

Kraisr hiket yimarhu yima yuhur wuthayerr

1 Barenko, kanga wuroh mrokfom akfoyaniko. Brorhu yindhor nmbuhat niko yakitohwat, mirahko ayafno thunomt, yakitohkfot. Bi ndwom gontwamn pthamoyanko. To tfitndar gontwatn tfit wompam pthiwanko. Na nhai hhrekkaaha nd rpahtet mrokforoh wawandfa thu wawandfa thu hatohneft. Na tuka kanga, “Akfo hatohkahtanm duka hanyrahmm mrokfom.

Yimam mirahm, ‘Faso faso akfo htanomm,’ na nd kfo htayuk mrokfem mhtiyakruhamn toh bmtarahm. Nhai suhruhatm.”

² Bi nd na kfo hnamo mrokfom waduka hanyswakomm. Wom fasoh net yimar kangr, “Nikompon amruh-aknekahann fasoh fasoh akfo htayanko,” nd yimar sinya troh tanykfot. Wany yakitoh duha. Wany yakitohrahkomr be rorhu fasoh nefm yau kutetm kanjo nia yak truf wunarahrko rorhu kutt. Ndhtet yimam, tha pukneft kukatoh-wom, kfo nneh mirahmko, “Tha pukrahko Bro Nkifrarhu yonko rhurahko.” Inji kfo nneh bonhehrahmko. ³ Ndhtet yimam nia pthiwumko mirahko awany yakitohnomm. Sinya troh tanykfot. Nhai tha puk thuneftpon Bro Nkifrarhu yonnom rhukahnom. Nhai. Nom tu Bororhu Yafothat thu kasinewattnom tu Bro Nkifrarhu lotu mifneft yak nuhaswattnom nom lotu-hato Kraisi Jisas kfo yindhorwonomr. Tot tu tha puk thuneftu yimbu yuha mift. ⁴ Be amekahmn Bro Nkifrar hti yindhorwor nkifrar boririfhut hiket yimam, na nhai wom yimar finji kforfotra. Na nd nkifra hingrnef yuhaf fak dbothat hikmoyant. ⁵ Barkoft akfoyanko, nanhu mmemt na hiyauni-mohat 7-pela marm rhunihato 8-yukr-pno nanhu that puk thumomt. Tot barkoft. Yo nanhu nia yuhaf nhr inji. Na nasakmo yifammaf rof tu Isrerf. Tu Benjamin kuny shoff nasakmofa. Na tu Hibru mifa. Na nd Bro Nkifrarhu Farisiya tohmoyann nd rorhu boririfhut fak hik marnyamoyant. ⁶ Farisiya tohhato Bro Nkifrarhu hingrneft hingrnahato rorhu yon kunys hikmoa nefm faso hti bebhato hik nembos tubatu inji namouann. Womm tuha tat noh bonohmouann. Be amekahmn, “Be nd boririfhut hikhato Bro Nkifrarhu yonn rhurahn,” na nhai wom tamoh dukarfota. ⁷ Nd na hik hnamo yihotar yo na nahnamo nefm memoa ka injinahato Bro Nkifrar hifa hti yindhorrahra, to nhai. Nd nefm be bi fahomoyann. Bi tfit Kraiser nanhu dukefm htewa. ⁸ Memoa, “Ka na nahnayuk nefm ka Bro Nkifrar htiruharn dborioh rhu nmbuhaf hirahra.” Nndnetann nd nefm na hnamoyann. Arihat bi nanhu Bro Nungohtet Kraiserpno rim tohnmoyann, nd na nahnamo nefm tfit faso hti bebwanm. Tfit Kraiserhu nefm hti wofnwa. Nd na bingot nahnamo nefm bi htitwann tu yafotha duha nefem. Kanga Kraiserpar tfit ayakitoh tkafkahann ⁹ be rorpno arim frfnahni bugakahann rorpno arim tohniya. Nndnetann na nhai wofnkaha nd nkifra boririfhut hikhato Bro Nkifrar na hifa hti yindhorneft. Nhai. Na kanga Kraiserhu mrokfot wany yakiohato hikneftn Bro Nkifrar htihat na dborioh yufat yakneft na wofnwa. ¹⁰ Nanhu dukefm kanga tu Kraiserpno arim frfnahni bugakahann nd ror nohhato sinyamo yuhathu bbuka rifhur afo ahtiyann yo ror yakmo yahrt kanga ayakwonant. Nd yahrt tohhato kanga nd tkittn anoha, to nhai mrokfom. ¹¹ Na kanga ror nohhato sinyamo kanjo na inji nohhato asinyaya.

Porr makkfothu yakneft duka duka tonemor

¹² Na Kraiser yakmohat, dborioh rhu nmbuhathu yakneft dukahato fakmora. To nd ror kfoyuk rhu nmbuhaf na tafito yakkahant. Nd rhu nmbuhathu yakneft dukahato na yuhre nhombra bonhombriwa. Nndnetann na nhai bi kfo mekfot na bi Kraiser kfoyuk rhu nmbuhaf bi yak bugahato be bi nd rhu nmbuhatn korhwa. Nhai. ¹³ To yinopenroko, rot nd Kraiser kfoyuk rhu nmbuhathu yakneftn, tafi afo yak-kahant. To nd na bingot tohmo toh nmbuham o namo nefroh yafho thuneft, ndm na bi fahomoyann, na nhai tfit wom dukak hanykahanm na bingot tohmo tohefm o namo nefm. Bi tfit nyingako rhuyuk rhu nmbuhathu yak dukefr duka duka korhwa. Torpar

nanhu bro yima yuhur. ¹⁴ Nd yima yuhur yorhwotra kanga yimam tone resishato be nd praiskfothu yak dukefrparn duka duka tonita kanjo kanga na inji Krairparhu dukefrpar duka duka atoh nnfakahann nd ror kfoyuk tkitt yakruhant. Krair na yakmohat to rorpro hefenr mttoh nkifranineftn fakmora. Tot nd tkitthu yak dukefr yorhwotra na toh nnfewa.

¹⁵ Nd dukefr na kfiwar, be yima dukefetnom arhunom, to nd na kfiwa dukefrparn hikkfot. Womr wom nndoh yima yuhetr rhuneft, tu Bro Nkifran yak nuhasrahrr. Yak nuhasruhattr hti dukarahrt tu Jisas Krair dukewa dukefr. ¹⁶ To ror nd dborioh dukefr nom bi yakitohwar, yafhothu duha. Nd dukefr yakitoh kihkfot.

¹⁷ Niko tukanhukomn kfiwanko. Na nikmoha tohmohat, nanhu toh nmbuham bi htimokomm. Be nd yuhat niko toh hikkfot. Yo frohm nikmoha nanhu tohefm toh hikwom, rroh tohefm toh hikkfot. ¹⁸ Nhai be sfno inji kfokahanko. Nhai. Ndharrhof yimam bi hti hik bohikmoyann wom yimaroh nefm fashohem. Jisas Krair bgre mis nohmo yuhat nhai mhtiyakhato duka mekahm, “Bi nmoh fasoh nefmpno yimar nohmo. Be tmifnom fasoh nefroh nanefm.” Nhai. Nhai inji mhtiyakkahm. Fasoh nefm kakitoh yakitoh hanitmm. Ndhett yimam niwa nefm bi kfo nuhasmoyanko. Tfit wompam kanga rom niwa nefm akfoyanke bu nyingam kawihnewuma. ¹⁹ Ndhett fasoh net yimaroh nefm nhai yima dukefmpno nakahmm tamoh tamoh nefm. Turoh thatipthu rhu nmbuharpathu dukefrparn buriwumm. Bro dukefm korhm thatiptn. Be ndar bbinysofthu tamoh tamohroh dukefrparoh dukefm korhm. Tamoh nefm nanefm nhai yimtna hanyhato nakahmm. Be yihato na fura bofure-wumm. Ndhett yimam kto Bro Nkifrar yakhatoh yak batirahrm. ²⁰ Nom, nom yura moun thofenom. Be Jisas Krair-rhu miyaknefrpatn toh gari hasiwunom. ²¹ Nd yiha ror yawihne thombat ndar nom bbinysoft hatohwa tfkha bebt thu troh tanyhato rorhu bbukeft kforaht, tfit turhut kanjo yak nhombranihato muhrahnom. Bro bbukeftpno nieruharn nd tamoh tamohm bbinysoft rhuuyukm rorhu yinhitn rhurahm.

4

Porr Filipai thofm mrokfom hemo yuhat

¹ Niko na higrnanhomoaiko, Bro Krair yakitoh kihkfot. Na asha toh thoft ka duka kangko momiwurnom. Nhai. Na masat dukiwanko. Na Filipait htamo mswirt memoya, “Ka be nhai sinyaruhatm yewurim.” Awi, yewurifann tom dborhamom. Nikomeko nd yewurifann. Na asha rhu haso thoft duka haso kanga aikahann ahti hafotanm.

² Nifn Yuodia Sintikerofn, nifn nd hus metfn afo wawanyfn. Nifn nhai be met furafn rhukahfn. Nifn tu Bro Nkifrarhu met husefn. Ndnetn nifn tufn metfn niyak marnyahato rpat toh marnyakfot. ³ Yo ni, nanpno brbo tohhato Bro Nkifrarhu higrnefm rpat nanpno higrnanhoyukn, ni nd hus metf hti yau hafothato rofhu rpat niyak marnya duha nmbuham yihato yak marnyahekfot. Na Filipait tohhato higrnamo higrnefm rofn yindarim kanjo fakitohnomoufa. Klemenrom damiagt rompno inji rpat higrnamounom. Rom buga rroh yufam korhwom toh nkifraniyet yimaroh yufam yorhwa gonborngtn.

⁴ Niko tohneft be yindhor yima yuhurpno tohkfot. Nhai be sfno inji kfokahanko. Niko bi Bro Nungothetr fakmorko. Ndnetn wayindhortwako. Tfit kfiwanko, wayindhortwako.

⁵ Be hifa yindhor yima yuhurpno tohkfot. Yimam nikmoh dborioh nefm htiruhamn brbo furyakna hnerahmko. Brorhu yawihneft bi brbohwo. Ror yawihna thoft yak nhtarahrn nmoh nefm. ⁶ Tamoh tamoh krho nmbuham korhmnom, mirahko be nd krho dukefmm aduka hasonom. Yudbat Bro Nkifrar nakufot. Tamoh tamoh krho nmbuham, ndm pthanihat tfit yurakn kfo yindhorkfot. ⁷ Nd na kfiwa yuhat hikrahko hifa yima yuhum yakruhakomn nikmoh yuhuwaf marbimio mirhu marnyarahmko. Bro Nkifrar ndhtet yima yuhum yimam hanyeft yima yuhum nhai wom krhokahmm. Yima yuhum be frjbtwa buganitamn tfit Jisas Krairpar kitm. Ndhtet yima yuhumpno yimam rhuneft womm htihat mduka nhita mirahm, “To ndhtet yima yuhume finji finji yakhatoinji yorhwam?”

⁸ Barenko, tfit wom wuroh mrokfot kfiwanko. Mirahko nandomrhu neft ayaknom. Nfndomr tu masat thu nheheter. Niko rorhu nefm hik duha. Tu Brorhu nefrpm yakitohhato hikkfot. Wom met yindarim nd niko nayuk dborioh nefm hti yindhorhato rom yindhorrahm. ⁹ Na nikmoha nikompno tohmohat, tamoh dborioh nefm bi fak nuhasmoyanko. Yaunefm, pthanefm, nd ndm bi hti hikmokomm. Be nd na yak nuhasmo toh yuhat hikkfot. Inji toh marnyarahko htirahko nd nom tita hatohwa krhopam yak thuwa Nkifrar brbo nia tohnhorahrko.

Porr Filipaimpno maruhat yakhatoinji kfo yindhormo kfo yindhor mrokfot

¹⁰ Hifa tuko wanakfo dukakomomn tfit marufenm dukamokma. Ndtppo na Bror kfo yindhorwanr. Nhais be ariharpa dukakahkma. Nhais. Duka hnamoukma tmifm, maruha htafyuk yihotam mduka nhiyaktihatoinji be nhaitafthermokma. ¹¹ Na nhais be maruham yaknafhatoinji kfokaha. Nhais. Nanhu toheft bi inji ritohakmoya. Na sfno wuska duha tohneft o wusketa rhuneft, na nhais mrokfom. Na tohkfot. ¹² Na sfno wuska duha tohneft na nhais womm kanjo kfo nur hatohkfot wommpno. Na nhais ndhtet nefm. O bok wusketa rhuneft nhais inji buga. Na nhais finji kfokfot. Tamoh yatinoh to yeshriyeta rhuneft, na nhais wom mrokfom. Nanhu rhuneft to be yon mumenm kanjo rhukfot. Nhais tng ptha inji nakfot. ¹³ Nanhu toheft Krair thu bmtewotra nd rorhu bbukeftppo na hifa tohwa. Na nhais tamoh tamohroh dukem dukakfot.

¹⁴ Na tamoh krho nmbuham rhuneft niko tukmoh hti yuhuwaf nmbuhatn maruham htahfahukkma. ¹⁵ Niko tu Filipai thofko htimoko. Na nikmoha Masedonia profinsko barkof yihatoinji Bro Nkifrarhu mrokfot hany pthahato tfit kto wom kmiko yimohat, niko tuko htimoko. Nhais wom kmithu Kristenm wom maruham yak nhafoh-hatoinji nanhu yufatppo htahfomm. Tu be nhais mif. Niko Filipai thofkmoh maruhenrpm na korhwa. ¹⁶ Na Tesalonaikat yitohmohat nhais inji. Nikmoh marufam htimoyanm. Dfik yiham maruhenm htahfhemokma. ¹⁷ Na nd mrokfom inji kfiwohat to mirahko ka maruham yuhurhato yuwi inji kfo rhtitr. Nhais. Nhais nanhu hanyeft dukahato kfokaha. Nhais. Kanga yima hanyeft yakitohkahtkomt Bro Nkifrar inji htihatoinji tawo thu brurhirahrko. ¹⁸ Ndar na wandfiwa mrokfot maruharoh kfo nuhas mrokfot kanga akfo nuhasanko. Nd niko htafmo maruham asom bi fakmoyanm.

Eprofrodaitusrpno htafmo maruham asom bi hnahemotra fakmoyanm. Hifa na yindhorwa. Be tu bok maruham htahfhemokma. Ndmppo bok yiham tohniruha. Be tu Bro Nkifrar yimam hifa mthet kahpam tarioh mthahato Bro Nkifrar mthatihato yindhorwa kanjo inji htitanm ndar niko

htafmo maruham. Hifa. Na be tu masat yindhorwa. ¹⁹ Nanhu Nkifrarko be tu mfro tamoh tamoh harhuwor. Ndnnetn niko, Krai Jisasr pno rpat tohyukko, tamoh tamohm miyak kkopentahato naku ttiwonrahko hirahrko. ²⁰ Bro Nkifrar nmoh Yifemer. Ndnnetn rorhu yufat nom yiha yiha yuta yindhorkfot.

Kfo yindhor mrokfom

²¹ Niko Krai Jisasr hikwako, nani nanpno asha hingrnewam nikompno kfo yindhor mrokfom htefiwumm. Yo asha Romthu yimam Bro Nkifrar hikwam, rom to inji nhaf kfo yindhor mrokfom htefiwumm. ²² Yo asharhof bro yima Sisarhu kunys hingrniwa Bro Nkifrar hiket yimam nhaf nikompno kfo yindhor mrokfom htefiwumm.

²³ Bro Nkifrarhu yuhuwaf nmbuhatn nikmoh yafotham thu kasirahtm.

Kolosi thofroh gontwat Porr dwandfakhato htafmot Barkof kfo nuhas mrokfom

Kolosit, Esia profins korht. Brbo Porr yi tohmo kmi Efesusyno korht nd kmi Kolosit. Nd kmi Kolosit Bro Nkifrarhu sioskfot sinyamohat nhai Porn nd kmi Kolosit yihato sioskfot kasinyarmort. Nhai. Kane ka Porr Efesus yi tohmohat, ka nd yiha Porr wom yimam misin hingrneft kfo tkrurhato hingrna htfasmoahat, ka nd yiha nd kmi Kolosit Bro Nkifrarhu mrokfom kfo pthanimoatmm Kolosi thofm wanyhato sioskfot sinyamot.

Nd kmi Kolosit bi sioskfot sinyayetn tfit wom yimam nd kmit yimoamn memoum nd kmithu Kristenm wom nfri nfri mrokfom akfo hta bohtanom. Porr inji wanyhato ndar gontwat wandfamorm Kolosi Kristenm. Roh kfo bmtayuk mrokfom wandfamorm. Kfo memorm, “Krais mifrapr tamoh tamohroh mfhakort korht. Kraisrpar toh rafohato rorhu mofsinhitn yak htarfornom, wom yimam nhai. Rom yakrfomnom nndo wuri yak htarfomnom. Nhai Kraisrarno brbo wom tohrfotnom.”

Kfo memor, “Kraisrhu tirmpno Bro Nkifrar hingrna hta bohtamorm hefenri bbinysotf rhuuyuk shrkam. Kraisrarno frtkafwatnom thu hamuhwornom. Thu hamuhhato nfri yima rifhur niewur. Nfri yima rifhur niewatr tfit tu Kraisrhu duka yima yuhur hikwonom.”

Porr ndar gontwat wandfakmortn Tikikusr hiyafmotr Kolosiko hany-mort. Onesimusrarno yimof. Filemonrhu gontwat Porr wandfamot to nd yima Onesimusrhu mrokfotn wakfotuh wakfotuhmour.

Kraisrn buriwurm tamoh tamohm. Bro Nkifrar bi rorn thu dbothatmor.

(Sapta 1.1-3.4)

Kolosim Kraisr yak hik mifmo yuhat

¹⁻² Na Pora, na Krais Jisasrhu aposer hingrneft kakitohwa. Tu Bro Nkifrarhu hti fiyo nann htihato nd aposer hingrneft fak htamor. Timotir, nmoh Kristen yimater, ror nanpno tohwarn, rorarno ndar gontwat wandfewunonko niko Kolosit tohwa Kristenko. Niko Kraisrarno frtkafwa yimako, Bro Yifemr nikmoh rhu nmbuham ayak hta bohta marnyakahtsko be rhu marnyarahko. ³ No kfo bruttnahato nikmoh yufam yuta thombat, nmoh Nungohtet Jisas Kraisrhu Yifemrarno kfo yindhorwononko. ⁴ Nhai be sfno Bro Nkifrararno kfo yindhor furakahnonko. Mrokfot wanyakmono kfo memomno, “Kolosi thofm Jisas Kraisr hikwamn Bro Nkifrarhu tuhan yindarim hifa hifa kak marnyewumm.” No inji wanyahato Bro Nkifrararno kfo yindhorwo-nonko. ⁵ Niko nhai bi nd nefm riyakitohakrmokomm. Hefenr yimam muhhato Bro Nkifrar hiruha wusshu mrokfot riwanyakhato Jisas Kraisrhu yafothet gutnius mrokfot riwanyakiowakhato nd nefm rifakitohak-mokomm. ⁶ Yimam nd gutnius mrokfot kmi kmi kfo ptha htfasmotmt niko wanyhato rihikakmokomt. Rihikakmotkomt Bro Nkifrar inji htihato fak marnyamorko. Tfit tukomn Bro Nkifrarhu yimam yak marnyewa nmbuhat mhtiyakhato duka memoko, “Dajohmn, gutnius mrokfot tu fipetet.” Nd gutnius mrokfot be bi kmi

kmi kitt. Nhai wom kmit rim tohtakaht. Be bi kmi kmi yitatt tuhan yindars wany hanitamn yima yuhum kak kebokt hanitmm nikmoh yima yuhum yak keboktmo kanjo. ⁷ Bro Nkifrarhu yuhuwaf nmbuhaf hifa Epafrastr nikompno tohmoarn kfo nuhas bonuhasmorko. Rorhu hingrneft, awi hifayet. Nom hifa hti yindhorwonomt ror hingrnawa hingrneft. Ror nmoh yimater. Rorn tkitt yaknihato nd gutnius mrokfot yi kfo ptha nuhasmorko. ⁸ Mkfo ptha nuhas tanyhato tfit niahato rorn tfit nia kfo ptha nuhasmornom, niko Bro Nkifrarhu Yafothat thu kasinyahato wom riruh arhuyuk Kristenm yak marnyewa yihotam.

Porr Kolosim kfo bruttnamo yuhaf

⁹ No nd Epafrastr kfo nuhasyuk mrokfom wanymo yiha, no Timotirpno rikfo bruttnakmononko. No nhai yafhokahnonko. Kangno, “Bro Nkifrar akfo bruttnakahtnonr Kolosithu Kristenko be Bro Nkifrarhu dukef yuhafn hikrahko.” Yo Bro Nkifrarhu Yafothatn tu dborioh riduka aduka yima yuhur hirwattko be nd dborioh dukefrpar brorahrko. ¹⁰ Be nd dborioh dukefr broruhatrko Bro Nungothetrhu dukef yuhafn hikruhatko hti yindhor-rahrko. Niko hingrnayuk hingrnafam nhai finji naruhafn. Be yi marnyarahm. Nikmoh toh nmbuham be dborioh nefrpam narahko. Nd yuhamn Bro Nkifrar hti duka tungunarahkomr. ¹¹ Bro Nkifrar harhuwa bbuka rifthur nhai be rpahtet bbuka rifthur harhukahr. Nhai. Ndohtet ndohtet bbuka rifthur rorn harhuworr. Ndnatn kangno Bro Nkifrar akfo bruttnakahtnonr nd ror harhuyuk bbuka rifthur hiruhatrko titarahkomm wuruha aruha niayuk krhopam. Tpm habokknaruhatrko nhai wohsisruhatko. Nhai. Tamoh tamoh nefm nhai be bmbri kaht kanjo wakuryakhato huttnakniruhafn. Be yindhorhato ¹² nikmoh Bro Yifemr yuta yindhorrahkomr. Nd Bro Yifemrn yihotam yak hta bohtamotrm nikmoh yufam bi rorhu rmon swirtn o rorhu rmon rifthutn korhwom. Yufam bi rorhu rmon rifthut ruhetm nd tamoh tamohm nikmoh yufampno hefenr rhuyukm yakrahkomm. Rpat nd Bro Nkifrarhu nukeft tohet met yindarimpno rpat yak hanyrahkomm. ¹³ Nom afo Satanrhu tirtn rhumononm. Tfit Bro Nkifrar yakmornom Jisarhu tirwafitn wakmbremornom. Turhu marbit rhuyuk Yonrhu tirtn wakmbremornom. ¹⁴ Nd Yonr suh nanyormotr Bro Nkifrar inji htihato be nd nmoh fasoh fasoh nefm nhai tfit dukakahrm.

Kraisrhu nefmi rorhu hingrnefm

¹⁵ Kraisr Bro Nkifrarhu yoner. Nda nom hti duha yita Nkifrarhu ruheft, to nd Kraisrn fak nhombramort. Kraisr, Bro Nkifrarhu nkati yonrn, to be rorhu yinhitn rhu bugewum tamoh tamohm. ¹⁶ Kraisrhu tirmpno Bro Nkifrar hingrna hta bohtamorm hefenri bbinysoft rhuyuk shrkam. Hefenr rhuyukm nhai htikahnom, bbinysofrpathum womm htitnom. Rorpar hingrnammounmotm, kminysofroh nkifram, gafman yimam, nd ndm rorpar hingrna bugamorm. Memor, “Ahtakanamn nanhu yinhit tohhato nanhu yima yuhurn hikrahm.” ¹⁷ Kraisr bi ruhetrn mounti bbinysoft yorhwa shrkar dborha hanymor. Nd dborhayuk shrkar rorpar kfiwatr nd shrkar nom htitwa htiyefn korhwor. Ror kfiwatr tek m yiretn yorhwatn yimanom yiram yakhato kawonom. Ror kfiwatr yimanom wiyauiyauwonom. Nd nd nefm o tamoh tamohm inji rhu hikwatn htitwonomm. ¹⁸ Kraisr tohhato rorhu sioskfot kasinyahato rmon kimor. Turn rmon bis ruhato kak hta bohtewurt. Kraisr tor tu barkof yimar bi nohetr

tfít sinyamor. Tamoh tamohm rorparhu yufatn nyingako htakfot. ¹⁹ Bro Nkifrar bi Jisasrn thu dbothat bugamor. Memor, “Athu dbothatkahtanr be rorn yakrahm nanhu nefm.” ²⁰ Nomi Bro Nkifrar nndo nndo toh hnamohat yo ndar bbinysofthu fasoh rhu beb nmbuhat rhumot Kraistrn yura bgre mis tohegir-hato rorhu kkut yohnemott Bro Nkifrarhu namburpam Kraistrn hta nohmormn gbhu mtir hnamorr.

²¹ Niko afo fasoh nefm yakitohhato yo fasoh dukefmpno rhuhato nhai Bro Nkifrarprno brbo yirmoako. Be inji hti sr thumoukomr. ²² To be hifa Kraistr yura bgre mis nohmor. Inji namotr Bro Nkifrarhu namburpam rorn hta nohmotrm hifa yima yuhur niehato rifak marnyakmornom. Bro Nkifrar duka memor, “Inji anakahta yimaroh yima yuhum tukanhu yima yuhum kindo rhuruhamn ee hifa htihato tfít yakruhanm. Yo nhai tfít wom mrokfetm rhuruhatm.” ²³ To nd dukeftpno, nd niko yakitohwa gutnius mrokfot mirahko yakitoh hrufreh hasohato tfít wom nefmpno amyafhoninomt. Nhai. Nikmoh dukefm nd gutnius mrokfot kfoyuk mrokfo yuhamn duka duka hti yukatoh hasokfot. Na Pora, nann aposer hingrneft myaknihato nd gutnius kmi kmim kfo ptha htfaswonomt.

Porr sios tohyuk tuhan yindariroh hingrna yimar tohmor

²⁴ Ndar yihart na kalabus tohwa. Na yindhorhato kekwanm nanpno niewa krhopam. Nd krhopam Kraistr yakmo krhopam kanjo kekwa. Niko yakyuk krhopam nann tfít kakahukanko. Nndetann kanga nd Kraistrhu sioskfot yakyuk krhopam nann tfít kak hanyahunm. ²⁵ Bro Nkifrar niko yima tangikmoh duka nmbuhatn na sioshu hingrna yimaya fak htamora. Nndetann na niko sios tohwa tuhan yindarikmoh hingrna yimaya tohwa. Nann nd hingrneft tohhato nann nd rim hta mhta mrokfefm frhik bohikak-hato kfo hik bohik nuhasruhanko. ²⁶ Bingot toh hnamo yimampno nd mrokfot afo fak kafroh hnamort. Ariharnd nd kafrohet mrokfot bi tafont htiwatrt Bro Nkifrar hikwa tuhan yindarinom bi htihato wanuknomt. ²⁷ Bro Nkifrar turhu dukeftpno nd kafrohet mrokfot hta nriyaf nuhasmornom. Nd kafrohet mrokfot inji kfiwut. Yima tangim Bro Nkifrar yukatohhato yak marnyarahrm. Nikompno Kraistr frtkafwa yuhatn hefenr hanyruharko hefenrhu dborioh dborioh rhu nmbuhat hi hanyahrko. ²⁸ Nndetnt nom aposernom kmi kmiroh tuhand yindars kfo nuhas buga hanitnomm gutnius mrokfot. Nd gutnius mrokfot kfo ptha nuhas thoft, nom yakitohwa bro duka yima yuhur kfo kangnom, Bro Nkifrarhu hikneft hik marnya bomarnyakfot. Nom kangnom tu dborioh dborioh dukefmpno nd Bro Nkifrarhu hik yuham akfo hik bohik nuhas marnyakahtnomm, mrokfom yak duka tunguna marnya-rahmm. Yak duka tungunaruhamn Kraistrpno frtkaf kihruhamn Bro Nkifrar hti marnyarahrm. ²⁹ Nndetnt Kraistr yahuka bbuka rifhurpno aposer hingrneft hingrna nnfiwant.

2

Toh bmtahato tamoh tamoh nefm niayukm frtfa thukfot

¹ Na kanga akfo nuhasanko niko nanpno tafi nahti duha Kolosiko, Laodisiako yo niko womko, na niko dukahato yiha yiha kfo bruttna nnfiwa. ² Na inji hingrna nnfiwohat nanhu yima yuhur duka kangr, niko Bro Nkifrar hikwa tuhan yindariko bi tat yima yuhumpno warhukahkomn tir nayakitohhato rpa yima yuhur bi warhuko. Ndhitet dborioh dukefm

wayakkahkomn niko Bro Nkifrar hikwa yihotar nd dborioh dukefmn thu bmta hanyruhatmko nd Bro Nkifrarhu yak kafkoyet mrokfot htirahkomt. Nd kfo kafkoyet mrokfot to nd Krairsru gutnius mrokfoyet. ³ Kristen yima yakitohyuk riduka aduka yima yuhum, mrokfo ptha yafothar, tamoh tamoh dukefr Krairsru gegb yohrn hmbre kafrohetm korhm. Yima Krairspno riyahn, ee susubur nuhashirahrn.

⁴ Mrokfom bi wanukwokomm. Wom yimam niahato mkfo wuti bowu-titmko, to mirahko bi ariwany yakiowaknomm. ⁵ To na, na nhai nikompno rpa kmit tohkahnom. Na nndo tohwa. To nanhu htiyefit inji htitant, thatiprpat nndo tohwot, dukefr nikompno korhwor. Hifa nikmoh toheft toh marnyiwakomn Krair kakitoh nnuhaknitkomr. Nd ndm wanyakhato yima yuhur yindhorrwora.

Krairspno frtkaf mifhato rorhu toheft yakkfot

⁶ Niko bi Nungothet Jisas Krairsru gutniuskfot wanyhato yakitohetko, be Krairspno frtkafhato wuyauyaukfot. ⁷ Miroh nembfam tum wom miroh nembfampno nathu dbkafhato tohwa kanjo nikmoh tohefti wiyauyau nm-buhat inji tohkfot. Nd nom yihato kfo nuhas htfaswa gutniuskfot yakitoh kihhato hik marnyakkfot. Nd gutniuskfot hikhato Bro Nkifrar nikompno niwa dborioh dborioh nefm tfit Bro Nkifrar kfo yindhorr boyindhorkfot.

⁸ Niko dukefmpno tohkfot. Wom yimam wom nkifra tndhmi mount yorhwa marrhu tndht o gunyrhu tndht o yamthu tndht o bbinysoft yorhwa shrkaroh nkifra tndht hneruhamtn yuwi mkfo tndh nhehruhatmko niko mwany wofnnihato mhikaknirahkomm. Ndhset yimam nkifram yakitoh hawihnamo nkifra boririfhuti mount yorhwa shrkaroh nkifra tndh mrok-fomi bbinysoft yorhwa shrkaroh tndh mrokforpam kakitohwom nhai Jisasr hikhato rorhu dukefr hikkahm.

⁹ Bro Nkifrar bi Krairsn thu dbothat bugamor. Ndnetn niko dukaf hanykfot. ¹⁰ Kminysofroh nkifram bi Krairspar kak wasitrm. Nhais rom mfrfnahnihato tfit rom mtokhfot mfhako. Nhais. Niko Krairspno frtkafwa yuhatn to be ror hatohyuk yafothar be bi niko mthu nawoh bugamor. ¹¹ Niko Krairspno bi frtkafhato tohwa yuhatn be bi kak hikwokomt tu tha pukthu yuhat. Ndt nhai be thatipthu hingerneft rhukaht. Nhais. Krair nd bingot hatoh hnamo yima yuhu bebm fak thumor. Tot tu tha pukthu yuhathu mrokfo yimbu yuhat. ¹² Bi Krairspno nohmokomn rpat sinyamoko. Baftais hingerneftn nd Krair nohhato sinyamo hingerneft baftais nuhasmoko. Krair nohhato tfit sinyamohat, fitoh yimam duka kangm, Krair nohmohat tfit tu Bro Nkifrarhu bbuka yafotharn tfit kasinyamorr; ndhet dukefr yakitohet yimam baftais neftpno nd dukefr kak nuhaswomr. Niko to ndhet dukefr yakitohmotko baftaismoko. ¹³ Niko ritohakhato toh hawihnamohat tuko rihatohakmo fasoh yima yuhurpno toh hawihnamokomn nhai wom dborioh nefm nahnarmoko. Be nd fasoh nefmn yakitoh hnamokomn bi hel yita yihotar bi tohmoko. Krair sinyamo yuhatn niko tfit nfri yima rifhur thu hmbrehemorko. Nd fasoh fasoh nefm nd yiha Bro Nkifrar mong trohmorm. ¹⁴ Be nd nmoh yufam bi kotpepakfot ruhetm Jisas nohmo bgre misn rpat frdbkafhato rpat nd kotkfot minohnimot. ¹⁵ Krair bgre mis nohmo tkittn Bro Nkifrar yimaroh nyingatikhato tafontn nda kminysofom yo nkifra yarhm hatohmo nungrajoh bbuka rifhum fahot nohmorm.

Bi Krairspno nohmonom. Nhai tfit nkifra tfha mntwatn yakhta marn-yaruhatt nmoh rhu nmbuhatt

¹⁶ Mirahr wom yimar mrokfot hnehato yemroroh ye hik yuham, yo Judaroh bro yiharoh rhu hik yuham, yo nfri yamroh mfnah yiharoh yemro burwa hta yuham yo Sabat yiharoh rhu krna yuham, nd nd nkifra yirmoht tfit amhfnahneyant. ¹⁷ Nd nefm nkifram yakitoh hik hnamom rom nkifra yirmoht yakitohetmn fak hik hnamomt. Rom yakitoh hnehato bi romn hanohnimomt. Nom yonnom tfit nd nkifra nefm yakitoh duha. Nom Krair hingrnamo hingr nef yuhatn tfit hikkfot. ¹⁸ Wom yimam niahato kfo rafo kangmko, “Tamoh tamoh yeshri-roh ye kars yuham kfiwunomko yo kfo kars mrokfom kahukwonomko, hikkfot. Hikhato mounmotmn kfo bruttnakfot.” Rom kfo yok tng yuhat hikrahko to be nd Bro Nkifrar hiruha hifa rhu nmbuhatt nhai yakruhatkomt. Ndh tet dukefn nd yimam kfiwam, be nd hwe tweh hanyhato yekwa mro-kfomn kfo nuhaswomko. Be turoh tuhagrha yima yuhumn nd mrokfom kfiwumm. ¹⁹ Nhai romn Krairspno frtkafkahn. Nhai. Nomn Krairspno frtkafwatnom ror hatoh ekwornom. Nom sioshu tuhan yindarinom rorn nmoh yima mrokfo rifuher. Rorn kak htuf bohtaf hanitrnom. Ndn etnomn rpat nayakitohwanomn Bro Nkifrarhu dukefn yuharn hik hanitnom.

²⁰ Niko bi Krairspno nohhato nkifra tahi rmonroh nkifra boririfhut bi minoh nhehafetko. To tfit tamohmpno tfit nd nkifra boririfhut yakitohwako? To tamohmpno kfo boririfhu yamukako, ²¹ “Hnaru yemrom tire yakti duha yo ye siwon duha.” Tamohmpno kfo kars mrokfom hikwako? ²² Mirahko ndhtet kfo kars mrokfom ahiknom. Ndh tet hnaru yemrom tng yuhat yiyefiwam nhai yihom rhukahn. Yihom fnahnitm. Be yimamn ndhtet yemro ye kars mrokfom mhfnahnewumm. ²³ Yimam to ndhtet yemro ye kars nmbuham ye hikwamn kangm ka tot tu dborioh neft. Kangm, “Ka nd yemro ye kars yuhamn hikhato nd fasoh yima yuhur minoh hmbrenirahr.” Ndn etmn mounmotm kfo tatewamn, yima yuhum yak karhuhato turoh thatipm tmbho wok bowokwomm. Kangm, “Ka nd yuham inji anakahnomn ka nd fasoh yima yuhur minoh hmbrenirahr.” Nhai mif.

3

Bi Krairspno rpat sinyamonom

¹ Niko bi Krairspno rpatn Bro Nkifrar kasinyamorko. Ndn etn nikmoh yima yuhum be hefenko rhuyuk shrkamn nikmoh yima yuhum duka duka rhu hasokfot. Hefenrn Bro Nkifrarhu tirmifko Krair mrhumor. Bro yufa yekwa mkuko mrhuhato kingroh gajis yakmorn korhr. ²⁻³ Niko bi nohmoko. Tfit Krairsn nfri yafothat thu hmbrehato be rorpno rim tohmoko. Krairspno rim tkafhato to be Bro Nkifrar rpat Krairspno rpatn toh natwihworko. Ndn etn yiha yiha hefenr rhuyuk shrkar duka duka rhu hasokfot. Mirahko ndar bbinysoft rhuyuk tamoh tamohroh dukefn be arhu hasonom. ⁴ Nikmoh rhu nmbuhathu rhu hik hanyuk yihotam Krairsn harhuwort mnat. Ror tafont miyak nriyafhato tuhan yindars tafont hti thombat rorpno tafont rpat toh bugarahko. Rorpno rpat tafont tohhato rorpno rpat fnhu bugarahko bruwohmr katiwa kanjo.

**Krair thu hamuhwatnom nfri yima rifhur
mfnahnewur**

*(Sapta 3.5–4.18)**Nfri yima rifhurhu nefm*

⁵ Niko to bi Kraispno rpat nohmoko, ndnetkomn mirahko tfit nd fasoh fasoh nefm tfit ayakitohnomm. Nda bbinysofthu fasoh fasoh dukefm niko hatohwam yafho buga mifkfot. Na kfiwa fasoh fasoh nefm, to kfiwa nd met yindarim nayak kafroh htfaswa nefm, yo yima yuhum wabbra sinyekwa nefm, yo nyinga nnwihnefm, yo maruha dukefr. Nd maruha dukefm yorhwammn nhai Bro Nkifrar dukakahmr. ⁶ Mirahko inji ananom. Yimam inji niwam, Bro Nkifrar namburrahmr. ⁷ Niko tafi Bro Nkifrarhu mrokfot hik duhakomn afo ndhтет nefm fakitoh hnamokomm.

⁸⁻⁹ To tfit arihat, namburneft, nd yima yuhum kahm kanjo wakuryak-hato womm kfo hutnefm, womm be hifa nyingar hta duha, womm faso faso kfo rindho borindhohato faso faso kfo dbotna inji nanefm yo womroh kfo fura nhehnefm, nd bugam be yafho thu bugakfot. Nd fasoh yat k yima yuhu bebr bi fahomokomr. ¹⁰ Bi Bro Nkifrar nd dmbt rhumot bi frwus bowusmortn yima rifhwm bi wutha-yemko. Yiha yiha nfri nfri dukefm hi hanitrko. Nfri dukefm yahukatrko nikmoh yima rifhur turhur kanjo korhr. ¹¹ Nom frohnom bi mar nukeft bi ruhetnom, to nhai tfit tunom yak nhtahato Judam rom tum watohko yo yima tangim rom tum inji watohko, tha puketm rom inji tha puk duhatm rom inji, wom mreht pthayetm rom inji, yo tahi muhm tohetm rom inji, slefm rom inji yo yima furam rom inji. Nhai tunom tfit inji yak nhta kfo nhtakfot. Nhai. Kraistr thu hamuh nhombra bugewurnom yima yima buganom. Ndnetnomn nom bi Kraistrparhu yima bugayenom.

Wommpno nayak marnyahato rpa yima yuhurhu toh nmbuhatn yakkfot

¹² Niko bi Bro Nkifrar yakmorko bi rorhu yufatn korhko. Rorhu dukefr nikomn korhr. Ndnettn niko womroh hti yuhuwaf nmbuhat yakkfot. Hifa hifa yima yuhum womm hmbrekfot. Nikmoh yufam yura yura hta duha. Nikmoh ruhefm, pthefm, ptha yima boyimakfot. Womm finji tamohm fak nhehmkon o finji newumko, niko be mirahko yima yuhum wakur sinyahato finji anakninom. Mrokfo ptha duha be ruhato nyingarpaye yukatohkfot. ¹³ Nikmoh wom frohr wom Kristenmn tamohm fak nhehmr o finji nemr, mirahr nd yimar be sinyahato finji anaya. Be hifa yima yuhurn nd yimam nayuk nefm yafhokfot. Mirahr ruhato nd womm nayuk nefm akfo nam-buranm. Nmoh Nungothetr nmoh fasoh nefm yafhomo kanjo womm nayuk nefm yafhokfot. ¹⁴ Nd na bi kfo hne mrokfom rom inji kfoni hanitanm. To ndmpno yakitohyuk wom bro nmbuhat kfiwanko wom yimaroh yak marnya nmbuhat. Tuko Kristenko tir nayakitohhato tawo tawo nayak marnya nayak marnyakfot. Inji narahko, to be nd tkittn tuko nahti dukaruhakomn be nd yiha tir riniyakitohakrahko. Yo Bro Nkifrar kfo yindhorkfot. ¹⁵ Kraistr nd dukeftn fakmorko. Ndnettn nd tir nayakitohnefm yakitohhahkomtn nd dukefrn yak htarahmr nikmoh rhu nmbuham. ¹⁶ Kraistrhu tu dborioh mrokfom mfhat htakfot. Niko rpa rpa yimako wom wom Kristen yimampno yi ruhato dborioh dborioh dukefmpno nakfo hta bohta marnyakfot. Niko Bro Nkifrar kfo yindhohato Windoh Gonborngthu windohm yo nd Bro Nkifrarhu windoh furam, nd nd windohm windohkfot. ¹⁷ Nikmoh tamoh tamoh mrokfom, tamoh tamoh hingrnefm, yo tamoh tamoh nef bugam niko nayukm, Nungothet Jisarrhu yufarpatpno na bugakfot. Yo rorhu yufarpatpno Bro Yifemr kfo yindhorkfot.

Kristen ripharoh toh nmbuhat Porr kfo pthamor

¹⁸ Niko metko, niko be yindariroh yinhitn rhuhato rroh tngm hikkfot. Tot tu dborioh nmbuhat. Bror ndhtet neft hti yindhorwort. ¹⁹ Yo niko yindariko tukmoh metn marbitn htakfot. Mirahko faso faso ayak beb bobebnomm.

²⁰ Yo niko yonko, yifammam tamoh tamohm kfiwumko, hanyjborna duha. Be rroh tng yuhamn hikkfot. Tot tu dborioh nmbuhat. Ndhtet neft Bro Nkifrar hti yindhorwort. ²¹ Yo niko yifemroko mirahko yonm fasoh nmbuhat ayak nuhasnomm. Inji narahko, to be rroh yima yuhum krhorahmm.

Tohakmi hingrna yimaroh mrokfom Porr kfo pthamor

²² Niko hingrna yimako, niko tukmoh tohak yimaroh tng yuhamn hingrna hikkfot. Mirahko be rroh yima yuhuroh yak marnya nmbuhatn rroh nyingahato tamoh tamoh hingrnefm ahingrna marnya bomarnyanomm. Nikmoh dukefm Bror duka yanhohato be dborioh hingrna yihotam hingrna-kfot. ²³ Tamoh tamoh hingrnefm hingrnewukon o tamoh tamoh nefm newuko, yima dukefmpno hingrnakfot. Nd hingrnefm nhai be nikomn fitha yakrmokomm. Bror kahukrko nd hingrnefm. Ndnetkomn hingrna hik marnyakfot. ²⁴ Tu Bro Kraiser kukatoh-worm niko niwa nefm yo hingrniwa hingrnefm. Kto rorn ttha hanyrahrko. Nd nmbuhat bi wanyeteko. Nd bi hta nhombret wuskam yakruharn ttha nhombra hanyrahrko. ²⁵ Bro Nkifrar kotkfot yakitoh thombat, nhai nndoh nndoh kotkfot yimam tohruhatn. Nhai. Rpa kotkforpat yima bugam toh bugarahm. Nd bro yufet yimam finji nem, bro namburet yimam finji nem, nd yima furam finji nem, rpa kot-kforpat toh bugahato krhopam he buga hanyrahmm.

4

¹ Niko hingrna yimaroh tohak yimako, niko tu hifa dborioh nefm hingrna yimam yak nuhaskfot. Niko dukaf hanykfot nikmoh tohak yimar to yura hefenr tohwor.

Kfo bruttnanefti yau marnyaneft

² Kfo bruttnaneft yafho thu duha. Yihof href kfo bruttna hasokfot. Duka yima yuhum Bro Nkifrarpar yi bugahato duka hik bohik buga, ee, kfo bruttna-kfot. Kfo bruttnahato Bro Nkifrar kfo yindhorkfot. ³ Nmoh hingrna nmbuham ndm kfo bruttnakfot. Bro Nkifrar wakfo bruttnakahtkomr Kraiserhu mrokfom kfo pthayuk yihotam yak hta bohtarahrmm. Nd Kraiserhu kafrohet mrokfot rhumoat, be tafont kfo ptharuhatnomt tuhant yindars wanyrahmt. Na nd nmbuhatpno yakmoma kalabus htamoma. ⁴ Wakfo bruttnakahtkma nd kafrohet mrokfeft tu Bro Nkifrar dukewa dukef yuhatn kfo hikhrotant wany hik bohikrahmt.

⁵ Kristennom tohwa tkitm tom Jisasrhu mrokfom hik duha yimam tom rpat tohwonon, ndnetn nikmoh tamoh mrokfo pthanefm ptha marnyakfot o toh nmbuham be dborioh dukefmpno toh marnyakfot. Nd Jisasr hik duha yimam nikmoh pthefm o toh nmbuham mhtiyakruhamn Jisasr mhikaknirahmr. ⁶ Tamoh tamoh mrokfom niko pthayukm be dborioh mrokfom pthakfot. Mrokfom be kfo yima boyima marnyakfot.

Porr kfo tkrurmotr Tikikus Onesimusrof yimof Kolosiko

⁷ Tikikusrn kfo nuhas hik bohik-rahrko na hingrnawa hingrna yuharoh mrokfom. Tikikusr nmoh nanyma kmi thofer. Nmoh Nungothen Jisasrhu hingrneft rorpno rpat hingrnewunomt. Rorhu hingrneft, awi, hifa. ⁸ Nmoh toh nmbuhat asha tohwat rorpno wawanyswako. Ror niahato kfo bmta mrokfom kfo hirahrko. ⁹ Nikmoh kmi thof Onesimusrpno rpat nierahf. Onesimusr nhaf nmoh dborioh yimatemer. Nompno rpat tohwor. Rofn kfo nuhas hik bohikrahfko nmoh toh nmbuhat yo nompno yorhwa nefm.

Porr kfo yindhor mrokfot Kolosimpno yimot

¹⁰ Aristarkusr nanpno rpat kalabus tohonom. Ror dukewarko kfo yindhor mrokfot htefiwurt. Yo Makr, Barna-basrhu rahemr, ror to rpat tohwanomn rorn wom kfo yindhor mrokfot htefiwurt. Fitoh yiha Makr nikmoha niewur, na kfomo yuhatn wahikkah-komn wayindhoraktwakomr. ¹¹ Yo Jisasr, wom yufat kutewumr Jastasr, rorn nhaf wom kfo yindhor mrokfot htefiwurt. Juda yimam na hingrna-nuhiwam, to nd nd yimarpam hingrnanuhiwuma. Bro Nkifrarhu yinhit tohwa yuhathu mrokfot, hifa nd nd yimampno kfo nuhas hanitnomt kmi kmim.

¹² Nikmoh kmi thof Epafrasrn wom kfo yindhor mrokfot htefiwurt. To nd Epafrasrn tor niko hingrnanuhiwa yimatr. Yiha yiha nd yimar nikmoh yufam yutewarko kfo bruttnewur. Nhaf wom yihar rhu furakahrr. Kangr, “Bro Nkifrar akfo bruttnakahtanr, rroh Kristen toh nmbuhat toh bmtaruhamn mirahm nko fitoh dfikrhof Kristenem.” ¹³ Ror niko dukewarn yihof href yihof href kfo bruttna hasiwurko. Niko duka, yo Laodisiathu Kristenm duka, yo Hierapolishu Kristenm duka, nhaf rhu witakehr kfo bruttnaneft. ¹⁴ Yo nmoh yimatem Lukr, nd dokta hingrneft yakitohwar, rori Demasr wom kfo yindhor mrokfot htefiwurt.

¹⁵ Na tukanhu kfo yindhor mrokfot wakfohitwokma Laodisiat tohwa Kristenmpno. Yo wom kfo yindhor mrokfot wakfohitwokma Nimfati rothu kunys yi rifinywa Kristenmpno. ¹⁶ Niko Kolosi thofko ndar gontwat waritimmikahkomt tfit Laodisia thofm wahekahtko rroh sios ritimrahmt. Yo Laodisiathu yufatpno yiyuk gontwat Laodisiathu sios aritimmikahmtnt tfit Kolosi thofm ahekahtm rroh sios ritimrahmt. ¹⁷ Arkipusruhert ndar mrokfo nmbuhat. “Ni Arkipuse, ni Brorppno yakmo hingrnafat mirahn amyafhonyant. Nd hingrnafat wayakitoh marnyakahnt wahingrna marnyetwant.”

¹⁸ Na Pora ndar gontwat wandfahato kfo yindhor mrokfot htefiwanko. Mirahko aduka mmonomr na kalabus tohwohat. Bro Nkifrar ayak marnya bomarnyatwarko.

Be injirpa mrokfom.

Tesalonaika thofroh barkof gontwat Porr dwandfakhato htafmot Barkof kfo nuhas mrokfom

Tesalonaika taunt, tot Masedonia profins rhumoa tu bro taunt. Porr misin hingrneft yihato Filipait tohnmohat to be tfit Tesalonaikako yimor. Ndha yihato ndha misin hingrneft hingrnahato sios kasinyamort. Tesalonaikathu misin hingrneftu kfo nuhas mrokfom htikfot (Aposer 17.1-9). Porr Tesalonaikat misin hingrneft hingrnahato, bok metm, yindarim Bro Nkifrarhu mrokfom wany yindhorhato hikmomm. Tfit Judam inji htihato namburmom. Namburhato Porr kfo hut hikafmomr. Kfo hut hikafmotmr Korinko yimor. Memom, ror tohwarn gutnius mrokfom ror pthiwatrm yimam bi Jisasr hikwom. Korinko tohetrn Jisasr hik duha yimam sinyahato Tesalonaika Kristenm krhopam hemomm. Timotir brbo Beriat tohetrn htihato wanyorm Tesalonaikathu Kristenroh krhopam. Timotir wanyhato rorn Korinko yihato Porr kfo nuhashemorr.

Timotir pthayuk mrokfom Porr yak bugahato tfit Por, Sailas, Timoti, rom husfirpat rhuahato Tesalonaikaroh yufatpno kfo bmta mrokfom wandfamomm. Bro Nkifrarhu rfa borngt rhuyuk mrokfom hti hik bohiket tu dborioh duka tunguna yimam Tesalonaikat ziyuk gontwam htihato kfo memom, “Nd kfo bmta mrokfom rhuyuk gontwatn tot Porr wandfayuk barkof gontwat.” Nd barkof gontwatn htamorm Tesalonaika thofm Jisasr hikmo yuhathu kfo yindhor mrokfom, yo rroh dborioh nefroh kfo yindhor mrokfom.

Timotir Porrpno yihato Tesalonaika thofroh kfo ttiwon mrokfom kfo ptha nuhas memorr, “Tesalonaika thofm kfo kangme, ‘Kraisr kto tfit yawihna thombate, finji yawihneruhar? Yo fitoh yuhat nieruhar? Yo nohet yimam finji sinyaruham?” ” To nd rroh ttiwon mrokfom Timotir pthamotrm gontwaye tfit kfo nuhas hik bohikmorm.

Porri rorhu hingrnanho yimam Tesalonaika Kristenm mfro dukamo yuhat

(Sapta 1–3)

¹ Nom Por, Sailas, Timotironomn ndar gontwat wandfewunomko niko taun Tesalonaikat yorhwa sioshu tuhan yindariko. Niko nmoh Bro Yifemri Nungohtet Jisas Krairpno frtkafwa tuhan yindariyeko, nikompno ndar gontwat htefiwunomt. Bro Nkifrar yak marnyakahtrko, nikmoh yima yuhum mirhurahmko.

Tesalonaika thofm Jisasr hikmo yuhatpno Porr yindhormor

² Niko Bro Nkifrar yakitohwa nmbuhat dukahato yiha yiha Bro Nkifrar kfo yindhorhato kfo bruttne-wunomko. ³ Nom htitwonom nikmoh dukefm Jisasrn yihato dborioh nefm hikwoko. Dborioh nefm yakitohetkomn womm htineft kbor marnyewukomm. Yo tamoh krhopam nianeft nhai yakrmekahko. Tohhato titewukomm. Krhopam titahato nikmoh dukefm kitm Nungohtet Jisas Krair hneruha dborioh rhu nmbuhatn. Nom inji htitanomn Bro Nkifrar kfo yindhor-wonomr. ⁴ Bar yinouroko, Bro Nkifrar

be marbit htewatrko, nom inji htihato kfo kangnom, Bro Nkifrar bi turhu yufatn kfo htamorko.

⁵ Nom nd gutnius mrokfom nikmoha hnehato kfo ptha nuhasmohat be Bro Nkifrarhu Yafothathu bbukeftpno ahingrna duha yinom, be mrokfo furam kanjo wany huhrasafermokokomm. Nd Bro Nkifrarhu Yafothat, nom hatohyukt, nd Yafothatn nikmoh yima yuhum thu yuhurmottko nom pthayuk mrokfom wany yindhorhato wufakmokomm. Nom nikompno yi tohmohat, memonom, “Rompno ai atohkahnomm, nom tohruha toheft rom htihakruhamn nd yuhat toh hikrahm.”

⁶ Niko Bro Nkifrarhu mrokfom wany yakiohato hikmohat, bok yimam inji htihato bok krhopam hemomko. To niko nd krhopam yakmohat niko nmoh nefti Jisas Krairhu neft hikhato tohhato nd krhopam titamokomm. Nhai yonenm kanjo kfo nurrmoko. Bro Nkifrarhu Yafothat yima yuhum hemottko nd krhopam yindhortpno titamokomm. ⁷ Ndnnett Masedonia profinsi Akaiat tohyuk Kristen bugam nikmoh nefm rihtiyakhato bi nikmoh nefm hikwom. ⁸ Bro Nungothetrhu mrokfot, niko pthayukt, bi frfnahnitatt kmi kmim bi wanukwomt. Yimam nrwir tanmbarafhato kmi kmi wanyekwa kanjo kmi kmim bi wanukwomt. Nhai be Masedonia profinsi Akaiarpat mrokfot wanyakahmt. Nhai. Bi kmi kmim wanukwomt. Bi wanyetmn nom nhai tfit kfohekfot. ⁹ Nom tunn tfit kfo tndh nuhas hanitwomnom nom nikmoha yihato Jisas Krairhu mrokfot kfo pthahato niko wanyakiohato nd nkifra tahi yifonm myafhonihato yima yuhu yakkektmo yuhat, yo niko Bro Nkifrarhu hingrna yimako yorhwa yuhat. Nd ndm kfo tndh nuhaswomnom. ¹⁰ Yo kfo tndhmomt niko Bro Nkifrar hikhato rorhu Yinemr toh gari hasiya yuhat. Nd yon Jisasrn nohhato tfit Bro Nkifrar kasinyahato, rorn fak noh-morm Bro Nkifrarhu namburpam bi duka hتامom.

2

Porr Tesalonaikat hingrnamo yuhathu kfo nuhas mrokfot

¹ Bar yinouroko, bi tukomn hti-mokomt nom nikmoha hingrnamo hingrneft. Nd nom hingrnamo hinger-neft nhai yi furarmot. Awi, yafothett rhumot. ² Niko bi wanymoko, nom Tesalonaikat yimohat, afo Filipait tohnimonom. Filipait tohnimohat kfo rindho borindhomomnom yo faso faso fak bebmomnom. Huhra krt kanjo mfrhabtotmonom. Filipait tohni tfit Tesalonaikat yimohat, nhaf krhopam fknemonom. To nhai yakrmermonom. Nhai. Bro Nkifrar nmoh yima yuhum thu bmtamotrm nom tohhato gutnius mrokfom kfo nuhasmonomko. ³ Niko Jisasrhu hikneft nom niko kfomohat, nom nhai wom dukefmpno yuwi duka marimonom, “Bro Nkifrarhu mrokfom akfo nuhasakahtnomm Jisas hikruhamn marufam hirahmnom, o nom kfo yindhorhato bro yufat hirahm.” Nom nhai nd nd dukefmpno gutniuskfot kfo nuhasrmonomko. Nhai. ⁴ Bi tu Bro Nkifrar bi nmoh yima yuhumi nmoh dukefm hti nhombra bonhombrahato ee nd hingrneft nmoh tirmn htamort. Ndnnett nom nhai mekahnom, “Nom pthayuk mrokfom tuhan yindarimn awany yindhormm.” Nhai. Nom kangnom, “Bro Nkifrar awany yindhormm nom pthayuk mrokfom.” ⁵ Htimokmnom, nom nhai wom yiha nikmoh wuskam o tamohm htihato mkfo rhti borhti o mkfo yuhur boyuhur-rmonomko. Nhai. Bro Nkifrar htitwor nom inji kfiwohat, nom nhai wom yiha inji nawonrmonomko.

⁶ Nhai marimonom, nikomn o wom frohmn nmoh yufam yura yura yuta hagrha-rahmm. ⁷ Nom Krairhu aposerenom. Nomn aposer hingrneft kakitohwonomt. Be amekahnomn nmoh yufam wayuta hagrhatwakomm, to inji kformonomko. To nhai, nom nhai inji kformonomko. Nom be noh hmbrenano tohhato mmemrom yonm yakitohhato hmnewa kanjo inji fakitohmonomko. ⁸ Nmoh yuhuwaf marbim nikomn rhu mif mifmomi. Ndnetnomn nmoh dukefm bi duka memonom, “Nom rroh kmit yihato gutnius hi hanyeftpno kangnom, anohnom o finji anamnom, nhai mrokfom.” Nom be yi tohnhohato kfo bmta mrokfom hemonomko.

⁹ Bar yinouroko, nom nikompno tohhato Bro Nkifrarhu gutnius hinger-neft hingrnamohat htimokmnom yonmari marm hinger-na krifaf-mounomm, yifungm hinger-na yifungafmounomm. Nhai be marimonom, be nikomn krhopam hirahnom tamoh yeshri hanyeft, o hweyuk tkitroh he, nd nd nefm. Nhai.

¹⁰ Niko Krair hiket yimakompno nom tohmo toheft, niko htimokmnom yo Bro Nkifrar htimornom, nom nhai wom fasoh neft rim na nuhas-rmonomko. Nmoh toheft toh marnya bomarnya-motnomt htimokomt. ¹¹ Tamoh tamoh nefenm nom namoam, yifemr tohhato turhu yinemrom tamoh tamoh nefenm kfo tebos nuhaswa kanjo inji kfo tebos nuhas-mounomko. ¹² Nikmoh yauefem tohefm mduka krho htatamoahat, nomn kfo kasinya-mounomko, o tamoh krhopam yak-moahat nomn yihato tohnhohato kfo bmta mrokfom hemounomko. Yo kfo tebos botebos nuhasmounomko toh marnyahato Bro Nkifrar tohwa tohefthu toh yuham. Nd tu Bro Nkifrar fakmorko. Yakhato turhu mofsinhitn yak htatahato toh hongmb hmbremorko.

Tesalonaika Kristenm Bro Nkifrar yakitoh kihhato toh bmta kihmom krhoparoh titaneft

¹³ Niko Bro Nkifrarhu mrokfot yakmo yuhat ridukak thombat, Bro Nkifrar nom kfo yindhorwonomr. Niko nom pthayuk mrokfom wany-mohat, nhai duka marimoko, “Nd rom pthiwa mrokfom be yimamn pthiwumm. Tamohmpno yakruhanomm?” Nhai inji dukarmoko. Duka memoko, “Bro Nkifrarhu mrokfoym.” Ndnetn fakmokomm. Nd mrokfot nikmoh yima yuhom rihingrnahato Krair hikwoko. ¹⁴ Bar yinouroko, Judiako rhuyuk siosroh Kristenm yakmo krhopam kanjo niko inji krhopam fakmoko. Nhai be briyo krhopam he furarmomko. Bro Nkifrarhu mrokfom hikmotko tukmoh korhof yimam hti namburhato faso faso fak bebmomko. Judiarih Kristen sioskfot to turoh korhof Judamn namburhato fak bebmoumm. ¹⁵ To nd Judarpamn nmoh nkifrapno tohmo profetm wasmomm, yo tfit Jisasr tohmo yihamn tohyuk Judamn, nmoh Nungohtet Jisasr wasmomr, yo tfit arihat nom tohwa yihamn nd Judarpamn, be hti dbnot thuwomnom. Nhai hifa nyingar htakahmnom. Kangnom wom taunm ainyom, kak tuhefiwumnom. Rom inji nahniwa nefm be tu nhai mif Bro Nkifrar hti yindhorkahrm. ¹⁶ Nhai wofnkahm yima tangim gutnius wany-hato Bro Nkifrapno rim tohakneft. Ndnetmn ndhtet neft newum. Rom nd nahnewa fasoh fasoh nmbuham bi nahna nahnewamn nd rroh fasoh fasoh nefm bi kminysofm kanjo wayekwamn nd wukier bi tathur yibonwomr.

¹⁷ Bar yinouroko, nom Judam mhutt hikafhato nndo nndo afo toh-mohat, to mirahko ka mumafonimo-nomko. Nhai. Yonr firtrohato yifemr yonrhu dukefr yorhwa kanjo nmoh dukefr inji dukamonomko. Yima nyingatikroh nahtineftn, nhai nahti-rmoanom. Nmoh yima yuhum nikmoh dukefrn tohmoatn, ndnetnomn niayuk yihotam rima hambrak mhambrakmou-nom. ¹⁸ Nikmoh tfit yi hti yibonet-nomn, na Pora dbiyaf hatohmoa yinyeft, to nhai. Satanrn nmoh ziyuk yihotam wuyak ayakmourm. ¹⁹ Nhai be sfno marimoanom, yihato ahtinomko. Nmoh dukefm be nikomn duka haso-mounom. Kto Jisars tfit nianeft kfo mirahnomr; “Tesalonaika thofm gutnius mrokfom kfohemohat, yakhato fakitoh kihmomt.” Nd yiha be tu bro yindho-reft yakrahtnom. ²⁰ Niko gutnius mrokfom wanyomohat, be yakhato fakitoh trp kihmokomm. Nom ndtpno kfo yindhonwonomko.

3

Timotir tfit Tesalonaikako yimor

¹ Niko be tu mfro dukamou-nomko. Nd dukeftpno nhai tfit wom kuknarmonom nikmoh yihato htineft. Ndnetnomn rhu naphamo-nomn no memono, Atensn toh haso-rahno. ² Timotirne Tesalonaikako riyahr. Nd yima Timotir, nmoh hingrna namnou yimayer. Bro Nkifrarhu hingrnafat ror yakitohwartn Kraishu gutnius mrokfom kfo ptha nuhas htfasworm. Niko Bro Nkifrar hikwa yuhatpno tamoh krhopam o yima yuhum korhmko, rorn nikompno rhuhatu wom dukefm o yima yuhum hiruhatrko yima yuhum thu juftwa-rahmko. ³ Kangnom be nd krhopam o tamoh dukefmpno rhurahko, yima yuhum nhai rhu marnyaruhatmko. Tuko bi wanyeteko, ndhtet krhopam niko yekwam, to be tu Bro Nkifrar kfomo yuhatn nd krhopam kekwoko. Rorhu mrokfot hiket yimam ndhtet krhopam kekwom. ⁴ Bi nikompno tohmohat, bi kfo memonomko, “Yimanom Bro Nkifrar hiketnom, yimam sinyahato krhopam hirahm-nom.” To nd nom kfomo mrokfot to bi tot bi htitwokomt. ⁵ Yimam inji yak bebmoatmko memoya, “Nhai wom kukna hatohrhota rroh yi htineft. Kukna hatohruha, bi yima yuhur mwastiwonyuk yima Satanrn yihato bi rorn rithu nhirakruhatm nom hingrnamo hingneft be yi furaraht. Nd dukeftpno Timotir kfo tkrurafmotanr niamor nikmoh hti hafott.”

Timotir Tesalonaika korhof hingrnfethu kfo yindhon mrokfot hanyomotr Porr yindhormor

⁶ Timotir nikmoha htanyhato niamohat, bi asha nompno mfnahhato bi ptha nuhas bonuhasmornom nikmoh mrokfom. Kfo memornom, “Awi, tom tohhato Bro Nkifrar kakitohwomr. Bro Nkifrar yakitohhato tum nayak marnya yo womm yak marnya inji newum.” Kfo memornom, “Niko dukewukmnom. Dukahato kangko, ahtinomn.” Yo nom to inji kangnom ai ahtinomko. ⁷ Bar yinouroko, nikmoh Bro Nkifrarhu yakitoh kihwa mrokfot wanyakhato be tu bro yindhoreft fakmotnom. Nd yindhoreft yakmottnom nd nom hatoh hasoyuk krhopam nhai tfit dukarmo-nomm. Tfit yindhorefrpatn bromot-nom. ⁸ To be nhai nom wom tamoh duka kurhefenm rhuruhatmnom, be niko Bro Nkifrapno rim tohni bugahato myakitoh kihaknineft. ⁹ Nom nikmoh nmbuhatpno yindhonwa yindhoreft finji kforuhanomt? Be tu ndohtet yindhoreft yekwattnom, to finji Bro Nkifrapno nd yindhoreft kfo hikruha-nomt? ¹⁰ Nikmoh yi htinefthu

dukefr nhai yafhokahnóm: Nd duka yima yuhurpno yifungm, marm kfo bruttna-hato kangnom, “Rompno yi tohhato kfo hta, kfo marnya, kfo bmta inji naruhatnomm nd Bro Nkifrarhu hik duka yima yuhur yi marnyaknirahrm.”

Tu Bro Nkifarn Porrhu yiyuk yihotat yak nukakkfot

¹¹ Nom Bro Nkifarpno yiyuk yihotam kfo bruttnewunóm: Nd Bro Nkifarn, nmoh Bro Yifemr, yo Nungohtet Jisasr, kangnom rof tufn nmoh yiyuk yihotat ayak htakkahtft yi htirahnomko. ¹² Yo nom nikompno nayakitohwa kanjo nom kfo bruttna kangnom, niko, Jisasr hiket yimako, ndhtet yima yuhum ahikahttko rpat tir niyakitohhato rpat toh marnya bomarnyarahko. Yo wom yima furam-pno to inji buga nayak nanyamahato rpat tohkfot. ¹³ Nom kangnom, inji akfo bruttnakahtnom thu bmtarahrko. Thu bmta hanyruhatrko dborioh nefm hikrahko. Kto nmoh Nungohtet Jisas Kraistr turhu mounmotmpno yawihna thombat, yima yuhum be wutham ruhettm mihtirahrko.

Tesalonaika thofm dborioh dborioh nefrpam yakitohhato tohkfot

4

(Sapta 4-5)

Dborioh toh nmbuhat tohkfot

¹ Bar yinouroko, nd bi wandfa hnayuk mrokforoh wuroh mrokfo nmbuham htaruhanm. Bro Nkifrar hti yindhorwa toheft nom kfomot bi wanymokomt. Niko nd tohefroh kfo nuhas mrokfom wanyhato Bro Nkifrar hti yindhorwa toheftm ritohakmoko. Tfit Jisasrhu yufatpno kfiwunomko, be ndhtet tohefrpat toh hik hanykft.

² Nungohtet Jisasrn ndhtet mrokfo duka yima yuhur hiyaf hanymoa-trnom kfo hta nuhasmounomko. Ndnnettnd nom kfo nuhasyuk toh yuhatn toh hikkfot. ³ Bro Nkifrarhu duka yima yuhur duka kangr, nikmoh toheftm be tur kanjo tohhato turhu dukef yuhatn toh hikhato tamoh tamoh nefm nakfot. Nhái wofnkahr wom tuhanet yimar wom met furatpno yikfot o wom ramet mett wom nndo yima furarpno yikfot. Damiag yimam yo met tmahm nhaf inji buga. Nhái be yima fura met furampno yikfot. ⁴⁻⁵ Niko tuhanet yimako yo ramet metko yo niko damiagko yo tnahko mirahko Bro Nkifrar hik duha yimam kanjo met fura bofurampno yo yindari fura bofurampno arim fnahnom. Wom mett htihato yima yuhur sinyewur o mett wom yimar htihato yima yuhur sinyewur, nd yima yuhur yudbat yak thukfot o yakrme trohkfot. ⁶ Niko Bro Nkifrar hiket yimako mirahko womr sinyahato womrhu mett amtah nheh-hiyanr. Bi nikompno tohmohat bi kfo memonomko, ijoh tonayet metm o yindarim Nungohtet Jisasr nhai miruhatr, “Nhái mrokfom inji arinaf hanym.” Nhái mif. Ndhtet nayet yimam rorn yakhato nndoh yuhat yak hatoh-aforahrm. ⁷ Bro Nkifrar nom nakuyak-hato ror hikmohat, nhái marimor, “Anakuyakkahtanm aniekahmnd, ndhtet ndhtet nefm narahm.” Nhái. Rorhu dukeft duka memor, “Anakuyak-kahtanm aniekahmnd na tuka tohwa toheft tohrahm.” Nd dukeftpno nakumornom. ⁸ Tu Bro Nkifrarhu Yafothat yahukatrm yimam rroh toheft Bro Nkifrarhu toheft kanjo tohwom. Fitoh yimam ndar kfo hta bohtayuk mrokfom wanyhato hamuh tfa thuwomm, nhái be nd

mrokfo kfoyuk yimarn hamuh tfa thukahm. Nhai. Bro Nkifrar hamuh tfa thuwom.

Dborioh dborioh nefrpam yakitoh kihkfot

⁹ Tuko Bro Nkifrar hiket yimakmoh nayakitohhato nayak marnya yuharoh mrokfom nhai tfit gontwatn hta-rhotanm. Ndm bi tu Bro Nkifrar nd nefm fak nuhas bonuhasmorko. ¹⁰ Bi Bro Nkifrar nd nefm yak nuhasetkonn, fitoh Masedonia tkitm tohyuk Kristenm, rpat nayakitohwakonn nayak marnya bomaryewuko. To bar yimako, kfo bmta mrokfot kfiwunomko, nd dborioh nefm, tuko nayak nuhaswam, wayakitoh kihtwakomm. Mirahko ayafhonomm. ¹¹ Mrokfom bi kfomonomko niko rhu digr yima yuhur rhu nhombra bonhombrawonkfot. Rhu digr yima yuhurpno nhowi rhu marnyahato tukmoh hingrnefmm hingrna mmo bommokfot. Tukmoh rhu nmbuhat dukahato niko tukmoh tire hingr-nahato tukmoh tirehm yakkfot. ¹² Inji narahko nhai wom tamohm yak kkopentaruhatko. Wom riruh aruhyukm niko yiha yiha rhu hasoyuk rhu nmbuhat hti hikruhamtn kfo yindhor-rahmt nikmoh rhu nmbuhat.

Nungohtet Jisasr yawihnehato yak nhafohrahrom

¹³ Bar yimako, noh hanita yimaroh mrokfot kangnom, akfo dukanomko. Womm kfo kangm, nohwa yimam nhai tfit sinyaruhatm. Niko mirahko ndhtet dukefet yimaroh dukefm hikhato yimam nohneft anur yibobi-yafnom. ¹⁴ Nmoh bro dukeft duka kangnom, Jisasr nohmohat, tfit sinyamor. To nd rorhu mrokfot wany yakiohato nohwam tfit sinyarahm. Tu Jisasr kforahr, Bro Nkifrar tfit kasinyafuhratm tfit Jisasrpon nierahm.

¹⁵ Tu Bro Nungohtet Jisasr kfoyuk mrokfo yuhat nom kfo hikwonom. Bro Nungohtet Jisasr yawihna thombat, nhai bi yima nfrinomn nakuhato tohakruhatnom. Nhai. ¹⁶ Nungohtet Jisasr yawihna thombat, barkoft tu Jisasrn kforuhatr, mtohekwa mounmotr naku tawihafrah; ee tfit noheh yimaroh yakthoyuk fumrr tohrah. Ndrpno Nungohtet Jisasr moun yuhat yawihnerahr. Yawihnehato nd rorhu mrokfom wany yakioni hanyatho noh hanyukm afo nyingam mfrdborharahm. ¹⁷ Rom myukatohruhatm ee bt yima nfrinomi rom rpat buga muhnfat kanjo watuhakruharnom rpat mnathu hmbreniruhanomn rpat mounko Jisasrpon mrifinyrahnom. Rorpno mnahtihato ror tohruha tkitrpat toh nkifranirahnom. ¹⁸ Ndar wandfewa mrokfom yakhato nakfohi hanykah-konn yima yuhum tfit marnyarahmko.

5

Nungohtet Jisasrhu nia yihar nom toh gari hasokfot

¹ Bar yinouroko, nhai tfit gontwatn wuroh yiharhu yiharoh kfo nuhas mrokfom kforuhatnomr. ² Nd wuroh yiharhu yiham nieruha yuhat, ndt bi kfo nuhasmotnomko wany hik bohik-moko. Nd yihar be yak fohtasakrahr; rikoh yimam yifung niewa kanjo. ³ Bi yimam kfo hany kangm, “Arr bi dborioh yihayer. Rhu marnyarahnom.” Inji kfo hanyhato mirahm, ka hifa kfoyet, yimam yak batiyuk krhopam yudbat nierahm mett yon yakrphewa kanjo. Nhai wom yimar frfnahniruhatr. ⁴ To yinouroko, nd yihar, to nikome kspitat tohwakonn rikoh yimam kanjo yak fohtasakrahkomr? Nhai. ⁵ Nom, Bro Nkifrar hiketnom, nom yima dukefmpno dborioh nefrpam newunom, yimam mar nuketpno hti hikak hanyhato tamoh nefm

niwa kanjo. Nom nhai kspitat yak tato botatiwa kanjo tamoh tamoh nefm na fura bofuraknikahnomm. ⁶ Ndnettn nom, Bro Nkifrar hiket yimanom, mirahnom ahwanyom yifungthu yimam kanjo. Yimam hwitam nhai yima dukefm rhuhato wanykahmm tamoh nmbarefm. Yo nhai htihakhamm tamohm niayukm. Nom inji hwe juha. Nom yima dukefmpno rhuhato tamoh tamoh nefm yima dukefmpno yak nhtakfot. ⁷ Htiyeteko, yimam hwitam yifung hwitm yo yimam drinhato spakwam, nhaf yifungtn drinhato spakwom. ⁸ To nom, Bro Nkifrar hiket yimanom, nom mar nukat tohwa yimayenom. Nom yima dukefmpno rhuhato tamoh tamoh nefm htihato yak nhtakfot. Nom soldiam kanjo siot kapakfoti hat kapakfot hmbrihato tohhato yukatoh hasokfot. Nom nd soldiam kanjo toh bmtahato yukatoh hasokfot. Nom Bro Nkifrarhu mrokfom wany yakiohato wom wommpno nayak marnyahato Jisasrhu niayuk yihar toh gari hasokfot. Ror nia thombat miyakruharnom rorhu tirtn rhurahnom. ⁹ Nd kim hegirtayet wukier Bro Nkifrar bi kim hegirtamor, nhai nmoh yufatpno Bro Nkifrar kim hegirtarmorr. Nhai. Nom tu Nungohtet Jisas Kraistrn miyak htihakhato turpno rhuukenom. ¹⁰ Nom bi Jisasr suh nanyormo yimayenom. Ndnettn nom be rorpo tohnirahnom. Afo yima nfrinom tohetnomn nier, nhai mrokfom, nom be yinyefr-payet. O bi nohetnomn nier, ndt to nhai mrokfom, nom be yinyefr-payet. ¹¹ Ndnettn Bro Nkifrar hiket met yindariko, niko tuko rpat tohhato tuko nakfo bmta, nakfo bmta hasokfot.

Wuroh kfo nuhas mrokfom

¹² Bar yinouroko, wom mrokfo nmbuhat kfiwunomko. Nikmoha frohmn tohhato ndha tohyuk Kristenko yakitohhato kukatohaf hanitwomko, niko be nd yimarpam yukatohhato rroh yinhitn tohkfot. Nd yimam Nungohtet Jisasr kak htewurm nikmoh mrokfo hehato yak hta bohta inji naneftn. ¹³ Romn kakitohwomko. Ndnettn niko romn bro yima yuhum htahato nd yimam yak marnyakfot. Niko buga nd yimampno nayak marnya nayak marnyahato rpat tohkfot.

¹⁴ Bar yinouroko, kangnom, wom yima yuhum ahenomko. Wom Kristenm rhu hrek hasohato nhai turoh rhu nmbuhat dukahato turoh hingernefm hingernekahmm, yihato mrokfom hekfot. Yo Yimam boknambok dukefm kasi htatewatmm bok dukefmpno yima yuhum gumuhatewumm, niko yihato rhu wanyhekfot. Rhu wanyehato hifa yima yuhum hehato hifa yima yuhum yakhato yima yuhum mirhu-rahmm. Yimam Bro Nkifrar hik hanyhato wom nmbuham krhopam yakhato kfo nakutmko, niko yihato rroh krhopam wanyhato kfo hta mrokfom hekfot. Yo wom yimampno yudbat sinyahato namburakni duha.

¹⁵ Yimam sinyahato finji newumko, niko mirahko toh kekuthato tawo finji ananomm. Niko be tfit hifa yima yuhurn tohhato dborioh dborioh nefm yak nuhaskfot nd Bro Nkifrar hiket yimam yo wom yima fura bofuram.

¹⁶ Yiha yiha niko be yindhoh yima yuhurpno rhukfot. ¹⁷ Yindhoh yima yuhurpno rhuhato yiha yiha kfo bruttna hasokfot. ¹⁸ Tamoh tamoh nefm korhmmom, be Bro Nkifrarpo kfo bruttna yindhorkfot. Tot tu Bro Nkifrar dukewa dukef yuhat. Yimam, Kraistrn Jisasrpo frtkafetm, nd yuhatn hikkfot.

¹⁹ Bro Nkifrarhu Yafothat bi wom yimampno mthu dbothathato kahm kanjo hingernef sinyewut, mirahko tfit ahwa tpohnomt. ²⁰ Bro Nkifrarhu Yafothat wom yimam thu dbothathato wom mrokfom kfo pthewumm, niko mirahko rom pthayuk mrokfom wany-hato akfo amanyom, "Ndr

tur ptha mmbrafinywor. Frohm wanyruhamr?” ²¹ Tamoh mrokfom kfo pthewum, niko rroh mrokfom wanyhato yak nhtakfot. Yak nhtahato fitoh mrokfom hifa wany fughewukomm, ndm yakitohkfot. ²² Fitoh mrokfom faso wanukwokomm, yafhokfot.

²³ Nd dborioh noh hmbre yima yuhu hnawa Bro Nkifrar niko yakhato turpno rim yak htewatrko be rorhu tuhan yindariko rhu buganirahko. Rorpno tohruhakomn nikmoh yafotham yo yima yuhum yo tohefm be nhai faso faso yiruhatm. Nmoh Nungothen Jisas Kraiser nia thombat be nhai mrokfo duhatko rhurahko. ²⁴ Nd niko naku-yakmo Bro Nkifrar bi wom mrokfot kfirt, to be kak hik twanhiwurt. Ndnenn nd ror bi kfo htamo mrokfot yak hikrahrt.

²⁵ Bar yinouroko, Bro Nkifrapno wakfo bruttnatwakmnom.

²⁶ Niko lotu yiham rifinyneft, niko tuko Kristenko naki yindhorhato tir nhekfot.

²⁷ Nungothen Jisasrhu yufatpno kfi-wanko, ndar gontwat Jisasr hiket tuhan yindari bugampno ritim nuhaskfot.

²⁸ Be injirpa mrokfom. Nmoh Nungothen Jisas Kraiser ayak marnya bomaryatwarko.

Tesalonaika thofroh husyuk gontwat **Porr dwandfakhato htafmot** **Barkof kfo nuhas mrokfom**

Taun Tesalonaikathu sioshu bok met yindarim fak mmotamom Jisas Kraistrhu nia yibon yihar rhuyuk nefm. Womomn kfo memom, “Nungohtet Jisasrhu yihar bi niamotr asor bi nd yiharn bi tohwonom.” Tesalonaika sios inji duka mmomom. Ndnettn Por Sailas Timotironom ndar kfo nuhas gontwat wandfakhato htafmot.

Porr kfo memor, “Nd yihar tor yuhre riyorhwor, tafi mfnahrnor. Nd yihar brbo rhu hanyrahr htirahkomm tuhan yindarim nhai tu yifo nefm naruhatm. Yimam mumiwa kanjo tamoh nefm be nafura bofurarahm. Hti-rahko buha wom yimar tohruharn nhai yima mrokfom wanyruhatr. Lokfot yak tuhafruharn Kraistrhu yufat nhai rorhu yimbhindangm wanykfot, be tu hti dbnot thurahr.”

Porr kfomorm Bro Nkifrarhu yakitohhato krhopa titanef. Rorhu dukeft duka memor, tu Porrom niwa kanjo Tesalonaika Kristenm inji nakfot. Turoh tire hingrnahato tamohm yakkfot. Nhai rhu hhrekfot. Yo womroh hingrnfem hti dukahato hingrna nhokfot.

Bro Nungohterhu yihar tor yuhre riyorhwor

(Sapta 1–2)

¹ Nom Por, Sailas, Timotironomn ndar gontwat wandfewunomko niko taun Tesalonaika sioshu tuhan yindariko. Niko nmoh Bro Yifemri Nungohtet Jisas Kraistrpno frtkafwa tuhan yindariyeko, nikompno ndar gontwat htefiwunomt.

² Nmoh Bro Yifemri Nungohtet Jisas Kraistr ayak marnya bomarnya-kahtfko, nikmoh yima yuhum mirhurahmko.

Tesalonaika thofm nhai krhopam hti yakrmihato Kraistr myafhonirmomr

³ O, yinouroko, niko Kraistr yakitohwa nmbuhat dukahato yiha yiha nom Bro Nkifrar kfo bruttna yindhorkfot. Niko Kraistr bi mhik trpakni twanhiwukomr. Mhik trpakni-hato tuko nayakitohhato tuko nayak marnya nayak marnyewa nmbuhat bi hifa miyakitohaknitkomt. Ndnettn nom Bro Nkifrar kfo bruttna yindhorneft nhai mrokfot. Ndt dborioh neft newunom. ⁴ Niko Kraistr hikhato tohwomat, nhai be rpahtet krhopam yimam hikahmko. Wonk wonk krho-pam yahukatmko yima yuhum nur finy suhunitmko. To niko nhai krhopam hti yakrmihato Kraistr myafhonikahkomr. Nhai. Bi riyakitohakmohat, to be kakitoh twanho hanitkomr. Ndnetnomn nom wom kongrigesnm-pno yishoft, niko kfo tndh yindhor htfaswonomko. Kfo kangnom, “Tesalonaika thofm nhai krhopam hti yakrmehato Kraistr myafhonikahmr. Nhai. Kakitoh kihwomr.”

Tamoh tamoh nefm Bro Nkifrar bi hti hasiwurm

⁵ Niko yekwa krhopam nhai be sfno nd krhopam yakkahkomm. Nhai. Niko Bro Nkifrarpmo rim tohnita nmbuhatpno yimam hti namburhato krhopam yahukatmko gumuha muh thunitko. Tamoh tamoh nefm Bro Nkifrar bi hti hasiwurm. Niko rorpno rim tohnita nmbuhatpno krhopam yekwohat, nhai mrokfom. Kto Bro Nkifrar king yufat yakhato ndar

bbinysofti met yindarim yakitoh thombat, rorn yakitohrahrko. ⁶ Nd niko krhopam hi hasiwa yimam tawo Bro Nkifrar hirahrm krhopam. Ndhtet nayet yimam Bro Nkifrar tu hti nhta marnyahato tawo krhopam henyeft, ndt tu dborioh neft narahr. ⁷ To nd niko hatoh hasiwa krho nmbuhat yak thurahr. Yak thuhato nhai wom krho yima yuhum rhuruhatm. Be rhu mmorahko. Nikomi nom inji na bugarahrnom. Bro Nungohtet Jisasri rorhu tu bbuka nanyjaret mounmotm moun yuhat kah funeftpno yawihneruha yiha, tot nd yiha Bro Nkifrar nd neft narahr. ⁸ Yo nd yiharn fitoh fitoh yimam Bro Nkifrar riyak htafhato nhai nmoh Nungohtet Jisasrhu gutnius mrokfom hikkahmm, nd yihar Bro Nkifrar afo htiwonrahrm. ⁹ Be nd yiha Bro Nkifrar yak ndohhato yak tuhaf thoft, to be inji nndo krhopa yakyuk tkit bebtm toh nkifranirahm. Nhahi Bro Nungohtet Jisasrpo brbo rorhu bro nuka nanyjareftpno tohruhatm. Be inji nndo toh nkifranirahm. ¹⁰ Nd Bro Nkifrarhu bro yiharn Jisasr niahato nd ror hiket yimam kfo yindhorhato bro yufat hirahrm. Niko to inji buga yindhor nhorahkomm. Bro Nkifrar nompno hingrnamo hingrneft, nom nikmoha yi pthamohat, wufak marnya-mokomt. Ndnettn yindhornhorahkomm.

Tesalonaika thofroh toh bmta nmbuhat dukahato Bro Nkifrar pno kfo bruttnamom

¹¹ Nom nd Jisasr bro yufat yakruha yiha dukahato nmoh Bro Nkifrar yiha yiha kfo bruttnewunomr. Kfo bruttna kangnom, “O Bro Nkifraye, nd Tesalonaika thofm ni nakuyakmotnm hikwomn. Ndnettn rroh yima yuhum wathu bmtakahtnm ninhu dukefrn hikrahm. Nd Tesalonaika Kristenm kangm, ‘Be ninpa ahikkahnomn be dborioh nefrpam ananom.’ Ndnettn kangnom, wathu bmtakahtnm be dborioh nefrpam naruhamn hti yindhorrahm.” ¹² Nom inji inji kfo bruttnewunomko Bro Nkifrar pno. Nikmoh yufam kfo bruttnetnm nmoh Bro Nkifrar Nungohtet Jisas Kraistr yak marnyarahfko. Yak marnyarahatfko niko inji htihat Jisasrhu yufat yuta hagrha yindhorrahkomt, tawo ror inji htiruharko yuta hagrha yindhorrahko.

2

Nkifra boririfhu mrokfot hamuhtfa nngrajohruha yimar mfnahrahr

¹ Bar yinouroko, nmoh Nungohtet Jisas Kraistrhu niahato nmoh yak nhafohhato mnahtiruha nmbuhat kfo ptha nuhasruhanko. ² Ka wom yimam kfo memomko, “Nmoh Nungohtet Jisasrhu yihar bi asor niamotr bi nd yiharn bi tohwonom.” Ndhtet mrokfom wanuknom, niko bi mirahko ariwany fohtasakkahnomn bok dukefm ayak-nom. Wom yimar kfo kangr, “Porr Bro Nkifrarhu Yafothat mthu nawohmottr nd mrokfot kfo pthamotr wanyamo-nomt.” O wom yimar kfo kangr, “Bro Nkifrarhu mrokfom kfo ptha hanyhato kfo pthamort.” O wom yimar kfo kangr, “Nom htayuk gontwatn nd mrokfot rhumot.” Na kfiwanko ndhtet ndhtet mrokfom war-ihataftwakomm. Mirahko awiyaknomm. ³ Mirahko ndhtet ndhtet yimaroh mrokfom awany yakionomm. Wawanyko, nd yihar mfnah thombat nhai be mfnah furaruhatr. Nhahi. Tafi Bro Nkifrarhu mrokfot riyakhtafhato rorhu boririfhu mrokforoh hanyjbor nungrajoheft bi mfnahrrott htirronomt. Afo nd neft kmi kmi rhuraht. Nd neft rhuni, ee tftt Bro Nkifrarhu mrokfom hamuhtfa nngrajohruha yimar mfnahrahr. Hel yihato mitaprhuruhar, ndr afo mfnah-rah. ⁴ Nd yimar nia thombat, htirah-komr tamoh tamohm

yimam tth kaugohato kfo tatiwam nhai htiruhatr yimam ndmn kfo tatoneft. Rorpar brorahr. Rorpar brohato Bro Nkifrarhu temperr, Jerusalemr yorhwar, ror rim fknenihato rorn rim rhuruharn kfo mirahr, “Na asoya Bro Nkifraya.”

⁵ Na nikompno tohhato nd kfomo mrokfome ka nhai duka hanyakahkonn? ⁶ Bi wanymoko, nd yimarhu fnahna yuhat afo wom yimarh toh rafiwart. Bro Nkifrar bi kfo htamort nd yimarhu fnahna yihar. Nd yiharne fnahnerahr. ⁷ Nd nom kfiwa yimar, tor be afo yukr yukr rorhu hingerneft hingernewurt. Nd Bro Nkifrarhu boririfhuthu hanyjbornaneft to frohmn yifemwamt? To nd yimar. Afo ndar yiham be afo yukr yukr rorhu hingerneft hingerneft hangerneft. Kto nd rorhu nia yuhat toh rafiwa yimar Bro Nkifrar riyak htafrahrr ee fnahnerahr. ⁸ Fnahne thombat, rorhu hingerneft tafont hingerarahr. To tfit kto to tor bi Nungohtet Jisas. Ror tfit fnahnerahr. Rorhu nuka nanyjareft rpat hnerahr. Nd nuka nanyjareftpno nieruharn nd yimarhu bbukeft nd yiha yohniraht. Rorhu tnge yahsha wunaruhattr mibatinirahr. ⁹ Nd yimar nia thombat, Satanrhu bbukeftpno nierahr. Satanrhu bbukeftpno nieruharn yimam yuwi frnheh bonhehrahrrm. Yuwi wonk wonk mirakerm hingerneft nheh hakuruhatrm yimam hti haku-ruhamn mirahm, ka tu Bro Nkifrarhu bbukeftpno hingernewurm. ¹⁰ To nd hel yita yihotat bi tohet yimamn inji yuwi frnheh bonheh hakurahrrm. Nd yimam nhai Bro Nkifrarhu yafothet mrokfot hikhatoyakrmom. Nhai. Bro Nkifrarhu yafothet mrokfot kurmomt. Ndnnetmn hel yihota yuhat tohrahm. ¹¹ Mirahm ka tfit yima yuhum sinyahato Bro Nkifrar hikrahnom. Nhai. Bro Nkifrar rroh yima yuhum hta krhoruhatrm nd yima yuhum nhai sinyaruhatrm. Tfit ndwom yimarhu frnhehyuk mrokfot dukeftn yima yuhum mwofnirahm. ¹² Ndnnetn nd yimam nhai Bro Nkifrarhu yafothet mrokfot hikfomt, be nd fasoh fasoh nefroh yindhoreftn ftohm, bro kotkfot tohnihatoyak batirahrrm.

Bro Nkifrarhu yakyukkonn bi tur kfo htamorko

¹³ To bar yinouroko, Nungohtet Jisas tu hti yindhorr mifworko. Bingot nd nikmoh nrfa htiyakneft Bro Nkifrar bi duka htangotmort. Bi duka hta memor, “Tukanhu Yafothaye thu hmbrihato bi nanhu yufatn rhurahm. Yo nanhu mrokfot bi yakruhamtn hikrahmt.” Nd nmbuhatpno nom niko dukahato Bro Nkifrar kfo yindhorkfot. ¹⁴ Nd gutnius mrokfot nom hany pthamot, nd yuhatn fakmorko. Bro Nkifrarhu dukeftn memor, yakrhoyannm nanpno tohhato nmoh Nungohtet Jisas Kraisr bro yufat yakhatoyak yindhorr thombat, niko rpat nd bro yufat yakrahko. ¹⁵ Ndnnetn yinouroko toh bmtakfot. Nd Bro Nkifrarhu kfo yirmoh mrokfom nom nikompno yi kfo pthamom yo kfo hta mrokfom gontwaye htamom yak hikkfot.

¹⁶⁻¹⁷ Nom kfo bruttna kangnom nmoh Nungohtet Jisas Kraisri Bro Nkifrar, nmoh Bro Yifemr, dukeftn ahakahrko athu bmtarko. Inji anaahrtrko tamoh nefm nanefthifa hifa narahkonn yo mrokfot pthaneft pthamarnyarahko. Yo nom tohwa toheft htitartrn hti yindhorrwornom. Yo hti yuhuwafwornom. Yuhuwafhato nmoh yima yuhum yiha hti hta bteuwornom. Ndnnetn Jisas toh gari kangnom, yakniruharnom be rorpnom toh nkifranirahnom.

Hhrekot yimam mrokfom hekfot

3

*(Sapta 3)**Wakfo bruttnatwakmnom*

¹ Yinouroko, wuroh mrokfom tfit kforuhanko. Wakfo bruttnatwakmnom. Wakfo bruttnakahtko ndar Nungogeth Jisasrhu mrokfot kmi kmi thu yufur dimandiniraht. Kmi kmi thu yufurniruhatt kmi kmiroh tuhan yindars wanyhato hikrahmt niko wanyhato hikmo kanjo. ² Yo womt nom ndar mrokfot hatonitanom wakfo bruttnatwakmnom. Bok yimam nhai Jisas Kraisorhu mrokfot hikkahmt. Wakfo bruttnakahtkmmnom nd fasoh fasoh yimam finji naneft Bro Nkifrar toh raforahrnom.

³ To Nungogeth Jisasr, ror nhai yafhokahrko. Ror yiha yiha kakitoh kihworko. Rorn tpim habokknaruharko yo toh raforahrko Satanr tamoh nefm naneft. ⁴ Nd nom kfo hayuk mrokfom wany yakiohato hikwatomm nom inji htihato kangnom, “Awi nd nom kfo hemo mrokfom hikmomm yo tfit gontwat htewa kfo tebos mrokfom hikrahmm.” Nom niko htihato dukewa dukefr Nungogeth Jisasrn nd dukefr kahukrnom.

⁵ Nom kangnom, Bro Nungogethr yima yuhum ahikahtrko wahti hikt-wakomt Bro Nkifrarhu yima yuhur nikompno yorhwa yuhati yo Kraisor khopam titahemo yuhat.

Hingrnaneftu mrokfot

⁶ Yinouroko, nmoh Nungogeth Jisas Kraisorhu yufatpno kfo pthiwanko. Ndar Jisasrhu mrokfot hikwa nmoh womm nhai nom yahuka kfo hta mrokfom hikkahmm. Be hwes rhut nahasiwum yonmari yiham. Mirahko nd yimampno brbo ainyom. ⁷ Nom nikompno tohmohat, nmoh toh ruheft bi htimokomt. Nd yuhatn niko hikkfot. Nom nikompno tohmohat, nom nhai hwes rhut narmoanom. ⁸ Nom nhai marimonom, “Wom yimarhu yeshrt be brio rimak furahato yerahnomt.” Nhai. Marufat rim htahato yeshrim fakmounomm. Yo tunom nhai rhu furarmoanom. Yifung mar, yifung mar tunmoh rhu nmbuhat dukahato hingrnammom. ⁹ Nom Bro Nkifrarhu hingrna yimanomn, nom nikmoh tirn rhurmonom tamoh yeshriyenm o tamohm. To nhai. Nom nhai inji narmonom. Nom memonom, “Tunmoh tire hingrnahato yeshrim yak yeruha-nomn rom inji htiruhamn rom nd yuhat hingrna hikrahm.”

¹⁰ Nom nikompno tohmohat mro-kfom hemonomko. Kfo memonomko, “Yimar nhai hingrnakahr, nd yimar mirahm yimam yeshrim tamohm ahe-nomr.” ¹¹ Bi wom mrokfom wanyak-monom, kfo memom, nikmoha tom wom yimam rhu fura bofurewum. Nhai wom hingrnefenm hingrnawonkahn. Be rhu fura bofura hasohato womroh mrokforoh yihom hiyaauyak mhiyaauyak nefrpat buriwum. ¹² Ndhtet nefm niwa yimam Jisas Kraisorhu yufatpno bi kfiwa, nd yimam warhu digrhato turoh rhu nmbuhat dukahato hingrnakfot.

¹³ Bar yinouroko, mirahko dborioh nefm na hanyhato tfit buha mhhrehkato amyafhinomm. ¹⁴ Fitoh yimar nhai hikkahrm ndar gontwat htewa mrokfom, hti hikak marnyahato nd yimarpno rhu nafiny juha. Turpar rhu mmbra-finyruharn dukarahr. ¹⁵ To tfit kfi-wanko, ndhtet nayet yimar mirahko wom ndoh yima furam kanjo ahtikahnomr, fasoh nefm ananomr o tng bebm akfonomr. Nom nhai be kfo mekahnomko, “Inji wanatwako.” Nhai. Nd yimar niko tuko rpat Jisasr hikwa yimayeko. Be kfo kangnomko, “Ndhtet net yimar mrokfom hekfot.”

Wuroh mrokfom

¹⁶ Bro Nungothetr harhuworr tu noh hmbre yima yuhur. Tamohtet tamohtet nefm yo tamohtet tamohtet yihar rorn nd nohmbre yima yuhur ahitwarko Nungothet Jisasr atoh natwih bugatwarko.

¹⁷ Na Pora niko dukahato nanhu kfo yindhorkfot htefiwant. Nd kfo yindhorkfot na tukanhu tire htewant. Kmi kmimpno yitwa gontwam yo be yimaroh yufampno yitwa gontwam na be ndhtet mrokfo nmbuharpam nanhu tire wandfaf hakutwanm.

¹⁸ Nmoh Nungothet Jisas Kraistr ayak marnya bomarnyatwarko.

Timotirhu barkof gontwat Porr dwandfakhato htanfot Barkof kfo nuhas mrokfom

Timotir damiagenrn Jisasr rihikakmor. Timotir Galesia profinsko yorhwa taun Listra thofer. Rorhu yifemr Grik thofr. Mmemtne Juda efkott. Timotir tohmohat Porr yaknimoarr misin hingrneft hiyau nuhas htasmourr. (Nd mrokfot htikfot Aposer 16.1-3). Timotir toh hanyhato ka kto taun Efesushu Kristenroh bro tohak yimar htamomr. Nd hingrneft tohetrn Porr ndar gontwat wandfamorr.

Barkof mrokfom afo kfo kars kfo tebos mrokfom hemorr. Kfo memorr, “Yo ni, ni hatohwa Kristen met yindarim wayukatoh marnyaf hanyswann. Wom yimam nieruhamn mfrnheh bonhehruhatmm rroh mrokfo yuhamn mitohnirahm. Nd yimam ndar bbinysofthu tamoh tamoht hti thombat kfo kangm fasohem. Yo wom mrokfot kfo kangm wom wom mur yemrot ye juha. Yo tuhan yak duha.”

Ndm inji kfonimormn tfit sios hingrnefroh toh yukatohhato yak hta bohta yuhamn kfo pthamor. Yo sios hingrnefroh hingrnayuk yimaroh yak hta yuham kfo pthamor.

Wuroh mrokfome Timotirhu toh yuham kfomor. Kfo memorr, “Ni Timotin Jisasrhu hingrna yima tohneft, tu dborioh hingrna yima tohkfot.”

Ni Timotinhu nefm yo sioshu tuhan yindariroh nefm duka marnyahato tamoh tamoh nefenm nakfot.

(Sapta 1–6)

¹ Na Pora, na Kraiss Jisasrhu aposera. Nann ndar gontwat wandfiwann ni Timoti. Bi fasoh yimarhu tirm ruhetnom yakmo Nkifrar yo nom rhu yukatoh darwon hasiwa yima Jisas Kraiss; rofhu tngtpno na aposer hingrneft yakhato hingrnewant.

² Timotiye, ni Bro Nkifrarhu mro-kfot hikwa yuhatn nanhu yon mife. Nmoh Yifem Bro Nkifrar yo nmoh Nungohtet Kraiss Jisasr yuhuwafhato ninhu rhu nmbuham yak marnya bomarnyahekahtfn yima yuhur miruhrahn.

Kfo fura bofura mrokfom mong trohkfot

³ Na Masedoniako yibon hanyneft-pno kfohemo mrokfotn kanga nd mrokfot tfit akfohiyann. Nanhu dukeft kanga, ni mirahn Efesus ahtanyant. Nd taun Efesushu Kristenm bi yimam yitamn mkfo yuhur nheh bonhehwatmm kanga afo Efesus watohkahnn nd yimam wakfo rafotwamm. Mirahm tfit wom nndoh nndoh dukefm nd taunthu Kristenm ahanyomm.

⁴ Mirahm nd nkifram harhu hawihnamo nkifra tndhm, yo nkifram niayuk frikef yuham tfit akfo tndh hik bohik hatohnomm. Nd nmbuhampno Kristenm tum tfit nakfo hamuh nakfo hamuhwom. Bro Nkifrar nhai hik marnyakahmr. Kraissrn rroh yima yuhum htahato ee Bro Nkifrarhu dukefr hikrahm. ⁵ Na kanga rpat nayak marnyahato rpat watohko. Mirahko nd yimaroh dukef yuhamn ahiknom. Kraissrhu mrokfom yakitoh kihhato yima yuhum wutham rhurahrn. Inji rhurahrn, tuko Kristenko nayak

marnyahato rpat tohrahko. ⁶ Wom yimam nd kfiwa mrokfom myafho-nitamm tfit nd yafotha duha mro-kfomn hikwom. ⁷ Kangm, “Nd Bro Nkifrarhu boririfhut nomn kakitoh marnyewunom. Womm nomn kfo nuhasrahnomm.” Ndt kfo furewumt. Nhai rom Nkifra boririfhut hik marnyakahmt. Kangm, be wommn akfo nuhaskahtom romn ahikmt.

⁸ Bro Nkifrarhu boririfhut rot dboriohet. Be tu Bro Nkifrar kfomo yuhatn nd boririfhut hikneft, rot nhai mrokfom. ⁹ Boririfhut nhai toh marnyet yimaroh yak hta bohtayukt Bro Nkifrar htarmort. Nhai. Mrokfet yimarpahro yak duka tungunayukt htamort. Yimam boririfhut mhanyjbor-nanihato hammo bohahumiwahro yak duka tungunayuket. Yo yimam Bro Nkifrar mong trohnihato fasoh nefm niwa yimaroh yak duka tungunayuket. Yo Bro Nkifrarhu nefm hti hhreknihato ndar bbinysofthu nefm tfit hti yuhurwaroh yak duka tungunayuket. Yo yifammam waswa yimam yo mrokfo duha yimam frdbofna fura yo krijowur furewaroh yak duka tungunayuket. ¹⁰ Yo ijoh tonita yimaroh yak duka tungunayuket. Yo Sodomthu yimam namo nefm kanjo nayet yimaroh yak duka tungunayuket. Yo yimam wom yimam yak rikohnihato tfit rroh slefm yak htewa yimaroh yak duka tungunayuket. Yo kfo fura bofurayet yimam yo yimam wom fasoh nefm nahato tfit namhi bror htahato Bro Nkifrarhu yufat yuta fura bofuriwa yimaroh yak duka tungunayuket. Yo sios kfo yirmohwa mrokfom rhu hanitm tfit womm rom wom nddoh neft tfit riharhuhany ndhtet ndhtet net yimaroh yak duka tungunayuket. ¹¹ Nd sios kfo yirmohwa mrokfomn gutnius kak hikwot. Nd gutniuskfot Bro Nkifrar nanhu tirtn htamort nann kfo ptha htfaswant. Nd gutniuskfot nd bruwohmr katiwa kanjo funa nanyjarwa Nkifrar yo yimam kfo yuta hagrhiwa Nkifrar, rorpno nd gutniuskfot niamot.

Bro Nkifrar yuhuwafmotrr Porr; Porr kfo yindhormorr Bro Nkifrar

¹² Nmoh Nungothet Krai Jisahr hinger na bbukefr hemotra kfo yindhorwanr. Nd tur hemo hinger na bbukefr htihat dukamor nann nd rorhu hingernefthu hingerneft. Ndnatpno na kfo yindhorwanr. ¹³ Na tafi rorhu hingerneft yarim fnahne duha na nda ror kfo garib bogarib hnamoahat, yo tamoh tamoh nefm na namoampno rorhu yima yuhenr muh wohne thunimoahat, yo faso faso kfo rindho borindho thumoahat, ror nhai nd na nayuk neft mhtiyakrmor. Nhai. Yuhuwafmora. Na namoa nefm ror htimoahat duka memor, “Ndr niwa nefm tafi na hti duka tunguna duha ndnetrn ndhtet nefm newurm.” Rorhu htiyekt inji htihat hifa yima yuhur niamotrr nhai yak tutfarmora. ¹⁴ Nmoh Nungothet Krai Jisahr tu mfro yuhuwaf mifhato nanhu yima yuhur kasinya-morr rorhu mrokfom hikhato wom yimampno nayak marnyahato rpat tohneft.

¹⁵ Krai Jisahr ndar bbinysoft fawihnamor nom fasoh fasoh nefm nayet yimanmoh yakneftn. Nd mrokfot tu kfo mif mif kfoyet. Yimam nd mrokfot wany yakiokfot. Na ndar yimayann fasoh fasoh nefm mfro nahato yiro fknemoya. ¹⁶ To na ndhtet fasoh nefm mfro hatohet yimaya, tamohmpno wayuhuwafmora? Memor, “Ror inji hti yuhuwafhato ayakkahta, yima bugam htirahmt na hifa yima yuhurpno fasoh nefm nayet yimam yuhuwafhato yekwa yuhat.” Rom inji htiruhamn rorhu mrokfom wany yakioruhamn toh nkifranirahm. ¹⁷ Ror toh nkifraniruha kinger. Nhai nohkahr. Yimanom nhai htikahnomr. Rorrpar Bro Nkifra mifer. Ndnatn

yiha yiha rorhu yufarpat bro yufat htakfot. Rorn nyingako htakfot. To be inji.

Fasoh nefm Timotir yukatoh duha

¹⁸ Nanhu yon Timotiye, wom kfo duka mrokfom kahukwann. Bi bingot ninhu nmbuhat bi profetm pthamomt. Na kfiwann nd profetm pthamo mrokfom ndm wayakitohtwannm yahrt tohyuk kfra inyarut kanjo. Giaman tisam niehato finji kfiwumn nd ni yakitohyuk kfra inyarum yakhato tawo tukfot. Nd kfra inyarut yakitohhato giaman tisampno yahrt watohtwant. ¹⁹ Mirahn Jisasr aftrohanr. Jisasr yakitoh kihhato tu dborioh yima dukefrpno nd yahrt watohtwant. Yima yuhur mwofnntwor tamoh nefroh nanefst o fitoko yinyeft, ee btn sinyakfot. Yima yuhur kurhiwur, sinya duha. Tamoh tamoh nefm be sinya fura bofuraknihato na fura bofuraknirahnm to be tunn yoh raforahnt tunhu yiyuk yihotat. ²⁰ Himeneus Aleksanderof to inji namotf Satanrpno rifak htamoyanf. Yimam inji yak gngngtatetmn nhai tfit Bro Nkifrar kfo garib bogaribruhatmr.

2

Rhu rifinyhato kfo bruttnaneft

¹ Rifinyhato kfo bruttnaneft, barkoft afo tuhan yindarim dukahato rroh rhu nmbuham kfo bruttnakfot. Tuhan yindarim tamoh dukefetem o tamoh krhopetem ndm afo kfo bruttnakfot. Kto tfit tamoh tamohm kfo bruttna yindhorkfot. ² Ndm inji kfo bruttnanihato tfit gafmanm, kingm kfo bruttnakfot. Bro Nkifrarpo kfo bruttnayetmn nom rhu mmohato Bro Nkifrar hti yindhorwa nefrpam yakitohhato hikrahnom. ³ Fitohtet fitohtet yimam yuta bugahato kfo bruttnefm, nom fasoh tkit bebt yakmo Bro Nkifrar hifa wany yindhor-wor. ⁴ Bro Nkifrar hifa yindhorwor yimaroh yufam kfo bruttnahato nd yimam Krairhu mrokfom wanyhato yakneft. ⁵ Rpa Nkifrarpar korhr. Rpa yimarp ar buha tohhato yima mifm yekwarm Bro Nkifrarpo brbo kak hteuwm. Nd yimar Krair Jisasr. ⁶ Krair tu Bro Nkifrarhu dukef yuhatn hikhato nmoh fasoh nefm rorn rorn suh nanyormorm. Rorn suh nanyor-motrm be nd Bro Nkifrarpo yiyuk yihotat yihotett rhumot. Bro Nkifrar nom tfit yak yibon bugetrn yihotat inji hingrnamort. ⁷ Na to nd ror suh nanyormo yuhathu mrokfothu kfo ptha nuhas htfasneft nd aposer hingrneft fak htamora. Memor, rorn rirhu arhuyuk yima tangim kfohi hanyrahm. Yima tangim wanyhato Jisasr hikruhamn tu yafothet mrokfot yakitohrahm. Na kfiwa mrokfom tu mrokfom kfiwanko.

⁸ Lotu yiham kmi kmim kfo bruttna-neft, na kanga, yindarim Bro Nkifrarpo brbo frtkafhato tirm yura hta hanyhato kfo bruttnakfot. Nd yimam nhai wommpno nakfo hutt nakfo nna inji nakfot.

Dborioh nefroh nanefst tot tu metroh wondht

⁹ Metroh wondh yuhat kfo ptharuha. Metm wondhneft mirahm be mfro tamoh tamohht yakhato awondhnom. Tmarim mirahm be mfro mfrau yukehato tmahrut tamohht yakhato hembonginahato tmarim awondh najugnomm. Yo mirahm gort o tamohht yakhato yimanyosom awondh htanom. Mirahm be mfro maru kfet hmbresham wiknahato awondh hta bohtanom. Nhai. ¹⁰ Metm kangm Bro Nkifrar ahiknom, dborioh nefm yakitohkfot. Metm nayuk dborioh nefmn tom tu metroh dborioh wondht.

¹¹ Metm hifa yima yuhurpno nhowi rhuahato Bro Nkifrarhu mrokfom kfo ptha nuhasyuk yimarhu yinhitn rhuahato mrokfom yakkfot. ¹² Nhai metmn yindarim yak hhrifnihato tfit romn tohhato yindarim Bro Nkifrarhu mrokfom kfo hta bohta-kfot. Ndt na nhai wofnkaha. Rom be nhowi rhuahato be wany yakitohkforpat. ¹³ Wawanyko, Adamr hingrnanihato Ift hingrnamor. ¹⁴ Nkifra tndht inji kfiwut, nhai Adamrpn tndhr mfnahhato mnhehormor. Nhai. Mettpno mfnahmotr rotn nd Bro Nkifrar kfo yuyuk kfo rafo mrokfot riyak htafnihato fasoh neft namot. ¹⁵ Metm rom be tumn yon hiyau hanyhato yiha yiha Krairhu mrokfom hikmm, yo rroh toh nmbuham rorhu tirtn htahato Bro Nkifrar kanjo ftohm, yo nd yima yak marnyanefit fakitohmt, yo dborioh nefm fak hikmm, Bro Nkifrar tfit yakmiyakrahm.

3

Sioskfot toh yukatohyuk yimam tu dborioh nefm yakitohkfot

¹ Na kfo mifwa, yimar kangr, sioshu toh yukatoh yimaya atoha, hifa. Ndt tu dborioh hingrneft. ² Nd sios toh yukatohyukrhu yau nmbuham, toh nmbuham be yak teh marnyakfot. Nhai rorhu wom fasoh nmbuhat yimam wahti nkriyafokfot. Nd yimar be rpa metrpatpno tohkfot. Nd yimarhu yima yuhur yak hta bohtahato rorhu wiyauyau nmbuhat dukefmpno yaukfot. Womm yakhato hifa rika bukr yak htakfot. Rorn Bro Nkifrarhu mrokfom womm kfo nuhas bonuhasetr rhukfot. ³ Nhai nd yimar bupa bebm yehato kfo mmo bammokfot. Nhai nd yimar tamoh nefenm bmbri kah rifhur mfnahhato tir tuyaknikfot o finji nakni-kfot. Nhai wommpno nakfo befenn rhukfot. Hifa yima yuhurn tamohm nakfo ptha marnyakfot. Ror nhai be mfro maru dukefrn rhukfot. ⁴ Nd yimarhu yon tuhanm hifa hifa yak hta bohtahato rom rhu marnyakfot. Yonm be yifemrhu yinhitn rhu digr marnya-kfot. ⁵ Yimar nhai turhu yon tuhanm hti yukatohaf hany marnyakahrm, nd yimar nhai Bro Nkifrarhu sioskfot toh yukatohruhatr. ⁶ Nd hingrneft tohyuk yimar nhai nfri Kristen yimarn nd hingrneft tohkfot. Nhai. Bi Kristen tohngotet yimarn nd hingrneft yak-hato htakfot. Nfri yimar nd hingrneft yakrahrt, to be turhu yufathu yura htaneftpno Bro Nkifrar tfit wahtarahr Satanr wahtamo kanjo. ⁷ Mrokfo hatoh hna duha yimar nd hingrneft yakneft, nhai mrokfom. Ndh tet yimar yakett n to be nhai Satanrhu rugitn fkniruhatr riruh aruhuyuk yimam mrokfo bebm turuhatmm.

Sioshu hingrnanhoyuk yimam dborioh nefm yakitohkfot

⁸ Sioshu hingrneftm hingrnanhoyuk yimam Kristenmpno tu dborioh nefm yakitohkfot. Nhai rom hus tngett rhukfot. Nhai rom wain bupam yehato kfo mmo bammokfot. Nhai maruham hmarsiyakt yakkfot. ⁹ Wutha yima yuhumpno nd tafont yak nriyafmo tu yafothet mrokfot, nd yimam yakitohkfot. ¹⁰ Kangko sioshu hingrnanhoyuk yimam ayaknom, afo yakhato htikfot rroh hingrneft. Tu hifa hingrna marnyewume ee btn nd hingrneft yak htakfot. ¹¹ Rroh metm nhaf tu dborioh nefm yakitohkfot. Mirahm tihtrwonom akektnom. Rorhu yima yuhur yak hta bohtahato rorhu wiyauyau nmbuhat dukefmpno yaukfot. Rroh rhu nmbuham be rhu marnya bomar-nyakfot. ¹² Sioshu hingrnanhoyuk yimar rpa metrpatpno rhukfot. Rorhu yon tuhanm yak hta bohta marnyakfot. ¹³ Yimam sios

hingrneft tohhato hifa hingrna marnyem, nd yimam tu dborioh yufat yakrahm. Nhai yakrmi hanyruhatm rom Jisasr hikwa yuhat wommpno kfo pthaneft.

Bro Nkifrarhu kafrohet mrokfot tafont htamort

¹⁴ Ninpno nianeft bi yibon hanita, ndar gontwat be wandfiwant. ¹⁵ Kanga na nia duha yinyeft o awi knga hatohneft, ndar gontwatn bi mrokfom yakrahnm nom Bro Nkifrar hiket yimanmoh toh yuham. Nom Bro Nkifrar hikwa tuhan yindarinom, nom toh nkifraniruha Bro Nkifrarhu yon kunyenom. Nomn dany rahur kanjo nd Bro Nkifrarhu yafothet mrokfot hatohwonomt. ¹⁶ Rpa yima yuhuri rpa tngr nom rpat tohhato kfo pthafkfof Bro Nkifrar nom yak nuhasmo tu yafothet mrokfothu mnat. Nd mro-kfothu mnat inji kroht:

Tu yima mif that yaknehato,

mifak dborhamotr,

tuhant yindars htimomr.

Ror tu mndohmb yima mifr tohmo.

Nhai wom tamoh nefenr rhurmorr.

Ndm Bro Nkifrarhu Yafothatn yak nuhasyukem.

Mounmotm hti bugamomr.

Rorhu mrokfom yimam yaknimomm,

kmi kmi kfo ptha habrimomm.

Ndar bbinysofthu yimam wany yakiomomr.

Bro Nkifrar yura hamuhmorrn,

bro yufat hemorr.

4

Giama tisaroh mrokfom

¹ Bro Nkifrarhu Yafothat mrokfom kfo hik twanho mifwotm. Bi wuroh yihar brboh hniwatr, yimam Bro Nkifrar kfoyuk mrokfom yuham myak htanitmm. Myak htanihato tfit nd yafotham yimam tuhagrhahato kfo ptha nnehwa yafotharoh mrokfomn o kmi yarhm kfoyuk mrokfom yuhamn hikwom. ² Ndhtet mrokfom giama tisamn hnewumm. Ndhtet yimaroh yima dukefr, tamoh nefm yak nhtiwat, bi nohmorio. Rom nayuk fasoh nefm nhai wom duka mekahm art fasoh nefet. ³ Ndhtet yimam kfo ptha kangm tuhan yakneft ndt fasohet, yo mur yeshrt ye fura bofuranest ndt fasohet. To nd yemrote be tum dborha furamom? Na kanga nmoh yeyukmn Bro Nkifrar hingrna htamorm. Yimam bi Bro Nkifrar hikhato rorhu tu yafothet mrokfot yakitohetm kfo bruttnahato yanyeft nhai mrokfom. ⁴ Tamoh tamoht, Bro Nkifrar ndar bbinysoft htamot, dborioh dborioh shrkarpar htamor, nom nhai kfo kurkfot. Bro Nkifrar kfo bruttna yindhornihato yak yakfot. ⁵ Bro Nkifrar bi kfo memor, “Nd nd yeshrim wayetwako.” To nhai nom kfo kurkfot. Nom nd yeshrim kfo bruttnanihato yenyeft, nhai mrokfom.

Timotir Kraishru dborioh hingrna yimar tohkfof

⁶ Ndar mrokfom yaknihato wom Kristenm kfo nuhas bonuhasrahnm, to be Kraishru dborioh hingrna yima tohrah. Yo nd ni hikwa gutnius mrokfoti sios yahuka kfo yirmoh mrokfomn tpim habokknarahnm. ⁷ Mirahn nd bro yimam harhuwa nkifra tndh furam ayaka. Bro Nkifrar tohwa toheft watoh hik hanywontwa. ⁸ Yimam wumtt yinyeft nhai be bmbri wumtt yi

yaknikahm. Afo tum wumt-hato baruhat hatone nhombrahato tum nahti nhombra nahti nhombra tamoh tamoh wumtefm bi tu hifa hifa fekmm, ee btn wumtt kitm. Kangn Bro Nkifrarhu toheft atoha, to nd wumteft kanjo afo tu toh nhombrakfot. Afo tu toh nhombra bonhombra hanyhato bi tu hifa hifa tu Bro Nkifrarhu toheft kanjo tohwo, ee ni bi nhai mrokfom. Nd hifa hifa rhu yuham bi hikwomn. Kto hifa hifa rhu nkifra-nirahn. ⁹ Ndar mrokfot tu kfo mif kfoyet. Yimam wany yakiohato hikkfot. ¹⁰ Yimam bi fasoh tkitm tohetm, toh nkifraniyet Nkifrar kekworm. Nhai frohm yakkahr. To nd rorhu mrokfom wany yakio-wanomn nmoh dukefm rorn kitwom, kangnom rorn yak marnyarahrnom. Yiha yiham to be kangnom, Bro Nkifrar tohwa toheft atoh hiknom.

¹¹ Ndar mrokfot wakfo nuhas-nikahanm yo tfit wakfo hik nuhas bonuhast-wanm ndar mrokfothu hik yuham. ¹² Ni damiag yimaye. To mirahm ni damiag yimann wahtinomn yonenm kanjo. Ni tu yimam kanjo tohhato wom Kristenm ni htiyak hanyruhamn hikrahm. Ni pthayuk mrokfom, ninhu yau nmbuham, yo ninhu yima yak marnyanest, yo Bro Nkifrarhu yakitoh kihneft, yo ninhu toheft, watoh hikkahnn wom Kristenm inji htiruhamn hikrahm ninhu toheftn. ¹³ Na nhai bmbri niakahane, afo ninn bro yima rifinyr ritimyuk mrokfom ritimtwanm. Ritimhato wakfo nuhas bonuhastwanm. Yo kfo hta bohta mrokfom whitwanm. ¹⁴ Mirahn ariwohsisaka Bro Nkifrarhu mrokforoh pthaneft. Eldam tir hta hanyhato kfo ptha hanymoa mrokfo yafothar to bi ninn muhorm. ¹⁵ Ninhu dukefr nd na kfo hta bohtayuk mrokfomn dukefr htahato hingrnakfot. Hingrnefr hingrna marnyaruhatnr wom Kristenm htiruhamn kfo mirahm, awi hifa hingrna marnyewur. ¹⁶ Ni tunhu toh nmbuhat htiafo hany yo wom Kristenm yak hta bohtiwa yuham htiafo hany inji nakfot. Inji na hanyrahn, nini ninhu mrokfom wanyuk yimam Bro Nkifrar toh raforahrko bro kotkfot tohruha yihart.

5

Wom Kristenmpno tohnefthu kfo nuhas mrokfot

¹ Mirahn wom yima bebparr be mfro akfo huttanr. Tamohm kfo ptharuhanr tunhu yifem mifr kanjo inji kfo ptha yima boyima marnyakfot. Damiag yimam nhaf inji. Rom tunhu garbn nmemrom kanjo yak marnyakfot. ² Yo met bebpat yo met tmaht nhaf rpahtet neft nakfot. Met bebpat tunhu hiyau mmemt kanjo yak marnyakfot. Yo met tmaht tu hifa dborioh wutha yima yuhurpno tunhu mndarem mif mift kanjo yakitoh marnyakfot.

Yindarim noh htaniet metroh mrokfom

³ Wom mett ramemr noh troh htanirt turpat rhu kutenwot, ni hti marsisa duha. Tamoh tamohm hti dukakfot. ⁴ Nd met dhirt yonetet o inyenem yonetet, ninn yihato kfo mekfot, “Niko mirahko nd met dhirt ahti marsisanomt. Wahtiyaf hany-swakomt tamoh tamohm.” Nd mmemt nd yonrhu inyangur bebt harhumohat tawo rot finji rhu bebwot nd yonr hti dukakfot. Bro Nkifra inji nayet yonm hifa hti yindhorworm.

⁵ Ramemr noh htaniet mett nhai womm hti dukakahmt, nd metthu yima yuhur Bro Nkifran naku kfiwut. Yiha yiha yifung marm Bro Nkifrar naku kfo hasiwatt rorn kukatohwort rothu rhu nmbuhat. ⁶ Wom mett ramemr noh trohnyett be tuthu thatipthu tuhagrha yima yuhur korhrt,

nd mett be bi sfnoh thatip furayet. Nhai wom Bro Nkifrar rhukahrt. Bi hel yita yihotatn kauwot. ⁷ Ndnettn yindarim noh htaniyet metm nd mrokfom wahikahtnm Bro Nkifrar akfo bruttnakahmn be hifa yima yuhurpar yauruhamn nhai riruh arhuyukm faso kfo bebruhatmm. ⁸ To afo wom mrokfot wawanykomt. Wom Kristen yimar nhai turhu froh frohm o turhu yon tuhanm o turhu darbn najomrom o nmemrom o mndaremrom hti dukakahrm, nd yimar bi Bro Nkifrar mong trohwor. Bro Nkifrar hik duha yimam niwa nefm nhai be ror niwa kanjo be inji mfro nakahm. Ror be tu faso yi mifwor.

⁹ Yindarim noh htaniyet metroh yufam yorhwa gonborngt kangn wom met dhirroh yufam ahtakahtanm, siosn nd metm hti dukarahtn rroh rhu nmbuham, to mirahn be nd met dhir bugaroh yufam ahtayanm. Hti hanykfot fitoh mett rpa yimpar fak dhir htanirtn nd mett 60 gunyjimetet, ¹⁰ yo nd mett dborioh yufetet, tuthu yonm hifa hifa fakitoh marnya hnamotm, yo wom kmim fak marnya hnamotm, yo Kristenroh bdr wuram fuk kifs a hnamotm, yo krhopet yimam krhopam titanho hnamotm, yo wom dborioh dborioh nefm na hnamotm, tot ndhtet metthu yufatn nd gonborngt htakfot.

¹¹⁻¹² Yo mirahn tmah dhirroh yufam bi ayakkahanm dhir metroh yufam yorhwa gonborngtn bi ahtayanm. Nd dhirm nd gonborngt yufa htaneft afo bro mrokfot kak dbkafwom. Kfo kangm, “Nom nhai tfit wom nfri ramr yakruhatnom. Nom be inji toh furahato sioshu hingrnefnn yakitohnhorahnom.” Mrokfot inji kak dbkafwont. To nom bi htiyetenom metm yuhre tmahmn yindarim noh htanineft, yima yuhum tfit sinyewatmm wom nfri ramr yekwamn nd barkof yak dbkafyuk mrokfot yi furewut. Nfri ramr yaknitamn sios hingrneft htanywomt. ¹³ Yo rom niwa wom neft, rhu hhrek hasohato kuny kuny yi htfasneft. Yo nhai be hhrek nmbuharpatpno kuny kuny yi htfaskahm. Nhai. Kuny kuny kuny kuny rhu htfas thoft to be nd womroh mrokforoh hatone htfashato rhu ptha htfassn inji rhu htfaswom. Womm rom turoh mrokfom rom tumn pthayukm, to nhai, nd metm be turoh mrokfom kanjo romn tfit nndo mando faso faso harhu htfaswomm wom yimam. ¹⁴ Ndnettn nanhu dukeft duka kanga fitoh metm yuhre tmahmn yindarim noh htanimm, nd metm afo tfit nfri yindarir yakkfot. Nfri yindarir yakhato afo nd yon mtitofr afo yakitoh hanyhato tu bro yon kunyet metroh hingrneft afo yakkfot. Inji naruhamn nd nom hti dbnotwa yimam nhai yarim tohnehato wom tng bebm turuhatmt. ¹⁵ Wom met dhirm to bi tfit mkekutakhato Satanr tfit hikwom. ¹⁶ Fitoh mett Bro Nkifrar hikwatn rothu frohemtn dhirt tohwot, rothu mmemet o najomet o nmemet o wimar-somet o yimboremet o tamohemet, to miraht nd mett be nyngarpaye ayukatoh marsisakahtanm sios kforpatn ayakitohm. Nhai. Rotn nd tuthu yimatm yakitohkfot. Fitoh met dhirm nhai yimat duhatem, nd metpram sioskfot yukatohrahtn.

Dborioh hingrnefm hingrnayet eldam yakitoh marnyakfot

¹⁷ Eldam tu bro hingrneft kakitoh-wom. Romn tohhato Bro Nkifrarhu mrokfot kfo pthiwatmt tuhan yindars wanukmt yo romn yimampno ruhato kfo hta bohta mrokfom kahukwomm. Ndhtet yimamn tu yura wuhtahato bro yufati marufat hekfot. ¹⁸ Bro Nkifrarhu rfa borngt kfo kangt, “Bulmakaur wit yukham kahot krhe-wurm, mirahn tngt akitasifkahtanr ror yi yak hany juha.” Yo “Hingrnefm hingrnayuk yimam marufam

yakkfot.” Ndnettn eldam hingrnanefst rom marufam yakkfot. ¹⁹ Wom yimar eldarpno wom kfo wok mrokfom kfiwurm, ni bi mirahn rorhu mrokfom awanyanr. Hus o husfirpa yimam rpahtet mrokfot nia kfo pthewum ee wanykfot. ²⁰ Wom eldar wom fasoh nefm ner, nd eldar yima nyinga riharpno kfo nyinga fnahkfot. Wom eldam inji htiruhamn yakrmirahm rom fasoh nefm naneft.

Timotir duka marnyahato tamoh tamoh nefm nakfot

²¹ Bro Nkifrari Jisas Kraistr ee Bro Nkifrar yak htamo mounmotm, yukatoh hanitatma na kfo mifwann, na kfo nuhasyuk hingrnefm yima dukefrpno wahingrnatwanm. Tamoh tamoh nefm niwa, mirahn bro yufet yimarpami tunhu yimatrpampno dborioh nefm ayak nuhasa. Nhai. Yima bugam rpahtet nefst yak nuhaskfot. ²² Bi mirahn Bro Nkifrarhu hingrneft yakitohyuk yimam tafi hti hik marnya duha bi tir hta dimandi-yakniyanm. Hti hik marnya duha tir htanihato kto nd yimarhu nefm tafont rhurahm, tfit ninn mrokfot thutitarahm. Ninhu yufat mrokfo duhatt rhukfot.

²³ Nd ninhu yatiyefr yejborhewohate mirahn be buparpam ayeya. Wain bupenmpno hta hmbrihato wayekahnn yatiyefr thu jubtwarahrn.

²⁴ Womroh fasoh fasoh nefm tafont nriyafwatm htitwonom. Htihato kfo kangnom nd yimar mrokfetr rhurahr. Womroh nefm be rhu kafroh marnye-wum, kto nriyafrahatm htirahnom. ²⁵ To be nd yuhatn wom dborioh nefm tafontn htitwonom. Wom dborioh nefm nhai tafontn htikahm kto nriyafrahatm htirahm.

6

Slefm be dborioh nefrpam nakfot

¹ Kristen yimar wom yimarpno slef tohwor, nd Kristen slefr be turhu tohak yimarhu yinhitn tohhato bro yufat htakfot. Nd Kristen slefr inji na marnyaruhatr be rirhu arhuyuk yimam nhai Bro Nkifrarhu yufat faso faso kfo beb bobebruhatmt. Yo nom Kristennom hikwa yirmoht nhai faso kforuhatmt.

² Fitoh Kristen slefrhu tohak yimar Kristen yimayer, to be nd Kristen slefr mirahr fasoh tuhagrha dukefr yak-kahann akfo amiya, “Nhai mrokfom, nanhu tohak yimar Kristen yimayer. Na finji naneft nhai kforuhatr.” Mirahr inji adukaya. Be yiro yima yuhurio riyindhorr mekfot, “Nanhu tohak yimar hifa Kristen yimar.” Ndhtet yindhorr yima yuhur riruhato turhu tohak yimarhu tamohtet hingr-nefm yakitohhirahr be hingrnefm yi marnyarahm.

Giaman tisaroh fasoh nefm

Nd na bi kfo hta bohte mrokfomn Kristenm wakfo nnhutwanm nd mrokforoh hikneft. ³ Fitoh yimar mkfoyuk kfo yirmoh mrokfom nhai niko sios wanuka kfo yirmoh mrokfom kanjo hikkahm, yo nhai nmoh Nungohtet Jisas Kraistrhu mrokfom kanjo hikkahm, ⁴ nd yimarhu yima yuhur bro yufathu yakneftn yima yuhur buriwurr. Nd yimar dukef duhater. Sfnoh mfra nyisofer, nhai yima dukefr rhukahrr. Nd tefi shrkenroh mrokfompno rinahtakhato nakfo hamuh nakfo hamuhneftn buriwurr. Ndt fasoh nefst kakitohwor. Nd nefn hnewutm womroh wuskar o tamohr htihato yima yuhu sinyaneft, nakfo yiritineft, nungurha mrokfo nahanyeft, hifa nyinga nahti duha, ⁵ kfo baboba-neft, ndhtet nefm yakitohet yimar nhai tu wom

dborioh yima yuhur rhukahrr. Yima yuhur tu faso rhu beb mifworr. Bro Nkifrarhu yafothet mrokfot nhai ndtset yimar wom rhukahtr. Inji newa yimam duka kangm, “Bro Nkifrarhu yirmoh mrokfot kfiwa yuhat toh hikruhanomn marut, wuss, yo tamoh tamohnt niayuk yihotat yak didbhatakraht burifhth kanjo.”

⁶ Be Bro Nkifrarhu kfo yirmoh mrokfom hikhato nhai be mfro dukakah-nom bok maruti wusshu harhuneft, nmoh rhu nmbuhath rhu marnyar-fonomt. Nhai tamoh tamohr yak kkopenrfotnom. ⁷ Nom nurmohat nhai wom tamohr yakitohakhato niarmonom. Tfit nom ndar bbinysoft htanyhato yi shoft nhai tfit wom tamohr yakitohakniruhatnom. ⁸ Dfik yeshriyenm korhmnom o dfik hmbresham harhuwonom, to be ndrampmpno rhukfot. Hti tmany juha. ⁹ Yimam mfro maruti wusshu yak dukefr mfro rhuneft, bok dukefm kekwomm. Bok wuskaroh yak dukefr yekwatrm be tumn fasoh tkitt htewum. ¹⁰ Mfro maru dukefr yakitohneft, tot ndharn boknambok dukefm mfnah-rahm. Tot tu fasoh nefm sinyewa mnakort. Yimam nd maru dukefr yekwatrm fnahnitamn boknambok krhopam kekwom. Krhopam yekwamn yima yuhum nhai hwe marnyakahmm.

Porr wom mrokfom hemorr Timotir

¹¹ To ni, ni bi Bro Nkifrarpmo rim tohniyet yimaye. Tamoh fasoh fasoh nefm ni brbo yi juha. Dborioh toh nmbuhathu toh yuhatn watoh nhombra won hanyswa, yo Bro Nkifrar yakitoh kih hanyhato ror tohwa toheft toh hikkfot, yo wommpno nayak marnya-hato rpat tohneftu yima yuhur yakitohkfot, yo noh hmbre yima yuhurhu rhu dukefrn tohkfot. ¹² Bro Nkifrar hikneft resis kanjo watohwonkahnn nd toh nkifraniryuk tkitt wayakwon-twant. Nd tkitthu yakneftn Bro Nkifrar nakumorn. Bro Nkifrar nakumotrnbok yima rifiny buhar tohhato Jisasr yakmo yuhat kfo srh nuhasomn.

¹³ Ndar bbinysofti mount yorhwa shrkar htamo Nkifrari Pontius Pailatrpno kfo srh nuhasmo yima Jisas Kraiser, na rof yukatoh hanitwotfa na kfo mif mifwann, ¹⁴ mrokfom kfo-yukm yakitoh marnyahato hikkfot. Nd kfoiyuk mrokfom yakitoh hasetnn Nungothet Jisas Kraiser yawihnerahr. ¹⁵ Rorhu mounthu yarim yak dborha-hato yawihna yihar, tu Bro Nkifrar bi duka htewa yiharn kforuhatr yawih-nerahr. To nd Bro Nkifrarhu tngtpno tamoh tamohr korwhor yo rorhu tngtpno tamoh tamohr rhu hik hanitwor. Rorrpar kingroh tu Kinger, yo rorrpar nungothetroh tu Nungotheter. ¹⁶ Nd rorrpar nhai nohkfot. Yiro bro funa nanyjareftn frhabrimottr yiro riyorhwor. Nhai yimam brbo yikfot. Nhai wom yimar htiwonrmorr, yo nhai wom yimar htikfot. Ndnnetn yiha yiha nom be rorrpar bro yufat hekfot. Rorhu bbuka nanyjareft be inji rhu nkifraniraht. To be inji.

Maru kunyet Kristenroh wom kfo duka mrokfom

¹⁷ Ndar bbinysoftu maruti wuss mfro haruhet Kristenm wakfo pthawann, mirahm turoh maruti wuss htihato akfo yindhorr hagrhanom. Mirahm nd mibatinita shrkarn rroh dukefm ahtanom. Bro Nkifrar rroh dukefm htakfot. Nd Nkifrar kahuk-wornom tu bro yindhoreftu rhuyuk wonk wonk shrkar. ¹⁸ Wakfotwanm, mirahm turoh maruti wuss htihato akfo amanyom, asot be tu dborioh rhu nmbuhath rhuyukti. Nhai. Mirahm inji adukanom. Tu rhu nmbuhathu yakneft, dborioh nefm yakitohhato womm tamohm kkopenwom, htihato yak hekfot. ¹⁹ Inji narahm, turoh

rhuyuk tkitthu tu dborioh wuskarn bi thu yibmon hanitm. Kto tu rhu nkifra-niyuk rhu nmbuhat yakrahm.

Porrhu wuroh mrokfom Timotirpno nd yimom

²⁰ Timoti, nd hingerneft Bro Nkifrar ninhu tirt htamot, yonm kanjo waya-kitoh marnyatwant. Tamoh tamoh mrokfom nhai tu Bro Nkifrarhu dukef yuhatn yimam kfo pthakahmm, ni mirahn nd yimampno brbo aiya. Rroh mrokfom be yuwi Bro Nkifrarhu gutniuskfotn kangm, ayoh mrk wuna bowunanom. Rom duka kangm, ka rroh mrokfom tu yafothet mrokfom kfo pthewum, to nhai. Nndo yafotha duha mrokfom kfo ptha furewum. ²¹ Wom yimam to ndhtet yafotha duha mrokfom yakitohmomn Bro Nkifrarhu mrokfot mfafhonomt.

To be injirpa nanhu mrokfom. Bro Nkifrar atoh natwihtwarko.

Timotirhu husyuk gontwat Porr dwandfakhato htafmot Barkof kfo nuhas mrokfom

Timotir Porr hingrna nhomoa yimayer. Ndnettn Porr ndar gontwat wandfakmortn Timotirhu yufatpno htafmort. Timotirhu dborioh nefrparoh yakitoh yuharoh kfo nuhas mrokfomn ndar gontwat htafmort. Mrokfom kfo memor; Timotir Bro Nkifrar hikwa yihotat nhai be wumtnano hikkfot, yo nhai Jisas Krairhu gutniuskofothu kfo pthaneft myak htanikfot, yo Timotir Bro Nkifrarhu mrokfot hik marnyakfot. Nd gutnius hingrneft tohhato yimam krhopam kahukmr, ror nd krhopam rihtiyakhato nd Bro Nkifrar hayuk hingrneft myafhoni duha.

Yimam hnayuk mrokfom nhai tu gutnius kfiwa yuhatn kfo hikkahmt, Timotir nd yimampno brbo yi juha. Ndhtet yimam kfo pthayuk mrokfom toh wany yakitohneft toh nmbuham nhai yi marnyakahm. Timotir Porrhu tohefm dukak hanyhato rorhu tohefm toh hikkfot. Bro Nkifrarhu hikneft, yo noh hmbre yima yuhurpno ruhato wommpno nayak marnyahato rpat tohneft, yo tamoh krhopam yimam hayukm tohhato nd krhopam titanef, tom Porr tohmo tohefm. Nd nefmn Timotir yak hikkfot.

Timotir tu mfro hingrna bbuka hanyhato tu Bro Nkifrarhu hingrna yima mifr tohkfot

(Sapta 1–4)

¹ Na Pora, na Krair Jisasrhu aposer hingrneft yakitohwa yimaya. Tu Bro Nkifrarhu dukef yuhatn nd aposer hingrneft tohwoyantn Krairpno frtkafet yimam yekwa rhu nmbuhat tu Bro Nkifrar kfo htamot, nann kfo nuhas htfaswanm.

² Timoti, ni tu nanhu yon mifnn ndar gontwat wandfiwann. Bro Nkifrar, nmoh Yifemr yo Krair Jisasr, nmoh Nungothetr, ayuhuwaftwarn yo ninhu rhu nmbuhat ayak marnya bomarnya-kahttrt yima yuhur mirhurahrn.

Gutniuskofothu kfo pthaneft yimtna hany juha

³ Nanhu nkifram Bro Nkifrarhu hingrneft yakitohmoahat, tu wutha yima yuhumpno Bro Nkifrarhu hingr-neft fakitohmoumt. Na ndar aposer hingrneft yakitohwohat na tuka yima yuhur kak nhtewanr na nhai wom tamoh nefm o yima yuhu bebm rhukahma na ndar hingrneft yakitohwohat. Yiha yiha yifung marm na kfo bruttnaneft na nhai yak trohnikahann ninhu yufat yutaneft Bro Nkifrar kfo yindhorwanr. ⁴ Ninhu nur nyingar yohnemor yuhre duka hanitanr. Kanga ni tohwa kmit aniekahann tuno nahtikahnnonn nanhu yima yuhur yindhorrahra. ⁵ Na tuka htitan ni Bro Nkifrarhu mrokfom hikwa hikeft to bi tunhu bapem Loisi tunhu mmem Yunis Bro Nkifrar yakitohhato hikmoa kanjo bi inji Bro Nkifrar yakitohhato hikwonr. ⁶ Bro Nkifrar inji yakitoh-hato hikwatnr na wom mrokfot kfiwann. Nd na tir htamo yiha Bro Nkifrar hemo mrokfo rifhur ayuwa muhtwar, mirahr nd mrokfo rifhur amitoh witanir. ⁷ Nd Yafothat Bro Nkifrar yahukat nhai wom tamoh nefm mhtihato tfit mongthur mongthur hanyakahtnom. Nhai. Nd Yafothatn tpi hiyaf hanittnom. Nd Yafothatn

yima yuhum kahuktnom wommpno nayak marnyahato rpat tohneft. Yo nd Yafothatn nmoh toh nmbuham kak hta marnyaf hanittm.

⁸ Ndnettn ni mirahn ayimtna hanya Bro Nungothethru mrokfothu kfo pthaneft. Na rorhu hingrna yimaya kalabus tohwohat, ni mirahn nann amhtiyakkahann ayimtnak hanya. Nhai. To ni inji yimtnaruhan to nane frohmn tohhato nd gutniuskfothu kropham titanhorhoma? Ninhu tpim Bro Nkifrar thu habokknamohat to nd krhoparoh titanefn tpim thu habokknamorn. ⁹ Bro Nkifrar buha mitoh rafohato nom tfit yakhato rorhu yufatn tfit fak htamornom. Bro Nkifrar nom tfit yakhato rorhu yufatn tfit yak htamohat, to mirahko ka nom nayuk dborioh nmbuham htihato inji namor. Nhai. Ror be turhu hti yuhuwaf nmbuhatn inji yakmornom tfit turpno rim fak htamornom. Ndar bbinysoft tafi trha duha nd nmoh yakyuk yihotat bi Kraiss Jisarpno fak dbkafmort. Memor rorn yihotat yak nukakhirahrm. ¹⁰ Nd mrokfot bi ruhettm nom hel yita yihotako bi tohetnom rorn yihato tfit yakmornom tfit toh nkifranyuk kmiko yita yihotako hta bugamornom. Nd hel yita yihotat fak thumort. Nd gutnius mrokfom kfiwam, to nd Jisarr nohhato hel yita yihotar yak thuhato toh yifantanyuk yihotako hta bugamo yuhathu kfo nuhas mrokfoyem.

¹¹ Bro Nkifrar nann aposer hingrneft fak htamor. Nann nd aposer hingrneft tohhato gutnius mrokfot kfo hta nuhas bonuhas htfaswanm.

¹² Na inji namota fakmoma. Yakhato kalabus htamoma. Afo yuhre kalabus tohwa. To na nhai yimtna inji nakaha na kalabus tohwohat. Nhai. Jisarrhu nefm bi htietann to be na Jisarr riyakitohakmohat to be inji yakitoh hanyruhanr. Na be rorhu tirmn ruhany ruhanye ror yawihnerahr.

¹³ Kfo yirmoh mrokforoh kfo nuhas yuham bi kfo hta nuhasmoyann. Nd yuhatn wahiktwa. Ninhu toheft Kraissrpno frtkafhato tohkfot. Ninhu toheft inji tohhato tuhan yindarim yak marnya bomarnyahato rpat tohkfot.

¹⁴ Nd gutnius hingrneft ninhu tirt htamot tu dborioh hingrneft. Wayakitoh manyatwant. Nom hatohwa Bro Nkifrarhu Yafothatn hti yukatohaf hanyraht nd ni yakitohwa hingrneft.

¹⁵ Bi wanyakmo, Asia profinskorhof yimam bi mong trohmoma. Figelus Hermogenes yima husf bi rpat mong trohmoma.

¹⁶ Onesiforus ripharr Bro Nkifrarppno kfo bruttnewanm. Kanga Bro Nkifrar akfo bruttnakohtanr hti yuhuwafrahrm. Nd yima Onesiforusn yiha yiha hifa yima yuhur hnamourr na kalabus tohmohat. Ror kfo pthamoa mrokfom wanymoahat yima yuhur thu jubtwa marnyamoura. Na sene dbkaf htateta rhumoahat nhai yau yimtna hnarmoar nanpno nia pthaneft. ¹⁷ Ror Romr mfnamohat, rorhu dukeft nanpno ruhettm be nann ttiwon hambrakna twanhomor. Hambrohna hambrohna, mhtimora. ¹⁸ O, Bro Nkifraye, Onesiforusr wayuhuwafwanr bro kotkfot tohruha yihar. Ni Timoti bi htietete Onesiforusr na Efesus tohhato ror na yak marnyamo nmbuhat. Ror inji yak marnyamoatra ndnetann inji kfo bruttnewanr Bro Nkifrarppno.

2

Timotir Kraissrpno rim tohni bugahato rorhu mrokforpam hikkfot

¹ Nanhu yon Timotiye, ninhu toh nmbuhat tohruhant, be Kraissrpno rim tohni bugahato rorppno frtkafhato tohkfot. Mirahn ginyetm kanjo ayesisa. Kraiss Jisarpno frtkafhato tohkahtn Bro Nkifrar toh natwihraharn. ² Bok

tuhan yindariroh nyinga riharpno kfo yirmoh mrokfom kfo yirmoh nuhas bonuhasmoyann. Nd kfo yirmoh mrokfomn wakfo nuhashitwanm Bro Nkifrarhu mrokfom yakitoh kihet yimam. Rom wakfo nuhaskahtnm tfit romn myaknihato womm kfo nuhas hi hanyrahmm.

³ Ni tu Kraiss Jisarhu ami watoh-kahnn ndar hingrnefthu krhopam na titiwam watohkahnn watitanhotwona. ⁴ Yimam soldia tohneft nhai rom tfit yima furaroh nefm rom tfit fknehato tohnhokfot. Nhais. Kangm nd tu soldiaroh bro yimar ahti yindhorrnom, nd soldia hingrnefrpat kakitohwom. ⁵ Yimar kangr tone resishato praiskfot ayaka, nd yimar nd tone resisyuk kfo hayuk kfo hta mrokfom wanyhato yak hikkfot. Nhais hikkahrm, be nhais winhato praiskfot yakruhatr. ⁶ Fitoh yimar mswir htaneft yikiat hatohwor, tor nd yimarn barkof yakyuk yewurit kekwort. ⁷ Nd na kfo hne mrokfom wamduka hik marnyak hanyswanm. Myak mumekwonme, nmoh Nungohtet Kraissr yima yuhum hiruhatrnr mro-kforoh mna yuham yakrahnm.

⁸ Duka hanykfot Jisas Kraissr. Nd na kfo pthiwa gutniuskfot kfo kangt, nd yima Jisarhu nia yuhat, Defit frikef yuhatnr niamor. Yopt bi ruhetr tfit Bro Nkifrarnr kasinyamorr. ⁹ Nd yimarhu gutnius mrokfom kfo pthia htfasmoata, yihotam yau htfaswa yima bebm kanjo htihato fakmoma. Yakhatoh kalabusn htamoma. To yimayann yakmoma kalabus htamoma. Bro Nkifrarhu mrokfot rot nhais yimam kalabusimtakfot. ¹⁰ Nanhu bro dukeft nd Bro Nkifrarhu yufatpno bi ruhet yimam dukahato ndnetann nd yonmar yonmar krhopam na yekwam nhais wohsiskahanm. Nanhu dukeft duka kanga nd Bro Nkifrar ayak bugarm. Yak bugahato bi hifa tkitt bi fekm, be nhais mrokfom, be nd hifa tkitt be rhu nkifranirahm. Ndnnetann rroh duka nmbuhatrnr krhopam kekwa.

¹¹ Nom bi Kraissr pno anohkahnm,
to be tfit rorpno tohrahnm.

¹² Krhopam yakhatoh tohrahnm,
to be ror king toh thoft nom king hingrneft yakitohno-rahnmr.
Nom mong trohrahnmr,
to be ror tu mong trohrahnm.

¹³ Nom kfo yuk tng yuhat nhais hikrfonomt,
ror nhais inji naruhatr. Ror tur kfo yuk tng yuhatnr hikrahnr.

Nom mikfota mkfotarfonom.
Ror nhais mikfota mkfotakfot.

Nd mrokfot tu kfo mif mif mrokfoyet.

Bro Nkifrar hti yindhorwa hingrnefmnr Timotir hingrnakfot

¹⁴ Yiha yiha Kristenm nd mrokfom wahe juka hanyswanm. Mirahn ahti marsisayanm. Mrokfom he juka hanyetmnr duka hanyrahmm. Mrokfom hanyeft kfo mekfot, “Na Bro Nkifrar kukatohwora. Na rorhu nyingampno kfiwanko. Mirahko nd nkifra kfo yirmoh mrokfefenmpnon o nkifra yufa yuhampno nakfo hamuh nakfo hamuhnm. Ndhtet tefi mrokfefenm-pno nakfo hamuh nakfo hamuhnefm womm nhais hifa yima yuhum yakkahm. Womm tfit manysifm kanjo mkkitm.”

¹⁵ Tu hingrna yimam kanjo hingrneft hingrnahato Bro Nkifrar hti yindhor-rahnr. Hingrnneft hingrna marnyaruhatnr be nhais yimtnaruhatnr rorhu nyingam-pno ¹⁶ Tamoh tamoh mrokfom yimam kfo pthayukm afo wany nhtakfot. Nhais tu Bro Nkifrarhu dukef yuhatnr mrokfom kfo pthia

hikkahmm, ni mirahn ndhtet yimampno brbo aiya. Roh mrokfom mwany wofnnirahn to be tfit fasoh nefm fknirahn. ¹⁷ Roh mrokfom hunt kfe rhot hik hanita kanjo inji kitm. Himeneus Filetusrof, tof nd yimaf ndhtet mrokfom kfo pthewaf. ¹⁸ Nd yimaf Bro Nkifrarhu tu yafothet mrokfot bi fahonimoft. Yimam kfo kangfm, noheh yimaroh sinya yihar bi yimor. Arihat nohyuk yimam nhai tfit sinyaruhatm. Inji kfiwatfm nd Kraiss Jisarhu hik yima yuhur, nhai mfro bi sinyakahmm. Womm bi tfit kafhoni hanitmr.

¹⁹ To sioskfothu hatohyuk dany rahur Bro Nkifrar bi kasinyamorr. Nd dany rahur nhai ninor ba inji nakahr. Kangm ka be tuha ftohr. Nd rahurn wandfamo mrokfom inji kfiwum. “Bro Nungothetr bi hti nhtewurm rorhu yufatpno rhuyuk yimam.” Yo, “Fitoh yimam kfo kangm, nom rorhu yufatn korhnom, nd yimaroh tamoh tamoh nefenm mong trohkfot.”

²⁰ Wom bro kunyrm korhm roh bikm. Wom rohm gorkfoti silvakfoye hingrnyetem. Womm be mi nmbuha furaye yo dif kranyjipaye hingrnyetem. Nd yak marnya bomarnyayet rohm, rom bro yiharpami bro yufet yimarpam-pno yakhato hta msokayukem. Ndwom roh furam rom be yiha yiha hta mska fura hasoyukem. ²¹ Bro Nkifrar Kristenm yak nhtiwa yuhato to inji kitt. Fitoh yimam, fasoh nefm mong trohhato Bro Nkifrar hikwam, nd yimam afo kak htefiwurm. Turhu yufat rhuhato turhu hingrnfroh hingrna hayukem.

²² Ndnnett ni Timotin, ni damiag yimam hatohwa yima yuhu sinyaneft, yo womroh tamohroh hti yuhur hanyeft, nd nd nefm yakitoh duha. Yafho thuhato afo tfit dborioh toh nmbuham, yo Bro Nkifrarhu yakitoh kihneft, yo wommpno rpat tohhato nayak marnyanefm, afo tfit nd nd nefm tfit yakitohwontwa. Nini yo Bro Nkifrar hti wuthahato ror lotuta yimam, niko buga afo nd na kfiwa nefm yakitoh bugawontwakomm. ²³ Mirahn fipa duha fipa duha mrokfom atohkahann awany yakitohanm. Ndhtet mrokfom yima dukef duha yimamn hatone htfaswomm. Ndhtet mrokfom yimam toh wanyneft yima yuhum tfit kahm kanjo wakur sinyahato nakfo wok nakfo wokhato nahuttwom. ²⁴ Ni tu dukaf hanykfot. Ni mirahn wom yimampno nnakfo hamuh nnakfo hamuhnom. Ni dborioh yima yuhur yak nuhaskfot. Ninn Bro Nkifrarhu mrokfom miyaknihato kfo nuhas bonuhaskfot. Bro Nkifrarhu mrokfom kfo nuhas hi hanyhato womm hanyjbornewumm, o hamuh tfa thuwomm to ni mirahn anambura. ²⁵ Ninn tfit nd mrokfo hanyjbornet yimam yakhato kfo yima boyima marnyakfot. Ni inji narahnm, ka Bro Nkifrar rroh yima yuhum yak kekutrahm. Yima yuhum yak kekutruhamn Bro Nkifrarhu tu yafothet mrokfot nd yiha hti dukarahmt. ²⁶ Afo Satanr yakmormn rorn uhatone ahato-nemoatrm nd dborioh duka yima yuhur afo frfnahnimor. Yima yuhum yak kekuthato ee ndnatn nyingam yoh dborharuhatmm Bro Nkifrarhu mrokfot hti hikruhamtn tfit dborioh yima yuhum nierahmm.

3

Wuroh yihar; fasoh fasoh nefm mfrfnah bugarahm

¹ Ni Timoti, wuroh yiha rhuruha fasoh fasoh nefm bi wawany htatanm. Wuroh yihar brbo rhu hanyrahr htirahn, ² yimam turpatm htitahato yemrot, wuss, o tamoh tamohht yakrahmt. Nhahi wom frohm hti dukaruhatmm. Maruti wusshu yak dukefr mfro tohrahrm. Nd dukefm mfro tohruhatmm,

maruti wuss hmarsi yakt hmarsi yakt yakrahmt. Yimam kmi danym yihom het grhak mhet grhakhato womm faso faso kfo rindho borindho thurahmm. Yonm nhai tfit wom yifammaroh dohr wom kmbri-ruhatm. Mrokfo hanyjbornaneft brorahtm yonm. Nhai kfo yindhor hakuruhatmm. Bro Nkifrarhu dborioh nefm hti kur tanyhato tfit ndar bbiny-softhu nefm tfit hikrahm. ³ Najohfi mndarehfi toht, nhai tum niyak marnya-hato rpat toh hakuruhatm. Wommpno nnakfonefm o finji nanefm, nhai tfit yi rhuhato nd hutteft o tamoh neft nnakfo dbruf nuhas inji naruhatmm. Nhai. Womroh mrokfom tfit wommn rroh mrokfom kanjo myakni hakuruhamm rom kuny kuny rim harhuta mharhuta hakurahmm. Tamoh tamoh mrokfompno yima yuhum be kahm kanjo bmbri wakur sinyak hakurahmm. Wom baryutham nhombra hakurahm. Dborioh nefm nayet yimam womm be hti srthu hakurahmm. ⁴ Tum yima-tehfim nahndhna nahndhna hakurahm. Tamoh tamoh nefm nhai wom toh dukaruhatm. Mirahm tamoh nefm ananom, be nafurakni hakurahmm. Yufa yura htaneft, turoh yufam be yura yura hta hakurahmm. Bro Nkifrar htirahmr nnarihat kanjo. Tfit ndar bbinysofthu nefmn mwofnni hakurahm. ⁵ Ndar nom hikwa Bro Nkifrarhu mro-kfot, tngrpaye frnhek hakurahmt. Yima yuhum rom nndo rhu hakurahmm. Ndhitet ndhtet nefm nayet yimam ni Timoti htitanm, ni mirahn brbo yihato kfo hta mrokfom ahiyanm.

⁶ Wom metm turoh kunym rhuhato tum nayuk fasoh nefroh krho yima rifhumpno rhuhato tafi dborioh yima yuhu yak duha rhu hasetm, rom yitamn rroh mrokfom rim kfo brur bobrur nhehwatmm, to be rroh dohrn mikmbre twanhonitm. ⁷ Ndhitet metm be womroh nfri nfri mrokfom mhik furaknitam, be nhai yakkfot Bro Nkifrarhu tu yafothet mrokfot. ⁸ Bingot Janes Jambresrof to inji namofm Mosesr kfoyuk mrokfom. Rof buha mtohhato tfit rofn kfo wok bawokmofm. Nd giaman tisam to inji newumt Bro Nkifrarhu tu yafothet mrokfot. Nd yimam nhai tu dborioh yima yuhur rhukahrm. Fasoh yima yuhu bebrpno yorhwamn nhai Bro Nkifrarhu tu yafothet mrokfot yakitohkahmt. ⁹ Yimam afo mhikaknirahmm nd giaman tisam. Kto nd rroh mmo nmbuhat mhti dukaruhamtn myafho-nirahmm. Janes Jambresrof mhti dukahato myafhonimo kanjo inji mhti dukahato yafhorahmm.

Timotir Bro Nkifrarhu mrokfot yakitoh kihkfot

¹⁰⁻¹¹ To ni Timotin, ni bi nanpno toh hnehato na kfo hta nuhasyuk mrokfom bi fakmonm. Nanhu yau nmbuham, yo nanhu riduka aduka yima yuhur bi fakmonr. Yo Bro Nkifrar hikhato rorpno frtkafhato wom Kristenmpno rpat tohhato nayak marnyamoahat, ndm hti bugamonm. Na Antiok, Aikoniam, Listra nd nd kmim toh hnehato yimam yak bebmoahat htimona. Yo nd na titamoa yonmari yonmari krhopam ni hti buga bobugamonm. To finji htimona? Yakrmehato hingerneft mfak htanimoyant? Nhai. Na tohhato mrokfot kfo pthamoant. Nd yimam hemoa krhopam, tu Bro Nkifrar toh rafohato fak thumourm. ¹² Yimam Kraiss Jisarspno frtkafhato Bro Nkifrarhu nefm hikneft, yak bebyuk yimam nierahm. Ndt tu kfo mif kfoyet. ¹³ Barkopfam nd yima bebmi giaman tisam

* **3:8:** Nd Janes Jambresrof, Judam kfo tndh memoum, Mosesr tohmo yiha to nd hus yimafn Ijifthu kingrhu kiret nyinget yimaf tohmof. For bi sngm to rofn harhumoufm.

afo Satanrn frnhehefiwatrm fasoh yuhat kitm. Tfit rom nd fasoh yihotat tohtahato womm riteh nhirekwomm.

¹⁴ To ni Timotin, ni nd Bro Nkifra-rhu yafothet mrokfot kfo hta nuhas bonuhasmo yimanom bi htimonnom. Nom tamohtet yimanomn o met-nomn kfo hta mrokfom hemonom, bi htimonnom. Nd nom kfo hta nuhasmo mrokfo yuhatn watoh hiktwa. ¹⁵ Ni bi wanurtanihato bi yau tone fnahetnn kfo yirmoh mrokfom bi rihiyakmomn. Nd kfo yirmoh mrokfomn dukefm hiyaf hanyruhatmn Krai Jisars hikrahn. Krai Jisars hikruhann Bro Nkifrar yakrahn. ¹⁶ Nd Bro Nkifrarhu mrokfot tu Bro Nkifrarhu Yafothat kfomot, nd mrokfot mfnahmot. Nd mfnahmo mrokfot nhai be mfnah furarmot. Nhai. Nd mrokfom Bro Nkifrarhu hik yuharoh kfo hta nuhasaf hanyuk mrokfoym, yo wiyauyau nmbuham faso faso rine wunyeneft, nd mrokfotn tfit yak hta marnyarah-tnom. Yo dborioh toh yuham nd mro-kfotn yak nuhasrahtnom. ¹⁷ Ndnnetn nom, Bro Nkifrarpo tohwa yimanom, nd mrokfotn toh marnya yuham yak nuhaswatnom toh marnyewanomn Bro Nkifrar hti yindhorwa nefm kakitoh marnyewunomm.

4

Timotir kfo pthakfot Bro Nkifrarhu mrokfot

¹ Krai Jisars yawihneruharn king tohhato ndar bbinysof thofm yakitohrahm. Ndnnetn Bro Nkifrar noheh yimami yima nfri nyinget yimaroh kotkfot yakitohruha yima Krai Jisars, nd hus yimafhu nyingam-pno na kfo mifwann. ² Bro Nkifrarhu mrokfot wakfo ptha hanyswant. Dborioh yihar o yiha bebr, mrokfot kfo pthakfot. Yimam tamoh nefm newum kfo nyinga fnahnihato tfit hifa yima yuhurpno tfit kfo yirmoh mro-kfom hekfot. ³ Kto, nd Kristenroh toh yuharoh kfo yirmoh mrokfom nhai wom tfit wanyruhatmm. Myafhonirahmm. Roh yimbhindangm tfit tohetohrahm mrokfo fura bofuraroh wany yakitoh-neftn. Nd mrokforoh wanyneftpno, ndhtet mrokfom haruhet tisam yak bugarahmt. Yak bugahato rom pthayuk mrokfomn roh yimbhindangm tohetohrahmm mrokfo wanyneft. ⁴ Nd Bro Nkifrarhu tu yafothet mrokfot myafhonirahmt. Myafhonihato tfit nd rom wanyuk nkifra tndh mrokfo yuhamn hikrahm. ⁵ To ni Timotin, tu dborioh duka yima yuhurpno tohhato ninhu toh nmbuham yak hta bohta marnyahato tohkfot. Tamoh tamoh krhopam niewum ni tohhato titakfot. Hingrneft yafho thu duha. Hingrna yakitoh hanykfot. Ni tu Bro Nkifrarhu hingrna yima mifn tohhato nd Bro Nkifrarhu gutniuskfot kfo pthakfot.

Porr wuroh noh yibonneftpno dkfomo mrokfom

⁶ Nane nhai wom tohrhota. Na bi noh yibonwa. Nanhu kkut yohniraht Bro Nkifrar wain bumam ofakfot yahuka kanjo. Asot bi nanhu tfkhathu htanyhato yinyeft. ⁷ Nd na tonemo resiskfot bi tone hnamoyantn bi makkfot myakmoyantn bi nanhu rim rhu wita yihayer. Bro Nkifrarhu duka yima yuhurpar toh hnamoya. Nhai marimoya finji naruha. ⁸ Nanhu yima rifhur nhai wom wusswenetr htikahr Bro Nkifrar. Be hti wuthewurr. Be praiskfothu yaknefrpayet bi. Yimam resishato praiskfot yekwa kanjo nmoh Nungothet Jisars nd praiskfot hirahra. Turn kot yakitohruha yiha nd praiskfot hirahra. To nhaf nhai be nanrpaya nd praiskfot yakrhota. Nhai. Jisarsru nia yihar rhu garihato rhu duka darwon hasiwa yimampno rpat nd praiskfot yak hanyrahnom.

Porr kfo hta mrokfom hemorr Timotir

⁹ Wom fitoh yihotamn afo bmbri nanpno wanietwa. ¹⁰ Demasr bi frtrohmora. Ndar bbinysofthu dukefr yakmotrr taun Tesalonaikako bi yimor. Kresensr, ror bi Galesia profinsko bi yimor. Taitusr, ror nhaf Dalmesia distrikko bi yimor. ¹¹ Lukrpar asha nanpno tohwor. Ndnnett ni nianeft, Makr wayaknetwa. Nahu hingrnefm rorn kakitohnho hakutra. ¹² Tikikusr ror bi kfo tkrurafmotanr Efesusko yimor.

¹³ Yo ni niewane, taun Troasn nanhu yuke sakethat Karpusrhu kunysn htanymoyant. Htikahnt wayaknahitwona. Yo bukm rpat wayaknetwanm. Nd sifsif thaye hingrnet bukm mirahn ammo mifa yaknaneft. Nd bukmn bro dukeft arhutwat.

¹⁴ Brase hingrnawa wuskam hingrnawa yima Aleksander, wom fasoh neft namotra nanhu yima yuhur nhai marnyakahra. Nhai mrokfom. Ror namo neft kto Nungothet Jisasr htirahr. ¹⁵ Timoti, ni mirahn nd yimar ka wonfoher. Nom pthiwa mrokfom to fitoh fitoh yimamn kfo wok bawokwamm? To nd yima yimam.

¹⁶ Na tohwonmo barkof kotkfot nhai wom fitoh yimar nanhu kotkfot tohnhormora. Fakrme troh bugamoma. Bro Nkifrar kanga mirahr nd yimam finji anayanm. ¹⁷ Jisas Kraistrn toh tkafmora na nd kotkfot tohmohat. Rorn bbuka rifhur hnamourr. Nd bbuka rifhur hiyaf hanymoatra na tohato Bro Nkifrarhu mrokfot kfo pthamoyant. Kfo pthamotant nd Romr tohyuk yima tangim wanyommt. Ka Jisas Kraistr atoh tkaf duha yira, ka bi laionroh yatimn yihom kfe bdgrmoya. ¹⁸ Jisas Kraistr na inji toh tkafmo kanjo na tamoh krhopam yakneft, na toh raforahra. Na be rorhu tirmn rhu hanyhato be tfit ror tohukatohwa kmi hefenr rihawitarahra. Ndnnetnomn nom be rorhu yufarpat yiha yiha kfo yuta yindhohr nohnikfot. To be inji.

¹⁹ Nanhu kfo yindhorkfot Prisila Akwila sawohfi yo Onesiforusrhu yon tuhanm, rompno wakfohitwona. ²⁰ Erastusr yuhre taun Korinko afo tohwor. Trofimusre dbohnetrn taun Miletus htanymoyanr. ²¹ Bmbri wom fitoh yuhamn bi wanietwa bi ndar yihamn. Awi knga hatohrahn to finji nieruhanm bro gonng wormrpnno sinyayuk wifor bum? Yubulusr, Pundensr, Linusr, Klodiat, yo asha tohwa wom Kristenm niko dukahato kfo yindhorkfot htefiwumt nikompno.

²² Bro Nkifrar atoh natwihtwart ninhu yafothat yo rorhu yuhuwafeft be ninn arhu hanyswat.

Taitusrhu gontwat Porr dwandfakhato htafmot Barkof kfo nuhas mrokfom

Taitusr mirahko ka tu Judayer. Nhai. Ror nndo wom yima tangi shof furar Jisasr rihikakhato rorn Porrhu aposer hingrneft kakitohnhomourr. Porrpno aposer hingrneft rpat hingrna hanymofn marombt yorhwa wom kmi yumbt, kutewumt Krit, ka ndha htanimotrr ndha toh hasomor. Taitusr ndha toh hasohato ndharhof sios hingrneft rorn fakitoh hasomort.

Ndar gontwathu barkof mrokfom Porr dwandfamom, ndharhof sioshu tohak yimaroh nefm kfo nuhasmorr Taitusr. Kfo memorr, Kritroh nefm mirahn ka be dboriohem. Ndnctn ndharhof yimam sioshu tohak yimam yak htaneft, afo yukatoh marnyahato, bi tu dborioh nefmn bi kakitoh trpaknitwome ee btn sioshu tohak yimam htakfot. Nd tohak yimaroh nefm inji kfo pthanimorr ee tfit tabou bugayet metn yindarim yo damiag yimam yo slefm, ndhtet ndhtet yimaroh mrokfom kfo nuhasmorr.

Wuroh mrokfomne tuhan yindariroh toh yuham kfomorr. Kfo memorr, tuhan yindarim mrokfom hekfot. Tum nayak marnyahato rpat toh marnyakfot. Mirahm tum nakfo hutt nakfo nna inji ananom. Ndm wuroh mrokfom Porr ndar gontwat htamorm.

Krit tohwa Kristenm Taitusr tohhato kfo bmta mrokfom hekfot yo rroh nefm yak susnakfot

(Sapta 1–3)

¹ Na Pora, nann ndar gontwat wandfiwann ni Taitusn. Na Bro Nkifrar kfo htamo hingrna yimaya. Nann hingrnahukanr Jisas Kraistrhu aposer hingrneft. Bro Nkifrar nann yakhato kfo tkrurafmor tur bi yak htamo yimampno yihato kfo nuhas marnya bomarnyakfot tu Jisas Kraistrhu mrokfothu hik yuhat. ² Rom wany hik marnyahato Bro Nkifrar yakitoh kihruhamn, toh gari yukatoh hasorahm Bro Nkifrar hiruha dborioh rhu nmbuhathu yak yihar. Bingot Bro Nkifrar tafi ndar bbinysot hingrna duha, nd dborioh rhu nmbuhathu yakneft bi kfo htamort. Bro Nkifrar nhai kfo furakahr. Nd mrokfot kfo mifmort. ³ Nd mrokfot rhumoat, kto tur duka htayuk yiharn nd mrokfot mfrpskenamot. Wom yimam kasinya-motrm romn nd mrokfot kfo ptha ntremotmt kmi kmi wanyommt. Bro Nkifrar, nom nrfa hbhakyuk yimar kfo tkrurafmor, rorn na yakhato rorhu mrokfot nanhu tirtn htamort. Nann kfo ptha htaswant.

⁴ Taituse, Bro Nkifrarhu mrokfot no hikwa yuhatn ni nanhu yone. Bro Nkifrar, nmoh Yifemr, yo Jisas Kraistr, nom nrfa hbhakmo yimar, rofn ninhu rhu nmbuhat ayak marnyahikahtfn ninhu yima yuhur mirhurahrn.

Elda hingrneft yakitohyuk yimam

⁵ Ni Krit na toh troh tanyomohat, memoya, “Ninn afo ndha tohhato, ndharhof sios hingrnefm yak hta bohta marnyarahn. Ndarhof hingrnefm nhai yi marnyakahm. Ninn yak hta marnyakahm, ee eldam wahta hanyswanm sioskfot ruhet taunm.” Na kfomo mrokfo yuhat wahiktwa.

⁶ Wom yimar elda hingrneft yak htaruhanre, mrokfo hatoh hna duha yimar yo rpa tuhanet yimar yo rorhu yonm Bro Nkifrar hikhato nhai yifammaroh

mrokfom mhanyjbornani-hato turoh fijo yau htfaskahm, tor nd yimarn nd hingerneft yak htakfot. ⁷ Yimar, elda hingerneft yakyukr, nhai wom mrokfom ror hatohkfot. Yo nhai be rorrparn, yimam wanyhato hikkfot. Yo nhai kahm kanjo tamoh mrokfom be wata tngarakkfot. Yo nhai nd yimar bupam ye mmokfot, o nambur fura bofurakfot o be mfro maru dukefr rhuhatu marut hmarsi yakt yakkfot. ⁸ Nd yimar tu dborioh yimar tohkfot. Yo nd yimar wommpno ptha wifor bowiforkfot yo yima he wifor bowiforkfot. Nd yimar dborioh duka tungunefmpno wiyauyaukfot yo hifa rhu marnyakfot. Yo Bro Nkifrarhu ruheft kanjo nd yimar rhukfot ⁹ Nd yimar ndar nom pthiwa Jisas Krairshu yafothet mrokfot ror yakitoh kihkfot. Ror nd mrokfot yakitohhato sioshu kfo yirmoh mrokfom rorn womm kfo ptha nuhaskfot. Yimam sioshu kfo yirmoh mrokfom yak wuna bowuna-neft, rorn tohhato kfo ptha yibnarkfot.

Krithu Kristenroh toheft

¹⁰ Tu dborioh yimamn Krithu siosroh elda hingernefm yak hanykfot. Ndt nhai be sfno inji kfokaha. Na htitant wom Kristenm nhai tu Bro Nkifrarhu mrokfot kfiwa yuhat hikkahm. Rom tfit kfo kekuthato rroh yafotha duha yafotha duha mrokfom kfo pthiwatmm Krit thofm tfit rroh yuhatn hikwom. To nhai wom frohmn ndhtet nefm nakahm. To nd tuha Krit tohwa Juda Kristenm, tu nkifra tha pukeft yakitohwa kmim, romn nd nefm newum. ¹¹ Ndnnetn nini, yo nd yak hta hanyuk nfri eldam, niko rpat tohhato nd Juda Kristenm kfo rafokfot. Rom nhai mrokfom tfit uhiau hiyau-kfot. Romn Krithu Kristenm fasoh fipa duha fipa duha mrokfom yahukatmm Bro Nkifrarhu mrokfot nhai mhikakni marnyakahmt. Rom nd neft niwohat be yuwi maruha dukefrn yuwi kangm, “Inji ahingrnakahtnom maruham hirahmnom.” ¹² Bingot tuha Krit tohyuk profetr kfo ptha memor, “Krit thofm tu mfro kfo fura bofura hanyetem. Nunga bndhorm kanjo nambur fura bofurayetem. Yemrot mfro yewamn yonmari marm hwe fura bofura hasiwum.” ¹³ Ndt tu kfo mif kfoyet. Ndnnetn ni mirahn nyingarpaye ayukatohanm. Tohhato wakfokahtnm nd Judam yakitohwa tndh furam ayafhotwamm. Yafho-kahmm tfit tu Bro Nkifrarhu mrokfot kfiwa yuhat hikrahm. ¹⁴ Kristenm mirahm nd Judaroh tndh fura bofuram ahiknom, yo Bro Nkifrar mong trohet yimaroh kfo yirmoh mrokfom ahik-nom. Ayafho miftwamm.

¹⁵ Yimam Bro Nkifrarpmo bi rim tohniyetm, rroh yima yuhum bi wuthamn tamoh tamoh hnaru yeshrim be ke fura bofurewumm. Yimam fasoh nefm nefm tohhato tafi Bro Nkifrarpmo rim tohnihatu Krair rroh yima yuhum yak wus bowus duham, nd yimam kakrmitm tamoh tamoh yeshrim ye fura bofuraneft. Yo tamoh tamoh nefm nhai mhtiyak hany mikahm art fasoh nefet o art dborioh nefet. Nhai inji mhtiyak hanykahm. Tamoh tamoh nefm rom be na fura bofurewum. Nhai yimtna hanykahm. ¹⁶ Ndnhtet yimam tngrpm kfiwum Bro Nkifrarhu hikneft. To tfit rom niwa fasoh nefm nefm Bro Nkifrar hik duha yimaroh nefm newum. Ndt tu be fasoh nefm newum. Rom inji newohat Bro Nkifrar nhai hti yindhorkahm. Ndm tu be mfro hanyjbornayet yimayem. Ndnnetn ndhtet yimam nhai wom dborioh nefm nakahm.

2

Bi tabou bugayet yimam, Bro Nkifrarhu yima yuhur hikkfot

¹ To ni, ni met yindarim sioshu tu kfo yirmoh mrokfom wahi-twanm. Tamoh tamoh nefm nanefst, tu Bro Nkifrarhu mrokfot kfiwa mrokfom yuhatn tamoh nefm nakfot. ² Yo bro tabou bugayet yimam mrokfom wahitwanm. Roh yima yuhumi rroh wiyauyau nmbuham tu duka hik marnyahato dborioh dukefmpno wiyauyaukfof. Rom Bro Nkifrarhu tu yafothet mrokfot yakitohhato tohkfof. Yo wommpno nayak marnyahato rpat tohkfof. Yo rom toh bmtahato krhopam titakfot.

³ Bro tabou bugayet metm rom nhaf mrokfom wahitwanm. Roh rhu nmbuham nhaf Bro Nkifrarhu dukef yuhatn rhu hikkfot. Mirahm tihtwom akecutnom. Mirahm yihof href wain bupam yehato akfo mmo hasonom. Rom rhu marnyahato Bro Nkifrar hiket met tmahm yakhato kfo yirmoh mrokfom hekfot. ⁴ Kfo yirmoh mro-kfom bi hayetmn kto rametn rhuhato yonetm rhuneft, ramemrom yuhur-hato yak marnyarahmm yo yonm inji buga. ⁵ Yo rroh rhu nmbuham dukefmpno rhu hik marnyarahuamn, rroh yima yuhum wutham rhurahmm. Wutha yima yuhumpno rhuhato rroh kuny knifarah hingr nefm yakitoh marnyarahmm. Tamoh tamoh mrokfom rroh ramemrom kfoyukm, rom be wany yakiohato hikrahmm. Inji inji narahm, nhai wom yimam Bro Nkifrarhu mrokfot kfo bebruhatmt.

Taitusrn dborioh dborioh nefm nahato wom yima damiagm hikrahm

⁶ Damiag Kristenm nhaf inji. Kfo yirmoh mrokfom hihato rroh toh nmbuham dukefmpo toh hikrahm. ⁷ Ni, ni tu dborioh nefm nakfot. Wom damiag yimam ninhu toheft htiruhamn toh hikrahm. Wom kfo yirmoh mro-kfom damiag Kristenm hiruhamne, tu hifa dborioh yima yuhumpno mro-kfom kfo hekfot. Mrokfom kfo ptha mmbrafiny duha. Mrokfom kfo ptha yembindtkfot. ⁸ Sios yakitohwa kfo yirmoh mrokfom kfo nuhas marnya bomarnyakfot. Inji kfo nuhas marnya bomarnyarahmm, be nhai mrokfom wany bebhato wom tng bebm turuhatm. Mirahm wom tng bebm atunom, tfit tum yimtnarahm.

Slefm hik marnyakfot turoh tohak yimaroh mrokfom

⁹ Kristen slefm mrokfom wahitwanm. Wom yimampno slefm tohwom, to be turoh tohak yimaroh yinhimn hingrna hafknikfot. Tohak yimaroh mrokfom kfo wok duha. Be hingrna hik marnyahato tohak yimam hifa hti yindhorrahmm. ¹⁰ Tamoh tamohm tohak yimam htewumm, yak rikohe duha. Tamoh tamohm rom htineft, tfit romn yak hta kars marnyahekfot. Rom inji hti yindhor-hato kto tamoh tamohm rroh tirmn htaneft, nhai duka hanyruhatm. Kristen slefm inji toh marnyanefst, riruh aruhyukm inji htiruhamn kfo mirahm, nd nom tfit yakmiyakmo Nkifrarhu yirmoh mrokfot tu fipet mrokfoyet.

Bro Nkifrar kangr; tuhan yindarim ayakkahanm tukanpno yarim toh bugam

¹¹ Ndar bbinysoft tohyuk yimaroh tfit Bro Nkifrarmpno niayuk yihotat tu Bro Nkifran tfit fak nukakmort. Tu Bro Nkifrarhu yuhuwaf nmbuhatn nd yihotat inji fak nukakmort. ¹² Bro Nkifrar yuhuwafhato tur hti bebwa nefroh myafho thuni yuham, yo ndar bbinysoftu fasoh riduka aduka yima yuhuroh yafho thu yuham kfo nuhas bonuhasmornom. Nom ndar

bbinysoft tohneft nom dukefmpno tohkfot. Tu Bro Nkifrar tohwa toheft toh hikkfot. ¹³ Nmoh rhu nmbuham inji yak hta bohta marnya htatahato rhu yukatoh hasorahnom, Jisas Kraistr tafont bro nuka nanyjareftpno yura moun yuhathatoh hawihna thombat. Jisas Kraistr nom toh hbha rafomo bro hta nngrajohet Nkifraye. ¹⁴ Bi Kraistrn nmoh fasoh nefm suh nanyormorm. Bi rorn suh nanyormotr yima yuhum wuthanimom. Be bi tu Bro Nkifrarhu yon bugayenom. To be ariham be dborioh nefrpam nakfot.

¹⁵ Yiha yiha ni ndar mrokfot yakhato kfo pthahekfot. Wakfo ptha kasinyakahtnm hikrahmt. Nd mrokfo hanyjbornet yimam kfo ptha nnhukahtnm yafho thurahmm rom yakitohwa nefm. Rihanyak duha. Rihanyakrahnm, yahot dbohtarahmn.

3

Kritt tohyuk Kristenm dborioh dborioh nmbuham nakfot

¹⁻² Wakfotwanm Krit tohwa Kristenm. Bro tohak gafman yimam, gafman hingrnefm yakitohwam, Krit tohyuk Kristenm nd gafman yimaroh yinhimm tohhato rom kfoyuk mrokfom wany yakiohato hikkfot. Yo womt wakfotwanm. Kristenm mirahm womm faso faso akfo rindho borindho-nomm. Yo mirahm wommpno nakfo hutt nakfo nna inji ananom. Nyinga-tikm yifatih marnyahato wommpno ptha wifor bowiforhato dborioh dborioh nefm nakfot.

³ Ni bi tunn bi htियete. Nom tafi dborioh dukefm yak duha toh hnamohat, ndhtet toheft toh hnamonomt. Satanr buha riyak nhirtamotrnom nhai tu Bro Nkifrarhu dukef yuhathn toh hikrmonom. Nhai. Nd tunnmohtamoh tamoh nefroh yima yuhu sinya fura bofuranefti yo womroh wuskar o tamohr hti yuhurhato duka marinyeft, nd nefmn brotamomnom. Wom yimampno nhai nayak nanyamahato rpat tohrmoanom. Nhai. Tawo tawo nahti sr nahti srmounom.

⁴ Nom nrfa hbhakyuk yimar kfo tkrurafmo Bro Nkifrar, nmoh fasoh fasoh nefm hti hasohato nd yuhuwafeft tfit niamotr. Nd yuhuwafeft niamottr, ⁵ to be nd yuhuwafeftpno nom Bro Nkifrar pno tfit yihotetnom rhumonom. Nhai nom nayuk dborioh nefm htihato nd yihotat yak nukakmorm. Nhai. Ndt rot be turhu hti yuhuwaf nmbuhatn nd yihotat fak nukakmorm. Nd nom hatoh hasoyuk fasoh fasoh nefm yonm asomif wanurtahato yukwa kanjo, inji fuk marnya bomarnya-mornom. Inji yuk marnyanihato turhu Yafothat yakhato rithu hmbremor-nom. Nd Yafothat yiro yimanomn riyorhwatn nfri yima rifhur mfnaah-newur. ⁶ Bro Nkifrar kfo tkrurafmo yima Jisas Kraistr, nom nrfa hbhakmo yimar, rorn kfomotr nd Yafothat yawihnehato mithu nawoh hany-motnom. ⁷ Bro Nkifrar be turhu hti yuhuwaf nmbuhatn Yafothat rithu hmbrehato nmoh yima yuhum fak wus bowusmornom. Yak wus bowushato wuthamom. Yima yuhum wuthamotm nd rhu nkifraniruha dborioh rhu nmbuhat, nom rhu gari hasiwat, yakrahnomt. ⁸ Nda mrokfom, kfo mifwanm. Nd mrokfomn na kanga wakfo ptha brokawm. Wakfo ptha brokahtnm, Bro Nkifrar yakitohet yimam wanyruhamn dborioh dborioh nefm hikhatoh rroh ruheft rhu marnya-rahm. ⁹ Wom yimam tum ruhato nkifram toh hawihnamo yuharoh mrokfompno mrokfom nateh natehhato nakfo yiriti nakfo yiriti inji newum, o Mosesrhu boririfhutpno nakfo hamuh nakfo hamuhwom, ni mirahn rim tohhato awany yakitohanm. Yimam ndhtet mrokfom ruhato

wany yakitohneft nhai dborioh dukefm yakhato dborioh yima yuhum yuwa muhkahm. Nhai.

¹⁰ Yimam mrokfom inji nateh natehhato sioskfot kak nanyorwomt, hus kfo rafo mrokfof hekfot. Hus yiha kfotihato nhai yima mrokfo wanykahm, to be mrokfo kfo duha nd yimam miyafhonikfot. ¹¹ Yimam hti hikkfot, mrokfom nateh natehhato sioskfot kak nanyorwomt, nd yimam, fasoh fasoh nefm yorhwatmm, rroh nefm tafont korhm.

Porr dkfo pthamo wuroh kfo nuhas mrokfom

¹² Bro gonng wormr tohruha yihame nane ka Nikopolis yihato ndha tohruha. Ndha tohetann wamhtiyafotwona. Ninhu tkitt myak hasoyuk yimare kane Artemasrn o Tikikusr nierahr. Bi frohrn niahato tkitt myak hasiwurte, ni wom fitoh yihotam htita nd yuhamn wanietwa. ¹³ Apolosri thfa mntwat yakitohet yima Senasr kitwofe, yihotat yi hanyuk yeshriyenm o tamohm wahiyaf hanyswanf.*

¹⁴ Nmoh Kristenm Krit tohyukm, Kristenroh nefm womm yak nuhas-kfot. Rom yimaroh htihato wuska hanyeft, rom nd nefm bi riyakitohak-kfot. Nd yima he wiforneft bi yakitohetmn, tfit nd wuska duha yimam htineft nhai hti marsisaruhatmm. Wuskam tamohm be yakhato he fura bofurarahmm.

¹⁵ Nanhu mrokfom to be injirpa. Wurohme ndar nanpno nia tohwa yimam niko dukahato kfo yindhoh mrokfom htefiwumm. Yo Jisahr hikhato nom dukewa yimamn nmoh wom kfo yindhoh mrokfom wakfohitwako. Bro Nkifrar atohnhotwarko.

* **3:13:** Nd yima Senasr kotkfom yakitohmoa loya hingrneft tohmour.

Filemonrhu gontwat Porr dwandfakhato htamot Barkof kfo nuhas mrokfom

Ndar gontwat Filemonrhu yufatpno yimo gontwayet. Filemonr Kolosithu Kristen yimayer. Filemonr tohmohat wom slefr kakitohmour. Nd yimarhu yufat, Onesimusr. Wom yiha nd yima Onesimusr, turhu tohak yimarpno wom nefm na tanyhato Romko fakrmenimor. Romko yakrmanyihato ndko tohmor.

Wom yiha Porr ndha Romtn kalabus tohetrn rorpno mfnahmor. Rorpno mfnahhato kfo ptha dbrufmorm ror na tanyuk nefm. Porr wanyhato Bro Nkifrapno kfo bruttnamotrr be nd duka krho hasomo yima yuhur wuthanimorr. Porr Onesimusrhu rhu nmbuhat yak marnyanimorrn, tfit dukamour kfo tkrurafhato turhu tohak yimarpno tfit yinyeft. Onesimusr fanho hanymour tfit turhu tohak yima Filemonrpn yinyeft. Rroh neft inji namoum: wom yimar womrhu slef hingrna yimar tohhato wom nefm na tanyhato yakrmanyihato tfit bi fekmr, nd slef yimar nhai rhurmoar. Wasmounr.

Nd dukefm Onesimusr rhumoatmr, Porr kalabus tohetrn be gontwarpat wandfahato kfo nuhas bonuhasmorr Onesimusr rorpno yimo nmbuhat. Yo kfo nuhas memorr, “Na Porann kfo tkrurefiwotanr niewur. Ni tamoh krhopam nd yimarpno korhwomn, mirahn rorn nd krhopam ahtayanm. Nann rorhu krhopam wahtotwa. Nann titaruhanm.” Yo kfo memorr, “Nd yimar afo be slef hingrna yimar kanjo hingrnamor. Arihat htirahrn ninhu hingnefm rorn yakno hakurahrn.” Nd nd mrokfom gontwatn hta buganimormn, nd gontwat tu Onesimusr hemotr turn hanyhato Filemonr mhemor.

Filemonrhu slefr wom nefm na tanyhato yagrmanyihato Romko nd ror nayuk neft myak marnyakhato Porr kfo tkrurafmotrr tu tohak yimarpno tfit yimor.

¹ Na Pora, nann ndar gontwat wandfakhato htefiwant. Krai Jisasrhu gutnius mrokfothu pthaneftpno kalabus htamoma. Nompno rpat Jisasr hikwa yima Timotir rpat rhuhato ndar gontwat wandfakhato htefiwunont ni Filemonnhu yufatpno. Ni tu nmoh yimate yo nom hingrnawa hingrneft tohnuhiwa yimaye. ² Yo nhai mmokahnont nnoh mndarem Apiat yo Arkipusr. Arkipusrn soldiam kanjo tohhato yahrt tohnuhiwurnom. Yo ni Filemonnhu kunys rifiny hakuta Kristenm duka bugewunonm. Kfo bugewunonko.

³ Nmoh Bro Yifemri Nungohtet Jisas Krai ayuhuwafkahfko, yima yuhum ayak marnya bomarnyafko.

Porr kfo yindhormorm Filemonrhu dborioh nefm

⁴⁻⁵ Wanyakmoya ni Nungohtet Jisasrhu dukefrpar rhuhato Bro Nkifrar hiket yimam yakitohwa yuhat. Na inji wanyakhato Bro Nkifrar kfo bruttna yindhorwanr. ⁶ Kfo bruttna kanga, Krai yakitoh hanykahnn rpat tohrahnom. Nompno nia rpat tohhato Krai rpn frtkafet yimanom Krai

yak marnyiwa yuhat tunn hti hikrahn. ⁷ O, yinowe, Bro Nkifrar hiket met yindarim ninn yakitohwatnm, rroh yima yuhenn myindhornitmm. Nanhu yima yuhur ndnatpno yindhorhato miyorhwor.

Filemonr tfit Onesimusr yakmiyakkfot

⁸ Na ndar yimaya, na Jisasrhu hingrna yimaya. Na to kforfoyann tamoh tamohroh finji naneft. To nhai. Na nhai tamohm kforhotann. ⁹ Htitann Bro Nkifrar hiket yimam ninn kaki-tohwonn. Na inji htitwoyann na nhai wom tamohm kfo tkrurrhotann. Nhai. Na be kfo ttiwonkfot kfo ttiwonruhann. Na Pora, na bi bro yima kasha, nann Jisas Krairhu mrokkfot hatone htfaswant. Na kalabus toh-wohat to nd nmbuhatpno kalabus htamoma. Nann be wom kfo ttiwon mrokkfot kfo ttiwonwann. ¹⁰ Nanhu yon Onesimusrhu yakmiyak nmbuhat be kfo ttiwonwann. Na kalabus toh hasetann Onesimusr mfnahmor. Nanpno mfnahhato nd yiharn Jisasrhu tirmn hتامoyanr. Bi nanhu yoner. ¹¹ Ror ninpno tohmohat nhai tu hingrnanho marnyarmorn. Nhai. Hingrna hhrekemor. Tfit arihat awi, ni hingrnanho yo na hingrnanho inji narahr.

¹² Bi kfo tkrurefiwotanr bi tor bi niewur bi tfit tunpno. Nanhu yima yuhur rorn korhr. ¹³ Nd gutnius mrokkfothu pthaneftpno kalabus hتامoma. Na kalabus tohwotaf afo rorn ninhu tkitt yakhato rorn niahato mhti duka tany hanyrfoura. ¹⁴ To nhai. Nhai be nanhu fijo ror yakitoh-kfot. Ni tu nd yimar yakitohwa tikat yimanhu kfo yakio mrokkfot awanyant, ee btn yakitohrfoyanr. Kto be tunn kangn, ania tohnhora, na nhai mro-kfom. ¹⁵ Nd Onesimusr yakrmemohat rot fakrmenamor. Yakrmayehato dfik yiham firtrohmore. Ndt rot ka Bro Nkifrar Onesimusr tfit kfo tkrurafhato ninpno toh nkifranineftn, nd neft inji rhumot.

¹⁶ Arihat mirahn ka be slef yimar ninpno tohrah. Nhai. Mkuko slef yimar tohrah. Mkuko htirahn najoh toht tohwa kanjo tohrahfn. Na tuka htitanr rpa yimarhuno kanjo. Ndnnettann na hti yindhorwanr. Ni, to inji hti yindhorrahn. Ror nayuk nefm htirahn tu slef yimam kanjo. Yo tfit Krairhu yuhat htirahn tu najoh toht tohwa kanjo. Inji htihatoh nhai yafhoruhatnr.

¹⁷ Ndnnettann na ninhu hingrna tamnou yimaya kanjo, no rpat kaki-tohwonont Krairhu hingrneft, nd yimar tfit wayakmiyaktwanr ni na yakmiyarkfo kanjo. ¹⁸ Ror ninpno wom tamohm yak he thombat, rorhu yufat wayak thukahnt tfit nanhu yufatn wahtatwa. Nann nd ror nayuk nefm marufa htaruhanm. ¹⁹ Na pthiwa mrokkfot asot bi tukanhu tire yikt yakitohhato wandfa kanga. Na Porann Onesimusrhu nefm marufa htaruhanm. Ni to wadukaf hanyswa, ni Bro Nkifrar hikwa yuhat frohmn nd yuhat fak nuhasafmomm? Ni nd mrokkfot tawo kahukann. ²⁰ Yinowe, wawany. Jisasrhu yufatpno kfo kangann nanhu yima yuhur wuyaktwanr. No buga Krair hikwono. Ndnnettann nanhu yima yuhurn wamikmbrekahtn nanhu yima yuhur be yindhorhato marnyarah.

²¹ Awi htita, na kfiwa mrokkfom hikrahn. Ndnatn ndar gontwat wandfiwann. Yo htita, ni Onesimusr-pno naruha nefm, tu dborioh nefm narahn. ²² Wom mrokkfo nmbuhent be kfiwant. Na nda kalabus tohwotaf, nanhu bro yima yuhur duka kangr nikmoh kfo bruttna nmbuhat na kfo bruttna hasiwotaf Bro Nkifrar wany-ruharn yak hfhanaforahra. Yak hfhanafohato tfit nikompno hnerahra. Ndnnettann kanga wom hweyuk tkitt bi wayak hta hanyswakomt.

Porrhu hingrnanho yimaroh kfo yindhor mrokfom

²³ Epafraſr kfo yindhor kfot htefiwurt. Ror to Kraiſ Jiaſrhu gutniuſ mrokfothu hanyeftpno kalabuſ hta-momr. ²⁴ Yo Mak, Ariſtakuſ, Demaſ, Luſ, nd nd yimandount, nanpno hingrnewam, rom wom kfo yindhor mrokfot htefiwumt. ²⁵ Nungoſhet Jiaſ Kraiſrhu yuhuwafeft athu kaſi bugatwatko.

Hibrumpno yimo gontwat Barkof kfo nuhas mrokfom

Ndar gontwat Hibru Kristenmpno yimo gontwayet. Hibru Kristenm bok krhopam yak hatohhato memom, “Jisasr ayafhoninomr.” Ndnettn ndar gontwat rroh kfo bmtayuk mrokfom wandfakhato htafmomm. Bro Nkifrar Jisasr yakhato hingrnamo hingrneft Kraistrn Bro Nkifrarhu hingrneft kfo nuhas bonuhasmorm.

Husfirpa bro mrokfom ndar gontwat kfomom. 1) Jisasr tu Bro Nkifrarhu yon mif mifer. Jisasr ndar bbinysoft tohmohat, boknambok krhopam fakmor. Bro Nkifrar inji htihato to be rorn htamor yimaroh tamoh tamoh nefroh htihato yak marnyayuk yimar (2.10). Ror inji namotr ndnetrn profetm, mounmotm, yo Mosesr nd ndm hingrnamo hingrnefm be inji hingrnamomm. Jisasr hingrnamo hingrneftn tu tpiyet hingrneft hingrnamor. 2) Jisasr pris hingrneft fak htamor. Ror be nd hingrneftn toh nkifranirahr. 3) Judam yakitohmoa nkifra pris hingrneftu hingrna yuhat rot be inji, Jisasr hingrnamo pris hingrneftn tu tpiyet hingrneft hingrnamor. Judaroh fasoh fasoh nefm yemro tarioh mthahato kur mtha hikmoa nkifra nefm ndt be yafotha hingrneft hingrnamoum. Jisasrn tu tpiyet hingrneft hingrnamor. Tot tu yima rifhuroh yak wus bowusyuk hingrneft.

Ndar gontwat met yindariroh kfo bmta mrokfom korhmt. Ndnettn bingot tohmo Iserrroh met yindariroh kfo bmta mrokfom korhm Sapta 11. Nda gontwathu mrokfom inji kfiwum tamoh tamoh nefm o krhopam kekwoke, bmbri riyoh dbhurak duha. Jisasr yakitoh bmta kihhato tohhany tohhany wuruh nohneftno be myafhonikfot. Jisasr krhopam titahato tohmor. Ndnettn niko nd yuhat hikkfot.

Mounmotm Jisasrhu yinhitn tohwom.

(Sapta 1-2)

Bro Nkifrarhu mrokfot Jisasr dhemo

¹ Bingot Bro Nkifrar nmoh nkifram mrokfom hemoahat profetmpno pthamoatrm tfit romn kfo nuhasmoumm met yindarim. Mrokfom hemoahat bok yiham bok yuhamn pthamoum. ² Tfit ndar yiham turhu yon Jisasrn mrokfom yakhato kfo ptha nuhas hanitrom. Jisasr tu Bro Nkifrarhu yonrn, ndnettn tamoh tamoh hingrnefm tamoh tamoh wuskam rorhu tirtnt htamorm. Bro Nkifrar kfomotrn Jisasr ee Jisasr wanyhato ndar bbinysoft yorhwa tamoh tamohm hingrnamorm. ³ Bro Nkifrar yorhwa ruheft nd yonrn fak nhombramort. Jisasr htineft to mirahko ka Jisasr htitwonom, nhai, Bro Nkifrarhu ruheft htitko. Bro Nkifrarhu ruheft to bi Jisasrn fak nhombramort. Ror tu bro ptha nanyjaretrn ndar bbinysoft ror kfiwatr rorhu tng yuhatn bbinysoft rhu hik hanitwot. Ror nda bbinysofthu yimaroh fasoh nefroh yak thu yuham yak hta bohta marnya tanyhato yimor. Yihato mrhumor tu yura myorhekwa nanyjaret Bro Nkifrarhu tirmifko. Tu bro yufa yakyuk tirko mrhumor.

Bro Nkifrarhu yonrn buriwurum mounmotm

⁴ Tirmifko mrhuhato rorn bromorm mounmotm. Yo nhaft rorn tu Bro Nkifrarhu yonr rhumor. Mounmotmn tfit rorhu hingrna yimam rhumom. Tamohmpno Jisar nd bro yufat yakmor? ⁵ Yimbu yuhat inji korht. Bingot toh hnamo mounmotm nhai Bro Nkifrar womr kfo marimorr, “Ni nanhu yone.

Hrek na bi ninhu yifema.”

Sng 2.7

Yo nhaft Bro Nkifrar nhai wom mounmotr kfo marimorr, “Ni nanhu yonn rhurahn.

Nann yifemruhann.”

2 Sml 7.14

Nhai. ⁶ Bro Nkifrarhu nkati yonrpar kfo tkrurafhato ndar bbinysoft yawihna thombat mounmotm kfo mirahrm, “Nd yonrn kfo yuta hagrhakfot.” ⁷ Bro Nkifrarhu yonrhu mrokfot kfonihato tfit mounmotroht riyakhato kfo memor,

“Mounmotm rom be hingrna yimayem.

Wiforti kaht kanjo hingrnewum.

Hingrneft afo hingrnaknitamt buha tfit mnoh hmbritm.

Hingrnakni tfit buha mnoh hmbritm.

Inji hingrnewumt rroh hingrneft.”

Sng 104.4

⁸ To tawo turhu yonrn kfo memor;

“O Bro Nkifraye, ninn kingn toh nkifranirahn.

Ni tohukatohruha kmim tu hifa dborioh nefrpm yak hta bohtarahnm.

⁹ Ninhu toh nmbuhat fasoh fasoh nefm faso hti bebwonm.

Tu hifa dborioh nefrpm hti yindhorwonm.

Ndnatn tunhu yifem Bro Nkifrar hti yindhorhato kfo memorn,

‘Ninn kingn tohrah.

Kingn tohhato ndar bbiny-softhu wuskam ninn hti yukatohaf hanyruhann yima yuhar yindhorrah.

Nhai wom yimam ni yakmo rhu nmbuhat o yufat kanjo yakrmom.’ ” *Sng*

45.6-7

¹⁰ Inji kfonihato tfit wom mrokfot kfo memor,

“Bingot ni Bro Najomn kfomotn bbinysoft trhamot.

Ni tunhu tire hingrnamont mount.

¹¹ Nd mounti bbinysoft rof mibatini-ruhatf

yimanom hti hambrafrahnomf.

Ni nhai. Ni nhai hti hambraf-ruhatnomn

ni be tahi nrwin kekutrah.

¹² Ndar bbinysofthu wuskam tamoh tamohm hwe nmbia manym kanjo

hwihany hwi hanyhato mskta-hato yakrirak rihtefiwa kanjo

inji narahnf mounti bbinysoft.

Yatk wuskam riyak htefiwa kanjo inji riyak htafruhanf

tfit nfrim yakhato wondhwa kanjo inji tfit wondh hmbrirahnf nfri wuskaye.

Ninhu ruheft nhai wom yihar rhu kriyohnihato

tfit wom yihar rhu marnya inji nakahn. Nhai.

Ninhu ruheft to be inji rpahtet ruheft korhn.”

Sng 102.25-27

¹³ Bro Nkifrar nhai wom mounmotr kfo won marimorr,

“Nanhu tirmifko warhukahnn nd ni tone dbombhiwa yimam nann afo htiruhanm.

Afo htitwa. Nd yimam mirahm,

‘Finji ananomn,’ tfit nann yakrhoyanmn

ninhu yinhitn yak htaruhanm.

Tfit ninn brohato tohukatoh-rahnm.”

Sng 110.1

¹⁴Mounmotm mirahko, “Tamohe?” Rom Bro Nkifrar pno ruhato rorhu hingrneft hinger-niwayem. Fitoh yimam Bro Nkifrar kangr, “Hifa rhu nmbuhat ahiyanm,” nd yimam mounmotm yitamn thu bmtewumm.

2

Brorhu nrfa htiyak yuhat

¹ Bro Nkifrarhu Yonr be tu bro yufa mift fakmor. Ndnettn nd Yonr kfoyk mrokfot yakitoh kihkfot. Yakitoh hrufrehrahkومت to be yak frikatiyafrahkومت. ² Bingot nkifrapno mounmotm Mosesr pno yimomn kfo borsisha nuhasmomr. Nd borsisha mrokfom Mosesr yakmom tu bro borsisha mrokfom yakhato kfo nuhas-mourm. Yimam nd borsisha mrokfot hanyjbornamoahat tu Bro Nkifrar kfomo yuhatn kak tutfamourm. ³ Tfit ndar yihat nfri dfa tik yuharhu mrokfot Jisasr kfo nuhaswat yimam hik duha yinyeft, to be finji kafrohruham? Nd Bror yimam nrfa htiyekwa nmbuhat bi turn kfomotr womm wanyhato kfo nuhasmomn. Ndnettn to mirahko ka kfo furakfoyet. ⁴ Tu Bro Nkifrar thu nawohmoatrm wonk wonk nefm na bugamoumm. Bro Nkifrar yimam mthu nawohhato pthamoahat duka memour, “Inji yak nuhaskahtanm yimam htiruhamn mirahm, ‘Mrokfom tu fipet mrokfot wanuknom.’ ” Tu Bro Nkifrarhu Yafothatn rpa rpa nefm kak htamourm rpa rpa yimam.

Jisasrhu yufat tohekwt

⁵ Bro Nkifrar king toh thombat mounmotm nhai tfit hingrnefm yakitohn-hokfot. Nhai. ⁶ Bro Nkifrarhu rfa borngtn wom yimar kfo memour, “Yimanom tamohtetnomn ni Bro Nkifraye be mfro dukewannom? Nom yima furayenom. Tamohm-pno yamuka, ‘Adukayanm?’

⁷ Nom yimanom ninn hinger-na-monnom.

Be dfik yiham mounmotroh yufamn afo mfrfnahnimom.

Tfit kto nomn bro yufat hemonnom.

⁸ Nmoh yinhitn hta bugamohat wuskam, nhai wom tamoht rim tohtarmot.”

Sng 8.4-6

Tamoh tamoh shrenm nmoh yinhitn hta bugamorm. Nmoh yinhit htamohat arihat tafi nmoh yinhitn wuskam rhukahtn htikahnomm. Nhai.

⁹ Tot wom yimarhu yufat riyorhwot. Nd yimar bbinysoft tohmohat afo mounmotroh yufatpno rorhu yufat ritohtamout. Tfit arihat nohnihato rorhu yufat mfrfnahnihato tohekwt. Nd yimar Jisasr. Nd mounmotroh yufam mfrfnahnimohat duka memour, “Afo bbinysofthu yimaroh tkitt nann yakrhyantn nohruha. Rroh nohyuk tkitt nann yakrhotant Bro Nkifrar ndt htihato yuhuwafhato yakrahm.” Ndnetrn Jisasr be tu bro krhopam yakhato nohmor. Nd krhopam ror yakhato nohmom, Bro Nkifrar thu bmtamotrr ror toh bmtahato nohmor. Kto Bro Nkifrar tfit kasinyamorr. Kasinyafhato bro yufat hemorr.

¹⁰ Bro Nkifrar tor tu ndar bbinysoft yakitohwa yimar. Tur kangr, “Finji finji ayak hta bohtayant, nhai mro-kfom.” Ndnetrn duka memour, “Bbinysoftu yimam newa fasoh nefm Jisasr yiruharn rorn nd bbinysoftu yimaroh tkitt yakhato nohrar. Nohruhatr yimam ndt htiruhamn tfit nann hikrahm.” Jisasr nd krhopam yakmohat nhai nd krhopamn hta kasuhmomr. Nhai. Nd krhopam frdruf thuhato tohmor. Nd krhopam

yaknihato dfa tik yuhar htakmorr. Nd dfa tik yuhar yauwa yimam turn nyingako tohekworm. ¹¹ Froh frohm Jisasr bi fak wus bowusrm, nd yimami Jisasr bi rpa yifemetem. Jisasr kangr; ayutayanm nmemrom, nhai mrokfom. Bi rpa yifemetmn hti yindhorworm. ¹² Kfo memor;

“Bro Nkifraye, ni hingrnamo hingrneft nanhu nmemrom kfo ptha srh nuhasruhanm.

Bro rifiny swirrn yufat yutahato kfo ptha yindhorruhant.” *Aisaia 8.17*

¹³ Tfit kfo memor;

“Nanhu bro dukeft kanga nd Bro Nkifrar kfoyuk mrokfot amhikakniya.

Na afo asoya tohwa Bro Nkifrar hemo yonmpno.” *Aisaia 8.18*

Nom tamoh nefm yakneft Jisasr toh nuhaknerahrnom

¹⁴ Nd Jisasr kfo memo, nanhu nmemroyem, ndm ndar bbinyssoft tohwa yima mifthet met yindarim kfomor. Jisasrhu toh nmbuhat rom kanjo toh nhombramor. Memor, “Rom kanjo toh nhombrakahann kto nohhato nd Satanr yakitohwa noh yafothat yak thuruhant. ¹⁵ Rorn kfo yakrmitatrm yimam kakrmitwom nohneft. Noheft yakrmitatm Satanrhu fasoh dukeftn kak hikwom. Nann noh nuhasrhotanm nhai wom yakrmiruhatm nohneft.”

¹⁶ Jisasr nd krhopam yakhato nohmohat nhai mounmotm dukahato nohrmor. Nhai. Abrahamr tohmo kanjo tohet yimam dukahato nd krhopam yakhato nohmor. ¹⁷ Bro Nkifrar kfo memor; “Bbinysfthu yimam kangn hifa tkitt ayak htayanm, btn ndhtet neft afo rompno yihato rom tohwa tkitt watohnhokahnm rom krhopam yakneft ni htiruhann hti yuhuwafrahnm. Ninhu yuhuwaf nmbuhat rom hti dukaruhamn rom tamoh krhopam rhunefm ni prisroh bro tohak prisn kanjo rroh krhopam mhiruhatmn tfit ninn yakhato nann yuwa hirahn. Ni be buha tohhatto rroh fasoh nefm yak tuhafhikahtnm nanpno nierahm.” ¹⁸ Jisasr yimanom kanjo tohhatto wom yiham memour; “Bro Nkifrarhu dukeft ahika,” to nhai, mduka nhitamour. Turn wabbuka sinyahato memour; “Nd Bro Nkifrarhu dukeft ahika,” krhopam fakmour. Ndhtet nefm ror bi mhtiyafetern btn nom tamoh nefm yakneft bmbri toh nuhaknerahrnom.

Mosesrhu bro yufat Jisasrhu bro yufathu yinhitn korht.

3

(Sapta 3.1–4.13)

Jisasr yakmo yufatn be tu bro yufat fakmor; Mosesr nhai ndhtet bro yufat yakrmor

¹ Niko froh frohko Bro Nkifrar rpat yak hikwanom, waduka hanyswako. Jisasr nmoh bro prisroh bro tohak priser. Bro Nkifrar nom dukahato kfo tkrurafmorr. Nd yima Jisasrn kfiwonom yak hikneft. Rorn dukefmi htakfot. ² Bingot Mosesr Bro Nkifrarhu yon kunyr kasinyamo kanjo ror nd hingrneft yakhato Bro Nkifrarhu yon kunyr kasinyamorr. Bro Nkifrarhu kfo tkrur mrokfot yak hikhato nd yon kunyr kasinyamorr. ³ Yimar yon kunyr kasinya thoft nhai kunyr bro kfo yindhor nmbuhat yikaht. Nhai. Nd yon kunyr kasinyayuk yimarpar kfo yindhorworm. Mosesr hingrnamo hingrnefti Jisasr hingrnamo hingrneft to inji rhumof. Jisasr kasinyamo yon kunysn Mosesr be rim fkniyakmor. ⁴ Ndar kasinya hanita yon kunym rpa rpa yimam kasinyewumm. Nd rpa rpa yon kunym tu Bro Nkifrar

kfiwatr kasinyewumm. ⁵ Mosesr Bro Nkifrarhu yon kunyrhu yonmpno hifa hifa tohhato rorhu hingernefm kakitohmourm. Tamoh tamoh nefm kto rhuyukm, Bro Nkifrar rorn mthu nawohmoarn pthamourm. Ror nd hingerneftn be hingerne yima furar tohmour. ⁶ Jisasr nhai. Ror tu Bro Nkifrarhu yon mifer. Rorhu hingerneft inji korht. Fitoh yimar Bro Nkifrarhu yon kunyr mfkniyekwor, nd yimar Bro Nkifrarhu yonr rhuhato Jisasr tohukatohworr. Nom be Bro Nkifrarhu mrokfefm yakitoh kihhato nmoh yima yuhumio yindhorhato kangnom, “Bro Nkifrar ayak marnyarnom.” Inji dukarahnom be Bro Nkifrarhu yonnom rhurahnom.

Hanyjbornet yimam nhai hifa rhu nmbuhat yakruhatm

⁷ Nom Bro Nkifrarhu yon kunyet. Ndnettn rorhu Yafothat niahato inji kfiwut,

⁸ “Arihat mirahko nkifram hanyjbornamo kanjo

inji ahanyjbornanomt nd Bro Nkifrarhu nia kfoyuk tngt.

Nikmoh nkifram wesam tik furat yau soh hanymohat to inji namom.

Hanyjbornahato memom, ‘Afo htirahnom Bro Nkifrar finji naruhar.’

Tfit niko rom namo kanjo na duha.

Bro Nkifrarhu Yafothat nia pthiwutn hanyjborna duha.

⁹ Na nikmoh nkiframpno foti gunyimm rompno tohhato

fak nuhasmouanm wonk wonk nefm.

Nhai nd nefm htihato nanrpaya dukarmoam. Nhai.

Na yakmoama mongko yiho htamouma.

Mongko yiho htahato turoh duka fijo yimoum.

¹⁰ Ndnatn na namburhato kfo memoya,

‘Ndar yimam nhai na kfiwa yima yuhur yakkahmr. Nhai.

Na kfiwa yuhat mong trohhato tfit turoh dukefmm kauwom.’

¹¹ Nd nmbuhatn na namburhato kfo memoyanm,

‘Na tu be kfo mif mifwa, be nhai nanhu rhu wita tkitt nieruhatko.’” *Sng*

95.7-11

¹² Yo niko mirahko nikmoh womr fasoh yima yuhu bebr ayakkahann yafothet Bro Nkifrar among trohanr. ¹³ Yihof href yihof href tuko nnakfo

hi hanykfot nd mrokfot. Nna kfo nuhas hi hany duha rhurahko, be nda bbinysofthu nefmn rhu nhehakruhatmko, Bro Nkifrarhu mrokfom mong

trohnirahkomm. ¹⁴ Bi Bro Nkifrarhu mrokfot rifakitohekomt, to be nd mrokforpat yakitoh kih hanykfot. Yakitoh kihhany be noh nefrpatpno

myafhothunikfot. Bro Nkifrarhu mrokfot inji yakitohrahkomt be Jisasrhu yon kunys rhurahko. ¹⁵ Kfo duka mrokfot duka hanykfot.

“Arihat mirahko nkifram hanyjbornamo kanjo

inji hanyjbornanomt Bro Nkifrarhu Yafothat nia kfoyuk tngt.” *Sng*

95.7-8

¹⁶ Fitoh yimamn Bro Nkifrarhu mrokfom hanyjbornamomm? To nd Mosesr Ijift yaknihato hanymo yimamn ndhtet nefm namom. Romn Bro

Nkifrarhu tngt hanyjbornanomt. ¹⁷ Yo frohmne foti gunyimm namburmorm? To nd fasoh net yimam namburmorm. Namburhato yuhre yima

toh duha tkitt tohetmn be inji noh witamom yukuteh yiram noh dborhewa kanjo. Rroh thatipm be nd wesam tik furatn mikfe bdnimom. ¹⁸ Bro

Nkifrar frohmn kfo memor, “Kfo mif mifwa be tu nhai mif nanhu rhu wita tkitt nieruhatm?” To nd yimam rorhu mrokfom hanyjbornamom, romn inji

kfomor. ¹⁹ Tumn nhai Bro Nkifrarhu mrokfot yak hikrmomt. Ndnatn nhai yirmom Bro Nkifrarhu rhu wita tkitt.

4

Bro Nkifrar hikwa yimam rhu wita nmbuhat yakrahm

¹ Bro Nkifrar bi kfomornom rorhu rhu wita nmbuhathu yakneft. Ndnett nom duka yanohefr-pno rhukfot. Nom wofnkahnom rhu wita tkitt yihato nmoh womr Bro Nkifrar hti hambrakneft. ² Nom Bro Nkifrarhu mrokfot wanyomonmt bingot Isrerm wanyomo kindo. Rom nd Isrerm Bro Nkifrarhu mrokfot wanyomohat nhai wuthu kmbriyak-rmoamt. Be wanyhato nhai yak nhta inji narmoamt nd mrokfot. Yimam inji be wany marsisataneft Bro Nkifrarhu mrokfot ka hifa yima yuhum kekwo? Ka nhai. Bro Nkifrarhu mrokfot wuthu kmbriyakmt, awi nd mrokfot hifa rhu nmbuhat yakrfom. ³ Nom fitoh fitoh met yindarinom Bro Nkifrarhu mrokfeft wany yakiowanom, nd rhu wita nmbuhat bi Bro Nkifrar arihatn kahukrnom. Bingot Bro Nkifrar nd nmbuhat dukahato kfo memor,

“Nd hanyjbornamo nmbuhatn na namburhato kfo memoyanm,
‘Na tu be kfo mif mifwa niko be nhai nanhu rhu wita nmbuhat
yakruhatko.’” *Sng 95.11*

Bro Nkifrar kfomor rhu wita nmbuhathu hanyeft. Inji kfomohat nhai be marimor; “Romrpam hiruha nd rhu wita nmbuhat.” Nhai. Nom arihat tohwa yima buganom rpat dukahato inji kfomor. Bingot Bro Nkifrar bbinysoft hingrnamohat kfo memor; “Kto bbinysoftu met yindarim rhu wita nmbuhat hiruhanm.” ⁴ Bro Nkifrarhu rfa borngtn korht 7-yuk yiharhu mrokfot. Nd mrokfot inji kfiwut,

“Bro Nkifrar mounti bbiny-softu wuskam hingrna bugahato

7-yuk yiharn hingrna tmbhomorn rhu witaamor.” *Stt 2.2*

⁵ To tfit Bro Nkifrar kfo memor; “Nhai tfit womn na kfoyuk rhu wita tkitt nieruhatm.” ⁶ To rom tom wom yimam nd kfoyuk rhu wita tkitt yiruham. To nd bi barkof gutnius wanyomo yimam nhai yirmomt nd Bro Nkifrar kfomo rhu wita tkitt. Turoh hanyjborna nmbuhatn nhai yirmomt nd tkitt. ⁷ Ndnett nd yimaroh rhu wita tkitthu nia nmbuhat dukahato Bro Nkifrar tfit wom yihar tfit dukamor rroh niayukr. Ndnetrn Defitrn mthu nawohhato kfo memor;

“Arihat mirahko nkifram hanyjbornamo kanjo

tfit inji ahanyjbornanom Bro Nkifrarhu Yafothat nia kfoyuk tngt.” *Sng 95.7-8*

To nd Defitrn kfomo tngt htihat duka kangnom Bro Nkifrar yimaroh rhu nmbuhat dukahato nd yiha tfit yihotat fak nukamort.

⁸ Nd Bro Nkifrar kfomo rhu wita tkitt bi Josuarpno ayakmt to nhai tfit Bro Nkifrar wom yiham Defitrpno kformor. ⁹ Nd mrokfom mhti dukahato duka kangnom Bro Nkifrar hikwa yimaroh rhu marnya yihar afo tor riyorhwor. ¹⁰ Bro Nkifrar hingrnahany hingrna hanyhato wuroh 7-yuk yihar rhu witamo kanjo inji rhu witarahm ror hikwa yimam. ¹¹ Ndnett nom ndar yiham nd rhu wita tkitthu yi dukefrn dukahato toh nnfakfot. Tamoh tamoh dukefm o nefm mong trohkfot. Isrerm namo kanjo nd dukefr myafhoni duha.

¹² Bro Nkifrarhu mrokfot tu yafothayet mrokfoyet. Nd mrokfothu nambur bim nhai yimam yak bsiskfot. Mrokfot yi shoft kfram kanjo yitatn

thatipt tasu fnahnitatt tu yiro yima mrokfo yafotha rifhur yorhwa tkitt rim kwitt. Nd mrokfotn rim was-wattnom yimanmoh yima yuhum ee ndnatn hti nhta kangnom o nd neft fasoh nefet, nd neft dborioh nefet. Inji nd mrokfot htihat kak nhtewunomm nom niwa nefm. ¹³ Nhai wom tamoh tu Bro Nkifarn yak htayukt tfit turpno kafrohkfot. Nhai. Tamoh tamohm be tafont yorhwatm htitworm. Tamoh tamoh nefenm nom niwam tu Bro Nkifarpn yak nhtarahrn. Yak nhtahato nmoh tamoh nefm htihat finji kfoneft, nom finji tfit kfo wokruhanomr?

Jisær yura hefenrn tohwr nfri hingnefthu bro tohak pris yima kanjo.

(Sapta 4.14–10.39)

Jisær nmoh bro tohak priser

¹⁴ Tor nmoh nyingako tohekwa bro prisr tu yura hefenr yihato Bro Nkifarrhu yorhwa tkitt yimor. Nd yimar Bro Nkifarrhu yon Jisær. Ndnnett nmoh yima yuhum be rorparn htahato rorhu mrokfot yakitoh kihkfot. ¹⁵ Nom krhopam yekwa yakeft hti duka tungunewurt. Nom yekwa krhopam ror fakmounr. Ror nd krhopam yakmoahat nhai wohsishato suhrmor. Nhai. Ror toh bmtamor. ¹⁶ Ndnnett nom to inji buga, yakrme duha Bro Nkifarpno brbo yikfot. Ror yima yuhuwafeter. Nom rorpon brbo yinyeft be hti yuhuwafahrnom. Tamoh krho nmbuham yakneft rorpon yakrmeni-hato be nd rorhu yuhuwafeftn thu kasirahtnom.

5

Fitharhof yimar bro tohak pris hingneft hingnarmoart?

¹ Bro tohak prisr hingneft tohwa yimar ndar tu bbinysofthu yimarn Bro Nkifarr yekwarn nd hingneft kak htewur. Rorn Bro Nkifarpno brbo yitwarn yeshrim mhtahukrr, womm be tarioh skurn mthewurm. Yimam turuh yindhor nmbuhatn Bro Nkifarr tarioh mtha yibon thoft nhai tum yihato mtarioh mthakahmr. Nhai. Nd bro tohak prisrpn mhtiwatmm rorn Bro Nkifarpno yihato mtarioh mthewurm. Womnam yimam fasoh nefm newohat nhaf inji buga. Rorpon yemrom mhtiwatmm tfit rorn nd yemrom yaknitwarm Bro Nkifarr mtarioh mthewatr, nd yimaroh fasoh nefm mong trohworm, nhai tfit yukatohekahrn nd fasoh nefm. ² Ndar bbinysoft tohwa yimam Bro Nkifarr nhai hik tungunakahmr. Nhai. Womnam toh marnyewum. Womnam suhwom. Nd bro tohak pris hingneft tohwa yimar to ndar bbinysofthu yimarn Bro Nkifarr kak htewur. Ndnnett wom yimam Bro Nkifarr hik hanyhato msuhwohat nhai bmbri kfo nyingo fnahaknikahrn. Be hifa yima yuhurn kfo hta bohta marnyewurm. ³ Ror ndar bbinysoft tohyuk yimar nd hingneft tohetrn, yimaroh fasoh nefm tarioh mthahukohat barkopfam afo turhu fasoh nefm dukahato tarioh mthefiwur, tur yak marnyani ee tfit mongkorn womroh fasoh nefm tarioh mthewur.

⁴ Nhai wom yimar bro tohak prisrhu bro hingneft be turhu fijo tohkahrt. Nhai. Bro Nkifarr Aronr bro tohak pris hingneft yak htamo kanjo inji kak htewur nom tohak prisr hingneft tohyuk yimam.

⁵ Jisær nd bro tohak prisr kanjohot hingneft yakmohat nd yuhatn hikmor. Nhaf nhai turhu fijo bro yufat yakneft yihato nd bro tohak prisr hingneft yakrmort. Nhai. Tu Bro Nkifarn nd hingneft fak htamorr. Kfo memorr,

“Ni nanhu yone.
 Hrekrpa mifr na tukann yonr yekanrn
 yimaroh buha mhurn myak htatahato kfo famuyanm,
 ‘Ndar yonr bi nanhu yoner.
 Nahu tamoh tamohm rorn yakitohnhorahra.’”

Sng 2.7

⁶ Tfit wom yiha wom mrokfot kfo memorr;
 “Ni nd bro tohak pris hingerneft toh thombat
 be nd bro tohak pris hingerneftn toh nkifranirahn Melkisedekr kanjo.”
Sng 110.4

⁷ Jisarr ndar bbinysoft tohmohat Bro Nkifrar kfo naku nurmohat nhai be tngprpatn ptha fura bofurarmorm mrokfom. Nhai. Tu yima rifhurpno masat masat kfo naku nurmorr: Memorr, “Bro Nkifraye, na yahr kmim nia wasaknanefst thu taburkrfona. To nhai. Nd nanhu noh nmbuhath bi tunn kfomo nanhu nohneft. Ndnatn nhai tfit kfo kurneft nanhu nohneft.” Be Jisarr inji kfo bruttnamotr ror nd krhopam yakmohat Bro Nkifrar thu bmtamorr. ⁸ Jisarr Bro Nkifrarhu yoner. To nhai kfo marimor, “Na Bro Nkifrarhu yona, tamohmpno nd krho mis nann titarhoyant.” Ror nhai inji kformor. Nhai. Nd krho mis rorn titamort. Nd krho mis titahato kto tfit htimor Bro Nkifrar yihato thu bmtamorr. ⁹ Bro Nkifrar Jisarrpno kfo hta nuhasmo mrokfom Jisarr hik bugamormn wuroht mnohmor. Mnohhato be nd rorhu hingerneft ndha mhingrna tmbhomortne be. Ror yimorn Bro Nkifrar pno mrhumor. Yihotat rorn yak nukamotr yimam Bro Nkifrar hikneft be rorpno mtoh nkifranirahm. ¹⁰ To be Jisarr Bro Nkifrar pno mrhumohat Melkisedekr hingrnamoa kanjo bro tohak pris hingerneft be rorn hemor.

Mirahko yon mumenm kanjo awany mmonom

¹¹ Jisarr yihato nd Melkisedekr hingrnamo bro tohak pris hingerneft yakmo yuhath kanga akfo nuhasanko, to nhai. Htitwanko yuhre yon mumenm kanjo wany mumiwuko mrokfo psha yuharoh yakneft. Ndnatn to mrokfom pthaneft finji finji yakruhakomm mna mrokfom? ¹² Niko nhai be ar nohof Bro Nkifrarhu mrokfot riwanyakhato rihikakrmokomt. Nhai. Niko bi bingot riwanyakhato rihika-kmokomt. Nikomn arihat wom yimam tfit kfo nuhas hi hanyrfokomm. To nhai, niko tfit muhra kmim kanjo wom yimamn niahato frhik bohik nuhaswomko Jisarrhu barkof rihikakhato hik hanyneft. Yonenm kanjo yuhre mmemthu mingapam kawuko. Tafi tat yeshrim yekahko. ¹³ Yuhre mingapam yewakomn mumiwuko. Nhai hti dukahato mekahko ndart fasoh nefet. Ndartne Bro Nkifrarhu dborioh nefet. Nhai. Be yon mumenm kanjo nammo bomumiwuko. ¹⁴ Bro yimam tat yeshrim yewa kanjo Bro Nkifrarhu tamoh tamoh nefm hti duka tungunanomm. Bro yimam rom bi tamoh tamoh nefm bi mhti fnahetmn tamoh tamoh nefm hti nhtewumm. Fasoh nefm htineft kangm ndt fasoh nefet. Dborioh nefm kangm ndm dborioh nefem.

6

Niko toh bmtaruhakomn Bro Nkifrar tawo yak marnyarahrko

¹ Jisarrhu mrokfom pthaneft mirahko yon mumenm ptha mumiwa kanjo be rpa mrokforpat waptha thu waptha thu hasonom. Inji narahko to be yimam kuny rahurpam tuhato rahurpam tohnita kanjo inji narahko. Tu kuny hingrnanefst rahum tunihato kuny kasinyahato kuny nyisofr hingrna

hanyhato hingrna pskitwor. Nom inji nakfot. Nhai kuny rahum wakasinya thu wakasinya thuwa kanjo kasinya thu hatohkfot. Ndar mrokfomwe inji korhwom yimam rahurpam wakasinya thu hatohwa kanjo. Mirahko nd nom yak bebwa fasoh nefroh mong troh yuhathu mrokfom yo Jisasrhu mrokforoh wany yakio yuhathu mrokfom ² yo baftais-hato tir hta yuhathu mrokfom yo nohhato sinya yuhathu mrokfom yo nd wuroh bro kotkfothu mrokforpam waptha thu waptha thu hasonom. ³ Wom nfri nfri mrokfom yakhato ndmn rim pthata mpthata hanykfot. Nd bi barkof yimaroh riwanyuk mro-kforoh pthaneft rot nhai mrokfom. Bro Nkifrar kangr tfit, “Wom nfri nfri mrokfom ahiyanko. Hehato ayak hta bohtayanko nd nfri mrokfothu pthaneft.”

⁴⁻⁶ Niko bi Jisasr nohhato fakmorko. Yakhato Bro Nkifrar fak marnya bomarnyamorko. Bro Nkifrarhu Yafothat bi yimako thu nawoh nhom-bramottko Bro Nkifrarhu mrokfot niko wanyomohat nhai kfo marimoko, “Yuwi furent.” Nhai. Niko wanyomohat kfo memoko, “Tu fiwet mrokfoyet.” Bro Nkifrarhu bbukapam bi htimo-komm. Kto Jisasrhu yawihna yihar tfit nd rorhu bbukeft htirahkomt. Nd nd nefm niko bi hti hnajokomm. Tfit nikmoh womr kfo smina tanyhato mong trohrahmr, nd yimarhu Bro Nkifrarppo yiyuk yihotat rinnfakraht. Nd yimar inji nanefit Jisasr bgre mis kisinyamo yimaroh dukefm kangr ayaka. Jisasr kisinyamo yimam inji namom. Tafontn kisinyamotmr yimam yihom kuninfarni mkuninfarnamoumr. Nd yimam namo yuhatn kangr inji anaya.

⁷ Tamohmpno nd yimar Bro Nkifrarhu nayuk nefm kfo smina tanyhato nndo frfnahnyuk yimar nhai tfit nieruhatr brbo Bro Nkifrarppo? Afo wom mrokfot akfokahtant afo wawanyawoko. Ndar bbinysoft buriohr wih frifrewatrt yewurit nuhta neft sinya marnyewut. Yimam htihato kfo kangm, “Bro Nkifrar thu warhiwatrm sinyewum.” ⁸ Yo mim gondhatahato yapkott sinyewut kangnom, “Nd bbinysoft bi fasohet.” Inji htihato nhai mswir htakaht nd tkitt. Be hta wus furefiwut.

⁹ Nd mrokfot be tu bro krho mrokfot fahuyanko. To mirahko ka nd mrokfot kfiwa yuhat kanjo ka be mibatnirah-nom. Awi nhai. Bro Nkifrar tor. Rorn tfit toh raforahrko. ¹⁰ Niko Bro Nkifrar hik htfaswa yimam hti yuhuwafhato hifa kak marnya hnawukomm. Nd dborioh nefm niko na hnawam Bro Nkifrar nhai duka mmoruhatrm. Bro Nkifrar nhai wom yimam kanjo duka mmokahrn. Rorhu hik htfasyuk yimam kak marnyewukomm tawo yak marnyarahrko. Nd niko hikwa yimam yak marnyewa nmbuhat Bro Nkifrar htitwartn hti yindhorrowoko. ¹¹ Nd dukeft wayakitohkahkonn nd niko newa nefm wana yakitoh hany-wakomm. Inji na hany inji na hanyrahko nd Bro Nkifrar kfo memohat Jisasr nikmoh bro tohak prisr rhurahr, to mirahko ka yuwi furewur. Nhai. Kfo mifmor, arihat bi nikmoh bro tohak prisr tohwor. ¹² Nd dukeftppo yima yuhum atohetohtwamko. Mirahko ahhrekahnomm kaht kanjo nd dborioh nefm aminoh hmbrenim. Bro Nkifrar hik hnamo nkifram kanjo toh bmtakfot. Rom to inji namom. Bro Nkifrar kfomorm dborioh rhu nmbuhathu hanyeft. Be nd ror kfoyuk mrokfot nhai mongko htarmomt. Nhai. Be nd dukefrparppo toh hany toh hanymomm kto htimom nd Bro Nkifrar kfomo mrokfot nhai kfo furarmorm. Tu fiwet mrokfot kfomor.

Bro Nkifrar bi finji kfir to be tur kfoyuk tng yuhatn hikwor

13-14 Dukakfot Abrahamrhu tndht. Bro Nkifrar kfo memorr, “Kfo mifwann, nini ninhu frikeft be yak marnya-ruhanko. Yak marnyarhotanko ninhu frikeft rifinysaraht.” Bro Nkifrar dukeft duka memor, “Abrahamr mirahr ka kfo furewura.” Inji dukahato kfo memorr, “Mirahna ka be kfo furewura. Nd na kfo yamuhat nini ninhu frikeft yak marnyarhotanko nd ninhu frikeft rifinysaraht, nd mrokfot kfo mif mifann yak marnya mifruhanko. Kangn na ka yima furaya. Nhai. Na Bro Nkifraya. Na kfiwa tngt kto htirahnt fipet rhuraht.”¹⁵ Abrahamr nd Bro Nkifrar kfoyuk tngt wanyhato nhai marimor, “Duka mmoruhant.” Nhai. Be yima yuhurn rhumout nd Bro Nkifrar kfoyuk tngt. Memor, “Afo hti hanyruha nd kfoyuk mrokfot fipett rhurahte. Nhai.” Abrahamr duka haso ee kto htimor nd Bro Nkifrar kfoyuk mrokfot fipett rhumot.

¹⁶ Yimam nakfo hanyjborna thoft to inji newum. Womr sinyahato womr kfo famurr, “Nd yiha nd shrt hiruhann.” Tfit womr kfo famur, “Na miruha kfo mifwona. Yuwi furarahna.” Inji kfitr womr kfo famurr, “Bare! Na yon mumena kfiwann? Na nhai kfo furakaha. Na kfo furaneft Bro Nkifrar yak tutfarahra.” Be bi inji kfiwure, be womr kangr, “Awi kfo mifwora.”¹⁷ Bro Nkifrar bi kfir tamohroh nanefst nhai tfit kto kfo kekutkahr. Nhai. Bi kfir tamohroh nanefst to be tur kfoyuk tng yuhat kak hikwor. Abrahamr kfo memohat Abraham frikeft yak marnyaruhanm, nom to nd frikeft, nmoh dukefm duka kangm yak marnya twanhorahrnom.¹⁸ Mrokfotn rpat naphahato yak tkafneft ndt hitwonom Bro Nkifrar yimampno bi fak tkaftr wom mrokfot nhai tfit mtoh kekuthato kfo mikahr, “Nhai inji narhota.” Nhai. Bi finji kfiur to be tur kfoyuk tng yuhatn hikwor. Nd rorhu nefm hitwanomn nmoh yima yuhurn bmtewumnom. Ndnettn nmoh fasoh nefm thu dbruf thumonomm Bro Nkifrar kakitoh kihwonom. Ndnettn nmoh dukefm nhai wom krhokahnom. Duka kangnom nmoh rhu nmbuham be Bro Nkifrar yak marnyarahrm.¹⁹ Nd dukeft yorhwattnom nmoh yima yuhurn be nd Bro Nkifrar kfoyuk yima yuhurn yak dbkaf kihhato be nd dukefrparpno korhnom. Nhai tfit wom dukefm rhukahnmom. Be nd dukefrn nmoh yima yuhurn thu bmtewattnom Bro Nkifrarhu mrokfot kakitoh kihwonomt.²⁰ Jisahr bi nyinga yuhatn bi tohak hanymorn Bro Nkifrarppno yiyuk yihotohat fak nukak hanymort. Bro tohak prisr Bro Nkifrar rhumoa rumt yimoa kanjo inji yimor hafenr. Rorn nd bro tohak prisr hingrneft be toh nkifranirahr Melkisedekr kanjo.

7

Melkisedekr tu bro yufet yimayer

¹ Nd Melkisedekrhu hingrna toh nmbuhat kfo nuhasruhanko. Nd Melkisedekr Salemt tohmour. Rorhu hingrnefm hus hingrneff kaki-tohmour, king hingrnefti yo yura myorhekwa Bro Nkifrarhu prisr hingrneft. Nd hus hingrneff kakitohmour nd bro kmi Salemt tohmoahat. Wom yiha Abrahamrhu wom yinem Lotr yahr knim yaknimotmr nmbritom Abrahamr mongko tone hikhato memor, “Ayihom nrfa kitohanr.” Yi-morn yihom nrfa htihaktho memor tfit kmiko aiya, buha yihotatn Melkisedekrppno mnafurmof. Mnafurhato Melkisedekr sinyahato Abrahamr yak wus hanyhato kfo memor, “O Bro Nkifraye, Abrahamr wayak marnya bomarnyakahtnr atoh marnyatwar.”² Inji kfonimorr be wom Abrahamr yahrt yihato yakmo wuskam tirhus rmonm htamorm. Wom

rmonett yakmortn Melkisedekr hemor. Nd Melkisedekr yufathu yimbu yuhat, “dborah nefm nayet kingr.” Ror kingmo kmithu yufat, “Salemt.” Salem yufathu yimbu yuhat, “hifa nayak marnyet kmit.” Ror king tohmohat nd kmi Salem thofm kfomoatrm nafak marnyamoum. ³ Nd Melkisedekrhu toh yuhat nhai Bro Nkifrarhu rfa borngt kfo mekaht, “Yifammtr o nkifretr rhumor.” O nhai kfo mekaht, “Nd yiha mmemt hiyaumotr nd yiha nohmor.” O rfa borngt nhai kfo mekaht, “Pris hingrneft tohmohat nd yiha hingrna tmbhomor.” Nhai nd kfo nuhas mrokfom rhukahm. Nd mrokfom htitihato duka kangnom, “Ka Bro Nkifrarhu yonr kanjo tohmor nd Melkisedekr.”

⁴ Melkisedekr yakitohmo yuhat wadukako. Abrahamr ar Bro Nkifrar hikmoa yimanmoh nkifra nngrajohr. Abrahamr tohhato Melkisedekr htimohat Abrahamrhu dukeft duka memor, “Na nhai ndar yimarhu toheft kanjo tohkaha. Nhai. Ror tu bro yufet yimayer. Ror Bro Nkifrarhu pris hingrneft kakitohwor.” Ndnatn nd ror yihato yakmo wuskam tirhus rmonetm htahato wom rmonett Melkisedekr hemor. ⁵ Lifai frikefthu womn pris hingrneft kakitohwomt. Roh thfa mntwat kfiwut, “Isrerm yakitohyuk tamoh tamoh wuskam o tamohm tirhus rmonm htahato Bro Nkifrarhu yufathu hayuk wom rmonett prism hekfot.” Nd prismi Isrerm nhai nndo nndo rroh toh nmbuhat. Roh nkifrar rpa Abrahamrpar. Nd rpa nkifrarhu yon kunyshu tamoh tamoh wuskam tirhus rmonm htahato wom rmonett prism kahukwom. Nhai be sfno inji hekahm. Nhai. Roh dukefm duka kangm, “Prism Bro Nkifrarhu hingrniwa yimayem.” ⁶ Nd yima Melkisedekr nhai Lifai frika yuhat niarmor. Ror nndo wom yima furarn nd Abrahamr htamo tirhus rmonroh wom rmonett Abrahamr yakhato hemorr. Bingot Bro Nkifrar Abrahamrpar kfo memor, “Abrahame, ni yak marnyarhotann wom yimam ndt htiruhamn kfo mirahma, ‘Bro Nkifraye, Abrahamr yak marnyewa kanjo nom inji wayak marnyanom.’” Abrahamrpar inji kfomorr. Nhai Melkisedekr inji kfomorr. Nhai. To nhai, Melkisedekr tohhato tfit Bro Nkifrar kfo memor, “Bro Nkifraye, Abrahamr wayak marnyatwanr.” ⁷ To wom mrokfot wawanykomt. Womr sinyahato Bro Nkifrar kfo naku kangr, “Bro Nkifraye ndar yimar wayak marnyanr,” nd Bro Nkifrar nakuyuk yimar bro yufetn Bro Nkifrar nakutrr wom yimarhu yak marnyaneft. Ndnatn duka kangnom, “Melkisedekr tu bro yufet yimarn Bro Nkifrar nakumorr Abrahamrhu yak marnyaneft.” Ndt inji korht.

⁸ Tfit wom yuhat inji. Lifai frika yuhathu yimam pris tohhato Isrer thofroh tamoh tamoh tirhus rmonm yak htatahato wom rmonett yekwa prism nhai toh yifaktakahm. Nhai. Noh frekiwum. ⁹ To Melkisedekr Lifai kanjo pris hingrneft hingrnamohat nhai Lifaim noh frekomo kanjo nohormo o hingrna hanyatho mhingrna tmbho-rmor. Nhai. Bro Nkifrarhu rfa borngt nhai htikahnom kfo mekaht, “Melkisedekr fnohr o hingrna tmbhir.” Nhai. Ndt htitihato duka kangnom, “Nd ror yakitohmo hingrneft yuhre kakitoh hanitrt.” ¹⁰ Abrahamr ror Lifairoh nkifrar. Ndnatn duka kangnom, Abrahamr yakmo wuskam yak nhtahato wom rmonett Melkisedekr hemohat nhai be sfno inji narmor. Melkisedekrhu yinhitn Abrahamr tohmo. Ndnatn wom wuskam yak nhtahato hemorr. Lifai frikefthu nkifraye Abrahamr. Melkisedekr bromohat Abrahamr to tfit rorhu mongko tohyuk Lifai frikeft to be nhai womm brokfot, Melkise-dekrpar bromorm.

Ariharhof Jisasr nfri bro tohak prisrhu hingrneftn tu tpiyet hingrneft hingrnewur

¹¹ Bingot Bro Nkifrar Mosesrpn niahato tarioh skurn mtha yuhathu hingrneft boririfhu nuhasmorr. Tfit Mosesrn Isrerm kfo nuhas memorm, “Bro Nkifrarhu tarioh skurn mthanedfhu hingrneft inji korht.” Nd hingrneft Aronrhu frikeftn nd hingrnefthu hingrna yuhat romn yakitohhato kfo hta bohtamoumm Isrerm. Aronr Lifai frikeft niamor. To nd tarioh mtha yuhathu hingrneft rom hingrnamoat nhai tu tpiyet hingrneft hingrnamoam. Nhai. Yimaroh fasoh nefm nhai yak thu marnyarmoaatm. Be kak wunatamoutm yimaroh fasoh nefm. Yimam mi yohwa kanjo be inji yura foh wokmoumt. Nhai tu yimbonett tou yifkasakmoamt. ¹² Ndnetrn Bro Nkifrar duka memor, “Tfit Melkisedek kanjohot wom nfri prisr yak htaruha. Rorn yimaroh fasoh nefm tou yifkasak marnyarahrm. Nd yatK hingrneft yak tuhaforuhart tfit rorhu nfri hingrnek yuhatn yimam hikrahm.” ¹³ Nd Bro Nkifrar yak htamo nfri prisr nndo wom tangishof furar nd prisr hingrneft fak htamor. Rorhu frikeft nhai womr prisr hingrneft tohhato yimaroh yak tarioh mthayuk yeshrim tarioh mtha wonakrmor. Nhai. ¹⁴ Nmoh Brorhu trha yuhat bi wany bugamokomt. Rorhu trha yuhat nhai nd Lifai frikeft yuhat niarmor. Nhai. Rorn nndo Juda frikeft yuhat niamor. Bingot Mosesr nd prisr hingrneft Lifai frikeftn yak htamohat nhai tfit marimor, “Judam yakitohhotwamm nd prisr hingrneft,” tu be nhai. Lifai frikefrpat kfomor nd hingrnefthu yakitohneft.

¹⁵ Bro Nkifrar tfit prisroh yak htayuk wom nfri yuhat hingrnamor. Melkisedekr kanjo tohhato hingrnayuk prisr tfit fak htamor. Rorn tu tpiyet hingrneft hingrnamor. ¹⁶ Lifai frikefthu yimam nd prisr hingrneft yakitoh hawihnamohat nhai be sfno nd hingrneft yakitohrmomt. Bi nd tangimn nd hingrneft rifakitohakmomt. Thfa mntwat bi romn kfomot nd hingrnefthu yakitohneft. Ndnettn nd prisr hingrneft romrpam fakitoh hawihnamomt. Tfit Jisas Kraistr nd hingrneft myakakni-mohat nhai be Lifai tangishofrn nd hingrneft ror myakaknirmort. Nhai. Ror wom tangishofr. Ror nd hingrneft yakmo nmbuhat nhai be sfno, rorhu toh nmbuhat ror nhai nohkfot. Toh yifahtarahr. Yo nhaft rorn yimaroh fasoh nefm yak thu marnyarahrm. Nhai be yak wuna hasoruhatrm. Ndnetrn rorn nd hingrneft fakmort. ¹⁷ Yakhato rorn yimam brbo Bro Nkifrarpn hany hakurahrm. Nhai be sfno inji kfokahnom. Nhai. Bi Bro Nkifrarhu rfa borngtn Bro Nkifrar kfo memor;

“Ni nd bro tohak prisr hingrneft toh thombat

be nd bro tohak prisr hingrneftn toh nkifrarahn Melkisedekr kanjo.”

Sng 110.4

¹⁸⁻¹⁹ Tamohmpno nfri prisr yakmonom? Ndt nhai be sfno. Wawanyko. Barkof prisroh hingrneft Bro Nkifrar Mosesrpn kfo nuhashato Lifai frikeft yakitohmot, nhai tu fipet hingrneft hingrnamoam. Yimam fasoh nefm nahato Bro Nkifrar tarioh mthamoahat nhai yak thu hermoarm. Nhai. Be kak wunatamourm. Ndnettn Bro Nkifrar tfit wom nfri yuhat fak nuhasmornom. Nd nfri yuhat yirahnom, be Bro Nkifrarpn brbo yirahnom. Ndnettn Jisasrn tohhato nd nfri yihotohathu riwita yuhat kak nuhasaf hanitrnom.

²⁰⁻²¹ Bro Nkifrar prisr hingrneft Jisasrpn yak htamohat bro mrokfot kfo memor;

“Na kfo mif mifwann, ni nd prisr hingrneft yak thoft

be ninn toh nkifranirahnt.

Na bi kfiwohat nhai tfit kfo kekutrhoti.”

Sng 110.4

Ndhtet tngt Bro Nkifrar Jisasrpnno kfomot nhai ndhtet kfo nnhu mrokkot wom prisrpnno kfomort. Nhai. Jisasrpnno nd tngt kfomort. ²² Nd nfri yihotat Jisasr hta tehakmot, tot tu dborioh yihotat. Bro Nkifrar kfo hnamo yihotat Jisasr hta tehakmornno.

²³ Bingot tohmo prism bokm tohmomt nd hingerneft. Womr tohhany toh hanyoarn bi fnohnir tfit wom nfri yimar kakmourt tkitt. Ror tohhany toh hany bi fnohnir yo tfit wom nfri yimar kakmourt tkitt. Be inji nahnatn bokm toh hnamomt nd hingerneft. ²⁴ Tfit Jisasr nd tkitt yakmohat nhai wom yimar myak tuhafhato rorhu tkitt myakruhatrt. Tu be nhai mif. Be rorppar tohwotat rorppar toh nkifra-nirahr. ²⁵ Bro Nkifrarppno brbo tohwo. Bro Nkifrarppno brbo tohwaro yimam Bro Nkifrarppno yinyeft Jisasrpnno fasoh nefm wuska yohm rimak yifhonita kanjo inji rimak yifhonitwatmm tfit Jisasrpnno Bro Nkifrarppno yihato kfo dbruf nuhaswatrr yimam Bro Nkifrarppno brbo kitwom.

²⁶ Yima Jisasr nmoh bro tohak pris tohneft hifa. Rorn nmoh tamoh nefm yak htarahm. Rorhu toh nmbuham tu dborioh mifm, tu Bro Nkifrarhu toheft toh hikwor. Nhai ror wom fasoh nmbuham. Rorhu rhu toh nmbuham tu hifa tohefm tohwo, nhai wom fasoh nefm. Ndar bbinysoft ror tohhato nd Bro Nkifrarhu thfa mntwathu mrokkot hanyjbornayet yimampno tohmohat, nhai ror marimor, “Rroh yuhat mitohniruha,” nhai. Ror ndo ror turpar. Rorhu nefm ror turpar. Nd fasoh nefm nayetm rom tum inji. Ndnetrn Bro Nkifrar tu yura hefenr fak htamorr. Tu yura myorhekwa tkitt fak htamorr, tu Bro Nkifrar yorhwa tkitt. ²⁷ Prisroh hingernefti rorhu hingerneft nndo nndo. Nhai rpahtett. Prism tarioh mthewohat yiha yiha nd hingerneft hingernewumt. Nd hingerneft nhai yihom tohaf hanykaht. Nhai. Barkofm afo turoh nefm Bro Nkifrar tarioh mthanitamr rroh fasoh nefm mong trohwo. Turohm inji nanihato ee womroh tarioh mthewatmr mong trohahukrm. Ndhtet ndhtet bok hingernefm hingernewum. To Jisasr nhai inji wahingrna thu wahingrna thu hatohmorr. Nhai. Rorpar rpa nohrpat nohmohat to be yima bugaroh fasoh nefm rorpar noh wikna buga-morm. Nhai yimam tfit Bro Nkifrarhu tarioh mthayuk yemrom hatone hatohkkot. Rorpar bi nd hingerneft hingrna buga hemornom. ²⁸ Tfit nd prisroh mrokkot akfoya. Pris hingerneft tohwa yimam Moserhu boririfhut hikhato nd tu bbinysoft tohyuk yima frikeftn nd pris hingerneft kak hteuwum. Ndnettn nd yimam pris hingerneft yakitohneft kangm, “Bro Nkifrar ahiknom,” to nhai, womnam myak nhiyekwom hikneft. Bro Nkifrar turhu yinemr kfo memorr, “Na kfo mifwann, ninn tfit nd tu nyingako mtohekwa prisroh hingerneft yakitohrahnt. Ni nd hingerneft yakni thoft nhai tfit womr yakruhatrt ninhu tkitt. Tu be nhai mif. Na bi inji kfiwohat nhai tfit buha kfo kekutrhoti.” Bro Nkifrar htamorr Jisasr tu Bro Nkifrarhu dukeft kak hikmour. Nhai wom fasoh nefm narmoar. Ndnetrn Bro Nkifrar nd mrokkot kfomorr.

8

Jisasr hefenrhu bro tohak priser

¹ Nd Bro Nkifrar htamo nfri prisrhu hingerneftu hingerneft kanga afrhikkahtant wawanyswakomt. Nd prisrhu hingerneft na kfo hnamot tu

kfo mif kfoyet. Jisasr bi tu yura myorhekwa Nkifrarponko bro mtahakm yekwa gajis, ror bi nd gajis yakhato korhwor. ² Bi yura hefenrn Bro Nkifrarhu rmontn pris hingrneft hingrnewur. Ndt tu Bro Nkifrarhu kunyet nhai yima mifmn kasinyarmomt. Tu Bronko kasinyamort.

³ Nd asha bbinysoft tohwa rmonthu hingrnayuk bro tohak prism rom nhai rhu furakahm. Rom yeshrim yakhato Bro Nkifrarho tarioh mthewumr. Ndnnetn nd ror yakitohwa rmontko nhai be sfno rhu furakfot. Nd rmonr yemror kur mthakfot. Nd rmont kur mthamo yemror nhai wom tamoh yemror yakhato kur mtharmotr yimaroh fasoh nefm mong trohrmorm. Nhai. Jisasrhu kkutn yohnemot. Nd kkut yohnemott Bro Nkifrar htimort. ⁴ Nd prism hingrnamao yemro tarioh mthaneft, nkifra tarioh mtha yuhat afo hikmoum. Jisasr yura hefenrn tohetrn nhai nd Bro Nkifrar htamo prisroh hingrneft hikrmor. Ror tur tohwa kmi hefenrhu nfri hingrneft hikmor. ⁵ Rom nd prism hingrnamao hingrneft, ndar tuha bbinysofthu rmonthu hingrneft hingrnammoum. Nd rom hingrnamao hingrneft yura hefenr tohyuk rmonthu toh ruhefti hingrneft hingrna nhombrammoum. Bingot Mosesri Bro Nkifrar ndar bbinysofthu rmonthu kasinya yuham, rmonthu yuke rifm, bro rifm nnakfo nuhasmohat kfo memorr, “You! Mirahn tunhu duka fijo ahingrnayant. Yura kmi Sainait kfo nuhasmo yuharpaw wahingrna hiktwa.” Tu yura hefenrhu rmonthu ruhefthu hingrna yuhat kfo nuhas bonuhasmorr hingrna hikneft. ⁶ Prism hingrnamao hingrneft, rom be nndo bbinysoft tohwa rmonthu hingrnf yuhat hingrna hikmoum. Jisasr ror tu hefenko yiyuk yihotathu pris hingrneft hingrnammor. Rorn tu yafothet hingrneft hingrnammor. Bingotrhof prism hingrnamao hingrneft nhai yimaroh fasoh nefm yak thurmoamm. Nhai. Prism tarioh mthamoahat Bro Nkifrar nd tarioh skurn gbefr mthatihato nd yimaroh fasoh nefm be kak wunafmorm. Bro Nkifrar bro mrofkot kfo memorr, “Nhai mrofkot. Nikmoh fasoh nefm yak thuhirhoyanko, tu dborioh yimakomn nanpno brbo nierahko.”

Jisasr htamo nfri yihotathu hingrnf yuhatn tu dboriohet

⁷ Nd yatn tarioh mtha yuhat yimam tarioh mthahato fasoh nefm yak wunamoahat Bro Nkifrar nhai kfo marimorr, “Tarioh mthakahtko fasoh nefm yak thu hiruhanko,” nhai. Ror be kfo memorr, “Fasoh nefroh yak thuyuk nfri yuhat yak hambrak hiruhanko.” ⁸ Nkifram yemroye tarioh mthamoahat Bro Nkifrar nhai hti yindhormort. Yimam tarioh mthamoahat nhai Bro Nkifrarpono brbo yirmoam. Ndnnetn Bro Nkifrar htihato kfo memorr,

“Na Bro Nkifraya kfiwa, afo wawanyko.

Wom yihar wom nfri yihotar tfit htakruha.

Nd yihotar na tukanpno wukio-ruharn

Tfit mano Isrert rhuyuk kmifpno wakiorahr.

Mano Isrerm tohwamn yo mano Judam,

nd Isrerroh hus kmifpno wakiorahr.

⁹ Nd nfri yihotar nhai ndwom yatn yihotar kanjo rhuruhatr.

Nd yatn yihotarn Isrerm Ijift tohhato na yaknamohat

Isrerm nhai na kfoyuk tng yuhat yak hikrmom.

Nd rroh nefm htihato mong trohmoyanm.

¹⁰ Tfit kto Isrermpono kndhakruha nfri yihotarhu hingrneft tfit nndo rhuraht.

Nanhu boririfhut yimaroh yima yuhumn rhuraht.

Yimaroh yima yuhum rhuruhatt

nd boririfhutn yak hta bohtarahtm na Bro Nkifraya hikneft.

Nhai wom tahi furam o wom tahi nasungwarm kfo tatoruhاتم.

Nanpraya rroh Nkifraya rhuruha.

Tukann hti yukatoh hasoruhanm nd nanhu yon kunyshu tamoh tamoh nefm.

¹¹ Rom toh thoft nhai tfit womr sinyahato

turhu kmi thofm o turhu tangiyemrom kfo ttiwon miruhاتم,

‘Bro Nkifrar nikmoh tamo-hemer?’

Nhai womr sinyahato tfit womr inji kfo ttiwonruhاتم. Nhai.

Yufet yimami yufa duha yimam rom tum hti mirahم,

‘Bro Nkifrar nmoh Nkifraye.’ Nhai womm hti mmo-ruhاتم.

¹² Rom wommpno nayuk tamoh tamoh nefm

nann yuhuwafhato yak thuhi-ruhanم.

Rom nayuk fasoh nefm nhai tfit dukarhotanم.” *Jeremaia 31.31-34*

¹³ Nd Bro Nkifrar kfomo wom nfri yihotarhu htaneft, ndt duka hanykfof. Bi nd nkifram hik hnamo yatK yihotar be yau trohaf bugarahنومر. Bufutn rinatuhakrahtm. Nhai tfit wom yihota yimbuefett rhuruhatt.

9

Bro tohak prism yemro kkut yaknihato Bro Nkifrar mhtahemoa yuhatt

¹ Bingot nmoh nkifram afo yatK yihotar hikhato Bro Nkifrar rhu rifinyhato kfo tato inji namoahatt nhai be busafon furatn rhu rifinyhato kfo tato inji narmoam, nhai. Tu kfo hta yuhamn kak hikmoamn ser thaye hingna nhombret rmontn rhu rifinyhato kfo tatoumrom Bro Nkifrar. Rmont hingnamohatt inji hingnamouم. ² Rmont kasinyamoa tkitt gna habri htfasmouم. Gna habrinihatou sertha rmonr kasinyamouم. Kasinyahato gnanhehm gnamouم. Biko mruhak-moa gnanhehr futamouمr Hnaru Gnar, tfit tu wuroh gurko yiho rhumoa tpurhe kutamouمr tu Nngrajoh Hnaru Gnamifr. Nd barkof mruhakyuk Hnaru Gnanhehrn htamouمm kah hta funamoa lam tndatikt, yo Bro Nkifrar bretpa mhtahemoa tik mkut. ³ Tfit ndwom tu wuroh gurko yiho rhumoa gnanhehrn tor tu Bro Nkifrar rhumoa tu Nngrajoh Hnaru Gnamif. ⁴ Nd barkof biko mruhakyuk Hnaru Gnanhehrn hifa mthet mifipam tariohmoa teborent htamouم. Hemkuye hingnamomtn tfit briahakorn gore tarioh trku hmbriyafmouم. Tu Nngrajoh Hnaru Gnanhehmifrn Bokis Kontrakt tohmouم. Rot nhaf gore tarioh trku hmbre bugamouم. Yiro nd Bokis Kontrakkfotn rhumouم gore hingrnet mana roht, yo Aronr yaki-tohmo miswa fnahet kio muss, yo tahi mkuf, boririfhum htamo tahi mkuf. Nd nd shrn rhumouم nd Bokis Kontrakt. ⁵ Nd Bokis Kontrakthu mnbifatn hus mounmotf Bro Nkifrarpo tohwaf hingna nhombrakmomfn tnamomf mano mano. Rofhu birnam thu sfondwamomfn toh wasi hmbrimouمf tu Bro Nkifrarhu Yafothatt o marbir rhumoa tkitt. Nd tkitt futamouم “Fasoh Nefm Mthu Dbrufyuk Tkitt.” Nd tkitt yemro kkut mthu nembongit-moatmt Bro Nkifrar ndm thihato tfit yuhuwafett niamoatrr yimaroh fasoh nefm nefem kak wunafhemouم. Nhai rim kfo hikak bugarhotanم tamoh tamoh mrokfom. Be inji kfonitanم.

⁶ Nd yiro rmonthu rawoft to be inji hingrna hta bohtamomt. Inji hingrna hta bohtanihato yo prisroh hingrneft rihingrnakmomt. Yiha yiha nd barkof biko mruhakyuk rumr prism rim fnahni mfnahnamoum: Yimam Bro Nkifrar naku kfo inji narahnom o tarioh mtha inji narahnom, romn rim hafkneni tfit yarim htafo inji namoum. Romn nd hingrneft hemorm. ⁷ Tu bro tohak prisrpar rim fnah-nimourt tu Nngrajoh Hnaru Gnanheht, tu Bro Nkifrar rhumoa tkitt. Nhai be yiha yiha yirmoart. Nhai. Rpa gunyjimr rpa yiharpar fknenimour. Tfit wom gunyjimr nhaf inji be rpa yiharpar. Nd gnanhehr yihom fknenimoahat nhai be sfno fkne furanirmoar. Nhai. Yemro kkut yaknihato ndm afo Bro Nkifrar pno yihom htamoatrm tu bro tohak prisrhu toh rawofm Bro Nkifrar frwus bowusmoum: Frwusnimoum ee kto wom yemro kkut htamoatrm met yindarim duka mmonihato namoa fasoh nefm Bro Nkifrar hta wunaf hemourm. ⁸ Nd Nngrajoh Hnaru Gnanhehr yima furam yi duha yinyeft rhumoaht nhai be sfno. Bro Nkifrarhu Yafothat tafi yibonrmot yima furam Bro Nkifrar pno brbo yinyeft. ⁹ Bro Nkifrar rhumoa tkitt hta rafomoa yuhathu yimbu yuhath inji korht. Yimam yewurit yaknihato Bro Nkifrar womm mhtahehato yo womm tarioh mthamoahat, nhai yak thu hermoarm rroh fasoh nefm. Nhai. Nd tarioh mthamoa skurn gbefr mthatihato be kak wunafhemourm rroh fasoh nefm. Ndnetmn rroh yima yuhum mduka kurhakmoum Bro Nkifrar pno brbo yinyeft. ¹⁰ Yimam brbo Bro Nkifrar yimoahat rorhu boririfhu mrokfomn hikmoum. Boririfhut hikmoa yimam inji namoum. Yemrom yakhat tarioh mthamoum: Fitoh yeshrim nhai wofnkahr yimaroh yanef ndm nhai yarmoamm, bupam nhaf inji, yo tamoh nefm namoahat yuk fnah inji namoum. Nd nefm be boririfhu yuhath hikmoum. Be nd briaha thatipthu hingrneft hingrnoum. Nhai tu yiro yima rifhurio yak marnyarmoam. Bro Nkifrarhu dukeft duka memor, “Afo nd boririfhut ahik tebfi hanykahmn kto nd fasoh nefroh yak thuyuk yihotat yak nuhasruhanm.”

Fasoh fasoh nefm Kraistr kkutn yohnemott wuthanimom

¹¹ To tfit arihat, bi Kraistr bi bro tohak prisr tohor. Rorn nd Bro Nkifrar kfo hnamo hifa rhu nmbuhat fak htamornom. Ror hefenr yimorn Bro Nkifrar pno brbo mrhumor. Nd ror mrhumo tkitt nhai ndar bbinysoft hingrnoum rmont kanjo rhukaht. Nhai. Nd ror mrhumo tkitt tu be ndoht rothu ruheft. Bro Nkifrar hingrnayettm rothu ruheft nndo. Jisar nd kmit yimorn tu hifa dborioh hingrneft hingrnoum. ¹² Kraistr nd tu Nngrajoh Hnaru Tkitt yimohat nhai bro tohak prisr namoa kanjo meme kkut o bulmakau kkut yaknihato rim tarioh mthamoa kanjo inji rim tarioh mtharmor. Nhai. Ror tu yimarhu kkut nd hnaru tkitt rim hafknenimour. Nd kkut rim hafknenimotr to be nd rpa yis yimohat to be nd yiharpa Bro Nkifrar htihato fakmiyakmornom. ¹³ Yimam bb kunys ruhetm yo yima tpim fakitohm nhai bi Bro Nkifrarhu rmont fknihato kfo bruttnakahm. Afo prisr pno yihato rorn meme kkut, bulmakau yiramrhu kkut yo bulmakau yogroh kandhi tounpam yekwarn hisop ghaye thu yifakhato frppi wunahato kak wus bowusworm. Nd hingrneft hingrnaniatrm ee Bro Nkifrarhu rmont yinyeft nhai mrokfom. ¹⁴ Nd boririfhut, bingot Bro Nkifrar hingrnoum barkof yihotarhu boririfhut hikwom. Arihat bi Kraistr tfit tu dborioh yihotar htakmorr. Kraistr nohhato nd nfri yihotar htakmorr. Nhai wom tamoh nefmpno nohrmor. Nhai. Mgoira yimar be noh furamor. Tu Bro

Nkifrarhu Yafothatn thu bmtamottr kku bebt hatohmohat nhai marimor, “Yakrmiruha.” Ror hatohmo kkuat Bro Nkifrar htihato nd yimam yak bebwa fasoh nefm fak thumorm. Arihat Bro Nkifrapno yinyeft nhai tfit wom duka kinyaki hanykfot. Be yi furakfot. Ndnatn ror kfiwa yuhatn hikkfot.

Jisasrhu kkuat kfomot nfri yihotar Bro Nkifrapno wukiomor

¹⁵ Bi Kraistr nyinga yuhat tohak hanyhato rorhu kkuat kfomot nfri yihotar Bro Nkifrapno wukiomor. Ndnett n yimam rorpno rim tohneft be yakrahm nd Bro Nkifrar kfoyuk rhu nmbuhat. Nd yimam yat k boririfhut hikmoam rom buga Kraistr nohmo nmbuhatn rom rpat noh wikna bugakmorm. Rom nhai wom mrokfom nd nfri yihotar yihato Bro Nkifrapno brbo yinyeft.

¹⁶⁻¹⁷ Jisasrhu kkuat kfohato nfri yihotar hingrnamo nmbuhathu mrokfot afo kfo nuhasrhotanko wawany-swakomt. Nmoh nkifram nhai mkfo fnah marimom, “Womr yuhre yima nfri toh hanyetrn womr bmbri tkitt yakkkfot,” nhai. Afo hti hanymoum womr bi fnohnir ee womr tkitt yakhato rorn tfit yifemmoum tamoh tamohm womr noh htaniyukm. ¹⁸ Bingot nd yat k yihotar yimam yau yaknimoahat, nhai be sfno bmbri yau yaknirmoam. Nhai. Barkoft afo wom yemror washato rorhu kkuatn Bro Nkifrar htimoarn ee yimam nd yihotar kfo fakiomourm yauneft. ¹⁹ Inji namoum. Barkofpam afo Mosesrn boririfhu mrokfom kfo nuhas hik buganimorm met yindari bugam. You tfit nd bulmakau yogroh kkuti memeroh kkuat yakmortn bupiktn rpat yak mortamormn yo hisop ghenm yak tiphato sifsif tmbene mtinet repela mtine nd hisop ghenm rpat kisipmormn nd kku piktn nd hisop yuhtenm thu yifakmormn barkoft afo gonborngtn frppri wunanimor. Tfit thu yifakhato yimamn thu ppri wunamor. ²⁰ Thu ppri wuna hanyhato kfo memor, “Nd nfri yihotar bi yima kkupampno bi kak dbkafwanr. Tot nd yuhatn Bro Nkifrar kfomorko hikneft.” ²¹ To nd yuhatn Mosesr hikhato yemro kkuat yakhato Bro Nkifrar rhumoa rmont thu ppri wunanimortn ee tfit nd yiro rmont rhuyuk wuskar rpat thu ppri wuna bugamorr. ²² Mosesrhu boririfhut yakitohmohat, yemro kkuat kfomout tamoh tamoh nefr wuthar rhumour. Yemro kkuat nhai yohnerfot nhai met yindariroh fasoh fasoh nefm mong trohhermoarm.

Kraistrhu kkuat kfomot fasoh nefm fak thumorm

²³ Nd rmont yimam ndar bbinysoft hingrnamot, Bro Nkifrar yorhwa kmi hefenrhu ruheft hingrna nhombra-moumt. Nd rmont hingrnamot duka memom, “Yemro kkuat hta duha yirah-nomt be nhai Bro Nkifrar brbo nieruhatr. Ndnett thu ppri wunakah-tnomt Bro Nkifrar htiruharn brbo nia toh tkafahrnom, nom rhu rifinyhato kfo bruttna kfo tatoneft.” Nd hingrneft ndar bbinysoftu rmontn inji hingr-namomt. Yura hefenrko nhai yemro kkuat Bro Nkifrar htihato yima yuhur marnyarmorr nom rorpno yinyeft. Nhai. ²⁴ Yima Jisasrhu kkuat kfomot, Bro Nkifrar nd kkuat htihato fak miyakmornom. Jisasr nhai nohhato ndar bbinysoft hingrnamo rmontn fknenirmor. Nhai. Ndar bbinysoft hingrnamo rmont be kmi hefen hingrna nhombramom. Jisasr fknenimo kmit rot tu kmi hefenr fkne twanhonimor. Ndnett arihat Bro Nkifrapno yorhwarn nom kfo bruttna hasi-wurnom. ²⁵ Bi nkifrapno ndar bbinysoft tohmoa rmontu tu Nngrajoh Hnaru Gnanhehr bro tohak prism fknenihato tarioh mthamoahat nhai be sfno fkne furanirmoam. Nhai. Yemro kkuat kfomout yihom fkneni-moumt nd Bro Nkifrar rhumoa rumt. Rpa gunyjimr rpa yiharpar fkneni-moumt.

Nhai be yakrpak yakrpak fknenirmoamt. Nd bro tohak prisr yaknimoa kcupam nhai turhu yima kkut yaknihato yirmoar. Nhai. Yemro kcupam faknimour. Nd yemro kkutpno fknenimour. Jisasr nhai. Ror nhai yiha yiha yi hatohrmor. Nhai. Ror be rpa yiharpa yihato mnohmohat, to be.

²⁶ Ndar bbinsoft trhahato ndar yonmari yiham toh hnamom, nhai htirmonom Jisasr nia minohhato tfit hefenr mtah tany tfit yawihna minohhato tfit hefenr muh inji narmor bok yiham. Nhai. Ror rpa niat niahato minohmohat, to be. Bro Nkifrarhu nia yihat bi brbohtn. Ndnatn minohhato to be nd nom kiminysoftamo mtitikt nd yiha puk dbrufakmornom. ²⁷ Ndar bbinsoft tohwa yimam nhai tahi nrwim kanjo toh nkifranikahm. Nhai. Nohwom. Nohnitamn Bro Nkifrarhu kotkfof toh garitwom. ²⁸ Krais Jisasr to be rpa yuhat inji namor. Rpa yiharpa mnohhato bok yimaroh fasoh nefm ror nohmo yiharn be Bro Nkifrar fak thumorm. Kraistr noh tany yimohat tfit wompam nierahr. Tfit nia thombat nhai tfit wompam nohruhatrnom. Nhai. Be nieruharn ror toh gari hasoyuk yimam hifa rhu nmbuhat hirahrm.

10

Bingot tarloh mthamoahat fasoh nefm Bro Nkifrar nhai yak thurmoarm

¹ Tamohmpno Jisasr nohmor? Mna yuhat inji korht. Bingot Bro Nkifrar Mosesrpnio yihato boririfhu nuhasmohat boririfhu nuhasmorr Bro Nkifrar pno kfo bruttna inji naneft. Kfo hta nuhasmorrn Judam nd mrokfo yuhat hikmoum. Nd rom boririfhu nuhasmo yuhat hikhato kfo tatomoahat memoum, “Ka tot tu hifa rhu nmbuha yakyuk yihotat.” To nhai. Tu hifa rhu nmbuhathu yakyuk yihotat tot rirhumout. Rom be inji mkndh wuna tanymoumt tu yihota yuhat. Rpa rpa gunyjimm rmont yihato Bokis Kontrakt rim frpuri wunamoahat yimaroh fasoh nefm nhai yak thurmoarm. ² Nd rim frpuri wunamoahat kkut Bro Nkifrar ndt htihato yimaroh fasoh nefm bi ayak thuhern, nhai tfit duka krho hanyhato wompam yi hatohrfotm. Nhai. Bi nd rpa yispno yak thuhafotm nd tarloh mtha hingerneft be myafhonirfomt. ³⁻⁴ To nhai, gunyjim gunyjimm kcupam yakhato Bokis Kontrakt thu ppru wunamoahat Bro Nkifrar nhai yak thurmoarm. Nhai. Nd fasoh nefm rhumoatm tfit waduka thu waduka thumoumm.

⁵ Ndnatn Jisasr yuhre bbinsoft nia yibon hanyetrn Jisasr sinyahato Bro Nkifrar kfo memorr;

“Yeshri mhta hihato tarloh mthamohat
nhai hti wofnrmonm.

Yemro skurn gbefr nhai wofnrmonr.

Inji hti hhrekhato wakfomotn bbinsoftu yimaroh thatipt kanjo fak
nhombra-nimoya.

⁶ Yemrom yakhato tarloh kandhi gunahato krn gbefr muhwohat
ndm nhai mthatihato yindhor-kahn.

Yemro kkut yakhato thu pprimoahat

Bokis Kontrakt nhai ndm htihato yima yuhur yindhorroarm. Nhai.

⁷ Bro Nkifra, wahtina. Na asoya.

Ni tamoh dukefm korhwomn, mirahn aduka kinyakiya.

Tunhu bro rfa borngt kfomo yuhatn kanga,

‘Nann anohkahta nanhu kkut htihato

yimaroh fasoh nefm yak thuhiyann, nhai mrokfom.

Na yibonwa nohneft.’ ”

⁸ Nd ror barkof wukfonamo mrokfot tfit wompam kfo memor, “Yeshri mhta hihato tarioh mthewohat nhai hti wofnkahn. Yemro skurn gbefer nhai wofnkahn. Yemrom yakhatu tarioh kandhi gunahato krn gbefer muhmohat ndm nhai mthatihato yindhorrmoa. Yemro kkuu yakhatu thuprimoat Bokis Kontrakt nhai ndm htiato yima yuhur yindhorrmoarn. Nhai.” (Nd nd nefm Mosesr Bro Nkifrapno yakhatu yimam hikmoa nefm nhai yak thurmoamm yimam namoa fasoh nefm.) ⁹ Ndnatn Jisasr kfo memor, “Bro Nkifra, wahtina. Na asoya. Ni tamoh dukefer korhwomn, mirahn aduka kinyakiya. Tunhu bro rfa borngt kfomo yuhatn kangr, ‘Nann anohkahta nanhu kkuu htiato yimaroh fasoh nefm yak thuihyann nhai mrokfom. Na yibonwa nohneft.’” Ror inji kfomohat to nd nkifra hingrneft nkifram hingrnamoat fak thumort. Tfit turhu nfri hingrney yuhat fak htamor. ¹⁰ Jisas Kraistr Bro Nkifrar kfomo yuhatn hikmorn nohmor. Nhai bok yiha noh hatohrmor. Nhai. Rpa noht nohmohat to be. Nd yiharpa nmoh fasoh nefm rorn yaknihato mhanohmotrm nom sfno yimanomn Bro Nkifrar htiato yindhorrwor. Nhai be sfno, bi Jisasrn mhanohmorm nmoh fasoh nefm.

Kraisr nohmo yuhatn tot tu fasoh nefroh yak thu yuhat

¹¹ Prism tarioh mthaneft hwe fnah hwe fnah tarioh mthewum. Nd rom tarioh mthewa yemrom nhai wom nndohtet nndohtet yemrom yakhatu tarioh mthakahn. Nhai. Be rpahtet yemrom yakhatu tarioh mthewum. Rom inji newohat Bro Nkifrar nhai nd tarioh narotwa gbefer mthatihato yak thuhikahn fasoh nefm. ¹² Prism yiha yiha tarioh mtha hatohmoum. Jisasr ror nhai inji na hatohrmor. Ror rpa noht nohmohat to be nd yiharpa yima bugaroh fasoh nef bugam yakni buga hemorm rorn mhanoh bugamorm. Mhanohhato be mrhumor Bro Nkifrarhu tu bro yufa yahuka tirmifko. ¹³ Mrhu-hato afo garitr Bro Nkifrar, kangr, “Nd yimam na Jisasa tone dbombha hatohwa yimam afo Bro Nkifrar nanhu yinhitn ahtarm.” ¹⁴ Ndnatn Kraistr rpa nohtpno yimaroh fasoh nefm nohmohat to be rroh yima yuhumio wutham rhumom. Nhai wom tamohm wom rhu hasormom. Bi wuthamn Bro Nkifrar frwus hasiwurmio yima yuhum. Kangr turhu ruheft kanjo aruh hasom.

¹⁵ Nd Bro Nkifrar yimaroh fasoh nefm yak thumo nmbuhat, to mirahko ka turpar pthamort nd mrokfot. Nhai. Tu Bro Nkifrarhu Yafothat to be rpa yuhat kfo hikmof. Nd Bro Nkifrarhu Yafothat kfo memot, ¹⁶ “Bro Nkifrar kfo memor, ‘Tfit kto rompno kndhakruha nfri yihotarhu hingrneft tfit nndo rhuraht. Nanhu boririfhut yimaroh yima yuhum rhuraht. Yimaroh yima yuhum rhuruhatt nd boririfhutn yak hta bohtarahtn na Bro Nkifraya hikneft.’” ¹⁷ Tfit wom kfot kfo memor, “Rom wommpno nayuk tamoh tamoh nefm nann yuhuwafhato yak thuhiruhanm. Rom nayuk fasoh nefm nhai tfit duka-rhotann.” ¹⁸ Bro Nkifrar bi mong trohefirm nd yimam nayuk fasoh nefm nhai tfit yemrom yaknihato mtarioh mthakfot. Nhai. Ror to be bi mong trohrn nhai tfit wom dukakahrm.

Bro Nkifrarhu dukefrparn rhuhato Bro Nkifrapno brbo yikfot

¹⁹ Barenko, Bro Nkifrapno brbo yinyeft, bi nhai wom mrokfom. Jisarrhu kkuu bi yohnemotn nmoh fasoh nefm bi fak thumorm. Mirahko tfit wom aduka kinyaki hanynom Bro Nkifrar yorhwa tkitt yinyeft. ²⁰ Nd Bro Nkifrar rhumoa tu Nngrajoh Hnaru Gnar bro yikop rmonthar hir rafomourr. Nhai yimam yihom fnahnikfot. Jisasr nohmo yiha nd rmonthar

buha wuyoh tnehakmorn myoh tnehnimorn mku mku rim hir mhirnof. Nd yiha Bro Nkifrar rhumoa tkitt yihotett riruhakmot. Bingot nhai yihotett rhurmot. Jisasrn nd nfri yihotar fak nukakmorr. Tor tu Bro Nkifrar pno yita yihotar. ²¹ Jisasrn nd nfri yihotar hingrnahato ror yimorn hefenrhu bro tohak prisr tohwor. Tohhato Bro Nkifrar hikwa yimam rorn tohukatohhato kukatohworm. ²² Bi Jisasrn nohhato nd nom hta rafomoa nefm bi rorhu kkutn frwus bowus thumotm. Frwus bowus thumotm bi mong troh bugamonomm. Mong trohhato baftaismonom. Ndnnetn nom Bro Nkifrar pno yinyeft be rorpparn duka duka yikfot. Nom Bro Nkifrar pno yinyeft duka kinyaki hany juha. Bro Nkifrar pno brbo ainyom. ²³ Bro Nkifrar bi kfomor hifa rhu nmbuhat hanyeft. Ror kfoyuk mrokfom nhai kfo furakahrn. Kangnom hefenrko he mifrahnom nd hifa rhu nmbuhat. Ndnnetn nmoh dukefm nd Bro Nkifrar kfoyuk mrokfotn duka duka rhu hasokfot. ²⁴ Nom Bro Nkifrar hikwanom tunom nahti duka nahti dukakfot. Womr tamoh nefeter, ni womn yihato womr hti dukakfot. Tawo womr ninhu neft htihato ror nd yuhat hikrahr. Tunom inji rinahtiyak rinahtiyak narahnom be nd nefrpat rhurahtnom. ²⁵ Wanyakmoya memom, “Rhu rifinyeft nhai rpat sinya bugahato rpat rhu rufinykahko.” Womn turoh kunymn korh hasiwum, womn nndo nndo nnto nnto habriwum. Ndt nhai hifa neft nakahko. Jisas Krairhu nia yihar bi brbohwr. Ndnnetn tuko rpat ruhato Jisasrhu mrokfom nakfo bmta nakfo bmtakfot. Nakfo bmta-ruhakomn Jisasrhu mrokfot nhai yafho thuruhatkomt.

Bro Nkifrarhu Yonr mong troh duha

²⁶ Nom bi Bro Nkifrarhu fipet mrokfot wanyetnom ni womn mirahn frfnahniato akfo amiya, “Bro Nkifrarhu mrokfot afo niko womrpako warihikaf hanykomt. Na afo wurhat rim yau-efiwa.” Ni yima inji wany sany hany-hato mong trohnirahn, na kfiwann, be tu yohrafo tanyrahnt tfit tunhu niayuk yihotat. To fitoh yuhat tfit nieruha? Bro Nkifrar nhai tfit wom yakmiyak-ruhatrn. ²⁷ Be bro yakrme dukefrpno Bro Nkifrarhu bro kotkfot toh gari hasorahn. Toh gari hasohato nd bro kotkfotn ni nd Bro Nkifrarhu mrokfom mong trohyuk yimani ror pno nahti dbnotwa yimam rpat yakruharko tu bro funa nanyjaret kahtn yiho turahrko. ²⁸ Afo yat k yuhat yimam tohmohat Mosesr kfo nuhasmorm Bro Nkifrarhu boririfhut. Nd boririfhut wom yimar kfo hanyjbornanihato yifirn wom neft rim netr, husf o husfirpa yimam htihato kfo nriyafmr, nd yimar nhai yuhuwafhato rhurmoar. Nhai. Kotkfot tohniato was hehur thumoumr. ²⁹ Nd yat k boririfhut hanyjbornamoa yimam inji namoumm. To tfit arihat Jisasr htamo nfri yiho-tarhu boririfhut yimam hanyjborna-nineft ka hifa ruhahm? Na kfiwanko nd yimam be tu bro krho nmbuhat yakrahm. Wom yimar Jisasrhu kkupamn yihotar yak nukektmr rorhu fasoh nefm Jisasrhu kkupaye yuk kifs thunihato tfit kto mtoh kekuthato Jisasrhu kkupam kfo famurm, “Nd Jisasrhu kkupam be kkupa furayem. Nhai yafotha duhatem.” Nd yimar inji kfoyukr bro krho nmbuhat yakrahr. Yo womt, inji nd yimar kfo famur, “Nd Jisasr hingrnamo hingrneft nhai tu Bro Nkifrarhu Yafothatpno hingr-narmor. Fasoh tahi yifonroh bbukeft-pno hingrnamor.” Nd yimar Bro Nkifrar yak tutfarahr. ³⁰ To tamohmpno yak tutfaruharr? Mrokfot Bro Nkifrar bi kfomort. Kfo memor, “Hanyjborniwa yimam na tuka htiruhamn. Nhai wommn. Na tuka.” Wom mrokfot kfo memor, “Tuha

kot tohyuk tkittn tukanhu met yindariroh nefm yak nhtaruhanm.” Tot inji Bro Nkifrar kfomo tngt. ³¹ Bro Nkifrar tu bro nanyjaret Nkifrayer. Ror namburhato afrwon-tarnom, nhai toh bmtaruhatnom. Mirahm, “Nndo kkr ritmn rim wuttho yibuknewum.”

Bro Nkifrar yakitoh kihhato tohkfot

³² Niko tuko wadukako niko barkof Bro Nkifrarhu mrokfot wanyhato rihikakmohat kmi thofm htihato nambur memom, “Tamohmpno nd Jisahr hikwam?” Inji namburhato memom, “Wom nefm anakahtnom tfit mkeku-takrahm.” To nhai. Niko hifa nhai wohsismoko. Hifa toh bmtamoko. ³³ Wom yiham yima rifiny buhamn kfo sinou bosinou, kfo yimtna boyimtna, kuninfar wuna inji namoumko. Wom yiham womm bi inji newumme niko womko rpat yihato rpat womm tohnuhaknimoakomm rpat kfo nyingo fnah inji namoumko. ³⁴ Niko toh hasohato yimam niahato nikmoh womm mkitu-makhato kalabus hanymoahat niko womko nhai yakrme trohrmoa-komm o be yakutohrmoakomm. Nhai. Rom finji namoumm niko womko brbo toh tkaf inji namoukomm. Krhopam rpat fakmoukomm. Yo yimam niahato nikmoh wuskam myak rhoptakni hemoahat nhai namburhato tone hik inji narmoakomm. Nhai. Niko be hifa yindhor yima yuhumpno kfo memouko, “Nhai mrokfom, ayaknimm. Nom nhai namburkoft.” Nikmoh dukefm duka memouko, “Tamohmpno nd fasoh wuskampno anamburnom? Nmoh tu dborioh wuskam Bro Nkifrar kfomom yura hefenrn korhwom. Nd fasoh wuskam ayaknimm.” Ndhtet dukefmpno rhumouko.

³⁵ Niko hifa Jisahr fak hiknamokomr. To tfit mirahko tfit ayafhoninomr. Yakitoh kihhato toh bmta hasorahko, tur yimayer hti dukarahrko. Nd ror kfomo hifa dborioh rhu nmbuhat hirahrko. ³⁶ Bro Nkifrar kfoyuk yihota yuharpas yak hik hasokfot. Inji yak hik marnya hasorahkomr, be nd Bro Nkifrar kfoyuk hifa rhu nmbuhat wuruh yiharn yakrahkomt. ³⁷ Krairhu yawihna yihar nkifram yakitohmo rfa borngtn kfo memot, “Nd yawihnayuk yimar bi brbohwor yawihnaneft. To mirahko ka wukuknarahr yawihnaneft. Brbo htiyekwokomr. ³⁸ Yimam nanhu yima yuhurn rhu hasiwamn ror fawihner, na yindhorhato yakrhoyanm nanpno toh nkifrani-rahm. Yimam nanhu yima yuhur rhu hasohato tfit kto nd yima yuhur fafho thunimr, be nd yimam ror yawihna thombat na nhai yindhorrotanm.”

³⁹ Awi nom nhai mrokfot. Mirahko aduka kinyakinomr. Nom hifa. Nom nhai wom yimam newa kanjo Bro Nkifrarhu yima yuhur rhu hanyhato tfit kto yafho thukahnomr. Nhai. Nmoh yima yuhum Bro Nkifra hikwa yimaroh yima yuhum kanjo korhm. Ndnnetnomn nom Bro Nkifrar yakruharanom rorpno toh nkifrarahnom.

Bro Nkifrar yakitohhato toh bmta kihkfat.

11

(Sapta 11–13)

Bro Nkifrarhu mrokforoh wany yakio yuhat

¹ Bro Nkifrar kfoyuk mrokfom wany yakioneft finji wany yakiofot? Wawanyko. Wom mrokfot Bro Nkifrar kfo famur, “Hifa rhu nmbuhat hiruhanko.” Nom nd mrokfot wanyhato nmoh dukefm be nd ror kfoyuk mrokfotn bro yima yuhum htahato duka hasinomm, tot ndhtet dukeft to tu wany yakioneft. Hus yima yuhuf rhuhat duka mirahn, “You ka?” Ndhtet

mduka you ta neft, be nhai yakruhatnomt. Ndt nhai tu wany yakioneft. O Bro Nkifrar kfo famur, “Nd yiha inji naruha.” Nhaf to inji. Nom wanyhato nhai bok dukefm yakrfonom. Be nd ror kfoyuk mrokfotn yima yuhum yak tkafhato tohnom, be nd mrokfot fipect rhuraht. Tot tu wany yakioneft. ² Nmoh nkifram to inji hik hnamotmr fak marnya hnamorm. Bro Nkifrar kfoyuk mrokfom nhai bok dukefm yakrmoamm. Tamoh mrokfom kfirm be nd ror kfoyuk mrokfom wany yakiohato rroh yima yuhumn fak tkafmoum. Bro Nkifrar inji htihato rroh rhu nmbuham fak marnyamourm. ³ Nom Bro Nkifrar kfoyuk mrokfom nmoh yima yuhum yakitoh tkafwanomn duka kangnom, “Mounti bbinysoft nhai womm kformotn trharmof. Nhai. Bro Nkifrar kfomotr trhamof. Ndar bbinysoftu wuskam nom htitam nhai wom shrm yakhato hingrna nhombraf hanyhato trharmom. Nhai. Be tnge pthamotr turoh fijo trha nhombra hanyomom. Bingot nhai wom tamohm rhurmotm btn ndm yakhato hingrna nhombraf hanyrmorm.”

Aber Inok Noarom Bro Nkifrarhu mrokfot wany yakiomo yuhat

⁴ Aberr Bro Nkifrar kfoyuk mrokfomn wany yakiomormn yemrom yakhato tarioh mthamorrko. Kenr ror nhai. Bro Nkifrar kfoyuk mrokfom nhai wany yakiormorm. Aberrpar Bro Nkifrar htihato kfo yindhormorr, memorr, “Aber, ni tu dborioh yimaye.” Aberr nhai wom tohkahr, bi nohngot-mor. To tfit nom arihat ror Bro Nkifrar wany yakiomo kindo nom Bro Nkifrar wany yakiokfot.

⁵ Enokr ror nhaf inji. Ror nhaf Bro Nkifrar kfoyuk mrokfom wany yakiohato tohmour. Ndnetrn Bro Nkifrar be yima tire fakmorr. Nhai nohrmor. Bro Nkifrar yakmotrr yimam hambroti hambroti nhai htirmomr. Enokr yuhre bbinysoft afo tohetrn Bro Nkifrar kfo memor, “Enokr na kfoyuk mrokfom wany yakiowatrm na yindhorwanr.” ⁶ Yimam, Bro Nkifrar kfoyuk mrokfom nhai wany yakiokahmm, nd yimam Bro Nkifrar be nhai yindhorruhatrm. Yimam duka kangm, “Bro Nkifrar brbo yorhwarn yak marnyarahrnmoh tamoh tamoh nefm,” nd yimam nd dukefr yorhwatrm yima yuhum sinyewumm Bro Nkifrarprno brbo yi tohneft.

⁷ Noar ror nhaf Bro Nkifrar bi kfo duka hta memorr, “Tu bro hnut nierahrt. Nieruhatn bbinysoft rhuyuk tamoh tamohm nd hnutn yak bati bugarhtm.” Nd Bro Nkifrar kfomo hnud bbinysoft thofm nhai htirmomt ndhtet hnud. Noar nd Bro Nkifrar kfomo mrokfot wanyhato rorhu yima yuhur fanhomorr. Nd duka yanuheft-pno bro sift hingrnarmort. Nd hnud niyahat rori rorhu nd kunys rom nhai hnud fune habohirhato nohrmorm. Bro Nkifrarhu mrokfot nd yima Noarpar wany yakiomort. Ndnetrn rorparn mfak htanimorr. Ndwom ndwomt nd hnutpno bati bugamom. Bro Nkifrar kfo memor, “Noarpar nanhu mrokfot wany yakiowatrn rorhu toh nmbuhat toh marnyewurt.”

Abraham Sararof Bro Nkifrarhu mrokfot wany yakiomo yuhat

⁸ Abrahamrhu tndht nhaf inji. Bro Nkifrar Abrahamrprno yihato kfo memorr, “Ni Abrahamn ndar tunhu kmit wahtanykahnt waiswa wuri wom kmitn. Tukann yak htaf hanyrhotann nd na dukayuk kmitn mifnahrhn. Nd ni mifnahrhu tkitt be ninhu bbinysoft rhuraht.” Abrahamr nd mrokfot wany-mohat nhai marimor, “Hanyjbornahato rhuruha.” Nhai. Ror be wany yakio-hato sinyahato yimor. Ror yimohat nhai kfo marimor, “Ndha nd kmit kita.” Nhai. Be sinyahat furanihato yimor. Be nd Bro Nkifrar kfoyuk

tngt wany yakiohato hikmor nd Bro Nkifrarhu tng yuhatn. ⁹ Abrahamr yimorn Bro Nkifrar wom kmitn fak htamorr. Nd kmit o bbinysoft bi yima tohet tkitt fak htamorr: Abrahamr bi yima tohet tkitt yak htamohat nhai kfo marimor, “Tamohmpno nda yima tohet tkitt Bro Nkifrar yak htamora? Tfit wom tkitm yiruha.” Nhai. Ror be nd Bro Nkifrar bi kfoyuk mrokfot wany yakiohato rorhu dukeft duka memor, “Na bi ndar tkitt fak htamora, to tfit finji wom finji yirhoya?” Be inji dukahato ser kunymn toh habrimom rorhu yon tuhtirpno. Aisak Jekofrof, rof nhaf be nd Abrahamr toh hnamo toheft be inji tohmof. Be nd Bro Nkifrar Abrahamr-pno kfomo tngt wany yakio hatohhato tohmom. ¹⁰ Abrahamrhu dukeft duka memor, “Tamohmpno ndar bbinysoftn kuny kihato kmiyeta rhurhoya. Hndhorma. Bro Nkifrarhu tire hinger-nayuk kmirpat tohruha. Nd kmit nhai mibatniruhatt. Be inji toh nkifranirah.”

¹¹ Yo Abrahamrhu met Sarat, rot nhaf inji. Sarat bi tabon bugahato bi bayett Bro Nkifrar niahato kfo memort, “Ni yon yindarir hiyaurahn.” Rot nd yon yindarirhu hiyau mrokfot wanymohat nhai marimot, “Duka mmoruhant.” Nd mrokfot rothu yima yuhurn hmbritamott. Rothu dukeft duka memot, “Bro Nkifrarhu mrokfom fipetm korhwom. Na kfomora yon yindarirhu hiyauneft nd mrokfot nhai yi furaruhatt.” Rot Bro Nkifrar kfoyuk mrokfot fakitohtamott ndnatn Bro Nkifrar kfomotr yon fanett ruhato yon yindarir hiyaumotr. ¹² Abrahamr bi tabon bugahato yon kasinya yimbuyef duhatr, nd yonrpnno be tu yonmari yon riffhur kasinyamor. Yon riffhur Abrahamr kasinyamor memom, “Nndo guny mounri nungur tik furayer. Nhai yimam thomnakfot.”

¹³ Abraham, Aisak, Jekofrom Bro Nkifrar kfoyuk mrokfom nhai mmormoamm. Rom be nd Bro Nkifrar kfoyuk mrokfom yakitohhato fukatoh hasomoum. Tohhany tohhany rom nohmom. Nd Bro Nkifrar kfoyuk tamohm rom nhai hti htanihato noh-rmom. Nhai. Yima nfrim tohmohat rroh dukeft be duka memom, “Nda bbinysoft nom tohwat be womroh bbinysoft tohekwonom. Kto nd Bro Nkifrar kfoyuk shrm hirahrmom. Hifa, nhai mrokfom.” ¹⁴ Rom kfo memoahat, “Ndart nhai tunmoh darbn bbinysoft tohkahnom,” ndt yuwi wom nfri kmithu yakhato toh yibonetmn inji kfomoum. ¹⁵ Nd rom barkof toh tanymo bbinysoft nhai wom dukarmoamt. Adukamt tfit tum toh tanyukko yirmom. ¹⁶ To nhai. Hefenn tu hifa nfri tkitt yak yibonetmn nhai wom dukarmom tfit tum toh tanymoko yinyeft. Bro Nkifrar bi fak htatahemorm rorpnno toh nkifrayuk kmit. Ndnetmn rom Bro Nkifrar kfo nakuhato kfo memoahat, “Bro Nkifraye ni nmoh nkifra mife,” Bro Nkifrar inji wanymoahat yima yuhur yindhormour.

¹⁷⁻¹⁸ Bro Nkifrar yihato Abrahamr kfo memorr, “Aisakrn ni Abrahamnhu frikeft kasinyarahrt.” Bro Nkifrar memor, “Afo htiruha Abrahamr nanhu mrokfom hikrahrt?” Ndnetrn memorr, “Abrahame, ninhu rpa yon Aisakr wawaskahn na watarioh mthatwona.” Abrahamr wany yakiohato nhai hanybornarmor. Abrahamr bi memor, “Aisakr washato Bro Nkifrar tarioh mtharuhahr.” ¹⁹ Abrahamr turhu yonr was hany sitamohat rorhu dukeft duka memor, “Nanhu yonr rpa mifer. Was thoft be Bro Nkifrarn tfit kasin-yarahrr.” Nd mrokfot inji akfonomt. Aisakr bi nohyuk tkitt rhumor. Nohyuk tkitt bi ruhetrn Bro Nkifrar fakmorr. Abrahamr ndt htihato duka memor, “Nanhu yonr bi nohet; Bro Nkifrarn tfit kasinyamorr.”

Aisak Jekof Josef from Bro Nkifrarhu mrokfom yakitoh tkafmo yuhat

²⁰ Aisakr ror nhaf inji. Ror Bro Nkifrar kfoyuk mrokfom nhai marimor, “Kfo furewurm.” Ror wanymoahat wanyhato fakitoh tkafmourm. Rorhu yon Jefok Isorof kfo tebos boteboshato kfo hta bohtamor. Womr niamotr yak marnyanimorrn kfo hta memorr, “Ni kasinyaruha yon frikeft Bro Nkifrar yak hta bohtarahr.” Tfit womr niamor nhaf inji kfo hta memorr, “Kto ninhu toh nmbuhat Bro Nkifrar inji yak htarahrt.” Inji inji kfo hta bohtamor.

²¹ Jefokr nhaf inji. Bro Nkifrar kfomoa mrokfom yakitoh tkafhato tohmour. Wuroh noh yibonruha kio musspno rim kio bmtatahato turhu yinem Josefrhu yon Ifrem Manasarof nakuyakmorf. Nakuyakhato yak marnya bomaryahato kfo memorf, “Kto Bro Nkifrar nifnihu toh nmbuham yak hta marnyarahrm.” Jefokr ror inji.

²² Tawo Josefr nhaf inji. Bro Nkifrar kfoyuk mrokfom ror yakitoh tkafhato tohmour. Wuroh noh yibonruha turhu tangiyemrom nakuyak bugakmorm. Yimotm kfo nuhas bugamorm Bro Nkifrar ror pno kfo pthayuk mrokfom. Kfo ptha memorm, “Nom Isrernom nda Ijif tohwanom be wom yiha Bro Nkifrar yakniruharnom tfit Kenanko hanyraharnom. Nhai asha tohruhatnom. Wom mrokfot kfiwanko. Asha yuhre tohhato na nohniya, nanhu tpitikt mirahko arhut. Kitwonom tpitikt yaknihato tu Kenantn tfit hanykfot.”

Mosesr Bro Nkifrarhu mrokfom wany yakiomo yuhat

²³ Mosesrhu yifammaf nhaf inji. Bro Nkifrarhu mrokfom nhai tuhaftar-moafm. Rof nhaf wany yakiomoufm. Mosesr nurnimohat rofhu dukeft duka memof, “Nda yonr Bro Nkifrar hifa hti yindhorworr.” Ndnetn Ijifthu kingrhu mrokfot nhai yak hikhato marimof, “Tektn yihom tuhafrahnonr.” Nhai. Tu hifa dborioh yonrn yak rir borirakhato hta kafrohafmofr. Husfirpa yamm nhai yak nriyafrmofr.

²⁴ Mosesr nhaf inji. Bro Nkifrarhu mrokfom ror be wany yakiohato tohmour. Kingrhu yon mettn duge warhetrn yimam kfo yiritihato kfo memoahat kingrhu yon metthu yoner Mosesr, tu Mosesr inji wanymoahat kfo memorm, “Na inji akfowohkma. ²⁵ Nanhu sinya tanyukkorhof yimam tu Bro Nkifrarhu yon kunyet. Rompno kanga rpat atohkahnomn rom yekwa kropham rpat ayaknom, nhai mrokfom. Na wofnkaha kingrpn tohhato rorhu fasoh nefm hikneft. Yimam ndhtet rhu nmbuhat rhuyukm nhai ndhtet rhu nmbuhat toh nkifranikahm. Nhai.” ²⁶ Mosesr duka memor, “Nom hbhakruha yimar nd frikeftn trharahr. Ndnetn nhai wofnkaha Ijifthu bro yimaya tohhato rorhu fasoh nefm hikneft. Na wofnwa tu Bro Nkifrarhu yon kunyspno rpat tohhato rpat kropham yakneft. Kto Bro Nkifrar mashoft, ‘Hifa rhu tkitt ahianm,’ na rpat yak htarahrnom.”

²⁷ Mosesr nd dukeftpno Ijift htanymort. Ijifthu kingr nhai hifa htiorm Mosesr Ijift htanymohat. Mosesr ror bi turn htimort Bro Nkifrar duka htamo dukeft. Ndnetn wany yakiohato nhai yakrmorm nd Ijifthu kingr. Nom yima mif nyingetnom nhai Bro Nkifrar htikfot. Mosesrpar Bro Nkifrar yima mif nyingaye htihato nhai marimor, “Wohsisruha tamoh tamoh nefm.” Nhai. Toh bmtamor. ²⁸ Mosesr Bro Nkifrar Pasofa yuhathu mrokfom kfomohat wany yakiomorm. Wany yakiohato kfomorm turhu yimam sifsifruha wasneft. Kfo memorm, “Sifsifr wawaskahkomrn, kkut yakkahkomt nikmoh kuny yifhatikroh yirawih mimn kkupam ki hanykfot. Ki hanykahtkomm Bro Nkifrarhu moun-motr niahato yimaroh nkati yonm

yak bati hne thombat nikhom kunym yau trohnrahrn. Nhai nohruhatn nikhom nkati yonm.”

Bok Isrerm Bro Nkifrarhu mrofkom wany yakiomomm

²⁹ Isrerm nhaf inji. Rom Bro Nkifrarhu mrofkom wany yakiomomm. Ndnetmn Retsit yau hayukmohat bupam mano mano yihom rhu mrhumotm sfnoh bbinysof furatn fau hayukmom. Ijifthu amim memom, “Atono hikkah-nomm arimak kitohnomm,” nd bu rifhu mano mano wuyoh nafurnehato fryifafmofm.

³⁰ Isrerrpamn nhaf Bro Nkifrarhu mrofkom wany yakiohato Jerikothu yonmari tahi gnam fau habrimotmm nd tahi gnam foh nafurmom. Sikispela marm fau habrimomt nd kmi gnat. Sefenyuk marrpno nd Jerikothu tahi gnam wufoh nafurnamom.

³¹ Nd taun Jerikot tohmout wom ijoh tonayet met Rahaft. Rot nd kmit tohato Bro Nkifrar namao nefm wanyhato mrofkom fakitohmoutm rothu yima yuhurn. Ndnetn Isrerm toneyaknihato nd Jerikothu hanyjbornet yimam was batiyaknimohat Ra haft nhai wasrmomt. Rahaft was duha yimo nmbuhat nhai be sfno. Jerikot hti tmbho harhuyuk yimaf Josuar tkrurafmof, rotn fak kafrohmotf Jerikothu amim was hany sitamohat. Tom inji wom womroh yufami tndhm Bro Nkifrarhu mrofkom yakitohhato tohmoam.

³² Tfit wom wom yimaroh yufam Gideon, Barak, Samson, Jefta, Defit, Samuer yo profetm, rom Bro Nkifrarhu mrofkom wany yakiohato Bro Nkifrar tohnhomoahat nhai kfo hik buga-rhotanm rroh tndhm. Be inji kfohi hanyruhanm. ³³ Rroh womm Bro Nkifrar kfoyuk mrofkom wany yakiohato tohnhomourm. Tohnhomoatrm wom kmithu kingrhu amikfotpno yi nnaoahat romn sinyahato yiho hathumoumm. Wom kmim tohukatohmoahat Bro Nkifrar yak htat hanyoatrm kmim tohukatoh marnyamoumm. Rroh womm kfo bruttnaomoahat Bro Nkifrar wanyhato fak marnyamoumm. Yo womm laionm tohyuk muhm tumohat laionm nhai yejborfarmomm. Bro Nkifrar fak tasifmorm laionroh tngm. ³⁴ Rroh womm kaht tumohat kaht nhai tandhirmotm. Rroh womm memom, “Awasmomm.” To nhai. Yakrmehato tohmom. Womroh thatipm tatko inji namoahat Bro Nkifrar tfit thu bmtamoumm. Womm yahrt yimoahat Bro Nkifrar thu hamuhmoatrm memom, “Nndo het yaum tohwom.” Wom kmi thofm niahato rroh kmim-pno yuwi mtah tebfu yaknehato memom, “Rroh tamoh tamohm ayak rikohnomm.” Yudbat rpa rpa hik tubatuyafmoumm.

³⁵ Rroh womm bi nohetm tfit sinyamotm mmemrom yindhormom. Womm yahrt kmim kiminysafmoumm. Memom, “Inji nakahtnomm Bro Nkifrar mong trohrahmr.” To nhai, rroh yima yuhom Bro Nkifrarparn kakitohmoum. Nhai yafho thurmoamr. Duka memom, “Tamoh nefm atoh bmtanom kto tu dborah rhu nmbuharpat rhu nkifrani-rahnom hefenrn.” Nd dukeftpno yimam finji namoahat yak marsisatamoatm tabot nohmoumm.

³⁶ Bok yimam nhai be rpahtet krhopam yakrmom. Womm tat noh bonohatato kfo snouhato kuninfari wunamoumm. Womm sene fohm kanjo mkuyakmoamm kalabus htamoumm. ³⁷ Womm fohm kanjo tahiye tahiye fryebhoh nohmoumm wom kmim sinyahato. Womm mim kanjo buha soim tmbhomoumm soye. Womm gon nyisofm kanjo bainate rithuhato hanysekrmoumm. Womm be inji foh nungam kanjo be inji yifamn toh habrimoum. Sifsif meme tham nyuhmoum rmontha mim. Be inji yeshri

duha tamoh wuskapa duha be inji toh mmbrafinysamoum. Nhai wom yuhatn hifa rhu nmbuhat yakrmom. Tu be nhai mif. Yima yuhenn nur finynimoumm. Yimam faso fasoh fak bebtamoumm. Nhai tu hifa nefm narmoamm. ³⁸ Ndnetmn be inji toh habrisamoum yima toh duha tkitmn yo womnam yura kminysofm yimoum. Nhai kuny juha be inji tahi muhmn o tahi yengongmn toh habri-samoum. Womnam be inji yiro bb muhmn tohmoum kmbrum kanjo. Romn sinyahato hifa hifa nefm namoumm kmi thofm. Tawo kmi thofm nhai tawo hifa nefm narmoamm. Romrpamn memoum, “Ka nmoh yima yuheteme, nom hifa nefm anakah-tnomm ndt htiruhamn tawo hti dukarahmnom.” To nhai, fasoh hti srthumoumm. Kmi thofm nhai wofnrmoam Bro Nkifrar hiket yimam-pno tohneft. Ndnetmn yauyenm kanjo tabohikmoumm.

³⁹ Nd yima yimaroh mrofkom nom bi wany hnem nd yimam Bro Nkifrar kfoyok mrokfom wany yakiomoumm. Ndnetmn Bro Nkifrar yindhorhato rroh toh rhu wiyauyau nmbuham fak marnyamourm. Nd rom yima nfrim tohhto wany hnemoa hifa rhu nmbuhat Bro Nkifrar kfomoat, bi nohniyetmn nd hifa rhu nmbuhat yakyuk yihotat Jisasr hingrnarmort. Nhai hti htanirmomt. ⁴⁰ Ndt nhai be sfno inji rhurmot. Bro Nkifrar duka memor, “Kto nd hifa rhu nmbuhat yakyuk yihotat hingrnarhoyantn be rpa yiharpa nd bingot nkifrapno tohhto nanhu mrokfefm hikmoam yo arihathum be rpa yiharpa yak nhafo-hakrhoyanm be nanpno toh nkifra-nirahm.” Bro Nkifrar inji dukamor.

12

Jisasrn nmoh nyingam be rorpar hti hti tonekfot

¹ Nd na kfohne nkifram rom bi yura hefenr yorhwamn nom kukatoh hasiwumnom Bro Nkifrar hikwohat. Ndnettn nom hhrek duha Bro Nkifrarhu hikneft. Bro Nkifrar hikhato dborioh nefm nakfot. Bro Nkifrar hikwohat yimam tone resiswa kanjo inji tonitwonomt. Nmoh nkifram kukatoh hasiwum yura wuruhato nom Bro Nkifrar hikwohat. Ndnettn nom nd Bro Nkifrarhu resiskfot tohneft, tamoh tamoh kurhet shrm, mfhatn o tirmn o wuram o yimanysoftn korhm, yak thu bugahato yima furanom tonekfot. Ndmprno tonirahnom be nd kurhet shrmn teh krhorahmnom o womnam teh knbasakruhatmnom suhrahnom. Briyoh yima furanom nd Bro Nkifrarhu resiskfot tonehany tone hanyhato wuroh mtone tmbho tkitt mtone fnahrahnomt. ² Nmoh nyingako tohakyuk yima Jisasrn nmoh nyingam be rorpar hti hti tonekfot. Nhai mano mano riyukatoh ayukatoh hanykfot. Rorn kfo htak hanyruharnom tonihany toni hanyhato be Bro Nkifrar yorhwa tkitt mtone fnahrahnom. Tot mtone tmbhoyuk tkitt. Jisasr bgre misn noh-mohat, nhai marimor, “Yimtnaruha.” Nhai. Rorhu dukeft kto hifa rhu nmbuhathu yakneft dukahato nhai yimtnarmor bgre mis nohmohat. Fura nd yimtna rifthur yak marsisanihato bgre mis nohmo. Ndnetrn arihat bi hifa tkittn Bro Nkifrar yimam bro yufa yahuka mkuko korhr.

Bro Nkifrar kfo hta yuham tohrahnom be toh marnyanirahnom

³ Jisasrhu tndh mrokfot htiyahato tohkfot. Ror hti srthumoa yimam fasoh nefm namoahat, nhai finji narmoar. Ror be tngt youkihato tohmour. Be Bro Nkifrarhu dukefrparpno tohmour. Nd ror tohmo yuhat toh hikkfot. Yimam finji naknaneft o krhopam henyefst toh bmtakfot. Inji naruhakomn

Bro Nkifrar nhai thu trohruhatkomr. ⁴ Niko kmi thofm nayuk nefm hti hhrekhato sinya trohwohat nhai ndt hti namburnihato wasrromko Jisasr wasmo kanjo. Nhai. ⁵ Wom kfo bmta mrokfot ka nhai yakitohkahkomt? Bro Nkifrar kangr, “Niko nanhu yoneko.” Rorhu gonborngtn nd mrokfot korht. Nd mrokfot kfo kangt, “Ni nanhu yone, hamumiwatn Bror wom nefm newurn o yimbhindangm frdambong-shiwurn mirahn akfo ameya, ‘Bro Nkifraye, tamohmpno inji newana? Inji newuna, be nhai ninpno brbo tohrhota.’ Nhai inji kfo duha. ⁶ Bro Nkifrar htitworn turhu yonn kanjo. Ndnettn ni faso fasoh hamumiwatn inji newurn, ndt htiruhann dukarahn.”

⁷ Tamoh krhopam Bro Nkifrar kahukworko mirahko ayakrme trohnomm. Finji newurko tha hekfot. Ndt htiruhakomn duka tungunarahko. Yifemrom yonm kfo hta bohtiwa kanjo inji newurko Bro Nkifrar. ⁸ Bro Nkifrar turhu yonroh kfo hta yak htaneft bi rinakngitakmort. Nhai be ar nohofrpa. Yimako Bro Nkifrar nhai kfo dbohfa inji nakahrko, ka nhai rorhu yonmifko rhukahko. Wom rorhu yonko arhuko to kfo dbohfa inji narforko. Ka be inji met tmaht yihota yuhat yauhato yakmo yoneko. ⁹ Yo womt, nom damiagnom tohhato hammomoahat nmoh yifemrom kfo nyingo fnah inji namounnom. Kfo nyingo fnahmoahat nom nhai kfo wokrmooanomm. Nhai. Nom be rom kfoyuk yuhatn hikmounom. Ndnettn Bro Nkifrar finji naneft nom sinyahato Bro Nkifrar kfo wok duha. Nhai. Nom be tngm youkihato wany yakitohkfot. Inji narahn nom be yiha yiha tohnhorahrnom. ¹⁰ Nom habhi yonennom tohhato nmoh yifammam kfo dbohfa inji na thoft, rom tu yifammamn kfo dbohfa mrokfom kahukmnom. Bro Nkifrar ror nhai be kfo dbohfa furakahrnom. Ror kangr tur tohwa toheft watohko ndnetrn kfo dbohfa mrokfom kahukrnom. ¹¹ Nd kfo dbohfa mrokfom hayukm afo barkofpam yima yuhum krhorahm. Tfit kto htirahn nd krho yima yuhum kekuthato tu dborioh yima yuhur nieruharn dborioh nefm hikrahm.

Bro Nkifrar hikneft hik marnyakfot

¹² Ndnettn niko toh bmtahato yimam resis tonita kanjo Bro Nkifrar inji hikkfot. Mirahko noheh yimam kanjo ayaunom. Tir wuram wunoh minysafekwomnom yak marsisani hanykfot. Mirahn amkkrrmita. Bro Nkifrar kangr, wayau bmta hany-kahkomn nd ror kfomo hifa dborioh rhu nmbuhat hirahrko. ¹³ Bro Nkifrar hikneft hik marnyakfot. Nikmoh toheft hifa toh marnyakfot. Wom yimam Bro Nkifrar hik hanyhato buha msuhneft niko womko htihat rom tfit sinya tohrahm.

¹⁴ Nikmoh rhu nmbuham be masat ndar bbinysofthu rhu nmbuharoh dukefm yak duha. Yima yuhum miruhato Bro Nkifrar yorhwa kanjo rhukfot. Yimam ndhtet rhu nmbuhat rhu duhatm be nhai htiruhatmr Bro Nkifrar. ¹⁵ Yima yuhum aduka hanyswamko. Bro Nkifrar nomn yuhuwasafato Jisasr tkrurafmotr niamorn minohmor. Ndnettn rorhu tamoh tamoh mrokfom hanyjborna duha. Womr bi Jisasr hikwor tfit womn rorpn yihato ninhu fasoh nefm hanyhato rorpn yihato myak nuhas duha. Inji narahn be nd yimar tfit ninhu nefm rim suhnirahr. ¹⁶ Mirahko nikmoh womr metroh dukefmn be ahika. Yo mirahko Isor namo neft ahiknom. Isor nhai duka marimor, “Nann nkati yona, na tukann tohrhota Bro Nkifrar kfoyuk mrokfo yafothar muhrahra.” Nhai. Yatit dukahato nkati yon yufat nhai wom dukarmort. Inji dukahato tfit wom habhirn tkitt yakhato ror mrokfo yafothar muhrom. Najomr nhai. ¹⁷ Bro Nkifrarhu mrokfo yafothar

bi wom habhirn ptha hmbriyetrn kto najomr yihato mkfo nurmor kfo hmbrineft kfo memorr; “To fitha rhumo? Mrokfo yafothar bi wom habhirn muhmor. To finji tfit yakhato ninn tfit herhoya?”

Bro Nkifrarhu kmitpno brbo niamoko

¹⁸⁻²⁰ Tfit afo waduka nmoh nkifram hikmoa yihotati tfit nom arihat hikwa yihotat. Nom arihat hikwa nfri yihotat nhai wom kfo rafo mrokfot rhukaht Bro Nkifrapno brbo yinyeft. Bingot nkifram hikmoa yihotarn to finji kforuhanom? Bro Nkifrapno brbo yinyeft be tu mfro fakrmemoum. Bro Nkifrar barkof boririfhu mrokfom hemo yiha yura kminysoftnko yawihnehato miruhato pthamohat, nhai marimom, “Ptha finji narahanom?” Tuha kmi tpit rim tohneft kfomohat be fura yakrme rifhurpno rim tohmom. Bro Nkifrar bro kfo kars mrokfom kfo memorm, “Wom fohr kmi tpit yarim tayouti duha. Rim tayoutineft tahiye tahiye fryebhoh gukfot.” Nd mrokfot wanyhato fanhomom. Kmi tpit rim tohhato kmi mfhar wuhtimomr kahr wafuna sinyahato yura mountko toh hamuhmor kah funefr. Nd yuht kminysof bugat grib rifhut thu kasi bugamott. Mount wumirmohat yuht bbinysofett mir bugamout. Toh bu wiform wasinyamohat be tuha ktpir ktpirt tohmom. Asha tfit wanymomko fumrrko tohmohat. Fumrr tohniomotr tfit kto Bro Nkifrarhu tngt wanymomt. Bro Nkifrarhu tngt wanyhato be tuha mifoh rihanimom. Miyoh rihanihato Mosesr kfo memorm; “Mosese, apthawahr Bro Nkifrar nom kakrmitwonom Bro Nkifrarhu tngthu wanyneft.” ²¹ Nki-fram nd tamoh tamoh nefm Bro Nkifrar yawihnamo yiha htimohat masat fanhomom. Mosesr to inji fanho bugamom. Mosesr memorr; “Na to inji yakrmitayann kangm gi nunes kekwota.”

²² Nd mrokfom bi kfim, yatki yiho-tarhu mrokfom wanuko. Tfitn nfri yihotat wadukakomt. Nd nfri yihotar niamokomn be turpno brbo niamoko turhu kmirn. Hefenrhu kminysof Saionr mfnahmoko. Nd kmir Bro Nkifrarhu bro kmiyer. Kutewunomr hefenrhu Jerusalemr. Tu be yonmari rifuhet mounmotm grha yindhor hasiwa kmir mfnahmonom. ²³ Bi nd Bro Nkifrapno nohnita yimam rifinywa kmi hefenr mfnahmoko. Rroh fasoh nefm Jisasr bi yak thuhemotrm Bro Nkifrapno tohwomko. Bro Nkifrarhu nkati yonn kanjo tohwomko bi. Rroh yufam Bro Nkifrar htamorm nd kmi hefenr tohyuk yimaroh yufa htayuk gonborngt. Bro Nkifrapno niamoko. Turparn yimam ndar bbinysoft tohwa nmbuham kak nhtewurm yimaroh toh nmbuham. ²⁴ Bi Jisasrpnio niamoko. Tor rorrpar nd nfri yihotar kndh hanyhato Bro Nkifrapno mkndh fnahmorr. Jisasr turhu kkupaye thu pprihato nmoh fasoh nefm yak thumo tkitt mfnahmoko. Jisasrhu kkut Bro Nkifrar htihato nom nhai kfakkfot rorpnio brbo yinyeft. Ken, Aberrof namo neft rot nndo. Kenr sinyahato Aberr wasmohat Bro Nkifrar htimort Aberrhu kkut. Bro Nkifrar htimohat duka memorr; “Nd yimar Aberr wasyukr tawo yak tutfaruhanr.”

Bro Nkifrarhu mrokfom wanyeft mirahko awany ffi hasonom

²⁵ Ndnnett duk marnyakfot. Bingotrhof gnggr yakitoh hanyhato arihat Bro Nkifrarhu mrokfom wany-neft mirahko awany ffi hasonomm. Bingot nmoh nkifram to inji namom. Bro Nkifrar Sainait miruhato kfomo mrokfom nhai wany yakiomomm. Turoh nd wany ffi haso nmbuhatn Bro Nkifrar fak tutfa wurasohmorm. Tfit arihat hefenr ruhato pthewatrm

wanukwonomm. Nd mrokfom ror pthiwam nom wany yakio duha rhuneft finji dukewako? Hifa rhurahnom? Be tu nhai mif. ²⁶ Bro Nkifrar Sainait miruhato pthamohat nhai wom shrt rfnrmot. Tfit arihat mekaht; wompam finji anaya, waduka marnya hany-swako. Mrokfot bi kfo htatamort. Kfo memor, “Wompam mekahta finji anaya, nhai be bbinysofrpat finji narhota. Nhai. Mounti bbinysoft rpat mirahm nndo nunes kekwoft.” ²⁷ Ndt nom dukaf hanykfot. Bro Nkifrar kfo yamukohat, “Wompam thu ninoruhanf mounti bbinysoft,” ndt duka-kfot. Mekaht; finji akfoya, be nhai wom tamohm rhuruhatm. Mibatiniyuk tamoh tamohm nd yiha yak bati thurahrm. Rhu hanyukrpam myak htanirahrm.

²⁸ Ndnatn nom yimanom turhu kmi hefenrhu shrkaroh tohukatohhoyuknom fak htamornom. Nhai marimor, “Hta tefikahanm tfit kto yak batiruhanm.” Nhai. Bro Nkifrar yuhu-wafhato hifa kak hta marnyewurnom. Nom nd rorhu yuhuwaf nmbuhat htihato kfo yindhorkfot. Nmoh yima yuhum yakrmi hanykfot rorhu mrokforoh hanyjbornaneft. Yakrme hanyhato kfo bruttnakfot. Bro Nkifrar nmoh kfo bruttnaneft wanyhato yima yuhur yindhorrharr. ²⁹ Yimam rorhu mrokfom hanyjbornaneft, to be kahthu mikur gufuhaniyukem.

13

Bro Nkifrar hti yindhorwa nefm kanga akfo nuhasanko

¹ Niko tuko Bro Nkifrar yak hikwako tuko nayak marnya nayak marnyakfot. ² Kmi kmiroh yimam Bro Nkifrar kak hikwomr. Ndnnetn wom kmithur niewur ni womnhu kmit, ni womn yakhato hifa rikabukurn yak htakfot. Bingot tohmo nkifram to inji namom. Mounmotm yima mif tham yak nhombranamoatm memoum, “Yima mifm kak marnyewu-nom.” Kto hti duka tungunahato kfo memoum, “Be merfotnom ahti marsisafonomm, be Bro Nkifrarhu mounmotmn hti marsisafonom.” Kto inji dukamoum.

³ Niko Bro Nkifrar hikwako, nikmoh womr kalabus kak htewumr; niko womko rorhu krhopam yaknhokfot. Ni nd kalabus tohneft ni nhai wofnkahn be turpa krhopam yakneft. Wom yi tohnhoneft ni yindhorwo. Womm krhopam yakneft rpahtet neft nakfot.

⁴ Wom met yindarif bi fak tatrutmf nd sawohf yifammam heyuk mrokfo yuharpamn hikkfot. Yindarim bi metetm turoh metrampmpno yikfot. Mirahko arim fnahni mfnahninom wom wom metmpno. Metm nhaf inji buga. Niko tukmoh yindarirampmpno yikfot. Mirahko wom wom yindarim-pno arim fnahni mfnahninom. Yimam inji rine wuneyetm kto Bro Nkifrarhu kotkfotn tohrahm.

⁵ Yo mirahko be maruharoh dukefrpar arhu hasonom. Finji finji harhuwoko ndrampmpno rhukfot. Mirahko masat masat marut yakkahnomn maru wuska buharn arhunom. Finji korhwo Bro Nkifrar htitworn. Bingot yat; rfa borngtn kfo memor, “Nikmoh rhu nmbuham nhai hti marsisarhotanko. Nikmoh rhu toh nmbuham nanhu tirnm rhurahko.” Bro Nkifrar bi inji kformor. ⁶ Ndnnetn nom toh bmtahato kfo mekfot, “Na nhai yakrme hanyrhota tamoh tamoh nefm yimam finji naneft. Yimam finji naneft Bro Nkifrar tor hti yukatohaf hany-rahra.” *Sng 118.6*

Nd Jisarr hingrnamo yuhaf hikneft mirahko awohsisnom

⁷ Bro Nkifrarhu yon kunys tohuka-tohmoa yimam mirahko duka mmonomm. Romn hifa tohhato Bro Nkifrarhu mrokfot kfo pthamotmt

wanymokomt. Rom tohmohat be Jisasrn hikhany hik hanyhato be mnohmom. Nhai thu trohrmomr Jisasr. Niko rom Jisasr hikmo hikeft hikkfot. ⁸ Jisasr rom toh hbhamo kindo nom toh hbhewurnom yo toh hbha hatohrahm wom yimam. ⁹ Ndnettn mirahko nd wom wom mro-kfomn wanykahnomn Bro Nkifrarhu yihotat ayau htafnomt. Mirahko nd nkifram hik hnamo kfo tebos mrokfom, nd tir kifsanemt, yuk fnaheft, mirahko nd nd yak kars hingrneft ahiknom. Be nd yeshri ye karsnefrpat hikruhakomn Bro Nkifrar nhai hik marnyahato toh bmtaruhatko. Nd yatk boririfhut mumafkfot. Bro Nkifrar nom hti yuhuwafmo nmbuhat nom htihato Bro Nkifrarhu yihotarn tohhato toh bmtakfot. ¹⁰ Jisasr nmoh fasoh nefm bi hanohmorm. Yimam nd yatk nkifram hikmo yihotar yaurahm be Jisasr nhai yak thuhiruhatr rroh fasoh nefm. ¹¹ Bingot nkifram yakitohmoa yatk tarioh mtha yuhat, inji namoum. Yemror wasmoumr. Nd yemrorhu kku mbrm bro tohak prisr yaknimoarm Bro Nkifrarhu rhuyuk rumtn hanyhato thu pprimoatr Bro Nkifrar hta wunafhemourm fasoh nefm. Kkut Bro Nkifrarhu rumt hanymount, yemro nyisofte wuri hanymoamtn tarioh-mount. Yemro nyisofm hanymoamm kmi yoh tmbhefmm tariohmoumm. ¹² Ndnettn Jisasr nohmohat, nhai yiro Jerusalem nohrmor. Kmi Jerusalem gnat hehurnihato nddo busafon furako was nohmomr. Nmoh fasoh nefm rorhu kkut fak thumotm. Yak thumotm nom ndnatn Bro Nkifrar kanjo fak htamornom. ¹³ Ndnetnomn nd nkifram hingrnamao yatk yemro tarioheft mong trohkfot. Tfit Jisasr hingrnamao nfri yihotat hikkfot. Nd Jisasr hingrnamao yuhat hikneft yimam kfo yimtnarahnmom. To mirahko awohsisnom. Yimam kmi taunthu briaahako nohyukm faso haninge kfo yukioh inji namoumm. Nom Jisasr namo yuhat inji narahnmom yimam. ¹⁴ Yakrme duha. Nd asha bbinysoft nhai wom taunt rhu nkifranikaht. Nhai. Nmoh dukefm be yikfot kto rhuruha kmi hefern. ¹⁵ Jisasr bi nmoh fasoh nefm mhanohmorm. Ndnettn nmoh bro kfo yindhor nmbuham Bro Nkifrar kfo yindhorefm yikfot. Nhai tfit wom finji kfofot. Nhai. Nmoh kfo yindhor nmbuham Jisasrpar yikfot. ¹⁶ Met yindarim dborioh nefm yak nuhaskfot. Wom hmbresham o tamohm kak nafwom, niko yakhato hekfot. Mirahko womroh wuska hanyeft ayafhonom. Bro Nkifrar nikmoh dborioh nefm htiruharmn yindhorahrko.

Bro Nkifrar yak marnyarahrnom

¹⁷ Nikmoh nyingako tohekwa yimam yiha yiha kukatoh marnya hasiwunko. Kto nd rom hingrnawa hingrneft Jisasr kfo nuhasrahmr. Ndnettn niko rroh mrokfom yak hikrahkomn be rom ndt htiruharmn rroh hingrneft yindhorhato hingrna marnyarahmt. Tfit niko mhta yuhu-wehrahko tawo rom mhta yuhuweh-hato nhai hingrna marnyaruhatm.

¹⁸ Nmoh toh nmbuham wakfo bruttnatwakmnom. Nom tunmoh rhu nmbuham nhai wom fasoh rhu nmbuham htikahnom ndm htihato btn Bro Nkifrar pno brbo yinyeft yimtnakahnom. ¹⁹ Nanhu bro dukeft dukewa nikmoh nia htineftn. Ndnatn kanga, wakfo bruttnakahtko Bro Nkifrar yihotat hingrnahirhotra, nia htiruhanko.

²⁰ Na tawo niko dukahato kfo bruttnewanko. Kanga kfo bruttna-kahtanr thu bmtarahrko. Yu yima yuhum be rhu marnyarahmko. Nhai tamoh tamoh dukefm yakruhatmko. Nd Bro Nkifrar Jisasr yopt rhumohat tfit thu kasinyamorr. Jisasrn nohhato nd nmoh fasoh fasoh nefm mhanohmorm. Nd ror nohmo yiharpa Bro Nkifrar yihato mtoh nkifraniyuk yihotat

fak nukakmort. Nom tohukatoh thombat yimam sifsifm tohukatohwa kanjo inji tohukatohwornom. ²¹ Kfo bruttnewa kanga, “Bro Nkifraye, wathu bmtakahtnm be ni Bro Nkifranhu yima yuhurpar hikrahm. Yo rroh toh nmbuham be ni Bro Nkifranhu dborioh nefrpam hikrahm.” Inji kfo bruttnewanko. Jisasrn yima yuhum yak hta bohtaruhatrko, wiyauyau marnyarahko. Wiyauyau marnya-ruhatko Bro Nkifrar hti yindhorrahrko. Yiha yiha rorrpar nom kfo yuta yindhorkfot. Be injirpa.

Wuroh kfo yindhor mrokfom

²² Barenko, bro mrokfot kfiwanko, na ndar gontwat htewa mrokfom hti marnyakfot. Nikmoh toh nmbuharoh kfo bmta mrokfoyem. Nhai be yuke mrokfom kfokahanko. Nhai. ²³ Wom mrokfot kanga akfo nuhasanko. Timotir, nom ndar hingrneft hingrnanhomoa yimar, kalabus yimohat, bi fnahnihato toh furewur. Bi yudbat nia mhtitwo-rane, rpat niahato mhtirahnonko.

²⁴ Na asha tohwohat dukahato kfo yindhor mrokfot kahukwanko niko tohak yimako yo Bro Nkifrar hikwa yima bugako. Ako kantri Italithu yimam, Bro Nkifrar hikwam, rom nhaf dukewamko kfo yindhor mrokfot kahukmko.

²⁵ Be injirpa Bro Nkifrar toh natwih bugarahrko.

Jemsr dwanfamo gontwat Barkof kfo nuhas mrokfom

Jemsr wandfamo gontwat bok dborioh dborioh kfo nuhas mrokfom wandfamorm. Jemsr duka memor, Kristenm nd kfo nuhas mrokfom htiruhamn dborioh dborioh nefm hikrahm. Bok mrokfom kfo nhombra mrokfom yakhato kfo pthamorm. Memor, “Inji kfo nhombrarhota dukefm yak marnyaruhamn yak hikrahmm mrokfom.”

Jemsr kfo bro memor, “Yimar Jisasr hiketr nhai be hik fura bofurakfot. Nd yimar womm dborioh nefm yak nuhaskfot. Womm inji htiruhamn duka mirahm nd yimar Jisasr hiket yimayer.”

Tamoh tamoh nefm riyoh buriyohak duha. Toh bmtahato Bro Nkifrapno tohyuk toh nmbuhat toh marnyarahnomt.

(Sapta 1.1-18)

¹ Na Jemsa, na Bro Nkifrari Nungothet Jisas Kraistr hikwa yimaya, nann wandfahato kfo wobu-hanko niko Isrerkmoh 12-pela frikefthu yimako rpa rpa natubatunihato ndar bbinysofthu kantrim rpen rpen toh htfaswako.

Tamoh tamoh nefenm toh bmtarahnom, be tu Kraistr tohwa toheft kanjo toh hikrahnom

² Yinouroko, be kfo nuhaswanko, tamoh tamoh krhopam kekwoomko, mirahko aduka krhonom. Be yindhor yima yuhumpno rhukfot. ³⁻⁴ Tamoh tamoh krhopam kekwoomko, tohhato Jisasr yakitoh kihkfot. Inji nahany inji nahanyrahko, be nhai tfit suhruhatko. Tamoh tamoh nefm toh bmtarahko. Be ndnetn nd Kristen yihotar tohneft toh trpkfot. Mtoh trpnirahko, be tu Kraistr tohwa toheft kanjo toh hik bugarahko.

Yimar wom tamoh dukefm myak kkopentewur; Bro Nkifrapno kfo bruttnakfot

⁵ Nikmoh wom yimar wom tamoh dukefm myak kkopentewur, Bro Nkifrapno kfo bruttnahato Bro Nkifrar dukefm hirahrr. Bro Nkifrapno tamohm yimam kfo ttiwonneft nhai wany marsisakahrm. Hifa yima yuhurpno he fura bofurewurm. ⁶ Mift, nd yimar kfo bruttnaneft, mirahr nd yimar hus dukeffpno akfo bruttnaya. Mirahr aduka amiya, “Ka Bro Nkifrar hirahran o nhai?” ⁷⁻⁸ Inji midukata mdukata-rahrr, to mirahr ka Bro Nkifra hirahra. Nhai. Rorhu yima yuhur nhai be rpa dukefrpar yikahr. Nhai.

Yufapa duha yimami wusket yimaroh mrokfom

⁹ Kristenm nhai hifa rhu nmbuhat rhukahm, rroh rhu nmbuhat faso korhmt, nd yimam o metm yindhor-kfot. Yimaroh nyingampno yufapa duhatem. Bro Nkifrarhu nyingampno nd yimam yufetem. ¹⁰ To nd marut wuss mfro yakitohet yimam, mirahm be turoh marut wuss htitahato ayindhornom. Nhai. Rroh dukefm Bro Nkifrar yindhorkfot. Maru shrkarn yindhoreft hta duha. Nd nd shrkar yakitoh yindhor tefi hasohato nohhato myak htanirahmr. Misfam kanjo wondht hatoh tefi hasohato tfit nd wondht yohnitt. ¹¹ Marr kekwort, nd dborioh wondht rom hatoh

hasoyukt nhai rhu buhtakaht, tfit yohnitt. Yimam, mfro marut yakitohetm, to inji narahm. Turoh maru hingerneft toh mmo hasetmn noheft be yak fohtsrahtm.

Bro Nkifrar kak marnyewurnom, nhai fasoh nefmn hany nhehkahrnom

¹² Yimar tamoh tamoh nefm mnhombrati mnhombrati nhai suhrfor, tohato Jisaspar fakitohr, Jisasr toh hongmb hmbriarahrr. Nd krhopam bi mfrdbrufnirm, nd yimar Bro Nkifrar yimam ttha hanyshombat, yiha yiha rhu hatohruha dborioh rhu nmbuhat hirahr. Nd rhu nmbuhat bi Bro Nkifrar kfo htangotmort. Yimam rorhu dukefr ruhet yimaroh dukeftpno nd rhu nmbuhat bi kfo htamort. ¹³ Wom yimar wom fasoh dukefm sinyewumr fasoh nefroh nanefst, to mirahr tfit Bro Nkifrarhu yufat yutahato akfo amiya, “Bro Nkifrar nd dukefr fahura.” Bro Nkifrarhu yufat tfit yuta duha. Nhai wom fasoh nefm Bro Nkifrar mthu yuhurkfot. Nhai. Yo nhai Bro Nkifrar yimam fasoh fasoh nefmn hany nheh-kfot. Nhai. ¹⁴ Yima yima buganom, tunmoh yima yuhu bebm tu yuhu-rekwomnom. ¹⁵ Nd fasoh fasoh nefroh nayuk yima yuhu bebm rihta tehekwaht, fasoh fasoh nefm newunom. Nd fasoh fasoh nefm nahany nahany bronitamn tfit nd fasoh nefmn got yoht kanjo yifung marm harhuhaso harhu hasiwatnome be tmbho noheft-wutnom.

¹⁶ Yo! Yinouroko, niko mirahko Bro Nkifrar niwa nefm ayak mmonomm. ¹⁷ Ror niwa nefm wawany hik marnya-komm. Ror nhai fasoh fasoh nefm tu yuhurkahrko. Hti dukewarko nikmoh rhu nmbuhat kak marnya bomarnye-wurt. Nda yura mountko tanukiwa shrkar rorn hinger na hta-morr. Mar yiha tanukayukr mfnahhato tanuka hany tanuka hany rorhu yihar yohnitr. Tfit yihar kekuthato yifung tanukayuk shrkar mfnahhato romn tfit tkitt yakhato yifungr tanuka nfhewumr. Rroh hingerneft to inji kitt. To Bro Nkifrar ror nhai yiham kanjo kekut kekutkahr. Nhai. Rorhu ruheft to be inji rpahtet ruheft yiha yiha korhr. Niko hti dukiwarko dborioh dborioh nefm kak nuhasworko. ¹⁸ Turhu duka fijo yafothet gutnius mrokfom kfohihato nd mrokfomn nfri mrokfo ptha yima rifhur hnamomr. Memor, “Inji anakahann romrpamn nd gutnius mrokfot yakhato tukanpno brbo mtahakrahm.”

**Nmoh dukefm Bro Nkifrar hta mifrahnomm,
dborioh nefm narahnom**

(Sapta 1.19–5.6)

Mrokfom wany yakiohato yo hikkfot

¹⁹ Yinouroko, niko waduka hik marnyatwakomm nompno Bro Nkifrar niwa nefm. Ndnettn niko mrokfo wanyneft yimbhindangm yudbat tohetohkfot. Mrokfo kfo pthanefst mirahko be yudbat duka marnya duha mrokfom atubatuyakninom. Yo mirahko yudbat anamburakinom. ²⁰ Fasoh nambur rifhut nhai Bro Nkifrarhu dborioh nmbuhat mhfnah-nekaht. ²¹ Ndnettn nd fasoh fasoh hnomha hnomha nefm niko hatoh-wam wayak thukomm. Yak thuhato dborioh yima yuhumpno Bro Nkifrarhu mrokfom nikmoh yima yuhum rihtamom hikkfot. Nd mrokfot yakitohhato hikrahkomt, Bro Nkifrar ndt htiruharn kto bro kotkfot tohruha yihart mrokfo duhatko rhurahko.

²² Ndar niko wany hniwa mrokfot mirahko be wanys wanyhato nd mrokfot kfiwa yuhat yak hikwon duha arhunomt. Be wanys wanyrah-komt, nikmoh yau nmbuhat ndo riyah. ²³ Yimar be wanys wanyhato nhai

yak hikwon duha yikahr, ndr kangme binasohtn turhu nyingatikt hitawor.
²⁴ Turhu nyingatikt htini-hato kto nd binasoht rihtanyhato fnahnineftpno turhu nyingatikt mimmonitrt. ²⁵ Krairhu gutnius mro-kfom, tom tu Bro Nkifrar yakitohwa boririfhu mrokfom. Nd mrokfomn yimam hti hikak hanyhato hikrahmm, nd yimaroh fasoh fasoh nefm yafho-hato dborioh nefm hikrahm. Ndnettn yimar nd Bro Nkifrarhu mrokfom yak nhta marnyahato hikrm, yo nd mro-kfom nhai mmonirform, nd yimar Bro Nkifrar yak marnyahirahrr rorhu wiyauyau rhu nmbuham.

²⁶ Wom yimar kfo kangr, “Na tu dborioh Kristena, na tu Bro Nkifrar hikhato kfo bruttnewa yimaya.” To ndhtet kfet yimar tfit rorhu tngt nndo mando rine wunineft, nd yimar be tu kfo furewur. Bro Nkifrar inji htihato nhai yindhorkahr. ²⁷ Tu Kristen mifr, fasoh fasoh nefenm yakitoh duhatr, yo rorhu toheft tu Bro Nkifrarpar hiketr, nd yimar inji nakfot: Yon kutenm yifamma duhatm yo tuhan dhirm tamoh tamoh krhopam titewum, rorn hti dukahato rroh krhopam hti dukahehato yak marnyahekfot. Yo womt turhu yau nmbuhat dukefmpno yauhato ndar bbinysoftu nefm hik duha. Ndhtet nefm Bro Nkifrar hti yindhorm.

2

Yufet yimarpam bro nyingami dukefm hta duha

¹ Bar yinouroko, niko nmoh Nungohtet Jisas Krair, bro nuka nanyjareft hatohwar hiket yimayeko. Ndnettn to mirahko be yimaroh yufam o dborioh rhu nmbuham htihato romn bro nyingam o bro dukefm yihato tfit nd yufapa duha yima fura bofuram be nyingarpaye amhtini hanynomn.

² Yufet yimar dborioh dborioh wuskar wondh hmbrinehato nianeft nikmoh lotu swirm, yo wom yima bebpar fasoh fasoh hmbresham hmbrinehato ror to rpat nianeft, ³ ka nd yufet yimar dborioh dborioh wuska wondhnayetrn nikmoh bro dukefm yihato rorn yakruhakomn dborioh gajir wahta hirahko. Nd yufapa duha yimar kkoret wuska hmbrinetr kfo mirah-komr, “Ndha watohn o asha bbinysoftn nmoh wurampno wamruhn.” ⁴ Yimam inji inji hti nhombrak hanyhato yak nhtarakhomm, ndt fasoh dukefmpno bi tuko tfit bi nayak nanyorwoko. Yufet yimar bi gajis fahunr, yufapa duha yimar gajis hekfot.

⁵ Bar yinouroko, wawanyko. Yufapa duha yimamn, tom nd yimamn Bro Nkifrar kfo htamor turhu yufatpno rhuneft. Nd yimam Bro Nkifrar duka-hato rorpar fakitohmoum. Ndnatn rroh rhu nmbuhat yak marnyahirahrm. Bingot Bro Nkifrar bi kfo htamo mrokfot hikruharn ror dukayet yimam yakruharm hifa rhu nmbuhat hirahrm. ⁶ Nd yufapa duha yimam ndhtet nefm newukomm, kak yimtnewukomm. Nikmoh dukefm tfit mongko aim afo. Niko frohmn faso yak bebwamko? Yo frohmn tehaknitamko kot hanitamko? To nd yufet yimam, romn ndhtet nefm newumko. ⁷ Yo womt, nd Krairhu dborioh yufat nikomn hmbremot to frohmn faso faso kfo rindhiwamt? To nd yufet yimam, romn ndhtet ndhtet nefm newumm.

⁸ Bro Nkifrar, nmoh kingr, Bro Nkifrarhu rfa borngtn wom bro boririfhut htamort. Nd boririfhut kfo memor, “Tunn yak marnyewa kanjo inji womm yak marnyakfot.” Nd boririfhut hikhato womm yak marnya-rahkomm, ndt tu dborioh neft narahko. ⁹ Womm hifa hifa yak marnyahato tfit womm

faso faso yak bebneft, ndt nhai tu Bro Nkifrarhu boririfhuth kfiwa yuhathikkahko. Nhahi. Fasoh neft newuko. ¹⁰ Akfokahta wawanyko, wom yimar boririfhu bugam hik bugewarmn, tfit wom fasoh neft rim naneft, to bibe, nd boririfhu bugam bi fak frikati bugerm. ¹¹ Nd Bro Nkifrarpar kfo memor, “Niko tuhanet yimako mirahko wom mettpno arim fnahnom. Niko ramet metko mirahko wom yindarirpno arim fnahnom.” Yo womt kfo memor, “Mirahko womm awas furanomn.” To wawanyko, nhai ijoh yuhatn mett rimakrfont, o ni metn nhai yindarir rimakrfont, be nambur sinyahato wom yimar was furen, to bibe, nd boririfhu bugam bi fak frikati bugenm. Nhai womt hikkahnt. ¹² Kraistr tor, rorn dukefm hiyaf hanyahrko Bro Nkifrarhu mrokforoh hikneft. Mrokfom nhai hikrfokomm, Bro Nkifrarparno mrokfetko rhurahko. Ndnnett niko duka marnyahato yau marnyakfot. ¹³ Wom yimar nhai wom yimam yuhuwafwonrform, nd yimar turhu kotkfot toh thombat, Bro Nkifrar nhai yuhuwafwahatr. Yimar womm yuhuwafworm, nd yimar awi mrokfo duhatr rhurah.

Kraisrhu dukefr ruhet yimar; tu Kraisrhu dukefr hikhato rorhu nefm nakfot

¹⁴ Bar yinouroko, wom yimar kfo kangr, “Nanhu duka yima yuhur Kraistrn korhr.” To nd yimar nhai nd Kraistrhu mrokfom hikhato rorhu dborioh nefm womm yak nuhaskahrm, nd duka yima yuhur, Kraistrpno rhuyuk, bi nohmorr. To nd yimar Kraisrhu dukefr bi nohetr, to finji Kraistr yak yurakruharr fasoh fasoh nefmn bi yiro turna hmbriyafneft? Nhai mif. ¹⁵ Nikmoh Kristen yimatm hmbre wusken duhatmn o yeshriyen duhatmn, ¹⁶ niko htihatoh nhai hmbre wuskenm o yeshriyenm yak herfokomm, be tngpramn kfo famukomm, “Warhu marnyatwako! Hmbre wuskam wayak wahmbre kkahtwako. Yo yeshrim wayak waye yingmaritwako.” To afo attiwonanko. Ndhett tng mrokforpat kforahn, nd tng mrokfot finji womm yak marnyaruhatm? Tukomm hmbre wuskar yeshrir yak hehato kforahn, ndt hifa. Tngt kfonihatoh yak hirahnm, tot tu neft. ¹⁷ Kraisrhu dukeft ruhet yimam niwa nefm to inji newum. Kraistr hiket yimam nhai womm dborioh nefm yak nuhaskahmm, nd Kraistrhu dukefr rom yorhwar bi nohmorr. Nhai wom Kraistrhu dukefr rhukahrm.

¹⁸ To tfit wom yimaroh htieyft nndo htiruhamtn kfo wok mirahm, “Womm Kraistrhu dukefrparpno ruhato nd dukefrparpno korhrm, womm nhai. Rom be Kraistrhu hiknefrpat hikhato Kraistrhu dborioh nefrpam newum. Ndt rot hifa.” To tfit akfoyanko. Be Kraistrhu dukefrpar ruruhakomm nhai ror kfoyuk mrokfo yuhathikhato dborioh dborioh nefm na duha yirahkomm, tone, finji kanjo hti duka mirhoya, “Ndr Kraistrhu dukefr ruhet yimayer.” To na, na Kraistrhu dborioh dborioh nefm yak nuhasrhotanko, ndm htiruhakomm, duka mirahko, “Ndr Kraistrhu dukefr ruhet yimayer.” ¹⁹ Nikmoh bro dukefr duka kangko, “Rpa Bro Nkifrarpar korhr.” Nd dukefr dborioh dukefer. To yarhm, rom to ndhett dukefetem. Ndnnetmn yakrmihatoh korhm. ²⁰ Ar mmoharim! Nd na kfo hniwa mrokfom nhai wany duka tungunakahkomm? Yimar nhai nd Kraistrhu mrokfom hikhato rorhu dborioh nefm womm yak nuhaskahrm, nd duka yima yuhur, Kraistrpno rhuyuk, bi nohmorr. Tfit wom nkifra tndh mrokfot mkfo tndhakhrota ndtn wanyhato dukefr yakrahko. Barkoft afo ttiwonanko. ²¹ Bingot nmoh nkifra Abrahamre, finji namotr rorhu yima yuhur Bro Nkifrar hti wuthamorr? Wawanyko, Abrahamr, yon Aisakrhu tarioh mtha

yuhat Bro Nkifrar kfomohat, Abrahamr nhai be marimor, “Be wany wanyruha.” Nhai. Wany yakionihato hikmort Bro Nkifra kfoyuk mrokfot. Yonr kitumakhato yura tariohyuk tkitt htahato memor yonrn Bro Nkifrar tarioh mtharuha. Nd ror namo neftn Bro Nkifrar htihato hti wuthamorr. ²² Bi htitwoko? Abrahamr Bro Nkifrar kfoyuk mrokfot wany yakiohato hikmort. Tamoh neft Bro Nkifrar kfomot hingrna hikmort. Hingrna hikmotrt, to be nd tkittn Bro Nkifrar htihato duka memor, “Abrahamr tu wany yakiowet yimayer.” ²³ Ndnnett Bro Nkifrarhu rfa borngt kfo kangt, “Abrahamr, Bro Nkifrar kfomo mrokfot wany yakiohato hikmotrt, Bro Nkifrar hti wuthamorr.” Be Bro Nkifrar nd yiha rikfak memor, “Abrahamr bi nanhu yimater.” ²⁴ To bi htitwoko. Yimam nhai be mrokfom wany yakiowa yuharpatn rroh yima yuhum Bro Nkifrar hti wuthakahrn. Nhai. Yimam mrokfom wany yakio-hato hikneftpno Bro Nkifrar hti wuthe-wurm. ²⁵ To nd ijoh tone htfasmoa met Rahafthu tndht to inji rhumot. Josuar kfo tkrurafyuk tmbho tohm, rotn dborioh neft nahato yak kafroh-tamotmn tfit wom nndoh yuhatn yakmotn fak htafmotn. Ndhett dborioh neft namott Bro Nkifrar htihato memor, “Nd metthu yima yuhur tu wuthayert.” ²⁶ Thatipt yafothett yorhwatn wiyauyawot. Yafothat thu troh tanywott, nohwot. To inji kanjo korhwom Krairhu dukefr ruhet yimam. Rorhu mrokfom wany yakiohato to nhai hikkahm, to bibe, nd Krairhu mrokforoh wany yakio dukefr bi nohmo. Nhai wom Krairhu dukefr rhukah.

3

Mrokfom duka marnyahato kfo pthakfot

¹ Bar yinouroko, mirahko be bok yimam tisa tohhato Jisasr hiket yimam kfo hta mrokfom ahenom. To wadukaf hanyswako, kto tuhant yindars bro kotkfot toh thombat, nom tisanom hingrnawa hingrna nmbuhat kotett rhuraht. Bro Nkifrarhu mrokfot nom yihato yimam yak nuhas bonuhas-wohat finji finji yak nuhaswanomm? Ndm frhik marnyarahmm. Nom tisan-moh kotkfot krhoniraht. Womm rom be inji.* ² Nom yima buganom, nmoh tngm tamoh mrokfom ptha nefm o tamoh nefmpno mrokfo ptha nefm, tngm nndo yiyaknihato faso faso mrokfom tubatuyaknitnom. Tng rine wuni duha yimar, ndr tu dborioh yimayer. Tngt yak hta bohtiwa kanjo rorhu nyingam, yimbhindangm, tir wuram, yak hta bohtakfot hosm yak hta bohtiwa kanjo. ³ Hosroh yak hta bohtayuk ainm, tngmn hatohwomm. Nd ainm mtitofm mano mano hirwom. Yimam nd mtitofm yakitohhato kak hta bohtaf hanitmm. Kangm fitoh yuhat aim, nd yuhat kitm. ⁴ Yo womt wadukakom doht. Doht nhai be tut yikaht. Yimar mitohhato mnange hanyag hanitart doht kitwot. Yimar kangr fitoh kmit o fitoh yuhat ais, nd doht rot be mnange kak htaf hanitrt. ⁵ Yo tngt nhaf inji. Tamoh tamoh nefmpno o mrokfompno, nd tefi tngentn yura yura kfo hagrha bohagrhewut.

To wadukako. Tefi kah banenr yakhato teng furhakrahnr, ndr funa nyanjar sinyahato yonmar nahonm kandhi witewurm. ⁶ To tngt, to tu kah nyungoramet. Kaht ndha mkur fnah-wot. Fasoh fasoh nefm to ndha

* **3:1:** Ndar veskfot kfiwa tisar mirahko ka wandfa kunym tohwa tisar kfiwut, o boririfhut kfo nuhasmoa tisar kfiwut. Nhai. Ndar veskfot kfiwa tisar, ror nndoher. Bro Nkifrarhu hik yuham o mrokforoh hik yuham o tamoh tamoh nenenroh na yuham, rorn kfo nuhas yak nuhas inji nayuk tisayer.

rhuhatu mfrfnah hasiwum. Yuhut yimanysoft bi nd fasoh nefmn thu nhombraniyettn, to be fasoh nefrpam mfrfnah hasorahm. Nd fasoh fasoh nefm to Satanrhu nefem. ⁷ Ndar bbinysoft yorhwa kmi tirf yemrom yo tekt yorhwa yiram tamoh, yimam yakgb bogb yo hegb bogb hnamoahat, yimampno brbo yi yo tamoh mrokfom kfoneft fak hikmoumm. Arihat to inji, yima mrokfom hikrfomm. ⁸ To tngt, nhai yima mrokfom hikkfot. Tu be nhai mif. Tngt kangt wom mrokfo bebt atuyant, tutwott. Nd mrokfot kitwot kfrat kanjo. Womr kfrat kanjo yuwitwattr rim kkitr. Nhai tngt yima yak tkafkfot. Tngt fasoh nandom jumbet. ⁹ Nd tnge Bro Nungothetr, nmoh Bro Yifemr kfo yindhor inji newunomr. Yo tfit nd tngrpaye tfit womm kfo twewunomm. Nd nom kfo twewam, yimayem, to Bro Nkifrar yak nhombramo yimayem. ¹⁰ Kfo yindhor nmbuhati fasoh nmbuhat nd rpa tngrrpat rpat mfnahwof. Bar yinouroko, ndt nhai tu dborioh nmbuhat. Yimar Jisasr hiketr nhai ndhtet nefn nakfot. ¹¹ Nhai wom tek yinhar dborioh bupami fasoh binef mrdipam rpa yinhar mfrfnahkahm. Nhai. ¹² Bar yinouroko, ka olif yukhame, fik tihatn hirrfom? Nhai. Yo ka fik yukhame, ka wain toftn hirrfom? Nhai. To inji kanjo, nhai fasoh binef mrdipam mfrfnahet tek yinhar tfit dborioh bupam mfrfnahrfotmr. Nhai.

Dborioh dukefet yimam, rroh rhu nmbuhat be yak teh marnyewut

¹³ Wom yimar tamoh tamoh nefm afo duka hik marnya bomarnyahato newurm, nd yimarhu wiyauyau nmbuham wiyauyau marnyakfot. Womm inji htiruhamrn, duka mirahm, ndr awi, dborioh yimayer. Tamoh nefm o mrokfom nhai be turhu yufat yura htahato pthakahrm. ¹⁴ To womm faso duka bebhato tukmoh yufamn yura yura htarahkomm, to mirahko akfo amanyom, “Nom duka hik marnya bomarnyahato tamoh tamoh nefm newunomm.” Mirahko inji akfo furanom. ¹⁵ Ndhtet riduka aduka yima yuhum nhai yura hefen yuhat niakahm. Ndhtet dukefem ndar bbinysoftuhem. Fasoh nefm mhato fnahet yimaroh nefem. Satanrn nd nefm mhfnahnewurm. ¹⁶ Wawanyko. Yimam nd womm faso duka bebhato turoh yufam yuta hagrha hasiwam, nhai rhu digr marnyakahm. Fasoh fasoh nefm to romn na htfaswomm. ¹⁷ To nd yimam tu Bro Nkifrarhu duka hik marnya bomarnyayuk dukefem yaketm, htirahnm rroh rhu nmbuham, tohefem, tamoh nefm, nhai wom tamoh nefenm htiruhatnm. Rroh rhu nmbuhat be yak teh marnyaraht. Tot tu bro htiyefhtirahnm. Yo wommpno nhai nakfo ba inji naruhatm. Rpat toh marnyahato nayak marnya hakurahm. Yo htirahnm mrokfom hikhato wany yakioneft brorahtm. Yo womm hti yuhuwafhato dborioh nefm na hakurahmm. Nhai yufet yimarpam yak marnyahato tfit yufa duha yimam nhai. Nhai. Yo nhai tngrrpamn kfo hnu bohnuruhatm dborioh nefroh hikneft. Nhai. Hik mif mifrahmm. ¹⁸ Yimam tum nayak marnyahato rpat toh marnyarahm, kto tfit tum htirahmt yimam yindhoreftpno rhuhatu tum yihom nakfo yindhorak mnakfo yindho-rak, yihom nahiyak mnahiyak inji naruhatm tum htihatn mirahm, asot tu dborioh rhu nmbuhat. Yimam yewuri tpim thu brurhato tfit tum thu bruryuk yewuri tpiroh dborhayuk wuritwamn yak yewa kanjo, inji tfit tum htirahmt nd dborioh rhu nmbuhat.

Yimar ndar bbinysofthu wuskaroh dukefr ruhetr; Bro Nkifrar hti srthurahrr

¹ Tamoh nmbuhatpno niko tuko Jisahr hiketko rinatuhakhato nakfo hamuh nakfo hamuhhato nakfo nnewako? Tukmoh nd tamoh tamoh wuskaroh yak dukefr sinyewatrko wommpno nnafo nnewuko. ² Nd wuska yak dukefr be mfro sinyewurko. Wom yuhahat mnhombrafotitko yo tfit wom yuhahat mnhombrafotitko nhai yakkahkomt, to be tfit kekutni tuko rinatuhakhato nakfo nnewakomn yima waswoko. Niko nhai Bro Nkifrar pno kfo bruttnakahko tamoh dukefr rhuneft. Ndnatn nhai hikahrko. ³ Yo niko kfo bruttnahato nhai yak duha yitahat, to mirahko nko tamoh dukefr-pno nhai hikahrnom. Bro Nkifrar htirko nd shrm niko kfo ttiwonwam, ndar bbinysofthu dukefr rhuhato fasoh hingerneft htarahkomm. Ndnatn Bro Nkifrar inji htitihato nhai wany yakiohato hikahrko. ⁴ Ndar bbiny-softhu shrkarhu dukefr rhurahko, to be Bro Nkifrar be hti srthurahkomr. Ndnatn ndar bbinysofthu dukefr rhurahko, Bro Nkifrar mong trohnirah-komr. Mett ramemr htanyhato yiho-tam toh htfaswa kanjo Bro Nkifrar inji mhtanirahkomr. ⁵ Bro Nkifrarhu rfa borngt yorhwa nkifra mrokfot ka nhai duka hanyakkomt? Bro Nkifrarhu rfa borngt kfo mif memot, “Nd Bro Nkifrarhu Yafothat yimanom yorhwat, be tu nhai mif wofnkaht nmoh dukefr nndo mando yikfot. Nd Yafothat be kangt, ‘Nann bro dukefr htahato nanhu dukefrparn warhuko.’”

⁶ To Bro Nkifrar nom be tu mfro yuhuwafwornom. Ndnatn Bro Nkifrarhu rfa borngt kfo memot,
 “Yimam be mfro turoh yufam kfo hagrhetn,

Bro Nkifrar nhai hifa yima yuhur hmbrikahrm.

Noh hmbre yima yuhurpno ruhetn,

Bro Nkifrar hifa yima yuhur hmbritrm.”

Sindaun 3.34

⁷ Ndnatn niko be Bro Nkifrarhu yinhit fknihato tohkfot. Satanr yak tuhafkahtkomr thu troh tanyhato yakrmanyirahr. ⁸ Bro Nkifrar pno brbo waiko. Rorpno brbo waikahtko ror inji htiruharn nikompno brbo yirahr. Nd fasoh fasoh nefm niko yakitohwam be tmifko wayafhokahkomm dborioh nefm wahikko. Nd hus bok yima yuhum niko harhuwam, wayafhokahkomm rpa yima yuhur wahikko. ⁹ Nd niko niwa fasoh fasoh nefm ridukakhato yima yuhum krhokahmn wanurko. Nyingatikm yifatoh hasiwam tfit yohnihato nur nyingam ayohnim. ¹⁰ Nmoh Nungothetrhu nyingampno be nhowi rhu marnyahato be rorhu yinhit rhukfot. Inji rhu marnyarahko, nmoh Nungothetr kfo yindhorrahrt nikmoh rhu toh nmbuhat.

Mirahko wom Kristenroh nefm o yau nmbuham htihato wom mrokfom akfonomm

¹¹ Bar yinouroko, mirahko tuko Kristenko womroh yau nmbuham htihato akfo amanyomm, “Ndm ndhtet ndhtet nefet Kristenem.” Womroh nefm o yau nmbuham frhik bohikke duha o frpsa bopsahe duha. Be rpat rhu marnyahato tuko Kristenko nayak marnyahato tohkfot. Wom Kristenroh nefm htihato wom mrokfom kfo ptha-raho, ndt nhai Bro Nkifrarhu mrokfot hikkahko. Be yura kau fnahwokomt. ¹² Bro Nkifrar pnd boririfhut htamort. Rorrpar nd boririfhut htamortn wom nefm hti bebnest, rorrparn mrokfo kfo pthakfot. Yo rorrpar yimam yakhato kaht turahrm. Yo

womm toh raforahrn. Ndnnett tamohmpno tuko wom Kristenroh nefm htihato mrokfom kfiwako?

Mirahko tamoh tamohmpno akfo grhanom

¹³ Wawanyswako, niko yimako kfo yamuka, “Href hafitn o yihof yuwonano hafitn, afo ndko nd tauntn yihato rpa gunyjimr tohhato wom hingernefm htarhoyann, marut mfro yakruha.” ¹⁴ Ndh tet kfet yima, nhai tawisafkahnt nohok rhuruha nmbuhat. Nikmoh rhu nmbuhat kangm kah hiptn mkur fnahhato tfit kto hti hambrefiwut. ¹⁵ Wom yima yuhur sinyewurn tamoh hingernefro hingerneft, mirahn nd ninhu hingerneft yihett arhut. Be kfo mekfot, “Be Bro Nungothetr htityaf hanyruha. Kangr watohkahnn nd hingerneft wahingrnane ee btn toh-rhoyann nd hingerneft hingerনারুহা.” ¹⁶ Ndh tet dukefm duka marnyayukm, to nhai. To tfit yima yuhum wasu grha sinyahato kfo grha htfas kangko “Nom nd nd hingernefm hingerনারহ-নম.” Ndh tet kfo yindhor kfo grha htfasneft fasohet. ¹⁷ Wawanyko, tamoh tamoh nefroh na marnya yuham yimar bi mhtiyafetr, to nd dborioh nefm nhai nakahrn, nd yimar fasoh neft newur.

5

Marut wuss tamoh tamoht yak yakhato thu tibmonwa yimaroh kfo duka mrokfot

¹ Marut wuss tamoh tamoht mfro yak yakhato thu tibmonwa yimako, wawanywakomt na kforuha mrokfot. Niko ndhtet yimako, niko tu bro kaht yirahko. Ndnnett niko bi wanur hifa bohifa hanyko. ² Niko tamoh tamoht yak yakhato thu tib-monwat, yoh nasoh bonasohraht, yoh tmbra botmbraraht, yoh dbotna bodbotnaraht, binef wingrt yerahtt, yo hmbre wuss dmt yerahtt. ³ Nikmoh marut yak yakhato htewat riyikia dhntahato yindengt ki hmbriahatn. Nd yindengt tafontn htaruhattko Bro Nkifrar htihato bro kaht htahrko. Wuroh yihar bi brbo rhu hanyetrn to tfit nd yonmari yonmari wuss tamoh tamoht yak yakhato hta tibmon furewukomt. ⁴ Wawany marnyako! Yimam yakmokomn nikmoh mswirroh kiptrt kfah furahemomko. Nhai wiknarmokomn. Roh hingernefthu maruham kfo nurwohat, tu yura myorhekwa Bro Nungothetr bi wanukr. ⁵ Niko ndar bbinysoft tohmohat, tukmoh toh nmbuharpad dukahato bi marut wuss tamoh tamoht yak yak-hato bi tohmokomt. Yeshrt bi ye warho marnyamokomn to bi nikmoh was yihayer bi. ⁶ Dborioh mgogra yimam be kotim furahato wasmo-komm. To rom nhai nikmoh nambupram frdbfaknihato tawo finji nar-momko.

Nom toh bmtahato Bro Nkifrapno kfo brutnahato Bro Nungothetr toh gari hasokfot
(Sapta 5.7–20)

Toh bmtahato rhopam titahato Bro Nungothetr toh gari hasokfot

⁷ Bar yinouroko, yimam wom tamoh nefm newumko, niko be yak marsisakfot. Yima yuhum be noh hmbrehato Bro Nungothetrhu nia yihar rhu gari hasokfot. Niko bi tawisafeteko. Yimar mswir htahato kangr wuritwam tamohm ayak ayeya, afo katwinworm. Nd wuritwa ye yima yuhur afo kak tkaf kihwarr kangr, afo buriyohri marr afo yakkahtfm wuri suhm afo muhrahm. Nd dukefrpno afo katwinworm. Bi yak yiboneheme

kekworm. ⁸ Ndnnetn niko tamoh tamoh krhopam yakneft be yima yuhum yak tkaf kihhato noh hmbre yima yuhumpno rhuhato rhu duka gari hasokfot. Bro Nungothetrhu nia yihar bi brbohvor.

⁹ Bar yinouroko, mirahko wom Kristenm kfo gungmiohhato yiro yiro harhunomm. Bro Nkifrar htiruharn mrokfetko rhurahko. Nd mrokfo yaki-tohyuk yimar bi tor bi kuny yifhatikt tohvor. ¹⁰ Bar yinouroko, wamdukak hanyswakomm profetroh tndhm. Brorhu yufat kfo ptha htfasmoahat faso faso kak bebmoumm. To rom nhai krhopam htihato riwohsisakrmom. Nhai. Yak marsisahato nd krhopam tohhato titamoumm. Niko to nd yuhat hikkfot. ¹¹ Wawanyko. Nom kfo kangnom, yimam toh bmtahato tamoh tamoh krhopam titiwam, kfo yindhor kangnomm, ndm tu tpiyetmn tohhato krhopam titewumm. To wanykomot Jofrhu tndht. Ror tamoh krhopam niayukm ror yak marsisahato tohmorn nd krhopam niayukm titamorm. To Jofr inji namohat, to Bror finji namorr? To kto Bror dborioh nefm namorr Jofr. To tot inji Brorhu neft. Bror tu mfro yima yuhuwafhato yima yak marnyeter.

Tamoh tamoh mrokfom nayak dbkafrahnom Bro Nkifrarhu yufat yuta duha

¹² Bar yinouroko, bro mrokfot akfo nuhasanko. Wommpno tamoh mrokfom o tamoh nefmpno mrokfom nayak dbkafneft, mirahko yura hefenr o bbinysoft o tamoh yutahato mrokfom ayak dbkafnomm. Bi kfo yakiokfot bi kfikomt to be injirpa, o bi kfo namhikfot bi kfikomt to be injirpa. Bro Nkifrar mirahko ayutakahnomn mrokfot ayak dbkafnomt. Inji narahko to be tukomn htkotrahko.

Tu dborioh yimar kfo bruttnarah; htirahnt nd kfo bruttna nmbuhat bbukefett rhuraht

¹³ Nikmoh womr tamoh krhopeter, nd yimar Bro Nkifrar pno akfo bruttna-twar. O, be yindhorhato korhr, nd yimar Bro Nkifrarhu windohm yakhato windoh yindhorkfot. ¹⁴ Wom yimar dbohnetere, nd yimar sioshu tohak yimam nakuyakhato romn kahpam htanihato akfo bruttnatwamr. Akfo bruttnakahtmr marnyanirahr. ¹⁵ Bro Nkifrar ko bro dukefm hta mif mifhato kfo bruttnaneft, Bro Nungothetr nd yimarhu dbohneft yak marnyahato tfit yak kasinyarahrr. Yo nd yimar wom fasoh nefm rhuneft, Bro Nungothetr yak thuhirahr rorhu fasoh nefm. ¹⁶ Ndnnetn niko tuko Kristenko tuko nakfo nriyaf nuhasokfot nikmoh tamoh tamoh nefenm. Womm wanyhiruhamko, romn kfo bruttna wuthafhiruhatmko ee tamoh dbohnefm rhyukm thu trohrahmko. Yimar kfo bruttnayukr tu dborioh yimar kfo bruttnarah; htirahnt nd kfo bruttna nmbuhat bbukefett rhuraht. ¹⁷ Irajjar, ndar nom kanjohot yimar kfo bruttnamohat buriohrhu nia duhanef, uwa, buriohr nhai niarmor husfirpa yuhut gunyjimmi wom gunyjimrhu 6-pela yamm. ¹⁸ Tfit kfo bruttnamor buriohrhu tfit nianef, ee buriohr tfit niahato mswirroh yeshrim bupam yakhato sinya marnyamom.

Bro Nkifrarhu tu yafothet mrokfot myafshoniyet yimam tfit rimakhato yarim htakfot

¹⁹ Bar yinouroko, wom Kristen yimar Bro Nkifrarhu tu yafothet mro-kfot myafshonihato bi nndoh yuhat bi yiyetr, tfit wom Kristenr yihato rorn womr yakhato tur toh tanyuk tkitt rim hterr, nd yimar inji nayukr, dborioh neft namor. Rorn ndwom yimarhu yafothat bi Maringou yuhat tohett, rorn tfit

fakhemorr. ²⁰ To mrokfot waduka hanyswakomt, wom yimar fasoh fasoh nefmn tohetr; to wom frohrn yihato kfo famurr; “Wurene, nd ni yita yihotat fasoh yihotat bi kitn. Wania ndar dborioh yuhat ainyo.” Nd yimar inji nayukr; rorn ndwom yimarhu yafothat bi Maringou yuhat tohett, rorn tfit fakhemorr. Yakhemotrr be nd yimarhu fasoh fasoh nefm Bro Nkifrar be mong trohhirahr. Boknambok nefm nd yimar nayukm mong trohhirahr.

Pitar dwanfamo barkof gontwat Barkof kfo nuhas mrokfom

Kristenm bok krhopam yakmoatm ndnatn Pitar rroh kfo bmtayuk mrokfom gontwat wandfakhato htafmorm. Gontwathu mrokfom kfo memor, “Kristenm Jisas Krairhu gutnius mrokfomn dukefm htakfot. Jisas Krair nohmor. Nohhato tfit sinyamor. Sinyahato yura moun yuhah rim fnahnimor. Kto tfit yarim fnahnehato yawihnehato tafont htihakrahm tuhant yindars.” Nd mrokfot tur kfo htanymort. Nd mrokfot yakitoh kihhato toh gari hasokfot.

Kristenm mirahko ka be rhu yindhorkfot wom kurhefen duha. Nhah. Nd krhopam Kristen yimaroh toh nmbuharoh mnhombrayuk nefem. Nd Kristenr wohsisrah o nhai. Nd nefet. Mirahko ka tamoh nefet. Ndnnett n Jisasr yakitoh kihhato toh bmtakfot. Toh bmta hasetnn Jisasr niahato mhtiyaknerahrn, to be yakruharn dborioh rhu nmbuhah hirahrn.

Nom Bro Nkifrarhu dborioh tuhannom yindarinom tohwonom. Ndnnetnomn nom be dborioh dborioh nefrpam na hasohato nd nmoh yufampno rhuyuk wuskamn be toh gari hasokfot.

(Sapta 1.1–2.10)

¹ Na Pitaya. Nann Jisas Krair aposer hingneft fak htamor. Ndar gontwat nann wandfakhato htefiwant. Niko Bro Nkifrarhu yufatpno bi ruhet yimako, nikompno ndar gontwat niewut. Niko frohko rpen rpen natubatunihato Pontus tohwako, niko frohko Galesiat toh-wako, Kapadosiat tohwako, Esiat tohwako o Bitiniat, nd nd profinsm tohwako, ndar gontwathu mrokfom wahtitwakomm. Nd kmim niko toh-wam womroh kmiyem. Hefenr tor, tukmoh tohyuk kmir. ² Bingot Bro Yifemr rhuhatoh rorhu dukeft bi wuri wuri yimot. Bi htimort nikmoh yak htayuk yihotat. Bi hti htatahato bi rorhu yufatpno fak dbkaf htamorko. Memor, “Kto nanhu yonm rhurahm.” Bi rorhu yufatpno yak dbkaf htayet-komn turhu Yafothat niahato tu Jisas Krair kanjo fak htamorko. Memor, “Inji yak htahato Jisas Krairhu mrokfom hikrahm.” Krairhu kkupam kfomom nikmoh yima rifhum yak wus bowushato Kristenko tohmoko. Bro Nkifrar hti yuhuwafhato nikmoh yima yuhum minoh hmbrehato yak marnya bomarnyarahrn.

Hefenrn tu dborioh toh nmbuhah yakrahko

³ Akfo yindhor boyindhornomr Bro Nkifrar, nmoh Nungohtet Jisas Krairhu Yifemr. Bro Nkifrar nom yuhuwafhato Jisasr bi nohhato yopt ruhetr tfit kasinyamorr. Jisasr yima nfrir tfit tohhato nfri dborioh rhu nmbuhah he hanitrnom. He hanyhato nom htitwa-nomn nmoh yima yuhum sinyewum Bro Nkifrarparhu yakitohhato hikneft. ⁴ Nmoh dukeft duka kangnom, bi rorhu yon mifenom. Nmoh yufatpno rhuyuk wuskamn Bro Nkifrar kakitoh-wormko hefenrn. To nhai finji na-ruhatm. Be inji rhu hanyrahm. ⁵ Bro Nkifrar tu nngrajoh Nkifrayer. Bro Nkifrar yakitohhato hikwatkomr kuka-tohafo hanitrko. Rorn toh natwihworko. Nhah wom

tamohm niko finji nakfot. Be inji rorn toh natwih hanyruharko, ee Jisasr nierahr. Niahato tfit rorn miyakruharko yak marnya bomarnya-rahrko.

⁶⁻⁷ Jisasr niko miyakruha nmbuhat wany yindhorwakomn yima yuhum tohetohwomko. Ndt rot hifa nmbuhat. Nd krhopenm Bro Nkifrar yahukam, to mirahko niko ndm mhtiyakhato tfit amthu youtanom. Nhai. Nd krhopenm niko Bro Nkifrar yahukohat kangr, “Afo ahtiyann, toh bmtarahm o nhai.” Kraistr yakitohhato hikwa nmbuhat gorharoh hingneft kanjo inji kitwot. Yimar gorham yekwohat yuht nungur fukayett kekwort. Kto tfit kahe tarioh hnutrm. Tarioh hnuhato nd nungur fukat yak thuwart tu fnhuyet gorha mifrpm kekwor. Bro Nkifrar hikwa yimaroh toheft to inji korht. To mirahko Bro Nkifrar ka nd gorham wofnwor. Nhai. Ndm rom bbinysoftpno mibatiniyukem. Ror niko yakitohwa dukeft ndt hti hanitrt. Nd krhopam yakruhakomn nikmoh toheft toh bmtarahko. To hifa. Nd krhopam niko yakmom, nhai yima yuhum krhormomko. Nhai. Jisasr yakitoh bmtahato tohmokomn yindho-refrpno tohmoko. Ndm bi hti htamormn kto Jisas Kraistr yawihnehato yimam htiyak thoft be tu bro yufat hirahrko yo bro yindhorr nmbuhat htarahrko yo nikmoh yufam yura yura yutahato kfo yindhorrahrko. ⁸⁻⁹ Jisasrpn yima yuhum yitahat nhai yima nyatgatkim htihat yima yuhum be rorhu dukefrn rhukahm. Nhai. Yo rorpn bro dukefm htewohat nhaf inji. Nhai yima nyinga-tikm htihat inji nakahko. Nhai. Nikmoh bro dukefm Jisasrn kitm, ndnatn Bro Nkifrar kak hanitrko. Inji newatrko bro yindhorefrparpno korhko. Nd bro yindhorrifhur nikompon yorhwar be tu bro yindhorrifhur korhrko. Nhai finji kfo hikkfot.

¹⁰ Bingot bi profetm kfo ptha htamomt ndar rhu nmbuhat niko bi yekwat. Kfo ptha nhta bonhta me-moum, “Bro Nkifrar nko fitoh yuham tfit yakmiyakruharm?” ¹¹ Bro Nkifra-rhu Yafothat nd profetm mthu nawohmoatm kfo memoum, “Kraistr krhopam yakrahr, nhai be rpahtet krhopam yakruhatr. Krhopam yakruhar n kto tfit bro yufat yakrahr.” Kraistrhu Yafothat inji kfo nuhasmoatm, tfit nd profetm kfo ttiwon hta memoum, “To nd yimare fitoh yiha nieruher? Tone krhopam finji finji yakruhar?” ¹² Inji ttiwonmoatm Bro Nkifrar kfo memorm, “Na hingraruha hingneft nhai bi nikompno hingrarnarhotant htiruha-komt. Nhai. Kto nikmoh mongko. Kto ndar bbinysoft nia tohruha yimam, romn nd neft htirahmt.” Nd gutnius mrokfom, yimam hnehato kfo nuhas-wam, ndmn kfomor. Bi Bro Nkifrarhu Yafothat yawihnehato yimam thu nawoh hanitattm romn nd mrokfot miyaknihato kfo ptha nuhas hanitatmko wany hanitwokomn nd gutnius mrokfom. Mounmotm rom nhaf kangm, “Nd gutnius mrokfot afo awany hik bohiknomn.”

Bro Nkifrar tur tohwa toheft kanjo tohneft nakumornom

¹³ Bro Nkifrar duka kangr, “Athu nhirakkahanm tukanhu toheft toh hikrahm.” Ndnetn nikmoh yima yuhum yak hta bohtatahato nikmoh wiyauyau nmbuham dukefmpno yaukfot. Bok dukefm yak duha, rpa yima yuhurpam rhukfot. Rpa yima yuhum rhuhato Bro Nkifrar mekahtr Jisas Kraistr yak hfhanafohato moun yuhat yawihnehato tuhan yindars tafont nyinga rihar wuhtiyak thombat, nd yiha Bro Nkifrar yakhato yak marnyarahrko. Nd dukeftn yakitohkfot. ¹⁴ To be niko Bro Nkifrarhu dukeftn rhukfot. Bi Bro Nkifrarhu yoneko bi. Ndnetn mirahko tfit Jisas Kraistrhu mrokfom tafi wany juha na hnamo nefm tfit nd nefm ananom.

¹⁵ Bi Bro Nkifrarhu yoneko. Bi turhu yufatpno fak dbkafmorko. Ndnnett niko yonko be turhu toheft toh hikkfot. Nhai kspitafat rim tohkfot. Nhai. Mar tafont tohkfot. ¹⁶ Nkifra rfa borngt Bro Nkifrarhu kfo memor, “Na Bro Nkifraya mar tafont tohwa, niko to inji mar tafont toh bugakfot.”

Nmoh fasoh fasoh nefmpno Kraistr suh nanyormonom

¹⁷ Hefenr tor nmoh nkifra kmir. Bro Nkifrar tor nmoh Yifemr. Ndnnett ndar bbinysoft tohneft be rorhu yinhitn toh hikkfot ndar bbinysoft tohwa yifemrom toh hikwa kanjo. Nd Yifemr nhai nom yakitohwa yufam o hingr-nefm o tamohm ndm htikahr. Nhai. Yima buganom rpahtet yukatoheft kukatohwornom. Ndt tu dborioh neft newur. ¹⁸ Bi nikmoh nkifram toh hawihnamo nefm ndm fak hik hna-moko. Nd nefm bi Kraistr suh nanyormom. Nhai fohrn o nunga krirn nohrmor. Nhai. ¹⁹ Kraistr suhato kkut yohnemot. Nhai rorn wom nefm nahato suhrmor. Nhai. Mgogra yimar, be nmoh nefmpno suhmor. ²⁰ Nmoh fasoh fasoh nefm Kraistr tkitt yakhatoh nohneft, ndt Bro Nkifrar mounti bbinysoft tafi hingrna hta duha nd dukefr bi duka htamorr. Nda tu wuruh yihampno Kraistr niahato yima rifiny buharn suh nanyormom. ²¹ Kraistr nohmotr tfit tu Bro Nkifrar bi yopt ruhetr tfit kasinyamorr. Kasinyahato bro yufat hemorr. Nd mrokmom bi wanyetkonn Bro Nkifrar kakitoh-wokomr. Yakitohhato gari hasiwuko Kraistrhu nia miyakneftn. Kraistr miyakraharko hifa rhu nmbuhak yak htarahrko.

Bro Nkifrar hikwa met yindarim yak marnyakfot

²² Jisas Kraistrhu gutnius mrokmom, yafothayet mrokmom wanyahato hikmokomm. Hikhatoh nd fasoh nefm nefm fahfo thumokomm. Yafho thuhato yima rifhumio wutham rhumom. Yima rifhumio wuthamn dborioh dukefmn yakhatoh niko tuko Jisas hikwa tuhan yindariko najohfi yagnr tohhato tuko nayak marnyewuko. Nd neftn yakitoh hany yakitoh hanykfot. ²³ Nda Bro Nkifrarhu mrokmom rhu yakitoh hanyraht. Kto be inji rhu nkifraniraht. Nd mrokmom nikmoh yima rifhumio rihingnamottm toh nmbuham bi yewuri tpm kanjo frdbrhamoko. Frdbrhahato nfri yima yuhumpno tohwoko. Nd yewuri tpm rom mibatiniyukem. Bro Nkifrarhu mrokmom rot be inji rhu nkifrani-raht. ²⁴ Ndar mrokmom tu fipet mro-kfoyet. Nkifra gonborngt kfo memot,

“Nda bbinysof bugathu tuhan yindars
kiprt kanjo tohwom.

Tfa htewamn tfit yudbat tfam yohnitm.

Nhai wom rhu hatohkahn.

Yimam inji nahikrahm,

wondht mhatoh tefihato yudbat yohniraht.

²⁵ Bro Nkifrarhu mrokmom nhai inji naruhatt.

Rorhu mrokmom be inji rhu nkifraniraht.”

Nd mrokmom niko wanyemo gutnius mrokmom.

Aisaia 40.6-8

2

Kraistr toh nkifraniruha rmon dany rahuyer

¹ Bi gutnius mrokmom wanyahato nfri yima yuhumpno tohwoko. Ndnnett ariham be tmifko wayafho thukomm womroh duka bebnefm, kfo nhehnefm, kfo nheh furanefm, yo womm tngrpaye frnhehafnefm yo

womroh hifa hingrneft o wuskam o tamohm hti yuhurhato yaknefm, yo kfo tukiohnefm. Nd nef bugam be wayafho thutwakomm. ²⁻³ Mirahko tfit nd nefm ayakitohnomm. Bro Nkifrar niwa dborioh dborioh nmbuham bi htiyeteko. Ndm htihatoh wahikkomr. Asomif yon hamboryenm wanurta-hato mingat mnnefekwa kanjo Bro Nkifrarhu mrokfot wuyakhato yakitoh dbkaftakfot. Inji rhurahko nikmoh toh nmbuham nhai be rpahtet ruheftn rhuruhatm. Nfri nfri yima yuhum nia hneruhamn toh bmtarahko.

⁴⁻⁵ Nikmoh dukefm Nungothet Jisasrpnio htamoatko Bro Nkifrar inji htihatoh rorhu yufat rhuyuk yon kunys fak htamorko. Yak htahato rorhu rmomt kanjo kasinyamorko. Womm rom nhai. Jisasr yakmomr rifak htafmomr. Tu Bro Nkifrarhu yima yuhur ror Jisasrpar htamour. Ndnatn Jisasr yak-morr rmonthu dany rahur kasinyamorr. Niko rorhu yon kunys, niko wohfna rahu nd ndeko. Niko Bro Nkifrarhu priseko. Turhu rmonthu hingrneft hingrna yimako fak htamorko. Niko lotuhato windoh nd nd nefm newam Jisasr yekwarm Bro Nkifrar wuyahukr ofakfot yahuka kanjo. Bro Nkifrar inji htihatoh yindhorwor.

⁶ Buk Aisaiatn Bro Nkifrar kfo memor,
 “Wawanyko! Nanhu yon kunys wom kingr
 dany rahur kanjo kasinya-ruhanr.
 Rorrpar titarahm.

Rroh dukefm rorparpno hta-ruhamn
 nhai suhhato haninge-ruhatmm.”

Aisaia 28.16

⁷ Rorrpar dany rahur tohhato hatoh-worko. Nikmoh bro dukefm rorpar kitm. Wom womt, rom nhai dukakahm. Nhai nd dany rahurpno yakitohhato tohkahm. Aisaia kfo memor,
 “Nd rahur, kamda yimam hti kurhato yak thumor,
 be bi tfit nd rahurn bi dany rahur tohwor.”

Sng 118.22

⁸ Tfit wom mrokfot memor,
 “Nd yimar Bro Nkifrar htewa tahiye:
 Nd tahirpno wuram mfrgu-ghato suhwom.”

Aisaia 8.14

Jisasrhu mrokfom yekwamm riyak htefiwumm. Inji newamn suhna-suhwom. Bingot Bro Nkifrar rhuhato bi htitamort yimam myahot bani suhruha tkitt.

⁹ To niko tu Bro Nkifrar bi turhu yufatpno fak dbkafmorko, niko tur kanjo tohwa kmiyeko. Niko nd kmikomn bi fakngotmor king kanjo tohhato pris hingrneft yakitohneft. Nikomn ror hingrnayuk hingrnefm htihatoh kfo nafhur htfaskfot. Niko kspitat ruhetko ror rimakhato turhu bro nanyjaret nukafat rim htamo yuhat to tfit nikomn nd ror nayuk nefk kfo ptha nafhur htfaskfot. Inji nayuk-komn fakmorko. ¹⁰ Niko nhai bi Bro Nkifrarhu kmiko rhurmoko, arihat bi Bro Nkifrarhu kmiyeko. Niko afo nhai hti yuhuwaftato yak marnya hna-rmorko, arihat bi kak marnyahne-wurko.

Wommpno tohneft nmoh yau nmbuham be yau marnyakfot

(Sapta 2.11-3.22)

Nom Bro Nkifrarhu hingrna yimanom kanjo tohkfot

¹¹ Bar yinouroko niko nndo wom kmi thofko ndar bbinysoft tohwako, hefenr tor nikmoh tu kmir. Niko kmiyakmiko bbinysoft tohwohat mirahko yima yuhum wagrha sinyekwa fasoh nefm ahiknom. Yima yuhum wagrha sinyekwa nefm yak hatohaforuhatkmo fasoh tkit bebt riyahko. ¹² Niko Bro

Nkifrar hik duha yimampno tohwoko, niko be yak tehato toh marnyakfot. Nd Bro Nkifrar hik duha yimam, romrpam kfo wokwomko o faso faso kfo beb-womko, niko dborioh neft hikhato nhai tawo kfwok inji narfokomm, nd tkittn kto ndar bbinysofthu bati yihar tfit Bro Nkifrar kfo yindhor mirahmr, “Bro Nkifrar hiket yimam dborioh nefm newum, nom nhai.”

¹³ Bror mdukakhato nda bbinysoft tohwa gafman yimam htayuk lohfot hikkfot. Romr tohwa kingrhu yinhitn toh bugewum kmi kmiroh tuhfot yindars. Ndnnett rorhu mrokfom hik-kfot. ¹⁴ Profins tohyuk gafmanm, ndm buga rroh yinhit tohkfot. Nd yimam kingr kak htewurm. Fasoh net fasoh net yimam romn yekwamm kalabus htewumm. Dborioh dborioh nefm nayet yimam kfo yindhorwomm. ¹⁵ Bro Nkifrarhu dukefr duka kangr niko be dborioh nefrpam wanakahtko, nd niko faso faso kfo bebwa yima dukef duha yimam inji htitihato nhai tfit wom ptharuhatm. ¹⁶ Nkifra boririfhut niko yak nhirtamoat bi frtmbho thumort Jisasrn. Nhai nd boririfhut wom yakitohkahtko. To mirahko amanyom, “Nhai mrokfom. Nhai bi boririfhut yakitohkahtnom. Ndur nefm nanefm nhai mrokfom.” Ndm fasoh dukefem. Jisasr nd fasoh nefmnr mrhumotmr suhmr. Ndnnett nd fasoh nefm yafho-hato be Bro Nkifrarhu yinhit tohkfot. ¹⁷ Wom yima fura bofuram dborioh dborioh nefm yak nuhaskfot. Niko Jisasr hikhato tohwoko niko tuko najohfi yagnr tohato nayak marnya-kfot. Bro Nkifrar duka yakrmihato rorhu yinhit tohkfot. Yo Kingroh mrokfom hikkfot.

Kraisr bi fak nuhasmornom krhoparoh yakneft

¹⁸ Niko hingrna yimako, fitoh yimar tohukatohworko to be nd tohuka-tohrhu yinhitn tohato rorhu mrokfom hikkfot. Nd tohak yimar fasoh yima kfeter niko to mirahko rorhu beb nmbuhat htihato tawo fasoh nmbuhat ayak nuhasnomr. Niko be dborioh nmbuharpampno tohkfot. ¹⁹ Niko tu Bro Nkifrarhu dukefr hikhato dborioh nefm newatko nikmoh tohak yimam htihato frtabotwomko, niko be tha hekfot. Inji narahko Bro Nkifrar yindhorhato kto yak marnya-rahrko. ²⁰ Tuko mmohato nd tohak yimaroh tngm nhai hikrfotkomm frtabotmko, nhai toh kekutni tawo frtabotfokomm, to ndte Bro Nkifrar finji dukaruhart nd neft? Ka duka mirahr dborioh neft neko? Na kanga ka nhai. Nd neft tukmoh mmo nmbuhatn frtabotmko. Rote, dborioh nefm netko frtabot furetmko nhai toh kekutni tawo frtabotfokomm, tot nd neftn Bro Nkifrar hti yindhorwor.

²¹ Dborioh yimako wom yimam tat furemkon o finji nemko, to niko finji kforuhako? Bro Nkifrar to nd neftn nakumorko. Kraisr to niko dukahato krhopam fakmor. Nd krhoparoh yak yuham to bi turn fak nuhasafmorko. ²² Jisasr krhopam yakmohat, nhai ror wom neft narmotr nd krhopam yakrmor. Ror nhai wom yiha kfo furarmotr wom yimar wanyrmorr. Nhai. ²³ Kfo tfar botfar thumomr ror nhai finji kformor. Yonmar yonmar krhopam titamorm. Rom inji namohat nhai kfo yanho mrokfot kformorm. Nhai. Nd rom nayuk nefm Bro Nkifrar-pno htamorm. Bro Nkifrar tu dborioh jaser. Ror duka marnya bomarnyahato tamoh tamoh mrokfefm kakitohworm. ²⁴ Nmoh fasoh fasoh nefroh krhopam Kraisr yura bgre mis fakmorm. Bi Kraisr nmoh fasoh nefmpno bgre misn nohmotr ndnett nd nmoh fasoh nefroh nammo hammoneft yafhohato toh marnyakfot. Ror harhumo fhu bebt kfomot nmoh fasoh nefm yoh-nemom. Yimam Jisasr frtabotmo nmbuhatn Bro Nkifrar fak marnya-morko.

²⁵ Sifsifm kanjo frfnah wurasoh-hato fau mmo bammo htfasmoko. Tfit arihatn sifsif tohukatohwa yimarpmo bi tfit nia tohwoko.

3

Bi nayaket tuhan yindariroh mrokfom

¹⁻² Hingrna yimam turoh tohak yimaroh yinhim tohwa kanjo niko metko bi ram yakhato ramemrom-pno yorhwako niko be ramemroh yinhimn rhukfot. Wom yimam tafi Jisars hik duhatem niko rroh metkomn rroh yinhim rruhato tamoh tamohm dborioh yima yuhumpno kfo ptha marnya bomarnyarahkomm, tot nd tkittn nikmoh ramemrom htiruhamn rroh yima yuhum yak kekuthato Jisars hikrahm. ³ Niko Jisars hikwa metko, rot hifa tmarim, tirm, wuram, yimbhindangm wondhet bugam korhm yo wondhet wondhet wuskam hmbritko, rot hifa inji wondh hta bohtewuko. To be mirahko be nd thatiproh wondhyuk wondhrpat aha-tohnom. Nhai. Kangko awondhkahtnom tukmoh yindarim ahti yindhormnom, wawanyko. ⁴ Tukmoh yindarim be dborioh yak marnya bomarnyakfot. Tamoh mrokfom naphorahnom be hifa yima yuhumpno rruhato naphtha marnya bomarnyakfot. Nhai be mfro mfro bahbahnakfot. Tom ndhtet ruhefem yima yuhum wondhkfot. Bro Nkifrar ndhtet nefmn hti yindhorwor. ⁵ Bingot Juda efkotm nhai thatiproh nefrpanm wondhrmoam. Yima yuhuroh nefmn wondhmoum. Rroh dukefem Bro Nkifrarpar yimoum, nhai riduka adukarmoam. Ndhtet dukefmpno tohmoamn rroh yindarimpno rhu marnyahato tamoh tamohm dborioh dukefmpno rruhato naphthamoum. ⁶ Serat rhumo rhu nmbuhat fak hik-mom. Serat tuthu ramem Abraham-rhu yinhitn be tohmout. Yufat yutamoahat futamoutr, tohukatohr. Niko Serathu nefm hikhato womm kak marnyewukomm yo nhai wom tamoh tamoh nefm duka yakrmikahko to bi Serathu yon meteko.

⁷ Niko yindariko bi metetko, mirah-ko metm yakhato arituhaftanomm. Nifn met yindarf n bi rpa yefn nhai wom husfn rhukahfn. Niko yimayeko yo rom yimayem ndnetn nayak marnyahato rpat tohkfot. Bro Nkifrar hiruha dborioh rhu nmbuhat nhai ni yindarirpa yakruhatnt. Nhai. Mett rot nd rhu nmbuhat yakraht. Yindariko metmpno toh marnyahato tamohm kfo bruttnaneft nhai wom tamohm hta raforuhattm nikmoh kfo bruttneft.

Wommpno yiha yiha dborioh nefm nakfot

⁸ Wuroh mrokfot kforuhant. Niko Kristen tir nayakitohhato rpa yima yuhur tohkfot. Womm yakyuk krhopam hti dukahekfot. Nahti marsisa duha. Yima najohfi kanjo tohhato nahti yuhuwaf nahti yuhuwafhato hifa yima yuhum nahmbrekfot. Noh hmbre yima yuhum tohhato tuko dborioh nefm nayak nuhaskfot. ⁹ Wom yimam fasoh nefm newumko mirahko tfit fasoh nefm ananomm. Mirahko tawo tawo fasoh nefm annhenom. Womm inji newumko niko dborioh nefm nakfot. Bro Nkifrarpmo kfo bruttnahato Bro Nkifrar yak marnyarahm. Inji narahko Bro Nkifrar yak marnyarahrko. Ndhtet dborioh nmbuhamn nakumorko. ¹⁰ Bro Nkifrarhu rfa borngt kfo kangt,

“Fitoh yimar kangr toh marnya-hato hifa rhu nmbuhat kto ahtiya,
nd yimar mirahr womm faso kfo beb bobebanm yo mirahr womm akfo nhehanm.

¹¹ Nd yimar fasoh nefm mong trohhato dborioh nefrpanm hikkfot.

Wommpno nhai nnakfo baboba inji nakfot.
Be hifa dborioh yima yuhumn nayak marnya hanyhato
rpat rhu marnyakfot.

¹² Nd mrokfom nhai be sfno inji kfokahm.
Dborioh metm o yindarim Brorko toh tamnourahrm
rroh wiyauyau toh nmbuham.

To tfit nd metm o yindarim toh nmbuham faso tohwom,
ror nhai toh tamnoukahrm rroh wiyauyau
toh nmbuham. Nhai.

Hti namburworm.”

Sng 34.12-16

Dborioh nefmpno krhopam yakneft hifa

¹³ Yimako dborioh dborioh nefm narahko, nhai wom yimar yak bebruhatrko. Nhai. ¹⁴ To dborioh nefm niwatko womm kangm finjina finjinemko ndt to nhai mrokfom. Be yindhorkfot. Mirahko ayakrmekahnomn bok dukfm ayaknom. ¹⁵ Kraistr nmoh Nungotheter, rorhu mongko mitohkfot. Rorn toh raforahrko tamoh nefm. Niko dborioh rhu nmbuhat toh gari hasiwa nmbuhat kfo ttiwonwomko, kfo nuhashekfot. ¹⁶ To mrokfom kfo ptha nuhasneft, mrokfom be duka marnyahato dborioh yima yuhurn kfo nuhas marnya bomarnyakfot. Mrokfom faso faso kforahkomm, tfit tuko yima yuhum krhorahmko. Mrokfom hifa kforahkomm, nd yimam niko Jisasr hikwa nmbuhatpno faso kfoyukm niko pthayuk mrokfom wanyruhamn tfit tum yimtnarahm. ¹⁷ Be tunmoh dborioh nefmpno Bro Nkifrar kangr krhopam wayakko, a to nhai mrokfom. Bro Nkifrar ndt yindhorwor. Tunmoh fasoh nefm krhopa yakneft, ndt Bro Nkifrar nhai yindhorkahr.

Nmoh nrfa htiyakneftn Kraistr nohhato tfit sinyamor

¹⁸ Kraistr nohmo yuhat dukakfot. Kraistr nhai wom tofspno wasrmomr. Nhai. Nmoh fasoh nefm rorn yakmorm mfha htamorm. Rorn mfha htamotr be nd gribt wafakmot. Bro Nkifrar nhai bi wom mrokfom nompno. To be nd yiharpa nohmorn to be. Nohmohat thatipprat nohmot. Yafothat nhai nohrmot. Yafothat rot rhumot. ¹⁹ Yafothat rhuhatto Maringour yimot. Maringour yihatto Maringour kalabus tohyuk noheh yimaroh yafotham mrokfom hemorm. ²⁰ Nd yafotham nhai be sfno ndha toh furarmom. Bingot Noar sift hingrna hanyhato Bro Nkifrarhu mrokfom kfo pthamoahat nd yimam hanyjbornamoumm Noar pthayuk mrokfom. Nhai wany yakiohato hikrmomm. Hanyjbornamoahat Bro Nkifrar nhai bi finji narmorm. Noar sift hingrna hanyhato Bro Nkifrarhu mrokfom kfo pthamoahat, 8-pela met yindarirpam nd Noar hingrnayuk sift fknimomn nhai bro hnut fune habohirhato miptkormom. Wom womtn bati bugamom. ²¹⁻²² Nd tekt be kfo nhombra mrokfoyet. Bro Nkifrar ndar yiha hingrnewa hingr-
nefthu kfo nhombra mrokfoyet. Ariha yimam baftais yekwohat, nd yiha Bro Nkifrar yekwarm rorpno rim tohwom. Baftais yekwohat nhai yima kifthu yukthuneftn yukkahm. Nhai. Yimam Jisasr Kraistr hikhato rorhu dborioh nefm hiketm, baftais neftpno wom womm kak nuhaswotm ror Jisas Kraistr hikwa yuhat. Ndt nhai be sfno nd hingrneft rhuakat nhai. Nd baftais hingrneft mnetet. Jisas Kraistr nohhato yopt tohmohat Bro Nkifrar kasinya-morr. Ndnnett yimam Kraistr frtkaf-hato baftais yekwohat Bro Nkifrar kasinyewarm rorpno rim tohwom. Jisasr nohmohat Bro Nkifrar kasinyak-nimorr hefenr hamuhmorr. Hefenr hamuhhato bro yufat

hemorr. Bro yufat hemotrr nd yufet mounmotm, bbuket mounmotm rorhu yinhirpat tohwom.

Kristenm bkra kaht kanjo fknitm

4

(Sapta 4-5)

Yatk yima yuhur yafhokfot

¹⁻²Nmoh fasoh fasoh nefmpno Kraiser yonmari kku bebt hatoh-mort. Niko rorhu tat yima yuhur yakhato nd yonmari bkra kahm fknekfot. Mirahko yakrmanyomm. Tpi yakyuk tkitet. Nd bkra kaht bi ftoh-nikomt, to be nd tkittn ndar bbinysofth toh thombat be nhai tfit nd yatk yima yuhum tfit uhatone hatonehato suh-ruhatko. Be Bro Nkifrarhu dukefrpar hikhato tohrahko. ³Bi nd yatk yima yuhumpno tohhato nd kspitat tohyuk yimam niwa nefm bi nahna nahnamo-kommm bi na buhtamokomm. Rom niwa nefm be tu fasoh fasoh nefm newum. Yima yuhum wasinyak thombat nhai tu dborioh nefm nakahm, drinkfot yakhato drink spak-wom. Yemrot, drinkfot hta burwewa tkitm yitamn yemrot yehany yehany nhai bmbri ye smbhonikahm, drinkfot yakhato drinakni thombat nhai bmbri mdrin tmbhonikahm. Yehany drinhany yehany drin hanyhato bro yindhoreft yekwattm yima yuhum be yura hirhato btn tum tawo tawo nayakni hanyhato nhai tu dborioh nefm nakahm. Inji newamn be ndha rhu nkifrangotefiwum. Bro Nkifrarhu kfo yirmoh mrokfom nhai hikkahmm. Turoh tahi yifonn yakhta ndmn kfo bruttnewum. ⁴Nd rom niwa nefm be tu fohm nhombre-wum. Fohm turoh foh swo brongm yihato yuk kekut bokekutwa kanjo inji fasoh fasoh nefm newum. Niko rom niwa nefm nhai brbo yihato htikahkomm. Niko rom niwa nefm yi hti duha yitatkomm kfo ptha kangm, "Tamoh dukefmpno nom niwa nefm nhai yi htikahmmom?" Ndnatn faso faso kfo rindho borindhiwumko. ⁵Kto tumn kot tohruhamn Jar kfo nuhas hik bohikrahmr, rom niwa nmbuhat. Nd kot yakitohyuk yimar bi yak htatetr korhr. Rorn wanyrahmr arihat tohwa yimami noheh yimaroh kotkfof. ⁶Nd dukeftpno Jisasr Maringour yihato Maringour tohyuk noheh yimam gutniuskfot bi mikfo ptha nuhas tanyomm. Kto nd bro kotkfof yakitohruha yiha nd noheh yimam sinyaruhamn rpat nd yima nfrimpno kot rpat tohrahm. Fitoh noheh yimam Jisasr miptha tanyuk gutnius mrokfom wanyhato fakitohmm, nd yimam Bro Nkifrarmpno hefenr tohrahm.

Niko rpa rpa yimako Bro Nkifrarhu Yafothat rpa rpa nefm he nhombra hanymotko

⁷Ndar bbinysofth bati yihar bi brbohwor. Ndnnett yima yuhum duka marnyahato yak hta marnyakfot. Yak hta marnyahato kfo bruttnakfot. ⁸Tu bro nmbuhat niko Jisasr hikwa yimako tuko nayakitohhato rpat toh marnyakfot. Inji narahko be nhai wom tamoh nefm rhuruhatmko. Tamoh tamoh nefm rhuneft nhai be krhoni-ruhatm. Yudbat yak dbhof-narahkomm. ⁹Bro Nkifrarhu hingerneft wom yimam niewum nikmoh kunah yakkfot. Mirahko kfo mari hanyhato ayaknomm. ¹⁰Niko rpa rpa yimako Bro Nkifrarhu Yafothat rpa rpa hingerneft he nhombra hanymotko. Tuko Kristenko nd hingerneft yakitoh-hato tuko nahti duka nahti dukakfot. Yafothat hayuk hingerneft mirahn be tuhaftahato arhut. Nhai. Tamoh

hingrneft fahurn, hingrnakfot. ¹¹ Bro Nkifrarhu mrokforoh kfo ptha htfasyuk hingrneft fahurn, to be nd hingrneft yakitohkfot. Bro Nkifrar kfo famur, “Ndar yimann wom yimam tamoh tamohm yibonwom o finji newum ninn yihato wanyhekfot o htihekfot.” Ni frohn nd hingrneft fahurn, tu Bro Nkifrar hayuk dukefmpno nd hingrneft hingrnakfot. Inji hingrna hik marnya-rahko, riruh aruhuk yimam htihato Bro Nkifrarhu yufat yura yura yuta yindhorrahmt. Yura yura yutaruhattm be rorhu yufatn broniruhattn be rorrpar tamoh tamohm nyingako tohruharn be tohhany, tohhany, tohhany, be inji toh nkifranirahr. Be inji rpa.

Yindhorkfot Kraistr kanjo krhopam yakneft

¹² Bar yinouroko, mirahko nd bkra kaht niko tohwat yironahato aduka amanyom, “Barenko, nome ndar kahte tamohmpno yi tohwanomt?” Inji kfo duha. ¹³ Jisasrhu yufatpno yi tohwatko nd krho mis titewuko Kraistr krho mis titamo kanjo. Ndnettn krho mis titewohat be yindhorthpno titahato warhutwako. Kto Jisasr turhu bro nukeft mihatohhato tuhant yindars htiruha yiha, nd yiha niko be tu bro yindhoreftpno tohrahko. ¹⁴ Niko Kristenko wom yimam kfo bebwomko, nhai mrokfom. Bro Nkifrar inji htihato kak marnyewurko. Nhai be sfno yak marnyakahrko. Bro nukeft hatohet Nkifrarhu Yafothat toh natwihwotko. Ndnettn niko yindhorkfot. ¹⁵ Yo! Niko Kristenko, nom mirahnom ka hifa kfoyet nikmoh womr sinyaniruharn yima wasrahr o rikohrahr o raskor hingrneft yirahr o womroh hingrnefm o tamoh yak nhta tkitm rim rhuhatu yukatoh hanyrahr. Nd nefm narahko to be tukomn tfit krhopam yakrahko. ¹⁶ Niko Kristenko be krhopam fak fureko, niko mirahko ayimtina furanom. Bro Nkifrar kfo yindhorrhato nikmoh yufa wasarem Kraistrhu yufat yuta yindhorkfot.

¹⁷ Bro Nkifrar yakitohruha bro kotkfote, finji kforhoyant? Arihat nom Kristenmoh mrokfomn bi rhuhatu kot kakitohworm. Nmoh mrokfom yakitohhato nmoh toh nmbuhat bi kak susnewurm. To Bro Nkifrarhu gutnius mrokfo hanyjbornayet yimamne finji naruharm? Be nhai wom yihotam, be kaht wundiati riyahm. ¹⁸ Ndt tu kfo mif kfoyet. Buk Sindauntn mrokfot korht. “Fitoh yimam Bro Nkifrar hik-hato bkra kaht yitohtn, Bro Nkifrar fekrn, tone nd hanyjbornet yimame finji naruham? Rom be kahtn wundiati riyahm.” ¹⁹ Bro Nkifrar bi turhu nyingaye bi htihato kfo famur, “Niko, nd nd yimako mrokfetko rhurahko.” Bi inji htihato kfir, nd yimam yudbat rroh yima yuhum Bro Nkifrar pno yak kekuthato dborah nefrparm yaukfot. Tu Bro Nkifrar hingrna htamornom. Yiha yiham hti yukatohaf hanitnrom. Tamoh krhopam nianeft turn thu bmtarahnom.

5

Niko eldako yakitoh marnyakfot Bro Nkifrarhu met yindarim

¹ Na Pitaya. Na sioshu eldaya. Nikmoh siosroh eldam hingrnawa hingrneft ndt hingrniwa. Na tukianhu nyingaye htimoyanr Kraistr krhopam yakmohat. Kto Kraistr yawihnehato met yindariroh nyinga riharpno bro yufat yak thombat, nd yiha niko bro yufam yak hanyshombat na rpat nd bro yufam yakrahnom. Ndnatn niko eldako wom yima yuhum kahukanko. ² Bro Nkifrar hikwa met yindarim niko eldako yakitoh marnyakfot tukmoh yonm yakitohwa kanjo. Nd Kristen met yindarim nikmoh tirmn korhwom. Ndnettn yakitoh marnyakfot. Mirahko nd elda hingrneft ahhreknomt. Yo mirahko be mfro maru hingrneft kanjo nd hingrneft ahingrnanomt. Nd

hingrneft be tukmoh yibon yima yuhumn hingrnakfot. ³ Mirahko tukmoh bro yufam dukahato Kristenm yihom toh mtoh yinomm. Nikomn dborioh nmbuhat htahato Kristenm htihato rom hikrahm. ⁴ Kto Kraistr yawihnehato met yindarim tafont htayahato sifsifroh tohak yimar kanjo met yindariroh tohukatoh yimaroh tohak yimar toh thombat nd yiha niko eldako tu hifa dborioh rhu nmbuhat htirahko. Yimam wumt resishato win praiskfot yekwa kanjo inji dborioh rhu nmbuhat yakrahko. Nd rhu nmbuhat nhai bmbri rhu tmbhoruhatt. Nhai. Be inji rhu nkifranirah.

Nom Bro Nkifrarhu tirtn rhukfot

⁵ Niko damiag yimako, niko eldaroh yinhim tohkfot. Mirahko yura amtoh-nomm. Tuko nahti duka nahti dukakfot.

“Yimam be mfro turoh yufam kfo hagrhetm,

Bro Nkifrar nhai hifa yima yuhur hmbrikahrm.

Noh hmbre yima yuhurpno ruhetm,

Bro Nkifrar hifa yima yuhur hmbritrm.”

Sindaun 3.34

⁶ Ndnnett nikmoh yima yuhum yak karhuhato be dborioh yima yuhum rhuhato Bro Nkifrarhu yinhitn rhukfot. Inji nahato wom yiha Bro Nkifrar nikmoh yufam yura htarahrm. ⁷ Bro Nkifrar hti dukewurko. Ndnatpno nikmoh dungunangunefm wahitwakomr.

⁸ Nikmoh wiyayau nmbuham dukefmpno yaukfot. Yima yuhum yak hta bohta marnyahato yimbhindangm tohetohaf hanykfot. Nhai be sfno inji kfokaha. Satanr yau gronetr tohwor. Niko kmbruyenm kanjo gbeft yak hikaknihato kangr atadbofnayanko. ⁹ Ndnnett nikmoh yima yuhum Bro Nkifrar pno htahato Bro Nkifrar yakitoh dbkafhato tohkfot. Inji nahato yima yuhum bmtaruhamko, nhai bmbri riwohsisakruhato Satanr nia finji naknanefm. Nhai be nikomrpako ndhtet krhopam yakkahko. Wur fitoh fitoh tkitm tohyuk Kristenm be nd rpahtet krhopam kekwo. Ndnnett toh bmtahato frtfa thukfot. Riyoh bruyohak duha. ¹⁰ Na kfo hta nuhaswa mrokfom hikrahko, Bro Nkifrar thu bmtarahrm nikmoh toh nmbuham. Bro Nkifrar yima yuhuwafetrn nd yuhuwaf nmbuhatn fakmorko. Memor yakhato Kraistrpno tohhato rorhu nukeftn be inji toh nkifranirahm. Ndnnett nd niko yekwa krhopam be inji ariharpat yakniruhakomm kto nikmoh toh nmbuhat yak marnyaruhart toh marnyarahko. ¹¹ Nhai finji kfokfot. Rorrparhu bbukeftn be inji rhu nkifranitt. To be inji.

Wuroh mroko nmbuhenm

¹² Sailasrhu tire ndar gontwat yorhwa mrokfom wandfahemora. Sailasr nanpno tu brbo toh tamnouwa yimayer. Kanga akfo duka tunguna marnyayanko. Mirahko ndar gontwat yorhwa mrokfom ka fura mrokfoym. Bro Nkifrar yak marnya mifrahko. Mrokfom yakitoh kihhato toh bmtakfot.

¹³ Asha Babilon thofm, bi tu Bro Nkifrarhu yufatpno kfo htatamom, niko dukahato kfo yindhorkfot htefiwumt. Yo na yakitohwa yon Makr ror nhaf niko dukahato wom kfo yindhorkfot htefiwurt. ¹⁴ Niko Kristen tuhan yindariko, wom Kristenmpno nakfo yindhohato naki yindhorkfot. Tot tu Kristenm niwa neft.

Nhai mrokfem, warhutwako. Niko Kraistrhu met yindariko Bro Nkifrar yak marnyatwarko.

Pitar dwanfamo husyuk gontwat Barkof kfo nuhas mrokfom

Ndar gontwathu bro dukeft, Kristenroh kfo dukayuk gontwayet. Kristenm Jisasr yakitoh kihhato toh bmtakfot. Tom wom tisam kau htfaswom. Nieruhamn frmmo bammoruhattmm Jisasr yafhohato rom yakitohyuk dborioh nefm yafhorahmm. Aposerm kfoyk mrokfom yakitoh kihkfot. Yakitohhato hikrahmm be nhai Bro Nkifrari Jisasr myafhoniruhatmf. Aposerm turoh nyingaye htimomr Jisasr kfo tebos mrokfom hemohat. Rom rpat ruhato wany yakitohmoumm kfo tebos mrokfom Jisasr hemoahat.

Wom yimam kfo kangm Jisasr nhai yawihneruhatr. Ndar gontwat kfo miraht Jisasr nierahr. Be yudbathu nianeft nhai. Ndt nhai be sfno. Bro Nkifrarhu yima yuhur nhai wofnkahr wom rpar rim tohtaneft. Ror kangr ndar yuht bbinsof bugathu yima bugam afo yima yuhu yak kekut bugam. Ndnetrn rroh toh garineftn yiham yuke hanitm (3.9).

Nmoh toh nmbuham dborioh nefm yakitoh bmtahato tohkfot. Yakitoh bmtahato fasoh dukefmpno niayuk yimam yak tuhafrahnomm.

(Sapta 1-3)

¹ Na Saimon Pitaya. Na Bro Nkifrarhu hingrneft hingrnawa yimaya. Nann Jisas Kraistr aposer hingrneft fak htamor. Nann ndar gontwat niko Jisas Kraistr hikwa yima-kmoh yufampno htefiwant. Jisas Kraistr nmoh Bro Nkifrar tohwor. Tohhato nrfa htiyakmornom. Nikomi nom Aposernom nmoh rhu nmbuhat Bro Nkifrar htitwort rpahtet ruheft korhnom. Nom Jisasr hikwa yihotat, ndtn kukatohwor. Nhai nom yakitohwa yufamn o maru kunymn o tamoh tamohmn htikahr. Nhai. Nom Jisasr hikwa yuhath titr. Nikomi nom Aposernom Jisasr hikwa yuhathifa rpat niyak tkaf hanitf. Nhai nom Aposernom mfrfnahnihato niko yiho tohkahko. Nhai. ² Nmoh Bro Nkifrari Jisasr, nom yak hta bohtiwat, hifa rofmpno bi tohwoko. Bro Nkifrarmpno kfo bruttna kanga nikmoh rhu nmbuham ayak marnyakahtmr rhu marnya-ruhakomn yima yuhum be mirhurahm.

Bro Nkifrarhu yufat korhnom

³ Jisas Kraistr Bro Nkifrar. Ror tu bro nanyjar bbukeft hatohwor. Rorhu nd nanyjar bbukeft kfiwut nom Bro Nkifrarhu nefm hikwonom yo dborioh rhu nmbuhat korhwonom. Nd dborioh rhu nmbuhat nom yorhwat be inji rhu nkifranirahat. Nom Kraistrmpno nia tohwohat dborioh rhu nmbuhat kahukrnom. Nmoh yukatoh nmbuhat htimonomr Bro Nkifrar kanjo yo bro bbuka nanyjaret yimar kanjo, ndnatn rorhu naku tngr yimohat nom wanyhato nia twanhomonom. ⁴ Jisasr Bro Nkifrar. Ndnatn nom rorpno rim tohmohat Bro Nkifrarhu dukefrn hikwonom. Nmoh rhu toh nmbuham, tur kfo htamo yuhamn hifa fak htamorm. Inji yak hta marnyamotmr, niko ariham Bro Nkifrarhu dukefrn kau hikwoko. Yau hikhato ndar bbinsofthufasoh yima yuhur mong trohwokomr. Ndnatn nhai nd fasoh yima yuhurn yak hatohaforuhatrko fasoh tkit bebt yiruhatko.

⁵ Nd bro dukefmpno nikmoh tpim habokkna marnyahato Jisasr yakitohkfof. Jisasr yakitohhato dborioh nefm rpat yakitohkfof. Dborioh nefm yakitohhato dborioh dukefm yakhato dborioh dukefmpno yaukfof. ⁶ Dborioh dukefmpno yauhato yima yuhum tamohm dukefm sinyewum afo yak nhtakfof. Yima yuhum yak nhtahato toh bmtakfof. Toh bmtahato Bro Nkifrarparhu dukefr hikkfof. ⁷ Bro Nkifrarhu dukefr hikhato tuko Jisasr hikwako nayak marnyahato tuko nayakitohkfof. Tuko Jisasr hiketko nayak marnyiwa kanjo wom yima furam inji yak marnyakfof.

⁸ Inji tohhany tohhanyrahko to be nd nefrpam bronirahmko. Bronihato nmoh Nungohtet Jisas Krairhu hik yuham nhai myak mmotaruhatko. Hik marnyaknirahkomr. ⁹ Wom yimar nhai nd kfiwa nefm yakitohkahrm, nd yimar nyingam kunyjawtmr nhai hti hikkahrm Bro Nkifrar hti yindhorwa nefm. Hti mmohato nhai mhtiyakkahrt Bro Nkifrar rorhu fasoh nefm yak thuhemo yuhat. ¹⁰ Niko nanhu yimatko kfiwanko, mirahko ndhtet yimaroh fasoh dukefm ahiknom. Nd dborioh dukefm bi kfahukam niko ndmn hik-kfof. Niko Bro Nkifrar yakmohat memor, “Nanhu yon kunys rhurahm.” Ndnnetn nd nefmn yakitoh trpaknikfof. Yakitoh trpaknirahko be nhai suhhato mong trohruhatkomr. ¹¹ Inji nahato nom nrfa htiyakmo bro yima Jisas Krair hti yindhorruharnom yakmi-yakrahrnom ror king tohruha kmi hefenr.

¹² Jisas Krairhu mrokfof rot hifa wany yindhorhato bi myakitoh bmtaknitkomt. To na kanga tfit wompam wompam akfo duka hanyakahtanko yima yuhum duka hanyrahmm na kfoyuk mrokfom. ¹³ Hifa mkfo dukak hanitanko. Kfo duka hanyetkomn mrokfom bi wany hmbrita hanyahato rhurahko. Kto na nohnineft mrokfom nhai yafho thuruhatkomm. ¹⁴ Na tuka kak nhtewa nanhu nohhato ndar thatipthu thu hur sany yihar bi brboh-wor. Nmoh Nungohtet Jisas Krair bi inji kfo nuhasmora. ¹⁵ Na tohruha yiham afo kfo duka hanyruhanko. Kfo duka hanyetkomn na nohni thoft nd dukefr yakitoh hanyrahkomr. Nhai yafho thuniruhatkomr.

Aposerm htimomt Bro Nkifrarhu nuka nanyjareft Krair hatohmort bruwohmr katiwa kanjo

¹⁶ Nom aposernom bi kfo ptha nuhasmonomko. Kfo memonomko, “Nmoh Nungohtet Jisas Krair bro bbuka nanyjaretr tfit yawihnerahr.” Mrokfom nom pthiwam nhai be ptha furakahnomm. Nom tunmoh nyingaye htimonomr Jisasr bruwohmr kanjo katohato funefm yambo hritnamohat. Nom tunmoh nyingaye hti hikhato kfo ptha nuhaswonomko. ¹⁷ Bro Yifemr Jisasr kfo yuta hagrha hanyahato bro nuka nanyjareft hemohat nom tunom tohato htimonomr. Hefenr tohwa tu Yura Myorhekwa Nkiframifr kfo memor, “Nda yimar nanhu yoner. Nanhu marbit rorn korht. Rorn mfro hti yindhorwa.” ¹⁸ Nd tngt yawihna-mohat nom tunom Jisasr rpat hnaru kminysofr toh hasetnomn nd tngt wuwanyakmonomt. ¹⁹ Tom profetm kfo pthayuk mrokfom. To mirahko ka kfo fura mrokfofem. Rom pthayuk mrokfom tu kfo mif kfofem. Rom kfo ptha htayuk mrokfom htiyak hanyahato yau hikrahkomm dborioh yihotam. Profetroh mrokfom lamrhu nukefpno yauwa kanjo profetroh mrokfom yak htaf hanyrahmko. Rroh mrokfom yakitoh hasohato Jisasr yawihne thombat Bro Nkifrar nd yiha hti yimbu hikrahkomr. Nd yiha nikmoh yima yuhum mirahm ka dbha ksfut mfnahwa gunyr kutewumr nwindmr tewur.

²⁰ Wawanyko! Niko tuko wahti dukako. Profetroh mrokfom nhai be turoh yima yuhum waphakrmomm. Nhai. ²¹ Yo nhai wom yimamn ptharmotmm wanyrmomm. Nhai. Tu Bro Nkifrarhu Yafothat kasinyamottm nd mrokfom kfo pthamomm.

2

Profet giamanroh fasoh dukefm (Jut 4-13)

¹ Bingot Isrerpno yimam profet yufam yaknehato mkfo nneh bonhehmoumm. Arihat to niko hti marnyaf hanykfot. Wom yimam tisa yufam yaknehato kfo fura bofura mrokfefm hnehato mfrnhehruhatmko mhikaknirahkomm. Kfo mirahm, “Jisarr nhai mfha htarmorm nikmoh fasoh nefm.” Yimam inji nayukm nhai rhuruhatm. Be yudbat Bro Nkifrar yak batiyakni twanhorahrm. ² Nikmoh wom wom Kristenm nd giaman tisam niahato mfrnhehakruhahatm rroh dohr mikmbrirahm. Mikmbriruhamn ijoh tonanyeft yak nuhasrahmm. Nd Kristenm tisa giamanroh dohr mikmbre-hato ijoh tonirahm, be nd tkittn riruh aruhyuk yimam inji htiruhamn mkkirahm manysifm kanjo. Nhai tfit sinyaruhatm Bro Nkifrarhu hikneft. ³ Nd giaman tisaroh yima yuhum be maruhamn korhm. Be tum wakfayuk mrofkomm mkfo nnehaknehato maruhenm mtarhoptakni herahmko. Nd rroh nefm Bro Nkifrar bi rihtiyak hatohakmorm. Arihat to bi dukewur yak batinefrpatn. Nhai kfo furakahr. Rorhu mrokfot fipett rhuraht.

⁴ Wawanyko! Bingot Bro Nkifrar fasoh nayet mounmotm yakhato hel tumorm. Tumotrm yuhre nd kspita nngrajohet muhr afo tohhato toh garitwom kotkfot. ⁵ Bingot Noar tohmo yiham nhaf rpahtet neft rhumot. Nd fasoh fasoh nefm namoa yimam nhai rhurmom. Bro Nkifrar kfomotr, hnun miptko bati witaom. Noa ripharpar tohmom. Noar hifa toh nmbuhathu toh yuharoh mrokfom uhatone hatonemour. ⁶ Yo bingot Bro Nkifrar dukamor Sodomti Gomorathu yak batineft, nd kmif nhai rhurmof. Yuht yimayett rpat wundiath mikur tounimom. Memour, “Inji anakahata yimam htiruhamn duka yanhorahma.” ⁷ Nd kmi Sodom Gomoraf mikur tounimohat Lotrpar nhai kurrmor. Nd hus kmifhu tuhand yindars yiramtieh yiram kanjo yihom yejbohnak myebohnakmoahat Lotr nhai yindhormor inji htimoahat. Lotr Bro Nkifrar hikmoatr Bro Nkifrar rorpar fakmorn nhai kurrmor. ⁸ Rorhu toheft fak teh marnyamot. Ror be rruhato mano mano htimour tuhand yindars yihom yejbohnak myejbohnakmoahat. Htihato rorhu yima yuhur nhai marnyarmoarr. ⁹ Nd tndhm wanyhato duka kangnom, Bro Nkifrar bi inji toh rafo hnewurm rorhu mrokfot hiket yimam. Ror hiket yimam tamoh krhopam yekwohat ror tor bi brbo toh tkafworm. Rorhu mrokfom hik duha yimam bi hti hta bohtewur finji finji narhoyanm bro kotkfot tohni thoft. Ndm bi hti htetm korhwom.

¹⁰ Nd giaman tisam bi inji hti hta bohtewur. Nhai Bro Nkifrarhu yinhit rhukahm. Rorhu mrokfom hanyjbor-newum. Turoh yima yuhum sinyewa fasoh dukefm hikwom. Hikhato mfro tuhagrha htfaswom. Ndnnetm be tu nhai yakrmekahm Bro Nkifrarhu mounmotm kfo wokneft. ¹¹ Nd giaman tisam mounmotm kfo wokwomm. Bro nngrajohet mounmotm nhai tum Bro Nkifrar nyingahato inji nna kfo wokkahn. Nd giaman tisarpanm inji newumm.

¹² Be tu mmo mifwom. Be tu nhai yimaroh dukefm rhukahmm. Nndo yau fohroh dukefm yorhwatmm womm kfo tukioh fura hanitmm. Be tu fasoh nefh hikwom. Inji nayukm Bro Nkifrar tufnah batirahrm foh nungam kanjo. ¹³ Womm faso kak bebwomm tawo Bro Nkifrar faso yak bebrahrm. Rom tafont yima nyinga riharpno niwa nefm nhai yimtnakahm. Nhah mekahm, “Kafrohato narahnom,” nhai. Nikom-pno yi rhuhato nuwa ye shombat be tu bro yimtnefh kahukmko. ¹⁴ Nd yimam rroh dukefm nhai wom tamoh dukefm rhukahmm. Be metroh dukefrn frtkaftewarmn nhai fasoh nefm yafho thukfot. Kristenm tafi tat yima yuhum yak duham nd giaman profetm yitamn mkfo yuhur boyuhurwatmm yitamn fasoh nefm newum. Nd giaman tisam fasoh nefm bi nawonfohetmm be nd maruha dukefrparpno korhm. Ndnatn Bro Nkifrar yak batirahrm. ¹⁵ Rom nd fasoh nefm newohat nhai be sfno nakahmm. Tu dborioh yihotar yafho thunimomrn be nd fasoh fasoh nefm fknihato mmo bamumiwum Beorhu yon Balamr namo kanjo. Balamr to inji namor, rorhu bro dukeft memour, “Fasoh fasoh nefm niwa yimam hikrhoyann maruham hirahma.” ¹⁶ Bro Nkifrar rorhu dukefr inji htihatoh yihotat toh rafomorr. Donkim yimam kanjo ptha duhatm, nd yiha donkir kfo pthamor. Balamr inji htihatoh be nhai hanysfanihato yirmor. Nd ror hatohmo fasoh yima yuhur ndha fahomorr.

¹⁷ Nd giaman tisam nhai dborioh yihotam yak nuhasruhatmko. Dborioh dukefm bi be. Kangme, bujurn mikna domtnitr bupen duhater. Rroh mrokfom be tu fipen duhatem. Bro Nkifrar bi htitamort rom tohyuk tkitt. Rom be tu kspita nngrohpanm yi toh-rahm. Nhah mar nmbritefenr htiruhatm. ¹⁸ Nd giaman tisam turoh fipa duha mrokfompno yihom kfo bruyohak mkfo bruyohakhato kfo grha fura hasiwum. Inji na hasiwamn to nhowi yitamn womm wuteh kecutwomm. Womm yuhre fasoh nefm yafho thuhato yuhre mtohtefi hanyetm yo romn tfit metroh mrokfom hanitamn mkfo yuhur boyuhurwatmm tfit yima yuhum sinyewumm. ¹⁹ Yitamn kfo kangmm, “Niko tamohmpno be inji yorhwako? Niko nhai Bro Nkifrarhu yinhitn rhukahko. Waniako. Nom hikrahko be tukmoh wuratn yau fura bofurarahko.” Nd giaman tisam nhai tu dborioh yima yuhumpno yau marnyahahm. Be tu fasoh nefmn kak hta bohtewumm. Bi fasoh nefmn kuny kimomm. Nhah yafho thukfot. Ndt nhai yuwi furakfot. Nhah. Tu kfoyet. Yimar bi fasoh nefmn bi kuny kimr to be finji yafho thukfot? ²⁰ Wawanyko! Yimam bi nmoh nrfa htikyayuk yima Jisas Krairpno niahato ndar bbiny-softhu fasoh nefm bi yafho thunihato tfit mkekuthato tfit tum yakitohyuk nefm bi tfit fekmn bi nd nefm bi tfit kak htewumm, be tu fasoh yima mifm tohrahm. ²¹ Nd giaman tisaroh toh nmbuhat to inji riruhakmot. Afo Jisasrpo yimomn rroh fasoh nefm mfafhonimomm. Ndt rot hifa nmbuhatnaho. To tfit kto nd aposerm hayuk mrokfom mfafhonimomm. Myafhonihato arihat rroh nefm be tu fasoh mif mifem. ²² Nd giaman tisam yau fohm kanjo inji newum. Yaum to inji newum, tum yifako yinayuk yem-rom, tfit kmifat yarim hta kthuwamm tfit kaumm. Fohm inji newum. Ar bi yuk marnyahato tham bi hifa fnhuyetm, to nhai miruhatm, nhah tfit bdrht yaknaruhatnom. Nhah. Tfit yitamn buburs yihato wik bowikhato bubur bebt harhuwom.

Tamohmpno Jisasr nhai bmbri niakahr?

¹ Bar yinouroko, ndar hus gontwaf nikmoh kfo dukayukef. Kanga, niko wanyuk mrokfom yafhonirah-komm. Mirahko ayafhonomm. Yakitohhato dborioh dukefmpno tohhato nikmoh toh nmbuham yak hta bohta marnyakfot. ² Bro Nkifrarhu profetm bingot pthayuk mrokfom yakitohhato yo aposerm kfo ptha nuhasyuk boririfhum dukak hanyhato yakitoh hanykfot. Nd boririfhum nmoh nrfa htiyakyuk Nungothetr hemorm.

³ Jisasrhu yawihna yihar brbo rhu hanyrahr. Yimam turoh fasoh dukefmm yorhwam, nieruhamn mhaninge yukatohhato kfo mirahmko, ⁴ “Nikmoh Nungothet Jisas Kraistr kfo mohat nianefte to fitoh yiha nieruhar? Aniekahr afo htirahnomr. Niko kang-nom ka gari furewuko, nhai nieruhatr. Bingot nkiframmpno nhai wom yimar hefenr muhato tfit yawihnarmor. Ndar bbinysofthu ruheft to be rpahtet ruheft korh hik twanhiwut. Nmoh nkifram bi inji mhti fnahmomt. Rom nohnimom arihat to be rpahtet ruheft korht.” Inji kforahmko. ⁵ Nd mrokfom rom be turoh fasoh yima yuhur o dukefm ptharahmm. Rroh dukefm nhai dukakahmm Bro Nkifrar ndar bbinysoft hingrnahato yak htamo yuhar. Bingot Bro Nkifrar be tnge kfo pthamotr mount yarim fnah furamot. Tfit bbinysoft tek bari furatn buha mfnahmot. Be buha tek bari furatn mborhahato tek bupam mano mano frhahir habrimomt. ⁶ Tfit Bro Nkifrar kfomotr bro hnut yihato nd bbinysoft wiyauyau hasoyuk tamoh tamoh noh bati wita bugamom. ⁷ Arihat to inji tamoh tamohm Bro Nkifrar kfo yuk mrokfo yuhatn be inji korhm. Yorh-wamn be bro kotkfotn garitim. Nd yiha Bro Nkifrar kotim bugarahm fasoh net fasoh net met yindarim. Kotim wurasohruhatrm bbinysoft mountpno rpat mikur batinirahm.

⁸⁻⁹ Bar yinouroko, mirahko ammo-nomt wom nmbuhar. Womm kfo kangm, Jisasrhu yawihna mrokfot nhai dimandikaht. To afo attiwonanko, nikmoh dukefti Bro Nkifrarhu dukefte ka rpat korhf? Na kanga ka nhai. Wahtiko, 1,000 gunyimm nomn htitwonomm be tu boknabok gunyji-mem. Nmoh nyingaye hti yukitwo-nomm. Tfit Bro Nkifrarhu htiyefst htitworm nd 1,000 gunyimm rpa yihar kanjo. Yo rpa yihar nhaf inji. Nom hti brbohwonmr, tfit rorn nd rpa yihar tfit 1,000 gunyimm kanjo htitworr. Nmoh dukeft kangnom Jisasr bmbri aniar. Bro Nkifrarhu dukeft htitwor yimamn. Ror nhai wofnkahr wom yimar o mett kaht yinyeft. Rorhu dukeft kangr, yuht bbinysofthu met yindarim yima yuhu ayak kekut bugam afo. Rroh garineftn kot tohyuk yiham yukitm afo.

Mounti bbinysoft mibatirahf

¹⁰ Bro Nkifrarhu wuroh yihar nhai yiha duhater be hti fohtasakrahr rikoh yimam kanjo. Nd yihar yura mountko wamir nadidar sinyahato mount rim fnahniraht. Mount yorhwa gunym tamohm kahtn kandhi ras witarahm. Ndar bbinysoft yo bbinysoft rhuyuk tamoh tamoh kahtn kandhi witarahm. ¹¹ Wahtiko, nhai wom tamohr rim tohtaruhatr. Kur wus bugarahm tamoh tamohm. Ndnnetn nikmoh yau nmbu-ham tu Bro Nkifrar dukewa yima yuhurn wayau hiktawako. ¹² Bro Nkifrarhu toheft toh hikhato nd Bro Nkifrarhu wuroh yihar toh gari haso-kfot. Yo toh marnya hasokfot. Inji narahko Bro Nkifrarhu wuroh yihar dimandinerahr. Nd yihar mount nhai rhuruhatt. Kahtn kandhi witarahm. Kaht mfro funa nanyjarhato nd tamoh tamoh kandhi bati witarahm. ¹³ Tot wom mrokfot Bro Nkifrar kfomot. Kfo memor, “Tfit nfri mounti bbinysoft hingrnaruha. Nd nfri

mounti bbinysoft tohruha met yindarim be dborioh nefrpam yakitohhato tohrahm.” Ndnettn nmoh dukefm be nd Bro Nkifrar kfiwa dukef yuhatn hti yukatoh hasorahnom.

Dborioh nefrpam yakitohhato Brorhu wuroh yihar toh gari hasokfot

¹⁴ Bar yinouroko, yima yuhum yak hta marnyakfot. Bok dukefm yak duha. Yima yuhum be Bro Nkifrarpar yikfot. Yima yuhum inji yak htarah-komm to be Brorhu wuroh yihar kfo mirahrko, “Niko nhai wom tamohm rhukahmko. Nikmoh yima rifhum wuthayem. Nikomi na bi rpa yima yuhur korhnom.” ¹⁵ Brorhu wuroh yihar inji bmbri nia duha yitahat, rorhu dukeft kangr, ndar bbinysofthu yima bugam afo ayarim tohna bugam na tukanpno. Roh garineftn nhai yudbat niakahr. Bro Nkifrar tu hifa dborioh dukefr hemorr Porr, nmoh Kristen yimat. Jisasrhu nia yihar rorpno wom kfo nuhas mrokfom kfo nuhasmornom. ¹⁶ Ror nikompno gontwam wandfamoahat to be nd Jisasrhu nia yuharoh kfo nuhas mrokfom kfo nuhasmourko. Rorhu wom mrokfom kfo pthamoam fak mmotamounomm. Wom yimam Bro Nkifrarhu mrokfom wany ffi hasiwam yo Bro Nkifrar hik marnya duha yitam, romn faso faso kfo kekut bokekutmoumm Porru mrokfom yo ndwom Bro Nkifrarhu rfa borngthu mrokfom. Nd yimam be tu Bro Nkifrar htirahrm.

¹⁷ Niko nanhu Kristen yimatko, nd giaman tisaroh nefm bi hti hik bohik bugamokomm. Rom be tu hanyjborna nngrajohwomm Bro Nkifrarhu mrokfom. Ndnettn niko dukefmpno tohkfot. Roh fasoh yima yuhum hneruhamm faso faso kfo hta bohtaruhatkmo Bro Nkifrarhu tu dborioh mrokfot niko yakitohwat myak htaniruhakomt tfit roh dukefm hikrahko.

¹⁸ Jisas Kraistr nmoh Broyer. Nom rorn nrfa htiyakhato rhu nmbuhak yak marnyamo yimayer. Rorpno frtkafrahko be toh bmtahato Bro Nkifrarhu dborioh nefm hikrahko. Nanhu dukeft duka kanga be rorhu yufarpat abronikahtn tuhant yindars be rorhu yufarpatn ariyuta hagrhak-kahmn yihof href be rorhu yufarpat yutahany yutahanye, to be inji.

Jonr dwandfamo barkof gontwat Barkof kfo nuhas mrokfot

Jonr ndar barkof gontwat wandfamohat, hus bro dukefetrn ndar gontwat wandfamort. Duka memor, “Gontwaye Kristenm bi kfo dukarhotanm Bro Nkifra nitohfno nayakitohruhamn rpat tohrahm.” Yo nhai wofnrnmor kspitat tohyuk yimam yihato Kristenm mfrnheh bonhehakhato rom Bro Nkifrar firrohneft.

Nd kspitat tohwa yimam kfo kangm, “Bbinysoft dborhayuk wuskar yo yimam nhai tu dboriohm rhukahm. Tu faso mif korhm. Bro Nkifrarhu yon Jisasr ndar bbinysoft adborhar nhai dboriohr rhurfotr. Yima mifm kanjo inji faso rhurfor.” Yo kfo kangm, “Bro Nkifrar nhai ndar bbinysoft nom tohhato niwa nefm htihato kfo ptha inji nakahr. Nhai. Kukatoh marsisa hasiwurnom. Ndnnetnomn nom tamoh neft to frohm kforuhamnom, be nafura bofurakfot. Dborioh nefm o fasoh nefm be nafura bofurakfot. Bro Nkifrar nhai ptha inji nakahrm nom niwa nefm. Ndnnetnomn tamoh nefm be tunmoh fiyo nafura bofurakfot.”

Jonr duka memor, “Ndhtet kfet yimam Kristenm wany yakio duha.” Kfo memor, “Jisasr tu yima mif mifr tohmr. Fitoh yimaroh yima yuhum kfo kangm, Jisasr tu yima mif mifr tohmr yo Bro Nkifrar rpat kakitohwomr, nd yimam womm yak marnyakfot.”

Mirahko yifungt ritohwa yimaroh nefm ahiknom. Bro Nkifrarhu nukeft wiyauyaukfot.

(Sapta 1.1–3.10)

Bro Nkifrarhu mrokfot yafothetet

¹ Nda gontwat na wandfiwat wom mrokfot kfo nuhasruhanko. Nd mrokfot tu yafothet mrokfot kfo nuhasruhanko. Ndar bbinysoft tafi trha duha nd mrokfot bi ritohngotakmot. Nom bi riwanyakmonomt nd mrokfot. Yo tunmoh nyingaye htimonomt. Yo tunmoh tire faktiwonmonomt.

² Nd yafothet mrokfot yarim fnahmott htimonomt. Nom nd mrokfot htihato kfo nuhaswonmko. Nd rhu nkifrayet mrokfot bingotn bi Bro Yifemrpnno rhumout.

³ Nom htihato wanyuk mro-kfom kangnom akfo nuhasakahtnomko, niko wanyhato nom tohwa toh yuhat rpat tohrahnom. Rpat tohhato nom Bro Nkifrari rorhu yon Jisas Krairpno tohwa tohefrpat toh bugarahnom.

⁴ Nom kangnom, gontwaye akfo nuhasakahtnomko niko wanyhato be bro yindhorefrparpno rhurahnom.

Bro Nkifrarhu nukeft wiyauyaukfot

⁵ Jisas Krair pthayuk mrokfom nom wanyhato kfo ptha nuhaswam inji kfiwum, “Bro Nkifrar nhai wom tefi kspitefenrpnno rhukah. Nhai. Ror bro mar nukefrparpno korhr.”

⁶ Wom yimar kfo kangr, “Na Bro Nkifrarpno hifa hifa tohwa. Nhai na wom nefm nakaha.” Inji kfet yimar wiyauyau marnyakfot. To tfit rorhu

wiyauyau nmbuhat nndo nndo rinewunineft, nd yimar be tngrpatn kfo furewur. Nhai Bro Nkifrar hikkahr.

⁷ Nom Bro Nkifrarhu mar nukeft tohhato rorhu dborioh nefrpam hikneft, tu Bro Nkifrar dborioh nefm niwa kanjo nom wom Kristenmpno be rpat toh marnya-hato nhai wom beb nmbuham rhu-ruhatmnom. Rpat tohruhanomn rorhu yon Jisas Krairhu kkupaye nmoh fasoh nefm yak wus bowuswatrm nmoh yima yuhum wutham rhurahm.

⁸ Nom be tunmoh rhu nmbuharpam hti yukatohhato kfo mirahnom, “Nom nhai wom fasoh nefenm rhukahmnom.” Mrokfot inji kfoneft be tunmoh nefm kak wunewunom. Nhai tu kfo mifkfof kfokahnom.

⁹ Nd nom nahnayuk fasoh nefm Bro Nkifrarpo yihato kfo ptha nriyafrahnom, nhai wanyhato rhu mongruhatrmom. Tur kfomo yuhatn nd fasoh nefm yak wus bowus thurahm. Yak wus bowus thuhato duka mumaforahrm nmoh fasoh nefm.

¹⁰ To tfit nom kfo manyeft, “Nom nhai wom fasoh nefenm nakahnom.” Inji kfonefte ka Bro Nkifrar kfo furamor ror dkfo memohat, “Yima bugam fasoh nef bugayetem?” Nd mrokfot ka kfo furamot. Niko ka nhai mdukakkahnom ror bi kfoym mrokfom?

2

Kraisr nmoh toh tario yimayer

¹ Bar yinouroko, nann ndar gontwat wandfiwanko. Kanga akfo hta nuhasanko. Mirahko fasoh fasoh nefm ananom. Be toh hanyhato wom fasoh nefm mment, tor nmoh wom toh tario yimar. Tor Bro Yifemrpno tohwor. Nd yimar Jisas Kraiser. Tu dborioh yima mifer. Nom niwa fasoh fasoh nefm tfit rorn Bro Nkifrarpo rhuhato kfo kangr, “Nd yimaroh nefm nann bi suh nanyormoyanm. Mirahn tfit adukahiyannm.” Rorn nd mrokfom kak hta bohta marnyewurm.

² Rorn nmoh ufasoh nefmpno nohmor. To niko mirahko ka be nmoh nefrpamn nohmorm, nhai mif. Nda dodh bbinysof bugathu met yindari bugaroh nefm noh bugamorm.

Yimar Bro Nkifrarpo brbo frtkafetr, nd yimar kak hikwort tu Bro Nkifrarhu thfa mntwathu mrokfot

³ Bro Nkifrarhu thfa mntwathu hikneftpno, Bro Nkifrar hti duka tawisaf-wonomr.

⁴ Wom yimar kfo kangr, “Na bi Bro Nkifrar tawisafwanr.” Tfit rorhu wiyau yau toh nmbuhat nhai Bro Nkifrarhu thfa mntwat kfiwa mrokfot yuhat hik marnyakahrt, nd yimar be tngrpatn furewur. Nhai tu kfo mif mifkahr.

⁵⁻⁶ Yimar Bro Nkifrarhu mrokfom hiketr, Bro Nkifrar rorhu yima yuhur korhr. Yimar kfo kangr, “Na Bro Nkifrarhu mrokfom kak hikwa.” Inji kfet yimar tu Jisas Krairhu wura tfi yuhatn yau hikkfot. Jisasrhu wura tfi yuhat yau hikhato nom htiruhanomn kfo mirahnom, awi, Bro Nkifrarhu toheft toh hikwor.

⁷ Bar yinouroko, nd yima nayak marnyanefthu mrokfot na wandfiwat, mirahko ka nfri mrokfoyet. Nhai. Nda mrokfot bi niko Kristenko riwanyakmo mrokfoyet.

⁸ To nda mrokfot tu mna yimbu yuhettn, ndnatn nfri mrokfot kanjo wandfiwanko. Nda mrokfot bingot tu yafothett rhumot. Kraiser nd mrokfot

hikhato bro hingrneft hingr-namor. Yo niko nd mrofkot wanyhato yifung kspitathu ufasoh nefm htany-hato Brorhu nukeftn wiyauyauwoko.

⁹ Wom yimar kfo kangr, “Na Bro Nkifrarhu mar nukefrn tohwa.” Inji kfet yimar tfit wom Kristenm hti srthuworm, nd yimar nhai mar nukefr tohkahr. Yuhre kspitat tohwor.

¹⁰ Yimar wom Kristen yimampno nayak marnyahato rpat tohwar, tor nd yimarn Bro Nkifrarhu mar nukeftn tohwor. Mar nukeft tohyuk yimar nhai suhkahr.

¹¹ Yimar wom Kristen yimam hti sret, nd yimar afo yifung kspthu nefm tohwor. Yiro yifung kspit tohwarn nyinga kunyjetm kanjo tur yiyuk yihotat nhai hti dbtakukahrt.

¹² O niko, nanhu yonenko, Bro Nkifrarhu Kraistr nohmo nmbuhat mhtiyakhato nikmoh fasoh nefm bi fak wus bowus thumorm. Nndnetann gontwatn wandfahato kfo nuhas-wanko.

¹³ Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

Yo niko damiag yimako, Bro Nkifrarhu bbuka rifhur hatohhato Satanr yahot tkafahato toh bmtewako, niko inji buga gontwat nikmoh yufam-pno niewut.

¹⁴ Nanhu yonenko, bi Bro Yifemr-pno frtkafetko, nikompno ndar gontwat wandfiwanko.

Niko bro yimako bi kriyany hmbreyetko, niko bi htimokomr, nd bi ritohngotakmo yimar. Ndar gontwat nikmoh yufampno rpat niewut.

O damiag yimako, niko toh bmtewakomn Bro Nkifrarhu mrofkot yakitohhato nd mrofkotn kak hta bohtewutm nikmoh wiyauyau nmbu-ham. Ror toh tkafwatrko Satanr bi fahot tkafmokomr. Nndnetann ndar gontwat wandfiwanko.

Bbinysofthu fasoh nefm yima yuhum sinyu duha

¹⁵ Nndnetann kfiwanko mirahko ndar bbinysofti rot haruhwa fasoh fasoh nefm ahti yuhurkahnomin nd fasoh nefm arim tohnom. Ndar bbinysofthu fasoh nefm rim toh-nirahko, to be nhai tfit kekutakhato tfit Bro Yifemr-pno nieruhatko. Nhai.

¹⁶ To mirahko ka tamoh nefm kfiwur-nom rim tohneft. To nd nyingaye htihat tfit yima yuhu sinyewohat yo thatipm mwofnnita nefm newohat ee tamoh tamoh nefmpno o wuskampno yufam kfo hagrha bohagriwa nefm, nd nefm nhai Bro Yifemr-pno niakahm. Nhai. Nd nefm be nda bbinysoftuhem.

¹⁷ Nda bbinysoft mibatiniirah. Yo nda bbinysoft yorhwa fasoh nefm yimam mhti wofnnihat niwam, ndm rpat mibati buganirahm. Yimam tu Bro Nkifrarhu dukef yuhatn toh hikwam, romn toh nkifranirahm.

Kraisrhu hti dbnotyuk yimam bi htikomm

¹⁸ Nanhu yonenko, niko wany hnamo mrofkot kfo memot, bbiny-softhu mibatini yihar Kraisrhu hti dbnotyuk yimar, kutewumr Anti Kraisr, nierahr. Arihar bi htitko bok yimam Kraisrhu hti dbnotyukm bi mfah hanitm. Nndnatn nom duka kangnom nda bbinysofthu mibatini yihar bi brbohwor.

¹⁹ Nd Kraisr hti dbnotwa yimam afo nompno rpat toh hnamounom. To tfit arihatn bi frfnah-wom. Rom nompno toh hnamohat nhai tu Kraisrhu yima yuhurn toh hnarmom. Tu Kraisrhu yima yuhurn atoh hnam, nhai inji

frfnahrmotm. Bi frfnahmotm, ndt htihato kangnom, Krairspno be inji toh tariowakmoum. Nhai tu yarim fnahna bugarmom.

²⁰ To nikom nhai nd Krair hti dbnotet yimam kanjo tohkahko. Nhai. Krairrn Bro Nkifrarhu Yafothar yak-hato yiro yima yuhum htewurko. Nd Yafotharn thu nawohwatrko dborioh yima yuhur niawatr Bro Nkifrarhu tu mrokfom duka dbtak hik bohikwo-komm.

²¹ Ndar gontwat nikompno wandfiwa nmbuhat mirahko ka Bro Nkifrarhu mrokfot yak mumiwatkomt na wandfiwanko. Nhai. Niko Bro Nkifrarhu mrokfot bi hti hik bohikwo-komt. Hti hikhato kfo kangko, “Nd Bro Nkifrarhu mrokfot tu kfo mif kfoyet.” Nd nmbuhatpno na wandfiwanko.

²² Yimam kfo furayetm to frohem? To nd yimam kfo yamukam, mirahko amanyom Jisars ka nmoh hbhakyuk yima Kraiser. Nhai. Tom inji kfet yimamn Bro Yifemri rorhu Yonr mong trohhato hti dbnotwomf.

²³ Yimar Yinemr frtrohwor, to be Yifemrn frtrohwor. Yimar Yinemr frtkafwor, to be Yifemrn frtkafwor.

Krairhu tu kfo mif mrokfom Bro Nkifrarhu Yafothar kak nuhas bonuhas-wornom

²⁴ Nd bingot niko Kristenko ritohak-hato riwanyakmo mrokfot, ndtn wayakitoh kih hanyswako. Yakitoh hanyrahkomt, be Bro Yifem nitohfpno rpt frtkafhato tohrahko.

²⁵ Bingot Krair bi kfo hta memornom, “Dborioh rhu nmbuhat hiruhanko. Hirhotanko be nd dborioh rhu nmbuhatn rhu nkifranirahko.”

²⁶ Yimam yi mfrnhehwatmko, ndnetann nda kfo duka mrokfot wandfiwanko.

²⁷ To tfit wom dukefr duka kanga, bi Krair Bro Nkifrarhu Yafothat thu hmbremotrm bi nd Yafothatn rroh toh nmbuham kak hta bohtaf hanittm. Ndnnett nhai wom yimam yihato mfrnhehruhatmko. Bro Nkifrarhu Yafotharpatn kak nuhas bonuhas marnyewutko tamoh tamohm. Nd Yafothat kfoyuk mrokfom tu kfo mif mrokfom kfiwutko. Niko mirahko ka kfo fura kfoyem. Ndnnett niko nd Bro Nkifrarhu Yafothat kfoyuk tng yuham yak hikhato Krairspno brbo frtkafkot.

Arihat bi Bro Nkifrarhu yonenom

²⁸ Yo nanhu yonenko, nikom Krairspno brbo mfrtkafkot. Inji nanest rorhu fnahnayuk yihar nom nhai yimtnakhato tpikr yihom nahmbri-ruhatnom. Nhai. Nom be bro yindho-rpampno tafont tohhato htiyakrah-nomr. Nhai yimtnayefmpno toh htiyak-ruhatnomr.

²⁹ Nikom htiyeteke Krair tu dborioh yima mifer. Ndnatn nikom htikfot fitoh yimar dborioh nefm newurm, nd yimar Bro Nkifrarhu yoner.

3

¹ Dajohmn, Bro Yifemr nom be tu mondt n hta mifhato kutewur-nom rorhu yonnom. Rorhu yonnom yorhwatno tfit nd Bro Nkifrar hik duha yimam hti mumiwumnom.

² Barenko, nom bi Bro Nkifrarhu yonnom korhnom. To kto Krair tafont yarim fnahna thombat nom ka finji frdborha rmonruhanom? Ror yarim fnahna thombat nom tunmoh nyingaye htiyakrahnomr. Ndnnett nom turhu ruheft kanjo frdborha rmon bugarah-nom.

³ Yimam Kraistr yukatoh darwon hasiwam, nd yimaroh yima yuhum yak marnya bomarnyahato wutham korhm tu Kraistr kanjo.

⁴ Yimar fasoh nefm nayetr, ndr Bro Nkifrarhu boririfhut hanyjbornet yimayer. Fasoh nefm naneft to Bro Nkifrarhu mrokfothu hanyjbornanefet.

⁵ Bi wany hnamokomt Kraistr yawih-nehato nohmo yuhat. Ror yawihnehato nohmohat to nmoh fasoh nefm minoh nhehafomor. Ror tur nhai wom fasoh nefm nahato nohrmor. Be mgogra yimar noh furamor.

⁶ Yimar Kraistrpno brbo mfrtkafwar, nd yimar mong troh bugewurm fasoh nefm. Yimar fasoh nefm rim tohak rim tohak na hanitar, nd yimar nhai Kraistrhu yihotar hti dbtakukahrr.

⁷ Yo! Nanhu yonenko, ndnettn niko duka marnyakfot. Wom yimam nieruhamn mfrnhehakhato fasoh yihota bebr hanyrahmko. Yimar dborioh yihotar yauwar, nd yimar Kraistr kanjo yauwarn rorhu yima yuhur wuthar korhrr.

⁸ Bingotn nda bbinysoft trhamo yiharpno Satanr fasoh nefm rinakhato na hnamorm. Ndnettn fasoh nefm na hnamo yimam to be Satanrhu yinhitn toh hnamom. Bro Nkifrarhu yon Jisas Kraistr inji hti tanyhato yawihnamorn nd Satanrhu fasoh hingrneft fak dbhurakmort.

⁹ Fitoh yimam bi Bro Nkifrarhu yonm korhm, nd yimam nhai wom fasoh nefm wanathu wanathunakahmm. Bro Nkifrarhu toheft romn fakmomt. Ndnettn nhai Satanrhu nefm yakitoh hanykahm.

¹⁰ Finji hti nhtahato kfo miruhanom, ndr Bro Nkifrarhu yoner, ndrne Satanrhu yoner? Wanukko. Inji htikfot, fitoh yimar nhai dborioh nefm nakahr yo Bro Nkifrar hikwa yimam nhai yak marnyakahrm, tor nd yimarn nhai Bro Nkifrarhu yonr rhukahr.

Rpa rpa yimanom wommpno nayak marnyakfot

(Sapta 3.11–5.21)

Jisatr fak nuhasmornom wommpno nayak marnyanefst

¹¹ Bingot riruhakmo mrokfot wany hnamokomt, inji kfmot: Nom wom Kristen yimampno tohneft, nom be nayak marnyahato rpa yima yuhur rhukfot.

¹² Nom Kenr namo nmbuhat yak duha. Ror Satanrhu yimarn turhu nmern Aberr frdbofna furamorr. To tamohmpno inji frdbofnamorr? Kenr nhai wom dborioh nefst narmoar. Tfit htimour wom nmernrhu nefm hifa hifa nmbuham namour, ndnetrn frdbofna furamorr.

¹³ Niko, nmoh Kristen yimatko, nda bbinysof thofm hti srwomko. Mirahko ndte ka arnhofrhof nefst.

¹⁴ Nom wom Kristen yimatmpno nayak marnyahato rpat tohwomat, nom nd hel yita yihotar yau htafhato tfit nd toh yifahtaniruha kmiko yita yihotar tohwanomn nd nefm newu-nomm. Afo nd hel yita yihotar yuhre atohnom nhai ndhtet nefm narfotnomm.

¹⁵ Mirahko nikmoh yimatm be ahti srthunomm. Womm inji rihti srtuhakhato wom bro shrn miyakniruhakomn yak nadborrahkomm. Yimar yima wasetr nhai toh yifahtakahr.

¹⁶ Jisas Kraistr nom dukahato nohmor. To nom womm dukahato nohneft to bi Jisas Kraistr fak nuhasmornom. Nom to nd yuhatn hikhato wom Kristen yimatm dukahato nohneft, hifa.

¹⁷ Bro Nkifrar yima hti yuhuwafeter. Ndnetn wom yimar bok wuskam harhuhato nhai wom wuskapa duha Kristen yimatm hti dukakahrm, nd yimar nhai Bro Nkifrarhu yima hti yuhuwafetf yakitohkahrt.

¹⁸ Arenko, mirahko wom Kristen yimatmpno be tngrrpaye akfo yindhör boyindhör furanomm. Ndt nhai dborioh neft. Tamohm yakhihato kfo yindhörneft, hifa.

Bro Nkifrarhu nyingahato toh bmtakfot

¹⁹⁻²⁰ Tamoh neft naruhanomn tu nom hti duka miruhanom, Bro Nkifrarhu tu mrokfo mift hikwonomt? Tuko wahtitwako. Womm hti yuhuwafhato tamohm fahukomm o hingr-nanuhikomm o tamoh tamohm finji nanuhikomm, nd nefmn htihato wamitwako, “Awi, Bro Nkifrarhu mrokfo mift hikwonomt.” Bro Nkifrar hik hanyhato wom yima yuhur kfo kangrn, “Ni Bro Nkifrar nhai hik marnyakahr.” Nd dukefr mfnahwor, mirahko nd dukefr ahtinom. Bro Nkifrarhu dukefr nhai yima mifnmohr kanjo rhukahr. Nom yorhwa ruheft Bro Nkifrar hti bugewurt. Ror tu yima yuhuwafeter. Be nhowi rhuhato rorpar yukatohaf hanykfot.

²¹ Barenko, yima yuhum duka kangm, nom hifa Bro Nkifrarhu mrokfom hikwonomm. Yima yuhum inji kfiwumnom, to be hifa. Tamohm Bro Nkifrar pno kfo ttiwonneft nhai duka kinyaki hany-ruhatnom.

²² Yima yuhum inji rhuhato Bro Nkifrar tamohm kfo ttiwonwonomr, awi, kahukrnom. Rorhu mrokfom hikhato ror hti yindhörwa nefm hikwatnom, ndnetrn nom tamohm kfo ttiwonneft kahukrnom.

²³ Bro Nkifrar kfo kangr, “Nanhu yon Jisas Kraistrn yakitohhato wom Kristen yimatmpno nayak marnyahato rpat toh marnya-kfot.”

²⁴ Wom yimar Bro Nkifrarhu mrokfom yakitohhato hikworm, Bro Nkifrar pno frtkafwor, tfit Bro Nkifrar tawo ror pno frtkafwor. Bro Nkifrar turhu Yafothat yahuka nmbuhaf htihato kfo kangnom, “Bro Nkifrar nom pno brbo frtkafwor.”

4

Yimam yafotham fknihato kfo pthiwa mrokfom afo wany nhtakfot. Fitoh yafothar fknitarr pthiwar?

¹ Barenko, bok giman profetm nda bbinsoft wuyayuwom. Ndnatn yimam niahato kfo kangmko, “Bro Nkifrarhu Yafothar mrokfom yahukatrnom kfo ptha nuhaswo-nomko.” Inji mkfoyuk yimam niko bi mirahko rroh mrokfom awany yakio-wakninomm. Nhai. Afo rhuhato wany nhtakfot. Fitoh yafothar fknihato mrokfom kfo pthiwar? Bro Nkifrarhu Yafothar fknitrr pthewurr o nhai?

² Yimam Bro Nkifrarhu Yafothar fknihato kfo ptha thoft wanyrahnm kfo mirahm, “Jisas Kraistr nda bbinsoft niahato yima mifm kanjo tohmor.” Tom ndhtet kfet yimamn tu Bro Nkifrarhu Yafothar fknitarr kfo pthewum.

³ Yimam nhai inji kfo pthakahm, nd yimam wom fasoh yafotham fknitarr pthewum. Nd yafotham Kraistr pno nahti dbnotwa yafothayem. Bi nd niko wanyaf memo yafotha bebm nierahm, to nd yafothamn bi niewum.

⁴ Nanhu yonenko, niko Bro Nkifrarhu Yafothat hatohwoko. Nd Yafothat niko hatohwat tu bro bbuke-fetet. Nd Yafothat kahot tkafwotr Satanr. Nd Yafothathu bbuka rifhur pno kahot tkafwokomm nd giman profetm.

⁵ Nd yimam ndar bbinysoftuhem. Ndnatn rom pthewa mrokfom be nda bbinysofthu mrokfom kfo pthewum. Yimam nda bbinysofthu ufasoh nefm hikwam romn nd yimaroh mrokfom wany yakiowahukmm.

⁶ Yimar tu Bro Nkifrapno frtkafetr, nd yimar womm pthayuk mrokfom wany nhtewurm. Mrokfom wany nhtahato kfo kangr, “Ndm tu yafothet mrokfom, ndm yafotha duhatem.” Nom bi Bro Nkifra-ruhenom. Yimam Bro Nkifrapno frtkafetm nom pthayuk mrokfom yudbat kekwoomm. Bro Nkifrapno frtkaf duha yimam nhai yudbat yakkahmm.

Yimar Bro Nkifrarhu dukefrpno tohwor, wommpno nayak marnyahato tohkfot

⁷ Arenko, nom wom Kristen yimatmpno nayak marnyahato rpat tohkfot. Nd wommpno nayak marnya-hato rpat tohneft, ndt Bro Nkifrarngo rihtakmort. Fitoh yimar womm kak marnya bomarnyewurm, nd yimar Bro Nkifrarhu yon mifer. Bro Nkifrar rorn kukatohwor.

⁸ Nd wom Kristen yimatmpno nayak marnyahato rpat tohneft, ndt Bro Nkifrar mhatoh fnahmo nefet. Nd yuhatn fitoh yimar womm nhai yak marnyahato hifa yima yuhur hmbrekahrm, nd yimar nhai Bro Nkifrar hti tawisafkahrr.

⁹ Bro Nkifrarhu dukefr nomn rhumor. Nd dukefetrn nd ror hatohmo rpa yon mifr tkrurafmotrr nda bbinysoft fawihnamor. Nmoh fasoh nefm rorn suh nanyormorm. Suh nanyormotrm to be nmoh tohefti Bro Nkifrarhu toheft bi nhai wom mrokfom rhukahm-nom. To be rorpono toh nkifranirah-nom.

¹⁰ Wommpno nahti dukahato nayak marnyanefn, ndt Bro Nkifrarhu nefet. To mirahko ka nomn hti duka gngonmonomr Bro Nkifrar. Nhai. Bro Nkifrar hti duka gngonmornom. Nd dukefetrn turhu yonr kfo tkrurafmotrr nda bbinysoft niahato nmoh fasoh nefm rorn suh nanyormorm.

¹¹ Barenko, Bro Nkifrar turhu yonr hemo nmbuhat, ndt rorhu bro dukeft nompno rhumo yuhatn fak nuhasmor-nom. Ndnnett nom Bro Nkifrarhu hikneft womm htihato yak marnya-kfot.

¹² Nhai wom yimar htiwonkahrr Bro Nkifrar. Be nd yimam htihato yak marnyanefn, ee nd tkittn Bro Nkifrar nompno tohwor. Nompno tohhato nd wommpno nayak marnyahato rpat tohneft rhu yakitoh hanyrahtnom.

¹³ Bro Nkifrarhu Yafothat nompno yorhwatt, nom ndt htihato kfo kang-nom, “Bro Nkifrar nompno tohwor yo nom Bro Nkifrapno tohwonom.”

¹⁴ Nd Yonr bbinysof thofroh nrfa htiyakyukr Bro Yifemr kfo tkrurafmor. Nom tunmoh nyingaye hti hikhato kfiwunomko.

¹⁵ Fitoh yimar kfo kamukr; Jisarr Bro Nkifrarhu yoner, nd yimar Bro Nkifrapno brbo frtkafwor yo nd yimarpno Bro Nkifrar brbo frtkafwor.

¹⁶ Bro Nkifrarhu yuhuwafeft nompno yorhwat htita-nomn duka kang-nom Bro Nkifrarhu bro dukefr nompno korhr. Ndnnetnomn nom nhai Bro Nkifrar yafhokahnomr.

Bro Nkifrar tu bro yima yuhuwa-feter. Fitoh yimam yima yuhuwafeft korhtm, nd yimam Bro Nkifrapno frtkafwom yo nd yimampno Bro Nkifrar frtkafwor.

¹⁷ Bro Nkifrapno inji nafrtkafhato tohrahnom, to be nd wom Kristenmpno nayakitohhato rpat tohneft myakitoh bmtaknirahnomt. Inji narahnom, Bro Nkifrarhu bro mrokfo yakitoh yihar nhai duka yanho

hanyruhatnom. Nom nda bbinysoft tohwohat Kraistr kanjo tohwonom. Ndnettn nd yihar nhai duka yanho furaruhatnom.

¹⁸ Yimar wom Kristenmpno nayak marnyahato rpat tohwom, nd yimar nhai Bro Nkifrar yakrmi hanykahrr. To wom yimar nhai wom Kristenmpno nayak marnyahato rpat tohkahm, nd yimar Bro Nkifrarmpno mrokfeter. Nd yimar kakrmi hanitr Bro Nkifrar.

¹⁹ Bro Nkifrar riyak marnyakmotr-nom nom be nd yuhat hikhato womm kak marnyewunomm.

²⁰ Fitoh yimar kfo kangr, “Bro Nkifrar be nanhu yuhuwaf marbitn korhr,” ndhtet kfet yimar mirahr be tngrpat afurat Be tngrpatn furahato womm nhai yak marnyakahrm, tone finji dukaruharr nd ror hti duha yita Nkifrar? Nhai. Nd yimar kfo furayeter.

²¹ Kraistr kfoyuk mrokfot kfo memor, “Fitoh yimar Bro Nkifrar rorhu yuhuwaf marbitn korhr, wom Kristenm yak marnyakfot.”

5

Kristenroh bbukeftn nda bbinysoftu ufasoh nefroh bbukeft kahot nohwott

¹ Fitoh fitoh yimam Jisatr htihato duka kangm, “Jisatr tor nd yimar Bro Nkifrar kfo tkrurafmor. Rorn yimam hbhakrahrm.” Inji dukayet yimam, Bro Nkifrarhu yonm korhm. Fitoh yimam Bro Yifemr hti yindhorwomr, rorhu wom yonm inji hti yindhorwomm.

² Bro Nkifrar nmoh yima yuhum htahato rorhu kfoyuk mrokfom hikrahnom, to be nom rorhu yonm htineft nmoh yima yuhum htarahnomm.

³⁻⁴ Nom Bro Nkifrar hti dukarahnom, rorhu kfoyuk mrokfom hikrahnom. Fitoh yimam Bro Nkifrarhu yonm tohwam, nda bbinysoftu ufasoh nefroh bbukeft kahot nohwomt. Nom Bro Nkifrarhu mrokfom yakitohhato hikwanomm nda bbinysoftu nefm yuwa muh thombat kahot nohwonomm. To be nd yuhatn Bro Nkifrar kfoyuk mrokfot nhai mduka nhiyakkahnomt hikneft.

Bro Nkifrar turhu yinemrhu mrokfot kfo ptha hikmort

⁵ Frohmn nda bbinysoftu ufasoh nefm yahot nohwamm? Yimam duka yamukam, Jisatr Bro Nkifrarhu yoner, tom nd yimamn nd ufasoh nefroh bbukeft kahot nohwomt.

⁶ Jisatr htimonomr tu Bro Nkifrarhu yoner. Jonrpno baftais yakmohat htimonomt Bro Nkifrarhu Yafothat nunga momkrs kanjo yohninehato Jisatr mifakmot. Yo yura bgre mis nohmohat kkuot yohnemot. Nd neff htihato duka kang-nom, tu Bro Nkifrarhu yon mifer. Nd Bro Nkifrarhu Yon mifrrhu rhu yuhat tfit tu Bro Nkifrarhu Yafothatn kak nuhas bugewutnom. Bro Nkifrarhu Yafothat tu kfo yimbu mifwot.

⁷ Jisatr Bro Nkifrarhu yonrhu ruheft, husfirpa yihotam htitanomn duka kangnom, tu Bro Nkifrarhu yoner.

⁸ Bro Nkifrarhu Yafothat yak nuhasmohat, yo Jisatr baftaismohat, yo kku bebt harhumohat, nd husfirpa nefm htihato kfo kangnom Jisatr tu Bro Nkifrarhu yoner.

⁹ Yima mifm pthayuk mrokfom wany nhtahato wom mrokfom kang-nom, kfo mif mrokfoyem. Womm kangnom kfo fura kfoyem. Rom yima mifmn pthiwatn ndhtet dukefm kekwonom. To Bro Nkifrar kfoyuk mrokfom

nhai ndhtet dukefm yakkfot. Ror kfo memohat Jisasr rorhu yoner, ndt kfo mifmormt.

¹⁰ Yimar Bro Nkifrarhu yonr yak hikwar, nd yimarn nd Bro Nkifrar kfoyuk mroxfom korhmr rorhu yima yuhur. Yimar nd Bro Nkifrar kfoyuk mroxfom nhai yakitohhato hikkahrm, ndhtet yimar nhai wany yakiokahrm. Kangr, “Bro Nkifrar kfo furewurnom. Jisasr nhai turhu yon mifr rhukahr.”

¹¹ Yimaroh toh nkifraniyuk yihotar Bro Nkifrar bi fak hta bohtamorr. Turhu yonrn yura bgre mis nohhato nd yimam toh nkifraniyuk yihotat fak marnyakmormt. Bro Nkifrar yihotar inji fak hta nuhasmornom.

¹² Yimam nd Bro Nkifrarhu yonrpnno frtkafwam, nd yimamn toh nkifraniyuk yafothar kekwoomr. Yimam nhai Bro Nkifrarhu yonrpnno frtkafkahn, nd yimam nhai toh nkifraniyuk yafothar yakkahn.

Toh nkifranirahnom

¹³ Niko Bro Nkifrarhu yonr hikwa tuhan yindariko mirahko bok dukefm yakhato kfo amanyom, “Nd toh nki-franiyuk yafothat ka bi hatohwonomt o ka nhai?” Mirahko ndhtet bok dukefm ayaknom. Nd toh nkifraniyuk yafothat bi fakmokomt. Ndar gontwat to ndthu kfo dukayuk gontwatn kahukanko.

¹⁴ Bro Nkifrarhu dukefrn toh hikhato tamohm kfo bruttnarah-nomr, wanukrnom. Ndnnetnomn nhai mduka kinyakiyak hanykahnom rorhu kfo ttiwonneft.

¹⁵ Nom tamohm kfo bruttna thombat wanyhato kahukrnom. Ndnnetnomn tamohm kfo bruttnaneft kangnom, he mifrahrnom. Nhai wany marsis-aruhatrnom.

¹⁶ Wom Kristenm wom fasoh nef bebm mfsuhm, yo be niko womko rhuhato nd yimam Bro Nkifrar pno kfo bruttnakfot. Kfo bruttnahato Bro Nkifrar tfit yafothat thu hmbriarahrm. Maringou yuhat yak hatohafoyuk nefm mnem, na kfiwa mirahko akfo bruttnanom.

¹⁷ Fasoh fasoh nefm, fasoh tkit bebm htewumko. Wom nefmn, hel yak hatohaforahmko. Wom nefm, nhai.

¹⁸ Rot htiitwonom, yimam, Bro Nkifrarhu yonm yorhwam, nhai fasoh nefm na hanykahm. Nhai. Bro Nkifrarhu yonr tabohifat hmbritatrn Satanr nhai brbo yikahr.

¹⁹ Nmoh toh nmbuhat rot htiitwonom Bro Nkifrar pno frtkafwonom. To nda bbinysom bugat rot nndo Satanrhu yinhitn korht. Rorhu bbukeftn kakitohwott.

²⁰ Bro Nkifrarhu yonr, ror bi niamor. Rorn dukefm kahukrnom. Dukefm yahukatrnom hti yimbu hikwonomr tu Bro Nkifrar. Bro Nkifrar rorhu yon Jisas Krair pno frtkafwonom. Jisas Krair tu Bro Nkifrar. Rorn nd toh nkifraniyuk yafothat thu hmbritrnom.

²¹ Bar yonenko, mirahko tahi yifonmpno brbo ainyom.

Jonr dwardfamo husyuk gontwat Barkof kfo nuhas mrokfom

Ndar husyuk gontwat sioshu bro yima Jonr wandfamort. Ndar gontwat ziyuk yimaroh yufam nhai htarmorm. Bok yimam duka memom, ka wom sioshu tuhan yindariroh yufampno htafmort. Sios futamort, mett. Sioshu Kristenm futamorm, “rothu yonm.” Ndar gontwat to rroh nayak marnyahato toh marnya yuhami yo giaman tisan, yimam frnheh htfaswa yuharoh kfo dukayuk mrokfom wandfamorm.

Bro Nkifrarhu tu yafothet mrokfot bi yakitohetnom, yakitoh bmta kihkfot. Nndo nndo mrokfom hik duha.

¹ Na sioshu bro tohak yimaya. Ni metni* rothu yonm† dukiwoyann ndar gontwat wandfiwanko. To mirahko ka be nanrpaya dukiwanko. Nhai. Bro Nkifrarhu mrokfo mifmift yakitohet yimam rompno rpat dukewunomko. ² Bro Nkifrarhu tu yafothet mrokfo mifmift nom yakitohwanomn nd nikmoh duka yima yuhur niewur-nom. Nd Bro Nkifrarhu mrokfo mifmift be yakitoh nkifranirahnomt. ³ Bro Yifemri rorhu yon Jisas Kraistr yuhuwafhato yak marnyaruhafm nmoh toh nmbuham, yima yuhum be mirhuruhamn nmoh dukefm be rofhu dukefrpno rhuhato Bro Nkifrarhu mrokfo mifmifrpant yakitoh hanyrah-nom.

Wommpno nayak marnyahato rpat tohkfot

⁴ Ninhu wom yonn Bro Nkifrarhu mrokfo mifmift yakitohhato hikwatmt na yindhorwa. Bro Nkifrar to ndhtet toh yuhamn kfiwurnom tohneft. ⁵ To bar mete, wom mrokfot kforuhant. Nmoh toh nmbuhat nom tunom nayak marnyahato rpat tohkfot. Ndt nhai be nfri mrokfot kanjo kfo ptha-kahant. Nhai. Nom Bro Nkifrarhu mrokfot riwanyakhato riyakitohak-mohat, bi nd yiha nd mrokfot bi riwanyakmonomt. ⁶ Nd nayak marnya-hato rpat tohneft, Bro Nkifrarhu kfo-yuk mrokfoyet. Ndt bi riwanyakmonomt. Nom Bro Nkifrarpno nayak marnyahato rpat tohrahnom be rorhu kfoyuk mrokfom hikrahnom.

Kraisrhu mrokfot yakitoh dbkaf kihkfot

⁷ Wawanyko, giaman tisan ndar bbinysoft bi thu yufurniromt. Nd yimam kfo yamak Jisas Kraistr nhai yima mifm kanjo ndar bbinysoft tohrmor. To ndhtet kfet yimamn yi htfaswamn yimam kfo nheh bonheh htfaswomm. Jisasr be hti dbnot thuwomr. ⁸ To niko wadukaf hanyswako. Yihotar bi nia niamonomrn bi kmir myak fnah yibonwonom. To mirahko bi brbohartin tfit manoh yuhat ariwitanom. Toh bmtahato kmir rpat myak fnahrahnomr. Kmir myak fnahhato hti hanyrahkomm niko yak hanyuk shrkar. ⁹ Wom yimar Kraistr kfo htayuk mrokfo yuham myak htanihato turhu dukefrn hikneft, nd yimar nhai wom dukakahrr Bro Nkifrar. Be mong trohnitr. Yimar Kraistr kfo htayuk mrokfo yuham hikwar, Bro Yifem nitohfpno

* 1:1: † 1:1: Sioshu Kristenm futamorm, “rothu yonm”.

brbo frtkafwor. ¹⁰ Niko bi kfo htewanko. Wom yimar nndo mrokfot hnewurt, wany nhtakfot afo. Nhai ndar niko wanuka mrokfot kanjo rorhu mrokfot kfokahrt, mirahko nd yimar akfo yindhorkahnomr ayakni kunyko ahanyonomr. ¹¹ Ndhtet yimar kfo yindhorhato yaknirahkomr, to be rorhu hingrnef bebt fknirahko.

Wuroh kfo yindhor mrokfom

¹² Nikompno bok mrokfeta. Gon-twatn mrokfom htaneft nhai wofnkaha. Kto wom yihamn nierhoyann yima tnge nakfo tndh nuhasrahnom. Tnge nakfo ptharuhanomn yima yuhum yindhorrahm. ¹³ Nikmoh mndaremt‡ Bro Nkifrarhu yufat yorhwat, rothu yonm§ niko dukahato kfo yindhor mrokfot htefiwumko.

‡ 1:13: § 1:13: Sioshu Kristenm futamorm, “rothu yonm”

Jonr dwardfamo husfirpehyuk gontwat Barkof kfo nuhas mrokfom

Jonr ndar gontwat wandfakmortn wom sioshu bro tohak yimar hemor. Nd tohak yimarhu yufat Gaiusr. Gaiusrhu nefm tu dborioh nefm namour. Kristenm nhai yukatoh marsisarmoarm. Nhai. Kakitohmourm. Nndnetn Jonr ndar kfo yindhor gontwat hemorr. Wom kfo duka mrokfot kfo memorr, “Diotrefesr nhai nmoh dukef yuhatn hikkahr, ndhtet yimam htiyaf hanykfot.”

Bro Nkifrarhu hingrneft hingrnewa yimam nom Kristennom hti dukakfot

¹ Na sioshu bro tohak yimaya. Ndar gontwat ni Gaiusnhu yufatpno niewut. O, Gaiusene, nanhu bro dukefr ninn korhr. ² Yinowe, Bro Nkifrar yiro yima yuhur yak marnyewa kanjo ninhu rhu nmbuhat, hingrneft, tamoh tamohr ayak marnya bomarnya-hitwarn. ³ Bi ndwom yihamn wom yimam niahato ninhu nefm kfo yindhor-momm. Kfo memom, “Gaiusr tu Bro Nkifrarhu mrokfo mifmift kakitoh hanitwor.” Inji kfo hanymotm nanhu yima yuhur yindhormor. ⁴ Nanhu yonm tu Bro Nkifrarhu mrokfo hikneftn wanyshoft nanhu yima yuhur yindhor-wora.

Gaiusrhu dborioh hingrneft

⁵ Yinowe, Bro Nkifrarhu tu mrokfo mifmift ni kak hik mifwont. Nndnetn yi htfaswa Kristen tisam ninhu kuny knifam hti duham mfnahwom, nhai yukatoh marsisakahnm nhai. Kekwonn. ⁶ Nd yimampno ni niwa dborioh nefm, asha niewamn tfit sioshu met yindarim kfo tndhwomm. Ndh tet yimam niewum dborioh nefm yak nuhas hanykfot. Turoh yihota yi hanyuk yeshrim yakhato hiyaf hanykfot. Inji narahnm tfit Bro Nkifrar bro yufat hirahm. ⁷ Krairhu mrokfothu kfo ptha htfasneftn inji fau htfasmom. Rom inji yau htfaswohat nhai Krair hik duha yimampno yihato wom tamohm kfo tndaukahm. Nhai. ⁸ Ndh tet yimam nom Kristennom hti dukakfot. Inji narahnom Bro Nkifrarhu tu yafothet mrokfot kfo ptha htfasneft yakitoh bmtahato hingrneft yak tirrahnomt.

Diotrefesrhu fasoh neft

⁹ Sioshu tuhan yindarimpno wom gontwat htafmoyant. To nd sios tohekwa yima Diotrefesr nhai nd gontwat kfoyuk mrokfom hikkahr. Kangr, “Tukianhu duka fijo sioshu met yindarim tohukatohruhanm.” ¹⁰ Kto tukann wom yiham niewane, nd yiha nd ror kfo pthiwa nungurha nungurha mrokfom yo yimam kfo nneh bonheh htfaswa mrokfom tafontn hta bugaruhanm. To mirahn ka nd nef-rpam newur, wom Kristen tisam yi htfasneft ror nhai yakwonkahrm rorhu kunys. Hti marsisewatrm tfit wom Kristenm inji htihato kangm ayaknomm tfit kfo rafo mrokfot kfiwurt. Kristenm nd yiyuk Kristenm yakneft to be kak tuhefiwurm. Nhai rorhu sioskfot wom yikfot.

Demitriusrhu dborioh nefm

¹¹ Bar yinowe, mirahn fasoh nefm ahika. Dborioh nefrpam hikkfot. Dborioh nefm niwa yimam Bro Nkifrar-pno frtkafwa yimayem. Nd fasoh nefm niwa yimam nhai Bro Nkifrar-pno frtkafkahm. ¹² Demetriusr niwa dborioh nefm yima yimat kfo tndh htfaswomt. Yimamn kfo tndhwomm yo nd Bro Nkifrarhu tu mrokfot ror yakitohwat, rotn mhfnahnewutm rorhu dborioh nefm. Na kfo mifwanko. Nhai kfo furakahanko. Ndnettn wayaktwa-komr.

Wuroh kfo yindhor mrokfom

¹³ Bok mrokfeta ninpno. To nanhu yima yuhur nhai wofnkahr be gon-twaye mrokfom pthanef. ¹⁴ Nhai mrokfom. Nanhu nia yihar to bi brbohwor. Tuka nierhoyann yima tnge naptharahno. ¹⁵ Nanhu mrokfom to be injirpa. Bro Nkifrar atoh natwih-twarn. Ninhu yimatm dukewamn kfo yindhor mrokfot htefiwumt yo wom womm nd nanhu kfo yindhor mrokfot wakfo hihanyswanm.

Jutr dwardfamo gontwat **Barkof kfo nuhas mrokfom**

Ndar gontwat yorhwa wom mrokfom Pitar wandfamo husyuk gontwat (2 Pita) yorhwa mrokfom kanjo htirahkomm. Bok giaman profetm Bro Nkifrarhu mrokfom kfo kekutmoatmm ndnatn Jutr inji htihatoh Kristenroh kfo dukayuk gontwat wandfamort. Kfo memor, “Nom Kristennom bi tu Bro Nkifrarhu kfo hta nuhas bonuhasmornom rorhu mrokfroh hik yuhat. Tur kfo nuhasmo yuhat nom bi hikwonom. Nhahi wom yimar niahato tfit rorn wom nfri yuhat tfit kfo htaruhatrnom. Nhahi” (ves 3).

Bro Nkifrar yakitoh bmtahato giaman tisaroh mrofkom riwanyak duha

¹ Na Juta, na Jemsrhu nmemena. Na Jisas Kraisorhu hingrna yimaya. Froh frohko Bro Nkifrarhu naku tngt wany sanyhato yimoko, niko nd yimakompno ndar gontwat niewut. Niko nd yimako Bro Yifemr be marbitn htewurko. Jisas Kraisorhu yufathukomn Kraisor kukatohaf hanitrko. ² Bro Nkifrar hti yuhuwafhato hifa hifa ayak marnya bomarnyakahturko nikmoh yima yuhum mirhurahmko.

*Gutnius yak wunayuk giaman tisam
(1 Pita 2.1-18)*

³ Nanhu Kristen yimatko, barkofpam afo duka memoya, “Gontwat wandfa thombat, Jisasr yimam nrfa htihakmo yuhathu kfo nuhas mrokfom wandfa nuhasruhanm.” To nhai, ndt rhuraht. Tfit wom mrokfot kfo nuhasruhanm. Bro Nkifrar gutnius mrokfot nom Kristen yimanompno htafmotr nom yakhatoh nom ndt bi hikwonom. Ndnatn na kfiwa, nd gutnius mrokfot wayakitoh kihtwakomt. Mirahko wom yimar ahti marsisakahtnomr nd gutnius mrokfot ayoh mrk wunart. ⁴ Bi htitwa tom bi wom yimam niko Kristenkompno nia toh tebfi botebfinuhiwumko. Niko nhai yakkahkomm rroh yima yuhum. Nd yimam nhai Bro Nkifrarhu tng yuhatn rroh mrokfom hikkahm. Nhahi. Rom tfit nddo kfo kekutwomt Bro Nkifrarhu mrokfot. Rroh wom mrokfot kfo kangm, “Nmoh fasoh fasoh nefm bi Bro Nkifrar fak thumorm. Kangnom tfit fasoh fasoh nefm ananom, nhai mrokfom. Bro Nkifrar nhai finji kforuhatr.” Inji kfet yimam be kangm, turoh yima yuhum wagra sinyakyuk yima yuhum ahiknom. Nmoh Najom Jisas Kraisor wahti tanyakahr, mong troh bugewunr. Nd yimam mrokfot tohhato kaht riyahm. Bro Nkifrarhu mrokfot bi inji kfongotmott.

⁵ Bi hti wany hnayeteko hanyjborner yimam, mfro tuhagrhet yimam Bro Nkifrar yak tutfa hnamom o yahr kmimpno yak hatohafohato was batimoahat. Ndm bi wany hnayeteko. Be kanga wom nefm Bro Nkifrar namom kfo srhrhota wanyhato yima yuhum dukarahmko. Ka wanyeteko Isrerroh tndht rom Ijift tohhato Bro Nkifrar minrfa htihakmohat. Barkofpam afo Bro Nkifrarhu bbuka rifhurpno Isrerom tanrfakmorm Ijifroh tirmn bi ruhetm. Tanrfaknehato hna marnyamorm. Tfit buhanano Isrerom mhta yuhuwehhato Bro Nkifrar frtrohmotmr, Bro Nkifrar namburhato buha bati

witamom Isrerm. ⁶ Bingot wom mounmotm to inji namom. Bro Nkifrar hayuk dborioh hingerneft yafhonihato turoh dukeft hikmom. Ndnatn Bro Nkifrar yakmorm yiro kspita nngrajohet muhr tohwom. Sent yakhato sene dbkaf hmbretamorm be tohwom. Kto kot tohnihto rom namo nefthu pekfof yakrahmt. ⁷ Taun Sodomti Gomorate wom taunm nd hu kmifpno rhuyukm to inji tuha grha nngrajohmoum. Nhai warhurmoam. Metm, yindarim yiramteh yiram kanjo yihom yejbonak myejbohnakmoum. Yindarim tum yindarim myakni hanymoum, metm rom tum metm myakni hanymoum. Nd kmiroh yimam nhai tu yimaroh nefm naromoam. Bro Nkifrar inji hti namburhato kfomotr kaht wuyohninehato nd kmimi tuhant yindars be kaht kur gufha thunimom. Ndhтет nayet yimam Bro Nkifrar yak hatohaforuhatrm tndh kaht riyahm. Ndnетn niko duka hik marnyakfof.

⁸ Nd yimam Bro Nkifrarhu mrokfom kfo kekut bokekutwam, to nd yuhat hikwom. Hwe tweh hanyhato tamoh tamoh nefm twenano hti hanitam, ndmn tfit yima yuhum thu yuhurwatmm fasoh nefm newum. Fasoh nefm nahato fut kanjo kasi hmbrittm. Yo yima mrokfom kfoyukm hanyjbornahato Bro Nkifrarhu mounmotm be tu faso faso kfo rindho borindhewumm. ⁹ Tawo mounmotm nhai inji nakahm. Bingot bro tohok mounmot Maikerri Satanr Mosesrhu thatipthu yak yuhatpno nakfo hamuh nakfo hamuhmohat, Maikerr nhai sinyahato Satanr yiro wahtarmorr. Nhai. Maikerr be kfo memor, “Tu Brornko ni kfoyuk tngt kfo wokrahrn.” ¹⁰ Nd yimam wom mrokfom mwany mmota thombat tfit turoh mrokfom riyakhato koh wuna bowunefiwumt. Yima dukef duha be inji foh yaum kanjo kau htfaswom. Inji nayet yimam mibatnirahm. ¹¹ Kenrhu hammo bohammoyeft romn fakmomt. Maruha yak yima yuhurpno rom niwa nefm, Balamr namo yuhatn hikwom. Mrokfo hanyjbornaneft, ndt Korar hanyjbornamo kanjo inji Bro Nkifrarhu mrokfom hanyjbornewum. Nd yuhat hikwom to be Korar yohnemo kanjo inji yohnirahm.

¹² Tuko Kristenko rpat nayak nhafohhato komunion kanjo yak hta mskewa yeshrt, nd giaman tisam nhai hti duka mekahm, “Turparoh yeyuk yeshrt htem. Nom nhai yihato yenyhoruhatnomm.” Nhai ndhet dukefm yakkahm. Rom be buha mruhaknihato ke fura bofuraknitm. Nikompno yi rhuhatu nuwa ye shombat be tu bro yimtneft kahukmko. Nd yimam tu tisam arhum to romn Kristenm yak hta bohtarfomm. To nhai, rroh hingerneft be tu fipa duhatet. Rroh mrokfom tohr kanjo nyungu furahato nhai hnut niakaht. Rroh nefm nnar tiham kanjo tfa hta furahato nhai yukha hirkahm. Nhai rom pthayuk mrokfom o nayuk nefm wom yima yuhum yakruhato, be tu nhai mif. ¹³ Rroh fasoh fasoh nefm nhai hti mmoruhatkomm. Be tafont htiyafu hanyrahkomm. Rroh nefm nhai yimtnahato hamongkfot. Tekt wuhnu fnah hnu brukt hatoh thombat, inji tafont rroh nefm htirahkomm. Inji na hasiwamn kto mirahm nndo gunyrm wafuna sinyahato tfit yifungpampno mikur nohnita kanjo mikur nohnirahm. Bro Nkifrar be tu bro kspita nngrajohet tkitt bi fak htatahemorm. Be nd tkittn toh nkifranirahm.

¹⁴ Adamrpnо wutohak toh hawihnamo nkifram bokm toh hawihnamom. Namba sefenyuk yimar tohmor, Inokr. Bro Nkifrarhu mrokfot nndo nndo kfo kekutwa yimam, Inokr kfo memor, “Bro Nkifrar turhu 1,000 mounmot rifhurpno yawihnerahr. ¹⁵ Yawihnehato inji niwa yimam kot tohrahm. Kot tohhato Bro Nkifrar mong hihato fasoh fasoh mrokfom yahukam nd yiha

yak gnggtatruhatrm afo yironarahm.” ¹⁶ Tamoh tamoh nefm nhai rom dukewa yuhath rhu hikkahm, nhai rhu kkof rhu kkof ptharuhatm. Rom turoh nndoh dukefr hikwom. Turoh yufam yura yura htahato yihom hetak mhetekwom. Yimaroh fsohot marufenm rom yitam mfrnheh bonhehhato mtarhoptakni yahukmm.

Kristenroh toh nmbuham

¹⁷ Nanhu Kristen yimatko, nmoh Nungohtet Jisas Krairshu aposerm kfo pthayuk mrokfom duka hanykfot. ¹⁸ Kfo memomko, “Jisasrhu nia yihar brbo rhu hanyrah; niko Bro Nkifrar hikwa yimako wom yimam niahato haninge yuktfarahmko. Haninge yuktfaahato rom nhai Bro Nkifrarhu dukefr hikruhatm. Nhai. Rom turoh fasoh dukefr hikrahm.” ¹⁹ Nd yimam Bro Nkifrarhu sios yak nhtiwamt womm bi myakni hanitmm. Roh dukefm be nd bbinsofthu dukefmm, wuskamm, tamohmm korhmm. Be tu nhai Bro Nkifrarhu Yafothat rhukahtm.

²⁰ To niko, nikmoh yima yuhum Bro Nkifrarparpno htahato kfo brutnakahtko nikmoh rhu wiyauyau nmbuham o tamoh tamoh nefm finjinanefm, rorhu Yafothatn yak hta bohtarahtm. ²¹ Waduka hanyswakomm Bro Nkifrar nikompno niwa dborioh dborioh nefm. Yiha yiha kukatoh hasiwurko. Nhai mong trohkahrko. Ror niwa dborioh nefroh dukefrparpno watoh hanykahtko nmoh Nungohtet Jisasr Krair hti yuhuwafrahko. Hti yuhuwafhato yakruharko turpno brbo yak htarahko. Yak htahato rorpno toh marnya hatohrahko. ²² Bok yimam Bro Nkifrarhu tu mrokfo yimbu yuhath tafi hti hik bohik marnyakahmt. Ahti hik marnyamt, to nhai inji mong trohrfotmt. Ndnetn fitoh yimam inji mmohato Bro Nkifrarhu tu mrokfot nhai hikkahmt, nd yimam hti yuhuwafhato kfo hta nuhas bonuhas marnyakfot. ²³ Wom yimam nd giaman tisam mfrnhehakmotmm rroh nefm hikhato yiro bkra kaht kanjo tohwom. Niko womko wayuhuwafkomm. Wayuhuwafkakhomm wanrfa htiyakkomm. Niko nrfa htiyakrahkomme, niko duka marnyakfot. Rom niwa nefm rim suhrahmko. Ndhtet nefm kangme, koret hmbreshayet. Rom niwa nefm mirahko brbo ai ahtinommm.

Bro Nkifrarhu kfo yindhor nmbuhat

²⁴ Bro Nkifrar nhai tuhafataruhatrko. Rorhu tir wafitn rhurahko. Nhai tamoh nefm yak kasuhruhahmko. Rorhu dborioh kmirn hany htarahko. Nd kmir nhai wom tamoh nefm htiruhahko. Be yindhor yima yuhurparpno tohrahko. ²⁵ Na kfiwanko nd Bro Nkifrarpar tohwor; nd Nkifrar nmoh Nungohtet Jisas Krair hingrnamo hingrneft htihato tfit fakmiyakmornom. Rorn nmoh nyingako mtahakyuk Kingr tohkfot. Ror tu bro bbuka nanyjareter. Rorn tamoh tamohm nyingako yak htakfot. Rorhu ruheft toheft bi riruhakmot, to be inji rhu hany swanhiwut. Kto to be inji rpahtet ruheft rhu hany swanhorahr. To be inji.

Revelesen Jisasr tafont yak nriyafmo mrokfot Barkof kfo nuhas mrokfom

Ndar Revelesen gonborngt wandfamohat, Kristenm htimourm Jisasr Kraistr turoh Bro Nungothetr kanjo. Inji htihato rorhu mrokfom hikmoatmm wom yimam inji mhti namburnihato faso faso kak bebmoumm. Ndnnettñ Jonr nda Revelesen gonborngt Kristenroh kfo bmta mrokfom htamorm. Memor, nda mrokfom htiruhamn nhai krhopam yak kasuhhato Jisasr ftrtrohruhatm.

Ndar gonborngt bok kfo nhombra mrokfom htamorm. Ka nd yiha tohmoa Kristenm nd htamo kfo nhombra mrokforoh yimbu yuham hifa fakmomm. Ndwomm Jisasrhu mrokfom hik duham nhai yakmomm nd kfo nhombra mrokforoh yimbu yuham. Nd htamo kfo nhombra mrokforoh yimbu yuham kfo memom Jisasr Kraistr Bro Nungotheter; to be rorhu tirtpno Bro Nkifrar mrhuniruharn yahr kmim yiho hathurahrn rpat Satanr-pno. Jisasr hingrna hanyhato rorhu hingrneft mhingrna tmbho thombat, Bro Nkifrar ttha hanyrahm yimam toh bmtahato Jisasr yafho duhatm. Bro Nkifrar Kristenm tfit nfri hefenri nfri bbinysoft htaruhatm be rorpno toh nkifranihato nhai wom krhopam yakruhatm.

Jisas Kraistr 7-pela siosroh met yindarimpno htafmo mrokfot

(Sapta 1-3)

¹ Ndar bbinysoft rhuyuk nefroh mrokfot nhai bi tafont yak nriyaf-hato rhurmott yimam wanyrmomt. Nhai. Jisas Kraistr yawihnehato rorn tafont yak nriyafhato htamort. Ndar bbinysoft rhuyuk nefm bi brbo brbo ruhnetmn Bro Nkifrar memor, “Jisasr pno ayak nuhasakahtanr tfit rorn Bro Nkifrar hiket yimam kfo nuhasrahm.” To be Jisasr turhu mounmotr kfo tkrurafmotr tfit moun-motr na rorhu hingrna yima Jonan-pno nd mrokfot hnamort. Memor, “Rorn tfit Bro Nkifrar hiket yimam kfo nuhasrahm.”

² To na Jona, na bi tuka hti hik bohik bugamoyanm Bro Nkifrar pno niayuk mrokfom, yo Jisasr kfo srhyuk mrokfom. Tuka hti hikhato kfo srh nuhasmoyanm. ³ Yihar bi brboh brboh hnewatr kfo kanganko yimar ndar na wandfayuk profet mrokfot Bro Nkifrar hiket yimampno kfo pthewurt, nd yimar yindhorrahr. Yo yimar nd kfo pthayuk profet mrokfot wanyhato kak hikwort, nd yimar yindhorrahr.

7-pela siosmpno Jonr dwandfamo gontwam

⁴ Na Jona, nann ndar gontwat wandfiwanko niko Esia profins yorhwa 7-pela siosm. Nd Bro Nkifrar ariha tohwar, yo bingot ritohngotak-mor, yo kto nieruhar, nd Bro Nkifrar ayak marnya bomarnyakahtsko yima yuhum amirhumko. Yo 7-pela yafot-ham Bro Nkifrarhu sia kingthu nyin-gako toh hnkokn hmbrihato Bro Nkifrarhu hingrneft hingrniwam, rom rpat tohato nikmoh yima yuhum ayak marnya bomarnyakahtsmko yima yuhum amirhumko.

⁵ Yo Bro Nkifrarhu mrokfom tu kfo hik mifwa yima Jisas Kraistr, ror nhaf ayak marnya bomarnyakahtsko yima yuhum amirhumko. Kraistr tor tu

barkof yimar bi nohetr tfit sinyamor. Rorn ndar bbinysoft tohwa kingm mtohekworm.

Ror marbit htewurnom. Rorhu kkut kfomot, nom fasoh fasoh nefm kihmbremohat frfnahmonom. ⁶ Frfnahni-hato tfit yakmornom turhu Bro Nkifrarhu yufatpno fak dbkafmornom, nom tur kanjo tohwa kmiyenom. Nom nd kminomn king kanjo tohhato pris hingrneft kakitohwonom. Pris hingr-neft yakitohhato Jisasrhu Yifemrhu hingrneft hingrnewunom. To be Jisasrn bro yufat htahato rorhu bbukefthu yinhitn tohhany tohhany toh nkifrani-rahnom. To be inji.

⁷ Nyingam yurakko yukatoh haso-kfot. Bi tor bi kawihna yibonwor. Gribpamn hawihneruhatmr nyngaro nyngaro htihakrahmr. Nd kfraye was hanyukm rpat htihakrahmr. Ndar bbinysofthu yimam ror htihakruhamn tfit rorpno nafmo nefm tfit dukakhato nur tau hifa bohifarahm. To be inji.

⁸ Tu Hta Nngrajohet Bro Nkifrar kfo kangr, “Na kfomoya nda niko htita tamoh tamoh dborhamot. Na tfit kforuha nd tamoh tamoh tfit mhingrna tmbhohaht. Na ariha tohwa, yo bingot ritohngotakmoya, yo kto nieruha.”

Jonr Krairs htimo yuhat

⁹ Na Jona, nani nikom nom rpat Jisasr hikwonom. Nd yuhatn nom najohfiyenom. Niko Jisasr hikhato yekwa krhopam na to niko yekwa kanjo inji kekwa. Nd Jisasrhu kingdomkfot na rpat tohnuhiwoyann, krhopam niewam nom rpat rpat toh bmtahato krhopam kekwanom. Bro Nkifrar-pno niayuk mrokfom, yo Jisasr yak nuhasyuk nefm kfo pthamota fakmoma. Yakhato ailan Patmos htamoma.* ¹⁰ Kristenm rifinyhato Bro Nungohtet Jisasr lotuta yiha Sandekfotn Bro Nkifrarhu Yafothat toh hongmbaknamota. Tfit mongko wom tngt wany-moyant mfro fumrr kanjo kfo ptharra memot, ¹¹ “Ni tamoh tamohm htitin, buktn wahta bugatwanm. Buktn wahta bugakahnm tfit nd bukt wahtafkahtnt aiswat 7-pela taunm yorhwa siosmpno. Nd 7-pela siosm yorhwa taunroh yufam: Efesus, Smerna, Pergamum, Taiataira, Sardis, Filadelfiati ee Laodisiati.”

¹² Na rhu kecutni memoya ahtiyann nd na kfoyuk yimar, htimoya 7-pela gor ginyam hatohet lamm. ¹³ Nd lamm tohmo tkitmpno yimar brbo tohmor. Nd yimar htimoyann yima mifr kanjo. Yuke hmbreshar hmbremor. Nd hmbreshar yahot yaumpno mitohmor. Yo mond nmbuhat kasiyukt, ndt gor mtine waset hmbresham dbkafmomr. ¹⁴ Tmars memom nndo tmb wur mfhayet. Wafnhumohat memom nndo gajomt fnhutt. Nyingam memom nndo kah banem. ¹⁵ Wuram wafnhumohat memom nndo brasn kaht kandhihato bngo bijham kanjo wuram fnhutwomr. Tngt memom nndo bhur mir ntatiwur. ¹⁶ Tirmif tirkorn fakitohmorm 7-pela gunym. Yo mano mano hanku namburet bainat tng yuhat yarim fnahmot. Nyingatikt memom nndo marrn masat funa rrewor.

¹⁷ Na inji htihato tuha nd yimarhu wurampno be guya suhmoya. Tfit tirmif tire yimayann tirt hta hanyhato kfo ptha hany memor, “Mirahn aduka yakrmeya. Na kfomoya nda ni htita tamoh tamoh dborhamot. Na tfit kforuha nd tamoh tamoh tfit mhingrna tmbhohaht. ¹⁸ Nanhu toheft to be asoya tohwa. Bi nohmoyann, to be asoya be inji toh nkifraniruha. Asoya nann noh yifhatikthu kit kakitohwant yo nann Maringourhu yiyuk

* **1:9:** Ailan Patmos yimam kalabus htamoa ailaner. Roman gafmanr hti hhrekmoa nefm yimam mnamoum, to be yakmoamm nd ailanrn kalabus htamoumm.

kit kaki-tohwant. ¹⁹ Ndnnetn ni tamoh tamohm hitn buktn wahtatwanm. Nd tamoh tamohm ariha rhurahm tfit kto tfit mfrfnahrahm. ²⁰ Htitnm nda 7-pela gunymi 7-pela gor ginym hatohet lamm. Nd 7-pela gunym ndm 7-pela siosroh mounmotem, yo nd 7-pela gor ginym hatohet lamm nd 7-pela siosem.”

2

Taun Efesusko rhuyuk siospno yimo gontwathu mrokfom

¹ Tfit nd mrokfo kfo pthamo yima Jisasr kfo memora, “Wom mrokfom wawandfakahnm taun Efesusko rhuyuk sioshu mounmotrpno wahtaftwanm.* Mrokfom inji wahta-twanm: Na 7-pela gunym tirmif tire yakitohato 7-pela gor ginym hatohet lamroh buha kau nanyor hakuta. Nann nda mrokfot kfiwann. ² Na htitant niko Kristenko toh hikwa toheft, yo niko hingrna hikwa hingrnafat. Yo htitanko tamoh tamoh nefm toh bmtahato fasoh fasoh nefm nayet yimam nhai hti yindhorkahkomm. Nd yimam kfo memomko aposerem. Ndt kfo furakfoyet. Ndm nhai tu aposer mifm rhukahm. Nd rroh kfo nneh nmbuhat bi tukomn hti hikmokomt rom pthayuk mrokfomm. Nd tkittn mhtiyakhato kfo memoko arm kfo fura nhehetem. ³ Yimam htitwomko na yakitohwatko krhopam kahukwomko. To niko nhai nd krhopam mhtiyakhato myafhonikahkma. Nhai. Toh bmtahato kakitoh kihwokma.

⁴ Tmift tot wom nmbuhat na nikom-pno yorhwat. Niko nfri yuktt na rihikakmohat na be tu marbit hta-mokma, tfit arihat nhai inji htikaha. ⁵ Afo dborioh dborioh nmbuham nah-namouko, tfit nd nefm bi mfafhonirom. Ndnnetn nd bingot nahnamao dborioh nefm mdukakhato tfit yima yuhum yak kekuthato tfit bingot nahnamao nefm tfit hikkfot. Be nhai nd nefm nakahkomm, to be nie-ruhoyann nd lamt yak hutfakruhanko. ⁶ Tmift tot wom dborioh nmbuhat newuko. Nikolasrom nayuk nefm hti hhrekwokomm. Na to inji buga na hti hhrekwanm.

⁷ Yimbhingangeteko, wany hik marnyakfot nd sioskfom yiyuk mrokfom Bro Nkifrarhu Yafothat kfo pthewam. Yimar nda bbinysofthu ufasoh nefroh bbukeft kahot nohwort, nd yimar Bro Nkifrarhu mswirt† tohwa mishu yukham yerahr. Nd mishu yukham yimam yak yanyeft toh nkifrewum.”

Taun Smernako rhuyuk siospno yimo gontwathu mrokfom

⁸ Tfit Jisasr wompam wom mrokfot kfo memor, “Yo tfit wom mrokfom wawandfakahnm taun Smernako rhuyuk sioshu mounmotrpno wahtaf-twanm. Mrokfom inji wahtatwanm: Na kfomoya nda ni htita tamoh tamoh dborhamot. Na tfit kforuha nd tamoh tamoh tfit mhingrna tmbharaht. Bingot na bi nohmoyann tfit sinyamo-yann tohwa. ⁹ Bi htitanm niko yekwa krhopam, yo htitanko ndar bbiny-softhu toh nmbuhatn faso rhu bebwoko. Yafotharoh rhu nmbuhat nhai inji rhu bebkahko. Nhai. Bro Nkifrarhu tirtn korhko. Na wanukwa, wom Judam faso faso kfo rindho borindhiwumko. Nd yimam nhai tu Juda mifmn inji kfokahmko, nndo Satanrhumn inji kfiwumko. ¹⁰ Niko yakyuk krhopam bi tom bi rhuhnewum. To mirahko ariyakrmiyaknomm. Wawanyko, Tmb Nyingetn yimam hatoniruharn

* **2:1:** Nd mrokfot kfo yamuka, “Efesusko rhuyuk sioshu mounmotr”, ndt nhai tu mounmot mifrn nd mrokfot kformot. Nhai. Efesusko rhuyuk sioshu yimam namao nefmn nd mrokfot kfomot.

† **2:7:** paradais

yakruhamko kalabus 10-pela marm htahato htirahm finji naruhako. Kalabus htahato bi nohyuk tkitt tohwoko, mirahko ariwohsisaknom, Bro Nkifrar yakitoh kihkfot. Yakitoh kihhato tohrahko Bro Nkifrar kforahr, toh hatohrahko.

¹¹ Yimbhindangeteko, nd sioskfom yiyuk mrokfom Bro Nkifrarhu Yafothat kfo pthiwam wany hik marnya-kfot. Yimar nda bbinysofthu ufasoh nefroh bbukeft kahot nohwort, nd yimar nhai mif nohruhatr tu wuroh noheft nia thombat.”[‡]

Taun Pergamumko rhuyuk siospno yimo gontwathu mrokfom

¹² Tfit Jisar wompam wom mrokfot kfo memor, “Yo tfit wom mrokfom wawandfakahnm taun Pergamumko rhuyuk sioshu mounmotrpnno wahtaf-twanm. Mrokfom inji wahtatwanm: Na mano mano hanku namburet yuke bainat hatohwa. ¹³ Nd niko tohwa kmitt na tawisafwant. Satanrhu rhuyuk sia kingt tot nd kmitt tuhtikmort. To tfit htita niko nhai yafhokahkomt nanhu yufat. Nanhu yufat yakitohhato nanhu mrokfom hikwokomm. Yo bingot wom yimar nanhu mrokfot hikhato nanhu mrokfot kfo ptha htfasmoa yima Antipasr ndha tohhato wasmohat, niko nhai wohsishato nanhu mrokfot yafhormokomt.

¹⁴ To tfit wom mrokfot kfiwanko. Nikmoh sios tom wom yimam Balamrhu nefm hikwom. Balamr to bingot inji namor: yimorn Moabroh king Balakr kfo nuhas bonuhasmorr Isrerroh frnhehakhato suhneft. Ndnetrn Balakr wom Isrerm kfo tkurr nhehmostrm Moabroh nkifra tahi rmonn htamo yeshrim fak famom yo met yindarim turoh neft namom. ¹⁵ To be ndnetrn wom yimam nikompno tohyukm Nikolasroh mrokfo yuham hikwom. ¹⁶ Ndnetrn nd Nikolasr kfoyuk mrokfom niko yafhohato mong trohkfot. Nhai yafhokahkomm be nhai kuknarhota niahato niko nd Nikolasrhu mrokfom yakitohet yimakompno nia nnaneft. Nd nanhu tng yuhat mfnahyuk bainat afo htirahtko.

¹⁷ Yimbhindangeteko, wany marnyakfot siosmpno yiyuk mrokfom Bro Nkifrarhu Yafothat kfo pthiwam. Yimar nda bbinysofthu ufasoh nefroh bbukeft kahot nohwort, to be nd yimar kafrohet manapam yakhato hiruhanr.[§] Nd manapam yak hiruhanr yo fnhuyet tahi gepahat hiruhanr. Nd tahi gepahat nfri yufat wandfahi-ruhanr. Nd htaruha yufat nhai wom yimar tawisafruhatrt. Nhai. Nd tu tahi gepahat yakitohyuk yimarpar tawisafraht.”

Taun Taiatairako rhuyuk siospno yimo gontwathu mrokfom

¹⁸ Tfit Jisar wompam wom mrokfot kfo memor, “Yo tfit wom mrokfom wawandfakahnm taun Taiatairako rhuyuk sioshu mounmotrpnno wahtaf-twanm. Mrokfom inji wahtatwanm: Na Bro Nkifrarhu Yona, nanhu nyingam kangme kah banem, yo wuram kangme brasn kaht kandihato bngo bijham kanjo wuram fnhutwom. Nann nd mrokfom kfehiwant. ¹⁹ Na bi hti hik bohikwanm niko niwa nefm. Htitwanko wom met yindarim be marbit htewukomm, yo tamoh tamoh nefm wom met yindarim niwam niko tir kahukkomm. Yo tamoh krhopam niko yakneft toh bmtahato kakitoh

[‡] 2:11: Nd wuroh noheftu kfo nuhasyuk mrokfot korhwot: Rev 20.14-15; 21.8 [§] 2:17: Nd manapam Isrerm tkitt furat yaumohat Bro Nkifrar nd manapam hemotrm famom. Manaparoh mrokfot htikfot Kisim Bek 16 yo Song 78.24.

kihwohma. Na tawisafwanm niko bingot namoa nefm, tu dborioh nefm namokomm tfit ariham nikmoh nefm tu hifa mfrfnah marnyewum.

²⁰ To tfit wom mrokfot kfiwanko. Na nhai wofnkaha niko yakitohwa met Jesebert.** Rot kfo kangt, 'Na profeta.' Ndt kfo furakfot kfiwut. To frohm kfiwa mrokfom yimam wany-hato nkifra tahi rmonm htayuk yemrom yewamm, yo met yindarim rine wunitam? To nd mett. ²¹ Kanga nd rothu nefm ayafhotm, ndnetann afo tobn marsisewant. To nhai. Nhai mekaht ayafhoyant rothu rine wune nef. ²² Nd nmbuhatpno to be nd mett bro dbohneft hirhotant nd dbohneft-pno hwe kkor hasoraht yo nd rotpno ijoh yitam nhai yaffhorfomm rotpno niwa nefm, rom nhaf dbohnefm hirhotanm afo yironarahm. ²³ Nanrpa-yann yimaroh yiro yima yuhum yo yima yuhum dukewa dukefm htitanm. Rothu yonm hifa wus rmonrhota, ndt siosroh yima bugam htiruhamn duka mirahm, 'Dajohmn, ndr yiro rhu kafrohwa fasoh nefm htitwarmn kak gngngtatworm yimanom niwa nef bebm.'

²⁴ To niko wom womko Taiatairat tohyukko nhai rot kfo srh nuhasyuk mrokfo yuhat hikrmoko, yo nhai yakr-mokomt rom kfo yamuka, 'Satanrhu kfo kafroh mrokfom.' Na kfo mifwanko, na nhai tfit wom krhopam thu hutar-hotanko. ²⁵ Tmift kfiwanko, nd niko yakitohwa mrokfom ndm afo yakitoh kih hasokahkomm afo na nieruha.

²⁶ Yimar nda bbinysofthu ufasho nefroh bbukeft kahot nohwort, yo be nanhu dukefrn tohhany tohhany wuroh yihar nier, nd yimar tuhan yindariroh toh yukatohyuk bro yufat hiruhanr. ²⁷ To nd yimar yufat yakni-hato yufet yimar toh thombat na tukanhu Yifemr yufat hehato toh yukatohwa kanjo inji nd yimar toh yukatohrah. Nd yimar ain nmbuhat yakitohhato roh tambonm frdbtohewa kanjohot yimar toh yukatohrah. Nhai yimam niahato yak bisskfot. ²⁸ Yo nda dbha ksfut mfnahwa kanjohot gunyr hiruhanr. ²⁹ Yimbhindange-teko, wany marnyakfot siosmpno ziyuk mrokfom Bro Nkifrarhu Yafothat kfo pthiwam."

3

Taun Sardisko rhuyuk siospno yimo gontwathu mrokfom

¹ Tfit Jisasr wompam wom mrokfot kfo memor, "Yo tfit wom mrokfom wawandfakahn taun Sardisko rhuyuk sioshu mounmotrpn wahtaftwanm. Mrokfom inji wahta-twanm: Na Bro Nkifrarhu hingrneft hingrnaruha 7-pela yafothami 7-pela gunym kakitohwa. Nikmoh mrokfom na htefiwa. Na bi htihnewanm niko nahniwa nefm. Kfo kangm, 'Nd sioskfot Jisasr hik marnyewut.' To nhai, bi minohni hanitwot. ² Ndnetn rhu mmo haso duha. Tuko warhukah-komm wahtiko niko na hikwa nmbuhat. Na hik hanyhato fitoha nd na hik dukefr bi minohni hanitr to be mirahko tfit finji anyom. To be nd tkittn miyakitoh kasinyakfot yudbat. To tfit mirahko wompam anyom, to be nd nanhu hik dukefr minoh buganirahr. Nhai be sfno inji kfokaha. Na htita nanhu Nkifrar nhai hti yindhorkahrm niko niwa nefm. Ndnetn nd mrokfom kfiwanko. ³ Nd gutnius niko bingot wanyhato

**
2:20: Nd met Jesebert bingot Isrerko kwin tohmt. Nd mett be tu fasoh met beb mift tohmt. Rothu tndhtitkfot 1 King 18.4 yo 19.1-2 yo 21.1-26; yo 2 King 9.22 yo 9.30-37. Nd Nikolashu hingrneft hikmoa yimaroh wom mett, ka Jesebert namoa nefm hikmoatn Taiatairakorhof wom Kristenm yakmoatm rothu nefm kak nuhasmoutm, nd Jeseberthu nefm hikmoatt ndnetn Jonr nd Jeseber yufat hmbremort.

yakmot, tfit dukak hanykfot. Nd gutnius mrokfom hik marnyahato fasoh fasoh nefm yafhokfot. Na Jisasa hik you boyourahkoma, be yudbat hti fohtasakrahkma rikoh yima htiyekwa kanjo.

⁴ To tmift tom nikmoh wom yimam Sardis tohwom. Nd yimam tafi rroh hmbresham kift yaknarmomm. Nd yimaroh nefm awi dboriohem. Ndnetn ndhtet yimam ganyom hmbresham hmbrehato nanpno rpat wiyauyaurahnom.

⁵ Yimar nda bbinysofthu ufasoh nefroh bbukeft kahot nohwort, nd yimar ndhtet ganyom hmbresham wondhrah; yo rorhu yufat nhai yak thurhotat toh nkifraniyuk yimaroh yufam yorhwa gonborngt. Nhai. Rorhu yufat nanhu Yifemri rorhu mounmotm-pno yutahato kfo miruham nd yimar nanpno tohwor. ⁶ Yimbhindangeteko, wany marnyakfot siosmpno ziyuk mrokfom Bro Nkifrarhu Yafothat kfo pthiwam.”

Taun Filadelfiako rhuyuk siospno yimo gontwathu mrokfom

⁷ Tfit nd yima Kraistr wompam wom mrokfot kfo memor, “Yo tfit wom mrokfom wawandfakahnm taun Filadelfiako rhuyuk sioshu mounmotr-pno wahtaftwanm. Mrokfom inji wahtatwanm: Na Bro Nkifrar tohwa kanjo inji tohwa, na nhai wom kfo nhehefenr yakitohkaha, na kfoyuk mrokfom tu kfo mif mif mrokforpam kfiwa. Nann king Defitru kit kakitohwant, nann bi tfanyant nhai tfit wom yimar frkihkfot. Yo nann bi frkihant nhai tfit wom yimar tfanykfot. Nann ndar mrokfom kfefiwanko. ⁸ Na bi tawisafwanm niko niwa nefm. Tawisaf-wanko bi wuroh bbukefenpar rhumotrko nanhu mrokfom hikmokommn nhai nanhu yufat yafhormokomt. Nikmoh yauyuk yihotar bi tukann fak wuthahemoyanko. Nhai wom tamohm hta rafokahm. ⁹ Niko bi tawisafeteko Satanrpno tohet yimaroh tngm, rom niahato kfo mirahm nom Judayenom. Ndm be yuwi frnheh mrokfoyem, nhai tu Bro Nkifrarhu kmi Juda mifm rhukahm. To tfit afo wahtitwako. Na kforuha nd yimam tfit nikompno niahato nikmoh wurampno bangu myuknarahm. Tum tfit inji naruhamn tfit dukefr niahato duka mirahm, ‘Arm ka Jisasrhu marbit korhm.’ ¹⁰ Niko nanhu mrokfom yak hikhato toh bmta bugamokomm niayuk krho nmbuham. Ndnetn nanhu tirmn rhurahko. Nanhu tirmn rhuruhakomn tfit ndar bbinysofthu tuhan yindariroh mfrnhombrayuk krhopam mekahtn aniekahnomm amfrnhombranom, toh raforuhank. ¹¹ Bi brbohwa nikompno nianeft. Nd niko na Jisasa hikwa hik dukefr yakitoh kihkfot. Wom yimam nieruhamn nd dukefr yak thurahmr, nhai nd winyuk praiskfot yakruhatko.

¹² Yimar nda bbinysofthu ufasoh nefroh bbukeft kahot nohwort, be nd yimar nanhu Bro Nkifrarhu temperrhu thu habokknayuk rahur tohruharn nhai tfit frfnaruhatr. Be inji toh hatohruharn nanhu Bro Nkifrarhu yufat htaruhanr yo kmi Jerusalemrhu yufat htaruhanr, nd nfri bro taunr Bro Nkifrar wahta-ruhar, yo nanhu nfri yufat ndt nhaf htaruhanr. ¹³ Yimbhindangeteko, wany marnyakfot siosmpno ziyuk mrokfom Bro Nkifrarhu Yafothat kfo pthiwam.”

Taun Laodisiako rhuyuk siospno yimo gontwathu mrokfom

¹⁴ Tfit nd yima Kraistr wompam wom mrokfot kfo memor, “Yo tfit wom mrokfom wawandfakahnm taun Laodisiako rhuyuk sioshu mounmotr-pno wahtaftwanm. Mrokfom inji wahtatwanm: Bro Nkifrar kfoyuk mrokfom yo kfo tahi mrokfom na kfo yakiohato wuyekwanm. Na Bro Nkifrarhu

mrokfom tu kfo hik mifwanm. Na nhai wom kfo nhehefenr yakitoh-kaha, na kfoyuk mrokfom tu kfo mif mif mrokforpam kfiwa. Nanhu tngtpno Bro Nkifrar nd tamoh tamohht hingrna htamort. Nann ndar mrokfot htefiwant nikompno. ¹⁵ Htitant niko yorhwa rhu nmbuhat. Nhαι gonngtani hanykahko yo nhαι kkahkahko. Amigonngtaniko, ee btn kkah rifhur herfiyanko. Be akkahko, nhαι mrokfom. Nhαι wom dukefm htarfotanko. ¹⁶ To nhαι, tor be kkahefenrpar korhrko. Nhαι be mfro kkahkahko yo nhαι be mfro gonngtakahko. Be inji buha yorhwatko hhrekhatο kanga ayak tuhanko. ¹⁷ Niko kfo mihakutko, ‘Nom bok maruti wussn yura korhnom. Nhαι rhu bebkahnom.’ Nd niko kfiwa mrokfot kfo furakfoyet. Niko tu fasoh rhu beb nmbuhat korhko. Ndhтет ruheft niko yorhwat yimam be tu bro yuhuwafest htakfot. Niko tu faso yorhwakomn nyingam kunyjhatο brioh hmbresha duha sfnoh bmbom-brohko korhko. To ndhтет rhu beb nmbuhat tuko yorhwat nhαι mhtiyak-kahkomt. ¹⁸ Ndnetann kanga akfoyanm. Nanhu gorkfot bi kahe kahe kandhi hnuhato bi nd binef wingrt bdrт gorkfotpno rhuyukt kur hnuhato fak dbofta wusmomn bi gorkforpayet. Ndtн kanga wawiknakahkomn be yura marutн rhurahko. Yo kanga ganyom hmbresham wawiknakahkomn ndm wahmbreko. Nd ganyom hmbresham yak hmbrehato be nhαι yimam hti nyumuktaruhatmkο sfno hmbresha duhatko rhuneft. Yo nyingaroh yak wuthayuk shrm wiknahato nyingam htakahtkomn nyingam wutharahmkο. ¹⁹ Na hti wofnwa yimam kfonitayanmн mrokfom kahukanm. Ndnetn yima yuhum sinyahato niko niwa fasoh nefm mong trohhato yafhokfot.

²⁰ Wawanyko! Na toya kuny yifhatikko tohhto krohna hasiwa. Yimar wanyhato yak tfanyakrahra na nd yimarhu kunys fkenihato nuwa yemskanhoruhanr, yo ror nuwa yems-kanhorahra. ²¹ Yimar nda bbinysofthu ufasoh nefroh bbukeft kahot nohwort, nd yimar yakrhoyanr na rhuyuk sia kingkfot rhunhorahra, na ufasoh nefroh bbukeft yahot nohnhato nanhu Yifemrhu sia kingkfot rhunuhiwa kanjo. ²² Yimbhingangeteko, wany marnyakfot siosmpno yiyuk mrokfom Bro Nkifrarhu Yafothat kfo pthiwam.

Sifsif Yonr hefenrhu skrorkfot yak nyusakmotrt nd fasoh fasoh shrm mfnahato nda bbinysofthu met yindarim thu kasi hmbremomm.”

4

(Sapta 4–11)

Bro Nkifrar yura hefenrn lotu hanyomomr

¹ Nd nanhu mongko mtohhato pthamo yimar kfoyuk mrokfom wanyни hanyhato tfit yura hefenr hti hanyomoyanr hefenrhu yifhatikt tfanyett hti hanyomoyant. Nd na barkof ptha hanymo yimar tfit yura hefenko mtoh hanyhato fumret yimam fumrwa kanjo inji wany hanyomoyanr. Kfo hany memora, “Asha yuwa muhn. Yuwa muhkahtn yak nuhas bonuhas bugaruhann kto rhuruha nefn.” ² Be inji htini hanyhato yudbat tfit Bro Nkifrarhu Yafothat toh hongmbakna-motta nyingam frkrekuthato hefenr

* **3:17:** Tu Laodisiaroh htiyett hti memoum, “Nom tunom tamohm wom dukaruhanom nom yura maruti wussn be yura korhnom.” Ndt yimaroh htiyettн inji htimoum. To tfit Bro Nkifrarhu htiyett faso htimourm. Yimam faso mif rhumoum. Revelesen 2.9 htikfot wom mrokfom.

hti hanymoyanr. Nyingam frkecutni-hato hefenr htimohat htimoyant kingm yorhwa gajis. Nd gajis htimoya tor wom Yimar korhrt nd gajis.* ³ Nd Yimar gunyinyimik fnhutwor kangme tahi jspathu fnhuyeftn fnhutwor yo tahi konirianthu fnhuyeftn fnhutwor. Nd ror yorhwa gajis kkujift frhtfasmott. Nd kkujift htimoyant kangme tahi emerartn fnhutwot. ⁴ Nd kingm yorhwa gajis 24 gajim hta htfasmomt, nd gajim 24 bro nungoethem korhmm. Nd gajim yorhwa nungoethem ganyom hmbresharpam wondh hmbrihato korh hasiwum, yo kingm hmbrita gor kraunkfot mfham hatohwomm. ⁵ Nd gajis yorhwa tkittn wuhtiyakmoanm toh fnhum wuyohninehato famboh-ritnamoum. Tohr wuyohninamoahat nyungefm thuwok fnahmoum. Yo nd gajis yukatohwako 7-pela kshm funa hasiwum. Nd 7-pela kshm ndm Bro Nkifrarhu hingerneft hingeraruha 7-pela yafothayem. ⁶ Yo nd sia kingt yukatohwako kangme tek baritn glase hingerneft, aiskfot kanjo fnhutwot.

Yo husfihus foh nunga kanjo ruhet shrm mano mano toh htfasmom. Nd shrm nyingatikko wom nyingam tohwom yo mongko wom nyingam tohwom. ⁷ Nd husfihus shrm barkofr laion mfheter. Womr bulmakau yiram mfheter. Yo womrne yima nyingati-keter. Wurohr dobi mfheter. Kangme dobirn yafuna hanyhato mfhat thu yuwof hanitrt. ⁸ Nd husfihus shrm birnet bugayetem. Rpa rpa shrm 6-pela birna bugayetem. Yo nyisofm nyingam rhu htfas bugewumm. Yiro birna yuhamio nyinget bugayetem. Yifung marm be Bro Nkifrar windoh tukna hasiwum. Windoh hanyhato kfo hany kangm,

“Tu Yura Myorhekwa Bro Nungothete,

Tu Hta Nngrajohet Bro Nkifra mife,

ni bingot ritohngotakmo arihato tohwo yo kto nierahn.”

⁹ Nd foh nunga kanjo ruhet shrm rom yindhorwomr nd Yimar turhu sia kingt rhuahato be inji toh nkifranitar. Yo rorhu yufat yuta hagrhaato kfo yindhorwomr. Nd nefst nd tohwa husfihus shrm be inji nahasiwum.

¹⁰ Tfit nd 24 nungoethem rom nd sia kingt rhuyuk Yimarhu nyingatikko bangum myuknahato lotu hasiwumr. Nd Yimar be inji toh nkifranirahr. Nd rroh mfham hatohyuk gor kraunkfot yak tutakhato nd Yimar yorhwa sia kingtpno watuhato kfo yindhor brutt-newumr. ¹¹ Kfo kangm,

“Nmoh Bro Nkifraye ninrpa tu yura myorhekwo.

Ninn nda nom htita tamoh tamoh hingerneft hta buga-motnm korhm.

Ndnett yimam be ninrpann kfo yindhorkfot

yo yufat yuta hagrhaato ninrpanhu yinhitn rhukfot.”

5

Bro Nkifrarhu mrokfom yorhwa skrorkfot Jonr htimort bi yakrirhato psifkort bi silimett

* **4:2:** Nd gajis rhumo yimar Jonr dhtimor, ndr htimor Bro Nkifrar. To ndashart nhai be yufat yuta marimor Bro Nkifrar korhrt nd gajis. Nhai. Kto sapta 7 ves 10 kfotn htirahn mrokfot kfo miraht, “Bro Nkifrar kingm yorhwa gajisn korh hasiwur.” Ndha mrokfot kfo ntemomt. To Jonr Bro Nkifrar htimohat nhai kfo marimor rorhu ruheft yima mifm kanjo korhr. Nhai. Be kfo nhombramor ror hatohmo funeft yo ror hatohmo wonk wonk nmboret nmboret fnhuyeft. Ndrpam kformor.

¹ Tfit htimoya nd sia kingt rhumo Yimarhu tirmiftn fakitohmort skrorkfot.* Nd skrorkfot mano mano mrokfom wandfamomm, Wandfa-momn tfit yakrirhato 7-pela nmbuharoh psifkorm silimmomm.† ² Nd skrorkfot inji htini hanymoyann tfit htimoya wom nngrajohet mounmotr nnhuhato kfo ptha ttiwon memor, “Tone fitoh yima tungunar nieruharn nd silkfom yakta hanyruhatrn nd skrorkfot rhuyuk mrokfom htiruham?” ³ Na nd mounmotrhu mrokfot inji wanyhato duka memoya nhai wom hefenr tohyuk frohrn o bbinysoft tohyuk frohrn o yiro Maringour tohyuk frohrn nd skrorkfot yak nyusakuhato yiro mrokfom htikfot. ⁴ Hti hambriwa nd skrorkfothu yak nyusakuyuk yimar. Dukafotihato bro nureft fakmota. ⁵ Tfit nd sia kingt rhu htfasmo nungothetroh womr kfo memora, “Anurwahn! Wawany! Tor Juda tangiroh Laionr, tu King Defit frikef yuhathu tu tannefenr, ror tohmo yahrt nhai finjinarmor. Yahr nungothat bi fakmort. Rorn nd 7-pela silkfom yak thu hanyrahm.”

Jonr Sifsif Yonr htimoyuhat

⁶ Nd nungothetr inji wanyini hany-hato tfit Sifsif Yonr htimoyanr brbo sia kingtpno mtohmor. Htimoya nd sia kingt husfihus foh nunga kanjo ruhet shrm mano mano toh htfasmom, tfit romponio 24 nungothetm toh htfasmomm. Nd Sifsif Yonr htimoyanr yimaroh was fnhum hatohwor. Rorhu mfhat htimoyanr 7-pela komm toh-womr yo 7-pela nyingam korhmr. Nd nyingam Bro Nkifrar kfo hta bohtayuk yafothayem. Nd yafothamn ndar yuht bbinysoft kukatohwomt. ⁷ Tfit hti-moyanr nd Sifsif Yonr nd sia kingt rhuyuk Yimarhu tirmifko yakitohmo skrorkfot rim fakmort. ⁸ Tfit htiyahu hanymoya nd husfihus foh nunga kanjo ruhet shrmi 24 nungothetm nd Sifsif Yonrhu nyingatikko bangu myukna hanymom. Nungothetm rpa rpa fakitoh nhombra bugamom musik wumtyuk gita kanjohot shrm yo dborioh mthet shrm kur mtha hanyet dis gorkfot. Nd dborioh mthet shrm, ndm Kristenm Bro Nkifrarprno kfo bruttnewa nmbuhat fak nuhasmom. ⁹ Yo wany-moyanm wom nfri windohr fakmom. Nd windohr inji kfo hanymomr:

“Ni bi wasmotmn nohmo.

Nd ninhu kku futn bi fak nhafoh-motm

wonk wonk kmim, wonk wonk yarmumat kfet kmi kmim,

wonk wonk thetm, wonk wonk ruheft ruhetm.

Be bi Bro Nkifrarhu yufat korhm.

Ndnetn nd skror htayuk silkfom yak thurfomn.

¹⁰ Nd yimam bi Bro Nkifrarhu kingdomkfo fak htamotnm

be bi nmoh Bro Nkifrarhu pris hingerneft bi tohwom.

Be kingm tohrhamn

bbinysofthu met yindarim romn yakitohrahmm.”

Sifsif Yonrhu yufat yuta hagrhamo yuhat

* **5:1:** Nd skrorkfot bi nkifram yakitohmoa buket. Ndar yiham buk mifm kakitohwonom bingot nkifram skrorm mrokfom rhumoatm nd skrorm yak nyusaku fnahhat mrokfom hti fnahmoumm.

† **5:1:** Nd skrorkfothu 7-pela nmbuharoh psifm yak natt tkitmn kenderm kandhi hnuhato tarioh trkuyaf hanymoa tkitmn piksakfo bi hingrna hta nhombretm yakmoamn tatanyjaf hanymoumm. Nd tatanyjaf hanyuk tkitm nhai wom yima furam nd kandhi hnuhato tatanyjaf hanyet tkitm yak ppokfot. Tu be nhai mif. Nd tu piksa tikatpar yak ppokfot.

¹¹ Ndt inji htini hanyhato tfit memoya ayukatohafoya, wanymoya mounmot rifhur yura wutohhato wanakumom. Nhai kuken mounmot rifhur htimoya, be tu tausen tausen milion milion mounmotm htimoya. Nd mounmotm niamomn toh dbu hmbremomm nd sia kingt rhuyuk Yimar yo husfihus foh nunga kanjo ruhet shrm yo 24 nungohtem. ¹² Nd mounmotroh tng rihar mfro wanakuyafo memom,

“Nd Sifsif Yonr yimam bi was-ngotmor, tu yufeter,
 rorn tu bro bbukefeter yo dborioh dukefeter,
 rorn tu dborioh rhu nmbuhat kakitohwort,
 yo rorrparn yimam kfo yuta hagrhaato
 yimam kfo yindhorkfot.”

¹³ Nd mounmotroh tngm wanyini hanyhato tfit Bro Nkifrar hefenri bbinsoft hingrna htamo yimam nd foh nungat nd tamoh tamoh wany-moyanm kfo yindhor memom,

“Nd Yimar sia kingt yorhwari Sifsif Yonr
 rof kfo yindhor tngm rpat ayak bugafm,
 yuta nawohyuk tngm kfo yindhor nmbuham,
 bbukefm rofrpafn yiha yiha arhu nkifranitwam.”

¹⁴ Nd 4-pela shrm kfo fakio memom, “To be inji.” Be nd nungohtem bangu tabokmehato lotumom.

6

Sifsif Yonr silkfom yak thumo yuhat

¹ Tfit htimoyanr nd Sifsif Yonr yakitohmo skrorkfothu barkof silkfot fak thumort. Fak thu hanymort nd husfihus foh nunga kanjo ruhet shriroh womr wanymoyanr tngt tohr kanjo. Kfo hany memor, “Aniar!” ² Inji nakumotr memoya ayukatoha htimoya wom ganyom hosr. Nd hosr hatoneyuk yimar tembt fakitohmor. Yahr kmim yiho hathu hnamotrm yahr nungohtat hemomr. Nd yahr nungohtatpno yahr kmim yak bisrahm.

³ Ndt inji htini hany tfit htimoya Sifsif Yonr husyuk silkfot fak thumort. Fak thu hanymort tfit nd foh nunga kanjo ruhet shriroh womr tfit kfo naku memor, “Aniar!” ⁴ Inji nakumotr memoya ayukatoha htimoya wom kuupa kanjo fnhuyet hnga mfnah hanymor. Nd hosr hatoneyuk yimar ndar bbinsoftu hnayuk yahrt hnehato yimam naye mhriruha bro bbukeft hemomr. Yo nd hingrnesthu hingrnayuk bainat kimt bi rpat hemomr.

⁵ Yo tfit Sifsif Yonr tfit husfirpeh-yuk silkfot fak thumort. Fak thu hanymort nhaf tfit wanymoya nd foh nunga kanjo ruhet shriroh womr nhaf sinyahato kfo naku memor, “Aniar!” Nakumotr memoya ayukatoha htimoya krta hosr. Nhaf nd hosr hatoneyuk yimar skerfkot tirt fakitohmor.

⁶ Nd husfihus foh nunga kanjo ruhet shrm tohmo tkittpno yima tngt kanjo wany hanymoyanr kfo hanymorr nd hosr rhuyuk yimar. Kfo hany memorr, “Ninhu hingrnest wai wahingrnakahtnt yatinoh wormr tohrah. Nd wormrhu toh yihar yimam witpam 40 kinakfet wan kilo wit sospenenrpar skerimhekfot. Yo baripam 40 kinakfet husfirpa bari sospenenm skerimhekfot. Ndrpam wahi hanyswanm. Yo olif suhmi wain shurpam mirahn ayak batianm.”

⁷ Yo tfit Sifsif Yonr husfihusyuk silkfot fak thumort. Fak thu hanymort tfit wanymoyanr nd foh nunga kanjo ruhet shriroh womr kfo memor, “Aniar!” ⁸ Nakumotr memoya ayukatoha, htimoya wom hosr. Nd hosr

gondhata bugamor. Nd hosr hatoneyuk yimarhu yufat Nohyukr. Tfit rorhu mongko tohmor wom hosr. Nd mongko tohmo hosr rhumo yimarhu yufat Maringour. Tuhan yindariroh yak batiyuk kfo yakio mrokfot rofpno hتامomt. Rofn nd kfo yakio mrokfot fakmof wonk wonk yuhamn rof yihato yimam yak bati witakfot. Rof yahrtn bainate tmbho witakfot o yatinoh wormr tohhato yimam yeshri duha noh witakfot o dbohna wormr tohhato yimam ridbohnakhany, ridbohnak-hany, noh witakfot o bbinysoft wutoni atonita namburet namburet foh nungamn yimam ye jborfa witakfot.*

⁹ Tfit Sifsif Yonr 5-yuk silkfot fak thumort. Ndt fak thu hanymor tfit hti hanymoyanm nd yimam Bro Nkifrarhu mrokfot yakitoh kihhato yo mrokfot kfo ptha htfashato dwas hanymo yimaroh yafotham. Htimoyanm nd yafotham Bro Nkifrar tarloh mthayuk alat tohmo ktitn rhu htfasmom.

¹⁰ Nd noheh yimaroh yafotham wany hanymoyanm mfro mfro kfo naku nur hany memoum, “Bro Nkifraye, ni king tohwann nd tamoh tamoh kakitohwont. Ni nhai wom kfo nhehefenr rhukahrn. Ni tu dborloh nefrpam yak hikhato nhai yimaroh fasoh fasoh nefm hti marsisakahnm. Nome bi gari hatoh-wonom. Fitoh yiha ni kot yakitohhato nd nom was furamo yimam tawo tofiyehm yakruhanm?” ¹¹ Inji kфомotm tfit hti hanymoyanm nd yafotham ganyom hmbresham hmbre buga hanymomm. Hmbrenimommn kfo memomm, “Niko bi akfo dimandi-wahko. Niko afo be inji warhu wita hanyko afo. Niko hingrnamo kanjohtet hingrnewa yimam tafi was bugahato Bro Nkifrar kfoyk thomnafat yakrrott. Was hany, was hanyruhamm bi Bro Nkifrar duka htayuk thomnafat bi fekt, ee tawo tu Bro Nkifrar tofiyehm wasrahm.” ¹² Yo tfit htimoyanr nd Sifsif Yonr 6-yuk silkfot fak thumort. Ndt fak thu hanymotr memoya ahtiyafoya htimoyant bbinysoft bro nunes tonemot. Marr htimoyanr krta hmbremor yimam bbtangurhato hmbrita krta hmbreshat kanjo. Yamt rot kkupata hmbre bugamot. ¹³ Guny mourr ror yohrof bugamorn bbinysoftn minajbuh bugamor fik suham wifort frashato minajbuhwa kanjo. ¹⁴ Yo mount htimoyant memome yitwatn fak rirefim. Nd kminysofm yo kmi yubm htimoyanm nhai tum tohyuk tkitmn tohrmom. Tum tohyuk tkitm thu trohhato nndo wom tkitmn tfit toh hany bugamom. ¹⁵ Yo nd bbinysoftnu kingm, yufet yimam, soldiaroh keptenm, maru kunyet yimam, nanyjaret nanyjaret yimam, slefm yo toh furayuk yimam, nd nd yima boyimat nhai watoh hasormom. Nndo yakrme tubatunimomn yiro kminysofm yo kminysofroh tahi bakunymn yi kafrohmom. ¹⁶ Ndko kafrohato kminysofm yo tahim kfo naku memoumm, “Ndar kminysofko, ndar tahiko, wathu kasikmnom. Wathu kasikahtkmmom nd sia kingt rhuyuk yimar nhai hti ruhatnom yo Sifsif Yonrhu namburpam nhai yakruhatm-nom. ¹⁷ Nd nom rofhu mrokfom hanyjbornahato fasoh fasoh nefm nahnamohat to bi tof bi nambur fnahwof. Ndnnett nhai wom fitoh yimar o mett tohhato rofhu nambur-pam frtfakruhatmf.”

7

Isrerroh 144,000 met yindars Bro Nkifrarhu makkfot hتامomm

* **6:8:** Nd rof yak bati witamo tuhan yindarim nhai be bbinysofthu tuhan yindari bugam yak bati witaromfm. Nhai. Be ¼ nd bbinysof rhuyuk tuhan yindarirpam fak bati witaromfm.

¹ Ndm inji htini hanymoyanmn tfit hti hanymoyanm husfihus mounmotm. Ndar bbinysofthu manoh manoh krayefm toh nhombramomm. Manoh manoh krayefm tohhato mano mano niayuk wiforefm fak tkafmomm. Nhai wifort wiforhato bbinysoft wifort yakrmott o marombt o mim wifort yakrmotm. Nd hingr nefetmn manoh manoh krayefm tohmomm. ² Yo tfit hti hanymoyanr wom moun-motr manoh marr yuwa muhwako toh tanyhato yi hanymor. Nd mounmotr htimoyanr Bro Nkifrarhu makkfot fakitohakmor. Nd mounmotr mtohhato mfro kfo nnhu hanymorm ndwom husfihus mounmotm. Nd mounmotm bi ndar bbinysofti marombthu yak batiyukn Bro Nkifrar kfo htamom. ³ Nd mounmotr kfo memorm, “Bi mirahko bi ndar bbinysofti marombt yo misuhm bi ayak batinomm. Afo nom yiruhanomn Bro Nkifrar hikwa met yindariroh nyimbikm Bro Nkifrarhu makkfot htarahnomm. Bi makkfot htaninome ee btn wayak batitwakomm nd tamoh tamoht.” ⁴ Nd Bro Nkifrarhu makkfot htamo met yindariroh tho-mnafat, 144,000 met yindariroh nyimbikm makkfot htamomm. To nd met yindarim, Isrerroh 12-pela frikefthu 144,000 met yindarim makkfot htamomm. ⁵ Rpa rpa frikeft 12,000 12,000 met yindarim makkfot hta hanymomm:

Juda frikeft 12,000,

Ruben frikeft 12,000,

Gat frikeft 12,000,

⁶ Aser frikeft 12,000,

Naftali frikeft 12,000,

Manase frikeft 12,000,

⁷ Simeon frikeft 12,000,

Lifai frikeft 12,000,

Isakar frikeft 12,000,

⁸ Sebulun frikeft 12,000,

Josef frikeft 12,000 ee

Benjamin frikeft 12,000.

Tu bro yima rifhur Bro Nkifrar lotu hanymo yuhat

⁹ Tfit hti hanymoya wom yonmari yima rifhur. Nndo ndar kipr shu furam, nhai yimam thomnakfot. Nd yimam hti hanymoyanm nndoh nndoh mrokfot kfetm, nndoh nndoh thetm, nndoh nndoh kmirohm yi hanymom. Nd yimam mtoh hanymom sia kingti Sifsif Yonrhu nyingakorn. Yo nd yimam bi ganyom hmbresham wondh hmbrehato yomkpo kanjo ruhet pamkfothu twam fakitoh bugamom. ¹⁰ Nd yimam mfro mfro wanakuyak memom, “Sia kingt rhuyuk nmoh Bro Nkifrar yo Sifsif Yonr, rofn nrfa htiyakmofnom.”

¹¹ Nd sia kingt toh htfasmo moun-motm yo 24 nungothetm yo husfihus foh nunga kanjo ruhet shrm tuha suhhato nyingatikm bbinysofko yohne-hato kfo hany memom,

¹² “Nom tunmoh Bro Nkifrar pno tu bro yindhoreft yorhwatn rorhu yufat kuta yindhor boyindhorwonomt.

Ror tu dborioh dukefetrn rorn kfo yindhor boyindhorhato rorhu yufat yura yura htakfot.

Tu bro bbukefeter. Uwa, ndt nhai fura kfot.

Tu bro bbukeft rorparpno korht.

Nd kfo yindhor mrokfompno Bro Nkifrar yiha yiha kfo yindhor hasokfot. To be inji!”

Ganyom hmbresha hmbreyetroh ruheft

¹³ Tfit wom nungothetr kfo ttiwon memora, “Nd ganyom hmbresha hmbreyet met yindarime frohem, yo fitoko niamom?” ¹⁴ Tfit kfo memoyanr, “Bro yimaye, ni tunn tawisafwonn.” Tfit rorn kfo memora, “Nd met yindarim bro krhopam tohmom. Mis kfrat rroh ruheht rhumot. Sifsif Yonrhu kkupaye nd rroh hmbresham kifsa-motmm hmbresham ganyomtewumm. ¹⁵ Ndnctm Bro Nkifrarhu temperr yorhwa sia kingthu nyingatikko toh-hato yifung marm lotu hasiwum. Nd sia kingt rhuyuk yimarn hti yukatoh hasiwurm. ¹⁶ Nhai tfit wom yatinoh-ruhatm yo nhai tfit wom bupa knaru-hatm. Nhai tfit marrn o tamohmn tagunaruhatmm. ¹⁷ Tu nd sia kingthu buha rhuyuk Sifsif Yonrn yukatohaf hanyrahm. Turn bu yinham yorhwa tkitm hany hakuruharm tum tas yeruhamn toh hatoh hakurahm. Yo nd harhuwa nur nyingam, Bro Nkifrar yak trkthurahm.”

8

Sifsif Yonr 7-yuk silkfot fak thumort

¹ Tfit hti hanymoyanr Sifsif Yonr tfit 7-yuk silkfot fak thumort. Nd 7-yuk silkfot yak thumohat hefen bugar be buskukrat rhumor, nhai wom tamoh nmbarefenr o nyungefenr wanyrmoya. Haf aua be buskukra furat rhumor. ² Buskukrat rhunomrn ee tfit kto htiyak hanymoya Bro Nkifrarhu nyingako mtohyuk 7-pela mounmotm 7-pela fumrm hi hanymomm.

³ Yo tfit wom mounmotr htiyak hanymoyanr dborioh mthet paurakfot htahato tarioh mthayuk gore hingrnayet pengt yakitohakhato altakfotpno mtoh hanymor. Mtohmotr nd yonmari dborioh mthet paurat hemomr. Nd paurat Bro Nkifrar hiket yimaroh kfo bruttnaneft nd paurakfot rpat Bro Nkifrarhu nyingatikko rhuyuk altakfot-pno mhtahato rpat tarioh mthafoyukmn nd paurat hemomr. ⁴ Yo htimoyanr nd ror yakmo paurat tarioh mthafmotr nd dborioh hip gbefri Bro Nkifrar hiket yimaroh kfo bruttnayuk mrokfom nd Bro Nkifrarhu nyingatikko tohyuk mounmotrhu pengt htanyhato rpat muhmom. ⁵ Nd mounmotr nd hingr-neft hingrnani bugamortn, tfit nd altathu kah bantikr tawokakmorr nd dborioh mthet paurakfot htahato tarioh mthayuk pengt yakmorn nd kah bantikr htamorrn, tfit yarim hatohnehato thu trufafmotr bbiny-sofkor fawihnamor. Inji namotr tohr wathu rbighato nyungu mirefetr yimor. Yo toh fnhur wufohninamor. Yo nunes tonemot.

Husfihus mounmotm fumrm fumrmo yuhat

⁶ Tfit nd 7-pela mounmotm 7-pela fumrm yakitohmom rom bi toh yibonmom rroh fumrroh fumrneft.

⁷ Barkof mounmotrhu fumrr hatoh-hato fumrmorr. Fumrmotr ren aiset kaht ee kkut rpat yakmomm wom bbinysof nmbuhatn yak tipakhato watumomm. Nd bbinysof nmbuhat watumotmm nd bbinysof nmbuhati nd bbinysoft tohyuk bro mi suhm yo mifan suhm, kpr suhm, gutn suhm, nd ndm kur witamom.*

⁸⁻⁹ Yo tfit husyuk mounmotrhu fumrr fumrmorr. Rorhu fumrrpno be tu yonmari kaht nda yuht kminysoft kur funewa kanjohot bro kaht yakmomt wom maromb nmbuhat watu-momt. Watumotmt nhaf nd maromb

* **8:7:** Nd bbinysof nmbuhat krhopam yakmot nhai be yuht bbinysof bugat kur witarmot. Nhai. Be 1/3 bbinysof nmbuharpat yo nd bbinysof nmbuhat rhuyuk shrm kur witamom.

nmbuhathu bupam kkupata bugamomn nd maromb nmbuhath hirhato yewussoh htfasmo yirat nd yiro marombt hutraf-mo tamoh tamohht noh witamat yo nd yura marombt wutone atonemo sifm ndm htimoyanm rpat bafinat yimom.†

¹⁰ Tfit husfirpehyuk mounmotrhu fumrr fumrmorr. Fumrmotr nd bro gunyr kshn kanjo funarriwar wuyoh-ninehato misuhmorm wom tkit nmbu-haroh bupa tasyuk tkitmi yo wom tkit nmuham yorhwa tek yinham.

¹¹ (Nd gunyrhu yufat Kurjbnheht.) Nd tekmi tek yinham nd gunyr misuhmotrm nd bupa tasyuk tekmi tek yinharoh bupam kurjbnheht. Yimam nd tekmi yinharoh kurjbnheht bupam tas yamomn noh wurasoh bugamom.‡

¹² Tfit husfihusyuk mounmotrhu fumrr fumrmorr. Fumrmotr mar yiha tayuk marrhu wom nukeft kur spohmot yo yifung tayuk yamti gunyroh wom nukefm kur spohmomm. Ndnnett wom yihar marr nhai mta fnahhato ta krifaf bugarmor. Nhai. Buha wom yiha nmbuhath marr afo mta nohnimor. Yifungnt nhaf inji. Nhai yamti gunym yifungr ta nfha bugarmomr. Nhai. Buha wom yifung nmbuhath afo mta nohnimom.§

¹³ Yo tfit yura mountn gribfanano hti hanymoya wom dobir hta htfasmour. Nd dobir hta htfasmoarn yima tngt yakhato tu mfro mfro kfo hany memour, “Wayeye! Wayeye! Wayeye! Wuroh husfirpa mounmotroh husfirpa fumrroh krhopam be tu bro krhopa mifm bbinysoft tohyuk yimam yakrahm!”

9

5-yuk mounmotrhu fumrr fumrmo yuhath

¹ Yo tfit htimoya 5-yuk moun-motrhu fumrr fumrmorr. Fumr-motr htimoya wom gunyr wuyohnine-hato bbinysoft misuhmor. Misuhmotr ndar bbinysoft kfe gdbofmo muhrhu rim fnahni yuhathu kit hemomr. Nd muhr nhai brbo watohrmor. Yiro yingotmorn kutndou duhater. ² Nd kiye gunyr nd muhr frkihnimo yifhatikt tfanymort. Tfanyafmohat hip rifhur bbofnahmor. Memom nndo gru kahtn hta funefitm kah hip rifhur mtagdf fnahwor. Nd hip rifhur muhhato tfit thusimorn mounti marr hta rafomotmt mounti marr rim nohnimofn yifungnt rhumot. ³ Nd muhmo gru rifhurn yakum dborhamomn bbinysofko tfit fawihnamom. Yawihnamomn tfit pkoroh tiknayuk nambur bim fakmom. ⁴ Nd yakum kfo hta mrokfot fakmom. Nhai rom yihato bbinysoft tohyuk kiprt o mim o wom tamohmn sinya-hato yanyohkfot. Rom Bro Nkifrarhu makkfot nyimbikm rhu duha yimarpam tiknahato trwafkot. ⁵ Tirfa yamm nd krhopam ayaktwam. Be tiknahato trwaneftn yimam trwafkot, tmift trwa hanyhato nohneft nhai. Be nd yakum inji wanyhato yimomn yimam tikna htfasmoumm. Yimam tiknahato trwamoahat memoum nndo pkomn tiknetmm trwewum. ⁶ Nd

† **8:8-9:** Nd maromb nmbuhati nd marom nmbuhath rhyuk tamoh tamohm krhopa yakmom ndm nhaf be marombthu 1/3 kforpat krhopam fakmot. ‡ **8:11:** Nd tekmi yinharoh bupam kurjbnheht nmbuhath nhaf nhai be ndar bbinysofthu tekmi yinha bugam kurjbnhehtrom nhai, be 1/3 tekmi yinharkforparoh bupa kurjbnheht. § **8:12:** Nd marri yifungnt krhopam yakmohat nhaf 1/3 yiharpar buha marr mta nohmor afo. Nhai be yuht yiha bugar marr mnohmor. Yifungnt nhaf yifungthu nukeft hayuk yam gunyim 1/3 yifungpar nhai tarmom yam gunyim.

tirfa yamm yakuroh tikna hasoneft hhrekhato mirahm, “Finji anakahnomn anohnom,” nhai nohruhatm.

⁷ Htimoyanm nd yakum memom ka hosmn mfham kasinyemni bi tag-biowom yahrt yinyeftn. Mfham memome gor kraunkfotn hmbrim, yo nyingatikem memome yima nyingatikem. ⁸ Rroh tmari yukem memom ka nndo metroh tmar yukayem. Bisom memom nndo laionroh bisoyem. ⁹ Htimoyanm memome yahrt yiyuk siot kapakfotn hmbrim yo rroh twam yafunahato mir nadidarmohat memome hosm yahrt yihato karism hatonitamn nadidar hanitn. ¹⁰ Nd yaku fndm tfit pkoroh fndm kanjo rhu yimamomn nd yima tiknayuk bim fndkorn rhumom. Ndnetmn nd yima tiknayuk bim fndko rhumomn nd tirfa yamm tikna haso-moumm. ¹¹ Nd yakum kingetem. Nd kingrn tohukatohworm. Nd kingr ndar bbinysoft kfe gdbofmo muhrhu mounmoter. Hibru yarmumat nd mounmotrhu yufat kutewumr Abadon. Grik yarmumat Apolion. (Tfit nmoh yuteft nd yufathu yimbu yuhat inji akfonom Shrka Kafringetr.)

¹² Nd dobir yura hta hanyhato kfomo barkof kfo wayeye mrokfo nmbuhathu barkof krhopam inji niamotm htimoyanm. To wawanyko, mirahko ka be inji rpa. Nhai. Tof wom krho nmbuhaf natajofetf niahnewuf. Wom husyuk mrokfothu krhopam bi tom bi brbo.

6-yuk mounmotrhu fumrr fumrmo yuhat

¹³ Tfit htimoyanr 6-yuk mounmotr yakitohmo fumrr fumrmorr. Nd fumrrpno wanyoyanr wom yimarhu tngt. Nd tngt wanyakmoyant Bro Nkifrarhu nyingatikko tohwa gore hingrnayet altathu husfihus konakfot tohyuk husfihus komroh buha nd tngt wanyakmoyant. ¹⁴ Nd tngt 6-yuk fumrr yakitohyuk mounmotrn kfomot. Kfo memotr, “Nd bro tek Yufretis yak tkaftamo husfihus mounmotm wayak hfhankahtnm afnahm.” ¹⁵ Nd Yufretis tohyuk mounmotm rom be gari haso-moum tu Bro Nkifrar kfo htayuk tu yiha mifmifrn. Nd yihar niamotr nd 6-yuk mounmotr yimorn nd husfihus mounmotm yak hfhanafomotrm rom fnahnihato hifa wus rmonmomr wom yima rifiny buhar.* ¹⁶ Yo soldiam hosm rhuhato tonemoroh thomnafat wanyoyant 200 milion soldiam hosm rhuhato tonemom. Nd thomnafat yutamotmt wanyoyant. ¹⁷ Nd hosm mrhuhato tonemo yimam htimoyanm fnhu nmboret fnhu nmboretet mondroh siot kapakfot hmbre bugamom. Womm tu retpela fnhu kkoret siot kapakfot hmbremom, womm blupelakfot fnhu kkoretm yo womm yeropela fnhu kkoretm. Hosroh mfham laionroh mfham kanjo hti hanyoyanm. Yo nd hosroh tngt yuhamn hti hanyoyanm kahm mkur fnah hanyomom yo kah hip rifhumm fnah hanyomom yo sarfakfot kuret kahm mkur fnah hanyomom. ¹⁸ Nd hosroh tngm yahshafoyuk kahm, yo hip rifhumm yo sarfakfot kuret kahm nd ndmn fak batimomm wom yima rifiny nmbuhar.† ¹⁹ Yimaroh yak batiyuk bbukeft hosm dhatonemot tngt yuhat mfahmot yo kinyoftn rhumot. Kinyofm nandomm kanjo nandom mfhetm rhumom. Yimam nd nandom mfhet kinyofe wasmoatmm trwa nohmoum.

²⁰ Yo tfit ndwom ndwomt nd hosm yak bati duha yimom, inji htimohat rom nhai hti yakrmihato yafhormomm turoh tire hingrnayet yifonm. Nhai

* **9:15:** Nd yimam hifa wusmom nhai be yuht bbinysof bugathu yima bugam hifa wusmom. Nhai. Be 1/3 yimarpam hifa wus rmonmom. † **9:18:** Nhai be ndar yuht bbinysoft tohyuk yima bugam yak batimomm. Nhai. Be 1/3 kforpatn nd husfirpa shrnm fak batimomm.

yafhormomt nd yarhroh nakuneft yo nd gore, silvaye, brase, tahiye, miye hingrnayet yifonm o tamoh tamohm. Nd yima tire hingrnayet shrkar, yima tng duha shrkar, nyinga duha shrkar yo wiyauyau duha shrkar, tfit naku hany yo nuwa rika htahe inji namoumm. ²¹ Yo nd yimam nhai yafhormomt yima was furaneft, yima tipnefti for bisingm, yo met yindariroh nayak kafroh htfasneft, yo rikohneft. Nd nd nefm nhai yafhormomm.

10

Jonr yamo skrorthu mrokfot

¹ Tfit htuyakmoya wom nngrajohet mounmotr yura hefen yuhat fawihnamor. Gribt yak-hato ndt hmbrenamor hmbresham kanjo, yo mfha nmbuhakortko kkujift mfhat frhtfasmott, yo nyingatikt fnhumotr marr kanjo, yo wuraf hatoh-mo kaht memom nndo bngo bijhayef. ² Nd mounmotr tefi skrorent bi yak nyimbusakafett tirt fakitohmor. Yo wuraf wom tirmif wurat marombt htamort, wom kindont yura bbinysoft htamort. ³ Wuraf inji htatahato mfro wafattormor laionm yattorwa kanjo. Nd mounmotrhu yattoreftpno 7-pela tohm yohnemom rroh mrokfo nmbu-hampno. Tohm nyungumoum mrokfom wanyakmoanm. ⁴ Nd 7-pela tohmpno niamo mrokfom memoya ka wandfa-ruhanm, tfit yura hefenko wom tngt kfo hany memota, “Nd tohrpno yakyuk mrokfom ni mirahn awandfakahtanm yima yima ahtimm. Nd mrokfom be tunhu yima yuhurpar arhutwam.”

⁵⁻⁶ Be nd mounmotr na htimor wura husf mano tektn wom wurat htamor yo mano bbinysoftn wom wura htamor, nd mounmotrn tir mift yura hefenko wuhta hanyhato nd toh nkifret Nkifrar, mounti nd mount rhuyuk shrkar hingrnamor yo nda bbinysofti ndar bbinysoft yorhwa shrkar yo marombti marombt yorhwa shrkar hingrna htamor, nd Nkifrarhu yufat yuta hanyhato nd mounmotr kfo memor, “Bi nda bbinysofti mounthu bnka yihayer. Bro Nkifrar nhai wom kukna hatohruhatr. ⁷ Nd 7-yuk mounmotrhu fumrrpno to be Bro Nkifrar turhu hingrna yima profetmpno kfo tndh hik buga duha yimo mrokfot nd yiha mfrwutha buganeraht.”*

⁸ Nd hefen yuhat niayuk tngt tfit kfo memota, “Nd tekti bbinysoft wura htewa mountrhu tirt yorhwa yak nyimbusaket skrotr warimaknt.” ⁹ Be na inji wanyhato yimoyann kfo ttiwon memoyanr, “Wahina nd skrorent.” Tfit ror kfo memora, “Wayakkahnt wayant. Afo tngt wuhtahato ye shombat mirahm nndo winepam kaum. Tfit yiro yatit nhai yakmiyakruhant, yatit tfit yiho finy sinyaraht.” ¹⁰ Inji kfomotra nd skrorent yakmoyantn fiyaknimoyant. Afo tngt wuhtamohat hifa famot wine bupam kanjo. Yiyafmoyantn tfit kto yironamoya yatit yiho finy bofinymota.

¹¹ Tfit kfo memoma, “Tfit wom nfri profet mrokfom wawandfatwa. Bro Nkifrar ndar bbinysoft yorhwa kantrimi yo nd kantrim tohwa met yindarim yo kfo pthiwa wonk wonk yarmumami yo nd yarmumam kfiwa

* **10:7:** Nda veskfothu wom kfo nuhas mrokfom. Bingot Bro Nkifrar kfo tndh nuhasmorm profetm ndar bbinysofti mount rhuruha nefm. Bro Nkifrar nhai kfo tndh hik buga nuhasmorm. Be inji kfoni hanymourm. Profetm nd Bro Nkifrar kfo tndhni hanymo mrokfom wanyamohat rom duka memoum, “To nda Bro Nkifrar kfiwa mrokfom to finji kanjo mfrfnahruhatm htiruhanomm?” Bok dukefmpno rhumom. Ndnetn nd 7-yuk mounmotrhu fumrrpno nd Bro Nkifrar kfo tndh furatamo tndhthu tndh mrokfot nd yiha mfrfnah bugarahm.

kmiroh kingm yak htaruha yuham, nd ndroh profet mrokfom wawand-fatwa.”

11

Hus profetf pthamo mrokfom

1 Yo nd yimam yak hafotyuk yak hafot mis hemoma. Nd yak hafott ehato kfo memoma, “Nd yak hafot mis wayaknikahnn wahta hafottwanr Bro Nkifrarhu temperrri altar. Yo nd temperr lotu hakuta met yindarim wathomnatwanm. 2 Mirahn nd briahako temper rim fnahnit yorhwa kmi kmi rhu rifinywa rifiny swirr rpat ayak hafotanm. Nd tkitr yak trohnikfot. Nd tkit nmbuhar yima tangim kakitohwomr. Kto nd yima tangimn 42 yamm Jerusalemr yihom yahot myahotrahm. Ndnnetn nd tkitr yak trohnikfot.* 3 Nd wan tausent tu handret sikisti (1,260) yiham yima tangim Jerusalemr yakitohruha yihamn, nanhu mrokfo pthayuk hus yimaf kfo tkrurafrhotanf nur dagu nmbiyam hmbrenihato nanhu tu yafothet mrokfot yi kfo ptharahf.”

4 Ndar bbinysoft yakitohwa Bro Nungothetrhu nyingatikko tohwa hus olif tihafi hus lam ginym hatohet lamf to ndef nd hus yimaf. Rofn tohwoft nd tkitt.† 5 Yimam sinyahato mirahm nd yima husf finji ananomf, nd yimam be turoh nohyuk tkitt yirahm. Rofhu tng yuhat mfuna fnahyuk kahtn rim yahot-akrahm. 6 Rof wonk wonk hingrnfroho hingrnayuk bbukefr kakitohwof. Kangf buriohr yak yembindaftahato Bro Nkifrarhu mrokfom afo akfo ptha htfasno, inji narfof. O kangf tek yinham ayak kekutkahtnonm akkupatam o kangf finji finji anakahnonn wonk wonk krhopam bbinysofthu met yindarim ayakm, rof inji narfof.

7 Rof mrokfom kfo ptha htfas hany-ruhafn bi nd hingrneft mhingrna tmbhifft, ee bt tor nd kfe rawofmo muhr tohyuk tndhr fnahato nd yima husfpno nnaknihato tndhr sinyaruharn yejborfarahr nd hus yimaf. 8 Yejborfa htaniruhatruf tufhu Bror washato kihagirimo taunthu bro yihota nafif yuhatn rofhu thatipm htarahmf. Nd taunthu yimam niwa nefm Sodomthu yimam namao nefm kanjo yimam niwatm kuta nhombra kangmt Sodommet yo Ijifthu yimam mrokfo hanyjborna-hato tat yima yuhum yakmoa kanjo nd taunthu yimam niwatm kuta kangmt Ijifet. Inji kuta nhombrewumt nd taunt. 9 Nd hus yimafhu thatipm bro yihota nafif yuhat rhuruhatm husfirpa yihami hafkfot wonk wonk kantrim, yo rpa mrokfoti rpa nkifra tndh mrokfot yakitohet kmim yo wonk wonk yarmumat kfetm yo wonk wonk thetm yihom htini mhtinirahmm. Yo nhai kfo yakioruhatm yimam nd hus yimafhu thatipm yaknihato yopneft. 10 Nd hus yimaf inji nohruhatf bbiny-softhu met yindarim inji hti yindhorr-uhamn kfo mirahm, “O hifa nd yimaf bi was hehurmomf. Rof tohmofn bbinysofthu met yindarim faso faso fak bebhnamofm.” Nd yindhorpampno yemro burwat htahato ye yindhorr-uhamn wuskam tawo tawo yihom nahiyak mnahiyakrahm.

11 Nd husfirpa yihami hafkfot tohnhato Bro Nkifrar tfit ssfoneft tfit hemotrf tfit mfenywjwomofn sinya tohmof. Tuhant yindars inji htimomn

* **11:2:** Yammn 42 yamm kfomom. Rpa rpa yiharoh thomnafat 1,260 yiham. Tfit gunyimm husfirpa yuht gunyimmii hafkfot. Nd mrokfot htikfot Danier 7.25 yo 9.27 yo 12.7. † **11:4:** Ndar veskfothu wom yak tkaf mrokfom htikfot Sekaraia 4.1-5 yo 4.10-14 ee Revelesen 1.12.

tuha yafotha duhatm tohmom. ¹² Nd hus yimaf tohmofn wanyomof wom tngt yura hefenko nakumotf. Nd tngt mfro naku memotf, “Asha yuwa muhfn.” Be nakumotff gribpam fknemofn gribpam hamuhmomf. Nd rof hti dbnotmoa yimam, rom tohhato htiyaf hanymomf rof gribpam hamuhmohat. ¹³ Tu nd rof muh hanyomo fijo bro nunes tonehato taunthu wom kuny rmonm teh tutmottm kunym wuyoh-nafurnyehato 7,000 met yindarim frtasf hmbremotmm nohmom. Nd wom teh fnah hanyukm rom inji hti yakrmi-hato hefenr rhuyuk Bro Nkifrar kfo yuta grha yindhormomr.†

¹⁴ Nd dobir yura mount hta hany-hato kfomo wom kfo wayeye mrokfo nmbuhathu wom krhopam inji rhuni-motm htimoyanm. To wawanyko, mirahko ka be bi tot wuroht. Nhai. Tot tu wuruh kfo wayeye mrokfothu krhopam bi brbohwm.

7-yuk mounmotrhu fumrr fumrmo yuhat

¹⁵ Nd 7-yuk mounmotrhu fumrr fumrmo, ee tfit hefenko wurhuyuk mounmotm mfro kfo ptha rrafo memom, “Ndar bbinysof bugat be bi tfit nmoh Brori yimam nrfa htiyakyuk yimar nmoh Bror yak htamor, be bi rofn ndar yuht bbinysof bugat kakitoh-wotf bi. Be rorn King toh nkifranirahr.”

¹⁶ Yo nd 24 nungohtem sia kingthu nyingatikko rhu htfasmom, bangu myukna rmonmomn bbinysotf mfa wasi bugahato Bro Nkifrar yuta yur boyurhato, ¹⁷ kfo bruttna memoum, “Broye, bro bbuka nanyaret Bro Nkifraye,

ariha tohwo yo bingot ritoh-ngotakmo.

Ni bi bro bbukeft yaknimontn bi kinge.
Ndnetn nom kfo yindhon-wonomn.

¹⁸ Ninhu namburparoh mfnah yihar bi niarotr,

Bro Nkifrarhu mrokfot hik duha yima tangim
inji wanyhato namburwomr.

Arihart bi noheh yimaroh kothu toh yihayer.

Yo arihart bi ninhu hingrna yima profetroh ttha yihayer,
yo nd yufetmi yufapa duha met yindarim
ni duka yakrmihato ninhu yinhit tohwam.

Arihart bi nda bbinysotf yak bebmo yimaroh yak beb yihayer.”

¹⁹ Nd sia kingthu nyingatikko wasi rmonhato kfo bruttnamo yimam kfo bruttna buganimotm ee tfit htimoya hefenrhu temperr tfanyetr rhumor. Bro Nkifrarhu bokis kontrakkfot be tafontn hmbrohnat rhumot. Yo hti-moanr toh fnhur mano yohne mano yohnemour. Tohr yohnemoahat yuht nyungu mirefetr yimour, yo nunes tonemot yo buriohr rpat aiskfotpno rpa fawihnamour.

Satanri rorpno hingrnayuk yimam be inji rpat mibatinimo yuhat

12

(Sapta 12–20)

Jonr metti yarh mugrr htimo yuhat

¹ Yura mounko wuhti hany-moya wom wonk nef mift mfnahmot. Tu yima mfa danyr frtnehyuk nef mfnahmot. Hti hany-moya wom mett marr hmbre hanymotr hmbresham kanjo. Yo yura yamtn wuraf wahtamotf. Yamt

† **11:13:** Nd taunt tohyuk kunym nunes teh tutmom, 1/10 kfot teh tutmot.

nhombramot wura wahtayuk gajis. Yo 12-pela gunyim kraunkfot kanjo mfhat hmbremotm. ² Nd mett bi yonfanett hti hanymoyant. Nd yonfant bi fak yirona hanymott. Yon yak rphamohat nhai tau ttifarmot. ³ Ndt inji htini-hany yo tfit wom wonk nef mift mfnahmot. Yura mounkorrpa tfit wom kkupa fnhuyet yonmari yarh mugrr hti hanymoya. Nd yarh mugrr htimoyanr 7-pela mfhetr, yo 7-pela kraunkfot hmbremor, yo 10-pela inyaru bim mfhat toh htfasmomr.

⁴ Tfit htimoya nd yarh mugrr kinyoft yiho sinyahato mounthu guny moun nmbuhar kinyofe frrasafmotrr bbinysofko yohnemor. Nhai be yuht guny mounr frrasrmorr. Nhai. Be 1/3 kfot frrasmotr bbinysoft yohnemor. Yo htimoyanr nd yarh mugrr nd yon yak rphamoa mettpno brbo tohhato hajoh hasomour. Nd mett hiyauyuk yonrhu yanyeftn toh hajoh hasomour. ⁵ Nd metthu yonfant yon yindarir hiyaumot. Nd yonrn Bro Nkifrar kfomor kingr tohhato kingm yakitohwa miyef kanjoht ain nmbuhar yakitohhato kmi kmim rorhu yinhitn rhukfot. Nd yonr nurnimohat nd yarh mugrr memor ka korhwor yeruhanr, to nhai, Bro Nkifrar tuhafunanimorrn hanymorr tu Bro Nkifrar rhuhato bbinysofthu met yindarim yukatohwako. ⁶ Nd yonrhu hiyau mmemt rot nhaf fakrmenimot. Yakrmayihato yimot tu yima toh duha tkitt. Ndko fak htatahemot rothu yi tohyuk tkitt. Nd tkitt yi toh-mott 1,260 yiham rorhu tirtn rhumot.

⁷ Ee bt tot tfit htimoya hefenr bro yahrt tohmot. Maikerri rorhu mounmotm sinyamomn nd yarh mugrrrhu mounmotmpno mnatuhaknimom. ⁸⁻⁹ Nnahany nnahanymomn nd yarh mugrrr rorhu mounmotm nhai toh bmtarmom. Nnahany nnnahansihato be wom yarh mugrrr rorhu mounmotm mfrna rmonom. Mfrna rmonom Bro Nkifrarhu mounmotm sinyahato nd yarh mugrr yakmorr watumomr. Nd yarh mugrr to tor nd bingot ritohngotakmo tndh Satanr. To rorn ndar bbinysoft tohwa mett yindars frnheh bonhehwatrm fasoh fasoh nefm newum. Bbinysoft watumohat rpat turhu mounmotmpno rpat watumomm.

¹⁰ Nd Satanr watuhafnimotmr tfit yura hefenko wom tngt wanymoyant kfo hany memot, “Nmoh Nkifrar bi nrfa hbhakmornom. Nd rorhu bbukeft bi tafontn htimonomt. Bi rorn king tohowr. Yo yimam nrfa htikyayuk yimar Bro Nkifrar yak htamor, bi rorn kakitohwort ndar bbinysoft. Nd Satanr Kristen met yindarim nayuk tamoh nefenm yudbat yaknihato Bro Nkifrar pno mkfo nuhashemoar be bi yak tumakhato watumorr. Nhai tfit yihof href Bro Nkifrar pno toniyakhato Kristenm nayuk nefm rorn yudbat yaknihato Bro Nkifrar pno hanyakni-ruhatrm. Bibe. ¹¹ Nmoh Kristen bratam nhai turoh bbinysofthu neft dukarmom. Nhai. Rroh dukeft duka memom, ‘Tamohm tfit wom duka yakmeruhanom? Nmoh fasoh nefm bi Jisarr nohhato rorhu kkupamn nmoh fasoh nefm fuk kifsa thumorm.’ Inji dukahato gutnius mrokfot rom tohhato kfo pthamomt, nhai yakrmer-mom nohneft. Inji namomn nd yima Satanrhu kfra inyarut fak nohmomt. ¹² Ndnenn ni hefenn yo niko froh frohko yura hefenr tohyukko, niko yindhorkfot. Yo to ni bbinysofn yo ni marombn nifn dukefmpno warhutwafn! Satanr bi tor bi nifnpno mitohwor. Rorhu yak thuyuk yiham bi brbo-hhnewatm bro namburpampno bi korhr.”

¹³ Nd yarh mugrr bbinysoft watu-motmr tur inji mhti namburnihato nd yon yindarir hiyaumo mett rim hambrak mhambrakmort. ¹⁴ To nhai. Rot bro munngu wondhmborhu birnam hiyafmotmt nd birnam yak-nihato

fafunanimot yima toh duha tkitko. Ndko fak htatahemomt rothu yi tohyuk tkitt. Tri yia sikis mun rroh tirmn rhumot. Ndnnetn nd yarh mugrr nhai finji narmort. ¹⁵ Nd yarh mugrr wom yuhat nhombratihato yakrmanyimott tfit nd yarh mugrr hnu bu rifhut tng yuhat takeyafmotrt nd bu rifhut tone hikmott nd mett. Memor hnut yiruhatn tarhotnirahtt nd mett. ¹⁶ To nhai. Bbinysoft metthu mkuko tohato bbinysofthu tngt nhnamott nd burifhut rotn fut knafmott. ¹⁷ Be nd yarh mugrr nambur kih bugahato tfit yimorn nd mett hiyaumo wom yonmpno memor annayur tinga. Nd yonm to Bro Nkifrarhu boririfhu mrokfom hikhato Jisarhu gutnius mrokfom kfo pthahato hikwa yonem. To nd yonmpno memor yihato annayur tinga. ¹⁸ Be nd yarh mugrr nhom-bratihato tuha maromb thmbthu nungurn toh hasomor.

13

Hus kmi yarh yemrof htimoyuhat

¹ Yo tfit htimoya wom kmi yarh yemror nndo mikrnysik furat yiro tek yuhat mfnah hanyomor. Nd kmi yarh yemror htimoyanr 7-pela mfhetr yo 10-pela inyaru bim toh htfasmomr yo 10-pela kraunkfom hmbremor. Nd kraunkfom Bro Nkifrarhu yufat faso faso riyuta ayuta rindho borindho hanyet yufam hta hanyomm. ² Nd na hti hanyoma kmi yarh yemror, lepat kanjo ruhet yemror hti hanyomoya. Nd lepatrhu wuram bearhu wuram kanjo rhumomr, tngtne laionrhu tngt kanjo rhumotr. Yo ndwom barkof htimoyuhat yarh mugrr, ror yi yaknimorn nd ror yakitohyuk king hingrnefthu hingrnayuk hingrna bbukeft, wom kmi yarh yemror hi hanyomor. ³ Ka nd kmi yarh yemrorhu wom mfhat ka frtekrmotmt nd mfhat nohmot. Nohmotn ka tfit thu nany-jhomotmt mfenyjomot. Thu nany-jhomo tkithu fhu gifarpat rhumot. Ndar bbinysof bugathu yima bugam nd kmi yarh yemrorpno rhumo neft htimohat mrokfo duhatm ruhato rroh dukefm rorparn htahato rorn hikmom. ⁴ Wom yarh mugrr yakitoh-moa king hingrnefthu hingrna bbukeft wom kmi yarh yemror hemo yuhat bbinysof thof bugam htihato nd yarh mugrr to be rroh lotuyuk nkifrar nhombramor. Rorn rihikakhato rilotu-yakmom. Yo ndwom kmi yarh yemror, ror to inji buga yarh mugrr kanjo inji rilotuyakhato kfo memom, "Frohndar kmi yarh yemror kanjo yorhwam? Frohr rorpon nnarfor?"

⁵ Nd kmi yarh yemror yakmo king hingrnefthu hingrnayuk hingrna bbukeft, Bro Nkifrar afo yiham hemorr. Yiham hemotr nd kmi yarh yemror kfo grha sinyahato Bro Nkifrar kfo tfar botfar thumorr. Bro Nkifrar nhai yak tongnrnor. Be tombn marsisa-motr 42 yamm hemotr rorhu nefm namor. ⁶ Bro Nkifrar kfo tfar botfar-morr; yo Bro Nkifrarhu yufat, yo rorhu kmit, yo rorpon hefenr tohwa yimam faso faso kfo rindho borindhomorm. ⁷ Bro Nkifrar kfo yakiomotr nd Bro Nkifrarhu met yindarimpno nnamohat rorpar sinyahato yiho hathumorm. Yiho hathuhato rorn king tohato rorhu yinhitn toh bugamom ndar bbinysof bugathu kantri bugam yo wonk wonk mrokfot kfet kmiya-kmim, yo wonk wonk thet kmiyakmim. ⁸ Ndar bbinysof bugathu yimam nd kmi yarh yemror loturahm. To fitoh fitoh yimaroh yufam korhm nd toh nkifraniyuk yimaroh yufam yorhwa rfa borngtn, nd yimarpam nhai nd kmi yarh yemror loturuhatm. Bro Nkifrar mounti bbinysoft tafi hingrna hta duha nd yimaroh yufam bi rhumom nd

rfa borngtn. Nd yimaroh yufam yorhwa rfa borngt, to nd wasmo Sifsif Yonrhu rfa borngt.

⁹ Yimbhingangeteko, ndar na kforuha mrokfot wawanyawako: ¹⁰ Bro Nkifrar bi kfir wom Kristen yimar kalabus yinyeft, nd yimar kalabus kitr. O wom Kristen yimar Bro Nkifrar bi kfir bainate tmbhoneft, nd yimar bainate tmbhiwumr. Ndnnett Bro Nkifrar pno tohyuk met yindarim bi ndhtet nefm mfnahwatm htitwomm, nd met yindarim toh bmtahato Bro Nkifrar yakitoh kihkfot.

¹¹ Yo tfit wom inyaru bi hatohet kmi yarh yemror hti yak hanymoyanr yiro bbinysof yuhat mtabbo fnah hanymor. Sifsif yonroh bim kanjo hus bif tohmofr mfhat. Tng ptheftne yarh mugrrhu tngt fakmor. ¹² Nd bbinysof yuhat mfnahyuk yarh yemror to be ndwom maromb yuhat mfnahyuk yarh yemrorpno mtihaknimor. Womr inji htihatoto be nd ror hingrna hasoyuk hingrnfethu hingrna bbukeft nafak nhtamoft. Nayak nhtahato ndar bbinysofti bbinysoft tohyuk met yindarim kfo tkrurmorm ndwom tek yuhat mfnahyuk yarh yemrorhu lotu-neft. To rorn mfhat frtekrhato nohmotr tfit yak nanyjhoyafmotmr tfit sinyamor. Yak nanyjhom tkitthu fhu gifarpat rhu hanitt. ¹³ Nd bbinysof yuhat mfnahyuk yarh yemror wonk wonk mirakerm hingrnamourm. Met yindarim toh fukatoh hanymom wom bro mira-kerkfot hingrnamort. Yura hefenko wukfomotr kaht yura hefen yuhat wuyohninehato bbinysoft misuhmot. ¹⁴ Bro Nkifrar kfo yakiomotr wom barkof mfnahyuk yarh yemrorhu nyingampno nd wonk wonk miraker-kfot hingrnamourt. Bbinysofthu met yindarim yuwi nd mirakerm hingrna nheh bonhehmourm. Met yindarim kfo memorn, “Nd bainate mfhat frtekrafhato minohafno yemror watht nhombrakahkonn ndr wakfo yindhorr grhatwako.” ¹⁵ Nd yemror tth nho-mbranimotmr tfit Bro Nkifrar kfo yakiomotr nd bbinysof yuhat mfnah-yuk yarh yemror sinyamorn nd tthmo yemror ssfoneft hemotrr tngetr ruhato pthamour. Yimam lotu duha yimourr, wasmourn.

¹⁶ Nd bbinysof yuhat mfnahyuk yarh yemror kfomotr tirmifkorhof tir gramtipnm makm hta hanymomm o womnam nyimbikmn hta hanymomm. Nd yima fura bofuram o yufetm, maru wuss yura ruhetm o yima furapam, slefm o toh furet yimam makm hta buga hanymomm. Nhai womr rim tohtarmor o womt rim tohtarmot. ¹⁷ Yimar o mett nhai ndhtet yarh yemrorhu yufat o rorhu yufathu nam-bakfot htarfomr o htarfomt be nhai nd yimar o mett wuska wiknakfot o wuskam rorpo o rotpon yimam yihato wuska wiknaneft. ¹⁸ Nd nambakfothu yimbu yuhat be nhai wom yima furar yakruhattr. Nhai. Nd nambakfot wom yimarhu nambakfoyet ndnett yimar tu yima duka tunguneter, nd nambak-fothu yimbu yuhat hti nhtahato yak-kfot. Nd yimarhu yufathu nambakfot 666 nambakfoyet.*

14

Sifsif Yonrppo tohmo met yindarim

* **13:18:** Bingot Hibru mrokfoti Grik mrokfot wandfamohat nhai nambakfot htarmoam. Nhai. Nd rpa rpa letakfom ndm htamoum nambakfot. Reta ‘a’ kfot ndt rroh namba 1 kfoyet. Reta ‘b’ kfot namba 2 kfoyet. Inji hingrna hikmoum. Barkof letakfot ritimaknikfot barkof nambakfotpno. Nd namba 666 kfot bok bro duka tungunet yimam bok dukefom kfomomt nd namba 666 kfothu yimbu yuhat. Bok duka tungunet yimam yak nhtamohat kfo memorn, Jonr ka Sisar Neror kfomor. Rorn Romroh kingr tohato Kristenm rorn fak beb bobebmorm.

1 Tfit wufukatohmoyanko, wuhtimoya Sifsif Yonr yura Saionrn wu-tohmr. Rorpno 144,000 met yindarim wutohmom. Nd met yindarim bi nd Sifsif Yonrhu yufati nd Sifsif Yonrhu Yifemrhu yufat bi rroh nyimbikm rihtamomm. 2 Yo tfit yura hefenko wom mir nadidarefm wanyak-moyanm rim mirta mmirtamoum. Womnam bhur mir nadidarwa kanjo inji wany mirmoa, yo tfit womnam tohr nyungu mirwa kanjo inji wany mirmoa, yo tfit womnam yimam gitampno win-dohwa kanjo inji wany mirmoa. Inji inji wany mir bomirmoa. 3 Nd yimam windohmom, Bro Nkifrarhu sia king-kfothu nyingatikko yo husfihus foh nunga kanjo ruhet shrirroh nyingako yo nungothet yimaroh nyingako mtoh hanyhato nfri windohr fakmomr. Nd windohr nhai wom yima furam tawi-safmromr. Nd tu 144,000 met yindarim bi Jisasrhu kku futn yak nhafo-hetm, romrpm nd windohr tawisaf-momr. 4 Nd yimam nhai bi metmpno hwihato bi metm tahifatrmomm. Nhai. Tu dborioh yimam fakmor.* Fitoth tkit tkitm Sifsif Yonr yinyeft, nd yimam wuhik ahikwomr. Nd yimam ndar bbinysoftu yimampno toh hasetmn Sifsif Yonrhu kku futn yak nhafohmottm be bi tom tufhu wurampno brbo toh tkafyuk met yindarim. 5 Rom nhai wom yiha kfo nneh o kfo furawonrmom. Nhai. Rom be tu nhai wom mrokfen duhatem.

Husfirpa mounmotm kfo pthamo mrokfom

6 Yo tfit wom mounmotr htiaf hanymoyanr buha mount fafuna hanyomor. Wom tu yafothet mrokforoh kfo pthaneftn yafuna hanyhato mrokfom kfo ptha nuhas hanyomr ndar bbinysoft tohyuk yimam, wonk wonk kantrim, wonk wonk kmiya-kmim, wonk wonk thetm mrokfo mrokfom kfo nuhas fnahmorm. 7 Kfo hany memor, “Nd kfohna kfohnamo yihar be bi niaror, be bi Bro Nkifrarhu kot yakitohhato yimaroh kot toh yihayer. Ndnnetkonn niko Bro Nkifrar duka yakrmi hanyhato rorhu yufat kfo yindhohr grhakfot. Bro Nkifrar niko lotufkot. Rorn hingrnamorm hefenr, bbinysoft, marombt, ee nd rhu htfaswa bu yinham.”

8 Tfit htiaf hanymoyanr wom mounmotr womr fafuna hik hanyomor. Nd mounmotr womr yafuna hik hanyhato kfo hany memor, “Bro taun Babilont be bi wuyoh nafuryakhato wahtamot! Be bi wahtamot! Nd taun Babilonthu nas hohodeft tuhant yindars mhti wofnnihato yimam me-mome yukuteh yiramn brnewum.”†

9 Yo tfit wom mounmotr fafuna hikmorf wom husf. Rorn yafuna hanyhato kfo hany memor, “Fitoth yimar nd yarh yemror yo nd yarh yemror tth nhombra htayet yifonr, ndrnr lotuhato makkfot nyimbiktn o tir gramtiptn htemr, 10 nd yimar Bro Nkifrar yak tkrurruhatr wainpam yerahr. Nd wain bupam to Bro Nkifrarhu bro krho namburpayem. Nd yarh yemror lotuyet yimam tengit wunaruha nambur bupayem. Nd yimam be tu yiro sarfa

* **14:4:** Grik mrokfotn kfohatt nd metmpno yihato metmn tahifatneft. Tfit bro duka tungunefet yimam duka memom nd kfo nhombra mrokfoyet. Yimam Bro Nkifrarhu nefm hik marnyahato nhai fasoh nefm na duhakahm, tom nd yimam nd mrokfot kfoht. † **14:8:** Jonr ndar gonborngt wandfamohat bro taun Babilont bi yohne buga-niyetn ndar gonborngt wandfamort. Ndnnetn bok duka tungunet yimam kfo memom nd Babilonthu mrokfot nhai tu Babilon mift kformor Jonr. Be nd Babilont tohmo yimam namao fasoh fasoh nefm, ndm yakhato wom kantrim fasoh nefm nahato Bro Nkifrar hti namburwa nmbuhatn kfo rhtimor. Womm kfo memom ka kantri Romr kformor (htikfot 1Pita 5.13 yorhwa mrokfot). Yo womm duka memom nd Babilon yufat kfo rhtimort Kraisri rorhu sioskfot yimam hti namburwa yuhatn.

tahim yukrwa bro kah rifhut yirahm. Bro Nkifrarhu mounmotmi Sifsif Yonr yukatoh hasorahmm nd bro krhopam yimam yak thoft. ¹¹ Yo nd yimam krhopam hiruha kah hip rifhur, be inji nd kah hip rifhur yiha yiha toh haso-rah. Nd yimam nd yarh yemrorhu makkfot yaketm yo rorhu ruheft tth nhombramo yifonr lotuyetm rroh krhopam nhai yihom tohaf hanyruhatm. Be inji yihof href yifung marm krho-pamn toh hasorahm.”

¹² Ndnnettnd ndhet yihar Bro Nkifrarhpn bi rim tohnihto Bro Nkifrarhu boririfhut hikhato Jisasrhu mrokfom hiket met yindarim, Jisasrpn frtkaf kihhato toh bmtakfot.

¹³ Tfit wom tngt yura hefen yuhat wanyakmoyant kfo hany memot, “Wom mrokfot wawandfa wamitwa, ‘Ariha tohwa yimam yo kto tohruha yimam Bro Jisasrpn frtkaf kihhato mfnohm ayindhortwam.’ Yo tfit Bro Nkifrarhu Yafothat nd mrokfot kfo yakio memot, ‘Uwa, ndt tu kfoyet. Ayindhortwam. Nd yonmari yonmari hingrnefm rom hingrna minysaf hasiwami krhopam toh hasiwam myak hanihto mrhu witarahm. Rom kot mtoh thoft nd tum nahnayuk dboriok nefm tohnhorahmm.’”

Bi bbinysofthu yewuri yak yibon yihayer

¹⁴ Yo tfit fukatohmoya, htimoya ganyom gribpam. Nd gribpamn yima mif thet yimar nd gribpamn rhumor.† Gor kraunkfot mfhatn tohwot. Hanku namburet karoht tirtn tohwot. ¹⁵ Yo tfit htihak hanymoyanr wom mounmotr hefenr yorhwa temper yuhatn yarim fnahnamor. Yarim fnahnehato nd gribpam rhuyuk yimar mfro kfo tkrur hany memorr, “Bi yewuri tmbho yibon yihayer. Yewuri tmbhoyuk karoht wayakkahnn yewurim watmbhaktwann.” ¹⁶ Be nd gribpam rhuyuk yimar yewuri tmbhoyuk karoht yaktho bbinysofthu yewurit tmbhak-nimort.

¹⁷ Yo tfit nd hefenr yorhwa temperr rhuyuk wom mounmotr yewuri tmbhoyuk wom namburet karoht yaknehato fnahnamor. ¹⁸ Yo tfit wom mounmotr yura hefenrhu altatpno toh tanyhato yarim fnahnamor. Nd altathu kaht to rorn kukatoh hasomourt. Ror sinyahato ndwom namburet karoht yakitohet mounmotr mfro kfo memorr, “Bbinysofthu wain suhm bi huktewann bi yak yibon yihayer. Ndnnettnd nd ninhu namburet karoht wamyak-nikahnn nd wain huk dmm watmbho rmon hanynm wom tkittn.” ¹⁹ Be nd mounmotr wain dmm hok tekarak hanyuk karoht myaknihato yohnemorn nd wain suhroh wain dmm hok tmbho hok tmbho hok tmbho rmon buga-mormn tfit wain yukha yahot tkbotk-yuk tahiye hingrnyet tenktm kmbre rmon bugamorm. Nd wain yukha yahot tkbotkyuk bro tahiye hingrnyet tenkt Bro Nkifrarhu namburpayem. ²⁰ Nd wain yukham yahot tkbotkyuk tahi tenkt nhai yiro tauntn hingrna htarmomt. Nhai. Briyaha kmi gna thmbefkorn hingrnamotmt btn nd wain yukharoh kku bus tone yakitoh-mohat wom tkitt frkamt bugamott. Nd kamtmo tkithu yuke rifm 300 kilomita. Yo yima toh nhombranefit yengongfatpno mtohkfot. §

† **14:14:** Danier 7.13 yorhwa mrokfot htikfot. § **14:20:** Bok yimam ndar Bro Nkifrarhu rfa borngroh mrokfom hti hik bohikwa yimam hti hikhato duka memom nd kfomo taunr, Jerusalemr kfomot. Yo nd kkut tonemo kilomitakfot, Grikk mrokfot htamom 1,600 stadia. Tfit nmoh yuteftn 300 kilomitakfot. Ndt be inji kfiwunom, nhai tu tawisaf marnyakahnom nd Jonr kfomo 1,600 nambakfot ka 300 kilomitakfotn kfomor o nd 1,600 nambakfot wom dukeftn nd nambakfot htamort.

15

7-pela mounmotm yakitohmo 7-pela bro krho nmbuham

¹ Yo tfit wom bro neft yura hefenko wuhtimoyant. Na nd neft wuhtimohat yafotha duhata rhumoya. Htimoya 7-pela mounmotm tuhan yindariroh hayuk 7-pela krhopam fakitohmom. Tom tu wuruh krhopam tuhan yindarim yakruham. Nd krhopamn Bro Nkifrar met yindarim he tingniruharn rorhu krho yima yuhur mirhurahr. To nhai tfit wom krhopam tfit wom htaruhatm.

² Yo tfit htimoyant wom bro shrt, memome glaskfoti kahtpno hinger-nayet marombet. Yo nd met yindarim nd yarh yemrorhu yufat nyimbikm hta duhatm yo rorhu ruheft tth nhombramo yifonr lotu duhatm htimoyanm nd glaskfoti kahtpno hingrnamo maromb thmbtn Bro Nkifrar hemo gitam yakitohhato tohmom.* ³ Yo Bro Nkifrarhu hingrna yima Mosesr, yo Sifsif Yonr wandfa-hato windohmo windohr ndr fakmom. Nd windohr inji yimor:

“Broye, ni tu hta nngrajohet Bro Nkifraye.
Ni tu wonk bbuket hingrnefm hingrnewun.
Nom inji hti thoft mfham danyr frtnehwom.
Kmiyakmiroh kinge.

Ni nhai wom nefenr rim hta mhtakahnr o kfo furakahnr. Nhai.

⁴ Broye, ninrpa tahi toht tohwo.

Ndnetn tuhan yindari bugat ninrpa yakrmihato,
nirpanhu yufat yutahato kfo grha yindhorkfot.

Ninhu dborioh dborioh nefm tafont yorhwatm kmi kmim htihato,
ndnetmn ninrpanpo yihato loturahm.”

⁵ Ndm inji htiyafoni hany tfit hefenrhu ser kuny rmonthu tu Nngrajoh Hnaru Gnanhehr bi tfanyetr hti hany moyanr. ⁶ Nd 7-pela moun-motm met yindarim yak bebyuk 7-pela krhopam yakitohetm nd rmonthu tu Nngrajoh Hnaru Gnanheh yuhato toh tanyhato fnahnamom. Nd mounmotm tu banuhah ganyom fnhu ganyomet rmontham tabuhtanehato yarim tohmom. Yo gore hingrneyet let bando tham mondm nyuh dbkafnamom.

⁷ Nd foh nunga kanjo ruhet husfihus shriroh womr, 7-pela dis gorm yakmormn nd 7-pela mounmotmn hemor. Nd dis gorm nd toh nkifraniyet Bro Nkifrarhu krho namburpam furkih-momm. ⁸ Nd 7-pela namburpam ruhet dis gorm 7-pela mounmotm hemotr nd tu Nngrajoh Hnaru Gnanhehr Bro Nkifrarhu nuka bbukeft thu dbothat-motr hipeft kanjo. Nd bro nuka bbukeft tu Nngrajoh Hnaru Gnanhehr yakmohat nhai bi yimam fknenikfot. Afo nd 7-pela mounmotm yakitohyuk 7-pela namburpam ruhet dis gorroh hingrneft bi hingrna buganimte ee btn yimam fknenikfot.

16

Bro Nkifrarhu namburpam ruhet 7-pela dism yak nengotafmo yuhat

¹ Nd 7-pela namburpam rhumo dism mounmotm yakitohhato tohmotm tfit tu Nngrajoh Hnaru Gnanhehrpno wom tngt wany moyant kfo hany

* **15:2:** Bok mrokfom ndar saptakfot yorhwam htirahnM Mosesrhu tndh mrokfom kanjo. Mosesr Isrerm Ijift yaknihato Bro Nkifrar kfoyk kmiko hany mohat, Ijif thofm bok krhopam yakhato Isrerm fafuhafmomm. Yo Isrerm bro marombt rim rhu mrhuhato buha yau hayuknimohat, mano tek thmbko rim tohhato Mosesri Isrerm wom windohr yakhato Bror windoh yindhormomr. Nd tndh mrokfot htikfot Kisim Bek 15.

memotm, “Nd niko yakitohwa 7-pela namburpam ruhet dism bbinysofkorn wayak nengotafkomm.”

² Be nd mounmotm inji wanyhato barkof mounmotrhu krhopam ruhet dis fak tengotafmotrt bbinysofko fawihnamot. Nd krhopam yak tengotafmotrm bt nd yarh yemrorhu mak-kfot htayet yimam yo rorhu ruheft tth nhombromo yifonr lotuyet yimam wonk wonk hunt, kutt, nhai kuken-hato yakrmotm.

³ Yo tfit husyuk mounmotrhu krhopam ruhet dis yura bro marombtn fak nengotafmort. Marombtn yak nengotafmotrt, nd yuht marombt noheh yimaroh kkut kanjo fnhu bugamot. Be nd marombt rhuuyuk tamoh tamoh noh dborha witamot.

⁴ Yo tfit husfirpehyuk mounmotr yakitohyuk namburet dis bro bro tekmm yo bro tek yinhamn fak tengotafmor. Be nd bro bro tekmm, bro tek yinham kkupata bugamom. ⁵ Yo tfit nd tekmm toh yukatohwa mounmotr wanymo-yanr kfo hany memor, “Bro Nkifraye, ariha tohwo yo bingot tohmo. Ni tahi toht tohwo. Ni niwa nefm tu be kak hik marnyewunmm, yo tu dborioh dborioh mife. Nd yimam ni bi tunn rhuhato hti yimbu hik bohikhato ni kfiwohat rroh krhoparoh yakneft nhai faso kfo bebkahn. Nhai. ⁶ Nd yimamn ninhu profetm yo ninpno tohyuk met yindarim wasmomm. Ndnnetn tawo kkupam bi yahukatnm bi tum futwomm. Bt asom afo agnngtatm.” ⁷ Tfit alat-pno wom tngt mfnah hanyhato kfo hany memot, “Broye, ni tu hta nngrajohet Nkifraye. Ni tuhan yindarim yak gngngtatwohat rroh nefm hti nhata-hato hifa kak gngngtat twanhiwunmm.”

⁸ Yo tfit husfirpehyuk mounmotr yakitohmo dis, marrn tengot wuna-motr, marrhu nukeft Bro Nkifrar mfro hip rifhur hemotr marr kahm kanjo tagunahato yimam kandhi guna wurasohmorm. ⁹ Nd marr nukeft mfro tagunahato yimam kandhi guna wurasohmotrm Nkifrarhu yufat faso faso riyuta ayutamomt. Nd Nkifrar, ror tu bro bbuketrn rorn kakitohworm nd yimampno yorhwa krhopam. To rom nd nefm htimohat to nhai tfit yima yuhum yak kekuthato Bro Nkifrarhu bro yufat tfit kfo yindhor grharmom.

¹⁰ Tfit namba 5-yuk mounmotr yakitohmo dis rhumo krhopam yarh yemrorhu sia kingkfotn fak tengot wunamor. Be nd yarh yemrorhu kingdomkfot yifungt rhumom. Nd yifungt yo nd yimam bi yakmo krhopam yo hunti kutt htihat kusmm ridbfa hatohmom. ¹¹ Nd rom yakmo krhopami fhum htihat Bro Nkifrarhu yufat faso faso riyuta ayutamomt. To rom nd krhopam htimohat to nhai yima yuhum yak kekutrmomm.

¹² Yo tfit namba 6-yuk mounmotr yakitohmo krhopet dis bro tek Yufretisn fak tengotafmort. Yak tengotafmotrt marr yuwa muhwako tohyuk kingroh niayuk yuhat dukahato nd tek Yufretis mikna domtnimot. ¹³ Yo tfit hti hanymoyann husfirpa yafotha bebm kukam kanjo fnah hanymom yarh mugrrhu tng yuhat yo maromb yuhat mfnahyuk yarh yemrorhu tng yuhat yo giaman profetrhu tng yuhatn.* ¹⁴ Nd husfirpa yafotha bebm rom mirakerkfom hingrnahato ndar bbinysoft yorhwa kantriroh kingmpno yi htfas bugewunmm. Kangm yi htfas-hato kantri kantriroh

* **16:13:** Nd giaman profetr to nd bbinysof yuhat mfnahyuk yarh yemroyer. Rorn wom maromb yuhat mfnahyuk yarh yemrorhu profetr tohato tuhan yindarim kfmorm nd maromb yuhat mfnahyuk yarh yemrorhu piksa yifonrhu lotuneft. Wom mrokfo nmbuham htikfot Revelesen 13.11-16.

kingroh amikfot yak nhafohhato romn hasinyarahmt bro nnayureft tuhan yindariroh kotkfot tu hta nngrajohet Nkifrar yakitoh thombat.

¹⁵⁻¹⁶ Be nd yafotha bebm nd kingm yaknimomm hanymomm wom tkittn, Hibru yarmumat nd tkitt kutewumt Armagedon.[†] Tfit Jisasr kfo memor, “Wawanyko. Na be yudbat rikoh yima kanjo hti fohtasakrahkma. Ndnetn yimam duka tungunefmpno rroh wuskam fak hta kebirs marnyahato tu yimampno rhu tkafmm, be nhai tuhan yindariroh nyingampno sfno bumbom-brohm rhuhatu yimtnaruhatm. Nhai. Bro yindhortpno rhu-rahm.”

¹⁷ Tfit namba 7-yuk mounmotr yakitohmo krhopam ruhet dis yura mountn tengotmorf. Ndtppo tu Nngrajoh Hnaru Gnanhehr rhuyuk sia kingtpno wom tngt mfro kfo hany memot, “Be bibe. Bi asom wuroh namburpam.” ¹⁸ Yura mountko toh fnhum mano mano fambohritnamom, tohr wuyohnina wuyohnina wathu rbigmor, yo bro nunes rot mirefett tonemot. Nd nunes tu yonmari nunes tonemot, nhai ndhtet wom yiha bi tonewonrmot. ¹⁹ Nd yonmari taun Babilonr buha buha yoh bohrhato husfirpa nmbuham rhumom. Kmi kmiroh kantriroh taunm nunes teh tutt hanymottm yohne hanymom. Bro Nkifrar dukakmorm bro kmi Babilonrhu fasoh fasoh nefm. Dukakhato nd Bro Nkifrarhu krho namburpet wain kaft yakhato hemotrr fiyakmor. ²⁰ Marombt buha hir hanyuk kmi yumbm yohnemotm hti hambrafmomm, yo nhai wom kminyinsofm wom rhurmom. ²¹ Yo yonmari ren ais fawihnamot. Nd yawihnamao ais tpim nhai krho tefirmom. Nd ais tpiroh krhopam 50 kilogram kurhet ais tpim fawihnamom. Bt nd ais tpim wuyohnina wuyohnina yimam mirbigmoahat nhai yimam hamuhrmoam. Yimam be mir hawohne twanhomom. Ndnetmn Bro Nkifrar faso fasoh kfo rindho borindhomomr.

17

Ijoh tonayet metroh mmemt

¹ Nd 7-pela mounmotm 7-pela krhopam ruhet dism yakitohmoroh womr nanpno niahato mkfo memora, “Wania. Waniekahnn wahtitwant nd tekmpno yorhwa ijoh tonayet metroh mmemt. Waniekahnn wahtitwa nd mett finji finji naruhoant. ² Bbinysofroh kingm yima yuhum tohakmoahat to be nd mettpno yimom.* Yo ndar bbinysofthu yima bugam yima yuhum tohakneft to be nd mettpno yimom. Nd mettpno yimoamn rothu pam ye hmbremomn rothu mumeft fak hikmom.”

³ Bro Nkifrarhu Yafothat tuhafuna-nimota hanymota yima toh duha tkittn. Nd yima toh duha tkittn wom mett htimoyant yura kkupa kanjo fnhuyet yarh yemrorn yura mrhumot. Nd yarh yemrorhu that wonk wonk yufam wandfamomr. Nd yufam Bro Nkifrar kfo thir yo kfo rindho

[†] **16:15-16:** Nd Armagedon yufat to “Megidothu bro kminyinsofet.” Bingot yahr kmim nnat yihato to brbo taun Megidotpno king Josaiar wasmomr. Nd Josaiarhu tndh mrokfot htikfot 2 King 23.29-30 yo 2 Stori 35.20-24. Tfit Bro Nkifrarhu rfa borngthu mrokfom hti hik bohiket yimam kangm nd Armagedon yufat nhai tu be Megido yufa mift kfoakaht. Nhai. Kangm nd yufat be yura mrokfoyet. Ndt kfo kangm nd yufat nnaruha tkithu yufayet. Nd kmim nna hanyhato amim be bafinat wundiati yirahm. *

17:2: Kingm yima yuhum tohakhato nd mettpno yimoahat nhai tu ijoh tone mif neft kfoakaht ndar mrokfot. Nhai. Yimar Bro Nkifrar mhikakni yo tfit yafonihato tfit wom nkifrar mhikakni injina fnahwohat yo wonk wonk nefm nafnahwohat, ndt Bro Nkifrarhu nyingam hitwort ijoh tonitwa kanjo. Yimar wom mett yakni tfit ndt htanyhato tfit wom metmpno hwe htfaswa kanjo inji Bro Nkifrar hitwort.

kanjohot yufam wandfamom. Nd yarh yemror 7-pela mfhami 10-pela komm tohwomr. ⁴ Nd mett kwinm hmbrita hmbresha kanjo fnhuyet hmbresham hmbremot. Nd hmbresham wonk wonk gort, yo mfro fnhuyet biskfot yo dborioh tahiye wondh marnyet wondht hembonginamomm nd rot hmbremo hmbresham. Yo gore hingrnyet kaftn tirt fakitohmot. Nd rot yakitohmo kaft wonk wonk yafotha duha yafotha duha hnomha nefm yo fasoh fasoh ijoh tonayet nefm furkihmomt. ⁵ Nd metthu nyimbiktn wom mrokfot inji htamomt, “Bro taun Babilont be tu ijoh tonayet metroh mmemet, yo ndar bbinysoft yorhwa hnomha nefroh mmemet.” ⁶ Yo htimoyant nd Jisasr hiket met yindarim wasmo mett tfit rroh kkut yakhato yamotn spak yimam kanjo mrokfom hus bok yimotm. Nd mett namo nefn na htihato tuha mrokfo duhata rhumoya.

⁷ Tfit mounmotr tohato kfo ttiwon memora, “To ni tamohmpno mrokfo kfo duha yorhwa? Afo wawanyswa nann kfo wutha nuhasruhann nd metthu ruheft yo nd rot hatonita 7-pela mfhami 10-pela inyaru krinsyiket yarh yemrorhu ruheft. ⁸ Wawany. Nd ni bi htitawo yarh yemror afo tohmour. Tfit ariha nd yarh yemror nhai wom tohkahr. To tfit nd yarh yemror nd kfe rawofet bro muhr htany-hato fnahnerahr. Be nd yiharne tot wuroh htite be wundiat hti hambrafrahr. To nd yarh yemror tfit wompam mfnah tany shombat, to nd yimaroh yufam toh nkifraniyuk yimaroh yufam yorhwa rfa borngt rhu duha yita yimam tfit nd yarh yemror wompam tfit hti thombat tfit bok dukefmi yakrahm. Nd yimam Bro Nkifrar mounti bbinysoft tafi hingrna hta duha nd yimaroh yufam nhai rhurmom nd rfa borngtn. Rroh dukefmi duka mirahm, to ndar bi nohnyet yarh yemror tone fitoh yuhatn yak dborha-naror? Bok dukefmi inji yakrahm.

⁹ Duka tunguna marnyetr ndar kfiwa mrokfom yima yuhum yakrahm. Nd yarh yemror hatohmo 7-pela mfham ndm 7-pela kmi yorgm nhombrewum. Yo mett nd kmi yorgmpno yura korhwot.† ¹⁰ Yo nd 7-pela mfharmpam ndm to nhaf 7-pela kingmn toh nhombrewum. Nd 7-pela kingm wom 5-pelakfot bi king yufat tohmomt, yo 6-yukr bi tohwort, wuroh 7-yukr tafi. Nd wuroh 7-yukr king yufat yakhato toh thombat be nd hingrneft nhai bok yiham tohruhatrt. ¹¹ To nd yarh yemror bingot tohhato tfit ariha toh duha yitar, ndr to tor nd 7-pela kingroh wom kingr. Nd king yufat yaketroh thomnafat rorn 8-yukr kingr tohrah. Ror king yufat yaknihatone be wundiat hti hambrafrahr.

¹² Yo tfit ndwom 10-pela komm rorhu mfhat hatohwom, ndm to nhaf 10-pela kingm toh nhombrewum. Ndm afo tafi king yufat yakhato tohrmom. Kto rom to king yufat yakhato tohrahm. King yufathu tohyuk kfo yakio mrokfot hiruhatmm nd yarh yemrorpno be wan auakforpat king hingrneftu yufat yakitoh tefirahmt. ¹³ Nd kingm rpa yima yuhurpar rhuruhamn nd rroh bbukefmi yufam nd yarh yemrorpar trohhirahm. ¹⁴ Be nd kingmi yarh yemror rpat nathu hmbrihato Sifsif Yonrpno nnarahm. Nna hanyruhamn Sifsif Yonri yimam ror bi nakuyakhato rorhu yufat htahato rorppno tohwam, rom rpat sinyaruhamn yiho hathurahmm nd kingmi yarh yemror. Sifsif Yonr, rorppar nungothetroh tu Nungotheter, yo rorppar kingroh tu Kinger.”

¹⁵ Yo tfit wompam mounmotr kfo memora, “Nd ijoh tonayet mettpno yorhwa bro bro tekem to wonk wonk kmiyem yo wonk wonk thet kmiyem

† 17:9: Bro kmi Romr 7-pela kmi yorgmpno hingnamomr.

yo wonk wonk mrokfot kfet kmiyem. ¹⁶ Yo nd ni htimo 10-pela komm, nd kommi yo yarh yemror rpat nathu hmbriruhamn nd ijoh tonayet mett hti dnotrahmt. Gobenm kanjo htirahmt. Nhai hifa nyingar htaruhatmt. Rothu wuskam yak rhoptakhato faso faso yak beb hakurahmt. Rot hatohyuk hmbresham yak taborhoh tuhruhamt brio sfnoht tohraht. Nd mett ye nyimbofiohakruhamt yuhut yimat kandhi tountuhrahmt. ¹⁷ Bro Nkifrar yima yuhum hiruhatrm nd 10-pela kingm, nd kfiwa nefm narahmm. Nd nefm rom naruham to bingot bi Bro Nkifrar kfo htatamo nefm narahm. Nd kingm rpa yima yuhur tohhato nd rom yakitohyuk king yufat yarh yemrorpar hiruhatom rorn nd king hingerneft yakitoh hanyruharn bi nd Bro Nkifrar kfo htatayuk mrokfot bi mfrfnahnet, ee btn Sifsif Yonr yiho hathurahrr. ¹⁸ Nd mett ni htimot to ndar bbinysofthu kmi kmiroh kingm toh yukatohwa bro taunet.”

18

Yonmari kmi Babilont yohnemo yuhat

¹ Yo tfit wom mounmotr yura hefenko wutoh tanymorn fawihnamor. Nd mounmotr tu bro bbukeft yakitohhato rorhu wondhthu fnhuyeft bbinysoft yakmohat yuht bbinysoft fnhu bugamot. ² Nd moun-motr yawihnehato kfo ptha bro memor, “Nd yonmari nanyjar hasomo kmi Babilont be bi finyk brom kanjo wuyoh nafuryakhato wahtamot! Be bi wahtamot! Nd kmit be bi yima duhattn nd kmit bi tfit yafotha bebm tohhato ye wussohwa kmiyet. Nd yafotha bebm, hnaru nungam, yo nd fasoh nunga pira bebobeht ndha rhu hasiwum. ³ Nhai be sfno nd yonmari kmit yohnermot. Tutn yima yima he htfasmot. Rothu thatipt wain buroh-roht kanjo yima yima thu hannamotm. Ndar bbinysofthu kingm yima yuhum tohakmoahat to be nd mettpno toniyak-moum. Yo ndar bbinysofthu bisnismanm, Babilont kfomot yonmar yon-mari bisnismanm tohmom. Babilontpno rroh bisnis hingernefm hingernameohat maru yihotam hifa yi marnyamoamn bro bro marut yakhato bro maru kunyetm rhumomn hifa rhu nmbuhaf fakmom.”

⁴ Yo tfit wom nddoh tngt yura hefen yuhaf wanyakmoyant. Nd tngt kfo hany memot, “Niko nanhu met yindariko nd kmit wahtanykahkomt wafnahnako. Mirahko rot niwa fasoh fasoh nefm tha ahtanom. Rot niwa nefm niko tha htarahko, to be rot yakyuk krhopam niko yaknhorahkomt. ⁵ Rot nahniwa nefm bi kangm kminy-sofem. To nd rothu rpa rpa nefm bi Bro Nkifrar kakitohworm. Rot niwa nefroh krhopam yak nhombra buga-rahtm. ⁶ Nd mett finji finji namotko, tawo Bro Nkifrar inji inji narahr. Rpa krho nmbuhaf hemotko, tawo Bro Nkifrar hus krho nmbuhaf hirahr. Hus krho nmbuhaf namotko, tawo Bro Nkifrar tthak tthak tu krhohato bro krhopam hirahr. ⁷ Nd mett hifa hifa dborioh rhu nmbuhaf rhuhatu tuthu yufat be yura yura htamott. Ndnnett tu krhohato Bro Nkifrar krhopam hiruhatrt nurniruhatn gngtatraht. Tuthu dborioh rhu nmbuhaf htihato kfo kangt, ‘Na mirahko ka met furaya. Na, na kwina. Kwinann kwinroh gajis korhwa. Na, na nhai yindariyetann btn yindarir nohruhatr nurrhoya. Nhai.’ ⁸ Nd Babilont tuthu yufat yura htaruhatt ndnett be rpa yiharpa wonk krhopam mano mano, mano mano yakaknerahmt. Mano dbohneft nierahnt, ndtpno mano yimam noh hanyrahm. Miraht ka be ndrpayet, tfit yatinoh wormr tohaknerahr. Ee tfit kaht wuyohninehato yuht

kmi Babilont kandhi witarahnt. Nd Babilont nayuk nefm nd hta nngrajohet Bro Nungothet Bro Nkifrar bi htihato bi kfomor nd kmithu yak batineft.

⁹ Nd rothu yindari yima yuhur yak nohmoa kingm, nd taunt kandhiruha kahthu kah hip rifhur mtagdfruhatr rom htiruhamn bro nurm nurhato yima yuhum nhai hifa marnyaruhattm. ¹⁰ Nd rot yakruha krhopam rom yakrmerahm rotprno brbo tohhato rpat krhopam yakneft, ndnetmn rom be inji nndo tohhato kfo yuhuwaf mirahm, ‘O, wayeye Babilone! Yonmari bro yufati bro bbuket kmieye! Tunhu fasoh fasoh neftprno be yudbat mif rpa auakfotn fak bati twanhirn!’

¹¹ Bbinysofthu kmiyakmiroh bisnismann hingrnayuk shrkaroh wiknayuk kmi Babilont mibatini thoft, bisnismann bro nur dungunangu yima yuhumpno rhurahm. To fitoh kmimn rroh hingrnayuk wonk wonk shrkar maruhampno yak tuknaruhamr? Nhai wom fitoh kmim. ¹² Nd maruhampno yak tuknayuk gorkfot, silvakfot, dborioh dborioh fnhuyet tahim, dborioh dborioh fnhuyet biskfot, yo wonk wonk rmontham, nd dborioh kku kkorpa fnhuyet rmontham, srika rmontham, yo dborioh dborioh gb mtha yarfonet mim, yo bro bro marufa kfet dborioh dborioh miye hingrnayet shrkar, yo elefan fohroh bim, braskfot, ainkfot, nd fnhu nmboretet gepha tahim, nd nde hingrnayet shrkar. ¹³ Yo maruhampno yak tuknayuk yeshrimpno htayuk mthet sinamonkfot, yo wajipam, yo tarioh mtha hipyuk paurakfot, yo dborioh dborioh gb mtha yarfonet griskfot, sandakfot, yo wainkfot, olif welpam, plauapami witkfot. Yo rom hatohyuk bulmakaun, sifsifm, yo hosmi hosm hatoneyuk karism, yo slefm kanjo maruhampno yak tuknayuk yimam. Nd yutahne tamoh tamohr, harhu dukarahm. To fitoh kmimn tfit wikna hiruhamm? Nhai wom kmim. ¹⁴ Bisnis hingrnefm hingrnayuk yimam Babilont kfo mirahmt, ‘Nd dborioh dborioh shrkar ni yakneft duka hasomoar, be bi fitha yiror? Nd bro bro marufa kfet dborioh dborioh shrkar yo ninhu dborioh dborioh fnhuyet wuskar be bi rim fnahniror. Nhai wom fitha hti ham-brakruhatnr.’

¹⁵ Yimam nd taunt nd yutahne shrkam maruhampno yak tuknahato maru kunyetm rhuyukm, nd taunt yakyuk krhopam hti yakrmehato be inji nndo tohhato hti yuhuwafhato nur dungunangurahm. ¹⁶ Kfo yuhuwaf mirahm, ‘O, wayeye, yonmari bro yufet Babilont! Bingot dborioh dborioh ganyom hmbresham hmbre wondhmout yo kku kkorpa kanjo fnhuyet rmontham hmbre wondhmout. Yo gorkfot yo dborioh dborioh fnhuyet tahim, yo dborioh dborioh fnhu nmboretet biskfot wondh hmbrehato rhumout. ¹⁷ Tu rpa aua miftn nd maruti wondht bati bugamot.’ Ndhtet kfo yuhuwaf mrokfot kforahmt.

Bro marombt hatone htfasyuk sifroh keptenm, yo sifm wiknani ziyuk pasindiam yo boskrum, yo marombt bisnis hingrnefm uhatone hatoneyuk yimam wuri tohrahm. ¹⁸ Nndo toh-hato nd taunt kandhiyuk kah hipecfr htiruhamn kfo ptha srh mirahm, ‘Nhai Babilon kanjohot bro taunm ruhakam!’ ¹⁹ Nd taunthu dukefrprno bb tangur-hato nurrahm. Naku kfo yuhuwaf mirahm, ‘O, wayeye, bro kmi Babilone! Yimam sifetm nd kmit kfomot rom tu maru kunyet yimam korhm. To be rpa auakfotn nd kmit rhuyuk tamoh tamoh hti hambrefit.

²⁰ Ni hefenn yo niko Bro Nkifrarhu tuhan yindariko, yo niko aposerko yo niko profetko, niko buga yindhorkfot ndar rotprno yorhwa kurheft. Rot

nikompno nahnamo nefm bi Bro Nkifrar htihamormn be bi fak gngtat twanhirt.’ ”

²¹ Nd mrokfom inji kfone hanyhato wom nngrajohet mounmotr wom wit hta tkbotkwa kanjohot bro tahis yak-mort marombt watumotr. Watunihato kfo memor, “Na nd tahis yituyefi kanjo taun Babilont yak tuyaforuhatmt nhai wom htiruhatmt. ²² Ndnettn, Babilone, ninhu gitaroh gur nyungefm, mayi nmbuharoh windohefm, trampetroh windohefm nhai wom wanyruhat-nomm nom wanymoa kanjo. Nhai ninhu wom wonk wonk hingrnfem hingrnayuk hingrna yimam wom htiruhatnomm. Ninhu witroh hta tkbotkyuk tahiroh nyungefm nhai wom wanyruhatnomm. ²³ Nhait tfit ninhu kunyroh lam nukefm wom htiruhatnom, yo nhait tfit nfri tuhan yindariroh nayak tatrut yiha kfo yindhoryuk kfo yindhor tngm wom wanyruhatnom. Ninhu bisnismanmn afo bro yufat yakitohmomm rroh yufarpam bronimom. Yo fasoh for bi singtpno hingnamonn kmi kmiroh yimam forakhato fasoh yihota yuhat fak nuhasmonm.”

²⁴ Nd kmi Babilontn profetroh kkupami Bro Nkifrar hiket yimam wasmo yimaroh kkupam rhumotm Bro Nkifrar htihat Babilont fak batimotr. Yo ndwom womt washnayukt to Babilonrpatn krhopam fak bugamotm.

19

Babilonthu bati nmbuhatpno hefenrhu tuhan yindari rifhur kfo yindhormo kfo yindhor mrokfom

¹ Nd bro bbuket mounmotrhu mrokfot kfo pthanimotr, ee tfit hefenko wanyakmoya bro ptha kimrefm. Memome hefenrn tuhan yindari rifhur ptha kimrwom. Nd met yindarim kfo ptha kimr yindhor memom, “Aleluya tunga Bro Nkifraye! Ninrpa nrfa hbbhakmonnom. Ninrpa bro yufat yakitohhato ninrpa bro bbukete. ² Bro Nkifrar tuhan yindarim yak gngtatwohat rroh nefm hti nhta-hato hifa kak gngtat twanhiwurm. Nd ijoh tonayet bro mett, be tutn katirnamot. Ndar bbinysofthu kmiyakmiroh yima boyimat rotn riyak nuhasakmottm be rotpno ritoniyak-hato be nd neft bronimotm. Yo Bro Nkifrar hiket met yindarim wasmottm ndnettn Bro Nkifrar tawo krhopam hemotr.”

³ Yo tfit kfo kimr yindhor memom, “O, aleluya tunga Bro Nkifraye! Nd bro taunt kandhi witewa kah hipefr yiha yiha be inji kur hip hasiwur.” ⁴ Yo nd 24 nungohtem yo husfilus foh nunga kanjo ruhet shrm sia kingtpno rhuyuk Bro Nkifrar pno mbangu yukna rmonmomm kfo memom, “Aleluya! To be inji.” ⁵ Yo tfit Bro Nkifrar rhumo sia kingtpno wom tngt kfo ptha memot, “Niko yufapa duha yimako yo yufet yimako, niko Bro Nkifrarpar duka yakrmihato rorhu yinhirpat rhuhato rorhu hingrneft hingrnahuka yimako, Bro Nkifrar wakfo yindhor wameko, ‘Bro Nkifraye, nom ninrpa bro yufat htewunom.’ ”

Sifsif Yonrhu tuhan yak yiharhu yemro burwat

⁶ Yo tfit wanymoya memome yimam rifinyhato kfo ptha mir nadidarwom. Tek bhur mir nadidarwa kanjon o tohr nyunguhato mir nadidarefetr yita kanjo inji wanymoya. Nd yimam kfo memom, “Aleluya tunga Nkifraye! Nmoh hta nngrajohet Bro Nkifrar, bi kingr tohor! ⁷ Be bi Sifsif Yonrhu tuhan yak yihayer, rorhu yakyuk mett be bi rhu garittr. Ndnettn ariha nmoh yima yuhum mirhuhato yindhor yima yuhumpno rorhu yufat kfo

yuta yindhorkfot.* ⁸ Bro Nkifrar tu dborioh ganyom hmbreshat nd mett hemotrt hmbremot. Nd hmbreshar tu ganyom tha yuhtr hemort. Nd dborioh ganyom hmbreshar ndr tu Bro Nkifrarhu met yindarim niwa dborioh dborioh nefroh kfo nhombra mrokfoyet.”

⁹ Tfit mounmotrn kfo memora, “Mrokfot inji wawandfatwant, ‘Nd Sifsif Yonrhu tuhan yak yiha htayuk yemro burwathu yanyhoyuk yimam Bro Nkifrar nakumom, ayindhortwam.’” Yo womt kfo memora, “Nda mrokfom tu Bro Nkifrarhu tu kfo mif mrokfoyet.” ¹⁰ Na inji wanyhato memoya rorhu wurampno amsuhkahann alotuyanr, tfit fak thfa memora, “Nann lotu duha. Bro Nkifrarpar lotukfot! Na to nini ninpno hingrnanuhiwa yimampno hingrnanuhiwa hingrnanho yimaya. Niko Jisasrhu gutnius mrokfom kfo pthahato hikwako, na to nikompno rpat hingrnanuhiwa hingrnanho yimaya. Nom to bi htihat wanyetenom, profetm Jisasrhu gutnius mrokfot pthayuk yafothar muhwatrn profet mrokfom kfo pthewumm.”

Ganyom hosrn hatonemo yimar

¹¹ Yo tfit htimoya hefenrhu yifhatikt tfanymotmt ganyom hosr htimoyanr. Nd hosr hatonayuk yimarhu yufat, “Tu yafothet mrokforpam yakitoh hik marnyet yimar,” yo “Tu yafothet nefrpm nahiket yimar.” Ror yimam nayuk nefrn ror kotkfotn yakitohhato frhikneft, yo yahrt ror yinyeft nhai riyohne ayohnekahr. Yima duka tungunefmpno yak hik marnyahato nefrn newurm. ¹² Rorhu nyingam memom nndo kaht funewut, hat kraunm nhai rpehm hatohkahr, tu boknabok mifm. Yima nyisofn wom yufat htamomr. Nd yufat nhai wom yimam tawisafkahmt, turpa mifr tawisafwort nd yufat. ¹³ Yima gobroh kkut tuh ppri wunayet kku hmbreshar hmbremor. Rorhu yufat “Bro Nkifrarhu mrokfot.” ¹⁴ Hefenrhu amim rom turoh ganyom hosrn mrhuhato tone hikmomr. Hmbresham tu dborioh ganyom tha yuhtm hmbremom. ¹⁵ Tohayuk yimar ror hanku namburet bainat tng yuhat mfnahmotr. Nd bainate kmi kmim tmbho witarahrm. Kingm yakitohwa ain nmbuhak yakitohhato met yindarim rorhu yinhitn tohrahm. Yo wain yukham hta tkbotkrahm nd bro tahi tenktn. Nd wain yukha hta tkyuk tahi tenkt ndt tu hta nngrajohet Bro Nkifrarhu krho namburpayem. ¹⁶ Ror hmbreyuk yuke hmbresharn yo wura bohtn inji wandfamomt, “Kingroh tu Kingr yo nungothetroh tu Bro Nungothetr.”

¹⁷ Yo mounmotr htimoyanr yura marrn mtohmor. Yura marr tohato buha mount yafuna htfasmo nungam mfro kfo nakuyaf memorm, “Niko yemro yayet nungako niko bi wania wanhafoh hanyswako. Bro Nkifrar bro yemro burwat tahiruhatrko yerahko. ¹⁸ Yimapan ndm yerahko. Kingroh yimapan, soldiaroh keptenroh yima-pam, soldiaroh yimapan, yo hospam yo hosm hatonayuk yimapan, yo nd yima bugaroh yimapan, slefroh o toh fura yimarohm yo yufetroh yimapan yo yufa duharoh yimapan, nd nd yimaroh yimapan yerahko.”

¹⁹ Yo htimoyanr nd kmi yarh yemror yo bbinysofthu kingmi rroh amim bi nia rifiny bugamom. Memom nd hosr hatoneyuk yimari rorhu amikfotpno nnarahnom. ²⁰ To nhai, nd hosr rhuyuk yimar sinyahato nd kmi yarh yemror fak tkaftamorr rpat rorhu giaman profetpno. To nd giaman

* **19:7:** Nd tuhan yakruha Sifsif Yonr, ndr Kraiser. Nd ror yakruha mett, ndt tu Kraiserhu sioskfoyet. Kraiser yawihnehato turhu sioskfot miyak thoft ndt tuhan yindarif nayak tatrutnihato yindarirhu kunyko yita kanjo inji Kraiser niahato turhu siokfotpno nayaknihato rorhu dborioh kmir hamuhrahm. Hamuhhato rorpno toh nkifranirahm.

profetn yarhr yemrorhu nyingampno mirakerkfof hingrnamort. Inji nahato yimam bi nd yarh yemrorhu makkfot yaketm yo rorhu ruheft tth nhombramo yifonr lotuyetm frnhehmorm. Nd kmi yarh yemrori giaman profetr yakmomf be nfri miff sarfa tahim wakur sinyewa tahiroh bro muhrn watumomfwe. ²¹ Nd hosr rhuyuk yimar sinyamorn nd rorhu tng yuhat mfnahyuk bainate tmbho witamorm rroh amim. Tmbho witamotrm nungam yihato nd yimaroh yimapam yeyehato miyuk yohm mihir bugamom.

20

Satanr 1,000 gunyjimm kalabus tohmor

¹ Yo wuhtiyakmojanr moun-motr yura hefenko wutoh tanyhato fawihnamor. Ror niamohat, bro kfe rawofmo muhrhu kiti yo bro sent fakitohakmor. ²⁻³ Yawihnehato nd yarh mugrr fak tkaftamorr. Nd yarh mugrr to nd tndh marr, rom kfiwa Satanr. Mounmotr yakmorr nd ror yaknamo sene kjbkafakhato watumorr nd kfe rawofmo bro muhrn. Watuyafhato muh yifhatikt frkihato lokimmort. Memor inji anakahann Satanr nhai tfit fnahnehato yima toh nheh htfasruhatrm. Bi nd 1,000 gunyjimm ftohnirme ee tfit tfanyak-hato fnahna tefrahr.

⁴ Yo htimoyanm sia kingm. Nd sia kingm htimoyanm Kristen yimarpam rhu bugamomm. Kotkfothu yakitoh-yukmn Bro Nkifrar nd gajim fak htamorm. To nd gajim rhumo yimam tom wom Kristen yimaroh yafotham htimoyanm. Nd Kristen yimam yima nfrim tohmohat, nhai nd yarh yemrori rorhu ruheft tth nhombrayuk yifonr loturmomr, yo nhai rorhu makkfot nyimbikmn o tir gramtipmn htar-momm. Nhai. Rom Bro Nkifrarhu mrokfomi Jisarr ptha nuhasyuk mrokfom hikhatom wom womm ptha nuhas htfasmomm. Nd yuhatn mfha tmbho hanymomm. To nd nd yimaroh yafothayem tfit myak dborhahato nd kingroh gajim mrhuhato Krairpno king hingrneft 1,000 gunyjimm rpat tohmom. ⁵ Ndm Kristen yimarpam inji htimoya. Tfit ndwom ndwomt be turoh nefmpno noh hanyukm, nd yihart nhai bi myak dborha bugar-motm htimoyanm. Rom afo nd 1,000 gunyjimroh bati yihar afo garimom. Nd barkof sinyahato sia kingm rhumom, ndm Kristenrpam sinya gungonmom. To romn tu barkof yimam sinyamom. ⁶ To nd barkof sinya hanyuk yimam yindhorkfot. Nd yimam bi tu Bro Nkifrar kfo hbhayetmn tfit wom wuruh noheft nianeft nhai rom finjinakfot. Rom to bi Bro Nkifrar Krairru prism tohrahm nd 1,000 gunyjimm. Yo nd yihar rom Krairru king hingrneft rpat king tohrahm.

Satanrhu wuruh yak bati buga yihar

⁷ Bi nd 1,000 gunyjimm bi bnkanim ee Satanr tfanyakrahm. ⁸ Fnahniruharn ndar bbinysofthu manoh manoh krayefm toh htfaswa kmi kmim toh nheh htfasrahm. Nd kmim kutewumm Gogmi Magogm. Nd Gogmi Magogm Satanr bi yak htatarahm bro yahrthu tohneftn. Nd Gogmi Magogroh amim nhai yimam thomnakfot, nndo ndar kivr suh furam. ⁹ Nd Gogmi Magogroh amim ndar yuht bbinysoft gonng rpr thuhato Bro Nkifrarhu met yindarim tohyuk kmit wifor hmbrirahmt. Nd kmit Bro Nkifrar tu marbit htamourt. Nd kmit toh hmbriruha amim mirahm ka hifa kfoyet, to nhai, kaht yura hefen yuhat yawihneruhatn kandhi bati witarahm nd amim. ¹⁰ Yo nd tndhr yimam toh nheh htfasmoar yakhato waturahm nd sarfa tahim wakur sinyewa tahiroh bro muhrn.

Nd kmi yarh yemrori giaman profetr watumo kahtn waturahmr. Nd rom husfirpat nd kahtn tohhato yifung mar, yifung mar nhai hifa rhu nmbuhat yakruhatm. Yiha yiha be inji tau kur hasorahm.

Wuroh bro kotkfot

¹¹ Yo tfit bro ganyom sia kingt htimoya. Nd sia kingt rhuyuk yimar mrhu hanyomor nd bbinysofti mount yudbat rim fnahnimof. Nhai wom rhurmof. ¹² Ee tom tfit htihak hany-moya nd bi noh hanyomo yufet yufet yimam yo yufa duha yufa duha yimam myak dborhahato nd sia kingthu nyingatikko mtohananyom. Mtohananyom ee nd met yindarim nahanyuk nefroh kfo nuhas mrokfom yorhwa gonborngm mounmotm fak-momm. Yo tfit toh yifahtayuk yimaroh yufam yorhwa wom bro gonborngt fakmomt. Yak htatahato nd gonborngm rhuyuk kfo nuhas mrokfomn sia kingt rhuyuk yimar htihak hanyhato fak hta bohtamorm yimam. ¹³ Bro marombtn miptko hanyhato rhuyuk yimam tfit tuh takeyafmottm kot tohmom. Noheft yakyukm yo Maringour tohyukm rofhum nhaf hemotfm kot tohmom. Nd sia kingt rhuyuk yimar nd gonborngt rhuyuk rpa rpa yima yimaroh nefm htihak hanyhato kotim hanyomorm. ¹⁴ Kto nd Nohefti Maringour yakmorf bro muhr mkur fnahwa kahrn watu-morf. Nd yiro muhr mkur fnahwa kaht ndt wuroh nohefet. ¹⁵ Yo nd yimam toh nkifraniyuk yimaroh yufam rhu duha yimom, yakmomm watu-momm nd bro muhr mkur fnahwa bro kahtn.

Bro Nkifrar hingrnayuk nfri hingrneft

21

(Sapta 21–22)

Nfri mounti nfri bbinysoftu mrokfot

¹ Nd wuroh bro kotkfot toh-yuk yimam htinimoyanm ee tfit nfri mounti nfri bbinysoft yarim fnahmof. Nd wom barkof rhumo mounti bbinysoft rof bi rim fnahnimof. Yo marombt rot rpat rim fnahnimom. ² Yo Bro Nkifrarhu nfri taun Jerusalemr wuhtiyakmoyanr Bro Nkifrapno yura kmi hefenr wutoh tanyhato fawihna-mor. Nd kmir rorhu wondhtpno yawihnamohat memom nndo metn wondh marnya bomarnyetn bi niewut ram kunysn. ³ Yo sia kingtpno wom bro tngt wanyakmoyant kfo nakuyaf memot, “Wawanyko! Bro Nkifrar be bi yawihnehato yimampno tohwor. Rompno tohruharn rorhu yufat hta-rahm. Rorhu yufat htaruhatrm yimam rorn yima yuhum htahato rorn lotu hakurahm. ⁴ Roh nur nyingam rorn yak thurahr. Yimam be nhai wom nohruhatm o nhai wom nurhato yima noh bb kunys rhuruhatm o nhai wom penkfot yakruhatm. Nd bingot rhumo ruheft nhai wom tfit rhuruhatt.”

⁵ Yo nd sia kingtpno rhuyuk yimar tfit kfo memor, “Wawanyko. Nd barkof rhumo tamoh tamohr be bi yak thuhato bi tfit nfri shrkarpar bi htewa.” Yo tfit kfo memora, “Ndar mrokfot tu kfo mif kfoyet. Yimam wany yakiorahm. Ndnnett ndar mrokfot inji wawan-dfatwa.” ⁶ Yo kfo memora, “Nd tamoh tamohr be bi hingrna kafkomoyanr. Nanrpaya barkofa yo nanrpaya wuroha, na kfo moya shrkar yarim fnahmor yo tfit na kforuha shrkar tfit rim fnah-nirahr. Yimar bupa knewur, yima toh nkifraniyuk bu yinharhu bupam he furarhotanr ye furarahm. Nd bu yinharhu bupam yimam yanyeft toh nkifrewum. ⁷ Fitoh yimar nda bbiny-softu ufasoh

nefroh bbukeft kahot nohwort, nd yimar nd na kfiwa shrkam hirhotanr yakrahm. Yaknihato nd yimar to be nann rorhu Bro Nkifraya rhuruha yo ror nanhu yonr rhurahr.

⁸ To ndwom ndwomtr ginyetm kanjo yesisetm o Bro Nkifrarhu mrokfot wany yakio duham o fasoh hnomha nefm yakitohetm o yima was furet m o yaum kanjo ijoh tone htfasetm o yima tipetm o yima grwasetm o forkat haruhetm o yima wasyuk wajim haruhetm o yima htakyuk wajim haruhetm o tahi rmonm o nkifra tahim lotuyetm o yima kfo fura nhehetm, ndhtet ndhtet metm o yindarim, rroh tohyuk kmit bi kfohtetet. Nd bro muhr sarfa tahim kur nanyjar hasiwa kahrn yohnirahm. Be nhai tfit niakfot. Ndt nd wuruh nohefet.”

Jonr nfri Jerusalemr htimo yuhat

⁹ Yo tfit wom mounmotr niamor. Nd nanpno niamo mounmotr to nd Bro Nkifrarhu 7-pela namburet dism yakitohmoa wom mounmotrn niamor. Nd mounmotr niamorn mikfo memora, “Wania. Waniakahtn yak nuhasruhann nd Sifsif Yonrpno kfo yibon hanita mett.” ¹⁰ Bro Nkifrarhu Yafothat mthu nawohhato tuhafunamota. Tuhafunanihato hanymota tu yura bro kmi birn. Kmi bir hanyhato fak nuhasmota nd Bro Nkifrarhu nfri kmi Jerusalemr. Nd kmir tu Bro Nkifrarpo yura kmi hefenr wuhtanyhato fawih-namor. ¹¹ Nd kmir tu Bro Nkifrarhu bro nukeft yakhato kmir wayifatoh-mohat memom ka nndo tahi jaspntr fnhuhato funefm kambohritnewum. ¹² Nd kmi gnar gna habriyetrn gnam nhai brbo ritoh hanyrmom. Tu yurak-ngot wafakmom. Nd kmir 12-pela yifhatikm htamomr. Nd 12-pela yifhatikm 12-pela mounmotm toh nhombramomm. Nd 12-pela yifhatikm yufet bugam rhumom. Isrerroh 12-pela nkifraroh yufam htamomm. ¹³ Nd kmirhu husfihus konam husfirpa husfirpa yifhatikm hta hanymomm. Marr yuwa muhwa isko husfirpa yifhatikm htamom. Yo tfit notko wom husfirpat htamom. Yo sautko wom husfirpat htamom. Yo tfit marr yohnita wesko wom husfirpat htamom. ¹⁴ Nd taunt gna habrimo gnat, 12-pela bro yuke tahim hatohmomt gnat. Nd gnat hatohmo 12-pela tahim, Sifsif Yonrhu 12-pela aposerroh yufam htamomm.

¹⁵ Nd mounmotr nanpno kfo pthamor, gore hingrnayet yak hafot mis fakitohmor. Nd kmiti kmi gnat yo kmi yifhatikroh yak hafotyuk yak hafot mis fakitohmor. ¹⁶ Nd kmirhu 4-pela konakfom yak hafotmohat rpa hafot tohmom. Tu mounmotrhu yak hafot miye yak hafotmohat, biyef, guref, yo manoh manoh kimbohnefm, yo yurak mingiahuko wayakmo hafott to be nd rpa 2,200 kilomita hafotrpat fakmorm.* ¹⁷ Kmi gnat bbinysoftpno wagnak gna hamuhmohat, 144 mita wafakmot gnat. Nd kmi gnat mounmotr yak hafotmohat yima mifm yak hafotwa yak hafote fak hafotmort.

¹⁸ Gnat hingrnamohat, Bro Nkifrar jasper tahirpaye hingrnamort. Yiro kmi rawofthu tamoh tamohm be gorrpaye hingrnamorm. Nd kmir memom nndo binasohtn kak dbratwor. ¹⁹ Gnat wahtakmo tahim, Bro Nkifrar wonk wonk fnhu nmboretet tahim yakhato nde hta nmboret htfas marnyamort gnat. Barkof wahtakmo tahis, jasper tahis htamor, yo tfit namba 2 tahis

* **21:16:** Grik yarmumat nd nom kfiwa 2,200 kilomita kfo futamomt “12,000 stadia.” Ndt nom nhai tawisaf marnyakahnom, Jonr kfomohat ka tu 2,200 kilomita kfo kfo mifm o nd Grikkfot htamo 12,000 stadiakfot wom nndoh shrn kfomom.

blupela sapaia tahis htamor yo tfit namba 3 tahis aget tahis htamor, yo tfit namba 4 tahis grinpela emerar tahis htamor. ²⁰ Yo tfit namba 5 tahis sadonikis tahis htamor, nd sadonikis tahis wonk wonk fnhu nmboretwot, kkupa kanjo fnhu yo ganyom fnhu, inji fnhutt. Yo tfit namba 6 tahis, kkupa kanjo fnhuyet konirian tahis htamor. Yo namba 7 tahis, yelopela fnhuyet krisorait tahis htamor. Namba 8 tahis, ndt womhtet grinpela berir tahis htamor. Namba 9 tahis, ndt nhaf womhtet yelo fnhuyet topas tahis htamor. Namba 10 tahis, krisopres tahis htamor. Namba 11 tahis, haiasin tahis htamor. Namba 12 tahisne womhtet kkupa kanjo fnhuyet ametis tahis htamor. ²¹ Yo 12-pela yifhatikm rom dborioh biskfot kutewumm perm. Nde hingrnamorm yifhatikm. Rpa rpa yifhatikm rpa rpa bro perkfot yakhato hingrnamorm. Yihotam rom gorrpaye hingrnamorm. Memom nndo binasohtn kak dbratwot.

²² Nhai wom temperr nd taunt htirmoya. Nhai. To nd hta nngrajohet Bro Nungothet Nkifrari yo Sifsif Yonr to fitha tohetfn nd kmir tfit temperetr rhurmor? Nhai. Tuha tohetfn tuha lotumoumr. ²³ Yo nd taunt nhai marr tarmor o yamt tarmot. Nhai. Tu Bro Nkifrarhu nukefrpat fakmott. Yo Sifsif Yonrn taunthu lamr rhumor. ²⁴ Kmi-yakmiroh met yindarim be nd taunthu nukefrpatn tohhato yaurahm o tamoh tamoh nefm narahmm. Yo bbinysofthu kingm rroh dborioh dborioh shrkar nhaf be nd taunrpat hnerahmm. ²⁵ Nd taunt nhai yifungt tohruhatt, be nd Bro Nkifrar hayuk nukefrpatn kmit rhu hasoraht. Ndnnett nhai taunthu yifhatikm frkihruhatmm. Yifhatikm be inji tfanyetm rhu hasorahm. ²⁶ Yima yimaroh wondht, marut, nd taunrpat hafknirahmt. ²⁷ Tmift nd fasoh fasoh shrkar, yo nd fasoh fasoh nefm nayet yimam yo nd kfo fura bofura hanyet yimam, nhai nd taunt yiruhatm. Be tu nhai mif. Yimam bi rroh yufam bi nd Sisif Yonrhu toh nkifraniyuk gonborngtn htetm, romrpam nd taunt fknirahm.

22

Toh yifahtayuk miyukhami bupam yima yanyeft yimam toh yifahtakfot

¹ Mounmotr nd nfri Jerusalemr yak nuhasnimora, ee tfit nd kmitpno tonita tekt fak nuhasmora. Nd tekthu bupam yimam yak yanyeft toh yifahtewum. Nd tekt memom nndo binasohtn kak dbratwot. Nd tek bukt myakmo tkitt, Bro Nkifrari Sifsif Yonr, rofhu sia kingtpno myakmotn, ² tu buha bro yihota danyuha yuhatn tone nanyormot. Nd tekthu mano mano tek thmbeffn mim tohmom. Womm mano mkuko womm manoh mkuko. Nd miroh yukham yima yanyeft yimam toh yifahtakfot. Nd mim, rpa gunyjimr 12-pela taim hirwom. Rpa rpa yamm rpa yiha hirwom. Nd miroh twam kmi kmiroh dbohnet yimam o thatip yayet yimaroh susfayuk miswayem.

³ Bro Nkifrar bi fitoh shrkam o fitoh yimam bi kfir yak thuneft, to be yak thurahrm. Nhai nd nfri kmir rhuruhatm. Bro Nkifrari Sifsif Yonr, rofhu sia kingrn nd kmir rhuruhatr Bro Nkifrar hikwa yimam nd sia kingrn yi loturahm. ⁴ Lotuhato rorhu nyingatikt htiruhamtn rorhu yufat rroh nyimbikmn rhuraht. ⁵ Nhai wom yifungt rhuruhatt. Yo nhai wom lamm hturuhatm o marr wom taruhatr. Bro Nkifrarn met yindarim nukeft hiruhatrn king hingrneftn hingrna nkifranirahm.

⁶ Nd mounmotr kfo memora, “Nda mrokfot tu kfo mifkfoyet. Yimam nda mrokfot wany yakiokfot. Bro Nun-gothetr; profetroh yima yuhum thu kasinyewa Bro Nkifrar, rorn moun-motr kfo tkrurafmorr. Mounmotr niahato Bro Nkifrarhu hingrna yimam kfo nuhas bonuhasmorm bi nd brbo ruhnewa nefm.”

⁷ Jisasr kfo memor, “Wawanyko! Na bi brbohwa nianeft. Nda gonborngt yorhwa profet mrokfom wany yakiowa yimam ayindhortwam.”

⁸ Na Jona, nann nd mrokfom wany-moya yo nd rhumo nefm htimoyann. Nd mrokfo kfo tngm yo nayuk nefm na htihato nd yak nuhasyuk mounmotrhu wurampno msuhhato memoya alotuyan; ⁹ tfit nd mounmotr kfo memora, “Ni nann mlotu duha! Na to nini ni ninpno hingrniwa profetmpno hingrnanuhiwa hingrnanho yimaya. Yo na, na nda gonborngthu mrokfom hikwa yimarah hingrnanhoyuk hingr-nanho yimaya. Ndnnett nann lotu duha. Bro Nkifrarpar lotukfot!” ¹⁰ Yo tfit wom kfot kfo memora, “Yihar bi brbohnewur, ndnett mirahn nda mrokfot be inji kon kafrohatt arhut. ¹¹ Fitoh met yindarim fasoh fasoh nefm nahasiwum, rom to be nd fasoh fasoh nefm nahasokfot. Fitoh met yindarim nd fasoh fasoh hnomha hnomha nefm kakitowom, rom to be nd fasoh fasoh hnomha nefm nahaso-kfot. Fitoh met yindarim dborioh dborioh nefm nahasiwum, rom to be nd dborioh nefm nahasokfot. Fitoh met yindarim Bro Nkifrar kanjo toh-wom, rom to be Bro Nkifrar kanjo toh hasokfot. Yihar bi brbohnewatr nhai wom finji wom finji nakfot. Fitoh tet toheft yimam tohwom, to be nd toheft tohkfot.”

¹² Jisasr kfo memor, “Wawanyko! Bi brbohwa nianeft. Yimam nahnyuk nefm htiyak hanyhato ttha nhombra hanyruhanm. ¹³ Nanrpaya barkofa yo nanrpaya wuroha. Na kfomoya shrkar yarim fnahmor yo tfit na kforuha shrkar tfit rim fnahnirahr.

¹⁴ Yimam bi wuskam kifs rmon htayetm, rom be yindhorkfot. Rom nd toh nkifraniyuk miroh yukham yak yanyeft rom nhai wom mrokfo duhatem. Yo rom nhai wom mrokfo duhatem taun yifhatikthu rim fnahnineft. ¹⁵ To nd yima tipetm o yima grwasetm o forkat haruhetm o yima wasyuk wajim haruhetm o yima htakyuk wajim haruhetm o yaum kanjo ijoh tone htfasetm o yima was furet m o tahi rmonm o nkifra tahim lotuyetm o yima kfo fura nhehetm, ndhtet ndhtet metm o yindarim nhai taun yifhatik rim fnahniruhatm. Be inji briahako tohrahm.

¹⁶ Na Jisasann mounmotr kfo tkrurafmotanr niko siosroh met yindariko mrokfom kfo ptha nuhasmorko. Na King Defit frikefthu trhanayuk tu tannefena. Na dbha ksfut mfro tarrewa gunya.”

¹⁷ Bro Nkifrarhu Yafothati Sifsif Yonrhu yakyuk mett kfo naku kangf, “Jisase, wania.” To tfit nd gonborngthu mrokfot wanyuk yimako tawo kfo mekfot, “Jisase, wania.” Frohr bupa knewur, nd yimar niakfot. Yimar kangr bupa ayeya, nd yimar niahato nd toh nkifraniyet bupam yehato toh nkifra-rahr. Bro Nkifrar be he furarahr.

Jonr bro kfo duka mrokfom kfomo yuhat

¹⁸ Na Jona bro kfo duka mrokfot kahukanm nda gonborngt yorhwa profet mrokfom wanuka met yindarim. Fitoh yimar nda profetm pthayuk mrokfom htihato tfit turoh dukefmm wom nfri mrokfom nmbuham rihtekrm, nd yimar, Bro Nkifrar nda gonborngt kfoyuk krhopam nd yima yak thombat, wom nfri krhopam htahutarahr. ¹⁹ O wom yimar gonborngt rhuyuk wom

profet mrokfom fak thurm, nhai Bro Nkifrarhu nfri kmir fkniruhatr. Yo nd toh nkifrayuk mishu yukham yimam yehato toh nkifrewam, nd mishu yuk-ham nhai ror yehato toh nkifraruhatr.

²⁰ Nd rhuruha nefm kfo ptha srhwa yimar kfo kangr, “Na yudbat nia mifruha.”

To be inji. Bro Nungothen Jisase, wania. ²¹ Bro Jisasrhu yuhuwafest atuh kasi bugatwatm met yindari bugam.

Read the New Testament daily

January

date	Scripture
1	Mt 1.1-2.12
2	Mt 2.13-3.6
3	Mt 3.7-4.11
4	Mt 4.12-25
5	Mt 5.1-26
6	Mt 5.27-48
7	Mt 6.1-24
8	Mt 6.25-7.14
9	Mt 7.15-29
10	Mt 8.1-17
11	Mt 8.18-34
12	Mt 9.1-17
13	Mt 9.18-38
14	Mt 10.1-23
15	Mt 10.24-11.6
16	Mt 11.7-30
17	Mt 12.1-21
18	Mt 12.22-45
19	Mt 12.46-13.23
20	Mt 13.24-46
21	Mt 13.47-14.12
22	Mt 14.13-36
23	Mt 15.1-28
24	Mt 15.29-16.12
25	Mt 16.13-17.9
26	Mt 17.10-27
27	Mt 18.1-22
28	Mt 18.23-19.12
29	Mt 19.13-30
30	Mt 20.1-28
31	Mt 20.29-21.22

February

date	Scripture
1	Mt 21.23-46
2	Mt 22.1-33
3	Mt 22.34-23.12
4	Mt 23.13-39
5	Mt 24.1-28
6	Mt 24.29-51
7	Mt 25.1-30
8	Mt 25.31-26.13
9	Mt 26.14-46
10	Mt 26.47-68
11	Mt 26.69-27.14
12	Mt 27.15-31
13	Mt 27.32-66
14	Mt 28.1-20
15	Mk 1.1-28
16	Mk 1.29-2.12
17	Mk 2.13-3.6
18	Mk 3.7-30
19	Mk 3.31-4.25
20	Mk 4.26-5.20
21	Mk 5.21-43
22	Mk 6.1-29
23	Mk 6.30-56
24	Mk 7.1-23
25	Mk 7.24-8.10
26	Mk 8.11-9.1
27	Mk 9.2-29
28	Mk 9.30-10.12

date	Scripture
1	Mk 10.13-31
2	Mk 10.32-52
3	Mk 11.1-26
4	Mk 11.27-12.17
5	Mk 12.18-37
6	Mk 12.38-13.13
7	Mk 13.14-37
8	Mk 14.1-21
9	Mk 14.22-52
10	Mk 14.53-72
11	Mk 15.1-47
12	Mk 16.1-20
13	Lu 1.1-25
14	Lu 1.26-56
15	Lu 1.57-80
16	Lu 2.1-35
17	Lu 2.36-52
18	Lu 3.1-22
19	Lu 3.23-38
20	Lu 4.1-30
21	Lu 4.31-5.11
22	Lu 5.12-28
23	Lu 5.29-6.11
24	Lu 6.12-38
25	Lu 6.39-7.10
26	Lu 7.11-35
27	Lu 7.36-8.3
28	Lu 8.4-21
29	Lu 8.22-39
30	Lu 8.40-9.6
31	Lu 9.7-27

date	Scripture
1	Lu 9.28-50
2	Lu 9.51-10.12
3	Lu 10.13-37
4	Lu 10.38-11.13
5	Lu 11.14-36
6	Lu 11.37-12.7
7	Lu 12.8-34
8	Lu 12.35-59
9	Lu 13.1-21
10	Lu 13.22-14.6
11	Lu 14.7-35
12	Lu 15.1-32
13	Lu 16.1-18
14	Lu 16.19-17.10
15	Lu 17.11-37
16	Lu 18.1-17
17	Lu 18.18-43
18	Lu 19.1-27
19	Lu 19.28-48
20	Lu 20.1-26
21	Lu 20.27-47
22	Lu 21.1-28
23	Lu 21.29-22.13
24	Lu 22.14-34
25	Lu 22.35-53
26	Lu 22.54-23.12
27	Lu 23.13-43
28	Lu 23.44-24.12
29	Lu 24.13-53
30	Jo 1.1-28

date	Scripture
1	Jo 1.29-51
2	Jo 2.1-25
3	Jo 3.1-21
4	Jo 3.22-4.3
5	Jo 4.4-42
6	Jo 4.43-54
7	Jo 5.1-23
8	Jo 5.24-47
9	Jo 6.1-21
10	Jo 6.22-40
11	Jo 6.41-71
12	Jo 7.1-29
13	Jo 7.30-52
14	Jo 7.53-8.20
15	Jo 8.21-30
16	Jo 8.31-59
17	Jo 9.1-41
18	Jo 10.1-21
19	Jo 10.22-42
20	Jo 11.1-53
21	Jo 11.54-12.19
22	Jo 12.20-50
23	Jo 13.1-30
24	Jo 13.31-14.14
25	Jo 14.15-31
26	Jo 15.1-27
27	Jo 16.1-33
28	Jo 17.1-26
29	Jo 18.1-24
30	Jo 18.25-19.22
31	Jo 19.23-42

date	Scripture
1	Jo 20.1-31
2	Jo 21.1-25
3	Ap 1.1-26
4	Ap 2.1-47
5	Ap 3.1-26
6	Ap 4.1-37
7	Ap 5.1-42
8	Ap 6.1-15
9	Ap 7.1-29
10	Ap 7.30-50
11	Ap 7.51-8.13
12	Ap 8.14-40
13	Ap 9.1-25
14	Ap 9.26-43
15	Ap 10.1-33
16	Ap 10.34-48
17	Ap 11.1-30
18	Ap 12.1-23
19	Ap 12.24-13.12
20	Ap 13.13-41
21	Ap 13.42-14.7
22	Ap 14.8-28
23	Ap 15.1-35
24	Ap 15.36-16.15
25	Ap 16.16-40
26	Ap 17.1-34
27	Ap 18.1-21
28	Ap 18.22-19.12
29	Ap 19.13-41
30	Ap 20.1-38

date	Scripture
1	Ap 21.1-16
2	Ap 21.17-36
3	Ap 21.37-22.16
4	Ap 22.17-23.10
5	Ap 23.11-35
6	Ap 24.1-27
7	Ap 25.1-27
8	Ap 26.1-32
9	Ap 27.1-20
10	Ap 27.21-44
11	Ap 28.1-31
12	Ro 1.1-17
13	Ro 1.18-32
14	Ro 2.1-24
15	Ro 2.25-3.8
16	Ro 3.9-31
17	Ro 4.1-12
18	Ro 4.13-5.5
19	Ro 5.6-21
20	Ro 6.1-23
21	Ro 7.1-14
22	Ro 7.15-8.6
23	Ro 8.7-21
24	Ro 8.22-39
25	Ro 9.1-21
26	Ro 9.22-10.13
27	Ro 10.14-11.12
28	Ro 11.13-36
29	Ro 12.1-21
30	Ro 13.1-14
31	Ro 14.1-23

date	Scripture
1	Ro 15.1-21
2	Ro 15.22-16.7
3	Ro 16.8-27
4	1Ko 1.1-17
5	1Ko 1.18-2.5
6	1Ko 2.6-3.4
7	1Ko 3.5-23
8	1Ko 4.1-21
9	1Ko 5.1-13
10	1Ko 6.1-20
11	1Ko 7.1-24
12	1Ko 7.25-40
13	1Ko 8.1-13
14	1Ko 9.1-18
15	1Ko 9.19-10.13
16	1Ko 10.14-11.1
17	1Ko 11.2-16
18	1Ko 11.17-34
19	1Ko 12.1-26
20	1Ko 12.27-13.13
21	1Ko 14.1-17
22	1Ko 14.18-40
23	1Ko 15.1-28
24	1Ko 15.29-58
25	1Ko 16.1-24
26	2Ko 1.1-11
27	2Ko 1.12-2.11
28	2Ko 2.12-17
29	2Ko 3.1-18
30	2Ko 4.1-12
31	2Ko 4.13-5.10

date	Scripture
1	2Ko 5.11-21
2	2Ko 6.1-13
3	2Ko 6.14-7.7
4	2Ko 7.8-16
5	2Ko 8.1-15
6	2Ko 8.16-24
7	2Ko 9.1-15
8	2Ko 10.1-18
9	2Ko 11.1-15
10	2Ko 11.16-33
11	2Ko 12.1-10
12	2Ko 12.11-21
13	2Ko 13.1-14
14	Ga 1.1-24
15	Ga 2.1-16
16	Ga 2.17-3.9
17	Ga 3.10-22
18	Ga 3.23-4.20
19	Ga 4.21-5.12
20	Ga 5.13-26
21	Ga 6.1-18
22	Ef 1.1-23
23	Ef 2.1-22
24	Ef 3.1-21
25	Ef 4.1-16
26	Ef 4.17-5.2
27	Ef 5.3-33
28	Ef 6.1-24
29	Fl 1.1-26
30	Fl 1.27-2.18

date	Scripture
1	Fl 2.19-3.6
2	Fl 3.7-4.1
3	Fl 4.2-23
4	Kl 1.1-20
5	Kl 1.21-2.7
6	Kl 2.8-23
7	Kl 3.1-17
8	Kl 3.18-4.18
9	1Te 1.1-2.9
10	1Te 2.10-3.13
11	1Te 4.1-5.3
12	1Te 5.4-28
13	2Te 1.1-12
14	2Te 2.1-17
15	2Te 3.1-18
16	1Ti 1.1-20
17	1Ti 2.1-15
18	1Ti 3.1-16
19	1Ti 4.1-16
20	1Ti 5.1-25
21	1Ti 6.1-21
22	2Ti 1.1-18
23	2Ti 2.1-21
24	2Ti 2.22-3.17
25	2Ti 4.1-22
26	Ta 1.1-16
27	Ta 2.1-14
28	Ta 2.15-3.15
29	Fm 1.1-25
30	Hi 1.1-14
31	Hi 2.1-18

date	Scripture
1	Hi 3.1-19
2	Hi 4.1-13
3	Hi 4.14–5.14
4	Hi 6.1-20
5	Hi 7.1-19
6	Hi 7.20-28
7	Hi 8.1-13
8	Hi 9.1-10
9	Hi 9.11-28
10	Hi 10.1-18
11	Hi 10.19-39
12	Hi 11.1-16
13	Hi 11.17-31
14	Hi 11.32–12.13
15	Hi 12.14-29
16	Hi 13.1-25
17	Je 1.1-18
18	Je 1.19–2.17
19	Je 2.18–3.18
20	Je 4.1-17
21	Je 5.1-20
22	1Pi 1.1-12
23	1Pi 1.13–2.10
24	1Pi 2.11–3.7
25	1Pi 3.8–4.6
26	1Pi 4.7–5.14
27	2Pi 1.1-21
28	2Pi 2.1-22
29	2Pi 3.1-18
30	1Jo 1.1-10

date	Scripture
1	1Jo 2.1-17
2	1Jo 2.18-3.2
3	1Jo 3.3-24
4	1Jo 4.1-21
5	1Jo 5.1-21
6	2Jo 1.1-13
7	3Jo 1.1-14
8	Ju 1.1-25
9	Re 1.1-20
10	Re 2.1-17
11	Re 2.18-3.6
12	Re 3.7-22
13	Re 4.1-11
14	Re 5.1-14
15	Re 6.1-17
16	Re 7.1-17
17	Re 8.1-13
18	Re 9.1-21
19	Re 10.1-11
20	Re 11.1-19
21	Re 12.1-18
22	Re 13.1-18
23	Re 14.1-20
24	Re 15.1-8
25	Re 16.1-21
26	Re 17.1-18
27	Re 18.1-24
28	Re 19.1-21
29	Re 20.1-15
30	Re 21.1-27
31	Re 22.1-21